

Tii Iitihi: Élele Iitihi na mwo Coho

Cemuhi New Testament

© 2018 Wycliffe Bible
Translators NZ pour
l'association Bii Popai
Wâro, Poindimé

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

Mataio	4
Maréko	47
Luka	74
Ioane	120
Apostolo	151
Roma	191
1 Korénit.....	211
2 Korénit.....	230
Galat	244
Éféso	253
Filipi	261
Kolosé.....	267
1 Tésalonik	273
2 Tésalonik	278
1 Timoté	281
2 Timoté	288
Tit	293
Filémon	297
Ébéru	299
Cang	318
1 Pétéru.....	324
2 Pétéru.....	331
1 Ioane	336
2 Ioane	342
3 Ioane	344
Jude.....	346
Pii Beetihi	349

Mataio

na e tii wo

Atabuhi ko a tii

Woo na e tii a tii ce?

Wo Mataio, pa apostolo. Ânebuhe a bwo todeeng de Iésu, ke pa atai mwani cuhi puni apulie te lépwo Roma. (Omehi 9.9.) Ne ha a tii ten, ke e tii ana e alihi he li e âcéi Iésu, ke e pé mwo ana e tii wo Maréko me ni béé jepule ko Iésu na tii.

E tii éniile?

Ha awieme a jo 60 me 65 (e mwonuhi a 30 jo alecehe a bwo mele te Iésu).

E tii me dee?

Te lépwo acéihi ne ko Iésu Kériso na te lépwo Juif mwo. Wieli lé mulie ité koja a amu Judé. Ke wieli lé pwo grek, time uce ébéru. Be e pé wo Mataio ni béé niide a tii mu ha a Élele Iitihî Ânebun he patilé.

É ko ade na e tii?

E tii beme e habwii pie, wo Iésu Kériso, ke pa Mesia, pa daame bé mu ko Padué na lé ucéieng wo lépwo Juif. Hiwon ni niide a tii na e pii wo Mataio, beme e habwii pie, te wo Iésu kuti na e pacuwohi ni bwopiinen ânebun de lépwo péroféta ne ha a Élele Iitihî Ânebun. E tii ni nii lépwo watihe Iésu, beme e habwii pie, pa piebehi pa daame Davita, me Abérama, pa watihe ati lépwo Juif.

E pamwoiu nina lé céihi ne ko Iésu, beme lé cumang hemepie lé téétilé ne ce béén, heme lé pipatemehi a Pwooti Wâé ten ne te ati ni apulie (28.19–20).

E pamwoiukenyé me pii tenye pie, o cuwo dieli mwo a Mwametau te Iésu, heme e bo mwojuia mwobé (24.30; 25.31).

Ade ace âne a tii ce?

Wo Iésu, ke pa daame, kehe icehi ana time uce pa daame pwohewii ni daame éni pwo bwohemwo. A Mwametau ten, ke é he miiden, ke é he ni pwonime apulie. Genye taa hen ha a céihi tenye ne kon.

Ke e hegi mu ko Padué ati ni pwojunuu jeda he miiden ke éni pwo bwohemwo. (Omehi 28.18.) Me e pacémuni ni apulie ko a pwooti te Padué, ke te nihe pipwojunuun a pwooti ten koja a bwomu te lépwo Juif. E piohiwon ko pii ni naado na pwohewii ani: «Geé te temehi pie, caa pii pie...kehe woéo, ke é pii pie...». (Omehi 5.21–44.)

Wâé te Mataio me e tii nina e picaa wo Iésu. Hiwon ni pwooti te Iésu ne ha a tii ten koja ni béé tii: a pwooti ko a bwo mulie tenye ha a mulie na mwo coho, wogenye ni nahi a Mwametau (omehi ni pwahamii tii 5–7; 18); ke a ocine ko a Mwametau (omehi ni pwahamii tii 13, 20). E caa tii mwo ni pwooti te Iésu na hiwon me paténe lépwo apihuôhi mwaiitihî te lépwo Juif, na time lé uce téele hegieng (pwahamii tii 23). Ke e caa tii mwo ni pwooti te Iésu, na e caa mi pii ânebun ni naado na o bo tuie, heme e mwojuia mwobé, beme e bwobe pacuwohi a Mwametau ten (omehi ni pwahamii tii 24–25).

A bwomune a tii te Mataio

Piâbeelee wo Iésu, ke pipwopweeng

E tabuhi ni penem den

A bwo pipune ne pwo juwole

Ni penem de Iésu ne Galilé

Habwii a junuu pa Mesia
 E pacihe lépwo acémun den ke e nelé ngen
 Lé tabuhi cubwonieng wo lépwo apihuô
 E pwo-ocine te ni apulie
 E panebwénihi ni penem den ne Galilé
 Pipatemehi pie pa Mesia na e bo mu he ni picani
 A pwooti ten ko pimiibule me pineuhi ni ta
 E taa Iérusaléma
 A pwooti ten ko ana e o tuie
 A bwo mele ke mulie cemwo ten

Ni watihe Iésu Kériso

Luka 3.23–38

1 †Wo Iésu *Kériso, ke e wie mu ko *Davita, pa
 piebehi *Abérama. Ke woélé-ni ni watihe Iésu:

2 Abérama ††

Isaaka

Iakobo

*Juda (me lépwo âjiénen) ‡

3 ††Pérès (me Zéra; nyaa telu, ke wo Tamar)

Esrón

Ram

4 Aminadab

Nachon

Salma

5 ††Booz (nyaa ten, ke wo Rahab)

Obed (nyaa ten, ke wo Rut)

Jessé

6 †††Davita.

Wo Davita, ke pa daame [ne *Isaraéla. Ke é alecehen,
 ke ni béé watihe Iésu, ke wo]:

*Solomona (nyaa ten, ke é mwode Uri ânebun)

7 Roboam

Abia

Asa

8 Josafat

Joram

Ozias

9 Iotam

Akaz

Ézékia

10 Manassé

Amon

Josias

11 †††Iékonia (me ni âjiénen).

† 1.1 Genèse 22.18; 1 Chroniques 17.11 †† Abérama... Grek: Wo Abérama, ke pa caa te Isaaka, ke wo Isaaka, ke pa caa te Iakobo, etc.

‡ Juda (me lépwo âjiénen)—Lépwo caa te ni 12 pwomwoiu Isaraéla.

†† 1.3 Genèse 38.29–30; Ruth 4.18–22 †† 1.5 Ruth 4.13–17

††† 1.6 2 Samuel 12.24 ††† 1.11 2 Rois 24.14–15; 2 Chroniques 36.10; Jérémie 27.20

Ke é ha a benaamwon naa, ke lé pawie lépwo Isaraéla
 mu ha amu telé, ke lé péélé nge *Babulona me lépwo
 *apenem tice ja kon.

12 §Ke é ne alecehen, [ke ni béé watihe Iésu, ke wo]:

Salatiel

Zorobabel

13 Abihoud

Éliakim

Azor

14 Sadok

Akim

Élioud

15 Élazar

Matan

Iakobo

16 Josef.

É mwode Josef, ke wo Maria, é nyaa te Iésu na pii kon
 pie Kériso.

17 Woélé naa ati a jéhi ni watihe Iésu Kériso. Tabuhi
 mu ko Abérama, die ko Davita, ke pwo 14 ni niide
 apulie. Ke tabuhi mu ko Davita, die ko a bwo pé wie a
 bele Isaraéla mu Juda nge Babulona, ke pwo 14 ni ni-
 ide apulie. Ke é mulang, ke 14 mwo ni niide apulie die
 ko a bwo pituie te pa *Mesia.

A bwo âbeelee te Iésu

Luka 2.1–7

18 §†Weengi a jepule ko a bwo pituie te Iésu Kériso, pa
 Mesia: Wo Maria, é nyaa ten, ke mwo te ju pinimelu
 kolu §†† me Josef. Ke é ânebuhe a bwo piaten delu, ke
 caa pwoapulie kon, na e pwaadeniini bé na a *Jenen
 Iitihi. 19 Ke e niimihi wo Josef pie, me e ne mwo Maria.
 Kehe icehi ana pa apulie na e te pipwoiipieng, ke time
 e uce pii pwaatihi, beme time uce tanim Maria ne he
 pwahamii ni apulie. 20-21 §†É he e ko pitautinaado ne ko
 anaa, ke e bwo alihi ne ha a niûn pa *âcélo te
 Padaame, na e pii ten pie: «Josef, pa piebehi Davita, go

§ 1.12 Esdras 3.2 §† 1.18 Luka 1.27,35 §†† Te ju pinimelu kolu—Pele lépwo Juif, ke time uce a bwopiinen pie, lu pipule ibu. §‡ 1.21 Luka 1.31, 2.21

nemwo pwo me mwotiko me go pé Maria. Be mepwo é ne ko pa cuwo ewa aiu na e kon, ke e pwaadeniin bé na a Jenen Iitihi. Ke mepie e bo pituie, ke go bo ne me a niin pie Iésu †. Be o bo weeng pana e bo *celuimi a bele ten mu he ni ta pwo ten.»

²² Ke ati ni naado naa, ke e tuie, beme pacuwohi ali e pii wo Padaame, na e pwaadeniin bé wo pa *péroféta ten pie: ²³ †† *O bo pwoapulie ko êgi toomwo, ke e bo picile pa ewa aiu. Ke bo ne me a niin pie Émanuéla, a bwopiinen pie, e pelenye wo Padué.*

Ésaïe 7.14

²⁴ Ke me e ûmiê wo Josef, ke e pwo ana e pii ten wo pali âcélo. Ke e pé Maria ê mwoden ne pelen. ²⁵ †Kehe icehi ana time lu uce pipule dieli ko a bwo piâbeele ewa te Maria. Ke wo Josef, ke e ne me a nii pali cuwo ewa pie Iésu.

Lé pipaunueng wo lépwo maagoi

2 E piâbeele wo Iésu ne Bétéléma ne *Judé, ha a benaamwon de pa daame *Érode †. Ke ni béé maagoi, nina lé pitemang na lé cémun ne ko ni ceni, ke lé âbé mu he na e caama lang a téale. Ke lé tuie nge *Iérusaléma.² ††Ke lé tahimwo ni apulie Iérusaléma pie: «E wé wo pa cuwo ewa na e mwo te ju piâbeele, pana me e bo daame he lépwo *Juif? Be geme alihi a ceni ten he e tuie, a ine a bwo piâbeele ten. Ke geme ko âbé me geme pipaunueng [ke me geme ne ten ni âpipati teme].»

³ Ke wo pa daame Érode, ke e téne a jepule ko a bwo tehenebé te lépwo maagoi me nina lé pii. Ke hauli a pwonimen. Ke ati lépwo Iérusaléma, ke mwotilé. ⁴ Ke e tapiti ati ni caa te lépwo *apwoâpwailo, me ni *dotéén ko patén.

Ke e tahimwolé pie: «He é wé ace duaan celi e bo piâbeele ne hen wo pali *Mesia [li géé ko ucéieng]?»

⁵ Ke lé hegi ne ten pie: «É ne Bétéléma ne Judé, be weengi a pwooti te Padué, li e caa tii wo pa péroféta, pie:

⁶ ††† *Adéihi a amu Bétéléma,
a amu mu *Juda!
Piubwo go koja ni béé amu.
Be e bo wie mu pelem
pa daame na ubwo nang;
pana e bo wéihi a bele tong,
a bele *Isaraéla.» Miché 5.1*

⁷ É mulang, ke e tode lépwo maagoi wo Érode. É he te piwoélé cehi, ke e pii telé pie: «Geé pii tong ehi ace be-naamwon celi géé tabuhi alihi hen ali ceni.»

† Iésu—A bwopiinen he pwo ébéru pie: Wo Padaame, ke e celuimikenye. †† 1.23 Ésaïe 7.14 † 1.25 Luka 2.21

†† Érode—Érode pa Bécéiuhén. Omehi Érode ne ha a Niinaado (Vocabulaire) ha anebwén ko a tii. †† 2.2 Nombres 24.17 ††† 2.6 Miché 5.1; Ioane 7.42

⁸ [Me lé pii ten] ke e pahedelé ngemwo Bétéléma, ke e pii telé pie: «Geé â hane ehi pali cuwo ewa, ke mepie géé tooeng, ke géé mwojuia mwobé me géé pii tong. Be nimung mwo me é ân me é pipaunueng, [ke me é ne ten ni âpipati tong.]»

⁹ Nebwén, ke lé engen wo lépwo maagoi. Ke lé te tai alihi mwo ali ceni. Ke lé âcehin, ke me e tehene nge he bebenihe a mwa na e mu hen wo pali cuwo nahi ewa, ke e cuwo. ¹⁰ Ke me lé alihi pie e cuwo lang ali ceni, ke lé te junihe pipwodéén kuti. ¹¹ †††Ke lé taa ha ali mwa, ke lé too pali cuwo ewa me Maria, ê nyaa ten. Ke lé tidih jililé, ke lé pipaunu pali cuwo ewa. Ke lé tuu ni âne élele telé, ke lé ne ten ni muko pétaapwo âpipati telé, na te junihe ubwo ni cuhin: mwani megele †, me ni *encens*, me ni tabe ûde na a niin pie *myrrhe*⁸.

¹² É alecehen, ke e pii telé wo Padué ne he ni niûlé pie, me time lé uce mwojuia ngemwo pele Érode. Kehe lé pé ace céiu pwaaden celi ité, me lé mwojuia ngemwo ha amu telé.

Lé cela ko Érode

¹³ É he lé caa mwojuia ngemwo wo lépwo maagoi, ke pwo a niû Josef. E ali pa *âcélo na e pii ten pie: «Go piepin! Go cuwoda, ke go pé lu téénemeewa, ke go celuimilu nge *Aigupito! Be e pwo me e hane pali cuwo ewa wo Érode, beme e taunueng. Ke géé mu lang dieli ha a tan na é bo paciheko mwo.»

¹⁴ Ke e cuwoda wo Josef, ke e pé luli téénemeewa, ke lé engen he bwén, nge ha amu Aigupito. ¹⁵ ††Ke lé mu lang dieli ko a bwo mele te Érode.

Ati ni naado naa, ke e tuie, beme pacuwohi ali e pii wo Padaame, na e pwaadeniin bé wo pa péroféta ten, pie: *É caa todebé pa naîng, ke é pawieeng mu Aigupito.*

Osé 11.1

E pwo me taunu ni cuwo ewa

¹⁶ Wo Érode, ke e alihi pie lé pipwohuô ten wo lépwo maagoi. Ke e te junihe okéé kuti. Ke e pwo me taunu ati ni nahi ewa aiu na élé neole koja a alo jo, ha ati a Bétéléma, me ni béé duaan ko jijen. Be e temehi mu ko lépwo maagoi ali benaamwon li e tuie hen ali ceni. ¹⁷ Ke me wonaa, ke e pacuwohi ali e pii wo Padué, na e pwaadeniin bé wo péroféta Iérémia pie:

¹⁸ ††† *Nye téne ni pwoé,
me ni pihemun ne Rama^{8†},
he e é niimi ni naîn wo Rachel†.
Pwocoon me lé tanyuueng,*

††† 2.11 Psaume 72.10–15; Ésaïe 60.6 § Mwani megele...Myrrhe—Ni âpipati me de pa daame. †† 2.15 Osé 11.1 ††† 2.18 Genèse 35.19; Jérémie 31.15 †† Rama; Rachel—Rama, ke e mwopopwaalé na e mwonuhi a Iérusaléma; Rachel, ke e mwode Iakobo (a niin mwo pie, Isaraéla). Éni, ni pwoé ten, ke e habwii a bwo piwahin na a bele Isaraéla, he péélé nge Babulona me lé penem tice ja kon.

be caa tielé ati. Jérémie 31.15

Lé mwojuia mwo mu Aigupito

¹⁹ É ne alecehe a bwo mele te Érode, ke pwo a niû Josef ne Aigupito. Ke e ali pa âcélo te Padaame ²⁰ he e pii ten pie: «Go cuwoda, ke go pé luli téenemeewa, ke go mwojuia imilu ngemwo ha amu Isaraéla, be lé caa mele wo lépwoli nimelé me lé taunu pali cuwo ewa.»

²¹ Ke e cuwoda wo Josef, ke e péélu mwojuia ngemwo ha amu Isaraéla. ²² Kehe icehi ana e téne pie wo Arkélaos, pa naî Érode, ke e caa te pé mwo a pwodaame ne Judé, alecehe a bwo mele te caa ten. Ke mwoti Josef me e mwojuia ngemwo lang. Ke e pii ten mwo wo Padaame ne ha a niûn pie, me lé â ha amu Galilé. ²³ †Ke lé mu ha a céiu mwopopwaalé na pii kon pie Nazaret, beme e pacuwohi ana lé caa pii wo lépwo péroféta pie, [wo pa Mesia, ke] o pa apulie mu Nazaret.

Ioane pa apipuu apulie

Maréko 1.1–8; Luka 3.1–18; Ioane 1.19–28

3 Alecehe ni jo na hiwon ††, ke e cuwoda wo pa céiu apulie na a niin pie *Ioane pa apipuu apulie. Ke e mu ha a da ne *Judé, ke e patemehi te ni apulie na lé âbé céiieng, ke e pii telé pie: ² ‡«Geé pininim, ke geé taatéhi ni mulihewé! Be caa é mwonu a *Mwametau he Miiden!»

³ ††Wo Ioane, ke weeng pali e caa pipwojepule kon wo péroféta Isaia pie:

Pwo pa apulie ha a da

na e toii da pie:

“E âbé wo Padaame!

Pwopweehi a pwaadeniin!

Pwo me belece

a duaan na e engen hen!”Ésaïe 40.3

⁴ ††Wo Ioane, ke e cuwohe a epwén na pwo ko pumii *chameau* †††, ke a taihenan a iiwota. Ke e wii koléé, ke e ûdu duhimepu. ⁵ Ke te junihe hiwon ni apulie na lé âbé céiieng ne ha a da, mu *Iérusaléma, me ati a amu Judé, me ni piduaa éémwa Ioridano. ⁶ Ke lé pii beetihi ni ta pwo telé ne he pwahamii ni apulie ati. Ke e puulé ne ha a éémwa Ioridano.

Geé pwo ce huô celi wâé!

⁷ †††Hiwon mwo ni apulie mu he lupwo dihe pwoiitihi te lépwo *Juif, wo lépwo *Farasaio, me lépwo *Sauducéen, na lé âbé céii Ioane, beme puulé.

† 2.23 Ésaïe 11.1, 53.2; Luka 2.39; Ioane 1.45 †† Alecehe ni jo na hiwon—Grek: Ha a benaamwon naa. ‡ 3.2 Mataio 4.17, 1.15 †† 3.3 Ésaïe 40.3 †† 3.4.2 Rois 1.8 ††† Chameau—Wota he melé. Epwéne Ioane, ke pwohewii epwéne péroféta Élia. ††† 3.7 Mataio 12.34, 23.33

Ke me e alilé, ke e pii telé pie: «Wogewé ni nahi bwien, me ni agele! Woo na e pii tewé pie, geé o cela ko ni kuhinaado na e bo ne tewé wo Padué? ⁸ Geé ni pwo ce huô celi wâé, beme a béhabwiinen pie, caa taatéhi ni mulihewé! ⁹ †É mu ko ade na geé niimihi pie, o celuimikewé mu ko ana wo *Abérama ke pa watihehé? Úhu! Be é pii tewé pie: Mepie nime Padué, ke o jan ne kon me e bitehi ni péi ce, me ni piebehi Abérama!

¹⁰ ††«E caa te pwopweehi a gi ten [wo Padué]. Ke e bo tahagéi ne ko ni waan ati ni acuwu na time uce wâé ni acehin, ke e bo cini ne pwo miû!»

O bo tauti ni apulie

¹¹ †††«Woéo, ke é puukewé ko a tabe, beme o a béhabwiinen pie geé caa pitaatéhi ni mulihewé. Kehe icehi ana wo pana e bo âbé alecehung, ke e bo puukewé ko a *Jenen Iitihi me a miû. Weeng, ke te junihe pwojunuun kojaéo, ke time uce jan ne kong me é tuwo ni tai ko ni dihibwaan. ¹² E caa te mi pipwopweeng, beme e tauti ni apulie, ke e bo pineité nina wâé jélé me nina ta jélé, pwohewii a bwo pineitéhi na a pidenaado koja a piin. Ke e ne ehi ni pidenaado, kehe e cini ni piin ne ha a miû na te tice paceli jan me e taunuhi.»

Pipuu Iésu

Maréko 1.9–11; Luka 3.21–22

¹³ É alecehen, ke e engen wo Iésu mu ha amu Galilé, ke e â ha a éémwa Ioridano beme e puueng wo Ioane.

¹⁴ Kehe icehi ana time uce nime Ioane me e pwo, ke e pii te Iésu pie: «Kona é ko ade na go âbé céiiéo? Pana time uce jan me é puuko. Wâé heme go puuéo.»

¹⁵ Ke e hegi ne ten wo Iésu pie: «[Te wâé ana go pii, kehe icehi ana] é jena, ke wâé heme genyu pacuwohi ana *mwomwon ne he pwahamii Padué.»

É mulang na e puueng wo Ioane pwohewii a bwopinen den. ¹⁶ ††Ke me e wie mu he tabe wo Iésu, ke e te tehi kuti a miiden, ke e alihi a Jenen Iitihi te Padué, he e opé ne huûn pwohewii a meni pwojo. ¹⁷ †††Ke pwo a pwocihe bé mu he miiden na e pii pie: «Wo panaa, ke pa Naîng [na te céiu nang] na te nihe eânimung den, weeng kuti pana é caa pipégalieng ne ha a pwonimung.»

E tacebwéni Iésu wo Caatana

Maréko 1.12–13; Luka 4.1–13

4 †É alecehen, ke e pé Iésu na a *Jenen Iitihi te Padué, nge ha a da, beme e tacebwénieng wo *Caatana, pa apipé ne konye. ² ††Ke time e uce wiinaa-

§ 3.9 Ioane 8.33,39; Roma 4.12 †† 3.10 Mataio 7.19; Luka 13.6–9 ††† 3.11 Ioane 1.26–27,33; Apostolo 1.5 †† 3.16 Ioane 1.32 ††† 3.17 Psaume 2.7; Ésaïe 42.1; Mataio 12.18, 17.5; Luka 9.35 †† 4.1 Ébéru 2.18, 4.15 †† 4.2 Exode 34.28

do wo Iésu he na 40 ni tan, be e *pipaciile, ke caa menen.

³ Ke e tooeng wo Caatana, pa atacebwénikenye, ke e pii ten pie: «Hemepie wogo pa *Naî Padué, ke go taatéhi ni péi ce me pwoloa!»

⁴ †Ke e hegi ne ten wo Iésu pie: «Caa te tii ne he ni *tii iitihî pie: *Time e uce mulie cehi ko a pwoloa wo pa apulie, kehe e te mulie mwo ko ni pwooti na e pii wo Padué.*»

Deutéronome 8.3

⁵ Ke e pé Iésu nge ha a pwomwo ubwo iitihî, *Iérusaléma, ke e pééeng da pwo puni a *mwaiitihî.

⁶ ††Ke e pii ten pie: «Hemepie wogo pa Naî Padué, ke go téele mu éni! Be caa te tii ne he ni tii iitihî pie:

E bo pahede ni âcélo ten

wo Padaame Padué

beme lé wéiko.

Ke lé bo hegiko,

ke o time uce tanahi ni am

ne ko ni péi.» Psaume 91.11–12

⁷ †Ke e hegi ne ten wo Iésu pie: «Ûhu, be caa te tii ne mwo he ni tii iitihî pie: *Go nemwo tacebwéni Padaame Padué hem.*»

Deutéronome 6.16

⁸ E pééeng mwo wo Caatana, da pwo a céiu juwole na te junihe e daaité. Ke e habwii ten ati ni amu, me ni mwametau pwo bwohemwo, me ni wâé telé, me ni naamuulé. ⁹ Ke e pii ten pie: «Mepie go tidihî jilim he pwahamiing, me go pipaunuéo, ke é bo ne tem ati ni naa.»

¹⁰ ††Ke e pii ten wo Iésu pie: «Go engen kojaéo, go Caatana! Be caa te tii ne he ni tii iitihî pie: *Go pipaunu Padaame Padué hem, ke te weeng cehi na me go penem den.*»

Deutéronome 6.13

¹¹ Nebwén, ke e ne Iésu wo Caatana. Ke lé âbé too Iésu ne ni *âcélo, ke lé penem den.

E tabuhi ni penem den wo Iésu

Maréko 1.14–15; Luka 4.14–15

¹² ††É ne alecehen, ke e téne wo Iésu pie, lé caa ne *Ioane pa apipuu apulie he karépu. Ke e engen wo Iésu, ke e â ha amu Galilé. ¹³ Ke time e uce mu Nazaret, kehe e â pimu Kapernaüm, a behi a bajié Galilé, ha a duaan Zabulon me Neftali. ¹⁴ É nelang he na e pacuwohi ali e pii wo Padué, na e pipwaadeniin bé wo péroféta Isaia pie:

¹⁵ †††*Téne, wogeu lupwo amu*

Zabulon me Neftali,

wogeu mwonuhi a jié;

ne gaale cemwo ko a Ioridano;

† 4.4 Deutéronome 8.3 †† 4.6 Psaume 91.11–12 † 4.7 Deutéronome 6.16 †† 4.10 Deutéronome 6.13 †† 4.12 Mataio 14.3; Maréko 6.17; Luka 3.19–20 ††† 4.15 Ésaie 8.23–9.1

lupwo duaan ne Galilé;
amu na pihiwon ni bele hen,
na time lé uce bele tong:

¹⁶ *Lé alihi a pwéélang na ubwo*
ne nina lé mu ha a melepiing.

A pwéélang na pwomelaan
ko nina lé mu ha a bwén iitihî.

[Lé o mulie cemwo!]Ésaie 8.23–9.1

¹⁷ †††Ke te tabuhi kuti mulang, ke e patemehi a pwooti te ni apulie wo Iésu. Ke e pii telé: «Geé pininim, ke geé taatéhi ni mulihewé! Be caa é mwonua a *Mwametau he Miiden!»

E tode ni bécéiuhe acémun den

Maréko 1.16–20; Luka 5.1–11

¹⁸ [É ha a céiu tan] ke e uti a nicepwon Galilé wo Iésu. Ke e ali lupwo apulie na lupwo apwotau, wo Simon na pii kon pie Pétéru, me André pa âjiéne, he lu ko ne pua ha a jié.

¹⁹ Ke e pii telu pie: «Geu âbé céing, be é bo pwo me wogeu lupwo apwotauhi apulie.»

²⁰ Ke lu te necu kuti li pua telu, ke lu âcéi Iésu.

²¹ Ke lé te ju piân, ke e ali Cang me Ioane, lupwo naî Zébédé, he lé teko pwoni pua ne pwo ong me caa telu. Ke e todelu wo Iésu. ²² Ke lu ne caa telu, me ali ong, ke lu âcén.

E pwo me tieden ni cunu ko ni apulie

Maréko 1.35–39; Luka 4.42–44, 6.17–19

²³ †E engen pithi a amu Galilé wo Iésu, ke e pacému-ni ni apulie ne he ni *mwotapithi te ni *Juif, ke e pipatemehi a *Pwooti Wâé ko a Mwametau [he Miiden]. Ke e pwo me tieden ati ni cunu me ni picani te ni apulie. ²⁴ ††Ke lé téne jepule kon, pithi a province Siri. Ke lé pébé céiieng ni béén na lé mu he ni picani, me ni béé bwo pwo cunu, me ni béén na pwo duéé kolé, me nina éjén jélé, me ni béén na tebwomwa jélé. Ke e te tai pwo me tieden ni cunu kolé naa wo Iésu. ²⁵ †††Hiwon ni apulie na lé âcéi Iésu: ni apulie bé mu Galilé, ke é mu ha a céiu duaan ko a *Dix Villes*††. Ke lé âbé mu mwo Iérusaléma, me ati a amu *Judé, ke é ne gaale cemwo ne ko a éémwa Ioridano.

††† 4.17 Mataio 3.2, 19.27 § 4.23 Mataio 9.35; Maréko 1.39; Apostolo 10.38 §† 4.24 Maréko 6.55 §†† 4.25 Maréko 3.7–8 §† *Dix Villes*—A niin mwo pie Décapole. 10 ni pwomwo ubwo na picipetéhi ne kolé.

a bwo pipune ne pwo juwole

(Pwahamii tii: Mataio 5—7)

Luka 6.17–49, 12.22–34

5 Me e ali ni apulie na hiwon wo Iésu, he lé ko âbé, ke e taa pwo juwole, ke e tebwo, beme pacému-nilé. Ke lé âbé tebwo pelen ne nina lé âcén.

Adéikewé

² Ke e pii telé pie:

³ †«*Adéi nina lé pwo me piwahin jélé, be o bo a delé a *Mwametau he Miiden.

⁴ ††Adéi nina lé é, be e bo pwopweehi ne kolé [wo Padué].

⁵ *Adéi nina bwala ni pwonimelé, be bo a delé a bwohemwo ati!

⁶ ††Adéi nina menelé me nimelé me lé ûdu ko ana te nime Padué kon, be e bo ne telé ati nina nimelé kon!

⁷ Adéi nina lé pipati, be e bo pipatilé wo Padué.

⁸ Adéi nina mang ni pwonimelé ne ko Padué, be lé o bo alieng!

⁹ Adéi nina lé pébé a péém, be e bo pii kolé wo Padué pie ni naïn!

¹⁰ ††Adéi nina pitéétilé ko a bwo piténedehi nen delé a pwooti te Padué, be o bo a delé a Mwametau he Miiden.

¹¹ †††Adéikewé, heme lé pitakewé, ke heme lé pwotahi ne kowé, ke hemepie lé getikewé, watihen woéo. ¹² †††Be lé caa te wonaa te ni péroféta na lé ânebuhewé. Kehe geé pipwodéén me pituume, be geé bo hegi a ceme ni penem dewé na ubwo ne jeda he *miiden!»

Wogewé ni pwéélang pwo a bwohemwo

¹³ †«Wogewé ni jié † pwo a bwohemwo. Kehe mepie patieden a neme a jié, ke he genye o woté ace bwop-wonen me nye ne mwo ace nemen? O caa te pitice-naado ne kon, ke o tahi ole pwomwo, ke lé o engen pwon ne ni apulie.

¹⁴ †††«Wogewé ni pwéélang pwo bwohemwo, pwohewii a pwomwo ubwo na e mu pwo juwole, be o pwocoon me nye neduwohi. ¹⁵ ††Ke piwien mwo ne ko a mwomiû, be time nye uce ne miû ko a mwomiû, me

† 5.3 Ésaïe 57.15 †† 5.4 Ésaïe 61.2–3; Pii Beetihi 7.17 † 5.5 Psaume 37.11 †† 5.6 Ésaïe 55.1–2 †† 5.10 1 Pétéru 3.14 ††† 5.11 1 Pétéru 4.14 ††† 5.12 2 Chroniques 36.16; Apostolo 7.52 † 5.13 Maréko 9.50; Luka 14.34–35 †† Jié—É bwolihi, ke time uce ju wâé ni jié, be te junihe hiwon ni alili hen. É he ni béé benaamwon, ke caa te tice nemen, be caa pé na a tabe, ke caa te ju mu cehi ni alili hen. Pwohewii ni nu na nye iti ne ko diinaado beme nye caa pwoti ati, ke caa tice nemen, ke genye caa tahi ne te ni ja. A penem de a jié mwo, ke me e pwopweehi me wéhi ni wiinaado. É ne mwo ko a piapwo te Padué ke time bo uce taatééhi mwo. Omehi Lévitique 2.13; Nom-

nye talui ko ace cio! Kehe genye ne da ko miiden, beme e pwéélang ati ko ni apulie na lé mu ha a mwa. ¹⁶ †††Ke wâé heme wonaa a pwéélang kowé! Wâé heme tuie ne he pwahamii ati ni apulie. Ke é mulang, ke lé o alihi ni naado na wâé na geé pwo, ke lé o pipaunu Padué Caa tewé na e jeda he miiden.»

É tuie me é punuun ni patén

¹⁷ ††«Geé nemwo niimihi pie é tuie me é pwo me tieden ni *patén de Moosé, me ni bwopiinen de ni péroféta. Kehe time é uce âbé beme é pétaabwon, kehe é tuie beme é punuun. ¹⁸ ††Geé téne ehi, be é pii tewé a juuju pie: Hemepie e mwo teko mu a miiden me a bwohemwo, ke time o uce pétaabwon ace céiu atii mu ko ni patén, dieli ko ace bwo pacuwohi na ati ni naado.

¹⁹ †††«É mu ko anaa, ke wo pace apulie celi e tahi taabwon ace céiu patén celi te ju wahin, ke me e picaa te ni béén me lé pipwohewiieng, ke wo panaa, ke te junihe wahin nang ne ha a Mwametau he Miiden. Kehe wo pa apulie na e âcehi ni patén, ke me e picaa te ni béén me lé wonaa, ke wo panaa, ke te junihe ubwo nang ne ha a Mwametau he Miiden. ²⁰ Éa, wâé heme ubwo a bwo piténedehi ne ni patén de Padué tewé, kaja a bwo piténedehi nen de ni *dotéén ko patén, me ni *Farasaio. Be mepie time uce wonaa, ke o time geé uce taa ha a Mwametau he Miiden.»

Go necu a okéé

²¹ †††«Geé te temehi pie, e caa pii [wo Padué] te ni watihenye, pie: *Go nemwo taunuhi apulie.*

Exode 20.13

Be wo paceli e taunu pace céiu, ke o pééeng nge céii pa atautinaado, me e pwocuhinaado ten. ²² †††Kehe woéo, ke é pii pie: Hemepie go okéé ne ko pace céiu acéihi béém, ke go bo cuwo he pwahamii Padué, ke e bo tautiko. Ke heme go pii te pace céiu béém pie: “Pipenem a punim!”, ke mepie go pii me ta nang, ke go ucéihi a cuhinaado na te junihe ubwo, ne ha a miû ¹⁸.

²³ †††«Ke é hemepie go pébé a âpipati tem ne ha a *mwaiitihi, ke me e âbé ne ha a pwonimem aceli piehadeniiu me pa béém acéihi, ²⁴ ke wâé heme go mwo ne lang a âpipati tem. Ke go mwojuia ngemwo me geu mi pipwopweehi me pa âjiénem. Ke nebwné, ke go bo mwojuia mwo me go bwobe ne a âpipati tem.

²⁵ «Me mwo ko wogo he pwaaden nge ha a mwotautinaado, me pana e neko ha a tautinaado, ke geu mi pipwopweehi me weeng. Be koli e bo neko te

bres 18.19. ††† 5.14 Ioane 8.12, 9.5 †† 5.15 Maréko 4.21; Luka 8.16, 11.33 ††† 5.16 Éféso 5.8–9; 1 Pétéru 2.12 †† 5.17 Roma 3.31 †† 5.18 Luka 16.17, 21.33 ††† 5.19 Cang 2.10 ††† 5.21 Exode 20.13; Deutéronome 5.17 ††† 5.22 1 Ioane 3.15 18 Miû—Grek: Géhenne de feu. 19 5.23 Maréko 11.25

pa atautinaado me e pwocuhinaado tem, ke me e neko te ni pwoli, me lé neko he karépu. ²⁶ Ke é pii tem a juuju pie: O time go uce wie mu he karépu, hemepie mwo time go uce téele pwocuhi ati ni kuhinaado tem!»

A pwooti ko pitahagéi piaten

²⁷ †«Geé te temehi pie, e caa pii [wo Padué] pie: *Go nemwo pibune.*

Exode 20.14

²⁸ «Kehe woéo, ke é pii pie: Hemepie go te ju ome é mwode pace céiu, ke me nimem kon, ke pwohewiin heme geu caa teko pipule me weeng. ²⁹ ††Be hemepie watihen a naamiim ne pwo jui me go tupwo ne ha a ta, ke go pétaabwon, ke go tahi nge ité kojako! Be o wâé ne kom hemepie tieden ace céiu duaa éém, kojan heme hején a éém, ke me o tahiko ne ha a miû †! ³⁰ ††Ke mepie watihen a im ne pwo jui me go pwo ana ta, ke go tahagéi, ke go tahi taabwon nge ité kojako! Be wâé hemepie tieden ace céiu duaa éém, kojan hemepie hején a éém, ke me go â ha a miû!»

³¹ ††«Geé te temehi pie, caa pii mwo pie: *Wo pana e cibéé é mwoden, ke wâé heme e pwo ace tii me pitahagéi piaten.*

Deutéronome 24.1

³² Kehe woéo, ke é pii pie: Go nemwo cibéé é mwodem na time uce é abune aiu ††. Be koli go bo cineeng me e bune aiu, hemepie lu piaten mwo me pace céiu. Ke wo pace céiu apulie celi e pééeng me é mwoden, ke e bune toomwo.»

A pwooti ko piapwo

³³ †† †«Geé te temehi mwo pie, e caa pii [wo Padué] te ni watihenye pie: *Go nemwo gele ne ha a *piapwo tem. Wâé heme go pajuujuhi a piapwo tem ne he pwhamii Padué.*

Nombres 30.2

³⁴ ††Kehe woéo, ke é pii pie: Go nemwo piapwo! Go nemwo piapwo da he miiden, be atebwo iitihii te Padué, ³⁵ †††ai, é pwo bwohemwo, be é he na nelang ni an, ai é *Iéruusaléma, be a pwomwo ubwo te Padaame ubwo. ³⁶ Ke go nemwo piapwo ne pwo punim, be time uce jan me go pwo me pwojo ai bwiile ace apun celi céiu. ³⁷ Kehe go te ju pii cehi pie “éa”, heme nimem, ke “ûhu”, heme muhi tem. Be ni béé behin, ke e âbê mu ko *Caatana, pana ta nang.»

A pwooti ko pitaacunaado

³⁸ ††«Geé te temehi pie, caa pii pie: *Naamiim me de a naamiing, ke a pecuwom me de a pecuwong*††.

Exode 21.24

³⁹ «Kehe woéo, ke é pii pie: Mepie e pwo aceli ta ne kom wo pace céiu apulie, ke go nemwo taacu ne ten. Ke me e ahi a kwoom ne pwo jui, ke go ne ten mwo a céiu. ⁴⁰ Ke mepie e pééko nge ha a mwotautinaado wo pace céiu apulie, ke me e pé a cimii tem, ke go ne ten mwo a palito tem. ⁴¹ Ke mepie e cuwokom wo pace céiu apulie me go engen he celi céiu *kilomètre*††, ke go engen he celi alo me weeng. ⁴² Ke é hemepie e ilehi kojako ace céiu naado wo pace céiu apulie, ke go ne ten. Ke é hemepie e ilehi, ke me e bo te ne tem mwo, ke go nemwo biteko ne kon.»

Geé pipwoééhe nina lé téétikewé!

⁴³ ††«Geé te temehi pie, caa pii pie: *Go pwo me eânimem de ni béén*††.

Lévitique 19.18

Ke: “Go tééti ni béén na lé téétiko.” ⁴⁴ †††Kehe icehi ana woéo, ke é pii pie: Geé pwo me eânimewé te nina lé téétikewé, {ke geé adéi lépwona lé apwokewé}, ke geé pwoiitihii me de nina lé pwo me geé mu he ni picani. ⁴⁵ Be, me geé wonaa, ke wogewé lépwo naî Padué, pa Caa tewé na e jeda he miiden. Be e pwo me téale ne ko nina wâé jélé, me nina ta jélé. Ke e pwo me ute ne ko nina wâé jélé, me ni béén na time uce wâé jélé.

⁴⁶ «Be mepie te ju eânimewé cehi te nina eânimelé tewé, ke o ade ace cemewé mu pele Padué? Be wo lépwo *atai mwani cuhi puni apulie, ke lé te pwo mwo anaa! ⁴⁷ Ke mepie geé te pwobwocu me adéi cehi ni bééwé, ke ade aceli geé pwo celi nihe piwâé? Be lé te pwo mwo anaa ne ni béén na time lé uce temehi Padué! ⁴⁸ †††Ke wogewé, ke wâé heme geé pwoiipikewé ati ne he ni pipwoééhe, pwohewii pa Caa tewé na e jeda he miiden.»

A pwooti ko a bwo pipati

6 ¹⁸[E pii mwo wo Iésu pie]: «Wâé heme go pwo ana te nime Padué kon, me pajuujuhi ni patén. Kehe icehi ana go pipwocileko! Go nemwo pwo ne he pwhamii ni apulie, beme lé pipii me wâé go. Be me wonaa, ke o time go uce hegi ace cemem ne pele Caa na e jeda he miiden. ² Ke me go ne mwani te ni béén na tice

† 5.27 Exode 20.14; Deutéronome 5.18 †† 5.29 Mataio 18.9; Maréko 9.47 † A ocine cehi ko ana nye pwo na ta. Be wâé heme nye tahi taabwon nge ité kojakenye. †† 5.30 Mataio 18.8; Maréko 9.43 †† 5.31 Deutéronome 24.1–4; Maréko 10.4 ††† Na time uce é abune aiu—ai Kehe icehi ana heme éce toomwo celi iitihii me geu piaten. ††† 5.33 1 Korénit 7.10–11 § 5.33 Exode 20.7; Lévitique 19.12; Nombres 30.3; Deutéronome 23.22 †† 5.34 Ésaie 66.1; Mataio 23.22; Cang 5.12 ††† 5.35 Psaume 48.3; Ésaie 66.1

§† 5.38 Exode 21.24; Lévitique 24.20; Deutéronome 19.21 ††† Naamiim me de a naamiing—Beme time lé uce piwéden koja nina e pwo ne kolé wo pace céiu. †† Cuwokom...me go engen he celi céiu kilomètre—Pwo mwomwon de pa coda roma me e cuwoko pa apulie me e pé a élele ten he na céiu kilomètre †† 5.43 Lévitique 19.18 ††† Ni béén—Grek: Pana e mu mwonuko, ai Pa ju béém. ††† 5.44 Exode 23.4–5; Luka 23.34; Apostolo 7.60; Roma 12.14,20 ††† 5.48 Lévitique 19.2; Deutéronome 18.13 18 6.1 Mataio 23.5

delé, ke go nemwo pihabwiiko, me pwohewii ni apipulekenye. Be lé pwo ne he ni *mwotapitih, ke é ne he ni apimu te ni apulie ne ha a pwomwo ubwo. Be lé hane beme lé pipaunulé ne ni apulie. Ke é pii a juuju pie: Lé caa te hegi a cemelé!

³⁴ «Ke wogo, ke go nemwo pihabwiiko heme go pwo ana wâé. Me go ne mwani te ni béén na tice delé ko a im ne pwo jui, ke wâé heme time e uce temehi na a im ne pwo eaamu! Be e bo ne a cemem wo Padué Caa tem na e alihi ati ni naado.»

A pwooti ko a bwo pwoiitih

⁵ †«Me geé pwoiitih, ke geé nemwo pwohewii lépwo apipulekenye. Be lé cuwo heme lé pwoiitih ne he ni mwotapitih, me ni apimu te ni apulie ne he ni pwomwo ubwo. Be wâé telé heme lé alilé ne ni apulie. Kehe é pii tewé a juuju pie: Lé caa te hegi a cemelé. ⁶ Kehe wogo, ke me go pwoiitih, ke go taa ha a nemwa tem, ke go capuhi a pomwa, ke go pwoiitih te Padué Caa tem na time genye uce alieng. Be e te alihi ana go pwo ne ha aduwo, ke e bo ne a cemem.

⁷ ††«Ke me geé pwoiitih, ke geé nemwo pwo jame cihe pwohewii ni béé apulie na time lé uce temehi pa ju Dué. Be lé te niimihi pie, e o te ténéle ko nina hiwon na lé pii. ⁸ †Ke geé nemwo pipwohewiilé, be e te temehi nina nimewé kon wo Padué Caa tewé, ânebuhe ni bwo pi-ile tewé.

⁹ ††«Kehe geé woni ko ace bwo pwoiitih tewé:

“Caa teme jeda he miiden,
wâé heme paciitih a niim.

¹⁰ ††Wâé heme e âbé a Mwametau tem.

Wâé heme pwo ana te nimem kon ne éni pwo bwohemwo, me pwohewii ne jeda he miiden.

¹¹ Go ne teme ce wiinaado celi jan ne kome ati he ni tan.

¹² ††Go pineuhi ni ta pwo teme, pwohewiin he geme pineuhi ni ta na lé pwo teme.

¹³ ††Go nemwo nekeme he ni tacebwén.

Go celuimikeme koja a ta [§].

{Be te etem a Mwametau, me a junuum me *a wâé tem, dieli mwo. Amen ^{§††}}

¹⁴ †††«Be é pii tewé pie: Me geé pineuhi ne te ni béén ni ta pwo telé, ke e o pineukewé mwo wo Padué Caa tewé jeda he miiden. ¹⁵ Ke mepie time geé uce pineuhi ni ta pwo te ni béén, ke time e o uce pineukewé ko ni ta pwo tewé wo Caa tewé.»

† 6.5 Mataio 23.5; Luka 18.10–14 †† 6.7 1 Rois 18.26–29 † 6.8 Mataio 6.32 †† 6.9–13 Luka 11.2–4 †† 6.10 Luka 22.42 ††† 6.12 Mataio 6.14–15, 18.21–35 ††† 6.13 Luka 22.40; Cang 1.13; Ioane 17.15; 2 Tésalonik 3.3; 2 Timoté 4.18 § Go celuimikeme koja a ta—ai Go celuimikeme koja pana ta nang (Caatana).
§† Amen—Wâé heme wonaa! §†† 6.14 Maréko 11.25–26

A pwooti ko a pipaciile

¹⁶ ††«Me geé *pipaciile (me geé patupwo wiinaado, beme geé pwoiitih), ke geé nemwo pihabwiikewé, pwohewii ni apipulekenye. Be lé habwii ne he ni pwa-hamiilé pie lé pipaciile, beme lé o alilé ati ne ni apulie. É pii tewé a juuju pie: Lé caa te hegi ni cemelé. ¹⁷ Kehe wogo, ke me go pipaciile, ke go puu a pwahamiim, ke go timi a punim ^{§††}. ¹⁸ Ke o time lé uce alihi ne ni apulie pie go pipaciile. Kehe te icehi Padué Caa tem, na time genye uce alieng, na e alihi ana go pwo ne ha aduwo, ke e bo ne ace cemem.»

Ni wâé na e pele Padué

¹⁹ ††«Geé nemwo hane ni wâé pwo bwohemwo, be koli bo bune kojakewé, ai koli bo muti, ke nyaale tieden. ²⁰ ††Kehe geé taineibuhi ni naumuuwé [ne pele Padué] ne he miiden. Be time o uce paale, ke time o uce ili ne naado. Ke time o uce nyaale, ke muti, ke te tice abune lang. ²¹ Be é he na e lang ni nauum, ke e lang a pwonimem.

²² «Go téne, ni naamiim, ke a pwéélang ko a éém. Ke me te wâé ni naamiim, ke e te mu ha a pwéélang ati a éém. ²³ Ke me ta ni naamiim, ke ati a éém, ke e mu ha a melepiing. Ke me e â melepiing na a pwéélang na e kom, ke o te junihe melepiing kuti!»

Go pipégali a mwani, ai wo Padué

²⁴ «Te tice pace apulie celi jan ne kon me pa apipenem de lupwoce daame celi alo julu, ati ha a pwonimen. Be e o pipenem ehi te pace céiu, ke e o tééti pa céiu. Kehe time uce jan me geé tai pipenem de Padué me a mwani.»

Hane ânebun a Mwametau ten

²⁵ †††«Weengaa a watihen me é pii tewé pie: Geé nemwo gia ko ni mulihewé me ni ééwé. Geé nemwo tee pitahimwokewé pie: “Genye o bo wii de?” ke “Genye o bo cuwohe ce de?” Be a mulihewé, ke junihe pwnaado ne kon koja a wiinaado; ke a ééwé, ke junihe pwnaado ne kon koja a epwén!

²⁶ †††«Geé omehi ni meni, be time lé uce picemi, me pitii âdaanu, ke time lé uce pine ehi wiinaado ne ko ni tan. Be te wo Padué Caa tewé jeda he miiden na e pawinaadonilé. Kona wogewé, ke time geé uce piwéden koja ni meni? Uhuu! ²⁷ Time uce é mu ko a bwo gia, celi geé o mwo ne mwo aceli céiu tan, ne he ni mulihewé!

§† 6.16 Ésaie 58.5–9 §†† Timi a punim—Grek: Timi a punim ko l'huile. §† 6.19 Cang 5.1–3 §† 6.20 Mataio 19.21; Luka 18.22 §†† 6.25 Filipi 4.6; 1 Timoté 6.6–8; 1 Pétéru 5.7 §†† 6.26 Mataio 10.29–31; Luka 12.6–7

²⁸ «É mu ko ade na geé gia mwo ko ce epwénewé? Geé cuwoteeke alihi ni muun, be lé cim ne he meté, ke time lé uce péi ke wolinaado. ²⁹ †Ke é pii tewé pie: Wo pa daame *Solomona, ati ha a wâé ten, ke ni epwé-nen, ke time uce junihe wâé koja a muun na te ju céiu.

³⁰ «Ke geé cuwoteeke alihi ni meté: E cim jenea, ke o cini meé ne pwo miû. Kehe wo Padué, ke e te ne ni epwénelé. Ke kona time e o uce ne ce epwénewé celi pi-wéden? Te junihe wahin kuti ni céihi tewé!

³¹ «Geé nemwo gia me geé pii pie: “Genye o wii de, me ûdu de?” ke “Nye o cuwohe ce de?” ³² †Be ni béén na time lé uce temehi Padué, ke time lé uce mwaale ko a bwo hane ninaa. Kehe icehi ana wogewé, ke e te temehi nina nimewé kon wo Padué Caa tewé na e jeda he miiden. ³³ †Geé hane ânebun a *Mwametau he Mi-iden, ke geé pwo nina nime Padué kon, ke e bo ne tewé ati nina tice tewé. ³⁴ Ke é pii mwo tewé pie: Geé nemwo gia ko a tan meé, be a tan meé, ke e bo te pwo a penem den. A gia jenea, ke te é jenea.»

Ni béé pipune te Iésu ne pwo juwole

Luka 6.37–49, 11.9–13, 13.24–27

Geé nemwo tauti ni béén

7 ††[E pii mwo wo Iésu pie]: «Geé nemwo tauti ni béén, beme e o nemwo tautikewé wo Padué.

² †Be e o bo tautikewé wo Padué pwohewii a bwo tautilé tewé, ke e o bo pwo tewé nina geé pwo telé! ³⁴ Go te ju alihi ehi a meté na e hamii pa âjiénem. Kehe time go uce alihi a ba-acuwo na ubwo na e hamiim! Ke go woté ko ace bwopiinen de pa béém pie: “Go ne me é pétaabwon a meté na e hamiim?”

⁵ «Wogo, ke pa apipulekenye, kehe bwi go! Go mi pétaabwon a ba-acuwo na ubwo na e hamiim! Ke é mulang, ke go bwobe ali ehi ace bwo pétaabwon na a meté na e hamii pa âjiénem!

⁶ «[Geé wéihi ehi nina wâé, na e âbé mu ko Padué.] Be time nye uce ne te ni wotaahen nina iitihii, be koli lé o bitelé ne mwo konye me lé wiikenye. Ke time genye uce tahi ne te ni puwokwo ni *perle* na te junihe ubwo ni kuhin, be lé o bo caaite.»

Geé ilehi me hane ke cii

⁷ ††«Wâé heme geé tee ilehi taaci [koja Padué] be e bo ne tewé. Ke geé tee hane taaci, be geé bo tooli. Ke geé tee cii taaci a pomwa, be e o bo tehi ne tewé.

⁸ †††Éa, be wo pana e ilehi, ke o bo ne ten. Ke wo pana e hane, ke e o tooli. Ke wo pana e cii a pomwa, ke o tehi ne ten.

⁹ «He woo mu hadeniwé, celi e o ne ace péi te pa naîn, hemepie e ilehi kojaeng ace pwoloa? ¹⁰ Ke he woo celi e o ne ten ace bwien, hemepie e ilehi ace ikua? ¹¹ †Be wogewé lépwo apulie na ta gewé, kehe geé temehi ne nina wâé te ni naîwé. Ke me wonaa, ke wo Padué Caa tewé jeda he miiden [na te junihe wâé nang] ke e bo ne ce naado celi te junihe wâé wéden te lépwona lé ilehi kojaeng.»

A ju âne ni patén

¹² ††«Geé pwo ne te ni béén ce naado celi nimewé me lé pwo ne tewé. Weengaa kuti a âne ni *patén de Moosé, me ati ni tii te ni péroféta.»

A pomwa na picu

¹³ †††«Geé taa ha a pomwa na picu. Be ubwo a pomwa nge ha a duaan na e patiedenikenye ne hen dieli mwo. Be ticecoon a bwo â ha a pwaaden naa, ke hiwon nina lé â hen. ¹⁴ Ke te junihe picu a pomwa nge ha *a ju mulip, ke pwocoon a bwo â hen. Ke time uce hiwon nina lé tooli.»

Lépwo péroféta agele

¹⁵ †††«Geé pipwocile lépwo péroféta agele! Be lé o âbé céiikewé he lé pwohewii ni muto, kehe icehi ana lépwo wota apiwii. ¹⁶ †††Geé o te temehilé mu ko ni bwo penem delé. Be time genye uce tabwo ace tabe megele mu ko ace éé muceni! Ke time genye mu uce tabwo ace majing mu ko ace acuwo celi pwo dan! ¹⁷⁻¹⁸ Be a acuwo na wâé, ke e te ne ni acehin na wâé [me wii] ke pwocoon me e ne ce acehin celi ta. Ke a acuwo na ta, ke e ne ni acehin na ta, ke pwocoon me e ne ce acehin celi wâé. ¹⁹ ††Ke o tahagéi a acuwo na time e uce ne ce acehin celi wâé, ke o tahieng da pwo miû.

²⁰ †††«Ke te piwien ne ko lépwo péroféta agele, be geé o temehilé mu ko ni penem delé.»

Go pii ke go pwo

²¹ †††«Mepie nimem me go tuie da ha a *Mwametau he Miiden, ke time go uce ju cuwo ko pii cehi pie: “Padaame, Padaame!” Wâé heme go pwo mwo ana nime Caa tong kon na e jeda he miiden! ²² Be é ha a Tan na e bo tauti ni apulie hen wo Padué, ke o hiwon nina lé o pii tong pie: “Padaame, Padaame, geme mu patemehi a pwooti tem, ke peni ni duéé ne he niim. Ke hiwon ni penem na geme pwo ko a junuum!”

²³ ††††«Ke é bo te ju pii telé gaale pie: Time é uce temehikewé. Geé engen kojaéo, be wogewé, ke lépwo apwo

† 6.29 1 Rois 10.4–7; 2 Chroniques 9.3–6 †† 6.32 Mataio 6.8 † 6.33 1 Rois 3.13–14; Psaume 37.4,25; Roma 14.17 †† 7.1 Roma 2.1; 1 Korénit 4.5; Cang 4.11–12 †† 7.2 Maréko 4.24 ††† 7.7 Maréko 11.24; Ioane 14.13, 15.7, 16.23–24 †††† 7.8 1 Ioane 3.22, 5.14–15

§ 7.11 Cang 1.17 †† 7.12 Mataio 22.39–40; Luka 6.31; Roma 13.8–10 ††† 7.13 Luka 13.24 †† 7.15 Mataio 24.24; Apostolo 20.29; 2 Pétéru 2.1 ††† 7.16 Galat 5.19–22; Cang 3.12 †† 7.19 Mataio 3.10; Luka 3.9; Ioane 15.6 †† 7.20 Mataio 12.33 ††† 7.21 Luka 6.46; Cang 1.25 †††† 7.23 Psaume 6.9; 2 Timoté 2.19

ne nina ta! [Be time geé mu uce pwo nina nimung kon.]»

A ocine ko lupwo mwa

²⁴ «Wo pana e téne a pwooti tong, ke me e piténédehi, ke e pwohewii pa apulie na e tauti ehi ni naado, ke e bahi a mwa ten ne pwo a péi. ²⁵ Ke e cuwo ole a ute, ke e téte a jaa, ke udan, ke e tatééhi a mwa, kehe icehi ana time e uce tupwo, be caa bahi ne pwo a péi. ²⁶ Ke he wo pana e téne ni pwooti tong, ke time e uce ténédehi, ke e pwohewii pa muti na e pacuuli a mwa ten ne ha a won. ²⁷ Ke e cuwo ole a ute, ke e téte a jaa, ke udan, ke e tanahi ati a mwa, ke e tupwo.»

Pwo mwomwon den me e pacémunilé

²⁸ Ke me e pii ati ni pwooti naa wo Iésu, ke lé téetihi a bwo cihe ten ne ni apulie. ²⁹ †Be time e uce pwohewii ni *dotéén ko patén delé. Be e te pacémunilé mu ha a pihuô [na e te ne ten wo Padué].

E pwo me tieden a cunu ko pa katia

Maréko 1.40–45; Luka 5.12–16

8 É alecehen, ke e opé mu pwo juwole wo Iésu, ke lé âcén ne ni apulie na te junihe hiwon jélé. ² Ke e âbé ne kon wo pa céiu katia. Ke e tidihii jilin he pwa-hamiin, ke e pii ten pie: «Padaame, hemepie te nimem, ke go pwo me tieden a katia kong!»

³ Ke e cine ngen a in wo Iésu, ke e ti kon, ke e pii ten pie: «Éa, te nimung! Caa wâé go!»

Ke te tieden kuti kojaeng a katia kon.

⁴ ††Ke e pii ten pie: «Go nemwo pwojepule kon! Kehe go â pihabwiiko ne te pa *apwoâpwailo. Ke go ne [te Padué] ali âpwailo li e pii wo *Moosé ne he li patén den. Be me wonaa, ke me lé alihi ati ne ni apulie pie caa wâé go.»

A céihi te pa céiu caa te coda

Luka 7.1–10

⁵ E ân wo Iésu, ke e taa Kapernaüm, ke e âbé benieng wo pa céiu caa te coda te lépwo Roma. Ke e ileeng beme e picani ten. ⁶ Ke e pii pie: «Au Padaame, pa eabwé tong, ke e tee ko pule pwomwo, be tebwomwa nang, ke te junihe cunu nang kuti.»

⁷ Ke e hegi ne ten wo Iésu pie: «Wâé, é bo ân, be é bo pwo me tieden a cunu kon.»

⁸ Ke e hegi ne ten wo paje pie: «Ûhu, time uce jan ne kom, me go tuie nge ha a pomwa tong, be te junihe pwnaado ne kom. Kehe go te ju cihe cehi, beme o tieden a cunu ko pa eabwé tong. ⁹ Be woéo, ke é piténéde pa apihuô tong, ke é uce pihuô te ni coda. Ke me é pii te pace céiu pie: “Go engen!”, ke e engen. Ke

me é pii te pace céiu pie: “Go âbé!”, ke e âbé. Ke me é pii te pa eabwé tong pie: “Go pwo ani”, ke e te pwo.»

¹⁰ Ke e te junihe téele wo Iésu, ke e picedi pali caa te coda. Ke e pii te lépwona lé ko âcén pie: «Geé te ju tabemi ehi: Time é uce téele too pace apulie celi ubwo ace céihi ten pwohewii paje, ke piwien mwo ne ha a *Isaraéla, [a bele te Padué]. ¹¹ †Éa, o bo hiwon celi lé o bo âbé ha a *Mwametau he Miiden, mu pwo a bwohemwo ati. Ke o pwo ce atebwo telé ne ha a piwiinaado ubwo me ni watihenye, *Abérama, Isaaka, me Iakobo. ¹² ††Ke hemepwo é ne ko lépwona me lé taa ha a Mwametau, ke time uce jan ne kolé me lé taa. Ke o bo tahlé ole pwomwo ha a melepiing ité koja Padué! Ke lé bo é ko piwii pecuwo.»

¹³ Ke nebwén, ke e pii wo Iésu te pali caa te coda pie: «Go mwojuia ngemwo ha a pomwa tem! Be é ko a céihi tem, ke e o tuie ana go ilehi!»

Ke é ha a benaamwon naa, ke caa te tieden kuti ali cunu ko pali eabwé.

E pwo me wâé ni apulie

Maréko 1.29–34; Luka 4.38–41

¹⁴ E â ha a pomwa te Pétéru wo Iésu, ke e too ê mwaa Pétéru he e teko pule, be e pwopilijing. ¹⁵ Ke e pétaa ko a in wo Iésu, ke te tieden kuti kojaeng ali pili-jing. Ke e cuwoda wo ênaa, ke e pwo me lé wiinaado.

¹⁶ É he babwén, ke lé pébé céii Iésu ni apulie na hiwon jélé, na pwo ni duéé kolé. É mu ko a pwooti ten, ke e peni ni duéé, me lé wie mu kolé. Ke e pwo me tieden ati ni cunu ko ni béén. ¹⁷ ††É nelang he na e pacuwohi ali e pii wo Padué, na e pwaadeniin bé wo péroféta Isaia pie:

E caa pé ni picani tenye,

ke e pé kojakenye ni cunu konye.Ésaie 53.4

Lépwona nimelé me lé âcén Iésu

Luka 9.57–62

¹⁸ É ha a céiu tan, ke hiwon ni apulie na élé aujeni Iésu. Ke me e alilé, ke e pii te lépwo acémun den pie, me lé tai gaale ko a céiu duaan ne gaale cemwo ko a jilé.

¹⁹ Ke é mulang, ke e âbé céiieng wo pa céiu *dotéén ko patén, ke e pii ten pie: «Pa apipune, [nimung me] é âcém, na ati he ce piduaan celi go bo â hen.»

²⁰ ††Ke e hegi ne ten wo Iésu pie: «Ni wota apiaba, ke pwo ni amwaale telé; ke ni meni, ke pwo ni mwonahilé. Kehe woéo, pa *Nahi Apulie, ke te tice duaan celi me é mwaale hen.»

²¹ †††Ke piwien mwo ne ko pace céiu apulie celi nimen me e âcén Iésu, be e pii ten pie: «O te jan me é mwo mi â pineduwo caa tong?»

²² Ke e hegi ne ten wo Iésu pie: «Ûhu, go âbé céing, ke go necu ni amele, me lé te pineduwolé!»

† 7.29 Maréko 1.22; Luka 4.32 †† 8.4 Lévitique 14.1–32; Mataio 9.30; Luka 17.14

‡ 8.11 Luka 13.29 †† 8.12 Mataio 22.13, 25.30; Luka 13.28 ††† 8.17 Ésaie 53.4 ††† 8.20 2 Korénit 8.9 ††† 8.21 1 Rois 19.20

E pacuwohi a udan wo Iésu

Maréko 4.35–41; Luka 8.22–25

²³ E taa pwo ong wo Iésu, ke lé âcén wo lépwo acémun den. ²⁴ †Alecehen, ke e tabuhi tahieng me ubwo a dan, ke e taa jíé ha ali ong. Ke mepwo wo Iésu, ke e teko pule ha ali ong. ²⁵ Ke lé paûmiêeng wo lépwo acémun den, ke lé pii ten pie: «Padaame! Go celuimikenye, be genye o caa mwiiê!» ²⁶ ††Ke e pii telé pie: «É mu ko ade na mwotikewé? Te junihe wahin kuti ni céihi tewé!»

Ke e cuwoda, ke e cihe okéé ne ko ali dan me a jíé. Ke e cuwo ali ta-amu, ke te ju au kuti.

²⁷ Ke lé téetihi, ke lé pipii telé pie: «He woo pa apulie ce, na lu piténeeng a dan me a jíé?»

E pawiehi ni duéé @ mu ko lupwo alo apulie

Maréko 5.1–20; Luka 8.26–39

²⁸ Lé tuie ngen wo Iésu me lépwo acémun den ha a duaan ne gaale cemwo [ne pejié Galilé] ne ha amu Gadara. É ne ha amu naa, ke pwo lupwo apulie na pwo duéé kolu. Ke te junihe mwoti ni apulie kolu, be lupwo a-okéé, ke te junihe pwo niihelu. Ke time lé mu uce piâ ha a duaan naa.

Ke me lu ali Iésu, ke lu te wie kuti mu he iitih, ke lu opé beniieng. ²⁹ †Ke lu toii da pie: «Pa *Naî Padué, ade aceli nimem me go pwo temu? Nimem me go pwocuhinaado temu, ânebuhe ace benaamwon ko pwocuhinaado?»

³⁰⁻³¹ Ke lé cuwokon ne li duéé, ke lé pii ten pie: «Mepie go pawiekeme, ke go pwo me geme gaale he ni puwokwo ne!»

Be pwo a pubu puwokwo, na lé teko um ne gaale cemwo.

³² Ke e hegi ne telé pie: «Geé ân!»

Ke lé wie mu ko lupwoli apulie, ke lé taa he li puwokwo. Ke lé te téte kuti ne li puwokwo mu pwo ali juwole ole he jíé. Ke lé tai mwiiê nelang.

³³ Ke wo lépwo awéihi puwokwo, ke lé te téte kuti nge ha a mwopopwaalé. Ke lé piuti ati a jepule ko ana e tuie ne ko lupwo apulie naa. ³⁴ Ke lé te tai âbé kuti céii Iésu ne ni apulie mu ha a mwopopwaalé. Ke me lé alieng, ke lé wâgo kon pie, me e engen mu ha amu telé.

E pwo me wâé pa céiu tebwomwa

Maréko 2.1–12; Luka 5.17–26

9 ††E mwojuia mwo wo Iésu pwo ong ne ha a mwopopwaalé [Kapernaüm] he na e pimu lang. ² Ke lé âbé céiieng ne ni apulie, he lé pipaadoimibé ne pwo a apule pace céiu béélé na tebwomwa nang.

† 8.24 Psaume 4.9 †† 8.26 Mataio 14.31; Psaume 89.10 † 8.29 Maréko 1.24; Luka 4.41 †† 9.1 Mataio 4.13

Ke me e alihi a céihi telé wo Iésu, ke e pii te pali tebwomwa pie: «Go mwoiu, go pa bééng! Be caa pineuhi ni ta pwo tem!»

³ Ke wo lépwo béé *dotéén ko patén na lé mu lang, ke lé piniimihi pie, 'E pii me ta Padué wo pa apulie ce [be e pwo me piwielu me weeng]!'

⁴ ††E te temehi nina lé niimihi wo Iésu, ke e pii pie: «É ko ade na ta ni pwonimewé? ⁵ Ade aceli piticecoon? Me é pii ten pie: "Caa pineuhi ni ta pwo tem", ai me é pii ten pie: "Go cuwoda, ke go engen"? ⁶ ††[Ke hemepie jan me é pwo me e engen ne ânebuhewé ati] ke geé bo temehi pie, pwo mwomwon dong, woéo, pa Nahi Apulie, me é pineuhi ni ta pwo te ni apulie ne pwo bwohemwo.»

Ke e pii te pali tebwomwa pie: «Go cuwoda, ke go pé apule tem, ke go âmwwo pelem.»

⁷ Ke e te cuwoda kuti wo pali, ke e âmwwo ha a pomwa ten. ⁸ Ke me lé alihi anaa ne ni apulie, ke mwotilé. Ke lé pipaunu Padué, be e ne ni *pipwo-junuun na ubwo te ni apulie!

E tode Mataio (Lévi)

Maréko 2.13–17; Luka 5.27–32

⁹ E engen wo Iésu, ke e ali pa apulie na pii kon pie Mataio, pa *atai mwani cuhi puni apulie [me de lépwo Roma] he e ko tebwwo ha a mwotai mwani ††† ten. Ke e pii ten wo Iésu pie: «Go âbé céing!»

Ke e te cuwoda kuti wo panaa, ke e âcén Iésu.

¹⁰ É alecehen, ke lé wiinaado pele Mataio wo Iésu me lépwo acémun den. Ke hiwon ni apulie na lé piwiinaado me woélé: wo lépwo atai mwani, me ni béé apulie na ta ni mulihelé.

¹¹ †Ke me lé alihi anaa wo lépwo *Farasaio, ke lé pii te lépwo *acémun de Iésu pie: «É mu ko ade na wo pa caa tewé, ke lé piwiinaado me lépwo atai mwani, ke ni béé apulie na ta jélé?»

¹² Ke e te ténéle wo Iésu, ke e pii telé pie: «Time lé uce hane ce dotéén wo lépwona te wâé jélé, kehe te icehi lépwona cunu jélé. ¹³ ††Wâé heme geé temehi a bwopiinen na e pii wo Padué pie: *Time uce a *âpwailo ko wota ana wâé tong. Kehe nimung ko a pipwoéhe.*

Osé 6.6

«Be time é uce âbé tode nina lé niimihi pie wâé ni mulihelé. Kehe é âbé tode nina lé temehi pie ta ni mulihelé.»

A ocine ko a pipaciile

Maréko 2.18–22; Luka 5.33–39

¹⁴ ††Lé tuiebé pele Iésu wo lépwo béé acémun de *Ioane pa apipuu apulip. Ke lé pii ten pie: «Wogeme,

†† 9.4 Mataio 12.25; Luka 9.47; Ioane 2.25 ††† 9.6 Ioane 17.2 ††† Mwotai mwani—Mwotai mwani cuhi puni apulie. Bureau des impôts. † 9.11 Luka 15.2 †† 9.13 Osé 6.6; Mataio 12.7 ††† 9.14 Luka 18.12

me lépwo Farasaio, ke geme te cuwo ko *pipaciile. Be geme patupwo wiinaado beme geme pwoiitihi. Kehe é ko ade na time lé uce pipaciile wo lépwo acémun dem?»

¹⁵ Ke e hegi ne telé wo Iésu pie: «Kona te piwahin lépwona todelé ne ko a piaten, heme e mwo teko mu pelelé wo pa apiaten? Ûhu! Be e o bo âbé a tan na o bo pé kojálé pa apiaten. Ke é mulang na lé o bobé pipaciile.

¹⁶ «Te tice pace céiu apulie celi me e pé ace memwaanu celi mwo te ju wâé, me e woli ne ko ace memwaanu celi ukéiu. Be [mepie e puu a mwaanu, ke] bo nihe ubwo a tie kon.¹⁷ Ke geé niimihi a *mwotabe na pwo ko iiwota. Be time nye uce pé ace tabe megele celi mwo coho, me nye pa a mwotabe na caa ukéiu. Be [pwocoon me cibú †, ke] e bo pabuwohi, ke genye o patieden a tabe megele me ni mwotabe. Ûhu! Wâé heme nye ne a tabe megele na mwo coho ne ha a mwotabe na mwo coho, beme cile ehi a tabe megele, me ali mwotabe.»

E pwo me wâé lu alo toomwo

Maréko 5.21–43; Luka 8.40–56

¹⁸ Me e mwo ko pii telé anaa wo Iésu, ke e âbé céieng wo pa céiu apulie na piubwo nang ne ha amu. Ke e tidihii jilin he pwahamii Iésu, ke e pii ten pie: «E mwo teko ju mele ê naîng! Go âbé ne ni im huîin, beme e o mulie mwo.»

¹⁹ Ke lé cuwoda wo Iésu me lépwo acémun den, ke lé âcén.

Ê toomwo na 12 ni jo ko a cunu kon

²⁰ É he lé ko â he pwaaden, ke e tuiébé ê toomwo na caa 12 ni jo na cunu nang hen, be e mu tuié ni be-naamwon na e mu téte kon a cewéle. E piâbé alecehe Iésu, ke e ti ko a baaé epwénen. ²¹ ††Be e pipii ten pie: “Mepie é te ju ti ko a epwénen cehi, ke o caa te tieden a cunu kong.”

²² Ke e biteeng wo Iésu, ke me e alieng, ke e pii ten pie: «Go mwouiu, go êje! Be caa wâé go, mu ko a céihii tem!»

Ke te tieden kuti ali cunu kon.

Ê naî pa apulie na piubwo nang

²³ E tuié wo Iésu nge ha a pomwa te pa apulie na piubwo nang. Ke e ali lépwo acuu oopwé ‡ he lé caa ko piwâam ne ko a pineduwo, ke te junihe ubwo kuti ni pwocihe lang.

²⁴ Ke e pii telé pie: «Geé engen! Geé ko pii pie e caa mele; kehe woéo, ke é pii pie e teko ju puluta ††!»

† Pwocoon me cibú—Omehi 2enote Mataio 14.36 ‡ Lépwona acuu oopwé—Me lé neduwohi apulie wo lépwona Juif, ke pwo lépwona lé cuu oopwé. †† Geé ko pii pie...e teko ju puluta—Grek: Caa time e uce mele ê cuwo ewa, kehe e teko puluta.

†† 9.21

Ke lé pihoonieng. ²⁵ Ke e tai pawielé wo Iésu, ke e taa ha ali mwa. Ke e pétaa ko a i êgi cuwo nahi toomwo, ke e te cuwoda kuti.

²⁶ Ke lé te piuti kuti pitihi a duaan naa a jepule kon.

Lu niê mwo wo lupwo bwi

²⁷ ††É mulang, ke e engen wo Iésu. Ke lu âcén wo lupwo bwi na alo julu, he lu ko toii céin pie: «Pa *Naî Davita, go pipwoééhemu!»

²⁸ Ke me e tehene nge pelen wo Iésu, ke lu âbé céieng wo lupwoje. Ke e pii telu pie: «Kona geu caa teko céihii kuti pie, jan ne kong me é pwo anaa?»

Ke lu hegi ne ten pie: «Éa, go Padaame.»

²⁹ Ke e pétaa ko ni naamiilu wo Iésu, ke e pii telu pie: «Wâé heme pwo ne teu ana geu céihii ne kon!»

³⁰ †††Ke lu caa te niê kuti. Ke e pii mwouihii telu pie: «Geu nemwo pwojepule ko nina é pwo teu!»

³¹ Kehe icehi ana he lu wie, ke lu pwojepule ko nina e pwo wo Iésu, pitihi a amu naa.

E pwo me e cihe pa huuhu

³² Ke me lu engen koja Iésu wo lupwoje, ke lé pébé céiieng pa apulie na huuhu nang, be pwo duéé kon.

³³ †††Ke e peni ali duéé wo Iésu, ke e te cihe kuti wo pali huuhu.

Ke lé téetieng ati ne ni apulie na lé mu lang, ke lé pii pie: «Time genye mu uce alihi celi wonaa, ne ha amu *Isaraéla!»

³⁴ ††Kehe icehi ana lé pii wo lépwo Farasaio pie: «E peni ni duéé ko a junuu *Caatana, pa daame he ni duéé!»

E pahede ni 12 apostolo ten

Maréko 6.7–13; Luka 9.1–6

Te junihe ubwo a pitii âdaanu

³⁵ †††E engen he ni pwomwo ubwo ke ni mwopop-waalé wo Iésu. Ke e pacémuni ni apulie ne he ni *mwotapitihi. Ke e patemehi a Pwooti Wâé ko a Mwametau [he Miiden]. Ke e pwo me tieden ni cunu me ni picani. ³⁶ †††Ke me e alihi a pubu apulie, ke e te junihe pipwoééhelé. Be caa mwaale jélé, ke pitupwo jélé, pwohewii ni muto na tice awéilé.

³⁷ †††Ke e pii te lépwo acémun den pie: «Nihe ubwo a pitii âdaanu na me pwo, kehe icehi ana time uce hiwon ni apenem. ³⁸ Geé pwoiitihi, me ilehi koja pa eapwihii apwoamu, me e ne mwobé ce béé apenem, beme lé pitii âdaanu.»

†† 9.27 Mataio 20.29–34 ††† 9.30 Mataio 8.4 ††† 9.33 Maréko 2.12 † 9.34 Mataio 12.24; Maréko 3.22; Luka 11.15 †† 9.35 Mataio 4.23; Maréko 1.39 ††† 9.36 Nombres 27.17; 1 Rois 22.17; Zakari 10.2; Mataio 14.14; Maréko 6.34 †† 9.37 Luka 10.2

Ni nii lépwo 12 apostolo

10 †E tode lépwo 12 *apostolo ten wo Iésu, ke e ne telé a pihuô beme lé peni ni duéé, ke me lé pwo me tieden ni cunu me ni picani te ni apulie. ²Weengi ni nii lépwo 12 apostolo:

Simon, na pii mwo kon pie Pétéru;
 André, pa âjiénen;
 Cang, pa naî Zébédé;
 Ioane, pa âjiéne Cang;
³Filip;
 Bartélemi;
 Toma;
 Mataio, pa *atai mwani cuhi puni apulie;
 Cang, pa naî Alfé;
 Tadé †;
⁴Simon, pa *Zélote*‡;
 Judas Iscariot, pana e bwo pipwohuô te Iésu.

E pahedelé ngen

⁵E pahede lépwo 12 apostolo naa wo Iésu, me lé â he ni amu. Ke e ne ni pihuô telé, ke e pii telé pie: «Geé nemwo â pele ni apulie na time uce lépwo *Juif. Ke geé nemwo taa he ni mwopopwaalé ha amu *Samari. ⁶‡Kehe geé te â céii cehi ni apulie *Isaraéla, be lé pwohewii ni muto na lé pipatieden. ⁷‡Ke geé pipate-mehi nge he pwaaden pie: “Caa é mwonu a *Mwametau he Miiden.”

⁸«Ke geé pwo me tieden ni cunu, ke geé pwo me lé mulie ni amele, ke geé pwo me wâé ni katia, ke geé peni ni duéé mu ko ni apulie. Be ana geé hegi he te tice cuhin, ke wâé heme geé ne mwo, me te tice cuhin. ⁹‡Ke me geé engen, ke geé nemwo pé ce mwani megele, ai mwani pwojo. ¹⁰‡Ke geé nemwo pé ce élele, me ce dihibwaawé, me ce bwajaawé. Geé te cuwohe ace epwén celi te céiu, be wo pa apenem, ke wâé heme e hegi a wiinaado ten me a cemen.

¹¹«Hemepie geé taa ha ace céiu pwomwo ubwo, ai ace céiu mwopopwaalé, ke geé hane pace apulie celi jan ne kon me e hegikewé. Ke geé mu pelen dieli geé bo engemwo mu ha a duaan naa. ¹²§Ke me geé taa ha ace céiu pwomwo, ke geé *adéi a pwomwo naa. ¹³Ke me lé hegikewé ehi, ke e o mu pelelé a adéihi, ke mepie time lé uce hegikewé ehi, ke geé te pémwójuiéhi mwo a adéihi tewé.

¹⁴‡«Ke mepie te tice apulie celi lé hegikewé me tabemi ni pwooti tewé ne ha ace céiu duaan, ke geé wie

† 10.1 Maréko 6.7; Luka 9.1 †† Tadé—A niin mwo pie Jude. Pa naî Cang. Omehi Luka 6.14–16, Ioane 14.22, Apostolo 1.13.
 ‡ Zélote—Grek: Cananite. Pa ju apulie Judé, na nimen me e pawie lépwo Roma mu pelelé. †† 10.6 Jérémie 50.6 ‡‡ 10.7 Mataio 3.2, 4.17; Luka 10.9,11 ‡‡† 10.9 Luka 10.4 ‡‡‡ 10.10 Luka 10.7; 1 Korénit 9.14 § 10.12 Luka 10.5–6 §† 10.14 Luka 10.10–12; Apostolo 13.51

mulang, ke geé tagilihi ni muu pule ko ni awé †† [beme geé habwii pie time uce wâé ni huô telé]. ¹⁵‡Ke é pii tewé a juuju pie: É ha ace Tan celi e bo tauti ni apulie hen wo Padué, ke o te junihe ubwo ace cuhinaado telé koja lépwo *Sodome me Gomore [li te junihe ta ni huô telé].»

O pwotahi ne kowé

¹⁶‡‡«Geé téné! É pahedekewé pwohewii ni muto nge ha awieme ni wota apiwii. Wâé heme geé piengen cile pwohewii ni bwien, ke me bwala gewé pwohewii pa meni pwojo. ¹⁷‡Be lé o imwikewé, ke lé o péékewé nge he ni mwotautinaado. Ke lé o tatikewé ko bwaliwota ne he ni *mwotapitihii. ¹⁸Ke lé o teuukewé nge he pwa-hamii ni gupéno me ni daame, beme lé tautikewé, wonaa mu kong. Wonaa beme ne tewé beme geé cihe telé kong, é ne mwo he pwhamii nina time uce ni Juif.

¹⁹«É heme lé bo péékewé, ke geé nemwo pwo me gia gewé ko ce bwopiinen telé. Be é ha a benaamwon naa, ke wo Padué, ke e bo te ne tewé ce pwooti celi me geé pii. ²⁰‡Be time o uce wogewé celi geé o cihe, kehe a Jene pa Caa tewé na e bo cihe kowé.

²¹‡‡«[É ha a benaamwon naa] ke wo pa céiu apulie, ke e o bo ne pa âjiénen beme taunueng. Ke e o wonaa mwo wo pa caa te ewa ne ko pa naî. Ke ni ewa, ke lé bo cuwode ni nyaa me caa telé, beme lé taunulé. ²²Ke lé o téétikewé mu kong ati ne ni apulie. Kehe wo paceli e bo cumang die ha anebwén [ko a mulihen] ke e o bo celuimieng wo Padué.

²³«Ke me lé pwo me geé picani ne ha ace céiu pwomwo ubwo, ke geé cela nge ha ace céiu. É pii tewé a juuju pie: Mwo time geé uce engen ati he ni pwomwo ubwo Isaraéla, ke é o caa mwojuia mwo, woéo pa Nahi Apulie.»

O wonaa mwo tewé

²⁴‡‡‡«É pii tewé pie: Wo pa acémun, ke time e uce piwéden koja pa apacémunieng. Ke wo pa apenem, ke time e uce piubwo nang koja pa daame hen. ²⁵‡‡‡Be wo pa acémun, ke wâé heme e pwohewii pa apacémunieng. Ke wo pa apenem, ke wâé heme e pwohewii pa daame hen. Be mepie lé pii ko pa eapwihii pwomwo pie, Caatana ¹⁸, ke lé o te junihe pii me ta mwo nina élé ha a pwomwo naa.»

††† Tagilihi ni muu pule ko ni awé—Habwii pie, lé tahi taabwoni lépwo na ta ni huô telé. §† 10.15 Mataio 11.24; Jude 7 §†† 10.16 Luka 10.3; Roma 16.19 §† 10.17–20 Maréko 13.9–11; Luka 12.11–12, 21.12–15 §† 10.20 Ioane 14.26 §†† 10.21 Miché 7.6; Mataio 10.35; Maréko 13.12; Luka 21.16 §††† 10.24 Luka 6.40; Ioane 13.16, 15.20 §††† 10.25 Mataio 9.34, 12.24; Maréko 3.22; Luka 11.15
¹⁸ Caatana—Bélzébul. Omehi Caatana ne ha a Niinaado (Vocabulaire) ha anebwén ko a tii.

Geé nemwo pwo me mwotikewé

²⁶ †«Geé nemwo pwo me mwotikewé ko ni apulie. Be ati ni naado na neduwohi, ke o bo habwii. ²⁷ Ke ni naado na é pii tewé neduwohi, ke geé pii beetihi ne ha a pwéelang. Ke ni naado na pii ne he pwojénewé, ke geé pii beetihi ne ha awiemewé. ²⁸ ††Geé nemwo pwo me mwotikewé ko ni apulie na lé taunuhi a ééwé, be time o uce jan me lé taunuhi a jenewé. Wâé heme geé pwo me mwotikewé ko Padué. Be te weeng cehi na jan me e taunuhi a ééwé me a jenewé ne ha a miû.

²⁹ «Geé cuwoteeke alihi ni meni na wahin jélé: Nye icuhi lupwoce meni celi alo, ne ko a mwani celi te céiu. Kehe icehi ana te tice mu kolé celi e o tupwo ti ne he pule, hemepie time e uce temehi wo Padué Caa tewé. ³⁰ Ke wogewé, ke e te tai temehi ati ni jéhi ni apuniwé. ³¹ †Ke é mu ko anaa, na é pii tewé pie: Geé nemwo pwo me mwotikewé! Be te junihe pwonaado ne kowé ne he pwahamii Padué, koja ni meni na te nihe hiwon jélé!»

Geé nemwo pineduwoéo

³² «Wo pa apulie na e pii ne he pwahamii ni apulie pie, weeng pa apulie tong, ke woéo mwo, ke é o pii mwo pie weeng ke pa apulie tong, ne he pwahamii Caa tong jeda he miiden. ³³ ††Kehe wo pana e pii, ne he pwahamii ni apulie, pie time e uce temehié, ke woéo mwo, ke é o te pii, ne he pwahamii Caa tong jeda he miiden, pie time é uce temehieng.»

Lé pipiiden ne ni apulie mu kong

³⁴ ††«Geé nemwo niimihi pie é âbé beme é pébé a péém ne pwo bwohemwo. Úhu! Woéo pa watihen me time lé uce piténelé ne ni apulie ††. ³⁵ †††Be é âbé me é pineité lupwo pwéénemeewa, me lu téénemeewa, me lu amwaan.³⁶ Ke wo lépwona lé mu ha a mwa te pa apulie, ke bo woélé lépwona lé pwotahi ne kon.»

Miché 7.6

Geé patupwo ni mulihewé me dong

³⁷ «Wo paceli te junihe eânimen de lu nyaa me caa ten kojaéo, ke time uce jan me pa acémun dong. Ke wo pana te junihe eânimen de pa naïn, me ê naïn kojaéo, ke time uce jan me pa acémun dong. ³⁸ †Wo pana time e uce canihi a *kuricé ten, me e âbé céing, ke time uce jan me pa acémun dong. ³⁹ Ke wo pana ni-men me e cile a mulihen, ke e o patieden. Kehe wo pana e patieden a mulihen mu kong, ke e o bo tooli *a ju mulip.»

† 10.26 Maréko 4.22; Luka 8.17 †† 10.28 Cang 4.12 † 10.31 Mataio 6.26 †† 10.33 Maréko 8.38; Luka 9.26; 2 Timoté 2.12 †† 10.34–36 Luka 12.51–53 ††† Dernière phrase—Grek: Kehe [é pébé] a teua. ††† 10.35 Miché 7.6 § 10.38–39 Mataio 16.24–25; Maréko 8.34–35; Luka 9.23–24, 17.33; Ioane 12.25

Wo pana e hegikewé ke e hegiéo

⁴⁰ ††«Hemepie e hegikewé wo pace céiu apulie, ke woéo pana e hegiéo. Ke wo pana e hegiéo, ke e hegi mwo pana e neéo bé. ⁴¹ Ke mepie e hegi pace péroféta mu ko ana pa péroféta, ke o bo pwo ace cemen celi pwohewii ana ne te ni péroféta. Ke mepie e hegi pace céiu apulie celi e *mwomwon ne he pwahamii Padué, be e mwomwon, ke o bo pwo ace cemen celi pwohewii ana ne te pana e mwomwon. É pii tewé a juuju pie: ⁴² Mepie e ne ace mwoûdu ko tabe bwala te ace pibéé ni cuwo nahi ewa ce, be pa acémun dong, ke e bo hegi mwo ace cuhin.»

11 É he e pii ati ni pihuô naa wo Iésu te lépwo 12 acémun den, ke e engen mulang, ke e â he ni béé pwomwo ubwo ne ha a duaan naa. Ke e pacémuni ni apulie, ke e pipatemehi telé a Pwooti Wâé.

Pa Mesia na lé ucéiang

Luka 7.18–23

² É he e mu he karépu wo *Ioane pa apipuu apulie, ke e téne a jepule ko Kériso, me nina e pwo. Ke e pahede lépwo béé acémun den, ³ beme lé â tahimwo Iésu pie: «He caa te wogo kuti pali *Mesia li me e bo tuiébé? Ai, me geme mwo te ucéi pace céiu?»

⁴ Ke e hegi ne telé wo Iésu pie: «Geé mwojuia mwo, me geé â piuti te Ioane nina geé téne, me nina geé alihi. ⁵ †††Be lé caa niê mwo wo lépwo bwi; ke lé caa engen ehi wo lépwo tebwa; ke caa wâé mwo wo lépwona katia jélé; ke lé caa téne mwo wo lépwona bwéjé jélé; ke lé caa mulie cemwo wo lépwo amele; ke lé caa hegi a Pwooti Wâé wo lépwona tice delé! ⁶ Adéi pana e ali temehié, me céihi ne kong ††!»

E cihe ko Ioane wo Iésu

Luka 7.24–35

⁷ Ke me lé mwojuia mwo wo lépwo acémun de Ioane, ke e pii wo Iésu te ni apulie na lé mu lang pie: «É he li geé â ha a da me geé téne Ioane, ke he ade aceli geé â alihi? [Pa apulie na pipwoééhen na e pwohewii] a womeéle celi e papenemihi na a dan? ⁸ Úhu! Ke kona he ade aceli geé â alihi? Pace céiu apulie celi e cuwohe ace epwén celi nihe wâé? Úhu! Be nina te junihe wâé ni epwénelé, ke nina lé mu he ni pwomwo he daame! ⁹ Te ade aceli geé â alihi? Pace céiu péroféta? Éa, ke é pii tewé pie: Wo panaa, ke pa péroféta ubwo! ¹⁰ †††Be te wo Ioane kuti, na e piieng wo Padué ne he ni tii iithi pie:

É bo neole pa apipépwooti tong.

E bo ânebuhem,

me e pwopweehi a pwaadeniim.» Malachie 3.1

†† 10.40 Maréko 9.37; Luka 10.16; Ioane 13.20 ††† 11.5 Ésaie 35.5–6, 61.1 §† Ai, Adéi pana time e uce piâ ité [koja Padué] mu kong. ††† 11.10 Malachie 3.1; Luka 1.76

¹¹ [E pii mwo wo Iésu pie]: «É pii tewé a juuju pie: Te tice pace apulie pwo bwohemwo, celi e piwéden koja Ioane pa apipuu apulie. Kehe icehi ana wo pana te nihe wahin nang ne ha a *Mwametau he Miiden, ke te nihe piubwo nang koja Ioane. ¹² †Tabuhi ha a benaamwon na e pipuu apulie wo Ioane dieli jenea, ke lé hane ne ni apulie, me lé ne, ne éni pwo bwohemwo, a Mwametau he Miiden ko ni nihelé ††. ¹³ Be é ânebuhe Ioane, ke ni *patén de Moosé, me ati ni péroféta, ke lé pipatemehi te ni apulie [pie e o caa ne a Mwametau ten wo Padué]. ¹⁴ †Geé céihi ne ko nina é pii tewé: Wo Ioane, ke wo péroféta *Élia li me e bo âmwobé ††.

¹⁵ «Wo paceli pwo ce pwojéenen me e téne, ke wâé heme e téne!»

Lé pipiikemu me Ioane

¹⁶⁻¹⁷ «É bo pipwohewii ne ko ace de ni apulie jenea? Lé pwohewii ni cuwo nahi ewa na lé pidaataa ha apimu te ni apulie. Be [muhi te ni béén me lé jele me ni béélé]. Ke lé pii telé ni béélé pie: “Geme cuu oopwé tewé, ke time geé uce pwolu. Ke geme pwo a nyebi ko mele, ke time geé uce é!”

«Ni apulie jenea, ke pwohewii ni cuwo nahi ewa naa, ¹⁸ be e tuiebé wo Ioane pa apipuu apulie, ke e pawie wiinaado he ni béé benaamwon, ke time e uce ûdu tabe megele, ke lé pii ne ni apulie pie: “Pwo duéé kon!”

¹⁹ ††«Ke é tuiebé, woéo pa Nahi Apulie, ke é wiinaado me ûdu [pwohewii ni béén]. Ke lé pii ne ni apulie pie: “Wo paje, ke te junihe pa aûdu, ke pa awiinaado! Ke e pabéé ni atai mwani, me ni béé apulie na ta jélé!”

«Kehe [a juuju ana nye mu pii pie]: “Nye alihi temehi a pitemang ne he ni bwomu [te nina lé mulie ha a pitemang].”»

Lé pwocuhinaado ne nina muhi telé me lé céihi

Luka 10.13–15

²⁰ Ke e cihe me mwoiu te ni apulie wo Iésu ne he ni pwomwo ubwo ko ni *pipwojunuun na hiwon na e caa pwo ne hen, be time lé uce pitaatééhi ni mulihelé.

²¹ ††Ke e pii telé pie: «Geé pipwocile, wogewé ni apulie Korazin me Betsáida! Be o bo ne cuhinaado tewé! Be é caa pwo ni naado na nihe ubwo ne pelewé [ke time geé uce céihi]! Geé cuwoteeke niimihi lupwo pwomwo ubwo Tir me Sidon ††† ânebun [be te nihe ta ni huô te ni apulie lang]. Kehe icehi ana hemepie lé alihi ana é pwo ne pelewé, ke wieli caa te é bwolihi celi lé

† 11.12–13 Luka 16.16 †† Ne...ko ni nihelé—ai Cubwoni. Omehi Luka 16.16. † 11.14 Malachie 3.23; Mataio 17.10–13; Maréko 9.11–13 †† Wo péroféta Élia li me e bo âmwobé—Lé pii ne ni péroféta ânebun pie, e bo âbé wo pace péroféta celi e pwohewii péroféta Élia, ânebuhe a bwo tuiebé te pa Mesia. †† 11.19 Mataio 9.14 ††† 11.21–22 Ésaie 23; Ézékiel 26–28; Joël 4.4–8; Amos 1.9–10; Zakari 9.2–4 ††† Tir me Sidon—Lupwo amu na time uce lupwo amu ko a Isaraéla.

taatééhi ni mulihelé. Ke me lé o habwii ko ace bwo cuwohe cang delé, me pitimilé he dep [§]. ²² Be é pii tewé a juuju pie: É ha ace Tan celi e bo tauti ni apulie wo Padué, ke o te junihe ubwo ace cuhinaado tewé koja lépwo Tir me Sidon.

²³ ††«Ke te piwien ne mwo kowé, wogewé ni apulie Kapernaüm. Be geé niimihi pie pwonaado ne kowé, ke geé pwohewii Padué †††. Ôhu! E bo nekewé ole céii lépwo amele! Be e pwo ni naado na te junihe ubwo ne pelewé. É hemepie e pwo ni naado naa ne *Sodome, ke wieli me e o mwo teko mu jenea a pwomwo ubwo naa. ²⁴ ††Ke é pii tewé a juuju pie: É ha ace Tan celi e bo tauti ni apulie wo Padué, ke o te junihe ubwo ace cuhinaado tewé koja lépwo *Sodome!»

Padué Caa me ni naîn

Luka 10.21–22

²⁵ ††É ha a benaamwon naa, ke e pii wo Iésu pie: «É pwo-olé tem, go Caa, Padaame he a miiden me a bwohemwo, be go neduwohi ni naado naa koja lépwo atemehinaado me lépwo apitemang, ke go habwii te lépwona time lé uce cémun ^{§†}. ²⁶ Be te âcehi ana te nimem kon.»

²⁷ ††[Ke e pii te lépwona lé téneeng pie]: «Ati nina e pele Caa tong, ke e caa ne tong. [E caa te pihabwiieng dong, beme é temehieng ehi.] Te weeng cehi na e temehié, woéo pa Naîn. Ke te woéo cehi na é temehieng, ke é habwiieng te ni béén beme lé temehieng mwo.»

É bo pwo me geé mwaale

²⁸ †††«Geé âbé céiié, wogewé nina junihe téé ni âneule tewé, ke mwaale gewé. Be é bo ne ce mwaale tewé. ²⁹ Geé pé a âneule na é ne tewé, ke geé engen ne ko ni pihuô tong. Be pana bwala a pating, ke é pwo me piwahin jo. Ke me geé âbé céiié, ke geé o tooli a ju mwaale. ³⁰ †††Éa, be a âneule na é ne tewé, ke te ju pwia, ke ni pihuô tong, ke te ju ticecoon a bwo âcehin.»

Pa eapwihii a tan iitihii

Maréko 2.23–28; Luka 6.1–5

12 †††É ha a céiu *tan iitihii, ke lé [uti a pwaaden na e] pitahagéi ni apwoamu wo Iésu me lépwo acémun den. Ke mene lépwo acémun den, ke lé te pwo me tabwo ni ace blé, ke lé wii.

§ Cuwohe cang...pitimilé he dep—Ana lé pwo wo lépwo Juif heme lé pininim, ai heme lé é. §† 11.23 Genèse 19.24–28; Ésaie 14.13–15 §†† 2e phrase—Grek: Kona geé taa he miiden? §† 11.24 Mataio 10.15; Luka 10.12 §†† 11.25 1 Korénit 1.26–29 §† Lépwona time lé uce cémun—Grek: Ni cuwo nahi ewa. §† 11.27 Mataio 28.18; Ioane 1.18, 3.35, 10.15, 17.2; Filipi 2.9 §†† 11.28 Jérémie 31.25 §†† 11.30 1 Ioane 5.3 §§§ 12.1 Deutéronome 23.26

² †Ke me lé alihi anaa wo lépwo *Farasaio, ke lé pii te Iésu pie: «Go alihi ana lé pwo ne ni acémun dem! Be a naado na iitih, ha a *tan iitih!»

³ ††Ke e hegi ne telé wo Iésu pie: «Kona time geé mu uce pine ne he ni tii iitih ana e pwo wo pa daame *Davita? Be é ha a céiu tan, ke menelé, woélé me ni béén. ⁴ †Ke e taa ha a *mwaitih [na pwo ko mwaanu]. Ke e pé ni pwoloa na ne me de Padué, ke lé eni me ni béén. Kehe ni pwoloa naa, ke te ni *apwoâpwailo cehi na pwo mwomwon delé me lé eni.

⁵ ††«Ke geé pine ne mwo he ni *patén de Moosé pie: Lé penem ha a mwaitih he ni tan iitih wo lépwo apwoâpwailo. Ke time uce ta ne he pwahamii Padué!

⁶ ††Ke é pii tewé pie: E éni ana junihe piwéden koja a mwaitih! ⁷ ††Be e pii wo Padué ne he ni tii iitih pie: *Time uce a âpwailo ko wota ana wâé tong. Kehe nimung ko a pipwoééhe.*

Osé 6.6

«Ke wogewé, ke time geé uce temehi ace bwomune a pwooti naa, be geé tauti ni apulie ce, na time lé uce pwo celi ta ne he pwahamii Padué. ⁸ Ke woéo pa Nahi Apulie, ke pa eapwih a tan iitih.»

E pwo me tieden a cunu ha a tan iitih

Maréko 3.1–6; Luka 6.6–11

⁹ É alecehen, ke e taa ha a *mwotapitih wo Iésu.

¹⁰ ††Kehe e ko mu lang wo pa apulie na mele a in.

Ke nime ni Farasaio me [lé alihi aceli e o pwo wo Iésu, beme] lé o bo pipé ne kon. Ke lé te pwo me tahimwoeng pie: «He te pwo mwomwon denye, me genye pwo me tieden ace cunu ko pace céiu apulie ha a tan iitih?»

¹¹ †Ke e hegi ne telé pie: «É hemepie e tupwo ne ha ace pwon ace muto tewé celi te ju céiu nang, ha ace tan iitih, ke kona geé o pwo de? Geé â céieng da mu ha a pwon! ¹² Be te junihe pipwonaado ne ko pa apulie koja a muto! Ke é mu ko anaa, na te ne me nye pwo ana wâé ha a tan iitih.»

¹³ Ke e pii te pali apulie pie: «Go cinebé a im.»

Ke e cine ngen a in, ke caa te wâé mwo kuti, pwohewii a céiu.

¹⁴ ††Ke wo lépwo Farasaio na lé mu lang, ke lé wie mu ha ali mwotapitih. Ke lé â pwopitih, beme lé hane ace bwopwonen me lé taunu Iésu.

Pa eabwé na pipégalieng

¹⁵ Me e téne wo Iésu pie, lé ko pihane ace bwopwonen me lé taunueng, ke e engen mu ha a duaan naa. Ke hiwon ni béén na lé âcén, ke e pwo me tieden ni

cunu kolé. ¹⁶ ††Ke e cihe me mwoiu ne kolé pie: «Geé nemwo pipatemehié!»

¹⁷ Ke ni naado naa, ke e tuie, beme e pacuwohi ali e pii wo Padué, na e pwaadeniin bé wo péroféta Isaia pie:

¹⁸ †††*Weengi pa eabwé tong, na é caa pipégalieng, pana te junihe eânimung den. É ne kon a *Jenen Iitih tong, ke e bo pipatemehi te ni bele a juuju ke a bwo celuimilé.*

¹⁹ *Time e o uce cihe okéé, ke time e o uce cihe me ubwo, ke time nye o uce téneeng heme e wiikau pwo pwaaden.*

²⁰ *Time e o uce tubwi ni womeéle na caa hajii. Time e o uce taunuhi ace miû celi caa tice niihen.*

Time e o uce tanahi ni apulie na tice nihelé. E o wonaa a bwo penem den, dieli e o bo â piwéden a mwomwon ke a juuju.

²¹ *Ke lé bo tai céih ne kon ati ni bele. Ésaïe 42.1–4*

Pwo mwomwon den me e peni ni duéé

Maréko 3.20–30; Luka 11.14–23

²² Lé pébé céii Iésu pa céiu apulie na bwi nang, ke huuhu nang, be pwo duéé kon. Ke e pwo me wâé nang wo Iésu. Ke e cihe, ke e nié mwo.

²³ Ke lé téetih ati ne ni apulie, ke lé pipii telé pie: «Mepwo wo paje, ke wieli wo pali piebehi Davita, pali *Mesia li genye tee ko ucéieng?»

²⁴ ††Kehe icehi ana lé pii wo lépwo Farasaio pie: «Ôhu! Wo pa apulie ce, ke e penem ko a junuu Caatana ††, pa daame he ni duéé! Be é mu ko anaa, na e peni ni duéé.»

²⁵ Ke e te temehi ni bwo niimihinaado telé wo Iésu, ke e pii telé pie: «Hemepie e te pipwopa ne mwo kon ace céiu mwametau, ke a mwametau naa, ke o tanahi. Ke mepie e te pipwopa ne kon mwo ace céiu pwomwo ubwo, ai ace céiu pwomwoiu, ke o pwocoon me e mu mang! ²⁶ Ke mepie e cibéé ni duéé wo Caatana, pa daame he ni duéé, ke e o te pipwopa ne mwo kon! Ke kona e o woté ko ace bwopwonen me e cumang a mwametau ten? ²⁷ Geé pii pie, é peni ni duéé ko a junuu Caatana. Ke hemepie wonaa, ke kona woo celi e

† 12.2 Exode 20.10 †† 12.3 1 Samuel 21.2–7 † 12.4 Lévitique 24.5–9 †† 12.5 Nombres 28.9–10 †† 12.6 Mataio 12.41–42 ††† 12.7 Osé 6.6; Mataio 9.13 ††† 12.10 Luka 14.3 † 12.11–12 Luka 14.5 † 12.14 Ioane 5.16

††† 12.16 Mataio 8.4; Maréko 3.12 †† 12.18–21 Ésaïe 42.1–4 ††† 12.18 Mataio 3.17 †† 12.24 Mataio 9.34, 10.25 †† Caatana—Bélzébül. Omehi Caatana ne ha a Niinaado (Vocabulaire) ha anebwén ko a tii.

ne te ni béewé ce junuun me lé peni ni duéé? Be lé habwii pie, geé getiéo.

²⁸ †«Ûhu! É peni ni duéé ko a Jenen Iitihite Padué. Ke [é hemepie nimewé kon, ke te jan me geé alihi temehi pie] e caa tuiebé pelewé na a *Mwametau te Padué!

²⁹ «É hemepie nimenye me nye taa ha a mwa te pace céiu apulie na pwo niihen, me nye pé ni naamuun, ke wâé heme nye mi cieeng. É mulang, ke genye bwobe pé ni naamuun mu ha a mwa ten. ³⁰ ††Wo pana time uce pa bééng, ke e cubwoniéo. Ke wo pana time e uce picani tong me gemu taineibuhi, ke e papiidenihi.»

Lé cihe me ta ne ko a Jenen Iitihite

³¹ †«É pii tewé pie: O jan me pineu ni apulie na lé cihe me ta ne ko Padué. Kehe wo paceli e cihe me ta ne ko a Jenen Iitihite, ke time o uce pineuhi ni ta pwo ten.

³² ††Ke o jan me pineu paceli e cihe me ta ne kong, pa Nahi Apulie. Kehe mepie e cihe me ta ne ko a Jenen Iitihite, ke o time uce jan me pineuhi ni ta pwo ten, ne ha a mulie ce, ke é ne mwo ha a *mulie dieli mwo.»

A acuwo me ni acehin

³³ ††A acuwo na wâé, ke e te ne ni acehin na wâé [me wii]. Ke a acuwo na ta, ke e te ne ni acehin na ta. Be nye o te temehi a acuwo mu ko ni acehin. ³⁴ †††[Ke wonaa mwo ne kowé] be geé o woté ko ace bwopiine ce naado celi wâé, wogewé ni nahi bwien, ke ni agele? Be nina e paobaanihi a pwonime pa apulie, ke weengaa nina e wie pwon heme e cihe. ³⁵ Ni naado na wâé, ke e te âbé mu ko pa apulie na wâé nang, be wâé a pwonimen. Kehe ni naado na ta, ke e te âbé mu ko pa apulie na ta nang, be ta a pwonimen.

³⁶ «Éa, é pii tewé a juuju pie: O bo pwo a Tan na e bo tauti ni apulie hen wo Padué. E bo muko pétaapwo tautilé ko ni pwooti ta na lé pipii hauli. ³⁷ Te é mu ko ni pwooti na go pii, na e bo te pihuôhi wo Padué pie, o pwocuhinaado tem, ai o celuimiko.»

Nimelé me lé alihi ce inenaado @ na pwojunuun

Maréko 8.11–12; Luka 11.24–32

³⁸ ††É ha a céiu tan, ke lé âbé céii Iésu ne ni béé *dotéén ko patén me ni béé Farasaio, ke lé pii ten pie: «Pa apipune, go pwo ace *pipwojunuun me geme alihi.»

³⁹ †Ke e hegi ne telé pie: «É mu ko ade na geé tee cuwo ko ilehi ce pipwojunuun, wogewé ni apulie jena? Te junihe ta gewé [be time geé uce piténe Padué!] O te tice mwo ace céiu pipwojunuun celi geé mwo alihi mwo, koja ali e too péroféta Jonas ânebun. ⁴⁰ ††Be li cié

† 12.28 Apostolo 10.38; 1 Ioane 3.8 †† 12.30 Maréko 9.40; Luka 9.50 † 12.31 Ébéru 6.4–6 †† 12.32 Luka 12.10 †† 12.33 Mataio 7.16–20 ††† 12.34 Mataio 3.7, 15.18; Luka 3.7, 6.45 ††† 12.38 Mataio 16.1; Luka 11.16; Ioane 6.30 † 12.39 Mataio 16.4; Maréko 8.12 †† 12.40 Jonas 2.1

li tan den, ke cié bwénin tina ali pilehe ikua. Ke te piwien ne mwo kong, pa Nahi Apulie, be cié ni tan, ke cié ni bwéning, tina a pule.

⁴¹ ††«E â Ninive wo Jonas, ke e pwopune te ni apulie lang. Ke lé téne a pune ten, ke lé pininim, ke lé pitaatéhi ni mulihelé. Kehe te e éni pelewé wo pa céiu apulie na e te nihe piwéden koja Jonas. Ke é ha a Tan na e bo tauti ni apulie hen wo Padué, ke wo lépwo Ninive, ke lé o cuwoda ânebuhewé, wogewé ni apulie jena, ke lé o pipé ne kowé! [Be muhi tewé me geé pininim, ke me geé bitekewé!]

⁴² †††[Ke geé te temehi mwo a jepule ko] é toomwo daame ha amu Saba bwolihi. Be li e âbé mu ha amu ten na te junihe e ité, beme e téne pa daame *Solomona na oba nang ko a pitemang. Kehe te e éni pelewé pa céiu apulie na e te junihe piwéden koja Solomona! Ke é ha a Tan na e bo tauti ni apulie hen wo Padué, ke e bo cuwoda ânebuhewé é toomwo daame naa, ke e bo pipé ne kowé, wogewé ni apulie jena. [Be muhi tewé me geé téne.]»

A bwo engen ke mwojuia te ni duéé

⁴³ «[Geé cuwoteeke téne ani]: Hemepie pwo duéé ko pace céiu apulie, ke me e wie mu kon, ke e â wé? E âdé ke âbé he ni duaan na ticie hen. Be e hane ace duaan celi me e mu hen, kehe icehi ana time e uce tooli. ⁴⁴ Ke e niimihi pie, 'É o mwojuia ngemwo ha ali pomwa tong.' Ke e mwojuia, ke e tooli ali mwa he tice ânen, ke te ju balé hen ehi, ke pwoiipihi ehi. ⁴⁵ †††Ke e â hane ni duéé béén na 7 jélé, na te junihe ta jélé kojaeng. Ke lé taa pimu ha ali mwa. Ke wo pa apulie naa, ke bwo junihe ta nang mwo kojan ânebun! Ke o wonaa celi e o tuie ne kowé, wogewé ni apulie na ta gewé jena.»

A ju pwomwoiu te Iésu

Maréko 3.31–35; Luka 8.19–21

⁴⁶ É he e mwo teko cihe ne ko ni apulie wo Iésu, ke lé tuiebé wo nyaa ten me lépwo ciéén, ke lé âbé cuwo pwomwo, be lé haneeng beme lé picihe.

⁴⁷ Ke e pii ten wo pa céiu apulie pie: «Aje, élé âoté pwomwo wo nyaa tem me lépwo ciéém. Be lé ko haneko me lé cihe tem ††.»

⁴⁸ Ke e hegi ne ten wo Iésu pie: «He woo êce nyaa tong? Ke wooélé lépwoce ciééng?»

⁴⁹ Ke e hiido lépwo acémun den, ke e pii pie: «Geé alihi, be woélé-ni ni nyaa tong me ni ciééng. ⁵⁰ ††Be wo pana e pwo ana te nime Caa tong kon, Padué na e jeda he miiden, ke te weengaa kuti pa âjiéning, ke é pwaadeniing, ke é nyaa tong.»

††† 12.41 Jonas 3.5 †† 12.42 1 Rois 10.1–10 ††† 12.45 2 Pétéru 2.20 †† A niide a tii naa, ke te tieden he ni béé tii iitihite he pwo grek. †† 12.50 Roma 8.29

A ocine ko pa apicemi

Maréko 4.1–20; Luka 8.4–15

13 É ha a tan naa, ke e wie mu ha a mwa he na e pimuwong lang wo Iésu, ke e ole ticepwon. Ke e tebwo †, beme e pacémuni ni apulie. ² ††Ke caa â hiwon ni apulie na lé âbé céiieng. Ke é mu ko anaa, ke e taa pwo a céiu ong, ke e tebwo. Ke lé te mu jeda ticepwon ne ni apulie.

³ Ke e pwo-ocine he e pacémunilé ko ni naado na hiwon. Ke e pii telé pie: «Geé téne! E bwo mu wo pa céiu apulie, ke e bwo wie ha a céiu tan, beme e tagiliihi ni âdaanu.⁴ Ke é he e ko tagiliihi, ke lé tupwo nge pwo pwaaden ni béé pidenaado. Ke lé âbé ne ni meni, ke lé wii ati. ⁵ Ke ni béén, ke lé tupwo ne ha a wii péi. Ke lé piepin ko cim, be time uce hiwon ni pule lang. ⁶ Kehe icehi ana me e niê na a téale, ke éle li nahi âdaanu, ke lé meu, be te tice waan. ⁷ Ke ni béén, ke lé tupwo ne ha awieme ni mwawi ubwo ‡. Ke me lé tai picim, ke lé taunuhi li pidenaado. ⁸ Ke ni béén, ke lé tupwo ne ha a pule na wâé. Ke lé aca; ke ni béén ke 100 ni acehin, ke ni béén 60, ke ni béén 30.» ⁹ Ke e pii mwo telé wo Iésu pie: «Wo paceli pwo ce pwojéénen me e téne, ke wâé heme e téne!»

É ko ade na go mu pwo-ocine telé?

¹⁰ Lé âbé mwonu Iésu wo lépwo acémun den, ke lé tahimwoeng pie: «É mu ko ade na go mu pwo-ocine te ni béén, heme go cihe ne kolé?»

¹¹ Ke e hegi ne telé pie: «E ne tewé wo Padué, me geé temehi a ju bwomune a Mwametau ten. Kehe icehi ana time uce jan ne ko ni apulie ati. ¹² ††Be wo pana caa pwo ne ten, ke o ne mwo pwon ce béén, beme pihiwon den. Kehe wo pana te tice ten, ke o pétaabwon kojaeng a nehinaado na mwo e pelen. ¹³ É mu ko anaa, na é pwo-ocine telé, heme é pacihelé. Be lé omehi, kehe time lé uce alihi temehi; ke lé téne, ke time lé uce téne temehi. ¹⁴ ††Ke weengaa a bwo pacuwohi na ali e pii wo Padué ne kolé, na e pwaadeniin bé wo péroféta Isaia pie:

*Geé o te téne taaci,
kehe time geé uce téne temehi.*

*Geé o te omehi taaci,
kehe time geé uce alihi temehi.*

¹⁵ *Mwoiu a puni a puapulie ce.*

Capuhi ni pwonimelé.

Bwéjé ni pwojéénelé.

Bwi ni naamiilé.

*Be time uce nimelé me lé alihi
ko ni naamiilé,*

† E tebwo—A bwopwonen de lépwo apipune ne pele lépwo Juif.
†† 13.2 Luka 5.1–3 ‡ Mwawi ubwo—Grek: *Acuwo pwo dan* (plantes épineuses). †† 13.12 Mataio 25.29; Maréko 4.25; Luka 8.18, 19.26 †† 13.14 Ésaie 6.9–10; Ioane 12.40; Apostolo 28.26–27

*ke me lé téne ko ni pwojéénelé,
ke me lé temehi ko ni pwonimelé.
Te muhi telé me lé bitelé bé céiié,
me lé taatééhi ni mulihelé,
ke me é o pwo me wâé jélé!» Ésaie 6.9–10*

¹⁶ ††«Ke hemepwo wogewé, ke geé pipwodéén, be geé alihi ko ni naamiwé, ke geé téne ko ni pwojéénewé.

¹⁷ É pii tewé a juuju pie: Hiwon ni péroféta, ke hiwon ni apulie na mwomwon jélé, na te nihe nimelé me lé alihi nina geé alihi, kehe time lé uce alihi temehi. Ke nimelé me lé téne nina geé téne, kehe time lé uce téne.»

A bwopiine a ocine ko pa apicemi

¹⁸ «Geé téne a bwopiine a ocine ko pa apicemi: ¹⁹ Ni béé pidenaado, ke lé tupwo nge pwo pwaaden. [A pwaaden] ke ni apulie na lé téne a pwooti ko a Mwametau, ke time lé uce temehi. Ke e tuiebé wo *Caatana, pana ta nang, ke e céi mwo a pwooti na caa cemi ne he ni pwonimelé.

²⁰ «Ke ni béé pidenaado, ke lé tupwo ne ha a wii péi. [A wii péi] ke ni apulie na lé téne a pwooti, ke lé epin me lé hegi ha a pipwodéén. ²¹ Kehe icehi ana te tice waan ne kolé a pwooti na lé téne. Ke lé te pitaatééhi ni bwo niimihinaado telé. Hemepie e tuie ne kolé a tacebwén me pwo nina ta ne kolé, watihen a pwooti te Padué, ke lé patieden ni céihi telé.

²² ††«Ke ni béé pidenaado, ke lé tupwo ne he ni mwawi ubwo. [A pule naa] ke ni apulie na lé téne a pwooti, kehe icehi ana pinekepé ni pwonimelé ne ko ni naado na e tuie ne pwo a bwohemwo ce. Ke lé tété cehi mwani me ni naamuu bwohemwo. É mu ko ninaa, ke e taunuhi a pwooti, ke te tice acehin.

²³ «Ke ni béé pidenaado, ke lé tupwo ne ha a pule na wâé. [A pule naa] ke ni apulie na lé téne a pwooti, ke lé temehi, ke pwo acehi a pwooti ne kolé: ni béén ke 100 acehin, ke ni béén ke 60, ke ni béén ke 30.»

Ni béé ocine ko a Mwametau

Maréko 4.30–34; Luka 13.18–21

A meté na ta

²⁴ E pwo mwo a céiu ocine wo Iésu, ke e pii te ni apulie pie: «A *Mwametau he Miiden ke pwohewii ani:

«E bwo mu wo pa céiu apulie, pa apwo âdaanu. Ke e bwo tagiliihi ni pidenaado na wâé ne ha apwoamu ten. ²⁵ Kehe icehi ana é he bwén, he e ko pule, ke e bwo tehenebé wo pa apipwokon, ke e tagiliihi ni âdaanu na ta, ha awieme ni âdaanu na wâé, ke e engen.

²⁶ «Ke lé cim ne li âdaanu li wâé, ke lé aca. Ke lé te cim mwo li âdaanu li ta. ²⁷ Ke me lé alihi anaa ne ni

††† 13.16–17 Luka 10.23–24 ††† 13.22 Luka 12.16–21; 1 Timoté 6.9–10,17

apenem ha apwoamu, ke lé pii te pali eapwihi ali apwoamu pie: “Go te alihi, go pa daame, be li go tagilihi li âdaanu li wâé ha ali apwoamu tem. Ke kona lé âbé mu wé ne ni âdaanu na ta na élé hen?”

²⁸ «Ke e hegi ne telé pie: “Ûhu, wo pa apipwokon na e pwo anaa.”

«Ke lé pii ten pie: “Kona o te nimem me geme â tewii taabwon ni âdaanu na ta?”

²⁹ «Ke e hegi ne telé pie: “Ûhu! Be mepie geé tewii ni âdaanu na ta, ke geé o tewii ne pehi ni âdaanu na wâé.

³⁰ Kehe geé te nelé me lé te picim ibu, die ha a pitii âdaanu. Ke é bo pii te ni apenem dong pie, me lé mi taineibuhi ni âdaanu na ta, me lé cini, ke me lé ne ni âdaanu na wâé ha a mwoâdaanu tong.”»

A pide moutarde

³¹ E pwo mwo a céiu ocine telé wo Iésu, ke e pii telé pie:

«A Mwametau he Miiden, ke pwohewii a pide *moutarde* na e cemi wo pa céiu apulie ha a cereda ten.

³² A cuwo nahi pidenaado na te junihe wahin. Kehe icehi ana me e cim, ke te junihe ubwo nang koja ati ni naado na nye cemi he ni cereda. Ke lé âbé ne ni meni, ke lé pwo ni mwonahilé ne he ni dihen, be caa â acuwo na junihe ubwo.»

A nyaa te pwoloa

³³ E pwo telé mwo a céiu ocine wo Iésu, ke e pii pie: «A Mwametau he Miiden, ke e pwohewii mwo a nyaa te pwoloa † na e pé ê céiu toomwo, ke e iluui neibu me a 25 kilo ko *farine* dieli e â cibi da ali pwoloa!»

É mu ko ade na e pwo-ocine wo Iésu?

³⁴ Ati ninaa, ke e pii telé he ocine wo Iésu. Be e te cuwo ko pwo-ocine telé heme e pacihe ni apulie. ³⁵ ††E wonaa, beme e pacuwohi ali e pii wo Padué na e pwaadeniin bé wo pa péroféta ten pie:

É bo pwo-ocine heme é pacihelé.

É bo pii ni naado na neduwohi

mu ha atabuhi ko a bwohemwo. Psaume 78.2

A bwopiine a ocine ko a meté na ta

³⁶ Lé engen koja ni apulie wo Iésu me lépwo acémun den, ke lé â pwomwo. Ke é nelang, ke lé pii ten pie: «Go cuwoteeke pii teme ace bwopiine ali ocine li go pii ne ko ni meté na ta.»

³⁷ Ke e hegi ne telé pie: «Wo pana e tagilihi ni pidenaado na wâé, ke woéo pa Nahi Apulie. ³⁸⁻³⁹ A apwoamu, ke a bwohemwo. A pide âdaanu na wâé, ke ni nahi a Mwametau. Wo pa apipwokon, ke wo Caatana, pana ta nang. Ke a pide âdaanu na e cemi, ke ni naîn, [ke ni apulie na e kolé a duéé]. Ke a pitii âdaanu, ke

† Nyaa te pwoloa—Levain. †† 13.35 Psaume 78.2

anebwén ko a bwohemwo. Ke ni apenem, ke ni *âcélo. ⁴⁰ †Ke lé bo tai ni pidenaado na ta, ke lé cini ne pwo miû. O wonaa ace [bwopwonen ne ko ni naî Caatana] ha anebwén ko a bwohemwo.

⁴¹ ††«Be woéo pa Nahi Apulie, ke é bo nebé ni âcélo tong. Ke lé bo pétaabwon mu ha a Mwametau tong ni na lé pwo nina ta, me lépwona lé pwo me tieden ni céihi † te ni béén. ⁴² †††Ke lé o bo tahlilé da pwo a miû na ubwo. Ke é nelang he na lé o é me piwii pecuwo.

⁴³ †††«Ke ni béén na mwomwon jélé ne he pwahamii Padué, ke o pwomelaan jélé pwohewii a téale § ne ha a Mwametau te Caa telé. Wo paceli pwo ce pwojéenen me e téne, ke wâé heme e téne!»

Ni wâé na neduwohi

⁴⁴ «A Mwametau he Miiden, ke pwohewii ni mwani megele na te junihe pwonaado ne kon, na neduwohi ha apwoamu. Ke e tooli wo pa apenem ha apwoamu. Ke e te junihe pipwodéén kuti, ke e te neduwohi mwo. Ke e icuhi ati nina eten, ke e pwocuhi a apwoamu naa.»

A perle na te junihe wâé

⁴⁵ «A Mwametau he Miiden, ke pwohewii mwo a *perle* na te junihe wâé, ke te junihe ubwo a cuhin. Pwo pa céiu a-icu, na e hane *perle*. ⁴⁶ Ke e tooli a *perle* naa. Ke e te icuhi ati kuti nina e pelen, beme e pwocuhin.»

A pua

⁴⁷ «A Mwametau he Miiden, ke pwohewii mwo a pua, heme nye tahi ole he jilé, ke e pé ni muko pétaapwo ikua. ⁴⁸ Ke genye pé da huâiu, ke genye tai ni ikua na wâé, ke genye ne he ni élele. Ke genye tahi taabwon ni ikua na ta. ⁴⁹ Ke o wonaa ha anebwén ko a bwohemwo, be e bo pahede ni âcélo ten [wo Padué]. Ke lé o pineité nina lé *mwomwon ne he pwahamiin, me ni béén na time lé uce piténeeng. ⁵⁰ ††Ke lé o bo tahi ni béén na time lé uce piténeeng ne ha a miû na ubwo. Ke é nelang he na lé o bo é me piwii pecuwo.»

Ni muko pétaapwo wâé

⁵¹ E tahimwo ni acémun den wo Iésu pie: «Kona geé te temehi ni ocine naa?»

Ke lé hegi ne ten pie: «Éa.»

⁵² Ke e pii telé pie: «Wo pa *dotéén ko patén na caa pa apulie ha a Mwametau he Miiden, ke e pwohewii pa céiu eapwihi pwomwo na e pipégali mu he ni wâé ten nina mwo coho, me nina caa bwolihi.»

‡ 13.40 Ioane 15.6 †† 13.41 Mataio 24.31, 25.31; Maréko 13.27

†† Lé pwo me tieden ni céihi—ai Lé pwo me lé pwo nina ta.

††† 13.42 Mataio 8.12 ††† 13.43 Daniel 12.3 § O pwomelaan jélé pwohewii a téale—A bwopiinen pie, e bo te junihe adéilé ke pi-paunulé wo Padué. Ke lé o mu pelen ne ha a bwo ubwo na a wâé ten. †† 13.50 Mataio 13.42; Luka 13.28

Time lé uce céihi ne kon ni Nazaret

Maréko 6.1–6; Luka 4.16–30

⁵³ Me e pii ati ni ocine naa wo Iésu, ke e engen mu ha a duaan naa. ⁵⁴ †Ke e â Nazaret, he na ubwo nang ne hen. Ke e pacémuni ni apulie [ko a pwooti te Padué] ne ha a *mwotapitih.

Ke lé te junihe téetieng, ke lé pitahimwolé pie: «He woo na e pacémunieng? Kona e âbé mu wé ni bwo temehinaado ten, ke ni *pipwojunuun na e pwo? ⁵⁵ ††Be pali naî pali apenem ko ba-acuwo! Pali naî Maria, ke pa cuwo Cang, me José ‡, me Simon, me Jude! ⁵⁶ Ke lé teko mulie pelenye ni toomwo pwaadeni-in! Ke he woo na e ne ten ni naado na e pwo?»

⁵⁷ ††Ke lé pitaaba ne kon wo lépwo Nazaret, ke te muhi telé me lé céihi ne kon. Ke e pii telé pie: «Au, mwolihi! Be wo pa péroféta, ke lé te paciitieng ati ne he ni amu, kehe te icehi ne ha amu ten!»

⁵⁸ Ke time e uce pwo ce pipwojunuun celi hiwon nelang wo Iésu, be time lé uce céihi ne kon.

E mele wo Ioane pa apipuu apulip

Maréko 6.14–29; Luka 9.7–9

14 É ha a benaamwon naa, ke e piténe ni jepule ko Iésu wo *Érode Antipas, gupéno ne Galilé. ² Ke e pii te ni eabwé ten pie: «Wo pa apulie naa, ke wo *Ioane pa apipuu apulip, he e caa mulie cemwo mu ha amele! Ke weengaa a watihen me e pwo ni *pipwojunuun.»

³⁴ ††Weengi a jepule ko a bwo mele te Ioane: Wo Érode, ke lu piaten me Érodiade, ê mwode Filip, pa âjiéne. Ke e mu te cuwo ko pii ten wo Ioane pie: «Te tice mwomwon dem me go pé ê toomwo naa.»

Ke e te pwo me imwi Ioane wo Érode, ke e cieeng, ke e neeng he karépu. ⁵ ††Nime Érode me e taunueng, kehe icehi ana mwotieng ko ni apulie, be a hiwon kolé, ke lé niimihi pie pa péroféta [te Padué].

⁶ Ke é ha a tan na lé pipaunuhi a bwo âbee te Érode, ke e pwolu he pwahamii ni apulie wo ê naî Érodiade.

Ke te junihe wâé te Érode. ⁷ Ke e *piapwo ne ten pie: «É o ne tem ati celi go o ilehi kojaéo.»

⁸ Ke e cineeng wo nyaa ten, beme e pii te pa daame Érode pie: «Go ne tong a puni Ioane ne ha ace tam.»

⁹⁻¹⁰ Ke te junihe piwahin Érode. Kehe icehi ana e caa mi piapwo ne he pwahamii ni apulie ati. Ke e pahede ni coda ten nge ha a karépu, beme lé â tahagéi a hene Ioane. ¹¹ Ke lé pébé a punin ne ha ace tam, ke lé ne te égi ewa toomwo. Ke wo êje, ke e pé nge céii nyaa ten.

† 13.54 Ioane 7.15 †† 13.55 Ioane 6.42 ‡ José—ai Josef.
†† 13.57 Ioane 4.44 †† 14.3–4 Lévitique 18.16, 20.21; Luka 13.19–20 ††† 14.5 Mataio 21.26

¹² Ke é alecehen, ke lé âbé wo lépwo acémun de Ioane, ke lé pé a één, ke lé â neduwohi, ke lé â pipate-mehi te Iésu ana e tuie ne ko Ioane.

Lé wiinaado ne ni apulie na 5000 jélé

Maréko 6.30–44; Luka 9.10–17; Ioane 6.1–15

¹³ Me e téne ana e tuie ne ko Ioane wo Iésu, ke e te piengen cehi pwo ong, ke e â ha a céiu duaan na e ité, na te piticie hen. Kehe icehi ana lé piténe ne ni apulie, ke lé wie mu he ni mwopopwaalé, ke lé piâcéin nge ticepwon. ¹⁴ Ke me e ele ole mu pwo ali ong wo Iésu, ke e alihi a pubu apulie na te junihe ubwo, ke e te junihe pipwoééhelé. Ke e pwo me wâé ni béén na cunu jélé.

¹⁵ E caa pwo me e nuule a téale, ke lé âbé céiieng wo lépwo acémun den, ke lé pii ten pie: «O caa babwén, kehe apiticie éni. Go ne ngemwo ni apulie ce, nge he ni mwopopwaalé na e mwonu, beme lé o pé ce wiinaado telé.»

¹⁶ Ke e hegi ne telé wo Iésu pie: «Ûhu, wâé heme lé mu éni, ke me geé ne ce wiinaado telé.»

¹⁷ Ke lé pii ten pie: «Time uce jan, be te ju nim ni pwoloo, ke alo lupwo ikua na e peleme!»

¹⁸ Ke e pii telé pie, me lé pébé céiieng.

¹⁹ ††Ke nebwén, ke e pii te ni apulie pie, me lé tebwo he ni meté. Ke e pé li pwoloo li nim me lupwoli ikua. Ke e alehede da he miiden, ke e pwo-olé te Padué. Ke e ebii li pwoloo, ke e ne te lépwo acémun den, ke lé pipatihini ne ko ni apulie. [Ke e wonaa mwo ko lupwoli ikua.] ²⁰ Ke lé tai wiinaado ati, ke caa pwoloo jélé. Ke lé taineibuhi mwo ni nehi wiinaado telé, ke lé paobaanihi ni élele na 12 kon. ²¹ A jéhi ni apulie aiu na lé wiinaado, ke e pwo 5000 jélé, ke time uce pine ni ewa me ni toomwo.

E engen pwo bwotabe wo Iésu

Maréko 6.45–52; Ioane 6.16–21

²² Te ju é alecehen, ke e pii wo Iésu te lépwo acémun den pie: «Geé taa pwo ong, ke geé mi gaale ângedé ko a céiu goon.»

Ke e mwo te mu wo Iésu, ke e pamwojuiéhi mwo ni pubu apulie. ²³ §Ke me e caa pinelé ati, ke e taa pwo juwole, beme e pwoiitihini, ke bwénieng nelang.

²⁴ Ke mepwo wo lépwo acémun den na lé mu pwo ali ong, ke caa élé ité koja a nicepwon. Ke e âbédelé na a dan; ke ni jilé, ke taii ne ko ali ong.

²⁵ Ke caa é pwopwometan, ke e âbé céiiilé pwo bwotabe wo Iésu. ²⁶ §†Ke me lé alieng, he e ko engen pwo bwotabe, ke te junihe mwotilé, ke lé haa da ko miiden, be lé niimihi pie a dué! ²⁷ Kehe icehi ana e te pwome pacihelé wo Iésu, ke e pii telé pie: «Geé nemwo pwo me mwotikewé! Be woéo! Geé mwoiu!»

††† 14.19 Mataio 15.35–39; Maréko 8.6–10 § 14.23 Luka 6.12, 9.28 §† 14.26 Luka 24.37

²⁸ Ke e pii ten wo Pétéru pie: «Padaame, mepie te wogo, ke go pwo me é oté céiiko ne pwo bwotabe.»

²⁹ Ke e pii ten wo Iésu pie: «Îgo, go opé!»

Ke e ole mu pwo ong wo Pétéru, ke e â céii Iésu pwo bwotabe. ³⁰ Kehe icehi ana mwotieng ko a dan [me ni jîé] be ubwo, ke e te tabuhi kopi neole ha a tabe. Ke e toii da pie: «Padaame, go celuimiéo!»

³¹ †Ke e te pétaa nge ko a in kuti wo Iésu, ke e pii ten pie: «Te junihe wahin kuti a céihi tem! É ko ade na pinekepé ne tem?» ³² Ke me lu taa pwo ong, ke e cuwo ali dan.

³³ Ke lé tidihi jililé ati nina lé mu pwo ong, ke lé pi-paunu Iésu, ke lé pii pie: «A juuju pie wogo, ke pa *Naî Padué!»

E pwo me wâé ni cunu ne Génésaret

Maréko 6.53–56

³⁴ Lé caa nebwén ko tahagéi jîé wo Iésu me lépwo acémun den. Ke lé tuie gaale ha a duaan na e mwonuhi Génésaret. ³⁵ Ke lé ali temehi Iésu ne ni apulie lang. Ke lé pipii ngen pitihî a duaan naa a bwo tuie ten.

Ke lé tai pébé céiieng ati ni cunu. ³⁶ ††Ke lé pii ten pie: «Te jan heme lé te ju ti cehi ko a baaé epwénem?»

Ke caa te wâé ati nina lé ti kon.

A bwo picihé ko ni bwomu

Maréko 7.1–13

15 Lé âbé mu *Iérusaléma ne ni béé *Farasaio me ni béé *dotéén ko patén, ke lé âbé too Iésu. Ke lé pii ten pie: ² «Time lé uce piténedehi a ju bwomu wo lépwo acémun dem, be time lé uce mi puu ni ilé âneb-uhe a wiinaado pwohewii ni watihenye. Kehe é mu ko ade, go paje?»

³ Ke e hegi ne telé pie: «Lépwoje! É mu ko ni ju bwomu tewé, ke time geé uce piténedehi nina nime Padué kon. Kehe é mu ko ade? ⁴ †Be e pii wo Padué pie: *Go paciiti lu nyaa me caa tem.*

Exode 20.12

E pii mwo pie: *Geé taunu pa apulie na e pipii me ta lu nyaa me caa ten.*

Exode 21.17

⁵ «Kehe icehi ana wogewé, ke geé te pii te ni apulie pie, te wâé heme lé pii te lu nyaa me caa telé pie: “Nimung me é ne teu ace céiu naado me bépiani teu, kehe icehi ana time uce jan, be é caa pwo me âpipati iitihî te Padué.”

⁶ «Ke é nelang he na geé pacémunilé, me time lé uce paciiti lu nyaa me caa telé! Ke me wonaa, ke geé caaite ne he pule †† ni pwooti te Padué ko ni bwomu tewé!

† 14.31 Mataio 8.26; Maréko 4.39 †† 14.36 Mataio 9.20–21 ‡ 15.4 Exode 20.12, 21.17; Deutéronome 5.16 †† Caaite ne he pule—Grek: Pwo me piticenaado ne kon.

⁷ Geé te ju gahe pwo! E te juuju wo péroféta Isaia, na e pwaadeni a pwooti te Padué ne kowé pie:

⁸ †Lé te ju pipaunuéo ko pwole

wo lépwo apulie ce,

kehe te e ité kojaéo ni pwonimelé.

⁹ Lé pwoiitihî me *pwoâpwailo tong

kehe te piticenaado ne kon.

Ana lé pacémuni ni apulie kon,

ke te ni patén delé ni apulie,

kehe time uce a pwooti tong.» Ésaie 29.13

Ana e pwo me ta pa apulie

Maréko 7.14–23

¹⁰ É alecehen, ke e tode ni apulie wo Iésu, ke e pii telé pie: «Lépwoje! Geé tabemiéo, ke geé temehi ehi ana me é pii tewé: ¹¹ ††Time uce ana e taa pwo pa apulip ana e pwo me ta nang ne he pwahamii Padué. Kehe te icehi ana e wie mu pwon, ana e pwo me ta nang.»

¹² Ke lé âmwonu Iésu wo lépwo acémun den, ke lé pii ten pie: «Ni pwooti tem, ke te junihe ti ko ni Farasaio, he go te temehi?»

¹³ Ke e hegi ne telé pie: «Wo lépwo Farasaio naa, ke lé pwohewii ni acuwo na time uce ni âcemi he Caa tong jeda he miiden. Ke e o bo taawii ††. ¹⁴ §Geé nelé! Be wo lépwo bwi, ke lé te pé lépwo bwi. Be wo pa bwi, ke me e pé pa céiu bwi, ke lu o tai tupwo ole ha ace pwon!»

¹⁵ Ke e pii te Iésu wo Pétéru pie: «Go patemehi ehi teme a ocine naa.»

¹⁶ Ke e hegi ne ten wo Iésu pie: «Kona wogewé mwo, lépwo acémun dong, ke time uce téele jan me geé temehi anaa? ¹⁷ Geé téne, ati ni naado na ta pwo pa apulie, ke me e â tinan, ke é alecehen, ke e te wie mwo mu ha a één. He time geé uce temehi anaa? ¹⁸⁻¹⁹ Kehe te icehi ni pwooti na e wie mu pwo ni apulie, ke ni bwo niimihinaado na ta na lé wie mu he ni pwonimelé, ke weengaa kuti nina e ne me lé pwo ana ta:

Lé taunuhi apulie;

Lé pibune;

Lé pipule me ni apulie hauli;

Lé bune;

Lé pigeti ni béén;

Lé pipii me ta ni béén.

²⁰ «Weengaa nina ta genye kon, ne he pwahamii Padué. Kehe time uce ta genye ko ace bwo time uce puu ne ni inye.»

†† 15.8–9 Ésaie 29.13 ††† 15.11 Mataio 12.34 ††† Grek: O taawii ati ni acuwo na time e uce cemilé wo Caa tong jeda he miiden. § 15.14 Luka 6.39; Roma 2.19

A céihi te ê toomwo Kanana

Maréko 7.24–30

²¹ É alecehen, ke e engen mu ha a duaan naa wo Iésu, ke e â ha a céiu duaan na e mwonuhi lupwo pwomwo ubwo Tir me Sidon. ²² Ke e âbé céii Iésu wo ê céiu toomwo mu ha amu naa, beme e cihe ne kon. Kehe time uce ê *Juif, be ê piebehi lépwo *Kanana [a bele na lé téétihi wo lépwo Juif]. Ke e toii da pie: «Padaame, pa *Naî Davita, go pipwoéhung me picani tong! Be pwo duéé ko ê naîng, ke te junihe cunu nang.»

²³ Kehe icehi ana time e uce hegi ne ten wo Iésu ko ace céiu pwooti.

Ke lé âbé mwonueng wo lépwo acémun den, ke lé pii ten pie: «Go pwo me engen wo ê toomwo ne! Be e tee ko cuwo ko cihe céinye!»

²⁴ †Ke e pii ten wo Iésu pie: «Wo Padué, ke e te neé bé cehi ne ko ni apulie *Isaraéla, na lé pwohewii ni nahi muto na lé pipatieden.»

²⁵ Kehe icehi ana wo êgi toomwo, ke e âbé tidihi jilin ânebuhe Iésu, ke e pii ten pie: «Padaame, go picani tong!»

²⁶ Ke e hegi ne ten wo Iésu pie: «Time uce wâé heme nye pé ni wiinaado te ni cuwo ewa, me nye tahi ne te ni 'nahi wotaahen' †.»

²⁷ Ke e pii ten wo êje pie: «Go te juuju, go Padaame, kehe icehi ana ni nahi wotaahen mwo, ke lé te eni ni mewiinaado na lé tupwo mu pwo taap te pa caa telé.»

²⁸ Ke e hegi ne ten wo Iésu pie: «Êje, te junihe ubwo a céihi tem! Wâé heme pwohewii ana nimem kon!»

Ke caa te tieden kuti ali cunu ko êgi naîng!

E pwo me tieden ni cunu

²⁹ É alecehen, ke e engen wo Iésu mu ha a duaan naa. Ke e uti a nicepwon Galilé. Ke é mulang, ke e taa pwo juwole, ke e tebwo. ³⁰ Ke lé âbé céiieng ne ni apulie na te junihe hiwon jélé, ke lé pébé céiieng nina tebwa jélé, ke nina bwi jélé, me ni tebwomwa, me ni huuhu, ke hiwon mwo ni béé cunu. Ke lé tai nelé ânebuhe Iésu, ke e tai pwo me tieden ni pétaapwo cunu kolé. ³¹ †Ke ni huuhu, ke lé caa cihe. Ke ni tebwomwa, ke lé caa engen. Ke ni bwi, ke lé caa niê.

Ke lé téétihi ne ni apulie, ke lé pipaunu Padué he lépwo Isaraéla!

Lé wiinaado ne ni apulie na 4000 jélé

Maréko 8.1–10

³² †E tode ni acémun den wo Iésu, ke e pii telé pie: «É te junihe pipwoééhe ni apulie ce! Be caa cié ni tan

† 15.24 Mataio 10.6 †† 'Nahi wotaahen'—Wo lépwo béé Juif, ke lé pii ko lépwona time lé uce Juif pie 'wotaahen'. Kehe icehi ana time e uce pii pie wonaa wo Iésu he e mwiihilé. Ke pwohewii a bwo cihe tenye ne ko ni pahecemenye. ‡ 15.31 Maréko 7.37 †† 15.32 Mataio 14.14

denye me woélé, ke tice wiinaado telé. Ke time uce wâé me é pamwojuiéle, be koli bo tice niihelé nge he pwaaden.»

³³ Ke lé pii ten wo lépwo acémun den pie: «Genye o woté ko ace bwo ne wiinaado telé ati, ne éni ha a duaan na apiticie? Be go alihi, be te junihe hiwon jélé!»

³⁴ Ke e tahimwolé wo Iésu pie: «Kona niile ce pwoloa celi e pelewé?»

Ke lé pii ten pie: «7 ni pwoloa, ke pwo ni cuwo nahi ikua.»

³⁵ Ke nebwén, ke e pii te ni apulie pie me lé tebwo.

³⁶ Ke e pé li pwoloa li 7, me li nahi ikua, ke e pwo-olé te Padué. Ke e ebii, ke e ne te lépwo acémun den, ke lé pipwopii ne ko ni apulie. ³⁷ Ke lé wiinaado dieli caa tai pwoluu jélé. Ke é alecehen, ke lé tai ni nehi wiinaado telé wo lépwo acémun den, ke e pwo 7 ni élele na oba!

³⁸ Pwo 4000 ni aiu na lé wiinaado, ke time uce pine ni toomwo me ni cuwo ewa!

³⁹ Ke nebwén, ke e pii telé wo Iésu pie, me lé mwojuia ngemwo pelelé. Ke e taa pwo ong, ke e â ha a duaan ne Magadan.

Lé ilehi ce pipwojunuun

Maréko 8.11–13; Luka 12.54–56

16 ††É ha a céiu tan, ke lé âbé céii Iésu ne ni béé *Farasaio, me ni *Saducéen, be nimelé me lé pipwohuô ten. Ke lé pii ten pie: «Go habwii teme ace *pipwojunuun de Padué celi e kom.» [Be nimelé me lé habwii pie time e uce penem ko a junuu Padué.]

² Ke e hegi ne telé pie: «Me e megele a miiden heme e nuule a téale, ke géé pii pie, o wâé amu ††.»

³ «Ke me pipiing a amu ko a acaama, ke géé pii pie, o ute. Be géé caa te temehi heme wâé a amu, ai é heme ta a amu. Kehe icehi ana me géé alihi ni naado na e ko tuie jenea, ke time géé uce temehi ace bwopiinen! [Be hemepie géé ko alihi ehi, ke géé temehi ehi ana nime Padué me géé pwo.] ⁴ ††É mu ko ade na géé tee cuwo ko ilehi ce pipwojunuun, wogewé ni apulie jenea? Te junihe ta gewé [be time géé uce piténede Padué!] O te tice mwo ace céiu pipwojunuun celi géé mwo alihi mwo, koja ali e too péroféta Jonas ânebun.»

Ke e engen koyalé wo Iésu.

A 'nyaa te pwoloa' te ni Farasaio

Maréko 8.14–21

⁵ É he lé hagéi a *jié Galilé wo lépwo *acémun de Iésu, ke lé neuhi me lé pé pwoloa.

⁶ †Ke e pii telé wo Iésu pie: «Geé pipwocilekewé ne ko a 'nyaa te pwoloa' te ni Farasaio me ni Saducéen!»

⁷ Ke lé pipii telé wo lépwo acémun den pie: «Wieli é mu ko ana time genye uce pé pwoloa?»

†† 16.1 Mataio 12.38; Luka 11.16 ††† Lupwo niide a tii naa, ke tieden he ni béé tii iitihi he pwo grek. ††† 16.4 Mataio 12.39; Luka 11.29 § 16.6 Luka 12.1

⁸ Ke e te téne wo Iésu, ke e pii telé pie: «Te junihe wahin kuti ni céihi tewé! É mu ko ade na geé tee cuwo ko cihe ko a pwoloa? ⁹ †Mwo te time geé uce temehi kuti? Kona time geé uce niimihi li nim pwoloa te li 5000 apulie? É ha a tan naa, ke li geé tai mwo celi niile élele? ¹⁰ ††Ai, li 7 pwoloa ne te li 4000 apulie, ke a tan naa, ke niile ce élele celi geé tai mwo?»

¹¹ «É caa te pii tewé pie: Geé pipwocilekewé ko a 'nyaa te pwoloa' te ni Farasaio, me ni Saducéen. Kehe time é uce pii tewé ce pwoloa celi me nye eni! Ke kona time geé uce temehi anaa?»

¹² Ke lé bwobe temehi wo lépwo acémun den pie, e pii telé pie, me lé pipwocile ni cémun de ni Farasaio me ni Saducéen.

Wo Iésu ke pa Mesia

Maréko 8.27—9.1; Luka 9.18—27

¹³ Ke lé engen wo Iésu me lépwo acémun den, ke lé tuie nge ha a céiu duaan ko a pwomwo ubwo Césaré-Filip. Ke e tahimwolé pie: «Kona lé pii pie woté ne kong ne ni apulie? Lé pii pie woéo ke woo, woéo pa Nahi Apulie?»

¹⁴ *Ke lé hegi ne ten pie: «Lé pii ne ni béén pie wogo, ke wo *Ioane pa apipuu apulie. Ke lé pii ne ni béén pie péroféta *Élia. Ke lé pii mwo wo lépwo béén pie Iérémia, ai pace céiu pibéé ni péroféta ânebun.»

¹⁵ Ke e tahimwolé wo Iésu pie: «Ke kona wogewé ke?»

¹⁶ ††Ke e hegi ne ten wo Simon Pétéru pie: «Wogo, ke pa *Mesia †, pa *Naï Padué na e mulip.»

¹⁷ †††Ke e pii ten wo Iésu pie: «Adéiko go Simon pa naï Jonas †††, be time uce wo pace céiu apulie paceli e pwo me go temehi anaa, kehe te wo Caa jeda he miiden.

¹⁸ †Ke é pii tem jena na ni pie: A niim pie Pétéru, [a bwopiinen pie 'a péi']. Ke é pwo a péi naa, ke é o bahi a *Mwaiiitihi tong †. Ke a junuu a melepiing, ke tice niihe ne kon. ¹⁹ ††É bo ne tem ni kilé ko a *Mwametau he Miiden, ke ati nina go paciitihi † ne éni pwo bwohemwo, ke e o te paciitihi ne mwo jeda he miiden wo Padué. Ke ati nina go pii pie wâé † ne éni pwo bwohemwo, ke e o te pii pie wâé ne mwo jeda he miiden.»

²⁰ Ke e paciitihi ko lépwo acémun den wo Iésu pie, me lé nemwo pii te ni apulie pie weeng pa Mesia.

E bo mele ke mulie cemwo

²¹ Tabuhi ha a tan naa, ke e pii beetihi te ni acémun den wo Iésu pie: «Wâé heme é â *Iéruusaléma, beme é mu he ni picani na ubwo na lé o pwo wo lépwo apihuô,

† 16.9 Mataio 14.17—21 †† 16.10 Mataio 15.34—38 † 16.14 Mataio 14.1—2; Maréko 6.14—15; Luka 9.7—8 †† 16.16 Ioane 6.69 †† Mesia—Grek: Kériso. Be Mesia he pwo ébéru, ke Kériso he pwo grek. Omehi Ioane 1.41. ††† 16.17 Galat 1.15—16 ††† Jonas—ai Ioane. † 16.18 Ioane 1.42; Éfésó 2.20 †† Bahi a mwaiiitihi tong—Ocine ko ati ni acéihi ne ko Iésu. ††† 16.19 Mataio 18.18; Ioane 20.23 †† Paciitihi; Pii pie wâé—Grek: Cie; Tuwo.

me lépwo caa te lépwo *apwoâpwailo, me lépwo *dotéén ko patén. Ke lé bo pwo me é mele. Kehe icehi ana é ha a bécíéhe ni tan alecehen, ke é o bo mulie cemwo.»

²² Ke e tode Iésu nge ha a céiu duaan wo Pétéru, ke e cihe me ubwo ne kon, ke e pii ten pie: «Úhu, Padaame! O te tice celi e o tooko celi wonaa!»

²³ Ke e biteeng wo Iésu ne kon, ke e pii pie: «*Caatana, go engen mu he pwahamiing! Be go teko pwobwoniéo koja ana te nime Padué kon. Be time go uce niimihi pwohewii Padué, kehe go niimihi pwohewii ni apulie!»

A bwo âcéi Iésu

²⁴ ††E pii te ni acémun den wo Iésu pie: «Wo paceli nimen me e âbé céing [beme pa acémun dong] ke me e nemwo bo uce piniimieng mwo. Kehe wâé heme e canihi a *kuri cé ten, ke me e âbé céing. ²⁵ ††Be wo pana nimen me e celuimi a mulihen, ke e o patieden. Kehe wo pana e patieden a mulihen mu kong, ke o celuimieng. ²⁶ ††He ade ne te pa apulie, hemepie e hegi ati ni naamuu a bwohemwo, ke me e patieden a mulihen? Kona ace de aceli o jan me e ne, beme e pwocuhi mwo a mulihen?»

²⁷⁻²⁸ †††«Geé tabemi ehi: É pii tewé ati anaa, be é o bo mwojuia mwobé, me é ne a pwodaame tong, woéo pa Nahi Apulie. Ke geme bo âbé me ni *âcélo tong ha a junuu Padué, me a bwo ubwo na a wâé ten. Ke é bo ne ce ceme ni penem de ni apulie. Ke pwo lépwo béén na élé éni jena na, na lé o mwo te alihi anaa, ânebuhe ce bwo mele telé.»

Habwii a bwo ubwo na a wâé ten

Maréko 9.2—13; Luka 9.28—36

17 Alecehe ni tan na 6, ke wo Iésu, ke e pé Pétéru, me lupwo pwénaâjién wo Cang me Ioane. Ke lé taa pwo a juwole na te nihe ubwo. ² ††Ke pitaatééhi a bwo alieng ne he pwahamiilé. Be pwodaadii a pwahamiin pwohewii a téale, ke pwojo pwomelaa ni epwé-nen pwohewii a pwéélang. ³ Ke lé te ali kuti *Moosé me *Élia, [lupwo alo péroféta ânebun na piubwo julu] he lé ko picihe me weeng.

⁴ Ke e pii te Iésu wo Pétéru pie: «Padaame, te nihe wâé heme genye ko mu éni. Hemepie nimem, ke é o pacuuli ce mwa mwaanu celi cié ne éni, beme a dem a céiu, ke me a de Moosé a céiu, ke me a de Élia a céiu.»

⁵ †††E he e mwo teko cihe, ke e te âbé kuti a menii na pwomelaan, ke e taluilé. Ke lé téne a pwocihe bé mu ha ali menii, na e pii pie: «Wo paje, ke pa Naing [na te

††† 16.24 Mataio 10.38; Luka 14.27 †† 16.25 Mataio 10.39; Luka 17.33; Ioane 12.25 †† 16.26 Mataio 4.8—9 ††† 16.27 Psaume 62.13; Proverbes 24.12; Mataio 25.31; Roma 2.6; Pii Beetihi 22.12 ††† 17.2 2 Pétéru 1.16—18 ††† 17.5 Deutéronome 18.15; Psaume 2.7; Ésaie 42.1; Mataio 3.17; Maréko 1.11; Luka 3.22

céiu nang] na te junihe eânimung den. Ke geé piténeeng!»

⁶ Ke me lé téne a pwocihe naa wo lépwo acémun den, ke lé tidih jililé, ke lé miibule, be mwotilé.

⁷ Ke e âbé céiil wo Iésu, ke e ti kolé, ke e pii telé pie: «Geé cuwoda! Ke geé nemwo pwo me mwotikewé!»

⁸ Ke me lé alehede, ke lé alihi pie, caa te piwoélé cehi me Iésu.

⁹ Ke me lé homwobé mu pwo juwole, ke e pii mwoiuhi telé wo Iésu pie: «Geé nemwo pii te ce béé apulie nina geé alihi, dieli ha ace tan celi é bo mulie cemwo mu ha amele, woéo pa Nahi Apulie.»

¹⁰ Ke lé tahimwo Iésu pie: «Lé pii wo lépwo *dotéén ko patén pie, wo Élia, ke pana me e mi âbé ânebuhe [pa *Mesia]. Ke he wonaa be woté?»

¹¹ Ke e hegi ne telé wo Iésu pie: «Éa kuti, e mi âbé wo Élia, beme e pine ehi ati ni naado he ni amu nen.

¹² ††Kehe icehi ana é pii tewé pie: E caa te âbé wo Élia, kehe time lé uce temehieng ne ni apulie, ke lé te pwo ten nina nimelé kon. Ke te pwohewii ne mwo kong, be é bo mu he ni picani mu kolé, woéo pa Nahi Apulie.»

¹³ †Ke lé bwo temehi wo lépwo acémun den pie, e cihe telé ko *Ioane pa apipuu apulip.

E pwo me wâé pa céiu ewa @ na pwo duéé kon

Maréko 9.14–32; Luka 9.37–45

¹⁴ [Me lé homwobé mu pwo juwole] wo Iésu me lépwo acémun den na cié jélé, ke lé tooli a pubu apulie.

Ke e âbé céii Iésu wo pa céiu apulie, ke e tidih jilin ânebuhen. ¹⁵ Ke e pii ten pie: «Padaame, go pipwoéhe pa naîng, be e kon a duéé na e pwo me éjén nang, ke te junihe cunu nang kon. É he ni béé be-naamwon, ke e mu tahieng da pwo miû, ai é he tabe.

¹⁶ Ke é caa pééeng bé céii lépwo acémun dem, ke time uce jan me lé pwo me wâé nang.»

¹⁷ Ke e pii telé wo Iésu pie: «[É te junihe pipwoéhewé] wogewé ni apulie jena! Mwo te time geé uce téele céihi, be wogewé ni apwo mwoiu pun! O é dieli éniile celi é o mwo te mu pelewé, ke me é mwo tee picani ne kowé? Geé pébé éni pa cuwo ewa naa!»

¹⁸ Ke e peni ali duéé wo Iésu, ke e pii ten pie: «Go wie!» Ke e wie, ke te wâé kuti pali cuwo nahi ewa.

¹⁹ ††É alecehen, ke me lé bwo te pimu cehi wo Iésu me lépwo acémun den, ke lé âbé mwonueng, ke lé tahimwoeng pie: «É ko ade na time uce jan me geme pwo me e wie ali duéé?»

²⁰ ††Ke e hegi ne telé pie: «Wonaa be te junihe wahin kuti a céihi tewé. Kehe é pii tewé a juuju pie: Hemepie a céihi tewé, ke me te ju wahin pwohewii a pide *moutarde*, ke o te jan me geé pii te a juwole ce pie: “Go engen mulang”, ke e o te engen! Ke o te tice aceli

† 17.10 Malachie 3.23 †† 17.12 Mataio 11.14 † 17.13 Luka 1.17 †† 17.19 Mataio 10.1 †† 17.20 Mataio 21.21; Maréko 11.23; Luka 17.6; 1 Korénit 13.2

o pwocoon ne kowé. ²¹ {Be o te icehi mu ko a pwoiitihi te Padué, me a pipatupwo wiinaado, na o jan me geé pawiehi a bwo pwo duéé naa.}»

E pii mwo a bwo mele ten

²² ††É alecehen, ke lé pipwotapitihi ne Galilé wo Iésu me lépwo acémun den. Ke e pii telé pie: «O bo icuéo te ni apulie, woéo pa Nahi Apulie. Ke lé bo imwiéo, ²³ ke lé o bo pwo me é mele, kehe é ha a béciéhe ni tan alecehen, ke é bo mulie cemwo mu ha amele.»

Ke me lé téne anaa, ke te junihe piwahin jélé kuti.

A cuhi puni apulie ko a mwaiitihi

²⁴ ††Lé tehene nge Kapernaüm wo Iésu me lépwo acémun den. Ke lé âbé céii Pétéru wo lépwo *atai mwani cuhi puni apulie ko a *mwaiitihi, ke lé tahimwoeng pie: «Kona wo pa caa tewé, ke e te ne mwo a cuhi puni apulie ko a mwaiitihi?»

²⁵ Ke e hegi ne telé wo Pétéru pie: «Éa! E te pwocuhin mwo!»

É alecehen, ke lu taa ha a mwa me Iésu. Ke e te pwome cihe wo Iésu, ke e pii te Simon Pétéru pie: «Simon, de ace bwo alihi nen dem? Woo paceli e o pwocuhi puni apulie [§] ne te pa daame? Wo pa eapwihi amu, ai wo pa aâbé?»

²⁶ Ke e hegi ne ten wo Pétéru pie: «Wo pa aâbé.»

Ke e pii ten wo Iésu pie: «Éa kuti, beme wo pa eapwihi amu, ke time e o uce pwocuhin. ²⁷ Kehe icehi ana genyu nemwo pwotahinaado ne kolé. Go â tapwé, ke ace ikua celi go céi, ke go waa a pwon, be go o tooli a mwani, ke go pébé me a cuhi puni apulie tenyu ko a mwaiitihi.»

A pwooti ko a pimiibule

Maréko 9.33–50; Luka 9.46–48

Woo pana piubwo nang?

18 ^{§†}É ha a benaamwon naa, ke lé âbé céii Iésu wo lépwo acémun den, ke lé tahimwoeng pie: «Kona woo paceli piubwo nang ne ha a *Mwametau he Miiden?»

² Ke e tode pa cuwo nahi ewa, ke e neeng ha awiemelé. ³ ††Ke e pii telé pie: «Geé tabemi ehi, be é o pii tewé a juuju pie: Mepie time geé uce pwo me piwahin gewé, me geé pwohewii ni cuwo ewa, ke time geé o uce taa ha a Mwametau he Miiden. ⁴ Ke hemepie pwo pace apulie celi e pwo me piwahin nang pwohewii pa cuwo nahi ewa ce, ke o bo piubwo nang ne ha a

†† 17.22 Mataio 16.21 †† 17.24 Exode 30.13, 38.26 § Pwocuhi puni apulie—Grek: Pwocuhi ni béé puni apulie (*impôts*). É ne pele lépwo Roma, ke wo lépwo na lé mu ha a tii telé (*citoyens*), ke time lé uce pwocuhi a mwani cuhi puni apulie. Te icehi lépwo na lé patiedenilé ne ko pa. † 18.1 Luka 22.24 †† 18.3 Mataio 19.14; Maréko 10.15; Luka 18.17

Mwametau he Miiden. ⁵ †Ke wo pana e hegi ne he ni-ning pace cuwo nahi ewa pwohewii paje, ke e hegiéo.»

Go nemwo pwotahi a céihi ten!

⁶ †«Go nemwo pwotahi a céihi † te pa apulie na e céihi ne kong pwohewii a cuwo nahi ewa, be o te junihe ubwo a kuhinaado tem. Ke wâé heme cie ace pilehe péi ne ko a henem, ke o tahiko ole ha anumwihi! ⁷ O te cuwo ko pwo ni bwomunen me nye tupwo ne ha a ta ne pwo a bwohemwo ce. Kehe go pipwocile, be o te junihe ubwo a kuhinaado te pana e pwo me lé tupwo ne ha a ta wo lépwo béén.

⁸ †«Mepie a watihen a im, ai a am, me go pwo ana ta, ke go tahagéi, ke go tahi taabwon nge ité kojako. Be wâé heme go taa ha *a ju mulip pele Padué, hemepie te céiu a im, ai te céiu a am. Kehe te junihe pwoééhém heme go te cile lupwo im, me am, ke me tahiko ne ha a miû na te tice pwonehin. ⁹ Ke me watihen a naamiim me go pwo ana ta, ke go tuu tahi nge ité kojako. Be wâé heme go taa ha a ju mulip pele Padué, hemepie te céiu a naamiim. Kehe te junihe pwoééhém me go tee cile lupwo naamiim, ke me tahiko ne ha a miû.

¹⁰ †«Geé pipwocilekewé, beme geé nemwo tééti ni cuwo nahi ewa na lé céihi ne kong! Be é pii tewé a juuju pie: Ni *âcélo na lé te wéilé, ke te élé pele Caa tong jeda he miiden. ¹¹ ††{Be woéo pa Nahi Apulie, ke é âbé me é *celuimi nina lé pipatieden.}»

A ocine ko a muto na e pipatieden

¹² ††«Ade ace bwo niimihinaado tewé ne ko a jepule ce?

«Pwo pa céiu apulie, na pwo 100 ni muto ten. Ke mepie tieden aceli te ju céiu nang, ke e o pwo de? E o necu nelang li 99 muto, ke e o â hane ali muto li e pipatieden. ¹³ Ke me e tooeng, [ke a tan naa] ke e te junihe pipwodéén ko a muto na te ju céiu, koja nina 99 na lé te mu. Ke geé tabemi ehi, be é pii tewé a juuju pie: ¹⁴ O wonaa ne ko Caa tewé ^s na e jeda he miiden, be time uce nimen me e patieden paceli te ju céiu nang mu ko ni naîn.»

Pa céiu acéihi béém na e pwo ana ta

¹⁵ ††«Mepie e pwo {tem} aceli ta wo pa céiu acéihi béém, ke go â tooeng, ke geu mi picihe ehi, ke go habwii ten ana ta na e pwo. Ke me e piténedeko, ke caa wâé, be go caa pééeng koja a ta. ¹⁶ †††Ke me time e uce piténedeko, ke go pé pace ai wo lupwoce acéihi me geé picihe me weeng, beme lu bo pajuujuhi a picihe

† 18.5 Mataio 10.40; Luka 10.16; Ioane 13.20 †† 18.6–7 Luka 17.1–2 † Pwotahi a céihi—ai Pwo me patieden a céihi—ai Ne me e pwo ana ta. Grek: Pwo me e tupwo. †† 18.8 Mataio 5.29–30 †† 18.10 Ébéru 1.14 ††† 18.11 Luka 19.10 ††† 18.12–14 Luka 15.4–7 † Caa tewé—ai Caa tong. †† 18.15 Luka 17.3; Galat 6.1 ††† 18.16 Deutéronome 19.15; Ioane 8.17

tewé [pwohewii ana caa te tii ne he ni tii iitihii pie]: *Wâé heme alo ai cié ni *apajuujuhi nen.*

Deutéronome 19.15

¹⁷ Ke mepie muhi ten me e ténedekewé, ke go â pii te ni apwoiitihii. Ke mepie muhi ten me e ténedé ni apwoiitihii, ke geé nemwo pipéce ne kon, be e bo â pwohewii nina time lé uce céihi, me ni *atai mwani cuhi puni apulie.

¹⁸ ††«Geé tabemi ehi, be é o pii tewé a juuju pie: Ati nina geé paciitihii ne éni pwo bwohemwo, ke e o te paciitihii ne mwo jeda he miiden wo Padué. Ke ati nina geé pii pie wâé ne éni pwo bwohemwo, ke e o te pii pie wâé ne mwo jeda he miiden.»

Geé pipwoiitihii ibu!

¹⁹ †††«A céiu mwo, ke wo lupwoceli alo jululu mu kowé, ke me céiu jululu ne ko aceli lu pwoiitihii ne kon, ke e o bo pwo ne telu wo Caa tong jeda he miiden. ²⁰ Be mepie alo ai me cié celi lé neibulé ne he niing, ke woéo ha awiemelé.»

Pa eabwé na time e uce pineu pa béén

²¹ E âbé céii Iésu wo Pétéru, ke e tahimwoeng pie: «Padaame, hemepie e te cuwo ko pwotahi ne kong wo pa bééng, ke o oniile jo ko pineueng? Dieli ko 7?»

²² ††Ke e hegi ne ten wo Iésu pie: «Time é uce pii tem pie, é dieli ko 7, ai é dieli ko 7000 ††. [Kehe go te pineueng taaci.] ²³ Be a Mwametau he Miiden, ke pwohewii ani:

«E bwo mu wo pa céiu daame, ke nimen me e teme-hi ace jéhi ce kérédi te ni eabwé ten. ²⁴ Ke e tabuhi mu ko pa céiu, ke lé pébé céiieng pana e caa taa pwo ni *milliard* ††† na hiwon ni kérédi ten. ²⁵ Ke caa time uce jan me e wodehin. Ke e pii wo pa daame pie: “Me icueng beme pa *apenem tice ja kon. Ke icu mwo mwoden, me ni naîn, me ni naamuun! Icuhi ati, beme e pwocuhi ni kérédi ten!”

²⁶ «Kehe icehi ana wo paje, ke e tidihii jilin he pwa-hamii pa daame, ke e é, me pii ten pie: “É ileko pie, go nemwo wele, be é bo te pwocuhi ne tem ati!”

²⁷ «Ke e te pipwoééhén wo pa daame, ke e citihii taabwon ni kérédi ten, ke e neeng me e engen.

²⁸ «Ke nebwén, ke e engen wo pali eabwé, ke pitapitulu me pa béén ko penem, na e pé kojaeng a mwani péi na te ju céiu †††. Ke e imwi pali, ke e pwoti henen, ke e pii ten pie: “Go piepin me go wodehi ni mwani tong!”

†† 18.18 Mataio 16.19; Ioane 20.23 ††† 18.19 Maréko 11.24; Ioane 15.7 †† 18.22 Luka 17.4 †† 7000—Grek: 70 x 7. A ocine cehi ko a numéru na junihe ubwo. ††† Ni milliard na hiwon—Grek: 10000 talents. Céiu a talent, ke a cuhi pa apulie na céiu nang he na 20 ni jo. ††† A mwani péi na te ju céiu—Grek: 100 mwani péi (deniers). A bwopiinen pie, te junihe wahin koja ni kérédi ten (10000 talents = 60 million deniers).

²⁹ «Ke e tidihni wo pali he pwahamiin, ke e pii ten pie: “É ileko pie, go nemwo wele, be é bo te wodehin ne mwo tem!”

³⁰ «Kehe icehi ana muhi te paje, ke e neeng da he karépu, ucéihi ace bwo wodehi ne ni kérédi ten.

³¹ «Ke lé téetihni ne ni béélu ko penem, ke te junihe muhi telé †, ke lé â pitéteiminaado te pa daame helé.

³² «Ke e tode pali eabwé wo pa daame, ke e pii ten pie: “Wogo, ke pa eabwé na piticenaado ne kom! Be li é ciitili ati li kérédi tem li te junihe ubwo, be he li go ko âbé é ne kong! ³³ Ke wogo mwo, ke me go pipwoééhe pa béém, pwohewii a bwo pipwoééhém dong!”

³⁴ ††«Ke e te junihe okéé wo pa daame, ke e pwo me imwi pali eabwé, ke e neeng he karépu. Ke e pwocuhinaado ten, ucéihi ace bwo wodehi na ati ni kérédi ten.»

³⁵ †[Ke e panebwénihi a ocine naa wo Iésu, ke e pii pie]: «O wonaa ana e o pwo tewé wo Caa tong jeda he miiden, hemepie time geé uce pineu pa bééwé acéihi he ni ju pwonimewé.»

A piaten me a pitahagéi piaten

Maréko 10.1–12

19 Me e pii ati anaa wo Iésu, ke e engen mu ha amu Galilé, ha a duaan *Judé ne gaale cemwo ne ko a éémwa Ioridano. ² Ke hiwon ni apulie na lé âcécín, ke e pwo me wâé nina cunu jélé.

³ Ke lé âbé céiieng ne ni béé *Farasaio, ke lé pwo me lé pipwohuô ten, ke lé tahimwoeng pie: «Kona te pwo mwomwon de pa apulie ne he ni patén, me e cibéé ê mwoden? He ade ace watihen me e cibééeng?»

⁴ ††Ke e hegi ne telé wo Iésu pie: «Kona time geé uce pine ana caa te tii ne he ni tii iitihni? Be caa tii pie, é ha atabuhi kon, me e tabuhi a bwohemwo wo Padué, ke e ne pa aiu me é toomwo.

Genèse 1.27

⁵ ††Ke e pii wo Padué pie: *Ke é mu ko anaa, ke e patupwo lu nyaa me caa ten wo pa aiu, beme lu pimu me é mwoden. Ke me wonaa, ke caa céiu julú.*

Genèse 2.24

⁶ «[É ko anaa na é pii tewé pie]: Caa time bo uce alo mwo lupwoce apulie, kehe caa te ju céiu julú. Ke geé nemwo pineitééhi mwo nina e caa pineibuhi wo Padué!»

⁷ ††Ke lé hegi ne ten wo lépwo Farasaio pie: «Ke me wonaa, ke kona é ko ade na e pii wo *Moosé pie, pwo mwomwon de pa apulie me e pawie mwo é mwoden, hemepie e pwo ace tii me pitahagéi piaten?»

⁸ Ke e pii telé wo Iésu pie: «E ne a mwomwon dewé, be te junihe mwoiu ni puniwé! Kehe icehi ana é ha atabuhi kon, ke time uce wonaa. ⁹ ††É ko anaa na é pii

† Te junihe muhi telé—ai Te junihe wahin jélé. †† 18.34 Mataio 5.25–26 † 18.35 Mataio 6.15; Maréko 11.25; Éféso 4.32; Kolosé 3.13 †† 19.4 Genèse 1.27, 5.2 †† 19.5 Genèse 2.24; Éféso 5.31 ††† 19.7 Deutéronome 24.1–4; Mataio 5.31 ††† 19.9 Mataio 5.32; 1 Korénit 7.10–11

tewé pie: Go nemwo cibéé ê mwodem na time uce é abune aiu §. Be, me go cibééeng, ke me go piaten mwo, ke go bune toomwo koja é mwodem ânebun.»

Pwo ni béén na time lé uce piaten

¹⁰ Lé pii te Iésu wo lépwo acémun den pie: «Heme wonaa, ke wâé heme tice piaten!»

¹¹ Ke e hegi ne telé pie: «A pwooti naa, ke time e uce ne, me de ati ni apulie, kehe wo Padué, ke e te ne cehi te ni béén me lé hegi. ¹² Be te pwo ni béén na time lé uce piaten, be time uce jan me lé pwo, mu he ni bwo âbeele telé. Ke pwo ni béén na te tice naillé ko nina lé pwo ne ko ni éélé ni apulie §†. Ke pwo ni béén na time lé uce piaten, be watihen a *Mwametau he Miiden. [Be nimelé me lé pipwoeabwé ehi te Padué.] Wo paceli nimen me e hegi a pwooti naa, ke wâé heme e hegi!»

E adéi ni cuwo nahi ewa wo Iésu

Maréko 10.13–16; Luka 18.15–17

¹³ É alecehen, ke lé âbé céii Iésu ne ni béé apulie, ke lé pébé céiieng ni cuwo ewa, beme e ne ni in huíilé, ke me e pwoiitihni me delé. Kehe icehi ana lé cihe me ubwo ne kolé wo lépwo acémun den, ke lé pacuwolé.

¹⁴ ††Kehe icehi ana e pii telé wo Iésu pie: «Geé ne ni cuwo nahi ewa me lé âbé céiié! Geé nemwo pacuwolé! Be a Mwametau he Miiden, ke a de ni apulie na lé pwohewii ni cuwo nahi ewa.»

¹⁵ Ke e ne ni in wo Iésu pwo puni ni cuwo ewa [ke e adéilé]. Ke é alecehen, ke e engen mu ha a duaan naa.

Pa apulie na nihe pwo den

Maréko 10.17–31; Luka 18.18–30

¹⁶ É he e mwo ko wonaa wo Iésu, ke e te tuie kuti wo pa céiu apulie, ke e tahimwoeng pie: «Pa apipune, he ade aceli me é pwo celi o wâé, beme é hegi a *mulie dieli mwo ne pele Padué?»

¹⁷ ††Ke e hegi ne ten wo Iésu pie: «Kona é mu ko ade na go tahimwoéo ko aceli wâé? Te céiu pana wâé nang. Ke hemepie nimem me pwo ne tem *a ju mulip, ke go piténehehi ni patén den.»

¹⁸ ††Ke e pii ten wo pali pie: «Kona de ce patén den?» Ke e hegi ne ten wo Iésu pie:

«Go nemwo taunuhi apulie;

Go nemwo pibune;

Go nemwo bune;

Go nemwo geti ni apulie§†;

¹⁹ §†Go paciiti lu nyaa me caa tem;

§ Go nemwo cibéé ê mwodem... ai Go nemwo cibéé ê mwodem, kehe icehi ana hemepie éce toomwo celi iitihni me geu piaten. §† 2e phrase—Heme a bwomu te ni béé apulie ânebun, ke mepwo wo lépwo apulie naa, na pii kolé pie eunuque

§†† 19.14 Mataio 18.2–3 §† 19.17 Lévitique 18.5; Luka 10.28 §†† 19.18 Exode 20.12–16; Deutéronome 5.16–20 §† Go nemwo geti ni apulie—A bwopiinen pie, go nemwo wonaa ne ha a mwotautinaado. §† 19.19 Exode 20.12–16; Lévitique 19.18

Go pwo me eânimem de ni béén†, pwohewii a bwo pieânimem dem.»

Exode 20.12–16

Lévitique 19.18

²⁰ Ke e hegi ne ten wo pali apulie pie: «É caa te ténédehi kuti ninaa, ke he ade aceli me é pwo mwo?»

²¹ Ke e hegi ne ten wo Iésu pie: «Mepie nimem me te junihe wâé ehi ni huô tem ne he pwahamii Padué, ke go engen, ke go â icuhi ati ni den, ke go ne ni cuhin ne te nina tice delé, be me wonaa, ke o pwo ce dem ne pele Padué. Ke nebwén, ke go âbé céing.»

²² Kehe me e téne anaa wo paje, ke te junihe piwahin nang, be te junihe pwo den, ke e engen.

A bwo taa ha a Mwametau

²³ Ke e pii wo Iésu te lépwo acémun den pie: «Geé tabemi ehi, be é pii tewé a juuju pie: Wo pa apulie na te junihe pwo den, ke te junihe pwocoon den me e taa ha a Mwametau he Miiden. ²⁴ Kona a *chameau*††, ke te jan ne kon me e taa ha a pwon ko a diti? Úhu, pwocoon, kehe é pii tewé pie: Wo pa apulie na te junihe pwo den, ke mwo te junihe pwocoon ne kon me e taa ha a *Mwametau te Padué.»

²⁵ Ke lé te junihe téetihí wo lépwo acémun den, ke lé pii pie: «Ke kona woo paceli jan me e piceluiimieng?»

²⁶ †Ke e omelé wo Iésu, ke e pii telé pie: «Ana time uce jan ne ko pa apulie me e pwo, ke jan ne ko Padué. Be ati ni naado, ke te tai jan ne ko Padué.»

²⁷ Ke e pii ten wo Pétéru pie: «Wogeme, ke geme caa patupwo ati ni naado, beme geme âcéim. Ke he ade aceli geme o hegi?»

²⁸ ††Ke e hegi ne telé wo Iésu pie: «Geé tabemi ehi, be é o pii tewé a juuju pie: E bo taatéhi me mwo coho ati ni naado wo Padué. Ke é ha a tan naa, ke woéo pa Nahi Apulie, ke é o bo tebwo pwo atebwo tong ne ha *a wâé tong. Ke wogewé na geé âcéing, ke geé tebwo pwo ni 12 atebwo te lépwo daame, beme geé o pihuô te ni 12 pwomwoiu *Isaraéla.

²⁹ «Ke wo paceli e patupwo a pomwa ten me ni âjié-nen, me ni toomwo pwaadeniin, me lu nyaa me caa ten, me ni naîn, me ni apwoamu ten, watihen a niing, ke e o bo hegi celi piwéden, celi te junihe ubwo ke hiwon, ke o pwo den ko a mulie dieli mwo ne pele Padué. ³⁰ ††Ke hiwon nina lé ânebun jena, na lé bo alece. Ke hiwon nina lé alece jena, na lé bo ânebun.»

Ni apenem na piwie a cuhilé

20 [E pii mwo telé wo Iésu pie]: «A *Mwametau he Miiden, ke pwohewii ani:

† Ni béén—Grek: Pana e mu mwonuko, ai Pa ju béem.

†† Chameau—Wota he melé. A bwopiinen ni pie, a wota na nihe ubwo. † 19.26 Job 42.2 †† 19.28 Mataio 25.31; Luka 22.30; Pii Beetihí 3.21 †† 19.30 Mataio 20.16; Luka 13.30

«E bwo mu wo pa eapwihi a ni tabe megele, ke e bwo wie he mwo ju acaama ne ha apwojenep, beme e hane ce apenem den. ² Ke e too ni béén, ke lé caa piténéle pie, me e pwocuhilé ko a cuhi a tan na céiu ko penem ††. Ke e nelé nge ha apwoamu. ³ É nge ko 9 inetéale ha acaama, ke e wie mwo ne ha apwojenep, ke e ali mwo ni béén na te tice celi lé pwo. ⁴ Ke e pii telé pie:

“Wogewé mwo, geé âmwo penem ha ali apwoamu tong, be é bo te ne ace cuhikewé celi jan.”

⁵ «Ke lé engen. Ke e wie mwo he te ju goahen wo pali, ke e pé mwobé ni béé apenem. Ke piwien mwo ko cié inetéale alecehe a goahen.

⁶ «Ke nebwén, ke e wie mwo nge ko nim inetéale, ke e too mwo ni béén na lé teko pitabée, ke e tahimwolé pie: “Lépwoje, kona geé teko pwo de? Te tice aceli geé pwo?”

⁷ «Ke lé hegi ne ten pie: “Wonaa, be te tice paceli me e péékeme me geme penem.”

«Ke e pii telé pie: “Wogewé mwo, ke geé â penem ha apwoamu tong.”

⁸ ††«Ke â babwén, ke e pii te pa caa te penem den pie: “Go todebé lépwo apenem, ke go pwocuhilé, ke go mi pwocuhi lépwoli lé bwo penem alece, ke go bwo panebwénihí ne ko lépwoli lé mi penem.”

⁹ «Ke lé mi âbé wo lépwoli lé bwo penem alece, ke lé pé ni cuhilé pwohewii a cuhi penem he na céiu tan.

¹⁰ Ke me lé alihi anaa wo lépwoli lé mi penem, ke lé piniimihi pie: ‘Wâé, be genye o hegi celi piwéden!’

«Kehe icehi ana lé te hegi mwo, pwohewii ana lé te hegi wo lépwo apenem alece. ¹¹ Ke lé okéé ne ko pali eapwihi apwoamu, ¹² ke lé pii ten pie: “Wo lépwoje, ke lépwoli lé bwo tuie alece, ke te céiu a inetéale na lé penem hen, ke go ne me te piwie a cuhikeme! Kehe wogeme, ke geme picani ko ni bwo mwaale geme, ke cinikeme na a téale!”

¹³ «Ke e hegi ne te pa céiu béélé wo pali eapwihi apwoamu, ke e pii ten pie: “Pa bééng, go nemwo niimihi pie é pihamiko, be li genyu caa te piténekenyu ne ko a cuhiko. ¹⁴ Go pé ni mwani tem, ke go engen, be nimung me é ne te nina lé alecehem celi piwien me wogo. ¹⁵ Te pwo mwomwon dong me é pihuôhi ni mwani tong. É ko ade na go piniimihi tahi he é pwo ana wâé ne ko ni béén?”»

¹⁶ §[Ke e panebwénihí a ocine naa wo Iésu, ke e pii pie]: «Wo lépwona lé alece, ke lé o bo ânebun, ke nina lé ânebun, ke lé bo alece.»

††† A cuhi a tan na céiu ko penem—Céiu a mwani pwojo (denier). Te piwie ni mwani na e ne telé ne he ni niide a tii 9,10,13. ††† 20.8 Lévitique 19.13; Deutéronome 24.15 § 20.16 Mataio 19.30; Maréko 10.31; Luka 13.30

E pii a béociéhe a bwo mele ten

Maréko 10.32–34; Luka 18.31–34

¹⁷ Lé mwo ko engen me lé â *Iérusaléma wo Iésu me lépwo 12 acémun den [me ni béé apulie]. Ke e pé itéhi ni acémun den, ke e pii telé pie: ¹⁸ †«Geé téne, genye o caa taa Iérusaléma. Ke é nelang he na o neó, woéo pa Nahi Apulie, te lépwo caa te lépwo *apwoâpwailo, me lépwo *dotéén ko patén. Ke lé bo tautiéo die ko ace bwo taunuéo, ¹⁹ ke lé o neó te nina te tice céihi telé. Ke woélé, ke lé o pihooniéo, ke lé o ahiéo ko a bwaliwota, ke lé o cemeiteéo ne ko a *kuricé, dieli ko a bwo mele tong. Kehe icehi ana é ha a béciéhe ni tan alecehen, ke é o mulie cemwo mu ha amele.»

Genye pwo me piwahin genye

Maréko 10.35–45

²⁰ É alecehe anaa, ke lé âbé céii Iésu wo mwode Zébédé me lupwo naîn. Ke e tidihii jilin he pwahamiin wo êje, beme e ilehi kojaeng a céiu naado.

²¹ ††Ke e pii ten wo Iésu pie: «De aceli nimem kon?»

Ke e hegi ne ten pie: «É hemepie go bo mu ha a Mwametau tem me ha *a wâé tem, ke wâé heme go pwo me lu tebwo ko ni piduaam wo lupwo naîng ce: wo pa céiu ne pwo juim, ke wo pa céiu ne pwo eaa-mum.»

²² †Ke e pii [te lupwoli pwénaâjién] wo Iésu pie: «Time geu uce temehi ana geu ko ilehi! Kona geu o te ûdu a tabe ko picani na é o ûdu?»

Ke lu hegi ne ten pie: «Éa, o te jan ne komu!»

²³ Ke e pii telu pie: «Éa kuti, geu o te ûdu a tabe na é o ûdu. Kehe time o uce woéo na é pihuôhi pie, woo paceli e o tebwo pwo a ing ne pwo jui, ke é pwo eaa-mung. Be te wo Caa tong na e caa te piwâamihii ni atebwo naa, me de ni béén na e caa te pipégaliilé.»

²⁴ Me lé téne a pwocihe naa wo lépwo 10 acémun béélu, ke lé te junihe okéé ne ko lupwo pwénaâjién naa.

²⁵ ††Ke e todelé wo Iésu, ke e pii telé pie: «Geé temehi pie, é ne pele ni béén na time uce ni apulie te Padué †, ke lé caaite ni apulie wo lépwo daame me lépwo api-huô. Ke lé pwo me piubwo jélé. ²⁶ †††Kehe wogewé, ke geé nemwo pwohewiilé! Be wo pana nimen me piubwo nang ne hadeniwé, ke wâé heme e pipwoeabwé tewé. ²⁷ Ke wo pana nimen me e pihuô tewé, ke wâé heme pa céiu *apenem tice ja kon ne pelewé. ²⁸ †††Wâé heme geé pipwohewiilé, woéo pa Nahi Apulie, be time é uce âbé beme lé pipwoeabwé tong. Kehe é âbé beme é pipwoeabwé te ni apulie, ke me é patupwo a

† 20.18 Mataio 16.21, 17.22–23 †† 20.21 Mataio 19.28; Luka 22.30 † 20.22 Mataio 26.39; Ioane 18.11 †† 20.25 Luka 22.25–26 †† Ne pele ni béén... Grek: Ne pele ni bele. ††† 20.26 Mataio 23.11; Maréko 9.35 ††† 20.28 Luka 22.27; Filipi 2.7

mulihung, beme cuhi a bwo *celuimi ni apulie na hi-won jélé.»

E pwo me lu niê wo lupwo bwi

Maréko 10.46–52; Luka 18.35–43

²⁹ É alecehe a bwo â Iériko telé, ke lé wie wo Iésu me lépwo acémun den. Ke te junihe hiwon ni apulie na lé âcéilé.

³⁰ Pwo lupwo bwi na lu tebwo ko a jije pwaaden. Ke me lu téne pie e tuie wo Iésu, ke lu te toii da kuti pie: «{Padaame,} pa *Naî Davita, go pipwoééhemu!»

³¹ Ke lé pihaalu ne ni apulie, beme lu nemwo cihe. Kehe icehi ana lu bwo junihe cihe da ko miiden kuti, ke lu pii pie: «Padaame, pa Naî Davita, go pipwoééhemu, ke go picani temu!»

³² Ke e â cuwo wo Iésu, ke e todelu, ke e tahimwolu pie: «Ade aceli nimeu me é pwo me deu?»

³³ Ke lu hegi ne ten pie: «Padaame, me go tehi ni naamiimu, me gemu niê.»

³⁴ Ke e te junihe pipwoééhelu wo Iésu, ke e pétaa ko ni naamiilu. Ke lu caa te niê kuti [pwohewiin ânebun §]. Ke lu âcéi Iésu.

E taa Iérusaléma wo Iésu

Maréko 11.1–24; Luka 19.28–48; Ioane 12.12–19

21 É he lé mwo ko engen me lé â *Iérusaléma wo Iésu me lépwo acémun den, ke lé caa âmwonuhi Betfagé, a mwopopwaalé na e mwonuhi a juwole ko ni Olivier. Ke e mi ne ngen lupwo alo acémun den wo Ié-su.

² Ke e pii telu pie: «Geu â ha a mwopopwaalé na e ânebuhenye. Ke geu bo tooli nelang a buriko na lé taaeng, me a naîn. Ke geu tuwolu, ke geu péélu bé céi-iéo.³ Ke mepie lé tahimwokeu ko aceli geu pwo, ke geu hegi ne telé pie: “Nime Padaame kolu.” Ke lé o nelu teu.»

⁴ E tuie a bwopwonen naa, beme e pacuwohi ali e pii wo Padué, na e pwaadeniin bé wo pa péroféta ten pie:

⁵ ††Go pii te Iérusaléma, pie:

*Go alihi, go é toomwo *Sion,
be e âbé céiiko wo Padaame hem!
Te junihe bwala a pwonimen,
be e âbé ha a péém.*

*E tebwo pwo a nahi buriko^{†††},
a wota na e pé ni âneule.Ésaie 62.11; Zakari 9.9*

⁶ Ke lu engen wo lupwoli acémun, ke lu te tai pwo ati nina e pii telu wo Iésu. ⁷ Ke lu pébé ali nyaa te buriko me ali naîn, ke lé ne ni epwén huîlu wo lépwo acémun den. Ke e bwo taa tebwo huî ali nahi buriko wo Iésu.

§ Pwohewiin ânebun—Omehi Maréko 10.52 ke Luka 18.43.
†† 21.5 Zakari 9.9 ††† A nahi buriko—Grek: A buriko, a nahi buriko.

Lé pipaunueng ne ni apulie

⁸ Hiwon ni apulie na lé talihi ni mwaanu telé nge pwo a pwaaden ânebuhe Iésu [beme lé pipaunueng]. Ke ni béén, ke lé tahagéi ni mii acuwo na mwo wamin, ke lé ne pwo a pwaaden. ⁹ †Ke hiwon ni apulie na lé ânebun ke lé alecehe Iésu. Ke lé tai toii da pie:

«*Osana!* Pipwoun de Padué!

Pipaunu pa *Naî Davita!

**Adéi pa apulie*

na e âbé ne he nii Padaame!Psaume 118.26

Osana me adéihi!

Paunu Padaame na e daaité!»

¹⁰ É he e tehene nge Iérusaléma wo Iésu, ke te junihe emegéi na ati ni apulie ha a pwomwo ubwo, ke lé pitahimwolé pie: «He woo pa apulie ce?»

¹¹ Ke lé hegi ne telé ne ni apulie na lé âcécín pie: «Wo Iésu mu Nazaret é Galilé, pali péroféta [li genye tee ko ucéieng].»

E peni lépwo api-icu mu ha a mwaiitih

¹² ††E taa ha a *mwaiitih wo Iésu, ke e peni wie nina lé pwojenep nelang. Ke e tamiibutih ni taap te lépwo ataatéhi mwani, ke ni atebwo te lépwo a-icuhi meni ‡.

¹³ ††Ke e pii telé pie: «E pii ne he ni tii iitih wo Padué pie: *A mwa tong, ke bo toii kon pie a mwo ko pwoiitih.*

Ésaie 56.7

Kehe wogewé, ke geé ko pwo me ataduwo te lépwo abune!»

Jérémie 7.11

¹⁴ Lé âbé céii Iésu ne ha a mwaiitih ni bwi me ni tebwa, ke e pwo me wâé jélé. ¹⁵ Ke lé téetih ne ni caa te lépwo *apwoâpwailo me ni *dotéén ko patén, he lé alihi ni naado na wâé na e pwo wo Iésu. Ke lé alihi mwo ni cuwo nahi ewa na lé cihe da ko miiden ne ha a mwaiitih, ke lé pii pie: «*Osana!* Pa Naî Davita!»

Ke lé te junihe okéé ne ko Iésu wo lépwo apihuô naa.

¹⁶ ††Ke lé pii te Iésu pie: «He go teko téne nina lé pii ne ni cuwo nahi ewa ce?»

Ke e hegi ne telé wo Iésu pie: «Éa, time geé mu uce pine ni pwooti na tii ne he ni tii iitih, na e pii pie:

É mu pwo ni ewa

me ni cuwo nahi ewa

na lé mwo âbeele,

ke lé bo pii a wâé tem,

âcehi ana te nimem kon.» Psaume 8.3

† 21.9 Psaume 118.25–26 †† 21.12 Ioane 2.13–22 ‡ Lépwo a-icuhi meni—Wo lépwo Juif na lé mulie ne he ni amu na lé mu ité, ke lé mu âbé ha a mwaiitih ne Iérusaléma. Ke lé pwocuhi ni wota beme ni âpwailo. Ke lé taatéhi mwo ni mwani bépiciani, be iitih me lé pébé ni mwani te lépwo Roma. Ke wo lépwo api-icuhi wota me lépwo ataatéhi mwani, ke lé pé mwani ko anaa. †† 21.13 Ésaie 56.7; Jérémie 7.11 †† 21.16 Psaume 8.3

¹⁷ Ke e nelé wo Iésu, ke e wie mu ha a pwomwo ubwo beme e â Bétani, ke e pule lang.

A éé majing na te tice acehin

¹⁸ É ha acaama hen, he e mwojuia ngemwo ha a pwomwo ubwo, ke menen. ¹⁹ Ke e alihi a *majing ne ko jije pwaaden, ke e piâmwonuhi, kehe e te ju tooli cehi ni madihin ††. Ke e pii ten pie: «O time o bo uce pwo mwo ce acehiko!»

Ke caa te meu kuti. ²⁰ Heme lé alihi anaa wo lépwo acémun den, ke lé te nihe téetih, ke lé pii pie: «Woté ace bwomunen me e piepin ko meu?»

²¹ †††Ke e hegi ne telé wo Iésu pie: «É pii tewé a juuju: Hemepie pwo ace céihi tewé, ke mepie time uce pinekepé tewé, ke o jan me geé pwo ana é pwo te pa majing ce. Ke o te jan mwo me geé pii te pa juwole ce pie: “Go engen mulang, ke go ole ha a jilé!”, ke e o te pwo.

²² †††«Ati nina geé ilehi mu ko a pwoiitih, ke geé bo hegi, hemepie geé céihi ne kon.»

Woo na e ne te Iésu a pihuô?

Maréko 11.27—12.12; Luka 20.1—19

²³ E taa ha a mwaiitih wo Iésu, ke e pacémuni ni apulie.

Ke lé âmwonung wo lépwo caa te lépwo apwoâpwailo, me lépwo apihuô, ke lé tahimwoeng pie: «Woo na e ne tem a pihuô me go pwo nina go ko pwo? Woo na e pahedeko?»

²⁴ Ke e hegi ne telé pie: «Woéo mwo, ke é o mwo tahimwokewé ko a céiu naado. Ke hemepie geé hegi ne tong, ke é bo pii tewé pana e ne tong a pihuô me é pwo ni naado naa. ²⁵ Wooélé na e ne a pihuô te Ioane me e *pipuu apulie? Wo Padué, ai ni apulie?»

Ke lé te junihe picuhe kon, ke lé pipii telé pie: «Mepie genye hegi ne ten pie: “É mu ko Padué”, ke e o pii tenye pie: “Ke é mu ko ade na time geé uce céihi ne ko nina e pii tewé wo Ioane?” ²⁶ †††Ke mepie genye hegi ne ten pie: “É mu ko ni apulie”, ke é mulang, ke genye pipwocilekenye ne ko ni apulie na lé céihi ne ko Ioane!»

Be lé tai céihi ne kon pie pa péroféta [te Padué].

²⁷ Ke é mu ko anaa, ke lé hegi ne te Iésu wo lépwo apihuô pie: «Mening, time geme uce temehi.»

Ke e pii telé pie: «Ke woéo mwo, ke time é o uce pii tewé pie, he wooélé na e ne tong a pihuô me é pwo ni na é ko pwo.»

††† Cehi ni madihin—Te ité, be tice acehi pa majing naa, be lupwo alo benaamwon ne ha a jo na lé aca ne ni acuwo majing. Wieli a ocine ko a bele Isaraéla. Omehi a Majing ne ha a Niinaado (Vocabulaire) ha anebwén ko a tii. ††† 21.21 Mataio 17.20; Luka 17.6; Ioane 14.12; 1 Korénit 13.2 † 21.22 Mataio 7.7–11, 18.19 †† 21.26 Mataio 14.5

A ocine ko lupwo pwénaâjién

²⁸ [E pwo-ocine telé wo Iésu pie]: «Ade celi geé niimihi ne ko a jepule ce?

«Lé bwo mu wo pa céiu apulie, me lupwo naîn. Ke e pii te pa bécéiuhén pie: Pa naîng, go â penem ha apwoamu jénaa.

²⁹ «Ke e hegi ne ten wo paje pie: “Te muhi tong.”

«Kehe icehi ana é alecehen, ke e pininim ne ko ali bwo hegi ne ten den. Ke e bwo te â penem ha ali apwoamu.

³⁰ «Ke e pii te pali céiu wo caa telu pie: “Pa naîng, go â penem ha apwoamu jénaa.”

«Ke e hegi ne ten pie: “Éa, wâé go caa. É o caa ân.” Kehe icehi ana time e uce ân.

³¹ «Ke woo hadenii lupwona celi e piténéde caa telu?»

Ke lé hegi ne ten wo lépwo caa te lépwo apwoâpwailo me lépwo apihuô pie: «Wo pa bécéiuhén.»

Ke e pii telé wo Iésu pie: «Geé tabemi ehi, be é o pii tewé a juuju pie: Lé o ânebhewé ne ha a *Mwametau te Padué wo lépwo *atai mwani cuhi puni apulie, me ni toomwo pwopwaaden. ³² †Be e âbé céiikewé wo Ioane pa apipuu apulie, beme e habwii tewé, wogewé a bele *Isaraéla, a pwaaden na *mwomwon ne he pwahamii Padué. Ke time geé uce céihi ne kon. Kehe icehi ana wo lépwo atai mwani me ni toomwo pwopwaaden, ke lé te céihi ne kon. Ke me geé alihi pie lé céihi, ke time geé uce pininim, me geé céihi ne kon.»

Lépwo awéihi na a ni tabe megele

³³ ††«Geé tabemi a céiu ocine:

E bwo mu wo pa eapwihi a ni tabe megele ‡. Ke e cemi apwoamu ten, ke e bwo pwo a aba beme babé kon. Ke e bwo ini a pwon, beme acaai ace tabe megele, ke me e bo céi ne hen a tabe hen. Ke e bahi a mwa na te junihe bwali da ko miiden, beme a mwowéa ko ali ni éé tabe megele. Ke nebwén, ke [e niimihi pie me] e mwo â pitabée ha ace céiu amu, ke e pwocuhi ni béé apulie, beme lé wéihi ali ni tabe megele ten, ke e engen.

³⁴ «[Pwo ni wole alecehen] ke tuie nge ha a benaamwon ko tabwo ace tabe megele. Ke e ne ngen ni apenem den, beme lé â hegi ce den mu ko a pitii âdaanu, koja lépwoli awéihi ni éé tabe megele. ³⁵ Kehe icehi ana lé imwilé wo lépwoli awéihi ni tabe megele. Ke lé pitati pa bécéiuhén, ke lé taunu pa béalohen, ke lé taunu mwo pa bécéihen ko péi. ³⁶ Ke e ne mwobé ni béé apenem. Kehe icehi ana te piwie ana lé pwo telé. ³⁷ Ke nebwén, ke e ne ngen pa naîn, be e piniimihi pie lé o paciitieng.

† 21.32 Luka 3.12, 7.29–30 †† 21.33 Ésaie 5.1–2 ‡ A ni tabe megele—Vignoble.

³⁸ ††«Kehe icehi ana me lé alieng he e tehene ngen, ke lé pipii telé pie: “Geé téné! Te weengaa kuti pana e bo eapwihi ali ni tabe megele ha ace céiu tan! Wâé heme nye ju taunueng, beme bo a denye ali ni tabe megele!” ³⁹ ††Ke lé imwieng, ke lé teuueng wie koja a apwoamu, ke lé taunueng.»

⁴⁰ [Ke wo Iésu, ke e tahimwo lépwona lé ko tabemieng pie]: «Ke kona mepie e tehenebé wo pali eapwihi ali apwoamu, ke e o woté te ni apenem naa?» ⁴¹ Ke lé hegi ne te Iésu wo lépwo caa te lépwo apwoâpwailo, me lépwo apihuô pie: «E bo taunu lépwona lé pwotahinaado, ke e bo uce ne te ce béén a apwoamu, beme lé bo uce wéa kon. Ke é ha a benaamwon celi lé tabwo ace tabe megele hen, ke lé o bo ne ten ce den.»

⁴² ††Ke e te pii telé mwo wo Iésu pie: «Kona time geé uce pine ana tii ne he ni tii iitihi?

Ali péi li lé tahi taabwon

wo lépwo abahi mwa,

ke te anaa kuti a ju paamwa.

Be te ni âpihuô te Padaame.

Ke nye téetihi a wâé ten,

na nye caa ko alihi!Psaume 118.22–23

⁴³⁻⁴⁴ «{Hemepie e tupwo wo pace céiu apulie ne pwo a péi naa, ke o tatubwi ati a één. Ke mepie e tupwo ali péi ne huî pace céiu apulie, ke o te ju tagetieng.} Weengaa a watihen me é pii tewé pie: Ke e o pé kojakewé [a *adéihi ko] a Mwametau ten wo Padué. Ke e o ne te ace céiu bele, celi e bo ne ce acehi ni penem de lépwo ju nahi a Mwametau.»

⁴⁵ Lé temehi wo lépwo apihuô te lépwo apwoâpwailo me lépwo *Farasaio, pie e ko pwo-ocine ne kolé wo Iésu. ⁴⁶ Ke te nimelé me lé imwieng. Kehe icehi ana mwotilé ko ni apulie, be te junihe hiwon ni béén na lé niimihi pie pa péroféta [te Padué].

A piwiinaado ubwo ko a piaten

Luka 14.15–24

22 Ke e pwo-ocine telé mwo wo Iésu, ke e pii telé pie: ² «A *Mwametau he Miiden, ke pwohewii ani:

«E bwo mu wo pa céiu daame. Ke e piwâam ko a piwiinaado na te junihe ubwo ko pa naîn na e piaten.

³ Ke e pahede ni eabwé ten, me lé â tode nina lé pahede céiilé ne ko a piwiinaado. Kehe icehi ana wo lépwona, ke time uce nimelé me lé âbé wiinaado.

⁴ «Ke e pahede mwo ni béé eabwé ten, me lé â pii telé pie: “É caa pipwopweehi ati. Be é caa pwo me lé taunui paaci me ni wota tong na géréén jélé. Geé âbé me nye piwiinaado ibu ko a piaten!”

⁵ «Kehe icehi ana time lé uce pipéce ne kolé wo lépwona todelé. Ke lé tee muko engen ne ko ni penem

†† 21.38 Mataio 27.18 †† 21.39 Ébéru 13.12 ††† 21.42 Psaume 118.22–23; Roma 9.33; 1 Pétéru 2.6–8

delé, be e â ha apwoamu ten wo pa céiu, ke e â mu ha a magaha ten wo pa céiu. ⁶ †Ke wo lépwo béén, ke lé imwi lépwoli eabwé, ke lé pwotahinaado ne kolé, ke lé taunulé. ⁷ Ke e te junihe okéé kuti wo pa daame. Ke e pahede ni coda ten me lé â taunu ni pwréca naa, ke lé cini a pwomwo ubwo telé.

⁸ «Ke e todebé ni béé eabwé ten, ke e pii telé pie: “Caa nebwn ali wiinaado ko piaten, kehe icehi ana wo lépwoli é caa todelé, ke time uce jan ne kolé. ⁹ Ke geé â ati he ni dihe pwaaden, ke geé todebé ati ce apulie celi geé toolé.”

¹⁰ «Ke lé engen uti ni pwaaden wo lépwoli eabwé, ke lé tode ati ni apulie na lé toolé, nina ta jélé, me nina wâé jélé, ke caa te ju â oba ali mwowiinaado.

¹¹ «Ke e taa wo pa daame, beme e ali lépwoli lé ko wiinaado. Ke e ali pa apulie na time e uce cuwohe ace epwén ko piwiinaado. ¹² Ke e pii ten pie: “Pa bééng, go woté ko ace bwo taabé tem éni, he te tice epwénem ko piwiinaado?”

«Ke time e uce temehi ace bwo hegi nen ne ten wo paje.

¹³ ††«Ke e pii te li eabwé ten wo pa daame pie: “Geé cie ni in me ni an, ke geé tahieng wie ne ha a melepiing, he na lé bo é nelang, ke lé piwii pecuwo.”»

¹⁴ Ke e pii wo Iésu pie: «Hiwon ni apulie na e todelé wo Padué, kehe time uce hiwon nina e pipégalié.»

A cuhi puni apulie te lépwo Roma

Maréko 12.13–17; Luka 20.19–26

¹⁵ †É ha a céiu tan, ke lé pitapitilé wo lépwo *Farasaio, beme lé hane ace bwopwonen me lé pipwohuô te Iésu ko ace bwo hegi nen den ne telé.

¹⁶ Ke lé pahede ngen ni béé acémun delé, me ni béén na élé ha a duaan de *Érode ††. Ke lé â pii te Iésu pie: «Pa apipune, geme temehi pie go pii a juuju, be go te patemehi ati ni naado na nime Padué me genye pwo. Be time uce mwotiko ko pa apulie, ke time go uce pipwoinen ne kolé. ¹⁷ Ke anaa kuti ana nimeme me geme tahimwoko pie: He te wâé heme †† nye pwocuhi puni apulie te pa daame he lépwo Roma? Ai time uce wâé?»

¹⁸ Kehe e te temehi a bwo pipwohuô telé wo Iésu, ke e pii telé pie: «Lépwowe, wogewé ke lépwo agele! É ko ade na geé pihaamié? ¹⁹ Geé cuwoteeke habwii tong ace mwani *cuhi puni apulie!»

Ke lé ne ten a mwani péi.

²⁰ Ke e pii telé pie: «A démee, ke a nii-î ana e pwo a mwani ce?»

²¹ †††Ke lé hegi ne ten pie: «A de pa daame he lépwo Roma.»

† 22.6 Mataio 21.35 †† 22.13 Mataio 8.12, 25.30; Luka 13.28
‡ 22.15 Maréko 3.6 †† Duaan de Érode—Lépwona wâé telé a pihuô te Érode me lépwo Roma. †† He te wâé heme... ai He pwo mwomwon denye. Wieli pii na a patén ko pwoitihiti te lépwo Juif.
‡†† 22.21 Roma 13.7

Ke e pii telé wo Iésu pie: «Ke caa wâé, ke geé ne mwo te pa daame nina te ni den, ke geé ne te Padué nina te ni de Padué.»

²² Ke lé te junihe téetihiti a bwo hegi nen den. Ke lé cepewieeng, ke lé engen.

A bwo mulie cemwo te ni amele

Maréko 12.18–27; Luka 20.27–38

²³ ††Mwo te é ha a tan naa, ke lé âmwobé céii Iésu wo lépwo béé *Saducéen. [Woélé, ke te a céiu dihe pwoitihiti te lépwo *Juif] na time lé uce céihiti pie, lé o mulie cemwo wo lépwo amele.

Lé âbé too Iésu, [ke lé pwo me lé habwii pie lé juuju] ke lé tahimwoeng pie: ²⁴ †«Pa apipune, e caa pii wo *Moosé ne he ni patén pie: *Hemepie e mele wo pace céiu apulie celi te tice naîn, ke wâé heme e pé é depwele*††ten wo pa ciéen me lu piaten.

Deutéronome 25.5

Be me wonaa, ke me bo pwo ce piebehi pa amele.

²⁵ «[Ke te wâé. Kehe go cuwoteeke niimihi ani]: Pwo lépwo pwénaâjién na 7 jélé, ke e piaten wo pa cuwolé, kehe icehi ana e mele he mwo te tice naîn. Ke lu piaten wo pa béalohen me égi depwele. ²⁶ Ke te piwien ne mwo ko pa béalohen, ke pa béciéhen, die ko pa bé7 hen. ²⁷ Ke é alecehelé ati, ke e bwobe mele wo égi toomwo. ²⁸ Ke [go ko pii pie] lé o bo mulie cemwo ne ni amele, ha ace céiu tan. Ke hemepie wonaa, ke o bo wooélé mu hadeniilé celi bo pa aiu he é toomwo naa, ha a benaamwon naa? Be caa te tai lépwo aiu hen ati! [Ke go cuwoteeke hegi!]]»

²⁹ Ke e hegi ne telé wo Iésu pie: «Geé pipweéo, be time geé uce temehi ni tii iitihiti, me a junuu Padué.

³⁰ Be mepie lé mulie cemwo ne ni amele, ke time lé o bo uce piaten mwo. Kehe lé mulie pwohewii ni *âcélo ne pele Padué. ³¹ He time geé uce pine ali e pii wo Padué ne ko a mulie cemwo? Be e pii pie: ³² †††Woéo Padué he *Abérama, ke Padué he Isaaka, ke Padué he *Iakobo*.

Exode 3.6

[A bwopiinen pie, lé teko tai mulie pele Padué!] Be time uce Padué he ni amele, kehe Padué he nina lé mulie!»

³³ Ke lé téne anaa ne ni apulie na hiwon jélé, ke lé te junihe téetihiti a bwo pacémunilé te Iésu.

A patén na piwéden

Maréko 12.28–34; Luka 10.25–28

³⁴ Me lé téne wo lépwo Farasaio pie e capuhi ni pwo lépwo Saducéen wo Iésu, ke lé pitaineibulé, beme lé â ali Iésu.

³⁵ Ke pwo pa céiu béélé, pa céiu *dotéén ko patén, na nimen me e pipwohuô te Iésu, ke e tahimwoeng

††† 22.23 Apostolo 23.8 § 22.24 Deutéronome 25.5 †† Depwele—Veuve. ††† 22.32 Exode 3.6; Mataio 8.11

pie: ³⁶ «Pa apipune, kona ade patén celi e piwéden na ati he ni patén?»

³⁷ †Ke e hegi ne ten wo Iésu pie: «Weengi: *Go pwo me eânimem de Padaame Padué hem, ati ne ha a ju pwonimem, me a mulihem, me a bwo niimihinaado tem.*

Deutéronome 6.5

³⁸ Weengaa a patén na junihe piwéden ne ha ati ni patén. ³⁹ ††Ke weengi a béalohe ni patén, na pwohewii ali ânebun: *Go pwo me eânimem de ni béén†, pwohewii a bwo pieânimem dem.*

Lévitique 19.18

⁴⁰ ††«Ati ni *patén de Moosé, me ni cémun de ni péroféta, ke lé te tai âbé mu ko lupwo patén naa.»

Nihe pwonaado ne ko pa Mesia

Maréko 12.35–37; Luka 20.41–44

⁴¹ Lé mu aujeni Iésu wo lépwo Farasaio, ke e tahimwolé pie: ⁴² ††«De ace bwo niimihinaado tewé ne ko pa *Mesia? Pa piebehii?»

Ke lé hegi ne ten pie: «Pa piebehi *Davita.» [A bwopiinen pie pa apulie na wahin nang kojaeng.]

⁴³ Ke e pii telé pie: «Wo Davita, ke he caa ju tilieng na a *Jenen Iitihii, ke e pii ko pa Mesia pie: “Padaame hung”. Kehe é mu ko ade? ⁴⁴ ††Be e pii pie:

*Pwooti te Padaame Padué,
na e pacihe pa daame hung:
“Go âbé tebwo éni pwo a juing.
[É ne tem a pihuô,
ke o pipaunuko dieli mwo.]
É pwo me go caaite
nina lé pipwopa ne kom.”Psaume 110.1*

⁴⁵ «Ke me e ko pii wo Davita pie: *Padaame hung*, ke a bwopiinen pie, wo pa Mesia. Ke me wonaa, ke ade ace watihen me geé niimihi pie, wo pa Mesia, ke time uce pace apulie celi piubwo nang koja Davita ††?»

⁴⁶ Ke te tice paceli e hegi ne ten. Ke é alecehe anaa, ke te tice paceli e bo uce tahimwoeng mwo ko ce béé naado.

Nemwo pipwohewii ni Farasaio

Maréko 12.38–40; Luka 11.43–46, 20.45–47

23 É alecehen, ke lé tabemi Iésu wo lépwo acémun den me ni apulie na lé mu lang, he e pii telé pie: ² «Geé te ali lépwo *dotéén ko patén me lépwo *Farasaio, be a penem delé me lé pacémuni ni apulie ko ni *patén de Moosé.

³ ††Ke wâé heme geé piténe dehi ati nina lé pii tewé. Kehe icehi ana geé nemwo pipwohewiilé, be time lé

† 22.37 *Deutéronome 6.5* †† 22.39 *Lévitique 19.18; Mataio 7.12* † Ni béén—*Grek: Pana e mu mwonuko, ai Pa ju béém.* †† 22.40 *Roma 13.10; Galat 5.14* †† 22.42 *Ioane 7.42* ††† 22.44 *Psaume 110.1; Mataio 26.64* ††† *Grek: Heme e pii wo Davita pie ‘Pa daame’, ke é ko ade me pa naïn? § 23.3 Malachie 2.7–8*

uce pwo nina lé pii tewé! ⁴ Be ni pihuô telé, ke pwohewii ni âneule na te junihe téé, na lé ne me lé taawon ne ni apulie. Be te muhi telé me lé ti kon ko a mwodéilé na te ju céiu!

⁵ ††«Ati ni huô telé, ke lé pwo, beme lé alilé ne ni apulie [pie lé teko âcehi ni pihuô te Padué]. Ke lé pwo me piubwo ni cuwo nahi élele iitihii ^{5††} na mu pwo bwaadelé, ke é ko ni ilé. Ke lé pwo me bwali ni baaé epwénéle ^{5†.6} Ke lé te cuwo ko pipégali ni atebwo ânebun ne he ni piwiinaado ubwo, ke é ne he ni *mwotapitihii. ⁷ Be wâé telé heme lé pipaunulé ne ni apulie, ke me lé pii telé pie ‘Pa daame’.

⁸ «Kehe wogewé, ke geé nemwo pwo me lé pii kowé pie ‘Pa daame’. Be te céiu Pa daame. Be wogewé, ke lépwo pwénaâjién. ⁹ Ke geé nemwo pii ko pace céiu apulie éni pwo bwohemwo pie ‘Caa’ ^{9††}, be te céiu pa Caa tewé, na e jeda he miiden. ¹⁰ Ke geé nemwo pwo me pitoii kowé pie ‘Pa apihuô’, be te céiu Pa apihuô, na wo Kériso, pa *Mesia. ¹¹ ††Wo pace apulie celi piubwo nang ne pelewé, ke wâé heme e pwo me piwahin nang. ¹² ††Be wo pana e pwo me piubwo nang, ke o neeng ole. Ke wo pana e pwo me piwahin nang, ke o pineeng da.»

E paténe lépwo Farasaio wo Iésu

¹³ E pacihe mwo lépwo Farasaio me lépwo dotéén ko patén wo Iésu, ke e pii telé pie: «Geé pipwocile, wogewé lépwo apipulekenye ke lépwo apihaami! Be o te junihe ubwo a kuhinaado tewé! Be time geé uce taa ha a *Mwametau he Miiden wogewé, ke geé capuhi a pomwa ne ko ni béén na nimelé me lé taa.

{ ¹⁴ «Geé pwo ni jame pwoiitihii [beme nye o niimihi pie, ni apulie na wâé gewé]. Kehe icehi ana geé pé ati koja ni depwele ni delé. Ke é mu ko anaa kuti, na o bo ne tewé a kuhinaado na junihe ubwo koja a kuhinaado te ni béén.}

¹⁵ «Wogewé, ke lépwo apulie na te junihe ta gewé! Be geé téte pitihii a bwohemwo me a jilé, beme geé tooli ace apulie celi te ju céiu nang, ke me e hegi a pwoiitihii tewé. Ke me geé caa pééeng, ke geé pwo me pa apulie na te junihe ta nang kojakewé, ke jan me e â ha a miû, pwohewiikewé!

§† 23.5 *Exode 13.9; Nombres 15.38–39; Deutéronome 6.8; Mataio 6.1* §†† *Cuwo nahi élele iitihii—Phylactères. A cuwo nahi élele na pwo ko iiwota. Ke lé ne a cuwo nahi memwaanu na tii ne kon ni pwooti he ni tii iitihii. Ke lé cie ne pwo bwaadelé, ke é ko ni ilé. Lé wonaa be lé niimihi pie lé pacuwohi ni pihuô te Padué ne he Deutéronome 6.4–9. §† Bwali ni baaé epwénéle—E huôhi ne te lépwo Isaraéla wo Padué pie, me lé cuwohe ni epwén na frangés ne ko ni baaéén, beme lé piniimihi ati ni pihuô ten. Omehi Nombres 15.37–41. §†† Nemwo pii...‘Caa’—Time e uce paciitihii konye me nye pii anaa te lépwo caa tenye. Kehe icehi ana time uce wâé heme lé cuwokonye wo lépwo apihuô te ni acéihii, me nye junihe pipaunulé. §† 23.11 Mataio 20.26; Maréko 9.35; Luka 22.26 §† 23.12 Job 22.29; Proverbes 29.23; Luka 14.11, 18.14*

¹⁶ †«Geé pwocilekewé, wogewé lépwo bwi na geé pipé lépwo bwi. [Be geé pitalupe heme geé pacémuni ni apulie ko ni *piapwo.] Be geé pii telé pie: “Mepie go piapwo cehi ne ko nii ‘a *mwaiitihí’, ke te piticenaado ne kon, kehe mepie go piapwo ne ko ce mwani megele celi e mu ha a mwaiitihí, ke wâé heme go pwo ana go piapwo ne kon.”

¹⁷ †«Wogewé, ke lépwo pitice pwonimewé, ke bwi gewé! Ade aceli junihe pwonaado ne kon? A mwani megele ai a mwaiitihí? É pii tewé pie: Te a mwaiitihí cehi ana pipwonaado ne kon, be a duaan na e mu hen wo Padué!

¹⁸ †«Ke piwien mwo, heme geé pii pie: “Hemepie go te ju piapwo cehi ne ko *apwoâpwailo, ke o te piticenaado ne kon. Ke heme go piapwo ne ko a âpwailo na e mu pwon, ke wâé heme go pacuwohi a piapwo naa.”

¹⁹ †«Woté? Kona te tice aceli geé temehi? Ade aceli junihe pipwonaado ne kon? A âpwailo, ai a apwoâpwailo, na e pwo me iitihí a âpwailo? ²⁰ Geé téne, wo pana e piapwo ne ko a apwoâpwailo, ke e piapwo ati ne ko nina e pwon. ²¹ Ke wo pana e piapwo ne ko a mwaiitihí, ke e piapwo ne ko a nii Padué, be a mwa ten. ²² ††Ke wo pana e piapwo ne ko a miiden, ke e piapwo ne ko a atebwo iitihí te Padué [na e daaité].»

Wogewé lépwo apineduwohi na a ta!

²³ ††«Geé ne te Padué ana te ju céiu mu ko nina 10, é mu ko ni pétaapwo âdaanu ††. [Ke te wâé.] Kehe geé pipwocile! Be time geé uce âcehi ni junaado ne he ni patén: a ju céihi ne ko Padué, me a bwo pipwoiipi ni apulie, me a bwo pipwoééhelé ††. Wâé heme geé pacuwohi ati nina ubwo, me ati ni nahi patén. ²⁴ Wogewé ni bwi na geé pé ni bwi! Geé tapulicéihi a tabe beme geé pétaabwon a nabu, kehe icehi ana geé nemihí a *chameau*††!

²⁵ †††«O te junihe ubwo a kuhinaado tewé, be geé te ju gahe pwo! Be geé puu ehi pwo mwojéi ni mwoûdu me ni tam, kehe icehi ana te ju oba kuti ni pwonimewé ko nina ta. Be geé te junihe tapi, ke geé tee cuwo ko hane nina wâé me dewé, ke geé bune ni apulie! ²⁶ Wogewé ni bwi! Geé mi puu ni ne ni tamewé. Ke é mulang, ke o wâé ati ni tam.

²⁷ ††«Wogewé lépwo apineduwohi na a ta! Be geé pwohewii ni bwomu na timi me pwojo pwomwo, ke te ju wâé bwo alihi nen. Kehe icehi ana é henen, ke te ju oba ko duapulie, me ati ni naado na caa muti.

²⁸ ††Wogewé mwo, be é ne pwomwo, ke te junihe wâé

† 23.16 Mataio 15.14 †† 23.22 Ésaïe 66.1; Mataio 5.34 † 23.23 Lévitique 27.30; Miché 6.8 †† É mu ko ni pétaapwo âdaanu—Pii ehi he pwo grek pie: *Menthe me aneth me cumin. Be lé pine die ko ni cuwo nahi madinaado, beme lé habwii pie, lé piténédehi ni patén.* †† A bwo pipwoiipi...me a bwo pipwoééhelé—*La justice et la compassion.* ††† *Chameau—Wota he melé. A bwopiinen ni pie, a wota na junihe ubwo. Omehi Mataio 19.24. ††† 23.25 Maréko 7.4 § 23.27 Apostolo 23.3 §† 23.28 Luka 16.15*

gewé ne ko ni apulie, kehe é jengedé ne kowé, ke te ju oba ko gele me nina ta.»

Wogewé na geé taunu ni péroféta

²⁹ †«O te junihe ubwo a kuhinaado tewé, wogewé lépwo dotéén ko patén me lépwo Farasaio! Be geé pwonaamuu ni bwomuhe lépwo péroféta, me ni apulie na mwomwon jélé ne he pwahamii Padué. [Kehe te wo lépwo watihewé kuti li lé taunulé!] ³⁰ Ke geé pipii tewé pie: “Hemepie teko wogenye he ni benaamwon naa, ke wieli me time nye uce taunulé!”

³¹ †††«Kehe icehi ana heme geé ko pii anaa, ke geé pihabwiikewé pie, wogewé, ke te ni ju naî lépwona lé taunulé. ³² Te wâé, ke geé te panebwénihi ni penem de ni watihewé! ³³ ††Wogewé ni nahi bwien! Ke e bo pwocuhinaado tewé wo Padué, ke e bo tahikewé ne ha a miû! Ke time geé o uce piceluumikewé koja anaa!

³⁴ ††«Geé tabemi ehi, be é o pahede ni péroféta me nina lé pitemang, ke nina me lé pacémunikewé. Ke geé o tahi bwaliwota ko ce béén ne he ni mwotapitihí. Ke geé o pwotahinaado ne ko ce béén nge he ni amu. Ke geé o cemeite ce béén ne ko ce *kuricé. Ke geé o taunu ce béén ko ce béé bwopwonen.

³⁵ †††«Ke é mu ko anaa, na e bo tautikewé wo Padué ko a bwo taunu lépwona lé céihi ne kon: tabuhi mu ko Abel ††, pa apulie na e mwomwon, die ko Zakari †, pa naî Baraki. Be geé †† taunu Zakari ne ha awieme apwoâpwailo me a duaan na junihe iitihí. ³⁶ É pii tewé a juuju pie: E bo pwocuhinaado tewé wo Padué, wogewé ni apulie jenea, ko ati nina lé pwo ne ni watihewé.»

A pipwoééhe te Iésu @ ne ko lépwo Iérusaléma

Luka 13.34–35

³⁷ [E pii mwo wo Iésu pie]: «Au, mwolikewé wogewé lépwo *Iérusaléma! Be geé taunu lépwo péroféta [na e nelé bé céiikewé wo Padué] be geé ahi ni béén ko péi, ke geé taunu ce béén ko ce béé bwopwonen. Mu te cuwo ko nimung me é taineibukewé, pwohewii a nyaa te ja, heme e taineibuhi ni naî haahi ni puuin. Kehe icehi ana te muhi tewé. ³⁸ †††Ke geé téne, [é o mwo engen kojakewé] ke e o patupwo a mwaiitihí tewé wo Padué. ³⁹ †††Ke é pii tewé pie: O caa time geé bo uce aliéo mwo dieli ha ace tan celi geé o bo pii pie: *Adéi pa apulie na e âbé ne he nii Padaame!»

Psaume 118.26

††† 23.31 Apostolo 7.52 †† 23.33 Mataio 3.7, 12.34; Luka 3.7 §†† 23.35 Genèse 4.8; 2 Chroniques 24.20–21 §† Abel—Omehi Zenote Zakari—*Pa bénebwéne apulie mu ko lépwona taunulé ne ha a Élele Iitihí Ânebun (l’Ancien Testament).* §† Geé—*A bwopiinen pie, lépwo watihewé.* §†† 23.38 1 Rois 9.7–8; Jérémie 22.5 §†† 23.39 Psaume 118.26

O bo tanahi a mwaiitihi

Maréko 13.1–2; Luka 21.5–6

24 É alecehen, he e ko wie mu ha a *mwaiitihi wo Iésu, ke lé ko picedi ni aba kon wo lépwo acémun den. Ke lé piâbé mwonu Iésu beme lé habwii ten. ²†Ke e pii telé pie: «Geé te alihi ati ninaa? Ke é pii tewé a juuju pie: O time e bo uce mu éni mwo ace céiu péi pwo ace céiu. Be ati, ke o tai tanahi taabwon.»

Ana e o tuie

Maréko 13.3–37; Luka 21.7–30, 17.26–37

³[É alecehen] ke e tebwo pwo a juwole ko ni Olivier wo Iésu [ne he bebenihe a mwaiitihi]. Ke lé âbé mwonueng wo lépwo acémun den, ke te piwoélé cehi me weeng, ke lé tahimwoeng pie: «He éniile celi e o bo tuie ana go ko pii? Ke o ade ace inenaado ko ace bwo mwojuia cemwo tem, ke a pwonehi a bwohemwo?»

⁴Ke e hegi ne telé pie: «Geé pipwocile, beme geé nemwo pipweéo! ⁵††Be o hiwon nina lé o âbé heme lé pé a niing. Ke lé o pii tewé pie: “Woéo pa *Mesia”, ke lé o pipwohuô te ce apulie celi hiwon jélé.

⁶«Ke geé o téne heme lé cihe ko ce pa celi e mwonu ai e ité. Kehe geé nemwo pwo me mwotikewé! Be e o mi tuie ninaa, kehe icehi ana time uce téele a pwonehi a bwohemwo. ⁷†Be a céiu amu, ke e bo pipwopa me a céiu amu. Ke a céiu mwametau, ke e bo pipwopa me a céiu mwametau. Ke o bo pwo ni menele na ubwo ne he ni pétaapwo piduaan, ke ni penem bwohemwo. ⁸É ne he ni bwomunen naa, ke o pwohewii ni bécéiuhé picani ko a piâbeelee ewa.»

O pwotahi ne ko ni acéihi

⁹††«[É ha a benaamwon naa] ke lé o bo téetikewé mu kong ati ne ni apulie pwo bwohemwo. Ke lé o bo imwikewé, ke pwotahi ne kowé, dieli lé o bo taunukewé, mu ko ana wogewé ke ni apulie tong.

¹⁰«Ke o bo hiwon nina lé o bo patieden ni céihi telé. Ke lé o bo pitéétilé nina pibéélé, ke lé o bo pi-iculé mwo. ¹¹††O hiwon ni péroféta agele na lé o bo tuiebé, ke lé o bo pipwohuô te ce apulie celi hiwon jélé. ¹²Ke a ta, ke o bo piubwo da ne pwo a bwohemwo, ke o bo hiwon nina lé o bo patieden ni pwonimelé ne ko Padué, ke é ne ko ni béélé. ¹³†††Kehe icehi ana wo pana e cumang die ha anebwén [ko a mulihen] ke e bo celuimieng wo Padué. ¹⁴†††Ke o bo pipatemehi ati ne pwo a bwohemwo a Pwooti Wâé ko a Mwametau, beme lé o bo téne ne nina time lé uce téele temehi Padué. Ke é alecehe anaa, ke o caa a pwonehi a bwohemwo.»

† 24.2 Luka 19.44 †† 24.5 Mataio 24.23–24; 1 Ioane 2.18 † 24.7 Ésaie 19.2 †† 24.9 Mataio 10.22 †† 24.11 Mataio 24.5,24; 1 Ioane 4.1 ††† 24.13 Mataio 10.22 ††† 24.14 Mataio 28.19

Lé o te junihe picani ne ni apulie

¹⁵§«Geé bo alihi ali naado li e caa cihe kon wo péroféta Daniéla, he e bo mu ha a duaan na iitihi: ali naado li e pwotahi ati ni naado, na nihe mwakile nang, ke muhi tenye kon.»

Wo paceli e pine anaa, ke wâé heme e temehi [beme e bo cihe kon]!

¹⁶«Ke é ha a benaamwon naa, ke wâé heme lé tai cela da pwo ni juwole ne nina lé mu *Judé! ¹⁷§†Ke wo pana e âoté pwomwo ^{§††}, ke e nemwo taamwo hane ce naado mu ha a mwa ten. ¹⁸Ke wo pana e mu ha apwoamu, ke e nemwo mwojuia ngemwo pelen, me e pé ce epwéne. ¹⁹Au, mwolihi! Be é he ni tan naa, ke o pwoééhe ni toomwo na pigiaa jélé, me nina lé mwo paditihé ewa.

²⁰«Ke geé pwoitihi te Padué pie, me a bwo cela tewé, ke me time e o uce tuie ha ace benaamwon celi ta-amu hen, ai é ha ace *tan iitihi ^{§†}. ²¹§††Be, é ha a benaamwon naa, ke lé o te junihe mu he ni picani ne ni apulie. Be mwo te tice pace apulie celi e caa mu he ce picani celi wonaa, tabuhi ha atabuhi ko a bwohemwo, dieli jena. Ke o te tice mwo pace céiu apulie celi e o bo mu he ce picani celi wonaa.

²²«É hemepie time e uce niimihi wo Padué pie, me e pineole a jéhi ni tan naa, ke wieli me o te tice pace céiu apulie celi e o celuimi a mulihen! Kehe icehi ana e te niimihi pie me e pineole, wonaa mu ko nina e caa pipégaliilé.»

Lépwo ‘mesia’ na ni agele

²³§†«Mepie e pii tewé wo pace céiu apulie pie: “Geé alihi! E éni wo pa *Mesia!”, ai “E ha a duaan ce!”, ke geé nemwo céihi ne kon. ²⁴§†Be lé o bo tehenebé ce ‘mesia’ me ce ‘péroféta’ celi ni agele. Ke lé o pwo ce *pipwojunuun celi lé o téetihé ne ni apulie, beme a bwopwonen me lé pipwohuô telé. Ke lé o te hane mwo me lé pipwohuô te nina e caa pipégaliilé wo Padué. ²⁵Ke é ko anaa na é caa mi pii tewé ni naado na o bo tuie!

²⁶§††«Ke mepie lé pii tewé pie: “Geé alihi, e ha a melé ^{§§†} wo pa Mesia!”, ke geé nemwo ân. Ke me lé pii tewé pie: “Geé alihi, be e taduwo éni!”, ke geé nemwo céihi ne kon. ²⁷§§§Be a bwo âmwobé tong, woéo pa Nahi Apulie, ke o pwohewii a ilehi heme e pwéélang ati a miiden, mu ha a céiu baaéén die ha a céiu baaéén.

²⁸§†Be [pwohewii ana nye mu pii pie]: “É he na e lang a déhi wota, ke lé taineibulé nelang ne ni bwaooléé.”»

§ 24.15 Daniel 9.27, 11.31, 12.11 §† 24.17 Luka 17.31 §†† Âoté pwomwo—Grek: Pwo mwa, be pwo ko pule, ke te ju belece ehi, ke jan me nye engen pwon. Ke lé mu mwaale lang. §† Tan iitihi—Ne pele lépwo Juif, ke iitihi me lé ju engen ha a tan iitihi. §†† 24.21 Daniel 12.1 §† 24.23 Mataio 24.5 §† 24.24 Deutéronome 13.2–4; 2 Tésalonik 2.8–9; Pii Beetihé 13.13–14 §§† 24.26 Luka 17.23–24 §§† Melé—Da (désert). A duaan na ticie hen. §§§ 24.27 Mataio 24.37–39 18 24.28 Luka 17.37; Job 39.30

A bwo âm wobé te Iésu

²⁹ †«É he ni tan naa, ke lé o te junihe mu he ni picani ne ni apulie. Ke é alecehe anaa, ke:

O time e uce niê na a téale.

O bwén ne ha a wole.

Lé o bo tupwo ne ni ceni.

O éjén ni pipwojunuun he miiden†. Ésaie 13.10; 34.4

³⁰ ‡«Ke é mulang, ke e o tuie a inenaado ne jeda he miiden, ko a bwo tuie tong, woéo pa Nahi Apulie. Ke lé o haa ko ni bwo mwotilé ati ne ni bele pwo a bwohemwo, be lé aliéo, he é âbé pwo ni nii, ne ha ati a junuung me a bwo ubwo jo. ³¹ ††Ke me e cuu a tutu na ubwo [wo pa céiu *âcêlo] ke é o pawiebé ni âcêlo tong, beme lé neibu nina é caa pipégalié. Ke lé o taineibulé ne ha a céiu behi amu, die ha a céiu behin, pitihii a bwohemwo.»

A inenaado ko a éé majing

³² «Wâé heme geé temehi a inenaado ko a majing. Be, me e tile, ke geé caa temehi pie, caa é mwonu a cim naado.

³³ «Wonaa mwo, heme geé alihi ati ni naado naa, ke geé o temehi pie, o caa pacuwohi ati †. ³⁴ ††É pii tewé a juuju pie: [Time o uce bwolihi.] Be lé o mwo te alihi anaa ne ni béé apulie jena, ânebuhe ace bwo mele telé. ³⁵ ††Be o tieden a miiden me a bwohemwo, kehe o time uce tieden a pwooti tong.»

Geé tee ûmiê!

³⁶ §«Te tice pace apulie celi e temehi ace tan me ace inetéale celi e o tuie hen ni naado naa. Te tice paceli e temehi, heme woéo pa Naîn, heme ni âcêlo te Padué. Kehe te wo Caa cehi na e temehi.

³⁷ ††«A tan na é bo âbé hen, woéo pa Nahi Apulie, ke o pwohewii a benaamwon de Noé. ³⁸⁻³⁹ ††Be lé teko wiinaado me ûdu ne ni apulie; ke lé piaten, ke lé ne ni naîlé toomwo me lé aten. Ke te tice aceli lé temehi dieli ha a tan na e taa ha ali ong wo Noé. Ke e te âbé kuti ali jaa, ke e tai péélé ati.

«Ke o te piwien mwo me a bwo âm wobé tong, woéo pa Nahi Apulie. ⁴⁰ Be é ha a tan naa, ke lupwo apulie na lu mu ha apwoamu, ke o pé pace céiu, ke o ne pa céiu. ⁴¹ Ke alo lu toomwo na lu ko cemeii blé ibu, ke o

† 24.29 Ésaie 13.10, 34.4; Ézékiel 32.7; Joël 2.10, 3.4; 2 Pétéru 3.10; Pii Beetihii 6.12–13 †† O éjén ni pipwojunuun he miiden—A bwopiinen pie, O tupwo ni ceni, ai O pahauli ni mwametau me lépwo daame helé, ai O pahauli ni duéé. † 24.30 Daniel 7.13; Zakari 12.10; Pii Beetihii 1.7 †† 24.31 1 Korénit 15.52; 1 Tésalonik 4.16 †† O caa pacuwohi ati—Wieli a bwo mwojuia cemwo te Iésu, ai wieli a bwo tanahi na a pwomwo ubwo Iérusaléma, na pwo ha a jo 70. Omehi note ††† 24.34 Mataio 16.28 ††† 24.35 Mataio 5.18 § 24.36 Apostolo 1.7; 1 Tésalonik 5.1–2 †† 24.37 Genèse 6.5–8 ††† 24.38 Genèse 7.7,23

pé é céiu, ke o ne é céiu. ⁴² ††Wâé heme geé tee ûmiê, be time geé uce temehi ace benaamwon celi e o tuie mwobé hen wo Padaame hewé! ⁴³ ††Geé cuwoteeke ni-imihii ani: Wo pa eapwihi pwomwo, ke time e uce temehi ace inetéale celi e o taa ha a mwa ten wo pa abune na e âbé he bwén. Be hemepie e teko wéa, ke me time e o uce neeng me e taa pelen. ⁴⁴ Weengaa kuti ana é pii tewé pie: Geé te piwâam. Be é o bo âbé, woéo pa Nahi Apulie, kehe time geé uce temehi ace benaamwon.»

Pa eabwé na e piténedehi

⁴⁵ «He wooélé pa eabwé na e piténedehi, ke e pipwoi-pieng? Wo pana e pii ten wo pa daame hen pie: “É ne tem a penem [na pwonaado kon]: Go ne ce wiinaado te lépwo apenem dong he ce benaamwon celi wâé.”

⁴⁶ «Ke o te nihe wâé ne ko pa eabwé naa, hemepie e tuiebé wo pa daame, hemepie e teko penem ehi! ⁴⁷ ††É pii tewé a juuju pie: E o ne ten a pihuô ati ne ko ni den. ⁴⁸ Kehe icehi ana wieli pa apulie ta wo pa apenem naa, ke wieli e piniimihii pie: ‘O bwoli pa caa tong me e âm-wobé.’ ⁴⁹ Ke e ahi lépwo béen ko penem. Ke e te nihe wiinaado me ûdu me lépwo apiolo. ⁵⁰ Ke e o bo âm-wobé wo pa caa ten ha a tan na time e uce ucéieng, ke é ha a inetéale na time e uce temehi. ⁵¹ Ke e bo ne a kuhinaado na junihe ubwo te pa apenem naa, woélé me lépwo béé apenem na ta jélé, ke lé o é ke piwii pecuwo.»

Ni ewa toomwo na 10 jélé

25 ††[E pii mwo wo Iésu pie]: «A *Mwametau he Miiden, ke pwohewii ani:

«Lé bwo mu ne ni ewa toomwo na 10 jélé. Ke lé bwo pé ni mwomiû helé, beme lé â ucéi pa apiaten. ² Nim léna lé piténedehi, ke nim léna lé piléeng ††.

³⁻⁴ ††«Léli ewa toomwo li lé piténedehi, ke lé âbé imi ni mwomiû helé, ne pehi ni tabe hen. Kehe wo léli ewa toomwo li lé piléeng, ke lé âbé imi ni mwomiû helé, kehe icehi ana tice tabe hen.

⁵ ††«[Ke caa bwén] ke time e uce epin ko âbé wo pali apiaten. Ke caa nime léli ewa toomwo me lé pule, ke lé pule.

⁶ ††«É ha awieme bwén, ke lé téné a pwocihe na e pii pie: “Neko pa apiaten! Geé wie me nye â beniieng.”

⁷ ††«Ke lé tai ûmiê wo léli ewa toomwo, ke lé pwopee-hi li mwomiû helé. ⁸ Ke lé pii te léli apiténedehi wo léli ewa toomwo apiléeng pie: “Au! Caa tice tabe he ni mwomiû heme! Geé ne ce tabe he ni mwomiû heme ko ni nehi tabe tewé.”

§ 24.42 Mataio 25.13 †† 24.43 Luka 12.39–40; Pii Beetihii 16.15 †† 24.47 Mataio 25.21,23 †† 25.1 Luka 12.35; Pii Beetihii 19.7 †† É ne pele lépwo Juif ânebu, ke e tuiebé wo pa apiaten, beme e pébé é mwoden me ati ni apulie na e todelé, ne pele caa ten, beme lu piaten nelang. Ke lé tai pé mwomiû.

⁹ «Ke lé hegi ne telé pie: “Ûhu! Caa time uce jan. Kehe geé â pele ni a-icu me geé pwocuhi ce tabe he miû tewé.”

¹⁰ «Kehe icehi ana me lé mwo ko engen, ke e tuiebé wo pali apiaten. Ke wo léli ewa toomwo li lé caa te pi-wâam, ke lé caa tai taa me pali apiaten ha ali mwopiat-en. Ke e capuhi a pomwa.

¹¹ †«Mepwo é ne ko léli ewa toomwo apilééng, ke lé bwo tehenebé, ke lé toii pie: “Pa daame, pa daame, tehi a pomwa!”

¹² ††«Kehe icehi ana e hegi ne telé wo pali apiaten pie: “[Geé engen kojaéo] be time é uce temehikewé.”»

¹³ †[Ke e panebwénihni a ocine naa wo Iésu, ke e pii pie]: «Geé ûmiê, be time geé uce temehi ace tan me ace inetéale [celi é o tehenebé hen].»

Ocine ko lépwo eabwé na cié jélé

Luka 19.11–27

¹⁴ [E pii mwo wo Iésu pie]: «A Mwametau he Miiden, ke pwohewii ani:

«E bwo mu wo pa céiu apulie. Ke nimen me e â pitabée, ke e tode ni eabwé ten, ke e pawie ne telé ni naamuun.

¹⁵ ††«Ke e muko pétaapwo ne telé nina jan me lé pwo. E ne te pa céiu nina 5 million††, ke wo pa céiu ke 2 million, ke wo pa béciéhen ke 1 million, ke e engen. ¹⁶ Ke e engen wo pa eabwé na e hegi nina 5 million, ke e â penem ko ni mwani naa, ke e tooli mwo nina 5 million.

¹⁷ Ke wonaa ne mwo ko pana e ne ten nina 2 million, ke e te hane béén mwo, ke e tooli mwo nina 2 million. ¹⁸ Ke mepwo wo pali e ne ten ana 1 million, ke e â ini a pwon, ke e neduwahi ali mwani te pali caa ten, [ke time e uce penem kon].»

Wogo pa eabwé na wâé go!

¹⁹ «Caa bwolihi a bwo engen de pali daame, ke e mwojuia mwobé. Ke e tode lépwo eabwé ten, ke e tahimwolé ko aceli lé pwo ko li mwani ten.

²⁰ «Ke e hegi ne ten wo pali eabwé li e ne ten li 5 million pie: “Padaame, li go ne tong li 5 million. Ke weengi nina 5 million mwo, ni âpenem dong beme ni béén.”

²¹ ††«Ke e pii ten wo pali daame pie: “Wâé! Wogo pa eabwé na wâé go. Be go piténedehi ne he ni naado na wahin, ke é bo ne tem ce naado celi ubwo. Ke go taabé me genyu pipwodéén ibu.”

²² «Ke e âbé wo pali béalohe eabwé, ke e pii te pali daame hen pie: “Pa daame, weengi li 2 million li go ne tong. Ke weengi nina 2 million mwo, ni âpenem dong beme ni béén.”

²³ «Ke e pii ten wo pali daame pie: “Wâé! Wogo mwo pa eabwé na wâé go, be go piténedehi ne ko a naado na wahin, ke é bo ne tem ce naado celi ubwo. Kehe go taabé me genyu pipwodéén ibu.”»

Wogo pa eabwé na ta go!

²⁴ «Ke e âbé wo pa béciéhen, ke e pii ten pie: “Pa daame, é caa temehi pie, wogo, ke pa apulie na go okéé, be go tii ni âdaanu na time go uce cemi, ke go taineibuhi nina time go uce penem kon. ²⁵ Ke mwotiéo, ke é neduwahi ni mwani tem, [be koli é o patieden]. Ke weengi, ke go te pé mwo.”

²⁶ «Ke e hegi ne ten wo pali daame hen pie: “Wogo ke pa eabwé na ta go, be pa apwoemaan! Woté? Go caa te temehi pie, é tii nina time é uce cemi, ke é taineibuhi nina time é uce penem kon. ²⁷ É mu ko ade na time go uce ne ha a mwomwani a mwani tong?! Be, mepie go wonaa, ke wieli me é céi ne pehi celi e taa ne pwon!”

²⁸ «Ke e pii te lépwo béé eabwé ten pie: “Geé pé ko-jaeng a 1 million na eten, ke geé ne te pana hiwon ni mwani ten! ²⁹ ††Be wo pana caa pwo ne ten, ke o ne mwo pwon ce béén, beme pihiwon den. Kehe wo pana tice ten, ke o pétaabwon kojaeng a nehinaado na mwo e pelen. ³⁰ †Ke wo pa eabwé piticenaado ne kon naa, ke o tahieng ole ha a melepiing, he na lé o é nelang, ke piwii pecuwo.”»

O pineitééhi ni muto me ni nani

³¹ ††[E pii mwo wo Iésu pie]: «É heme é âmwobé, woéo pa Nahi Apulie, ne ha a junuung me *a wâé tong, woéo me ni *âcélo tong, ke é o tebwo pwo atebwo tong he daame.

³² ††«Ke é o taineibuhi ne he pwahamiin ati ni bele. Ke é bo pineitéé ni apulie, pwohewii pa awéihi muto heme e pineitééhi ni muto me ni nani ††. ³³ Ke é o bo ne ni muto pwo juing. Ke ni nani, ke é bo nelé pwo eamung.»

Adéihi be geé hegiéo!

³⁴ «Ke, woéo pa daame, ke é †† bo pii te nina lé mu pwo juing pie: “Geé âbé, wogewé na e adéikewé wo Caa tong, me geé hegi a Mwametau na e caa pipwopweehi me dewé, ânebuhe atabuhi ko a bwohemwo. ³⁵ †É mu ko ana, he li menung, ke geé pwo me é wi-inaado, ke é he nimung me é ûdu, ke geé pwo me é ûdu, ke he é mwo coho, ke geé hegiéo. ³⁶ Ke é he tice naamuung, ke geé ne ni naamuung. Ke é he li cunu jo,

††† 25.29 Mataio 13.12; Maréko 4.25; Luka 8.18 § 25.30 Mataio 8.12; Luka 13.28 †† 25.31 Mataio 16.27, 19.28 ††† 25.32 Ézékiel 34.17; Pii Beetihni 20.11–13 †† Ni muto me ni nani—Heme pwang, ke lé pimbu ne ni muto me ni nani. Kehe me babwén, ke pineitééélé, be ni nani, ke time lé uce picani ne ko a bwala. ††† (me niide a tii 34–46) É—Grek: E (il). †† 25.35 Ésaie 58.7

† 25.11 Luka 13.25–27 †† 25.12 Mataio 7.23 † 25.13 Mataio 24.42 †† 25.15 Roma 12.6 †† Million—Grek: Talent. A céiu talent, ke a cuhi pa apulie na céiu nang he na 20 ni jo. ††† 25.21 Mataio 24.45–47; Luka 16.10

ke geé âbé caniêéo. Ke é he li é mu he karépu, ke geé âbé die pelong.”

³⁷ «Ke lé o hegi ne tong nina mwomwon jélé pie: “Pa daame, he éniile celi geme aliko he celi menem, ke geme pwo me go wiinaado? Ke éniile celi nimem me go ûdu, ke geme pwo me go ûdu? ³⁸ Ke éniile celi go mwo coho, ke geme hegiko? Ke éniile celi tice naa-muum, ke geme ne ce naa-muum? ³⁹ Ke éniile celi cunu go, ke geme caniêko? Ke go mu he karépu, ke geme âdé die pelem? [He éniile naa?]”

⁴⁰ †«Ke e hegi ne telé pie: “É pii tewé a juuju pie: É ati he ni benaamwon na geé pwo ninaa ne te lépwo âjié-ning na wahin jélé, ke woéo pana geé ko pwo tong.”»

Geé engen, be time geé uce hegiéo!

⁴¹ ††«Ke é bo pii te nina lé mu pwo eaamung pie: “Geé engen kojaéo, be e apwokewé wo Padué! Geé â ha a miû na e te éle dieli mwo, na e caa pipwopweehi wo Padué, me de *Caatana me ni duéé ten. ⁴² Be é he li menung, ke time geé uce pwo me é wiinaado. Ke é he nimung me é ûdu, ke time geé uce pwo me é ûdu.

⁴³ Ke é he li é coho, ke time geé uce hegiéo. Ke é he li tice naamuung, ke time geé uce ne ce epwénung. Ke é he li cunu jo, ke time geé uce caniêéo. Ke é he li é mu he karépu, ke time geé uce âbé die pelong.”

⁴⁴ «Ke lé o hegi ne tong pie: “Pa daame, he éniile celi geme aliko, he celi menem, ke nimem me go ûdu, ke go coho, ke tice naa-muum, ke cunu go, ke go mu he karépu? Ke time geme uce picani tem? [He éniile naa?]”

⁴⁵ «Ke é o hegi ne telé pie: “É pii tewé a juuju pie: Ati he ni benaamwon na muhi tewé me geé picani te ni âjiéning na wahin jélé, ke woéo pana time uce nimewé me geé picani tong.”

⁴⁶ †«Ke lé bo engen, me lé hegi a kuhinaado dieli mwo. Ke mepwo nina lé piténede Padué, ke lé bo engen me lé hegi a *mulie dieli mwo ne pele Padué.»

Lé hane me lé taunu Iésu

Maréko 14.1–2; Luka 22.1–2; Ioane 11.45–53

26 É he e nebwén ko pwocémun ko ninaa wo Iésu, ke e pii te lépwo acémun den pie: ² ††«Lépwoli, geé temehi pie é he na alo tan, ke caa a tan ko Pacika †. Ke o icuéo, ke cemeiteéo ne ko a *kuricé, woéo pa Nahi Apulie.»

³ [He e ko pii anaa wo Iésu] ke lé ko pitapitilé wo lépwo caa te lépwo *apwoâpwailo, me lépwo apihuô te lépwo *Juif, ne pele Kaife, pa daame helé. ⁴ Be nimelé me lé taunu Iésu. Ke lé pihane ace bwopwonen me lé pipwohuô ten, me lé imwieng neduwohi. ⁵ Be lé pipii

† 25.40 Proverbes 19.17; Mataio 10.42; Maréko 9.41 †† 25.41 Mataio 7.23 † 25.46 Daniel 12.2; Ioane 5.29 †† 26.2 Exode 12.1–27; Mataio 20.18 †† Pacika—Tan ubwo te ni Juif ko a bwo celuimilé mu ha a bwo penem tice ja kon ne Aigupito.

telé pie: «O time uce wâé heme nye imwieng ha a piwiinaado ubwo ne he pwahamii ni apulie, be koli lé bo okéé.»

Tapulicéihi tabe ûde ne ko Iésu

Maréko 14.3–9; {Luka 7.36–50}; Ioane 12.1–8

⁶ [É ha a benaamwon naa, ke] e mu Bétani wo Iésu ha a mwa te Simon, pa katia. ⁷ ††É he lé mwo ko wiinaado, ke e tuiebé ê céiu toomwo, imi a mwotabe péi na oba ko tabe ûde na te junihe ubwo a cuhin, ke e cepulicéihi ne pwo puni Iésu.

⁸ Ke me lé alieng wo lépwo acémun den, ke te junihe time uce wâé telé. Ke lé pipii telé pie: «He e pihoonihi a tabe ûde ne, kona woté? ⁹ Ana te junihe ubwo a cuhin! É ko ade na time e uce icuhi, ke me genye ne a mwani te nina tice delé?»

¹⁰ E te temehi nina lé niimihi wo Iésu, ke e pii telé pie: «É mu ko ade na geé ili ê toomwo ce? Ana e pwo tong, ke te junihe wâé. ¹¹ ††Be o tee élé pelewé wo lépwona tice delé, kehe woéo, ke time é o uce tee mu pelewé.

¹² Wo ênaa, ke e tapulicéihi ne kong a tabe ûde, be e caa mi pipwopweehi a bwo ole tong he pwon. ¹³ Ke é pii tewé a juuju pie: É heme bo pipii beetihi a Pwooti Wâé ne he ni piduaan ati ne pwo a bwohemwo, ke lé bo tee piuti mwo a jepule ko ana e pwo ê toomwo ce, beme tee pipaniimieng.»

E icu Iésu wo Judas

Maréko 14.10–11; Luka 22.3–6

¹⁴ E â too ni caa te lépwo apwoâpwailo wo pa céiu béé lépwo 12 *apostolo na a niin pie Judas Iscariot.

¹⁵ †Ke e pii telé pie: «Ade aceli geé bo ne tong, hemepie é ne Iésu tewé?»

Ke lé ne ten nina 30 mwani péi †. ¹⁶ Ke e tabuhi pihane ace pwaaden me e icu Iésu telé.

A piwiinaado te Padaame

Maréko 14.12–42; Luka 22.7–46; Ioane 13.21–38; 1 Korénit 11.23–25

¹⁷ ††É ha a bécéiuhe tan ko 'pieni pwoloa tice nyaa ten', ke lé âbé céii Iésu wo lépwo acémun den, ke lé pii ten pie: «Geme o â piwâam ko a wiinaado ko Pacika. Kona é wé, he celi nimem me genye piwiinaado nelang?»

¹⁸ Ke e hegi ne telé pie: «Geé â ha a pwomwo ubwo, pele pa apulie [na é bo piieng dewé] ke geé pii ten pie: “E pii wo Padaame pie: ‘Caa tuie a benaamwon dong. Ke é pelem he na me é wii a wiinaado ko Pacika, wogeme me ni acémun dong.’”»

††† 26.7 Luka 7.37–38 ††† 26.11 Deutéronome 15.11 § 26.15 Zakari 11.12; Ioane 11.57 †† 30 mwani péi—Âcehi a patén de lépwo Juif, ke weengaa a mwani na ne te pa céiu apulie, heme pa apenem tice ja kon den, ke taunueng na a paaci. Omehi Exode 21.32. A bwopiinen pie, lé pwo me piticenaado ne ko a mulihe Iésu. ††† 26.17 Exode 12.14–20

¹⁹ Ke lé pwo ana e pii wo Iésu, ke lé piwâamihi a wiinaado ko Pacika.

Pwo pa bééwé na e bo pi-icuéo

²⁰ Caa babwén, ke lé tebwo pwo taap wo Iésu me lépwo 12 apostolo ten. ²¹ Ke é he lé ko wiinaado, ke e pii telé pie: «É pii tewé a juuju pie: E bo pi-icuéo wo pa bééwé.»

²² Ke te junihe piwahin jélé kuti, ke lé muko pétaapwo tahimwoeng pie: «Padaame, he time uce woéo?»

²³ †Ke e hegi ne telé wo Iésu pie: «Wo pana gemu tai pétaa ole ha a tam me weeng ††, ke weeng pana e bo pi-icuéo.

²⁴ «É bo mele, woéo pa Nahi Apulie, pwohewii ana e caa pii beetihi ne ni tii iitihii. Kehe wo pa apulie na e pi-icuéo, ke o te junihe pwoééhen! Au, mwolihi! Be wo panaa, ke wieli me o te wâé ne kon, hemepie time e uce ko âbee!»

²⁵ Ke e tahimwo Iésu wo Judas, pana e icueng, pie: «Kona time uce woéo, go Padaame?»

Ke e hegi ne ten wo Iésu pie: «Go caa teko pii.»

A pwoloa me a tabe megele

²⁶ †É he lé ko piwiinaado ibu, ke e pé a pwoloa wo Iésu, ke e pipwo-olé te Padué. Ke e ebii, ke e pwopatihii ne ko lépwo acémun den, ke e pii telé pie: «Geé pé, ke geé eni, be ani, ke a ééng.»

²⁷ Ke é alecehen, ke e pé a mwoûdu ko tabe megele. Ke e pwo-olé te Padué, ke e ne telé. Ke e pii pie: «Geé tai ûdu. ²⁸ ††Be ani, ke a cewéhung na e o caa téé me de ni apulie, beme pineuhi ni ta pwo telé. Be a pipwoâpwailo na e pacuwohi a *piapwo na e pwo wo Padué [pie e ne a péém ne ha awiemelé me weeng].

²⁹ «Ke é pii tewé pie: O caa time é bo uce ûdu mwo ace tabe megele [ne éni pwo bwohemwo] dieli ha ace tan celi genye bo ûdu ace tabe megele celi mwo coho me wogewé, ne ha a Mwametau te Caa tong.»

Go bo piwotétaa kong, go Pétéru

³⁰ ††Ke lé nyebihi a *psaume* ko a tan ubwo naa, ke é mulang, ke lé taa pwo a juwole ko ni Olivier.

³¹ †††Ke e pii wo Iésu te lépwo acémun den pie: «É jena he bwén, ke geé o bo tai engen kojaéo. Be caa te tii ne he ni tii iitihii pie:

O bo taunu pa awéihi muto,

ke lé o pipiiden ne ni muto. Zakari 13.7

³² †††«Kehe icehi ana é hemepie é mulie cemwo mu ha amele, ke é bo ânebhewé ne Galilé.»

† 26.23 *Psaume* 41.10 †† Heme lé piwiinaado ibu wo lépwo Juif, ke lé te ju pétaa ole ha a tam na céiu ko ni ilé. ‡ 26.26–28 1 Korénit 11.23–25 †† 26.28 *Exode* 24.8; *Jérémie* 31.31–34; *Zakari* 9.11; 1 Korénit 10.16 †† 26.30 *Luka* 22.39; *Ioane* 18.1 ††† 26.31 *Zakari* 13.7; *Ioane* 16.32 ††† 26.32 *Mataio* 28.7,16

³³ Ke e pii ten wo Pétéru pie: «Wieli lé o engen kojako wo lépwoje, kehe time o uce woéo!» ³⁴ †Ke e hegi ne ten wo Iésu pie: «É pii tem a juuju pie: É ha a bwén jena, ânebuhe a bwo to te a ja, ke o caa ocié go ko piwotétaa kong pie, time go uce temehié.» ³⁵ Ke e pii wo Pétéru pie: «Ûhu! Piwien hemepie genyu tai mele, kehe time é o uce wotétaa kom!»

Ke tai woélé ati, ke lé te tai pii ten ana céiu.

Te junihe téé Iésu

³⁶ Ke é mulang, ke lé â ha a céiu duaan [na cemi acuwow hen] na pii kon pie Getsémané. Ke e pii te lépwo acémun den wo Iésu pie: «Geé tebwo éni, be é mwo â pwoiitihii.»

³⁷ Ke e pé Pétéru me lupwo naî Zébédé. Ke caa tabuhi piwahin Iésu, ke pinekepé ten. ³⁸ ††Ke e pii telé pie: «Te junihe téé ke piwahin a pwonimung †††. Kehe geé tee mu éni, ke genye tai piûmié ibu. [Geé nemwo pule!]

³⁹ Ke e te ju piâdé kojale, ke e tidihii jilin, ke e miibule. Ke e pwoiitihii da céii Padué, ke e pii pie: «Caa, hemepie te jan, ke go pé kojaéo ni picani me ni téé ce ††† Kehe icehi ana go nemwo pwo ana nimung kon, kehe ana nitem kon.»

⁴⁰ Ke me e mwojuia mwobé céii lépwo acémun den na cié jélé, ke e alihi pie lé teko pule. Ke e pii te Pétéru pie: «Be he time uce jan me nye piûmié ibu, he na te ju céiu inetéale?

⁴¹ «Geé te ûmié, ke geé pwoiitihii, beme o te pwo nihewé, hemepie tacebwénikewé. Be nimewé me geé pwo ana wâé, kehe icehi ana tice nihewé.»

⁴² Ke e engemwo kojale wo Iésu, ke e pwoiitihii mwo, ke e pii pie: «Caa wé, mepie time uce jan me pé kojaéo ni picani me ni téé ce, ke é ilehi kojako pie, go picani tong, beme é pitenedehi ana te nitem kon †††.»

⁴³ Ke me e mwojuia mwobé céii lépwo acémun den, ke e toolé mwo he lé teko pule. Be caa te junihe emaan jélé, ke lé tee ko pipucing.

⁴⁴ Ke e engemwo kojale, ke e âmwo pwoiitihii, ke e te pii mwo ana e caa mi pii.

⁴⁵ Ke me e mwojuia mwobé céiilé, ke e toolé mwo he lé teko pule, ke e pii telé pie: «Woté? Geé mwo teko mwaale, ke pule mwo? Wâé ne kowé! Kehe icehi ana o caa neéo, woéo pa Nahi Apulie, ne te lépwona lé pwo nina ta! ⁴⁶ ††Geé cuwoda! Me nye engen! Be caa e lang wo pana e icuéo!»

§ 26.34 *Mataio* 26.69–75 †† 26.38 *Ioane* 12.27 ††† Ne mwo he pwo grek ni pwooti ce: Ke é caa pwo me é mele. †† Ni picani me ni téé ce—Grek: A mwoûdu ce. ††† Grek: «Hemepie wâé me é ûdu ana, ke wâé heme pwo ana nitem kon.» † 26.46 *Ioane* 14.31

Lé imwi Iésu

Maréko 14.43–50; Luka 22.47–53; Ioane 18.3–12

⁴⁷ É he e mwo ko pii anaa wo Iésu, ke e te ju tehenebé wo Judas, pali céiu béé lépwoli 12 apostolo ten. Ke lé âbé céin ne ni apulie na te junihe hiwon jélé, imi ni teua me ni ba-acuwo. Be lé nelé ngen wo lépwo caa te lépwo apwoâpwailo, me ni apihuô te a bele te lépwo Juif.

⁴⁸ Ke wo Judas, pana e icu Iésu, ke e caa pipatemehi telé ana me e pwo: «Wo pa apulie na é o mwom-waaung, ke te weeng kuti. Ke geé imwieng.»

⁴⁹ Ke he lé tehenebé, ke e te â céii Iésu kuti, ke e pii ten pie: «Bwocu tem, go pa apipune!» Ke e mwom-waaung.

⁵⁰ Ke e pii ten wo Iésu pie: «Îgo, go pwo ana me go pwo †.»

Ke lé te imwi Iésu kuti. ⁵¹ ††Kehe icehi ana wo pa apulie na e mu pele Iésu, ke e te pwome céi kuti a teua ten mu ha a mwon, ke e te tahi kuti ole pwo a puni pa apenem de pa *daame he lépwo apwoâpwailo. Kehe icehi ana e te ju tahagéi a jéénen.

⁵² *Ke e pii ten wo Iésu pie: «Go ne homwo a teua tem ne ha a mwon! Be wo lépwona lé pwopa ko teua, ke lé o te mele ko teua.

⁵³ «Go téne, hemepie nimung, ke é o tode Caa tong, beme e nebé céiié a céiu mwocoda ko ni *âcélo na te junihe hiwon jélé, beme lé pwopaing! ⁵⁴ Kehe me wonaa, ke wieli me time e o uce pacuwohi ana e pii ne he ni tii iitih! Be e pii pie, ke o wonaa a bwo engen ne ni naado.»

⁵⁵ ††Ke e pii te lépwona lé imwieng, pie: «Woté? Geé âbé pééo ko teua me beba-acuwo, pwohewiin heme woéo pace ataunuhi apulie! Ati he ni tan, ke é te mu hadeniwé, he é teko pacémuni ni apulie ne ha a *mwaiitih, kehe icehi ana time geé uce imwiéo!

⁵⁶ «Kehe ati ninaa, ke e tai pacuwohi a pwooti na lé pii wo lépwo péroféta ne he ni tii iitih.»

Ke ati lépwo acémun den, ke lé cepewieeng, ke lé cela.

A mwohuô te lépwo Juif

Maréko 14.53–65; Luka 22.54–71; Ioane 18.13–24

⁵⁷ Lé pé Iésu nge céii Kaïfe, pa daame he lépwo apwoâpwailo. Be lé pitapitilé ne pelen wo lépwo *dotéén ko patén me lépwo apihuô te lépwo Juif. ⁵⁸ Ke e pilipuwolé ngen wo Pétéru. Ke e tuie nge pele pa daame he lépwo apwoâpwailo, ke e tebwo pwo napwomwo, ne pele ni apenem, ni awéa. Be nimen me e alih aceli e o tuie ne ko Iésu.

† Îgo, go pwo ana me go pwo—Grek: É mu ko ade na wogo éni?
†† 26.51 Ioane 18.26 ‡ 26.52 Genèse 9.6; Pii Beetih 13.10
†† 26.55 Luka 19.47, 21.37

⁵⁹ Wo lépwo caa te lépwo apwoâpwailo, me ati a *mwohuô te lépwo Juif, ke lé hane ce apulie beme lé pipé ne ko Iésu, be nimelé me lé pwocuhinaado ten, me e mele. ⁶⁰ Ke hiwon ni agele na lé âbé pipé ne ko Iésu, kehe icehi ana time lé uce tooli ace ju watihen me lé taunueng.

Ke é he caa e mwonu me nebwén a pitautinaado telé, ke lu tehenebé wo lupwo alo apulie. ⁶¹ ††Ke lu pii pie: «E pipii den wo panaa pie, me e bo paniihi a mwai-itih te Padué, ke me e bo pacuuli mwo, he na cié ni tan.»

⁶² Ke e te cuwoda kuti wo pa daame he lépwo apwoâpwailo, ke e tahimwo Iésu pie: «Kona te tice béhegi nen dem? He time go uce téne nina lé ko pipé ne kom?» ⁶³ ††Kehe icehi ana time e uce hegi wo Iésu. Ke e te tahimwoeng mwo wo pali daame pie: «É ne he nii Padué na e mulip, ke é ileko pie, go hegi. Kona te wogo kuti, pa *Mesia, pa *Naî Padué?»

⁶⁴ †††Ke e hegi ne ten wo Iésu pie: «Go caa teko pii. Ke é pii tewé pie: Tabuhi jena ni, ke geé bo aliéo, woéo pa Nahi Apulie, heme é tebwo *pwo a jui Padué na te junihe pwojunuun [beme é pihuôhi ati ni naado]. Ke geé bo aliéo, heme é âbé he ni nii, mu he miiden.»

Wâé heme e mele!

⁶⁵ §[Ke te junihe emegéi na pali daame he lépwo apwoâpwailo, ke e te nihe okéé] ke e pitie ni epwénen, ke e pii te ni béé atautinaado pie: «E cihe me ta ne ko Padué [be e pwo me piwielu me weeng! Caa jan! Necu ce béé bwo pipé ne kon, be e caa teko pipé ne kon mwo! Be geé caa te téne ana e pii. ⁶⁶ ††Ke ade aceli geé niimihi ne kon?»

Ke lé tai hegi ne ten ati pie: «Wâé heme e mele.»

⁶⁷ †††Ke lé cumi ne he pwahamiin, ke lé nuô i kon. Ke lé tahi pale ni ilé ne kon wo lépwo béén, ⁶⁸ ke lé pii ten pie: «He woo na e ahiko? Go cuwoteeke pihane, go 'Mesia', hemepie wogo ke pace péroféta [celi go temehi ati ce naado]!»

E piwotéaa ko Iésu wo Pétéru

Maréko 14.66–72; Luka 22.56–62; Ioane 18.16–27

⁶⁹ Mepwo wo Pétéru, ke e tee tebwo jeoté pwomwo. Ke e âbé céiieng wo ê céiu eabwé, ke e pii ten pie: «Éé, wogo, ke pa céiu béé Iésu, mu Galilé!»

⁷⁰ Ke e wotéaa ne he pwahamii ni apulie, ke e pii pie: «Ûhu! Time é uce temehi ana go ko pii!»

⁷¹ Ke e te â wie kuti ha a pwobabé. Ke e alieng wo ê céiu toomwo na e penem lang, ke e pii te nina lé mu lang pie: «Uhuu, wo paje, ke pa béé Iésu mu Nazaret!»

‡ 26.61 Ioane 2.19–21 ††† 26.63 Ésaie 53.7; Mataio 27.12
††† 26.64 Psaume 110.1; Daniel 7.13; Mataio 24.30 § 26.65 Mataio 9.3; Ioane 10.33 † 26.66 Lévitique 24.16; Ioane 19.7 ††† 26.67 Ésaie 50.6, 53.5

⁷² Ke e pii mwo wo Pétéru pie: «Ûhu! É piapwo pie time é uce temehiang!»

⁷³ É alecehen, ke nina lé mu lang, ke lé âbé céii Pétéru ke lé pii ten pie: «Uhu! Wogo ke pa céiu acémun den! Be nye téne ne he patim.»

⁷⁴ Ke e te junihe pimwoiu wo Pétéru, ke e pii pie: «Geé téne! Time é uce temehi panaa. Wâé heme e pwocuhinaado tong wo Padué, hemepie é gele!»

Ke me e mwo ko pii anaa, ke e te to kuti ali ja. ⁷⁵ †Ke e bwo niimihi ali e pii ten wo Iésu, pie: «Ânebuhe a bwo to te a ja, ke go ocié ko piwotétaa pie, time go uce temehié.»

Ke e wie wo Pétéru ke e te junihe é kuti.

Lé pé Iésu nge pele Pilate

Maréko 15.1; Luka 22.66–71

27 É he mwo te junihe acaama, ke lé pitapitilé neibu wo lépwo caa te lépwo *apwoâpwailo, me lépwo apihuô te a bele te lépwo *Juif. Ke lé piténelé ko ace bwo taunu Iésu. ² Ke lé cieeng, ke lé pééeng nge céii *Pilate, pa gupéno te lépwo Roma.

A bwo mele te Judas

Apostolo 1.18–19

³ Mepwo wo Judas, pali e icu Iésu, ke e alihi pie, lé o caa taunueng. Ke e bwo pininim ne ko ana e pwo te Iésu, ke te junihe piwahn nang kon. Ke e mwojuia ngemwo pele lépwo caa te lépwo apwoâpwailo, me lépwo apihuô. Ke e ne mwo telé li 30 mwani péi li lé ne ten.

⁴ Ke e pii telé pie: «Au, é pwo ana ta. Be é icu pa céiu apulie na te tice ta pwo ten, me e mele.»

Ke lé hegi ne ten pie: «Te tice aceli geme alihi ne kon!»

⁵ †Ke e tahi nge céiilé ne ha a *mwaiitihili li mwani. Ke e â piwogéi henen.

⁶ Ke lé tai li mwani wo lépwo caa te lépwo apwoâpwailo, ke lé pii pie: «Ade aceli genye o pwo ko ni mwani ce? Genye nemwo ne pehi ni âpipati ko mwaiitihili, be ni mwani cuhi cewéle.»

⁷ Ke lé piténelé pie, me lé pwocuhi a pule na a niin pie 'a pule te pa apwo ila pule' beme a iitihili te ni coho.

⁸ É mu ko anaa, na ni apulie, ke lé pii ko a duaan naa pie, 'a ninaado na pwo cewéle hen'. Ke lé mwo teko pii kon dieli jenaar. ⁹ †Ati ninaa, ke e tuie, beme e pacuwohi [li ocine] li e pwo wo péroféta Iérémia †, ne he ni tii ten: Lé pé li 30 mwani péi, wonaa a jéhin na lé niimihi na a bele *Isaraéla me lé pwocuhin me den. ¹⁰ Ke lé

pwocuhi ali pule te pali apwo ila pule. Be weengaa ana te nime Padaame kon †.

E tauti Iésu wo Pilate

Maréko 15.2–20; Luka 23.1–25; Ioane 18.28–19.16

¹¹ Lé pé Iésu nge he pwahamii Pilate, pa gupéno te lépwo Roma. Ke e tahimwoeng wo Pilate pie: «Kona te wogo kuti pa daame he lépwo Juif?»

Ke e hegi ne ten wo Iésu pie: «A juuju a bwopiinen dem †.»

¹² †Ke nebwén, ke lé pipé ne kon wo lépwo caa te lépwo apwoâpwailo, me lépwo apihuô te a bele. Kehe time e uce hegilé.

¹³ Ke e te pwo me pii ten wo Pilate pie: «Kona time go uce téne nina ta na lé pii ne kon?»

¹⁴ Kehe icehi ana time e uce hegi ne telé wo Iésu. Ke e te junihe téele kon wo Pilate.

Nimelé ko Barabas

¹⁵ Caa te cemang ne ko Pilate, ha a tan ko *Pacika, me e pawie mu he karépu pace céiu apulie celi nime a bele kon. ¹⁶ Ke é ha a jo naa, ke pwo pa céiu apwokarépu na pii kon pie Barabas †, na lé te junihe temehiang ne ni apulie. ¹⁷ Ke [hiwon ni apulie na] lé tehenebé pele Pilate, ke e pii telé pie: «Kona nimewé me é pawie Barabas, ai wo Iésu, na pii kon pie 'pa *Mesia'?» ¹⁸ †Be e te temehi pie, lé ne Iésu ten wo lépwo caa te lépwo apwoâpwailo ha a pipwokon delé.

¹⁹ Ke nebwén, ke e tebwo pwo atebwo ten, beme e tauti Iésu. Ke é ha a benaamwon naa, ke e tehenebé wo pa céiu apulie na e pébé céiieng a pwooti te mwoden. Be e pii pie: «É tibwén, ke pwo a niûng ne ko pa Iésu naa, ke te junihe time wâé jo kon. Go patuwoeng, ke go nemwo ti kon, be pa apulie iitihili!»

²⁰⁻²¹ Ke e pii mwo te lépwo apulie wo Pilate pie: «É bo patupwo ne tewé pace céiu apwokarépu. Ke he woo hadenii lupwoje, celi nimewé kon?»

Ke lé hegi ne ten pie: «Barabas!» Be lé cinelé wo lépwo caa te lépwo apwoâpwailo, me lépwo apihuô, beme lé pii anaa, ke me e mele wo Iésu.

Cemeiteeng ne ko a kuricé!

²² Ke e pii telé wo Pilate pie: «Ke he ade aceli é o pwo te Iésu, panaa pii kon pie 'Mesia'?»

Ke lé hegi ne ten pie: «Pwo me cemeiteeng ne ko a *kuricé!»

²³ Ke e tahimwolé mwo pie: «Kona ade aceli e pwo celi ta?»

† 26.75 Mataio 26.34 †† 27.5 Mataio 26.14–15; Apostolo 1.18–19 † 27.9 Zakari 11.12–13; Jérémie 32.6–15, 18.2, 19.1 †† Wo péroféta Iérémia—Ni pwooti ne ha a niide a tii 9 ke 10, ke e âbé mu he ni tii te lupwo péroféta Iérémia me Zakari. Kehe icehi ana wo Mataio, ke e pii a nii Iérémia, be weeng pa péroféta na te junihe ubwo a niin.

†† 2e phrase—Ai, Be weengaa ana e caa te pii tong wo Padaame pie, me é bo pii. ††† A juuju a bwopiinen dem—Grek: Go caa teko pii. ††† 27.12 Ésaie 53.7 † Barabas—Ni béé tii iitihili he pwo grek, ke lé pii pie: Iésu Barabas. É ne pele lépwo Juif, ke Iésu, ke a nii ni apulie na hiwon pwohewii Dui, Bwaé †† 27.18 Ioane 11.47–48, 12.19

Kehe icehi ana lé bwo nihe cihe me ubwo pie: «Pwo me cemeiteeng ne ko a kuricé!»

²⁴ †Ke e alihi wo Pilate pie time lé uce tabemieng, be caa junihe ubwo a bwo iluulé. Ke e pé a mwotabe, ke e puu ni in ne he pwahamiilé ati, ke e pii telé pie: «Time uce woéo pa watihe a bwo mele te pa apulie ce. Kehe te wogewé cehi!»

²⁵ ††Ke lé tai hegi ne ten pie: «Éa, te wogeme lépwo watihen, wogeme me ni naîme! Ke hemepie geme pwo aceli ta, ke wâé heme geme te hegi a kuhinaado ko a bwo mele ten.»

²⁶ Ke e pawie ne telé Barabas wo Pilate. Ke e pwo me ahi Iésu ko a bwaliwota. Ke e patupwoeng ne te ni coda, beme lé â cemeiteeng ne ko a kuricé.

Lé pihoonieng ne ni coda

²⁷ Ke lé pé wie Iésu wo lépwo coda, ke lé â pwo a céiu napwomwo na ubwo. Ke lé tode ati ni mwocoda. ²⁸ †Ke lé céi ni epwénen, ke lé ne kon a epwén na megele [pwohewii a epwéne pa apulie na piubwo nang] beme lé pihoonieng. ²⁹ Ke lé péi a kuron ko ni mii acuwo na pwo dan, ke lé neole pwo punin. Ke lé ne ha a in ne pwo jui a bewomeéle [pwohewii a bwaja pa daame]. Ke lé tidih jililé he pwahamiin, ke lé pii ten pie: «Bwocu, go pa daame he lépwo Juif! Adéiko!»

³⁰ ††Ke lé cumi ne kon, ke lé pé ali bewomeéle, ke lé tati a punin kon. ³¹ Ke me lé caa nebwén ko a bwo pihoonieng, ke lé céi mu mwo kon ali epwén megele, ke lé te ne mwo kon ni epwénen. Ke é mulang, ke lé pééeng wie, beme lé â cemeiteeng ne ko a kuricé.

Lé cemeite Iésu ne ko a kuricé

Maréko 15.21–32; Luka 23.26–43; Ioane 19.17–27

³² Me lé ko wie mu ha a pwomwo ubwo, ke pitapitilé me pa apulie mu ha a pwomwo ubwo Cirène na pii kon pie Simon. Ke lé cuwokon, beme e canihi ali kuricé te Iésu. ³³ Ke lé tuie nge pwo a céiu tih juwole na pii kon pie Golgota, a bwopiinen pie ‘pwo a piipuni apulie’. ³⁴ ††Ke wo lépwo béén, ke lé pineibuhi a tabe megele me a tabe na maga ††. Ke lé ne te Iésu, ke me e nemi, ke time uce nimen me e ûdu.

³⁵ †††Nebwén, ke lé cemeiteeng ne ko ali kuricé wo lépwo coda. Ke lé pipii ne kolé ni epwénen. Ke lé picí metii ne ko {a epwén bwali ten} §. ³⁶ Ke lé tebwo beme lé wéa kon.

³⁷ Ke lé cemeite ne pwo punin a eaa acuwo na tii ne kon a watihe a bwo mele ten, pie: *IÉSU PA DAAME HE LÉP-
WO JUIF.* ³⁸ ††Ke lé cemeite mwo lupwo alo apulie na lu

† 27.24 Deutéronome 21.6–9 †† 27.25 Apostolo 5.28 † 27.28 Luka 23.11 †† 27.30 Ésaie 50.6 †† 27.34 Psaume 69.22 ††† Tabe na maga—Wiel a eti me time genye uce téne a cunu. ††† 27.35 Psaume 22.19 § Ni béé tii iitih he pwo grek, ke e hen ni pwooti ce: Lé wonaa beme o pacuwohi a pwooti te pa péroféta, na e pii pie: «Lé pipwopii ne kolé ni epwénung. Ke lé picí metii ne ko a epwén bwali tong.» (Psaume 22.19) §† 27.38 Ésaie 53.12

pwotahinaado, ne he ni piduaa Iésu: wo pa céiu ne pwo juin, ke wo pa céiu ne pwo eaamun.

³⁹ ††Me lé alieng wo lépwona lé âdé ke âbé ha a duaan naa, ke lé tagilihi ni punilé, ke lé pijeta kon. ⁴⁰ ††Ke lé pii pie: «Kona time uce wogo kuti pana me go tanahi ali mwaiitih, ke me go bo pacuuli mwo he na cié ni tan? Ke wâé, be mepie wogo pa *Naî Padué, ke go piceluumiko mwo, ke go opé mu ko a kuricé naa!»

⁴¹ Ke lé pihoonieng mwo wo lépwo caa te lépwo apwoâpwailo, me lépwo *dotéén ko patén me lépwo apihuô, ke lé pii pie: ⁴² «E niimihi pie pa daame henye, lépwo Isaraéla. Ke e temehi me e celuimi ni béén, kehe time e uce temehi me e piceluumieng mwo! Hemepie e ole mu ko a kuricé naa, ke wieli genye o bo céihi ne kon!»

⁴³ †††«E céihi ne ko Padué, ke e pii pie, weeng, ke pa Naî. Ke mepie eânime Padué ten, ke wâé hemepie e celuumieng jenaal!»

⁴⁴ Ke te piwien ne mwo ko lupwona lu pwotahinaado na cemeitelu ne he ni piduaa Iésu. Be lu te pihoonieng mwo.

E mele wo Iésu

Maréko 15.33–41; Luka 23.44–49; Ioane 19.28–30

⁴⁵ É he te ju goahen ehi, ke te ju melepiing ati ha amu †, die ko cié inetéale alecehe goahen. ⁴⁶ ††Ke me teko ju cié ni inetéale, ke e toii me ubwo wo Iésu pie: «Éli, Éli, lama sabaktani?» A bwopiinen pie: «Padué hung, Padué hung, é mu ko ade na go pawieéo?»

⁴⁷ Ke me lé téneeng ne ni béén na lé mu lang, ke lé niimihi pie, e tode péroféta *Élia [beme e picani ten].

⁴⁸ ††Ke e te téte kuti wo pa céiu béélé, imi a mwaanu, ke e pate ha a tabe megele na maga ††. Ke e ne ko a ba-acuwo, ke e ne te Iésu beme e ûdu.

⁴⁹ Kehe lé pii ten wo lépwo béén pie: «Go mwo cuwo lang, be wieli nye o ali Élia, hemepie e âbé celuumieng!»

⁵⁰ Kehe icehi ana e cihe da me ubwo wo Iésu, ke ele a nenehen.

Hiwon ni inenaado ko a bwo mele ten

⁵¹ †††Ke a mwaanu [na e capuhi bwonihi a duaan na junihe iitih] ne ha a mwaiitih, ke te tie ne ha awiemen kuti, mu jeda die jeoté ko a baaéén. Ke penem a bwohemwo, ke buwo ni péi.⁵² Ke te tehi kuti ni bwomu, ke lé mulie cemwo mu ha amele a hiwon ko apulie te Padué. ⁵³ Ke é alecehen, he e mulie cemwo mu ha amele wo Iésu, ke lé wie mu he ni bwomu. Ke lé

††† 27.39 Psaume 22.8, 109.25 §† 27.40 Mataio 26.61; Ioane 2.19 §†† 27.43 Psaume 22.9 §† Ati ha amu—ai Ati pwo a bwohemwo. §† 27.46 Psaume 22.2 §†† 27.48 Psaume 69.22 §†† Tabe megele na maga—Vinaigre ne ha a Tii iitih he pwo pwopwaalé: A tabe megele na time uce ubwo a kuhin, na tahagéi ko tabe. ††† 27.51 Exode 26.31–33; Ébéru 10.19–20

taa *Iérusaléma, a pwomwo ubwo iitih, ke lé pihabwí-
ilé te ni apulie na hiwon jélé.

⁵⁴ Wo lépwo coda roma na lé wéa ko Iésu, me pa caa
telé, ke lé téetih a bwo éjén na a bwohemwo, me ati
nina e tuie. Ke te junihe ubwo kuti a bwo mwotilé, ke
lé pii pie: «A juuju pie, wo pa apulie ce, ke pa Naî
Padué!»

⁵⁵ †Hiwon ni toomwo na lé mu lang, na lé omehi mu
ité. Woélé kuti na lé âcéi Iésu mu Galilé beme lé picani
ten. ⁵⁶ É hadeniilé, ke e lang wo Maria mu Magdala, me
Maria nyaa te Cang me José ††, me nyaa te lupwo naî
Zébédé.

Neeng he iitih

Maréko 15.42–47; Luka 23.50–56; Ioane 19.38–42

⁵⁷ É he babwén, ke e tehenebé wo pa céiu apulie na
pii kon pie Josef, pa apulie mu ha a mwopopwaalé Ari-
maté, pana te junihe pwo den. Weeng mwo, ke pa
apulie na e mu te âmwo céi Iésu. ⁵⁸ †Ke e â pele pa
daame Pilate, ke e ilehi a éé Iésu. Ke e pii te lépwo co-
da wo Pilate pie, me lé neeng den.

⁵⁹ Ke e pé a éé Iésu wo Josef, ke e tawii ko a mwaanu
na mwo te ju wamin. ⁶⁰ ††Ke e pééeng ngen, ke e
neeng he iitih na e mwo te ju pwo, a pwon na e ini ne
ha a péi, beme te a den, weeng Josef. Ke nebwén, ke e
papitibehi a pilehe péi, ke e capuhi bwonih ali pwon.
Ke e engen.

⁶¹ Ke wo Maria mu Magdala me ê céiu Maria, ke lu
teko tebwo ânebuhe ali mwa péi.

Lé wéih ali mwa péi

⁶² [Ati ninaa, ke lé pwo he paciile] a tan ânebuhe a
*tan iitih te lépwo Juif. [He paciile] ke lé mu piwâamihi
a piwiinaado ko a tan iitih.

Ke é ha acaama hen, [é he capéto] a tan iitih, ke lé
pitapitilé ne pele Pilate wo lépwo caa te lépwo ap-
woâpwailo, me lépwo *Farasaio. ⁶³ ††Ke lé pii ten pie:
«Go te alihi, go pa daame, be wo pali ageti ni apulie li,
wo Iésu, ke li e mi pii ânebuhe a bwo mele ten, pie: “É
ha a bécíéhe ni tan alecehe a bwo mele tong, ke é o
mulie cemwo mu ha amele.”

⁶⁴ «Kehe wâé heme go pii te ni coda pie, me lé wéih
ehi ali mwa péi he na cié ni tan. Be koli lé bo bune a
één wo lépwo acémun den, ke lé bo pii te a bele pie, e
caa mulie cemwo mu ha amele. Ke mepie wonaa, ke a
jepule gele naa, ke o te junihe ubwo kojan ânebun!»

⁶⁵ Ke e pii telé wo Pilate pie: «Wâé. Woélé-ni ni béé
coda. Ke hemepie nimewé, ke geé pwo me lé wéih a
mwa péi!»

⁶⁶ Ke lé engen, ke lé â piwâamihi a bwo wéih na ali
mwa péi. Ke lé pwomangihi a péi bwonih a pomwa
hen. Ke lé ne li coda, beme lé wéih.

E mulie cemwo wo Iésu

Maréko 16.1–10; Luka 24.1–12; Ioane 20.1–10

28 Caa nebwén a *tan iitih te lépwo *Juif. Ke é he
pwoiitih, he mwo te ju acaama ††, ânebuhe a
bwo taa tuie te a téale, ke lu engen me lu â he iitih wo
Maria mu Magdala me ê céiu Maria.

² Ke te penem kuti a bwohemwo. Be e ole mu he mi-
iden wo pa céiu *âcélo te Padaame, ke e papitibehi ali
pilehe péi mu ha a pwo ali mwa péi, ke e tebwo pwon.

³ Te ju pwomelaan pwohewii a ilehi, ke te junihe pwojo
a epwénen.

⁴ Ke te junihe ele jene lépwo coda na lé wéih ali mwa
péi, ke éjén jélé ko a bwo mwotilé, ke lé tupwo
pwohewii nina lé caa mele.

⁵ Ke e pii te luli toomwo wo pali âcélo pie: «Geu nem-
wo pwo me mwotikeu. Be é te temehi pie geu hane Ié-
su, pali lé cemeiteeng ne ko a *kuricé. ⁶ ††Caa time uce
e éni! Be e caa mulie cemwo mu ha amele, pwohewii
ali e caa mi pii. Geu âbé me geu alihi ali duaan li lé
neeng hen. ⁷ Ke geu epin, me geu â pii te lépwo acé-
mun den pie: “E caa mulie cemwo mu ha amele wo Ié-
su, ke e mi â ânebhewé ne Galilé. Ke geé bo alieng
nelang.” Weengaa ana me é pii teu.»

⁸ Ke lu engen he epin mu ha ali iitih. Ke te pimwotilu,
kehe icehi ana lu te junihe pipwodéén mwo. Ke lu téte
nge pipatemehi a jepule ne te lépwo *acémun de Iésu.
⁹ Ke é nge he pwaaden, ke lu téeti Iésu he pitapitilé.

Ke e pii telu pie: «Bwocu teu!»

Ke lu téte ne kon, ke lu imwi ni an, ke lu pipaunueng.
¹⁰ †Ke e pii telu pie: «Geu nemwo pwo me mwotikeu,
kehe geu â pii te lépwoli bééng pie me lé â Galilé, be lé
bo aliéo nelang.»

A jepule na lé uti wo lépwo coda

¹¹ É he lu ko â he pwaaden wo luli toomwo, ke lé téte
nge ha a pwomwo ubwo wo lépwo béé coda, li lé wéih
ali mwa péi. Ke lé too lépwo caa te lépwo *apwoâpwai-
lo, ke lé piuti telé ati nina e tuie.

¹² Ke wo lépwonaa, ke lé tode ati ni béélé, me lépwo
apihuô, beme lé pitapitilé, ke me lé picih ko a jepule
naa. Ke lé piniimihi ibuhi pie, me lé ne ace mwani celi
te junihe ubwo ne te lépwo coda. ¹³ Ke lé pii telé pie:
«Weengi ana me geé uti: Lé bune a één wo lépwo acé-
mun den he geé mwo ko pule. ¹⁴ Ke mepie e téne anaa
wo gupéno pa daame hewé, ke bo wogeme na geme
bo cih ne kon, beme e o nemwo okéé ne kowé.»

† 27.55 Luka 8.2–3 †† José—Grek: Josef. ‡ 27.58 Deutéronome
21.22–23 †† 27.60 Ésaie 53.9 †† 27.63 Mataio 12.40, 16.21;
Maréko 9.31, 10.33–34; Luka 9.22, 18.31–33; Ioane 2.19–21

††† É he pwoiitih, he mwo te ju acaama—ai He bwén. Wieli é he
capéto he bwén. ††† 28.6 Mataio 12.40, 16.21 § 28.10 Mataio
26.32

¹⁵ Ke lé pé ali mwani wo lépwo coda, ke lé pwo ana lé pii telé. É mu ko anaa, na lé mwo tee ko piuti wo lépwo Juif, dieli jena.

E pihabwieng de ni acémun den

Maréko 16.14–18; Luka 24.36–49; Ioane 20.19–23; Apostolo 1.6–8

¹⁶ †Lé â ha amu Galilé wo lépwo 11 acémun de Iésu. Ke lé â pwo a juwole na e pii telé wo Iésu pie me lé bo â lang. ¹⁷ Ke e âbé benilé wo Iésu, ke lé pipaunueng. Kehe icehi ana pwo ni béén †† na time lé uce mwomwohi pie weeng.

† 28.16 Mataio 26.32 †† Pwo ni béén—ai Woélé ati.

¹⁸ ‡Ke e âmwonulé wo Iésu, ke e pii telé pie: «Wo Padué, ke e ne tong ati ni *pipwojunuun ne jeda he miiden, ke éni pwo bwohemwo. ¹⁹ ††É mu ko anaa, na é pii tewé pie: Geé engen pitihhi a bwohemwo. Ke geé pwo me lé céihi ne kong, beme lé âbé céing. Ke geé puulé ne he nii Caa, me pa Naïn, me a *Jenen Iitihhi. ²⁰ Ke geé pacémunilé, beme lé piténe dehi ati ni pihuô na é caa ne tewé. Ke woéo, ke é o tee mu pelewé ati he ni tan, die ha a pwonehi a bwohemwo.»

‡ 28.18 Ioane 13.3; Éfésó 1.20–22 †† 28.19 Maréko 16.15–16; Apostolo 1.8

Maréko

na e tii wo

Atabuhi ko a tii

Woo na e tii a tii ce?

Wo Maréko, pana pii kon mwo pie Ioane, ai Ioane-Maréko. (Omehi 13.5; 15.37–41.) Lu pipenem ibu me Pétéru, pa céiu apostolo, na e piuti ten ati ni naado na e pii ke e pwo wo Iésu. Ke é alecehen, ke e bwo tii wo Maréko.

E tii éniile?

Ha awieme a jo 55 me 65 (e mwonuhi 20–35 jo alecehe a bwo mele te Iésu). A , ke a bécéiuhe tii na tii, mu ko ni tii na paa , ke , ke , ke , na lé piuti a mulihe Iésu Kériso. Hiwon ni pwooti ha a , ke te e mu mwo ha a , ke a .

E tii me dee?

Te lépwo acéihi ne ko Iésu na time uce lépwo Juif, na lé mulie ité koja a Palestine, a amu te lépwo Juif. Ke e pii ehi ni nii ni piduaan wo Maréko, ke e pii ni pwooti me a bwomu te lépwo Juif.

É ko ade na e tii?

E pii pwaatihu a pwooti te Iésu he e todekenye beme genye apulie ten. Nye wonaa, heme nye mu kon ati he ni tan, ke time uce é mu ko a bwo âcehi ne ni patén ai a bwomu. Hemepie wogenye ni ju apulie te Iésu, ke genye o bo mu he ni picani pwohewiieng.

Ade ace âne a tii ce?

E habwii wo Maréko pie, wo Iésu Kériso, ke pa Naî Padué na te junihe pwojunuun. Ke a céiu mwo, ke te pa apulie pwohewiikenye. E pwo me piwahin nang, ke e âbé céiikenye, beme e pipwoeabwé tenye. Ke e pétaa ko ni i ni apulie (1.31); e haai ni cuwo nahi ewa ke e adéilé (10.16). E téne a bwo picani te ni apulie, ke e pipwoééhelé (1.41). Ke weeng, ke e picani me denye, ke e mele ne ko a kuricé me denye ati ni apulie pwo bwohemwo.

Ana e pwo wo Iésu, ke ana a junaado ne te Maréko. Hiwon ni pipwojunuun de Iésu na tii ne ha a tii ce. E pwo me tieden ni cunu ko ni apulie. E peni ni duéé. E pwo me lé mulie mwo ne nina lé caa mele. Pwojunuu a patin, pwohewii Caa ten. Ati nina e pwo wo Iésu, ke e pajuujuhi ana e pii pie: «Caa e mwonukewé a Mwametau te Padué.»

Lé téetieng ne ni apulie, ke lé pitahimwolé pie: «He woo pa apulie ce?»

E hegi ne te Iésu wo Pétéru ne he 8.29 pie: «Wogo, ke pa Mesia.» A bwopiinen pie, pa daame na e âbé mu ko Padué. Wonaa a âne a . Be e âbé mu ko Padué wo Iésu, beme e ne tenye a ju mulip ne pele Padué, tabuhi jena, ke é dieli mwo.

A bwomune a tii te Maréko

Ni penem ne Galilé

Pipwopwee Iésu ne ko ni penem

E tode lépwo acémun den

E pwo me tieden ni cunu ko ni apulie

E peni ni duéé; e pacuwohi a udan

E pwo-ocine te ni apulie

E pacémuni ni acémun den

Lé alihi pie pa Mesia
 Habwii a bwo ubwo na a wâé ten
 E pii a bwo mele me mulie cemwo ten
 E taa Iérusaléma
 E pacémuni lépwona lé âcéin
 E pii ana e o tuie
 A bwo mele ke mulie cemwo ten

Ioane pa apipuu apulie

Mataio 3.1–12; Luka 3.1–18; Ioane 1.19–28

1 E tabuhi ne éni a *Pwooti Wâé te Iésu Kériso †, pa *Naï Padué. ² ††Be caa tii ne ha a tii te *péroféta Isaia a pwooti te Padué pie:
*É bo neole pa apipéwooti tong.
 E bo ânebuhem,
 me e pwopweehi a pwaadeniim. Malachie 3.1*
³ *Pwo pa apulie ha a da na e toii da pie:
*“E âbé wo Padaame!
 Pwopweehi a pwaadeniim!
 Pwo me belece
 a duaan na e engen hen!” Ésaïe 40.3*

⁴ ††Wo *Ioane pa apipuu apulie, ke e tuie ne ha a da, ke e patemehi te ni apulie pie: «Geé pininim, ke geé bitekewé. Ke geé pwo me puukewé, beme geé habwii pie pitaatéhi ni mulihewé. Be me wonaa, ke e bo pineuhi ni ta pwo tewé wo Padué.»

⁵ Te junihe hiwon ni apulie na lé âbé céii Ioane ne ha a da mu *Judé, ke é ha a pwomwo ubwo *Iérusaléma. Ke lé pii beetihi ni ta pwo telé, ne he pwahamii ni apulie ati. Ke e puulé ne ha a éémwa Ioridano.

⁶ ††E cuwohe a epwén na pwo ko pumii *chameau* †††, ke a taihenan a iiwota. Ke e wii koléé, ke e ûdu duhimépu. ⁷ †††E toii pie: «Wo pana e bo âbé alecehung, ke te junihe pwojunuun kojaéo. Time uce jan ne kong me é ciiéo, ke me é tuwo ni tai ko ni dihibwaan [§].
⁸ Woéo, ke é puukewé ko a tabe, ke weeng, ke e bo puukewé ko a *Jenen Iitihii.»

Puu Iésu ke tacebwénieng

E puu Iésu wo Ioane

Mataio 3.13–4.11; Luka 3.21–22, 4.1–13

⁹ É ha a benaamwon naa, ke e tuiebé wo Iésu mu Nazaret, a mwopopwaalé ne Galilé. Ke e puueng wo

† Kériso—A bwopiinen pie: Pana pipégalieng. †† 1.2 Malachie 3.1 † 1.3 Ésaïe 40.3 †† 1.4 Apostolo 13.24, 19.4 †† 1.6 2 Rois 1.8; Mataio 11.8 ††† Chameau—Wota he melé. Epwéne Ioane, ke pwohewii a epwéne péroféta Élia. ††† 1.7 Apostolo 13.25 § Tuwo ni tai ko ni dihibwaan—A penem de lépwo eabwé na te junihe wahin.

Ioane ne ha a éémwa Ioridano. ¹⁰ Te ju é ha a benaamwon na e wie mu he tabe wo Iésu, ke e alihi a miiden he tehi, ke e alihi a Jenen Iitihii he e opé ne huîn, pwohewii a meni pwojo. ¹¹ ††Ke pwo a pwocihe bé mu he miiden, na e pii ten pie: «Wogo pa Naîng [na te céiu go] na te nihe eânimung dem. Wogo kuti, na é caa pipégaliiko ne ha a pwonimung.»

E tacebwéni Iésu wo Caatana

¹²⁻¹³ †††Te ju é alecehe anaa, ke e pé Iésu nge ha a da na a Jenen Iitihii, beme e tacebwénieng wo *Caatana. Ke e mu lang he na 40 ni tan. E mu pele ni wota apia-ba, ke ni *âcélo, ke lé penem den.

E tode ni bécéiuhe acémun den

Mataio 4.12–22; Luka 5.1–11

¹⁴ ††É ha a céiu tan, ke lé imwi Ioane, ke lé neeng he karépu. E engen wo Iésu, ke e â Galilé, me e â pipate-mehi a Pwooti Wâé te Padué. ¹⁵ †††Ke e pii telé pie: «E caa tuie a benaamwon na e caa pipégali wo Padué, ke caa é mwonu a Mwametau ten. Geé taatéhi ni mulihewé, ke geé céihi ne ko a Pwooti Wâé!»

¹⁶ [É ha a céiu tan] ke e uti a nicepwon ne Galilé wo Iésu. Ke e ali Simon me André, lupwo pwénaâjién, na lu ko ne pua, be lupwo apwotau.

¹⁷ Ke e pii telu pie: «Geu âbé céing, be é bo pwo me wogeu lupwo apwotauhi apulie.»

¹⁸ Ke lu te necu kuti ni pua telu, ke lu âcéi Iésu. ¹⁹ Ke lé te ju piân, ke e ali Cang me Ioane, lupwo naî Zébédé, he lu ko tebwo ha a ongelu, ke lu ko pwoni ni pua telu. ²⁰ E te pwome todelu wo Iésu, ke lu ne caa telu Zébédé me ni apenem den ne ha a ong, ke lu âcéin.

E pwo me wâé ni apulie

Mataio 8.1–4, 14–17; Luka 4.31–5.16

²¹ Lé tuiebé ha a pwomwo ubwo ne Kapernaüm wo Iésu me ni acémun den. Ke é ha a *tan iitihii, ke e taa ha a *mwotapitihii [te ni *Juif] ke e pacémunilé. ²² ††He lé téne, ke lé téetihii a bwo cihe ten, be time e uce

† 1.11 Psaume 2.7; Ésaïe 42.1; Mataio 12.18; Maréko 9.7
 †† 1.13 Psaume 91.11–13 †† 1.14 Maréko 6.17 ††† 1.15 Mataio 3.2 †† 1.22 Mataio 7.28–29

pwohewii ni *dotéén ko patén. Be e te pacémunilé mu ha a pihuô [na e te ne ten wo Padué].

Pa apulie na pwo duéé kon

²³ [He e mwo ko cihe wo Iésu] ke e taa ha a mwotapitihii wo pa apulie na pwo duéé kon. Ke e wiikau ke e pii pie:

²⁴ †«Iésu mu Nazaret, te tice celi go pwo peleme. Go âbé pwotahi ne kome? É te temehiko, be wogo pa apulie na e pipégaliko wo Padué, ke e neko bé.»

²⁵ Ke e heni ali duéé wo Iésu, ke e pii ten pie: «Go capuhi a pwom, ke go wie mu ko pa apulie naa!»

²⁶ ††Ke e pegili pali apulie na ali duéé, ke e wie, he wiikau mu kon.

²⁷ Ke lé te nihe tai téetihii ne ni apulie, ke lé te pitahimwolé pie: «He ade celi e ko pwo wo pa apulie ce? E pacémunikenye ko ace céiu bwomunen celi mwo coho. Be pwojunuun, ke e pihuôhi mwo ni duéé, ke lé te piténeeng!»

²⁸ *Ke e te engen kuti a jepule ko Iésu, pitihii amu Galilé.

É mwaa Simon Pétéru

²⁹ E wie mu ha a mwotapitihii wo Iésu. Ke e te pwome â pele Simon Pétéru me André. Ke lu piâcén wo Cang me Ioane. ³⁰ Ke me lé tehene ngen, ke nina lé mu lang ke lé te pwome pii te Iésu pie: «E tee ko pule é mwaa Simon, be e pwopilijing.» ³¹ Ke e âbé céiieng wo Iésu, ke e pétaa ko a in, ke e pwiieng da, ke te tieden kuti kojaeng ali pilijing. Ke e cuwoda, ke e pwo me lé wiinaado.

E pwo me tieden ni pétaapwo cunu

³² É he babwén, alecehe a bwo nuule na a téale ††, ke lé pébé céii Iésu ati ni cunu me lépwona pwo ni duéé kolé. ³³ Ke lé pitaineibulé ne ko a pomwa ati ne ni apulie ha a pwomwo ubwo. ³⁴ ††Ke e pwo me tieden ati ni pétaapwo cunu wo Iésu. Ke e pawiehi mwo ni duéé na hiwon, ke time e uce nelé me lé cihe, be lé te teme-hieng ††.

E patemehi a Pwooti Wâé ne Kapernaüm wo Iésu

³⁵ ††É ha acaama, he mwo te melepiing, ke e caama wo Iésu, ke e â ha apiticie, ke e pwoitihii. ³⁶ Ke lé ha-neeng wo Simon me lépwona béén, ³⁷ ke me lé tooeng, ke lé pii ten pie: «Lé ko haneko ati ne ni apulie.»

³⁸ Ke e hegi ne telé pie: «Genye engen mu éni, ke genye â he ni béé mwopopwaalé ko jijenye. Be é

† 1.24 Maréko 5.7 †† 1.26 Maréko 9.26 † 1.28 Mataio 4.24 †† Pele ni Juif, ke nebwén a tan heme nuule a téale. Ke lé ucéihii anebwén ko a tan iitihii, beme lé pébé ni cunu. †† 1.34 Maréko 3.10–12 ††† Time e uce nelé me lé cihe... Be time uce téele a be-naamwon den, me e pihabwiieng ehi. ††† 1.35 Mataio 14.23; Maréko 6.46

nelang mwo, he na me é â pipatemehi a Pwooti Wâé, be anaa kuti a watihen me é opé §.»

³⁹ ††Ke e engen pitihii a amu Galilé wo Iésu, ke e pipatemehi a Pwooti Wâé ne he ni mwotapitihii, ke e pawiehi ni duéé.

Pana katia nang

⁴⁰ E âbé mwonu Iésu wo pana katia nang ††. Ke e tidihii jilin ânebuhen, ke e ileeng me e pwo me wâé nang, ke e pii pie: «Hemepie te nimem, ke go pwo me tieden a katia kong!»

⁴¹ E te nihe pipwoééhen †† wo Iésu, ke e cine ngen a in, ke e ti ko pali katia, ke e pii ten pie: «Éa, te nimung! Caa wâé go!»

⁴² Ke e te engen kuti ali katia, ke caa wâé nang.

⁴³ Ke e pii me mwoiu ten wo Iésu pie: «Go engen. ⁴⁴ ††Ke go nemwo pii te ni apulie! Kehe go â pihabwiiiko ne te pa *apwoâpwailo, ke go ne te Padué ali âpwailo li e pii wo *Moosé ne he li patén den. Be me wonaa, ke me lé alihi ati ne ni apulie pie caa wâé go.»

⁴⁵ Kehe e engen wo pali, ke e â piuti te ni apulie ati nina e pwo ne kon wo Iésu. É mu ko anaa, ke caa pwocoon me e wie ne ha a pwomwo ubwo wo Iésu. Ke e â mu ha apiticie. Ke ni apulie, ke lé bwo tuiebé ne kon mu he ni piduaan.

E pwo me wâé pa céiu tebwomwa

Mataio 9.1–8; Luka 5.17–26

2 E âmwobé wo Iésu ne Kapernaüm he ni tan alecehen. Ke lé téne pie caa e mwo pwomwo. ² Ke hiwon ni apulie na lé pitaineibulé ne ha a mwa, ke â pitice ahiélé, piwien die ha a pomwa, ke é pwomwo. ³ Ke lé âbé céiieng ni béé apulie he lé pébé céiieng pa apulie na tebwomwa nang; paa jélé na lé pi-paadoimieng. ⁴ Kehe pwocoon me lé âmwonueng, wonaa mu ko a pubu apulie. Ke lé temeeng da pwo mwa ††, ke lé tapwii a céiu duaa mwa ne he bebenihe Iésu, ke lé neole pali tebwomwa pwo apule ten.

⁵ Ke me e alihi a céihii telé wo Iésu, ke e pii te pali tebwomwa pie: «Pa nañg, caa pineuhi ni ta pwo tem!»

⁶ Lé mu lang mwo ne ni béé *dotéén ko patén, ke lé pitautinaado ne he ni pwonimelé: ⁷ 'Woté? Pa apulie ce, ke e cihe pwohewiin heme wo Padué! Be he wooélé na e temehi me e pineuhi ni ta pwo ten? Te icehi Padué!

⁸ Ke e te ju temehi ni bwo niimihinaado telé wo Iésu, ke e pii telé pie: «É mu ko ade na wonaa ni bwo niimihinaado tewé? ⁹ Ade aceli piticecoon? Me é pii te paje pie: "Caa pineuhi ni ta pwo tem", ai me é pii ten pie:

§ Me é opé—ai Me é wie mu Kapernaüm. Grek: Me é tehene ngen. †† 1.39 Mataio 4.23, 9.35 ††† Pana katia nang—Lèpre. Wo lépwona Juif, ke lé mwiihi ni katia. †† E te nihe pipwoééhen—ai E te junihe okéé. ††† 1.44 Lévitique 14.1–32 †† É pwo a mwa, ke belece, ke pwo a aca na e taa die pwo mwa.

“Go cuwoda, ke go pé apule tem, ke go engen?”¹⁰ [Ke mepie jan me é pwo me e engen ne ânebuhewé ati] ke geé bo temehi pie, pwo mwomwon dong, woéo, pa *Nahi Apulie, me é pineuhi ni ta pwo te ni apulie ne pwo bwohemwo.»

Ke e pii te pali tebwomwa pie:¹¹ «Aje, go cuwoda, ke go pé apule tem, ke go âmwo pelem!»

¹² Ke e te cuwoda kuti wo pali, ke e te pé kuti ali apule ten, ke e wie ne he pwahamii ni apulie.

Lé te nihe téetihî ne ni apulie, ke lé pii pie: «Time genye mu uce téele alihi ace naado celi wonaa! Te a ju-uju pie wo Padué, ke te junihe ubwo nang.»

E tode Lévi (Mataio)

Mataio 9.9–13; Luka 5.27–32

¹³ E mwojuia ngemwo ticepwon ne Galilé wo Iésu. Ke lé âbé céieng ne ni apulie na hiwon jélé. Ke e pacémunilé [ko a pwooti te Padué].

¹⁴ É he e ko ân, ke e ali Lévi (Mataio), pa naî Alfé, he e ko tebwô ha a mwotai mwani † [me de lépwo Roma]. Ke e pii ten wo Iésu pie: «Go âbé céing!»

Ke e te cuwoda kuti wo paje, ke e âcéi Iésu.

¹⁵ É alecehen, ke lé wiinaado wo Iésu me lépwo acémun den pele Lévi. Ke hiwon ni atai mwani me ni apulie na ta ni mulihelé, na lé tai taa pwo taap me woélé, be te nihe hiwon jélé na lé âcéi Iésu.¹⁶ ††Ke me lé alihi anaa wo lépwo dotéén ko patén me lépwo *Farasaio, ke lé pii te lépwo acémun den pie: «É mu ko ade na wo pa caa tewé, ke lé piwiinaado me ûdu me lépwo atai mwani, ke ni béé apulie na ta jélé?»

¹⁷ Ke e ténéle wo Iésu, ke e pii telé pie: «Time lé uce hane ce dotéén wo lépwona te wâé jélé, kehe te icehi lépwona cunu jélé. Ke time é uce âbé tode nina lé ni-imihî pie wâé ni mulihelé. Kehe é âbé tode nina lé temehi pie ta ni mulihelé.»

A ocine ko a pipaciile

Mataio 9.14–17; Luka 5.33–39

¹⁸ É ha a céiu tan, ke lé ko *pipaciile wo lépwo acémun de *Ioane pa apipuu apulie me lépwo Farasaio. [Be lé patupwo wiinaado beme lé pwoiitihî.]

Ke lé tuiebé pele Iésu ni béé apulie, ke lé pii ten pie: «É mu ko ade na lé te pipaciile wo lépwonaa, ke lé te wiinaado ne ni acémun dem?»

¹⁹ Ke e hegi ne telé wo Iésu pie: «Kona lé te pipatupwo wiinaado wo lépwona todelé ne ko a piaten, heme e mwo teko mu pelelé wo pa apiaten? Ûhu! Heme e mwo teko mu pelelé wo pa apiaten, ke lé mwo te wiinaado ke ûdu.²⁰ Kehe e o bo âbé a tan na o bo pé kôjalé pa apiaten. Ke é mulang na lé o bobe pipaciile.

²¹ «Te tice pace apulie celi me e pé ace memwaanu celi mwo te ju wâé, me e woli ne ko ace memwaanu

celi ukéiu. Be [mepie e puu a mwaanu, ke] bo nihe ubwo a tie kon.

²² «Ke geé niimihi a *mwotabe na pwo ko iiwota ‡. Be time nye uce pé ace tabe megele celi mwo coho, me nye pa a mwotabe na caa ukéiu. Be [pwocoon me cibi, ke] e bo pabuwohi, ke genye o patieden a tabe megele, me ni mwotabe. Ûhu! Wâé heme nye ne a tabe megele na mwo coho, ne ha a mwotabe na mwo coho!»

Pa eapwihî a tan iitihî

Mataio 12.1–8; Luka 6.1–5

²³ É ha a céiu *tan iitihî, ke lé [uti a pwaaden na e] pitahagéi ni apwoamu wo Iésu me lépwo acémun den. Ke é nge he pwaaden, ke lé tabwo ni ace blé wo lépwo acémun den.

²⁴ ††Ke lé pii te Iésu wo lépwo béé Farasaio pie: «Aje, é mu ko ade na lé wonaa wo lépwo acémun dem ha a tan iitihî! Be iitihî!»

²⁵⁻²⁶ †††Ke e hegi ne telé pie: «Kona time geé mu uce pine ne he ni *tii iitihî ana e pwo wo pa daame *Davita, ha a benaamwon de Abiatar, pa *daame he lépwo apwoâpwailo? Be é ha a céiu tan, ke menelé, woélé me ni béén, be tice celi lé wii. Ke e taa ha a *mwaiitihî [na pwo ko mwaanu] wo Davita. Ke e pé a pwoloa na ne me de Padué, na te icehi lépwo apwoâpwailo na jan ne kolé me lé eni. Ke e eni, ke e ne mwo te lépwo béén.»

²⁷ †††Ke e pii mwo wo Iésu pie: «Wo Padué, ke e pwo a tan iitihî me de ni apulie. Kehe time e uce pwo ni apulie me de a tan iitihî!

²⁸ «É mu ko anaa, ke woéo pa Nahi Apulie, ke pa eapwihî a tan iitihî.»

E pwo me tieden a cunu ha a tan iitihî

Mataio 12.9–14; Luka 6.6–11

3 É alecehe anaa, ke e â taamwo ha a *mwotapitihî wo Iésu, [ha a *tan iitihî]. Pwo pa apulie na e mu lang na mele a in.² Ke lé te ju ome Iésu wo lépwo *Farasaio, beme lé alihi pie, he e o te pwo me wâé nang ha a tan iitihî. Wonaa beme lé pipé ne kon.

³ Ke e pii te pali cunu wo Iésu pie: «Go cuwoda [ânebuhelé ati].»

⁴ †Ke e pii te lépwona lé mu lang pie: «Woté? He te ne me pwo ana wâé, ha a tan iitihî, ai ana ta? Me celuimi a mulip, ai me taunuhî?»

Ke time lé uce cihe.⁵ Ke e te ju omelé he okéé, be lé pwo me e mu he ni picani ko a bwo mwoiu ne ni pwonimelé. Ke e pii te pali apulie pie: «Go cinebé a im.»

‡ Mwotabe... Omehi a déme ali mwotabe ne ha a Mataio pwa-hamii tii 9. E bitehî a tabe megele na mwo coho, ke e pítâa a dan. Ke me caa â dele mwotabe, ke o buwo, be pwocoon me cibi a iiwota, be caa tele. †† 2.24 Deutéronome 23.26 †† 2.25 1 Samuel 21.1–6 ††† 2.26 Lévitique 24.5–9 ††† 2.27 Deutéronome 5.14 § 3.4 Luka 14.3

† Mwotai mwani me de lépwo Roma—Bureau des impôts.
†† 2.16 Mataio 11.19

Ke e cine ngen a in, ke caa te wâé mwo kuti.

⁶ †Wo lépwo Farasaio, ke lé te pwome â wie mu ha ali mwotapitih, ke lé picihe me lépwo béé *Érode Antipas, ke lé tai hane ace bwopwonen me lé taunu Iésu.

Hiwon ni apulie na lé âbé céii Iésu

⁷ Lé â ticepwon ne Galilé wo Iésu me ni acémun den. Ke hiwon ni apulie na lé âcélilé: ni apulie na lé âbé mu Galilé, mu *Judé, ⁸ mu *Iérusaléma, mu Idumé, ke é ha a céiu duaan mu ko a éémwa Ioridano, ke é he ni duaan mu ko a Tir ke é mu Sidon. Ke lé tai âbé ali Iésu, be lé téne nina e pwo.

⁹ Ke e pii te lépwo acémun den wo Iésu pie: «Geé pipwopweehi ace cuwo nahi ong, be é kon heme nihe hiwon ni apulie, be koli lé bo haiteéo!»

¹⁰ ††Be e caa pwo me wâé ni apulie na hiwon jélé. Ke nina lé mu he ni picani ko ni cunu kolé, ke lé tété ne kon, beme lé ti kon. ¹¹ †Ke é he lé alieng ne ni apulie na pwo duéé kolé, ke lé tupwo ke lé tidih jililé ânebuhen, ke lé toii pie: «Wogo ke pa *Naî Padué!»

¹² ††Ke e cihe me mwoiu ne kolé pie: «Geé nemwo pipatemhiéo!»

E pipégali ni apostolo ten na 12

Mataio 10.1–4; Luka 6.12–16

¹³ É alecehen, ke e taa pwo juwole wo Iésu. Ke e tode ni apulie na te nimen kolé, ke lé âbé céiieng. ¹⁴ Ke e pipégali mu hadeniilé lépwona 12 jélé beme ni béén, ke me lé â patemehi a *Mwametau te Padué. {Ke e ne me niilé pie *apostolo.} ¹⁵ Ke e ne telé a pihuô beme lé peni ni duéé. ¹⁶ †††Weengi ni nii lépwo 12 apostolo:

Simon, na e toii me a niin pie Pétéru;

¹⁷ Cang, pa naî Zébédé;

Ioane pa ciéé Cang (e toii niilu wo Iésu pie Boanergès, a bwopiinen pie 'lupwo nahi tikekele') ††;

¹⁸ André;

Filip;

Bartélemi;

Mataio;

Toma;

Cang, naî Alfé;

Tadé †;

Simon, pa Zélate^{††};

¹⁹ Judas Iscariot, pana e bwo icu Iésu.

Nime a pwomwoiu te Iésu me e pééng nge ité

²⁰ Ke e mwojuia ngemwo pwomwo wo Iésu. Ke hiwon ni apulie na lé pitapitilé nelang. Ke tice bwopwo-

† 3.6 Mataio 22.15–16 †† 3.10 Mataio 14.36 † 3.11 Luka 4.41 †† 3.12 Mataio 12.16; Maréko 1.34 †† 3.16 Ioane 1.42 ††† 3.17 Luka 9.54 ††† Nahi tikekele—A bwopiinen pie Pa tabeokéé.

§ Tadé—Pana a niin mwo pie Jude, pa naî Cang. Omehi Ioane 14.22, Apostolo 1.13. †† Zélate—Grek: Cananite. Pa ju apulie Judé, na nimen me e pawie lépwo Roma mu peelé.

nen me lé wiinaado wo Iésu me lépwo acémun den.

²¹ Ke é he lé téne anaa ne ni apulie mu ha a pwomwoiu ten, ke lé âbé pééng kojale. Be lé pipii telé pie: «Pa apiolo!»

E hegi ne te nina lé pipé ne kon

Mataio 12.22–50; Luka 11.14–23, 8.19–21

²² †††Pwo lépwo *dotéén ko patén na lé ole mu Iérusaléma. Ke lé pipii pie: «E ko Iésu wo Caatana ††, pa caa te ni duéé. Be weeng na e ne ten a pihuô me e peni ni duéé.»

²³ E todelé wo Iésu, ke e tahimwolé pie: «Kona e o woté ko ace bwopwonen me e te pipawieeng mu ko pa apulie wo Caatana?»

Ke e pii telé ni ocine ce: ²⁴ «É hemepie e te pipwopa ne kon ace céiu mwametau, ke o pwocoon me e mu mang. ²⁵ Ke me lé pipiéi hadeniilé ne ni apulie ha a pwomwoiu, ke a pwomwoiu naa, ke o pwocoon me e mu mang. ²⁶ Ke é hemepie e pipwopa ne mwo kon wo Caatana, ke mepie time e uce piténeeng mwo, ke o caa time uce bwolihi a pihuô ten. O caa te wonaa a bwo pipatieden den. ²⁷ É hemepie nimenye me nye taa ha a mwa te pace céiu apulie na pwo niihen, me nye pé ni naamuun, ke wâé heme nye mi cieeng. É mu-lang, ke genye bwobe pé ni naamuun mu ha a mwa ten.»

Pana e pihooni a Jenen Iitih

²⁸ †††«Geé téne ehi, be é pii tewé a juuju pie: O te jan me pineu pa apulie na e pwo nina ta, te piwien hemepie e cihe me ta ne ko Padué. ²⁹ Kehe wo pana e cihe me ta ne ko a *Jenen Iitih, ke o time uce jan me pineuhi ni ta pwo ten. Ke ni ta pwo ten, ke o tee mu dieli mwo.»

³⁰ E pii anaa wo Iésu, be me de lépwo dotéén ko patén. Be lé pii pie pwo duéé kon.

A ju pwomwoiu te Iésu

³¹ ††Ke é alecehen, ke lé tehenebé wo nyaa te Iésu me lépwo âjiénen. Ke lé âbé tebwo pwomwo. Ke lé pahede pa céiu apulie me e taa tode Iésu.

³² Hiwon ni apulie na lé mu aujeni Iésu, ke lé pii ten pie: «Aje, élé âoté pwomwo wo nyaa tem me lépwo ciéém. Be lé ko haneko.»

³³ Ke e pii telé pie: «He woo êce nyaa tong? Ke wooélé lépwoce ciééng?» ³⁴ Ke e te ju ome ni apulie na lé ko tebwo aujenieng, ke e pii telé pie: «Geé alihi, be woélé-ni ni nyaa tong me ni âjiéning. ³⁵ Be wo pana e pwo ana nime Padué kon, ke te weengaa kuti pa ciééng, ke ê pwaadening, ke ê nyaa tong.»

††† 3.22 Mataio 9.34, 10.25 †† Caatana—Bélzébül. Omehi Caatana ne ha a Niinaado (Vocabulaire) ha anebwén ko a tij. ††† 3.28–29 Luka 12.10 †† 3.31 Maréko 6.3; Ioane 2.12; Apostolo 1.14

A ocine ko pa apicemi

Mataio 13.1–23; Luka 8.4–15

4 †E pacémuni ni apulie mwo ko a pwooti wo Iésu, ne ticepwon ne Galilé. Ke hiwon nina lé taineibulé ne kon. Ke é mu ko anaa, ke e taa ha a céiu ong, na e teko mu he tabe, ke e tebwo. Ke lé te mu jeda huâiu ne ni apulie. ² ††Ke e pwo-ocine he e pacémunilé ko ni naado na hiwon. Ke e pii telé pie:

³ «Geé téne! E bwo mu wo pa céiu apulie, ke e bwo wie ha a céiu tan, beme e tagiliihi ni âdaanu. ⁴ Ke é he e ko tagiliihi, ke lé tupwo nge pwo pwaaden ni béé pidenaado. Ke lé âbé ne ni meni, ke lé wii ati.

⁵ «Ke ni béén, ke lé tupwo ne ha a wii péi. Ke lé piepin ko cim, be time uce hiwon ni pule lang. ⁶ Kehe icehi ana me e niê na a téale, ke éle li nahi âdaanu, ke lé meu, be te tice waan. ⁷ Ke ni béén, ke lé tupwo ne ha awieme ni mwawi ubwo ‡. Ke me lé tai picim, ke lé taunuhi li pidenaado, ke te tice acehin.

⁸ «Ke ni béén, ke lé tupwo ne ha a pule na wâé. Ke lé cim, ke piubwo jélé da, ke lé aca. Ke ni béén, ke 30 ni acehin; ke ni béén 60; ke ni béén mwo, ke lé taa die pwo 100.»

⁹ Ke e pii mwo wo Iésu pie: «Wo paceli pwo ce pwo-jéénen me e téne, ke wâé heme e téné!»

É mu ko ade na e pii ni ocine?

¹⁰ É he lé te pimucehi wo Iésu me lépwo 12 *apostolo ten me lépwo béén, ke lé tahimwoeng pie: «É mu ko ade na go pii ni ocine naa?»

¹¹ Ke e hegi ne telé pie: «Wogewé na e ne tewé wo Padué, me geé temehi a ju bwomune a Mwametau ten. Kehe ni béé apulie, ke lé te ju téne cehi ni ocine.

¹² ††Be [e pii ne kolé wo Padué pie]:

[Mwoiu a puni a puapulie ce.]

Be lé tee omehi taaci,

kehe time lé uce alihi temehi.

Lé tee téne taaci,

ke time lé uce téne temehi.

Te muhi telé me lé bitelé bé céiiéo,

ke me é pineuhi ni ta pwo telé.»Ésaïe 6.9–10

A bwopiine a ocine ko pa apicemi

¹³ É alecehen, ke e pii te nina lé mu lang wo Iésu pie: «Kona time geé uce temehi a ocine ko pa apicemi? Ke geé bo woté ko ace bwo temehi ne ni béé ocine ko a Mwametau? ¹⁴ Pa apicemi, ke e cemi a pwooti te Padué. ¹⁵ [Ke ni béé pidenaado, ke lé tupwo nge pwo pwaaden.] A pwaaden, ke ni apulie na lé téne a

† 4.1 Maréko 3.7–9; Luka 5.1–3 †† 4.2 Mataio 13.34; Maréko 4.33–34 ‡ Mwawi ubwo—Grek: *Acuwo pwo dan* (plantes épineuses). †† 4.12 Ésaïe 6.9–10; Apostolo 28.26–27

pwooti, kehe e pwome âbé pé kojale a pwooti wo *Caatana, na caa cemi ne he ni pwonimelé.

¹⁶ «Ke ni béé pidenaado, ke lé tupwo ne ha a wii péi. [A wii péi] ke ni apulie na lé téne a pwooti, ke lé pwome hegi ko a pipwodéén. ¹⁷ Kehe icehi ana te tice waan ne kolé a pwooti na lé téne. Ke lé te pitaatééhi ni bwo niimihinaado telé. Hemepie e tuie ne kolé a tacebwén, me pwo nina ta ne kolé, watihen a pwooti te Padué, ke lé patieden ni céihi telé.

¹⁸ «Ke ni béé pidenaado, ke lé tupwo ne he ni mwawi ubwo. [A pule naa] ke ni apulie na lé téne a pwooti, ¹⁹ ††kehe icehi ana pinekepé ni pwonimelé ne ko ni naado na e tuie ne pwo a bwohemwo ce. Ke lé tété cehi mwani me ni pétaapwo naamuu bwohemwo. É mu ko ninaa, ke e taunuhi a pwooti, ke te tice acehin.

²⁰ «Ke ni béé pidenaado, ke lé tupwo ne ha a pule na wâé. [Ke a pule naa] ke ni apulie na lé téne a pwooti, ke lé hegi ne he ni pwonimelé. Ke pwo acehi a pwooti ne kolé. Ke ni béén, ke 30 ni acehin; ke ni béén, ke 60, ke ni béén mwo, ke lé taa die pwo 100.»

Ni béé ocine ko a Mwametau

Mataio 13.31–32; Luka 8.16–18, 13.18–19

A ocine ko a mwomiû

²¹ ††E pii telé mwo wo Iésu pie: «Time nye uce ne miû ko a mwomiû, me nye talui ko ace cio, ai me nye ne haahi ace apule. Kehe genye ne da ko miiden. ²² ††Ati ni naado na neduwahi, ke o bo habwii ne ha a pwéélang, beme nye alihi ehi. ²³ Wo paceli pwo ce pwojéénen me e téne, ke wâé heme e téné!»

²⁴ †Ke e pii telé mwo pie: «Geé pipwocile nina geé téne! Be e o bo pwo tewé wo Padué nina geé pwo te lépwo béén. Ke e o bo pwo celi nihe piubwo koja nina geé pwo. ²⁵ ††Be wo pana caa pwo ne ten, ke o ne mwo pwon ce béén. Kehe wo pana tice ten, ke o pétaabwon kojaeng a nehinaado na mwo e pelen.»

Âdaanu na te picim cehi

²⁶ Ke e pii mwo wo Iésu pie: «Mepwo a *Mwametau te Padué, ke pwohewii ani:

«E bwo mu wo pa céiu apulie, ke e bwo cemi ni âdaanu ne ha apwoamu ten. ²⁷ Ke é alecehen, ke e mwo pwome mwaale, ke e pule he bwén, ke e ûmiê ha acaama. Ke é ha a benaamwon naa, ke lé cim li âdaanu, ke piubwo jélé da. Kehe icehi ana wo paje, ke time e uce temehi ace bwo cim nen. ²⁸ Be te a penem de a pule me e pwo me cim ni âdaanu. Ke e ne me piubwo jélé da, dieli lé ne ni acehilé, me ni piden. ²⁹ ††Ke

†† 4.19 Mataio 19.23–24 ††† 4.21 Mataio 5.15; Luka 11.33

††† 4.22 Mataio 10.26; Luka 12.2 § 4.24 Mataio 7.2 † 4.25

Mataio 13.12, 25.29; Luka 19.26 ††† 4.29 Joël 4.13; Pii Beetihi 14.15

me caa pun ni âdaanu ha apwoamu, ke wo pa apulie naa, ke e bo pipwopweeng me e pitii âdaanu.»

A ocine ko a pide moutarde

³⁰ Ke e pii mwo wo Iésu pie: «He a Mwametau te Padué, ke he pwohewii ace de? Weengi a ocine, me geé temehi:

³¹ «A Mwametau te Padué, ke e pwohewii a pide *moutarde* na genye cemi he pule; a cuwo nahi pide-naado na te junihe wahin †. ³² Kehe icehi ana me e cim, ke te junihe ubwo nang koja ati ni naado na nye cemi he ni cereda. Be bwo ubwo ni dihen, ke lé âbé ne ni meni, ke lé te pwo mwonahilé ne ha a boom kon.»

³³ É he e pii te ni apulie a pwooti te Padué wo Iésu, ke e pii ni ocine na pwohewii a ocine ce. Ke e pwo a bwopiinen, beme lé pé ce delé mu ko ni bwo téne temehi nen delé.

³⁴ Be e te cuwo ko pwo-ocine telé, kehe me bwo te piwoélé cehi me lépwo acémun den, ke e bwo te pipate-mehi telé ati.

E pacuwohi a udan wo Iésu

Mataio 8.23–27; Luka 8.22–25

³⁵ É ha a babwén naa, ke e pii wo Iésu te lépwo acémun den pie: «Nye gaale ângedé ko a céiu goon.»

³⁶ Ke lé pééeng pwo a ong na lé tebwo hen, ke lé cepewie ni apulie. Kehe icehi ana lé âcélilé ni béén ne he ni béé ong.

³⁷ É alecehen, ke e tabuhi tahieng a dan. Ke te piubwo da a bwo tahieng. Ke te piubwo ni pihijíé, ke e taii ne ha a ong.³⁸ Kehe wo Iésu, ke e teko pule alecehe ali ong, pwo a paapun.

Lé paûmiéeng wo lépwo acémun den, ke lé pii ten pie: «Pa apipune, genye o caa mwiiê! Woté! Time uce junaado ne tem?»

³⁹ Ke e ûmiê, ke e heni ali dan. Ke e pii te ali jíé pie: «Go cuwo!»

Ke caa te ju wâé mwo a amu, ke e cuwo ali dan.

⁴⁰ Ke e pii telé pie: «É mu ko ade na mwotikewé? Time geé uce téele céihi kuti?»

⁴¹ Kehe te nihe mwotilé, ke lé pipii telé pie: «Éé! Be he woo pa apulie ce, me lu piténeeng a dan me a jíé?»

E cibéé ni duée na hiwon jélé @ mu ko pace céiu apulie

Mataio 8.28–34; Luka 8.26–39

5 Ke lé tehene nge Gadara †† wo Iésu me lépwo acémun den ko a goon ne gaale cemwo pejié ne Galilé. ² Ke me e ole mu pwo ali ong wo Iésu, ke e te wiebé kuti mu ha a iitihii wo pa apulie na pwo duée kon. Ke e âbé beni Iésu. ³⁴ Be wo panaa, ke pa apimu

† Pwohewii a acuwo tili ne éni Kalédoni, be te junihe ubwo, kehe te junihe wahin ni piden. †† Gadara—A niin mwo pie Gérasène.

he iitihii. Ke te tice bwopwonen me lé imwieng, me lé cie lupwo in me lupwo an; piwien mwo heme cieeng ko ace itihii tiki. Be lé te cuwo ko cieeng kon, ke e te cuwo ko tahagéi. Ke te tice pace apulie celi pwo niihen me e imwieng me e ju mu. ⁵ Téteda he ni benaamwon, heme bwén ke pwang, ke e teme da ni pwowiiikau ne ha ali iitihii, ke é ne pwo ni juwole. Ke e pitanahieng ko ni péi.

⁶ †Me e ali Iésu mu ité, ke e tété beniieng, ke e tidihii jilin ânebuhen, ⁷ ke e toii da pie: «Iésu, pa *Naî Padué na nihe e daaité, ade aceli nimem me go pwo tong? É ileko ne he nii Padué pie go nemwo pwo tong aceli ta!» ⁸ E pii anaa, be e pii ten wo Iésu pie: «Duée, go wie mu ko pa apulie ce!»

⁹ Ke e tahimwoeng wo Iésu pie: «He piwoté ace ni-im?» Ke lé hegi ne ten ne ni duée †† pie: «A niime pie Bwehi duée, be hiwon geme.»

¹⁰ Ke e wâgo ko Iésu wo pali, ke e pii ten pie: «[Hemepie go pawiehi ni duée mu kong] ke go nemwo cibéélé mu éni ha amu!»

¹¹⁻¹² Ke lé wâgo kon mwo [ne li duée] ke lé pii ten pie: «Me geme ân, ke me geme taa he ni puwokwo ne!»

Be pwo a bwehi puwokwo na nihe hiwon jélé na lé ko um gaale hamwo juwole. ¹³ Ke e ne telé ana lé ilehi wo Iésu. Ke lé wie mu ko pali apulie, ke lé gaale he li puwokwo. Ke lé te tai tété kuti li puwokwo mu hamwo juwole, ke lé ole he jíé, ke lé mwiiê. Caa te piâmwonuhi a 2000.

Piân a jepule

¹⁴ Wo lépwo awéihii puwokwo, ke lé tété ngen, ke lé â piuti a jepule naa, ne ha a mwopopwaalé ke é na ati ha amu. Ke lé âbé ni apulie, beme lé alihi nina e ko tuie.

¹⁵ Ke lé tehenebé pele Iésu, ke lé ali pali apulie li pwo duée kon, he e caa ko tebwo, ke e caa cuwohe ni epwén, be caa ju wâé nang. Ke lé téetieng, ke te junihe mwotilé. ¹⁶ Ke lépwona lé alihi nina e tuie, ke lé piuti te lépwo béén ali jepule ko pa apulie naa, me ni puwokwo. ¹⁷ Ke lé wâgo ko Iésu wo lépwo apulie mu ha amu naa, ke lé pii ten pie: «Nimeme me go engen mu ha amu teme.»

¹⁸ Ke me e taa pwo ali ong wo Iésu, ke wo pali lé wie mu kon li duée, ke e ileeng pie: «Nimung me é âdé céim.» ¹⁹ Kehe icehi ana te muhi te Iésu, ke e pii ten pie: «Go mwojuia ne ha a pomwa tem, pele lépwo béém. Ke go uti telé a bwo pipwoééhém de Padaame, ke ati ni naado na e pwo me dem!» ²⁰ Ke e mwojuia mwo wo paje, ke e uti ne ha a duaan na pii kon pie *Dix Villes* †† ni naado na e pwo me den wo Iésu. Ke lé tai téetihii ne ni apulie.

‡ 5.7 Maréko 1.24 †† Lé hegi ne ten ne ni duée—Grek: E hegi ne ten. †† Dix Villes—A niin mwo pie Décapole. 10 ni pwomwo ubwo na picipetééhi ne kolé.

E pwo me wâé lu alo toomwo

Mataio 9.18–26; Luka 8.40–56

²¹ E taa pwo ali ong wo Iésu, ke e gaale ko a goon ne gaale cemwo. Ke me e ole mu pwo ong, ke hiwon ni apulie na lé mu aujenieng ne ticepwon. ²² Ke e tuiebé wo Jaírus, pa céiu caa te *mwotapitih, ke e ali Iésu, ke e â tidihi jilin ânebuhen. ²³ Ke e pii ten pie: «Go âbé epin, be e caa pwo me e mele ê naîng! Go âbé me go ne ni im huîin, beme tieden a cunu kon, ke me wâé nang mwo.» ²⁴ Ke e âcén wo Iésu. Ke te nihe hiwon mwo ni apulie na lé ân, ke lé caa ju pitité.

Ê toomwo na 12 ni jo ko a cunu kon

²⁵ Ke e mu hadenii ni apulie naa ê céiu toomwo na caa 12 ni jo na cunu nang hen, be e mu tuie ni be-naamwon na e mu tête kon a cewéle. ²⁶ Caa junihe hiwon ni dotéén na e mu â alilé, ke lé bwo pwo me junihe cunu nang kuti. Ke e caa ju patieden ati ni mwani ten, kehe icehi ana time uce wâé nang, kehe bwo junihe cunu nang kuti. ²⁷ Ke e téne a jepule ko Iésu, ke e âbé ne ha a tapitih naa. Ke e piâbé alecehe Iésu, ke e ti ko a epwénen. ²⁸ Be e niimihi pie, 'Mepie é te ju ti ko a epwénen cehi, ke o caa te pitieden a cunu kong.' ²⁹ Ke me e pwo, ke e te cuwo kuti a bwo tête kon na ali cewéle. Ke e téne ne kon pie caa tieden a cunu kon.

³⁰ †Ke wo Iésu mwo, ke e téne pie, e engen kojaeng a céiu duaa niihen, ke e biteeng, ke e tahimwo ni apulie pie: «He woo na e ti ko a epwénung?»

³¹ Ke lé hegi ne ten wo lépwo acémun den pie: «Go ko cuwo ha awieme ni apulie na lé ko pitité! Ke é mu ko ade na go tahimwohi pie, woo na e ti kom?»

³² Kehe icehi ana e te piniê aujenieng wo Iésu, beme e niê hane pie, he woo na e pwo anaa. ³³ Ke e te ju éjén êgi toomwo ko a bwo mwotieng, be e temehi ana e ko tuie ne kon. Ke e âbé ke e tidihi jilin ânebuhe Iésu, ke e pii ten ati a juuju. ³⁴ ††Ke e pii ten wo Iésu pie: «Adéiko go êje! Caa wâé go mwo ko a céihi tem! Ke go engen, ke me e mu pelem a péém. Be caa te tieden a cunu kom!»

Ê naî Jaírus

³⁵ É he e mwo ko pii anaa wo Iésu, ke lé tehenebé ni béé apulie mu pele Jaírus, pali eapwih mwotapitih, ke lé pii ten pie: «Au! E caa mele wo êgi naîm. Kehe go nemwo pahauli pa apipune.» ³⁶ E téne ni pwocihe naa wo Iésu, kehe time e uce pipéce ne kon, ke e pii te Jaírus pie: «Go nemwo pwo me mwotiko! Kehe go céihi ne kong!» ³⁷ E te ju pé cehi Pétéru, me Cang me Ioane, lupwo pwénaâjién. Be time uce nimen me lé âcén ne ce béé apulie. ³⁸ Ke lé tuie nge ha a pomwa te Jaírus. Ke te junihe hiwon kuti ni pwocihe lang. Ke wo Iésu, ke

† 5.30 Luka 6.19 †† 5.34 Maréko 10.52; Luka 7.50, 17.19

e ali ni apulie he lé ko é, ke lé pihemun. ³⁹ Ke e taa ha ali mwa, ke e pii telé pie: «É mu ko ade na geé te junihe pié ne da kon? Kona geé é kona woté? Geé ko pii pie e caa mele ê cuwo ewa ne †; kehe woéo, ke é pii pie e teko ju puluta!» ⁴⁰ Ke lé pihoonieng.

Ke e tai pawielé wo Iésu, ke e pé lu nyaa me caa te êgi ewa, me lépwo acémun den na cié jélé. Ke lé taa ha a céiu nemwa na lé ne êgi cuwo nahi ewa hen. ⁴¹ ††Ke e pétaa ko a in, ke e pii ten pie: «*Talita, koumi!*» A bwopiinen pie: «Ê naîng, go cuwoda!» ⁴² Ke e te cuwoda kuti, ke e engen! Ê cuwo nahi toomwo naa, ke 12 ni jo hen. Ke lé te junihe téetihi ne nina lé mu lang. ⁴³ Ke e pii telé wo Iésu pie: «Geé ne celi e wii.» Ke e pii mwoiuhi telé pie: «Geé nemwo pii te ce béé apulie ana e tuie ne éni.»

Time lé uce céihi ne kon ni Nazaret

Mataio 13.53–58; Luka 4.16–30

6 E engen mu ha a duaan naa wo Iésu, ke e â Nazaret, he na ubwo nang ne hen. Ke lé âcén wo lépwo acémun den. ² †É ha a tan ko pwoitih, ke e taa ha a *mwotapitih, ke e pacémuni ni apulie na hiwon jélé [ko a pwooti te Padué]. Ke me lé téne, ke lé te junihe téetieng, ke lé pitahimwolé pie: «Kona woo na e pi-caa ten nina e ko pii? E âbé mu wé ni bwo temehinaado ten, ke ni *pipwojunuun na e pwo? ³ Be pali apen-em ko ba-acuwo, pali naî Maria, ke pa cuwo Cang, me José, me Jude, me Simon! Ke lé teko mulie pelenye ni toomwo pwaadeniin!»

Be lé pitaaba ne kon wo lépwo Nazaret, ke te muhi telé me lé céihi ne kon. ⁴ ††Ke e pii telé wo Iésu pie: «Au, mwolihi! Be wo pa péroféta, ke lé te paciitieng ati ne he ni amu, kehe te icehi ne ha amu ten, ne pele ni âjiénen!»

⁵ Ke te tice bwopwonen me e pwo celi pwojunuun nelang. Kehe icehi ana te pwo ni béé cunu na e ne ni in huîilé, ke wâé jélé. ⁶ E te junihe téetihi, be te ju time lé uce céihi kuti ne ni apulie.

E pahede ni 12 apostolo ten

Mataio 10.5–15; Luka 9.1–6

É alecehe anaa, ke e â patemehi a Pwooti Wâé wo Iésu, ati ne he ni mwopopwaalé na élé aujenihi a Nazaret. ⁷ Ke e tode lépwo 12 *apostolo ten, ke e nelé ngen he pialo. Ke e ne telé a pihuô beme lé peni ni duéé. ⁸ †††Ke e pii telé pie: «Geé nemwo pé ce naado hemepie geé engen: mepie ace pwoloa, ke ace élele, ke ace mwani ne he ni mwomwani tewé. Kehe geé te ju pé cehi ce bwajaawé, ⁹ me ce dihibwaawé, ke te picéiu ce epwénewé.»

† Geé ko pii pie e caa mele ê cuwo ewa ne—Grek: Caa time e uce mele ê cuwo ewa. †† 5.41 Luka 7.14 ††† 6.2 Ioane 7.15 †††† 6.4 Ioane 4.44 †††† 6.8–11 Luka 10.4–11

¹⁰ Ke e pii telé mwo pie: «Mepie lé hegikewé ne ha ace céiu pwomwo, ke wâé heme geé mu lang, dieli geé bo engemwo mu ha a duaan naa. ¹¹ †Ke heme time uce nime ni apulie me lé hegikewé ne ha ace céiu duaan, ke me te muhi telé me lé tabemikewé, ke geé engen mulang. Ke geé tagiliihi ni muu pule ko ni awé, beme geé habwii pie time uce wâé ni huô telé [be muhi telé ko a pwooti te Padué].»

¹² Ke lé ân wo lépwo apostolo, ke lé patemehi te ni apulie pie: «Geé pitaatéhi ni mulihewé.»

¹³ ††Ke lé peni ni duéé na hiwon mu ko ni apulie. Ke lé ne huile ko ni apulie na cunu jélé, ke lé pwoiithi ne kolé, ke wâé jélé.

Érode Antipas me Iésu

Mataio 14.1–12; Luka 9.7–9

¹⁴ †E téne a jepule ko Iésu wo pa daame *Érode Antipas, be caa nihe piân a jepule kon. Be lé pii ne kon wo lépwo béén pie: «Wo *Ioane pa apipuu apulie, he e caa mulie cemwo mu ha amele! Anaa kuti a watihen me e pwo ni pipwojunuun.»

¹⁵ Kehe lé pii ne ni béén pie: «Wo péroféta Élia †.» Ke lé pii ne ni béén mwo pie: «Pa céiu péroféta ha a céiu benaamwo amu.»

¹⁶ Kehe me e téne anaa wo Érode, ke e pii pie: «Éé! E caa mulie cemwo mu ha amele wo Ioane pa apipuu apulie, pali é pwo me tahagéi henen!»

E mele wo Ioane pa apipuu apulie

¹⁷⁻¹⁸ ††Weengi a jepule ko a bwo mele te Ioane: Wo Érode, ke lu piaten me Érodiade, ê mwode Filip, pa âjiénen. Ke e mu te cuwo ko pii ten wo Ioane pie: «Te tice mwomwon dem me go pé ê mwode pa âjiénem!»

Ke e te pwo me imwi Ioane wo Érode, ke e cieeng, ke e neeng he karépu. ¹⁹ Ke e tééti Ioane wo êje Érodiade, ke nimen me e pwo me e mele. Kehe icehi ana te pwocoon den me e pwo, ²⁰ be e te paciiti Ioane wo Érode, be e te temehi pie, pa apulie na e mwomwon, ke e iithi, ke e te pipwopain. Te nime Érode me e tabemieng, kehe icehi ana heme e téneeng, ke caa time e uce temehi aceli me e pwo.

Cuwo a bwo niimihinaado te Érodiade

²¹ Ke mepwo êje Érodiade, ke e hane ace bwopwonnen me e pwo me e mele wo Ioane. Ke te ju cuwo ehi ne kon a tan na lé pipaunuhi a bwo âbee te pa daame Érode. Be e pwo a piwiinaado ubwo wo Érode, ke e tode ati ni gupéno, ke ni caa te coda, me ni apulie na piubwo jélé ne ha amu Galilé. ²² Ke e taa ha a mwa naa ê naî Érodiade, ke e pwolu.

† 6.11 Apostolo 13.51 †† 6.13 Cang 5.14 † 6.14 Mataio 16.14; Maréko 8.28; Luka 3.19–20 †† Élia—Pa péroféta te Padué na e mulie he na 800 ni jo ânebuhe Iésu Kériso. †† 6.18 Lévitique 18.16

Ke lé te junihe pipwodéén wo Érode, me lépwona lé piwiinaado me weeng. Ke e pii te êgi ewa pie: «Go ileéo ko celi nime kon, be é o caa te ne tem.» ²³ Ke e *piapwo ne ten pie: «É o te ne tem ati celi go o ilehi kojaéo, te piwien heme a awieme a mwametau tong.»

Ne tong a puni Ioane!

²⁴ Ke e wie wo êgi toomwo, ke e pii te nyaa ten pie: «He ace de celi me é ilehi koja pa daame?»

Ke e hegi ne ten pie: «Go ilehi kojaeng a puni Ioane pa apipuu apulie.»

²⁵ Ke e te pwome téte wo êgi toomwo, ke e â too pa daame Érode, ke e pii ten pie: «Nimung me go ne tong a puni Ioane ne ha ace tam.»

²⁶ Ke te junihe piwahin Érode. Kehe icehi ana pwocoon den me e tapihi, be e caa piapwo ne ânebuhe ni béén na e caa todelé. ²⁷ Ke e te pwome pii te pa céiu coda pie: «Go ân, ke go pébé céiiéo a puni Ioane.» Ke e engen wo pali coda, ke e â ha ali karépu, ke e â tahagéi a hene Ioane. ²⁸ Ke e pébé ali punin ne ha a tam, ke e ne te êgi ewa toomwo. Ke e pé wo êgi, ke e â ne te nyaa ten. ²⁹ Ke me lé téne anaa wo lépwo acémun de Ioane, ke lé â pé a één, ke lé â ne ha a iithi.

Lé wiinaado ne ni apulie na 5000 jélé

Mataio 14.13–21; Luka 9.10–17; Ioane 6.1–15

³⁰ ††Lé mwojuia mwo wo lépwo apostolo, ke lé pipitilé ne ko Iésu. Ke lé uti ten ati ni naado na lé pwo, ke ni naado na lé patemehi te ni apulie ati.

³¹ Ke e pii telé pie: «Geé âbé céing ne ha a céiu duaan na tice apulie hen, beme geé o mwo mwaale.» Be tice benaamwon me lé wiinaado, be hiwon ni apulie na lé âbé céiilé. ³² Ke lé te piân cehi pwo a céiu ong, ne ha a céiu duaan na tice apulie hen.

³³ Kehe icehi ana te junihe hiwon ni apulie na lé alilé he lé engen, ke lé te temehilé. Ke lé tétebé mu ati he ni mwopopwaalé, ke lé tuiebé ânebuhe Iésu me lépwo acémun den [ne ko a céiu goon].

³⁴ †††Ke me e ole mu pwo ali ong wo Iésu, ke e ali li apulie he te nihe hiwon jélé. Ke e te nihe pipwoééhelé, be lé pwohewii ni muto na tice awéilé. Ke e picaa telé ni naado na hiwon.

³⁵ †Ke e caa pwo me e nuule a téale, ke lé âbé céieng wo lépwo acémun den, ke lé pii ten pie: «O caa babwén, kehe apiticie éni. ³⁶ Go ne ngemwo ni apulie ce, nge he ni mwopopwaalé me ni pwomwo na e mwonu, beme lé pwocuhi celi me lé wii.»

³⁷ Kehe icehi ana e hegi ne telé wo Iésu pie: «Ûhu! Geé ne ce wiinaado telé!»

Ke lé tahimwoeng pie: «Kona geme â pwocuhi pwolooa me de ati ni apulie? Nihe ubwo a cuhin ††!»

††† 6.30 Luka 10.17 ††† 6.34 Nombres 27.17; Mataio 9.36 † 6.35 Maréko 8.1–9 †† Nihe ubwo a cuhin—Grek: Kona wâé

³⁸ Ke e pii telé pie: «Be he niile ce pwoloa celi e pelewé? Geé â alihi.»

Ke lé pitahimwolé, ke lé pii ten pie: «Nim ni pwoloa, ke alo ni ikua.»

³⁹ Ke e pii telé pie: «Geé pii te ni apulie ce pie: “Geé pwo ce pubuwé, ke geé tebwo he ni meté.”»

⁴⁰ Ke lé pwo ni pubuulé me pi 100, ke pi 50, ke lé tebwo. ⁴¹ Ke e pé li pwoloa li nim me lupwoli ikua wo Iésu, ke e alehede da he miiden, ke e pwo-olé te Padué. Ke e ebii li pwoloa, ke e ne te lépwo acémun den, ke lé patihi ne ko ni apulie. Ke lé wonaa mwo ko lupwoli ikua. ⁴² Ke lé tai wiinaado ati, ke caa pwoluu jélé. ⁴³ Ke lé taineibuhi mwo ni nehi mepwoloa, me ni ne-ikua, ke lé pwo na 12 ni élele kon. ⁴⁴ Ke a jéhi ni apulie aiu na lé wiinaado, ke pwo 5000 jélé.

E engen pwo bwotabe wo Iésu

Mataio 14.22–33; Ioane 6.16–21

⁴⁵ Te ju é alecehen, ke e pii wo Iésu te lépwo acémun den pie: «Geé taa pwo ong, ke geé mi gaale ângedé ko a céiu goon, ha a mwopopwaaalé Betsaïda. Be é mwo tee mu, beme é pamwojuiéhi mwo ni apulie.» ⁴⁶ †Ke me e caa pinelé ati, ke e taa pwo juwole, beme e pwoi-itihi.

⁴⁷ É he caa bwén, ke caa élé ha awieme jié wo lépwo acémun den, pwo ong. Ke e te pimu cehi âdaalé ha a meiuhi wo Iésu. ⁴⁸ Caa é pwopwometan, ke e alihi pie pwocoon a bwo tahi kaale telé, be âbédélé na a dan. Ke e âbé céiilé pwo bwotabe. Be nimen me e wédenilé.

⁴⁹⁻⁵⁰ ††Ke me lé alieng he e ko engen pwo bwotabe, ke te junihe mwotilé, ke lé haa da ko miiden, be lé niimihi pie a duéé! Kehe icehi ana e te pwome pacihelé wo Iésu, ke e pii telé pie: «Geé nemwo pwo me mwotikewé. Be woé! Geé mwou!»

⁵¹ †Ke e taa céiilé ne pwo ali ong. Ke e cuwo ali dan. Ke te junihe emegéi nalé. ⁵² Be time lé uce temehi ni pipwojunuun na e tuie he li e pipwopatihi ni pwoloa wo Iésu. Be capuhi ni pwonimelé.

E pwo me wâé ni cunu ne Génésaret

Mataio 14.34–36

⁵³ Lé caa nebwné ko tahagéi jié wo Iésu me lépwo acémun den, ke lé tuie gaale ha a duaan na e mwonuhi Génésaret, ke lé taa ali ong. ⁵⁴ Ke me lé ele ole, ke lé alihi temehi Iésu ne ni apulie lang. ⁵⁵ Ke lé tête nge ati ha amu telé, ke lé pébé céiieng ni cunu ne pwo ni apule telé ati ne he na lé tène pie e lang.

⁵⁶ É ati he na e â lang wo Iésu, he ni mwopopwaaalé, ke ni pwomwo ubwo, me ni amu, ke lé pébé ni cunu ne he ni apimu te ni apulie ati. Ke lé piwâgo ko Iésu, ke

heme geme pwocuhi ce pwoloa ko 200 mwani pwojo? 200 mwani pwojo, ke pwohewii a cuhi pa apulie na céiu nang he na 8 ni wole.
† 6.46 Luka 5.16 †† 6.49 Luka 24.37 † 6.51 Maréko 4.39

lé pii ten pie: «Te jan heme lé te ju ti cehi ko a baaé epwénem?» Ke caa te wâé ati nina lé ti kon.

A bwo picihe ko ni bwomu

Mataio 15.1–9

7 Lé âbé wo lépwo *Farasaio, me ni béé *dotéén ko patén na lé âbé mu *Iérusaléma. Ke lé pitapitilé ati ne ko Iésu. ² ††Ke lé alihi pie, lé â wiinaado wo lépwo béé acémun den, kehe time lé uce puu †† ni ilé pwohewii a bwopwonen de ni ukéiu telé.

³⁻⁴ †††Be wo lépwo *Juif, ke lé te engen ne ko a huô ha a bwomu te ni ukéiu telé: Lé mi puu ehi ni ilé, ânebuhe ni bwo wiinaado telé. Ke lé wonaa mwo, he lé mwojuia mwobé mu he ni apimu te ni apulie ati. Ke hiwon ni béé bwomu na lé âcehin mwo, pwohewii a bwo puu mwoûdu, me mwotabe, me ila. Ke mepwo é ne ko lépwo Farasaio, ke lé mwo te junihe pipaunuhi.

⁵ É mu ko anaa, na lé pii te Iésu, woélé me ni dotéén ko patén pie: «Wo lépwo acémun dem, ke time lé uce mulie pwohewii a bwomu te ni watihenye. Be lé wiinaado ko ni ilé na tooli. Kehe é mu ko ade, go pajé?»

⁶ †††Ke e hegi ne telé wo Iésu pie: «Geé te ju gahe pwo! E te juuju wo péroféta Isaia, na e pwaadeni a pwooti te Padué ne kowé. Be e tii pie:

Lé te ju pipaunuéo ko pwolé wo lépwo apulie ce,

kehe te e ité kojaéo ni pwonimelé.

⁷ Lé pwoiitihi me *pwoâpwailo tong kehe te piticenaado ne kon.

Ana lé pacémuni ni apulie kon,

ke te ni patén delé ni apulie,

kehe time uce a pwooti tong.» Ésaïe 29.13

⁸ Ke e pii mwo telé wo Iésu pie: «Geé caa patupwo ni pihuô te Padué. Ke geé caa tai engen ne ko ni pihuô tewé lépwo apulie. ⁹ Geé tahi taabwon ni pihuô ten, ke geé bwo te wéihi nina te ni pihuô me ni bwomu tewé! ¹⁰ †Be e caa pii wo *Moosé pie: *Go paciiti lu nyaa me caa tem.*

Exode 20.12

E pii mwo pie: *Geé taunu pa apulie na e pipii me ta lu nyaa me caa ten.*

Exode 21.17

¹¹ «Kehe icehi ana wogewé, ke geé te pii te ni apulie pie, te wâé heme lé pii te lu nyaa me caa telé pie: “Nimung me é ne teu ace céiu naado me bépiani teu, kehe icehi ana time uce jan, be é caa pwo me âpipati iitihi te Padué.”

¹² «Ke wonaa ana geé picaa telé, me lé tapi lu nyaa me caa telé! ¹³ Ke geé caaite ne he pule st ni pwooti te

†† 7.2 Luka 11.38 †† Puu—Lé wonaa, beme wâé jélé ne he pwa-hamii Padué, âcehi a pwoiitihi telé. Omehi Pwoiitihi ko a bwo wâé genye ne pele Padué ne ha a Niinaado (Vocabulaire) ha anebwén ko a tii. ††† 7.4 Mataio 23.25 ††† 7.6 Ésaïe 29.13 § 7.10 Exode 20.12,

Padué ko ni bwomu tewé! Ke hiwon mwo ni naado na wonaa na geé pwo mwo.»

Ana e pwo me ta pa apulie

Mataio 15.10–20

¹⁴ É alecehen, ke e tode mwo ni apulie wo Iésu, ke e pii telé pie: «Lépwoli! Geé tabemié. Ke geé temehi ehi ana me é pii tewé: ¹⁵ †Time uce ana e taa pwo pa apulie ana e pwo me ta nang ne he pwahamii Padué. Kehe te icehi ana e wie mu ha a pwonimen ana e pwo me ta nang. { ¹⁶ Wo paceli pwo ce pwojéenen me e téne, ke wâé heme e téne!}»

¹⁷ É mulang, ke e engen koja ni apulie wo Iésu, ke e âmwo pelen. Ke lé tahimwoeng wo lépwo acémun den ko a ocine na e mwo ko ju nebwén ko pii. ¹⁸ Ke e hegi ne telé pie: «Kona wogewé mwo, ke time uce téle jan me geé temehi anaa? Geé téne, te tice ace céiu naado celi e taabé mu pwomwo celi e pwo me ta pa apulie ne he pwahamii Padué. ¹⁹ Be ni naado mu pwomwo, ke time lé uce taa ha a pwonimen. Be lé te ju taa ha a nan cehi, ke é alecehen, ke lé te wie mwo mu ha a één.»

E habwii nelang wo Iésu pie, e caa ne me jan me nye wii ati mu ko ni wiinaado.

²⁰⁻²¹ Ke e pii telé mwo pie: «Nina lé wie mu he pwonime ni apulie, ke te weengaa kuti, nina e ne me lé pwo ana ta:

Lé pipule me ni apulie hauli;

Lé bune;

Lé taunuhi apulie;

²² Lé pibune;

Lé pwo me tai pwo delé ati ko ni naado;

Lé pwotahinaado ne ko ni béén;

Lé pigeti ni béén;

Lé mulie hauli;

Lé pitaaba;

Lé cihe me ta ne ko ni béén;

Lé pipaunulé.

«Ke te tice aceli lé temehi ne ko nina wâé. ²³ Ati ni ta naa, ke nina lé wie mu he pwonime pa apulie. Ke te weengaa kuti nina e pwo me ta ne kon ne he pwahamii Padué.»

A céihi te ê toomwo Kanana

Mataio 15.21–28

²⁴ É alecehen, ke e engen mu ha a duaan naa wo Iésu. Ke e â ha a duaan na e mwonuhi lupwo pwomwo ubwo Tir me Sidon. É nelang, ke e mu ha a céiu pwomwo, ke time uce nimen me lé temehi ne ni apulie pie e lang. Kehe icehi ana e piengen a jepule. ²⁵⁻²⁶ É mu ko anaa, na e piténe a pwooti kon wo ê céiu toomwo mu ha amu naa. Kehe time uce ê Juif, be ê piebehi lépwo

^{21.17}; Deutéronome 5.16 †† Caaite ne he pule—Grek: Pwo me tieden. † 7.15 Apostolo 10.14–15

Fénisi ha a province Siri. Ke e âbé céii Iésu, ke e tidihi jilin he pwahamiin, ke e pii ten pie: «Padaame, é ileko pie go pawiehi a duéé na e ko ê naîng.»

²⁷ Ke e hegi ne ten wo Iésu pie: «Nye ne me lé wiinaado ânebun ne ni cuwo nahi ewa. Be time uce wâé heme nye pé ni wiinaado telé, me nye tahi taabwon ne te ni nahi wotaahen ††.»

²⁸ Ke e pii ten wo êje pie: «Go te juuju, go Padaame. Kehe icehi ana ni nahi wotaahen mwo, ke lé te eni ni mewiinaado na lé patupwohi ne ni cuwo nahi ewa mu pwo taap.»

²⁹ Ke e pii ten wo Iésu pie: «É mu ko a bwo hegi nen dem, ke jan me go mwojuia ngemwo pelem. Be e caa wie ali duéé mu ko ê naîm.»

³⁰ Ke e mwojuia ngemwo ha a pomwa ten wo êje. Ke e ali êgi naîn, he e teko pule pwo ali apule. Be e caa wie ali duéé mu kon!

E pwo me wâé pa huuhu ke bwéjé

³¹ É mulang, ke e engen mu ha a piduaan ne Tir wo Iésu, beme e mwojuia ngemwo ticepwon ne Galilé. Ke e pitahagéi ngen ni duaan Sidon me *Dix Villes*‡.

³² Ke lé pébé céiieng pa apulie na huuhu nang ke bwéjé nang. Ke lé wâgo ko Iésu, ke lé ileeng pie: «Go ne lupwo im huîin, beme wâé nang!»

³³ Ke e pééeng wo Iésu, ke lu â ité koja ni apulie. Ke e cine gaale ni mwodéin he ni pwojééne paje. Ke e pwo me titi ni mwodéin ko ni tabepwon, ke e ti ko a upehen. ³⁴ Ke e alehede da he miiden, ke e pwo me taa nene kon, ke e pii te pali apulie pie: «*Efata!*» A bwopiinen pie: «Go tehiko!»

³⁵ Ke te tehi kuti lupwo pwojéénen. Ke te wâé kuti ali upehen, ke caa jan me e cihe ehi.

³⁶ ††Ke e pii wo Iésu te lépwona lé alihi anaa pie: «Geé nemwo pwojepule kon!»

Kehe icehi ana me e ko pii anaa telé, ke lé bwo junihe pwojepule kuti kon, ne te ni apulie ati. ³⁷ ††Be lé te junihe téle, ke lé tai pii pie: «Geé alihi! Be te junihe wâé kuti ni naado na e pwo! Be e pwo me lé ténekenye ne nina bwéjé jélé; ke e pwo me lé cihe ne nina huuhu jélé.»

Lé wiinaado ne ni apulie na 4000 jélé

Mataio 15.32–39

8 É ha a benaamwon naa, ke lé pitapitilé ne pele Iésu ni apulie na hiwon jélé. Ke tice wiinaado telé. Ke e tode ni acémun den wo Iésu, ke e pii telé pie: ² ††«É te junihe pipwoééhe ni apulie ce, be caa cié ni tan denye me woélé, ke tice wiinaado telé. ³ Ke hemepie é pamwojuiéle, ke o tice nihelé nge he pwaaden, be hiwon lépwona lé âbé mu ité.»

†† Ni nahi wotaahen—Ana lé pii wo lépwo Juif ko lépwo béén. Omehi note ‡ *Dix Villes—ai Décapole*. †† 7.36 Maréko 1.43–45 †† 7.37 Ésaie 35.5 ††† 8.2 Maréko 6.34–44

⁴ Ke lé pii ten wo lépwo acémun den pie: «Genye o woté ko ace bwopwonen me lé wiinaado, ne éni ha a piticie?»

⁵ Ke e tahimwolé pie: «Kona niile ce pwoloa celi e pelewé?»

Ke lé pii ten pie: «7 ni pwoloa.»

⁶ Ke e pii te ni apulie pie me lé tebwo. Ke e pé li pwoloa li 7, ke e pwo-olé te Padué. Ke e ebii, ke e ne te lépwo acémun den, ke lé patihi ne ko ni apulie. ⁷ Ke te pwo mwo ni cuwo ikua telé. Ke e pwo-olé te Padué, ke e pii te lépwo acémun den pie me lé patihi mwo. ⁸ Ke lé wiinaado dieli caa pwoluu jélé. Ke é alecehen, ke lé tai ni nehi wiinaado wo lépwo acémun den, ke e pwo 7 ni élele na oba. ⁹ É nge ha a 4000 ni apulie na lé wiinaado.

Ke e pii telé wo Iésu pie, me lé mwojuia ngemwo pelelé. ¹⁰ Ke e taa pwo ong, weeng me lépwo acémun den. Ke lé â ha a céiu duaan na pii kon pie Dalmanouta.

Lé ilehi ace inenaado ni Farasaio

Mataio 16.1–12

¹¹ É ha a céiu tan, ke lé tehenebé pele Iésu wo lépwo béé *Farasaio, be nimelé me lé pipwohuô ten. Ke lé pitaacunaado me weeng, ke lé pii ten pie: «Go habwii teme ace *pipwojunuun de Padué celi e kom.» [Be nimelé me lé habwii pie time e uce penem ko a junuu Padué.]

¹² †Ke pitaa nenehe Iésu, ke e pii pie: «É mu ko ade na geé tee cuwo ko ilehi ce pipwojunuun, wogewé ni apulie jena? É pii tewé a juuju pie: O te tice ace céiu pipwojunuun celi geé o mwo alihi.»

¹³ Ke e jéin ne kolé, ke e engen kojálé. Ke e taa pwo ong, ke lé gaale ko a céiu goon, [weeng me lépwo acémun den].

A 'nyaa te pwoloa' te lépwo Farasaio

¹⁴ [Lé tuie gaale ko a céiu goon. Ke lé alihi] wo lépwo acémun den pie, lé pineuhi me lé pé ce pwoloa. Be te ju céiu a nehi pwoloa telé. ¹⁵ ††Ke e pii telé wo Iésu pie: «Geé pipwocile a 'nyaa te pwoloa' te lépwo Farasaio, me a 'nyaa te pwoloa' te *Érode!»

¹⁶ Ke lé pipii telé wo lépwo acémun den pie: «Wieli é mu ko ana time genye uce pé pwoloa?»

¹⁷ †E te téne wo Iésu, ke e pii telé pie: «É mu ko ade na geé tee cuwo ko cihe ko a pwoloa? Be he time geé uce téele temehi? Woté, mwo tee ko capuhi ni pwonimewé? ¹⁸ Pwo ni naamiiwé, ke he time geé uce alihi? Pwo ni pwojénewé, ke he time geé uce téne? ¹⁹ ††Kona time geé uce niimihi ali tan li é ebii li nim pwoloa ne te

† 8.12 Mataio 12.39; Luka 11.29 †† 8.15 Luka 12.1 ‡ 8.17 Maréko 6.52 †† 8.19 Maréko 6.41–44

li 5000 apulie? Ke niile ni élele na geé paobaanihi ko ni nehi pwoloa?»

Ke lé hegi ne ten pie: «12 ni élele.»

²⁰ «Ai, li 7 pwoloa ne te li 4000 apulie, ke a tan naa, ke niile ni élele li geé tai mwo?»

Lé hegi ne ten pie: «7 ni élele.»

²¹ Ke e pii telé pie: «Kona time geé uce téele temehi kuti?!»

E pwo me e niê mwo pana bwi nang

²² Lé tuie nge ha a mwopopwaalé Betsaïda wo Iésu me lépwo acémun den. Ke wo lépwo apulie lang, ke lé pébé pana bwi nang. Ke lé ile Iésu me e pétaa kon.

²³ Ke e pétaa ko a in wo Iésu, ke e pééeng wie mu ha a mwopopwaalé. Ke e ne a tabepwon ko ni naamii pali apulie. Ke e ne ni in ne huûin, ke e tahimwoeng pie: «Go ko alihi ce de?»

²⁴ Ke e tehi lupwo naamiin wo pali bwi, ke e pii pie: «É ali ni apulie, kehe icehi ana me é alilé, ke lé pwohewii ni acuwo na lé engen.»

²⁵ Ke e ne mwo lupwo in wo Iésu ne ko ni naamiin, ke e bwo niê ehi wo paje. Ke caa wâé nang, ke e caa alihi pwaatihi ni naado.

²⁶ Ke e pii ten wo Iésu pie: «Go mwojuia ne mwo pelem, kehe go nemwo taamwo ha a mwopopwaalé.»

Wo Iésu ke pa Mesia

Mataio 16.13–28; Luka 9.18–27

²⁷ Lé engen wo Iésu me lépwo acémun den, nge he ni amu na e mwonuhi a pwomwo ubwo Césaré-Filip. Ke é he lé mwo ko â he pwaaden, ke e tahimwolé pie: «Kona lé pii pie woté ne kong ne ni apulie? Lé pii pie woéo, ke woo?»

²⁸ ††Ke lé hegi ne ten pie: «Lé pii ne ni béén pie, wogo ke wo *Ioane pa apipuu apulie. Ke lé pii ne ni béén pie, wo péroféta *Élia. Ke lé pii mwo wo lépwo béén pie, pa céiu béé ni péroféta ânebun.»

²⁹ †††Ke e tahimwolé wo Iésu pie: «Ke kona wogewé ke?»

Ke e hegi ne ten wo Pétéru pie: «Wogo ke pa *Mesia ††† [na go âbé mu pele Padué]!»

³⁰ Ke e te paciitih kolé kuti me lé nemwo patemehi.

E bo mele ke mulie cemwo

³¹ É alecehen, ke e pii beetih te ni acémun den wo Iésu pie: «E bo tuie a benaamwon na é bo te nihe mu he ni picani hen, woéo pa Nahi Apulie. Be wo lépwo apihuô, me lépwo caa te lépwo *apwoâpwailo, me ni *dotéén ko patén, ke o te muhi telé kong. Ke lé bo

†† 8.28 Maréko 6.15 ††† 8.29 Maréko 9.9; Ioane 6.68–69
††† Mesia—Grek: Kériso. Be Mesia he pwo ébéru, ke Kériso he pwo grek. Omehi Ioane 1.41.

pwo me é mele. Kehe icehi ana é ha a béciéhe ni tan alecehen, ke é o bo mulie cemwo.»

³² E pii pwaatihi ne telé a pwooti naa. Kehe icehi ana e todeeng nge ha a céiu duaan wo Pétéru, ke e tabuhi pééleeng.

³³ Ke e biteeng wo Iésu, ke e ome lépwo acémun den. Ke e pééle Pétéru, ke e pii ten pie: «*Caatana, go engen mu he pwahamiing! Be time go uce niimihi pwohewii Padué, kehe go niimihi pwohewii ni apulie!»

A bwo âcéi Iésu

³⁴ †É nelang, ke e tode ni apulie me lépwo acémun den wo Iésu, ke e pii telé pie: «Wo paceli nimen me e âbé céing [beme pa acémun dong] ke me e nemwo bo uce piniimieng mwo. Kehe wâé heme e canihi a *kuricé ten, ke me e âbé céing. ³⁵ Be wo pana nimen me celuimi a mulihen, ke e o patieden. Kehe wo pana e patieden a mulihen mu kong me a Pwooti Wâé, ke o celuimieng. ³⁶ He ade ne te pa apulie, hemepie e hegi ati ni naamuu a bwohemwo, ke me e patieden a mulihen? ³⁷ Kona ade aceli o jan me e ne, beme e pwocuhi mwo a mulihen?»

³⁸ ††«Be wo lépwo apulie jena, ke caa te lépwo apwo ne nina ta, ke time uce mwomwon jélé ne pele Padué. Ke wo lépwo béén, ke tanim jélé kong me a pwooti tong, ne ânebuhe ni apulie. Ke heme wonaa, ke woéo pa Nahi Apulie, ke o bo tanim jo kolé, hemepie geme bo âbé me ni *âcélo iitihii. É ha a tan naa, ke e bo habwii a bwo ubwo na a wâé ten wo pa Caa tong.»

⁹ †E pii telé mwo wo Iésu pie: «É pii tewé a juuju pie: E bo ne éni a Mwametau ten wo Padué, ati ne ha a junuun. Ke pwo lépwo béén na élé éni jena, na lé o mwo te alihi anaa, ânebuhe ce bwo mele telé.»

Habwii a bwo ubwo na a wâé ten

Mataio 17.1–13; Luka 9.28–36

² †É alecehe ni tan na 6, ke e pé Pétéru me Cang me Ioane wo Iésu, ke lé taa pwo a juwole na nihe ubwo, ke lé te pimucéhi lang. Ke pitaatéhi a bwo ali Iésu ne he pwahamiilé. ³ Ke â pwojo pwomelaa ni epwénen. Ke te tice pace apulie, éni pwo bwohemwo, celi jan ne kon, me pwo ace epwén celi pwojo pwohewii anaa. ⁴ Ke lé ali mwo *Élia me *Moosé [lupwo alo péroféta ânebun na piubwo julu] he lé ko picuhe me weeng.

⁵⁶ Ke te nihe mwoti Pétéru me lupwo béén. Ke e pii te Iésu pie: «Pa apipune, te nihe wâé heme genye ko mu éni. Wâé heme geme pacuuli ce mwa mwaanu celi cié, beme a dem a céiu, ke me a de Élia a céiu, ke me a de Moosé a céiu.»

E pii anaa, be caa time e uce temehi aceli me e pii, be te junihe mwotieng.

† 8.34 Mataio 10.38–39; Luka 14.27 †† 8.38 Mataio 10.33 ‡ 9.1 Maréko 13.30 †† 9.2–7 Apostolo 3.22; 2 Pétéru 1.17–18

⁷ Ke e te âbé kuti a menii, ke e taluilé. Ke lé téne a pwocihe bé mu ha ali menii, na e pii pie: «Wo paje, ke pa Naïng [na te céiu nang] na te junihe eânimung den. Ke geé piténeeng.»

⁸ Ke lé piniê aujenilé, kehe icehi ana caa te piwoélé cehi me Iésu.

⁹ Ke lé homwobé mu pwo juwole, ke e pii mwouhi telé wo Iésu pie: «Geé nemwo pii te ce béé apulie nina geé alihi, dieli ha ace tan celi é bo mulie cemwo mu ha amele, woéo pa Nahi Apulie.»

¹⁰ Ke lé piténehehi a pwocihe naa. Kehe icehi ana lé pitahimwolé pie: «He a bwopiine ace de, ana e pii pie: “É bo mulie cemwo mu ha amele”?»

Lé tahimwoeng ko Élia

¹¹ Ke é alecehen, ke lé tahimwo Iésu pie: «Lé pii wo lépwo *dotéén ko patén pie: “Wo Élia pana me e mi âbé, ânebuhe [pa *Mesia].” Ke he wonaa be woté?»

¹² ††Ke e hegi ne telé wo Iésu pie: «Éa kuti, e mi âbé wo Élia, beme e pine ehi ni naado he ni amu nen. Ke lé caa tii mwo ne kong ne he ni tii iitihii pie, e bo mu he ni picani wo pa Nahi Apulie, ke lé bo téétieng. Wonaa mu ko ace de? ¹³ ††É pii tewé pie: E caa te âbé wo Élia ††, ke lé caa te pwo ten nina nimelé kon ne ni apulie. Be caa te tii ne he ni tii iitihii.»

E pwo me wâé pa céiu ewa @ na pwo duéé kon

Mataio 17.14–21; Luka 9.37–43

¹⁴ [Me lé homwobé mu pwo juwole] wo Iésu me lépwo acémun den na cié jélé, ke lé â too lépwo béé acémun béélé. Ke lé ali ni apulie na te junihe hiwon jélé, na lé mu aujenilé. Be lé picuhe me lépwo dotéén ko patén. ¹⁵ Ke me lé ali Iésu ne ni apulie, ke lé te junihe téele. Ke lé téte nge céiieng, beme lé pwobwocu ten. ¹⁶ Ke e tahimwo lépwo acémun den pie: «Kona ace de celi geé ko pipii me woélé?»

¹⁷ Ke e hegi ne ten wo pa céiu mu ko ni apulie naa, ke e pii pie: «Pa apipune, é pwo me é pébé céiiko pa naïng. Be pwo duéé kon, ke e mu pwo me time e cihe.

¹⁸ Pwo ni béé benaamwon na e mu pééeng, ke e tahieng ole pwo bwohemwo. Ke mu téte ni tabepwon, ke e mu piwii pecuwo, ke mu te ju mwou a één. Ke é ile lépwo acémun dem pie, me lé peni ali duéé, kehe icehi ana time uce jan me lé pwo.»

Te tai jan ati ne ko pana e céihi!

¹⁹ Ke e pii telé wo Iésu pie: «[É te junihe pipwoéhewé] wogewé ni apulie jena! Mwo te time geé uce téele céihi, be wogewé ni apwo mwou pun! O é

†† 9.12 Psaume 22.2–19; Ésaie 53.3; Malachie 3.23 ††† 9.13 Mataio 11.14 †††† E caa te âbé wo Élia—Wo Iésu, ke e pii Ioane pa apipuu apulip, be a penem den, ke pwohewii a penem de péroféta Élia. Omehi Luka 1.17.

dieli éniile celi é o mwo tee mu pelewé, ke me é mwo tee picani ne kowé? Geé pébé éni pa cuwo ewa naa!»

²⁰ Ke lé pééeng bé. Ke me e ali Iésu na ali duéé, ke e te pwo me éjén ati kuti pali cuwo ewa. Ke e tupwo, ke e ngaulieng nge pwo bwohemwo. Ke téte ni tabepwon.

²¹ Ke wo Iésu, ke e tahimwo pali caa te pali cuwo ewa pie: «Tabuhi éniile celi wonaa nang?»

Ke e hegi ne ten pie: «Te tabuhi ha a bwo mwo te wahin nang. ²² Ke a duéé naa, ke pwo ni benaamwon na e mu tahieng da pwo miû, ke é he tabe, beme e mele. Kehe go pipwoééheme me picani teme, hemepie te jan me go pwo.»

²³ †Ke e hegi ne ten wo Iésu pie: «É mu ko ade na go pii tong pie: “É hemepie te jan me go pwo”? Te tai jan ati ne ko pana e céihi!»

²⁴ Ke e te toii kuti wo pali pie: «Uhuu! É céihi! Kehe icehi ana go picani tong, be time uce junihe ubwo a céihi tong!»

²⁵ Ke e alihi wo Iésu pie, hiwon ni apulie na lé teko âbé ne kolu. Ke e te epin kuti ko peni ali duéé, ke e pii ten pie: «Wogo pa duéé na go pwo me time e cihe, ke me time e ténekenye, ke é pii tem pie: Go wie mu ko paje! Ke me time go bo uce taamwo kon!»

²⁶ ††Ke e wiikau na ali duéé, ke e te pwo me éjén kuti pali cuwo ewa, ke e te wie kuti. Kehe icehi ana mepwo wo pali cuwo ewa, ke pwohewiin heme e caa mele. Ke hiwon ni apulie na lé pii pie e caa mele. ²⁷ Kehe icehi ana e pétaa ole wo Iésu, ke e pwiieng.

²⁸ É alecehen, ke e mwojuia ngemwo pwomwo wo Iésu. Ke me lé te pimu cehi me lépwo acémun den, ke lé tahimwoeng pie: «É ko ade na time uce jan me geme pwo me e wie ali duéé?»

²⁹ Ke e hegi ne telé pie: «Te é ko a pwopwoiitih te Padué cehi na o jan me nye pawie a bwo pwo duéé naa.»

E patemehi mwo a bwo mele ten

Mataio 17.22—18.9; Luka 9.44—50

³⁰ †Lé wie mu ha a duaan naa wo Iésu me lépwo acémun den, ke lé pitahagéi epin a amu Galilé. Be time uce nime Iésu me lé temehi ne ni apulie pie e mu lang.

³¹ ††Be e ko pacémunihi ne te lépwo acémun den pie: «O bo icuéo te ni apulie, woéo pa Nahi Apulie. Ke lé o imwiéo, ke lé o bo pwo me é mele; kehe é ha a bécíéhe ni tan alecehen, ke é bo mulie cemwo mu ha amele.»

³² ††Kehe icehi ana time lé uce temehi ana e pii. Ke mwotilé me lé tahimwoeng kon.

Woo paceli piubwo nang?

³³ Lé tuie nge ha a mwopopwaalé Kapernaüm. Ke me lé taa ha a mwa, ke e tahimwolé wo Iésu pie: «Kona ace de celi geé ko pipii he li genye ko âbé?»

³⁴ Kehe icehi ana time lé uce hegi ne ten. Be he lé ko âbé he pwaaden, ke lé pitahimwolé pie: «Kona woo paceli piubwo nang ne ha awiemenye?»

³⁵ ††Ke e tebwo wo Iésu. Ke e pwo me lé aujenieng ††, ke e pii telé pie: «É hemepie pwo pace céiu apulie celi nimen me pa bécíuhen, ke wâé heme pa bénebwenen, ke me e pwo me piwahin nang, ke me e penem me de ati ni apulie!»

³⁶ Ke e pé pa cuwo nahi ewa, ke e neeng ha awiemelé, ke e mwomwaueng, ke e pii telé pie: ³⁷ †«Wo pana e hegi ne he niing, pace cuwo nahi ewa pwohewii paje, ke e hegiéo. Ke wo pana e hegiéo, ke time e uce hegiéo cehi, kehe e hegi mwo pana e neéo bé.»

Pana time e uce âdekenye

³⁸ Ke e pii wo Ioane te Iésu pie: «Pa apipune, geme ali pa céiu apulie na e peni ni duéé ne he niim. Ke geme pii ten pie me e nemwo pwo. Be time uce pa béénye.»

³⁹ Ke e hegi ne telé pie: «Geé nemwo tanyuueng! Be wo pana e pwo ni *pipwojunuun ne he niing, ke o pwocoon me e uce pii celi ta ne kong. ⁴⁰ ††Be wo pana time e uce âbédekenye, ke pa béénye. ⁴¹ †††Ke é pii tewé a juuju pie: Wo paceli e ne tewé ace mwoûdu ko ju tabe, be wogewé lépwo béé *Kériso, ke wo panaa, ke e bo hegi mwo ace cuhin.»

Geé pipwocile!

⁴² «Go nemwo pwotahi a céihi †† te pa apulie na e céihi ne kong pwohewii a cuwo nahi ewa, be o te junihe ubwo a kuhinaado tem. Ke wâé heme cie ace pilehe péi ne ko a henem, ke o tahiko ole he jíé!

⁴³ †††«Mepie watihen a im me go pwo ana ta, ke go tahagéi ††. Be wâé heme go taa ha *a ju mulip pele Padué, hemepie te céiu a im. Kehe te junihe pwoééheme heme go te cile lupwo im, ke me tahiko ne ha a miû na te tice paceli jan me e taunuhi! { ⁴⁴ É ha a duaan naa, ke time lé uce mele ne ni ûne kolé, ke o tee éle a miû, ke o te tice anebwén kon.}

⁴⁵ «Ke mepie watihen a am me go pwo ana ta, ke go tahagéi. Be wâé heme go taa ha a ju mulip pele Padué, hemepie te céiu a am. Kehe te junihe

††† 9.35 Mataio 20.25—27; Maréko 10.43—44; Luka 22.24 ††† E pwo me lé aujenieng—Grek: E tode lépwo 12 (apostolo). † 9.37 Mataio 10.40 †† 9.40 Mataio 12.30; Luka 11.23 ††† 9.41 Mataio 10.42 †† Pwotahi a céihi—ai Pwo me patieden a céihi—ai Ne me e pwo ana ta. Grek: Pwo me e tupwo. ††† 9.43 Mataio 5.30 †† E pwo-ocine wo Iésu, beme e pii pie, wâé heme nye necu ni naado na lé ne me nye pwo ana ta.

† 9.23 Mataio 21.21; Maréko 11.23 †† 9.26 Maréko 1.26 † 9.30 Ioane 7.1 †† 9.31 Maréko 8.31, 10.32—34 †† 9.32 Luka 9.45

pwoéhem heme go cile lupwo am, ke me tahiko ne ha a miû! { ⁴⁶É ha a duaan naa, ke time lé uce mele ne ni ûnele kolé, ke o tee éle a miû, ke o te tice anebwén kon.}

⁴⁷†«Ke mepie watihen a naamiim me go pwo ana ta, ke go tuu tahi taabwon. Be wâé heme go taa ha a *Mwametau te Padué, hemepie te céiu a naamiim. Ke he te junihe pwoéhem heme go tee cile lupwo naamiim, ke me tahiko ne ha a miû! ⁴⁸††É ha a duaan naa, ke time lé uce mele ne ni ûnele kolé, ke o tee éle a miû, ke o te tice anebwén kon.

⁴⁹«Muko pétaapwo ni apulie, ke e bo ne telé a miû me a jîé † [beme pétaabwon ni ta pwo telé]. ⁵⁰††A jîé, ke a céiu naado na wâé, kehe mepie e patieden a nemen, ke he genye bo pwo nemenaado ko ace de? Wâé heme e mu kowé a jîé, ke me geé mulie ne ha a wâé me ni bééwé.»

Piaten me a pitahagéi piaten

Mataio 19.1–12; Luka 16.18

10 É mulang, ke e engen mu ha a duaan naa wo Iésu. Ke e pitahagéi a amu *Judé. Ke e gaale ko a céiu goo a éémwa Ioridano. [Ke é ati he ni duaan na e mu â hen] ke lé âbé ne ni apulie, ke lé mu aujenieng. Ke e pacémunilé ko a pwooti, be ana caa te cemang ne kon me e pwo.

²Ke lé âbé céiieng wo lépwo béé *Farasaio. Ke lé pwo me lé pipwohuô ten, ke lé tahimwoeng pie: «Kona te pwo mwomwon de pa apulie ne he ni patén me e cibéé ê mwoden?»

³Ke e uce tahimwolé wo Iésu pie: «Kona e pii pie woté [ne he ni patén den] wo *Moosé?»

⁴††Ke lé hegi ne ten pie: «Time e uce paciitih wo Moosé ko pa apulie me e pamwojuia ê mwoden, ke wâé heme e pwo ace tii me pitahagéi piaten.»

⁵Ke e pii telé wo Iésu pie: «Geé téne, e tii me dewé a patén naa, be te nihe mwoiu ni puniwé! ⁶†††Kehe icehi ana é ha atabuhi kon, he e tabuhi a bwohemwo wo Padué, ke e ne pa aiu me ê toomwo.

Genèse 1.27

⁷†††É mu ko anaa, ke e patupwo lu nyaa me caa ten wo pa aiu, beme lu pimu me ê mwoden.⁸ Ke me wonaa, ke caa céiu julu.

Genèse 2.24

«[É ko anaa, na é pii tewé pie]: Caa time bo uce alo mwo lupwoce apulie, kehe caa te ju céiu julu. ⁹Ke geé

† 9.47 Mataio 5.29 †† 9.48 Ésaie 66.24 † A miû me a jîé—Ne ha a pwoiitih te lépwo Juif, ke lé ne jîé pwo ni apwoâpwayilo na lé cini ne pwo miû (Lévitique 2.13). Be a miû, ke a ocine ko a bwo pétaabwon ne ni ta pwo tenye te Padué. Ke a jîé, ke a ocine ko a bwo pé ne ni penem denye me nye mulie ne ha a mulip na iitih, me a péém (Mataio 3.11). †† 9.50 Mataio 5.13; Luka 14.34 †† 10.4 Deutéronome 24.1–4; Mataio 5.31 ††† 10.6 Genèse 1.27, 5.2 ††† 10.7–8 Genèse 2.24; Éféso 5.31–33

nemwo pineitééhi mwo nina e caa pineibuhi wo Padué.»

¹⁰Ke [lé engen kojaté] wo Iésu me lépwo acémunden, ke me lé mwojuia ngemwo pwomwo, ke lé tahimwoeng mwo ko ali pitahagéi piaten. ¹¹†Ke e pii telé pie: «Mepie e cibéé ê mwoden wo pace apulie, ke me e piaten mwo, ke pa apibune. ¹²Ke hemepie e engen koja pa aiu hen ê toomwo beme e piaten mwo, ke ê apibune.»

E adéi ni cuwo nahi ewa wo Iésu

Mataio 19.13–15; Luka 18.15–17

¹³Lé âbé céii Iésu wo lépwo apulie, ke lé pébé céiieng ni cuwo nahi ewa, beme e ti kolé [ke me adéilé]. Kehe icehi ana lé cihe me ubwo ne kolé wo lépwo acémunden, ke lé pacuwolé.

¹⁴Ke me e alihi anaa wo Iésu, ke time uce wâé ne kon, ke e pii telé pie: «Geé ne ni cuwo nahi ewa me lé âbé céiié. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁵††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁶Ke e te pé kuti li cuwo nahi ewa, ke e haailé, ke e ne ni in huililé, ke e adéilé.

Pa apulie na nihe pwo den

Mataio 19.16–30; Luka 18.18–30

¹⁷É he e mwo ko pwo me e engen wo Iésu, ke e tété tehenebé wo pa céiu apulie. Ke e â tidih jilin he pwa-hamiin, ke e tahimwoeng pie: «Pa apipune, wogo pa apulie na te junihe wâé go kuti. He ade aceli me é pwo, beme é hegi a *mulie dieli mwo ne pele Padué?»

¹⁸Ke e hegi ne ten wo Iésu pie: «Kona é mu ko ade na go pii kong pie, woéo ke pa apulie na wâé jo? Be te tice pace apulie celi wâé nang, kehe te icehi Padué.

¹⁹†††[Ke é ne ko a bwo tahimwohi nen dem] ke go temehi ehi ni patén:

Go nemwo taunuhi apulie;

Go nemwo pibune;

Go nemwo bune;

Go nemwo pii ce pwooti celi ni gele ne ko ce béé apulie[†];

Go nemwo pwo ce huô celi ta ne ko ce béén;

Go paciiti lu nyaa me caa tem.»

Exode 20.12–16

²⁰Ke e hegi ne ten wo pali apulie pie: «Pa apipune, é caa te ténedehi kuti ninaa, ha a bwo mwo wahin jo.»

§ 10.11 Mataio 5.32 † 10.15 Mataio 18.3 †† 10.19 Exode 20.12–17; Deutéronome 5.16–20 †† Go nemwo pii ce pwooti celi ni gele—A bwopiinen pie, go nemwo wonaa ne ha a mwotautinaado.

²¹ Ke e te ju omeeng wo Iésu, be te junihe eänimen den, ke e pii ten pie: «Go téne, te ju céiu cehi a naado na mwo tieden kojako: Go engen, ke go â icuhi ati ni dem, ke go pé ni cuhin, ke go ne te nina tice delé. Be me wonaa, ke o pwo ce dem ne [pele Padué na e jeda] he miiden. Ke nebwén, ke go âbé céing.»

²² Kehe me e téne anaa wo paje, ke te junihe piwahin nang, be te junihe pwo den. Ke e engen.

A bwo taa ha a Mwametau

²³ Ke wo Iésu, ke e ome lépwo acémun den na élé aujениeng, ke e pii telé pie: «Geé téne, wo lépwona te junihe pwo delé, ke te junihe pwocoon ne kolé me lé taa ha a Mwametau te Padué!»

²⁴ Ke lé te junihe téele ko a pwocihe naa, kehe icehi ana e bwo pii telé mwo pie: «Lépwo bééng, uhuu! Te junihe pwocoon ne ko pace apulie me e taa ha a Mwametau te Padué. ²⁵ Kona a *chameau*†, ke o te jan ne kon me e taa ha a pwon ko a diti? Ūhu, pwocoon, kehe é pii tewé pie: Wo pa apulie na pwo den, ke mwo te junihe pwocoon ne kon me e taa ha a Mwametau te Padué.»

²⁶ Ke lé te junihe téele kuti wo lépwo acémun den, ke lé te pipii telé mwo pie: «Ke kona woo paceli jan me e picelumieng?»

²⁷ Ke e omelé wo Iésu, ke e pii telé pie: «Ana time uce jan ne ko pa apulie me e pwo, ke jan ne ko Padué. Be ati ni naado, ke te tai jan ne ko Padué.»

²⁸ Ke e hegi ne ten wo Pétéru pie: «Wogeme, ke geme caa patupwo ati ni naado, beme geme âcéim!»

²⁹ Ke e pii telé wo Iésu pie: «É pii tewé a juuju pie: Wo paceli e patupwo a pomwa ten, me ni âjiénen, me ni toomwo pwaadeniin, me lu nyaa me caa ten, me ni naîn, me apwoamu ten, watihen woéo me a Pwooti Wâé, ³⁰ ke o tabuhi jena, ke e bo hegi ce naado celi piwéden, celi te junihe ubwo ke hiwon. Ke o pwo ne ten ce pwomwo, me ce âjiénen, me ce ewa pwaadeniin, me ce nyaa me caa ten, me ce naîn, me ce apwoamu ten. Kehe e o bo hegi mwo ni picani me ni téé, [wona mu ko ana pa apulie tong]. Kehe é alecehen, ke o pwo den ko a mulie dieli mwo ne pele Padué. ³¹ ††Te junihe hiwon nina lé ânebun jena, na lé o bo alece. Ke hiwon nina lé alece jena, na lé o bo uce ânebun.»

E pii a béociéhe a bwo mele ten

Mataio 20.17–19; Luka 18.31–34

³² †É he lé ko taa *Iéruusaléma, ke e ânebun wo Iésu, ke lé alecehen wo lépwo 12 acémun den, me ni béé apulie. Ke â pinekepé ne telé, ke mwotilé.

Ke e pé itéhi lépwo acémun den wo Iésu, ke e patemehi telé ni naado na e bo tuie ne kon: ³³ «Geé téne,

† *Chameau*—Wota he melé. Éni, ke a bwopiinen pie, a wota na nihe ubwo. †† 10.31 Mataio 20.16; Luka 13.30 ‡ 10.32–34 Maréko 8.31, 9.31

genye o caa taa Iéruusaléma. Ke é nelang he na o neéo, woéo pa Nahi Apulie, te lépwo caa te lépwo *apwoâpwailo, me lépwo *dotéén ko patén. Ke lé bo tautié die ko ace bwo taunuéo, ke lé o neéo te nina te tice céihi telé. ³⁴ Ke lé o pihooniéo wo lépwona, ke lé o cumi ne kong, ke lé o ahiéo ko a bwaliwota, ke lé o pwo me é mele. Kehe icehi ana é ha a béciéhe ni tan alecehen, ke é o mulie cemwo mu ha amele.»

Genye pwo me piwahin genye

Mataio 20.20–28

³⁵ É alecehen, ke lu âbé céii Iésu wo Cang me Ioane, lupwo naî Zébédé, ke lu pii ten pie: «Pa apipune, pwo a céiu naado na me gemu ilehi kojako, be nimemu me go ne temu.»

³⁶ Ke e pii telu pie: «De aceli nimeu kon?»

³⁷ Ke lu hegi ne ten pie: «É hemepie go bo mu ha a Mwametau tem me *a wâé tem, ke go patupwo ne temu, beme mu tebwo he ni piduaam: wo pa céiu ne pwo juim, ke wo pa céiu ne pwo eaamum.»

³⁸ ††Ke e hegi ne telu pie: «Time geu uce temehi ana geu ko ilehi! Kona geu o te ûdu a tabe ko picani na é o ûdu? Kona te jan me geu mulie he ni picani pwohewi-
iéo †?»

³⁹ †††Ke lu hegi ne ten pie: «Éa, o te jan ne komu!»

Ke e pii telu pie: «Éa kuti, geu o ûdu a tabe na é o ûdu, ke geu bo mulie he ni picani pwohewiiéo. ⁴⁰ Kehe time uce woéo na é pihuô pie, woo paceli e o tebwo pwo a ing ne pwo jui, ke é pwo eaamung. Be te wo Padué na e caa te piwâamihi ni atebwo naa, me de ni béén na e caa te pipégalié.»

⁴¹ Me lé téne a pwocihe naa wo lépwo 10 acémun béélu, ke lé okéé ne ko Ioane me Cang.

⁴² †††Ke e todelé bé wo Iésu, ke e pii telé pie: «Geé temehi pie, é ne pele ni béén na time uce ni apulie te Padué §, ke lé caaite ni apulie wo lépwo daame me lépwo apihuô. Ke lé pwo me piubwo jélé. ⁴³ ††Kehe wogewé, ke geé nemwo pwohewiilé! Be wo pana nimen me piubwo nang ne hadeniwé, ke wâé heme e pipwoeabwé tewé. ⁴⁴ Ke wo pana nimen me e ânebun, ke o wâé heme pa céiu *apenem tice ja kon te ni apulie ati. ⁴⁵ Be woéo, pa Nahi Apulie, ke time é uce âbé beme lé pipwoeabwé tong. Kehe é âbé beme é pipwoeabwé te ni apulie, ke me é patupwo a mulihung, beme cuhi a bwo *celuimi ni apulie na hiwon jélé.»

†† 10.38 Maréko 14.36; Luka 12.50 †† Dernière phrase—Grek: Jan me puukeu pwohewiiéo? A ocine ko a bwo picani me a bwo mele te Iésu. Piwien ne ha a niide a tii 39. ††† 10.39 Apostolo 12.2; Pii Beethi 1.9 ††† 10.42 Luka 22.25–26 § É ne pele ni béén... Grek: Ne pwo a bwohemwo ce. †† 10.43 Mataio 23.11; Maréko 9.35

E pwo me e niê pa bwi

Mataio 20.29–34; Luka 18.35–43

⁴⁶ Lé tuei nge ha a mwopopwaalé Iéríko wo Iésu me lépwo acémun den. Ke me lé wie mu ha a mwopopwaalé, ke te nihe hiwon ni apulie na lé âcéilé.

Ke pwo pa bwi na e tebwo ko a jije pwaaden, na a ni in pie Bartimé, pa naî Timé. Wo panaa, ke pa a-ile, be pana te tice den. ⁴⁷ Ke é heme e téne pie e tuei wo Iésu, pa apulie Nazaret, ke e toii da pie: «Iésu, pa *Naî Davita, go pipwoééhung!»

⁴⁸ Hiwon ni apulie na lé pihaaeng, beme e nemwo cihe.

Kehe icehi ana e bwo te junihe cihe da ko miiden kuti, ke e pii pie: «Pa Naî Davita, go pipwoééhung, ke go picani tong!»

⁴⁹ Ke e â cuwo wo Iésu, ke e pii telé pie: «Geé todeeng.»

Ke lé todeeng, ke lé pii ten pie: «Go mwou! Ke go cuwoda, be e todeko!»

⁵⁰ Ke e te pwome tahi taabwon kuti a palito ten, ke e cuwoda, ke e âde Iésu.

⁵¹ Ke e tahimwoeng wo Iésu pie: «Ade aceli nimem me é pwo me dem?»

Ke e hegi ne ten pie: «Pa apipune, me é niê mwo!»

⁵² †Ke e pii ten wo Iésu pie: «Go engen, be caa wâe go mwo mu ko a céhi tem.»

Ke e te niê kuti pwohewiin ânebun. Ke e âcéi Iésu nge he pwaaden.

E taa Iérusaléma wo Iésu

Mataio 21.1–19; Luka 19.28–48; Ioane 12.12–19

11 Lé âmwonuhi *Iérusaléma wo Iésu me lépwo acémun den. Ke lé tuei nge mwonuhi lupwo mwopopwaalé Bétani me Betfagé die pwo a juwole ko ni Olivier.

Ke e mi ne ngen lupwo alo acémun den wo Iésu, ² ke e pii telu pie: «Geu â ha a mwopopwaalé na e ânebuhenye. Ke geu bo tooli nelang a nahi buriko na lé taaeng, na mwo te tice apulie celi lé mu tebwo huîn. Ke geu tuwoeng, ke geu pééeng bé. ³ Ke mepie lé tahimwoekeu pie: “É mu ko ade na geu tuwoeng?”, ke geu hegi ne telé pie: “Nime Padaame kon. Ke e o te neeng bé.”»

⁴ Ke lu ân, ke lu tooli ali nahi buriko ne ko jije pwaaden, na lé taaeng mwonuhi a pomwa ko a céiu mwa. Ke lu tuwoeng.

⁵ Ke wo lépwona lé mu lang, ke lé tahimwolu pie: «He ade ana geu ko pwo? É mu ko ade na geu ko tuwo a nahi buriko naa?»

⁶ Ke lu hegi ne telé ko ali e pii telu wo Iésu, ke lé te nelu. ⁷ Ke lu pébé céii Iésu ali buriko. Ke lé ne ni epwén

† 10.52 Maréko 5.34

huîn wo lépwo acémun den, ke e bwo taa tebwo huîn wo Iésu.

Lé pipaunueng ne ni apulie

⁸ Hiwon ni apulie na lé talihi ni mwaanu telé nge pwo a pwaaden ânebuhe Iésu [beme lé pipaunueng]. Ke wo lépwo béén, ke lé ne ni dihe acuwo na mwo wamin na lé tahagéi nge he ni apwoamu.

⁹ ††Ke lépwona lé ânebuhe Iésu, me lépwona lé alecehen, ke lé tai toii da pie:

«Osana! Pipwoun de Padué!

*Adéi pa apulie

na e âbé ne he nii Padaame!Psaume 118.26

¹⁰ Wâe hemepie adéihi

a mwametau na e mwo ju tuei,

a mwametau te *Davita,

pa watihenye!

Osana! me adéihi!

Paunu Padué na e daaité!»

¹¹ Ke e tuei nge Iérusaléma wo Iésu, ke e taa ha a *mwaiitihhi, ke e alihi [nina lé ko pwo nelang wo lépwona lé teko mu lang]. Ke nebwén, ke lé â Bétani me lépwo 12 acémun den, be caa bwén.

A éé majing na te tice acehin

¹² É ha acaama hen, he lé wie mu Bétani, ke mene Iésu. ¹³ †Ke e alihi mu ité a *majing, na te junihe bupwi. Ke e piâmwonuhi beme e alihi pie, te pwo ce acehin. Kehe me e piân, ke e te ju tooli cehi ni madihin, be time uce a benaamwon ko ni ace majing. ¹⁴ Ke e pii ten pie: «É jena, ke te tice paceli e bo wii mwo ce acehiko!»

Ke lé téneeng wo lépwo acémun den.

E peni lépwo api-icu mu ha a mwaiitihhi

¹⁵ Lé tehene nge Iérusaléma. Ke e taa ha a mwaiitihhi wo Iésu, ke e peni wie lépwona lé pwojenep †† nelang. Ke e pwii taabwon ni taap te lépwo ataatéhi mwani, ke ni atebwo te lépwo a-icuhi meni.

¹⁶ Ke e pii telé pie: «Geé nemwo pé da haulihi ce naado ne ha a mwaiitihhi! ¹⁷ ††Be e pii wo Padué ne he ni tii iitihhi pie: *A mwa tong, ke bo toii kon pie a mwo ko pwoiitihhi me de ati ni amu.*

Ésaie 56.7

Kehe wogewé, ke geé ko pwo me ataduwo te lépwo abune!»

Jérémie 7.11

¹⁸ †††Wo lépwo caa te lépwo *apwoâpwailo me lépwo *dotéén ko patén, ke lé téne a jepule ko ana e pwo wo Iésu. Ke lé hane ace bwopwonen beme lé taunueng,

†† 11.9 Psaume 118.25–26 † 11.13 Luka 13.6 †† Pwojenep—Omehi note

††† 11.17 Ésaie 56.7; Jérémie 7.11 ††† 11.18 Maréko 14.1

be mwotilé kon. Be caa junihe hiwon ni apulie na lé [â céiieng be lé] picedihi nina e pii.

¹⁹ Ke é he babwén, ke lé wie mu ha ali pwomwo ubwo wo Iésu me lépwo acémun den.

Geé céihi ne ko Padué

Mataio 21.21–22

²⁰ É ha acaama hen, ke lé â he pwaaden wo Iésu me lépwo acémun den, ke lé alihi ali éé majing li e piapwohi, he caa meiu ati, die ko ni waan.

²¹ Ke wo Pétéru, ke e niimihi ali e pii wo Iésu. Ke e pii ten pie: «Pa apipune, go alihi! E caa meiu ali acuwo li go piapwohi haabwén.»

²² Ke e pii wo Iésu telé pie: «Wâé heme geé céihi ne ko Padué! ²³ †Be é pii tewé a juuju pie: O te jan me geé pii te a juwole ce pie: “Go pwiiko, ke go engen mulang, ke go téele ole he jíé!”, ke e o pwo wo Padué! Kehe icehi ana wâé heme geé céihi pie, o tuie ana geé pii. Geé nemwo pwo me pinekepé ni pwonimewé! ²⁴ ††Anaa kuti a watihen me é pii tewé pie: Heme geé pwoiitihi me ilehi ace céiu naado, ke wâé heme geé céihi pie geé caa hegi. Ke me wonaa, ke e o ne tewé wo Padué.

²⁵ †«Ke mepie geé cuwoda me geé pwoiitihi, ke wâé heme geé pineu mwo lépwona lé pwo tewé nina ta. Be me wonaa, ke wo Caa tewé na e jeda he *miiden, ke e o pineukewé mwo ko ni ta pwo tewé. { ²⁶ Kehe mepie time geé uce pineu lépwo béén, ke wo pa Caa tewé na e jeda he miiden, ke time e o uce pineukewé ko ni ta pwo tewé.}»

Woo na e ne te Iésu a pihuô?

Mataio 21.23–27; Luka 20.1–8

²⁷ Lé taamwo Iérusaléma wo Iésu me lépwo acémun den.

Ke me e ko engen ha ali mwaiitihi wo Iésu, ke lé âbé mwonueng ne ni béé caa te lépwo apwoâpwailo, me lépwo dotéén ko patén me lépwo apihuô.

²⁸ Ke lé tahimwoeng pie: «De ne ace pihuô me go pwo nina go ko pwo? Woo na e pahedeko?»

²⁹ Ke e hegi ne telé pie: «Woéo mwo, ke é o mwo tahimwokewé ko a céiu naado. Ke mepie geé hegi ne tong, ke é bo pii tewé pana e ne tong a pihuô me é pwo ni naado naa. ³⁰ Kona wo Ioane, ke e *pipuu apulie mu ko a pihuô te Padué, ai é mu ko a pihuô te ni apulie? Geé hegi ne tong!»

³¹ Ke lé te junihe picihe kon, ke lé pipii telé pie: «Mepie genye hegi ne ten pie: “É mu ko Padué”, ke e o pii tenye pie: “Ke é mu ko ade na time geé uce céihi ne ko nina e pii tewé wo Ioane?” ³² Ke mepie genye hegi ne ten pie: “É mu ko ni apulie”, ke [ade aceli e o tuie ne konye]?»

Be mwotilé ko ni apulie na lé caa ju céihi ati pie, wo Ioane, ke pa péroféta [te Padué]. ³³ Ke é mu ko anaa, ke lé hegi ne te Iésu pie: «Mening, time geme uce temehi.»

Ke e pii telé pie: «Ke woéo mwo, ke time é o uce pii tewé pie, he wooélé na e ne tong a pihuô me é pwo ni na é ko pwo.»

Lépwo awéihi na a ni tabe megele

Mataio 21.33–46; Luka 20.9–18

12 ††E pacihe ni apulie wo Iésu, ke e piuti telé ni ocine:

«E bwo mu wo pa eapwihi a ni tabe megele. Ke e bwo cemi apwoamu ten, ke e bwo pwo a aba, beme a babé kon. Ke e ini a pwon, beme acaai ace tabe megele, ke me e bo céi ne hen a tabe hen. Ke e bahi a mwa na te junihe bwali da ko miiden, beme a mwowéa ko ali ni éé tabe megele. Ke nebwén, ke [e niimihi pie me] e mwo â pitabée ha ace céiu amu, ke e pwocuhi ni béé apulie, beme lé wéihi ali ni tabe megele ten, ke e engen.

² «[Pwo ni wole alecehen] ke tuie nge ha a benaamwon ko tabwo ace tabe megele. Ke e ne ngen pa céiu apenem den, beme lé ne ten ace den mu ko ali ni éé tabe megele ten. ³ Kehe icehi ana lé pitatieng, ke lé neeng ngemwo, he te tice celi lé ne ten. ⁴ Ke é mulang, ke e ne ngemwo pa céiu apenem den. Ke lé piahieng ko péi, ke lé tanahi a punin, ke lé piciheta ne kon.

⁵ «Ke nebwén, ke e ne ngemwo pa béciéhe ni apenem den, kehe icehi ana lé taunueng. Ke hiwon ni béé apenem den na e nelé ngemwo, ke lé piahi ni béén, ke lé taunu ni béén.

⁶ «Ke nebwén, ke caa te tice apulie celi me e nelé ngen, ju nehi céiu pa ju naîn, na te nihe eânimen den. Ke e neeng nge céii lépwo awéa ko ali ni éé tabe megele. Be e piniimihi pie, lé o paciitieng, be te pa naîn.

⁷ «Kehe icehi ana lé pipii telé pie: “Geé téne, te weengaa kuti pana e bo eapwihi ali ni tabe megele ha ace céiu tan. Wâé heme nye ju taunueng, beme bo a denye ali ni tabe megele!”

⁸ ††«Ke lé imwieng, ke lé taunueng, ke lé pé a één, ke lé tahi ne ité koja ali apwoamu.»

⁹ Ke wo Iésu, ke e tahimwo lépwona lé ko tabemieng pie: «Ke e bo pwo de wo pali eapwihi ali ni tabe megele? E bo âbé, ke e bo taunu li apulie na ta jélé. Ke e bo uce ne te ce béén ali ni tabe megele, beme lé bo uce wéa kon. ¹⁰ †††Kona time geé uce pine ana tii ne he ni tii iitihi?

*Ali péi li lé tahi taabwon
wo lépwo abahi mwa,
ke te anaa kuti a ju paamwa.*

† 11.23 Mataio 17.20 †† 11.24 Mataio 7.7 †† 11.25 Mataio 6.14–15

†† 12.1 Ésaie 5.1–2 †† 12.8 Ébéru 13.12 ††† 12.10 Psaume 118.22–23

¹¹ *Be te ni âpihuô te Padaame.
Ke nye téetihî a wâé ten,
na nye caa ko alihi!» Psaume 118.22–23*

¹² Ke he lé téné anaa wo lépwo apihuô te lépwo *Juif, ke lé hane me lé imwi Iésu. Be lé te temehi pie, e ko pwo-ocine ne kolé. Kehe icehi ana mwotilé, be hiwon ni apulie [na wâé telé nang]. Ke lé neeng, ke lé engen.

A cuhi puni apulie † te lépwo Roma

Mataio 22.15–22; Luka 20.19–26

¹³ ††Wo lépwo caa te pwoitihî, ke nimelé me lé pipwohuô te Iésu, ke lé ne nge céiieng ni *Farasaio, ke ni apulie mu pele *Érode [beme lé tahimwoeng ko ce naado]. Be lé hane pwaaden beme lé pipé ne kon, mu ko ace bwo hegi nen den.

¹⁴ Ke lé â pii ten pie: «Pa apipune, geme temehi pie go pii a juuju. Ke time uce mwotiko ko ni apulie, ke time go uce pipwoinen ne kolé, kehe go te patemehi ati ni naado na nime Padué me genye pwo. Ke anaa kuti ana nimeme me geme tahimwoko pie: He te wâé † heme nye pwocuhî puni apulie te pa daame he lépwo Roma? Ai time uce wâé?»

¹⁵ Ke e te temehi wo Iésu pie lépwo apulie naa, ke lépwo agele, ke e pii telé pie: «É ko ade na geé pihaamié? Geé cuwoteeke habwii tong ace céiu mwani péi.»

¹⁶ Ke lé ne ten a mwani péi. Ke e pii telé pie: «A démee, ke a nii-î ana e pwo a mwani ce?»

Ke lé hegi ne ten pie: «A de pa daame he lépwo Roma.»

¹⁷ ††Ke e pii telé wo Iésu pie: «Ke caa wâé, ke geé ne te pa daame nina te ni den, ke geé ne te Padué nina te ni de Padué.»

Ke lé nihe téetihî a bwo hegi nen den.

A bwo mulie cemwo te ni amele

Mataio 22.23–33; Luka 20.27–38

¹⁸ ††Lé âmwobé céii Iésu wo lépwo bée *Saducéen. [Woélé, ke te a céiu dihe pwoitihî te lépwo Juif] na time lé uce céihî pie, lé o mulie cemwo wo lépwo amele. Lé âbé too Iésu [ke lé pwo me lé habwii pie lé juuju] ke lé tahimwoeng pie: ¹⁹ †††«Pa apipune, e caa tii me denye wo *Moosé ne he ni patén pie: *Hemepie e mele wo pace céiu apulie celi te tice naîn, ke wâé heme e pé ê depwele*†††ten wo pa ciéen me lu piaten.

Deutéronome 25.5

Be me wonaa, ke me bo pwo ce piebehi pa amele.»

²⁰ «[Ke te wâé. Kehe go cuwoteeke niimihi ani]: Pwo lépwo pwénaâjién na 7 jélé, ke e piaten wo pa cuwolé,

kehe icehi ana e mele he mwo te tice naîn. ²¹ Ke wo pa béalohen, ke lu piaten me êgi depwele, kehe icehi ana e te mele mwo wo paje, he te tice naîlu. Ke te piwien ne ko pa béciéhen. ²² Ke te wonaa mwo ne ko lépwoli 7 jélé. Be lé te tai mele, ke he te tice naîlé. Ke é alecehelé ati, ke e bwobe mele wo êgi toomwo. ²³ Ke [go ko pii pie] lé bo mulie cemwo ne ni amele ha ace céiu tan. Ke hemepie wonaa, ke o bo wooélé mu hadeniilé celi bo pa aiu he ê toomwo naa, ha a benaamwon naa? Be caa te tai lépwo aiu hen ati! [Ke go cuwoteeke hegi!]

²⁴ E hegi ne telé wo Iésu pie: «Geé pipweéo, be time geé uce temehi ni tii iitihî, me a junuu Padué. ²⁵ Be mepie lé mulie cemwo ne ni amele, ke time lé o bo uce piaten mwo, kehe lé mulie pwohewii ni *âcélo ne pele Padué.

²⁶ §«[Geé ko tahimwoéo] ko a bwo mulie cemwo mu ha amele. He time geé uce pine ne he ni tii te Moosé a jepule ko ali nahi acuwo li e éle kon ali miû? Be é nelang he na e pii ten wo Padué pie: *Woéo Padué he *Abérama, ke Padué he Isaaka, ke Padué he Iakobo.*

Exode 3.6

²⁷ [A bwopiinen pie, lé teko tai mulie pele Padué!] Be time uce Padué he ni amele, kehe Padué he nina lé mulie! Geé te nihe pipweéo!»

A patén na piwéden

Mataio 22.34–40; Luka 10.25–28

²⁸ †É he lé mwo ko picihé, ke e tabemilé wo pa céiu *dotéén ko patén, ke e alihi pie, e te ju hegi ehi ne te lépwo Saducéen wo Iésu. Ke e âbé mwonueng, ke e tahimwoeng pie: «Kona ade patén celi e piwéden na ati he ni patén?»

²⁹ ††Ke e hegi ne ten wo Iésu pie: «Weengi: *Geé téné wogewé lépwo *Isaraéla! Wo Padaame Padué, ke te weengaa kuti pa ju Daame henye, na te céiu nang*†† Ke go pwo me eânimem den ati ne ha a ju pwonimem, me a mulihem, me a bwo niimihinaado tem, me a niihem.

Deutéronome 6.4–5

³¹ ††«Ke weengi a béalohe ni patén: *Go pwo me eânimem de ni béén*††, *pwohewii a bwo pieânimem dem.*

Lévitique 19.18

Be te tice ace céiu patén, celi piwéden koja lupwo patén naa.»

³² ††Ke e pii ten wo pa dotéén ko patén pie: «Éa kuti! Te junihe a juuju, go pa apipune, ana go ko pii! Be wo Padaame, ke te weeng kuti pa ju Dué henye! Ke te tice mwo pace céiu! ³³ Ke wâé heme eânimenye ten mwo ati ne he ni ju pwonimenye, me ni pitemang, me ni ni-ihenye. Ke wâé mwo, heme eânimenye mwo te ni béén pwohewii a bwo pieânimenye tenye. Te junihe a

† *A cuhi puni apulie—Impôt.* †† 12.13 Maréko 3.6 † He te wâé—*ai Pwo mwomwon denye. Wieli lé pii ni patén ko a pwoitihî te lépwo Juif.* †† 12.17 Roma 13.7 †† 12.18 Apostolo 23.8 ††† 12.19 Deutéronome 25.5 ††† Depwele—*Veuve.*

§ 12.26 Exode 3.2,6 † 12.28 Luka 10.25–28 †† 12.29 Deutéronome 6.4–5 †† 12.31 Lévitique 19.18 ††† Ni béén—*Grek: Pana e mu mwonuko, ai Pa ju béém.* †† 12.32–33 Deutéronome 4.35; Deutéronome 6.4–5; Lévitique 19.18; 1 Samuel 15.22; Osé 6.6

junaado ana koja ni *âpwailo te Padué, me ni béé âpí-pati.»

³⁴ Ke e alihi wo Iésu pie e hegi ha a pitemang den, ke e pii ten pie: «Time uce wogo ité koja a *Mwametau te Padué.»

Ke caa mwoti ni apulie me lé tahimwo Iésu ko ce béé naado.

Nihe pwonaado ne ko pa Mesia

Mataio 22.41–46; Luka 20.41–44

³⁵ É he e ko pacémunilé ne ha a *mwaiitihi wo Iésu, ke e pii te nina lé ko tabemieng pie: «Lé pii wo lópwo dotéén ko patén pie, wo pa *Mesia, ke pa piebehi *Davita. [Te a juuju anaa, kehe icehi ana te junihe ubwo nang koja Davita.] ³⁶ †Be te wo Davita [na e pii anaa] he caa ju tilieng na a *Jenen Iitihi, be e pii pie:

*Pwooti te Padaame Padué,
na e pacihe pa daame hung:
"Go âbé tebwo éni pwo a juing.
[É ne tem a pihuô,
ke o pipaunuko dieli mwo.]
É pwo me go caaite
nina lé pipwopa ne kom."Psaume 110.1*

³⁷ «Ke me e ko pii wo Davita pie: *Padaame hung*, ke a bwopiinen pie, wo pa Mesia. Ke me wonaa, ke ade ace watihen me geé niimihi pie, wo pa Mesia, ke time uce pace apulie celi piubwo nang koja Davita †?»

Geé nemwo pipwohewii lópwo dotéén ko patén

Mataio 23.1–12; Luka 20.45–21.4

Lé tabemi Iésu ni apulie na hiwon jélé, ke lé te junihe pipwodéén. ³⁸ Ke e pacémunilé mwo pie: «Geé pipwocile! Geé nemwo pipwohewii lópwo dotéén ko patén! Be te junihe wâé telé me lé engen he ni epwén na bwali †. Ke wâé telé heme nye tee pwobwocu telé, me pipaunulé ne he pwahamii ni apulie ati. ³⁹ Lé te hane ni atebwo ânebun, ne he ni *mwotapitihi, ke é ne mwo he ni apiwiinaado na ubwo. ⁴⁰ Ke lé te nihe pwo ni jame pwoitihi, beme nye o niimihi pie ni apulie na wâé jélé. Kehe icehi ana me lé ko wonaa, ke lé pé ati koja ni depwele ni delé! Ke te é mu ko anaa kuti, na o bo ne telé a kuhinaado na te junihe ubwo koja ni kuhinaado te ni béén.»

É depwele na te tice den

⁴¹ [É mulang, ke e taa ha a mwaiitihi wo Iésu.] Ke e tebwo he bebenihe a duaan na lé mu ne mwani hen me de a mwaiitihi. Ke e ali nina lé ko ne. Ke te pwo ni béén na te nihe pwo delé, ke lé ne ni mwani na te nihe

† 12.36 Psaume 110.1 †† Grek: Te wo Davita kuti na e pii kon pie 'Pa daame'; ke é ko ade me pa nâin? ‡ Epwén na bwali—Ne pele lépwo juif ânebun, ke a ine lépwo apitemang me lépwo apipacitilé.

hiwon. ⁴² Ke e tuiebé ê depwele na te tice den, ke e ne lupwo cuwo nahi mwani péi.

⁴³ †Ke e tode lópwo acémun den wo Iésu, ke e pii telé pie: «É pii tewé a juuju pie: É depwele ce tice naamun, ke e ne nina te junihe piwéden koja ni béén. ⁴⁴ Be lé ne ni mwani na pikaoole mu ko ni cuhilé. Ke hemepwo weeng, ke te tice den. Kehe icehi ana e te ne ati ni mwani na jan me e mulie kon.»

O bo tanahi a mwaiitihi

Mataio 24.1–2; Luka 21.5–6

13 É alecehen, ke e wie mu ha a *mwaiitihi wo Iésu. Ke e âbé céieng wo pa céiu béé lópwo acémun den, ke e pii ten pie: «Pa apipune, te junihe wâé a mwa ce, ke ni péi ko a aba kon!»

² †Ke e pii ten wo Iésu pie: «Go te alihi ni pilehe mwa ce, be o time e bo uce mu éni mwo ace céiu péi pwo ace céiu mwo. Be ati ke o bo tai tanahi taabwon.»

Ana e o tuie

Mataio 24.3–44; Luka 21.7–33

³ [É alecehen] ke e tebwo pwo a juwole ko ni Olivier wo Iésu [ne he bebenihe a mwaiitihi]. Ke lé âbé mwonueng wo Pétéru me Cang, me Ioane, ke wo André. Ke te piwoélé cehi me weeng, ke lé tahimwoeng pie: ⁴ «He éniile celi e o bo tuie ana go ko pii? Ke o ade ace inenaado kon, me geme o temehi pie, caa é mwonu, ke o bo tuie ni naado naa?»

⁵ Ke e pii telé pie: «Geé pipwocile, beme geé nemwo pipweé! ⁶ Be o hiwon nina lé o âbé heme lé pé a ning. Ke lé o bo pii tewé pie: "Woéo pa *Mesia!" Ke lé o pipwohuô te ce apulie celi hiwon jélé. ⁷ Ke me geé téne heme lé cihe ko ce pa celi e mwonu, ai e ité, ke geé nemwo pwo me mwotikewé! Be e o mi tuie ninaa, kehe icehi ana time uce téele a pwonehi a bwohemwo.

⁸ ††«Be a céiu amu, ke e bo pipwopa me a céiu amu. Ke a céiu mwametau, ke e bo pipwopa me a céiu mwametau. Ke o bo pwo ni penem bwohemwo ne he ni pétaapwo piduaan, ke ni menele na ubwo. É ne he ni bwomunen naa, ke o pwohewii ni bécéiue picani ko a piâbeelee ewa.»

O pwotahi ne ko ni acéihi

⁹ ††«Kehe wogewé, ke geé pipwocilekewé, be lé bo péékewé nge he ni mwopitautinaado. Ke lé bo ahikewé ne he ni *mwotapitihi. Ke lé bo teuukewé nge he pwahamii ni gupéno me ni daame, beme lé tau-tikewé, wonaa mu kong. Wonaa beme ne tewé, beme geé cihe telé kong. ¹⁰ Be wâé heme mwo mi patemehi a Pwooti Wâé ati nge he ni amu.

†† 12.43 2 Korénit 8.12 †† 13.2 Luka 19.44 ††† 13.8 Ésaie 19.2 ††† 13.9 Mataio 10.17–20

¹¹ †«É heme lé bo péékewé ngen me tautikewé, ke geé nemwo pwo me gia gewé, ke geé nemwo mi pi-hane celi me geé bo pii. Be geé te ju pii cehi celi o bo ne tewé ha a inetéale naa. Be time uce wogewé celi geé o cihe, kehe a *Jenen Iitih na e bo cihe.

¹² ††«[É ha a benaamwon naa] ke wo pa céiu apulie, ke e o bo ne pa âjiéne beme taunueng. Ke e o wonaa mwo wo pa caa te ewa ne ko pa naîn. Ke ni ewa, ke lé bo cuwode ni nyaa me caa telé, beme lé taunulé.

¹³ †«Lé o téétikewé ne ni apulie ati, wonaa mu ko a ni-ing. Kehe wo pana e cumang die ha anebwén [ko a mulihen] ke e bo celuimieng wo Padué.»

Lé o te junihe picani ne ni apulie

¹⁴ ††«Ke geé o bo alihi a naado na ta, na e bo tuiebé ne ha a duaan na time uce ace amu nen: ali naado li e pwotahi ati ni naado, na te nihe mwakile nang, ke muhi tenye kon.»

Wo paceli e pine anaa, ke wâé heme e temehi [beme e bo cihe kon]!

«Ke é ha a benaamwon naa, ke wâé heme lé cela da pwo ni juwole ne nina lé mu *Judé! ¹⁵ ††Ke wo pana e âoté pwomwo, ke e nemwo taamwo hane ce naado mu ha a mwa ten. ¹⁶ Ke wo pana e mu ha apwoamu, ke e nemwo mwojuia ngemwo pelen, me e pé ce epwénen. ¹⁷ †††Au, mwolihi! Be é he ni tan naa, ke o pwoééhe ni toomwo na pigiaa jélé, me nina lé mwo paditih ewa.

¹⁸ †«Ke geé pwoiitih te Padué pie, me time e uce tuie ne kowé ni naado naa ha a benaamwon na ta-amu hen! ¹⁹ †††Be é ha a benaamwon naa, ke lé o mu he ni picani ne ni apulie. Be mwo te tice pace apulie celi e caa mu he ce picani celi wonaa, tabuhi ha a tan na e tabuhi ati ni naado wo Padué, dieli jena. Ke o te tice mwo pace céiu apulie celi e o bo mu he ce picani celi wonaa.

²⁰ †«É hemepie time e uce niimihi wo Padué pie, me e pineole a jéhi ni tan naa, ke wieli me o te tice pace céiu apulie, celi e o celuimi a mulihen! Kehe icehi ana e te niimihi pie me e pineole, wonaa mu ko nina e caa pipégalié.»

Lépwo 'mesia' na ni agele

²¹ †«Ke mepie e pii tewé wo pace céiu apulie pie: "Geé alihi! E éni wo pa Mesia!" ai "E ha a duaan cel!", ke geé nemwo céihi ne kon. ²² †Be lé o bo tehenebé ce 'mesia' me ce 'péroféta' celi ni agele. Ke lé o pwo ce *pipwojunuun celi lé o téetih ne ni apulie, beme a bwopwonen me lé pipwohuô telé. Ke lé o te hane mwo me lé pipwohuô te nina e caa pipégalié wo Padué. ²³ Ke me

† 13.11 Luka 12.11–12 †† 13.12 Mataio 10.21 † 13.13 Mataio 10.22; Ioane 15.21 †† 13.14 Daniel 9.27, 11.31, 12.11 †† 13.15 Luka 17.31 ††† 13.17 Luka 23.29 ††† 13.19 Daniel 12.1; Pii Beetih 7.14 § 13.22 Pii Beetih 13.13

wonaa, ke wogewé, ke geé o pipwocile! Be é caa mi patemehi tewé ni naado na o bo tuie!»

A bwo âmwobé te Iésu

²⁴ ††«É he ni tan naa, ke lé o te junihe mu he ni picani ne ni apulie. Ke é alecehe anaa, ke:

O time e uce nié na a téale.

O bwén ne ha a wole.

²⁵ *Lé o bo tupwo ne ni ceni.*

O éjén ni pipwojunuun he miiden^{††}. Ésaie 13.10; 34.4

²⁶ ††«Ke nebwen, ke lé o bobé alié, woéo pa Nahi Apulie, heme é âbé he ni nii, ne ha ati a junuung me a bwo ubwo jo. ²⁷ †††Ke é o pawiebé ni *âcélo, beme lé neibu nina é caa pipégalié. Ke lé o taineibulé ne ha a céiu behi amu, die ha a céiu behin, pitih a bwohemwo.»

A inenaado ko a éé majing

²⁸ †«Wâé heme geé temehi a inenaado ko a *majing. Be, me e tile, ke geé caa temehi pie, caa é mwonu a cim naado. ²⁹ Wonaa mwo heme geé alihi pie, e caa ko tuie li é caa pii, ke geé o temehi pie, o caa pacuwohi ati [†]. ³⁰ Ke é pii tewé a juuju pie: [Time o uce bwolihi.] Be lé o mwo te alihi anaa ne ni béé apulie jena, ânebuhe ace bwo mele telé. ³¹ Be o tieden a miiden me a bwohemwo, kehe o time uce tieden a pwooti tong.»

Geé tee ûmié!

³² †«Te tice pace apulie, celi e o temehi ace tan me ace inetéale, celi o tuie hen ni naado naa. Te tice paceli e temehi, heme woéo pa Naîn, heme ni âcélo te Padué. Kehe te wo Caa cehi, na e temehi. ³³ Geé pipwocile, ke geé nemwo tee pule! Be time geé uce temehi ace benaamwon celi e o tuie hen nina. ³⁴ Be o pwohewii ne ko pa apulie na e engen mu ha amu ten. Ke e ne te lépwo apenem den a pihuô ne ko ati ni naamun die ko a pomwa ten. Ke e pipatih ne kolé ni pétaapwo penem delé. Ke e pii te pa awéih pomwa pie: "Go mu ke go tee ûmié."

³⁵ ††«[Ke te piwien ne mwo kowé.] Wâé heme geé tee ûmié! Be time geé uce temehi ace benaamwon celi e o tuie mwobé hen wo pali eapwih pwomwo. Be wieli é ko a babwén, ai é ha awieme bwén, ai é heme ko to a ja, ai é ko acaama. ³⁶ Ke hemepie e pwome tehenebé,

† 13.24–25 Ésaie 13.10; Joël 2.10, 3.4, 4.15; Pii Beetih 6.12–13 ††† O éjén ni pipwojunuun he miiden—A bwopiinen pie, O bo tupwo ne ni ceni, ai O pahauli ni mwametau me lépwo daame helé, ai O pahauli ni duéé. † 13.26 Daniel 7.13 ††† 13.27 Mataio 13.41; Maréko 13.32 †† O caa pacuwohi ati—ai É o caa tuie. (A bwo mwojuia cemwo te Iésu.) Ne ha a pwahamii tii ce, ke wo Iésu, ke e caa mi pii lupwo alo naado na o bo tuie: A céiu, ke a bwo pwo me tieden a pwomwo ubwo Iérusaléma, alecehe a bwo mele ten, ha a jo 70. Ke a céiu, ke ni naado na o bo tuie ha a pwonehi a bwohemwo ânebuhe a bwo mwojuia mwobé ten. † 13.35 Luka 12.38

ke o time uce wâé heme e tookewé heme geé tee ko pule! ³⁷ Ana é pii tewé, ke a pwooti me de ni apulie ati: Wâé heme geé tee ûmiê!»

Lé hane me lé taunu Iésu

Mataio 26.1–5; Luka 22.1–2; Ioane 11.45–53

14 Nehin alo ni tan, ke o cuwo lupwo tan ubwo te lépwo *Juif: a tan ko a *Pacika a céiu, ke a tan na lé eni a pwoloa na te tice nyaa ten.

Ke nime lépwo caa te lépwo *apwoâpwailo, me lépwo *dotéén ko patén, me lé taunu Iésu. Ke lé pihane ace bwopwonon beme lé pipwohuô ten, me lé imwieng neduwahi. ² Ke lé pipii telé pie: «O time uce wâé heme nye imwieng ha a piwiinaado ubwo, ne he pwahamii ni apulie, be koli lé bo okéé.»

Tapulicéihi tabe ûde ne ko Iésu

Mataio 26.6–13; {Luka 7.36–50}; Ioane 12.1–8

³ †[É ha a benaamwon naa, ke] e mu Bétani wo Iésu, ha a mwa te Simon, pa katia. É he lé mwo ko wiinaado, ke e tuiebé ê céiu toomwo, imi a mwotabe péi na te junihe wâé, na oba ko tabe ûde na te junihe ubwo a cuhin ††. Ke e taii ali mwotabe, ke e cepulicéihi ali tabe ûde ne pwo puni Iésu.

⁴ Ke me lé alieng wo lépwona lé mu lang, ke te nihe time uce wâé telé, ke lé pipii telé pie: «Éé! E te nihe pihoonihi a tabe ûde ne. ⁵ Be pwo *million*‡ ko a cuhin! Ke é ko ade na time e uce icuhi, ke me genye ne a mwani te nina tice delé?» Ke lé te nihe cihe ne ko êgi toomwo.

⁶ Ke e pii telé wo Iésu pie: «Geé neeng! É mu ko ade na geé ilieng? E pwo ana nihe wâé ne kong. ⁷ ††Be o tee élé pelewé wo lépwona te tice delé, ke heme nimewé, ke te jan me geé bo te pwopweehi ne kolé. Kehe woéo, ke time nye uce cuwo ko pimu ibu. ⁸ ††Énaa, ke e pwo ana jan me pwo. Be é he e ne a tabe ûde ne ko a ééng, ke e caa mi pipwopweehi cawi a bwo ole tong he pwon. ⁹ Ke é pii tewé a juuju pie: É heme bo pipii beetihi a Pwooti Wâé ne he ni piduaan ati ne pwo a bwohemwo, ke lé bo tee piuti mwo a jepule ko ana e pwo ê toomwo ce, beme tee pipaniimieng.»

E icu Iésu wo Judas

Mataio 26.14–16; Luka 22.3–6

¹⁰ Wo Judas Iscariot, pa céiu béé lépwo 12 *apostolo, ke e â too ni caa te lépwo apwoâpwailo. Ke e pii telé pie: «É bo ne Iésu tewé.»¹¹ Ke te nihe piwâénimelé, ke lé pii ten pie: «Geme bo ne ce mwani tem hemepie go pwo.» Ke e pihane ace pwaaden me e icu Iésu telé.

† 14.3 Luka 7.37–38 †† Tabe ûde na te junihe ubwo a cuhin—A niin pie nard. ‡ Million—Grek: 300 mwani péi (deniers). A cuhi pa apulie ha a jo na céiu. †† 14.7 Deutéronome 15.11 †† 14.8 Ioane 19.40

A piwiinaado te Padaame

Mataio 26.17–35; Luka 22.7–34; Ioane 13.21–38

¹² ††E caa tuie a bécéiuhe tan ko 'pieni pwoloa tice nyaa ten', a tan na nye taunuhi a nahi muto me de a Pacika. Ke lé pii te Iésu wo lépwo acémun den pie: «Geme o â piwâam ko a wiinaado ko a Pacika. Kona é wé he celi nimem me genye piwiinaado nelang?»

¹³ Ke e ne ngen lupwo alo mu kolé, ke e pii telu pie: «Geu â ha a pwomwo ubwo, ke o pitapitikewé me pa apulie na e pé a mwotabe, ke geu âcécín. ¹⁴ Ke me e â taa ha a mwa, ke geu pii te pa eapwihin lang pie: "E tahimwohibé wo pa apipune teme pie: "E wé ace nemwa celi me geme †† o pieni ibuhi ne hen a wiinaado ko a Pacika, me ni béé acémun dong?"

¹⁵ «Ke e o habwii teu a céiu nemwa na e ko miiden, a nemwa ubwo na caa pipwopweehi. Ke geu piwâamihi a wiinaado tenye nelang.»

¹⁶ Ke lu â ha a pwomwo ubwo, ke lu te tai tooli pwohewii ana e pii telu wo Iésu. Ke lu piwâamihi a wiinaado ko Pacika.

Pwo pa bééwé na e bo pi-icuéo

¹⁷ É he babwén, ke lé tuie wo Iésu me lépwo 12 apostolo ten. ¹⁸ §Ke lé tebwo, ke lé wiinaado.

Ke é he lé ko wiinaado, ke e pii telé wo Iésu pie: «É pii tewé a juuju pie: E bo pi-icuéo wo pa céiu bééwé, pana nye te piwiinaado ibu me weeng.»

¹⁹ Ke te piwahin jélé, ke lé muko pétaapwo tahimwoeng pie: «He time uce woéo?!»

²⁰ Ke e pii telé pie: «Wo pa céiu bééwé, wogewé lépwo 12 apostolo, pana gemu tai pétaa ole ha a tam ††. ²¹ É bo mele, woéo pa Nahi Apulie, pwohewii ana e caa pii beetihi ne ni tii iitihi. Kehe wo pa apulie na e pi-icuéo, ke o te junihe pwoééhen. Au, mwolihi! Be wo panaa, ke wieli me o te wâé ne kon hemepie time e uce ko âbeele!»

A pwoloa me a tabe megele

²² ††Ke é he lé ko piwiinaado ibu, ke e pé a pwoloa wo Iésu, ke e pipwo-olé te Padué. Ke e ebii, ke e pwopatihii ne ko lépwo acémun den, ke e pii telé pie: «Geé pé, be ani ke a ééng.»

²³ Ke é alecehen, ke e pé a mwoûdu ko tabe megele. Ke e pwo-olé te Padué, ke e ne telé. Ke lé tai ûdu.

²⁴ ††Ke e pii telé pie: «Ani ke a cewéhung na e o caa téé me de ati ni apulie. Be a pipwoâpwailo na e pacuwahi a *piapwo na e pwo wo Padué [pie e ne a péém ne ha awiemelé me weeng]. ²⁵ Ke é pii tewé a juuju pie: O caa

††† 14.12 Exode 12.6 ††† Geme—Grek: Woéo (Iésu) me lépwo acémun dong. § 14.18 Psaume 41.10 †† Ne pele lépwo Juif, ke wo lépwo ju béén, ke lé te ju pétaa ole ha a tam na céiu ko ni ilé. ††† 14.22–25 1 Korénit 11.23–25 †† 14.24 Exode 24.8; Jérémie 31.31–34; Zakari 9.11; 1 Korénit 10.16; Ébéru 9.20

time é bo uce ûdu mwo ace tabe megele [ne éni pwo bwohemwo] dieli ha ace tan celi é bo ûdu ace tabe megele celi mwo coho, ne ha a *Mwametau te Padué.»

Go bo piwotétaa kong, go Pétéru

²⁶ Ke lé nyebihi a *psaume* ko a tan ubwo naa. Ke é mulang, ke lé taa pwo a juwole ko ni Olivier.

²⁷ Ke e pii wo Iésu te lépwo acémun den pie: «Geé o bo tai engen kojaéo. Be caa te tii ne he ni tii iitihhi pie: *O bo taunu pa awéihi muto, ke lé o pipiiden ne ni muto.* Zakari 13.7

²⁸ †«Kehe icehi ana é hemepie é mulie cemwo mu ha amele, ke é bo ânebhewé ne Galilé.»

²⁹ Ke e pii ten wo Pétéru pie: «Wielé lé o engen kojako wo lépwoje, kehe time o uce woéo!»

³⁰ Ke e hegi ne ten wo Iésu pie: «É pii tem a juuju pie: É ha a bwén jena, ânebuhe a bwo okelo ko to te a ja, ke wogo, ke o caa ocié go ko piwotétaa kong pie, time go uce temehié.»

³¹ ††Ke wo Pétéru, ke e te nene ko pii pie: «Ûhu! Te piwien hemepie genyu tai mele, kehe time é uce piwotétaa kom!»

Ke tai woélé ati, ke te céiu ana lé pii.

E pwoiitihhi ne Getsémané wo Iésu

Mataio 26.36–40; Luka 22.39–46

³² †Ke é mulang, ke lé â ha a céiu duaan [na cemi acuwow hen] na pii kon pie Getsémané. Ke e pii te lépwo acémun den wo Iésu pie: «Geé tebwo éni, be é mwo â pwoiitihhi.»

³³ Ke e pé Pétéru, me Cang, me Ioane. Ke tabuhi pinekepé ten, ke mwotieng. ³⁴ ††Ke e pii telé pie: «Te junihe téé ke piwahin a pwonimung †. Kehe geé tee mu éni, ke geé ûmiê! [Geé nemwo pule!]

³⁵ Ke e te ju piâdé kojale, ke e tidihhi jilin, ke e ilehi koja Padué me e pétaabwon kojaeng ni picani ko a be-naamwon naa, hemepie te jan. ³⁶ †††Ke e pii pie: «Abba†††, Caa! Jan ne kom ati ni naado. Go pé kojaéo ni picani me ni téé ce †! Kehe icehi ana go nemwo pwo ana nimung kon, kehe ana nimem kon.»

Lé pule wo lépwo acémun den

³⁷ Ke e mwojuia mwobé céii lépwo acémun den na cié jélé, ke e alihi pie lé teko pule. Ke e pii te Pétéru pie: «Simon, woté, go tee ko pule? Time uce jan me go ûmiê he na te ju céiu inetéale? ³⁸ Geé te ûmiê, ke geé pwoiitihhi, beme o te pwo niuhewé hemepie taceb-

† 14.28 Mataio 28.16; Maréko 16.7 †† 14.31 Ioane 11.16 † 14.32 Ioane 18.1 †† 14.34 Ioane 12.27 †† Ne mwo he pwo grek ni pwooti ce: Ke é caa pwo me é mele. ††† 14.36 Maréko 10.38; Ioane 6.38 ††† Abba—A bwopiinen pie Caa tong he pwo araméen, a pwocihe ko Iésu. † Ni picani me ni téé ce—Grek: A mwoûdu ce.

wénikewé. Be nimewé me geé pwo ana wâé, kehe icehi ana tice niuhewé.»

³⁹ Ke e engemwo kojale wo Iésu, ke e â pwoiitihhi, ke e te pii mwo ana e caa te pii. ⁴⁰ Ke me e mwojuia mwobé céii lépwo acémun den, ke e toolé mwo he lé teko pule. Be caa te junihe emaan jélé, ke lé tee ko pipucing. Ke time lé uce temehi ace bwo hegi nen ne ten.

⁴¹ Caa a béociéhe a bwo engen den kojale, ke e mwojuia mwo. Ke e pii telé pie: «Kona geé mwo teko mwaale, ke pule mwo? Caa nebwén! Caa weengi a be-naamwon! Be o caa neéo, woéo pa Nahi Apulie, ne te lépwona lé pwo nina ta. ⁴² Geé cuwoda! Me nye engen! Be caa e lang wo pana e icuéo!»

Lé imwi Iésu

Mataio 26.47–56; Luka 22.47–53; Ioane 18.3–12

⁴³ É he e mwo ko pii anaa wo Iésu, ke e te ju tehenebé kuti wo Judas, pali céiu béé lépwoli 12 apostolo ten. Ke lé âbé céin ne ni apulie na hiwon jélé, imi ni teua me ni ba-acuwo. Be lé nelé ngen wo lépwo caa te lépwo apwoâpwailo, me lépwo dotéén ko patén me lépwo apihuô. ⁴⁴ Ke wo Judas, pana e pi-icu Iésu, ke e caa patemehi telé ana me e pwo: «Wo pa apulie na é o mwomwaueng, ke te weeng kuti. Geé imwieng, ke geé pééeng ngen, ke geé wéieng ehi.»

⁴⁵ Ke he lé tehenebé, ke e te âde Iésu kuti, ke e pii ten pie: «Bwocu tem, go pa apipune!» Ke e mwomwaueng. ⁴⁶ Ke lé te imwi Iésu kuti. ⁴⁷ Kehe icehi ana wo pa apulie na e mu pele Iésu, ke e te pwome céi kuti a teua ten mu ha a mwon, ke e te tahi kuti ole pwo a puni pa apenem de pa *daame he lépwo apwoâpwailo. Kehe icehi ana e te ju tahagéi a jéenen.

Kona woéo pace ataunuhi apulie?

⁴⁸ Ke e pii ten wo Iésu pie: «Woté? Geé âbé pééo ko teua, me beba-acuwo, pwohewiin heme woéo pace ataunuhi apulie?! ⁴⁹ ††Ati he ni tan, ke é te mu hadeniiwé, he é teko pacémuni ni apulie ne ha a *mwaitihhi, kehe icehi ana time geé uce imwiéo! Kehe wâé me wonaa, be é jena, ke o caa pacuwohi ni naado na caa te tii ne he ni tii iitihhi.»

⁵⁰ Ke ati ni acémun den, ke lé neeng, ke lé cela.

E cela he te tice mwaanu kon @ wo pa ewa aiu

⁵¹ Kehe icehi ana pwo pa ewa aiu †† na e piâcéin. E tawiieng ko a ciite. Ke me lé pwo me lé imwieng wo lépwo béé apulie, ⁵² ke lé te ju pé cehi a ciite ten, ke e cela, he te tice mwaanu kon.

† 14.49 Luka 19.47, 21.37; Ioane 18.20 †† Pa ewa aiu—Wielé wo Maréko celi e tii a tii ce.

A mwohuô te lépwo Juif

Mataio 26.57–68; Luka 22.54–71; Ioane 18.19–24

⁵³ Lé pé Iésu nge céii pa daame he lépwo apwoâpwailo. Be lé pitapitilé nelang wo lépwo caa te lépwo apwoâpwailo, me lépwo apihuô, me lépwo dotéén ko patén. ⁵⁴ Ke e pi-ilipuwolé ngen wo Pétéru, ke e â taa pele pa daame he lépwo apwoâpwailo. Ke e tebwo pwo napwomwo ne pele ni apenem, ni awéa, ke e pwocadéu.

⁵⁵ Wo lépwo caa te lépwo apwoâpwailo, me ati a *mwohuô te lépwo Juif, ke lé hane ce apulie beme lé pipé ne ko Iésu, be nimelé me lé pwocuhinaado ten me e mele. Kehe icehi ana time lé uce tooli. ⁵⁶ Be hiwon nina lé pipé ne kon, kehe icehi ana time lé uce piténelé.

⁵⁷ Ke nebwén, ke lé cuwoda ne ni béén mu kolé, ke lé pii pie: ⁵⁸ †«Geme te téne he e pii pie: “É o panihi a mwaiitihi te Padué ce, na lé bahi wo lépwo apulie. Ke é he na cié ni tan, ke é o bo pacuuli mwo ace céiu mwaiitihi na time uce bahi ko ni i apulie.”»

⁵⁹ Kehe icehi ana wo lépwona lé pipé ne kon, ke time lé uce piténelé mwo.

A bwo hegi nen de Iésu

⁶⁰ Nebwén, ke e cuwoda ânebuhe ati lépwo apihuô wo pa daame he lépwo apwoâpwailo. Ke e tahimwo Iésu pie: «Kona te tice béhegi nen dem? He time go uce téne nina lé ko pipé ne kom?»

⁶¹ Kehe icehi ana time e uce hegi wo Iésu. Ke e tahimwoeng mwo wo pali daame pie: «Kona woté? Te a juuju pie wogo, ke pa *Mesia, pa *Naî Padué, wo Padué na nye paciitieng?»

⁶² †Ke e hegi ne ten wo Iésu pie: «Éa, te woéo kuti. Ke geé bo aliéo, woéo pa Nahi Apulie, heme é tebwo *pwo a jui Padué na te junihe pwojunuun [beme é pi-huôhi ati ni naado]. Ke geé bo aliéo heme é âbé he ni nii, mu he miiden.»

⁶³ Ke me e téne anaa wo pa daame he lépwo apwoâpwailo, ke e te nihe okéé, ke e pitie ni epwénen ‡, ke e pii te ni béé atautinaado pie: «Caa jan! Necu ce béé bwo pipé ne kon [be e caa teko pipé ne kon mwo]!

⁶⁴ ††Be geé caa téneeng, he e pwo me piwielu me Padué! Ke he ade aceli geé niimihi ne kon?»

Ke lé tai hegi ne ten ati pie: «Wâé heme e mele!»

⁶⁵ Ke lé cumi ne kon wo lépwo béén, ke lé tawii a pwahamiin, ke lé nuô i kon, ke lé pii ten pie: «He woo na e ahiko? Go cuwoteeke pihane, hemepie wogo pace péroféta [celi go temehi ati ce naado!]

Ke lé pééng ne ni apenem, ke lé taii punin.

† 14.58 Ioane 2.19–21 †† 14.62 Psalme 110.1; Daniel 7.13
‡ Pitie ni epwénen—A ine a bwo emegéi nan, ai a pwo-okéé kon.
†† 14.64 Lévitique 24.16; Ioane 19.7

E piwotéeta ko Iésu wo Pétéru

Mataio 26.69–75; Luka 22.56–65; Ioane 18.16–27

⁶⁶ Mepwo wo Pétéru, ke e te mu jeoté pwomwo.

Ke e tehenebé é céiu apenem de pa daame he lépwo apwoâpwailo. ⁶⁷ Ke e ali Pétéru he e ko pwocadéu. Ke e te ju omeeng ehi, ke e pii ten pie: «ÉÉ! Wogo ke pa céiu béé Iésu mu Nazaret!»

⁶⁸ Ke e hegi ne ten wo Pétéru pie: «Ûhu! Time é uce temehieng, ke time é uce temehi aceli nimem me go pii.»

Ke e â pwo napwomwo. {Ke e to ali ja.} ⁶⁹ Kehe wo êje, ke e te omeeng mwo, ke e pii mwo te ni apulie na lé mu lang pie: «Uhuu! Weeng ke pa céiu béé lépwo *acémun de Iésu!»

⁷⁰ Ke e pii mwo wo Pétéru pie: «Ûhu! Time é uce temehieng!»

Ke é alecehen, ke lépwona lé mu lang, ke lé pii ten mwo pie: «Uhuu! A juuju pie wogo pa céiu acémun den! Be wogo mwo, ke pa âbé mu Galilé †!»

⁷¹ Ke e pii mwouhi wo Pétéru pie: «ÉÉ! Geé téne! Time é uce temehi panaa! Wâé heme e pwocuhinaado tong wo Padué, hemepie é gele!»

⁷² Ke é he e mwo ko pii anaa, ke e okelo ko to na ali ja. Ke e bwo niimihi ali e caa pii ten wo Iésu pie: «Âneb- uhe a bwo okelo ko to te a ja, ke go caa ocié ko pi- wotéeta kong pie, time go uce temehié.»

Ke e é wo Pétéru.

Lé pé Iésu nge pele Pilate

Mataio 27.1–31; Luka 22.66–23.25; Ioane 18.28–19.16

15 ††É he mwo te junihe acaama, ke lé pitapitilé neibu ati ni *mwohuô te lépwo *Juif: wo lépwo caa te lépwo *apwoâpwailo, me lépwo apihuô, me lépwo *dotéén ko patén. Be nimelé me lé temehi aceli me lé pwo te Iésu. Ke lé cieeng, ke lé pééng nge céii *Pilate [pa gupéno te lépwo Roma]. ² Ke e tahimwoeng wo Pilate pie: «Kona te wogo kuti pa daame he lépwo Juif?»

Ke e hegi ne ten wo Iésu pie: «A juuju a bwopiinen dem ††.»

³ Ke lé pipé ne ko Iésu wo lépwo caa te lépwo apwoâpwailo, ke hiwon ni naado na lé pipé ne kon. ⁴ Ke e tahimwoeng mwo wo Pilate pie: «Kona woté? Te tice celi go hegi kon? Go teko téne ati ni naado na lé ko pii ne kom?»

⁵ †Kehe icehi ana time e uce hegi. Ke e te junihe téele kon wo Pilate.

†† Ni béé tii iitihi he pwo grek, ke e hen ni pwooti ce: Geme téne ne ha a maa a pwocihe tem. ††† 15.1 Luka 22.66 ††† A juuju a bwopiinen dem—Grek: Go caa teko pii. § 15.5 Ésaie 53.7; Maréko 14.61

Nimelé ko Barabas

⁶ Caa te cemang ne ko Pilate, ha a tan ko *Pacika, me e pawie mu he karépu pace céiu apulie celi nime a bele kon. ⁷ [Ke é ha a jo naa] ke pwo pa céiu apulie na pii kon pie Barabas, na lé pimu ibu he karépu me lépwo béén. Be lé taunuhi apulie he lé pwobwoni lépwo Roma.

⁸ Ke lé tehenebé pele Pilate ni apulie na hiwon jélé, ke lé ilehi kojaeng pie: «Go pwo ne teme a naado na caa te cemang ne kom me go pwo!»

⁹ Ke e hegi ne telé pie: «Kona nimewé me é pawie mwo Iésu, pa daame he lépwo Juif?»

¹⁰ Be e te temehi pie, lé ne Iésu ten wo lépwo caa te lépwo apwoâpwailo ha a pipwokon delé.

¹¹ †Kehe icehi ana wo lépwonaa, ke lé cine ni apulie beme lé pii pie: «Ne teme Barabas!»

Cemeiteeng ne ko a kuricé!

¹² Ke e tahimwolé mwo wo Pilate pie: «Kona ade celi me é pwo te pana geé pii kon pie 'Pa daame he lépwo Juif?»

¹³ Ke lé cihe me ubwo pie: «Cemeiteeng ne ko a *kuricé!»

¹⁴ Ke e tahimwolé mwo pie: «Kona ade aceli e pwo celi ta?»

Kehe icehi ana lé bwo te nihe cihe da me ubwo pie: «Cemeiteeng ne ko a kuricé!»

¹⁵ Ke wo Pilate ke e pawie ne telé Barabas, be nimen me lé piwâéeng ne ni apulie. Ke e patupwo Iésu ne te ni coda. Ke lé ahieng ko a bwaliwota, ke lé â cemeiteeng ne ko a kuricé.

Lé pihoonieng ne ni coda

¹⁶ Lé pé wie Iésu, ke lé â pwo a céiu napwomwo na ubwo. Ke lé tode ati ni mwocoda. ¹⁷ Ke lé pwo me e cuwohe a epwén na te junihe megele [pwohewii a epwéne pa apulie na piubwo nang, beme lé pihoonieng]. Ke lé péi a kuron ko ni mii acuwo na pwo dan, ke lé ne ole pwo punin.

¹⁸ Ke lé cuwo aujenieng, ke lé pii ten pie: «Bwocu, go pa daame he lépwo Juif! Adéiko!»

¹⁹ Ke lé ahi a punin ko a bewomeéle. Ke lé cumi ne kon, ke lé tidihii jililé he pwahamiin. ²⁰ Ke me lé caa nebwné a bwo pihoonieng, ke lé céi mu kon ali epwén megele. Ke lé te ne mwo kon ni epwéne. Ke é mu-lang, ke lé pééeng ngen, beme lé â cemeiteeng ne ko a kuricé.

Lé cemeite Iésu ne ko a kuricé

Mataio 27.32–44; Luka 23.26–43; Ioane 19.17–27

²¹ ††Pwo pa céiu apulie mu ha a pwomwo ubwo Cirène na pii kon pie Simon, pa caa te Alexandre me Rufus ‡. E piâbé lang, be e mwojuia mwobé mu ha apwoamu. Ke lé cuwokon wo lépwo coda, beme e canihii ali kuricé te Iésu. ²² Ke lé pé Iésu nge pwo a céiu tihii juwolé na pii kon pie Golgota, a bwopiinen pie 'pwo a piipuni apulie'. ²³ Ke wo lépwo béén, ke lé pineibuhi a tabe megele me a tabe na maga ††. Ke lé ne te Iésu, kehe icehi ana te muhi ten me e ûdu.

²⁴⁻²⁵ ††É he ko 9 ni inetéale ko acaama, ke lé cemeiteeng ne ko ali kuricé wo lépwo coda. Ke lé picéi metii, beme lé pipii ne kolé ni epwéne. ²⁶ [Ke lé cemeite ne pwo punin] a eaa acuwo na tii ne kon a watihe a bwo mele ten, pie: *PA DAAME HE LÉPWO JUIF.*

²⁷ Ke lé cemeite mwo lupwo alo apulie na lu pwotahinaado, ne he ni piduaa Iésu: wo pa céiu ne pwo juin, ke wo pa céiu ne pwo eaamun. { ²⁸ ††Ke wonaa, caa *pajuujuhi ana caa mi tii ne he ni tii iitihii ne kon pie: *Lé pwo me e pwocuhinaado; be lé pii pie, pa apwotahinaado.*

Ésaie 53.12

}

²⁹ ††Me lé alieng wo lépwona lé âdé ke âbé ha a duaan naa, ke lé tagilihi ni punilé, ke lé pijeta kon. Ke lé pii pie: «Aje, kona time uce wogo kuti pana me go tanahi ali *mwaiitihii, ke me go bo pacuuli mwo he na cié ni tan? ³⁰ Go piceluumiko mwo, ke go opé mu ko a kuricé naa!»

³¹⁻³² Ke lé pihoonieng mwo wo lépwo caa te lépwo apwoâpwailo me lépwo dotéén ko patén. Ke lé pipii telé pie: «E niimihi pie pa daame henye, lépwo *Isaraéla. Ke e temehi me e celuimi ni béén, kehe time e uce temehi me e piceluumieng mwo! Hemepie e ole mu ko a kuricé naa, ke wieli genye o bo céihii ne kon!»

Ke lu pihoonieng mwo lupwo alo na cemeitelu ne ko ni kuricé ne he ni piduaan.

E mele wo Iésu

Mataio 27.45–56; Luka 23.44–49; Ioane 19.28–30

³³ É he te ju goahen ehi, ke te ju melepiing ati ha amu §, die ko cié inetéale alecehe a goahen. ³⁴ ††Ke me teko ju cié ni inetéale, ke e toii me ubwo wo Iésu pie: «Éloi, Éloi, lama sabaktani?» A bwopiinen pie: «Padué hung, Padué hung, é mu ko ade na go pawieéo?»

³⁵ Ke me lé téneeng ne ni béén na lé mu lang, ke lé niimihi pie, e tode péroféta *Élia [beme e picani ten].

†† 15.21 Roma 16.13 ‡ Alexandre me Rufus—Wieli lupwo apihuô te ni acéihii ne Rome. †† Tabe na maga—A niin pie Myrrhe. A eti na me time nye téne a cunu. †† 15.24 Psaume 22.19 ††† 15.28 Ésaie 53.12 ††† 15.29 Psaume 22.8, 109.25; Maréko 14.58 § Ati ha amu—ai Ati pwo a bwohemwo. †† 15.34 Psaume 22.2

³⁶ †Ke wo pa céiu béélé, ke te téte kuti imi a mwaanu, ke e pate ha a tabe megele na maga ††. Ke e ne ko a ba-acuwo, ke e ne te Iésu beme e ûdu. Kehe lé pii ten wo lépwo béén pie: «Go mwo cuwo lang, be wieli nye o ali *Élia, hemepie e âbé neeng ole mu ko a kuricé!»

³⁷ Kehe icehi ana e cihe da me ubwo wo Iésu, ke ele a nenehen.

³⁸ Ke a mwaanu [na e capuhi bwonihi a duaan na ju-nihe iitih] ne ha a mwaiitih, ke te ju tie ne ha awiemen kuti, mu jeda die jeoté ko a baaéén.

³⁹ Pwo pa caa te coda roma na e cuwo ânebuhe Iésu, ke me e alihi a bwo mele ten, ke e pii pie: «A juuju pie wo pa apulie ce, ke pa *Naî Padué!»

Lé alieng wo léli toomwo

⁴⁰ †Pwo ni béé toomwo na lé mu lang mwo, na lé omehi mu ité: woélé me Maria Magdala, me Salomé, me Maria, nyaa te José me Cang (wo pana lé pii kon pie: Ewa Aiu). ⁴¹ Woélé kuti, na lé âcéi Iésu, ke lé picani ten, he e mwo tee mu ha amu Galilé. Ke hiwon ni béé toomwo na lé mu mwo lang, na lé taa céin mwo ne *Iérusaléma.

Neeng he iitih

Mataio 27.57–61; Luka 23.50–56; Ioane 19.38–42

⁴² Ati ni naado naa, ke tai pwo heme [paciile] a tan ânebuhe a *tan iitih te lépwo Juif. É he ni paciile, ke lé pwopweehi a piwiinaado ko a tan iitih.

⁴³ É he babwén, ke e tehenebé wo Josef, pa apulie mu ha a mwopopwaalé Arimaté, pa céiu apulie na pwo a niin ne ha a mwopitautinaado te lépwo Juif. Wo pali e teko mwoiu ko ucéihi ace bwo tuiebé na a *Mwametau te Padué. E pipamwouieng, ke e â pele pa daame Pilate, ke e ilehi a éé Iésu. Be nimen me e pé a één ânebuhe a bwo tabuhi na a tan iitih.

⁴⁴ Ke me e téne wo Pilate pie e caa mele wo Iésu, ke e téetih. Ke e tode pa caa te coda, ke e tahimwoeng pie: «Kona caa bwolihi ace bwo mele ten?»

⁴⁵ Ke e piuti ten. Ke wo Pilate, ke e ne a pihuô te Josef, beme e pé a éé Iésu. ⁴⁶ Ke e engen wo Josef, ke e â patuwo a éé Iésu mu ko a kuricé. Ke e tawiieng ko a mwaanu na e pwocuhin. Ke e pééeng, ke e neeng he iitih, ha a pwon na ini ne ha a péi. Ke nebwén, ke e papitibehi a pilehe péi, beme e capuhi bwonihi ali pwon. ⁴⁷ Ke wo Maria Magdala, me Maria nyaa te José me Cang, ke lu te alihi a duaan na e ne Iésu hen.

E mulie cemwo wo Iésu

Mataio 28.1–8; Luka 24.1–12; Ioane 20.1–10

16 [É he capéto ko a babwén] he caa nebwén a *tan iitih te lépwo *Juif, ke lé pwocuhi a tabe

† 15.36 Psaume 69.22 †† Tabe megele na maga—A tabe megele na time uce ubwo a cuhin, na pitili hen me a tabe. ‡ 15.40 Luka 8.2–3

ûde wo Maria Magdala, me Salomé, ke wo Maria nyaa te José me Cang, beme lé â timi a éé Iésu kon. ² He pwoiitih, he e taawie na a téale, ke lé â he iitih. ³⁻⁴ É nge he pwaaden, ke lé pipii telé pie: «De e bo titééhi ne tenye ali péi mu ha ali pomwa ko ali mwa péi? Be te nihe ubwo!»

Ke me lé tehene ngen, ke lé alihi pie caa titééhi! ⁵ Ke lé taa ha ali mwa péi, ke lé ali pa nahi aiu †† he e ko tebwo pwo jui, ke e ne a jame epwén na pwojo. Ke lé téetih, ke nihe mwotilé.

⁶ Ke e pii telé pie: «Geé nemwo pwo me mwotikewé! Geé hane Iésu, pa mu Nazaret, pali lé cemeiteeng ne ko a *kuricé. Kehe e caa mulie cemwo mu ha amele, ke caa time uce e éni! Be éni ali duaan li lé neeng hen. ⁷ †Kehe geé mwojuia, ke geé â pii te Pétéru me lépwo béé acémun pie: “E ucéikewé ne Galilé wo Iésu, ke geé bo alieng nelang, pwohewii ana e caa pii tewé.”»

⁸ Lé te â wie kuti mu ha ali mwa péi wo léli toomwo, ke lé te téte kuti. Be te nihe emegéi nalé, ke éjén jélé, ke time lé uce pii te ni apulie hauli, be te nihe mwotilé.

E pihabwiieng de ni apulie ten

Mataio 28.9–20; Luka 24.13–53; Ioane 20.11–23; Apostolo 1.6–11

—Maria Magdala

⁹ E caa mulie mwo wo Iésu he pwoiitih, he mwo nihe acaama. Ke e te mi pihabwiieng de Maria Magdala, égi toomwo li e pwo me wâé nang, li e pwo me lé engen kojaeng li 7 duéé.¹⁰ Ke e âbé wo éje, ke e piuti ana e alihi te lépwo béé Iésu, na élé ha a piwahin.

¹¹ Ke lé téne he e pii telé pie: «E caa mulie cemwo wo Iésu! Be é alieng!»

Kehe icehi ana time lé uce céihi ne kon.

—Lupwo alo acémun den

¹² Pwo lupwo alo *acémun de Iésu, na lu piâ pwo pwaaden mu ha a pwomwo ubwo. Ke e pihabwiieng delu wo Iésu, kehe caa ité a bwo alieng.¹³ Ke lu mwojuia mwo, beme lu â piuti te lépwoli béé acémun, kehe icehi ana time lé uce céihi ne kolu!

—Lépwo 11 apostolo ten

¹⁴ ††Ke a bénebwénen, ke e pihabwiieng de lépwo 11 *apostolo ten wo Iésu, he lé mwo ko wiinaado. Ke e péélelé, ke e pii telé pie: «Te junihe mwoiu ni puniwé! Muhi tewé me geé céihi he lé pii tewé pie, é caa mulie cemwo!»

¹⁵ ††Ke e pii telé mwo pie: «Geé engen pitih a bwohemwo, ke geé â patemehi a Pwooti Wâé te ati ni

†† Pa nahi aiu... Pa âcélo. Omehi Âcélo ne ha a Niinaado (Vocabulaire) ha anebwén ko a tii. †† 16.7 Mataio 26.32; Maréko 14.28 ††† 16.14 1 Korénit 15.5 ††† 16.15 Apostolo 1.8

apulie[†].¹⁶ ††Ke wo pana e bo céihi ne kong, ke o bo pu-ueng, ke o bo celuimieng, ke e bo mulie. Ke wo pana time e uce céihi, ke o bo tautieng, ke o bo pwocuhi-naado ten.¹⁷ †Weengi a béhabwiinen ne ko nina lé céihi:

Lé o bo peni ni duée ne he niing;

Ke lé o bo cihe he ni béé pati apulie na te ité;

¹⁸ ††Ke o te jan me lé imwi ni bwien ne he ni ilé;

Ke me lé ûdu ace tabe celi nye mele kon[‡], ke time lé o uce mele;

† Te ati ni apulie—Grek: Te ati nina e tabuhi [wo Padué].

†† 16.16 Apostolo 2.38 ‡ 16.17 Apostolo 2.4, 8.7 †† 16.18 Luka 10.19; Apostolo 28.3–6 ‡‡ Lé imwi ni bwien...lé ûdu ace tabe celi nye mele kon—A bwopiinen pie, *mepie*

Ke lé o bo ne ni ilé ko ni cunu, ke bwo wâé jélé.»

¹⁹ ‡‡É alecehe a bwo picuhe telé naa, ke céida he mi-iden Padaame Iésu, ke e tebwo *pwo a jui Padué.²⁰ ‡‡Ke wo lépwo acémun den, ke lé engen pitihhi a bwohemwo, beme lé patemehi a Pwooti Wâé. Ke e picani telé wo Padaame. Ke e *pajujuhi a Pwooti na lé patemehi, be e ne telé a junuun, beme lé pwo ni in-enaado na lé téetihhi ne ni apulie.

‡‡ 16.19

Apostolo 1.9–11, 2.33–34 ‡‡‡ 16.20 Apostolo 14.3; Ébéru 2.3–4

Luka

na e tii wo

Atabuhi ko a tii

Woo na e tii a tii ce?

Wo Luka, pa dotéén (omehi 4.14), na e âcéi Paulo (omehi 16.10 me 4.11). Pa Grek. Wieli te weeng cehi pa apulie na e pwotii ne ha a Tii Iitihi na time uce pa Juif. E hane ati nina lé pii ke lé tii ne ko Iésu wo lépwo apajujueng, ke e tii beme e pipwoiipihi. (Omehi 1.1–3.) A bwo pwotii ten, ke e habwii pie, weeng, ke pa acémun.

E tii éniile?

Ha awieme a jo 60 me 65, ânebuhe a bwo tanahi na a pwomwo ubwo Iérusaléma ha a jo 70.

E tii me dee?

Te pa céiu apulie na a niin pie Téofile, pa apulie na piubwo nang ne pele lépwo Roma, na lé pihuô ne ha amu naa. Caa pa céiu acéihi ne ko Iésu Kériso, ke e caa picaa ni naado ko a céihi (1.4). A nii , ke a bwopiinen pie 'wo pana eânimen de Padué'. Wieli a ocine mwo ko ati lépwo acéihi na hiwon jélé, na time uce lépwo Juif, ke lé mulie ité koja a amu Judé.

É ko ade na e tii?

E habwii wo Luka pie, a paa a céihi tenye ne ko Iésu, ke a naado na mang ke juuju.

Ade ace âne a tii ce?

A , ke a tii na hején ko a mulihe Iésu koja ni béé tii. Hiwon ni niide a tii ne ha a pwahamii tii 10—18 na te tieden he ni , me .

E habwii wo Luka pie, wo Iésu Kériso ke pa apulie na hején nang. Ke e piuti a bwo mu te Iésu me ni apulie, me a pipwoééhe ten delé (4.18–19; 19.41).

Wo Iésu, ke e te junihe pipwoééhe nina tice niihelé me nina pwoééhelé:

- wo lépwona katia jélé (17.12–19);
- wo lépwona tice delé (16.19–31);
- ni toomwo (7.43–48);
- ni toomwo depwele (7.11–17);
- wo lépwo atai mwani: wo lépwona lé pitéétilé ne ni apulie (18.9–14);
- wo lépwona ta ni mulihelé (7.36–50).

Ha a benaamwon de Iésu, ke te piticenaado ne ko ni toomwo koja lépwo aiu. Kehe icehi ana nye alihi ne ha a tii te Luka pie, time e uce niimihi pie wonaa wo Iésu. Ke wo Luka, ke e tii ni nii ni toomwo na lé âcéi Iésu (8.2–3; 24.10).

E piuti mwo wo Luka ne ha a tii ce, nini:

- a pwoiitihi, ke te junihe ubwo ne ha a mulihe Iésu (5.16);
- a penem de a Jenen Iitihi ne ha a mulihe Iésu (omehi 1.80), me ni apulie te Padué;
- a penem de ni âcélo (pwahamii tii 1, 2).

A bwomune a tii te Luka

Piâbeele wo Iésu ke pipwopweeng
 Ni penem de Iésu ne Galilé
 Atabuhi kon
 Lé tabuhi cubwonieng wo lépwo apihuô
 E pacémuni lépwo acémun den
 Woo pa Iésu naa?
 E pwo-ocine heme e pacémuni ni apulie
 Te junihe pwojunuu Iésu
 A bwo mu telé me lépwo 12 acémun den
 E â Iérusaléma
 E pacémuni ni apulie ten
 E paténe lépwo apihuô li lé cubwonieng
 E ocié ko patemehi a bwo mele ten
 Ni penem den ne Iérusaléma
 A bwo mele ke mulie cemwo ten

E pii beetihi a tii ten wo Luka

1 ¹⁻³ †Bwocu tem, go pa daame Téofile. É tii a tii ce, beme é piuti tem ati ni naado na e caa pwo wo Padué ne peleme, ne alecehe a bwo pituie te Iésu ††. Hiwon ni apipajuuji na lé alihi ni naado naa, ke lé patemehi a *Pwooti Wâé. Ke wo lépwo béén, ke lé pwo me lé piuti ne he tii. Ke woéo mwo, ke me é hane ehi, beme é tii ke cile ehi a jepule be me dem, ne ko ati ni naado naa. ⁴ Be me wonaa, ke me go bwobe alihi pie, a juuju a pwooti na go caa hegi.

Zakari me Élisabet

⁵ É ha a benaamwon na e mwo daame ne *Judé wo Érode pa Bécéiuhén ‡, ke pwo pa céiu apulie lang, na pii kon pie Zakari, pa *apwoâpwailo mu ha a pwomwoiu te Abia [mu ha amu te *Aarona]. Ke ê mwoden, wo Élisabet, ê piebehi Aarona. ⁶ Ke tai woilu, ke mwomwon julu ne ânebuhe Padaame Padué. Be lu piténédehi ati ni patén me ni pihuô ten, ke te tice celi me tautilu kon. ⁷ Kehe icehi ana te tice naîlu, be pwocoon me pwo naî Élisabet. Caa tai ukéiu julu.

E âbeeti Zakari pa céiu âcélo

⁸ Ha a céiu tan, ke e pwo a penem den wo Zakari, ne ha a *mwaiitihii te Padué. Be te a tan na lé penem ibu hen me ni béén. ⁹ ††Âcehi a bwopwonen de lépwo apwoâpwailo, ke lé picéi metii, beme lé pipégali pace apulie mu kolé, na me e taa ha a duaan na iitihii, ne ha a mwaiitihii. É lang, he na cini *encens* [ni dep na ûde wâé heme nye cini] beme âpipati te Padué.

† 1.1 Apostolo 1.1 †† Ne alecehe a bwo pituie te Iésu—Grek: É ha atabuhi kon. ‡ Érode—Omehi Érode ne ha a Niinaado (Vocabulaire) ha anebwén ko a tii. †† 1.9 Exode 30.7

Ke é ha a tan naa, ke hiwon ni metii te Zakari. Ke e taa pwo a penem den. ¹⁰ Nihe hiwon ni apulie † na lé ko pwoiitihii ne jeoté pwomwo, he e mwo ko cini *encens*. ¹¹ Ke é he e ko wonaa, ke e te âbeetieng kuti wo pa céiu *âcélo te Padaame, na e cuwo pwo jui ne ko apwoâpwailo na mu cini *encens* ne pwon. ¹² Ke e téetieng wo Zakari, ke te nihe mwotieng.

O bo pwo pace naîm

¹³ Kehe e pii ten wo pali âcélo pie: «Go nemwo pwo me mwotiko, go Zakari, be e caa téné ni pwopwoiitihii teu wo Padué. Ke [bo pwoapulie ko] mwodem, ke e bo picile ewa, ke go bo pitooi kon pie Ioane. ¹⁴ Ke bo piwâênimeu, ke bo hiwon mwo ni béén na lé bo pipwodéén mwo. ¹⁵ ††Pa naîm naa, ke bo pa apulie na nihe ubwo nang ne ale Padaame. Ke iitihii me e ûdu tabe megele, me ace céiu bwimwoiu, be caa ju tilieng na a *Jenen Iitihii, he e mwo te mu tina nyaa ten.

¹⁶ «Ke nihe hiwon lépwona mu ha a puapulie *Isaraéla na e bo péélé ngemwo pele Padaame Padué helé. ¹⁷ ††E bo mu kon a junuu a Jenen Iitihii, pwohewii *péroféta Élia ânebun. Ke e bo cile ehi me pwopweehi a puapulie ten, ânebuhe a bwo tuie te Padaame. Ke é mu kon, ke wo lépwo caa, ke lé bo pinenimelé ne ko ni naîlé §. Ke lé bo pininim wo lépwona time lé uce piténéde Padué, ke lé o pwohewii lépwo apulie na lé mwomwon ne ale Padué.»

É o woté ko ace bwo céihi nen dong?

¹⁸ E pii wo Zakari te pali âcélo pie: «É o woté ko ace bwo céihi ne ko ana go ko pii? Be caa te nihe ukéiu jo, ke é mwodong, ke caa te ukéiu nang mwo.»

†† Nihe hiwon ni apulie—Grek: Ati a bele [te Padué]. ††† 1.15 Nombres 6.3 ††† 1.17 Malachie 3.23–24; Mataio 17.11–13 § 3e phrase—ai O pwo a péém ha awieme ni nyaa me caa, me ni naîlé.

¹⁹ †Ke e hegi ne ten pie: «Woéo, Gabriel, pa âcélo na é mu cuwo ale Padué, beme pa apenem den. Weeng na e neéo bé, beme é pipatemehi tem a jepule wâé ce.

²⁰ Wâé heme go temehi pie, lé o bo tuie ati ni naado na é pii tem, ha a benaamwon na e caa ne wo Padué. Ke he icehi ana wogo, ke time go uce céihi ne kon! Ke o huuhu go, die ha a tan na o bo cuwo ati nina é pii tem!»

²¹ Ke é he lu tee ko picihe wo Zakari me pali âcélo, ke e mwo ko ucéieng a pubu apulie. Ke lé téetihí, be te ni he bwolieng lang. ²² Me e wie mulang, ke caa huuhu nang. Ke e te ju pwo inenaado telé ko a in. Ke lé temehi pie pwo celi e alihi, celi e âbé mu ko Padué.²³ Nebwén, ke e panebwénihí a penem den wo Zakari ne *huâ iitihí, ke e âmwo ha a pomwa ten.

Pwoapulie ko Élisabet

²⁴ É alecehen, ke pwoapulie ko mwoden Élisabet, ke e te mu huâ he na nim ni wole. Ke e tee niimihi pie, ²⁵ †Te nihe wâé Padaame ne kong, be é ânebun, ke te nihe tanim jo, be êna te tice naíng. Ke e piwâééo, ke e pwii mu huíng a bwo tanim jo.'

Pipatemehi a bwo âbeele te Iésu

²⁶ Caa 6 ni wole na pwoapulie ko Élisabet. Ke wo Padué, ke e neopé pa âcélo ten, wo Gabriel, ne Nazaret ne Galilé, ²⁷ ††ne pele é céiu ewa toomwo na pii kon pie Maria. Wo ênaa, ke lu picihe me † pa apulie na pii kon pie Josef, pa piebehi pa daame *Davita.

²⁸ Ke e âbeetieng pa âcélo, ke e pii ten pie: «Adéiko, go Maria! Be e pelem wo Padaame Padué, ke wâé ten go.»

²⁹ Ke e téetihí wo Maria, be time e uce temehi nina e pii ten. Ke e piniimihi pie: 'É ko ade na e adéié wo Padué?'

³⁰ Ke e pii ten wo pali âcélo pie: «Go nemwo pwo me mwotiko, go Maria! Be e piwâéko wo Padué, ke e pipé-galiko. ³¹ ††Ke bo pwoapulie kom, ke go bo picile pa cuwo nahi aiu, ke go bo toii niin pie Iésu †. ³² †††Ke bo pa apulie na nihe ubwo nang ne he pwahamii Padué. Ke o bo toii kon pie 'Pa *Naî Padué na e daaité'. Ke wo Padué, Padaame hen, ke e bo ne ten a pwodaame te pa daame Davita, pa watihen. ³³ Ke bo pa daame he a puapulie Isaraéla dieli mwo, ke o te tice anebwén ko a pihuô ten.»

³⁴ Ke e pii wo Maria te pali âcélo pie: «Kona anaa, ke o woté ace bwopwonen?! Be time gemu uce pipule me pa aiu hung, ai pace céiu aiu!»

† 1.19 Daniel 8.16, 9.21 †† 1.27 Mataio 1.16, 18 † Lu picihe me—Ne pele lépwo Juif, ke time uce a bwopiinen pie, lu pipule ibu. †† 1.31 Ésaie 7.14; Mataio 1.21–23 †† Iésu—A bwopiinen he pwo ébéru pie, Wo Padaame, ke e celuimikenye. ††† 1.32–33 2 Samuel 7.12, 13, 16; Ésaie 9.6

O bo wonaa mu ko a Jenen Iitihí

³⁵ E hegi ne ten wo pali âcélo pie: «E bo opé ne kom †† a Jenen Iitihí, ke bo e pelem a junuu Padué na nihe e daaité. Ke wo pa cuwo nahi ewa na go bo picileeng, ke weeng kuti na e pipégalieng wo Padué, ke bo toii kon pie pa Naî Padué.

³⁶ «Go téne, lé mu pii ânebun ko é béém Élisabet pie: "Te tice naî!" Kehe icehi ana e bo picile ewa, be ko pwoapulie kon ni, caa 6 ni wolen. ³⁷ †Be te tice aceli pwocoon ne te Padué!»

³⁸ Ke e hegi ne ten wo Maria pie: «Woéo é apipenem de Padaame, ke me e pwo ne tong ana nimen kon.» Ke me wonaa, ke e engen kojaeng pali âcélo.

E â caniê Élisabet wo Maria

³⁹⁻⁴⁰ É he ni tan alecehen, ke e engen wo Maria me e â caniê Élisabet. A mwopopwaalén ten, ke e mu pwo a juwole ne ha a céiu duaan ko a Judé. E taa ha a mwa †† wo Maria, ke e pwobwocu ten.

⁴¹ Me e téne a bwo pwobwocu te Maria wo Élisabet, ke e pipenem a ewa na e kon, ke caa ju tili Élisabet na a Jenen Iitihí. ⁴² Ke e toii da pie: «E te nihe adéiko wo Padué, ke e ne me ubwo go koja ati ni ewa toomwo! E te junihe *adéi a ewa na e kom. ⁴³ Nihe a naado na nihe ubwo ne kong! Be go âbé caniêéo, wogo é nyaa te Padaame hung!

⁴⁴ «Go téne, go é ju bééng, heme é téne a pwocihe tem, ke e pipwodéén ali cuwo ewa li e kong, ke e pipenem ne tinang! ⁴⁵ Adéiko, be go caa céihi pie, e bo te pacuwohi nina e pii tem wo Padaame.»

Nyebi te Maria

⁴⁶ †††E pii wo Maria pie:

«Pipwodéén a pwonimung, ke é pipaunu Padaame.

⁴⁷ Piwâénimung kon, be pa aceluimié!

⁴⁸ E pwo me pwonaado ne kong, é apipenem den na wahin jo.

Lé o pii kong pie: "Adéi éje!" ati ne ni niide apulie.

⁴⁹ Be e picani tong ko a juin, wo pana nihe ubwo nang. E adéié wo Pana iitihí a niin.

⁵⁰ †††Ubwo a bwo wâé nang me de nina lé paciitieng.

E picani telé dieli mwo.

⁵¹ †††E penem ko a junuun,

††† E bo opé ne kom... Grek: E bo taluiko pwohewii a démen. § 1.37 Genèse 18.14 †† A mwa—Grek: A mwa te Zakari. ††† 1.46 1 Samuel 2.1–10 †† 1.50 Psaume 103.13, 17 ††† 1.51 2 Samuel 22.28

e ta papiideni nina lé cibehede.

⁵² †E patupwo ni daame

mu pwo ni atebwo telé,

ke e eti da lépwona wahin jélé.

⁵³ ††E ne ni naamuu nina tice delé;

e pamwojuiéhi nina pwo delé,

heme tice âne ilé.

⁵⁴ †E picani te a puapulie ten,

a puapulie Isaraéla,

pa apipenem den,

be e pipwoééhen.

⁵⁵ ††Be e *piapwo ne te ni watihenye,

ne te *Abérama me ni piebehieng.

Ke e pacuwohi nina e caa pii.

O time e uce neulé dieli mwo.»

⁵⁶ E mwo te mu pele Élisabet wo Maria he na cié ni wole. Ke e bwo mwojuia ngemwo pelen.

A bwo âbeelee te Ioane

⁵⁷ Tuie nge ha a benaamwon na me e picile ewa hen wo Élisabet, ke e picile pa ewa aiu. ⁵⁸ Ke lé téne a jepule kon ne nina lé mu mwonung, me a pwomwoiu ten, ke lé temehi pie e te junihe adéieng wo Padaame. Ke lé tai pipwodéén ati, ibu me weeng. ⁵⁹ ††Alecehe a naadenitan na céiu, ke lé âbé me lé *pwotegoop te ali cuwo nahi ewa [pwohewii ana e pii ne ni *patén de Moosé]. Nimelé me lé ne ten a nii caa ten: Zakari.

⁶⁰ Kehe icehi ana e pii telé wo nyaa ten pie: «Ûhu! O pii kon pie Ioane.»

⁶¹ Ke lé pii ten pie: «É mu ko ade? Be te tice ha a pwomwoiu tem celi e pé a nii apulie naa.»

⁶² Ke lé te ju pwo inenaado te caa ten, Zakari, beme lé tahimwoeng pie: «O nimem me pii pie woté kon?»

O pii kon pie Ioane

⁶³⁻⁶⁵ Ke e pwo inenaado telé wo Zakari, beme lé ne ten ace metii, beme e pwotii ne hen, ke e tii pie 'Ioane'. Ke me e tii a nii Ioane, ke e te cihe mwo kuti, ke e pipaunu Padué.

Ke lé téetihii [ne nina lé téneeng] ke mwotilé. Ke lé piuti a jepule kon ne ha ati ni piduaan ko a juwole ne ha amu Judé. ⁶⁶ Ke é he lé téne a pwooti naa ne ni apulie, ke lé te nihe pitautinaado, ke lé pii pie: «Éé! O te nihe ubwo celi e bo pwo wo pa cuwo nahi ewa naa!» Be e pelen wo Padaame.

E paunu Padué wo Zakari

⁶⁷ Wo Zakari, pali Caa te ewa, ke caa ju tilieng na a Jenen Iitihii, ke e pipatemehi a pwooti na e ne ten wo Padué. Ke e pii pie:

⁶⁸ ††«Pipaunu Padaame,

Padué he a puapulie Isaraéla!

E celuimikenye, me tuwokenye

mu he ni ta pwo tenye.

⁶⁹ ††Be e nebé pa *aceluimikenye,

na nihe pwojunuun,

wo pa piebehi Davita,

pa apipenem den.

⁷⁰ Lé pipatemehieng bwolihi

ne ni péroféta na e pipégalilé.

⁷¹ †Be e caa pii pie:

«É bo celuimikewé

koja nina lé pii me ta gewé.»

⁷² ††Ubwo a pipwoééhe ten

ne ko lépwo watihenye.

E te pacuwohi a piapwo ten,

⁷³ ††na e ne te Abérama, caa tenye,

ne ha a bwo eânimen den.

Be e ko pii ne konye pie:

⁷⁴ «É celuimi ni naîm,

koja lépwona lé pii me ta jélé,

ke lé o pipenem dong,

be o time o uce mwotilé.

⁷⁵ ††Ke o bo wâé tong jélé.

Ke o wâé ni pwonimelé,

na ati he ni mulihelé

ne éni pwo bwohemwo.»

⁷⁶ ††Ke e pii mwo wo Zakari [ko pa naîn Ioane] pie: «Wogo pa naîng:

O bo pii kom pie pa péroféta,

pa apipépwooti te Padué

na e mu âda he miiden.

Go bo â ânebuhe Padaame,

me go pwopweehi a pwaadeniin.

⁷⁷ ††Go o pii te a puapulie ten pie:

E bo celuimikewé!

E bo pineuhi ni ta pwo tewé!

⁷⁸ ††Nihe ubwo a bwo wâé nang!

E pébé pelenye a pwéélang,

a bwo caama te a téale.

⁷⁹ A pwéélang na e pwoeihii

nina lé mu ha a melepiing.

Ke e habwii telé a pwaaden

mu ha amele nge ha a péém.»

† 1.52 Job 12.19, 5.11; Psaume 147.6 †† 1.53 Psaume 34.11
‡ 1.54 Psaume 98.3 †† 1.55 Genèse 17.7; Miché 7.20 †† 1.59
Genèse 17.12; Lévitique 12.3; Luka 2.21

††† 1.68 Psaume 72.18 ††† 1.69 Psaume 132.17 § 1.71 Psaume
106.10 §† 1.72 Genèse 17.7; Psaume 105.8–9 §†† 1.73 Genèse
22.16–17 §† 1.75 Tit 2.12–14 §†† 1.76 Ésaie 40.3 §† 1.77 Jérémie
31.34 §† 1.78 Ésaie 60.1–2

Caa ubwo Ioane

⁸⁰ Caa ubwo pali ewa aiu, Ioane, ke piubwo ngen mwo a junuu a Jenen Iitihhi ne kon. Ke e mulie ne ha a da, die ha a tan na e bo pihabwiieng de a puapulie Isaraéla.

A bwo âbeelee te Iésu

Mataio 1.18–25

2 ¹⁻² É ha a benaamwo amu naa, he e daame ubwo te lépwo Roma wo Auguste, ke e mwo gupéno ne Siri wo Kirinius, pa apenem den. Ke e huôhi wo Auguste pie, me pine a jéhi ni apulie na ati he ni amu na lé mu ko a mwôhû ten. Ke he bwo te a bécéiuhen me lé pwo anaa. ³ Ke lé engen ati ni apulie, ke lé caa muko pipiiden nge he ni mwopopwaalé te ni ukéiu telé, beme lé tii ni niilé.

⁴⁵ Ke wo Josef, ke e engen mu Nazaret ne Galilé beme e â Bétéléma ha amu *Judé, beme e â tii a niin. Be he li e tuie nelang wo pa daame *Davita, pa watihen. Ke e pé Maria ê mwoden, na caa pigiaa nang, be e ucéihi a bécéiuhe naîn.

⁶ Ke me lu mu Bétéléma, ke e tuiebé a benaamwon na me e caa picile ewa hen wo Maria. ⁷ Ke e picile pa bécéiuhe naîn. Ke e taluieng ha a pwotuun, ke e neeng ha a mwowiewota, be tice ahilu † [be nihe hiwon ni apulie].

Lépwo awéihi muto

⁸ É ha a bwén naa, ke pwo ni apulie na lé wéihi ni muto telé ne ha a céiu dua juwole.

⁹ Ke e te tuiebé kuti pa céiu *âcéló te Padaame, ke e cuwo ânebuhelelé, ke te pwéélang aujenilé kuti a bwo ubwo na a wâe te Padaame. Ke te junihe mwotilé kuti.

¹⁰ Ke e pii telé wo pali âcéló pie: «Geé nemwo pwo me mwotikewé, be é pébé céiikewé a pwooti na wâé, na lé o te nihe pipwodéén kon ati ne ni apulie! ¹¹ Be é ha a bwén ce, ke e caa âbeelee pa aceluimikewé, ne ha a mwopopwaalé te Davita: wo pali *Mesia ††, Padaame [li géé teko ucéieng]. ¹² Weengi a inen beme géé ali temehieng: Geé o too pa cuwo ewa na taluieng ko a pwotuun, ke e pule ha a mwowiewota.»

¹³ Ke me wonaa, ke lé te tuie opé kuti mu he miiden ni béé âcéló na nihe hiwon jélé. Ke lé aujeni pali âcéló, ke lé pwonyebi me pipaunu Padué:

¹⁴ ‡«Pipaunu Padué jeda he miiden!

Péém ne éni pwo bwohemwo,
me de ati nina wâé ten jélé!»

Lé â caniê pali cuwo ewa

¹⁵ É alecehen, ke li âcéló, ke lé engen koyalé, ke lé mwojuia daamwo he miiden. Ke lé pipii telé wo lépwo awéihi muto pie: «Genye â Bétéléma, me nye alihi aceli e tuie, ana e ko pii tenye wo Padaame.»

¹⁶ Ke lé te piepin ko engen kuti, ke lé too Maria me Josef, me pali cuwo ewa he e ko pule ha a mwowiewota. ¹⁷ Ke me lé caa alieng, ke lé â uti ati te ni apulie li e pii telé wo pali âcéló ne ko pali cuwo ewa. ¹⁸ Ke lé te nihe téetihi ati ne nina lé téne.

¹⁹ ††Ke e te ju cile ehi ati ni naado naa wo Maria, ke e bo tee pitautinaado ne ha a pwonimen.

²⁰ Lé mwojuia ngenmwo li awéihi muto, ke lé nihe pwonyebi me paunu Padué ko ati ni naado na lé alihi me téne. Be te tai cuwo ati li e pii telé wo pali âcéló.

Lé habwii Iésu ne huâ iitihhi

²¹ ††É alecehe a naadenitan na céiu, ke lu pé ngen pali naîlu wo Josef me Maria, beme *pwotegoop ten pwohewii ni *patén de Moosé. Ke lu ne me a niin pie Iésu, ali nii apulie li e caa mi pii wo pali âcéló, ânebuhe a bwo pwoapulie ko Maria.

Lu neeng de Padué

²²⁻²⁴ †††Tuiebé a benaamwon na wo Maria, ke me e *pwoâpwailo ko a bwo wâé nang ne pele Padué †††, alecehe a bwo picile ewa ten. Be e caa tii ne he ni patén de Moosé pie: *Wâé heme e ne lupwoce uiajaap, ai lupwoce bun.*

Lévitique 12.8

É mu ko anaa, na lu â *huâ iitihhi ne *Iéusaléma wo Maria me Josef, beme lu pwoâpwailo. Ke lu pé ngen ali cuwo ewa, beme lu neeng de Padaame. Be caa tii mwo ne he ni patén pie: *Pa bécéiuhe ewa aiu, ke a de Padaame.*

Exode 13.2

E pipwoun de Padué wo Siméon

²⁵ [É ha a benaamwon naa] ke pwo pa céiu apulie ne Iéusaléma na pii kon pie Siméon, pa apulie na e mwomwon, ke e pipwoiipieng ne ale Padué. Ke e tee ucéihi a bwo tuie te pa Mesia, pa aceluimi na a puapulie *Isaraéla. Ke e huîin a *Jenen Iitihhi.

²⁶ Ke e caa pii ten a Jenen Iitihhi pie: «Go téne go Siméon, go o mwo te alihi a bwo tuie te pa Mesia te Padaame Padué, ânebuhe ace bwo mele tem!» ²⁷ Ke e pahedeeng nge ha ali *mwaiitihhi. Ke he te ju é ha a be-

†† 2.19 Luka 2.51 ††† 2.21 Luka 1.31 †††† 2.22 Lévitique 12.1–8; Exode 13.2, 12 †††† Pwoâpwailo ko a bwo wâé nang ne pele Padué—Âcehi a pwoiitihhi te lépwo Juif, kehe wâé heme e pwo a âpwailo naa ê toomwo, ha a bé40 he ni tan alecehe a bwo piâbeelee ewa ten. Omehi mwo a Pwoiitihhi ne ha a Niinaado (Voculaire) ha anebwén ko a tii.

† Tice ahilu—Grek: Tice ahilu ne ha a mwa na lé mu mu hen ne ni coho. †† Mesia—Kériso ne he ni Tii Iitihhi he pwo pwopwaalé. Omehi Ioane 1.41. ‡ 2.14 Luka 19.38

naamwon naa kuti, na lu ko pé ngen Iésu wo lu nyaa me caa ten, beme lu habwiieng te Padaame pwohewii li patén. ²⁸ Ke e pé pali cuwo ewa wo Siméon, ke e *adéi Padué, ke e pii pie:

²⁹ «Jenaa ni, go Padaame, ke [é pipwodéén] woéo pa apipenem dem! Go pééo ne pelem, ne ha a péém dem. Be caa pacuwohi ana go caa pii. ³⁰ †Ni naamiing, ke lé ali pa aceluimi ati ni puapulie na go neeng deme, ³¹ na go caa pipwopweeng ne ânebuhe ni puapulie. ³² ††Pa pwéélang ko a bwohemwo, ke a bwo ubwo na a wâé te a puapulie tem, Isaraéla.»

³³ Wo lu nyaa me caa te pali cuwo ewa, ke lu téetihi ni na e pii ne kon wo Siméon.

³⁴ †Ke e adéilu, ke e pii te Maria pie: «É mu ko pa naîm, ke bo hiwon ne Isaraéla nina lé bo tupwo, ke hiwon mwo nina lé bo cuwoda. Ke bo pa inenaado te Padué, ke lé bo téétieng ni béé apulie. ³⁵ Be o bo pwéélang ko ni bwo niimihinaado na e ha aduwo ne te ni apulie. Ke me wogo, go êje, ke o te nihe cunu go kon, pwohewiin heme e woli a pwonimem ace teua.»

E pwo-olé te Padué wo Anne

³⁶ É ha a benaamwon naa, ke e ko mu [huâ iitih] é céiu toomwo péroféta na pii kon pie Anne, ê naî Fanuel, mu ha a pwomwoiu te Asser. Wo ênaa, ke lu pimu me pa aiu hen, he na te ju 7 ni jo, ke e mele ko-jaeng wo panaa. Ke wo Anne, ke caa ukéiu nang, ne ha a bwo depwele ten ††. Be caa 84 ni jo hen jenaa. ³⁷ Ke e mu huâ iitih heme bwén ke pwang, beme e pipenem de Padué, ke me e pwoiitih ke pipatupwo wiinaado me ûdu. ³⁸ Ke e tuiebé he lé ko mu lang wo Siméon [me pali cuwo ewa, me lu nyaa me caa ten]. Ke me e alilé, ke e pwo-olé te Padué, ke e pwojepule ko Iésu te ati ni apulie na lé ucéih ace bwo tuiebé te pa Mesia beme e celuimi ni apulie Iéusaléma.

Lé mwojuia ngemwo Nazaret

³⁹ ††Wo lu nyaa me caa te Iésu, ke lu pacuwohi nina e pii ne he ni patén de Padué: [ni naado na nye mu pwo heme e tuie a cuwo ewa]. É he lu caa pacuwohi ati, ke lu mwojuia mwo ne Nazaret ne ha amu Galilé.

† 2.30 Ésaie 52.10; Luka 3.6; Tit 2.11 †† 2.32 Ésaie 42.6, 49.6, 52.10 † 2.34 Ésaie 8.14; Mataio 21.42; 1 Pétéru 2.8 †† A bwo depwele ten—Veuvage. †† 2.39 Mataio 2.23

Caa ubwo Iésu

⁴⁰ Piubwo da Iésu, pali cuwo ewa, ne ha a bwo teme-hinaado, me a pitemang. Ke e te mu pelen a adéih te Padué.

Wo Iésu he ko 12 ni jo hen

⁴¹⁻⁴² ††É téteda he ni jo, ke te cemang me lu â Iéusaléma wo lu nyaa me caa te Iésu, ne ko a pwoiitih ko a *Pacika. Ke é he 12 ni jo he Iésu, ke e âcéilu. ⁴³ É alecehen, ke lu caa mwojuia mwo. Kehe icehi ana e te mu Iéusaléma wo Iésu. Ke time lu uce alihi pie tieeng, ⁴⁴ be lu niimihi pie, e pele ni béélé ko a engen. Kehe icehi ana é alecehe ana céiu tan, ke lu bwo alihi pie tieeng. Ke lu tabuhi haneeng ne ha awieme ni pwomwoiu telu me ni béélu. ⁴⁵ Ke time lu uce alieng, ke lu mwojuia mwo ne Iéusaléma me lu â haneeng. ⁴⁶ É ha a béciéhe ni tan, ke lu bwo tooeng ne huâ iitih, he e ko tebwo ha awieme ni apacémuni ni *Juif. Be e ko tabemilé, ke e tahimwolé ko ni *tii iitih. ⁴⁷ Ke ati nina lé tabemieng, ke lé nihe téetihi a bwo temehinaado ten me a bwo hegi nen den.

É pwo ni penem de caa tong

⁴⁸ Ke é heme lu alieng wo lu nyaa me caa ten, ke lu te nihe téetieng, ke e pii ten wo nyaa ten pie: «É mu ko ade na go pwo temu anaa? Go téne, nihe mwotikemu me caa tem, ke gemu mwojuia mwo beme gemu haneko!»

⁴⁹ Ke e hegi ne telu pie: «É mu ko ade na geu haneéo? Kona geu pineuhi pie, wâé heme é pwo ni penem de Caa tong? É mu ko anaa, na woéo éni ha a mwa ten.»

⁵⁰ Kehe icehi ana time lu uce temehi ana nimen me e pii telu.

⁵¹ ††É alecehen, ke lu mwojuia ngemwo me weeng ne Nazaret. Ke e te nihe piténede lu nyaa me caa ten. Ke wo nyaa ten, ke e te cile ne ha a pwonimen ati ni naado naa. ⁵² †Ke piubwo da Iésu, ke ubwo mwo a bwo temehinaado ten. Ke nihe wâé te Padué nang, ke ni apulie mwo.

Ioane pa apipuu apulie

Mataio 3.1–17; Maréko 1.1–11; Ioane 1.19–28

3 E tabuhi pipatemehi a pwooti te Padué wo Ioane, he caa 15 ni jo na e daame ubwo te lépwo Roma wo Tibère. Woélé-ni ni gupéno te daame Tibère nelang:

Wo Ponce *Pilate, pa gupéno ne ha amu *Judé; Wo Érode Antipas ne Galilé;

††† 2.41 Exode 12.24–27, 23.14–17; Deutéronome 16.1–8 ††† 2.51 Luka 2.19 § 2.52 1 Samuel 2.26; Proverbes 3.4

Wo Filip, pa ciéé *Érode Antipas, ne Ituré die Trakonite;
Wo Lisantias, ne Abilène.

² Ke wo Hanne me Kaïfe, ke lupwo *daame he lèpwo apwoâpwailo.

Ke é ha a benaamwon naa, ke e ko mu ha a da wo Ioane pali naî Zakari. Ke e paciheeng wo Padué [beme e pipatemehi a pwooti ten].

A bwo pininim

³ †E engen ati he ni piduaan ko a éémwa Ioridano, ke e patemehi te ni apulie pie: «Geé pininim, ke geé bitekewé. Ke geé pwo me puukewé, beme geé habwii pie pitaatéhi ni mulihewé. Be me wonaa, ke e bo pineuhi ni ta pwo tewé wo Padué.» ⁴ Be caa tii ne ha a tii te péroféta Isaia pie:

Pwo pa apulie ha a da

na e toii da pie:

“E âbé wo Padaame!

Pwopweehi a pwaadeniin!

Pwo me belece

a duaan na e engen hen!

⁵ *Bo pa ni atebwolu,*

tatibe ni juwole me ni bwojuwole,

pamwomwonihni ni acine pwaaden;

pwopweehi a engen den.

⁶ ††Lé bo alihi ne ni apulie

ana e pwo wo Padaame:

Be e âbé me celuimikenye!”Ésaie 40.3–5

A bwo tauti ni apulie!

⁷ †Hiwon ni apulie na lé âbé céii Ioane, beme e puulé [ne ha a éémwa]. Ke e pii [te ni béén mu kolé] pie: «Wogewé ni nahi bwien, me ni agele. Woo na e pii tewé pie, geé o cela ko ni kuhinaado na e bo ne tewé wo Padué? ⁸ ††Geé mi pwo ce huô celi wâé, beme a béhabwiinen pie, geé caa taatéhi ni mulihewé! É mu ko ade na geé te niimihi pie, o celuimikewé mu ko ana wo *Abérama ke pa watihewé? Ūhu! Be é pii tewé pie: Mepie nime Padué, ke o te jan ne kon, me e bitehi ni péi ce, me ni piebehi Abérama!

⁹ ††«E caa te pwopweehi a gi ten [wo Padué]. Ke e bo tahagéi ne ko ni waan ati ni acuwo na time uce wâé ni acehin, ke e bo cini ne pwo miû!»

Geé pwo ce huô celi wâé

¹⁰ Hiwon nina mu ko ni béén na lé téne Ioane, na lé tahimwoeng pie: «He ade aceli me geme pwo [beme pitaatéhi ni muliheme]?»

† 3.3 Apostolo 13.24 †† 3.6 Ésaie 40.3–5 † 3.7 Mataio 12.34, 23.33 †† 3.8 Ioane 8.33,39 †† 3.9 Mataio 7.19

¹¹ Ke e hegi ne telé pie: «Hemepie alo ce epwénem, ke go ne a céiu te pana tice ten. Ke é hemepie pwo ce wiinaado tem, ke go pati pana tice ten.»

¹² ††Pwo lèpwo *atai mwani cuhi puni apulie, na lé âmwobé, beme e puulé wo Ioane. Ke lé tahimwoeng pie: «Pa apipune, ade aceli me geme pwo?»

¹³ Ke e hegi ne telé pie: «Me geé tai mwani *cuhi puni apulie [beme de lèpwo Roma] ke geé nemwo uce pé ce mwani celi piwédén koja ni jéhi cuhi puni apulie.»

¹⁴ Ke pwo ni béé coda mwo na lé tahimwo Ioane pie: «Ke wogeme, ke o ade aceli me geme pwo?»

Ke e hegi ne telé pie: «[Geé necu ni bwopemikewé na ta ne ko ni apulie]: Geé nemwo pwohuu telé, ke geé nemwo wâgo kolé me lé ne ce mwani tewé. Wâé heme geé ju pipwodéén cehi ko ni cuhikewé.»

E patemehi a bwo tuie te Iésu

¹⁵ Ati ni apulie, ke lé ucéihi ne ha a pipwodéén aceli e o bo tuie, ke lé pitahimwolé pie: «Wieli wo Ioane pa *Mesia?»

¹⁶ †††Ke e hegi ne telé ati pie: «Woéo, ke é puukewé ko a tabe. Kehe icehi ana wo pana e bo âbé alecehung, ke e bo puukewé ko a *Jenen Iitihni me a miû [§]. Weeng, ke te junihe pwojunuun kojaéo. Ke time uce jan ne kong me é tuwo ni tai ko ni dihibwaan. ¹⁷ Ke e caa te mi pipwopweeng beme e [tauti ni apulie. Ke e bo pineitééhi nina wâé jélé me nina ta jélé, pwohewii a bwo] pineitééhi na a pidenaado koja a piin. Ke e ne ehi ni pidenaado, kehe e cini ni piin ne ha a miû na te tice paceli jan me e taunuhi!»

¹⁸ Hiwon ni bwomunen na e pwo wo Ioane na wonaa, beme e pacihe a puapulie [te lèpwo *Juif] me e pipatemehi telé a Pwooti Wâé.

Time uce wâé te Érode Antipas

¹⁹ ††E mu tee pii te gupéno Érode wo Ioane pie, time uce wâé a huô te Érode, be lu pimu me Érodiade, é mwode pa âjiénen. Ke hiwon mwo ni béé naado na ta na e pwo wo Érode. ²⁰ Ke [é mu ko ana e pii wo Ioane, ke] e neeng he karépu. Ke me wonaa, ke e ne behin mwo ko ni huô ten na nihe ta.

E puu Iésu wo Ioane

²¹ É ha a benaamwon na e puu ni apulie hen wo Ioane, ke e puu mwo Iésu. Ke é he e mwo ko pwoiitihni wo Iésu, ke e te tehi kuti a miiden. ²² †††Ke e te opé kuti ne huîin a Jenen Iitihni pwohewii a meni pwojo. Ke pwo a pwocihe bé mu he miiden, na e pii ten pie: «Wogo pa

††† 3.12 Luka 7.29 ††† 3.16 Apostolo 13.25 § Puukewé ko...a miû—A tautinaado te Padué, ai pétaabwon ni ta pwo tenye. †† 3.19 Mataio 14.3–4; Maréko 6.17–18 ††† 3.22 Ioane 1.32

Naïng na te céiu go, na te nihe eânimung dem. Wogo kuti, na é caa pipégalikó ha a pwonimung.»

Ni watihe Iésu Kériso

Mataio 1.1–17

²³ He ko 30 ngelang ni jo he Iésu, ke e tabuhi pate-mehi a Pwooti Wâé. Ne he ni bwo niimihinaado te ni béé apulie, ke te pa naî Josef pa naî Éli. [Woélé-ni ni watihen]:

Wo Josef,
 pa naî Éli,
²⁴ pa naî Matat,
 pa naî Lévi,
 pa naî Melki,
 pa naî Janaï,
 pa naî Josef,
²⁵ pa naî Matatias,
 pa naî Amos,
 pa naî Nahoum,
 pa naî Esli,
 pa naî Nagai,
²⁶ pa naî Mahat,
 pa naî Matatias,
 pa naî Séméin,
 pa naî Iosek,
 pa naî Ioda,
²⁷ pa naî Ioanan,
 pa naî Résa,
 pa naî Zorobabel,
 pa naî Salatiel,
 pa naî Néri,
²⁸ pa naî Melki,
 pa naî Adi,
 pa naî Kosam,
 pa naî Elmadam,
 pa naî Er,
²⁹ pa naî Iéchoua,
 pa naî Éliézer,
 pa naî Iorim,
 pa naî Matat,
 pa naî Lévi,
³⁰ pa naî Siméon,
 pa naî Juda,
 pa naî Josef,
 pa naî Ionam,
 pa naî Éliakim,
³¹ pa naî Méléa,
 pa naî Mena,
 pa naî Matata,
 pa naî Natan,
 pa naî *Davita,
³² ††pa naî Jessé,

pa naî Obed,
 pa naî Booz,
 pa naî Sala,
 pa naî Nachon,
³³ pa naî Aminadab,
 pa naî Admin,
 pa naî Arni,
 pa naî Esron,
 pa naî Pérès,
 pa naî *Juda,
³⁴ pa naî Iakobo,
 pa naî Isaaka,
 pa naî Abérama,
 pa naî Téra,
 pa naî Nahor,
³⁵ pa naî Seroug,
 pa naî Réhou,
 pa naî Péleg,
 pa naî Éber,
 pa naî Chéla,
³⁶ †pa naî Kénan,
 pa naî Arpaxad,
 pa naî Sem,
 pa naî Noé,
 pa naî Lémek,
³⁷ pa naî Matusalem,
 pa naî Énoka,
 pa naî Iéred,
 pa naî Malalél,
 pa naî Kénan,
³⁸ ††pa naî Énos,
 pa naî Set,
 pa naî *Adamu,
 pa bécéiuhe naî Padué ne éni pwo bwohemwo.

E tacebwéni Iésu wo Caatana

Mataio 4.1–11; Maréko 1.12–13

4 E mwojuia mwo wo Iésu mu ha a éémwa Ioridano. Ke he caa ju tilieng na a *Jenen Iitihi, ke e pééeng nge ha a melé †. ² Ke e mu lang wo Iésu he na 40 ni tan. Ke e pwo me tacebwénieng nelang wo *Caatana, pa apipé ne konye. Ke é ha a benaamwon naa, ke time e uce wiinaado, ke caa nihe menen. ³ Ke e â céiieng wo Caatana, ke e pii ten pie: «Hemepie wogo pa *Naî Padué, ke go taatéhi ni péi ce me pwoloa!»
⁴ ††Ke e pii ten wo Iésu pie: «Caa te tii ne he ni tii iitihi pie: *Time e uce mulie cehi ko a pwoloa wo pa apulie.*»

Deutéronome 8.3

⁵ Ke e pééeng [da pwo a juwole] wo Caatana, ke e habwii ten, ha a cuwo benaamwon naa, ati ni amu me ni mwametau pwo bwohemwo. ⁶ Ke e pii ten pie: «É o bo ne tem *a wâé te ati ni mwametau ce, me ni pihuô,

† 3.23 Luka 4.22; Ioane 6.42 †† 3.32 Ruth 4.17–22

‡ 3.36 Genèse 11.10–26 †† 3.38 Genèse 4.25–26 †† Melé—Da (désert). A duaan na ticie hen. ††† 4.4 Deutéronome 8.3

be caa ne tong, ke é o te ne te paceli te nimung me é ne ten. ⁷ Ke é bo tai ne tem ati, hemepie go tidih jilim ne ânebuhung me go pipaunuéo.»

⁸ †Ke e hegi ne ten wo Iésu pie: «Caa te tii ne he ni tii iitih, pie: *Go pipaunu Padaame Padué hem, ke te weeng cehi na me go penem den.*»

Deutéronome 6.13

⁹ Ke e pé Iésu nge *Iérusaléma. Ke e pééeng da pwo a puni a *mwaiitih, ke e pii ten pie: «Hemepie wogo pa Naî Padué, ke go téele mu éni! ¹⁰ ††Be caa te tii ne he ni tii iitih pie:

*E bo pahede ni âcélo ten
wo Padaame Padué,
beme lé wéiko.*

¹¹ *Ke lé bo hegiko,
ke o time uce tanahi ni am
ne ko ni péi.» Psaume 91.11–12*

¹² †Ke e hegi ne ten wo Iésu pie: «Ûhu, be caa te tii ne mwo he ni tii iitih pie: *Go nemwo tacebwéni Padaame Padué hem.*»

Deutéronome 6.16

¹³ ††Heme e tacebwénieng ati wo Caatana, ke e engen kojaeng. Ke e ucéih mwo ace céiu tan.

E tabuhi ni penem den wo Iésu

Mataio 4.12–17; Maréko 1.14–15

¹⁴ E mwojuia mwo ne ha amu Galilé wo Iésu, he caa ju tilieng na a Jenen Iitih. Ke lé caa tabuhi pwojepule kon ne ha ati ni piduaan naa. ¹⁵ Ke e pacémuni ni apulie ne he ni *mwotapitih te ni *Juif, ke lé nihe pipii me wâé nang.

E mwojuia mwobé @ ne ha a mwopopwaalé ten

¹⁶ E mwojuia mwobé wo Iésu ne Nazaret, he na ubwo nang ne hen. Ke é ha a *tan iitih, ke e taa ha a mwotapitih, pwohewii ana mu te cemang me e pwo. Ke e cuwoda me e pine ni tii iitih. ¹⁷ ††Ke e ilehi [koja pa céiu apenem] ††† a tii te péroféta Isaia. Ke e pale, ke e pipégali ni pwooti [na e pine telé]:

¹⁸ *E kong a Jene Padaame.
E neéo ngen††, me é pé ngen:
a Pwooti Wâé te nina tice delé;
a bwo pawie ni apwocuhinaado;
a bwo tehi ni naamii lépwo bwi;
ke a bwo tuwo lépwo na cielé.*

¹⁹ *Weengi a benaamwon den*

† 4.8 Deutéronome 6.13–14 †† 4.10 Psaume 91.11–12 † 4.12 Deutéronome 6.16; 1 Korénit 10.9 †† 4.13 Ébéru 2.18, 4.15 †† 4.17 Ésaie 61.1–2 ††† Ke e ilehi koja pa céiu apenem—Grek: Ke [lé] ne ten. ††† Neéo ngen—Grek: Oint. (Oindre, ke cepulicéih.) Lé cepulicéih a l'huile

Me é pwo me wâé

mwo lépwo na téé ni pwonimelé.

*me e pipatemehi a pipwoééhe
ke a wâé te Padaame.Ésaie 61.1–2*

²⁰ E capipih ali tii wo Iésu, ke e ne te mwo pali apenem, ke e tebwo. Ke lé te ju omeeng ati ne ni apulie na élé ha ali mwotapitih. ²¹ Ke e pii telé pie: «Geé caa te téne nina e pipatemehi ne ni tii iitih. Ke é jena, ke e caa pacuwohi [ne ânebuhewé ati].»

Muhi telé kon

²² § ††Lé picedi Iésu, me pii me wâé nang, be lé te junihe téetih ni pwooti ten na pwojunuun. [Kehe icehi ana é alecehen] ke lé pipii telé pie: «[É mu ko ade na e wonaa a bwo cihe ten? He te pa apulie pwohewi-ikenye.] Be te pali naî Josef!»

²³ Ke e hegi ne telé pie: «Geé caa te téne ni naado na é pwo ne Kapernaüm. Ke nimewé me é pwo mwo celi wonaa ne éni ha amu tong.

«Wieli géé pii tong a ocine ce: “Dotéén, go te pipwo mwo me tieden a cunu kom!”

²⁴ †††«Kehe icehi ana é pii tewé pie: “Au, mwolihi! Wo pa péroféta, ke time lé uce hegieng ehi ne ha amu ten.”

²⁵ †††«Te a juuju, be pwohewii a benaamwon de péroféta *Élia. Be li time uce ute, ke pwo a menele na nihe ubwo ne ha ati ni amu, he na cié ni jo ke pwo a behin. Ke nihe hiwon ni depwele ne ha amu *Isaraéla [na menelé]. ²⁶ †††Kehe icehi ana time e uce ne ngen Élia wo Padué, beme e picani te êce céiu depwele ne Isaraéla, [amu ten]. Kehe e neeng nge pele ê céiu depwele ne ha a mwopopwaalé Sarepta, ne ha a céiu duaan ko a Sidon.

²⁷ †††«Ke géé te niimi mwo péroféta Élisé. Be li e pwo me tieden a katia ko Naaman, pa apulie mu Siri. Kehe icehi ana nihe hiwon ni katia ne Isaraéla.»

²⁸ Ke é he lé téne anaa wo lépwo apulie ne ha ali mwotapitih, ke lé te nihe okéé ne ko Iésu. ²⁹ Ke lé te cuwoda kuti, ke lé teuueng da pwo a juwolé ††, he na e mu lang a mwopopwaalé telé, beme lé bo cibetééeng ole jeoté. ³⁰ Kehe e te â ha awiemelé, ke e engen kojale.

E pacémuni ni apulie @ ke e pwo me tieden ni cunu kolé

Mataio 8.14–17; Maréko 1.21–39

³¹ E tuie wo Iésu ne Kapernaüm ne Galilé, ke e taa ha a mwotapitih, ha a céiu tan iitih. Ke e pacémuni ni apulie ko a pwooti te Padué. ³² †††Ke lé téetih a bwo ci-

§ 4.22–24 Mataio 13.54–57; Maréko 6.2–6 † 4.22 Luka 3.23; Ioane 6.42 ††† 4.24 Ioane 4.44 †† 4.25 1 Rois 17.1,7 ††† 4.26 1 Rois 17.8–16 † 4.27 2 Rois 5.1–14 †† Da pwo a juwolé—A mwopopwaalé na bahi ne pwo juwolé, ne ko a céiu duaa a péi na te junihe mwoiu. ††† 4.32 Mataio 7.28–29

he ten, be e te pacémunilé mu ha a pihuô [na e te ne ten wo Padué].

E pawiehi ni duéé

³³ [É he e mwo ko cihe wo Iésu] ke e taa ha a mwotapitihí wo pa apulie na pwo duéé kon. Ke e wi-ikau, ke e pii pie: ³⁴ «Éé! Iésu mu Nazaret, te tice celi go pwo peleme! Go âbé pwotahi ne kome? É te temehiko, be wogo pa apulie na e pipégaliko wo Padué, ke e neko bé!»

³⁵ Ke e te heni kuti ali duéé wo Iésu, ke e pii ten pie: «Go capuhi a pwom, ke go wie mu ko pa apulie naa!»

Ke e tahi ole pali apulie na ali duéé, ne ânebuhe nina lé mu lang. Ke e wie mu kon, ke time e uce pwotahinaado ne kon.

³⁶ Ke lé te nihe tai téetihí ne ni apulie, ke lé pitahim-wolé pie: «He ade celi e ko pwo wo pa apulie ce? Be pwojunuu nina e pii. Ke e pihuôhi mwo ni duéé, ke lé pitabemieng, ke lé wie!»

³⁷ Ke te piân a jepule ko Iésu, pitihi amu naa.

E pwo me tieden ni cunu ko ni apulie

³⁸ E wie mu ha a mwotapitihí wo Iésu, ke e â pele Simon Pétéru. Ke lé pii ten pie, te nihe cunu égi mwaa Simon, be e pwopilijing. ³⁹ Ke e âbé céiieng wo Iésu, ke e ole nge huûin. Ke e pwohuu te ali pilijing, ke te tieden kojaeng kuti. Ke e cuwoda wo ênaa, ke e pwo me lé wi-inaado.

⁴⁰ É he capéto ko a babwén †, [he caa nebwén a tan iitihí telé] ke lé pébé céii Iésu ati ni cunu. Ke e ne ni in huûilé ati, ke te muko tieden kuti ni cunu kolé. ⁴¹ ††Ke lé wie mwo ni duéé, he lé cihe da ko miiden ko pii pie: «Wogo ke pa Naî Padué!» Kehe icehi ana e cihe me mwoiu ne kolé, ke time e uce nelé me lé patemehieng. Be lé caa temehi pie, weeng pa *Mesia.

E pipatemehi a Pwooti Wâé

⁴² É ha acaama hen, ke e engen wo Iésu, ke e â ha a céiu duaan na ticie hen. Kehe icehi ana lé haneeng ne ni apulie, beme lé ileeng pie, me e mwo mu pelelé.

⁴³ Ke e hegi ne telé pie: «Ûhu. Be wâé heme é pipatemehi mwo a Pwooti Wâé ne he ni béé mwopopwaalé. Be weengaa a watihen me é opé.»

⁴⁴ ††Ke e â pitihi a *Judé ††, ke e pipatemehi a Pwooti Wâé ne he ni mwotapitihí.

E tode ni bécéiuhe acémun den

Mataio 4.18–22; Maréko 1.16–20

⁵ ††É ha a céiu tan, ke e mu jeoté ticepwon ne Galilé †† wo Iésu. Ke e patemehi a pwooti te Padué. Ke hiwon ni apulie na lé tebwo aujenieng, beme lé tabemieng. ² Ke e alihi lupwo ong na lu ko mu jeoté ha a tabe mwonuhi ticepwon. Be lé caa ole mu pwon wo lépwo apwotau, ke lé ko puu ni pua telé.

³ Ke e taa pwo a céiu ong, a onge Simon Pétéru. Ke e pii ten pie: «Go picéi oté ali ong.»

Ke e tebwo, ke e pacémunihi mwo ni apulie.

⁴ Ke me e cihe ati, ke e pii te Simon [me ni béén] pie: «Geé taabé me genye te ju piole he na numwihi lang. Ke geé bwobe ne ni pua tewé.»

⁵ †††Ke e hegi ne ten wo Simon pie: «Pa apipune, go téne, geme tee ko pwotau jame a bwén ce, ke te tice celi geme pé. Kehe icehi ana é mu ko ana go pii teme, ke é o pwo.»

⁶ Ke lé patupwo li pua telé. Ke te nihe hiwon kuti ni ikua na lé cuwo hen, ke pwo me e tie li pua telé. ⁷ Ke lé pwo inenaado nge céii ni béélé na lé mu pwo a céiu ong, beme lé âbé picani telé. Ke oba lupwoli ong ko ikua, ke lu pwo me lu mwiié.

⁸⁻¹⁰ Ke te junihe mwotilé ati ko ana e tuie: wo Simon Pétéru, me Cang me Ioane (lupwo naî Zébédé) me ati ni béélé. Ke e tupwo tidihí jilin ânebuhe Iésu wo Simon, ke e pii pie: «Padaame, go piâdé ité kojaéo, be woéo, ke pa apulie na ta jo!» Kehe e pii ten wo Iésu pie: «Go nemwo pwo me mwotiko! Tabuhi jenea, ke bo wogo pa apwotauhi apulie.»

¹¹ ††Ke lé mwojuia daamwo ticepwon, ke lé céida huâiu lupwoli ong. Ke lé necu ati, ke lé âcéi Iésu.

E pwo me tieden ni cunu ko lupwo alo apulie

Mataio 8.1–4, 9.1–8; Maréko 1.40–2.12

Pa katia

¹² É he e mu ha a céiu mwopopwaalé wo Iésu, ke e tuiebé wo pa céiu katia ††. Ke me e ali Iésu, ke e tidihí jilin me pimiibule ne ânebuhen, ke e ilehi kojaeng pie: «Padaame, hemepie te nimem, ke go pwo me tieden a katia kong!»

¹³ Ke e cine ngen a in, ke e ti kon, ke e pii ten pie: «Éa, te nimung! Caa wâé go!»

Ke te tieden kuti kojaeng a katia kon.

¹⁴ †††Ke e pii ten pie: «Go nemwo uce uti, kehe go â pi-habwiiko ne te pa *apwoâpwailo. Ke go ne [te Padué] ali âpwailo li e pii wo *Moosé ne he li patén den. Be

† Ko a babwén—Grek: É alecehe a bwo nuule na a téale. Ke caa nebwén a tan iitihí he capéto he babwén. †† 4.41 Mataio 8.29; Maréko 3.11–12 † 4.44 Mataio 4.23 †† Judé—Ni béé tii iitihí he pwo grek, ke lé pii pie Galilé.

†† 5.1 Mataio 13.1–2; Maréko 3.9–10 ††† Galilé—Grek: Génésaret. Omehi a jilé Galilé ne ha a Niinaado (Vocabulaire) ha anebwén ko a tii. ††† 5.5 Ioane 21.3–8 § 5.11 Mataio 19.27 †† Katia—Lèpre. Wo lépwo Juif, ke lé mwiihi ni katia. ††† 5.14 Lévitique 14.1–32

me wonaa, ke me lé alihi ati ne ni apulie pie caa wâé go.»

¹⁵ Kehe icehi ana caa piân a jepule ko Iésu. Ke nihe hiwon nina lé âbé céiieng me lé téneeng, me ilehi ko-jaeng pie, me e pwo me tieden ni cunu kolé. ¹⁶ Kehe e mu â he ni duaan na te ticie hen, beme e pwoiitihi.

Pa tebwomwa

¹⁷ É ha a céiu tan, ke e pacémuni ni apulie wo Iésu. Ke lé tabemieng ni béé *Farasaio me ni *dotéén ko patén, na lé âbé céiieng mu he ni mwopopwaalé mu Galilé, me *Judé, me *Iérusaléma. Ke e mu ko Iésu a junuu Padaame Padué, beme e pwo me wâé nina cunu jélé.

¹⁸ Ke lé tuiebé ni béé apulie he lé pipaadoimi pa céiu béélé ne pwo apule ten, pana tebwomwa nang. Be nimelé me lé pééeng da huâ, me neeng ânebuhe Iésu. ¹⁹ Kehe icehi ana tice ace bwopwonen, be junihe hiwon ni apulie. Ke lé pééeng da pwo mwa †, ke lé tapwii a céiu duaa mwa. Ke lé neeng ole ne pwo apule ten ne ânebuhe Iésu me ni apulie na élé aujenieng.

²⁰ †† Ke e téetihi a céihi telé wo Iésu. Ke e pii te pali tebwomwa pie: «Pa bééng, caa pineuhi ni ta pwo tem.»

²¹ Wo lépwo Farasaio me ni dotéén ko patén, ke lé pipii telé pie: «Wooélé pa apulie ce? Be e [pwo me piwielu me Padué, me] piciheta ne ko a niin! Be he wooélé na e temehi me e pineuhi ni ta? Te icehi Padué!»

²² Kehe icehi ana e te temehi wo Iésu nina lé niimihi, ke e pii telé pie: «É mu ko ade na wonaa ni pwon-imewé? ²³ Ade aceli piticecoon? Me é pii ten pie: “Caa pineuhi ni ta pwo tem”, ai me é pii ten pie: “Go cuwoda, ke go engen?” ²⁴ †[Ke heme pie jan me é pwo me e engen ne ânebhewé ati] ke géé bo temehi pie, pwo mwomwon dong, woéo pa *Nahi Apulie, me é pineuhi ni ta pwo te ni apulie ne pwo a bwohemwo.»

Ke e pii te pali tebwomwa pie: «Aje, go cuwoda, ke go pé apule tem, ke go âmwo pelem.»

²⁵ Ke e te cuwoda kuti ne ha awieme ni apulie. Ke e pé apule ten, ke e âmwo pelen, he e pipwoun de Padué.

²⁶ Ke lé nihe téetihi ati ne nina lé alihi anaa. Ke te junihe mwotilé, ke lé pii éwaanuhi telé pie: «Éé! Te nihe ité kuti nina nye alihi jena!»

Ke lé pipwoun de Padué.

E tode Lévi (Mataio)

Mataio 9.9–13; Maréko 2.13–17

²⁷ É alecehen, ke me e â he pwaaden wo Iésu, ke e ali Lévi (Mataio), pa *atai mwani cuhi puni apulie [me de

† Da pwo mwa—Pwo ko pule, ke te ju belece ehi, ke jan me nye engen pwon. Omehi Mataio 24.17. †† 5.20 Ésaie 43.25; Luka 7.48 ‡ 5.24 Ioane 5.8

lépwo Roma] he e teko tebwwo ha a mwopenem den.

Ke e pii ten wo Iésu pie: «Go âbé céing!»

²⁸ Ke e te cuwoda kuti wo Lévi, ke e necu ati, ke e âcéi Iésu.

²⁹ Ke é alecehen, ke e pwo a piwiinaado na ubwo wo Lévi ne pelen, beme e pipwoun de Iésu. Ke e tode mwo lépwo atai mwani béén, ke hiwon mwo ni béé apulie.

³⁰ †† Ke lé mu lang mwo wo lépwo Farasaio ke ni béélé, lépwo dotéén ko patén. Ke lé tai pihuu ne ko lépwo *acémun de Iésu, ke lé pii telé pie: «É mu ko ade na géé piwiinaado me ûdu me lépwo atai mwani, ke ni béé apulie na ta jélé?»

³¹ Ke e pii telé wo Iésu pie: «Time lé uce hane ce dotéén wo lépwona te wâé jélé, kehe te icehi lépwona cunu jélé. ³² Be time é uce âbé tode nina lé niimihi pie wâé ni mulihelé. Kehe é âbé tode nina lé temehi pie ta ni mulihelé, beme lé bitelé, ke me lé pitaatéhi ni mulihelé.»

A pwooti ko a pipaciile

Mataio 9.14–17; Maréko 2.18–22

³³ Lé pii te Iésu ne ni béé Farasaio pie: «Geme te cuwo ko *pipaciile, wogeme ni Farasaio, me lépwo acémun de *Ioane pa apipuu apulip. [Be geme patupwo wiinaado † beme geme pwoiitihi.] Kehe é mu ko ade na time lé uce pipaciile wo lépwo acémun dem?»

³⁴ †† Ke e hegi ne telé pie: «Kona lé te pipatupwo wiinaado wo lépwona todelé ne ko a piaten, heme e mwo teko mu pelelé wo pa apiaten? Ūhu! ³⁵ Kehe e o bo âbé a tan na o bo pé kojálé pa apiaten. Ke é mulang na lé o bobé pipaciile.»

³⁶ Ke e pii telé mwo a ocine ce wo Iésu pie: «Te tice pace céiu apulie celi e tie ace me-epwén celi mwo ju wamin, me e woli ne ko a epwén na caa ukéiu. Be o bo tie ali epwén li mwo ju wamin! A céiu mwo: Ke time uce piwie lupwo memwaanu ne ko a epwén, be caa ukéiu.

³⁷ «Géé niimihi a *mwotabe na pwo ko iiwota. Be time nye uce pé ace tabe megele celi mwo coho, me nye pa a mwotabe †† na caa ukéiu. Be [pwocoon me cibuh, ke] e bo pabuwohi §, ke genye o patieden a tabe megele me ni mwotabe. ³⁸ Ūhu! Wâé heme nye ne a tabe megele na mwo coho, ne ha a mwotabe na mwo coho! ³⁹ Kehe icehi ana wo lépwona lé mu ûdu ni tabe megele na caa ukéiu, ke muhi telé ko ni tabe megele na mwo ju coho. Be lé pii pie: “Nihe wâé a neme ni tabe megele na caa ukéiu †††”»

†† 5.30 Luka 15.1–2 †† Patupwo wiinaado—A bwopiinen pie, paciitihi wiinaado. ††† 5.34 Ioane 3.29 ††† Mwotabe... Omehi a déme ali mwotabe ne ha a Mataio pwahamii tii 9. § Pabuwohi—Omehi note ††† Wieli a ocine ko lépwo apihuô te lépwo Juif na muhi telé ko ni cémun de Iésu.

Pa eapwihi a tan iitih

Mataio 12.1–14; Maréko 2.23–3.6

6 †É ha a céiu *tan iitih, ke lé [uti a pwaaden na e] pitahagéi nge he ni apwoamu wo Iésu me lépwo acémun den. Ke é nge he pwaaden, ke lé tabwo ni ace blé wo lépwo acémun den. Ke lé elelehi ne he ni ilé, ke lé wii ni piden.

2 ††Ke lé pii telé wo lépwo béé *Farasaio pie: «Lépwo-je, é mu ko ade na géé pwo anaa? A naado na paciitih ‡ ha a tan iitih!»

3 ††Ke e hegi ne telé wo Iésu pie: «Kona time géé mu uce pine ne he ni tii iitih, ana e pwo wo pa daame *Davita? Be é ha a céiu tan, ke menelé, woélé me ni béén. 4 ††Ke e taa ha a mwaiitih [na pwo ko mwaanu] ††. Ke e pé ni pwoloa na ne me de Padué, ke e eni. Ke e ne me lé eni mwo wo lépwo béén. Kehe ni pwoloa naa, ke te ni *apwoâpwailo cehi, na pwo mwomwon delé me lé eni.»

5 Ke e pii telé mwo wo Iésu pie: «Woéo, pa Nahi Apulie, ke pa eapwihi a tan iitih.»

E pwo me tieden a cunu ha a tan iitih

6 É ha a céiu tan iitih, ke e taa ha a *mwotapitih wo Iésu, ke e pacémuni ni apulie. E mu lang mwo wo pa apulie na mele a in ne pwo jui.

7 Ke lé te ju ome Iésu wo lépwo *dotéén ko patén me lépwo Farasaio, beme lé alihi pie, he e o te pwo me wâé pa apulie naa, ha a tan iitih? Be lé hane ace bwopwonen me lé bo pipé ne kon.

8 Kehe e te temehi ni âniimihinaado telé wo Iésu, ke e pii te pali cunu pie: «Go cuwoda, ke go âbé éni, ânebuhe ni apulie ati!»

Ke e cuwoda wo paje [ke e âbé céii Iésu, ne ânebuhe ni apulie].

9 Ke e pii wo Iésu te nina lé mu lang pie: «Woté? He te ne me pwo ana wâé ha a tan iitih, ai ana ta? Me celuimi a mulip, ai me taunuhi?»

10 Ke e te ju ome taatéélé wo Iésu. Ke e pii te pali apulie pie: «Go cinebé a im!»

Ke e cine ngen a in, ke caa te wâé mwo kuti.

11 Ke lé te nihe okéé kuti wo lépwo Farasaio me lépwo dotéén ko patén. Ke lé picihé ko aceli me lé pwo te Iésu.

E pipégali ni apostolo ten na 12

Mataio 10.1–4; Maréko 3.13–19

12 É ha a céiu tan, ke e taa pwo juwole wo Iésu. Ke e pwoiitih te Padué jame a bwén. 13 É pwopwometan, ke e tode ati nina lé mu âcéin. Ke e bwo pipégali mu pelelé lépwo apulie na 12 jélé, ke e ne ni niilé pie *apostolo: 14 Woélé-ni:

Simon (e ne me a niin wo Iésu pie Pétéru);

André, pa ciéén;

Cang;

Ioane;

Filip;

Bartélemi;

15 Mataio;

Toma;

Cang, pa naî Alfé;

Simon, pa Zélote††;

16 Jude §, pa naî pa céiu apulie na pii kon pie Cang;

Judas Iscariot, pana e bwo icu Iésu †.

Hiwon ni apulie na lé âbé céii Iésu

Mataio 4.23–25

17 Lé mwojuia mwo mu pwo juwole wo Iésu me ni 12 apostolo ten. Ke lé cuwo ha a duaan na te ju pule ehi. Ke hiwon ni apulie na lé âbé céii. Be wo lépwo béén na lé mu âcéi Iésu, me ni béé apulie mu *Iérusaléma, ke é mu ati ha amu *Judé, ke é pejié mwonuhi lupwo pwomwo ubwo Tir me Sidon. 18 Be lé tai âbé beme lé tabemi Iésu, ke me e pwo me tieden ni cunu kolé. Ke e peni ni duéé na hiwon mu kolé. 19 Ke hiwon nina lé hane me lé ti kon. Be pwo a *pipwojunuun na e wie mu kon, ke te tai tieden ni cunu kolé.

Pipune te Iésu

Mataio 5.1–12,43–48; 7.1–29

Adéikewé

20 E biteeng wo Iésu nge céii lépwo acémun den, ke e pii telé pie:

«Adéikewé, wogewé na tice dewé, be o bo a dewé a *Mwametau te Padué!

21 ††Adéikewé, wogewé na mwo menewé jena, be o bo pwoluu gewé!

Adéikewé, wogewé na géé é jena, be géé o bo piap.

22 ††Adéikewé heme lé téetikewé, me muhi telé kowé, me lé pihoonikewé, me lé pii me ta gewé, mu ko ana wogewé, ke wo lépwo apulie tong, woéo pa Nahi Apulie. 23 Be lé te wonaa te lépwo péroféta wo lépwo

† 6.1 Deutéronome 23.26 †† 6.2 Ioane 5.10 ‡ Naado na paciitih—Te junihe iitih ne ko lépwo Juif me lé penem ha a tan iitih, ke lé niimih pie, haii ni ace blé †† 6.3 1 Samuel 21.1–6 †† 6.4 Lévitique 24.5–9 ††† Mwaiitih na pwo ko mwaanu—Grek: Mwa te Padué. Omehi a Niinaado (Vocabulaire) ha anebwén ko a tii.

††† Zélote—Pa ju apulie Judé na nimen me e pawie lépwo Roma mu ha amu ten. § Jude—Pana a niin mwo pie Tadé. Omehi Mataio 10.3; Maréko 3.16–19. † Icu Iésu—Tahir Jésus. ††† 6.21 Psaume 126.5–6; Ésaie 61.3; Pii Beetih 7.16–17 †† 6.22 Ioane 15.19, 16.2; 1 Pétéru 4.14

watihelé. Ke é pii tewé pie: Geé pipwodéén, me pi-wânimewé, be o ubwo a cemewé ne jeda he mi-iden* ko ni penem dewé!»

O bo pwo ni téé ne ko ni béén

²⁴ «[Weengi ni pwooti tong ne kowé] wogewé na pwo dewé:

O bo pwo ni picani me ni téé ne kowé. Be ni naa-muuwé, ke o caa te ninaa kuti ni ja ko ni pipwodéén dewé.

²⁵ O bo pwo ni picani me ni téé ne kowé, wogewé na pwo luu gewé. Be o bo menewé.

O bo pwo ni picani me ni téé ne kowé, wogewé na geé pipwodéén jena. Be geé bo é me pihemun.

²⁶ O bo pwo ni picani me ni téé ne kowé, wogewé na lé pii me wâé gewé ne ni apulie. [Kehe time uce a bwopiinen pie wâé gewé!] Be o junihe ubwo ni cuhinaado [tewé koja] lépwo péroféta agele li lé nihe pii me ubwo jélé wo lépwo apulie.»

Geé pipwoééhe nina lé téétikewé!

²⁷ «É pii tewé, wogewé na geé tabemiéo pie: Geé pwo me eânimewé te nina lé téétikewé, ke geé pwo nina wâé ne ko nina muhi telé kowé. ²⁸ Ke geé *adéi nina lé piapwokewé, ke geé pwoiitih me de nina lé pii me ta gewé. ²⁹ Ke mepie e ahi a céiu kwoom wo pace céiu apulie, ke go ne ten mwo a céiu. Ke hemepie e pé ace palito tem, ke go ne ten mwo a cimii tem. ³⁰ Ke é hemepie e ilehi kojako ace céiu naado wo pace céiu apulie, ke go ne ten. Ke é hemepie e pé ace dem, ke go nemwo ilehi mwo kojaeng. ³¹ †[É pii tewé mwo pie]: Go pwo ne te ni béén ce naado celi nimem me lé pwo ne tem.»

³² «Be mepie te ju eânimem cehi te nina eânimelé tem, ke kona é mu ko ade na go uce ucéihi ace cemem [koja Padué]? Be lé te wonaa mwo wo lépwo apulie ta. ³³ Ke hemepie go pwo nina wâé te nina lé pwo ana wâé tem, kona é mu ko ade na go ucéi ace cemem? Be lé te wonaa mwo wo lépwo apulie ta. ³⁴ Ke é hemepie go te ne mwani cehi te ni béén na lé bo wodehi ne tem, ke é ko ade na go ucéihi ace cemem? Be lé te wonaa mwo wo lépwo apulie ta.

³⁵ «Geé téne! Geé pwo me eânimewé te nina lé téétikewé. Ke geé pwo celi wâé ne ko ni apulie, ke geé ne telé me piticenaado ne kon. Be mepie geé wonaa, ke o nihe ubwo ce cemewé celi e bo ne tewé wo Padué, ne he miiden. Be [geé habwii ne he ni bwomu tewé pie] wogewé, ke ni ju nañ. Be weeng, ke te eânimen de lépwona time lé uce pwo-olé ten, me lépwona lé pwo nina ta. ³⁶ Wâé heme go pipwoééhe pwohewii pa Caa tem, be e pipwoééhe.»

Geé nemwo tauti ni béén

³⁷ †«Geé nemwo tauti ni béén, ke o time e uce tau-tikewé wo Padué. Geé nemwo pwo me lé pwocuhinaado wo lépwo béén, beme time geé uce pwocuhinaado. Ke mepie geé pineuhi ni ta pwo telé, ke weeng, ke e o pineuhi ni ta pwo tewé. ³⁸ ‡Geé ne, be e o bo ne tewé mwo wo Padué. Ke o te piubwo a ja kon ne tem mwo. Ke geé bo hegi ni naado na pida ke nina nihe piwéden. Be e o bo ne tem pwohewii a bwo ne nen dem ne te lépwo béén †.»

³⁹ ††Ke e pii telé a ocine ce wo Iésu, pie: «Kona wo pa bwi, ke o te jan ne kon me e pé pace céiu bwi? Ûhu! Be lu o tai tupwo ne ha ace pwon! ⁴⁰ ††Ke é pii tewé pie: Wo pa acémun, ke time e uce piwéden koja pa apacémunieng. Kehe icehi ana mepie e nihe cémun ehi, ke e bo pwohewii pa apacémunieng.

⁴¹⁻⁴² ††«Go te ju alihi ehi a meté na e hamii pa âjiénem, kehe time go uce alihi a ba-acuwo na ubwo na e hamiim! Ke go woté ko ace bwopiinen de pa béém pie: “Go ne me é pétaabwon a meté na e hamiim”?

«Wogo, ke pa apipulekenye, kehe bwi go! Go mi pétaabwon a ba-acuwo na ubwo na e hamiim! Ke é mulang, ke go bwobe ali ehi ace bwo pétaabwon na a meté na e hamii pa âjiénem.»

A acuwo me ni acehin

⁴³ §«A acuwo na wâé, ke pwocoon me e ne ce acehin celi ta. Ke a acuwo na ta, ke pwocoon me e ne ce acehin celi wâé. ⁴⁴ Be genye alihi temehi a acuwo mu ko ni acehin. Be time genye mu uce tabwo ace majing mu ko ace éé muceni! Ke time genye mu uce tabwo ace tabe megele mu ko ace acuwo celi pwo dan. ⁴⁵ Ni naado na wâé, ke e âbé mu ko pa apulie na wâé nang, be wâé a pwonimen. Kehe ni naado na ta, ke e âbé mu ko pa apulie na ta nang, be ta a pwonimen. Be genye cihe mu ko nina e mu he ni pwonimenye.»

A ocine ko lupwo mwa

⁴⁶ §†«É mu ko ade na geé tee pii pie: “Padaame, Padaame!”, he time geé uce piténeéó? ⁴⁷ [Geé téne a ocine ce]:

«Pa apulie na e téne ati ni pwooti tong, ke me e piténeéó, ⁴⁸ ke e pwohewii pa apulie na e pwo a mwa ten. Ke e ini ole die ko a péi, beme e ne pwon a mwa ten. Ke me ujaa, ke me e téte a tabe ne ko ali mwa, ke time e uce tanahi, be e bahi ne pwo a péi.

†† 6.37 Mataio 6.14 ‡ 6.38 Maréko 4.24 †† He pwo grek, ke a ocine ko ni wotéléa na nye pwocuhin mu ha apwojenep. Pwohewii ni wotéléa na céihi me piticenaado ne kon, ne ha a cio, ke é alecehen ke genye tagiiliihi a cio, beme oba ehi die ko a pwo a cio. †† 6.39 Mataio 15.14 ††† 6.40 Mataio 10.24–25 ††† 6.41–42 Mataio 7.3–5 § 6.43–45 Mataio 12.33–35 †† 6.46 Mataio 7.21

⁴⁹ Kehe wo pana e téne ni pwooti tong, ke me time e uce ténédehi, ke e pwohewii pa apulie na e pacuuli a mwa ten, ke time e uce ne ace paan. Ke me e âbé a jaa, ke me e ti ko ali mwa, ke e te tupwo kuti, ke e te tanahi ati.»

A céihi te pa céiu caa te coda

Mataio 8.5–13

7 É heme e ko pii ati ninaa wo Iésu te ni apulie, ke e mwojuia ngemwo Kapernaüm. ² Ke pwo pa céiu caa te coda roma na e mu lang, ke pwo pa apenem den na te nihe ubwo a pwonimen kon, ke nihe cunu nang, ke e caa pwo me e mele. ³ Ke me e téne a jepule ko Iésu, ke e ne nge céiieng ni béé apulie na piubwo jélé ne pele lépwo Juif, beme lé ilehi kojaeng pie, me e pwo me tieden a cunu kon.

⁴ Ke lé â too Iésu wo lépwonaa, ke lé wâgo kon me e picani te pali caa te coda, ke lé pii ten pie: «Go téne go Padaame, wo panaa, ke pa apulie na nihe wâé nang, ke wâé heme go picani ten. ⁵ Be e pipwoééhe a bele tenye [wogenye lépwo *Juif] die ko ana e pwo a *mwotapitihni tenye.»

⁶ Ke e âcélélé wo Iésu. Kehe me lé âmwonuhi ali pomwa te pali caa te coda, ke e nebé céii Iésu ni béén, beme lé pébé céiieng a pwooti ten ce: «Go téne go Padaame, time uce jan ne kom, me go tuie nge ha a pomwa tong, be te junihe pwnaado ne kom. ⁷ Ke time uce jan ne kong mwo me é âdé céiiko. Wâé heme go ju pii ace pwooti, ke o tieden a cunu ko pa apenem dong. ⁸ Be woéo, ke é piténede pa apihuô tong, ke é uce pihuô te ni coda. Ke me é pii te pace céiu pie, me e ân, ke e ân. Ke me é pii te pace céiu pie: “Go âbé!”, ke e âbé. Ke me é pii te pa apipenem dong pie: “Go pwo ani!”, ke e te pwo.»

⁹ Ke e te junihe téele wo Iésu, ke e picedi pali caa te coda. Ke e biteeng nge céii ni apulie na nihe hiwon jélé na lé âcén. Ke e pii telé pie: «Geé te ju tabemi ehi: Time é uce téele too pace apulie celi ubwo ace céihi ten pwohewii paje, ke piwien mwo ne [ha a bele te Padué], *Isaraéla.»

¹⁰ Ke heme lé mwojuia ngemwo pele pali caa te coda wo lépwoli béén, ke lé too pali apenem den he caa wâé nang mwo.

E mulie mwo wo pa naî ê depwele

¹¹ É alecehen, ke e engen wo Iésu nge ha a mwopopwaalé na pii kon pie Naïn. Ke lé âcén ni acémun den, me ni béé apulie na hiwon jélé. ¹² É heme lé tuie nge ha a pomwa ko ali mwopopwaalé, ke lé too ni apulie he lé ko pipaadoimi nge he iitihni pa apulie na e caa mele. Pana te céiu nang ne te nyaa ten, êgi depwele. Ke hiwon ni apulie na lé âcélélé.

¹³ Ke me e alieng wo Padaame, ke te nihe ubwo a bwo pwoééhen, ke e pii ten pie: «Êje, go nemwo é.»

¹⁴ Ke e gaaté, ke e ti ko ali piélele. Ke lé cuwo wo lép-woli lé pé. Ke e pii te pali amele pie: «Aje, é pii tem pie: Go ûmiê!»

¹⁵ †Ke e te caama tebwo kuti ††, ke e cihe! Ke e neeng ole wo Iésu, ke e neeng de céii nyaa ten.

¹⁶ †Ati nina lé mu lang, ke te nihe mwotilé, ke lé picedi Padué. Ke lé pipii telé pie: «E opé penem pelenye wo Padué! Be e nebé céiikenye pa céiu péroféta ten, na nihe ubwo nang.»

¹⁷ Ke lé piuti nina e pwo wo Iésu ne ha ati ni piduaan ne ko a *Judé.

Pa Mesia na lé ucéieng

Mataio 11.1–6

¹⁸ Wo lépwo acémun de Ioane [pa apipuu apulie] ke lé uti ten ati nina e pwo wo Iésu. Ke e tode lupwona alo julu wo Ioane, ¹⁹ ††ke e nelu nge céii Padaame Iésu, beme lu tahimwoeng pie: «He caa te wogo kuti pali *Mesia li me e bo tuiebé? Ai, me geme mwo te ucéi pace céiu mwo?»

²⁰⁻²¹ Ke lu engen, ke é he lu tehene nge pele Iésu, ke lu alihi pie, e pwo me tieden ni cunu ko ni béé apulie. Ke e pawiehi ni duéé, ke e pwo me lé niê mwo ni béén na bwi jélé. Ke lu pii ten pie: «E nekemu bé céiiko wo Ioane, beme gemu tahimwoko pie: Caa te wogo kuti pali Mesia li me e bo tuiebé? Ai, me geme mwo te ucéi pace céiu?»

²² ††Ke e hegi ne telu pie: «Geu mwojuia mwo me geu â piuti te Ioane nina geu alihi, me nina geu téne. Be lé caa niê mwo wo lépwo bwi; ke lé caa engen ehi wo lépwo tebwa; ke caa wâé mwo wo lépwona katia jélé; ke lé caa téne mwo wo lépwona bwéjé jélé; ke lé caa mulie cemwo wo lépwo amele; ke lé caa hegi a Pwooti Wâé wo lépwona tice delé! ²³ *Adéi pana e alihi teme-hié, me céihi ne kong †††!»

E cihe ko Ioane wo Iésu

Mataio 11.7–19

²⁴ É heme lu caa mwojuia mwo wo lupwoli acémun de Ioane, ke e pii wo Iésu te ni apulie na lé mu lang pie: «É he li geé â ha a da [me geé téne Ioane] ke he ade aceli geé â alihi? [Pa apulie na pipwoééhen na e pwohewii] a womeéle celi e papenemihni na a dan? ²⁵ Ôhu! Ke kona he ade aceli geé â alihi? Pace céiu apulie celi e cuwohe ace epwén celi nihe wâé? Ôhu! Wo lépwona lé wonaa, ke nina lé mu he ni pwomwo he daame, ke nihe hiwon ni naamuulé. ²⁶ †††Te ade aceli

† 7.15 1 Rois 17.23; 2 Rois 4.36 †† Tice capuhe ali piélele.

‡ 7.16 Luka 1.68 †† 7.19–20 Psauwe 40.8; Malachie 3.1; Pii Beethi 1.8 †† 7.22 Ésaie 35.5–6, 61.1; Luka 4.18 ††† Grek: Adéi pana time uce tanahieng mu kong, ai Adéi pana time e uce tahi taabwonié.

††† 7.26 Luka 1.76

geé â alihi? Pace céiu péroféta? Éa, ke é pii tewé pie: Wo panaa, ke pa péroféta ubwo! ²⁷ †Be te wo Ioane kuti na e pieng wo Padué ne he ni tii iitih pie:

É bo neole pa apipépwooti tong.

E bo ânebuhem,

me e pwopweehi a pwaadeniim. Malachie 3.1

²⁸ «Geé téne ehi: Te tice pace apulie pwo bwohemwo celi e piwéden koja *Ioane pa apipuu apulie. Kehe icehi ana é pii tewé pie: Wo pana nihe wahin nang ne ha a *Mwametau te Padué, ke nihe pida koja Ioane.»

²⁹ ††Lé téne anaa wo lépwo *atai mwani cuhi puni apulie ‡, ke ni béén mwo, ke lé caa tai alihi pie, wo Padué, ke wâé nang ke mwomwon nang. Ke lé â céii Ioane beme e puulé ††. ³⁰ ††Kehe icehi ana wo lépwo *Farasaio, me lépwo *dotéén ko patén, ke time lé uce piténédehi ana nime Padué me lé pwo, be muhi telé me lé â céii Ioane me e puulé.

Lé pipiikemu me Ioane

³¹ Ke e pii mwo wo Iésu pie: «É bo pipwohewii ne ko ace de ni apulie jenaar? ³² Lé pwohewii ni cuwo nahi ewa na lé pidaataa ha apimu te ni apulie. Be [muhi te ni béén me lé jele me ni béélé]. Ke lé pii telé ne ni béélé pie: “Geme cuu oopwé tewé, ke time geé uce pwolu. Ke geme pwo a nyebi ko mele, ke time geé uce é!”

³³ «Be e tuiebé wo Ioane pa apipuu apulie, ke time e uce eni pwoloa, ke time e uce ûdu tabe megele, ke geé pii pie “Pwo duéé kon!”

³⁴ †††«Ke é tuiebé, woéo pa Nahi Apulie, ke é wiinaado me ûdu [pwohewii ni béén]. Ke geé pii pie: “Wo paje, ke te nihe pa aûdu, ke pa awiinaado! Ke e pabéé ni atai mwani, me ni béé apulie na ta jélé.”

³⁵ «Ke [a juuju ana nye mu pii pie]: “Nye alihi a pitemang ††† ne he ni bwomu te nina lé mulie ha a pitemang ‡.”»

Tapulicéihi tabe ûde ne ko Iésu

{Mataio 26.6–9; Maréko 14.3–9; Ioane 12.1–8}

³⁶ É ha a céiu tan, ke e tode Iésu wo pa céiu Farasaio beme lé piwiinaado. Ke é he lé mwo ko tebwo pwo taap ‡†, ³⁷ ‡††ke e tuiebé ê céiu toomwo pwopwaaden ‡†, be e téne pie, e lang wo Iésu. E pébé a mwotabe péi na oba ko tabe ûde. ³⁸ Ke e tidih jilin me pimiibule ne

† 7.27 Malachie 3.1 †† 7.29 Luka 3.12 ‡ Lépwo atai mwani cuhi puni apulie—A bwopiinen pie, lépwona ta ni mulihelé. Omehi Atai mwani cuhi puni apulie ne ha a Niinaado (Vocabulaire) ha anebwén ko a tii. †† Puulé—Ni niide a tii 29 me 30, ke wieli a pwooti te Luka, ai wieli a behi pwooti te Iésu. †† 7.30 Mataio 21.32 ††† 7.34 Luka 15.2 ††† Pitemang—Pitemang de Padué, ai Pitemang de ni apulie. ‡ Ni bwomu te nina lé mulie ha a pitemang—Grek: Ni nailé.

‡† Tebwo pwo taap—Omehi note ‡†† 7.37 Mataio 26.7; Maréko 14.3; Ioane 12.3 ‡† É céiu toomwo pwopwaaden—Grek: É céiu toomwo na ta a mulihen.

ânebuhe Iésu, ke e é. Ke téé ni tabehaamiin ne pwo lupwo a Iésu, ke e tahi ko ni apunin. Ke e mwomwauhi ni a Iésu, ke e céihi ne pwon ali tabe ûde.

³⁹ Me e alihi anaa wo pali eapwihi pwomwo, pali Farasaio, ke te junihe muhi ten, ke e niimihi pie, ‘Mepie pa céiu péroféta wo paje, ke e o te temehi pie ê toomwo ce, ke ê toomwo pwopwaaden.’

⁴⁰ Kehe icehi ana [e te temehi âniimihinaado ten] wo Iésu, ke e pii ten pie: «Go téne, go Simon, be pwo ana nimung me é pii tem!»

Ke e hegi ne ten wo paje pie: «Go cihe!»

⁴¹ Ke e pii ten wo Iésu [a ocine].

A ocine ko lupwo alo apulie na pwo kérédi telu

«E bwo mu wo pa céiu apulie. Ke pwo lupwo alo apulie na lu pwo kérédi ten, be wo pa céiu, ke 500000 ‡, ke wo pa céiu ke 50000 ‡†.

⁴² «Kehe icehi ana time uce jan me lu pwocuhin. Ke e pii telu pie: “Caa wâé! Geu necu ni kérédi teu.” Ke e tai pineulu die ko ni kérédi telu.»

[E panebwénihi a ocine ten wo Iésu, ke e tahimwo Simon, pali Farasaio, pie]: «Wooélé mu ko lupwona, na e junihe alihi a bwo wâé pali eapwihi mwani ‡†?»

⁴³ Ke e hegi ne ten wo Simon pie: «Wieli wo pali nihe hiwon ni kérédi ten.»

Ke e pii ten wo Iésu pie: «Go juuju.»

Nihe ubwo a pipwoééhe te êgi toomwo

⁴⁴⁻⁴⁶ Ke e biteeng wo Iésu nge céii êgi toomwo, ke e pii te Simon pie: «Aje, heme é taabé éni ha a pomwa tem, ke time go uce pwopweehi ne kong [pwohewii ana nye mu te pwo]. Be time go uce ne ace tabe me a bépuu ne ni ang. Ke time go uce céihi tabe ûde ne pwo a puning. Kehe go te ali ê toomwo ce? Tabuhi he li e taabé éni ‡†, ke time e uce cuwo ko a [bwo pwo ne ni na wâé. Be e] puu ni ang ko ni tabehaamiin, ke e tahi ko ni apunin. Ke e céihi a tabe ûde [na te junihe ubwo a cuhin] ne pwo lupwo ang. ⁴⁷ Be nihe ubwo a pipwoééhe ten, be nihe hiwon ni ta pwo ten na caa pineuhi. Kehe go téne, wo pa apulie na time uce pineuhi ni ta pwo ten na hiwon, ke time uce ubwo ne kon a pipwoééhe.»

⁴⁸ Ke e pii te êgi toomwo pie: «Êje, caa pineuhi ni ta pwo tem.»

⁴⁹ Ke wo lépwona lé teko tai tebwo pwo taap me weeng, ke lé pipii telé pie: «Wooélé pa apulie ce, na jan me e pineuhi ni ta?»

‡†† 500000; 50000—Grek: 500 deniers; 50 deniers. Céiu denier, ke a cuhi pa apulie ha a tan na céiu. ‡† Alihi a bwo wâé pali eapwihi... Grek: Pwoééhe pali eapwihi mwani. ‡† Tabuhi he li e taabé éni—ai Tabuhi he li étaabé éni ne he ni béé tii iitih he pwo grek.

⁵⁰ †Ke e pii te êgi toomwo wo Iésu pie: «Adéiko go êje! E caa celuimiko na a céihi tem! Ke go engen, be e bo mu pelem a péém.»

E pacémuni ni apulie na lé âcécín

Mataio 12.46—13.23; Maréko 3.31—4.25

8 É alecehen, ke lé engen wo Iésu me lépwo 12 acémun den, ke lé â nge he ni pwomwo ubwo me ni mwopopwaalé. Ke e patemehi ngelang a Pwooti Wâé ko a Mwametau te Padué.

Ni toomwo na lé âcécín

² †Pwo mwo ni toomwo na lé âcécí Iésu: wo léli toomwo li e pwo me tieden ni cunu kolé, me pawiehi mu kolé ni duée:

Wo Maria mu Magdala li e pawiehi mu kon ni duée li 7;

³ Wo Jeanne, êgi mwode Chuza, pa caa te lépwo apipenem de pa daame *Érode;

Wo Suzane;

Hiwon mwo ni toomwo na lé mu ne mwani me ni delé, beme ni bépicani te Iésu, me ni acémun den.

A ocine ko pa acemi

⁴ Nihe hiwon ni apulie na lé âbé céii Iésu mu he ni muko mwopopwaalé. Ke e pii telé a ocine ce:

⁵ «E bwo mu wo pa céiu apulie, ke e bwo wie ha a céiu tan, beme e tagiliihi ni âdaanu. Ke é he e ko tagiliihi, ke lé tupwo nge pwo pwaaden ni béé pidenaado, ke lé engen pwon ne ni apulie. Ke lé âbé ne ni meni, ke lé wii ati. ⁶ Ke ni béén, ke lé tupwo ne ha a wii péi. Ke lé te pwome cim, kehe icehi ana lé meiu, be te tice tabe lang. ⁷ Ke ni béén, ke lé tupwo ne ha awieme ni mwawi ubwo †. Ke me lé tai picim, ke lé taunuhi li pidenaado. ⁸ Ke ni béén, ke lé tupwo ne ha a pule na wâé. Ke lé cim, ke piubwo jélé da, ke lé ne ni acehin na nihe hiwon, die ko 100.»

Ke e pii me ubwo wo Iésu pie: «Wo paceli pwo ce pwojéénen me e téne, ke wâé heme e téne!»

Lé téne ke time lé uce piténedehi

⁹ Lé tahimwo Iésu wo lépwo acémun den ko ace bwopiine a ocine naa.

¹⁰ ††Ke e hegi ne telé pie: «E ne tewé wo Padué me geé temehi a ju bwomune a Mwametau ten. Kehe ni béé apulie, ke lé te ju téne cehi ni ocine beme: *Lé tee omehi taaci, kehe time lé uce alihi temehi; ke lé tee téne taaci, kehe time lé uce téne temehi.*»

Ésaie 6.9

† 7.50 Luka 8.48, 18.42 †† 8.2 Mataio 27.55—56; Maréko 15.40—41; Luka 23.49 ‡ Mwawi ubwo—Grek: *Acuwo pwo dan (plantes épineuses)*. †† 8.10 Ésaie 6.9—10

A bwopiine a ocine ko pa apicemi

¹¹ E pii telé mwo wo Iésu pie: «Weengi a bwopiine a ocine naa: Ni pide âdaanu, ke a pwooti te Padué.

¹² «[Ke ni béé pidenaado, ke lé tupwo nge pwo pwaaden.] A pwaaden, ke ni apulie na lé téne a pwooti, kehe icehi ana e tuiebé mwo wo *Caatana, ke e céi cemwohi a pwooti mu he ni pwonimelé. Be koli lé bo céihi ne kon, ke bo celuimilé.

¹³ «Ke ni béé pidenaado, ke lé tupwo ne ha a wii péi. [A wii péi] ke ni apulie na lé hegi a pwooti ne ha a pipwodéén, ke lé tabuhi céihi ne kon ha a céiu benaamwon. Kehe icehi ana time e uce pwo waan ne kolé a pwooti na lé téne. Ke me e tuie ne kolé ni tacebwén, ke lé patieden ni céihi telé.

¹⁴ «Ke ni béé pidenaado, ke lé tupwo ne he ni mwawi ubwo. [A pule naa] ke ni apulie na lé téne a pwooti, kehe icehi ana me lé caa engen, ke pinekepé ne telé ne ko ni naado na e tuie ne pwo a bwohemwo ce. Ke lé téte cehi a mwani me ni naamu bwohemwo, me ni naado na wâé telé. É mu ko ninaa, ke time lé uce ne ce acehin celi megele.

¹⁵ «Ke ni béé pidenaado, ke lé tupwo ne ha a pule na wâé. [Ke a pule naa] ke ni apulie na lé téne a pwooti, ke lé hegi ne he ni pwonimelé na wâé, ke lé ténédehi, ke lé cumang ne kon, ke pwo acehi a pwooti ne kolé.»

A ocine ko a mwomiû

¹⁶ ††[E pii telé mwo wo Iésu pie]: «Time nye uce ne miû ko a mwomiû ††, me nye talui ko ace cio, ai me nye ne haahi ace apule! Kehe genye ne da ko miiden, beme lé o alihi ehi, ne nina lé â taabé ha a mwa.

¹⁷ †††Ati ni naado na neduwohi, ke o bo habwii ne ha a pwéélang, beme nye alihi ehi. ¹⁸ †Geé cile ni pwooti na geé téne [beme piubwo da nina geé temehi]. Be wo pana caa pwo ne ten, ke o ne mwo pwon ce béén. Kehe wo pana te tice ten, ke o pétaabwon kojaeng a nehinaado na e niimihi pie e pelen.»

A ju pwomwoiu te Iésu

¹⁹ É alecehen, ke lé tuiebé wo nyaa te Iésu me lépwo ciéén, beme lé alieng. Kehe icehi ana pwocoon me lé â céiieng ko a bwo hiwon ni apulie na lé aujenieng.

²⁰ Ke e pii te Iésu wo pa céiu apulie pie: «Aje, élé âoté pwomwo wo nyaa tem me lépwo ciéém. Be nimelé me lé aliko.»

²¹ Ke e hegi ne telé pie: «É nyaa tong me ni ciééng, ke ni apulie na lé téne a pwooti te Padué, ke lé piténedehi.»

‡‡ 8.16 Mataio 5.15; Luka 11.33 ††† Mwomiû—*Lampe, lumière*. ††† 8.17 Mataio 10.26; Luka 12.2 § 8.18 Mataio 25.29; Luka 19.26

E pacuwohi a udan wo Iésu

Mataio 8.23–27; Maréko 4.35–41

²² É ha a céiu tan, ke lé taa pwo a céiu ong wo Iésu me lépwo acémun den. Ke e pii telé pie: «Genye gaale ângedé ko a céiu duaa jíé.» Ke lé engen.

²³ Ke me lé ko ân, ke e pule wo Iésu. Ke e tabuhi tahieng me ubwo a dan he jíé. Ke ubwo a tabe, ke e taa ha ali ong.

²⁴ Ke lé paûmiê Iésu, ke lé pii ten pie: «Pa apipune, genye o caa mwiiê!»

Ke e cihe me mwoiu ne ko ali dan me ali jíé. Ke e te cuwo kuti ali udan, ke caa te ju au mwo. ²⁵ Ke e pii telé pie: «É ko ade na time geé uce céihi?»

Kehe icehi ana te nihe mwotilé. Ke lé téetieng, ke lé pipii telé pie: «É! Kona woo pa apulie ce na e pihuôhi a dan me a jíé, ke lu piténeeng?»

E cibéé ni duéé na hiwon jélé @ mu ko pace céiu apulie

Mataio 8.28–34; Maréko 5.1–20

²⁶ Lé tuie nge ha amu Gadara † wo Iésu me lépwo acémun den, he bebenihe a amu Galilé. ²⁷⁻²⁹ É ha amu naa, ke pwo pa apulie na pwo ni duéé kon. Caa nihe bwolihi na e pimu ha a iitihí, ke te tice naamuun. Ke hiwon ni benaamwon na lé mu pahaulieng li duéé [beme e pwotahinaado]. Ke wo lépwo apulie lang, ke lé mu cie lupwo in me lupwo an, ke lé taa kon a itihe toki. Kehe icehi ana e mu te tahagéi. Ke lé mu cineeng nge ha a melé ne li duéé.

Ke heme e ole mu pwo ali ong wo Iésu, ke e te âbé benieng kuti wo paje. Ke wo Iésu, ke e cibéé wie ni duéé mu kon.

Kehe icehi ana e tidihí jilin, me pimiibule ne ânebuhen, ke e toii da pie: «Iésu, pa *Naî Padué na nihe e daaité! Ade aceli nimem me go pwo tong? É ilehi kójako pie: Go nemwo pwo tong aceli ta.»

³⁰ Ke e tahimwoeng wo Iésu pie: «He pii e woté ace niim?»

Ke e hegi ne ten pie: «Bwehi duéé!» Be nihe hiwon ni duéé na élé kon.

³¹ Ke lé wâgo ko Iésu, me pii ten pie: «Go nemwo tahikeme ne ha a pwon na tice anebwén kon ††!» ³² Ke he pwo a pubu puwokwo na nihe hiwon jélé na lé ko um gaale hamwo a juwole, ke lé pii ten ne li duéé pie: «Kehe go nekeme me game taa he ni puwokwo ne.»

Ke e te pwo ne telé ana lé ilehi wo Iésu. ³³ Ke lé wie mu ko pali apulie, ke lé gaale he li puwokwo. Ke lé te téte kuti li puwokwo mu pwo juwole, ke lé téele ne he tabe, ke lé mwiiê.

† Gadara—A niin mwo pie Gérasène. †† A pwon na tice anebwén kon—A niin mwo pie Oolaa. A karépu te ni duéé. Omehi a tii Pii Beetihí pwahamii tii 9.

Piân ali jepule

³⁴ Me lé alihi ana e tuie wo lépwo awéihi puwokwo, ke lé te téte kuti, beme lé â uti a jepule naa, ne he ni mwopopwaaalé ke é na ati ha amu. ³⁵ Ke lé âbé ni apulie, beme lé alihi ana e tuie. Ke me lé âbé mwonu Iésu, ke lé ali pali apulie li e pawiehi li duéé mu kon, he e caa ko tebwo ânebuhe Iésu. Ke e caa cuwohe ni epwén, be caa ju wâé nang. Ke te junihe emegéi nalé.

³⁶ Ke wo lépwo na lé alihi nina e tuie, ke lé piuti te lépwo béén ali jepule ko a bwo wâé nang mwo. ³⁷ Ke te junihe mwoti ati ni apulie ha amu naa, é Gadara. Ke lé pii te Iésu pie me e engen kójalé.

Ke e taa pwo ong.

³⁸ [Me e pwo me e engen] ke e âbé ileeng wo pali apulie li lé wie mu kon li duéé pie, me e âcén. Kehe icehi ana e hegi ne ten pie: ³⁹ «Go mwojuia ngemwo pelem, ke go uti ati ni naado na e pwo ne kom wo Padué!»

Ke e mwojuia mwo wo paje. Ke e â uti ne ha a mwopopwaaalé ati ni naado na e pwo ne kon wo Iésu.

E pwo me wâé lu alo toomwo

Mataio 9.18–26; Maréko 5.21–43

⁴⁰ E tuie gaapé wo Iésu mu ko a céiu duaan ko a jíé. Ke lé hegieng ne ni apulie lang, be lé tee ko ucéieng.

⁴¹ Ke e tuiebé wo pa céiu apulie na a niin pie Jairus, pa céiu caa te *mwotapitihí. Ke e tidihí jilin ne ânebuhe Iésu, ke e wâgo kon pie, me e âcén die ha a pomwa ten. ⁴² Be pwo ê naîn na te céiu nang na caa 12 ni jo hen, na e caa pwo me e mele. Ke e âcén wo Iésu.

É toomwo na 12 ni jo ko a cunu kon

[É he e mwo ko â he pwaaden] ke hiwon ni apulie na lé aujenieng, ke lé picemelé. ⁴³ Ke e mu ha awieme ni apulie naa ê céiu toomwo na caa 12 ni jo na cunu nang hen, be e mu tuie ni benaamwon na e mu téte kon a cewéle. Ke e caa te ju patieden ni mwani ten ‡ ne ko ni dotéén, kehe icehi ana time uce jan me lé pwo me tieden a cunu kon. ⁴⁴ Ke e piâbé alecehe Iésu, ke e ti ko a baaé epwénen. Ke e te cuwo kuti a bwo téte na ali cewéle.

⁴⁵ Ke e pii wo Iésu pie: «Wooélé na e ti ko a epwéning?»

Ke lé tai hegi ne ten pie: «Time uce wogeme!» Ke e pii ten wo Pétéru pie: «Pa apwopune, é mu ko ade na go pii anaa? Be go alihi, te nihe hiwon ni apulie éni na lé aujenikenye, ke lé picemeko!»

⁴⁶ Kehe icehi ana e pii mwo wo Iésu pie: «Pwo pace céiu apulie celi e ti ko a epwéning, be é téne pie e engen mu kong a céiu duaa nihung.»

‡ Ke e caa te ju patieden ni mwani ten—Te tieden ni pwooti naa he ni béé tii iitihí he pwo grek.

⁴⁷ Ke te ju éjén êgi toomwo ko a bwo mwotieng. Be e alihi pie e temehi ana e ko tuie wo Iésu. Ke e tidihi jilin me pimiibule ne ânebuhen. Ke e pii ten, ne ânebuhe ati ni apulie, a watihen me e ti kon, ke a bwo tieden na a cunu kon.

⁴⁸ †Ke e pii ten wo Iésu pie: «Adéiko go êje! Caa wâé go mwo ko a céihi tem! Ke go engen, ke me e mu pelem a péém.»

Ê naî Jaïrus

⁴⁹ He e mwo ko pii anaa wo Iésu, ke e tehenebé wo pa céiu apulie mu pele Jaïrus, pali eapwihi mwotapitihhi. Ke e pii ten pie: «Au! E caa mele wo êgi naîm. Kehe go nemwo pahauli pa apipune.»

⁵⁰ Ke e téne ni pwocihe naa wo Iésu. Kehe icehi ana e pii ten pie: «Go nemwo pwo me mwotiko! Kehe go céihi, be bo wâé nang mwo!»

⁵¹ É heme lé tuie nge ha a pomwa ten, ke e paciitihhi ko ni apulie me lé nemwo taa huâ, te icehi Pétéru, me Ioane, me Cang, me lu nyaa me caa te êgi cuwo nahi toomwo. ⁵² Be lé tai é ke pihemun ko êgi nahi toomwo.

Ke e pii telé wo Iésu pie: «Geé nemwo é! Geé ko pii pie e caa mele; kehe woéo, ke é pii pie e teko ju puluta ††!»

⁵³ Ke lé pihoonieng, be lé temehi pie e caa te mele.

⁵⁴ [Ke e taa ha ali mwa.] Ke e pétaa ko a in, ke e toii da pie: «Ê naîng, go cuwoda!»

⁵⁵ Ke e caa mulie mwo, ke e te caamada kuti. Ke e pii wo Iésu [te lu nyaa me caa ten] pie: «Geu ne celi e wii.»

⁵⁶ Lu te nihe téetihi, kehe icehi ana e pii telu wo Iésu pie: «Geu nemwo pii te ce béé apulie ana tuie ne éni.»

E ne ngen ni 12 apostolo ten

Mataio 10.5–15; Maréko 6.7–13

9 ¹⁻² E todebé ni 12 *apostolo ten wo Iésu, ke e nelé ngen beme lé â patemehi a *Mwametau te Padué. Ke e ne telé a pihuô me a junuun, beme lé pawiehi ni duéé, ke me lé pwo me tieden ni cunu ko ni apulie. ³ †Ke e pii telé pie: «Geé nemwo pé ce naado hemepie geé engen: mepie ace bwaja, me ace élele, me ace pwoloa, me ce mwani. Ke geé te cuwohe cehi ace epwén celi te céiu.

⁴ «Ke mepie lé hegikewé ne ha ace céiu pwomwo, ke wâé heme geé mu lang, dieli geé bo engemwo mu ha a duaan naa. ⁵ Ke mepie time uce nime ni apulie me lé hegikewé ne ha ace céiu duaan, ke geé engen mulang. Ke geé tagiliihi ni muu pule ko ni awé, beme geé habwii pie time uce wâé ni huô telé [be muhi telé ko a pwooti te Padué].»

† 8.48 Luka 7.50 †† Geé ko pii pie...e teko ju puluta!—Grek: Caa time e uce mele, kehe e teko ju puluta. ‡ 9.3–5 Luka 10.4–11

⁶ Ke lé engen wo lépwo apostolo nge he ni mwopopwaalé, ke lé patemehi a Pwooti Wâé, ke lé pwo me tieden ni cunu ko ni apulie.

E téne a jepule kon wo Érode

Mataio 14.1–12; Maréko 6.14–29

⁷⁻⁹ ††E téne ni jepule ko Iésu wo *Érode Antipas, gupéno ne Galilé. [Be e téne pie e pwo ni *pipwo-junuun.] Ke e pii pie: «É pwo me tahagéi hene *Ioane pa apipuu apulie. Ke he wooélé pa apulie ce?» Ke e hane me e alieng.

Ke tabuhi pinekepé ten, be lé pii ne ni béé apulie pie: «Weeng, ke wo Ioane pa apipuu apulie, he e caa mulie cemwo mu ha amele!» Ke lé pii ne ni béén pie, wo péroféta Élia ††, ai pace céiu péroféta ânebun na e caa mulie cemwo.

Lé wiinaado ne ni apulie na 5000 jélé

Mataio 14.13–21; Maréko 6.30–44; Ioane 6.1–15

¹⁰ Lé mwojuia mwo wo lépwo apostolo [mu he ni mwopopwaalé, ke lé pitapitilé] ne pele Iésu. Ke lé uti ten ati ni naado na lé pwo. Ke e péélé nge ha a céiu duaan na te piticie hen, mwonuhi a mwopopwaalé Betsaïda. ¹¹ Kehe icehi ana hiwon ni apulie na lé téne pie lé â lang, ke lé âcéilé. Ke e hegilé wo Iésu, ke e pacémunilé ko a Mwametau te Padué, ke e pwo me tieden ni cunu kolé.

¹² Ke é he babwén, ke lé âbé céiieng wo lépwo acémun den, ke lé pii ten pie: «Go ne ngemwo ni apulie ce, nge he ni mwopopwaalé, me ni pwomwo na e mwonu, beme lé pé ce wiinaado telé, ke me lé pule ngelang. Be apiticie éni.»

¹³ Ke e hegi ne telé wo Iésu pie: «Ûhu! Geé ne ce wiinaado telé!»

Ke lé pii ten pie: «Te ju nim ni pwoloa, ke alo ni ikua na e peleme! Kona nimem me geme â pwocuhi ce wiinaado me delé ati?!»

¹⁴ Be élé nge ha a 5000 ni apulie aiu.

Ke e pii te ni acémun den pie: «Geé pii te ni apulie pie, me lé pwo ce pubuulé, me pi 50. Ke me lé tebwo.»

¹⁵ Ke lé ténedehi, ke lé pwo me lé tai tebwo ne li apulie. ¹⁶ Ke e pé li pwoloa li nim me lupwoli ikua wo Iésu. Ke e alehede da he miiden, ke e pwo-olé te Padué. Ke e ebii li pwoloa, ke e ne te lépwo acémun den, me lé pwopatihi ne ha a pubu apulie. ¹⁷ Ke lé tai wiinaado ati, ke caa pwoluu jélé. Ke lé taineibuhi mwo ni nehi mepwoloa, ke lé paobaanihi ni élele na 12 kon.

†† 9.7 Mataio 16.14; Maréko 8.28; Luka 9.19 †† 9.9 Luka 23.8 ††† Élia—Pa péroféta te Padué na e mulie he na 800 ni jo ânebuhe Iésu Kériso.

Wo Iésu ke pa Mesia

Mataio 16.13–28; Maréko 8.27–9.1

¹⁸ É ha a céiu tan, ke e te pwoitihí wo Iésu ne ha a céiu duaan na apiticie, weeng me ni acémun den. Ke e tahimwolé pie: «Kona lé pii pie woté ne kong ne ni apulie? Lé pii pie woéo, ke woo?»

¹⁹ †Ke lé hegi ne ten pie: «Lé pii ne ni béén pie, wogo, ke wo Ioane pa apipuu apulie. Ke lé pii ne ni béén pie, wo péroféta Élia. Ke lé pii mwo wo lépwo béén pie, pa céiu béé lépwo péroféta ânebun na e caa mulie cemwo.»

²⁰ ††Ke e tahimwolé wo Iésu pie: «Ke kona wogewé ke?»

Ke e hegi ne ten wo Pétéru pie: «Wogo, ke pa *Mesia ‡, na go âbé mu pele Padué!»

²¹ Kehe icehi ana e te junihe paciitihí kolé me lé nemwo pii anaa te ni apulie.

E bo mele ke mulie cemwo

²² †E pii telé pie: «O bo tuie ni benaamwon na é bo nihe mu he ni picani hen, woéo, pa Nahi Apulie. Be wo lépwo apihuô, me lépwo caa te lépwo *apwoâpwailo, me ni *dotéén ko patén, ke o te muhi telé kong. Ke lé bo pwo me é mele. Kehe icehi ana é ha a béciéhe ni tan alecehen, ke é bo mulie cemwo.»

A bwo âcén

²³ ††E pii te ati ni apulie wo Iésu pie: «Wo paceli nimen me e âbé céing [beme pa acémun dong] ke me e nemwo bo uce piniimieng mwo. Kehe wâé heme e canihí téteda he ni tan a *kuricé ten, ke me e âbé céing.

²⁴ †††Be wo pana nimen me e celuimi a mulihen, ke e o patieden. Kehe wo pana e patieden a mulihen mu kong, ke o celuimieng. ²⁵ He ade ne te pa apulie, hemepie e hegi ati ni naamuu a bwohemwo, ke me e patieden a mulihen?

²⁶ †††«Wo lépwo béén, ke tanim jélé kong me a pwooti tong, ne ânebuhe ni apulie. Ke heme wonaa, ke woéo pa Nahi Apulie, ke o bo tanim jo kolé, hemepie é bo âmwobé. É ha a tan naa, ke o bo habwii a bwo ubwo na a wâé teme, woéo me Caa tong, me ni *âcélo iitihí.

²⁷ Ke é pii tewé a juuju pie: E bo ne éni a Mwametau ten wo Padué, ati ne ha a junuun. Ke pwo lépwo béén na élé éni jena na lé o mwo te alihi anaa, ânebuhe ce bwo mele telé.»

† 9.19 Luka 9.7–8 †† 9.20 Ioane 6.68–69 ‡ Pa Mesia—Grek: Kériso. Mesia he pwo ébéru, ke Kériso he pwo grek. Omehi Ioane 1.41. †† 9.22 Luka 9.44, 18.32–33 ††† 9.23 Mataio 10.38; Luka 14.27 †††† 9.24 Mataio 10.39; Luka 17.33; Ioane 12.25 †††† 9.26 Mataio 10.33; Luka 12.9

Habwii a bwo ubwo na a wâé ten

Mataio 17.1–8; Maréko 9.2–8

²⁸ É he na 8 ni tan alecehe a bwopiine ni pwooti naa te Iésu, ke e pé Pétéru, me Ioane, me Cang. Ke lé taa pwo juwole beme lé pwoitihí. ²⁹ Ke é he e mwo ko pwoitihí wo Iésu, ke pitaatééhi a bwo alihi na a pwa-hamiin. Ke â pwojo ni epwénen, pwohewii a pwéélang ko a ilehi. ³⁰ Ke [lé te ali kuti] lupwo apulie na lé picihe me weeng: wo *Moosé, me Élia, [lupwo alo péroféta ânebun na piubwo julú]. ³¹ †Ke lu âbeetieng ne ha a bwo ubwo na a wâé te Padué. Ke lé picihe ko a bwo â mele ten ne *Iéruusaléma.

³² ††Ke me lé mwo ko wonaa, ke wo Pétéru me lupwo acémun béén, he lé mwo ko pule ko a bwo mwaale jélé. Ke me lé ûmiê, ke lé alihi *a wâé te Iésu, ke lé ali lupwoli apulie, li lu mu pelen. ³³ Ke me lu engen koja Iésu wo Moosé me Élia, ke e pii ten wo Pétéru pie: «Éé! Pa apipune, te nihe wâé heme genye ko mu éni. Wâé heme geme pacuuli ce mwa mwaanu celi cié, beme a dem a céiu, ke me a de Moosé a céiu, ke me a de Élia a céiu.»

E pii anaa, be time e uce temehi aceli e ko pii [ko a bwo emegéi nan].

³⁴ É he e mwo tee ko cihe, ke e te âbé kuti a menii, ke e taluilé ko a démen. Ke te nihe mwoti lépwo acémun den. ³⁵ †††Ke lé téne a pwocihe bé mu ha ali menii, na e pii pie: «Wo paje, ke pa Naîng [na te céiu nang] na é caa pipégalieng. Ke geé piténeeng!»

³⁶ Ke é alecehen, ke lé alihi pie, caa te piwoélé cehi me Iésu. Ke lé te cile me delé ha a benaamwon naa, ke time lé uce piuti te ni apulie.

E pwo me wâé pa céiu ewa @ na pwo duéé kon

Mataio 17.14–18; Maréko 9.14–27

³⁷ É ha acaama hen, ke lé homwobé mu pwo juwole wo Iésu me lépwo acémun den na cié jélé. Ke lé âbé céii Iésu ne ni apulie na nihe hiwon jélé.

³⁸ Pwo pa céiu béélé, na e toii da pie: «Pa apipune, é ileko pie, go picani te pa naîng, na te ju céiu nang.

³⁹ Be e mu pééeng a duéé, ke e mu pwo me e wiikau, ke e mu pegilieng, ke e mu tahieng ole pwo bwohemwo, ke e pwo me téte ni tabepwon. Ke e mu te nihe pwotahinaado ne kon, ânebuhe a bwo wie mu kon.

⁴⁰ Ke é ile ni acémun dem pie, me lé peni ali duéé, kehe icehi ana time uce jan ne kolé.»

⁴¹ Ke e pii telé wo Iésu pie: «[É pipwoééhewé] wogewé ni apulie jena! Mwo te time geé uce téle céihi, be wogewé ni apwo mwoiu pun! O é dieli éniile celi é o mwo tee mu pelewé, ke me é mwo tee picani ne kowé? Pébé éni pa cuwo ewa naa!»

§ 9.31 Luka 9.22 †† 9.32 2 Pétéru 1.16–18 ††† 9.35 Luka 3.22

⁴² He lé mwo ko pééeng bé, ke e tahieng ole pwo bwohemwo na ali duéé, ke e pegilieng. Ke e te penieng kuti wo Iésu. Ke e pwo me tieden ali cunu ko pali ewa aiu, ke e neeng de caa ten. ⁴³ Ke lé te nihe téetihati ati ne ni apulie na lé alihi a inenaado naa ko a junuu Padué.

Ni béé pwooti te Iésu

Mataio 17.22—18.6; Maréko 9.30—41

Lé o pwo me taunuéo

Ni béé apulie, ke lé picedihi ati nina e pwo wo Iésu. Ke e pii te ni acémun den pie: ⁴⁴ †«Ke wogewé, ke geé téne ehi ani: O bo icuéo te ni apulie, woéo pa Nahi Apulie. Ke lé bo imwiéo, [ke lé bo pwo me é mele].»

⁴⁵ ††Kehe icehi ana time lé uce temehi ana e pii. Be time uce pwaale ne telé a bwopiinen. Kehe mwotilé me lé tahimwoeng kon.

Woo pana piubwo nang?

⁴⁶ †É alecehen, ke lé tabuhi picihe wo lépwo acémun den, ke lé pitahimwolé pie: «Kona woo paceli piubwo nang ne ha awiemenye?»

⁴⁷ Kehe icehi ana e te temehi ni pwonimelé wo Iésu. Ke e pé pa cuwo nahi ewa, ke e neeng cebwon. ⁴⁸ ††Ke e pii telé pie: «Wo pana e hegi ne he niing pace cuwo nahi ewa pwohewii paje, ke e hegiéo. Ke wo pana e hegiéo, ke e hegi mwo pana e neéo bé. Be wo pana nihe piwahin nang mu hadeniwié ati, ke weeng pana piubwo nang.»

Pana time e uce âbédekenye

⁴⁹ E pii wo Ioane te Iésu pie: «Pa apwopune, geme ali pa céiu apulie na e peni ni duéé ne he niim. Ke geme pii ten pie me e nemwo pwo, be time uce pa béénye.»

⁵⁰ ††Ke e hegi ne telé pie: «Geé nemwo tanyuueg! Be wo pana time e uce âbédekenye, ke pa béénye.»

Muhi telé kon ne Samari

⁵¹ E o caa tuie a benaamwon na me ece a bwohemwo ce wo Iésu. Ke e te nihe pipamwouieng, beme e â Iérusaléma. ⁵² Ke e ne ngen lépwo apipéwooti ten, me lé â ha a céiu mwopopwaaalé ne ha amu ne *Samari, beme lé bo piwâam ko ace bwo tuie ngen den. ⁵³ Kehe icehi ana wo lépwo apulie lang, ke muhi telé me lé hegieng ††, be e engen me e â Iérusaléma [a pwomwo ubwo na e ha amu *Judé].

⁵⁴ †††É heme lu téne anaa wo lupwo acémun den, wo Cang me Ioane, ke lu pii ten pie: «Padaame, hemepie

nimem, ke gemu o ilehi a miû me e opé mu he miiden, beme e bo cinilé!»

⁵⁵ Ke e biteeng wo Iésu, ke e henilu {pie: «Time geu uce temehi pie he ade jenenaado na e cihe kou. ⁵⁶ Be woéo pa Nahi Apulie, ke time é uce âbé beme lé mele wo lépwo apulie, kehe é âbé beme é celuimilé.»}

Ke lé â ha a céiu mwopopwaaalé.

Lépwona nimelé me lé âcéi Iésu

Mataio 8.19—22

⁵⁷ É he lé ko â he pwaaden, ke e âbé céii Iésu wo pa céiu apulie, ke e pii ten pie: «[Nimung me] é âcéim na ati he ce piduaan celi go bo â hen.»

⁵⁸ Ke e hegi ne ten wo Iésu pie: «Ni wota apiaba, ke pwo ni amwaaale telé; ke ni meni, ke pwo ni mwonahilé. Kehe woéo, pa Nahi Apulie, ke te tice duaan celi me é mwaale hen.»

⁵⁹ Ke e pii te pa céiu apulie wo Iésu pie: «Go âbé céing.» Kehe icehi ana e pii pie: «Mwo cuwo lang, beme é mwo â pineduwo caa tong.»

⁶⁰ Ke e hegi ne ten wo Iésu pie: «Go necu ni amele me lé te pineduwolé! Kehe wogo, ke go pipatemehi a Mwametau te Padué.»

⁶¹ †E pii te Iésu wo pa céiu apulie pie: «Padaame, é bo te âdé céim. Kehe icehi ana go mwo neéo beme é mwo â pine a pwomwoiu tong.»

⁶² Ke e hegi ne ten wo Iésu pie: «Wo pana e ne a in ko a béum, ke me e nié ocemwo, ke time uce jan ne kon, me e taa ha a Mwametau te Padué.»

E pahede lépwo apulie na 70 jélé

Mataio 11.20—24, 13.16—17

10 ††E pipégali ni apulie na 70 ††† jélé wo Padaame Iésu. Ke e nelé ngen he pialo ânebuhen, nge he ni mwopopwaaalé me ni duaan na e niimihi pie me e â lang. ² ††Ke e pii telé pie: «Nihe ubwo a pitii âdaanu na me pwo †††, kehe icehi ana time uce hiwon ni apenem. Geé pwoiitihi, me ilehi koja pa eapwihi apwoamu, me e ne mwobé ce béé apenem, beme lé pitii âdaanu.

³ ††Geé engen [ke geé pipwocile]! Be é pahedekewé pwohewii ni nahi muto nge ha awieme ni wota apiwii. ⁴ ††Ke heme geé ân, ke geé nemwo pé ce mwani, me ce élele, me ce dihibwaaawé. Ke geé nemwo tee pwojepule ††† me ni béé apulie nge he pwaaden.

⁵ «Ke me geé taa ha ace céiu pwomwo, ke geé mi pii pie: "Me e mu ha a pwomwo ce a péém!" ⁶ Ke mepie pwo pace apulie celi e mu lang, celi e mu kon a péém, ke e bo mu pelen a péém. Ke me time uce wonaa, ke e

§ 9.61 1 Rois 19.20 †† 10.1 Maréko 6.7 ††† 70—ai 72 ne he ni béé tii iitihi he pwo grek. †† 10.2 Mataio 9.37—38; Ioane 4.35 ††† Nihe ubwo a pitii âdaanu na me pwo—Be junihe hiwon nina time lé uce téne a Pwooti Wâé. †† 10.3 Mataio 10.16 †† 10.4 Mataio 10.7—14; Maréko 6.8—11; Luka 9.3—5 ††† Tee pwojepule—Grek: Pipwobwocu. Be koli bwolilé, ke time lé o uce pwo a penem na e pahedelé kon.

† 9.44 Luka 9.22 †† 9.45 Luka 18.34 † 9.46 Luka 22.24 †† 9.48 Mataio 10.40 †† 9.50 Mataio 12.30; Luka 11.23 ††† Te junihe time lé uce piténelé wo lépwo Samari me lépwo Judé. ††† 9.54 2 Rois 1.9—16

o te mwojuia ne mwo kowé. ^{7 †}Me geé mu ha ace pwomwo, ke geé wii ke ûdu celi lé bo ne tewé. Be wo pa apenem, ke o wâé heme e hegi a cuhieng. Ke geé nemwo piâdé ke âbé nge he ni pwomwo; geé mu ha ace pwomwo celi céiu [dieli geé bo engen mu ha a du-aan naa].

^{8 ††}«Ke é heme geé taa ha ace céiu mwopopwaalé, ke mepie lé hegikewé, ke geé wii celi lé bo ne tewé. ⁹ Ke geé pwo me tieden ni cunu ko ni apulie lang, ke geé pii telé pie: “E caa âbé mwonukewé a *Mwametau te Padué!”»

Lépwona muhi telé ko a pwooti

¹⁰ «É hemepie time lé uce hegikewé ne ha ace mwopopwaalé, ke geé â ha apimu ubwo te ni apulie, ke geé pipatemehi telé pie: ^{11 ††}“Geme tagilihi ni muu pule ko amu tewé, mu ko ni ame [beme ine a pitautinaado te Padué]! Ke geé pipwocile, be caa é mwonu a Mwametau ten!”

^{12 ††}«Ke é pii tewé a juuju pie: É ha ace Tan celi e bo tauti ni apulie hen wo Padué, ke o te junihe ubwo ace kuhinaado telé koja lépwo *Sodome [li te junihe ta ni huô telé].

¹³ «Geé pipwocile, wogewé ni apulie Korazin me Betsaïda ^{††} Be o bo ne kuhinaado tewé! Be é caa pwo ni naado na nihe ubwo ne pelewé [ke time geé uce céihij]! Geé cuwoteeke niimihi lupwo pwomwo ubwo Tir me Sidon ^{†††} ânebun [be te nihe ta ni huô te ni apulie lang]. Kehe icehi ana hemepie lé alihi ana é pwo ne pelewé, ke wieli caa te é bwolihi celi lé taatéhi ni mulihelé. Ke me lé o habwii ko ace bwo cuwohe cang delé, me pitimilé he dep. ¹⁴ Ke o te nihe ubwo ce kuhinaado tewé koja lépwo Tir me Sidon.

¹⁵ «Ke te piwien ne kowé, wogewé lépwo apulie Kapernaüm. Be geé niimihi pie pwonaado ne kowé, ke geé pwohewii Padué ^{†††}. Ôhu! E bo nekewé ole céii lépwo amele!»

^{16 ††}Ke e pii mwo wo Iésu te lépwo apulie ten pie: «Hemepie e piténedekewé wo pace céiu apulie, ke woéo na e piténeдео. Ke mepie time e uce hegikewé wo pace céiu apulie, ke woéo na time e uce hegié, ke time e uce hegi mwo pana e neéo bé.»

[Ke lé engen wo lépwo apulie te Iésu na 70 ^{††} jélé.]

† 10.7 1 Korénit 9.6–14; 1 Timoté 5.18; Lévitique 19.13 †† 10.8 1 Korénit 10.27 † 10.11 Apostolo 13.51, 18.6 †† 10.12 Genèse 19.24–25; Mataio 10.15, 11.24 †† Korazin me Betsaïda—Lupwo amu na nihe pipwonaado ne kon ne Isaraéla. ††† Tir me Sidon—Lupwo amu na time uce lupwo amu ko a Isaraéla. ††† 2e phrase—Grek: Kona geé taa he miiden? † 10.16 Mataio 10.40; Luka 9.48; Ioane 5.23 †† 70—ai 72 ne he ni béé tii iitihij he pwo grek.

Lé mwojuia mwobé

¹⁷ He lé mwojuia mwobé, ke lé te junihe pipwodéén, ke lé pii pie: «Padaame, lé piténedekeme ni duéé [heme geme pii telé pie me lé wie] ne he niim!»

^{18 †††}Ke e hegi ne telé wo Iésu pie: «Geé téne! É ali *Caatana, he e tupwo mu he miiden pwohewii a ilehi! ^{19 ††}Ke é caa ne tewé a pihuô me geé engen pwo ni bwien, me ni atinip ^{†††}, ke me geé â ati pwo a junuu Caatana. Ke o te tice celi e tatéékewé. ^{20 ††}Kehe icehi ana geé nemwo pipwodéén cehi mu ko ana lé piténedekewé ne ni duéé! Kehe wâé heme geé pipwodéén ne ko ana e caa tii ni niwé wo Padué ne ha a tii ten ne he miiden.»

E pwo-olé te Padué wo Iésu

²¹ Ke é ha a cuwo benaamwon naa, ke e te nihe pipwodéén wo Iésu, mu ko a *Jenen Iitihij. Ke e pii te Padué pie: «É pwo-olé tem, go Caa, Padaame he a miiden me a bwohemwo, be go neduwohi ni naado naa koja lépwo atemehinaado me lépwo apitemang, ke go habwii te lépwona time lé uce cémun ^{††}. Be te âcehi ana te nitem kon.»

^{22 †††}[Ke e pii te lépwona lé téneeng pie]: «Ati nina e pele Caa tong, ke e caa ne tong. [E caa te pihabwiieng dong, beme é temehieng ehi.] Te weeng cehi na e temehié, woéo pa Naïn. Ke te woéo cehi na é temehieng, ke é habwiieng te ni béén, beme lé temehieng mwo.»

²³ Ke e biteeng nge céii ni acémun den wo Iésu, ke e pii telé pie: «Nihe piwâénimewé heme geé alihi ni naado na geé alihi. ²⁴ Be é pii tewé pie: Hiwon ni péroféta me ni daame na te nihe nimelé me lé alihi nina geé alihi, kehe time lé uce alihi. Ke nimelé me lé téne nina geé téne, kehe time lé uce téne.»

A patén na piwéden

^{25 †††}[Ha a céiu tan] ke e âmwobé céii Iésu wo pa céiu *dotéén ko patén. Be nimen me e tacebwénieng, ke e tahimwoeng pie: «Pa apipune, he ade aceli me é pwo, beme é hegi a *mulie dieli mwo ne pele Padué?»

²⁶ Ke e hegi ne ten wo Iésu pie: «He ade aceli tii ne he ni patén? Ke go woté ko ace bwo temehi nen dem?»

^{27 †††}Ke e pii ten wo pali apulie pie: «Go pwo me eân-imem de Padaame Padué hem, ati ne ha a ju pwon-imem, me a mulihem, me a niihem, me a bwo niimihi-naado tem.

Deutéronome 6.5

††† 10.18 Ioane 12.31; Pii Beetihij 12.8–9 †† 10.19 Psaume 91.13; Maréko 16.18 ††† Atinip—Grek: Scorpion. †† 10.20 Filipi 4.3; Pii Beetihij 3.5 †† Lépwona time lé uce cémun—Grek: Ni cuwo nahi ewa. ††† 10.22 Ioane 3.35, 10.15 ††† 10.25 Mataio 22.35–40; Luka 18.18 ††† 10.27 Lévitique 19.18; Deutéronome 6.5

Ke go pwo me eânimem de ni béén†, pwohewii a bwo pieânimem dem.»

Lévitique 19.18

²⁸ †† Ke e hegi ne ten wo Iésu pie: «Go te ju hegi ehi; ke me go wonaa ace bwomu tem, ke go o taa ha *a ju mulip.»

²⁹ Kehe icehi ana nime pali me e habwii pie e juuju. Ke e tahimwo Iésu mwo pie: «Ke kona woo pace apulie celi me eânimung den?»

³⁰ [Ke e pwo a ocine wo Iésu beme e hegi ne ten.]

A ocine ko pa Samari

E pii pie: «Pwo pa apulie [pa âjiénye, wogenye lépwo *Juif. Ke é ha a céiu tan] ke e ole mu *Iérusaléma me e â Iériko. Ke me e â he pwaaden, ke lé ahieng wo lépwo abune, ke lé pé ati ni mwani ten me ni epwé-nen. Ke lé bwo neeng, he e caa pwo me e mele.

³¹ «Ke nebwén, ke e âbé ha a pwaaden naa wo pa *apwoâpwailo, [pa âjiénye]. Ke heme e ali pali apulie, ke e te padep kon, ke e te ân. ³² Ke e tuiebé mwo wo pa apipenem ko a *mwaiitihî ‡, [pa âjiénye] ke e te pwohewii pana e ânebun, ke e te uti a pwaadeniin.

³³ «Ke heme e âbé wo pa céiu béé lépwo *Samari, [lépwona geé pitéétilé] ke e ali pali apulie, ke nihe ubwo a bwo eânimem den. ³⁴ Ke e âmwonueng, ke e céihi a *huile* me a tabe megele beme e ciie ni ahinaado kon, ke e tawii. Ke e temeeng da pwo a buriko ten. Ke e pééeng nge ha a mwa te ni aâdé ke âbé, ke e cileeng nelang.

³⁵ «É ha acaama hen, ke e ne ni mwani te pali eapwii hi pwomwo, ke e pii ten pie: “Go cile ehi paje. Ke mepie time uce jan ni mwani ce, ke go bo pwocuhi ni nehin, ke é bo wodehi ne tem hemepie é bo mwojuia mwobé.”

«[Ke nebwén, ke e engen.]»

³⁶ Ke e tahimwo [pali dotéén ko patén] wo Iésu pie: «É mu ko lépwo apulie na cié jélé naa, ke woo paceli eânimem de pali apulie †† li tanahieng? Ade ace âniimi-hinaado tem?»

³⁷ Ke e hegi ne ten wo pali dotéén ko patén pie: «Wo pana e pwopweehi ne kon, ke e picani ten.»

Ke e pii ten wo Iésu pie: «Go engen, ke go pipwohewiieng.»

Lu hegi Iésu wo Maria me Marte

³⁸ Lé â pwo pwaaden wo Iésu me ni acémun den. Ke lé tuie nge ha a céiu mwopopwaalé na e mu hen é céiu toomwo na pii kon pie Marte. Ke e hegilé ne ha a pomwa ten. ³⁹ †† Ke pwo é ciéén na pii kon pie Maria, na

† Ni béén—Grek: Pana e mu mwonuko, ai Pa ju béém. †† 10.28 Lévitique 18.5 ‡ Apipenem ko a mwaiitihî—Lévite. Penem de a pwomwoiu te Lévi. †† Woo paceli eânimem de pali apulie... Grek: Woo paceli ju âjiénye pali apulie... †† 10.39 Ioane 11.1, 12.2–3

e tebwo ânebuhe Iésu, beme e tabemi ati ni pwooti ten.

⁴⁰ Ke wo Marte, ke pipééeng a pwoila, ke e âbé pii te Iésu pie: «Padaame, e te neéo é ciééng me é te pipen-em cehi! Kona te piticenaado ne kon ne tem? Go pii ten pie, me e âbé picani tong!»

⁴¹ Ke e pii ten wo Padaame pie: «Au êje, Marte, go te junihe gia ko ni naado na nihe hiwon [na piticenaado ne kon]. ⁴² †† Kehe go téne, te ju céiu cehi a naado na pwonaado ne kon. Ke e caa tooli wo Maria. Ke o time bo uce pé kojaeng mwo.»

A bwo pwoiitihî

Mataio 6.9–13, 7.7–11

11 É ha a céiu tan, ke e pwoiitihî ne ha a céiu duaan wo Iésu. Ke é he e caa nebwén, ke e pii ten wo pa céiu acémun den pie: «Padaame, go pacémunikeme ko a bwo pwoiitihî, be e wonaa wo *Ioane pa apipuu apulie te lépwo acémun den.»

Pa caa teme...

² Ke e hegi ne ten pie: «Weengi a bwo pwoiitihî tewé: “Caa teme jeda he miiden, wâé heme paciitihî a niim. Wâé heme e âbé a Mwametau tem.

³ Go ne teme ce wiinaado celi jan ne kome, ati he ni tan.

⁴ Go pineuhi ni ta pwo teme, pwohewiin he geme pineuhi ni ta na lé pwo teme.

Go nemwo nekeme he ni tacebwén.”»

Ocine ko a bwo pwoiitihî

⁵⁻⁶ [E pacémuni mwo lépwo acémun den wo Iésu] ke e pii telé a ocine ce ko a bwo pwoiitihî: «Geé cuwoteeke niimihi ani: E tuiebé wo pa céiu apulie ne pelem ha awieme bwén, kehe te tice wiinaado ha a pomwa tem. Ke go téte nge pele pa béém, ke go ilehi kojaeng ce pwoloa celi cié.

⁷ «Kehe icehi ana e caa pule wo paje, ke time e uce wie ne kom, ke e te ju pii ole pie: “Neéo! Be é caa pule me ni naîng, ke é caa kiléhi a pomwa. Pwocoon me é cuwoda me é ne tem ce pwoloa!”»

⁸ [Ke e pii wo Iésu pie]: «Wielî time e uce picani tem be te pa béém, kehe icehi ana hemepie go te mwoiu ko ilehi, ke e o te picani tem, ke e bo ne tem ana nimem kon.»

Geé ilehi taaci koja Padué

⁹ «É mu ko anaa, na é pii tewé pie: Wâé heme geé tee ilehi taaci [koja Padué] be e bo ne tewé. Ke geé tee hane taaci, be geé bo tooli. Ke geé tee cii taaci a pomwa, be e o bo tehi ne tewé. ¹⁰ Éa, be wo pana e ile-

†† 10.42 Mataio 6.33

hi, ke o bo ne ten. Ke wo pana e hane, ke e o tooli. Ke wo pana e cii a pomwa, ke o tehi ne ten.

¹¹ «{He woo mu hadeniwé celi e o ne ace péi te pa nañ, hemepie e ilehi kojaeng ace pwoloa? Ke} he woo celi e o ne ten ace bwien, hemepie e ilehi ace ikua?

¹² Ke woo paceli e o ne ace atinip † te pace nañ, hemepie e ilehi ace pihija? ¹³ Be wogewé lépwo apulie na ta gewé, kehe geé temehi ne nina wâé te ni nañwé. Ke me wonaa, ke wo Padué Caa jeda he miiden [na te junihe wâé nang] ke e bo ne a *Jenen Iitihi ne te lép-wona lé ilehi kojaeng.»

E cibéé ni duéé wo Iésu

Mataio 12.22–30,43–45; Maréko 3.22–27

¹⁴ É ha a céiu tan, ke e cibéé a duéé wo Iésu mu ko pa apulie na huuhu nang. Ke me e wie mu kon ali duéé, ke e te cihe kuti wo pali apulie. Ke lé téetihi ne ni apulie na lé mu lang.

¹⁵ ††Kehe lé pii ne ni béén pie: «E peni ni duéé ko a junuu Caatana ‡, pa daame he ni duéé!»

¹⁶ ††Ke lé pwo me lé pipwohuô te Iésu wo lépwo béén, ke lé pii ten pie: «Go habwii teme ace *pipwojunuun de Padué celi e kom.» [Be nimelé me lé habwii pie, time e uce penem ko a junuu Padué.]

É penem ko a junuu Padué

¹⁷ Ke e te temehi ni bwo niimihinaado telé wo Iésu. Ke e pii telé pie: «Hemepie e pipwopa ne mwo kon ace céiu mwametau, ke a mwametau naa, ke o tanahi. Ke mepie e te pipwopa ne kon mwo ace céiu pwomwoiu, ke a pwomwoiu naa, ke o tanahi ††. ¹⁸ Ke é hemepie e pipwopa ne mwo kon wo Caatana, ke kona e o woté ko ace bwopwonen me e cumang a mwametau ten? Geé ko pii pie, é cibéé ni duéé ko a junuu Caatana: ¹⁹ Ke hemepie wonaa, ke kona woo celi e ne te ni bééwé ce junuun me lé peni ni duéé?! Be lé habwii pie geé getié! ²⁰ Ūhu! É peni ni duéé ko a junuu Padué. Ke [é hemepie nimewé kon, ke te jan me geé alihi temehi pie] e caa tuiebé pelewé na a *Mwametau te Padué!

²¹ «Wo pa apulie na pwo niihen, ke pwo ni pihe pa ten, ke o jan ne kon me e wéihi a pomwa ten me ni naamuun. Ke time uce mwotieng, ²² ††be e céihi ne ko ni pihe pa ten. Kehe icehi ana hemepie e tuiebé wo pa apulie na junihe pwo niihen kojaeng, ke me lu pipwopa, ke e piwéden wo pana junihe pwo niihen. Ke e pé kojaeng ni pihe pa ten me ni wâé ten, ke e patihi ne ko lépwo béén.

²³ ††«Ke wo pana time uce pa bééng, ke e cubwonié. Ke wo pana time e uce picani tong me gemu taineibuhi, ke e papiidenihi.»

† Atinip—Grek: *Scorpion*. †† 11.15 Mataio 9.34, 10.25
‡ Caatana—Grek: *Bélzébül*. Omehi Caatana ne ha a Niinaado (Vocabulaire) ha anebwén ko a tii. †† 11.16 Mataio 12.38 †† Grek: Ke

A bwo engen ke mwojuia te ni duéé

²⁴ «[Geé cuwoteeke téne ani]: Hemepie pwo duéé ko pace céiu apulie; ke me e wie mu kon, ke e â wé? E âdé ke âbé he ni duaan na ticie hen. Be e hane ace duaan celi me e mu hen, kehe icehi ana time e uce tooli. Ke e niimihi pie, me e mwojuia ngemwo ha ali mwa li e wie mu hen.

²⁵ «Ke e mwojuia, ke e tooli ali mwa he te ju balé hen ehi, ke pwoiipihi ehi. ²⁶ Ke e â hane ni duéé béén na 7 jélé, na te junihe ta jélé kojaeng. Ke lé taa pimu ha ali mwa. Ke wo pa apulie naa, ke bwo junihe ta nang mwo kojan ânebun!»

Ni béé bwo hegi nen de Iésu

Mataio 12.38–42

²⁷ ††Hiwon ni apulie na lé ko tabemi Iésu. He e mwo tee ko pacihelé, ke e te cihe da ko miiden kuti é céiu toomwo mu hadeniilé, ke e pii pie: «*Adéi é toomwo na go âbeele mu kon, ke e paditiko!»

²⁸ Ke e hegi wo Iésu pie: «Nihe ubwo a adéihi te nina lé téne a pwooti te Padué, ke lé piténedehi!»

Nemwo hane ace céiu inenaado

²⁹ ††Caa â junihe hiwon ni apulie na lé tabemi Iésu, ke lé te ju â pitélé ne kon.

Ke e pii telé pie: «Te junihe ta ni apulie jena, [be time lé uce piténe de Padué]. Ke lé te cuwo ko ilehi kojaeng ce inenaado, ke ce pipwojunuun. Kehe o te tice inenaado celi lé bo uce alihi mwo koja ali e too pérofé-ta Jonas ††† ânebun. ³⁰ Be weengaa a inenaado ne te ni apulie Ninive [beme habwii pie, te wo Padué na e ne Jonas nge céiilé, beme e mi pii telé pie e o bo pwocuhinaado telé]. Ke wonaa [ana e o tooéo] woéo pa Nahi Apulie, ke o a inenaado te ni apulie jena.

³¹ ††«[Ke geé te temehi mwo a jepule ko] é toomwo daame ha amu Saba ††† bwolihi. Be li e âbé mu ha amu ten na te junihe e ité, beme e téne pa daame *Solomona na oba nang ko a pitemang. Kehe te e éni pelewé pa céiu apulie na e te junihe piwéden koja Solomona! Ke é ha a Tan na e bo tauti ni apulie hen wo Padué, ke e bo cuwoda ânebuhe wé é toomwo daame naa, ke e bo pipé ne kowé, wogewé ni apulie jena. [Be muhi tewé me geé téne.]

³² ††«Ke é ne ko ni apulie Ninive na lé téne a pune te pérofé-ta Jonas, ke lé pininim, ke lé pitaatéhi ni mulihelé. Kehe te e éni pelewé wo pa céiu apulie na e te nihe piwéden koja Jonas! Ke é ha a Tan na e bo tauti ni

o bo tupwo ne huillé ni mwa ten. ††† 11.22 Kolosé 2.15
††† 11.23 Luka 9.50 † 11.27 Luka 1.28,42,48 †† 11.29 Mataio 16.4
††† Jonas—Pa pérofé-ta bwolihi li cié tan ke cié bwénin tina ali ikua (Mataio 12.40). A ocine ko a bwomune a bwo mele te Iésu, ânebuhe a bwo mulie cemwo ten. †† 11.31 1 Rois 10.1–10 ††† Ha amu Saba—Grek: *Du sud*. †† 11.32 Jonas 3.5–10

apulie hen wo Padué, ke wo lépwo Ninive, ke lé o cuwoda ânebuhewé, wogewé ni apulie jena, ke lé o pipé ne kowé. [Be muhi tewé me geé pininim, ke me geé bitekewé!]

Geé mulie ne ha a pwéélang

Mataio 5.15, 6.22–23

³³ †«Time nye uce ne miû ko a mwomiû, me nye talui ko ace cio! Kehe genye ne da ko miiden, beme lé o alihhi ehi ne nina lé â taabé huâ.³⁴ Geé téne! Ni naamiinye, ke a pwéélang ko ni éénye. Ke me te wâé ni naamiinye, ke e mu ha a pwéélang ati a éénye. Kehe me ta ni naamiinye, ke a éénye, ke e mu ha a melepiing. ³⁵ Geé pipwocile a pwéélang na e kowé, be koli e â melepiing. ³⁶ Mepie e mu kom a pwéélang, ke o te tice ace céiu duaan mu kom celi e o mu ha a melepiing. Be e pwohewii a miû na e pwéélang kom.»

E paténe lépwo Farasaio wo Iésu

Mataio 23.1–36; Maréko 12.38–40

³⁷ É he e mwo ko panebwénihi a pune naa wo Iésu, ke e âbé céiieng wo pa céiu *Farasaio, ke e todeeng bé ne pelen, beme lé piwiinaado [me ni béé Farasaio béén]. Ke lé tehene nge pwomwo, ke lé tebwo pwo taap. ³⁸ Ke wo Iésu, ke time e uce puu lupwo in ânebuhe a wiinaado [pwohewii ana te a bwomu te lépwo *Juif]. Ke e téetihhi wo pa Farasaio, [ke time uce wâé ten].

³⁹ Ke e pii ten wo Padaame Iésu pie: «Wogewé lépwo Farasaio, ke geé te ju puu ehi pwo mwojéi ni mwoûdu me ni tam. Kehe icehi ana te ju oba kuti ni pwonimewé ko nina ta. Be geé te junihe tapi, ke geé tee cuwo ko hane nina wâé me dewé, ke geé bune ni apulie! ⁴⁰ Geé pipatieden! Be kona time geé uce temehi pie, wo Padué na e pwo a mwojéi a tam, ke te weeng mwo pana e pwo a ne a tam? ⁴¹ Wâé heme geé ne te lépwona tice delé nina e mu he ni tamewé. Be me wonaa, ke geé puu ni iwé ke ni pwonimewé mwo!

⁴² «Te ni bwomu tewé na geé ne te Padué ana te ju céiu mu ko a 10, é mu ko ni pétaapwo âdaanu ††. [Ke te wâé.] Kehe geé pipwocile! Be time geé uce âcehi [ni ju naado ne he ni patén]: a bwo pipwoiipi ni apulie, me a bwo eânimewé te Padué. Wâé heme geé pacuwohi ati nina ubwo, me ati ni nahi patén.

⁴³ «O te junihe ubwo a kuhinaado tewé, wogewé lépwo Farasaio! Be geé te hane ni atebwo na e mu ânebun ne he ni *mwotapitihhi. Be te junihe wâé tewé heme lé te pwobwocu tewé, me pipaunukewé ne he pwa-hamii ni apulie ati.

⁴⁴ «Geé pwohewii ni bwomu na time uce pwopweehi ‡. Be, me genye engen pwon, ke time genye uce temehi pie genye ko engen pwo ce bwomu!»

† 11.33 Maréko 4.21; Luka 8.16 †† Mu ko ni pétaapwo âdaanu—E pii beetihhi he pwo grek pie: A menthe me a rue me ati ni

E paténe lépwo dotéén ko patén

⁴⁵ Wo pa céiu *dotéén ko patén, [ke e téne a pwooti te Iésu naa, ne ko lépwo Farasaio] ke e pii ten pie: «Padaame, me go pii anaa, ke go pii me ta geme mwo, wogeme lépwo dotéén ko patén!»

⁴⁶ Ke e hegi ne ten pie: «Te piwien ne mwo kowé! Geé pipwocilekewé, wogewé lépwo dotéén ko patén! Be ni pihuô tewé, ke pwohewii ni âneule na te junihe téé, na geé pwo me lé taawon ne ni apulie. Be muhi tewé me geé pétaa kon ko a mwodéiwé na te ju céiu!

⁴⁷⁻⁴⁸ «Éa! O te junihe ubwo a kuhinaado tewé. Be lé taunu lépwo péroféta [te Padué] wo lépwo watihewé. Ke é jena ni, ke é he geé bahi ni bwomuhelé, ke geé habwii pie, wogewé mwo ko a bwo taunulé! ⁴⁹ Be weengi ana e pii ne kowé wo Padué, pana e temehi ati: “É bo ne lé céiikewé lépwo péroféta tong, me ni *apostolo tong. Ke geé o pwotahi ne kolé, dieli geé o taunu ce béén.”

⁵⁰ «Ke e bo tautikewé wo Padué ko a bwo taunu ati lépwo péroféta ten, mu ha atabuihi ko a bwohemwo, ⁵¹ tabuihi mu ko Abel, die ko Zakari ††, li lé taunueng ne ha awieme *apwoâpwailo me a duaan na junihe iitihhi! Ke é pii tewé pie: Wogewé lépwo apulie jena na e bo tautikewé kon ††!

⁵² «Wogewé lépwo dotéén ko patén, ke a panewé me geé tehi ne te ni apulie ni bwo temehinaado mu he ni tii iitihhi. Kehe icehi ana geé neduwohi kolé ††! Muhi tewé me geé taa ha a Mwametau te Padué, ke geé pacuwo ni béén na nimelé me lé taa hen. Ke é pii tewé pie: O te junihe ubwo ace kuhinaado tewé!»

⁵³ [E panebwénihi ana e pii wo Iésu, ke] e wie mu ha a mwa [te pali Farasaio]. Ke lé te junihe okéé kuti wo lépwo Farasaio me lépwo dotéén ko patén. Ke tabuihi mu ha a benaamwon naa, ke lé te cuwo ko tacebwénieng, beme lé téne celi e pii. ⁵⁴ Be lé hane pwaaden beme lé pipé ne kon mu ko ace bwo hegi nen den.

E pamwoiu ni acémun den

Mataio 10.19–33

12 É ha a benaamwon na e ko pacihe lépwo *Farasaio wo Iésu, ke caa pihiwon ni apulie na lé âbé tabemieng. Ke lé tabuihi pitéélé.

É ânebuhe a bwo pacihelé ten, ke e mi pacémuni ni acémun den.

béé madinaado. ‡ Bwomu na time uce pwopweehi—ai A bwomu na time nye uce alihi. †† Zakari—Pa bénebweéne apulie mu ko lépwona taunulé ne ha a Élele Iitihhi Ânebun. †† Tautikewé... E pii wo Iésu pie, te piwien ne kolé, be lé o caa taunueng, kehe te pa céiu péroféta mwo. ††† Panewé me geé tehi... Grek: Geé pétaabwon a kilé ko a bwo temehinaado.

Nina neduwohi ke o bo habwii

Ke e pii telé pie: «Geé pipwocile a 'nyaa te pwoloa' te lépwo Farasaio, be lé habwii a duaan na wâé, kehe lé neduwohi ni ta pwo telé. ²†Ati ni naado na neduwohi, ke o bo habwii ne ha a pwéélang, beme nye alihi ehi. ³Ke ni naado na geé pii neduwohi ne ha a melepiing, ke o pii pwaatihi ne ha a pwéélang. Ke ni naado na geé pihuu ko pii ne ha a nemwa, ke o bo toii da ne ha a pubu apulie.»

Nihe pipwonaado ne kowé

⁴«Geé nemwo pwo me mwotikewé ko ni apulie, wogewé ni bééng. Be hemepie lé taunuhi ni ééwé, ke o te tice ace céiu naado celi lé o pwo te a jenewé. ⁵Kehe geé pipwocilekewé, ke wâé heme geé pwo me mwotikewé ko Padué! Be weeng na jan ne kon me e taunuhi a ééwé, ke me e tahikewé ne ha a miû.

⁶«Geé cuwoteeke alihi ni meni na wahin jélé: Nye icuhi ni meni na nim ne ko nina alo mwani, kehe icehi ana te tice mu kolé celi e pineulé wo Padué. ⁷†Kehe wogewé, ke e te tai temehi ati ni jéhi ni apuniwé. Ke é pii tewé pie: Geé nemwo pwo me mwotikewé! Be te junihe pwonaado ne kowé ne he pwahamii Padué koja ni meni na nihe hiwon jélé!»

Geé mwoiu ke geé pipatemehié

⁸«É pii tewé pie: Wo pa apulie na e pii ne he pwahamii ni apulie pie, weeng pa apulie tong, ke woéo mwo, ke é o pii mwo pie weeng ke pa apulie tong, ne he pwahamii ni *âcélo te Padué. ⁹Kehe wo pana e pii, ne he pwahamii ni apulie, pie time e uce temehié, ke woéo mwo, ke é o te pii, ne he pwahamii ni âcélo te Padué, pie time é uce temehieng. ¹⁰†Ke o pineu ati lépwona lé cihe me ta ne kong, pa Nahi Apulie. Kehe icehi ana wo pa apulie na e cihe me ta ne ko a *Jenen Iitihi, ke o time uce jan me pineuhi ni ta pwo ten.»

E picani tewé a Jenen Iitihi

¹¹†«Geé téne, lé o bo imwikewé beme lé pitautikewé ne he ni *mwotapitihi, ke é ne he pwahamii ni daame me lépwo gupéno. Ke é ati he ni benaamwon naa, ke geé nemwo pwo me gia gewé ko ce bwopiinen telé. ¹²Be a Jenen Iitihi, ke e o bo te patemehi tewé celi me geé bo pii, hemepie geé bo cuwo he pwahamiilé.»

A mwani me ni naamuunye

Mataio 6.19–34

¹³Pwo pa céiu mu ha a pubu apulie na e pii te Iésu pie: «Pa apipune, e caa mele wo caa tong koja ni naa-

† 12.2 Luka 8.17†† 12.7 Luka 12.24; Apostolo 27.34 † 12.10 Mataio 12.32; Maréko 3.28–29 †† 12.11 Maréko 13.11; Luka 21.12–15

muun. Go pii te pa âjiéning pie, me gemu pipwopatihi ne komu!»

¹⁴Ke e hegi ne ten wo Iésu pie: «Aje, time é uce âbé me é tauti ni naado na wonaa!»

¹⁵†Ke e pii te ni apulie pie: «Geé pipwocilekewé me geé nemwo tee hane me pihiwon dewé ni naado! Be a ju mulihe pa apulie, ke time uce é mu ko ni naado na eten.»

A ocine ko ni naamuunye

¹⁶Ke e uti telé a ocine ce:

«E bwo mu wo pa apulie na junihe pwo den, ke pwo ni pule ten na e ne ni âdaanu na junihe wâé. ¹⁷Ke e bwo pitahimwoeng pie: “É bo pwo de? Be caa pitice ahi ni âpenem dong ne ha ali pié tong.”

¹⁸«Ke e bwo pipii ten pie: “Weengi ana me é bo pwo: É o tatii ni pié tong, ke é bo pwo celi piubwo, ke é bo ne ehi hen ni âpenem dong, ke ni naamuung. ¹⁹Ke é alecehen ke é o pipii tong pie: ‘Nihe hiwon ni naamuung he ni jo na hiwon. Ke é o mwaale, ke é o wiinaado, ke é o ûdu, ke é o pipwodéén!’”

²⁰«Kehe icehi ana e pii ten wo Padué pie: “Wogo, ke pa apiolo! É jena a he bwén, ke é o pé mwo kojako a mulihem. Ke bo ni dee ati ni naamuun na go tapihi?”»

²¹†E pii mwo wo Iésu pie: «Weengaa ana e o bo tuie ne ko pana e hane ni naamuun ne éni pwo bwohemwo. Be o time uce pwo den ne pele Padué!»

Ana junaado koja ni naamuunye

²²E biteeng wo Iésu ne ko lépwo acémun den, ke e pii telé pie: «Weengaa a watihen me é pii tewé pie: Geé nemwo gia ko ni mulihewé, me ni ééwé. Geé nemwo tee pitahimwokewé pie: “Genye o bo wii de?” ke “Genye o bo cuwohe ce de?” ²³Be a mulihewé, ke junihe pwonaado ne kon koja a wiinaado. Ke a ééwé, ke junihe pwonaado ne kon koja ni epwénéwé. ²⁴Geé omehi ni meni, be time lé uce picemi âdaanu, ke time lé uce pitii âdaanu, ke te tice béé awéa telé he ni tan. Be wo Padué, ke e te ne ni wiinaado telé. Kona wogewé, ke time geé uce piwéden koja ni meni? Uhuu!²⁵ Time uce é mu ko a bwo gia celi geé o mwo ne mwo aceli céiu tan ne he ni mulihewé! ²⁶Ke hemepie time uce jan me geé pwo me bwali a mulihewé, é mu ko ade na geé pwo me pinekepé tewé ne ko ni nehin?

²⁷«Geé cuwoteeke alihi ni muun he meté, be lé cim, ke time lé uce péi ke wolinaado. Ke é pii tewé pie: Wo pa daame *Solomona ati ha *a wâé ten ke ni epwénénen, ke time uce junihe wâé koja a muun na te ju céiu.

²⁸Geé cuwoteeke alihi ni meté: E cim jena a, ke o cini meé ne pwo miû. Kehe wo Padué, ke e te ne ni epwénénelé. Ke kona time e o uce ne ce epwénéwé celi piwéden? Te junihe wahin kuti ni céihi tewé!

†† 12.15 1 Timoté 6.9–10 ††† 12.21 Mataio 6.19–20

²⁹ «[Éa kuti, é pii tewé pie]: Geé nemwo pwo me pinekepé tewé, ke geé nemwo gia ko celi me geé wii me ûdu. ³⁰ Be wo lépwona time lé uce temehi Padué, ke time lé uce mwaale ko a bwo hane ninaa. Kehe wogewé, ke wo Padué Caa tewé, ke e te temehi nina nimewé kon. ³¹ Geé hane ânebun a Mwametau ten. Ke e o bo ne tewé ati nina tice tewé.»

A ju wâé ne he miiden

³² «Geé nemwo pwo me mwotikewé, wogewé lépwo ju bééng, wogewé a pubu apulie tong. Be wâé te Caa tewé me e bo ne tewé a Mwametau ten. ³³ †Geé icuhi nina etewé, ke geé ne ni cuhin ne te lépwona tice delé. Be me wonaa, ke o pwo ce naamuuwé ne pele Padué celi time uce bumedén, ke o time uce ta nelang. Be o pwocoon me lé pé wo lépwo abune. Ke te tice dale celi me lé wii, ke te tice ôbe †† celi me lé ili. ³⁴ Be é he na e lang ni naaumu, ke e lang a pwonimem.»

A pwooti ko a bwo ûmiê me piténédehi

Mataio 24.45–51; Maréko 13.33–37

³⁵ †[E pii mwo wo Iésu pie]: «Geé ûmiê, ke geé ne ni epwénéwé he penem, ke geé cile ehi ni mwomiû hewé me te pwéélang. ³⁶ Geé pwohewii ni apenem na lé ucéi pa caa telé heme e mwojuia mwo mu ha a piaten. Ke me e tehenebé, ke me e cii pomwa, ke lé o bo tehi ne ten. ³⁷ Be o nihe wâé ne ko lépwona e toolé heme lé tee ko ûmiê, ke lé ucéieng.

«Ke é pii tewé a juuju pie: E bo cuwohe a epwén ko penem wo pa daame. Ke e pwo me lé tebwo pwo taap, ke e bo ne ce wiinaado telé! ³⁸ [É he li lé tee ko ucéieng, ke time lé uce temehi pie, e bo tuie ha ace benaamwon celi woté] é ha awieme bwén ai é pwopwometan. Ke o adéilé, hemepie e tuiebé, ke me e toolé heme lé teko ûmiê!

³⁹ ††«Geé cuwoteeke niimihi ani: Wo pa eapwihii pwomwo, ke time e uce temehi ace inetéale celi e o âbé hen wo pa abune me e taa ha a mwa ten. Be hemepie e te temehi, ke wieli e o te pacuwoeng. ⁴⁰ Wogewé mwo, ke geé te piwâam. Be é o bo âbé, woéo pa Nahi Apulie, kehe time geé uce temehi ace benaamwon.»

Pa apenem na e piténédehi

⁴¹ E tahimwo Iésu wo Pétéru pie: «Padaame, kona a ocine na go pii, ke te a deme cehi, [wogeme lépwo acémun dem] ai a de ati ni apulie?»

⁴² Ke e hegi ne ten wo Padaame pie: «He wooélé pa apenem na e piténédehi ke e pipwoiipieng? Wo pana e pii ten wo pa daame hen pie: “É ne tem a penem na

† 12.33 Luka 18.22 †† Dale...ôbe—Grek: Mite. ‡ 12.35 Mataio 25.1–13 †† 12.39 Mataio 24.43–44; 1 Tésalonik 5.2

pwonaado ne kon: Go ne ce wiinaado te lépwo apenem dong he ce benaamwon celi wâé.”

⁴³ «Ke o te nihe wâé ne ko pa apenem naa, hemepie e tuiebé wo pa daame, hemepie e teko penem ehi! ⁴⁴ ††É pii tewé a juuju pie: E o ne ten a pihuô ati ne ko ni den. ⁴⁵ Kehe icehi ana wieli e piniimihi wo pa apenem naa pie, ‘O bwoli pa caa tong me e âmwobé.’ Ke e ahi ni béén ko penem, ke e te nihe wiinaado me ûdu, ke e piolo. ⁴⁶ Ke e o bo âmwobé wo pa caa ten, ha a tan na time e uce ucéieng, ke é ha a inetéale na time e uce temehi. Ke e bo ne a kuhinaado na junihe ubwo te pa apenem naa, woélé me lépwo béén ko penem na time lé uce piténédehi.

⁴⁷ ††«O junihe ubwo a kuhinaado ten, é mu ko ana e te temehi ana nime pa daame hen kon, ke time e uce pwo, ke tice aceli e pipwopweehi me den. ⁴⁸ Kehe time uce nihe ubwo ace kuhinaado te lépwona time lé uce temehi pie, ta nina lé pwo. Be wo pana e hegi nina hiwon, ke o ilehi kojaeng nina hiwon ††.»

Lé pipiiden ni apulie mu ko Iésu

⁴⁹ «É âbé, beme é pébé a miû ne pwo a bwohemwo; ke nihe nimung me caa ko éle. ⁵⁰ †Be o puuéo ko a puu apulie [ko ni picani na nihe ubwo]. Be é teko ucéihi ne he ni téé beme panebwénihi. ⁵¹ ††Geé nemwo niimihi pie é âbé beme é pébé a péém ne pwo a bwohemwo. Ûhu! É pii tewé pie, woéo pa watihen me time lé uce piténéle ne ni apulie †††. ⁵² Tabuhi jenea, heme nim ni apulie na lé mulie ha a pwomwo na céiu, ke o time lé uce piténéle. Be o bo cié celi lé âbé céieng, ke o bo alo lupwona lu piâdeéo ††, ai o cié celi lé piâdeéo, ke o alo lupwoceli lu âbé céieng. ⁵³ †††Be o time lu uce piténelu wo pa caa me pa naîn, ke ê nyaa ma ê naîn; ke o time lu uce piténelu lu amwaan.»

Geé alihi ana mwomwon, ke geé pwo!

⁵⁴ ††E pii mwo wo Iésu te ni apulie na hiwon pie: «É hemepie geé alihi ni nii na e âbé mu ha ale amu ††, ke geé pii pie e o ute. Ke e o tuie. ⁵⁵ Ke hemepie e tahieng a dan mu paaéémwa, ke geé pii pie: “O te nihe éle”. Ke o te wonaa. ⁵⁶⁻⁵⁷ Wogewé lépwo bwi! Geé te ju gahe pwo! Geé te nihe temehi me geé pii pie, wâé a amu, ai ta a amu. Ke é mu ko ade na time geé uce alihi temehi a juuju ne he ni naado na e ko tuie jenea? [Be hemepie geé ko alihi ehi] ke geé temehi ehi ana mwomwon me geé pwo.

†† 12.44 Mataio 25.21,23 ††† 12.47 Cang 4.17 ††† Dernière phrase—He pwo grek, ke e hen ni pwooti ce: Hemepie nye ne ce naado celi hiwon te pace céiu, ke genye o te ilehi mwo kojaeng celi nihe hiwon. † 12.50 Maréko 10.38–39 †† 12.51–53 Mataio 10.34–36 ††† Dernière phrase—Grek: Kehe [lé pébé] a bwo pineitééhi [ne ni apulie]. ††† Cié...alo... Grek: Na lu cubwoni nina cié jélé mu kolé. ††† 12.53 Miché 7.6 †† 12.54–57 Mataio 16.2–3 †† Mu ha ale amu—Grek: Mu he na e nuule lang a téale.

⁵⁸ †«[Weengi ana mwomwon]: É hemepie e pitéteimi-naado ne kom wo pace céiu, ke geu mi pipwopweehi heme mwo ko wogeu nge he pwaaden nge ha a mwotautinaado. Be koli e bo neko te pa atautinaado; ke wo panaa, ke e o bo neko te ni pwo, ke lé bo neko nge he karépu. ⁵⁹ Ke é pii tem a juuju pie: O time go uce wie mu he karépu, hemepie mwo time go uce téele pwocuhi ati ni kuhinaado tem.»

Geé taatééhi ni mulihewé!

13 Ha a benaamwon naa, ke lé âbé céii Iésu ne ni béé apulie, ke lé pii ten pie: «Wo pa daame *Pilate, ke e pwo me taunu ni béé apulie mu Galilé, he lé *pwoâpwailo te Padué [ne *huâ iitihini ne Iérusaléma].»

² ††Ke e hegi ne telé wo Iésu pie: «Kona geé niimihi pie lé mele be te junihe ta jélé koja ni béén? ³ Ūhu! Ke é pii tewé pie: Geé pipwocilekewé, ke geé pitaatééhi ni mulihewé wogewé ati, be koli geé o tai mele pwohewii ni apulie naa! ⁴ Ke geé cuwoteeke niimi lépwoli 18 apulie li e tupwo ne huîlé ali aba ne Siloé, ke taitelé. Kona te junihe ta jélé koja ni béé apulie *Iérusaléma? ⁵ Ūhu! É pii tewé mwo pie: Wâé heme geé pininim, ke me geé bitekewé. Be koli geé o tai epin ko mele pwohewii ni apulie naa!»

A majing na te tice acehin

⁶ E pii telé a ocine ce wo Iésu:

«E bwo mu wo pa céiu apulie, ke e bwo cemi a acuwo *majing ha apwoamu ten. Kehe icehi ana me e mu â omehi ce acehin, ke mu te tice.

⁷ †«Ke e te pwo me pii te pa apenem den pie: “Go alihi! Be caa cié ni jo na é âbé hane ce acehin, ke te tice. Tahagéieng taabwon! Be time uce wâé heme cepwotee picim heme tee ko tice acehin!”

⁸ ††«Ke e hegi ne ten wo pali apenem den pie: “Padaame, mwo te ju neme neeng, beme é mwo pwopweehi kon. É o mwo ini aujenieng, ke me é ne pule kon. Ke genyu bo alihi ha a jo naa. ⁹ Ke mepie pwo ce acehin, ke wâé; ke mepie te tice, ke go bo tahagéi taabwon.”»

E pwo me tieden a cunu @ ko é toomwo ha a tan iitihini

¹⁰ É ha a céiu *tan iitihini, ke e mu ha a *mwotapitihini wo Iésu, ke e pacémuni ni apulie. ¹¹ Ke e mu mwo lang é céiu toomwo na caa 18 ni jo na cunu nang hen. Be e mu kon a duéé, ke cii a duun, ke pwocoon me e pamwieng.

¹² Ke e alieng wo Iésu, ke e todeeng, ke e pii ten pie: «Éje, caa tieden a cunu kom!»

¹³ Ke e ne ni in huîin, ke e caa te pamwieng kuti, ke e te junihe pipaunu Padué!

¹⁴ ††Kehe icehi ana e te junihe okéé wo pa apihuô ne ha a mwotapitihini, be e pwo me wâé nang wo Iésu ha a tan iitihini. Ke e pééle ni apulie wo panaa, ke e pii telé pie: «Lépwaje, 6 ni tan na nye penem hen. Ke heme nimewé me tieden ni cunu kowé, ke geé âbé ha a naadenitan! Ke geé necu a tan iitihini!»

¹⁵ †††Ke e hegi ne ten wo Padaame Iésu pie: «Wogo pa apulie ta! Tai wogewé ati, ke kona time geé mu uce tuwo ni wota tewé me paûdulé he ni tan iitihini? Uhuu! ¹⁶ Mepwo é ne ko é toomwo ce, ke é piebehi *Abérama, pa watihenye. Ke e cieeng wo *Caatana he na 18 ni jo. Ke woté, o te tice mwomwon dong me é tuwo a cunu kon ha a tan iitihini?»

¹⁷ Ke tanim ati nina lé piâde Iésu. Kehe icehi hiwon ni apulie na lé te junihe pipwodéén ko nina wâé na e pwo.

Alo lupwo ocine ko a Mwametau

Mataio 13.31–33; Maréko 4.30–32

¹⁸ E pii mwo wo Iésu pie: «Mepwo a *Mwametau te Padué, ke he pwohewii ace de? Weengi a ocine me pwo me geé temehi:

A pide moutarde

¹⁹ «A Mwametau te Padué, ke pwohewii a pide *moutarde* na e cemi wo pa céiu apulie ha a cereda ten. [Te junihe wahin] kehe me e cim, ke te junihe ubwo nang, ke lé âbé ne ni meni, ke lé pwo ni mwonahilé ne he ni dihen.»

A nyaa te pwoloa

²⁰ E pii mwo wo Iésu pie: «Ade aceli é o pipwohewii ne kon, a Mwametau te Padué? ²¹ A Mwametau te Padué, ke pwohewii a nyaa te pwoloa na e pé é céiu toomwo, ke e iluuhini neibu me a 25 kilo ko *farine*, dieli é â cibi da ali pwoloa!»

A pomwa na picu

Mataio 7.13–14, 21–23

²² E pacémuni ni apulie wo Iésu ne he ni mwopopwaalé me ni amu, he e ko â Iérusaléma.

²³ Ke e tahimwoeng wo pa céiu apulie pie: «Padaame, kona te ju mehini celi e o te celuimilé wo Padué?»

Ke e pii te ni apulie wo Iésu pie: ²⁴ «Te junihe picu kuti a pomwa [da ha *a ju mulip]. Kehe geé hane ace bwopwonen me geé taa hen. Be hiwon nina nimelé me lé taa, kehe icehi ana pwocoon ne kolé. ²⁵ †††Be, me e capuhi ke kiléhi a pomwa wo pa eapwihini pwomwo, ke time o uce jan me geé taa. Geé o te cuwo âoté

† 12.58–59 Mataio 5.25–26 †† 13.2 Ioane 9.2 † 13.7 Luka 3.9 †† 13.8 2 Pétéro 3.9, 15

†† 13.14 Exode 20.9–10; Deutéronome 5.13–14 ††† 13.15 Luka 14.5 ††† 13.25 Mataio 25.10–12

pwomwo, ke geé o te cii taaci a pomwa, me pii ten pie: "Padaame, Padaame, go tehi ne teme!"

«Kehe icehi ana e o hegi ne tewé pie: "Ûhu, time é uce temehikewé."»

²⁶ «Ke geé o bo pii ten pie: "Te wogeme kuti li genye mu piwiinaado me ûdu me wogo. Ke go pwocémun nge he ni pwaaden ne he ni pwomwo ubwo teme!"»

²⁷ †«Ke e bo te ju pii tewé gaale, pie: "Ûhu, time é uce temehikewé! Geé engen kojaéo, wogewé nina ta ni huô tewé!"»

²⁸ †«Ke o bo tahikewé ole pwomwo. Ke geé bo é me piwii pecuwo. Be geé bo ali [lépwo watihewé]: wo Abérama, me Isaaka, me Iakobo, me ati ni péroféta, na tai élé ha a Mwametau te Padué. ²⁹ †Ke o bo hiwon ce béén celi lé o bo âbé ha a Mwametau, mu pwo a bwohemwo ati ††. Ke o pwo ce atebwo telé ne ha a piwiinaado ubwo. ³⁰ ††Be hiwon nina lé alece jena na lé bo ânebun ha a benaamwon naa. Ke hiwon nina lé ânebun jena na lé o bo alece [ne jeda ha a Mwametau te Padué].»

A pipwoééhe te Iésu @ ne ko lépwo Iérusaléma

Mataio 23.37–39

³¹ É he e mwo ko pii anaa wo Iésu, ke lé te tuiebé kuti ne ni béé *Farasaio, ke lé pii ten pie: «Aje, geme téne pie, e pwo me e taunuko wo pa daame *Érode Antipas! Kehe wâé heme go engen mu éni!»

³²⁻³³ Ke e hegi ne telé pie: «Geé pii te pa wota apiaba naa pie, é jena ke é meé, ke [é o mwo te mi pwo ni penem dong, be] é o mwo peni ni duée, ke é o mwo cile ni cunu. Ke é ha a béciéhe ni tan alecehen, ke é bo panebwénihi ati. Kehe é o mwo te mi cuwo ha a pwobenele ko a pwaadeniing [nge Iérusaléma]. Be time o uce wâé hemepie taunu pace céiu péroféta [te Padué] ne pwomwo koja Iérusaléma [a pwomwo ubwo iitih ten]!»

³⁴ «Au, mwolikewé wogewé lépwo Iérusaléma! Geé taunu lépwo péroféta na e nelé bé céiikewé wo Padué, be geé ahi ni béén ko péi, ke geé taunu ce béén ko ce béé bwopwonen. Mu te cuwo ko nimung me é taineibukewé, pwohewii a nyaa te ja heme e taineibuhi ni naîn haahi ni puuin. Kehe icehi ana te muhi tewé.

³⁵ Ke geé téne, [é o mwo engen kojakewé, ke] e o pwo me ticie ha a *mwaiitih tewé wo Padué! Ke é pii tewé pie: O caa time geé bo uce aliéo mwo, dieli ha ace tan celi geé o bo pii pie: *Adéi pa apulie na e âbé ne he nii Padaame!»

Psaume 118.26

† 13.27 Psaume 6.9 †† 13.28 Mataio 8.11–12 † 13.29 Psaume 107.3 †† Mu pwo a bwohemwo ati—Grek: De l'est, de l'ouest, du nord et du sud. †† 13.30 Mataio 19.30

E paténe lépwo Farasaio wo Iésu

Mataio 22.1–14

14 ¹⁻² É ha a céiu *tan iitih, ke e mu ha a pomwa te pa céiu *Farasaio wo Iésu, ke lé piwiinaado. Ke e mu lang mwo wo pa céiu apulie na cunu nang, be cibi ni miin. Ke lé wéa ko Iésu ati wo lépwo apulie [beme lé alihi heme e pwo me tieden a cunu kon].

³ ††Ke e tahimwo lépwo *dotéén ko patén me lépwo Farasaio pie: «Kona te pwo mwomwon denye me nye pwo me tieden a cunu ko pace céiu apulie ha a tan iitih, ai iitih?»

⁴ Ke time lé uce hegi ne ten. Ke e biteeng nge céii pali cunu, ke e pwo me wâé nang, ke e pii ten pie, me e mwojuia ngemwo pelen.

⁵ ††Ke e tahimwo ati ni apulie pie: «É hemepie e tupwo ne ha ace pwomiidu wo pace naîm ai ace wota tem, ha a tan iitih, ke kona go o pwo de? Geé â céieng da mu ha a pwon!»

⁶ Ke time uce jan me lé hegi ne ten.

Go nemwo pipaunuko

⁷ E ome nina todelé ne ha ali piwiinaado wo Iésu, ke e alihi pie lé pipégali ni atebwo na e mu ânebun. Ke e pii telé pie: ⁸ †«Go pipwocile! Be é hemepie todeko ne ko ace piwiinaado ko piaten, ke go nemwo â tebw pwo a atebwo te lépwo apulie na piubwo jélé. Be koli e bo tode pace céiu apulie celi nihe pida kojako ⁹ wo pali eapwih ali piwiinaado! Ke koli e bo pii tem pie: "[Go cuwoda, ke] go engen mu ha atebwo naa." Ke o bo tanim go me go â hane ace atebwo tem.

¹⁰ «Wâé heme go â tebw âuté ha a bénebwéne atebwo. Ke e o bo pii tem wo pana e todeko pie: "Pa bééng, go âbé, me go tebw pwo a atebwo te lépwona piubwo jélé." Ke lé bo alihi nelang a bwo pipaunuko te pa eapwih a piwiinaado. ¹¹ ††Be wo pana e pwo me piubwo nang, ke o neeng ole, ke wo pana e pwo me piwahin nang, ke bo neeng da.»

Go tode lépwona tice naamuulé

¹² É nelang, ke e pii wo Iésu te pana e todeeng pie: «É hemepie go piwâam ko ace piwiinaado [celi woni] ke go nemwo tode cehi lépwona lé o wodehi ne mwo tem nina go pwo: é hemepie wo lépwo béém, me lépwo âjiénem, me lépwona pwo ni naamuulé.

¹³ «Be wâé heme go tode lépwona tice naamuulé, ke wo lépwona cunu jélé, ke wo lépwona tebwa jélé, ke wo lépwona bwi jélé. ¹⁴ ††Ke o adéiko, be time uce jan me lé wodehi ne tem, kehe wo Padué, ke e o bo ne

††† 14.3 Luka 6.9 ††† 14.5 Mataio 12.11; Luka 13.15 § 14.8 Proverbs 25.6–7 §† 14.11 Mataio 23.12; Luka 18.14 §†† 14.14 Ioane 5.29

tem a ceme ni penem dem, ha a tan na lé bo mulie cemwo mu ha amele wo lépwona lé pwo nina wâé.»

Muhi telé ko a piwiinaado te Padaame

¹⁵ †Pwo pa céiu apulie na lu mu pwo taap †† me Iésu. Ke me e téne a bwo pipune ten, ke e pii ten pie:

«Padaame, te junihe *adéi lépwona lé mu ha a piwiinaado ubwo ne ha a *Mwametau te Padué!»

¹⁶ Ke e pwo-ocine wo Iésu, beme e hegi ne ten. Ke e pii pie:

«E bwo mu wo pa céiu apulie, ke e pipwopweehi a piwiinaado na nihe ubwo. Ke e tode lépwona nihe hiwon jélé beme lé piwiinaado. ¹⁷ Ke nebwén, ke cuwo ali tan ko piwiinaado. Ke e pahede pa céiu apenem den, me â tode lépwona me lé piwiinaado me weeng.

¹⁸ «[Ke e ân, ke e too pa céiu béélél] kehe icehi ana e hegi ne ten wo paje pie: “Au, go â pii te pa daame pie, me e pineuéo, be time uce jan me é âdé wiinaado, be é âbé mu ha apwocuhi a apwoamu, ke wâé heme é â cedi.”

¹⁹ «Ke nebwén, ke e ali pa béalohen mu ko lépwona todelé. Ke e hegi ne ten wo paje pie: “Au, go â pii te pa daame pie, me e pineuéo, be time uce jan ne kong me é âbé. Be é âbé mu ha apwocuhi ni paaci na 10, beme lé um. Ke wâé heme é mwo â picaalé.”

²⁰ †«Ke e ân, ke e too pa bécíéhen, ke e hegi ne ten wo paje pie: “É mwo ko ju piaten, kehe time uce jan me é âbé.”

«Be te tai pipéélé, ke te tai muhi telé me lé âbé, be lé tai pii pie, pwo ni penem delé †.»

E tode lépwo béén

²¹ «Ke e mwojuia mwo wo pali apenem, ke e piuti te pali daame hen a bwo hegi nen de lépwo apulie naa.

«Ke e te junihe okéé kuti wo pali daame, ke e pii ten pie: “Go epin nge ha ati ni amu, ke go todebé nina tice naamuulé, me ni tebwa, me ni tebwomwa, me ni bwi.”

²² «[Ke e an wo pa apenem.] Me e mwojuia cemwo, ke e pii te pali apihuô pie: “Pa apihuô, geme caa pwo ali go pii, kehe mwo te pwo ni nehi atebwo.”

²³ «Ke e hegi ne ten pie: “Go â ati pwo ni pwaaden, ke é mwonuhi ni ninaado. Ke go tode celi pitapitikewé, beme oba a mwa tong! ²⁴ Ke mepwo é ne ko lépwoli é mi todelé, ke o te tice celi lé wii mu ko a piwiinaado tong!”»

A bwo âcéi Iésu

Mataio 10.37–38

²⁵ É alecehen, ke e engen wo Iésu, ke hiwon ni apulie na lé âcén.

† 14.15 Luka 13.29 †† Mu pwo taap—Time lé uce tebwo pwo taap pwohewiikenye. Be lé te ju pule ko ni béé duaalé. † 14.20 1 Korénit 7.33 †† Dernière phrase—A pwooti mu ha a niide a tii 18.

Ke e biteeng nge céiilé, ke e pii pie: ²⁶ ††«Wo paceli e âbé céing, ke wâé heme nihe eânimen dong koja pa caa ten me nyaa ten, me é mwoden, me ni naîn, me ni âjiénen, me ni iitieng, die mwo ko a mulihen. Be wo pana te junihe eânimen de ati ninaa kojaéo, ke time uce jan me pa acémun dong. ²⁷ Wo paceli time e uce canihi a *kuricé ten, me e âbé céing, ke time uce jan me pa acémun dong.»

Geé mi pininim ehi

²⁸ «Hemepie nime pace céiu apulie me e pacuuli ace mwa, ke e o tabuhi tebwo, ke e o pihane pie, ‘He o niile ace cuhin? He o te jan ce mwani tong beme panebwénihi?’

²⁹ «Be hemepie e te ju pwo cehi a paamwa, ke me time e uce panebwénihi a mwa, ke lé o te nihe pihoonieng ati ne ni apulie. ³⁰ Be lé o pii pie: “Pa apulie ce, ke e tabuhi pacuuli, ke time e uce panebwénihi!”

³¹ «Ke wo pace céiu daame, ke heme e â pwopa ne ko pace céiu daame, ke wâé heme e mi pitahimwoeng pie: ‘Pwo ni coda tong na 10000. He o te jan me é â pwopa ne ko pana e âbé pwopa ne kong ko ni coda ten na 20000 jélé?’

³² «Ke me time uce jan ne kon, ke e o ne ngen ce apitéimipwooti nge céii pa céiu daame heme e mwo ko e ité, ke e o ileeng me lu pwo a péém.»

³³ Ke e pii mwo wo Iésu pie: «O wonaa mu hadeniwé hemepie pwo paceli time e uce necu ati ni den. Be wo pa apulie naa, ke time uce jan ne kon me pa eabwé tong.»

A jié ke tieden a nemen

³⁴ ††«Éa, a jié †† ke a naado na wâé, kehe mepie e patieden a nemen, ke he nye o woté ace bwopwonen me genye ne mwo ace nemen? ³⁵ Caa time uce jan me genye penem kon, ke genye tahi ole pwomwo. Wo paceli pwo ce pwojéénen me e téne, ke wâé heme e téne!»

E pipwoééhe ni apulie na ta jélé

Mataio 18.12–14

15 Lé âbé céii Iésu ni apulie na ta ni mulihelé: wo lépwo *atai mwani cuhi puni apulie me lépwo béén mwo. Be nimelé me lé téne a bwo pipune ten.

² †Ke junihe time uce wâé te lépwo *Farasaio, me lépwo *dotéén ko patén. Ke lé pipii telé pie: «Kee! Wo paje, ke lé pimu ibu me lépwona ta ni mulihelé, ke lé piwiinaado me weeng!»

A ocine ko a muto na e pipatieden

³ Ke e pii telé wo Iésu a ocine ce:

†† 14.26 Luka 9.23 ††† 14.34–35 Mataio 5.13; Maréko 9.50 ††† Jié—Omehi note § 15.2 Luka 5.30

⁴ †«[Geé cuwoteeke téne ani]: Pace céiu bééwé, ke 100 ni muto ten. Ke mepie tieden aceli te ju céiu nang, ke e o pwo de? E o necu nelang li 99 muto, ke e o â hane ali muto li e pipatieden, dieli e bo tooeng. ⁵ Ke me e tooeng, ke e te nihe pipwodéén, ke e caniheng ne pwo lupwo pieaan.

⁶ «Ke é he e tuiebé pwomwo, ke e tode lépwo béén, ke nina lé mu ko jijen, ke e pii telé pie: “Geé âbé beme nye pipwodéén ibu! Be é caa tooli mwo ali muto tong li tieden!”

⁷ «É pii tewé pie, te piwien ne jeda he miiden, be wo Padué, ke e te junihe pipwodéén kuti ko pace apulie ta celi te ju céiu nang celi e pitaatééhi a mulihen, koja lépwona 99 na wâé ni mulihelé, ke time lé uce niimihi pie me lé mwo pininim mwo.»

Ocine ko a mwani na tooli mwo

⁸ [E pwo a céiu ocine wo Iésu, ke e pii pie]:

«E bwo mu é toomwo na 10 ni mwani péi †† ten na nihe ubwo a cuhin. Ke é ha a céiu tan, ke e patieden ana céiu. E bwo ne miû ko a mwomiû, ke e bwo balé ehi ha ali mwa ten. Ke e hane ali mwani ten, dieli e bwo te â tooli!

⁹ «Ke me e tooli ali mwani ten, ke e tode lépwo béén, me nina lé mu ko jijen, ke e pii telé pie: “Geé âbé me nye pipwodéén, be é caa tooli mwo ali mwani péi tong!”

¹⁰ «Kehe é pii tewé pie: O nihe ubwo a pipwodéén de lépwo *âcêlo te Padué ko pace apulie celi te ju céiu nang na ta nang celi e pitaatééhi a mulihen.»

A ocine ko pa ewa aiu na e mwojuia mwo ne pele caa ten

¹¹ E uti telé mwo [a céiu ocine] wo Iésu:

«Lé bwo mu lupwo ewa aiu me caa telu. ¹² Ke e pii te caa telu wo pa béalohen pie: “Go ne tong ni dong mu ko ni naamuum ‡.”

«Ke e te ne ten wo pali caa telu.

¹³ «Ke nebwén, ke wo paje, ke e pé ati li den, ke e icuhi. Ke e pé li mwani, ke e â ha amu na nihe éité. Ke e hane a mulie na wâé ten, ke e pipwohauhi ko li mwani ten. ¹⁴ [Âdé li wole, ke âdé, ke âdé, ke âdé...] Ke e â patieden ati li mwani ten. Ke e tuie a menele na nihe ubwo ne ha amu naa. Ke te junihe menen kuti. ¹⁵ Ke e hane ace penem den, beme e wiinaado. Ke e picile puwokwo †† te pa céiu apulie ne ha amu naa. ¹⁶ Kehe icehi ana caa junihe menen, ke caa nimen me e eni mu

† 15.4 Ézékiel 34.11,16; Luka 19.10 †† 10 ni mwani péi—Céiu a mwani péi (denier), ke a cuhi pa apulie na céiu nang ha a tan na céiu. ‡ Iلهi ni naamuu caa ten, ânebuhe a bwo mele ten, ke time uce ace naado celi me pwo ne ha a bwomu te lépwo Juif. Habwii pie, pa acibeheke ke pa atapi wo pa huédi. †† Picile puwokwo—Âcehi a bwo niimihi nen de lépwo Juif, ke a puwokwo, ke a wota na te junihe mwiihi, ke time lé uce wii.

ko li e puwokwo. Be te tice apulie celi me lé ne celi me e wii.»

E piniimihi pie me e mwojuia mwo

¹⁷ «Ke e tuie nge ha a céiu benaamwon, ke e pininim, ke e niimihi pie, ‘É ne pele caa tong, ke nihe hiwon ni wiinaado me de ati ni apulie, die ko lépwo apenem den. Ke te nihe hiwon mwo kojale! Ke woéo ne éni, ke é ko metihi menele! ¹⁸ ††Caa jan! É o mwojuia ngemwo céii caa, ke é o pii ten pie: Caa, go pineuéo, be é pitalupe ne he pwahamii Padué, ke é ne he pwahamii. ¹⁹ Caa time uce jan me woéo pa naîm. Kehe go pwo me pa céiu apenem dem.’ ²⁰ Ke e cuwoda, ke e engen me e mwojuia ne mwo pele caa ten.»

E te nihe niimieng wo caa ten

«É he e mwo ko âbé he pwaaden, ke e temehieng wo caa ten, ke e te nihe pipwoééhen. Ke e téte beniieng, ke e haaieng, ke e mwomwaaung. ²¹ Ke wo pa naîm, ke e pii ten pie: “Caa, go pineuéo, be é pitalupe ne he pwahamii Padué, ke é ne he pwahamiiim, ke caa time uce jan me go pii kong pie pa naîm...”

²² «[He e mwo tee ko cihe] ke e caa pii te ni apenem den wo caa ten pie: “Geé epin! Geé pébé ace epwén celi nihe wâé, beme e cuwo hen wo pali naîng. Ke geé ne ce tai ko in, ke ce dihibwaan. ²³ Geé pébé ali nahi paaci li nihe wâé a bwo ubwo nang, ke geé taunueng. Be é jena, ke genye o piwiinaado ibu, ke genye pipwodéén! ²⁴ ††Geé alihi, wo pa naîng ce, ke e caa mele, kehe e caa mulie mwo! Ke tieeng, ke é caa tooeng mwo!”

«Ke lé tabuhi pipwodéén.»

E okéé wo pa cuwon

²⁵ «He lé ko wonaa, ke he e tee ko penem he ni apwoamu wo pa cuwon. Ke me e mwojuia ne mwo pwomwo, ke e téne ni pwofonyebi, ke ni tihi bweje. ²⁶ Ke e tode pa céiu apipenem, ke e tahimwoeng pie: “Woté? É mu ko ade [na geé ko junihe pipwodéén]?”

²⁷ «Ke e hegi ne ten pie: “E caa mwojuia mwobé wo pali ciéém. Ke te junihe piwâénime caa teu. Ke e pii pie me taunuhi ali nahi paaci, [beme nye piwiinaado, me pipwodéén] be e caa too mwo pa naîm he teko wâé nang!”

²⁸ «Kehe icehi ana e okéé wo pali cuwon, ke muhi ten me e taa pwomwo. Ke e â wie wo caa ten, ke e wâgo kon me e taa céiilé.

²⁹ «Kehe icehi ana e hegi ne ten pie: “Go téne go caa, caa nihe hiwon ni jo na é ko penem dem, ke time é uce téele pwoemaan, ke me muhi tong me é piténedeko. Ke time go uce téele ne tong ace cuwo nahi nani me geme piwiinaado me lépwo bééng! ³⁰ Ke wo pane, ke e

†† 15.18 Psaume 51.6 ††† 15.24 Éféso 2.1,5

caa patieden ati ni mwani tem ne ko ni toomwo pwo-pwo waaden, ke me e mwojuia, ke go pwo me lé taunuhi ali paaci li nihe wâe a bwo ubwo nang, beme a den!"»

Nye pipwodéén be nye caa tooeng mwo

³¹ «Ke e hegi ne ten wo caa ten pie: "Go téne go pali nañg, go teko mu pelong, ke tai ati ni dong, ke ni dem. ³² Kehe icehi ana wâe heme nye pwo a piwiinaado jena me pipwodéén. Be pa ciéém ce, ke e caa mele, ke e caa mulie mwo! Pana caa tieeng, ke nye caa tooeng mwo!"»

A ocine ko pa apenem na e te pipwocileeng

16 E pacémuni lépwo acémun den wo Iésu, [ke e pii telé a ocine ce]:

«E bwo mu wo pa céiu apenem de pa céiu apulie na pwo den. Be pa apiwéhi ne ni mwani ten.

«Ke é ha a céiu tan, ke lé âbé pitéteiminaado te pali daame hen ne ni béé apulie, ke lé pii ten pie: "E te nihe pihoonihi li mwani tem wo pali apenem dem."

² «Ke e todeeng wo pali daame, ke e pii ten pie: "Aje! Lé pitéteiminaado ne tong kom! Go pii pwaatihi tong aceli go pwo ko li mwani tong. Be o time go uce tee wéhi!"

³ «Ke e te pitautinaado wo pali apenem, ke e pipii ten pie: "[É te ju nebwén kuti!] Ke é bo pwo de? Caa tice ni ihung me é penem he pule. Ke te nihe tanim jo me é ile."

⁴ «Ke e te niimihi kuti ana me e pwo, beme pwo ce béén celi me lé picani ten †, hemepie caa tice penem den.

⁵ «Ke e tode he picéiu lépwo na pwo ni kérédi telé ne pele pali daame hen. Ke e tahimwo pa bécéiuhen pie: "Niile ce kérédi tem?"

⁶ «Ke e hegi ne ten pie: "100 piibwi †† ko géréén."

«Ke e pii ten wo pali apenem pie: "Ûhu! Go te ju wodehi celi celi 50, go pali bééng. Neko a metii bépa juujihi nen pie caa nebwén ati li kérédi tem."

⁷ «Ke e tode mwo pa céiu, ke e tahimwoeng pie: "Wo go paje, ke niile ce kérédi tem?"

«Ke e hegi ne ten pie: "100 ni cang ko blé."

«Ke e pii ten wo pali apenem pie: "Ûhu! Neko a metii tem, ke go te ju tii celi pie 80, [ke nebwén ati a kérédi tem]."

⁸ «Ke [é he e téne anaa] wo pali daame, ke e te nihe téele, ke e picedi pali apulie ko a bwo pipwocileeng, ke te piwien hemepie pa apipwohuô.»

[Ke e panebwénihi nelang a ocine naa wo Iésu, ke e pii pie]: «Geé alihi, wo lépwo apulie éni pwo bwohemwo, ke lé te nihe temehi me lé pipwocilelé, koja ni apulie te Padué ‡ na mwomwon ke juuju ni huô telé.

† Picani ten—Grek: Hégié ne ha a pomwa telé. †† Piibwi—Butéi (bouteille).

⁹ Ke é o pii tewé pie: A mwani, ke pa apipaupaakenye! Wâe heme go pé ni mwani tem, beme go picani te lépwo apulie kon ne éni pwo bwohemwo, beme o pwo ce béém. Be é alecehen, hemepie go caa mele koja ni mwani tem †, ke wo Padué, ke e o te hegiko ehi ne ha a pomwa ten ne jeda [he miiden] dieli mwo.»

Ni béé pwooti ne ko a mwani

¹⁰ ††[E pacihelé mwo wo Iésu ko a mwani, ke e pii pie]: «Hemepie go temehi pwoiipihi ace cuwo nahi naado, ke go te temehi mwo me go pwoiipihi ni naado na ubwo. Ke é hemepie time go uce temehi me go pwoiipihi ni naado na wahin, ke o time go bo uce temehi me go pwoiipihi ni naado na ubwo. ¹¹⁻¹² Ke é hemepie time go uce temehi me go pwoiipihi ni naado na te ju wahin ne éni pwo bwohemwo, pwohewii a mwani, ke é mu ko ade na go niimihi pie [wo Padué, ke e] o bo ne tem, me go papenemihi nina wâe na ni junaado [ne he miiden]?»

¹³ ††«Te tice pace apulie celi jan ne kon me pa apipenem de lupwoce daame celi alo julu, ati ha a pwonimen. Be e o pipenem ehi te pace céiu, ke e o tééti pa céiu. Kehe time uce jan me geé tai apipenem de Padué me a mwani!»

¹⁴ Ke he lé téne a pwooti naa wo lépwo béé *Fara-saio, ke lé pihoonieng, be wâe telé a mwani.

¹⁵ ††Ke e pii telé pie: «Geé pipwocile, be geé te nihe pihabwiikewé ne he pwahamii ni apulie, kehe icehi ana e te temehi ni pwonimewé wo Padué. Ke nina pwo-naado ne kon ne te pa apulie, ke te junihe ta ne he pwahamii Padué.»

Ni pwooti ko ni patén me a Mwametau

¹⁶ †[E pacémuni ni apulie wo Iésu ko ni béé pwooti, ke e pii telé pie]: «[Lé pihuôkenye] ne ni *patén de Moosé, me ni pwooti te lépwo péroféta, die ha a be-naamwon na e pipune wo *Ioane pa apipuu apulie. Kehe icehi ana é jena, ke é ko patemehi a Pwooti Wâé ko a *Mwametau te Padué. Ke te nihe hiwon ni apulie na lé ko pipwopa hane beme lé taa hen st. ¹⁷ ††Kehe icehi ana hemepie e mwo teko mu a miiden me a bwohemwo, ke o te tice ace céiu atii celi e o pétaab-won mu ko ni patén st.

¹⁸ «É mu ko anaa, na é pii pie: Hemepie go cibéé é mwodem, beme go piaten mwo, ke pa apibune be go engen koja égi mwodem ânebun. Ke piwien mwo

‡ Ni apulie te Padué... Grek: Ni nahi pwéélang. †† Mwani tem—ai Ni mwani na go hegi ha a pipwohuô. †† 16.10 Luka 19.17–26 ††† 16.13 Mataio 6.24 ††† 16.15 Mataio 23.28; Luka 18.9–14 § 16.16 Mataio 11.12–13 §† Lé ko pipwopa hane beme lé taa hen—ai Lé pine nihelé, ai Lé hane me lé ne a Mwametau ko ni-ihelé. Grek: Lé taa ko ni nihelé. §†† 16.17 Mataio 5.18 §† Grek: Te junihe piticeoon de a miiden me a bwohemwo me tieden kojan me....

heme go piaten me êce céiu toomwo celi e caa tahagéi piaten.»

Pana nihe pwo ni den me Lazare

¹⁹ E pii wo Iésu a ocine ce:

«[Lu bwo mu wo lupwo apulie na alo julú.] Wo pa céiu, ke pa apulie na nihe pwo den. Ke e mu cuwohe ni epwén na te nihe wâé ne kon, ke te nihe ubwo ni cuhin. Ati he ni tan, ke e te pwo nina te wâé ten, ke e mu pwo ni piwiinaado na ubwo.

²⁰⁻²¹ «Ke wo Lazare, ke tice den, ke tome ahinaado kon, be e pwo katia, ke lé mu tami ni ahinaado kon ne ni wotaahen. Ke e tee pule ha a pomwa ko a babé ko ali mwa te pali pwo den. Ke te nihe nimen me e eni ni mewiinaado na e mu tupwo mu pwo a taap te pali pwo den.

²² «Ke nebwén, ke lu mele wo lupwoli apulie, ke lé âbé wo lépwo *âcélo, ke lé pé Lazare nge pele *Abérama [ne he miiden]. ²³ Kehe é ne ko pali pwo den, ke lé pééeng ole céii lépwo amele. Ke te nihe cunu nang, ke e te nihe mu he ni picani nelang.

«Ke me e alehede, ke e ali Lazare me Abérama, ke he nihe woilu ité kojaeng. ²⁴ Ke e toii da céii Abérama pie: “Au, caa, go pipwoééhung! Ke go neopé Lazare, beme e te ju neole ha a tabe a mwodéin, ke me e ne pwo a upehung. Be é te nihe mu he ni picani ne ha a miû ce.”

²⁵ «Ke e hegi ne ten wo Abérama pie: “Pa naîng, go teko niimihi he li go mwo mulie [pwo bwohemwo]. Ke te tice celi tieden pelem, ke go mulie ha a pipwodéén. Kehe wo Lazare, ke e mu he ni cunu me ni picani. Ke go alihi, jena, ke e pipwodéén, ke wogo, ke go mu he ni cunu me ni picani. ²⁶ Ke a céiu mwo, ke pwo a pwon na nihe ubwo ne ha awiemenye. Ke pwocoon me geme oté céiikewé, ke pwocoon me geé taabé céi-ikeme.”

²⁷ «Ke e hegi ne ten wo pali pwo naamun pie: “Ke me wonaa, go caa, ke é ileko pie, go pahede Lazare nge ha a pomwa te caa tong, ne pwo bwohemwo.

²⁸ Be mwo élé lang wo lépwo âjjiéung na nim jélé; be wâé heme e pacihelé ko a duaan ce é ko mu hen. Be koli lé bo opé ne éni, he ni cunu me ni picani [hemepie lé bo mele].”

²⁹ «Ke e hegi ne ten wo Abérama pie: “Ûhu! Be caa te e pelelé wo Moosé me lépwo péroféta. Kehe wâé heme lé piténédehi!”

³⁰ «Ke e pii ten wo pali pie: “Ûhu go caa. Be te nihe wâé heme e mwojuia mu ha amele wo pace céiu apulie me e pacihelé, beme lé pininim, ke me lé bitelé.”

³¹ «Kehe icehi ana e hegi ne ten wo Abérama pie: “Mepie time lé uce piténéde Moosé me lépwo péroféta, ke time lé o uce piténéde pace apulie celi e mulie cemwo mu ha amele!”»

Ni pune te Iésu ne te lépwo acémun den

Mataio 18.6–7, 21–22; Maréko 9.42

17 E pii te lépwo acémun den wo Iésu pie: «O te cuwo ko pwo ni bwomunen me nye tupwo ne ha a ta. Kehe o te junihe ubwo a cuhinaado te pana e pwo me lé tupwo ne ha a ta wo lépwo béén!»

Go nemwo tanahi a céihi ten!

² «Geé pipwocile! Go nemwo pwotahi a céihi † te pa apulie na e céihi ne kong pwohewii a cuwo nahi ewa, be o te junihe ubwo a cuhinaado tem. Ke wâé heme cie ace pilehe péi ne ko a henem, ke me tahiko ole he jíé! ³ ††Hemepie e pwo aceli ta {ne kom} wo pa céiu acéihi béém, ke go paciheeng ehi. Ke mepie e pininim, ke me e biteeng, ke go pineuhi ni ta pwo ten. ⁴ Ke mepie e tee pwo celi ta ne kom ‡, ke mepie e te âmwobé pii tem pie e pininim, ke go pineueng.»

Jan ne ko a céihi na junihe wahin

⁵ [É ha a céiu tan, ke] lé pii te Padaame Iésu wo lépwo *apostolo pie: «Ne teme a céihi celi nihe ubwo!»

⁶ ††Ke e pii telé pie: «Hemepie a céihi tewé, ke me te ju wahin pwohewii a pide *moutarde*, ke o te jan me geé pii te a acuwo ce pie: “Go tawii ni waam mu éni, ke go ole cuwo he jíé!”, ke e o te pitabemikewé.»

Geé penem ha a pimiibule

⁷ [E pacémunilé mwo wo Iésu, ke e pii telé pie]: «Geé cuwoteeke niimihi a bwomunen ce: Pwo pa apenem de pa daame, na e umi ni apwoamu, ke e wéihi muto. Ke me e âmwobé mu he ni apwoamu, ke time e uce pii ten wo pa daame pie: “Go â wiinaado.” ⁸ Kehe e pii ten pie: “Go piwâam ko a wiinaado tong! Ke é alecehen, ke go taatéhi ni epwénem, ke go âbé penem dong, beme é wiinaado ke me é ûdu. Ke é alecehe anaa, ke go bwobe wiinaado ke ûdu.” ⁹ Time e uce olééhi ne te pa apenem den wo pa daame be e pwo nina e ilehi!

¹⁰ «Te piwien ne mwo kowé jena, heme geé pwo ati nina e pii wo Padué, be wâé heme geé pii pie: “Wogeme lépwo apenem na piticenaado ne kome. Ke geme te ju pwo celi nina me geme pwo.”»

E pwo me wâé lépwo katia na 10 jélé

¹¹ E mwo ko â he pwaaden nge *Iérusaléma mu Galilé wo Iésu. Ke e tuie nge ha a céiu duaan na e mwonuhi a amu *Samari. ¹² Ke e â taa ha a céiu mwopopwaaélé.

† Pwotahi a céihi—ai Pwo me tieden a céihi—ai Ne me e pwo ana ta. Grek: Pwo me e tupwo. †† 17.3 Mataio 18.15 ‡ Mepie e tee pwo celi ta ne kom—Grek: Mepie e pwo 7 pwo na ta ne kom ha a tan na céiu. †† 17.6 Mataio 17.20, 21.21

Ke me e tehene ngen, ke lé âbé beniieng lépwo katia na 10 jélé. ¹³ †Ke lé te pimu ité †† koja Iésu, ke lé cihe da ko miiden ko pii pie: «Iésu, Padaame, go pip-woééheme!»

¹⁴ †Ke e alilé wo Iésu, ke e pii telé pie: «Geé ân, ke geé pihabwiikewé ne te lépwo *apwoâpwailo.»

Ke me lé mwo ko ân, ke caa te wâé jélé kuti. ¹⁵ Ke heme e alihi wo pa céiu béélé pie caa wâé nang, ke e mwojuia, ke e cihe da ko miiden, ke e pii pie: «Wâé Padué!»

¹⁶ Ke e tidihii jilin ne ânebuhe Iésu, ke e ti pwo bwohemwo a bwaaden, ke e pwo-olé ten. Pa apulie naa, ke pa apulie mu Samari ††.

¹⁷ Ke e pii ten wo Iésu pie: «Tai wogewé lépwona 10 gewé, ke time uce tai wâé gewé? Ke kona élé wé lépwona 9 jélé? ¹⁸ É mu hadeniilé ati, ke te tice paceli e mwojuia cemwo beme e pipaunu Padué, kehe te icehi wogo pa aâbé! ¹⁹ Go cuwoda, ke go engen, be e caa pwo me wâé go na a céihi tem.»

A bwo tuie te pa Nahi Apulie

Mataio 24.23–28,37–41

²⁰ [É ha a céiu tan] ke lé tahimwo Iésu ni béé *Fara-saio pie: «He éniile celi e o bo âbé a *Mwametau te Padué?»

A Mwametau ke caa e éni

Ke e pii telé pie: «A Mwametau te Padué, ke o time e uce âbé pwohewii ace céiu naado celi genye alihi. ²¹ Ke o time uce jan me geé pii pie: “E éni” ai “E lang”. Be a Mwametau te Padué, ke caa e ha awiemewé ††.»

Lé o bo tai alihi a bwo mwojuia tong

²² É alecehen, ke e pii te lépwo acémun den wo Iésu pie: «E o âbé a benaamwon na o nimewé me geé alié, woéo pa Nahi Apulie, ha ace tan celi ju céiu, kehe o time geé uce alié. ²³ ††Pwo ni apulie na lé o pii tewé pie: “E jeoté” ai “E éni”, kehe geé nemwo ân; geé nemwo téte ngen. ²⁴ Be a bwo âmwobé tong, woéo pa Nahi Apulie, ke o pwohewii a ilehi heme e pwéélang ati ha a miiden, mu ha a céiu baaéén die ha a céiu baaéén. ²⁵ Kehe, é ânebuhe ninnaa, ke wâé heme é mu he ni picani, ke me lé téétié ne ni apulie jena.»

Lé o téetihii a bwo tuie opé tong

²⁶ «A tan na é bo âbé hen, woéo pa Nahi Apulie, ke o pwohewii a benaamwon de Noé. ²⁷ Be lé teko wiinaado

† 17.13 Lévitique 13.45–46 †† Lé te pimu ité—Wo lépwo katia, ke iitihii me lé âmwon ni béé apulie. † 17.14 Lévitique 14.2–3; Ioane 3.3, 18.36 †† Samari—Wo lépwo Juif, ke lé mwiihi lépwo Samari, be time lé uce niimihi pie, te lépwo ju apulie te Padué pwohewiiilé. Omehi Samari ne ha a Niinaado (Vocabulaire) ha anebwén ko a tii. †† Caa e ha awiemewé—ai Caa e kowé. ††† 17.23 Maréko 13.21; Luka 21.8

me ûdu ne ni apulie, ke lé piaten, ke lé ne ni naîlé toomwo me lé aten. [Ke te tice aceli lé temehi] dieli ha a tan na e taa ha ali ong wo Noé. Ke e te âbé kuti ali tilihii amu, ke lé tai mele ati ni apulie naa.

²⁸ †††«Ai o pwohewii a benaamwon de Lota ⁵. Be lé teko wiinaado me ûdu ne ni apulie, ke lé icuhinaado me pwocuhinaado, ke lé cemi, ke lé pacuuli ni mwa. ²⁹ Ke é ha a tan na e wie mu *Sodome wo Lota, ke wo Padué, ke e pwo me tupwo mu he miiden a miû, ke a muu pule na éle ^{5†}. Ke lé tai mele ^{5††} ne ni apulie naa. ³⁰ Ke [lé pii tewé pie, o piwie a bwo téetihii nen de ni apulie] ha a tan na é o pihabwiié, woéo pa Nahi Apulie.»

O bo pé pace céiu

³¹ ††«É ha a tan naa, ke wo pana e âoté pwomwo, ke e nemwo taamwo hane ni naamuun ne ha a mwa ten. Ke wo pana e mu ha apwoamu, ke e nemwo mwojuia ngemwo pelen. ³² Geé te piniimi égi mwode Lota [li e niê ocmwo. Be lé mele ibu me lépwo Sodome].

³³ †††«Be wo paceli e hane me e cile a mulihen, ke e o patieden. Kehe wo paceli e patieden a mulihen, ke e o cile dieli mwo. ³⁴ Éa, é pii tewé pie: É ha a bwén naa, ke alo ni apulie ne pwo ace apule, ke o pé pace céiu, ke o ne pa céiu. ³⁵ Ke alo lu toomwo na lu ko cemeii blé ibu, ke o pé ê céiu, ke o ne ê céiu.

{ ³⁶ «Ke wo lupwo apulie na lu mu ha apwoamu, ke o pé pa céiu, ke o ne pa céiu.»}

³⁷ [Ke me lé téne anaa] wo lépwo acémun den, ke lé tahimwo Iésu pie: «Padaame, e o bo tuie ne wé anaa?»

Ke e pii telé pie: «[Geé ûmié, me geé alihi ni béhabwiinen. Be pwohewii ana nye mu pii pie]: “É he na e lang a déhi wota, ke lé taineibulé nelang ne ni bwaoolé ^{5†}.”»

Égi depwele na e tee ile taaci

18 ^{5†} Pii a ocine ce wo Iésu te lépwo acémun den, beme e habwii telé pie, wâé heme nye cuwo ko pwoiitihii, kehe me nye nemwo pwo me mwaale genye. ²⁻³ Ke e pii telé pie:

«E bwo mu wo é céiu depwele ^{5††} [na te tice den]. Ke é ha a céiu tan, ke e â céii pa céiu atautinaado, [pa apulie na nihe ubwo nang] beme e ilehi kojaeng pie, me e cuwoko pa céiu apulie [me e uje ne mwo ten ana te a den]. Ke e pii ten wo éje pie: “Pa daame, go picani tong, ke go pwo ana mwomwon me dong!”

††† 17.28 Genèse 18.20, 19.25 † Lota—Pa acim ko Abérama li e âcén ne ha ali amu li e ne te Abérama wo Padué. Omehi Genèse pwahamii tii 18 me 19. †† Muu pule na éle—Soufre. ††† Tai mele—Te wo Lota cehi me lu naîn toomwo na lé mulie. †† 17.31 Mataio 24.17–18 ††† 17.33 Luka 9.24 †† Bwaoolé—Aigle pêcheur (ici pour aigle). †† 18.1 Kolosé 4.2; 1 Tésalonik 5.17 ††† E bwo mu wo é céiu depwele... Grek: Pwo pa céiu atautinaado... Pwo mwo é céiu depwele.

«Kehe icehi ana wo pa atautinaado, ke time uce pa apaciiti Padué, ke time e uce paciiti lépwo apulie mwo. ⁴⁵ Ke muhi ten, ke e pamwojuia êgi depwele †. Kehe e te cuwo ko âbé céiieng wo êje ati he ni tan, dieli e o bo te â téneeng.

«Ke nebwén, ke e pii ten wo pa atautinaado pie: “Te tice aceli é alihi ne ko Padué. Ke te tice aceli é alihi ne ko lépwo apulie [na lé pwohewii ê depwele ce]. Kehe icehi ana te junihe mwaale jo kon! Ke é o caa ne ten a mwomwon, beme o time e uce tee âbé iliéo!”»

⁶ Ke e pii mwo wo Padaame Iésu pie: «Geé cu-woteeke alihi ana e tuie! ⁷ E picani ten wo pa atautinaado naa, na ta nang. Ke kona wo Padué, ke o time e uce téne ni apulie ten, ke me e picani telé, heme lé todeeng heme bwén ke pwang? ⁸ Uhuu! E o te ju piepin ko ténéle. Kehe icehi ana me é o mwojuia cemwo [ne éni pwo bwohemwo] woéo pa Nahi Apulie, ke he é o mwo te too ce apulie celi lé céihi?»

Pa Farasaio me pa atai mwani

⁹ Pwo ni apulie na lé niimihi pie lé *mwomwon ne he pwahamii Padué, ke lé tééti ni béén. Ke e pii a ocine ce wo Iésu ne kolé pie:

¹⁰ «Lu bwo mu wo lupwo apulie na alo julu: Pa *Farasaio pa céiu, [pa apulie na ubwo nang ne ha a pwoiitihii]. Ke pa *atai mwani cuhi puni apulie pa céiu, [pana e mu bune he ni mwani naa]. Ke é ha a céiu tan, ke lu â pwoiitihii ne *huâ iitihii.

¹¹ «Ke e cuwoda wo pa Farasaio, ke e pwoiitihii pii pie: “Padué hung, é pipwo-olé tem, be time é uce pwohewii nina ta ni mulihelé. Be time lé uce juuju, ke lé bune, ke lé pibune. Ke time é uce wonaa! Ke é pipwo-olé tem, be time é uce pwohewii pa atai mwani naa. ¹² ††Be [é te pitenedehi ati ni patén ko a pwoiitihii. Be] é mu patupwo wiinaado, beme é pwoiitihii tem, é he na alo tan ha a naadenitan. Ke é mu ne tem a âpipati ko ni âpenem dong.”

¹³ ‡«Ke mepwo é ne ko pa atai mwani cuhi puni apulie, ke te time uce jan ne kon me e alehede da he miiden he e pwoiitihii. Ke e picii a bwaangen, be piwahin nang. Ke e pii te Padué pie: “Padué, go pipwoéhung. Be woéo ke pa apulie na ta jo!”»

¹⁴ ††Ke e pii wo Iésu pie: «Wooélé mu ko lupwona, na e pwo me wâé a pwonimen wo Padué? Wooélé pana e mwomwon ne he pwahamiin? Te wo pa atai mwani cehi, kehe time uce wo pa Farasaio. Be wo pana e pwo me piubwo nang, ke o neeng ole, ke wo pana e pwo me piwahin nang, ke bo neeng da.»

E adéi ni cuwo nahi ewa wo Iésu

Mataio 19.13–15; Maréko 10.13–16

¹⁵ Lé âbé céii Iésu wo lépwo béé apulie, ke lé pébé céiieng ni cuwo nahi ewa, beme e ti kolé [ke me adéilé]. Kehe icehi ana he lé alihi anaa wo lépwo acémun den, ke lé cihe me ubwo ne kolé, ke lé pacuwolé.

¹⁶ Kehe e pii telé wo Iésu pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

Pa apulie na nihe pwo den

Mataio 19.16–30; Maréko 10.17–31

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

¹⁸ ††Éa, é pii tewé a juuju pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa. ¹⁷ ††Éa, é pii tewé a juuju pie: Wo pa apulie na time e uce hegi a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

† 1re phrase—Grek: Caa bwolihi na muhi ten. †† 18.12 Ésaie 58.2–3; Mataio 23.23 ‡ 18.13 Psaume 51.3 †† 18.14 Mataio 23.12

‡‡ 18.17 Mataio 18.3 ††† 18.18 Luka 10.25 ††† 18.20 Exode 20.12–16; Deutéronome 5.17–20 § Go nemwo pii ce pwooti celi ni gele... A bwopiinen pie, Go nemwo wonaa ne ha atautinaado. †† Chameau—Wota he melé. Éni, ke a bwopiinen pie, a wota na nihe ubwo. Omehi Mataio 19.24.

Exode 20.12–16

pwo den, ke mwo te junihe pwocoon ne kon, me e taa ha a Mwametau te Padué.»

²⁶ Lé te junihe téele kuti wo lépwona lé téne anaa, ke lé te pipii telé pie: «Ke kona woo paceli jan me e picelumieng?»

²⁷ Ke e pii telé pie: «Ana time uce jan ne ko pa apulie me e pwo, ke te tai jan ne ko Padué.»

²⁸ Ke e pii ten wo Pétéru pie: «Wogeme, ke geme caa patupwo ati ni deme, beme geme âcéim!»

²⁹ Ke e pii telé wo Iésu pie: «É pii tewé a juuju pie: Wo paceli e patupwo a pomwa ten, ai ê mwoden, ai ni âjié-nen, ai lu acileeng, ai ni naîn, watihen a Mwametau te Padué, ³⁰ ke o tabuhi jena, ke e bo hegi ce naado celi piwéden, celi te junihe ubwo ke hiwon. Ke é alecehen, ke e bo hegi a mulie dieli mwo ne pele Padué.»

E pii a béociéhe a bwo mele ten

Mataio 20.17–19; Maréko 10.32–34

³¹ †E pé itéhi lépwo 12 acémun den wo Iésu, ke e pii telé pie: «Geé téne, genye o caa taa *Iérusaléma, ke é nelang he na o caa pajujuhi ati nina lé tii wo lépwo péroféta ne kong, woéo pa Nahi Apulie.

³² ††«Be o neó te nina te tice céihi telé. Ke lé bo pi-hoonié, ke lé bo pwotahi ne kong, ke lé bo cumi ne kong, ³³ ke lé o ahiéo ko a bwaliwota. Ke lé o pwo me é mele. Kehe icehi ana é ha a béciéhe ni tan alecehen, ke é o mulie cemwo mu ha amele.»

³⁴ †Kehe time lé uce temehi ana e pii wo lépwo acémun den. Be neduwohi kojala a bwopiinen.

E pwo me e niê pa bwi

Mataio 20.29–34; Maréko 10.46–52

³⁵ [Lé mwo teko â Iérusaléma wo Iésu me lépwo acémun den.] É he lé ko piâmwonuhi Iériko, ke pwo pa bwi na e tebwo ko a jije pwaaden, ke e ile [be pana te tice den]. ³⁶ É he e téne a pubu apulie he ko âbé, ke e tahimwohi pie, he ade.

³⁷ Ke lé pii ten pie, wo Iésu mu Nazaret na e ko âdé.

³⁸ Ke e cihe da ko miiden ko pii pie: «Iésu, pa *Naî Davita, go pipwoéhung!»

³⁹ Ke wo lépwona lé engen ânebuhe Iésu, ke lé pi-haaeng, beme e nemwo cihe. Kehe icehi ana e bwo junihe cihe da ko miiden kuti, ke e pii pie: «Pa Naî Davita, go pipwoéhung, ke go picani tong!»

⁴⁰ Ke e â cuwo wo Iésu, ke e pii pie, me lé pééeng bé céieng. Ke me e âbé mwoung wo pali bwi, ke e tahimwoeng wo Iésu pie: ⁴¹ «Ade aceli nimem me é pwo me dem?»

Ke e hegi ne ten pie: «Padaame, me é niê mwo!»

⁴² Ke e pii ten wo Iésu pie: «Niê mwo! Be caa wâé go mwo mu ko a céihi tem!»

⁴³ Ke e te niê kuti, pwohewiin ânebun. Ke e âcéi Iésu, ke e pipaunu Padué. Ke lé tai pipwoun de Padué ati ni apulie na lé alihi anaa.

Iésu me Zaché

19 E â taa Iériko wo Iésu, ke e pitahagéi a pwomwo ubwo, ² he e ko mu lang wo pa apulie na pii kon pie Zaché, pa caa te lépwo *atai mwani cuhi puni apulie. Pa apulie na [piubwo nang, ke] junihe pwo den. ³ E hane me e ali Iésu. Kehe pwocoon, wonaa mu ko a pubu apulie, be ju bahin nang. ⁴ Ke e téte nge ânebuhe ni apulie, ke e â taa pwo a acuwo *sycomore*, beme e ali Iésu, heme e âbé lang.

É mu ha a mwa tem jenaal

⁵ Me e tehenebé wo Iésu ha a duaan naa, ke e eti da ni naamiin, ke e pii ten pie: «Pa daame Zaché, go epin ko ole, beme é mu ha a mwa tem jenaal!»

⁶ Ke e te epin kuti ko a bwo ole ten wo Zaché, ke e hegi Iésu ne pelen ne ha a pipwodéén.

⁷ †He lé alihi anaa wo lépwo apulie, ke lé pihuu, ke lé pii pie: «E â mu pele pa apulie na ta nang †.»

⁸ ††Ke e cuwo ânebuhe Padaame Iésu wo Zaché, ke e pii ten pie: «Go alihi, go Padaame, é o bo ne te lépwona tice delé a céiu duaa ni dong. Ke mepie é pwotahinaado ne ko pace céiu, ke é o bo ne ten me opaa mu ko ana me é ne.»

⁹ †††Ke e hegi ne ten wo Iésu [ne he pwahamii ni apulie] pie: «E celuimikewé wo Padué, wogo me a mwa tem! Be [go habwii pie] pa ju piebehi *Abérama! ¹⁰ †Be woéo, pa Nahi Apulie, ke é âbé hane ke *celuimi lépwona lé pipatieden.»

Ocine ko lépwo eabwé na cié jélé

Mataio 25.14–30

¹¹ Hiwon ni apulie na lé ko téne a pwooti te Iésu. Ke e piuti telé a céiu ocine [beme lé temehi a ju bwomunen ne ha a *Mwametau te Padué]. Be caa e mwonu *Iérusaléma, ke lé niimihie pie, wieli e o caa pacuwohi a Mwametau he e â taa ha a pwomwo ubwo. ¹² Ke e pii pie:

«E bwo mu wo pa céiu apulie na e mu ha a pwomwoiu na nihe pwonaado ne kon. [Ke lé bwo todeeng beme pa daame ha amu ten.] Ke e bwo pipwopweehi a bwo engen den nge ha a céiu amu na éité, beme e [ali pa daame ubwo nelang, me] hegi a pihuô ten. ¹³ Ke e tode lépwona 10 jélé mu ko lépwo eabwé ten, ke e muko pétaapwo ne telé ni mwani megele na hiwon ††,

†† 19.7 Luka 15.2 †† Pa apulie na ta nang—Wo lépwo atai mwani, ke hiwon ni mwani na lé bune koja lépwo âjiénelé. Omehi mwo Atai mwani ne ha a Niinaado (Vocabulaire) ha anebwén ko a tii. ††† 19.8 Exode 21.37; Nombres 5.6–7 ††† 19.9 Luka 13.16; Apostolo 16.31 † 19.10 Luka 15.4; Ioane 3.17; 1 Timoté 1.15 †† Ni

† 18.31 Luka 24.44 †† 18.32 Luka 9.22,44 † 18.34 Maréko 9.32

ke e pii telé pie: “Geé penem kon dieli é bo âmwobé.” [Ke nebwén, ke e engen, beme e hegi a pihuô ten.]

¹⁴ «Kehe lé téétieng ni béé apulie ha amu ten, ke lé ne ni apulie nge ha amu na e â hen, beme lé pii [te pa daame ubwo] pie: “Te muhi teme me pa apulie ce, ke me e pihuô teme.”»

Wogo pa eabwé na wâé go!

¹⁵ «E caa te pwo me e daame. Ke nebwén, ke e mwoujuia mwo. Ke e todebé ne pelen lépwo eabwé ten li e ne telé li mwani, beme e temehi pie, he niile celi e taa ne mwo pwon. ¹⁶ Ke e âbé wo pa bécéiuhen, ke e pii pie: “Pa daame, go ne tong ana 1 million[†], ke e taa ne pwon nina 10 million.”

¹⁷ †«Ke e pii ten wo pa daame pie: “Wâé! Wogo pa eabwé na wâé go; be go piténedehi ne he ni naado na wahin. Ke go pé a pihuô ne ko nina 10 ni pwomwo ubwo.”

¹⁸ «Ke e âbé wo pa béalohen, ke e pii pie: “Pa daame, go ne tong ana 1 million, ke e taa ne mwo pwon nina 5 million.”

¹⁹ «Ke e pii ten wo pa daame pie: “Wâé! Wogo mwo, go pihuô ne pwo nina nim ni pwomwo ubwo.”»

Wogo pa eabwé na ta go!

²⁰ «E âbé wo pa céiu, ke e pii ten pie: “Pa daame, go ne tong ana 1 million ke é cile ne ha a mwaanu. ²¹ Be mwotié kom, be pa apulie na go okéé [ne ko lépwona time lé uce penem ehi]. Ke go taineibuhi nina time go uce penem kon, ke go tii ni âdaanu na time go uce cemi.”

²² «Ke e pii ten wo pa daame pie: “É tautiko mu ko nina go pii, pa eabwé na ta go! Be go te temehi pie woéo, ke pa a-okéé, ke é taineibuhi nina time é uce penem kon, ke é tii ni âdaanu na time é uce cemi. ²³ É mu ko ade na time go uce ne ha a mwomwani a mwani tong?! Be hemepie go ko wonaa, ke wieli é o te céi ne pehi celi e taa ne pwon †!”

²⁴ «Ke e pii te lépwona lé mu lang wo pa daame pie: “Geé pé kojaeng a 1 million na eten, ke geé ne te pana eten nina 10 million.”»

O bo ne te pa apenem ehi

²⁵ «Kehe lé pii ten pie: “Pa daame, caa eten ni mwani na te junihe hiwon wéden!”

²⁶ †«E hegi ne telé wo pa daame pie: “Wo pana caa pwo ne ten, ke o ne mwo pwon ce béén. Kehe wo pana te tice ten, ke o pétaabwon kojaeng a nehinaado na mwo e pelen. ²⁷ É ne ko lépwona ta jélé ne kong, ke

mwani megele na hiwon—Grek: 10 mines. A céiu mine, ke a cuhi pa apulie he na 3–4 ni wole, ke é nge ha 1 million † (& niide a tii 18–24 mwo) Million—Grek: Mine (mwani péi). Omehi note

†† 19.17 Luka 16.10 ‡ Mwani; Ne pehi celi e taa ne pwon—L’argent; Avec son intérêt. †† 19.26 Mataio 13.12; Luka 8.18

lépwona te muhi telé me é pihuô ne kolé, geé péélé bé ne éni, ke geé taunulé ne ânebuhung!”»

E taa Iérusaléma wo Iésu

Mataio 21.1–17; Maréko 11.1–19; Ioane 12.12–19

²⁸ É alecehe a bwo piuti nen den a ocine naa, ke e engen wo Iésu beme e taa Iérusaléma. [Ke lé alecehen wo lépwo 12 acémun den.] ²⁹ Ke lé piâmwonuhi lupwo mwopopwaaalé, Betfagé me Bétani, die pwo a juwole ko ni Olivier.

Ke e mi ne ngen lupwo alo acémun den wo Iésu, ³⁰ ke e pii telu pie: «Geu â ha a mwopopwaaalé na e ânebuhenye. Ke me geu â taa hen, ke geu bo tooli a nahi buriko na lé taaeng, na mwo te tice apulie celi lé mu tebwo huîin. Ke geu tuwoeng, ke geu pééeng bé. ³¹ Ke mepie lé tahimwokeu pie: “É mu ko ade na geu tuwoeng?”, ke geu hegi ne telé pie: “Nime Padaame kon.”»

³² Ke lu ân, ke lu tooli ali nahi buriko, pwohewii nina e pii telu wo Iésu.

³³ É he lé mwo ko tuwoeng, ke lé tuiebé wo lépwo eapwihin, ke lé pii telu pie: «É mu ko ade na geu tuwo a nahi buriko naa?»

³⁴ Ke lu hegi pie: «Nime Padaame kon.»

³⁵ Ke lu pébé céii Iésu ali buriko. Ke lé tai ne ni epwén huîin wo lépwo acémun den, ke lé pwo me e taa tebwo huîin wo Iésu.

Lé pipaunueng ne ni apulie

³⁶ É heme e ko piân, ke ni apulie, ke lé talihi ni mwaanu telé nge pwo a pwaaden ânebuhe Iésu [beme lé pipaunueng]. ³⁷ Ke lé piâmwonuhi a duaan he na e mu lang a ole ko a pwaaden mu ko a juwole ko ni Olivier ke e â Iérusaléma. Ke lé tai pipwodéén wo lépwo apulie, ke lé cihe da ko miiden, beme lé pipaunu Padué mu ko ni *pipwojunuun na lé alihi. ³⁸ †Ke lé toi da pie:

*Adéi Padaame ce!

E âbé ne he nii Padué!

A péém ne he miiden!

Wâé ne he ni duaan na daaité!

³⁹ Kehe icehi ana wo lépwo béé *Farasaio na lé mu lang, ke lé pii te Iésu pie: «Aje, go pacihe lépwo acémun dem!»

⁴⁰ Ke e hegi ne telé pie: «É pii tewé pie, mepie time lé cihe, ke ni péi ce, ke lé bo pipaunu Padué!»

E é pai Iérusaléma

⁴¹ E ko piâmwonuhi Iérusaléma wo Iésu, ke me e alihi a pwomwo ubwo, ke e é pain. ⁴² Ke e pii pie: «Au, mwolihi! Iérusaléma, nihe nimung me wogo mwo, ke

†† 19.38 Psaume 118.26; Luka 2.14

me go tooli a péém jenea. Kehe icehi ana te muhi tem, ke é jenea, ke caa pwocoon me go alihi. ⁴³ Be o caa time uce bwolihi, ke lé o âbé céiiko wo lépwona muhi telé kom. Ke lé o cubwoniko na ati he ni piduaan. Ke lé bo pwopa ne kom. [Ke o time uce jan me go taunulé] be hiwon ni babé ataduwo [†] telé na lé pwo aujeniko. ^{44 ††} Ke [lé bo tanahi ni goomwa babé bwonihi a amu tem. Ke] time e bo uce mu mwo ace céiu péi pwo ace céiu. Ke lé bo caaitekwé, me ati ni apulie tem. Wonaa be time go uce alihi temehi ali benaamwon li e âbé céiiko hen wo Padué beme e celuimiko.»

E peni ni api-icu mu huâ iitih

⁴⁵ [Lé tuie nge Iérusaléma] ke e taa *huâ iitih wo Ié-su. Ke e peni wie lépwona lé pwojenep nelang ‡.

⁴⁶ Ke e pii telé pie: «Geé caa te temehi ali e pii wo Padué ne he ni tii iitih pie: *A mwa tong, ke bo toi kon pie a mwo ko pwoiitih.*

Ésaïe 56.7

Kehe wogewé, ke geé ko pwo me ataduwo te lépwo abune!»

Jérémie 7.11

^{47 ††} Ke é alecehen, ke e pacémuni ni apulie ne huâ iitih wo Iésu, ati he ni tan. Ke é ne ko lépwo caa te lépwo *apwoâpwailo, me lépwo *dotéén ko patén me lépwo apihuô, ke lé tabuhi hane ace bwopwonen beme lé taunueng. ⁴⁸ Kehe icehi ana time lé uce tooli, be nihe hiwon ni apulie na lé cedihi ni pwooti na e pacémunilé kon.

Woo na e ne te Iésu a pihuô?

Mataio 21.23–27; Maréko 11.27–33

20 E mu pacémuni lépwo apulie ne *huâ iitih wo Iésu, ke e patemehi telé a Pwooti Wâé.

Ke é ha a céiu tan he e mwo teko wonaa, ke lé âbé céieng wo lépwo béé caa te lépwo *apwoâpwailo, me lépwo béé *dotéén ko patén, me lépwo béé apihuô.

² Ke lé tahimwoeng pie: «Aje, wooélé na e ne a pihuô tem me go pwo nina go ko pwo? Wooélé na e pahedeko?»

³ Ke e hegi ne telé pie: «Woéo mwo, ke é o mwo tahimwokewé ko a céiu naado. Weengi: ⁴ Wooélé na e ne a pihuô te Ioane me e *pipuu apulie? Wo Padué, ai ni apulie?»

⁵ Ke lé te nihe picihe kon, ke lé pipii telé pie: «Mepie genye hegi ne ten pie: “É mu ko Padué”, ke e o pii tenye pie: “Ke é mu ko ade na time geé uce céihi ne ko nina e pii tewé wo Ioane?” ⁶ Ke mepie genye hegi ne ten pie: “É mu ko ni apulie”, ke wieli lé bo ahikenye ko péi ne ni apulie. Be lé tai céihi me ubwo pie, wo Ioane, ke pa péroféta [te Padué].»

⁷ Ke é mu ko anaa, ke lé hegi ne te Iésu pie: «Meni-ing, time geme uce temehi.»

⁸ Ke e pii telé pie: «Ke woéo mwo, ke time é o uce pii tewé pie, he wooélé na e ne tong a pihuô me é pwo nina é ko pwo.»

Lépwo awéihi na a ni tabe megele

Mataio 21.33–46; Maréko 12.1–12

^{9 ††} Wo Iésu, ke e piuti te lépwo apulie a ocine ce:

«E bwo mu wo pa eapwihi a ni tabe megele. Ke e bwo cemi apwoamu ten. Ke nebwen, ke [e niimihi pie me] e mwo â pitabée ha ace céiu amu, ke e pwocuhi ni béé apulie, beme lé wéihi ali ni tabe megele ten. Ke e engen, ke te nihe bwolihi a bwo mu ten ha amu naa.

¹⁰ [Pwo ni wole alecehen] ke tuie nge ha a benaamwon ko tabwo ace tabe megele. Ke e ne ngen pa céiu apenem den, beme e hegi koja lépwoli awéa ko ali ni tabe megele, ace den mu ko a pitii âdaanu. Kehe icehi ana lé ahieng, ke lé neeng ngemwo, he te tice celi lé ne ten.

¹¹ «Ke é mulang, ke e ne mwobé pa céiu apenem den. Ke lé piciheta ne kon, ke lé ahieng mwo. Ke lé pamwojuieeng mwo, he te tice celi lé ne ten. ¹² Ke nebwen, ke e ne ngemwo pa béciéhe ni apenem den, ke lé piahieng, ke lé picibééeng.

¹³ «Ke nebwen, ke e pipii ten wo pali eapwihi ali ni tabe megele pie: “He ade aceli me é bo pwo? É bo ne ngen pali ju naing na nihe eânimung den. Be wieli lé bo paciitieng”.

¹⁴ «Kehe icehi ana me lé alieng he e tehene ngen, ke lé pipii telé pie: “Geé téne, te weengaa kuti pana e bo eapwihi ali ni tabe megele ha ace céiu tan. Wâé heme nye taunueng, beme bo a denye ali ni tabe megele!”

¹⁵ «Ke lé teuueng wie koja a apwoamu, ke lé taunueng.»

[Ke wo Iésu, ke e tahimwo lépwona lé ko tabemieng pie]: «Ke e bo pwo de wo pali eapwihi ali ni tabe megele? ¹⁶ E bo âbé, ke e bo taunu li apulie na ta jélé. Ke e bo uce ne te ce béén ali ni tabe megele, beme lé bo uce wéa kon!»

Kehe icehi ana wo lépwona lé tabemi ali ocine, ke lé téetihi, ke lé pii pie: «Ûhu! Pwocoon! Time o uce wonaa!»

¹⁷ Ke e omelé wo Iésu, ke e hegi ne telé pie: «Geé cuwoteeke niimihi ali caa tii ne he ni tii iitih, pie:

*Ali péi li lé tahi taabwon
wo lépwo abahi mwa,
ke te anaa kuti a ju paamwa.» Psaume 118.22*

^{18 †††} «Hemepie e tupwo wo pace céiu apulie ne pwo a péi naa, ke o tatubwi ati a één. Ke mepie e tupwo ali péi ne huîi pace céiu apulie, ke e o ju tagetieng.»

† Babé ataduwo—Refuge. †† 19.44 Luka 21.6 ‡ Omehi note
‡† 19.47 Luka 21.37

‡† 20.9 Ésaïe 5.1 ‡†† 20.18 Ésaïe 8.14–15

A cuhi puni apulie te lépwo Roma

Mataio 22.15–22; Maréko 12.13–17

¹⁹⁻²⁰ †Lé temehi wo lépwo dotéén ko patén me lépwo caa te lépwo apwoâpwailo, pie e ko pwo-ocine ne kolé wo Iésu. Ke nimelé me lé imwieng, beme lé icueng ne te pa gupéno te lépwo Roma. Kehe icehi ana mwotilé, be hiwon ni apulie [na wâé telé nang]. Ke lé neeng, ke he lé te piwéa kon.

[Ke é ha a céiu tan] ke lé ne nge céiieng ni béé apulie, beme lé tahimwoeng ko ce naado. Ke woélé, ke lé pii ten pie, nimelé me lé temehi a juuju. Kehe icehi ana lé hane me lé pipé ne kon ko aceli e bo hegi ne telé kon.

²¹ Weengi ana lé pipii me weeng: «Pa apipune, geme temehi pie, go pii a juuju, ke time go uce pipwoinen ne ko ni apulie. Be go te patemehi ati ni naado na nime Padué kon me genye pwo. ²² Be anaa kuti ana nimeme me geme tahimwoko pie: He wâé heme †† nye pwocuhi puni apulie ‡ te pa daame he lépwo Roma? Ai time uce wâé?»

²³ Kehe e te temehi a pipwohuô telé wo Iésu, ke e pii telé pie: ²⁴ «Geé cuwoteeke habwii tong ace céiu mwani péi. A démee, ke a nii-î ana e pwo a mwani ce?»

Ke lé hegi ne ten pie: «A de pa daame he lépwo Roma.»

²⁵ Ke e pii telé wo Iésu pie: «Ke caa wâé, ke geé ne mwo te pa daame nina te ni den, ke geé ne te Padué nina te ni de Padué.»

²⁶ Ke lé te nihe téetihi a bwo hegi nen den, be time uce jan me lé pipé ne kon ne he pwahamii ni apulie. Ke te tice aceli me lé bo uce pii mwo.

A bwo mulie cemwo te ni amele

Mataio 22.23–33; Maréko 12.18–27

²⁷ Lé âmwobé céii Iésu wo lépwo béé *Saducéen. [Woélé, ke te a céiu dihe pwoiitih te lépwo *Juif] na time lé uce céihi pie, lé o mulie cemwo wo lépwo amele. Lé âbé too Iésu, [ke lé pwo me lé habwii pie lé juuju] ke lé tahimwoeng pie: ²⁸ «Pa apipune, e caa tii me denye wo *Moosé ne he ni patén pie: *Hemepie e mele wo pace céiu apulie celi te tice naîn, ke wâé heme e pé ê depwele ten wo pa ciéén me lu piate.*

Deutéronome 25.5

Be me wonaa, ke me bo pwo ce piebehi pa amele.

²⁹ «[Ke te wâé. Kehe go cuwoteeke niimihi ani]: Pwo lépwo pwénaâjién na 7 jélé, ke e piate wo pa cuwolé, kehe icehi ana e mele he mwo te tice naîn. ³⁰ Ke wo pa béalohen, ke lu piate me êgi depwele, kehe icehi ana he e mele mwo wo paje, ke te tice naîlu. ³¹ Ke te piwien ne ko pa béciéhen, ke te wonaa mwo ne ko lépwoli 7

† 20.20 Luka 11.54 †† He wâé heme... ai He te pwo mwomwon denye? Wieli lé pii ni patén ko a pwoiitih te ni Juif. ‡ Pwocuhi puni apulie—Payer l'impôt.

jélé. Be lé te tai mele, ke he te tice naîlé. ³² Ke é alecehelé ati, ke e bwobe mele wo êgi toomwo. ³³ Ke [go ko pii pie] lé bo mulie cemwo ne ni amele ha ace céiu tan. Ke hemepie wonaa, ke o bo woélé mu hadeniilé celi bo pa aiu he ê toomwo naa, ha a benaamwon naa? Be caa te tai lépwo aiu hen ati! [Ke go cuwoteeke hegi!]

A bwo hegi nen de Iésu

³⁴ Ke e hegi ne telé wo Iésu pie: «[Geé pitalupe!] Be nye mwo te piate celi ha a benaamwon na nye mwo tee ko mu éni pwo bwohemwo. ³⁵⁻³⁶ Ke o time uce wonaa, he ce benaamwon celi e lang. Be e bo pitaigali ni naîn wo Padué, ke caa te woélé kuti lépwona e piniimihi pie wâé me lé pimu ibu me weeng. Ke e bo pwo me lé mulie cemwo mu ha amele, ke lé bo pwohewii ni *âcélo ten. Be time lé bo uce mele mwo, ke time lé bo uce piate mwo.

³⁷ «[Geé ko tahimwoéo] ko a bwo mulie cemwo mu ha amele. He time geé uce temehi ali e pii wo Moosé, he e pwojepule ko ali nahi acuwo li e éle kon ali miû? Be e pii ko Padué pie, *Padué he *Abérama, ke Padué he Isaaka, ke Padué he Iakobo.*

Exode 3.6

³⁸ [A bwopiinen pie] lé teko tai mulie pele Padué! Be time uce Padué he ni amele, kehe Padué he nina lé mulie.»

A bwo hegi nen den @ ne te lépwo dotéén ko patén

Mataio 22.41–23.12; Maréko 12.35–40

³⁹ Wo lépwo dotéén ko patén, ke me lé téne ana e pii wo Iésu te lépwo Saducéen, ke lé pii ten pie: «Nihe wâé kuti ali bwo hegi nen dem, go pa apipune!» ⁴⁰ Be te nihe pipwocoon delé, me lé tahimwo Iésu ko ce béé naado.

⁴¹ Kehe icehi ana e pii telé pie: «É mu ko ade na lé pii wo lépwo apulie pie, wo pa *Mesia, ke pa apulie na wahin nang koja *Davita †?»

Nihe pwonaado ne ko pa Mesia

⁴²⁻⁴³ ††«Time uce wonaa. Be te wo Davita na e pii ne ha a tii *Psaumes, pie:

*Pwooti te Padaame Padué,
na e pacihe pa daame hung:
"Go âbé tebwo éni pwo a juing.
[É ne tem a pihuô,
ke o pipaunuko dieli mwo.]
É pwo me go caaite
nina lé pipwopa ne kom."Psaume 110.1*

⁴⁴ «Be, me e ko pii wo Davita pie: *Padaame hung*, ke a bwopiinen pie, wo pa Mesia. Ke me wonaa, ke ade ace

†† Pa apulie na wahin nang koja Davita—Grek: Pa naî Davita.

‡‡ 20.42 Psaume 110.1

watihen me geé niimihi pie, wo pa Mesia, ke time uce pace apulie celi piubwo nang koja Davita? †»

Geé nemwo pipwohewii ni dotéen naa

⁴⁵ Hiwon ni apulie na lé ko tabemi nina e ko pii wo Ié-su, ke é ne he pwahamiiélé ati, ke e pii te lépwo acémun den pie: ⁴⁶ «Geé pipwocile! Geé nemwo pipwohewii lépwo béé dotéen ko patén! Be te junihe wâé telé me lé engen he ni epwén na bwali ††. Ke wâé telé heme nye tee pwobwocu telé, me pipaunulé ne he pwahamii ni apulie ati. Ke lé te hane ni atebwo ânebun ne he ni *mwotapitihii, ke é ne mwo he ni apiwiinaado na ubwo.

⁴⁷ «Ke lé te nihe pwo ni jame pwoiitihii, beme nye o niimihi pie ni apulie na wâé jélé. Kehe icehi ana me lé ko wonaa, ke lé pé ati koja ni depwele ni delé! Ke te é mu ko anaa kuti, na o bo ne telé a kuhinaado na te junihe ubwo koja a kuhinaado te ni béén.»

Iésu ne huâ iitihii

Mataio 24.1–2; Maréko 12.41–13.2

Ê depwele na tice den

21 E mu *huâ iitihii wo Iésu. Ke e ome ni apulie na te nihe pwo delé na lé ko ne mwani, ne ko a *mwaiitihii. ² Ke e alihi mwo ê depwele na tice den na e ne lupwo cuwo nahi mwani péi. ³ †Ke e pii wo Iésu [te lépwo acémun den] pie: «É pii tewé a juuju pie: Ê depwele ce tice naamuun, ke e ne nina te junihe piwédén koja ni béén. ⁴ Be lé ne ni mwani na piwédén mu ko ni âpenem delé. Kehe wo ênaa, ke te ju tice den, ke e te ne ati ni mwani na jan me e mulie kon.»

O bo tanahi a mwaiitihii

⁵ Ke é alecehen, ke lé cihe ko ali mwaiitihii ne ni apulie, ke lé pii pie: «Junihe wâé kuti ko ni péi na e gaale kon, ke ni naado na lé ne te Padué mwo!»

⁶ †Ke e hegi ne telé wo Iésu pie: «Geé te alihi ati ninaa: Be o bo âbé ace tan, celi o bo tanahi taabwon ati ninaa. Ke o time bo uce mu mwo ace céiu péi pwo ace céiu mwo.»

Ana e o tuie

Mataio 24.3–35; Maréko 13.3–31

⁷ Lé tahimwo Iésu wo lépwo acémun den pie: «Pa apipune, he éniile celi e o bo tuie ana go ko pii? Ke o ade ace inenaado kon, me geme o temehi pie, caa é mwonu ni naado naa, ke o bo tuie?»

⁸ Ke e hegi ne telé wo Iésu pie: «Geé pipwocile, beme geé nemwo pipweéo! Be o hiwon nina lé o âbé heme lé pé a niing. Ke lé o bo pii tewé pie: “Woéo pa *Mesia. Be e caa tuie a benaamwon.” Kehe geé nemwo âcéilé. ⁹ Me geé téne heme lé cihe ko ce pa, ke ce naado na ta ne pwo a bwohemwo, ke geé nemwo pwo me mwotikewé. Be e o mi tuie ninaa, kehe icehi ana time uce téele a pwonehi a bwohemwo.»

¹⁰ Ke e pii telé mwo wo Iésu pie: «A céiu amu, ke e bo pipwopa me a céiu amu. Ke a céiu mwametau, ke e bo pipwopa me a céiu mwametau. ¹¹ Ke o bo pwo ni penem bwohemwo ne he ni pétaapwo piduaan, ke ni menele, ke ni cunu na nihe ubwo, ke ni naado na te junihe ité ne jeda he miiden. Ke o bo nihe mwoti ni apulie.»

O pwotahi ne ko ni acéihii

¹² «Ke ânebuhe ninaa, ke lé bo pwo me geé mu he ni picani. Be lé bo imwikewé, ke lé bo péékewé nge he ni *mwotapitihii beme tautikewé. Ke lé bo tahikewé nge he karépu. Ke lé bo teuukewé nge he pwahamii ni daame me ni gupéno, beme lé tautikewé, watihen a niing. ¹³ Ha a benaamwon naa, ke o ne tewé me wogewé lépwo apajuujuéo. ¹⁴ ††Geé te ju niimihi ehi pie geé nemwo mi pipwopweehii celi me geé bo pii hemepie lé bo tautikewé. ¹⁵ †††Be é bo te ne tewé ce pwooti, ke ce bwo temehinaado. Ke wo lépwona lé pii me ta gewé, ke o bo pwocoon ne kolé me lé hegi ne tewé.

¹⁶⁻¹⁷ †††«Ke lé o bo icukewé mwo ni ukéiu tewé ke ni âjiénewé ke ni bééwé. Ke lé o téetikewé mu kong ati ne ni apulie. Ke lé o bo taunu ni béén mu kowé. ¹⁸⁻¹⁹ Kehe wo pana e cumang, ke e bo celuimieng wo Padué. Ke o te tice celi lé o pwo me tatéehi *a ju mulip na e kowé †.»

O te junihe pwoééhe lépwo Iérusaléma

²⁰ «Me geé alihi ni mwocoda na lé mu aujenihii *Iérusaléma, ke geé o caa temehi pie, o caa tanahi taabwon a aba. ²¹ Wo lépwona élé pwomwo koja a pwomwo ubwo, ke lé nemwo taa hen! Ke me lé cela epin! Ke ati lépwona lé mu ha amu *Judé, ke wâé heme lé tai cela da pwo ni juwole! ²²⁻²³ ††Au, mwolihi! Be é he ni tan naa, ke o te junihe pwoééhe ni toomwo na pigiaa jélé, me nina lé paditihii ewa. Be lé o te junihe mu he ni picani. Be weengaa a benaamwon na wo Padué, ke e o pwo me lé pwocuhinaado na a bele ten, [lépwo *Juif]. Ke o wonaa ace bwo pacuwohi ati ne ni pwooti te lépwo péroféta ne he ni tii iitihii.

† Grek: E pii kon wo Davita pie 'Pa daame', ke é ko ade me pa nâin?
†† Epwén na bwali—Ne pele lépwo Juif ânebun, ke a ine nina lé pitemang me nina lé pipaciitilé. † 21.3 2 Korénit 8.12 †† 21.6 Luka 19.44

†† 21.14 Luka 12.11–12 ††† 21.15 Apostolo 6.10 ††† 21.16 Mataio 10.21–22 † Dernière phrase—Grek: Kehe o time uce tieden ace apun celi te ju céiu mu pwo puniwé. †† 21.22 Jérémie 5.29, 46.10; Osé 9.7

«Ke o te junihe ubwo a pwo-okée ten, ke lé o te junihe picani ne ni apulie lang, ha a benaamwon naa.
²⁴ †Ke o te junihe hiwon nina o taunulé ko teua. Ke o hiwon mwo nina lé o cielé me péélé nge he ni amu na hiwon, [beme ni *apenem tice ja kon de ni apulie lang]. Be a benaamwon naa, ke a benaamwon de nina time uce ni Juif. Ke lé o tanahi taabwon ati Iérusaléma. Ke lé o caaite a pule ten me a bele ten, dieli ha a tan na e bo pacuwohi anaa [wo Padué].»

A bwo âmwobé te Iésu

²⁵⁻²⁶ ††«[É alecehe anaa] ke o pwo ni inenaado na ité ne ha a téale, me a wole, me ni ceni. Be lé o penem ni junuunaado he miiden. Ke [o te ité mwo a jilé, be] o bo â ni pilehe pihijí, ke o te junihe ubwo a één. Ke lé o téetihí ati ninaa ne ni apulie pwo bwohemwo. Ke o te junihe mwotilé, ke o cenim jélé, be lé o alihi pie, o caa tuie a benaamwon na caa junihe ta a bwohemwo.
²⁷ †Ke nebwén, ke lé o bobé aliéo, woéo pa Nahi Apulie, heme é âbé he ni nii, ne ha ati a junuung me a bwo ubwo jo. ²⁸ [Anaa kuti na é pii tewé pie]: Heme geé alihi pie, e caa tabuhi cuwo ni naado naa, ke geé mwou me pipwodéén! Be o caa time uce bwolihi, ke e o caa celuimikewé wo Padué!»

A inenaado ko a éé majing

²⁹ [E pacihelé mwo wo Iésu ko ana e o tuie.] Ke e pii telé a ocine ce: «Geé cuwoteeke alihi a majing, be te a céiu acuwo. ³⁰ Be, me e tile, ke geé caa temehi pie, caa é mwonu a cim naado. ³¹ Wonaa mwo, heme geé alihi pie e caa ko tuie li é caa pii, ke geé o temehi pie, e o ju téele ne a Mwametau ten wo Padué. ³² Ke é pii tewé a juuju pie: [Time o uce bwolihi.] Be lé o mwo te alihi anaa ne ni béé apulie jena, ânebuhe ace bwo mele telé. ³³ Be o tieden a miiden me a bwohemwo, kehe time o uce tieden a pwooti tong.»

Geé tee ûmiê!

³⁴ «Geé pipwocile! Geé nemwo mulie ha a mulie hauli, ke geé nemwo junihe ûdu me wiinaado! Ke geé nemwo gia ko ni naado ne éni pwo bwohemwo. Be, mepie geé te mu ko ni naado naa, ke wieli geé o bo téele, ke pitice bwopemikewé heme é âmwobé, ³⁵ pwohewii ati ni béé apulie pwo bwohemwo. Be é o bo tai péélé ati, pwohewii [pa apwotau, heme e tahi] a pua ten ne ko a bwehi ikua. ³⁶ Geé ûmiê! Ke wâé heme geé pwoiitihi te Padué, me ilehi kojaeng pie, me e wéikewé koja ati ni naado na ta na o bo tuie. Ke [é bo pipwodéén kowé] woéo pa Nahi Apulie, na geé cuwo ânebung.»

† 21.24 Psauwe 79.1; Pii Beetihí 11.2 †† 21.25 Ésaie 13.10; Ézékiel 32.7; Joël 3.4; Pii Beetihí 6.12–13 ‡ 21.27 Daniel 7.13; Mataio 26.64; Pii Beetihí 1.7

³⁷⁻³⁸ [É ha a benaamwon na e mu Iérusaléma hen wo Iésu] ke e mu taa huâ iitihi he ni tan ati, beme e pacémuni ni apulie. Be lé mu pitapitilé nelang ati he ni acaama, beme lé téneeng. Ke me babwén, ke e mu mwojuia ngemwo pwo a juwole ko ni Olivier, ke e mu lang heme bwén.

E icu Iésu wo Judas

Mataio 26.1–16; Maréko 14.1–2; Ioane 11.45–53

22 Caa é mwonu a tan ubwo te lépwo *Juif, na pii kon pie a tan ko *Pacika, a tan na lé eni a pwoloa na te tice nyaa ten. ² Ke wo lépwo caa te lépwo *apwoâpwailo, me lépwo *dotéén ko patén, ke lé pihane ace bwopwonen beme lé taunu Iésu. Kehe icehi ana mwotilé ko ni apulie. [Be te junihe hiwon nina lé mu ko Iésu.]

³ †Ke é ha a benaamwon naa, ke wo *Caatana, ke e te taa kuti ko Judas Iscariot, pa céiu béé lépwo 12 *apostolo te Iésu. ⁴ Ke e engen, ke e â too lépwo caa te lépwo apwoâpwailo, me lépwo caa te lépwo awéihi *mwaiitihi. Ke e pii telé pie, me e bo patupwo Iésu ne telé. ⁵ Ke lé te junihe pipwodéén kuti, ke lé pii ten pie, me lé bo ne ten ce mwani. ⁶ Ke é alecehen, ke e pihane pwaaden, ité koja a pubu apulie, beme e icu Iésu telé.

A piwiinaado te Padaame

Mataio 26.17–30; Maréko 14.12–26; 1 Korénit 11.23–25

⁷ †E caa tuie a bécéiue tan ko 'pieni pwoloa tice nyaa ten', a tan na lé mu taunuhi a nahi muto me de a Pacika.

⁸ Ke wo Iésu, ke e patupwo nge *Iérusaléma Pétéru me Ioane, ke e pii telu pie: «Geu mi â ha a pwomwo ubwo, ke geu piwâam ko a wiinaado tenye ko Pacika.»

⁹ Ke lu tahimwoeng pie: «É wé he celi nimem me genye piwiinaado nelang?»

¹⁰ Ke e hegi ne telu pie: «Mepie geu â taa ha a pwomwo ubwo, ke o pitapitikewé me pa apulie na e pé a mwotabe, ke geu âcén. Ke me e â taa ha a mwa, ¹¹ ke geu pii te pa eapwihin lang pie: "E tahimwohibé wo pa apipune teme pie, e wé ace nemwa, celi me geme o pieni ibuhi ne hen a wiinaado ko a Pacika?"

¹² «Ke e o habwii teu a céiu nemwa na e ko miiden, a nemwa ubwo na caa pipwopweehi. Ke geu piwâamihi a wiinaado tenye nelang.»

¹³ Ke nebwén, ke lu engen wo Ioane me Pétéru, ke lu te tai tooli pwohewii ana e pii telu wo Iésu. Ke lu piwâamihi a wiinaado ko Pacika.

A pwoloa me a tabe megele

¹⁴ É he babwén, ha a benaamwon na lé piwiinaado hen, ke lé tebwo pwo taap wo Iésu me lépwo 12 apostolo ten. ¹⁵ Ke e pii telé pie: «Caa bwolihi na é ucéihi a

†† 22.3 Ioane 13.2,27 †† 22.7 Exode 12.1–27

benaamwon ce, me nye piwii ibuhi a wiinaado ko Pacika, ânebuhe a bwo mu he ni picani tong. ¹⁶ Be é pii tewé pie: O time é bo uce wii mwo a wiinaado ce me wogewé [ne éni pwo bwohemwo]. É bo wiinaado mwo ne ha a *Mwametau te Padué, hemepie é bo panebwénihni a penem [ko a ju Pacika] †.»

¹⁷ Ke e pé a mwoûdu ko tabe megele. Ke e pwo-olé te Padué, ke e pii telé pie: «Geé pé, ke geé piûdu hadeni-wé. ¹⁸ Be é pii tewé a juuju pie: O caa time é bo uce ûdu mwo ace tabe megele [ne éni pwo bwohemwo] dieli ha ace tan celi e bobé ne a Mwametau ten wo Padué.»

¹⁹ Ke e pé a pwoloa, ke e pipwo-olé te Padué. Ke e ebii, ke e pwopatihni ne kolé, ke e pii telé pie: «Ani, ke a ééng na é patupwo me dewé. Geé pwo ani beme geé pipaniimiéo.»

²⁰ É alecehe a piwiinaado, ke e pé ali mwoûdu ko tabe megele ††, ke e pii telé pie: «A mwoûdu ce, ke a inenaado ko a *piapwo na mwo coho, na e pwo wo Padué ko a cewéhung na o caa téé. [Be o wonaa a bwo ne a péém ne ha awiemewé me weeng.]»

E pacihelé mwo he lé piwiinaado

Mataio 26.20–35; Maréko 14.17–31; Ioane 13.21–38

²¹⁻²² †[E pii telé mwo pie]: «Wâé heme é mele, woéo pa Nahi Apulie, beme pacuwohi a bwo niimihinaado te Padué ha atabuhi kon. Kehe wo pa apulie na e picuéo, ke o te junihe pwoééhen! Ke geé alihi, wogewé lépwo bééng, be teko e pelenye ne éni, be nye teko wiinaado me weeng.»

²³ Ke [lé téetihni a pwooti naa] wo lépwo acémun den, ke lé caa tabuhi pitahimwolé pie: «He woo celi e bo pwo anaa?»

Geé pwo me piwahin gewé pwohewiiéo

²⁴ †É alecehen, ke lé tabuhi pipééle, be lé pihane pace apulie celi piubwo nang ne pelelé.

²⁵ ††Ke e pii wo Iésu pie: «É ne pele ni béén na time uce ni apulie te Padué, ke lé caaite ni apulie wo lépwo daame me lépwo apihuô. Ke lé pipwo me ubwo jélé. Ke nimelé me nye tee pipaunulé, me pipwo-olé telé taaci †††. ²⁶ †††Kehe wogewé, ke geé nemwo pwohewiié! Be wo pana piubwo nang ne hadeniwé, ke wâé heme e pwohewii pa cuwo nahi ewa. Ke wo pa apihuô, ke wâé heme pwohewii pa eabwé.»

† Dernière phrase—Grek: Dieli e o pacuwohi ne ha a Mwametau te Padué. †† E pé ali mwoûdu ko tabe megele—Wieli e wonaa heme e ne telé a mwoûdu na céiu (niide a tii 17), ai wieli e wonaa ne alecehen. Be âcehi a bwomu te lépwo Juif, ke ocié jélé ko ûdu a mwoûdu ko tabe megele ha a tan ko Pacika. † 22.21 Psaume 41.10; Ioane 13.21–22 †† 22.24 Luka 9.46 †† 22.25 Mataio 20.25–27; Maréko 10.42–45 ††† Dernière phrase—ai Ke lé pwo beme nye pii kolé pie 'lépwo na lé pwo ana wâé'. ††† 22.26 Mataio 23.11; Maréko 9.35

²⁷ †«Be [é ne pele ni apulie pwo bwohemwo, ke] wo pa daame pana piubwo nang, ke e te tebwo pwo taap, ke lé ne me e wiinaado wo lépwo eabwé ten. Kehe geé téne, time uce wonaa ne ha awiemenye. Be é caa â eabwé tewé.

²⁸ «Ke wogewé na geé mu pelong he é mu he ni picani me ni téé. ²⁹ Ke é bo ne tewé a Mwametau na e caa ne tong wo Caa tong. ³⁰ ††Ke genye bo piwiinaado ibu me woéo. Ke geé bo tebwo pwo ni atebwo te lépwo daame, beme geé o pihuô te ni 12 pwomwoiu *Isaraéla.»

Go bo piwotétaa kong, go Pétéru

³¹ E biteeng wo Iésu ne ko Simon Pétéru, ke e pii pie: «Go téne! E ilehi wo Caatana pie, me e tai tacebwénikewé, [wogo me lépwo béém] ke me e pwo me pinekepé ni pwonimewé ha ace céiu benaamwon ††. ³² ††Kehe woéo, ke é caa pwoiitihni me dem, ke é ilehi pie, me time go uce patieden a céihi tem. Ke mepie go mwojuia mwobé céiiéo, ke go pamwoiu lépwo ju béém ce.»

³³ Ke e hegi ne ten wo Pétéru pie: «Ûhu go Padaame! Te jan ne kong mwo me é mu he ni picani pwohewiiko, heme é ne he karépu, ai heme nyu tai mele!»

³⁴ Ke e pii ten wo Iésu pie: «Uhuu, go Pétéru, be é pii tem pie: É jena, ânebuhe a bwo to te a ja, ke o caa ocié go ko piwotétaa kong pie, time go uce temehiéo.»

Geé pipwopweekewé ne ko pa!

³⁵ ††E pii mwo wo Iésu te lépwo acémun den pie: «É he li é pahedekewé [beme geé â patemehi a Pwooti Wâé] ke te tice mwani, me élele, me dihibwaawé celi geé pé céiwé, ke kona pwo ce naado celi tice tewé?»

Ke lé hegi ne ten pie: «Ûhu.»

³⁶ Ke e pii telé pie: «Kehe icehi ana é jena ni, ke é pii tewé pie, wâé heme geé pé ce mwani me ce élele tewé! Ke mepie tice teua tewé, ke wâé heme geé icuhi ni epwénéwé, beme o pwocuhin kon. ³⁷ ††[Be lé o caa pwotahi ne kong, pwohewiin hemepie woéo, ke pace apulie ta.] Be pwo a céiu pwooti kong na tii ne he ni tii iitihni, pie: *Lé pwo me e pwocuhinaado; be lé pii pie, pa apwotahinaado.*

Ésaie 53.12

Ke e o caa te cuwo a pwooti naa.»

³⁸ Ke lé pii ten wo lépwo acémun den pie: «Weengi lupwo alo teua, go Padaame!»

Ke e hegi ne telé pie: «Caa te jan ††!»

§ 22.27 Ioane 13.12–15 †† 22.30 Mataio 19.28 ††† Pwo a ocine he pwo grek ko a bwo tagillihni blé

§† 22.32 Ioane 17.15 ††† 22.35 Luka 9.3, 10.4 †† 22.37 Ésaie 53.12 †† Caa te jan—Wieli a bwopiinen pie: Caa nebwen me nye cihe.

E pwoiitihi ne pwo a juwole

Mataio 26.36–46; Maréko 14.32–42

³⁹ Lé wie mu huâ wo Iésu me lépwo acémun den, ke lé â pwo a juwole ko ni Olivier. Be mu te cemang me lé â lang.

⁴⁰ Ke me lé tehene ngen, ke e pii telé pie: «Geé pwoiitihi, beme o te pwo ni hewé hemepie taceb-wénikewé.»

⁴¹ Ke e te ju piâdé kojale, ke e tidihii jilin, ke e pwoiitihi da céii Padué. ⁴² Ke e pii pie: «Caa, hemepie nimem, ke go pé kojaéo ni picani me ni téé ce †! Kehe icehi ana go nemwo pwo ana nimung kon, kehe ana nimem kon.»

{ ⁴³ Ke e pihabwiieng den wo pa céiu *âcêlo bé mu he miiden, ke e pamwoieng. ⁴⁴ Ke e pwoiitihi mwo wo Iésu, be e caa junihe mu he ni picani. Ke a tii kon, ke e caa â pwohewii ni pihicewéle na tupwo ne pwo bwohemwo. }

⁴⁵ Ke nebwén, ke e cuwoda, ke e mwojuia mwobé céii lépwo acémun den. Kehe icehi ana e alihi pie lé teko pule. Be te junihe emaan jélé ko a bwo piwahin jélé.

⁴⁶ Ke e pii telé pie: «He geé tee ko pule kona woté? Geé ûmiê, ke geé pwoiitihi, beme o te pwo ni hewé hemepie tacebwénikewé.»

Lé imwi Iésu

Mataio 26.47–56; Maréko 14.43–52; Ioane 18.3–12

⁴⁷ É he e mwo ko pii anaa wo Iésu, ke e te ju tehenebé wo Judas, pali céiu béé lépwoli 12 apostolo ten. Ke lé âbé céin ni apulie na hiwon jélé. Ke e te âde Iésu kuti, ke e mwomwaueng.

⁴⁸ Ke e pii ten wo Iésu pie: «Judas, kona é mu ko a bwo mwomwauéo na go icuéo, woéo pa Nahi Apulie?»

⁴⁹ Ke me lé alihi ana o pwo wo lépwo *acémun de Iésu, ke lé tahimwoeng pie: «Padaame, he me geme tahi ni teua?»

⁵⁰ Ke e pé a teua ten wo pa céiu béélé, ke e te tahi kuti ole pwo puni pa apenem de pa *daame he lépwo apwoâpwailo. Kehe icehi ana e te ju tahagéi a jééne ne pwo jui.

⁵¹ Ke e pii telé wo Iésu pie: «Ûhu! Caa jan! Geé nemwo pwobwonilé!»

Ke e pétaa ko ali jééne pali eabwé. Ke caa te ju wâé mwo.

⁵² Ke e pacihe lépwo apihuô te lépwona lé âbé imwieng, lépwo caa te lépwo apwoâpwailo, me lépwo caa te lépwo awéihi mwaiitihi. Ke e pii telé pie: «Woté? Geé âbé pééo ko teua me beba-acuwo, pwohewiin heme woéo pace ataunuhi apulie?! ⁵³ Ati ni tan, ke é te mu hadeniwé ne *huâ iitihi, kehe icehi ana time geé uce imwiéo! Kehe wâé me wonaa! Be ani, ke caa te a

benaamwon dewé, a benaamwon na e pihuô na a junuu a melepiing.»

⁵⁴ †Ke lé imwi Iésu.

E piwotétaa ko Iésu wo Pétéru

Mataio 26.69–75; Maréko 14.66–72; Ioane 18.16–27

Lé pé ngen Iésu ha a pomwa te pa daame he lépwo apwoâpwailo. Ke e pi-ilipuwoeng ngen wo Pétéru. ⁵⁵ E too ni béé awéa pwo napwomwo. Be lé patéi miû, ke lé cadéu. Ke e cuwo ko cadéu pelelé wo Pétéru.

⁵⁶ Ke e alieng ê céiu eabwé he e ko tebwo ko ali miû. Ke e te ju omeeng ehi, ke e pii pie: «Éé, wo paje, ke pa céiu béé Iésu mu Nazaret!»

⁵⁷ Kehe icehi ana e piwotétaa wo Pétéru, ke e pii ten pie: «Ûhu! Time é uce temehiang!»

⁵⁸ Ke te ju é alecehe a cuwo benaamwon naa, ke pwo mwo pa céiu apulie na e temehiang mwo, ke e pii ten pie: «Aje, kona time uce wogo pa céiu béé Iésu?»

Ke e hegi ne ten wo Pétéru pie: «Ûhu!»

⁵⁹ Ke te ju céiu inetéale alecehen, ke pwo pa céiu apulie na e caa te ju pii mwoiuhi te lépwo béén pie: «Uhuu! Te a juuju, be pa céiu béén! Be weeng mwo, ke pa aâbé mu Galilé!»

⁶⁰ Ke e hegi ne ten wo Pétéru pie: «Time é uce temehi aceli nimem me go pii!»

Ke me e mwo ko pii anaa, ke e to ali ja. ⁶¹ Ke e biteeng wo Iésu, ke e ome Pétéru. Ke e bwo niimihi wo Pétéru ali e caa mi pii ten wo Iésu pie: «Ânebuhe a bwo to te a ja, ke o ocié go ko piwotétaa pie, time go uce temehiéo.»

⁶² Ke e te wie kuti mu pwo napwomwo wo Pétéru, ke e te junihe é kuti.

Lé pwotahi ne ko Iésu ke lé tautieng

Mataio 26.63–27.2; Maréko 14.53–15.1; Ioane 18.13–14,19–24

⁶³ Lé pihooni Iésu wo lépwo awéa, ke lé ahieng. ⁶⁴ Ke lé tawii a pwahamiin, ke lé tahimwoeng pie: «He woo na e ahiko? Go cuwoteeke pihane, hemepie wogo ke pace péroféta [celi go temehi ati ce naado]!»

⁶⁵ Ke lé pijeta kon, ke lé pii ten ni naado na te junihe ta.

A mwohuô te lépwo Juif

⁶⁶ É pwopwometan, ke lé pitapitilé neibu ati ne ni *mwohuô te lépwo Juif: lépwo caa te lépwo apwoâpwailo, me lépwo apihuô, me lépwo dotéén ko patén. Ke lé pii [te lépwo awéa] pie me lé pébé Iésu he pwahamiilé.

⁶⁷ †Ke lé pii ten pie: «Hemepie wogo ke pa *Mesia, ke go pii teme!»

Ke e hegi ne telé wo Iésu pie: «Mepie é pii tewé a juuju, ke o time geé uce céihi ne kon.

† Ni picani me ni téé ce—Grek: A mwoudu ce.

†† 22.54 Psaume 31.12 † 22.67 Ioane 3.12

⁶⁸ «Ke mepie é tahimwokewé ko ace céiu naado, ke o time geé uce hegi ne tong. ⁶⁹ †Kehe icehi ana e o caa tuie a benaamwon na woéo pa Nahi Apulie, ke é o bo tebwo *pwo a jui Padué na te junihe pwojunuun [beme é pihuôhi ati ni naado].»

⁷⁰ [Ke me lé téne anaa, ke lé te junihe okéé kuti] ke lé pii pie: «Aje, he wogo ke pa *Naî Padué?»

Ke e hegi ne telé wo Iésu pie: «Geé mwo teko ju pii!»

⁷¹ Ke lé pipii pie: «Caa jan! Be geé caa teko téne ana e ko pii. Necu ce béé bwo pipé ne kon. [Be e caa teko pipé ne kon mwo]!»

Wo Iésu ne ânebuhe Pilate

Mataio 27.11–26; Maréko 15.2–15; Ioane 18.28–19.16

23 Lé tai cuwoda ati ni *mwôhuô te lépwo *Juif, ke lé pé Iésu nge céii *Pilate [pa gupéno te lépwo Roma]. ² Ke lé pipé ne ko Iésu, ke lé pii pie: «Wo pa apulie ce, ke e pine ânepuni a bele teme, beme lé pwobwoni César, pa daame. Be e pii telé pie, me lé nemwo pwocuhi puni apulie ne ten. Ke e pii pie, weeng, ke pa *Mesia, pa céiu daame ubwo.»

³ Ke e tahimwoeng wo Pilate pie: «Kona te wogo kuti pa daame he lépwo Juif?»

Ke e hegi ne ten wo Iésu pie: «A juuju a bwopiinen dem. †»

Te tice aceli e pwo celi ta

⁴ E biteeng wo Pilate ne ko lépwo caa te lépwo *apwoâpwailo, me ni béé apulie na lé mu lang. Ke e pii telé pie: «Time é uce tooli ace watihen me e pwocuhinaado.»

⁵ Kehe icehi ana lé te junihe pii mwoiuhi ten pie: «Uhuu, go te alihi, be e pahauli pitihi a amu ko ni bwo pipune ten, tabuhi mu Galilé, die éni *Iérusaléma!»

⁶ Ke e pii telé wo Pilate pie: «Woté? Geé pii pie, pa apulie Galilé?»

⁷ †Ke me lé pii ten pie: «Éa», ke e pawie Iésu nge pele *Érode Antipas. Be weeng pana e gupéno ne Galilé, ke, é ha a benaamwon naa, ke e ko pimu Iérusaléma.

E cuwo ânebuhe Érode Antipas

⁸ E te junihe pipwodéén kuti wo Érode he e ali Iésu, be caa te junihe bwolihi a bwo téne nen den a jepule kon. Ke te junihe nimen me e alihi ace *pipwojunuun celi e pwo. ⁹ Ke e tahimwoeng mwo ko ni naado na hiwon. Kehe icehi ana time e uce hegi ne ten wo Iésu. ¹⁰ É he ko wonaa, ke lé tee ko mu lang wo lépwo caa te lépwo apwoâpwailo, me lépwo *dotéén ko patén, ke lé te junihe cihe da me ubwo me pipé ne kon. ¹¹ [Caa â emaan Érode kon] ke e pijeta kon, ke e pihoonieng,

weeng me ni coda ten. Ke lé pwo me e cuwohe a epwén he daame. Ke lé pawieeng ngemwo céii Pilate.

¹² Tabuhi ha a tan naa, ke lu piténelu wo Érode me Pilate. Be é ânebun, ke lupwona te pita julu.

E cuwo mwo ânebuhe Pilate

¹³ Wo Pilate ke e taineibu ni apulie, me ni apihuô telé, me ni caa te lépwo apwoâpwailo. ¹⁴ Ke e pii telé pie: «Geé caa pébé pa apulie ce, ke geé pii pie: “E pine ânepuni ni apulie, beme hauli a amu.” Ke é ko tahimwoeng kon ne he pwahamiiwé. Kehe icehi ana time é uce tooli aceli ta ne kon, celi jan me é pwocuhinaado ten kon.

¹⁵ «Ke wo pa daame Érode Antipas mwo, ke time e uce tooli ace ta celi e pwo, ke e neeng mwobé éni. Be te tice watihen me e mele. ¹⁶ Heme wonaa, ke é o te ju pwo me tatieng cehi, ke é o te neeng ngemwo.» { ¹⁷ Be te a pane Pilate me e pawie pace céiu apulie mu he karépu, ati he ni jo, ha a tan ko *Pacika.}

Nimelé ko Barabas

¹⁸ Ke lé te tai toii da ko miiden ne ni apulie pie: «Pwo me e mele wo pa apulie naa! Ke go pawie Barabas!»

¹⁹ Be e mu he karépu wo Barabas, be pa ataunuhi apulie. Ke wo pa céiu béé mwo lépwona lé pwo me lé pwobwoni lépwo Roma ne Iérusaléma.

Cemeiteeng ne ko a kuricé!

²⁰ Te nime Pilate me e pawie Iésu, ke e pwo me e cihe ne ko ni apulie [beme e pacuwolé]. ²¹ Kehe icehi ana lé bwo te junihe cihe me toii da pie: «Cemeiteeng! Cemeiteeng ne ko a *kuricé!»

²² E mwo ocié ko tahimwolé wo Pilate pie: «Ade ace watihen me e mele? Te tice ace ta celi é tooli ne kon. É o te ju pwo me tatieng cehi, ke é o caa te pawieeng mwo.»

²³ Kehe icehi ana lé bwo te junihe pwole, ke lé toii da pie: «Cemeiteeng!»

²⁴ Ke e te pihuôhi wo Pilate pie, me e pwo ana nimelé kon. ²⁵ Ke e pawie Barabas, pali pwéréca †, ke e ne Iésu te ni coda ten beme lé taunueng †.

Lé pé Iésu me lé pwo me e mele

Mataio 27.32–34; Maréko 15.21–24; Ioane 19.17

²⁶ É he lé pé ngen Iésu wo lépwo coda roma, ke pitapitilé me pa apulie mu ha a pwomwo ubwo Cirène, na pii kon pie Simon, he e ko mwojuia mwobé mu ha apwoamu. Ke lé wâgo kon, beme e canihi ali kuricé céi Iésu.

²⁷ Te junihe hiwon ni apulie na lé âcéi Iésu. Ke lé é me pihemun ni toomwo.

† 22.69 Psaupe 110.1; Apostolo 7.56 †† A juuju a bwopiinen dem—Grek: Go caa teko pii. ‡ 23.7 Luka 3.1

†† Pwéréca—Meurtrier. †† Beme lé taunueng—Grek: Beme lé pwo ten ana nimelé kon.

²⁸ Ke e biteeng ne kolé wo Iésu, ke e pii telé pie: «Léli ewa Iérusaléma, geé nemwo é niimiéo, kehe geé pié niimikewé me ni naíwé! ²⁹ †Be e o caa tuie a benaam-won na geé bo pii pie: “Nihe wâé ne ko ni toomwo na time uce jan me pwo naílél, me nina time lé uce téele piâbeele ewa, me nina time lé uce paditihí ewa!”

³⁰ ††«Be [o te junihe ubwo ace bwo mu he ni picani te ni apulie]. Ke o bo nimelé me tupwo ne huílél ni juwolé ‡, beme neduwolé [koja ni téé naa]!

³¹ «Be “Me lé cini a acuwo na mwo wamin ‡, ke lé o bo woté ko a acuwo na caa meu?” [Be lé pwotahi ne kong jena, ke lé bo nihe pwotahi ne kowé alece.]»

³² Ke ni coda, ke lé tai pé Iésu me lupwo apwotahinaado, beme o tai taunulé.

Lé cemeite Iésu ne ko a kuricé

Mataio 27.35–44; Maréko 15.25–32; Ioane 19.18–27

³³ Lé pé Iésu ngen, ke lé tuie nge ha a duaan na pii kon pie ‘Piipuni Apulie’. Ke lé cemeiteeng ne ko ali kuricé. Ke lé cemeite mwo lupwoli apwotahinaado: wo pa céiu ne pwo juin, ke wo pa céiu ne pwo eamun.

³⁴ ††Ke e pii te Padué wo Iésu pie: «Caa, go pineulé, be time lé uce temehi ana lé pwo.»

Ke wo lépwo coda, ke lé picéi metii ne ko ni epwé-nen.

³⁵ †††Hiwon ni apulie na lé cuwo lang, ke lé tee tai alihi ati nina e tuie. Ke wo lépwo apihuô te lépwo Juif, ke lé pihooni Iésu, ke lé pii pie: «E pipii kon pie, pa Mesia! Ke e temehi me e celuimi ni béén, kehe icehi ana time e uce temehi me e picelumieng mwo!»

³⁶ †††Ke lé te pihoonieng mwo wo lépwo coda, ke lé pébé céiieng a tabe megele na maga, ³⁷ ke lé pii ten pie: «Aje, hemepie wogo pa daame he lépwo Juif, ke go piceluumiko mwo!»

³⁸ [Ke lé cemeite ne] pwo punin a eaa acuwo na tii ne kon pie: *PA APULIE CE, KE PA DAAME HE LÉPWO JUIF.*

³⁹ Ke mepwo wo pali céiu apwotahinaado li cemeiteeng ne ha a céiu duaa Iésu, ke e te junihe pitaahieng, ke e pii ten pie: «Woté go paje? Go pii pie, wogo pa Mesia. Ke go piceluumiko mwo, ke go celuumikemu mwo!»

⁴⁰ Kehe icehi ana e hegi ne ten wo pali béén li e mu ha ali céiu duaa Iésu, ke e pii ten pie: «Wogo, ke go pwocuhinaado pwohewii pa apulie naa. Ke he time uce mwotiko ko Padué? ⁴¹ Go te téne, be te mwomwon ne konyu a bwo pwocuhinaado tenyu, be lupwo ap-

† 23.29 Luka 21.23 †† 23.30 Osé 10.8; Pii Beetihí 6.16 ‡ Nimelé me tupwo ne huílél ni juwolé—Grek: Lé o pii te ni juwolé pie: Geé taluikeme! Lé bwo pii te ni nahi juwolé pie: Geé tupwo ne huíime. Omehi Osé 10.8. †† Me lé cini a acuwo... A bwopiinen pie, heme e picani wo Iésu, weeng na time e mu uce pwo celi ta, ke lé o bo junihe picani kuti wo lépwo duaan, lépwo Juif, na lépwona ta. †† 23.34 Psaume 22.19; Ésaie 53.12 ††† 23.35 Psaume 22.8–9 ††† 23.36 Psaume 69.22

wotahinaado. Ke hemepwo é ne kon, ke te tice aceli e pwotahi!»

⁴² Ke e pii te Iésu pie: «Au, Iésu, go bo niimiéo heme go caa tebwo ha a Mwametau tem.»

⁴³ Ke e hegi ne ten wo Iésu pie: «É pii tem a juuju pie: É jena ni, ke wogo pelong ne ha amu tong na e hen a péém §.»

E mele wo Iésu

Mataio 27.45–56; Maréko 15.33–41; Ioane 19.28–30

⁴⁴⁻⁴⁵ ††É he te ju goahen ehi, ke te ju melepiing ati ha amu †††, die ko cié inetéale alecehe a goahen. Ke te tie kuti a mwaanu [na capuhi bwonihi a duaan na junihe iitihí] ne *huâ iitihí. ⁴⁶ Ke e cihe da me ubwo wo Iésu pie: «Caa, é ne mwo a mulihung he naatiim!»

Psaume 31.6

Ke ele a nenehen.

⁴⁷ Ke me e alihi a bwo mele ten wo pa caa te coda roma, ke e pipaunu Padué, ke e pii pie: «Te a juuju pie, wo pa apulie ce, ke te tice ta celi e pwo!»

⁴⁸ Ke tai ni apulie na lé mu lang, ke lé alihi ni naado na tuie, ke lé mwojuia mwo he nihe téé ni pwonimelé ††. ⁴⁹ Lé mu lang mwo ati nina lé temehi Iésu, ke ni toomwo na lé âbé céin mu Galilé. Ke lé tee cuwo ité, ke lé omehi a bwomune ni naado.

Neeng he iitihí

Mataio 27.57–61; Maréko 15.42–47; Ioane 19.38–42

⁵⁰⁻⁵¹ Pwo pa céiu apulie na pii kon pie Josef, pa apulie mu Arimaté ne *Judé. Pa apulie na wâé me mwomwon nang. E teko mwoiu ko ucéihi ace bwo tuiebé na a *Mwametau te Padué. Pa apulie ha a mwopitautinaado te lépwo Juif, kehe icehi ana time e uce mu he nina lé pwo te Iésu wo lépwo béén.

⁵² Ke e â pele Pilate, ke e ilehi a éé Iésu. ⁵³ Ke e neeng ole mu ko a kuricé, ke e tawiieng ko a mwaanu. Ke e neeng ha a pwon na lé ini ne ha a péi, é he na mwo te tice celi lé nelé lang. ⁵⁴ Ati ni naado naa, ke pacuwohi he paciile, ha a tan ânebuhe a *tan iitihí te lépwo Juif. A paciile, ke lé pipwopweehi a piwiinaado ko a tan iitihí. Be o caa tabuhi a tan iitihí.

⁵⁵ Lé toomwo na lé âbé mu Galilé me Iésu, ke lé âcéi Josef, ke lé alihi he na neduwo Iésu nelang. ⁵⁶ †††Ke lé mwojuia ngemwo, ke lé pwopweehi ni tabe ûde me de a éé Iésu. Ke lé mwaale ha a tan iitihí, pwohewii ana pii ne he ni patén.

§ Amu tong na e hen a péém—Grek: Paradis. †† 23.45 Luka 8.2–3 ††† Ati ha amu—ai Pitihí a bwohemwo. †† Nihe téé ni pwonimelé—Grek: Lé tacii ni bwaangelé. ††† 23.56 Exode 20.10; Deutéronome 5.14

E mulie cemwo wo Iésu

Mataio 28.1–10; Maréko 16.1–8; Ioane 20.1–10

24 É he pwoiitihi, he mwo te ju acaama, ke lé â he iitihi wo léli toomwo. Ke lé pé ngen ni *huile* me ni tabe ûde na lé caa pipwopweehi. ² Ke lé tooli ali péi he caa papitibehi mu ânebuhe ali mwa péi. ³ Ke lé taa hen, kehe icehi ana time lé uce tooli a éé Padaame Iésu. ⁴ É he lé mwo ko pitahimwolé ko aceli e tuie, ke lu te âbeetilé kuti wo lupwo apulie na alo julu, na pwomelaa ni epwénelu †. ⁵ Ke te junihe mwotilé, ke lé miibule [be time uce jan me lé omelu].

Kehe icehi ana lu pii telé pie: «É mu ko ade na geé hane hadenii nina lé mele pana e caa mulie cemwo? ⁶ †{Caa time uce e éni ‡, be e caa mulie cemwo!} He geé te piniimihi a bwo cihe ten ne kowé he e mwo mu Galilé? ⁷ Be li e pii pie, weeng pa Nahi Apulie, ke o neeng te lépwo apulie na ta jélé, beme lé cemeiteeng ne ko a *kuricé, ke e bo mulie mwo ha a béciéhe ni tan alechen.»

⁸ Ke wo léli toomwo, ke lé bwo piniimihi ana e caa pii telé wo Iésu. ⁹ Ke lé mwojuia cemwo mu ko a bwomu, ke lé patemehi ati ninaa ne te lépwo 11 *apostolo, ke ati ni béé apulie te Iésu. ¹⁰ Lé toomwo naa, ke wo Maria mu Magdala, ke wo Jeanne, me Maria ê nyaa te Cang, ke ni béé toomwo na lé mu peelé.

Kehe icehi ana he lé piuti a jepule naa ne te lépwo apostolo, ¹¹ ke time lé uce mwomwolé, be lé niimihi pie lé pihaamilé. ¹² Kehe e cuwoda wo Pétéru, ke e tété nge ko a bwomuhe Iésu. Ke e pioole da, ke e te ju alihi ni mwaanu neole pwo bwohemwo. Ke e mwojuia ngemwo pelen, ne ha a bwo emegéi nan ne ko ana e tuie.

E pihabwiieng ne pwo pwaaden Émaüs

Maréko 16.12–13

¹³ Mwo te é ha a tan naa, ke lu ko â he pwaaden wo lupwo alo béé Iésu, beme lu â ha a mwopopwaalé Émaüs, alo ni inetéale mulang die *Iérusaléma.

¹⁴⁻¹⁵ É he lu ko â he pwaaden, ke lu tee ko picihe ko nina e tuie [ne ko Iésu]. É he lu mwo ko wonaa, ke e piâbé mwonulu wo pa céiu apulie, ke lé tai piengen ibu. Te wo Iésu kuti, ¹⁶ kehe time lu uce ali temehieng.

¹⁷ E pii telu pie: «He ace de celi geu ko picihe kon bé he pwaaden?»

Ke lu â cuwo ha a bwo piwahin julu. ¹⁸ Ke wo pa céiu na pii kon pie Kléopas, ke e hegi ne ten pie: «Kona time go uce temehi ana tuie he ni tan ce? Ati ni apulie Iérusaléma, ke lé te temehi, ke he te wogo cehi?»

¹⁹ Ke e tahimwolu pie: «Kona ade celi e tuie?»

† *Lupwo apulie... A bwopiinen pie, lupwo âcélo. Omehi mwo Âcélo ne ha a Niinaado (Vocabulaire) ha anebwén ko a tii.* †† 24.6 Luka 9.22 ‡ *Caa time uce e éni... Ni pwooti naa, ke te tieden he ni béé tii iitihi he pwo grek.*

Ke lu hegi ne ten pie: «Ana e tehenebé ne ko Iésu mu Nazaret, pana pa péroféta na e piwéden. Be te junihe pwojunuun ne he ni penem den, ke é ne he ni pwooti ten ne ânebuhe Padué, ke é ne ânebuhe ni apulie. ²⁰⁻²¹ ††Ke geme céihi pie me weeng pa *Mesia, pana e bo celuimi a bele *Isaraéla. Kehe icehi ana wo lépwo apihuô tenye, ke wo lépwo caa te lépwo *apwoâpwailo, ke lé neeng beme cemeiteeng ne ko a kuricé. Ke caa cié ni tan alecehe a bwo mele ten jena.

²²⁻²³ «Ke é jena, ke lé âbé ni béé toomwo mu hadeniime, ke lé [piuti a jepule na e] pwo me geme tétitihi. Be lé pii pie, lé â die ko a bwomuhe Iésu he mwo ju acaama, ke time lé uce tooli a één. Ke pwo lupwo *âcélo na lu âbeetilé, ke lu pii telé pie, e caa mulie mwo wo Iésu! ²⁴ ††Ke wo lépwo béén mu kome, ke lé â ko a bwomuhén, ke lé tooli ni naado pwohewii nina lé pii ne ni toomwo; be te a juuju pie, tieden a éé Iésu!»

E hegi ne telu

²⁵ Ke e pii telu wo Iésu pie: «[Au, mwolikewé!] Be tice aceli geé temehi! Junihe bwolihi me geé céihi ne ko nina lé pii wo lépwo péroféta ânebun! ²⁶ ††Be lé pii pie, o wâé heme e mu he ni picani wo pa Mesia, ânebuhe a bwo habwii na a bwo ubwo na a wâé ten.»

²⁷ ††[Ke é he lé ko â he pwaaden] ke e patemehi telu ati nina tii ne kon ne he ni tii iitihi. Be e tabuhi mu ko ni tii te *Moosé, die ko ni tii te lépwo péroféta.

²⁸ Nebwén, ke lé piâmwonuhi a mwopopwaalé na me lu â hen. Ke wo paje, ke e pwo me e engen kojalu.

²⁹ Kehe icehi ana lu cuwokon, ke lu pii ten pie: «Ûhu, go mwo mu pelemu, be caa bwén.»

Ke lé taa pwomwo, ke lé mu lang.

Lu temehieng he e ebii a pwoloa

³⁰ É he lé ko mu pwo taap, ke e pé a pwoloa wo paje, ke e pwoiitihi ne kon. Nebwén, ke e ebii, ke e ne telu.

³¹ Ke te tehi kuti ni naamiilu, ke lu temehieng; kehe icehi ana te ju pwo é tieeng ne ânebuhelu. ³² Ke lu pipii telu pie: «Wii! Te junihe ité kuti a pipwodéén na e mu he ni pwonimenyu, he e patemehi tenyu bé lang he pwaaden ni tii iitihi!»

³³ Ke lu te cuwoda kuti, ke lu epin ko mwojuia ngemwo Iérusaléma. Ke lu too lépwo 11 apostolo me lépwo béélé he lé teko pimu ibu. ³⁴ †Kehe icehi ana woélé, ke lé mi pii telu pie: «Éé! E caa mulie mwo wo Padaame! Be e alieng wo Simon Pétéru!»

³⁵ Ke wo lupwoli apulie mwo, ke lu uti telé ana toolu nge he pwaaden. Ke lu pii mwo pie: «Gemu te temehieng kuti he e ebii a pwoloa!»

†† 24.21 Luka 19.11; Apostolo 1.6 †† 24.24 Ioane 20.3–10 ††† 24.26 Luka 9.22 ††† 24.27 Psaume 22.2–22; Ésaie 53 § 24.34 1 Korénit 15.4–5

E pihabwiieng de ni acémun den

Mataio 28.16–20; Maréko 16.14–18; Apostolo 1.6–8

³⁶ É he lu ko wonaa a bwo uti nen, ke e te pihabwieng kuti ne ha awiemelé wo Iésu, ke e pii telé pie: «Bwocu tewé! Ke adéikewé!»

³⁷ †Ke te junihe mwotilé kuti, be lé niimihi pie lé alihi ace duéé.

³⁸ Kehe e pii telé pie: «É mu ko ade na mwotikewé ke pihauli ni pwonimewé? É mu ko ade na time geé uce céihi pie woóo?»

³⁹⁻⁴⁰ Ke e habwii telé ni in me ni an, ke e pii telé pie: «Geé alihi ni ing ke ni ang, ke geé ti kong, be te ju woóo kuti! Be a jენenaado ke te tice mehieng, ke te tice duun!»

⁴¹ Ke lé te junihe téetihini ninaa, ke piwâénimelé, kehe icehi ana time lé uce téele mwomwohi ehi, be mwo te junihe emegéi nalé. Ke e pii telé wo Iésu pie: «Te pwo celi me nye wii ne éni?»

⁴² Ke lé ne ten a me-ikua na cini. ⁴³ Ke e wii ne he pwahamiilé.

E tehi a bwo temehi nen delé ni tii iitihini

⁴⁴ ††Ke e pii telé pie: «Geé te niimihi ali é pii tewé he li é mwo tee mu pelewé, pie: Wâé heme panebwénihi ati nina lé tii ne kong wo Moosé ke wo lépwo péroféta, ke é ne ha a tii *Psaumes.»

† 24.37 Mataio 14.26 †† 24.44 Luka 9.22

⁴⁵ Ke e tehi ni bwo temehi ne ni tii iitihini telé. ⁴⁶ †Ke e pii telé pie: «Caa te tii ne he ni tii iitihini pie, e o mu he ni picani wo pa Mesia, [ke e o mele]. Kehe e o mwojuia cemwo mu hadenii ni amele ha a béciéhe ni tan alecehen ††.

⁴⁷ «Ke [é pahedekewé, beme geé] pipatemehi te ati ni bele, tabuhi mu Iérusaléma, a pwooti ko a bwo pininim. [Ke geé pii telé] ne he niing pie: “Geé bitekewé, ke geé pitaatéehi ni mulihewé, ke e bo pineuhi ni ta pwo tewé wo Padué!”

⁴⁸ ††«Be te wogewé ni *apajuujuhi na ati ninaa.

⁴⁹ ††Kehe geé mwo te ju mu éni ha a pwomwo ubwo, ucéihi a junuu Padué. Be é bo nebé ne huîwé a [*Jeneni Iitihini] be weengaa ana e caa mi pii wo Caa tong.»

E taa he miiden kojale

Maréko 16.19–20; Apostolo 1.9–11

⁵⁰ E pé lépwo acémun den wo Iésu nge ha a céiu duaan ko a Bétani, ke e pwii ni in, ke e adéilé. ⁵¹ He e ko adéilé, ke e engen kojale, ke e céieng da he miiden [wo Padué]. ⁵² Ke lé pipaunueng. Ke é alecehen, ke lé mwojuia ngemwo Iérusaléma he lé te junihe pipwodéén. ⁵³ Ke lé tee mu *huâ iitihini téteda, ke lé tee pipaunu ke *adéi Padué.

† 24.46 Ésaie 49.6, 53.10–11; Psaume 16.10 †† Ha a béciéhe ni tan alecehen—E mele wo Iésu he paciile, ke e mulie cemwo he pwoiitihini. Jēnaa, ke genye pii pie, alo ni tan alecehen. Kehe icehi ana ácehi a bwopiine ne ni tan de lépwo Juif, ke a paciile, ke a béciéuhe tan; ke a capéto, ke a béalohen; ke a pwoiitihini, ke a béciéhen. †† 24.48 Ioane 15.27; Apostolo 1.8 ††† 24.49 Ioane 14.16, 15.26; Apostolo 1.4

Ioane

na e tii wo

Atabuhi ko a tii

Woo na e tii a tii ce?

Wo Ioane, pa apostolo. Kehe icehi ana time e uce pii ace niin, ne ha a tii ce. Kehe e te ju pii cehi pie 'pa céiu acé-mun', ke 'pali te junihe eânime Iésu ten'. (Omehi 19.26; 20.2,2; 21.20.)

E tii éniile?

Ha awieme a jo 70 me 100 (wieli 80–85), ha a benaamwon na wo Ioane, he e mwo ko mu ha a province Asia (ha amu Turki jena). E tii alecehe Mataio, me Maréko me Luka.

E tii me dee?

Te ati lépwona lé hane a pwaaden, me a juuju me a mulip (14.6).

É ko ade na e tii?

Nime Ioane me e pébé lépwo apulie na lé téne a pwooti, beme lé temehi pie wo Iésu, ke pa Mesia, pa Naï Padué, li lé caa pii beetieng ânebun wo lépwo péroféta.

Ade ace âne a tii ce?

Time uce piwie a bwo uti nen de Ioane, me a bwo uti nen de Mataio, me Maréko, me Luka. Be time e uce uti ati ni pwooti me ni penem de Iésu. Kehe e te pipatemehi cehi ni naado na e mu ha aduwo, ne he ni pwooti me ni penem de Iésu. Weengi ni âne a tii: Wo Iésu Kériso, ke pa Pwooti na e pele Padué, ânebuhe a bwo tabuhi na ati ni naado. Ke e pé a éé apulie, ke e mulie ha awiemenye ne éni pwo bwohemwo. Weeng, ke pa ju pwéelang; ke pa pwaaden, ke e pomwa ko a ju mulip ne pele Padué. Ke weeng mwo 'pa awéihi muto', na e péekenye ni apulie nge pele Caa.

7 ni inenaado ke 7 ni bwopiinen ne ha a tii te Ioane
E pé a numéro 7 (a inenaado ko ana hején) wo Ioane, beme e habwii pie wo Iésu, ke pa Naï Padué.

E taatéhi a tabe beme a tabe megele (2.1–12)
E pwo me tieden a cunu ko pa apulie (4.43–54)
E pwo me wâé pa tebwomwa ha a tan iitihi (5.1–18)
Lé wiinaado ne ni apulie na 5000 jélé (6.1–15)
E engen pwo bwotabe (6.16–21)
E pwo me e niê wo pa bwi (9.1–7)
E pwo me e mulie mwo wo Lazare (11.1–44)

E pii wo Iésu pie: , ke:

É pwoloa na e ne a mulip (6.35,51)
É pwéelang pwo a bwohemwo (8.12)
É pomwa te ni muto (10.7,9)
É piwéihi muto (10.11,14)
Pana é ne a mulip, ke é pamulipi mwo ni apulie mu ha amele (11.25)
É pwaaden, ke é juuju, ke é mulip (14.6)

Pa ju éé tabe megele (15.1,5)

Nye woni ko a bwo tii nen «» be a béhabwiinen pie, e pé a nii Padué wo Iésu, « pana é mu lang ânebun, ke é jena, ke é dieli mwo.» (Omehi pwahamii tii 8 me 13, me 3.14.) E wonaa beme e habwii tenye pie, time uce pa apulie cehi, be e âbé mu ko Padué Caa.

A bwomune a tii te Ioane
 Pa Pwooti na e âbé mu ko Padué
 Pajuujuhi ke pipwopweehi
 Ni penem den ne pele ni apulie
 Penem den ne Judé ke Samari
 Lé tabuhi cubwonieng wo lépwo apihuô
 Penem den ne Iérusaléma
 E pipamwoiu lépwo acémun den
 Bénebwéne piwiinaado
 Bénebwéne pipamwoiu
 Bénebwéne pwopwoiitihi
 A bwo mele ke mulie cemwo ten
 Lé imwieng ke lé pwo me e mele
 E mulie cemwo mu ha amele

A pwooti na e pé a éé apulie

- 1** †Ha atabuhi kon, ke a Pwooti.
 Ke a Pwooti, ke e pele Padué.
 Ke a Pwooti, ke Padué.
² E te mu pele Padué
 ha atabuhi kon.
³ ††Tai ni naado ati,
 ke lé tabuhi mu kon.
 Te tice celi e tabuhi heme tieeng.
⁴ †É mu kon, ke pwo a mulip,
 a pwéelang te ni apulie.
⁵ †E pwéelang ha a melepiing.
 Ke time e uce hegieng ††
 na a melepiing.

A bwo pajuujuhi na a pwéelang

- ⁶ ††Wo Padué, ke e pahede pa apulip na pii kon pie Ioane. ⁷ E âbé beme e *pajuujuhi a pwéelang, beme lé céihi ne kon ne ni apulie ati. ⁸ Time e uce âbé mu kon a pwéelang, kehe e tuie beme e pajuujuhi a pwéelang.
⁹ ††A pwéelang naa, ke a ju pwéelang na e tuie ne pwo a bwohemwo, beme e pwéelang ko ni apulie ati.
¹⁰ Ke a Pwooti, ke e caa mu pwo a bwohemwo. Ke e tabuhi a bwohemwo wo Padué ko a Pwooti. Ke time lé uce temehieng ne pwo a bwohemwo [§]. ¹¹ E tuie ne pele

† 1.1 Ioane 17.5; 1 Ioane 1.1–2; Pii Beetihi 19.13 †† 1.3 1 Korénit 8.6; Kolosé 1.16–17; Ébéru 1.2 † 1.4 Ioane 5.26 †† 1.5 Ioane 3.19 †† Hégieng—Grek: Imwieng—ai Hégieng, temehieng ai Pacuwoeng, taunueng. ††† 1.6 Mataio 3.1; Luka 1.13–17,76 ††† 1.9 Ioane 8.12 § Ne pwo a bwohemwo—Grek: Bwohemwo. Wo Ioane, pana e tii a tii ce, ke e pii ati lépwo apulie na muhi telé ko Padué, ke lé cubwoni Iésu me lépwona lé âcén.

ni béén, ke time lé uce hegieng. ¹² Nina lé hegieng, ke lé céihi ne ko a niin, ke e ne telé a pihuô beme lé naí Padué. ¹³ ††Time lé uce âbeele mu ko ana nime pa apulie kon, kehe lé âbeele mu ko Padué.

E pé a éé apulie a Pwooti

- ¹⁴ Ke e pé a éé apulie a Pwooti, ke e mu hadeniinye, ke ubwo a pwonimen konye. Ke genye caa alihi a bwo ubwo na a wâé ten, a wâé te pa Naîn na te céiu nang, na e âbé mu ko Caa.
¹⁵ E pajuujueng wo Ioane, ke e pii me ubwo pie: «Weeng pana é piieng pie, e bo âbé céing wo pa apulie na te nihe pwonaado ne kon kojaéo, be e caa te mi mu ânebuhung.»
¹⁶ Nye caa tai hegi ati a *adéihi, ko a bwo eânimen denye. ¹⁷ †††Mepwo é ne ko ni patén, ke e ne tenye mu ko *Moosé. Kehe wo Iésu *Kériso, ke a pwaaden ko a *pipwoééhe tice ja kon, ke a *JUJU. ¹⁸ ††Te tice pace apulie celi e ali Padué, kehe te pa Naîn na te céiu nang, be e mu ko Caa, ke weeng na e pipatemehieng denye.

Ioane pa apipuu apulie

Mataio 3.1–12; Maréko 1.1–8; Luka 3.1–18

¹⁹ Wo lépwo apihuô juif ††† ne *Iérusaléma, ke lé pahede lépwo béé *apwoâpwailo me lépwo béé apipen-

§† 1.13 Ioane 2.11, 3.3–6; Filipi 2.7; 1 Pétéru 1.23 §†† 1.17 Exode 34.28; Roma 6.14 §† 1.18 Exode 33.20; Ioane 6.46; 1 Timoté 6.16 §†† Lépwo apihuô juif—Wo Ioane, ke piohiwon ko tii pie, lépwo juif ne ha a tii ce, kehe a bwopiinen pie, lépwo apihuô juif. Ai é he ni béén, ke a bwopiinen pie ati ni apulie na lé ko tabemi Iésu (pwohewii a niide a tii 6.41 me 8.22, me 12.9). Ke ne he ni niide a tii naa, ke geme tii pie, lépwo apulie nelang.

em ko a *mwaiitihi † me lé â tahimwo Ioane pie: «Wogo, ke he woo?»

²⁰ Ke time e uce waaneduwahi kolé, kehe e te pii telé pie: «Woéo, ke time uce pa Mesia ††.»

²¹ *Ke lé tahimwoeng mwo pie: «Wogo ke he woo? He wogo ke wo péroféta *Élia [na me e mi ânebuhen]?» Ke e pii telé pie: «Ûhu ††!»

Ke lé tahimwoeng mwo pie: «Kona wogo ke he pa Péroféta [na e piieng wo Moosé] ††?» Ke e pii telé pie: «Ûhu!»

²² Ke lé pii ten pie: «Kona wogo, ke he woo? Go pii teme, beme geme â pii te lépwona lé pahedekeme bé. Kona wogo, ke he go pii pie woté ne kom?»

²³ ††Ke e hegi ne telé pie: «Woéo, ke wo pali e piieng wo péroféta Isaia:

Pwo pa apulie ha a da na e toii da pie:

“E âbé wo Padaame!

Pwopweehi a pwaadeniin!”» Ésaie 40.3

²⁴ Mepwo é ne ko ni apulie na pahedelé ngen, ke lé mu hadeniilé ne ni Farasaio ††. [Woélé, ke a céiu dihe pwoiitihi te lépwo *Juif.] ²⁵ Ke lé tahimwoeng mwo pie: «É mu ko ade na go puu ni apulie, hemepie time uce wogo wo Kériso, ke time uce wogo wo Élia, ke time uce wogo pa Péroféta?»

²⁶ Ke e hegi ne telé wo Ioane pie: «É puu ni apulie ko a tabe, kehe e ha awiemewé wo pa apulie na time géé uce temehieng. ²⁷ †Weeng na e âbé alecehung. Ke time uce jan ne kong me e tuwo ni tai ko ni dihibwaan ††.»

²⁸ Tai ninaa, ke tuie ne Bétani, ko a céiu goon ne Iori-dano, he na e pipuu apulie nelang wo *Ioane pa apipuu apulie.

Pa Naï Padué wo Iésu

²⁹ ††É ha acaama hen, ke e ali Iésu wo Ioane, he e âbé céiieng. Ke e pii pie: «Weengi pa *Nahi Muto te Padué. Weeng na e pétaabwon ni ta pwo te ni apulie pwo bwohemwo. ³⁰ †Weeng na é caa mi piieng, pie:

† Apipenem ko a mwaiitihi—Lévite. Pa apulie mu ha a pwomwoiu te Lévi, na e picani te lépwo apwoâpwailo. †† Mesia—Kériso. Grek: Oint. Pana e pipégalieng wo Padué. Omehi a note

‡ 1.21 Deutéronome

18.15,18; Mataio 11.14 †† Ûhu—Time e uce ju temehi wo Ioane a bwo ubwo na a penem den. Be e pii wo Iésu ne ha a Mataio 11.14 pie, te wo Ioane kuti na e pwo a penem de Élia. Omehi mwo Mesia me Élia ne ha a Niinaado (Vocabulaire) ha anebwén ko a tii. †† Pa Péroféta na e piieng wo Moosé—Pa péroféta na pipwonaado ne kon, pana e bo pipéppwooti ha awieme Padué me ni apulie. Time lé uce temehi wo lépwo Juif pie, wo pa apulie naa, ke weeng kuti pa Mesia na lé ucéieng. Ke time lé uce temehi pie, caa wo Iésu Kériso. Omehi Péroféta ne ha a Niinaado (Vocabulaire) ha anebwén ko a tii. ††† 1.23 Ésaie 40.3 ††† Ai, Mepwo é ne ko ni apulie na pahedelé ngen, ke ni Farasaio, ai Lépwona apulie na lé pahede lépwo apé pwooti, ke ni Farasaio. § 1.27 Ioane 1.15 †† Tuwo ni tai ko ni dihibwaan—A penem de lépwo eabwé na te junihe wahin. ††† 1.29 Ésaie 53.6–7; 1 Pétéru 1.18–19 †† 1.30 Ioane 1.15

Pwo pana e bo âbé alecehung, na te nihe pwonaado ne kon kojaéo, be e caa te mi mu lang ânebuhung.

³¹ «Time é uce mi temehieng ânebun, ke é âbé puu ni apulie ne ha a tabe, beme e patemehieng te lépwo *Isaraéla.»

³² ††Weengi ana e uti wo Ioane: «É alihi a *Jenen Iitihi he e opé mu he miiden pwohewii a meni pwojo, ke e ole huûin. ³³ Time é uce mi temehieng. Kehe pana e pahedeéo me é puu ni apulie ko a tabe, ke e pii tong pie: “Pana go bo alihi heme e ole huûin a Jenen Iitihi, ke weeng pana e bo puu ni apulie ko a Jenen Iitihi.”

³⁴ ††«É alihi, ke é pajuujuhi pie: Weeng pa *Naï Padué.»

E tode ni acémun den

³⁵ É ha acaama hen, ke e mwo te mu lang wo Ioane me lupwo acémun den. ³⁶ ††Ke e ali Iésu, ke e pii pie: «Neko ali Nahi Muto te Padué!»

³⁷ Lu caa téne wo lupwo acémun den a bwopiinen naa, ke lu âcéi Iésu. ³⁸ E biteeng wo Iésu, ke e alilu he lu ko âcéin, ke e pii telu pie: «Geu hanee?» Ke lu pii ten pie: «Rabí (pa apipune), é wé he celi go mu lang?»

³⁹ Ke e hegi ne telu wo Iésu pie: «Geu âbé me geu alihi.»

Ke lé tai miân, beme lé alihi he celi e mu lang. He babwén ko paa inetéale ko alecehe goahen, ke lé mu lang ha a tan naa.

⁴⁰⁻⁴¹ †††Wo André, pa céiu béélé, ke e â too Simon Pétéru, pa âjiénen, ke e pii ten pie: «Gemu caa too pa Mesia [pana pipégalieng].» A bwopiinen pie ‘Kériso’ [he pwo *grek].

⁴² ††Ke e pééeng nge céii Iésu. Ke e alieng wo Iésu, ke e pii ten pie: «Wogo Simon, pa naï Jonas †††. Bo a niim pie Céfás †.» Ai Pétéru: a bwopiinen pie ‘a péi’.

E tode Filip me Natanaël

⁴³ É ha acaama hen, ke e â Galilé wo Iésu. Ke e too Filip, ke e pii ten pie: «Go âbé céing!» ⁴⁴ Wo Filip, ke pa apulie Betsaïda, a mwopopwaalé te André me Pétéru.

⁴⁵ 18E ân wo Filip, ke e too Natanaël ¹⁹, ke e pii ten pie: «Geme caa too pali e piieng wo Moosé ne he ni patén, ke lé cihe mwo kon ne ni péroféta! Wo Iésu mu Nazaret, pa naï Josef.»

⁴⁶ Ke e pii ten wo Natanaël pie: «He te jan me e âbé mu Nazaret aceli wâé?»

Ke e hegi ne ten wo Filip pie: «Âbé me go alihi!»

††† 1.32 Mataio 3.16 †† 1.34 Mataio 3.17 †† 1.36 Ioane 1.29 ††† 1.40 Mataio 4.18–20 ††† 1.42 Mataio 16.18 ††† Jonas—ai Ioane; Céfás—A niin he pwo araméen, Pétéru he pwo grek. 18 1.45 Deutéronome 18.18; Ésaie 7.14, 9.5; Jérémie 23.5; Ézékiel 34.23 19 Natanaël—A niin pie Bartélemi ne he ni tii te Mataio, Maréko me Luka.

⁴⁷ E ali Natanaël wo Iésu, he e âbé beniieng, ke e pii ne kon pie: «Weengi pa ju Isaraéla, na te tice pip-wohuô kon.»

⁴⁸ E pii ten wo Natanaël pie: «Go temehiéo mu wé?»

Ke e hegi ne ten wo Iésu pie: «Ânebuhe a bwo todeko te Filip, he go ko mu haahi a majing, ke é caa te aliko.»

⁴⁹ †E hegi ne ten wo Natanaël, ke e pii ten pie: «Pa apipune, wogo pa Naî Padué, pa daame Isaraéla!»

⁵⁰ E hegi ne ten wo Iésu pie: «Go céihi be he é pii tem pie, é aliko ne haahi a majing? Go bo alihi ce naado celi nihe ubwo koja anaa!»

⁵¹ ††E pii mwo pie: «É pii tewé a juuju pie: Geé bo alihi a miiden heme tehi, ke lé bo taa ke ole ne ni *âcélo te Padué, huîi pa *Nahi Apulie.»

A bécéiuhe inenaado ne Kana

2 Alo ni tan alecehen, ke lé pwo a piaten ne Kana, a mwopopwaaalé ne Galilé. E mu lang wo nyaa te Iésu. ² Ke lé te tode mwo Iésu me ni acémun den, ne ko a piaten.

³ Ke me caa tice tabe megele ‡, ke e pii te Iésu wo nyaa ten pie: «Caa tice tabe megele telé!»

⁴ ††Ke e hegi ne ten wo Iésu pie: «Nyaa, time uce wogo na me go pii tong aceli me é pwo ††. Be time uce téele tuie a benaamwon dong ††.»

⁵ E pii te lépwo apenem wo nyaa ten pie: «Geé pwo ati nina e pii tewé.»

⁶ E mu lang ni mwotabe péi na 6, beme ni bépiwon de lépwo *Juif, be te a bwomu telé. É he ni pétaapwo mwotabe, ke jan me nye neole hen celi 100 litre.⁷ E pii te lépwo apenem wo Iésu pie: «Geé pa ko tabe ni mwotabe ce.»

Ke lé pa ke oba.

⁸ Ke e pii telé mwo wo Iésu pie: «Geé tai, ke geé pé nge céii pa eapwihi piwiinaado.»

Ke lé pé ngen. ⁹ Ke e nemi a tabe wo paje, ke [e téele, be] caa taatéhi me a tabe megele. Ke time e uce temehi pie, he lé pé mu wé. Kehe lé te temehi cehi ne ni apenem. Ke e tode pa apiaten, ¹⁰ ke e pii ten pie: «Tai ni apulie, ke lé mi pipatihu a ju tabe megele, ke ana time uce ju wâé, ke lé bo ne heme lé caa nihe ûdu wo lépwo ajelu. Kehe wogo, ke go patihu a ju tabe megele, die ha a benaamwon ce!»

¹¹ Weengaa a bécéiuhe *inenaado na pwojunuun na e pwo wo Iésu. Anaa, ke e tuie ne Kana ne Galilé. Be e habwii a bwo ubwo na a wâé ††† ten, ke lé céihi ne kon ne ni acémun den.

† 1.49 Mataio 14.33, 16.16; Maréko 3.11 †† 1.51 Genèse 28.12 ‡ Tice tabe megele—Te junihe ubwo a bwo pitanim lépwo eapwihi a tan. †† 2.4 Ioane 7.30, 8.20 †† Time uce wogo na me go pii tong... ai Ade aceli nimem kon? Grek: Ade ne tem ana a dong? ††† Benaamwon dong—A benaamwon na o bo habwii a bwo ubwo na a wâé te Iésu. ††† A bwo ubwo na a wâé—Gloire.

¹² †Alecehen, ke lé ole Kapernaüm me nyaa ten me ni céien, ke ni acémun den. Time uce ju hiwon ni tan na lé mu lang hen.

E peni lépwo api-icu mu ha a mwaiitihu

{Mataio 21.12; Maréko 11.15; Luka 19.45} †

¹³ ††Caa e mwonu a Pacika † te lépwo Juif: [a *pip-wodéén ko a bwo celuimilé mu *Aigupito]. Ke wo Iésu, ke e taa *Iérusaléma. ¹⁴ E taa ha a *mwaiitihu, ke e too lépwo a-icuhi paaci, me muto, me meni, ke lépwo ataatéhi mwani ††, he lé ko tebwo pwo ni taap telé.

¹⁵ Ke e pwo a bwaliwota, ke e cibéélé mu ha a mwaiitihu me ni muto ke paaci. Ke e tahi taabwon ni mwani te lépwo ataatéhi mwani, ke e puwo ni taap. ¹⁶ Ke e pii te ni a-icuhi meni pie: «Geé pétaabwon ninaa mu éni! Geé nemwo pé a mwa te Caa tong me a mwopi-icu tewé!»

¹⁷ ††Ke lé niimihi ne ni acémun den a pwooti na caa te tii ne he ni *tii iitihu pie: *Nihe ubwo a pwonimung ko a mwaiitihu tem.*

Psaume 69.10

A ocine ko a bwo mulie cemwo ten

¹⁸ Ke lé pii ten wo lépwo apihuô juif pie: «Ade ace inenaado celi go pwo, beme habwii teme pie te pwo mwomwon dem me go pwo anaa?»

¹⁹ ††E hegi ne telé wo Iésu pie: «Geé tatii taabwon a mwaiitihu ce, be é he na cié ni tan, ke é bo pacuuli mwo.»

²⁰ Lé pii ten wo lépwo Juif pie: «Lé pacuuli a mwaiitihu ce he na 46 ni jo, ke he wogo, ke é he na cié ni tan, ke go bo pacuuli?»

²¹ †††Kehe a mwaiitihu na e cihe kon, ke a één. ²² †††Ke é he e caa mulie cemwo mu ha amele, ke lé niimihi mwo nina e caa pii telé ne ni acémun den. Ke lé céihi ne ko nina e pii ne ni tii iitihu, ke é ne ko a pwooti te Iésu.

E te temehi ni pwonime apulie

²³ †††É he ni tan na e mu Iérusaléma wo Iésu ne ko a Pacika, ke hiwon nina lé céihi ne kon, he lé alihi ni inenaado na pwojunuun na e pwo. ²⁴ Kehe time e uce mwomwolé, be e te tai temehilé ati. ²⁵ Ke time uce a ju-naado ne ten heme lé piuti ten ni bwomu te ni apulie, be e te temehi ati ni pwonime apulie.

§ 2.12 Mataio 4.13 †† Wieli e okelo ko pawie lépwo api-icu huâ iitihu wo Iésu, ha a bwo tabuhi mu ten Iérusaléma, na tii ne éni ha a Ioane 2.13–22; ke é ne ha a béociéhe a bwo mu ten lang, na tii ne ha a Mataio 21, ke a Maréko 11, me a Luka 19. ††† 2.13 Exode 12.1–27 †† Pacika—Omehi Pacika ne ha a Niinaado (Vocabulaire) ha anebwén ko a tii. ††† Ataatéhi mwani—Omehi note

†† 2.17 Psaume 69.10 †† 2.19 Mataio 26.61, 27.40 ††† 2.21 1 Korénit 6.19 ††† 2.22 Luka 24.6–8; Ioane 12.16 ††† 2.23 Ioane 7.31

Iésu me Nikodème

3 [†]Pwo pa apulie na a niin pie Nikodème, pace béé ni *Farasaio, ke pa apihuô te ni *Juif. ²Ke e âbé too Iésu he bwén, ke e pii ten pie: «Pa apipune, geme caa temehi pie wogo, ke pa apipune na e neko bé wo Padué. Te tice pace apulie celi e pwo ce inenaado celi pwojunuun pwohewiiko, heme time e uce mu pelen wo Padué.»

Wâé heme geé âbeele mwo

3 ^{††}Ke e hegi ne ten wo Iésu pie: «É pii tem a juuju pie: Te tice pace apulie celi e alihi a *Mwametau te Padué, heme time e uce âbeele mwo †.»

4 Ke e pii ten wo Nikodème pie: «He e o woté ko ace bwomunen me e âbeele mwo, heme caa ukéiu nang? Te jan me e mwojuia ne mwo tina nyaa ten, ke me e bo âbeele mwo?»

5 ^{††}Ke e hegi ne ten wo Iésu pie: «É pii tem a juuju pie: Te tice pace apulie celi e taa ha a Mwametau te Padué, heme time e uce âbeele mu ko a tabe me a *Jenen Iitihi. ⁶ ^{††}Nina lé âbeele mu ko pa apulie, ke e te mu kolé a mulie pwo bwohemwo; ke nina lé âbeele mu ko a Jenen Iitihi, ke e te mu kolé a Jenen Iitihi. ⁷Go nemwo tétetihi ana é pii tem: Wâé heme geé âbeele mwo.

8 «A dan, ke e cuu nge he na te nimen me e cuu nge-lang, ke go téne a tihin. Kehe time go uce temehi he celi e âbé mulang, ke é he celi me e â lang. Wonaa ni apulie na lé âbeele mu ko a Jenen Iitihi.»

O pieti da pa Nahi Apulie

9 Ke e tahimwoeng wo Nikodème pie: «Woté ace bwopwonen?»

10 Ke e hegi ne ten wo Iésu pie: «Wogo pa apipune na lé nihe pipaunuko ne ha amu *Isaraéla, ke time go uce temehi ninaa? ¹¹É pii tem a juuju pie: Geme ^{†††}pii ni naado na geme te temehi. Geme uti ni naado na geme alihi. Ke time geé uce hegi nina geme uti. ¹²Me é pii tewé ni naado na e pwo bwohemwo, ke time geé uce céihi ne ko nina é pii. Kona hemepie é bo cihe tewé ko ni naado na e he *miiden, ke geé bo woté ko ace bwo céihi ne kon? ¹³Te tice pace apulie celi e taa he miiden, kehe te icehi pa Nahi Apulie ^{†††}na e opé mu he miiden.

14 [§]«Wo *Moosé, ke e eti da a bwien toki ^{††}ko a bacuwo, ne ha a da. Ke wâé heme wonaa a bwo eti da pa Nahi Apulie ^{†††}, ¹⁵^{§†}be me wonaa, ke ni apulie na lé

† 3.1 Ioane 7.50, 19.39 †† 3.3 Mataio 18.3; 1 Péturu 1.23
 ‡ Âbeele mwo—ai Pituie mu ko Padué na e jeda. †† 3.5 Ézékiel 36.25–27 †† 3.6 Ioane 1.13 ††† Geme—Wieli wo Ioane, na e pé a pwooti te Iésu, beme a pwooti te ati ni acéihi. ††† Pa Nahi Apulie—Pa Nahi Apulie na e jeda he miiden ne he ni béé tii iitihi he pwo grek. § 3.14 Nombres 21.9; Ioane 8.28, 12.32 †† E eti da a bwien toki—E pwo anaa wo Moosé beme celuimi a mulihe ni apulie na lé wiilé ne ni bwien. Omehi Nombres 21.9. ††† Wieli a pwooti te Iésu, ai wieli a pwooti te Ioane. †† 3.15 Ioane 20.31

céihi ne kon, ke me etelé a mulie na tice anebwén kon.»

Te junihe eânime Padué tenye

16 ^{§††}«Te nihe eânime Padué ko a bwohemwo, ke e ne pa Naîn na te ju céiu nang, be mepie lé céihi ne kon, ke me time lé uce mele, kehe o etelé a *mulie dieli mwo. ¹⁷^{††}Be time e uce neopé pa Naîn beme e tauti a bwohemwo, kehe me e *celuimi a bwohemwo.

18 ^{§†}Pana e céihi ne kon, ke time uce tautieng, kehe pana time e uce céihi ne kon, ke caa tautieng, be time e céihi ne ko a nii pa *Naî Padué na te céiu nang.

19 ^{§††}«A tautinaado naa, ke weengi: Caa tuie a pwéélang ne pwo bwohemwo, kehe nime ni apulie ko a melepiing koja a pwéélang. Be ni penem delé, ke ta. ²⁰Wo pa apulie na e pwo nina ta, ke muhi ten ko a pwéélang. Ke time e uce âbé ne ha a pwéélang, be koli genye bo alihi nina e pwo na ta. ²¹Kehe wo pana e penem ha a juuju, ke e âbé ha a pwéélang, beme nye alihi ni penem den na e pwo mu ko Padué.»

E pii beeti Iésu wo Ioane

22 ^{§§†}É alecehe ni pwooti naa, ke lé tai â ha amu *Judé wo Iésu me ni acémun den. Ke e mu pelelé, ke e *puu apulie. ²³Wo Ioane mwo, ke e puu ni apulie ne Aînon, cebwo Salim, be nihe ubwo a tabe lang. Ke lé âbé me puulé nelang. ²⁴É ha a benaamwon naa, ke mwo time uce ne Ioane he karépu.

25 Ke lé pipééle wo lépwo acémun de Ioane me pa Juif, mu ko a bwo puu ne ni éélé pwohewii a patén de ni Juif. ²⁶Ke lé â too Ioane, ke lé pii ten pie: «Pa apipune, e ko puu apulie wo pali e mu pipabéém ne ko a céiu goo a éémwa Ioridano, wo pali go mu pipajuujueng, ke caa hiwon nina lé âcén.»

27 Ke e pii telé wo Ioane pie: «Pwocoon me e pwo ace céiu naado wo pa apulie, heme time uce ne ten mu he miiden. ²⁸^{§§§}Geé caa te téne he é pii pie, time uce woéo pa *Mesia, kehe woéo pana neéo bé ânebuhen.

29 «Wo pana eten ê apiaten, ke pa apiaten. Ke wo pa béé pa apiaten, ke e mu pelen, ke e tabemieng, ke piwâénimen heme e téne a patin. Pwohewii ne kong, be piwâénimung. Ke é jena, ke hején a bwo piwâénimung. ³⁰Wâé heme piubwo nang da, ke me piwahin jo ole.»

Wo Pana e opé mu he miiden

31 ¹⁸Wo pa apulie na e âbé mu he miiden, ke te nihe e daaité koja ni apulie ati. Ke pana e âbé mu pwo bwohemwo, ke te pa apulie pwo bwohemwo. Ke e te

§†† 3.16 Ioane 3.36, 10.28; Roma 5.8, 8.32; 1 Ioane 4.9–10
 †† 3.17 Luka 19.10 †† 3.18 Ioane 5.24 ††† 3.19 Ioane 1.5,9, 8.12
 §†† 3.22 Ioane 4.1–2 ††† 3.28 Mataio 11.10; Ioane 1.20 18 3.31
 Ioane 8.23

pwo a bwo cihe pwo bwohemwo. Kehe wo pana e âbé mu he miiden, ke te nihe e daaité koja ni apulie ati †. 32 ††Ke e te uti nina e alihi ke téne. Ke te tice paceli e hegi nina e uti. 33 Be wo pa apulie na e hegi nina e uti, ke e *pajuujuhi pie wo Padué, ke e pii a juuju. 34 Be wo pa apulie na e pahedeeng wo Padué, ke e pii ni pwooti te Padué. Be time e uce ne jahi a Jenen Iitihhi wo Padué.

35 †Ke eânime Padué Caa te pa Naîn, ke e ne ten ni pi-huô ne ko ni naado ati. 36 ††Pana e céihi ne ko pa Naîn, ke eten a mulie na tice anebwén kon. Paceli time uce nimen me e céihi ne ko pa Naîn, ke time o uce eten a mulie na tice anebwén kon. Kehe o mu huîn a okéé te Padué.

Iésu me ê toomwo Samari

4 1-2 ††Lé téne wo lépwo *Farasaio pie, caa hiwon ni *acémun de Iésu, ke e puu ni apulie na hiwon koja Ioane. (Kehe icehi ana time uce wo Iésu na e puu ni apulie, kehe te ni acémun den.) É he e téne anaa wo Iésu, 3 ke e engen mu *Judé, ke e mwojuia ne mwo Galilé. 4 Ke wâé heme e pitahagéi a amu *Samari.

5 ††Ke e tuie nge ha amu Samari, ha a céiu duaan na pii kon pie Schar, cebwo a apwoamu na e ne wo Iakobo †† te Josef, pa naîn [ha a céiu benaamwon]. 6 E lang a pwomiidu te Iakobo †. Caa mwaale Iésu ko a engen, ke e tebwô ko a jije a pwomiidu. Be caa goahen.

A pwomiidu ko a mulip

7-8 Lé â ha a mwopopwaalé wo lépwo acémun den, beme lé â pwocuhi ce wiinaado telé. Ke e âbé ê toomwo Samari, beme e tai tabe, ke e pii ten wo Iésu pie: «He te jan me go ne me é ûdu?»

9 ††Ke e pii ten wo êje pie: «É mu ko ade, na wogo pa *Juif, ke go ileéo me é ne ace ûdem, woéo ê toomwo Samari?» Be time uce pibéé ni Juif me ni apulie Samari ††.

10 ††Ke e hegi ne ten wo Iésu pie: «Hemepie go te temehi a âpipati te Padué, ke wo pana e pii tem pie: “Nebé ace ûdong”, ke é nelang, ke me go ileeng me e ne ace ûdem, ke e o ne tem a tabe mulip.»

11 E pii ten êgi toomwo pie: «Pa daame, te tice mwotai tabe tem, kehe a pwomiidu, ke te junihe tebwolu. He é mu wé he celi go o pé mulang a tabe mulie na go ko pii? 12 ††He piubwo go koja pa caa teme ††

† Wieli a pwooti te Ioane pa apipuu apulip, ai wieli wo Iésu, ai wo Ioane, pana e tii a tii ce. †† 3.32 Ioane 3.11 † 3.35 Mataio 11.27; Ioane 5.20 †† 3.36 Ioane 3.16–18; 1 Ioane 5.12 †† 4.1 Ioane 3.22 ††† 4.5 Genèse 33.19; Josué 24.32 ††† Iakobo—Pa watihe ati lépwo Juif. Omehi mwo Abérama, me Isaaka, me Iakobo ne ha a Niinaado (Vocabulaire) ha anebwén ko a tii. † Pwomiidu te Iakobo—Te junihe numwihi, ke nye neole ni cio na taa ko ni tai, beme nye tai tabe. †† 4.9 Esdras 4.1–5 ††† Be time uce pibéé... ai Wo lépwo Juif, ke time lé uce wiinaado me ûdu he ni tam me ni mwoûdu na lé caa wiinaado hen wo lépwo Samari. †† 4.10 Ioane 7.37–38; Pii Beetihhi 21.6 ††† 4.12 Ioane 8.53 †† Teme—ai Tenye. Be wo Iakobo, ke pa watihe Iésu me ati lépwo Juif, kehe icehi ana wo êgi toomwo, ke ni-

Iakobo, na e ne teme a pwomiidu ce? E caa ûdu mu kon me lépwo naîn, me ni wota ten.»

13 Ke e hegi ne ten wo Iésu pie: «Mepie go ûdu mu ko a tabe ce, ke o mwo te nimem me go ûdu mwo. 14 ††Kehe wo paceli e ûdu a tabe na é ne ten, ke o caa time uce nimen me e ûdu, be a tabe na é ne ten, ke pwohewii acaamatabe na e taawie, ke e tee téte dieli mwo.»

15 Ke e pii mwo ten êgi toomwo pie: «Pa daame, go ne tong a tabe naa, beme time bo uce nimung mwo me é ûdu, ke me time é bo uce âmwobé tai éni.»

Woéo pa Mesia na é paciheko

16 Ke e pii ten wo Iésu pie: «Go â tode pa aiu hem, ke geu âbé ne éni.»

17 Ke e pii ten êgi toomwo pie: «Te tice aiu hung.» Ke e pii ten wo Iésu pie: «Te a juuju ana go pii pie te tice aiu hem. 18 Be nim ni aiu hem, ke wo pana geu mu jena, ke time uce pa aiu hem. É ko anaa, ke go pii a juuju.»

19 Ke e pii êgi toomwo pie: «Pa daame, é alihi pie wogo, ke pa *péroféta. 20 ††Ni caa teme, ke lé pipaunu Padué ne pwo a juwole ce, ke geé pii wogewé lépwo Juif pie, a duaan na me genye pipaunu Padué ne hen, ke é *Iérusaléma.»

21 E hegi ne ten wo Iésu pie: «Éje, go céihi ne ko ana é pii, be o caa tuie a benaamwon na caa time o uce é pwo a juwole ce, ai é ne Iérusaléma, na geé pipaunu Caa. 22 ††Be wogewé ni Samari, ke geé pipaunu pana time geé uce temehieng. Kehe wogeme ni Juif, ke geme pipaunu pana geme temehieng, be a bwo *celuimi ne ni apulie, ke e âbé mu ko ni Juif. 23 Kehe o caa tuie a benaamwon, ke caa éni, he na lé o pipaunu Caa ne ni apulie, ha a *Jenen Iitihhi ke a juuju. Be anaa kuti a pipwoun na nime Caa kon. 24 ††Be wo Padué, ke te a Jenen. Ke wâé heme nina lé pipaunueng, ke lé pipaunueng ne ha a Jenen Iitihhi ke a *JUJU.»

25 Ke e pii ten êgi toomwo pie: «É te temehi pie e o tuie pa *Mesia na pii kon pie Kériso. Hemepie e bo tuie, ke e bo patemehi tenye ati ni naado.»

26 18E pii ten wo Iésu pie: «Woéo kuti pana é ko cihe tem.»

E piieng te ni béén ê toomwo

27 É he lu mwo ko picuhe, ke lé tuiebé ne ni acémun den. Ke lé te nihe téele ko ana e pacihe ê toomwo. Ke te tice paceli e tahimwoeng pie: «Ade aceli go tahimwoeng kon?» ai «Ade aceli geu pipii?»

men me e pineité a bwomu te lépwo Samari, koja a bwomu te lépwo Juif. †† 4.14 Ioane 6.35 ††† 4.20 Deutéronome 12.5–14; Psaume 122.1–5 ††† 4.22 2 Rois 17.29–41; Ésaie 2.3; Roma 9.4–5 ††† 4.24 Roma 12.1; 2 Korénit 3.17; Filipi 3.3 18 4.26 Maréko 14.61–62

²⁸ Ke e necu lang a mwotabe ten êgi toomwo. Ke e â ha a mwopopwaalé ten, ke e pii te ni apulie pie:
²⁹ «Geé âbé ali pa apulie na e pii tong ati ni naado na é pwo. Wieli wo pa Mesia?»
³⁰ Lé tai wie mu ha a mwopopwaalé telé, ke lé âbé céii Iésu.

A ju wiinaado ke a bwo piténede Caa

³¹ É ha a benaamwon naa, ke ni acémun den, ke lé wâgo kon, ke lé pii ten pie: «Pa apipune, go wiinaado!»
³² Ke e pii telé pie: «A wiinaado na é wii, ke time geé uce temehi.»
³³ Ke lé pitahimwolé ne ni acémun den pie: «He wo paceli e pébé céiieng ce wiinaado?»
³⁴ †Ke e pii telé wo Iésu pie: «A wiinaado tong, ke me é pwo ana nime Padué kon, pana e pahedeéo, ke me é pwo ni penem na e ne tong.
³⁵ ††«Geé mu pii pie: “O mwo paa ni wole, ke o caa a pitii âdaanu †.” Kehe é pii tewé pie: Geé eti ni naamii-wé, me geé alihi ni apwoamu †, be caa a benaamwon ko pitii âdaanu.
³⁶ «Wo pana e pitii âdaanu, ke pwo a cemen, ke e taineibuhi ni acehin ne ko a mulie na tice anebwén kon. Be lu tai pipwodéén ibu wo pana e cemi me pana e tii. ³⁷ É ko anaa, ke a juuju: “E cemi wo pa céiu, ke e tii wo pa céiu.”
³⁸ «É pahedekewé me geé â tii âdaanu he na time geé uce penem lang. Lé penem ne ni béén, ke wogewé, ke geé bo uce pitii âdaanu.»

Hiwon ni béén na lé céihi ne kon

³⁹ Hiwon ni apulie Samari mu ha a mwopopwaalé naa, na lé céihi ne ko Iésu, wonaa mu ko ana e pii wo êgi toomwo pie: «E pii tong ati ni naado na é pwo.»
⁴⁰ Lé âbé tooeng ni apulie Samari, ke lé cuwokon me e mwo mu pelelé. Ke e mu pelelé he na alo ni tan.
⁴¹ Te nihe hiwon mwo ni apulie na lé céihi mu ko a pwooti ten. ⁴² ††Ke lé pii te êgi toomwo pie: «Time uce é mu ko nina go pii teme cehi na geme céihi. Be geme caa téne temehi pie te ju weeng kuti pa apulie na e celuimi a bwohemwo!»

E pwo me wâé pa naî pa apihuô

⁴³ Alecehe lupwo tan naa, ke e engen mulang wo Iésu beme e â Galilé. ⁴⁴ ††Be e caa pii pie: «Wo pa péroféta, ke time lé uce paciitieng ne ha amu ten.»
⁴⁵ †††Ke e âbé ne Galilé, ke lé hegieng ehi nelang. Be lé alihi ati ni naado li e pwo ne Iérusaléma ha a tan ko *Pacika, be lé mu lang ha a tan naa.

† 4.34 Ioane 6.38 †† 4.35 Luka 10.2 † Pitii âdaanu; Apwoamu—Ati ni apulie na nye nelé da ha a Mwametau te Padué. †† 4.42 1 Ioane 4.14 †† 4.44 Mataio 13.57 ††† 4.45 Ioane 2.23

⁴⁶ †††E mwojuia ne mwo Kana é Galilé, he li e taatéehi nelang a tabe beme a tabe megele. E mu lang wo pace céiu apulie na piubwo nang, pa apihuô te pa daame *Érode. Ke cunu pa naîn ne ha a mwopopwaalé Kaper-naüm. ⁴⁷ †E téne pie wo Iésu ke e âbé mu Judé ke e tu-iebé Galilé. Ke e âbé beniieng ke e ileeng me e ole, ke me e pwo me wâé pa naîn, be ubwo a cunu kon. ⁴⁸ ††Ke e pii ten wo Iésu pie: «Me time geé uce alihi ni *in-enaado na pwojunuun, ke time geé o uce céihi!»
⁴⁹ Pa apihuô, ke e pii te Iésu pie: «Padaame, go ole pelong ânebuhe a bwo mele te pa naîng!»
⁵⁰ †††Ke e hegi ne ten wo Iésu pie: «Go âmwo pelem, be caa wâé pa naîm.»
 E céihi ne ko a pwooti te Iésu, ke e ân.

Caa wâé mwo pa naîn

⁵¹ É he e mwo ko â he pwaaden, ke lé âbé beniieng ne ni apenem den me lé pii ten pie: «Pa naîm, ke caa wâé nang.»
⁵² Ke e tahimwolé pie: «He ade inetéale celi wâé nang hen?» Ke lé hegi ne ten pie: «É haabwén, ko céiu inetéale ko alecehe goahen, na tieden kojaeng ali pili-jing.»
⁵³ Ke e temehi wo caa ten pie ha a inetéale naa, na e pii ten wo Iésu pie: «Pa naîm, ke caa wâé nang.» Ke lé tai céihi ne ko Iésu, weeng me a pomwa ten.
⁵⁴ ††Weengaa a béalohe inenaado na pwojunuun na e pwo wo Iésu, he e mwojuia mu Judé ne Galilé.

E pwo me wâé pa tebwomwa

5 Alecehe a tan naa, ke a *tan ko pipwodéén de ni *Juif. Ke e taa *Iérusaléma wo Iésu.
² É Iérusaléma mwonuhi a Pomwa te ni Muto, ke pwo a mwopiwon, a niin he pwo *ébéru pie Bétesda ††, na nim ni pomwa kon.³ Ke é he ni mwa naa, ke te nihe hiwon ni cunu na lé pule hen: ni bwi, nina tebwa, ke ni tebwomwa. {Be lé ucéihi a bwo penem na a tabe. ⁴ Be e opé wo pa *âcélo, beme e pwo me penem a tabe, he ni béé benaamwon. Ke wo pa bécéiuhe apulie na e ole, heme mwo ko penem a tabe, ke caa te tieden a cunu kon.}
⁵ E mu hadenii lépwo apulie naa, wo pana cunu nang he na 38 ni jo. ⁶ Ke e alieng wo Iésu he e ko pule, ke e te temehi pie caa nihe bwolihi a bwo cunu nang. Ke e pii ten pie: «Nimem me wâé go?»
⁷ Ke e hegi ne ten wo pali cunu pie: «Pa daame, te tice celi me lé neéo ole ha a tabe, ha a benaamwon na e ko pipenem a tabe. Ke me é pwo me é ole, ke e caa mi ole wo pace céiu ânebuhung.»

††† 4.46 Ioane 2.1–11 § 4.47 Mataio 8.5–6 †† 4.48 Ioane 2.18; 1 Korénit 1.22 ††† 4.50 Mataio 8.13 †† 4.54 Ioane 2.11 ††† Bétesda—ai Betzata.

⁸ †Ke e pii ten wo Iésu pie: «Go cuwoda, ke go pé a talihi tem, ke go engen!»

⁹ Ke te wâé nang kuti. Ke e pé a talihi ten, ke e engen.

Time uce wâé te lépwo apihuô

A tan naa, ke a *tan iitihî te lépwo juif. ¹⁰ ††Ke lé pii wo lépwo apihuô juif te pali cunu pie: «É jenea, ke a tan iitihî, ke iitihî me go pé a talihi tem!»

¹¹⁻¹² Ke e pii telé pie: «Wo pana e pwo me wâé jo, ke e pii tong pie: “Go pé a talihi tem, ke go engen!”»

Ke lé tahimwoeng pie: «Wooélé pa apulie na e pii anaa?»

¹³ Ke time e uce temehi pie he wooélé. Be wo Iésu, ke caa te tieeng hadenii ni apulie na élé lang.

¹⁴ Ke é alecehen, ke e too pali cunu wo Iésu ne ha a *mwaitihî, ke e pii ten pie: «Go téne, caa wâé go. Kehe go nemwo pwo ce naado celi ta, be koli e bo tooko aceli nihe ta.»

¹⁵ Ke e engen wo pali, ke e â uti te ni apihuô juif pie: «Wo Iésu na e pwo me wâé jo.» ¹⁶ É mu ko anaa, na lé hane Iésu ne ni apihuô juif, beme lé pwotahinaado ne kon, be e pwo ninaa ha a tan iitihî.

Piwie Iésu me Padué Caa

¹⁷ Ke e pii telé wo Iésu pie: «Wo Caa, ke e pwo ni naado dieli jenea. Ke woéo mwo.»

¹⁸ †É mu ko anaa, ke ni apihuô juif, ke lé hane ace bwopwonen beme lé taunueng; time uce é mu ko ana e pwo ha a tan iitihî cehi, kehe é mu ko ana e pii mwo pie wo Padué, ke pa ju Caa ten, ke e pii mwo pie, piwielu me Padué.

E hegi ne te lépwona lé tautieng

Wo Padué na e ne ten a mwomwon

¹⁹ ††E pii mwo telé wo Iésu pie: «É pii tewé a juuju pie: Wo pa Naîn, ke pwocoon me e pwo ace céiu naado mu kon. E te pwo ni naado na e alihi heme e pwo wo Caa ten. Ke tai ni naado na e pwo wo Caa ten, ke e te pwo mwo wo pa Naîn. ²⁰ Be eânime Caa te pa Naîn, ke e habwii ten ati nina e pwo, ke e o habwii ten ni naado na te nihe ubwo koja ninaa, beme geé téele kon. ²¹ Be mepwo wo Caa, ke e pwo me lé mulie cemwo ni amele, ke e ne a mulip. Piwien mwo ne ko pa Naîn, be e ne a mulip ne te lépwona e pipégallilé.

²² ††Time e uce tauti apulie wo Caa, kehe e ne a pitautinaado ne te pa Naîn, ²³ †††beme lé tai pipaunueng, pwohewii a bwo pipaunu Caa. Wo paceli time e

uce pipaunu pa *Naî Padué, ke time e uce pipaunu Caa na e pahedeeng bé.

²⁴ †††«É pii tewé a juuju pie: Wo paceli e ténedehi a pwooti tong, ke e céihi ne ko pana e pahedeéo bé, ke o eten a mulie na tice anebwén kon. Ke o caa time uce pwocuhinaado ten, be e caa engen koja a mele me e â ha a mulie.»

Lé o piténedééo wo lépwo amele

²⁵ «É pii tewé a juuju pie: E bo tuie a céiu tan, ke caa e éni, ke ni amele, ke lé téne a pwocihe te pa Naî Padué. Ke nina lé ténedehi, ke lé o mulie. ²⁶ Be wo Caa, ke eten a mulie, ke pa Naîn, ke te eten mwo a mulie. Te wo Caa ten na e ne ten anaa.»

²⁷ «E ne ten mwo a pihuô beme e tautinaado, mu ko ana weeng pa Nahi Apulie. ²⁸ Geé nemwo téetihî, be o tuie a benaamwon na tai nina lé caa mele, ke lé o téne a patin, ke lé o mulie cemwo. ²⁹ †Nina lé pwo ni penem na wâé, ke lé o mulie cemwo ne ko a mulie. Kehe nina lé pwo nina ta, ke lé o mulie cemwo ne ko a pwocuhinaado.»

Lépwo apajuuju pa Nahi Apulie

³⁰ ††[E pii telé mwo wo Iésu pie]: «Pwocoon me é pwo ace naado mu kong. É tauti mu ko ana e pii wo Padué. Ke a juuju a tautinaado tong, be time é uce hane ana nimung kon, kehe ana nime pana e neéo bé kon.

³¹ «Hemepie te woéo na é piutiéio, ke o te ju pitice-naado ne ko nina é pii. ³² Te pwo pa céiu na e pajuujuéo †††, ke é te temehi pie ana e pii ne kong, ke a juuju.»

Ioane pa apipuu apulie

³³ «Geé pahede ni apulie nge céii Ioane, ke a jepule na e piuti tewé ne kong, ke a juuju.

³⁴ «É ne kong, ke time uce a junaado ne tong me e pajuujuéo wo pace apulie. Kehe é pii anaa beme celuimikewé. ³⁵ Wo Ioane, ke e pwohewii a mwomiû na nye patéi, ke e pwéélang. Ke nimewé me geé pipwodéén ha a cuwo benaamwon naa, ne ko a pwéélang kon.»

A penem de Iésu

³⁶ †††«Pwo ni bépajuujuéo na junihe ubwo koja Ioane: ni penem na e ne tong wo Caa beme é pacuwohi. Be lé habwii pie wo Caa na e neéo bé.»

† 5.8 Mataio 9.6 †† 5.10 Néhémi 13.19; Jérémie 17.21 † 5.18 Mataio 26.4; Ioane 7.1, 10.30 †† 5.19 Ioane 5.30 †† 5.22 Ioane 5.27; Apostolo 10.42 ††† 5.23 Filipi 2.10–11; 1 Ioane 2.23

††† 5.24 Ioane 3.15–18 § 5.29 Daniel 12.2; Mataio 16.27; Apostolo 24.15 †† 5.30 Ioane 5.19, 6.38 ††† E pajuujuéo—Il rend témoignage de moi. Omehi mwo Pajuujuhi ne ha a Niinaado (Vocabulaire) ha anebwén ko a tii. †† 5.36 Ioane 3.2, 14.11

Padué Caa

³⁷ †«E pajuujuéo wo Caa, be weeng na é pahedeéo bé. Time geé mu uce téne a patin, ke time geé mu uce alihi a pwahamiin. ³⁸ Ke time uce e kowé a pwooti ten, be time geé uce céihi ne ko pana e neeng bé.»

Ni tii iitih

³⁹ ††«Geé hane bwoluhi ne he ni tii iitih, be geé niimihi pie geé o tooli ne hen a mulie na tice anebwén kon. Kehe woélé na lé cihe kong! ⁴⁰ Ke time uce nimewé me geé âbé céiiéo beme etewé *a ju mulip.

⁴¹ «Time é uce hane me lé pipaunuéo ne ni apulie. ⁴² Be é te temehi pie time uce e kowé a pwonime ko Padué. ⁴³ É âbé ne he nii Caa tong, ke time geé uce hegiéo. Hemepie e âbé wo pace céiu celi e te piâbé mu kon, ke geé o hegieng. ⁴⁴ Woté ace bwo céihi tewé, wogewé na geé hegi *a wâé mu ko ni bééwé? Ke time uce nimewé me geé hane a wâé na e âbé mu ko Padué na te céiu nang. ⁴⁵ Geé nemwo niimihi pie é o pipé ne kowé † ne he pwahamii Caa; kehe wo *Moosé pana e o pipé ne kowé, be geé ne kon a céihi tewé!

⁴⁶ ††«Be mepie geé céihi ne ko Moosé, ke weli geé o te céihi ne mwo kong, be e caa cihe kong ne he ni tii ten. ⁴⁷ Ke hemepie time geé uce céihi ne ko nina e tii, ke o woté ace bwo céihi tewé ne ko ni pwooti tong?»

Lé wiinaado ne ni apulie na 5000 jélé

Mataio 14.13–21; Maréko 6.30–44; Luka 9.10–17

6 É alecehen, ke e engen wo Iésu, ke e hagéi a céiu duaa *jié Galilé, na te pii kon mwo pie a jé Tibériade. ² Ke lé âcén ne ni apulie na hiwon jélé, be lé alihi ni *inenaado na pwojunuun, he e pwo me wâé ni cunu. ³ Ke e taa pwo juwole, ke e tebwo me ni acémun den. ⁴ Te ju piânebuhe a *Pacika, a *pipwodéén de lépwo *Juif. ⁵ Ke me e eti ni naamiin wo Iésu, ke e ali ni apulie na hiwon jélé na lé âbé céiieng. Ke e pii te Filip pie: «He genye bo pwocuhin mu wé ce pwoloa, beme lé wiinaado ne ni apulie ce?»

⁶ E pii anaa, beme e téne aceli me e o pii wo Filip, kehe e caa te temehi ana me e bo pwo.

⁷ Ke e hegi ne ten wo Filip pie: «Hemepie genye pwocuhi ce pwoloa ko ni *million*††, ke time uce jan me nye ne telé ce cuwo nahi mepwoloa!»

⁸ Ke [e â céii Iésu] wo pa céiu acémun na pii kon pie André, pa âjiéne Simon Pétéru, ke e pii ten pie: ⁹ «E éni pa cuwo nahi ewa aiu, na nim ni pwoloa ††† ten, ke alo lupwo ikua. Kona he o te jan ne ko ni apulie na nihe hiwon jélé? Ūhu!»

† 5.37 Mataio 3.17; Ioane 5.32, 8.18 †† 5.39 Luka 24.27 ‡ Pipé ne ko—Accuser. †† 5.46 Apostolo 3.22 ††† Ni million—Grek: 200 mwani péi (deniers). A cuhi pa apulie he na 8 ni wole.

††† Pwoloa—Grek: Pwoloa na pwo ko orge. (Orge, ke pwohewii a ace wotéléa.)

E pwo me lé wiinaado

¹⁰ E pii wo Iésu pie: «Pwo me lé tebwo ati ne ni apulie.»

Ha a duaan naa, ke hiwon ni meté, ke lé tebwo ni apulie. Ke âmwonuhi a 5000 ni apulie aiu. ¹¹ Ke e pé li pwoloa wo Iésu, ke e olééhi ne te Padué. Ke e patih ne ko ni apulie na élé lang. Ke e patih mwo li ikua ne telé. Ke lé wiinaado dieli â pwoluu jélé.

¹² Caa pwoluu jélé, ke e pii te ni acémun den pie: «Geé tai ni nehi wiinaado, beme te tice celi genye patieden.»

¹³ Lé tai ni nehi li pwoloa li nim, ke lé paobaanihi ni élele na 12, alecehe a bwo wiinaado telé.

¹⁴ Ke ni apulie, ke lé alihi a inenaado na pwojunuun na e pwo wo Iésu, ke lé pii pie: «Pa apulie ce, ke te pa ju Péroféta na me e âbé ne pwo bwohemwo!»

¹⁵ †††Ke e temehi wo Iésu pie lé o âbé pééeng beme lé etieng me pa daame helé. Ke e piâ ité kojale, ke e â taa pwo juwole, he te piweeng cehi.

E engen pwo bwotabe wo Iésu

Mataio 14.22–33; Maréko 6.45–52

¹⁶ He caa babwén, ke lé ole ko a bajié wo lépwo *acémun de Iésu. ¹⁷ Caa bwén, kehe time e uce téele â toolé. Ke lé taa pwo ong, beme lé â Kapernaüm. ¹⁸ Ke e te nihe tahieng a dan, ke ubwo ni pihijé. ¹⁹ Ke lé caa kaatihi a ong he na nim *kilomètre*. Ke lé ali Iésu he e engen pwo bwotabe, ke e âbé mwonuhi a ong. Ke te junihe mwotilé.

²⁰ Ke e pii telé wo Iésu pie: «Geé nemwo pwo me mwotikewé! Be *Woéol!»

²¹ Ke nimelé me lé pééeng pwo ong, kehe lé caa tuie nge he na me lé â lang.

A pwoloa na e ne a mulip

²²⁻²⁴ É ha acaama hen, ke lé mwo te mu ko a céiu goon ne li apulie li lé eni ali pwoloa †. Ke lé alihi pie te tie Iésu. Ke lé te temehi pie time e uce taa pwo ong, be lé caa te piengen cehi ni acémun den. Ke te céiu a ong na e engen.

[É he lé mwo ko haneeng] ke lé tuie ne ni ong bé mu ha a pwomwo ubwo Tibériade. Ke lé taa pwo li ong ne ni apulie, ke lé â Kapernaüm, me lé â haneeng lang.

Hane a pwoloa na e mu dieli mwo

²⁵ Ke lé too Iésu ne ko a céiu goon. Ke lé pii ten pie: «Pa apipune, he éniile celi go âbé éni?»

²⁶ Ke e pii telé wo Iésu pie: «É pii tewé a juuju pie: Geé haneéo, time uce é mu ko a bwo alihi nen dewé ni inenaado na pwojunuun na é pwo, kehe é mu ko ana

††† 6.15 Ioane 18.36 † Li lé eni ali pwoloa—Grek: Li lé eni ali pwoloa, alecehe a bwo pwo-olé te Padaame.

geé eni ni pwoloa, ke pwoluu gewé. ²⁷ †Geé nemwo penem ne ko a wiinaado na o tieden, kehe geé penem ne ko a wiinaado na e o mu, na e ne a mulip ne pele Padué dieli mwo. A wiinaado naa, ke wo pa Nahi Apulie na e bo ne tewé. Be wo Padué Caa na e ne a pi-huô te pa Naîn.»

²⁸ Ke lé pii ten pie: «He ade aceli me geme pwo, be-me geme pwo ni penem de Padué?»

²⁹ ††Ke e pii telé wo Iésu pie: «A penem de Padué, ke me geé céihi ne ko pana e neeng bé.»

A ju pwoloa mu he miiden

³⁰ †Ke lé pii ten mwo pie: «Ade ace inenaado celi go pwo me geme alihi, ke me geme céihi ne ko nina go pii? Go pwo de? ³¹ ††Lé eni a pwoloa ne ha a melé † ne ni watihenye, pwohewii ana caa tii ne he ni tii iitih pie: *E ne telé a pwoloa mu he miiden me lé eni.*»

Psaume 78.24

³² Ke e hegi ne telé wo Iésu pie: «É pii tewé a juuju pie: Time uce wo *Moosé na e ne tewé a pwoloa na e âbé mu he miiden. Kehe wo Caa tong. Ke é jena na ni, ke e ne tewé a ju pwoloa mu he miiden. ³³ Éa, a pwoloa te Padué, ke wo pana e opé mu he miiden, ke e ne a mulie ne pwo bwohemwo.»

³⁴ Ke lé pii ten pie: «Pa apipune, go te cuwo ko ne teme a pwoloa naa!»

Woéo ke pa pwoloa

³⁵ ††Ke e hegi ne telé wo Iésu pie: «Woéo, ke pa pwoloa na é ne a mulip. Wo paceli e âbé céiiéo, ke time o uce menen, ke wo paceli e céihi ne kong, ke time o uce nimen me e ûdu. ³⁶ É caa mi pii tewé pie: Geé aliéo, kehe time geé uce céihi ne kong. ³⁷ Ati ni apulie na e ne tong wo Caa, ke lé âbé céiiéo. Ke time é o uce ne pwomwo paceli e âbé céiiéo.

³⁸ «Ke time é uce opé mu he miiden me é pwo ana nimung kon, kehe me é pwo ana nime Padué, na e neéo opé. ³⁹ †††Neko ana nime Padué kon, ke me time é uce patieden paceli te ju céiu nang, mu ko ni apulie na e ne tong; kehe me é pwo me lé mulie cemwo ha a Tan Alece §. ⁴⁰ Ana nime Caa tong kon: Ke wo paceli e ali pa Naîn, ke me céihi ne kon, ke o ne ten a mulie na tice anebwén kon. Ke é bo pwo me e mulie cemwo ha a Tan Alece.»

† 6.27 Ioane 6.48–58 †† 6.29 1 Ioane 3.23 † 6.30 Mataio 16.1; Ioane 2.18 †† 6.31 Exode 16.14–15; Nombres 11.7–9; Psaume 78.24 †† Pwoloa ne ha a melé—A wiinaado na pwohewii ni cuwo nahi pide memepo, na e ne wo Padué te lépwo Juif ne ha a melé (da). ††† 6.35 Ioane 4.14 ††† 6.39 Ioane 10.28–29, 17.12 § Tan Alece—A tan na e bo mwojuia cemwo wo Iésu Kériso. Omehi a Zenote

Time uce wâé te lépwo apihuô juif

⁴¹ Lé pipii Iésu wo lépwo Juif, mu ko ana e pii pie: «Woéo, ke pa pwoloa na é opé mu he miiden.» ⁴² ††Ke lé pipii mwo pie: «He time uce wo Iésu pali naî Josef, li genye te temehi lu nyaa me caa ten? É mu ko ade na e pii pie: “É opé mu he miiden?”»

⁴³ Ke e pii telé wo Iésu pie: «Geé nemwo tee pipii apulie! ⁴⁴ †††Te tice paceli e âbé céiiéo, heme time uce neeng bé wo Caa, pana e neéo bé. Ke me é bo pwo me e mulie cemwo ha a Tan Alece. ⁴⁵ ††Neko ana e tii wo pa céiu péroféta: *Lé o te tai picaa mu ko Padué.*

Ésaïe 54.13

É mu ko anaa, na wo paceli e téne Caa, ke e hegi ni pune ten, ke e o âbé céiiéo. ⁴⁶ †††Te tice paceli e ali Caa, te icehi pana e âbé mu ko Padué.»

Wo pana e céihi ke eten a mulie

⁴⁷ †††É pii tewé a juuju pie: Wo paceli e céihi [ne kong] ke o eten a mulie na tice anebwén kon. ⁴⁸ ††A pwoloa na e ne a mulie, ke woéo. ⁴⁹ Lé eni a *manne* ne ha a melé ne ni caa tewé, ke lé tai mele. ⁵⁰ Weengi a pwoloa na e opé mu he miiden. Wo paceli e o eni, ke time e o uce mele. ⁵¹ Woéo, ke pa pwoloa ko a mulip, na é opé mu he miiden. Mepie pwo paceli e eni mu ko a pwoloa naa, ke e o *mulie dieli mwo. A pwoloa na é ne ten, ke a ééng, na é bo ne, me a mulie ne pwo bwohemwo.»

A ééng ke te a ju wiinaado

⁵² É mu ko ana e pii wo Iésu, ke lé pidaataa kon ne ni Juif, ke lé pii pie: «E o woté ko ace bwopwonen me e ne tenye a één beme a wiinaado?»

⁵³ Ke e pii telé wo Iésu pie: «É pii tewé a juuju pie: Mepie time geé uce wii a éé pa Nahi Apulie, ke me time geé uce ûdu a cewéhen, ke o time uce e kowé a mulie. ⁵⁴ Wo paceli e wii a ééng, ke e ûdu a cewéhung, ke eten a mulie na tice anebwén kon. Ke é bo pwo me e mulie cemwo ha a Tan Alece. ⁵⁵ Be a ééng, ke te a ju wiinaado; ke a cewéhung, ke te a ju tabe. ⁵⁶ Wo paceli e wii a ééng ke e ûdu a cewéhung, ke e o mu kong, ke é o mu kon.

⁵⁷ †††«E mulie wo Caa na e neéo bé. Ke woéo, ke é mulie ko Caa. Ke wo paceli e wii a ééng, ke e o mulie mu kong. ⁵⁸ Weengi a pwoloa na e opé mu he miiden. Time uce pwohewii ni watihewé na lé eni a *manne*, ke lé tai mele. Be wo paceli e eni a pwoloa ce, ke e o mulie dieli mwo.»

⁵⁹ E pii telé ninaa wo Iésu ne ha a *mwotapitih te ni Juif ne Kapernaüm.

† 6.42 Mataio 13.55 †† 6.44 Ioane 6.65 † 6.45 Ésaïe 54.13 ††† 6.46 Ioane 1.18 †† 6.47 Ioane 3.15–16 † 6.48 Ioane 6.32,58 †† 6.57 1 Ioane 3.24

Lé ece Iésu ni béé acémun den

⁶⁰ Ke me lé téne ana e pii wo Iésu, ke hiwon ni acémun den na lé pii pie: «Te nihe binyi ni pwooti ten. He woo paceli me e tee tabemieng?»

⁶¹ Kehe e te temehi pie lé pipiieng ko nina e pii, ke e tahimwolé pie: «Woté? Ni pwooti naa, ke te nihe téé ne tewé? ⁶² Ke mepie geé ali pa Nahi Apulie heme e taamwo he na e mu lang ânebun, ke geé bo pii pie woté?

⁶³ A *Jenen Iitihî, ke e ne a mulie. Kehe wo pa apulie, ke te tice aceli jan me e pwo. Ni pwooti na é pii tewé, ke e âbé mu ko a Jenen Iitihî, ke e ne a mulip. ⁶⁴ †Pwo ni béén mu hadeniwé na time lé uce céihi.»

Be e te temehilé wo Iésu ha atabuhî kon. Ke e te temehi mwo pana e bo icueng.

⁶⁵ ††Ke e pii ne mwo pwon pie: «É mu ko anaa, na é pii tewé pie: Te tice paceli e o âbé céiié, hemepie time e uce neeng bé wo Caa.»

⁶⁶ Ke é ha a benaamwon naa, ke hiwon ni acémun den na lé engen kojaeng.

Lé te cumang wo lépwo apostolo

⁶⁷ Ke e pii wo Iésu te lépwo 12 *apostolo † ten pie: «Ke wogewé, ke time uce nimewé mwo me geé âcéilé?»

⁶⁸ ††Ke e hegi ne ten wo Pétéru pie: «Padaame, he me geme â céii-i? Be te e pelem [cehi] ni pwooti ko a mulie na tice anebwén kon. ⁶⁹ Ke geme caa céihi, ke geme caa temehi pie wogo ke wo Kériso, pa *Naî Padué.»

⁷⁰ Ke e hegi ne telé wo Iésu pie: «Woé na é pipéga-likewé, wogewé ni 12. Ke pwo pa duéé hadeniwé!»

⁷¹ E cihe ko Judas Iscariot, pa naî Simon, pa béé lépwo 12 apostolo. Be weeng pana e o bo icueng.

E taa Iérusaléma ne ko a pipwodéén

7 ††Alecehe anaa, ke e engen ati ha amu Galilé wo Iésu, be time uce nimen me e â *Judé, be lé hane me lé taunueng ne ni apihuô juif.

² †††Ke caa e mwonu a *tan ko pipwodéén de ni *Juif ko Mwa mwaanu †††. ³ Ke lé pii te Iésu ne ni âjiéne pie: «Go engen mu éni, ke go â Judé, beme lé alihi ne ni apulie tem ni naado na go pwo. ⁴ Te tice paceli e penem ha aduwo, heme nimen me lé temehieng. Go pwo ni naado na ubwo, ke go pihabwiiko ne te ni apulie!»

⁵ †Be ni âjiéne mwo, ke time lé uce ju téele céihi ne kon.

Time uce téele a benaamwon dong

⁶ Ke e pii telé wo Iésu pie: «Time e uce téele tuie a benaamwon dong. Kehe wogewé, ke te é ati he ni benaamwon. ⁷ Te tice watihen me lé téétikewé ne ni apulie, kehe woé, ke lé téétié, be é te cuwo ko pii beetihî ni naado na ta na lé pwo. ⁸ Geé taa wogewé, ne ko a *pipwodéén naa. Kehe woé, ke time é o uce téele taa, be time e uce téele tuie a benaamwon dong.»

⁹ Ke me e pii telé anaa, ke e mwo te mu Galilé.

¹⁰ Kehe icehi ana me lé caa taa wo lépwo âjiéne ne ko a pipwodéén, ke e bwo te pitaa céilé wo Iésu, kehe icehi ana time e uce pihabwieng.

Lé haneeng ni apihuô juif

¹¹ Ni apihuô juif, ke lé haneeng ha a benaamwon ko a pipwodéén, ke lé tahimwohi pie: «He e wé naa?»

¹² Lé te nihe picihe kon ne ni apulie. Ke lé pii ne ni béén pie: «Pa apulie na wâé nang.» Ke ni béén, ke lé pii pie: «Ûhu! E pwo me lé pipatieden ne ni apulie.» ¹³ Ke te tice paceli e cihe pwaatihî ne kon, be mwotilé ko lépwo apihuô juif.

E pihabwieng ke e pipune

¹⁴ Ha awieme a pipwodéén, ke e taa ha a *mwaiitihî wo Iésu. Ke e pacémunilé.

¹⁵ †Lé te nihe téele ne ni apihuô juif, ke lé pii pie: «He e woté ace bwo temehi nen den ni patén, he time e uce cémun?»

E pahedeé wo Padué

¹⁶ ††Ke e hegi ne telé wo Iésu pie: «Ni pune, ke time uce é mu kong, kehe é mu ko pana e neé bé.

¹⁷ Hemepie nime pace apulie me e pwo nina nime Padué kon, ke e o te temehi pie ni pune naa, ke e âbé mu ko Padué, ai e âbé mu kong. ¹⁸ ††Wo pana e te picihe mu kon, ke e hane me lé pipaunueng. Ke wo pana e hane me lé pipaunu pana e neeng bé, ke e mwomwon, ke te tice gele kon.»

Wâé heme geé tauti ne ha a mwomwon

¹⁹ †††«Kona time e uce ne tewé ni patén wo *Moosé? Ke te tice paceli e âcehi ni patén mu kowé. Ade ace watihen me nimewé me geé taunué?»

²⁰ ††Ke lé hegi ne ten pie: «E kom a iténaado! He woo paceli e hane me e taunuko?»

²¹ Ke e hegi ne telé wo Iésu pie: «É pwo a penem na te ju céiu [ha a *tan iitihî] ke geé tai téetihî. ²² ††Ke wogewé mwo, [ke geé te penem mwo] ha a tan iitihî,

† 6.64 Ioane 13.11 †† 6.65 Ioane 6.44 † Omehi Mataio 10. †† 6.68–69 Mataio 16.16 †† 7.1 Ioane 5.18 ††† 7.2 Lévitique 23.34 ††† Tan ko...Mwa mwaanu—Fête des huttes. Omehi mwo a Tan ubwo ne ha a Niinaado (Vocabulaire) ha anebwén ko a tii. § 7.5 Apostolo 1.14

§† 7.15 Mataio 13.54; Luka 2.47 §†† 7.16 Ioane 12.49, 14.10 §† 7.18 Ioane 8.50 §†† 7.19 Apostolo 7.53; Roma 2.21–24 §† 7.20 Ioane 8.48, 10.20 §† 7.22 Genèse 17.9–13; Lévitique 12.3

be geé *pwotegoop te pa ewa aiu, âcehi ni *patén de Moosé. Kehe time e uce âbé mu ko Moosé na a te-goop, be e te âbé mu ko ni watihenye ânebuhen. ²³ †É ha a tan iitih, ke geé pwotegoop te pa ewa aiu, beme time geé uce caada ni patén. Woéo, ke é ha a tan iitih, ke é pwo me wâé pa apulie. Ke geé okéé ne kong kona woté? ²⁴ Geé nemwo tauti ni naado ne ha a bwo alihi nen. Kehe geé tauti ne ha a mwomwon.»

Wieli pa Mesia wo Iésu?

²⁵ Lé pii ne ni béé apulie mu *Iéruusaléma pie: «He time uce wo pali lé hane me lé taunueng? ²⁶ Geé alihi! Be e cihe ânebuhe ni apulie! Te tice paceli e cihe ten. Wieli ni apihuô tenye, ke lé caa temehi pie weeng pa *Mesia? ²⁷ ††Kehe wo pa apulie ce, ke genye te temehi he na e âbé mulang. Kehe wo Kériso, ke mepie e tuie, ke te tice paceli e temehi he celi e âbé mulang †.»

²⁸ ††É ha a benaamwon naa, he e mwo ko pipune ne *huâ iitih wo Iésu, ke e cihe me ubwo, ke e pii telé pie: «Geé te temehié. Ke geé te temehi he na é âbé mulang. Time é uce piâbé mu kong, kehe a juuju [a pwooti te] pana e neéo bé. Ke time geé uce teme-hieng. ²⁹ Woéo, ke é te temehieng, be é âbé mu kon, ke weeng na e neéo bé.»

³⁰ ††Lé hane beme lé imwieng, kehe te tice bwopwonen, be time e uce téele tuie a benaamwon den.

³¹ Hiwon ni apulie na lé céihi ne kon, ke lé pii pie: «Hemepie e tuie wo pa Mesia, ke he o te hiwon ce inenaado celi pwojunuun celi e pwo koja pa apulie ce?»

Lé hane ace bwopwonen me lé imwi Iésu

³² Ni *Farasaio, ke lé téne ni apulie he lé ko pii éwaan kon. Ke lé piténelé me ni caa te lépwo *apwoâpwailo, beme lé pahede ni awéihi mwaiitih me lé imwieng.

³³ Ke e pii telé wo Iésu pie: «É o mwo mu pelewé ha a benaamwon ce, ke é alecehen, ke é o caa âmwotoo pana e neéo bé. ³⁴ †††Geé bo haneéo, ke time geé o uce tooéo, be pwocoon me geé â he na é â lang.»

³⁵ Ke lé pitahimwolé ne ni Juif pie: «He e o â wé? Ha ace céiu duaan celi me time genye o uce tooeng hen? Pele ni Juif na lé mulie hadenii lépwona time uce lépwo Juif? He e o picaalé? ³⁶ E pii tenye pie: “Geé bo haneéo, ke time geé o uce tooéo, be pwocoon me geé â he na é â lang.” Ke he a bwopiinen pie woté ni pwooti naa?»

É ne tewé a tabe ko a mulip

³⁷ †††Caa tuie a bénebwéne tan ko a pipwodéén, a tan na nihe pipwonaado ne kon. Ke e cuwoda wo Iésu, ke

† 7.23 Ioane 5.8–10, 16 †† 7.27 Ioane 7.41, 9.29 † Lé pipweéo wo lépwo apulie naa, be li e pii beetih wo Miché pa péroféta pie, wo pa Mesia, ke e bo âbé mu Bétéléma. Omehi a niide a tii 42, me Miché 5.1 me Mataio 2.6. †† 7.28 Mataio 11.27; Ioane 8.55 †† 7.30 Ioane 7.44 ††† 7.34 Ioane 8.21, 13.36 ††† 7.37 Lévitique 23.36; Ésaie 55.1; Ioane 4.14

e toii pie: «Mepie pwo paceli nimen me e ûdu, ke jan me e âbé céiiéo, ke me e ûdu. ³⁸ †Ke wo paceli e céihi ne kong, ke o bo tété he pwonimen a éémwa. Ke a tabe naa, ke e ne a mulip. Genye pine anaa ne he ni tii iitih.»

³⁹ ††E pii anaa ne ko a *Jenen Iitih, na me lé bo hegi ne nina lé céihi ne kon. É ha a benaamwon naa, ke mwo time e uce téele âbé na a Jenen Iitih, be mwo time e uce téele hegi *a wâé ten wo Iésu.

Time lé uce piténelé ne ni apulie mu ko Iésu

⁴⁰ †††É he lé téne ni pwooti te Iésu, ke lé pii ne ni béén pie: «A juuju pie te weeng kuti pa Péroféta!»

⁴¹ ††Ke lé pii mwo ne ni béén pie: «Weeng pali Mesia!» Kehe pwo ni béén na lé pii pie: «He te é mu Galilé he celi me e âbé mulang wo pa Mesia? Úhu! ⁴² †††Be nye pine ne he ni tii iitih pie, wo pali Mesia, ke e wie mu ko a pwomwoiu te *Davita. Ke e o âbé mu Bétéléma, a mwopopwaaalé te Davita †.»

⁴³ É mu ko Iésu, ke time lé uce piténelé ne ni apulie. ⁴⁴ Ke nime ni béén me lé imwieng, kehe te tice bwopwonen.

Time lé uce céihi wo lépwo apihuô

⁴⁵ É he lé âmwobé ne ni awéihi mwaiitih, ke lé tahimwolé wo lépwo caa te ni apwoâpwailo me ni Farasaio pie: «He time geé uce pébé Iésu be woté?»

⁴⁶ ††Ke lé hegi ne ni awéihi mwaiitih pie: «Te tice pace apulie celi e cihe pwohewii pa apulie ce!»

⁴⁷ Ke lé pii telé ne ni Farasaio pie: «Wogewé mwo, ke e te pahaulikewé mwo! ⁴⁸ †††Be te tice pace apihuô, ke te tice pace Farasaio celi e céihi ne kon! ⁴⁹ Kehe ni apulie ce [ke te tice aceli lé temehi]! Ke lé ko céihi ne kon, be time lé uce temehi ni patén de Moosé. Ke e nelé nge ité wo Padué!»

⁵⁰ †††Kehe icehi ana e cuwoda wo Nikodème, pali e âbé too Iésu [he bwén]. Ke e pii te ni Farasaio béén pie: ⁵¹ «Ne he ni patén denye, ke pwocoon me nye pwo me e pwocuhinaado wo paceli time nye uce téele téne ke temehi aceli e pwo.»

⁵² †††Ke lé hegi ne ten wo lépwo béén pie: «He wogo mwo, ke pa aâbé mu Galilé? Pine ehi ni tii iitih, ke go bo temehi pie, te tice péroféta celi lé âbé mu Galilé!»

{ ⁵³ É nelang, ke lé pétaapwo âmwotoo he ni pomwa telé. }

§ 7.38 Ésaie 58.11 † 7.39 Ioane 16.7, 20.22; Apostolo 2.4 †† 7.40 Ioane 6.14 †† 7.41 Ioane 1.46 ††† 7.42 2 Samuel 7.12; Psaume 89.4–5; Miché 5.1–2 † Time e uce temehi pie, wo Iésu, ke e pituie ne Bétéléma. †† 7.46 Maréko 1.22 ††† 7.48 Ioane 12.42 ††† 7.50 Ioane 3.1–2 ††† 7.52 Ioane 7.41–42

Ê toomwo na e bune aiu

8 *E engen wo Iésu, ke e taa pwo a juwole ko ni Olivier.² É ha acaama hen, he mwo te ju acaama, ke e mwojuia ngemwo ha a *mwaiitih. Ke lé âbé ne kon ne ni apulie na hiwon jélé. Ke e tebwo[†]wo Iésu, ke e punelé.³ Ke lé âbé céiieng ni *dotéen ko patén me ni *Farasaio, ke lé pébé céiieng ê toomwo na lé tooeng he lu pibune me pa aiu na time uce pa aiu hen. Ke lé pwo me e cuwo ânebuhelé ati.⁴ Ke lé pii ten pie: «Pa apipune, geme mwo te ju tétédo ê toomwo ce, he e ko bune aiu.⁵ ††Ne he ni *patén de Moosé, ke e pii pie me taunuhi ko péi ni toomwo na lé pwo anaa[‡]. Ke kona wogo, ke ade aceli go pii ne kon?»*

⁶ Lé pii ten anaa beme lé tacebwénieng, be pwo aceli me lé pipé ne kon kon. Kehe e cieng wo Iésu, ke e pwotii ko a mwodéin, neole pwo bwohemwo.

Woo paceli tice ta pwo ten?

⁷ ††Ke lé teko cuwo ko tahimwoeng. Ke e etieng wo Iésu, ke e pii telé pie: «Wo pace bééwé celi mwo te tice ta pwo ten, ke me e tabuhi tahi kon ace bécéiuhu péi.»

⁸ Ke e te cieng mwo wo Iésu, ke e te pwotii ne mwo pwo bwohemwo.⁹ Ke me lé téne ni pwooti naa, ke lé engen he picéiuhu, tabuhi mu ko pana piukéiu nang. Ke lu te pimu cehi wo Iésu me êgi toomwo, he e mwo teko cuwo ânebuhén.

¹⁰ Ke e etieng wo Iésu, ke e pii ten pie: «He élé wé wo lépwoli lé tautiko? Te tice paceli e pwocuhinaado tem?»

¹¹ ††Ke e hegi ne ten wo êgi toomwo pie: «Pa apipune, caa tielé.» Ke e pii ten wo Iésu pie: «Woéo mwo, ke time é uce pwocuhinaado tem. Kehe go engen, ke tabuhi ni, ke time go bo uce pwo mwo ce naado celi ta.»

E pwéélang ne pwo a bwohemwo

¹² †††E pii mwo telé wo Iésu pie: «Woéo, ke é pwéélang pwo a bwohemwo. Wo paceli e âbé céing, ke time e bo uce engemwo ha a melepiing, kehe o eten a pwéélang ko a mulip.»

¹³ Ke lé pii ten ne ni Farasaio pie: «Go te pipajuujuko ††, be ana go pii, ke time uce pwonaado ne kon!»

¹⁴ †Ke e hegi ne telé wo Iésu pie: «Éa, é te pipajuujuéo, kehe nina é pii ne kong, ke te ni juuju. É te teme-hi he na é âbé mulang, ke é te temehi he na me é â

† Ke e tebwo—Pele lépwo Juif, ke lé tebwo wo lépwo apipune ke lé pacémuni ni apulie. †† 8.5 Lévitique 20.10; Deutéronome 22.22–24 † Ni toomwo... É ne he ni patén de Moosé (Lévitique 20.10; Deutéronome 22.22), ê toomwo me pa aiu, ke tai woilu, ke lu tai pwocuhinaado. †† 8.7 Deutéronome 17.7 †† 8.11 Ioane 5.14 ††† 8.12 Ésaie 49.6; Ioane 1.4–9, 9.5, 12.46 ††† Go te pipajuujuko—Tu rends témoignage de toi-même. Omehi mwo Pajuujuhi ne ha a Niinaado (Vocabulaire) ha anebwén ko a tii. † 8.14 Ioane 5.31–32, 7.28

lang. Kehe wogewé, ke time geé uce temehi he na é âbé mulang, ai é he celi é â lang. ¹⁵ ††Geé tauti pwohewii a bwohemwo. Kehe woéo, ke time é uce tau-ti pace apulie. ¹⁶ †††Heme é tauti, ke é tauti ne ha a mwomwon, be time uce woéo cehi na é tauti; kehe te tai wogemu me Caa, na e neéo bé. ¹⁷ ††Ne he ni patén dewé, ke genye pine pie: “Mepie lu pii aceli céiu wo lupwoce apulie, ke genye céihi ne ko ana lu pii.” ¹⁸ †††É te pipajuujuéo, ke e te pajuujuéo mwo wo Caa na e neéo bé.»

¹⁹ Lé tahimwoeng ne ni Farasaio pie: «He e wé wo caa tem?»

Ke e hegi ne telé wo Iésu pie: «Time geé uce teme-hié, ke time geé uce temehi mwo pa Caa tong. Hemepie geé temehié, ke me geé o te temehi mwo pa Caa tong.»

²⁰ ††Ke e pii telé ni pwooti naa wo Iésu, ha a benaam-won na e pacémunilé ne ha a mwaiitih, é he na e lang ni âpipati ni mwani. Te tice paceli me e imwieng, be mwo time uce téele a benaamwon den.

E patemehi a bwo engen den @ ne pele Caa

²¹ ††E pii telé mwo wo Iésu pie: «É o engen, ke geé bo haneéo, kehe geé bo mele ne he ni ta pwo tewé. Be o pwocoon me geé â he na me é â lang.»

²² Ke lé pii ne ni *Juif pie: «He e o â pitaunueng? Be e ko pii pie: “Time geé uce â he na me é â lang.”»

²³ †††Ke e pii telé wo Iésu pie: «Wogewé, ke geé âbé mu pwo bwohemwo, kehe woéo, ke é opé mu he mi-iden. Ke wogewé, ke lépwo apulie pwo bwohemwo, kehe woéo, ke time uce pa apulie éni pwo bwohemwo. ²⁴ É mu ko anaa, ke é pii tewé pie, geé bo mele ne he ni ta pwo tewé. Éa, geé o bo mele ne he ni ta pwo tewé, hemepie time geé uce céihi pie, ‘*WOÉO [ânebun, ke é jena, ke é dieli mwo].’»

²⁵ Ke lé tahimwoeng pie: «Wogo, ke he woo?»

Ke e hegi ne telé wo Iésu pie: «É caa te cuwo ko pii tewé mu ha atabuhi kon †††. ²⁶ Hiwon ni naado na me é pii ne kowé, ke me é tauti ne kowé. Kehe é te pii pwaatih cehi ana é téne mu ko pana e neéo bé, be pana e pii a juuju.»

²⁷ Time lé uce temehi pie e ko cihe telé ko [Padué] Caa. ²⁸ †††Ke e pii telé wo Iésu pie: «Hemepie geé pieti da ¹⁸ pa Nahi Apulie, ke geé o temehi pie woéo, ke te ‘WOÉO [ânebun, ke é jena, ke é dieli mwo].’ Ke geé o temehi pie time é uce pipwo ni naado mu kong, kehe é pii ni naado na é picaa mu ko Caa. ²⁹ Wo pana e neéo

† 8.15 Ioane 12.47 ††† 8.16 Ioane 5.30, 8.29 †† 8.17 Deutéronome 19.15 ††† 8.18 1 Ioane 5.9 †† 8.20 Ioane 7.30 †† 8.21 Ioane 7.34, 13.33 ††† 8.23 Ioane 3.31 ††† É caa te cuwo ko pii tewé mu ha atabuhi kon—ai É ko ade na é hegi ne tewé? ††† 8.28 Ioane 3.14 18 Pieti da—E pii wo Iésu ko a bwo cemeit-eeng ne ko a kuricé, ke é ko a bwo mwojuia cemwo ten ne mwo pele Padué ne he miiden.

bé, ke te e pelong. Time e uce pineéo cehi, be é te cu-
wo ko pwo nina wâé ten.»

³⁰ É ha a benaamwon na e pii anaa wo Iésu, ke hiwon
ni apulie na lé céihi ne kon.

A JUUJU ke e âbé mu ko Padué

³¹ Ke e pii te ni Juif na lé céihi ne kon wo Iésu pie:
«Hemepie géé cumang ne ko ni pwooti na é pii tewé,
ke a juuju pie wogewé, ke ni acémun dong. ³² Geé o
temehi a *JUJU. Ke a juuju, ke e bo tuwokewé.»

³³ †Ke lé pii ten pie: «Wogeme ne ha a pwomwoiu te
*Abérama, ke time geme mu uce téele â penem tice ja
kon de pace apulie. Ke go o woté ko ace bwopiinen
deme pie, o bo tuwokeme?»

³⁴⁻³⁵ ††Ke e hegi ne telé wo Iésu pie: «Éa, é pii tewé a
juuju pie: Wo pana e pwo nina ta, ke pa *apenem tice
ja kon de ni ta pwo ten. Ke wo pa apenem tice ja kon,
ke time e uce mu taaci ha a pwomwoiu te pa caa ten.
Be te pa naîn cehi na e mu ha a pwomwoiu dieli mwo.
³⁶ Hemepie e tuwokewé wo pa Naî [Padué] ke o caa te
tice aceli o mwo toole gewé kon. ³⁷ É te temehi pie
wogewé ha a pwomwoiu te Abérama. Kehe géé hane
me géé taunuéo, be time géé uce hegi ni pwooti tong.
³⁸ Woéo, ke é pii ni naado na é alihi ne pele Caa tong.
Kehe wogewé, ke géé te pwo nina géé picaa mu ko pa
caa tewé.»

³⁹ *Ke lé hegi ne ten pie: «Wo Abérama pa caa teme!»

Ke e pii telé wo Iésu pie: «Hemepie wogewé ni ju naî
Abérama, ke géé o pwo ni penem na e pwo. ⁴⁰ Woéo,
ke é pii tewé a juuju na é téne mu pele Caa. Ke é jena,
ke géé hane beme é mele. Abérama, ke time e uce
pwo anaa! ⁴¹ ††Wogewé, ke géé te pwohewii pa caa
tewé.»

Ke lé hegi ne ten pie: «Wogeme, ke time uce ni ewa
mu ko pace céiu apulie. Te céiu pa caa teme, ke wo
Padué.»

Time géé uce naî Padué

⁴² Ke e pii telé wo Iésu pie: «Hemepie wo Padué, ke
pa Caa tewé, ke o eânimewé tong. Be woéo, ke é âbé
mu ko Padué. Ke woéo éni mu kon. Time é uce piâbé
mu kong, kehe wo Padué na e neéo bé. ⁴³ É mu ko ade
na time géé uce téne temehi nina é pii tewé? Be time
géé uce tabemi ni pwooti tong.

⁴⁴ ††«Be te wo *Caatana pa caa tewé! Ke nimewé me
géé pwo nina nimen kon. Weeng, ke pa ataunhi
apulie mu ha atabuhi kon. Time e uce mu ha a JUJU,
be te tice JUJU kon. E te pii ni gele, be te pa agele. Be
weeng, ke pa caa te a gele.

⁴⁵ «Ke woéo, ke é pii a juuju. Ke é mu ko anaa, na
time géé uce céihi ne ko ana é pii. ⁴⁶ ††Hadeniiwé, ke te

† 8.33 Mataio 3.9 †† 8.34 Roma 6.16,20 ‡ 8.39 Mataio 3.9
‡† 8.41 Ésaie 63.16 †† 8.44 1 Ioane 3.8

tice paceli jan me e pii pie pwo ni ta pwo tong. É pii a
juuju, ke time géé uce céihi ne ko ana é pii kona woté?
⁴⁷ ††Pa apulie te Padué, ke e tabemi ni pwooti te
Padué. Kehe wogewé, ke time géé uce tabemi, be time
géé uce apulie te Padué.»

Iésu me Abérama

⁴⁸ †Ke lé pii te Iésu ne ni Juif pie: «Te a juuju pie wogo,
ke pa apulie *Samari, be e kom a jenenaado!»

⁴⁹ E hegi ne telé wo Iésu pie: «Ûhu, te tice jenenaado
kong, be é pipaunu Caa tong. Kehe wogewé, ke time
géé uce pipaunuéo. ⁵⁰ Time é uce hane *a wâé tong,
kehe pwo pana e hane a wâé tong, ke e tauti. ⁵¹ †Éa, é
pii tewé a juuju pie: Hemepie pwo paceli e ténedehi ni
pwooti tong, ke time e o uce mele.»

⁵² Ke lé pii te Iésu ne ni Juif pie: «É jena, ke geme
caa temehi pie, e kom a jenenaado. E caa mele wo
Abérama me ni péroféta, ke go pii wogo pie: «Hemepie
pwo paceli e ténedehi ni pwooti tong, ke time e o uce
mele.»

⁵³ «He te junihe piubwo go koja Abérama, pa caa
teme, na e caa mele me ni péroféta? He go pipééko
me pa de?»

É te mi mu ânebuhe Abérama

⁵⁴ Ke e hegi ne telé wo Iésu pie: «Time é uce pwo me
é pipaunuéo, be mepie é pipaunuéo, ke o te piticena-
do ne kon. Te wo Caa tong na e te ne tong a wâé.
Weeng na géé pii kon pie Padué hewé! ⁵⁵ Kehe time
géé uce temehieng. Kehe woéo, ke é te temehieng.
Hemepie é pii pie time é uce temehieng, ke é o gele
pwohewiikewé. Kehe é te temehieng, ke é te ténedehi
ni pwooti ten. ⁵⁶ Abérama, pa caa tewé, ke e pip-
wodéén, be e niimihi pie e o alihi a tan na é tuie hen.
Ke e caa alihi, ke te nihe ubwo a bwo piwâénimen.»

⁵⁷ Ke lé pii te Iésu ne ni Juif pie: «Mwo time uce 50 ni
jo hem, ke he go caa ali Abérama?»

⁵⁸ ††Ke e hegi ne telé wo Iésu pie: «Éa, é pii tewé pie
ânebuhe a bwo tuie te Abérama, ke caa te woéo lang.»

⁵⁹ Ke lé pé ni péi beme lé tahi ko Iésu, kehe e taduwo
kolé, ke e wie mu ha a mwaiitih.

E pwo me e niê wo pa bwi

9 He e ko â pwo pwaaden wo Iésu, ke e ali pa
apulie na bwi nang, tabuhi ha a bwo âbeele ten.
² †Ke lé tahimwo Iésu wo lépwo acémun den pie: «Pa
apipune, he é mu ko ade na wo pa apulie ce, ke e
âbeele he bwi nang? Wona mu ko ni ta pwo ten, ai ni
ta pwo te lu nyaa me caa ten?»

††† 8.46 2 Korénit 5.21; 1 Péteru 2.22 ††† 8.47 1 Ioane 4.6
§ 8.48 Maréko 3.21–22 † 8.51 Ioane 5.24 ††† 8.58 Ioane 1.1
§† 9.2 Ézékiel 18.20; Luka 13.2,4

³ †Ke e hegi ne telé wo Iésu pie: «Time uce weeng, ke time uce wo lu nyaa me caa ten. A bwo bwi nang, ke pwo beme e habwii a junuun wo Padué ne kon. ⁴ He mwo pwang, ke wâé heme genye pwo ni penem de pana e neóo bé. Be, me e tuie a bwén, ke te tice paceli jan me e penem. ⁵ ††He mwo woéo pwo bwohemwo, ke woéo pa pwéelang pwo bwohemwo.»

⁶ †E caa pii anaa wo Iésu, ke e cumi ole pwo bwohemwo, ke é ko a cumihen, ke e pwo me titi a pule, ke e pé ke e ne ko ni naamii pali bwi. ⁷ Ke e pii ten pie: «Go â puuko ne he tabe ne Siloé.» Siloé, a bwopiinen pie 'pa-hedeeng'.

Ke wo pali bwi, ke e â puu a pwahamiin. Ke me e mwojuia mwobé, ke e caa niê ehi.

Lé téele kon wo lépwo apulie

⁸ Pa apulie naa, ke pa a-ile. Ke lé pitahimwolé ne ni apulie na lé alieng ânebun me ni béén pie: «He woo paje? He time uce wo pali bwi li e mu tee tebwo, ke e ile?»

⁹ Ke lé pii wo lépwo béén pie: «Éa, weeng.» Kehe lé pii ne ni béén pie: «Ôhu! Time uce weeng. Kehe pana te ju pwohewieng.»

É nelang, ke e pii telé pie: «Te woéo.»

¹⁰ Ke lé tahimwoeng ne ni apulie pie: «Go woté ko ace bwopwonen me go niê?»

¹¹ Ke e hegi ne telé pie: «Wo pa apulie na pii kon pie Iésu, ke e pé a hepule, ke e ne ko ni naamiing, ke e pii tong pie me é â puuéo ne he tabe ne Siloé. Ke é ân ke é puuéo, ke é caa niê!»

¹² Ke lé tahimwoeng pie: «He e wé naa wo pa apulie naa?»

Ke e hegi ne telé pie: «Time é uce temehi.»

Lé tahimwo pali bwi ni Farasaio

¹³ Lé pé pali bwi nge céii ni *Farasaio. ¹⁴ A tan na e pé a hepule hen †† wo Iésu ke e pwo me e niê wo pali bwi, ke é ha a tan iitihî. ¹⁵ Ke lé uce tahimwo pali apulie ne ni Farasaio pie: «Go caa niê jena? He ade aceli e pwo tem?»

Ke e pii telé pie: «E ne ko lupwo naamiing ni hepule, ke é â puuéo, ke é jena, ke é caa niê.»

¹⁶ Ke lé pii ne ni béélé pie: «Time e uce âbé mu ko Padué wo pana e pwo anaa, be time e uce paciitihî a tan iitihî!»

Kehe lé pii ne ni béén pie: «Wo pace apulie celi pwo ce ta pwo ten, ke pwocoon me e pwo ace inenaado celi pwojunuun celi wonaa.» Ke time lé uce piténelé wo lépwo Farasaio.

¹⁷ ††Ke lé tahimwo mwo pali bwi pie: «Wogo, ke he ade aceli go pii ne ko pana e pwo me go niê?»

Ke e hegi ne telé pie: «Pa péroféta.»

Lé tode lu nyaa me caa ten

¹⁸ Kehe time uce nimelé me lé céihi pie bwi nang ânebun, ke é jena ke e caa niê ehi. Ke lé tode lu nyaa me caa ten, ¹⁹ ke lé tahimwolu pie: «Wo paje, ke he te pa naû? Ke geu pii pie bwi nang, he e mwo âbeele? É jena, ke e caa niê. He ade aceli e tuie ne kon?»

²⁰ Lu nyaa me caa ten, ke lu hegi pie: «Gemu temehi pie te pa naîmu, ke e âbeele he te bwi nang. ²¹ Ke é jena, ke e caa niê. Kehe time gemu uce temehi aceli e tuie ne kon. Ke time gemu uce temehi pie he woo paceli e pwo me e niê. Geé te tahimwoeng, be caa te ubwo nang! Ke e o te hegi ne tewé!»

²² Lu pii pie wonaa wo lu nyaa me caa ten, be mwotilu ko ni apihuô juif. Be lé caa mi pii pie, hemepie lé pii pie wo Iésu, ke pa *Mesia, ke lé o pawielé mu ha a *mwotapitihî. ²³ É mu ko anaa, ke lu pii wo lu nyaa me caa ten pie: «Caa te ubwo nang! Ke geé te tahimwoeng!»

Lé tahimwo mwo pali bwi

²⁴ Ke lé tode mwo pali bwi ne ni Farasaio a béokelohen, ke lé pii ten pie: «Go pii a juuju ne he pwahamii Padué! Geme te temehi pie, pana e pwo me go niê, ke pa apulie na ta nang.»

²⁵ Ke e hegi ne telé pie: «Time é uce temehi pie pace apulie celi ta nang. Te céiu ana é temehi pie, bwi jo, ke é jena, ke é caa niê.»

²⁶ Ke lé tahimwoeng mwo pie: «He ade aceli e pwo tem? He e woté ko ace bwopwonen me go niê?»

²⁷ Ke e hegi ne telé pie: «É caa pii tewé, ke time geé uce tabemiéo. Kona nimewé me geé téne mwo kona woté? Me geé pipwoeabwé te Iésu mwo, wogewé?»

²⁸ Ke lé pipiitaeng, ke lé pii ten pie: «Te wogo pa eabwé te pa apulie naa! Wogeme, ke ni eabwé te *Moosé! ²⁹ Wogeme, ke geme temehi pie e cihe ne ko Moosé wo Padué, kehe wo panaa, ke time geme uce temehi pie e âbé mu wé!»

E pajujuhi ne telé a junuu Iésu

³⁰ Ke e pii telé wo pali bwi pie: «Te ité! Be e pwo me é niê, kehe icehi ana wogewé, ke time geé uce temehi he celi e âbé mulang! ³¹ †††Genye te temehi pie wo Padué, ke time e uce pitabemi nina ta jélé, kehe e te pitabemi pana e ténedeeng, ke e pwo nina e pii.

³² Time genye uce téele téne pie, pwo pace apulie celi e pwo me e niê wo paceli bwi nang tabuhi ha a bwo âbeele ten. ³³ Hemepie time e uce âbé mu ko Padué, ke o time uce jan ne kon me e pwo aceli wonaa.»

† 9.3 Ioane 11.4 †† 9.5 Mataio 5.14; Ioane 8.12 † 9.6 Maréko 8.23 †† A tan na e pé a hepule hen—Lé pii pie, a bwo bitehi na a pule, ke a penem na iitihî ha a tan iitihî.

†† 9.17 Ioane 4.19 ††† 9.31 Psaume 34.16

³⁴ †Ke lé hegi ne ten pie: «Wogo, na go âbeele ne ha a ta, ke nimem me go pacémunikeme?»
Ke lé neeng wie.

Ni ju bwi

³⁵ Ke e téne wo Iésu pie lé pawie pali bwi. Ke e â too-eng, ke e pii ten pie: «He go te céihi ne ko pa Nahi Apulie?»

³⁶ Ke e hegi ne ten wo pali apulie pie: «Pa apipune, he woo panaa, beme é céihi ne kon?»

³⁷ Ke e pii ten wo Iésu pie: «Go caa alieng jena, be weeng na e ko cihe tem.»

³⁸ Ke e pii ten wo pali apulie pie: «Padaame, é céihi.»
Ke e tidihii jilin he pwahamii Iésu.

Lépwona muhi telé me lé alihi

³⁹ Ke e pii wo Iésu pie: «É tuie ne pwo bwohemwo beme lé niê ne ni bwi, ke me bwi nina lé niê. Weengaa a tautinaado.»

⁴⁰ ††É he lé téne anaa ne ni béé Farasaio na lé mu lang, ke lé tahimwoeng pie: «He bwi geme mwo?»

⁴¹ Ke e hegi ne telé wo Iésu pie: «Hemepie bwi gewé, ke o te tice ta pwo tewé. É jena, ke geé pii pie: “Geme caa niê.” É mu ko anaa, ke geé o te mu he ni ta pwo tewé.»

Iésu ke pa awéihi muto

10 [E pii mwo wo Iésu pie]: «É pii tewé a juuju pie: Wo pana e taa pwo a goomwa babé te ni muto, ke me time e uce taa ha a pomwa kon, ke wo panaa, ke pa abune, ke pa apulie ta. ² Kehe wo pana e taa ha a pomwa, ke pa ju awéihi muto. ³ Ke e tehi ne ten a pomwa wo pa awéihi nen. Ke lé téne temehi † a patin ne ni muto, he e toii ni niilé, ke e péélé wie. ⁴ Ke me e caa tai pawielé, ke e engen ânebuhelé. Ke lé âcén, be lé téne temehi a patin. ⁵ Time lé uce âcéi pace céiu apulie, kehe lé o cela kon, be time lé uce téne temehi ni pati ni béé apulie.»

⁶ Ke wo lépwona lé téne a ocine naa, ke time lé uce temehi aceli nimen me e pii telé.

Woéo pa pomwa

⁷ Ke e pii mwo telé wo Iésu pie: «Éa, é pii tewé a juuju pie: *WOÉO pa pomwa te ni muto. ⁸ ††Wo lépwona lé âbé ânebuhung, ke ni abune, ke ni apulie ta. Ke ni muto, ke time lé uce ténédelé. ⁹ WOÉO pa pomwa. Wo paceli e taabé kong, ke o celuimieng. Ke e o taa ke e o wie, ke e o te tooli ce wiinaado ten.

† 9.34 Psaume 51.7 †† 9.40 Mataio 15.14 † Lé téne temehi...ne ni muto... Ne pele lépwona Juif, ke ni muto te ni apulie na hiwon, ke lé pimu ibu ha a babé na céiu heme bwén. †† 10.8 Jérémie 23.1–2; Ézékiel 34.2–3

¹⁰ «Wo pa abune, ke e te ju âbé beme e bune, ke me e taunuhi, ke pwotahi. Kehe woéo, ke é âbé me é pamulipi ni apulip, ke me hején a mulihelé.»

Woéo pa ju awéihi muto

¹¹ ††WOÉO pa ju awéihi muto. Ke pa ju awéihi muto, ke e patupwo a mulihen me delé. ¹² †††Wo pana e cile muto me pwocuhieng, ke time uce pa ju awéihi muto, be time uce ni muto ten. Ke me e alihi a wota apiwii, ke e necu ni muto, ke e cela. Ke ali wota apiwii, ke e pé ni muto, ke e pwo me lé pipiiden ne ni béén. ¹³ Ke e cela wo pana e penem me pwocuhieng, be time e uce cile ehi ni muto.»

É patupwo a mulihung me delé

¹⁴ «WOÉO, ke pa ju awéihi muto, ke é te temehi ni muto tong, ke lé te temehié. ¹⁵ †††Pwohewii a bwo temehié te Caa, ke a bwo temehi Caa tong. Ke é patupwo a mulihung me delé. ¹⁶ †Mwo te pwo ni béé muto tong na mwo tielé ha a babé ††. Woélé mwo, ke me é péélé bé. Ke lé o téne a pating, ke o te céiu a pubuulé, ke o te céiu pa awéilé.

¹⁷ †††«Êanime Caa tong, be é patupwo a mulihung, beme é bo hegi mwo. ¹⁸ Te tice paceli e o pé a mulihung, kehe é te ne mu kong. Etong me é ne, ke etong me é pé mwo. A pihuô naa, ke é hegi mu ko Caa.»

Lé pipiilé mwo mu kon

¹⁹ Ke time lé uce piténéle mwo ne ni Juif mu ko ni pwooti te Iésu. ²⁰ Be hiwon ni béén mu kolé na lé pii pie: «Pwo ace jenenaado kon! Pihauli nang! É mu ko ade na geé tabemieng?»

²¹ Kehe lé pii ne ni béén pie: «Mepie e kon ace jenenaado, ke time e o uce wonaa ko ace bwo cihe ten. Kona a duéé, ke o te jan me e tehi ni naamii ni bwi?»

Muhi telé me lé céihi ne ko Iésu

²² É ha a benaamwon ko ta-amu, é ne *Iérusaléma, ke a *pipwodéén ko a bwo tehi ne mwo a *mwaitihi. ²³ Ke e mu lang wo Iésu, ke e âdé ke âbé ha a mwaitihi, ne ha a 'Mwa te Solomona' ††.

²⁴ Ke lé pitaineibulé ne ko Iésu ne ni Juif, ke lé pii ten pie: «He go pwo me geme ucéiko dieli éniile? Mepie wogo pa *Mesia, ke go pii ehi teme!»

²⁵ Ke e hegi ne telé wo Iésu pie: «É caa pii tewé, kehe time geé uce céihi ne ko ana é pii. Ke lé pajuujuéo mwo ni penem na é pwo mu ko Caa. ²⁶ Ke time geé uce céihi, be time uce wogewé ni muto tong.»

†† 10.11 Psaume 23.1; Pii Beetihii 7.17 ††† 10.12 Apostolo 20.29 ††† 10.15 Mataio 11.27; 1 Ioane 3.16 † 10.16 Ésaie 56.8; Ézékiel 34.23 †† Mwo te pwo ni béé muto tong—Lépwona acéihi na time uce lépwona Juif. ††† 10.17 Filipi 2.8–9 †† 'Mwa te Solomona'—Te tice goomwa kon ke te junihe ubwo ni an. Omehi a note

Lé temehié ne ni muto tong

²⁷ «Lé téne temehi a pating ne ni muto tong. Ke é temehilé, ke lé âbé céing. ²⁸ †Ke é ne telé a mulip ne pele Padué dieli mwo. Time lé uce mele, ke te tice paceli e bo péélé mu ha a naatiing. ²⁹ Be wo Caa na nelé tong, ke e daaité koja ati ni naado. Ke o te tice paceli e o péélé mu ha a naatii Caa. ³⁰ Wogemu me Caa, ke te céiu gemu.»

Lé pwo me lé ahieng

³¹ Ke lé pé mwo ni péi ne ni Juif, beme lé taunueng. ³² Ke e pii telé pie: «Hiwon ni naado na wâé na é pwo mu ko Caa, ne he pwahamiwé. Ke he ade mu he nina é pwo, celi nimewé me géé taunuéo kon?» ³³ ††Ke lé hegi ne ten pie: «Time uce é mu ko ace naado celi wâé celi go pwo, na nimeme me geme taunuko, kehe é mu ko ana go cihe me ta ne ko Padué. Kehe wogo, ke pa apulie, ke nimem me go pwo me wogo Padué!»

Woéo ko Caa ke e kong

³⁴ †Ke e pii telé wo Iésu pie: «Caa tii ne he ni patén dewé pie, e pii wo Padué pie: *Wogewé, ke ni naî Padué††!*

Psaume 82.6

³⁵ Ke pwocoon me tili taabwon ana tii ne he ni tii iitihi. Hemepie e toii ko ni apulie pie naî Padué, ³⁶ ke é ko ade na géé pii pie é picihe hauli ne ko Padué me é pii pie, woéo pa Naî? Be wo Caa na e pipégaliéo, ke e pahedeéo bé ne pwo bwohemwo.

³⁷ «Mepie time é uce pwo ni penem na e ne tong wo Caa, ke géé nemwo céihi ne kong! ³⁸ ††Kehe icehi ana mepie é pwo, ke wâé heme géé céihi. Be mepie pwocoon ne kowé me géé céihi ne kong, ke géé céihi ne kong mu ko ni naado na é pwo. Beme géé téne temehi pie e kong wo Caa, ke woéo, ke é mu ko Caa.»

³⁹ Ke lé hane mwo me lé imwi Iésu, kehe pwocoon ne kolé.

⁴⁰ ††Ke e engen wo Iésu, ke e mwojuia ngemwo ko a céiu goo a éémwa Ioridano, he na e mi *puu apulie nelang wo Ioane. Ke e mu lang.

⁴¹ Hiwon ni apulie na lé âbé tooeng, ke lé pipii telé pie: «Te tice inenaado celi pwojunuun celi e pwo wo Ioane, kehe te ni juuju ati nina e pii ne ko Iésu.»

⁴² É nelang, ke hiwon ni apulie na lé céihi ne kon.

A bwo mele te Lazare

¹¹ ††Pwo pa céiu apulie na cunu nang, na pii kon pie Lazare. E mu Bétani [§], a mwopopwaalé te Maria me é béén Marte. ² ††Wo Maria ^{§††}, ke égi toomwo li e céihi ne pwo ni a Padaame a tabe ûde, ke e tahi ko ni apunin. Ke é iiti Lazare, pali cunu nang.

³ Lu ténaâjién, ke lu pahede pa céiu apulie, me e â pii te Iésu pie: «Padaame, pali eânimem den, ke cunu nang.»

Time e uce piepin ko engen

⁴ ††Me e téne anaa wo Iésu, ke e pii pie: «A cunu na e ko Lazare, ke time e o uce metihi, kehe a bwopwonen me e habwii a junuun wo Padué. Be é mu ko anaa, ke lé o alihî a junuu pa Naî.» ⁵ Junihe eânimem de Marte me é béén, ke wo Lazare. ⁶ He e téne pie cunu Lazare, ke e mwo mu lang he na alo ni tan.

⁷ Ke é alecehen, ke e pii te ni acémun den pie: «Genye âmwo *Judé.»

⁸ Ke lé pii ten ne ni acémun den pie: «Pa apipune, ha ali céiu tan, ke lé haneko ne ni *Juif na lé mu lang, beme lé ahiko ko péi me lé taunuko. Ke nimem me go mwojuia ngemwo lang?»

⁹ Ke e hegi ne telé wo Iésu pie: «Ha a tan, ke 12 ni inetéale. Hemepie genye engen heme pwang, ke time genye uce tupwo, be te pwéélang he na genye â lang.

¹⁰ Kehe mepie genye engen he bwén, ke genye o tupwo, be time uce e konye a pwéélang.»

E mele wo Lazare

¹¹ Ke e pii mwo wo Iésu pie: «E caa puluta wo pa béénye Lazare, kehe é o â paûmiêng.»

¹² Lé pii ten ne ni acémun den pie: «Padaame, mepie e puluta, ke o wâé nang!»

¹³ Nime Iésu me e pii pie, e caa mele, kehe lé niimihi ne ni acémun den pie, e teko ju pule. ¹⁴ Ke e pii telé ehi pie: «E caa mele. ¹⁵ Time é uce mu lang, kehe é pipwodéén. Wonaa mu kowé, beme géé céihi ne kong. Kehe genye â pele Lazare!»

¹⁶ ††Ke wo Toma ^{§†}, pana pii kon mwo pie 'pa Péidu', ke e pii te ni béé acémun pie: «Genye tai ân, beme genye tai mele me Iésu ^{§††}!»

Te junihe téé lu pwaadeniin

¹⁷ Ke é he e tehene ngen wo Iésu, ke e téne pie caa paa ni tan na lé ne Lazare ha a mwa péi. ¹⁸ Bétani, ke é mwonuhi *Iérusaléma, he na cié ni *kilomètre* ngelang.

† 10.28 Ioane 3.16, 6.39 †† 10.33 Lévitique 24.16 ‡ 10.34 Psaume 82.6 †† Ni naî Padué—Élohim he pwo ébéru. Alo lupwo bwopiine a pwooti naa: Ni naî Padué, ai Lépwō atautinaado. É ne ha a tii Psaumes, ke a pwooti ko lépwō atautinaado te lépwō Juif. †† 10.38 Ioane 14.10–11 ††† 10.40 Ioane 1.28

††† 11.1 Luka 10.38–39 § Bétani—Time uce piwien me a Bétani he na e pipuu apulie nelang wo Ioane ha a 1.28. §† 11.2 Ioane 12.3 §†† Maria—Omehi Ioane 12.3. §† 11.4 Ioane 9.3 §†† 11.16 Maréko 14.31 §† A nii 'Toma', ke e âbé mu ko a bwopiinen pie "péidu" he pwo ébéru. Grek: Didymus. §† E temehi wo Toma pie, hemepie lé â Iérusaléma, ke wieli lé o taunu Iésu wo lépwō Juif.

¹⁹ É mu ko anaa, ke hiwon ni Juif na lé âbé too Marte me Maria, beme lé tuie ne kolu ko a bwo mele te Lazare.

²⁰ E téne wo Marte pie e tuie wo Iésu, ke e âbé beniieng. Kehe wo Maria, ke e te mu pwomwo. ²¹ Ke e pii wo Marte te Iésu pie: «Hemepie teko wogo éni, ke me time e o uce mele wo pa iitiéo. ²² Kehe é ha a benaamwon ce, ke é te temehi pie tai ni naado na go ilehi koja Padué, ke e o te tai ne tem ati.»

Woéo pana é ne a mulip

²³ Ke e pii ten wo Iésu pie: «Pa iitiko, ke e o mulie cemwo mu ha amele.»

²⁴ †E hegi ne ten wo Marte pie: «É te temehi pie e o mulie cemwo hemepie lé o mulie cemwo ne ni amele ha a *Tan Alece.»

²⁵ Ke e pii ten wo Iésu pie: «*Woéo pa mulie cemwo ke pa mulip. Wo pana e céihi ne kong, ke eten a mulie, te piwien hemepie e caa mele. ²⁶ Ke tai nina lé mulie heme lé céihi ne kong, ke time lé o uce mele †. Go te céihi ne ko anaa?»

²⁷ *Ke e pii ten wo Marte pie: «Éa, go Padaame! É céihi pie wogo, ke pa *Mesia, pa *Naî Padué na me e âbé ne pwo a bwohemwo.»

Lu picihe me Maria

²⁸ He e caa pii anaa wo Marte, ke e â tode é ciéen, Maria, ke e pii ten pie: «E éni wo Padaame, kehe e todeko.»

²⁹ He e téne anaa wo Maria, ke e te caama kuti ke e â too Iésu. ³⁰ Be time e uce téele taa ha a mwopopwaalé, kehe mwo te é he na e tooeng lang wo Marte. ³¹ Ni Juif na lé âbé tuie ne ko Maria ne ha a pomwa ten, ke lé alieng he e te caama kuti ke e â wie. Ke lé âcén, be lé niimihi pie e â é, he iitihi.

³² Me e tehene nge ha a duaan na e mu hen wo Iésu, ke e tidih jilin ko an, ke e pii ten pie: «Padaame, mepie te wogo éni, ke me time e o uce mele wo pa iitiéo!»

E é pai pa béén

³³ Ke me e alieng wo Iésu he e é me ni Juif na lé âbé cén, ke te nihe penem a pwonimen, ke piwahin nang.

³⁴ Ke e tahimwolé pie: «He geé neduwoeng wé?»

Ke lé pii ten pie: «Padaame, go âbé ke go bo alihi.»

³⁵ Ke e é wo Iésu. ³⁶ Ke lé pii ne ni Juif pie: «Geé alihi, be te junihe eânimen den!»

³⁷ ††Ke lé pii ne ni béén pie: «Weeng pana e tehi ni naamii pa bwi. Kona pwocoon me e pwo me time e uce mele wo Lazare?»

E mulie cemwo wo Lazare

³⁸ Ke te nihe penem a pwonime Iésu. Ke e â ko a bwomu, a mwa péi na capuhi ko a pilehe péi. ³⁹ Ke e pii pie: «Geé pétaabwon a péi!»

Kehe wo Marte, é iiti pali e caa mele, ke e pii ten pie: «Padaame, caa ûde nang, be caa paa ni tan na e lang.»

⁴⁰ Ke e pii ten wo Iésu pie: «É caa pii tem pie, mepie go céihi, ke go o alihi a bwo ubwo na a wâé te Padué.»

⁴¹ Ke lé pétaabwon ali péi. Ke e eti ni naamiin wo Iésu, ke e pii pie: «Caa, é oléhi ne tem, be go téneéo.

⁴² Ke woéo, ke é te temehi pie go te téneéo. Kehe é cihe, beme lé céihi ne ni apulie na élé aujuniéo pie, wogo na go pahedeéo bé.»

⁴³ Ke é alecehe anaa, ke e cihe da ko miiden, ke e pii pie: «Lazare, go wie mulang!»

⁴⁴ Ke e wie wo pali amele! Ni an me ni in, ke cie ko ni mwaanu. Ke a pwahamiin, ke tawii mwo ko a mwaanu. Ke e pii telé wo Iésu pie: «Geé tuwo mu kon nina lé cieeng kon, ke neeng me e engen.»

Lé piténéle me lé taunu Iésu

⁴⁵ ††Hiwon ni Juif na lé â pele Maria, ke lé alihi nina e pwo wo Iésu, ke lé céihi ne kon.

⁴⁶ †††Kehe ni béén, ke lé â too ni *Farasaio, ke lé uti telé nina e pwo wo Iésu. ⁴⁷ Ke lé taineibuhi a *mwohuô wo lépwo caa te lépwo *apwoâpwailo me ni Farasaio, ke lé pii pie: «He ade aceli genye o pwo? Be hiwon ni *inenaado na pwojunuun na e pwo wo pa apulie ce.

⁴⁸ «Hemepie genye te neeng me e pwo, ke lé o tai céihi ne kon ne ni apulie ati. Ke lé o âbé ni coda roma, ke lé o tanahi a *mwaiitihi tenye ke a bele tenye †††!»

Wâé heme e mele wo pana céiu nang

⁴⁹ Ha a jo naa, ke wo pa *daame he lépwo apwoâpwailo, na pii kon pie Kaïfe. Ke e pii telé pie: «Te tice aceli geé temehi? ⁵⁰ Wâé hemepie e mele wo pana céiu nang me de a puapulie, beme time uce tanahi a amu ati. Ai, kona te time geé uce temehi anaa?»

⁵¹ Time e uce âbé mu kon ni pwooti naa, be weeng, ke pa daame he lépwo apwoâpwailo ha a jo naa, ke e mi pii pie, e bo mele me de a bele juif wo Iésu. ⁵² †Kehe time e uce pwo cehi me de a bele juif, kehe me e taineibuhi me céiu ni naî Padué na élé ati he ni piduaan ne pwo a bwohemwo.

⁵³ ††Ke tabuhi ha a tan naa, ke lé pitaineibulé ne ni apihuô juif, beme lé pwo me e mele wo Iésu. ⁵⁴ É mu ko anaa, ke caa time e uce âdé ke âbé he pwahamiilé wo Iésu. Kehe e engen mulang, ke e â ha a céiu duaan

†† 11.45 Ioane 7.31 ††† 11.46 Luka 16.31 ††† Wo lépwo apihuô juif, ke mwotilé pie wo lépwo acéihi ne ko Iésu, ke lé cubwoni lépwo Roma, woélé na lé pihuô ne ha amu telé. † 11.52 Ioane 10.16 †† 11.53 Ioane 5.18

† 11.24 Ioane 6.40 †† Mele—Mele dieli mwo. † 11.27 Ioane 6.69 †† 11.37 Ioane 9.6

ko a melé, ne ha a céiu mwopopwaalé na pii kon pie Éfraïm. Ke e mu lang me ni acémun den.

Lé ucéieng ne Iérusaléma

⁵⁵ Caa e mwonu a tan ko *Pacika, a *pipwodéén de ni Juif, ke hiwon ni apulie na lé engen mu he ni amu telé, beme lé taa Iérusaléma ânebuhe a Pacika, beme lé pwo a *pwoiitihî ko a bwo wâé genye ne pele Padué, pwohewii a patén de ni Juif. ⁵⁶ Lé hane Iésu, ke lé pipii telé ne ha a mwaiitihî pie: «Geé niimihi pie woté? E o te âbé ne ko a pipwodéén?»

⁵⁷ Ke ni caa te lépwo apwoâpwailo me ni Farasaio, ke lé huôhi pie, hemepie pwo pace apulie celi e temehi he celi e lang wo Iésu, ke me e âbé pii telé, beme lé imwieng.

E puu lupwo a Iésu wo Maria

Mataio 26.6–13; Maréko 14.3–9; {Luka 7.36–50}

12 [†]Mwo 6 ni tan ânebuhe a *Pacika, a *pipwodéén de lépwo *Juif, ke e tehene nge Bétani wo Iésu. Ke e mu pele Lazare, pali e pwo me e mulie cemwo wo Iésu. ² ^{††}Ke lé tebwo pwo taap me ni béén, ko a wiinaado na lé caa mi piwâam kon. Ke wo Marte, ke e âdé ke âbé, beme e wéihî a taap. ³ [‡]Mepwo é ne ko Maria, ke e pé a mwotabe na oba [†] ko tabe ûde ^{††} na te junihe ubwo a cuhin. Ke e céihî ne pwo ni a Iésu, ke e tahi ni an ko ni apunin. Ke te ju ûde wâé ha ali mwa.

⁴ [Kehe time uce wâé te] Judas Iscariot, pa céiu *acémun de Iésu, pali e bwo icueng. Ke e pii pie: ⁵ «Woté? É ko ade na time e uce icuhi a tabe ûde ce, ke me nye ne a mwani te nina tice delé? Be pwo *million*^{‡‡} ko a cuhin!»

⁶ Time e uce pii anaa hemepie eânimen de nina tice delé, kehe e wonaa be pa abune. Ke weeng na e cile a mwomwani telé, ke e mu pé mu kon.

⁷ Ke e pii wo Iésu pie: «Go neeng! Be e caa mi pwo anaa ne ko a tan na lé o bo neduwoéo hen. ⁸ ^{‡‡‡}Be o tee élé pelewé wo lépwona tice delé, kehe woéo, ke time é o uce tee mu pelewé.»

Lé picihé me lé taunu Lazare

⁹ Hiwon ni Juif na lé téne pie e mu Bétani wo Iésu, ke lé âbé nelang. Time uce é mu kon cehi, kehe nimelé me lé ali mwo Lazare, pana e pwo me e mulie cemwo.

¹⁰ Kehe lé picihé wo lépwo caa te lépwo *apwoâpwailo, me lé taunu mwo Lazare. ¹¹ ^{‡‡‡}Be wonaa mu ko Lazare, me hiwon ni Juif na lé wie mu pelelé, ke lé céihî ne ko Iésu.

[†] 12.1 Ioane 11.1,43 ^{††} 12.2 Luka 10.40 [‡] 12.3 Luka 7.37–38

^{††} Mwotabe na oba—Grek: 500 ml; Tabe ûde—A niin pie nard.

^{‡‡} Million—Grek: 300 mwani péi (deniers). A cuhi pa apulie ha a jo na céiu. ^{‡‡†} 12.8 Deutéronome 15.11 ^{‡‡‡} 12.11 Ioane 11.45

Lé pipaunu Iésu he e taa Iérusaléma

Mataio 21.4–9; Maréko 11.7–10; Luka 19.36–38

¹² Ha acaama hen, ke hiwon ni apulie na lé âbé ne ko a pipwodéén ko a tan ko Pacika, be lé téne pie e taa *Iérusaléma wo Iésu. ¹³ [§]Ke lé pé ni madi alica, ke lé â beniieng, ke lé toii me ubwo pie:

«Osana^{§†}! Pipwoun de Padué!

*Adéi pa apulie

na e âbé ne he nii Padaame! Psaume 118.26

*Adéi Padaame he ni *Isaraéla!»

¹⁴ ^{§††}Ke e pé a nahi buriko wo Iésu, ke e tebwo huîin, pwohewii ana caa te tii ne he ni tii iitihî pie:

¹⁵ Wogo é nahi toomwo Sion^{§†},

go nemwo pwo me mwotiko!

Be e âbé wo Padaame hem,

he e tebwo huîi a nahi buriko^{§††}. Zakari 9.9

¹⁶ ^{§†}É ha a benaamwon naa, ke time lé uce téele temehi ne ni acémun den celi e o tuie. Ke é he e caa mu ha *a wâé ten wo Iésu, ke lé bo piniimihi mwo pie ninaa, ke caa mi tii ne kon, ke lé bwo *pajujuhi ne kon ana caa pii.

¹⁷ Tai nina lé mu pele Iésu he e tode Lazare me e wie mu ha a bwomuhén, ke e pwo me e mulie cemwo, ke lé â uti nina e pwo. ¹⁸ É mu ko anaa, na e âbé beniieng a pubu apulie, be lé téne pie e pwo a *pipwojunuun naa.

¹⁹ Lé pipii telé ne ni *Farasaio pie: «Geé te alihi, te tice aceli jan me genye pwo. Be tai ni apulie, ke lé tai âcén!»

Pa ju eabwé te Iésu

²⁰ Pwo ni apulie na time uce ni Juif na lé taa Iérusaléma ha a pipwodéén, beme lé pipaunu Padué. ²¹ Ke lé âbé too Filip, pa aâbé Betsaïda ne Galilé, ke lé pii ten pie: «Nimeme me geme ali Iésu.»

²² Ke e ân wo Filip, ke e pii te André, ke lu â pii te Iésu. ²³ ^{§†}Ke e hegi ne telu wo Iésu, pie: «Caa tuie a benaamwon me pipaunu pa Nahi Apulie. ²⁴ ^{§††}É pii tewé a juuju pie: Hemepie time e uce tupwo ne he pule a pide blé, ke me time e uce mele, ke e te mu cehi. Ke hemepie e mele, ke o hiwon ce acehin.

§ 12.13 Psaume 118.25–26; Ioane 1.49 ^{§†} Osana—A pwooti he wo ébéru, na lé pii wo lépwo Juif na lé pwoiitihî. Éni, ke a bwopiinen pie: Nye pipaunu Padué! ^{§††} 12.14 Zakari 9.9 ^{§†} É nahi toomwo Sion—Iérusaléma, ke a niin mwo pie Sion, be a nii a céiu juwole na lé pwo ne pwon a pwomwo ubwo. ‘Ewa toomwo Sion’, ke a bwopiinen pie, a bele Iérusaléma na a béhabwiine a amu Isaraéla. ^{§††} E tebwo huîi a nahi buriko—Pa daame Davita, ke e pwo me e taa pwo a buriko ten wo pa naîn Solomona, beme e habwii pie weeng pa daame. (1 Rois 1.33–35,44,45). Wo Iésu, ke e habwii pie weeng, ke pa piebehi Davita, ke pa daame na caa mi pieng. ^{§†} 12.16 Ioane 2.22 ^{§†} 12.23 Ioane 13.31–32, 17.1 ^{§††} 12.24 1 Korénit 15.36

²⁵ †«Wo paceli eânimen ko a mulihen, ke e o patieden. Kehe wo paceli te nihe eânimen de Padué koja a mulihen ne éni pwo bwohemwo, ke eten a mulie na tice anebwén kon.

²⁶ «Wo paceli nimen me e pipwoeabwé tong, ke e âbé céing. Ke é he na woéo lang, ke o e lang mwo wo pa eabwé tong. Ke wo Caa, ke e o bo ne a ceme ni penem den.»

E pii a bwo mele ten

²⁷ ††«É jenea, ke téé a pwonimung, ke me é pii pie woté: “Caa, go neéo nge ité koja ni picani na e o tuie ne kong ha a benaamwon ce”? Kehe é mu ko anaa, na é âbé. ²⁸⁻²⁹ Caa, go habwii pie wogo Padué na ubwo go ††.»

Ke ni apulie na lé mu lang, ke lé téne a pwocihe mu he miiden: «É caa te habwii a wâé tong, ke é o mwo te habwii mwo.» Ke lé niimihi ne ni béén pie a tikekele. Ke lé pii ne ni béén pie a *âcélo na e cihe ten.

³⁰ Ke e pii telé wo Iésu pie: «Time e uce âbé a pwocihe naa me dong, kehe me dewé. ³¹ É jenea, ke o pwo a tautinaado ne pwo a bwohemwo ce. É jenea, ke e o tahi wie pa daame he a ta ne pwo a bwohemwo. ³² ††Ke woéo, hemepie pineéo da mu pwo bwohemwo, ke é bo céibé ni apulie ati.»

³³ ††É mu ko ni pwooti ten, ke e caa mi pii a bwo mele ten.

Hegi a pwéélang

³⁴ †††Ke lé hegi ne ten ne ni apulie pie: «Geme picaa ne he ni tii ko patén pie, pa *Mesia, ke e o *mulie dieli mwo. Kehe woté ace bwomunen me go pii pie, wâé heme ne da pa Nahi Apulie? He woo pa Nahi Apulie naa?»

³⁵ †††Ke e pii telé wo Iésu pie: «A pwéélang, ke time uce bwolieng hadeniwé. Geé engen he mwo e pelewé a pwéélang, beme time e cetéékewé na a melepiing. Be wo paceli e engen ha a melepiing, ke time e uce temehi he na e â lang. ³⁶ †He mwo ko wogewé ha a pwéélang, ke geé hegi a pwéélang, beme wogewé ni nahi a pwéélang.»

Ke me e caa pii anaa wo Iésu, ke e â taduwo ité kojale.

Ni Juif ke time lé céihi ne ko Iésu

³⁷ Hiwon ni inenaado na e pwo ne he pwahamiilé, kehe time lé uce céihi ne kon. ³⁸ ††Caa pacuwohi a pwooti na e pii wo péroféta Isaia:

Padaame, he woo paceli e céihi

† 12.25 Mataio 16.25 †† 12.27 Psaume 6.4, 42.6; Mataio 26.38 † Go habwii pie wogo Padué na ubwo go—Grek: Go habwii a wâé ko a niim. †† 12.32 Ioane 3.14 †† 12.33 Ioane 19.6 ††† 12.34 Psaume 110.4; Ésaie 9.6; Daniel 7.14 ††† 12.35 Ioane 8.12 † 12.36 Éfeso 5.8 † 12.38 Ésaie 53.1

ne ko ni pwooti teme?

He go habwii ne tee a junuum? Ésaie 53.1

³⁹ Ke e pii wo Isaia a watihen me time lé uce céihi:

⁴⁰ [E pii wo Padué pie]:

*É pwo me mwoiu ni punilé^{††},
beme time uce nimelé me lé alihi
ko ni naamiilé,
ke me lé temehi ko ni pwonimelé.*

Te muhi telé me lé bitelé bé céiiéo,

ke me é o uce pwo me wâé jélé. Ésaie 6.10

⁴¹ ††E pii anaa wo Isaia be e caa mi alihi a junuu a wâé te Iésu, ke e cihe kon.

⁴² †††Ke é hadenii ni apihuô juif, ke hiwon nina lé céihi ne kon. Ke time lé uce pii pwaatihi, be mwotilé ko ni Farasaio. Be koli lé bo pawielé mu ha a *mwotapitih. ⁴³ ††Be wâé telé a bwo pipaunulé te ni apulie, koja a bwo pipaunulé te Padué.

E tauti ni apulie a pwooti te Iésu

⁴⁴ Ke e pii da me ubwo wo Iésu pie: «Wo pana e céihi ne kong, ke time e uce céihi ne kong cehi, kehe é ne mwo ko pana e neéo bé. ⁴⁵ ††Ke wo pana e aliéo, ke e ali mwo pana e neéo bé. ⁴⁶ Woéo, ke pa pwéélang, na é âbé ne pwo bwohemwo, beme wo paceli e céihi ne kong, ke me time e o uce mu ha a melepiing.

⁴⁷ †††«Hemepie pwo paceli e téne ni pwooti tong ke me time e uce piténédehi, ke time uce woéo na é tautieng. Be time é uce âbé me é tauti a bwohemwo, kehe me é *celuimi a bwohemwo.

⁴⁸ «Wo pana muhi ten kong, ke me time e uce hegi ni pwooti tong, ke o bo tautieng. A pwooti na é toii, ke e bo te tautieng ha a *Tan Alece ^{†††}. ⁴⁹ Be time é uce cihe mu ko ace bwo niimihi nen dong, kehe wo Caa na e neéo bé, ke e pii tong ati nina me é pii ke me é pate-mehi. ⁵⁰ Ke é temehi pie, a pihuô ten, ke a mulie dieli mwo. Nina é toii, ke é patemehi pwohewii ana e pii tong wo Caa.»

E puu ni a lépwo acémun den

13 Ânebuhe a *pipwodéén ko a *Pacika, ke e temehi wo Iésu pie, e caa tuie a benaamwon den: Me e engen mu pwo a bwohemwo me e taa too Caa. Ke te nihe ubwo a pwonimen ko ni ju béén, mu ha atabuhi kon die ha a pwonehin.

² †††É he babwén, he lé wiinaado me ni acémun den, ke wo Caatana ¹⁸, ke e caa ne ha a pwonime Judas Is-

††† Heme e pwo me mwoiu ni puni apulie wo Padué, ke a tauti-naado ten ne kolé be time nimelé me lé céihi. Time uce wo Padué pana e watihe a bwo time uce céihi telé. Omehi a Roma 1.18–32, Cang 1.13–15. †† 12.41 Ésaie 6.1 ††† 12.42 Ioane 9.22 †† 12.43 Ioane 5.44 †† 12.45 Ioane 14.9 ††† 12.47 Ioane 3.17 ††† Tan Alece—Omehi note ††† 13.2 Lu-

cariot, pa naî Simon, a bwo niimihinaado pie, me e icu Iésu.

³ †Wo Iésu, ke e te temehi pie, e caa ne ten me e pihuôhi ati ni naado wo Caa, e âbé mu ko Padué, ke e o te mwojuia ngemwo céii Padué. ⁴ Ke e caama mu pwo taap, ke e céi a céiu epwénen, ke e pé a mwaanu, ke e cieeng kon. ⁵ Ke e tapulicéihi a tabe ne ha a tam ubwo, ke e puu ni a †† ni acémun den. Ke e tahi ko a mwaanu na e cieeng kon.

É puu ni a pana pwo den mu kong

⁶ Me e tuie nge ko Simon Pétéru, ke e pii ten wo Pétéru pie: «He wogo Padaame, na me go puu ni ang?»

⁷ Ke e hegi ne ten wo Iésu pie: «Ana é pwo jena, ke time go uce téele temehi. Kehe go bo te temehi.»

⁸ Ke e pii ten wo Pétéru pie: «Ôhu! Time go o uce puu ni ang!»

Ke e hegi ne ten wo Iésu pie: «Hemepie time é uce puu ni am, ke o te tice dem mu kong.»

⁹ Ke e pii ten wo Simon Pétéru pie: «Time uce ni ang cehi, go Padaame, kehe ni ing mwo me a puning!»

¹⁰ †Ke e pii ten wo Iésu pie: «Wo pana e caa puu ati a één, ke caa tice tooli kon. Ke te ju puu cehi ni an ††. Caa tice tooli kowé, kehe time uce tai wogewé ati.»

¹¹ Be e caa te temehi pana e bo icueng. Weengaa a watihen me e pii pie: «Time uce tai wogewé ati.»

Geé pipwoeabwé tewé

¹² Alecehe a bwo puu ne ni alé, ke e cuwo mwo ha a epwénen, ke e âmwo tebwo pwo taap, ke e pii telé pie: «Geé te temehi ana é pwo tewé? ¹³ Geé toii kong pie pa apipune tewé ke pa daame hewé. Éa, geé te ju pii ehi, be woéo. ¹⁴ ††É puu ni awé, woéo pa apipune tewé ke pa daame hewé. Wogewé mwo, ke geé pipuu ni awé. ¹⁵ †††Be é caa habwii tewé beme geé bo pwo, pwohewii ana é pwo tewé. ¹⁶ †††É pii tewé a juuju pie: Wo pa apenem, ke time uce ubwo nang koja pa daame hen. Ke pa *apostolo, ke time uce ubwo nang koja pana e pahedeeng bé.

¹⁷ «Hemepie geé temehi nina, ke o adéikewé, hemepie geé pwo.»

Time uce tai wogewé ati

¹⁸ §«Time é uce pii anaa ne kowé ati. É te temehi nina é pipégalié. Kehe wâé heme e cuwo nina caa tii: Wo

pana gemu piwiinaado ibu me weeng, ke weeng pana e o icuéo^{§†}.

Psaume 41.10

¹⁹ §††«É mi pii tewé anaa jena, ânebuhe ace bwo tuie nen, be mepie e bo tuie, ke geé céihi pie, 'Woéo [ânebun, ke é jena, ke é dieli mwo]'. ²⁰ §†É pii tewé a juuju pie: Wo paceli e hegi pana é neeng lé, ke e hegiéo. Ke wo pana e hegiéo, ke e hegi mwo pana e neéo bé.»

E pii beetihi a bwo icueng de Judas

Mataio 26.20–25; Maréko 14.17–21; Luka 22.14–23

²¹ He e caa pii ni pwooti naa wo Iésu, ke e téne he abwobwo a pwonimen, ke e pii telé pie: «É pii tewé a juuju pie: E bo pi-icuéo wo pa céiu bééwé.»

²² Ke lé piomelé wo lépwo acémun den, be time lé uce temehi pie he e pii ne koo. ²³ Wo pa acémun den, na nihe eânime Iésu ten §††, ke e tebwo pwo taap, cebwo Iésu. ²⁴ Ke e pwo inenaado ten wo Simon Pétéru me e tahimwohi pie he e ko cihe koo wo Iésu. ²⁵ Pa acémun den naa, ke e pioole nge céii Iésu, ke e tahimwoeng pie: «Padaame, he wooélé?»

²⁶ Ke e hegi ne ten wo Iésu pie: «Wo pana é o bo ne ten a mepwoloa na é pate.»

Ke e pate a mepwoloa, ke e ne te Judas, pa naî Simon Iscariot. ²⁷ §†Ke me e te pé kuti ali mepwoloa wo Judas me e eni, ke e te taa he pwonimen kuti wo Caatana.

Ke e pii ten wo Iésu pie: «Go epin ko pwo aceli me go pwo!»

²⁸ Te tice pace béélé ne pwo taap celi e temehi pie he e pii ten anaa be woté. ²⁹ Be lé niimihi pie e pii ten, me e pwocuhi nina nimelé kon ne ko a pipwodéén, ai me e pati nina tice delé. Be pa acile mwani telé. ³⁰ He e caa pé a mepwoloa wo Judas, ke e te â wie kuti, he caa meleping.

ni pwooti bépamwoiu ni acémun den

(Pwahamii tii: 14–16)

³¹⁻³² §†É he e wie wo Judas, ke e pii telé wo Iésu pie: «É jena, ke o caa habwii a wâé te pa Nahi Apulie. Ke o paunu Padué, mu ko pa Naîn. Ke heme wonaa, ke wo Padué, ke e o paunu pa Naîn. Ke e o te ju téele pihabwii ne kon a bwo ubwo na a wâé ten.»

Geé pwo me pieânimewé tewé

³³ §††«Ni naîng, é mwo te mu pelewé ha ace cuwo nahi benaamwon. Geé bo haneéo, kehe é pii tewé je-

§† Icuéo—Pwobwoniéo. É he pwo ébéru, ke grek, ke e pii pie: E pwii ni dihibwaan beme e pwobwoniéo. §†† 13.19 Ioane 14.29, 16.4 §† 13.20 Mataio 10.40 §†† Pa acémun den na nihe eânime Iésu ten—Wiel wo Ioane, pa atii na a tii ce. Omehi mwo Ioane 19.26; 20.2; 21.7,20. §† 13.27 Ioane 13.2 §† 13.31–32 Ioane 12.23, 17.5 §†† 13.33 Ioane 7.33–34

ka 22.3; Ioane 13.27 18 Caatana—Pa apihuô te ni jenen na ta. A niin 'Satan', ke a bwopiinen pie pa Acubwoni. † 13.3 Ioane 3.35, 16.28 †† Puu ni a—A penem de ni eabwé na te junihe wahin. ‡ 13.10 Ioane 6.64,70–71, 15.3 †† Ke te ju puu cehi ni an—Ni pwooti naa, ke te tieden he ni béé tii iitih he pwo grek. †† 13.14 Mataio 20.28; Luka 22.27 ††† 13.15 Filipi 2.5; Kolosé 3.13; 1 Pétéru 2.21 ††† 13.16 Mataio 10.24 § 13.18 Psaume 41.10

naa nina é caa pii te ni apihuô juif pie: “Pwocoon me geé â he na é â lang.”³⁴ †É ne tewé a patén na mwo coho: Geé pwo me pieânimewé tewé. Pwohewii a bwo eânimung dewé, ke wogewé mwo, ke geé pwo me pieânimewé tewé.³⁵ Be me wonaa, ke lé bo temehi pie, wogewé, ke ni acémun dong, hemepie pieânimewé tewé.»

Go bo piwotétaa kong, go Pétéru

³⁶ Ke e pii ten wo Simon Pétéru pie: «Padaame, he go â wé?»

Ke e hegi ne ten wo Iésu pie: «He na é â lang, ke pwocoon me go âbé céing jena. Kehe go bo âbé céing ha ace céiu tan.»

³⁷ Ke e pii ten wo Pétéru pie: «Padaame, he ade aceli pwocoon ne kong me é âdé céim jena? Te jan me é mele me dem jena!»

³⁸ Ke e hegi ne ten wo Iésu pie: «He o te jan me go mele me dong? É pii tem a juuju pie: Ânebuhe a bwo to te a ja, ke o caa ocié go ko piwotétaa kong pie, time go uce temehié.»

É pwopweehi ce atebwo tewé

14 «Geé nemwo pwo me pinekepé ni pwonimewé. Geé céihi ne ko Padué, ke geé céihi ne mwo kong.² Hiwon ni pwomwo ne pele Caa. Hemepie time uce wonaa, ke time é o uce pii tewé pie, é â pwopweehi he celi geé bo mu lang.

³ †«Ke mepie é caa pwopweehi he celi me geé bo mu lang, ke é bo âmwobé, ke é bo péékewé, beme geé mu pelong, ne he na é mu lang.⁴ Geé te temehi he na é â lang, be geé te temehi a pwaaden.»

Woéo na é pwaaden ke é JUJU, ke é mulip

⁵ Ke e pii ten wo Toma pie: «Padaame, time geme uce temehi he celi go â lang. Geme o woté ko ace bwo temehi na a pwaaden?»

⁶ †Ke e pii ten wo Iésu pie: «Woéo, ke é pwaaden, ke é juuju, ke é mulip. Te tice paceli e â too Caa, hemepie time e uce mi âbé tooéo.⁷ †Hemepie geé temehié, ke geé o te temehi mwo Caa tong. Ke é jena, ke geé caa temehieng, ke geé caa alieng.»

Wo pana e aliéo ke e ali Caa

⁸ Ke e pii ten wo Filip pie: «Padaame, mepie go habwii teme Caa, ke caa te jan †.»

⁹ †Ke e pii ten wo Iésu pie: «Caa bwolihi na é mu pelewé, ke time go uce téele temehié, go Filip? Wo pana e aliéo, ke e ali Caa. É mu ko ade na go pii mwo

tong, pie me é habwii Caa?¹⁰ ††He time go uce céihi pie woéo ko Caa, ke wo Caa ke e kong? Ni pwooti na é pii tewé, ke time é uce pii mu kong. Te wo Caa na e mulie kong, ke e pwo ni penem.¹¹ †Geé céihi ne ko ana é pii pie: Woéo ko Caa, ke wo Caa, ke e kong. Ai geé céihi mu ko nina é pwo.»

O te junihe ubwo ni penem dewé

¹² ††«É pii tewé a juuju pie: Paceli e céihi ne kong, ke e o pwo mwo ni penem na é pwo. Ke e o bo pwo mwo celi nihe ubwo koja nina é pwo, be é caa âmwo pele Caa.¹³ ††Tai nina geé bo ilehi ne he niing, ke é o bo pwo, beme a bwo pipaunu Caa, ke me habwii ne ko pa Nañ.¹⁴ Hemepie geé ilehi ace céiu naado ne he niing, ke é o bo pwo ne tewé.»

O ne tewé a Jenen Iitih

¹⁵ ††«Hemepie eânimewé tong, ke geé o ténédehi ni patén dong.¹⁶ ††Ke woéo, ke é bo ile Caa, beme e bo ne tewé paceli e wéikewé, ke me e mu pelewé dieli mwo:¹⁷ ††a *Jenen Iitih na e *JUJU. Pwocoon me lé hegieng ne pwo bwohemwo, be time lé alieng, ke time lé temehieng. Kehe wogewé, ke geé te temehieng be e pelewé, ke e kowé.»

Pana eânimen dong

¹⁸ «Time é uce nekewé me tice nyaa me caa tewé, kehe é bo âmwobé.¹⁹ Caa time uce bwolihi, ke ni apulie, ke o caa time lé uce aliéo. Kehe wogewé, ke geé bo te aliéo mwo, be é mulie, ke geé bo te mulie mwo.²⁰ ††É ha a tan naa, ke geé bo temehi pie woéo ko Caa, ke wogewé kong, ke woéo kowé.²¹ Wo pana e kon ni patén dong ke me e ténédehi, ke weeng pana eânimen dong. Wo pana eânimen dong, ke o eânimen Caa ten. Ke woéo mwo, ke o eânimung den, ke é o bo pihabwiié ten.»

²² Ke e pii ten wo Jude †† (time uce Judas † Iscariot, kehe pa céiu) pie: «Padaame, go woté ko ace bwopwonen me go bo pipatemehiko ne teme, koja ni apulie pwo bwohemwo?»

²³ Ke e hegi ne ten wo Iésu pie: «Hemepie eânimen pace apulie tong, ke e o ténédehi a pwooti tong. Ke o eânimen Caa ten, ke gemu bo âbé ne kon, ke gemu bo mu pelen.²⁴ ††Ke wo paceli time uce eânimen dong, ke me time e uce ténédehi a pwooti tong. Ke ni pwooti na é pii tewé, ke time e uce âbé mu kong, kehe e âbé mu ko Caa, na e neéo bé.»

† 13.34 Ioane 15.12,17; 1 Ioane 3.23; 2 Ioane 5 †† 14.3 Ioane 12.26 † 14.6 Ioane 11.25; Roma 5.1–2 †† 14.7 Ioane 8.19 †† Caa te jan—ai Geme o pipwodéén. ††† 14.9 Ioane 12.45; Kolosé 1.15; Ébéru 1.3

††† 14.10 Ioane 12.49 § 14.11 Ioane 10.38 †† 14.12 Maréko 16.19–20 ††† 14.13 Mataio 7.7; Ioane 15.16 §† 14.15 Ioane 15.10; 1 Ioane 5.3 §†† 14.16 Ioane 14.26, 15.26, 16.7 †† 14.17 Ioane 16.13 §† 14.20 Ioane 17.21–23 §†† Jude; Judas—Lupwo niin pie Jude me Judas, ke piwien he pwo grek. Wo pa Jude ce, ke wieli a niin mwo pie Tadé. Omehi Luka 6.16. §§† 14.24 Ioane 7.16

É ne tewé a péém

²⁵ «É pii tewé ninaa, he é mwo teko mu pelewé.

²⁶ Pana e bo picani tewé, ke a Jenen Iitihi, na e neeng bé wo Padué ne he niing, ke e o pacémunikewé ko ni naado ati, ke e bo paniimihi tewé ati nina é caa pii.

²⁷ «É ne pelewé a péém, ke é ne tewé mwo a péém dong. Time é uce ne tewé pwohewii a bwo ne nen de a bwohemwo. Beme time uce pinekepé ni pwonimewé, ke me time uce mwotikewé. ²⁸ †Geé caa téne ana é pii tewé pie: É o caa engen, kehe é bo mwojuia mwobé céikewé.

«Hemepie eânimewé tong, ke geé bo pipwodéén, be é â céii Caa! Be wo Caa tong, ke te nihe ubwo nang ko-jaéo. ²⁹ †É pii tewé ninaa jena, ânebuhe ace bwo tuie ne ni naado naa, be mepie lé bo tuie, ke me geé céihi ne kon. ³⁰ Caa time é bo uce nihe cihe tewé mwo, be e o caa tuie wo pa daame he a ta ne pwo a bwohemwo. Kehe o te tice aceli jan me e pwo ne kong. ³¹ Ke ni apulie pwo bwohemwo, ke lé o bo temehi pie eân-imumung de Caa, ke é o pwo nina e patupwo ne tong me é pwo.

«Geé caama, me genye engen mu éni!»

Woéo pa ju éé tabe megele

15 «Woéo, ke pa ju éé tabe megele, ke wo Caa tong, ke pa awéihi na a ni tabe megele. ² †Tai ni dihen na lé mu kong na tice acehin, ke e pétaabwon. Ke ni dihen na pwo acehin, ke e pwopweehi kon, beme nihe aca.

³ «É jena, ke caa tice tooli kowé, wonaa mu ko a pwooti na é pii tewé. ⁴ Geé mu kong, ke é o bo mu kowé. Be pwocoon me e aca na a dihe tabe megele, hemepie time uce paati ko a watihen. Ke o te wonaa ne mwo kowé, hemepie time geé uce mu kong.

⁵ «Woéo, ke pa watihen, ke wogewé ni dihen. Wo paceli e mu kong, ke é o mu kon, ke o hiwon ni acehi ni penem den. Pwocoon me geé pwo ace céiu naado hemepie tieéo kowé. ⁶ †Hemepie pwo paceli time e uce mu kong, ke o tahieng wie, pwohewii ni dihe tabe megele na caa meu. Ke genye tai, ke genye tahi ne pwo miû, beme éle.»

Wâé heme geé mu kong

⁷ «Hemepie geé mu kong, ke me e mu kowé ni pwooti tong, ke celi geé o ilehi, ke é bo ne tewé. ⁸ †Ke weengaa a bwo pipaunu Caa, hemepie hiwon ni acehi ni penem dewé. Ke me wonaa, ke geé habwii pie wogewé, ke ni acémun dong.

⁹ «Pwohewii a bwo eânime Caa tong, woéo mwo, ke te eânimumung mwo tewé. Geé mu ha a pipwoééhe tong.

† 14.28 Ioane 20.17 †† 14.29 Ioane 13.19 ‡ 15.2 Mataio 3.10 †† 15.6 Mataio 7.19, 13.42 ‡† 15.8 Mataio 5.16

¹⁰ ††Hemepie geé ténedehi ni patén dong, ke geé mu ha a pipwoééhe tong, pwohewii a bwo piténedehi nen dong ni patén de Caa, ke é mu ha a pipwoééhe ten.

¹¹ «É caa mi pii tewé ninaa, beme e mu kowé a pipwodéén dong, ke me hején a pipwodéén dewé.»

Wâé heme pieânimewé tewé

¹² ††«Weengi a patén dong: Wâé heme pieânimewé tewé, pwohewii a bwo eânimumung dewé. ¹³ †Mepie e patieden a mulihen wo pace céiu apulie me de ni ju béén, ke a inen pie junihe ubwo a bwo eânimen delé. ¹⁴ ††Wogewé, ke ni bééng, hemepie geé pwo nina é pii tewé. ¹⁵ Caa time é uce toii kowé pie ni apenem dong, be time e uce temehi wo pa apenem aceli e pwo wo pa daame hen. Kehe é caa toii kowé pie ni bééng, be é caa patemehi tewé nina é picaa mu ko Caa. ¹⁶ Time uce wogewé na geé pipégaliéo, kehe woéo na é pipégalikewé. Ke é nekewé beme geé ân, ke me pwo ce acehi ni penem dewé. Ni acehi ni penem dewé naa, ke me o mu dieli mwo. Ke nina geé bo ilehi koja Caa ne he niing, ke e bo ne tewé. ¹⁷ ††Ana é pii tewé me geé pwo: Wâé heme pieânimewé tewé.»

Lé o bo téétikewé mu kong

¹⁸ «Hemepie e téétikewé na a bwohemwo, ke wâé heme geé temehi pie e mi téétiéo ânebhewé.

¹⁹ ††Hemepie wogewé ni béé a bwohemwo, ke o eânime a bwohemwo tewé, ke o wogewé mwo ni apulie ten. Kehe time geé uce béé a bwohemwo, be é caa pipégalikewé mu pwo a bwohemwo. Ke é mu ko anaa, na e téétikewé na a bwohemwo. ²⁰ ††Geé niimihi a pwooti na é caa pii tewé: Wo pa apenem, ke time uce ubwo nang koja pa daame hen.

«Lé pwo nina ta ne kong, ke lé o te pwo tewé mwo. Me time lé uce ténedehi a pwooti tong, ke time lé o uce ténedehi mwo ni pwooti tewé.

²¹ «Ke lé o bo tai pwo tewé ati ninaa mu kong, be time lé uce temehi pana e neéo bé. ²² Hemepie time é uce âbé, ke me time é uce cihe telé, ke o te tice ta pwo telé. Kehe é jena, ke caa te tice aceli me lé pii beme pineulé ko ni ta pwo telé.

²³ ††«Pana e téétiéo, ke e te tééti mwo Caa tong.

²⁴ Mepie time é uce pwo ne hadeniilé ni penem na te tice paceli jan me e pwo, ke me o te tice ta pwo telé. Kehe é jena, ke lé caa alihi, ke lé téétikemu me Caa, ²⁵ ††beme e tuie ana tii ne he ni tii iitihi telé pie: Lé téétiéo he te tice watihen.»

Psaume 35.19

††† 15.10 Ioane 14.15; 1 Ioane 2.5 ††† 15.12 Ioane 13.34 § 15.13 Ioane 10.11; 1 Ioane 3.16 †† 15.14 Mataio 12.50 ††† 15.17 Ioane 13.34 †† 15.19 Ioane 17.14 ††† 15.20 Ioane 13.16 †† 15.23 Luka 10.16 †† 15.25 Psaume 35.19, 69.5

É nebé pa apicani tewé

²⁶ †«Hemepie e bo tuie a *Jenen Iitihí, pana e bo picani tewé ne he nii Caa, a Jenen Iitihí na e juuju, na e bo âbé mu ko Caa, ke e bo âbé patemehié ne tewé. ²⁷ Ke wogewé mwo, ke geé o bo patemehié, be geé caa mu pelong ha atabuhi kon.»

É pii tewé beme geé cumang

16 «É pii tewé ninaa be me wonaa, ke me time geé uce patieden ni céihi tewé. ² †Lé bo pawiekewé mu he ni *mwotapitihí. Ke o tuie a benaamwon na ni apulie, ke lé bo taunukewé, ke lé niimihi pie lé pipwoe-abwé te Padué. ³ †Wonaa ni bwopemilé, be time lé uce temehi Caa, ke time lé uce temehié. ⁴ É pii tewé ni pwooti naa, beme geé bo piniimihi nina é pii tewé, hemepie e bo tuie a tan naa.»

Wâé heme é engen

«Time é uce mi pii tewé ni pwooti naa, he é mwo mu pelewé. ⁵ É jena, ke é caa âmwo pele pana e neéo bé, ke te tice paceli e tahimwoéo mu hadeniwé pie: “Go â wé?”

⁶ «Ke piwahin ni pwonimewé ko ni pwooti na é pii tewé. ⁷ †Kehe é pii tewé a juuju pie: Wâé ne kowé hemepie é engen, be mepie time é uce engen, ke time e o uce tuie wo pana me e bo picani tewé. Kehe é engen, ke é bo neeng bé céiikewé.»

A penem de a Jenen Iitihí

⁸ «Ke hemepie e bo âbé, ke e o patemehi ne te ni apulie pwo bwohemwo, a ta, ke a mwomwon †, ke a tautinaado. ⁹ Be lé pitalupe ne ha a ta, be time lé uce céihi ne kong. ¹⁰ Ke lé pitalupe ne ha a mwomwon, be é â pele Caa tong, ke time geé o bo uce aliéo mwo. ¹¹ ††Ke lé pitalupe mwo ne ha a tautinaado, be caa tauti pa daame he a ta ne pwo a bwohemwo.

¹² ††«Hiwon nina me é pii tewé mwo, kehe o mwo nihe pwocoon ne kowé † jena. ¹³ Ke hemepie e bo tuie wo pa bépicaní tewé, a *Jenen Iitihí † na e *JUJU, ke e o bo péekewé ne ha a JUJU. Be time e o bo uce picihe mu kon, kehe e o bo pii nina e téne. Ke e o bo mi pii tewé nina o bo tuie. ¹⁴ E o bo habwii *a wâé tong, be e bo pé mu ko ni dong, ke e bo patemehi tewé. ¹⁵ Tai ni

† 15.26 Ioane 14.26 †† 16.2 Mataio 24.9; Luka 6.22; Ioane 9.22 † 16.3 Ioane 15.21 †† 16.7 Ioane 14.16 †† Mwomwon—Justice. Omehi mwo Mwomwon ne ha a Niinaado (Vocabulaire) ha anebwén ko a tii. ††† 16.11 Ioane 12.31 ††† 16.12 1 Korénit 3.1–2 † Nihe pwocoon ne kowé—ai Tice niihewé. †† Jenen Iitihí—Ácehi a patén ko ni bwopiinen he pwo grek (grammaire), ke wâé heme nye tii pie a

de Caa, ke te ni dong mwo. É mu ko anaa, na é pii pie: E pé mu ko ni dong ††, ke e bo patemehi tewé.»

A piwahin ke o â a pipwodéén

¹⁶ ††«Mwo pwo a cuwo benaamwon na o caa time geé uce aliéo. Ke bo pwo mwo a benaamwon na geé bo aliéo mwo ††.»

¹⁷ Ke lé pipii telé ni béé acémun den pie: «Ade aceli nimen me e pii tenye? É mu ko ade na e pii pie: “Mwo pwo a cuwo benaamwon na o caa time geé uce aliéo, ke bo pwo mwo a benaamwon na geé bo aliéo mwo”, ke “É â pele Caa”? ¹⁸ Ke he a bwopiinen pie woté: “Mwo pwo a cuwo benaamwon”? Time nye uce temehi pie e cihe ko ace de.»

¹⁹ Ke e temehi wo Iésu pie nimelé me lé tahimwoeng, ke e pii telé pie: «Geé pitahimwokewé ko ana é pii pie: “Mwo pwo a cuwo benaamwon na o caa time geé bo uce aliéo, ke bo pwo mwo a benaamwon na geé bo aliéo mwo.” ²⁰ É pii tewé a juuju pie: Geé bo é, ke geé bo mu ha a piwahin. Ke lé o bo pipwodéén ni apulie pwo bwohemwo. Geé bo mu ha a piwahin, kehe a piwahin naa, ke o bo taatééhi me a pipwodéén.

²¹ «Hemepie e picile ewa ê toomwo, ke e mu he ni picani, be caa a benaamwon na cunu nang hen. Ke hemepie e caa tuie a cuwo nahi ewa, ke e caa pineuhi a bwo cunu nang, é mu ko a pipwodéén ko a ewa na e âbeele. ²² Wogewé mwo jena, ke mwo wogewé ha a piwahin, kehe é o bo tookewé mwo, ke o bo pipwodéén mwo ni pwonimewé. Te tice paceli jan me e pé kojakewé a pipwodéén naa.»

Geé ilehi be geé o hegi

²³ ††«É ha a tan naa, ke caa time geé uce tahimwoéo ko a céiu naado. É pii tewé a juuju pie: Tai nina geé bo ilehi koja Caa ne he niing, ke e bo ne tewé. ²⁴ Dieli jena, ke mwo te tice aceli geé ilehi ne he niing. Geé ilehi, beme geé o bo hegi, ke me hején a pipwodéén dewé.»

É o caa taamwo pele Caa

²⁵ «É cihe tewé ko ninaa ne he ocine. E âbé a benaamwon na time é bo uce cihe ne mwo kowé he ocine, kehe é o caa cihe pwaatihí tewé ko Caa. ²⁶ É ha a tan naa, ke geé o ilehi ne he niing.

«Ke time é uce pii tewé pie, é o bo pwoiitihí te Caa me dewé. ²⁷ ††Be eânime Caa tewé, be eânimewé tong, ke geé céihi pie é âbé mu ko Padué. ²⁸ É wie mu ko Caa, ke é âbé ne pwo a bwohemwo. É jena, ke é ece a bwohemwo, ke é mwojuia ne mwo pele Caa.»

††† E pé mu ko ni dong—ai Nina é pii ten. †† 16.16 Ioane 14.19 ††† Ni béé tii iitihí he pwo grek, ke e hen ni pwooti ce: Be é mwojuia cemwo ne pele Caa. †† 16.23 Mataio 7.7 †† 16.27 Ioane 14.21,23

É caa piwédén koja a bwohemwo

²⁹ Ke lé pii ten ne ni acémun den pie: «Go te alihi, é jenea, ke go cihe pwaatihi, ke time go uce cihe he ocine! ³⁰ É jenea, ke geme temehi pie go temehi ati ni naado, ke time uce junaado me geme tahimwoko [be go te temehi ni âniimihinaado teme]. É mu ko anaa, ke geme céihi pie, go âbé mu ko Padué.»

³¹ Ke e hegi ne telé wo Iésu pie: «He é jenea na geé bwobe céihi? ³² †Weengi a benaamwon, ke e caa tuie. Geé o bo pipiiden ne he ni piduaan, ke geé o bo neéo cehi. Kehe time uce woéo cehi, be te e pelong wo Caa. ³³ ††É caa pii tewé anaa, beme e kowé a péém mu kong. Geé o bo mu he ni picani ne pwo a bwohemwo. Kehe geé mwoiu, be woéo, ke é caa piwédén koja a bwohemwo!»

A pwopwoiitihi te Iésu

17 Alecehe ni pwooti naa, ke e eti ni naamiin wo Iésu, ke e pii pie: «Caa, a benaamwon, ke caa tuie. Go habwii *a wâé te pa Naîm, beme e habwii a wâé tem wo pa Naîm. ² Go caa ne ten a pihuô ne ko ni apulie ati, beme e ne a mulie na tice anebwén kon ne te nina go nelé ten. ³ †Be a mulie na tice anebwén kon, ke me lé temehiko, wogo Padué na go juuju, ke pana go nebé, Iésu Kériso.

⁴ ††«É habwii a wâé tem ne pwo a bwohemwo, ke é panebwénihi ana go ne tong me é pwo. ⁵ ††Caa, é jenea, ke go habwii a wâé tong ne pelem: a wâé na go caa ne tong, he mwo te tieden a bwohemwo.»

E pwoiitihi me de ni acémun den

⁶ «É patemehiko ne te ni apulie na go nelé tong ne pwo bwohemwo: te ni apulie tem, ke he go caa nelé tong. Lé caa te ténedehi ni pwooti tem. ⁷ Ke é jenea, ke lé caa te temehi pie, tai ni naado na go ne tong, ke e te tai âbé mu kom. ⁸ Be é caa ne telé ni pwooti na go ne tong, ke lé caa hegi. Be lé caa te temehi pie é âbé mu kom, ke lé caa céihi pie wogo na go neéo bé.

⁹ «É ne kolé na é pwoiitihi. Kehe time é uce pwoiitihi ne ko a bwohemwo, kehe é ne ko nina go nelé tong, be ni apulie tem. ¹⁰ Tai nina etong, ke etem; ke nina etem, ke etong. Ke a wâé tong, ke e kolé.

¹¹ «É jenea, ke caa time uce woéo pwo bwohemwo, kehe woélé, ke te élé pwo bwohemwo. Ke é caa âmwo lé céiiko. Caa, go cilelé ne ha a niim na iitihi, a niim na go ne tong, beme céiu jélé pwohewiikenyu. ¹² ††He mwo woéo pelelé ne pwo bwohemwo, ke é cilelé ne he niim. É wéi ni apulie na go nelé tong, ke te tice paceli

tieeng, te icehi pa nahi apipatieden, beme *pajuujuhi a pwooti na caa tii.»

Go wéi nina lé mu pwo bwohemwo

¹³ «É jenea, ke é caa âdé céiiko, ke é pii ni pwooti naa ne pwo bwohemwo, beme e mu kolé a pipwodéén dong, a pipwodéén na hején. ¹⁴ É ne telé a pwooti tem.

«Ke e téétilé na a bwohemwo, be time uce ni apulie pwo bwohemwo, pwohewiéo, be time é uce âbé mu pwo bwohemwo. ¹⁵ ††Time é uce ileko me go péélé mu pwo a bwohemwo, kehe me go wéilé ne ko [*Caatana] pana ta nang. ¹⁶ Time uce ni apulie pwo bwohemwo, pwohewiéo, be time é uce âbé mu pwo a bwohemwo.

¹⁷ «Pacémunilé ko a *JUJU, be a pwooti tem, ke a JUU-JU.

¹⁸ ††«Pwohewii a bwo neéo bé ne pwo bwohemwo, ke é nelé ngemwo pwo bwohemwo. ¹⁹ É pineéo tem me delé, beme woélé mwo, ke me lé pinelé tem ha a juuju.»

E pi-ile me de ati lépwona lé o céihi

²⁰ «Time é uce pwoiitihi ne kolé cehi, kehe é ne mwo ko nina lé bo céihi ne kong mu ko ni pwooti telé. ²¹ É ilehi me céiu jélé pwohewii a bwo céiu genyu, go Caa, be wogo kong, ke woéo kom, ke me céiu jélé ne konyu. Ke me e céihi na a bwohemwo pie, wogo na go neéo bé.

²² ††«É ne telé a wâé na go ne tong, beme céiu jélé pwohewii a bwo céiu genyu: ²³ woéo kolé, ke wogo kong, beme te ju céiu jélé. Ke me e temehi na a bwohemwo pie, wogo na go neéo bé, ke me eânimem delé pwohewii a bwo eânimem dong.

²⁴ «Caa, nimung me nina go nelé tong, ke me lé mu mwo pelong ne he na é mu lang, beme lé alihi a wâé tong, a wâé na go ne tong. Be eânimem dong âneb- uhe atabuhi ko a bwohemwo. ²⁵ Caa, wogo na go mwomwon. Time e uce temehiko na a bwohemwo, kehe woéo, ke é te temehiko. Ke ni apulie tong, ke lé temehi pie wogo na go neéo bé. ²⁶ É pwo me lé temehi a niim. Ke é bo pwo mwo me lé temehi, beme a pwon- imem kong, ke me e kolé, ke me é mu kolé.»

Lé imwi Iésu

Mataio 26.47–56; Maréko 14.43–52; Luka 22.47–53

18 Alecehe a bwopiine ni pwooti naa, ke lé tahagéi a dihen Cédron wo Iésu me ni acémun den. Ke lé â taa ha a duaan na cemi acuwo hen.

² Wo Judas, pali e bwo pipwohuô ten, ke e te temehi mwo a duaan naa, be wo Iésu me ni acémun den, ke lé mu âbé nelang. ³ E pébé ni coda roma wo Judas me ni awéihi *mwaiitihi. Be lé pahedelé ngen ne ni caa te

† 16.32 Mataio 26.31,56 †† 16.33 Ioane 14.27; Roma 5.1; 1 Ioane 5.4 † 17.3 1 Ioane 5.20 †† 17.4 Ioane 4.34 †† 17.5 Ioane 1.1 ††† 17.12 Ioane 6.39, 13.18

††† 17.15 Mataio 6.13; 2 Tésalonik 3.3 § 17.18 Ioane 20.21 †† 17.22 Apostolo 4.32

ni *apwoâpwailo me ni *Farasaio. Lé ân imi ni ei helé, me ni teua.

Woéo Iésu mu Nazaret

⁴ E caa te temehi wo Iésu ati nina me lé pwo ne kon. Ke e â benilé, ke e pii telé pie: «He geé hanee?»

⁵⁶ Ke lé hegi ne ten pie: «Wo Iésu mu Nazaret.»

Ke e pii telé pie: «*WOÉO.»

Ke lé te pitidicemwo † kuti, ke lé tai tupwo ne pwo bwohemwo, woélé me Judas, pali e icueng. ⁷ Ke e tahimwolé mwo wo Iésu pie: «He geé hanee?»

Ke lé pii mwo pie: «Wo Iésu mu Nazaret.»

⁸ Ke e hegi ne telé pie: «É caa ko pii tewé pie WOÉO. Hemepie geé ko haneéo, ke geé ne lépwoje me lé engen!»

⁹ †E pii anaa, beme e cuwo a pwooti na e pii pie: «Te tice pace apulie celi tieeng mu ko nina go nelé tong.»

¹⁰ Ke e te céi kuti a teua ten wo Simon Pétéru mu ha a mwon, ke e tahi ko Malkus, pa apenem de pa *daame he lépwo apwoâpwailo, ke e tahagéi a jéenen ne pwo jui.

¹¹ *Ke e pii wo Iésu te Pétéru pie: «Go ne homwo a teua tem ha a mwon! Woté, pwocoon me é ûdu a tabe ha a mwotabe ko picani na e ne tong wo Caa?»

Ne pele pa daame @ he lépwo apwoâpwailo

Mataio 26.57–75; Maréko 14.55–72; Luka 22.54–71

¹² Lé imwi Iésu ne ni coda, me pa caa telé, me ni awéihi mwaiitihi, ke lé cieeng. ¹³ Lé mi pééeng nge céii Hanne †, be pa mwaa Kaïfe, pa daame he lépwo apwoâpwailo ha a jo naa. ¹⁴ ††Kehe wo Kaïfe li e ne ali pi-huô, ne te ni *Juif pie: «Wâé hemepie e mele wo pana céiu nang me de a puapulie ati.»

Lu piâcén wo lupwo acémun den

¹⁵ Lu âcéi Iésu wo Simon Pétéru me pa céiu acémun den. Wo panaa, ke e te temehieng wo pali daame he lépwo apwoâpwailo. Ke e â taa pwo napwomwo pele pa daame he lépwo apwoâpwailo.

E piwotétaa ko Iésu wo Pétéru

¹⁶ E cuwo pwomwo cebwo a pomwa wo Pétéru, ke wo pali acémun béén ††, ke e cihe ne ko ê toomwo awéihi pomwa, beme e pwo me e taa wo Pétéru.

¹⁷ Ke e pii te Pétéru wo êje pie: «He time uce wogo pa céiu *acémun de Iésu?»

Ke e hegi ne ten pie: «Ûhu!»

† Pitidicemwo—Reculer. †† 18.9 Ioane 17.12 † 18.11 Mataio 26.39 †† Hanne—Pa apwoâpwailo ubwo mu ko 6 die ko 15 alecehe J.-C. Alecehen, ke lé mwo pii kon pie 'pa apwoâpwailo ubwo', ke pa apulie na ubwo nang ne ha a mwohuô te lépwo Juif. †† 18.14 Ioane 11.49–51 ††† Wo pali acémun béén—Grek: Wo pali céiu acémun li e temehieng wo pali daame he lépwo apwoâpwailo.

¹⁸ Ke e â pwocadéu pele ni apenem me ni awéa na lé caa patéi miû, be ubwo a bwala.

E tahimwo Iésu wo Hanne

¹⁹ Wo [Hanne] pali daame he lépwo apwoâpwailo [ânebun] ke e tahimwo Iésu ko lépwo acémun den, ke é ko ni cémun na e ne telé.

²⁰ Ke e hegi ne ten wo Iésu pie: «É mu te cihe pwaatihi ne tewé. É mu te pacémuni ni apulie ne he ni *mwotapitihi, ke é ne *huâ iitihi, he na lé mu te pipitilé nelang ne ni Juif. Ke te tice celi é pipii neduwohi. ²¹ É mu ko ade na go tahimwoéo ko nina é pii? Go tahimwo lépwo na lé téneéo, be lé te temehi nina é pii.»

²² He e ko pii anaa wo Iésu, ke e tahi kon a in wo pa céiu awéihi mwaiitihi, ke e pii ten pie: «Go wonaa a bwo hegi ne te pa daame he lépwo apwoâpwailo?»

²³ Ke e pii ten wo Iésu pie: «Hemepie ta ace bwo hegi nen, ke go pii tong aceli ta celi é pii. Ke hemepie wâé ace bwo hegi nen dong ne ten, ke é mu ko ade na go ahiéo?»

²⁴ Ke wo Hanne, ke e ne Iésu, he teko cieeng, nge céii Kaïfe, pa daame he lépwo apwoâpwailo [ha a benaam-won naa].

E piwotétaa mwo wo Pétéru

²⁵ Mepwo wo Simon Pétéru, ke e mwo ko pwocadéu. Ke lé pii ten pie: «Wogo, ke he time uce pace céiu acémun den?»

Ke e hegi ne telé pie: «Ûhu, time é uce béélé.»

²⁶ E mu hadeniilé wo pa céiu apenem de pa daame he lépwo apwoâpwailo, pa béé pali e tahagéi ali jéenen wo Pétéru. Ke e pii mwo ten pie: «He time uce wogo pana é alikeu me Iésu, ne ha ali duaan li cemi acuwon hen?»

²⁷ †††Ke e piwotétaa mwo wo Pétéru, ke e pii pie: «Ûhu!»

Ke e te to kuti ali ja.

Wo Iésu ne ânebuhe Pilate

Mataio 27.11–31; Maréko 15.2–20; Luka 23.1–25

²⁸ He mwo ju acaama, ke lé pé Iésu mu pele Kaïfe, nge he pomwa te *Pilate, pa gupéno te lépwo Roma. Time lé uce taa ha a mwa wo lépwo apihuô juif [be time uce pa Juif wo Pilate] beme time e uce mu kolé a ta, hemepie lé pé a wiinaado ko *Pacika.

²⁹ Ke e wie benilé wo Pilate, ke e pii pie: «Ade aceli ta celi e pwo pa apulie ce, beme geé pipé ne kon?»

³⁰ Ke lé hegi ne ten pie: «Hemepie paceli te tice ta pwo ten, ke me time geme o uce neeng dem.»

³¹ †É mu ko anaa, ke e pii telé wo Pilate pie: «Geé pééeng, ke geé tautieng âcehi ni patén dewé.»

††† 18.27 Ioane 13.38 § 18.31 Ioane 19.6–7

Ke lé pii wo lépwo Juif pie: «Te tice mwomwon deme me geme taunu pace céiu apulie.»

³² †E tuiebé ninaa, beme cuwo ni pwooti na e caa pii wo Iésu. Be e caa mi pii telé a bwomune ace bwo mele ten ††.

Time uce e éni a Mwametau tong

³³ E taa ha a mwa wo Pilate, ke e tode Iésu ke e pii ten pie: «He wogo pa daame he ni Juif?»

³⁴ Ke e hegi ne ten wo Iésu pie: «He go te pipii a pwooti na mu kom, ai lé pii tem ne ce béén?»

³⁵ †Ke e hegi ne ten wo Pilate pie: «Kona woéo, ke he pa Juif? Be lé neko tong na a puapulie tem me ni caa te lépwo apwoâpwailo. Ke he ade aceli go pwo?»

³⁶ Ke e hegi wo Iésu pie: «Time uce e éni pwo bwohemwo a Mwametau tong. Be hemepie wonaa, ke wieli lé o pwopaing ne ni eabwé tong, beme time uce neéo te ni apihuô juif. Be a Mwametau tong, ke time uce e éni pwo bwohemwo.»

³⁷ Ke e tahimwoeng wo Pilate pie: «Wogo, ke he pa daame?»

Ke e hegi ne ten wo Iésu pie: «A *JUJU a bwopiinen dem. Woéo, ke é âbeele ke é âbé ne éni pwo bwohemwo, beme é patemehi a JUJU. Ke lé téne a pating ati ne ni apulie na e kolé a JUJU.»

³⁸ Ke e hegi ne ten wo Pilate pie: «A JUJU, ke he ade?»

Nimelé ko Barabas

He e caa pii ni pwooti naa, ke e wie mwo, ke e â beni lépwo Juif. Ke e pii telé pie: «É ne kong, ke te tice aceli ta celi jan me e pwocuhinaado kon wo pa apulie ce.

³⁹ Caa te cemang ne kowé, me é pwo me e wie mu he karépu wo pace céiu apulie, ha a tan ko Pacika. Ke woté? Nimewé me é patupwo ne tewé mwo pa daame he ni Juif?»

⁴⁰ Ke lé tai toii da ko miiden ko pii pie: «Ûhu! Time uce weeng, kehe wo Barabas.» Wo panaa, ke pa apulie na te junihe ta nang ††.

Lé pwotahinaado ne ko Iésu

19 Ke e pahede ni coda wo *Pilate me lé pé Iésu, ke me lé ahieng ko bwaliwota.

² ††Ke lé pihoonieng ne ni coda: Lé péi a kuron ko ni mii acuwo na pwo dan, ke lé neole pwo punin. Ke lé pwo me e cuwohe a epwén na te junihe megele [pwohewii a epwéne pa apulie na piubwo nang]. ³ Ke lé âbé mwonueng, ke lé pii pie: «Bwocu, go pa daame he ni *Juif! Adéiko!» Ke lé ahi a pwahamiin.

† 18.32 Ioane 3.14, 12.33 †† Ace bwo mele ten—Cemeiteeng ne ko a kuricé, âcehi a bwo taunuhi apulie te lépwo Roma. ‡ 18.35 Ioane 1.11 †† Junihe ta nang—Wieli wo Barabas, ke e pwopa ne ko lépwo Roma (ni coho na lé pwohuu te lépwo eapwihii amu). Ke é mu ko anaa, na wâé te ni apulie nang. †† 19.2 Luka 23.11

Cemeiteeng ne ko a kuricé!

⁴ E wie mwo wo Pilate, ke e pii te ni Juif pie: «Geé téne, é pééeng wie, beme geé temehi pie te tice aceli é tooli ne kon celi ta ke me e pwocuhinaado.»

⁵ Ke e wie wo Iésu, he e pwo punin ali kuron li pwo dan, imi a epwén na megele. Ke e pii telé wo Pilate pie: «Weengi pali apulie!»

⁶ He lé alieng ne ni caa te ni *apwoâpwailo me ni awéihi *mwaiitihii, ke lé toii da pie: «Cemeiteeng! Cemeiteeng ne ko a *kuricé!»

Ke e pii telé wo Pilate pie: «Geé te pééeng me geé cemeiteeng, be é ne tong, ke te tice ace ta celi é tooli ne kon beme e pwocuhinaado.»

⁷ Ke lé hegi ne ten ne ni Juif pie: «Pwo a patén deme, ke é ne ha a patén naa, ke tii pie wâé heme e mele, be e pii pie weeng, ke pa *Naî Padué.»

E tahimwoeng mwo wo Pilate

⁸ He e téne a pwooti naa wo Pilate, ke te nihe mwo-tieng. ⁹ ††Ke e taa huâ, ke e pii te Iésu pie: «Wogo, ke he pa apulie mu wé?»

Ke time e uce hegi ne ten wo Iésu. ¹⁰ Ke e pii ten wo Pilate pie: «He woéo na muhi tem me go cihe tong? He time go uce temehi pie jan ne kong me é patupwoko, ke jan ne kong me é cemeiteko?»

¹¹ †††Ke e hegi ne ten wo Iésu pie: «Te tice aceli jan ne kom me go pwo tong, hemepie time uce ne tem mu he miiden ace pihuô ne kong. É mu ko anaa, ke te nihe ubwo a ta pwo te pana e icuéo ne tem.»

Nimen me e pawieeng mwo

¹² §Ke e hane wo Pilate me e patupwoeng. Kehe lé wiikau ne ni Juif, ke lé pii pie: «Hemepie go patupwoeng, ke time uce wogo pa béé pa daame ubwo César. Be wo pana e pii pie weeng pa daame, ke pa apwobwoni César!»

¹³ He e caa téne ni pwooti naa, ke e pé wie Iésu wo Pilate, ke e tebwo pwo atebwo te pa atautinaado, ne he na pii kon lang pie 'Cour pavée'; he pwo *ébéru, ke lé pii pie Gabata.

¹⁴ A tan naa, ke a tan na lé piwâam ne ko a *Pacika hen. Ke caa goahen. Ke e pii wo Pilate te ni Juif pie: «Neko pa daame hewé!»

¹⁵ Ke lé wiikau ke lé pii pie: «Me taunueng! Me taunueng! Cemeiteeng ne ko a kuricé!»

Ke e pii telé wo Pilate pie: «Me é cemeite pa daame hewé ne ko a kuricé?»

Ke lé hegi ne ni caa te ni apwoâpwailo pie: «Te tice pace céiu daame heme koja pa daame ubwo César!»

††† 19.9 Mataio 27.12 ††† 19.11 Ioane 10.18; Apostolo 2.23; Roma 13.1 § 19.12 Luka 23.2; Apostolo 17.7

¹⁶ Ke e neeng delé beme lé cemeiteeng ne ko a kuricé. Ke lé pé Iésu ngen wo lépwo coda.

Lé cemeite Iésu ne ko a kuricé

Mataio 27.33–50; Maréko 15.22–37; Luka 23.33–46

¹⁷ E pé a kuricé ten wo Iésu, ke e wie mu ha a pwomwo ubwo, beme e â ha a céiu duaan na pii kon pie Golgota he pwo ébéru, a bwopiinen pie 'pwo a piipuni apulie'. ¹⁸ É nelang he na lé o cemeiteeng ne ko a kuricé, me lupwo alo apulie, woilu he lupwo piduaan, ke wo Iésu ha awiemelu.

¹⁹ Ke e pwo me lé tii ne ko a ba-acuwo a céiu atii wo Pilate, pie: *IÉSU MU NAZARET, PA DAAME HE LÉPWO JUIF*, ke lé cemeite ne ko a kuricé.

²⁰ Lé tii he pwo ébéru, *grek, ke *latin*, be a duaan na lé cemeite Iésu ne ko a kuricé ne hen, ke é mwonuhi a pwomwo ubwo.

Ke hiwon ni Juif na lé pine.

²¹ Kehe lé pii te Pilate ne ni caa te ni apwoâpwailo, pie: «Go nemwo tii pie “Pa daame he ni Juif”, kehe go tii pie “*E pii pie* woéo pa daame he ni Juif.”»

²² Ke e hegi ne telé wo Pilate pie: «Ana é tii, ke é caa te tii.»

Lé pipwopii ni epwénen

²³ He lé caa cemeite Iésu ne ko a kuricé, ke lé pé ni epwénen ne ni coda, ke lé pipii me paa ni mwoto kon, me pipétaalé. Ke lé pé mwo a epwénen na te tice awoli kon, a mwaanu na hején, ²⁴ †ke lé pipii telé pie: «Genye nemwo tie, kehe genye céi metii ne kon, beme genye temehi pie woo paceli e bo pé.»

Beme pacuwohi a pwooti na caa tii ne he ni tii iitihhi pie:

*Lé pipatihhi ne kolé ni epwénung,
ke lé picéi metii ne kon. Psaume 22.19*

Weengaa ana lé pwo ne ni coda.

Lé alieng ne ni apulie ten

²⁵ ††Lé cuwo mwonuhi a kuricé te Iésu wo nyaa ten, ke é ciéé nyaa ten, ke wo Maria mwode Klopas, ke wo Maria mu Magdala.

²⁶ †Ke e ali nyaa ten wo Iésu ne cebwo pa acémun den na te nihe eânimen den ††, ke e pii te nyaa ten pie: «Nyaa, neko pa naîm.»

²⁷ Ke e pii te pali acémun den pie: «Neko nyaa tem.»

Ke tabuhi ha a tan naa, ke e pé nyaa ten wo pali acémun den ne he pomwa ten.

E mele wo Iésu

²⁸ ††Alecehe anaa, ke e temehi wo Iésu pie caa cuwo ati ni penem na e ne ten wo Caa. Ke e pii pie: «Nimung me é ûdu», beme e pajuujuhi ana caa te tii ne he ni tii iitihhi.

²⁹ ††E mu lang a mwotabe na oba ko a tabe megele na maga. Ke lé pate hen a mwaanu ne ni coda, ke lé cie ne ko a dihe *hysope*, ke lé ne mwonuhi a pwon.

³⁰ Ke me e ûdu a tabe maga wo Iésu, ke e pii pie: «É caa tai pacuwohi.»

Ke e miibule, ke e ne a jenen.

E woli a céiu duaan wo pa céiu coda

³¹ ††[He paciile] a tan na lé piwâam ko a *tan iitihhi telé wo lépwo Juif. Ke te time uce wâê te ni apihuô, hemepie lé mwo te mu ko a kuricé ni éé † Iésu me lupwo alo béén, ha a tan iitihhi. Be a tan iitihhi naa, ke te nihe pwnaado ne kon. Ke lé ile Pilate me e tatubwi ni alé [beme lé epin ko mele] ke me lé pé ni éélé mulang.

³² Ke lé âbé ne ni coda beme lé tatubwi ni a pa bécéi-uhén, ke lé tatubwi mwo ni a pa béalohen, lupwo apwocuhinaado na cemeitelu ne ko ni piduaa Iésu. ³³ Ke me lé âbé mwonu Iésu, ke lé alihi pie e caa mele, ke time lé uce tatubwi ni an. ³⁴ Kehe pwo pa coda na e woli a céiu duaan ko a da, ke e te wie kuti a cewéle me a tabe. ³⁵ ††Wo pana e alihi ninaa, ke e uti, ke ana e uti, ke a juuju. E te temehi pie e pii a juuju. E pajuujuhi beme geé céihi mwo wogewé. ³⁶ ††E tuie anaa, beme pajuujuhi nina tii ne he ni tii iitihhi, pie: *Te tice ace duun celi tatubwi.*

Exode 12.46

³⁷ ††Ke: *Lé o bo alieng wo lépwona lé wolieng.*

Zakari 12.10

Neeng he iitihhi

Mataio 27.57–61; Maréko 15.42–47; Luka 23.50–56

³⁸ Pwo pa céiu apulie mu Arimaté na pii kon pie Josef. Pa céiu *acémun de Iésu, na e te pineduwoeng, be mwotieng ko ni apihuô juif. Ke e â ilehi a éé Iésu koja Pilate. Ke e te neeng wo Pilate, me e â pé a éé Iésu. ³⁹ ††Ke e âbé céin wo Nikodème, pali e caa mi too Iésu he bwén. E pébé lupwo tabe ûde na e pineibuhi, na *30 kilo, a myrrhe* ke a *aloès*.

⁴⁰ Ke lu pé a éé Iésu, ke lu tawii ko ni mwaanu, ke lu céihi a tabe ûde, be te a bwomu te ni Juif heme lé pineduwohi apulie. ⁴¹⁻⁴² Ke lu pééeng nge ha ali duaan li cemi acuwo hen, be e mwonuhi a duaan na lé taunu Iésu

†† 19.28 Psaume 22.16 ††† 19.29 Psaume 69.22 ††† 19.31 Deutéronome 21.22–23 † Hemepie lé mwo te mu ko a kuricé ni éé...ha a tan iitihhi—A naado na mwiihi âcehi a patén de lépwo Juif. Omehi Deutéronome 21.22–23. †† 19.35 Ioane 21.24 ††† 19.36 Exode 12.46; Nombres 9.12; Psaume 34.21 †† 19.37 Zakari 12.10; Pii Beetihhi 1.7 ††† 19.39 Ioane 3.1–2

† 19.24 Psaume 22.19 †† 19.25 Mataio 27.55–56 † 19.26 Ioane 13.23 †† Pa acémun den na te nihe eânimen den—Wieli wo Ioane. Omehi note

ne hen, ke e lang mwo a bwomu na mwo te tice apulie hen. [Lu piepin ko neduwoeng lang] be o caa tabuhi a tan iitihî † [he babwén, ke iitihî me lé neduwo ni amele ha a tan iitihî].

E mulie cemwo wo Iésu

Mataio 28.1–7; Maréko 16.1–8; Luka 24.1–12

20 He pwoiitihî pwopwometan, ke e â he iitihî wo Maria mu Magdala. Ke e alihi pie caa titéehi ali péi mu ânebuhe a bwomuhe Iésu. ² Ke e téte hane Simon Pétéru, ke pa céiu acémun den na eânime Iésu ten. Ke e pii telu pie: «Lé caa pé Padaame mu ha ali mwa péi, ke time geme uce temehi he celi lé neeng lang!»

³ Lu wie wo Pétéru me pa céiu acémun den, ke lu â ha ali mwa péi. ⁴ Lu tai téte, kehe e piepin wo pa céiu acémun den koja Pétéru, ke e mi tuie ngen. ⁵ E â pi-oole da, ke e alihi ni mwaanu na lé mu pwo bwohemwo, kehe time e uce taa. ⁶ Ke e tehenebé wo Simon Pétéru, ke e taa ha ali mwa péi he li lé ne Iésu lang. Ke e alihi ni mwaanu na lé mu pwo bwohemwo. ⁷ Kehe a mwaanu na lé tawii a puni Iésu kon, ke time e uce mu he ni béé mwaanu. Be te capipihî, ke ne ha a céiu duaan.

⁸ E bwo uce alecehe Pétéru wo pali béén, ke e taa ha ali mwa péi, ke e alihi [pie te tie Iésu lang] ke e céihî [pie e mulie cemwo mu ha amele]. ⁹ ††Kehe time lu uce téele temehi pie, caa mi tii ne he ni tii iitihî pie, e o bo mulie cemwo. ¹⁰ Ke lu mwojuia ne mwo pelelu.

E pihabwiieng ne te ni apulie ten

Mataio 28.9–10; Maréko 16.9–11; Luka 24.35–49

—Maria mu Magdala

¹¹ Mepwo é ne ko Maria, ke e teko cuwo ko é pwomwo, cebwo ali mwa péi. He e ko é, ke e pi-oole da, ¹² ke e ali lupwo *âcélo na lu cuwohe ni epwén na pwojo, na lu ko tebwo he li e mu lang a éé Iésu. Pa céiu, ke e tebwo he na e lang a punin, ke wo pa céiu, ke e tebwo he na e mu lang ni an. ¹³ Ke lu pii ten pie: «Êje, he go é kona woté?»

Ke e hegi ne telu pie: «É é niimi Padaame hung, be time é uce temehi he celi lé neeng lang.»

¹⁴ †He e ko pii anaa, ke e biteeng, ke e ali Iésu he e ko cuwo, kehe time e uce temehi pie weeng. ¹⁵ Ke e pii ten wo Iésu pie: «Êje, he go é kona woté? He go hanee?»

E niimihi pie pana e cihe ten, ke pa apenem he ni ni acuwo. Ke e pii ten pie: «Hemepie wogo na go pééeng, ke go pii tong he celi go neeng lang, beme é bo â pééeng.»

† O caa tabuhi a tan iitihî—Grek: Be a tan naa, ke lé piwâam ko a tan iitihî te ni Juif. †† 20.9 Apostolo 2.24–32; 1 Korénit 15.4 † 20.14 Luka 24.16; Ioane 21.4

¹⁶ Ke e pii ten wo Iésu pie: «Maria!»

Ke e niê ocemwo, ke e pii ten he pwo *ébéru pie: «*Rabouni!*», a bwopiinen pie 'pa apipune'.¹⁷ ††Ke e pii ten wo Iésu pie: «Go nemwo ti kong, be mwo time é uce téele taa pele Caa. Kehe go â too ni bééng, ke go pii telé pie, é o caa taa pele Caa tong, pa Caa tewé mwo; céii Padué hung, Padué hewé mwo.»

¹⁸ Ke e te engen kuti wo Maria, ke e â patemehi te ni *acémun de Iésu pie: «É ali Padaame!» Ke e uti telé a bwo picihé telu.

—Ni acémun den

¹⁹ Ha a babwén naa, ke lé pimu ibu ne ni acémun den, ke lé capuhi ni pomwa, be mwotilé ko ni apihuô juif. Ke e te pihabwiieng kuti ne ha awiemelé wo Iésu, ke e pii telé pie: «Me e mu pelewé a péém!» ²⁰ ††He e caa pii telé ninaa, ke e habwii ni naatiin, ke a duaan. Ke te nihe piwâénime ni acémun den, he lé ali Padaame.

²¹ Ke e pii telé mwo wo Iésu pie: «Me e mu pelewé a péém! Pwohewii a bwo neéo bé te Caa, woéo mwo, ke é nekewé ngen.»

²² Alecehe ni pwooti naa, ke e cuulé, ke e pii telé pie: «Geé hegi a *Jenen Iitihî! ²³ ††Ni apulie na geé pineuhi ni ta pwo telé, ke o te pineuhi, kehe nina time geé uce pineuhi ni ta pwo telé, ke e o te mu kolé.»

—Toma

²⁴ Toma, na pii kon pie 'pa Péidu', pa céiu béé ni 12 acémun den, ke tieeng hadeniilé he e âbé wo Iésu.

²⁵ Ni béé acémun de Iésu, ke lé pii te Toma pie: «Geme ali Padaame!»

Kehe e pii telé pie: «Hemepie time é uce alihi ne he naatiin a ahi toki, ke me time é uce ne kon a mwodéing, ke me time é uce ne ko a duaan a ing, ke time é uce céihî!»

²⁶ Alecehe a naadenitan na céiu, ke lé pitoolé mwo ne ha a mwa wo lépwo acémun de Iésu, ke e mu pelelé wo Toma. Ke lé tai capuhi ni pomwa ko kilé. Ke e âbé wo Iésu, ke e cuwo hadeniilé. Ke e pii pie: «Me e mu pelewé a péém!»

²⁷ Ke e pii te Toma pie: «Nebé éni a mwodéim, ke go alihi ni ing. Ne mwobé a im, ke go ne ko a duaang. Nemwo pwo me pinekepé a pwonimem, kehe go céihî!»

²⁸ Ke e hegi ne ten wo Toma pie: «Padaame hung ke Padué hung!»

²⁹ †††Ke e pii ten wo Iésu pie: «Go céihî be go aliéo. *Adéi lépwona time lé uce alihi, kehe lé céihî!»

†† 20.17 Roma 8.29; Ébéru 2.11–12 †† 20.20 Ioane 16.22; 1 Ioane 1.1 ††† 20.23 Mataio 16.19 ††† 20.29 1 Pétéru 1.8

É ko ade na tii a tii ce?

³⁰ Hiwon ni béé *inenaado na pwojunuun na e pwo wo Iésu, ne he pwahamii ni acémun den, kehe time uce tii ati ne ha a tii ce. ³¹ †Kehe nina tii ne éni, ke e ne beme geé céihi pie wo Iésu, ke pa *Mesia, pa *Naî Padué. Ke mepie geé céihi, ke etewé a mulie ne he ni-in.

É ticepwon ne Galilé

21 Alecehe anaa, ke e pihabwiieng wo Iésu ne te ni acémun den, ne ko jije a *jié Galilé ††. Woni a bwo pihabwiieng ne telé:

² Simon Pétéru, Toma na pii kon pie 'pa Péidu', Natanaël ‡ na e âbé mu Kana ne Galilé, lupwo naî Zébédé, me lupwo alo *acémun de Iésu, ke lé pitoolé nelang.

³ ††Ke e pii telé wo Simon Pétéru pie: «É mwo â pwo tau.»

Ke lé hegi ne ten pie: «Geme âdé céim.»

Ke lé wie, ke lé taa pwo ong. Ke é ha a bwén naa, ke te tice âpéhelé.

⁴ He mwo ju acaama, ke e mu ticepwon wo Iésu. Kehe time lé uce temehi ne ni acémun den pie weeng.

⁵ Ke e pii telé pie: «Lépwoje, te tice ikua tewé?»

Ke lé hegi ne ten pie: «Úhu.»

Lé temehi Iésu

⁶ Ke e pii telé pie: «Geé tahi a pua nge pwo jui ne ko a ong, ke geé bo tooli.»

Ke lé tahi a pua, ke te nihe pwocoon me lé céida mwobé, be te junihe hiwon ni ikua. ⁷ ††Ke e pii te Pétéru wo pa acémun na eânime Iésu ten, pie: «Wo Padaame!»

Ke me e te téne anaa wo Pétéru, ke e epin ko apilihi kon ni epwénen, ke e téele ole he tabe. ⁸ Ke lé âbé pwo ong ni béé acémun den, he lé ko céi a pua, be te nihe oba ko ikua. Be time uce élé ité ††† kojan ticepwon. ⁹ He lé caa ole mu pwo ong, ke lé alihi ni daapi na éle, na e pwon ni ikua, ke pwo ni pwoloa cebwon.

¹⁰ Ke e pii telé wo Iésu pie: «Geé pébé ce béé ikua mu ko ni âpéhewé.»

¹¹ †††Ke e taa pwo ong wo Simon Pétéru, ke e céi ali pua, ke te ju oba ko ni pilehe ikua na 153. Kehe time uce tie a pua.

¹² Ke e pii telé wo Iésu pie: «Geé âbé pé celi me geé wii!»

† 20.31 Ioane 3.15; Roma 1.17; 1 Ioane 5.13 †† Galilé—Grek: Tibériade. Omehi a jilé Galilé ne ha a Niinaado (Vocabulaire) ha anebwén ko a tii. ‡ Natanaël—A niin pie Bartélemi ne he ni tii te Mataio, Maréko me Luka. †† 21.3–6 Luka 5.4–7 ††† 21.7 Mataio 14.29; Ioane 13.23 †††† Time uce élé ité... Patemehi he pwo grek pie: É nge he na 100 mètre. †††† 21.11 Luka 5.6

Ke te tice pace acémun den celi e tahimwoeng pie: «Wogo, ke he woo?» Be lé te tai temehi pie wo Padaame.

¹³ Ke e âbé mwonulé wo Iésu, ke e pé a pwoloa ke e patihi ne kolé, ke e pé mwo a ikua, ke e ne telé.

¹⁴ †Caa a béciéhe ni bwo pihabwiieng ne te ni acémun den, tabuhi he e mulie cemwo mu ha amele.

Lu piche wo Iésu me Pétéru

¹⁵ Alecehe a bwo wiinaado telé, ke e tahimwo Simon Pétéru wo Iésu pie: «Simon, pa naî Jonas ††, te eânimem dong koja lépwoje?»

Ke e hegi ne ten pie: «Éa, go Padaame, go te temehi pie eânimung dem.»

Ke e pii ten wo Iésu pie: «Go ne ce wiinaado te ni nahi muto tong.»

¹⁶ †††Ke e pii ten mwo a béokelohen pie: «Simon, pa naî Jonas, te eânimem dong?»

Ke e hegi wo Pétéru pie: «Éa, go Padaame, go te temehi pie eânimung dem.»

Ke e pii ten wo Iésu pie: «Go wéihi ehi ni muto tong.»

¹⁷ Ke e pii ten mwo a béociéhen pie: «Simon, pa naî Jonas, te eânimem dong?»

Ke ju piwahin a pwonime Pétéru ko ana e caa ocié ko pii ten pie: «Te eânimem kong?» Ke e hegi ne ten pie: «Padaame, go te temehi ati ni naado, ke go te temehi pie eânimung dem!»

Ke e pii ten wo Iésu pie: «Go ne ce wiinaado te ni muto tong. ¹⁸ É pii tem a juuju pie: He mwo ewa go, ke go te pine cehi a taihenam, ke go â he na nimem me go â lang. Ke hemepie bo caa ukéiu go, ke go bo eti ni im, beme e cie a taihenam wo pace céiu apulie. Ke e o bo pééko nge he na time uce nimem me go â lang.»

¹⁹ †††E pii anaa, beme e patemehi te Pétéru ace bwo mele ten †††, beme e habwii *a wâé te Padué.

Ke e pii ten pie: «Go âbé céing!»

Wo pana eânime Iésu ten

²⁰ ††Ke e niê ocmwo wo Pétéru, ke e ali pa céiu acémun den he e âbé céilé, pali te nihe eânime Iésu ten, pali e pioole nge céii Iésu he li lé wiinaado, ke e pii ten pie: «Padaame, he woo paceli e bo icuko?»

²¹ He e alieng, ke e pii te Iésu wo Pétéru pie: «Padaame, wo paje, ke ade aceli e bo tuie ne kon?»

²² Ke e pii ten wo Iésu pie: «Hemepie nimung me e mulie dieli hemepie é bo âmwobé, ke te tice aceli me go pii ne kon. Kehe wogo, ke go âbé céing!»

²³ É mulang, ke a bwopiinen naa, ke lé caa pii ne ni acéihi pie, pa acémun naa, ke time e o uce mele. Kehe time e uce pii wo Iésu te Pétéru, pie: «Time e o uce

§ 21.14 Ioane 20.19,26 †† Jonas—ai Ioane. ††† 21.16 Apostolo 20.28 ††† 21.19 Mataio 16.24–25; 2 Pétéru 1.14 †††† Ace bwo mele ten—A bwo mele te Pétéru. A bwopiinen pie, lé o taunu Pétéru wo lépwona lé cubwonieng. †† 21.20 Ioane 13.23–25

mele.» Kehe e pii pie: «Hemepie nimung me e mulie dieli hemepie é bo âmwobé, ke te tice aceli me go pii ne kon.»

²⁴ †Te wo pa acémun naa, na e uti ni pwooti ce, ke e tii mwo. Ke geme temehi pie nina e uti, ke ni juuju.

²⁵ ††Nihe hiwon ni béé naado na é pwo wo Iésu. Kehe mepie lé tii ati nina e pwo, ke é niimihi pie time uce jan ne ko a bwohemwo ati me e mu hen ni tii na lé tii ne kon!

† 21.24 *Ioane 19.35* †† 21.25 *Ioane 20.30*

Apostolo

Atabuhi ko a tii

Woo na e tii a tii ce?

Te wo Luka, pana e tii a . E tabuhi âcéi apostolo Paulo ha awieme a béalohe bwo engen de Paulo. Tabuhi mu ko a niide a tii 16.10, na e tii pie: « engen...»

E tii éniile?

Ha awieme a jo 61 me 65, alecehe a bwo tabuhi mu he karépu te Paulo ne Rome. (Omehi a pwahamii tii 27—28.)

E tii me dee?

Te pa céiu apulie na pii kon pie Téofile, pa céiu apulie na piubwo nang ne pele lépwo Roma. Omehi Atabuhi ko a tii .

É ko ade na e tii?

E pinebehi a bécéiuhe tii ten. Ne ha a , ke e piuti a mulihe Iésu, me a bwo mele ke mulie cemwo ten. Ke é ne ha a tii ce, a tii , ke e pipatemehi ngen a Pwooti Wâé mu Iérusaléma, ke ati a amu Judé me Samari die Rome, a pwomwo na te junihe ubwo ne pwo a bwohemwo ha a benaamwon naa. Be e mu ko lépwo apostolo a junuu a Jenen Iitih, beme lé pwo ali e pwo wo Iésu.

Wieli nime Luka me e habwii mwo te lépwo Roma (na lépwo apihuô ne he ni amu na hiwon) pie, wo lépwo acéi-hi ne ko Iésu, ke lépwo apulie na lé te pipwoiipihi ni mulihelé, be time uce nimelé me lé iluuhi a amu.

Ade ace âne a tii ce?

E tabuhi ko a bwo opé te a Jenen Iitih ne ko lépwo apostolo (pwahamii tii 2). Ne he ni pwahamii tii 3—12, ke e piuti ni penem de Pétéru me lépwo béén ne ha a pwomwo ubwo Iérusaléma, me a amu Judé, die ha amu na e mwonuhi, Samari.

É ha atabuhi kon, ke wo lépwo acéihi ne ko Iésu, ke te tai lépwo Juif. Ke time uce nimelé me lé patemehi a pwooti te ni béén na time uce lépwo Juif. Kehe icehi ana wo Padué, ke e habwii te Pétéru pie, a Pwooti Wâé, ke te tai a de ni bele pwo bwohemwo (pwahamii tii 10—11, me 15).

Nye pine ne ha a pwahamii tii 9 a bwo tode Paulo, pali apulie li e te junihe pwotahi ne ko ni acéihi ânebun. Ke e biteeng, ke e âcéi Iésu. É he ni pwahamii tii 13—28, ke wo Luka, ke e piuti ni penem de Paulo, ne he ni bwo engen den na cié, nge he ni amu na hiwon. E pipatemehi a Pwooti Wâé, ke e tabuhi ni puco te ni acéihi, ke e pamwoiu lépwo acéihi na élé lang, die Rome, ha a pwahamii tii 28, ha a jo 62.

Ni tii te Paulo die ko , ke e tii nge céii lépwo acéihi he ni duaan naa, li e mi mu hen. É mulang, a tii ce, , ke a bépinebehi ati ni tii naa. É ha a jo 51 ai 52, ke e mu Korénit ha amu Grèce . Ke é alecehen, ha a jo 53—55, ke e tii a tii ne te lépwo acéihi na élé lang, ha a benaamwon na e mu ha a pwomwo ubwo Éféso. (Omehi 19.8—10.) Ke é alecehen mwo, ke e mu Rome (piuti ne ha a pwahamii tii 28), ke e tii me de lépwo Éféso.

E piuti mwo wo Luka ne ha a tii ce ninaa:

- A mulie na wâé, me a pimu ibu, me a bwo pwoiitih te lépwo atabuhi céihi;
- A bwo pwotahi ne ko lépwo acéihi ne Iérusaléma. É mu ko anaa, na lé pipiiden, ke lé pipatemehi pitih a pwooti;
- A bwo pipune te Pétéru, me Paulo, me Étienne.

A bwomune a tii Apostolo
 E pahede lépwo acéihi wo Iésu @ beme lé pipatemehieng pitih
 Pipwopweelé
 Lé hegi a Jenen Iitih
 Pajuuju Iésu ne Iérusaléma
 Pétéru
 Étienne
 Pajuuju Iésu ne Judé ke Samari
 Tode Paulo
 Pajuuju Iésu te nina time uce ni Juif
 Pétéru
 Pwo me ta ne kolé
 A bécéiue bwo engen de Paulo
 A béalohe bwo engen de Paulo
 A bécíéhe bwo engen de Paulo
 Pajuuju Iésu die ko lépwo Roma
 Imwi Paulo
 Paulo ne Césaré me Rome

É alecehe a bwo mulie cemwo te Iésu

1 †Téofile, é pii ne ha a bécéiue tii tong, ati nina e pwo wo Iésu, ke pacémunihi mu ha atabuih kon, ² ††die ha a tan na céieng da he *miiden. Ânebuhe anaa, ke e mi ne ni pihuô ten, mu ko a *Jenen Iitih, ne te lépwo *apostolo na e caa pipégalié.

E pii a bwo opé te a Jenen Iitih

³ †Alecehe a bwo mele ten, ke e pihabwiieng delé pie e caa mulie cemwo. Ke e ne telé ni béé alihi nen, ke e pihabwiieng delé, he na 40 ni tan, ke e cihe ko a *Mwametau te Padué. ⁴ ††É he lé ko pimu ibu, ke e pii telé pie: «Geé nemwo engen mu *Iérusaléma, kehe geé ucéihi ana e caa mi pii wo Caa, ke ali é caa pii tewé mwo. ⁵ ††Be e *pipuu apulie ko a tabe wo Ioane, kehe ju lupwoce tan, ke o puukewé ko a Jenen Iitih.»

E taa he miiden wo Iésu

⁶ ††Lé pimu ibu wo Iésu me lépwo apostolo, ke lé tahimwoeng pie: «Pa daame, caa é ha a benaamwon ce, na go pacuuli mwo a mwametau te *Isaraéla?»

⁷ ††E hegi ne telé wo Iésu pie: «Time uce wogewé na me geé temehi ce tan, ai ce benaamwon celi e ne wo Caa, ne he ni âpihuô ten. ⁸ †Kehe geé bo hegi a junuu a Jenen Iitih na e bo opé ne huúiwé. Ke bo wogewé lépwo apajuujué ne Iérusaléma, ati ha a *Judé ke é *Samari die pwo a bwohemwo ati.»

† 1.1 Luka 1.3 †† 1.2 Maréko 16.19; Luka 24.49–51 † 1.3 Luka 24.36–49; Apostolo 10.41 †† 1.4 Luka 24.49; Ioane 14.16–17; Apostolo 2.33 †† 1.5 Mataio 3.11 ††† 1.6 Luka 24.21 ††† 1.7 Maréko 13.32 § 1.8 Mataio 28.19; Luka 24.48

⁹ É alecehe a bwopiine ninaa telé, ke e céieng da kosalé ne he miiden [wo Padué]. Ke é he lé mwo ko omeeng, ke tieeng ne ha a menii.

¹⁰ Ke é he lé mwo ko nié da he miiden he e ko taa, ke pwo lupwo apulie na pwomelaa ni epwénelu st, na lu âbeetilé. ¹¹ ††Ke lu pii telé pie: «Lépwo apulie Galilé, é mu ko ade na geé ko cuwo ko nié da he miiden? Wo Iésu na e céieng da he miiden mu ha awiemewé, ke e bo âmwoobé, pwohewii a bwo alieng he e ko taa he miiden.»

Wo Matias ke e wodehi Judas

¹² ††Ke lé mwojuia mwo mu pwo a juwole ko ni Olivier wo lépwo apostolo, beme lé âmwo Iérusaléma, he na céiu *kilomètre*. ¹³ ††É he lé tuie ngen, ke lé taa ha a nemwa na e mu ko miiden ne ha a pwomwo na lé mu te cuwo ko mu hen. Wo lépwoanaa, ke wo Pétéru, Ioane, Cang, André, Filip, Toma, Bartélemi, Mataio, Cang pali naî Alfé, Simon pali *Zélote*st, ke wo Jude pali naî Cang.

¹⁴ Lé pitaineibulé, ke lé tee pwoiitih taaci, woélé me ni toomwo, me Maria nyaa te Iésu me lépwo ciéé Iésu.

E pacihe lépwo acéihi wo Pétéru

¹⁵ É ha a céiu tan, ke piâmwonuhi a 120 lépwo acéihi na lé pimu ibu. Ke e cuwoda mu hadeniilé wo Pétéru, ke e pii telé pie: ¹⁶ ††«Lépwo âjiénung, wâé heme e cu-

st † Lupwo apulie... A bwopiinen pie, lupwo âcélo. Omehi mwo a Âcélo ne ha a Niinaado (Vocabulaire) ha anebwén ko a tii. ††† 1.11 Mataio 26.64; Luka 21.27 §† 1.12 Luka 24.50–53 §†† 1.13 Mataio 10.2–4 §† Zélote—Pa ju apulie Judé, na nimen me e pawie lépwo Roma mu ha amu ten. Omehi mwo a Judé ke Rome ne ha a Niinaado (Vocabulaire) ha anebwén ko a tii. §† 1.16 Psaume 41.10

wo a pwooti, na e caa pii na a Jenen Iitihi na e cihe ko *Davita. Be e caa mi pii ânebun ana e pwo wo Judas, be e bo pwaaden beme lé imwi Iésu. ¹⁷ Kehe wo Judas, ke te pa céiu bééme, ne he ni penem de lépwo apostolo.»

¹⁸ †(E pwocuhi a pule ko a cuhi a bwo icu Iésu, é nelang na e tupwo, ke tehi a nan, ke â wie ni oohen. ¹⁹ Ke lé tai temehi a jepule naa ati ne ni apulie ha a pwomwo ubwo Iérusaléma, ke lé ne me nii a duaan naa pie, Akeldama, a bwopiinen he pwo patilé pie 'a ni-naado na pwo cewéle hen'.)

²⁰ ††[E pii mwo wo Pétéru pie]: «Be caa tii ne ha a tii *Psaumes te Davita pie:
*Wâé heme tice apulie
ha a pomwa ten.
Me time lé bo uce mu mwo lang
ne ce apulie. Psaume 69.26*

«Ke e tii mwo pie:
*Wâé heme e wodehieng
ne ha a penem den wo pace céiu. Psaume 109.8*

²¹⁻²² †«Wâé heme pwo pace céiu bééme, beme pa céiu *apajujuhi na a bwo mulie cemwo te Iésu. Wâé heme pa apulie naa, ke pa céiu béé lépwona lé mu cuwo ko âbé céinye, he ni benaamwon na e mwo mu pelenye wo Padaame henye, tabuhi he li e pipuu apulie wo Ioane, die ha a benaamwon li e taamwo he miiden wo Iésu.»

Lé pipégali Matias

²³ Ke lé pipégali lupwo apulie na alo julu: Wo Josef na pii kon pie Barsabas, ke Justus, ke pa céiu na pii kon pie Matias. ²⁴ Ke lé tai pwoitihi, ke lé pii pie: «Padaame, wogo pana go temehi ni pwonime ati ni apulie, go habwii teme pace apulie celi go caa pipégalieng mu hadenii lupwo apulie ce, ²⁵ me pa apostolo bééme, beme e pé ni penem de Judas. Be e caa necu ni penem den wo Judas, ke e caa â ha a duaan den [be e caa hegi a cuhi a penem den na ta.]»

²⁶ Ke lé céi metii †† ne kolu, ke hiwon ni metii te Matias. Ke lé pééeng me pa béé lépwo 11 apostolo.

E opé a Jenen Iitihi

2 ††É ha a tan ko Pentekote ††† [a tan ubwo ko pitii âdaanu] ke lé pimbu ha a céiu duaan ne ni acéihi. ² Ke lé te téne kuti, ana e opé mu he miiden, na pwo huu hen, pwohewii a huu he a dan na junihe ubwo. Ke e te paai kuti a mwa na lé mu hen. ³ †††Ke lé alihi

† 1.18 Mataio 27.3–8 †† 1.20 Psaume 69.26, 109.8 † 1.22 Mataio 16.19; Maréko 1.9; Ioane 15.27 †† Céi metii—Tirage au sort. Éni Kalédoni, ke genye pwo ko metii. Wo lépwo Juif ânebun, ke lé pwo ko péi. †† 2.1 Lévitique 23.15–21; Deutéronome 16.9–11 ††† Pentekote—50 ni tan alecehe a tan ko Pacika. ††† 2.3 Mataio 3.11

ni naado na e âbé, na pwohewii ni duwele miû, ke lé muko pétaapwo â ti kolé. ⁴ †Ke e te ole huîilé kuti a *Jenen Iitihi. Ke lé cihe he ni muko pétaapwo pwooti, na e ne telé na a Jenen Iitihi.

Hiwon nina lé muko téne ni patilé

⁵ É ne *Iérusaléma ha a benaamwon naa, ke lé mulie nelang wo lépwo *Juif na te junihe eânimelé ko a pwoitihi, na lé âbé mu he ni amu pitihii a bwohemwo. ⁶ Ke lé tai téte, ke lé tai â mu, he na lé téne nelang ali huu he naado. Ke te junihe emegéi nalé, be lé téne nina lé céihi he lé cihe he ni pétaapwo pwooti.

⁷ Lé tai téetihii ati, ke te junihe emegéi nalé, ke lé pitahimwolé pie: «Kona ni apulie ce, na lé ko cihe, ke time uce tai ni apulie Galilé? ⁸ Ke é mu ko ade na nye ténéle, he lé ko cihe he ni patinye ††?»

⁹ Be hadeniilé, ke pwo ni apulie na lé âbé mu he ni amu: é Parte, ke é Médi, ke é Élam, ke é Mésopotami, ke é *Judé. Ke pwo ni béén na lé âbé mu he ni béé province roma: Kapados †, ke é Pont, ke é Asia, ¹⁰ ke é Frigi, ke é Pamfili ††. Ke ni béén, ke lé âbé mu *Aigupito, ke é he ni nahi amu ko a Libi, cebwo Cirène. Ke ni béén mwo, ke lé âbé mu *Rome, ¹¹ ke é mu Krète, ke é mu ha amu Arabi. Ke tai woélé ati, ke lé tai âbé ati mu he ni béé amu naa. Ke pwo ni béén mu pelelé na te ni ju Juif; ke ni béén na lé céihi ne ko a pwoitihi te lépwo Juif.

Ke lé pitahimwolé pie: «Kona ade ace watihen me nye téne ni apulie Galilé naa, na lé ko pii ne he ni béé patinye ni naado na ubwo na e pwo wo Padué?»

¹² Ke lé te junihe téetihii ati, kehe time lé uce temehi aceli lé ko pii, ke lé pipii telé pie: «De ace bwopiine ani?»

¹³ Kehe icehi ana pwo ni béén na lé pihooni nina lé céihi, ke lé pii pie: «Lé te junihe piolo kuti ko tabe megele!»

E pacihe a bele wo Pétéru

¹⁴ Ke e cuwoda wo Pétéru me lépwo 11 *apostolo béén, ke e toii da, beme lé temehi ehi pie: «Wogenye lépwo Juif, me wogewé ati na wogewé éni Iérusaléma, geé tabemi heme é pii ehi tewé ana e ko tuie. ¹⁵ Ke time lé uce piolo ni apulie ce, pwohewii a bwo niimihi nen dewé, be mwo teko ju 9 inetéale † ko acaama, ha a benaamwon ce. ¹⁶ Ôhu! Weengi kuti ali e caa pii wo *péroféta Joël pie:

¹⁷ ††E pii wo Padué pie:
*“É he *ni bénebwéne tan,*

§ 2.4 Maréko 16.17; Apostolo 4.31, 10.44–46, 19.6 † Ni niide a tii 9–11 he pwo grek, ke a behi pwooti na lé pii ne ni apulie ne he ni niide a tii 7 ke 8. ††† Kapados; Pont; Asia; Frigi; Pamfili—Lé mu ha amu Turki jena. †† 9 inetéale... Wo lépwo Juif, ke lé bo wiinaado me údu ko 10 inetéale ko acaama alecehe a pwoitihi. ††† 2.17–21 Joël 3.1–5

ke é bo neoté a Jenung
ne ko ati ni niide apulip.
Ni ewa aiu me ewa toomwo tewé,
ke lé bo patemehi a pwooti tong.
Ke é bo habwii ni naado
ne he ni jene ni nahi ewa tewé.
Ke mepwo é ne ko ni ukéiu tewé,
ke é bo pacihelé ne he ni niûlé.
18 É he ni tan naa,
ke é bo neole a Jenung
ne ko ni eabwé tong,
aiu me toomwo.
Ke lé bo patemehi a pwooti tong.”

19 “É bo pwo me tuie ni naado
ne he miiden me pwo bwohemwo
na te junihe ité
ke time geé mu uce téele alihi:
a cewéle, ke a miû, ke ahu.
20 O biteeng na a téale me bwén;
ke o megele a wole
me pwohewii a cewéle,
ânebuhe a tan de Padaame,
a tan na ubwo, ke pwojunuun.
21 Ke é o *celuimi
nina lé tode Padaame.”» Joël 3.1–5

E mulie cemwo wo Iésu

22 [E pii mwo wo Pétéru pie]: «Lépwo apulie *Is-
araéla, geé tabemi a pwooti na me é pii tewé: Wo Iésu,
pa apulie Nazaret, ke pa apulie na e caa te mi pipé-
galieng wo Padué. Ke wo Padué, ke e caa pihabwiieng
dewé. Geé te temehi ehi pie e ne me e pwo ni naado
na te junihe ité, me ni *pipwojunuun, ne ha aw-
iemewé. 23 Wo panaa, ke pa apulie na e pineeng dewé,
pali geé pwo me e mele, ke geé neeng me lé cemeit-
eeng ne ko a *kuricé wo lépwo apulie na ta jélé, âcehi
ana e mi temehi wo Padué, ke ana nimen kon. 24 Kehe
icehi ana wo Padué, ke e celuimieng mwo, ke e
pééeng koja ni picani ko a mele, ke e pamulipieng
mwo, be te tice mwomwon de a mele ne kon. 25 †Be e
caa te mi piuti wo *Davita, he e pii pie:

É te cuwo ko te ali taaci
Padaame ânebung.
Be e tebwo pwo a juing,
ke time é uce pipenem.
26 É te junihe pipwodéén me pietiang
be é temehi pie, é hemepie é mele,
ke o te wâé ne kong.
27 Be wogo Padué,
ke time go uce patupwo a jenung
ne ha amele,

† 2.25 Psaume 16.8–11

ke time o uce nyaale a ééng,
be go caa pipégaliéo
me é eabwé tem.
28 Go caa habwii tong
a pwaaden nge ha a mulip,
ke é o te junihe pipwodéén
be go o tee mu pelong.» Psaume 16.8–11

29 ††[E pii mwo wo Pétéru pie]: «Lépwo âjiénung, time
uce piwâ jo me é pii pwaatihi tewé pie, pa watihenyé
Davita, ke e mele, ke neduwoeng. Ke nye mwo teko al-
ihi a bwomuhén dieli jena. 30 †Kehe icehi ana wo Davi-
ta, ke te pa péroféta, ke e te temehi nina e pii wo
Padué ânebun, he e pii ten pie:
É bo pipégali pace apulie
mu ko ni piebehiko,
ke é bo pwo me e tebwo
pwo a atebwo tem.» Psaume 132.11

31 ††«Ke e caa te temehi ânebun wo Davita ana e bo tu-
ie, ke e caa te mi pii a bwo mulie cemwo te pa *Mesia.
Ke a bwopiinen ce, na pii ne ko Iésu: O time e uce
patupwo a jenen ne ha amele, ke time o uce nyaale a
één. 32 E caa pamulipi mwo pa Iésu naa wo Padué, ke
wogeme kuti lépwo *apajujuhi nen.

33 ††«Ke e neeng da wo Padué Caa ne *pwo a juin [be-
me e pihuôhi ati ni naado] ke e ne ten a jenen Iitihina
e caa nebwén ko pii ânebun. Ke é mulang, na e neopé
kome a jenen Iitihina, pwohewii ana geé ko alihi ke téne
jena. 34 †††Be time e uce taa he miiden wo Davita, kehe
icehi ana e pii pie:

Pwooti te Padaame Padué,
na e pacihe pa daame hung:
“Go âbé tebwo éni pwo a juing.
[É ne tem a pihuô,
ke o pipaunuko dieli mwo.]

35 É pwo me go caaite
nina lé pwopa ne kom.”Psaume 110.1

36 †††«Wogewé a bele Isaraéla, wâé heme geé temehi
pie, wo pali Iésu li geé cemeiteeng ne ko a kuricé, ke e
neeng wo Padué me pa Mesia ke me Padaame.»

Hiwon mwo nina lé céihi

37 É alecehe a bwo téne nen delé a pwooti naa, ke tai
tatéhi ke gini ni pwonimelé, ke lé pii te Pétéru me ni
béé apostolo pie: «Lépwo âjiéneme, me geme pwo
de?»

38 Ke e pii telé wo Pétéru pie: «Geé pininim, ke geé
bitekewé, ke me puukewé ne he nii Iésu *Kériso, beme
o pineuhi ni ta pwo tewé, ke me geé hegi a jenen Iitihina.

†† 2.29 1 Rois 2.10 † 2.30 2 Samuel 7.12; Psaume 89.4–5, 132.11

†† 2.31 Psaume 16.10 †† 2.33 Apostolo 5.32, 7.55–56

††† 2.34–35 Psaume 110.1 ††† 2.36 Apostolo 5.30–31

³⁹ †Be a *piapwo ânebun naa, ke a dewé me ni naîwé, me ati ni apulie na junihe élé mwo ité, na e bo todelé wo Padué, Padaame henye.»

⁴⁰ Ke te junihe hiwon ni pwooti na e pajuujihi ne telé, ke e pamwoiulé kon wo Pétéru. Ke e pii telé mwo pie: «Geé cela ko ni apulie na ta ni huô telé, beme geé o mulie.»

⁴¹ ††Hiwon ni apulie mu pelelé na lé hegi a pwooti te Pétéru. Ke lé céihi ne ko Iésu, ke puulé. É ha a tan naa, ke lé caa âmwonuhi a 3000. Ke bo ni béé nina lé caa mi céihi ânebun.

A bwo mulie te nina lé céihi

⁴² †Ati nina lé céihi, ke lé te cuwo ko pimu ibu me lépwo apostolo, ke lé téne ehi ni naado na lé pii. Ke lé ebii ibuhi a pwoloa ††, ke lé pipwoiitihi ibu.

⁴³ Ke mepwo ni apulie, ke lé téetihi, ke mwotilé, be wo Padué, ke e habwii ne ko lépwo apostolo ni pipwojunuun na junihe hiwon.

⁴⁴ ††Ati nina lé céihi, ke te céiu a pwonimelé, ke lé pwo me ni naamuulé, ke me tai ni delé. ⁴⁵ Lé icuhi ni pule telé, me ni wâé telé, ke lé pipwopii ne kolé ni cuhin, beme cuhi nina tice telé. ⁴⁶ Ati he ni tan, ke lé te tai pipwoiitihi ibu *huâ iitihi, ke lé piwiinaado ibu ne he ni pomwa telé, ha a pipwodéén, ke a piwâénime. ⁴⁷ †††Ke lé pipaunu Padué. Ke ati ni apulie, ke lé pipwodéén kolé. Ke wo Padaame, ke é ati he ni tan, ke e ne me pihiwon da nina e celuililé.

Caa wâé mwo pa tebwomwa

3 É ha a benaamwon ko pwoiitihi, ko cié inetéale alecehe a wiinaado, ke lu taa ha a *mwaiitihi te lépwo *Juif wo Pétéru me Ioane.

² É ko jije a pomwa ko a mwaiitihi, ke pwo pana tebwomwa nang ha a bwo piâbeele ten. É ati he ni tan, ke lé pééeng bé, ke lé âbé neeng ha a pomwa na pii kon pie a Pomwa Wâé, beme e ilehi mwani koja ni apulie na lé taa *huâ iitihi. ³ Ke me e ali Pétéru me Ioane, he lu pwo me lu â taa huâ iitihi, ke e ilelu ko mwani.

⁴ †††Ke lu te ju omeeng ehi, ke e pii ten wo Pétéru pie: «Go omechemu!»

⁵ Ke e te ju omelu ehi, ucéihi aceli me lu ne ten.

Go cuwoda ne he nii Iésu!

⁶ †Kehe icehi ana e pii ten mwo wo Pétéru pie: «Te tice mwani tong, kehe icehi ana etong, ke é o ne tem:

† 2.39 Ésaïe 57.19 †† 2.41 Apostolo 2.47, 4.4 † 2.42 Apostolo 20.7 †† Ebii ibuhi a pwoloa—A piwiinaado te Padaame. Nye pii mwo jenea pie Caanilo (Sainte-Cène, Eucharistie). Piwiinaado bépaniimihi na a bénebéné piwiinaado te Iésu me lépwo 12 apostolo ten, ânebuhe a bwo mele ten. Omehi Mataio 26.26–29. †† 2.44 Apostolo 4.32–35 ††† 2.47 Apostolo 6.7, 11.21 ††† 3.4 Apostolo 14.9 § 3.6 Apostolo 4.10, 16.18

É ne he nii Iésu Kériso mu Nazaret, ke go cuwoda ke go engen!»

⁷ Ke e pétaa ole ko a in ne pwo juin wo Pétéru, ke e pwieng. Ke caa te ju wâé mwo lupwo an. ⁸ Ke e te cuwoda kuti, ke e engen. Ke lé taa me weeng ha ali mwaiitihi. Ke e te junihe pipwodéén, ke e téele, ke e pipaunu Padué. ⁹ Ati ni apulie na lé alieng he e engen, ke lé pipaunu Padué. ¹⁰ Be lé ali temehieng, pie pali e mu tee tebwomwa ha a Pomwa Wâé, beme e ilehi mwani. Lé téetihi ati ne ni apulie, ke lé wéhaahi, ana e tuie ne kon.

A pwooti te Pétéru ne te ni Isaraéla

¹¹ Time e uce engen koja Pétéru me Ioane wo pali tebwomwa. Ke lé téetieng ati ne ni apulie, ke lé tétebé céiilé ne ha a mwa na tice goomwa kon, na pii kon pie 'Mwa te Solomona' ††.

¹² Ke me e alihi anaa wo Pétéru, ke e pii te a bele pie: «Lépwoli *Isaraéla, é ko ade na geé téetihi a bwo wâé pajé? É ko ade na geé omechemu, pwohewiin heme wogemu na gemu pwo me e engen wo pa apulie ce, ke ace junuumu, me ace âpipwoiipihinaado temu?

¹³ †††«Wo Padué he *Abérama, me Isaaka, me Iakobo, wo Padué he lépwo watihenye, ke e habwii pie te junihe ubwo Iésu, pa eabwé ten ††. Ke wogewé kuti, ke geé icueng te ni daame hewé, ke geé téetieng ne ânebuhe gupéno *Pilate, he e caa te niimihi pie me e pawieeng mwo. ¹⁴ Muhi tewé me pawie pa apulie na e pipégalieng wo Padué, pa apulie na mwomwon nang, ke geé bo pawie pa ataunuhi apulie.

¹⁵ «Ke geé pwo me e mele wo pa Caa te a mulip. Kehe icehi ana wo Padué, ke e pwo me e mulie cemwo mu ha amele. Ke wogeme ni *apajuujihi nen.

¹⁶ «Geé caa ko alihi temehi pa apulie ce. Be caa wâé nang ko a nii Iésu, be gemu céihi ne kon. Ke a céihi ten ne ko Iésu na e ne me wâé nang ne ânebhewé ati.»

Geé bitekewé bé céii Padué

¹⁷ †††«Kehe icehi wogewé lépwo bééng, na é temehi pie ana geé pwo me lépwo daame hewé, ke time geé uce temehi. ¹⁸ Kehe icehi ana wo Padué na e pacuwohi ana lé caa patemehi ânebun ati ne ni péroféta ten. Ke lé caa pii pie, e bo mu he ni picani wo pa Mesia.

¹⁹ †††«Geé pininim, ke geé bitekewé bé céii Padué, beme e bo ciitili ni ta pwo tewé, ²⁰ ke me e bo ne tewé a pipwowâé ten, ke e bo pawiebé céiikewé pa Mesia ten, wo Iésu, na e caa pipégalieng ânebun me dewé.

†† 'Mwa te Solomona'—A mwa na te tice goomwa kon, ke te junihe ubwo ni an, ke pwo a pwaaden hen, beme a pitabée. Wieli wo pa daame Solomona pana e pwo me bahi a mwa naa. ††† 3.13 Exode 3.6, 15; Luka 23.13–25; Apostolo 2.23 †† Pa eabwé ten—Pa Mesia. Omehi mwo Mesia ne ha a Niinaado (Vocabulaire) ha anebwén ko a tii. ††† 3.17 Luka 23.34; 1 Timoté 1.13 †† 3.19 Apostolo 2.38

²¹ «Kehe icehi ana ha a benaamwon ce, ke e mwo te mu he miiden dieli ha ace tan celi e bo pine ehi ati ni naado wo Padué. Ke e caa mi pahede lépwo péroféta beme lé â pii beetihi ana. ²² †E pii wo *Moosé pie: *Wo Padué Padaame hewé, ke e bo pwo me e cuwoda mu hadeniwé pace péroféta celi pwohewiiéo. Wâé heme geé bo pitenedehi ati nina e bo pii tewé.*

Deutéronome 18.15

²³ *Pana time e uce pitabemi pa péroféta naa, ke e bo pawieeng mu hadenii a bele.*

Deutéronome 18.19

²⁴ «Ke ati lépwo péroféta, na tabuhi mu ko Samuel, ke lé tai pii beetihi ni tan ce.

²⁵ ††«Wogewé lépwo naí lépwo péroféta, a bwopiinen ce, ke te a dewé mwo. Be wo Padué, ke e caa pwo a *piapwo ten, ne te lépwo caa tenye. Ke e pii te Abérama pie: *É mu ko lépwo piebehiko, ke é bo *adéi ati ni pwomwoiu ne pwo a bwohemwo.*

Genèse 22.18

²⁶ *«Be te mi é ne tewé ânebun, na e nebé Iésu, pa apenem den, wo Padué, beme e ne tewé a adéihi, me geé bitekewé he picéiu, mu he ni ta pwo tewé.»

Pétéru me Ioane ne ânebuhe a mwohuô te lépwo Juif

4 É he lu mwo ko cihe te a puapulie wo Pétéru me Ioane, ke lé pwome tehenebé wo lépwo *apwoâpwailo, me pa apihuô te lépwo awéihi *mwaiitih, me lépwo *Saducéen. ² Ke lé te nihe okéé ne kolu, he lu pacémunihi a puapulie, be lu cihe telé ko a bwo mulie cemwo te Iésu mu ha amele. [Be time lé uce céihi pie pwo ace mulie cemwo wo lépwo Saducéen.]

³ Ke lé imwilo, ke lé nelu he karépu die ko acaama, be he caa babwén.⁴ ††Ke hiwon nina lé téne a pwooti, ke lé céihi ne kon. Ke caa e mwonuhi 5000 a jéhi ni acéihi.

⁵ É ha acaama hen, ke wo lépwo apihuô, me lépwo ukéiu, me lépwo *dotéén ko patén, ke lé pitaineibulé ne *Iéusaléma, ⁶ me Hanne † pa *daame he lépwo apwoâpwailo, me ati ni pwomwoiu ten: wo Kaife †, me Jean, me Alexandre, me ni béén mwo. ⁷ Lé ne Pétéru me Ioane ne ha awiemelé, ke lé tahimwolu pie: «É mu ko a junuu-û, ai é ne he nii-î na geu pwo me tieden a cunu?»

⁸ Ke caa ju tili Pétéru na a *Jenen Iitih, ke e pii telé pie: «Lépwo apihuô, me lépwo ukéiu te lépwo *Is-araéla, ⁹ geé tahimwokemu jena, beme gemu pii tewé ace watihen me tieden a cunu ko pa apulie ce. ¹⁰ ††Wâé heme geé temehi ati wogewé a puapulie Is-araéla, pie, é mu ko a nii Iésu Kériso mu Nazaret, pana geé cemeiteeng ne ko a *kuricé, ke wo Padué, ke e

† 3.22 *Deutéronome 18.15, 18–19* †† 3.25 *Genèse 22.18* † 3.26 *Apostolo 13.46* †† 4.4 *Apostolo 2.41* †† Hanne; Kaife—*Wo Kaife, ke pa daame he lépwo apwoâpwailo ha a benaamwon naa. Wo Hanne, ke pa caa te mwode Kaife. Ke wo Hanne, ke pa daame he lépwo apwoâpwailo ânebuhen.* ††† 4.10 *Apostolo 3.6, 13–16*

pwo me e mulie cemwo mu ha amele. É mu kon, na wo pa apulie ce, ke e éni ânebuhewé he caa ju wâé nang. ¹¹ ††Caa te tii ne he ni *tii iitih pie:

*Ali péi li geé tahi taabwon,
wogewé lépwo abahi mwa,
ke te ana kuti a ju paamwa!* Psaume 118.22

«A péi naa, ke wo Iésu. ¹² †Be te tice ne haahi a miiden ace céiu nii apulie celi ne te lépwo apulie, me e celuimikenye, kehe te céiu cehi a nii Iésu na e celuimikenye.»

Te tice aceli me lé mwo pii mwo

¹³ Ni *mwohuô, ke lé alihi a bwo cumang de Pétéru me Ioane, ke lé téetih, be lé temehi pie lupwo apulie mu hadenii ni apulie, na time lu uce nihe temehinaado, ke lé temehi pie lupwona lu mu âcéi Iésu. ¹⁴ Ke me lé ali pali apulie, he caa ju wâé nang ne pelelu, ke te tice aceli me lé mwo pii mwo.

¹⁵ Lé pawielu mu ha ali mwohuô, beme lé mwo picihe hadeniilé. ¹⁶ Ke lé pitahimwolé pie: «Genye bo woté te lupwo apulie ce? Be lé caa tai temehi ati ne ni apulie Iéusaléma a *pipwojunuun na lu pwo, ke pwocoon me genye waaneduwahi. ¹⁷ Kehe me time lé uce pipii ngen a jepule naa hadenii ni apulie. Genye pa-abwobwolu, ke paciitih kolu me lu nemwo cihe ko a nii Iésu, ne te ni apulie.»

¹⁸ ††Ke lé tode Pétéru me Ioane mwo, ke lé paciitih kolu, me lu nemwo cihe mwo, ke pwocémun ne he nii Iésu.

¹⁹ †††Kehe lu hegi ne telé pie: «Geé cuwoteeke pitauti pie, he te mwomwon ne ânebuhe Padué me gemu ténedekewé, ai wo Padué. ²⁰ Be wogemu, ke time uce jan me time gemu pii ni naado na gemu alihi, me ni naado na gemu téne.»

²¹ Ke é alecehe a bwo pa-abwobwolu, ke lé pawielu, be time lé uce temehi ace bwopwonen celi me lé pwo, beme lu pwocuhinaado. Wona mu ko ni apulie, be lé tai pipwoun de Padué ko ni naado na e pwo. ²² Be e caa wédenih a 40 ni jo he pali apulie li wâé nang.

A pwoitih te lépwo acéihi

²³ Alecehe a bwo pawie Pétéru, me Ioane, ke lu â too lépwo béélu, ke lu piuti telé ati ni naado na lé pii telu wo lépwo caa te lépwo apwoâpwailo me lépwo apihuô.

²⁴ ††Ke heme lé téne ati ninaa, ke lé tai pwoun de Padué ne he ni pwonimelé na te céiu. Ke lé pii pie: «Padaame, wogo na go tabuhi a miiden me a bwohemwo, a jii me ati ni naado na e hen. ²⁵ ††Wogo na go nebé a Jenen Iitih me e cihe ko pa caa teme, pa apipenem dem *Davita, pie:

††† 4.11 *Psaume 118.22* § 4.12 *Mataio 1.21* †† 4.18 *Apostolo 5.28* ††† 4.19 *Apostolo 5.29* †† 4.24 *Exode 20.11; Néhémi 9.6; Psaume 146.6* ††† 4.25 *Psaume 2.1–2*

É mu ko ade na lé tee okée ne ni bele,
ke lé pwo ni bwo niimihinaado
na te piticenaado ne kon?
²⁶ Wo lépwo daame ubwo
ne pwo bwohemwo,
ke lé pwo me lé pwopa
ne ko Padaame Padué.
Ke wo lépwo apihuô,
ke lé pineibulé bwoni Padué
me pa Mesia†ten. Psaume 2.1–2

²⁷ ††«Te a juuju, be wo pa daame Érode Antipas me gupéno Ponce *Pilate, ke lé picuwo ibu me lépwo apulie, me ni pwomwoiu Isaraéla ne ha a pwomwo ubwo ce. Ke lé pipwobwoni pa apipenem iitihhi tem, wo Iésu, na go pipégalieng me pa Mesia. ²⁸ *Kehe icehi ana me lé wonaa, ke lé pwo me cuwo ati nina go caa ne ânebun, âcehi nina nimem kon, me a junuum.

²⁹ ††«Kehe é jena, go Padaame, ke go alihi a bwo pwohuu telé. Geme ilehi kojako pie go pwo me geme mwoiu, wogeme lépwo apipenem dem, beme time uce piwâ geme, me geme pii a pwooti tem. ³⁰ Wâé heme go nebé a junuum beme wâé lépwona cunu jélé, me pwo ce inen, ke ce junuum ne he nii Iésu, pa apipenem iitihhi tem.»

³¹ Ke me lé pwoiitihhi ati, ke te éjén kuti ali duaan li lé mu hen. Ke e ole huîlé ati a Jenen Iitihhi, ke caa time uce piwâ jélé me lé pii beetihhi a pwooti te Padué.

A pipwoééhe te lépwo acéihhi

³² ††Te tai ati kuti lépwo acéihhi, ke te céiu a pwonimelé, ke céiu ni bwo niimihinaado telé. Te tice pace céiu béélé celi e pii pie: «Ni wâé tong, ke te ni dong cehi», kehe caa te tai ni delé. ³³ Ke lé cihe mwoiuhi wo lépwo *apostolo, ke lé *pajuujuhi a bwo mulie cemwo te Padaame Iésu. Ke e neopé ne huîlé ati a pipwowâé ten wo Padué. ³⁴ †††Te tice pace céiu mu ha awiemelé celi pwo celi tieden kojaeng. Be te ati lépwona pwo ni apwoamu telé, ke ni mwa telé, ke lé icuhi, ke lé pébé ni cuhin, ³⁵ ke lé ne te lépwo apostolo. Ke lé bo pipatihhi ne kolé, âcehi nina tice telé.

³⁶ Pwohewii ne ko Josef, pa apulie mu ha a pwomwoiu te Lévi †††, na e piâbee ne pwo a één Chipre. Wo panaa, ke lé pitohii niin wo lépwo apostolo pie Barnabas, a bwopiinen pie 'pa apipamwoiukenyé'. ³⁷ Be e icuhi a apwoamu ten, ke e pébé ni cuhin, ke e ne te lépwo apostolo.

† Mesia—Grek: Oint. Pana pipégalieng wo Padué. Omehi note

†† 4.27 Mataio 27.1–2; Luka 23.7–11; Apostolo 3.13

‡ 4.28 Apostolo 2.23 †† 4.29 Éfésó 6.19 †† 4.32 Apostolo 2.44

††† 4.34 Apostolo 2.45 ††† Pa apulie mu ha a pwomwoiu te Lévi—Lévite. Pa apulie mu ha a pwomwoiu te Lévi, na e picani te lépwo apwoâpwailo.

Lu gele wo Ananias me Safira

⁵ Pwo pa aiu na pii kon pie Ananias, me é mwoden na pii kon pie Safira, ke lu icuhi a mepule telu. ² Lu piténelu me mwoden, ke e pébé a mwani céii lépwo apostolo wo Ananias, kehe icehi ana lu neduwohi a céiu duaan, ke time lu uce ne telé ati.

³ ††Ke e pii ten wo Pétéru pie: «Ananias, é mu ko ade me go pitabemi *Caatana, me e ganye a pwonimem, me go pigeti a *Jenen Iitihhi, beme go imwi a céiu duaan cuhi a céiu mepule. ⁴ É ânebuhe a bwo icuhi nen, ke te a dem ali pule! Ke é alecehe a bwo icuhi nen, ke te a dem mwo ali mwani kon! Wonaa a bwo niimihinaado tem kona woté? Be time uce ni apulie na go getilé, kehe go geti Padué!»

⁵ Ke me e téne ni pwooti naa wo Ananias, ke ele a nenehen, ke e tupwo ole. Ke nihe mwoti lépwona lé téne a jepule naa. ⁶ Ke lé âbé ni ewa aiu, ke lé pwoiipieng, ke pééeng wie, me lé â pineeng he iitihhi.

Te piwien mwo ne ko mwoden

⁷ É he ko cié inetéale ha a pwocehin, ke e tuiebé wo mwode Ananias. Mwo te tice aceli e temehi mu ko ali e mi tuie nelang.

⁸ Ke e tahimwoeng wo Pétéru pie: «Te a cuhi ali mepule li geu icuhi?»

Ke e hegi ne ten pie: «Éa, te a cuhin anaa kuti!»

⁹ Ke e pii ten wo Pétéru pie: «Geu woté ko ace bwopwonen me geu piténekeu, me geu tacebwénihi a Jenen Iitihhi te Padaame? Go alihi, be wo lépwona lé mwo te ju âbé mu ha a pineduwo pali aiu hem, ke nekolé nelang he pomwa. Ke lé o bo caa pééko mwo.»

¹⁰ Ke ele a nenehen, ke e tupwo ole ko ni a Pétéru. Ke lé taabé li apulie ewa, ke lé alieng he e caa mele, ke lé pééeng, ke lé â neduwoeng cebwo pali aiu hen. ¹¹ Ke nihe mwoti ati lépwo acéihhi die ko ati nina lé téne ni bwomunen naa.

Ubwó a junuu Padué @ ne ko lépwo apostolo

¹² †††Hiwon ni inenaado na pwo ne ha awieme a pubu apulie, mu ko lépwo apostolo. Ke wo lépwo acéihhi, ke lé tai pimu ibu ne ha a 'Mwa te Solomona'. ¹³ Ke piwâ ni béén me lé âbé céiilé, kehe ni apulie, ke lé te junihe picedilé. ¹⁴ E taa a jéhi ni aiu me ni toomwo na lé céihhi ne ko Padaame, ke nihe hiwon jélé.

¹⁵ Pwo ni cunu na lé péélé bé ne pwo pwaaden, ke lé nelé pwo ni apule, ke e pwo ni talihi, be lé niimihhi pie, me e âbé wo Pétéru, ke me e ti ko ce béén a démen.

¹⁶ Hiwon ni apulie na lé âbé ne *Iéruusaléma, ni apulie na lé âbé mu he ni béé duaan ko jijen. Lé pébé nina

§ 5.2 Apostolo 4.34–35 §† 5.3 Ioane 13.2 §†† 5.12 Apostolo 2.43, 14.3

cunu jélé, me nina pwo duée kolé, ke te tai wâé jélé ati.

Lé imwi lépwo apostolo

¹⁷ É he ko wonaa, ke lé te tai cuwoda wo pa *daame he lépwo apwoâpwailo me lépwo *Saducéen, be lé te nihe pitaaba ne ko lépwo *apostolo. ¹⁸ Ke lé te imwilé kuti, ke lé nelé da he karépu †.

¹⁹ ††Ke é he bwén, ke pwo pa *âcélo te Padaame, na e tehi ati ni pomwa ko a karépu, ke e pawielé. Ke e pii telé pie: ²⁰ «Geé â mu *huâ iitihî, ke geé patemehi te ni puapulie ati ni pwooti ko a mulie na mwo coho.»

²¹⁻²² Ke me lé te téne kuti anaa, ke lé taa huâ iitihî he mwo te ju acaama, ke lé pacémuni ni apulie.

Tielé he karépu

É ha a benaamwon naa, ke wo pa daame he lépwo apwoâpwailo me ni béén, ke lé tode ati lépwo apihuô, wo lépwo ukéiu te a bele *Isaraéla, beme lé pipitilé. Ke lé ne me lé â pébé lépwo apostolo, mu he karépu.

Kehe icehi ana me lé tuie nge he karépu wo lépwo awéihî *mwaiitihî, ke time lé toolé. Ke lé mwojuia mwo, ke lé pwojepule te lépwna lé pahedelé, ke lé pii te a *mwohuô pie: ²³ «Geme tuie nge ha ali karépu, ke he te ju capuhi ehi ni pomwa kon, ke wo lépwo awéihî nen, ke he lé teko cuwo he ni awéa telé. Kehe icehi ana me geme tehi ni pomwa, ke he caa te tice apulie hen!»

²⁴ Ke lé téne ni pwooti naa wo pa apihuô te lépwo awéihî mwaiitihî, me lépwo caa te lépwo apwoâpwailo. Ke time lé temehi aceli me lé pii ne ko a bwo tie lépwo apostolo, me aceli e bo tuie.

²⁵ É he mwo ko wonaa, ke e tehenebé wo pa céiu apulie, ke e pii telé pie: «Lépwoli apulie li geé nelé he karépu, ke élé huâ iitihî ni, ke lé ko pacémuni ni apulie!»

²⁶ Ke lé engen wo lépwo awéihî mwaiitihî me pa apihuô telé, ke lé te ju â péélé bé ehi, be mwotilé ko a bele, be koli lé bo ahilé ko péi.

Ne ânebuhe a mwohuô te lépwo Juif

²⁷ É alecehe a bwo pébé lépwo apostolo, ke lé péélé nge céii a mwohuô, ke e tahimwolé wo pa daame he lépwo apwoâpwailo pie: ²⁸ ††«Kona he li time geme uce paciitihî kowé me time geé uce pwocémun ne he nii pa apulie naa? Ke é jena ni, ke geé patemehi pitihî Iérusaléma ko ni cémun dewé! Ke mwo te nimewé mwo me geme watihe a bwo mele ten ††?»

Nye piténede Padué cehi

²⁹ ††Ke e hegi ne telé wo Pétéru, he woélé me lépwo apostolo béén pie: «Wâé heme nye piténede Padué koja ni apulie. ³⁰ Wogewé kuti na geé taunu Iésu, be geé ne me cemeiteeng ne ko a *kuricé. Kehe icehi ana e te pamulipieng mwo wo Padué he ni caa tenye.

³¹ †††Ke e ne da Iésu ne *pwo a juin [beme e pihuôhi ati ni naado]. Ke e neeng me Padaame, ke me pa acelui-mi, beme e temehi na a bele Isaraéla pie, jan me e pininim beme e o neuhi ni ta pwo ten. ³² Ke wogeme kuti lépwo *apajujuhi ati ni naado naa, wogeme me a Jenen Iitihî, na e ne wo Padué ne te nina lé piténedeeng.»

³³ Ke me lé téne ni pwooti naa na a mwohuô, ke lé te junihe okéé, ke lé pwo me lé taunu lépwo apostolo.

E paténe lépwo béén wo Gamaliel

³⁴ Kehe icehi ana e cuwoda mu hadeniilé wo pa *Farasaio na pii kon pie Gamaliel, pa *dotéen ko patén, na lé te junihe picedieng ati na a bele. Ke e ilehi pie me lé mwo te ju neme pawie lépwo apostolo. ³⁵ Ke e pii te a mwohuô pie: «Lépwo bééng Isaraéla, geé pipwocilekéwé ko celi geé ko niimihi pie me geé pwo te ni apulie naa. ³⁶ †††Time uce téele bwolihi a benaamwon na e tuie hen wo Teudas, pa apulie na e te piniimihi pie te junihe pwonaado ne kon. Ke e nge pwo 400 ni apulie na lé âcén. Kehe icehi ana me lé taunueng, ke lé caa te pipiiden ati, ke caa te tice patilé.

³⁷ «É alecehen, ha a benaamwon na pine a jéhi ni apulie hen, ke e cuwoda wo Judas §, pa apulie Galilé, ke hiwon ni apulie na lé âcén. Kehe icehi ana e te mele mwo, ke ni apulie naa, ke lé caa te pipiiden mwo.

³⁸ «Ke é jena ni, ke é pii tewé pie, me geé nemwo ili lépwnaa. Kehe wâé heme geé nelé me lé engen, be mepie nina lé pwo, ke mepie e te âbé mu ko ni apulie, ke o tieden. ³⁹ Ke hemepie e te âbé mu ko Padué, ke o time uce jan me geé pacuwohi. Geé nemwo pwoabwobwo me geé pipwobwoni Padué!»

Ke wo lépwo apihuô, ke lé engen ne ko nina e pii wo Gamaliel. ⁴⁰ ††Ke lé tode mwo lépwo apostolo, ke lé nelé me ahilé. Ke lé pawielé, ke lé paciitihî kolé me lé nemwo bo uce cihe mwo ko a nii Iésu.

⁴¹ †††Ke lé wie koja a mwohuô wo lépwo apostolo, ke lé te junihe pipwodéén, be wo Padué ne ha a tautinaado ten, ke te jan me ahilé ne ko a nii Iésu. ⁴² Ke é he ni tan ati, ne huâ iitihî, ke é ne he ni pwomwo, ke lé te cuwo ko pacémuni ni apulie. Ke lé patemehi a *Pwooti Wâé ko Iésu, pa *Mesia.

† Nelé da he karépu—ai Nelé da he karépu, ne ânebuhe ati ni apulie. †† 5.19 Apostolo 12.7–10 † 5.28 Mataio 27.25 †† Dernière phrase—Grek: «Nimewé me geé pwo me téne ne kome a cewéhe pa apulie naa?»

†† 5.29 Apostolo 4.19 ††† 5.31 Apostolo 2.33–34; Éféso 1.20; Ébéru 2.10, 12.2 ††† 5.36 Apostolo 21.38 § Judas—Time uce wo Judas pali acémun de Iésu, li e bo icueng (1.16–18). †† 5.40 Apostolo 4.18 ††† 5.41 Mataio 5.10–12; 1 Pétéru 4.13

Lépwo apicani te lépwo apostolo

6 †É ha a benaamwon naa, ke e taa a jéhi lépwo acéihi. Lépwona lé cihe he pwo *grek ††, ke lé pi-huu ne ko lépwona lé cihe he pwo *ébéru, be nihe time uce wâé a bwo patihi wiinaado na lé pwo he ni tan, ne ko ni depwele ‡ telé.

2 Lé tode ati lépwo acéihi wo lépwo 12 *apostolo, ke lé pii telé pie: «Time uce wâé heme geme cuwo koja a bwo patemehi na a pwooti te Padué, ke me geme uce patihi a wiinaado ne pwo ni taap. 3 É mu ko anaa, ke wogewé lépwo bééme ko a céihi, geé pipégali lépwoce apulie celi 7 mu hadeniwé, celi wâé ni huô telé me ni bwopemilé, na tililé na a *Jenen Iitih, ke a pitemang, beme o a penem delé. 4 Be wogeme, ke geme o caa ju mu ne ko a pwoiitih, ke é ne ha a cihe ko a pwooti te Padué.»

5 É ne ha a bwopiinen naa, ke tai wâé ne ko lépwo acéihi. Lé pine ni apulie ce:

Étienne, pa apulie na nihe ubwo a céihi ten, ke tilieng na a Jenen Iitih;

Filip;

Prokore;

Nikanor;

Timon;

Parménas;

Nikola, pa apulie mu Antioche; pana e céihi ne ko a pwoiitih te lépwo *Juif.

6 Lé péélé bé céii lépwo apostolo, ke lé pwoiitih telé, ke lé ne ni ilé huîlé.

7 ††Ke e piubwo ngen a pwooti te Padué. Ke e taa me ubwo a jéhi lépwo acéihi ne *Iéruusaléma. Ke hiwon lépwo *apwoâpwailo na lé céihi.

Lé imwi Étienne

8 Wo Étienne, ke pa apulie na nihe ubwo a *adéhi te Padué ne kon. Ke e pwo ne ha awieme ni bele ni *inenaado na pwojunuun, be nihe ubwo a junuu Padué ne kon. 9 Ke pwo ni béé apulie na lé pwobwonieng: lépwo béé Juif mu Cirène, mu Alexandri, na lé âbé mu ha a *mwotapitih te lépwo *affranchi*, a bwopiinen pie lépwo apenem na tuwolé. Ke pwo mwo lépwo béé Juif mu he lupwo province é Silisi ke é Asia, ke lé piche me Étienne. 10 ††Kehe icehi ana te tice aceli me lé pwo ten, be e cihe ha a bwo temehi nen na e ne ten a Jenen Iitih.

11 Ke lé pwocui ni apulie, beme lé pii pie: «Geme téne he e pii ni pwooti na ta ne ko *Moosé me Padué.» 12 Ke lé pwo me okéé ni pwonime ali bele, ke wo lépwo apihuô, me lépwo *dotéén ko patén. Ke lé pwome

† 6.1 Apostolo 4.35 †† Lépwona lé cihe he pwo grek—Ni acéihi juif na lé pimu pwomwo koja a amu Judé. ‡ Depwele—Veuve.

†† 6.7 Apostolo 2.41, 16.5 †† 6.10 Luka 21.15

gaaté, ke lé imwi Étienne, ke lé pééeng nge céii a *mwohuô.

13 Ke lé ne mwo lépwo apulie na lé gele, me lé pii pie: «Pa apulie ce, ke time uce mwaale nang me e tee cihe me ta ne ko a *mwaiitih ke ni patén. 14 Geme téne he e pii wo Étienne pie wo Iésu mu Nazaret naa, na me e bo paniihi a mwaiitih ce, ke e o bo taatééhi ni huô li e ne tenye wo Moosé!»

15 Ke lé ome Étienne ati ni mwohuô, be e pwéélang a pwahamiin pwohewii a pwahamii *âcélo.

E pwopune wo Étienne

7 Ke e tahimwo Étienne wo pa *daame he lépwo apwoâpwailo pie: «Te a juuju kuti ana lé ko pii ne kom?»

E piuti jepule ko lépwo Isaraéla @ —Abérama

2 †††Ke e hegi ne ten pie: «Lépwo âjiénung me lépwo caa, geé téne, wo Padué na ubwo nang ne ha *a wâé ten, ke e pihabwiieng de pa caa tenye *Abérama, he e mwo te mu ha amu Mésopotami, ânebuhe a bwo engen den me e â mu Aran. 3 Ke e pii ten wo Padué pie: *Go engen koja a pwomwoiu tem me a amu tem, ke go â ha amu na é bo habwii tem.*

Genèse 12.1

4 †††«Ke e engen wo Abérama mu ha amu te lépwo Babulona §, ke e â mu Aran. Ke é alecehen, ke e mele wo caa ten. Ke wo Padué, ke e pééeng bé ne ha amu ce, na geé caa tee ko mu hen jena.

5 †††«Kehe te tice ace céiu duaan celi e ne ten. Kehe icehi ana e caa te mi pii ten pie: *É bo ne tem me ni piebehiko a amu ce.*

Genèse 17.8

Ke é ha a benaamwon naa, ke he mwo te tice naî Abérama.

6 †††«Ke e pii ten wo Padué pie: *Ni naî ni naîm, ke lé o bo mulie ne ha amu na mwo coho, ke lé bo penem tice ja kon ne ha amu naa, ke o bo pwotahinaado ne kolé he na 400 ni jo.* 7 †††Kehe icehi ana e pii mwo wo Padué pie: *É bo pwocuhinaado te a bele naa, na lé pwo me lé penem tice ja kon. Ke é alecehen, ke lé bo wie, ke lé bo pipaunuéo, ne ha a duaan ce.*»

Genèse 15.13–14

Isaaka me Iakobo

8 †††«É alecehen, ke wo Padué, ke e pacuwohi a *piapwo telu me Abérama. Ke a ine a piapwo, ke a *tegoop. Ke wo Abérama, ke e pwotegoop te Isaaka, pa naî, ha a bécéiuhe naadenitan den. Ke wo Isaaka, ke e pwotegoop te Iakobo pa naî, ke wo Iakobo, ke e pwo te ni

††† 7.2–7 Genèse 11.31, 12.1 ††† 7.4 Genèse 11.31–12.5

§ Babulona—Grek: Kaldé—la partie sud de la Babylonie. †† 7.5

Genèse 12.7, 15.18, 17.8 ††† 7.6–7 Genèse 15.13–14; Exode 12.40

§† 7.7 Exode 3.12 ††† 7.8 Genèse 17.9–14, 21.4

naîn na 12 jélé: wo lépwona lé bo watihe ni 12 pwomwoiu te a bele tenye *Isaraéla.»

Josef

⁹ †«Ke lé pitaaba ne ko Josef wo lépwo âjiénen naa. Ke lé icueng, ke e caa â *apenem tice ja kon ne ha amu *Aigupito. Kehe icehi ana e te mu pelen wo Padué. ¹⁰ ††Ke e te celuimieng koja ni picani me ni téé. Ke e ne ten a bwo temehinaado. Ke e ne me e piwâé Josef wo Faraô, pa daame ne Aigupito. Wo Faraô, ke e ne me e gupéno ne ha amu Aigupito, ke me e pihuôhi ni den ne ha a pomwa ten.

¹¹ ††«Ke e tuiebé a menele na ubwo, na ati ha amu Aigupito, ke é Kanana †. Ke te junihe pwoééhe ni apulie. Ke caa tice wiinaado te lépwo caa tenye. ¹² Ke me e temehi pie pwo wiinaado Aigupito wo Iakobo, ke e tabuhi pawie ole [ni naîn], lépwo caa tenye.

¹³ ††«É ha a béalohe bwo ole telé, ke e pipatemehieng de lépwo âjiénen wo Josef. É mulang, ke e bwobe temehi a pwomwoiu ten wo Faraô. ¹⁴ †††Ke wo Josef, ke e todebé caa ten Iakobo, me ati a pwomwoiu ten, ke pwo 75 jélé ati. ¹⁵ †††Ke e ole Aigupito wo Iakobo, ke e bwo mele nelang, woélé me lépwo caa tenye. ¹⁶ †Ke lé te pédaamwo ni duulé ne ha amu Sichem, ke nelé ha a iitih na e pwocuhin ko mwani wo Abérama koja ni piebehi Amor, pa apulie ha amu Sichem.

¹⁷ †††«Ke caa é mwonu a benaamwon na o caa cuwo a piapwo ânebun na e pii wo Padué te Abérama. Ke mepwo ali bele Isaraéla, ke piubwo ke pihiwon jélé ne Aigupito. ¹⁸ †††Kehe icehi ana e â cuwoda wo pa céiu daame ne Aigupito, na e pwo me piticenaado ne ko ni penem de Josef. ¹⁹ Ke e pipwohuô te ali bele tenye, ke e pwo me ta ne kolé, ke e pwohuu telé, me lé engen koja ni naîlé, beme lé mele.»

Moosé

²⁰ †††«É ha a benaamwon naa, ke e pituie wo *Moosé, pa cuwo ewa na te junihe wâé nang ne hamii Padué. Ke lu picileeng he na cié ni wole wo lu nyaa ten me caa ten. ²¹ †††[Ke caa time uce jan me lu pineduwoeng] ke lu pééeng, ke lu neeng ole he éémwa. Ke e tooeng ê naî pa daame Faraô, ke e pééeng me pa naîn. ²² Ke lé pacémunieng ne ha ati ni pitemang de lépwo Aigupito, ke pa acihe ehi, ke e penem ehi.

²³ «É he ko 40 ni jo hen, ke e âbé ne he pwonimen pie me e â caniê lépwo âjiénen, a bele Isaraéla. ²⁴ †Ke e too pa céiu Aigupito, he e ko ahi pa céiu apulie Is-

† 7.9 Genèse 37.11,28, 39.2,21–23 †† 7.10 Genèse 41.37–44 † 7.11 Genèse 41.54, 42.1–2 †† Kanana—Ali amu li e ne te Abérama me ni piebehieng wo Padué. Omehi a niide a tii 4. Omehi mwo Kanana ne ha a Niinaado (Vocabulaire) ha anebwén ko a tii. †† 7.13 Genèse 45.1–4, 16 ††† 7.14 Genèse 45.9–11, 46.27 ††† 7.15 Genèse 46.1–7, 49.33 § 7.16 Genèse 23.2–20, 33.19; Josué 24.32 †† 7.17–18 Exode 1.7 ††† 7.18–19 Exode 1.8–22 †† 7.20 Exode 2.2 ††† 7.21 Exode 2.3–10 †† 7.24 Exode 2.11–15

araéla. Ke e pwopain ko pali e ko ahieng, ke e taunu pali Aigupito. ²⁵ E te niimihi pie wo lépwo âjiénen, ke lé o te temehi pie wo Padué ke nimen me e celuimilé. Kehe icehi ana time lé uce temehi.

²⁶ ††«Ke é ha a tan alecehen, ke e ali lupwo apulie Isaraéla na lu ko piokéé, ke e picuwo hadeniilu, ke e pii telu pie: “Lupwo bééng, wogeu, ke lupwo âjién. É ko ade na pita geu?” ²⁷ Kehe icehi ana wo pa apulie na e ahi pa béén, ke e pitité Moosé, ke e pii ten pie: *Woo paceli e etiko me go daame heme, ke me go pa atautikeme?*²⁸ *Woté? Go pwo me go taunué, pwohewii ali bwo taunu pali Aigupito haabwén?*

Exode 2.14

²⁹ †††Ke me e téne anaa wo Moosé, ke e te cela kuti, ke e â coho ne ha amu Madian. Ke lu pituie nelang wo lupwo naîn.

³⁰ †††«É alecehe nina 40 ni jo, ke e pihabwiieng de Moosé wo pa céiu *âcêlo ne ha a melé ††† e mwonuhi a juwole Sinai. E âbé ha a duwele miû ko a nahi acuwo na éle. ³¹ Ke me e alihi anaa wo Moosé, ke e te junihe téetih kuti, ke e âbé mwonuhi, beme e alihi ehi. Ke e téne a pwocihe te Padaame na e pii ten pie: ³² *Woéo Padué he lépwo watihem: Padué he Abérama, ke Padué he Isaaka, ke Padué he Iakobo.*

Exode 3.6

Ke te éjén kuti Moosé ko a bwo mwotieng, ke pwocoon den me e omehi.

³³ †††Ke e pii ten wo Padaame pie: *Go céi ni dihibwaam, be mepwo a duaan na go ko cuwo hen, ke a duaan na iitih.*³⁴ *É caa alihi a picani me a téé te a bele tong Isaraéla, ne Aigupito, ke é téne a pwocewé ten. Ke é opé beme é pawielé. Ke é jena, ke go engen, be é bo neko nge Aigupito.*

Exode 3.5–10

³⁵ †††[E ne te Moosé a mwomwon naa wo Padué] kehe icehi ana time lé uce temehieng, ke lé pii pie: *Woo paceli e etiko me go daame heme, ke me go pa atautikeme?*

Exode 2.14

Weeng kuti na e neeng wo Padué me e pihuô, ke me e pipéélé, be weeng pana e pipégalieng wo pa âcêlo te Padué, li e pihabwiieng ne ha ali nahi acuwo.

³⁶ ††††«Ke wo Moosé, ke e pwo me e wie a bele ten mu Aigupito. Ke e pwo ni *inenaado na pwojunuun, ne ha amu Aigupito, ke é ne ha a jié Megele, ke é ne ha a melé he na 40 ni jo. ³⁷ Wo pa Moosé naa kuti, na e pii te a bele Isaraéla pie: *Wo Padué, ke e bo pwo me e cuwoda mu hadeniwé wo pace péroféta celi e pwohewi-é.*

Deutéronome 18.15

³⁸ †††Mwo te wo Moosé mwo, na e mu pele lépwo caa tenye, ke lé tai mu ha a melé. Ke te weeng mwo na e

§† 7.29 Exode 2.21–22, 18.3–4 ††† 7.30–35 Exode 3.1–10 ††† Melé—Da (désert). A duaan na ticie hen. ††† 7.36 Exode 7.3, 14.21; Nombres 14.33 18 7.38 Exode 19.3

mu pele pali âcélo, he li e paciheeng ne pwo a juwole Sinai. Ke e ne ten wo pali âcélo ni pwooti mulip, beme e bo ne tenye.»

Muhi telé ko Moosé

³⁹ «Kehe icehi ana wo lépwo caa tenye, ke muhi telé me lé piténedeeng, be muhi telé kon, be nimelé me lé mwojuia ngemwo Aigupito. ⁴⁰ †Ke lé pii te *Aarona [pa cuwo Moosé] pie: *Go pwo ce *dème duéé henye celi me lé ânebuhenye. Be mepwo wo pa Moosé naa, pali e pawiekenye mu ha amu Aigupito, ke time genye uce temehi celi e ko tooeng.*

Exode 32.1

⁴¹ ††É he ni tan naa, ke lé pwo a nahi paaci me a déme duéé helé, ke lé pwo a tan ubwo, ke lé pwoâpwailo ten. Ke lé te junihe pipwodéén ko ana lé pwo. ⁴² †Ke e biteeng wo Padué kojálé, ke e patupwolé me lé pwoi-itihi te [a téale, me a wole, me] ni ceni. Genye pine anaa ne he ni tii te lépwo péroféta pie:

*Bele Isaraéla,
kona geé mu te pwoâpwailo tong
he na 40 ni jo ne ha a melé? Ûhu!*
⁴³ *Be li geé pé ali mwa mwaanu
te ali duéé Molok†,
ne pehi ali ceni te ali duéé Réfan††,
ni démenaado na geé pwo,
me geé pipaunuhi.
Watihen kuti ninaa,
na é pwo me péékewé
nge ité koja Babulona.» Amos 5.25–27*

A mwa mwaanu

⁴⁴ «Ne ha a melé, ke wo lépwo caa tenye, ke lé pwo a mwa mwaanu na e mu hen ni patén de Padué. Lé pacuuli a mwa mwaanu naa, pwohewii a bwomunen na e pii te Moosé wo Padué, he e habwii ten. ⁴⁵ ††É alecehen, ke uce ni nailé na lé pé céilé, he lé âcéi Iosua, ke lé pipwoeapwihi a amu [Kanana] ke lé mu lang. Be wo Padué, ke e caa peni ni bele na lé te mi mu lang ânebuhelé. Ke mepwo a mwa mwaanu naa, ke e mu lang dieli ha a benaamwon de pa daame *Davita. ⁴⁶ †††Ke mepwo wo Davita, ke te junihe wâé nang ne he pwahamii Padué. Ke e ilehi kojaeng, pie me e pacuuli ace *mwaiitihi te a bele Isaraéla †††. ⁴⁷ †Ke wo *Solomona na e bo bahi a mwaiitihi te Padué.

⁴⁸ «Kehe icehi ana wo Padué na nihe e daaité, ke time e uce mu he ni mwa na lé pwo ne ni apulie. Be e pii wo pa céiu péroféta pie:

⁴⁹ *E pii wo Padué pie:*

† 7.40 Exode 32.1 †† 7.41 Exode 32.2–6 † 7.42 Amos 5.25–27 †† Molok—Pa céiu duéé he lépwo Kanana; Réfan—Pa céiu duéé he lépwo Babulona. †† 7.45 Josué 3.14–17 ††† 7.46 Exode 25.40; 2 Samuel 7.1–16 ††† Bele Isaraéla—Grek: Pomwa te Iakobo. § 7.47 1 Rois 6.1–38

*“A miiden, ke atebwo tong,
ke a bwohemwo, ke aca tong.
Ke he ace mwa celi woté
celi me geé bahi me dong?
É wé ace duaan*

celi o jan me é mu hen?

⁵⁰ *He time uce a ing*

na e pwo ati ni naado naa?” Ésaïe 66.1–2

Wogewé lépwo apipwobwoni Padué

⁵¹ ††E pii mwo wo Étienne te lépwo apihuô pie: «Te junihe mwoiu ni puniwé! Be muhi tewé me geé téne a pwooti te Padué! Ûhu! Geé te cuwo ko pipwobwonihii a *Jenen Iitihi, pwohewii lépwo caa tewé. ⁵² †††Be lé pwotahi ne ko ni péroféta ati. Ke lé taunu ni béén na lé te mi piuti ânebun a bwo tuie te pana mwomwon nang, na e pipégalieng wo Padué. Ke te wogewé mwo na geé icueng, ke geé taunueng. ⁵³ Wogewé lépwo na geé hegi ni patén de Padué na lé pipwaadeniin bé ne pelewé ne ni âcélo ††, ke time geé uce âcehin.»

A bwo mele te Étienne

⁵⁴ Ke me lé téne ni pwooti naa wo lépwo apihuô, ke lé te junihe okéé kuti, ke lé piwii pecuwo ne ko Étienne.

⁵⁵ †††Ke e ole kon a Jenen Iitihi, ke e niê da he miiden, ke e alihi a wâé te Padué, ke e ali Iésu [na e pihuô] ne *pwo a jui Padué. ⁵⁶ ††Ke e pii pie: «Geé téne! É alihi a miiden he tehi. Ke e cuwo pwo a jui Padué wo pa *Nahi Apulie!»

⁵⁷ Ke lé te cihe kuti me ubwo, ke lé capuhi ni pwojéénelé, ke lé te tai tétebé ne kon. ⁵⁸ Ke lé céieng wie koja a pwomwo ubwo, ke lé ahieng ko péi, beme lé taunueng. Ke lé ne ni epwénelé ko ni a pa ewa aiu na pii kon pie Saulo.

⁵⁹ Me lé ko ahieng ko péi, ke e pwoiitihi pii pie: «Padaame Iésu, go hegi a jenung.»

⁶⁰ ††Ke e tidihii jilin, ke e toii da pie: «Padaame, go pineulé ko a ta na lé pwo tong!» Ke é alecehe ni pwooti naa, ke e mele.

8 Wo Saulo, ke e mu lang, ke te céiu jélé ko a bwo taunu Étienne.

Saulo ke e pwotahinaado ne ko lépwo acéihi

Ke é ha a tan naa, ke te nihe ubwo ngen a bwo pwotahinaado ne ko lépwo acéihi na lé mu *Iérsaléma. Ke lé muko pipiiden ati, ne he ni piduaan, ne ha a *Judé me ha a *Samari. Te icehi lépwo *apostolo na lé mu Iérsaléma. ² Pwo lépwo apulie na lé nihe pipwoi-

§† 7.51 Ésaïe 63.10 §†† 7.52 Mataio 23.31 §† Ni âcélo—Lé pii wo lépwo béé Juif pie, ni patén, ke lé pwaadeniin bé ne ni âcélo. §†† 7.55 Psaume 110.1 §† 7.56 Kolosé 3.1 §† 7.60 Luka 23.34

ipilé ne ko Padué, ke lé pineduwo Étienne, ke lé te nihe é niimieng me ubwo.

³ †Wo Saulo, ke e te nihe pwotahinaado ne ko lépwo acéihi. E taa he ni mwa, ke e céi wie ni aiu me ni toomwo, ke e nelé he karépu.

A penem de Filip ne Samari

⁴ Lépwoli acéihi li lé pipiiden, ke lé pétaapwo â he ni piduaan, ke lé cihe ko a Pwooti Wâé. ⁵ E ole wo Filip †† ne ha a pwomwo ubwo mu ko a *Samari, ke e cihe telé ko pa *Mesia. ⁶ Lé tabemi ehi nina e pii telé ati ne ni apulie na lé mu lang. Ke lé alihi ni *inenaado na pwojunuun na e pwo. ⁷ Be ni duéé, ke lé wie mu ko ni apulie na cunu jélé, ke lé cihe me ubwo, ke hiwon ni tebwomwa me ni tebwa na wâé jélé. ⁸ Ke nihe ubwo a pipwodéén ne ha amu naa.

Simon, pana e pwo pwoduéé

⁹ E te mi mu ha amu naa, pa apulie na pii kon pie Simon, pana e pwo pwoduéé. Ke e pipééeng me nihe pwonaado ne kon. Ke lé te nihe téele ko nina e pwo wo lépwo apulie ne ha amu Samari.

¹⁰ Woélé ati, tabuhi mu ko lépwo cuwo nahi ewa die ko lépwo ukéiu, ke lé te nihe tabemieng ehi, ke lé tai pii ati pie: «Wo paje, ke e mu huîin a Junuu Padué na nye pii pie a Junuun Ubwo.» ¹¹ Ke lé te nihe tabemieng kuti, be caa te nihe bwali a benaamwon, na e pwo me lé téele ko a bwo pwo pwoduéé ten.

¹² Ke é he lé céihi ne ko Filip, na e pii telé a Pwooti Wâé ko a *Mwametau te Padué ke a nii Iésu Kériso, ke ni aiu me ni toomwo, ke puulé.

¹³ Ke e céihi mwo wo Simon, ke é alecehe a bwo puueng, ke caa time e uce engen koja Filip. E alihi nina pwojunuun me ni inenaado na ubwo na e pwo, ke te nihe emegéi nan mwo.

¹⁴ Lépwo apostolo na lé mu Iérusaléma, ke lé téne pie, lé caa hegi a pwooti te Padué wo lépwo apulie Samari. Ke lé ne nge céiilé Pétéru me Ioane. ¹⁵ Ke me lu tehene nge pelelé, ke lu pwoitihi telé me lé hegi a *Jenen Iitihi. ¹⁶ Be time e uce téele ole ko pace pibéélé. Mwo te ju puulé cehi ne he nii Padaame Iésu. ¹⁷ †Ke lu ne ni ilu huîilé wo Pétéru me Ioane, ke lé hegi a Jenen Iitihi.

¹⁸ É he e alihi wo Simon pie e ole huîi lépwo acéihi a Jenen Iitihi, he lu ne ni ilu huîilé wo lupwo apostolo, ke nimen me e ne telu ni mwani. ¹⁹ Ke e pii telu pie: «Geu ne tong a junuun naa, be mepie pwo pace céiu apulie celi me é ne a ing huîin, ke me e hegi a Jenen Iitihi.»

²⁰ Kehe e pii ten wo Pétéru pie: «Wâé heme tiekeu me a mwani tem, be go niimihi pie, a âpipati te Padué,

ke ace naado celi nye pwocuhin ko mwani! ²¹ Ke o te tice dem mu ko ni penem demu! Be é ne te Padué, ke te nihe ta a pwonimem. ²² Go biteko koja ni âniimihi-naado tem na ta, ke go pwoitihi te Padué, beme e pineuhi ni bwo niimihi nen dem. ²³ Be é alihi pie e he pwonimem a pitaaba ke a pipwokon, ke e caa tiliko a ta.»

²⁴ Ke e hegi ne telu wo Simon pie: «Lupwoje, geu pwoitihi me dong, beme time uce tooéo ni naado na geu ko pii!»

²⁵ Ke lu pii beetihi a pwooti te Padué wo Pétéru me Ioane. Ke é alecehen, ke lu mwojuia ne Iérusaléma. Ke é nge he pwaaden, ke lu pii beetihi a Pwooti Wâé ne he ni cuwo nahi amu na hiwon ne Samari.

E céihi wo pa apulie Étiopi

²⁶ Ke é ne ko Filip, ke e paciheeng a *âcélo te Padaame, ke e pii ten pie: «Go caamada, ke go â ha a pwaaden na e ole mu Iérusaléma ne Gaza, a pwaaden na time lé mu uce cuwo ko engen hen.»

²⁷ Ke e te cuwoda kuti wo Filip, ke e engen, ke é he e mwo ko â he pwaaden, ke pitapitilu me pa céiu apulie Étiopi ††. Wo panaa, ke pa apulie na piubwo nang †† ne he ni pihuô ko ni mwani te Kandace, ê toomwo daame ne Étiopi. Be e mwojuia mu ha a pipwoun de Padué ne Iérusaléma. ²⁸ Ke e ko pine, ne ha a otuun den, a tii na e tii wo péroféta Isaia.

²⁹ Ke e pii te Filip a Jenen Iitihi pie: «Piâmwonuhi a otuun na e ko âbé!»

E paciheeng ko Iésu

³⁰ Ke e téte ngen wo Filip, ke e téne pali Étiopi he e ko pine a tii te péroféta Isaia. Ke e tahimwoeng wo Filip pie: «Go teko temehi ana go ko pine?»

³¹ Ke e hegi ne ten pie: «He me é woté ko ace bwo temehi nen, he te tice paceli me e patemehi tong?» Ke e ile Filip me e taa tebwo pelen.³² †††Ke a niide a tii na e ko pine, ke e pii pie:

*Pwohewii a muto
na lé teuueng ngen
ne ha a mwotaunuhi wota.
E pwohewii ne ko a nahi muto
na e te ju mu me nye tali ni pumiin,
be time e uce cihe.*

³³ *Ke lé pwo me piwahin nang,
ke lé pwo me ta ne kon.
Ke de e bo pwojepule
ko ni piebehieng? Te tice.
Be caa tieden a mulihen
mu éni pwo bwohemwo.Ésaie 53.7–8*

† 8.3 Apostolo 9.1,13, 22.4, 26.9–11 †† Filip—Pa céiu béé lépwo 7 bépicaní te lépwo apostolo. Omehi Apostolo 6.5. ††† 8.17 Apostolo 19.6

†† Étiopi—A amu ne Afríke, âoté ité koja Aigupito (Égypte).
††† Pa apulie na piubwo nang—Grek: Pa eunuque, pa apulie na piubwo nang. Omehi Mataio 19.12. †††† 8.32–33 Ésaie 53.7–8

³⁴ Ke e tahimwo Filip wo pali apihuô pie: «He woo paceli e ko cihe kon wo pa péroféta ce? Ai e teko picihe kon mwo, ai e ko pii pace céiu mwo? É ileko pie, go pii tong.»

³⁵ Ke e tabuhi pii pwaatihi ten wo Filip mu ko a bwopiinen naa, ke e pii beetihi ten a Pwooti Wâé ko Ié-su.

E céihi ke puueng

³⁶ †Ke é he lu ko â he pwaaden, ke lu alihi a pihitabe, ke e pii te Filip wo pali apihuô pie: «Ade aceli e pacu-wohi me puuéo, he caa neko a tabe?»

{ ³⁷ Ke e hegi ne ten wo Filip pie: «Hemepie go céihi ati ne he pwonimem, ke jan me puuko.»

Ke e hegi ne ten wo pali apihuô pie: «É céihi pie wo Ié-su Kériso, ke pa *Naî Padué.»}

³⁸ Ke e pacuwohi ali otuun, ke lu ole me Filip ne ha ali pihitabe, ke e puueng wo Filip. ³⁹ Ke é he lu taamwo mu ha a tabe, ke e pé Filip a Jenen Iitihî, ke caa time e bo uce alieng mwo wo pali apihuô. Kehe icehi ana nihe piwâénimen, ke e te uti a pwaadeniin.

⁴⁰ ††Ke e bwo ne Filip ne Azot ali Jenen Iitihî. Ke é mulang, ke e â Césaré wo Filip, ke é nge he pwaaden, ke e patemehi a Pwooti Wâé na ati he ni cuwo nahi amu.

E tode Saulo wo Padaame Ié-su

9 †É ha a benaamwon naa, ke e te junihe okéé wo Saulo. Ke nimen me e taunu nina lé céihi ne ko Padaame [Ié-su] ke e hane ace bwopwonen. Ke e â too pa *daame he lépwo apwoâpwailo. ² Ke e ileeng pie me e tii ace tii te lépwo apihuô te ni *mwotapitihî te ni *Juif ne Damas. A tii naa, ke e ne a mwomwon den me e imwi nina lé céihi na e toolé, ni aiu me ni toomwo na lé âcéi Ié-su, beme e péélé bé ne *Ié-ru-salé-ma.

³ Ke é he e ko â ha a pwaaden nge Damas, ke me e âmwonuhi lang, ke e te opé kuti mu he miiden a pwéelang, ke e pwéelang aujenieng. ⁴ Ke e te tupwo kuti ne pwo bwohemwo, ke e téne a pwocihe na e pii ten pie: «Saulo, Saulo, é ko ade na go pwotahi ne kong?»

⁵ [Te junihe mwoti Saulo kuti] ke e tahimwohi pie: «Wogo ke woo, go pa daame?»

Ke e hegi ne ten wo Padaame pie: «Woéo Ié-su, pana go ko pwotahi ne kong †. ⁶ Go cuwoda, ke go taa ha a pwomwo ubwo [Damas] be o bo pii tem nelang aceli me go pwo.»

⁷ Ke lé cuwo ne ni apulie na lé âcêin, ke te junihe emegéi nalé, ke time lé temehi aceli me lé pii. Be lé te

téne a pwocihe, kehe icehi ana te tice apulie celi lé alihi.

⁸ Ke me e cuwoda mu pwo bwohemwo wo Saulo, ke he e teko niê, kehe icehi ana caa time e uce alikenye. Ke lé bwo te ju pétaa ko in, ke lé pééeng nge Damas.

⁹ Ke cié ni tan na e mu hen, ke time e uce alikenye, ke time e uce wiinaado, me ûdu.

E pahede Ananias nge céii Saulo

¹⁰ E mu Damas wo pa céiu acéihi na pii kon pie Ananias. Ke e pihabwieng den wo Padaame, ke e pii ten pie: «Ananias!»

Ke e hegi ne ten pie: «Padaame, woéo-ni!»

¹¹ Ke e pii ten wo Padaame pie: «Go cuwoda, ke go â ha a pwaaden na pii kon pie 'Mwomwon ko pwaaden'. Ke go hane ha a pomwa te Judas, pa apulie mu Tarse na pii kon pie Saulo. Be e ko pwoitihî, ke é ne me e alihi ne ha a jenen ¹² pa apulie na a niin pie Ananias na e ko taabé, ke e ne ni in huîn, beme e niê mwo.»

¹³ Ke e hegi ne ten wo Ananias pie: «Padaame, hiwon ni apulie na lé pii tong ati ni naado na ta na e pwo wo pa apulie naa, te ni naîm na lé céihi ne ko Ié-su ne Ié-ru-salé-ma. ¹⁴ Ke e éni, imi a mwomwon na lé ne ten wo lépwo caa te lépwo apwoâpwailo, beme e imwi ati ni apulie na lé pipaunuko.»

¹⁵ ††Kehe icehi ana e hegi ne ten wo Padaame pie: «Go ân, be é caa pipégali pa apulie naa, beme pa bépenem dong. E bo pipatemehi a niing ne he pwa-hamii ni bele me ni daame helé, ke é ne mwo he pwa-hamii a bele *Isaraéla. ¹⁶ †††Ke é bo habwii ten ati ni picanî ke ni téé na e bo mu hen, watihen a niing.»

¹⁷ Ke e te wie kuti wo Ananias, ke e engen.

E pwoitihî me den wo Ananias

Ke e â taa ha a mwa na e mu hen wo Saulo, ke e ne lupwo in huîn. Ke e pii ten pie: «Saulo, pa bééng: E pahedeéo wo Padaame Ié-su, wo Padaame li e pihabwieng dem ne pwo pwaaden. Ke e neéo bé, beme go niê mwo, ke me tiliko na a *Jenen Iitihî.»

¹⁸ Ke e te tupwo kuti mu hamii Saulo nina pwohewii ni ude-ikua, ke e caa niê mwo. Ke é alecehen, ke e cuwoda, ke puueng. ¹⁹ Ke e wiinaado, ke pwo niihen mwo.

E pii beetihî a Pwooti Wâé wo Saulo

Mwo te pwo mwo ni tan de Saulo ne Damas pele ni acéihi. ²⁰ Ke e te pwome patemehi kuti a pwooti nge he ni mwotapitihî. Ke e pii beetihî telé pie, te wo Ié-su kuti pa *Naî Padué.

²¹ †††Ati nina lé tabemieng, ke lé te junihe téele. Ke lé pii pie: «He time uce weeng kuti, pali te junihe pwo ni-

† 8.36 Apostolo 10.47 †† 8.40 Apostolo 21.8 † 9.1 Apostolo 8.3 †† Ni béé tii iitihî he pwo grek, ke e hen ni pwooti ce: «O te junihe pwocoon ne kom, me go pwobwoni Padué.» Te junihe emegéi na Saulo, ke te junihe éjén nang. Ke e pii pie: «Padaame, ade aceli nimem me é pwo?» Ke e hegi ne ten wo Padaame pie...

†† 9.15 Apostolo 25.13, 27.24; Roma 1.5 ††† 9.16 2 Korénit 11.23–28 ††† 9.21 Apostolo 8.3

ihen me e pwotahi ne ko nina lé pwoiitihi ne he nii Ié-su ne Iérusaléma? Ke li e pwo me e âmwobé imwilé ne mwo éni, ke me e péélé nge céii ni caa te lépwo apwoâpwailo!»

²² †Kehe icehi ana te piubwo da a junuu Padué ne ko ni bwo cihe te Saulo. Ke e patemehi te lépwo Juif mu Damas, pie wo Iésu, ke pa *Mesia. Ke time lé temehi ace bwo hegi nen den.

E cela ko lépwona lé téétieng

²³ Caa pwo a benaamwon de Saulo pelelé, ke lé pipitilé wo lépwo Juif, ke lé piténelé beme lé taunueng.

²⁴ Ke é ati he ni bwén, ke pwang, ke lé wéa kon ne he ni pomwa ko a pwomwo ubwo, beme lé taunueng. Kehe icehi ana e caa â temehi anaa wo Saulo. ²⁵ ††Ke é he bwén, ke lé pwo me e cela wo lépwo acémun den; ke lé neeng ole ha a élele tai, ke lé neeng ole ko a goomwa babé ko a pwomwo ubwo.

E picani ten wo Barnabas

²⁶ †Ke é he e â Iérusaléma wo Saulo, ke e hane ace bwopwonen beme e â too lépwo acéihi. Kehe icehi ana tai mwotilé kon, be time lé uce mwomwohi pie caa pa céiu acéihi.

²⁷ ††Ke e picani ten wo Barnabas †, ke e pééeng nge céii lépwo apostolo, ke e piuti telé pie: «Wo Saulo, ke e ali Padaame ne pwo pwaaden, ke e paciheeng wo Padaame. Ke time uce piwâ nang me e patemehi a Pwooti Wâé ne he nii Iésu ne Damas.»

²⁸ Tabuhi mulang, ke e caa mu pele lépwo *apostolo wo Saulo. Ke e âdé ke âbé me lépwo apostolo ne Iérusaléma, ke e patemehi mwoiuihi nelang a Pwooti Wâé ne he nii Padaame. ²⁹ Ke e pacihe mwo lépwo Juif na lé cihe he pwo *grek. Kehe icehi ana lé pééleeng ko ana e pii telé, ke lé hane ace bwopwonen beme lé taunueng. ³⁰ Ke me lé temehi anaa wo lépwo acéihi, ke lé pééeng nge Césaré. É mulang, ke lé pwo me e â Tarse.

³¹ É ha a benaamwon naa, ke lé mulie ne ha a péém wo lépwo acéihi ati he ni amu *Judé, Galilé, ke *Samar. Lé pipamwoiulé, ke paciiti Padué. Ke e pitaa a jéhilé, be e picani telé na a Jenen Iitihi.

A penem de Pétéru ne Lida me Jopé

E caa engemwo wo Éné

³² Wo Pétéru, ke e canié ngemwo ni acéihi ati he ni amu, ke e ole die pele lépwona lé mu Lida. ³³ Ke é nelang, ke e too pa céiu apulie na pii kon pie Éné, na e

caa pwo 8 ni jo ko a pule pwo apule ten, be tebwomwa nang.

³⁴ Ke e pii ten wo Pétéru pie: «Éné, e pwo me wâé go ni wo Iésu Kériso! Go cuwoda, ke go capipihi apule tem!» Ke e te cuwoda kuti.

³⁵ Ke me lé alihi anaa, ke lé céihi ne ko Padaame ati ne ni apulie Lida me Saron ††.

E pwo me e mulie mwo wo Tabita

³⁶ É ne pele lépwo acéihi ne Jopé, ke pwo é toomwo na pii kon pie Tabita [he pwo *ébéru] ke Dorkas he pwo grek. Ke ênaa, ke te a penem den me e pwo nina wâé. Ke e picani te nina pwoééhelé. ³⁷ Ke é ha a benaamwon naa, ke cunu nang, ke e mele. É alecehe a bwo papiwonieng, ke lé pééeng da ha a nemwa na e da ko miiden. ³⁸ Ke me lé temehi ne ni acéihi na élé Jopé pie, wo Pétéru ke e Lida, ke lé pahede ngen lupwo alo béélé me lu â pii ten pie, me e piepin bé pelelé. Be time uce e ité Lida me â Jopé. ³⁹ Ke e te âcéilu kuti wo Pétéru. Ke me e tehene ngen, ke lé pééeng da ha a nemwa na e ko miiden. Ke ati ni toomwo depwele, ke lé é bé beniieng, ke lé habwii ten ni epwén na e pwo wo Dorkas, he e mwo mulie.

⁴⁰ Ke e pawielé ati wo Pétéru, ke e tidih jilin, ke e pwoiitihi, ke e biteeng ne ko ali éé apulip, ke e pii ten pie: «Tabita, go cuwoda!»

Ke e te nié kuti wo Tabita, ke me e ali Pétéru, ke e te caama tebwokuti. ⁴¹ Ke e pétaa ngen wo Pétéru, ke e pwieng. Ke é alecehen, ke e tode ati ni acéihi, ni toomwo depwele me ni béé apulie, ke e habwii Tabita telé, pie e caa mulie mwo.

⁴² Ke lé téne a jepule naa, ati ne ni apulie Jopé, ke te junihe hiwon nina lé céihi ne ko Padaame.

⁴³ Caa pibwoli Pétéru Jopé, ke e pimu pele pa apulie na pii kon pie Simon, pa apenem ko iiwota.

Pétéru me Korneï

10 Pwo pa apulie na e mu Césaré na pii kon pie Korneï. Pa Roma, pa céiu caa te ni 100 coda ne ha a mwocoda te lépwo Itali. ² Pa apulie naa, ke e céihi ne ko a pwoiitihi te lépwo *Juif, weeng me ni apulie na lé mu ha a pomwa ten. E te nihe pati lépwo Juif na tice delé, ke e te pwoiitihi te Padué.

E pacihe Korneï wo pa âcélo

³ É ha a céiu tan, he ko cié inetéale ko alecehe a goahen, ke e pwoiitihi, ke e te ju ali ehi pa *âcélo te Padué, he e ko â taadeeng ne huâ, ke e pii ten pie: «Korneï!»

⁴ Ke e te ju omeeng ehi wo Korneï, ke te nihe mwo-tieng, ke e pii pie: «Ade, go Padaame?»

† 9.22 Apostolo 18.28 †† 9.25 2 Korénit 11.32–33 † 9.26 Galat 1.17–19 †† 9.27 1 Korénit 9.1 †† Barnabas—Omehi Apostolo 4.36–37.

†† Saron—A da na ubwo: 80 kilomètre

15 kilomètre

Ke e pii wo pali âcélo pie: «E caa hegi a pwopwoiitihi tem wo Padué. Ke e alihi ati ni âpipati tem ne pele nina pwoééhelé, ke time e uce pineuko. ⁵ Wâé heme go ne nge Jopé ce apulie, beme lé â todebé Simon, pana te pii kon mwo pie Pétéru. ⁶ E pimu pele Simon, pa apenem ko iiwota, na e mu pejié.»

⁷ Ke e caa te engemwo wo pali âcélo li e paciheeng. Ke wo Korneï, ke e tode lupwo apulie na alo julu, mu pele lépwo apenem den. Ke e tode mwo pa céiu coda ten, mu hadenii ni coda na e pihuô telé, pa coda na caa nihe bwolieng pelen; pana e te pipwoiipieng ne ha a pwoiitihi. ⁸ Alecehe a bwo uti telé ati nina e tuie ne kon wo Korneï, ke e nelé nge Jopé.

E pacihe Pétéru a Jenen Iitihi

⁹ A tan alecehen, he e teko ju goahen ehi, ke lé piâm-wonuhi a pwomwo ubwo Jopé. É ha a benaamwon naa, ke e taa pwo mwa he na belece lang wo Pétéru, beme pwoiitihi. ¹⁰ Ke menen, ke nimen me e wiinaado. Ke é he lé mwo ko piwâam ko a wiinaado ten, ke e habwii ni naado wo Padué te Pétéru ne ha a jenen. ¹¹ Ke e alihi a miiden he tehi, ke e opé mulang ana pwohewii a cehitaap na nihe ubwo, na cie ni uhin na paa. Ke e opé die pwo bwohemwo. ¹² Ke e mu hen ati ni pétaapwo wota na pipaa ni alé, ke ni paile me ni âmutaa me ni bwien, me ni meni mwo.

¹³ Ke e pii ten a pwocihe pie: «Go cuwoda, go Pétéru, ke go taunuhi, ke go wii!»

¹⁴ †Kehe icehi ana e pii wo Pétéru pie: «Úhu! Te muhi tong, go Padaame, be time é mu uce wii ni naado na iitihi ne he ni patén.»

¹⁵ ††Ke e téne mwo ali pwocihe, he e pii ten pie: «Go nemwo pii me ta, nina e pii wo Padué pie te wâé.»

¹⁶ Ke ocié ko tuie ni naado naa, ke e caa te taamwo he miiden ali cehitaap.

¹⁷ Ke é ha a benaamwon naa, ke wo lépwoli apulie li e nelé bé wo Korneï, ke lé pitahimwohi he celi e lang ace pomwa te Simon. Ke lé piân, ke lé tuie nge ha ali pomwa, ha a benaamwon na wo Pétéru he e mwo ko pihane ace bwopiine ali e ko habwii ten wo Padué.

¹⁸ Ke lé to, ke lé tahimwohi pie: «Be he te éni kuti, he celi e pimu lang wo Simon, na pii kon pie Pétéru?»

Lé tooeng wo lépwo apulie te Korneï

¹⁹ E mwo tee ko pitautinaado wo Pétéru ne ko ali e alihi, ke e pii ten na a *Jenen Iitihi pie: «Élé éni wo lépwo apulie na cié jélé na lé haneko. ²⁰ Go cuwoda me go ole, ke go nemwo uce pwo me piwâ go me go âcéilé, be woéo na é nelé bé.»

²¹ Ke e ole wo Pétéru, ke e pii te lépwo apulie naa pie: «Woéo-ni pali apulie li geé ko haneéo. Ade ace watihen me geé âbé?»

† 10.14 Lévitique 11.1–47; Ézékiel 4.14 †† 10.15 Maréko 7.15, 19

²² Ke lé hegi ne ten pie: «E pahedekeme wo Korneï, pa caa te coda, pa apulie na mwomwon nang, ke e céihi ne ko a pwoiitihi te lépwo Juif. Ke ati lépwo Juif, ke lé pipii me wâé nang. E pihabwiieng den wo pa âcélo te Padué, ke e pii ten pie me e pwo me go âbé ne ha a pomwa te Korneï, beme e téne celi go pii ten.»

²³ Ke e tanyuulé wo Pétéru me lé mwo pule.

E âcéilé ne pele Korneï wo Pétéru

É ha acaama hen, ke e caa te âcéi lépwo apulie na cié jélé naa wo Pétéru. Ke lé âcéilé mwo wo lépwo béé acéihi na lé mu Jopé. ²⁴ É ha a tan alecehen, ke lé tuie nge Césaré. Ke e teko ucéilé lang wo Korneï me lépwo apulie ha a pwomwoiu ten, me lépwo ju béén na e te todelé bé. ²⁵ Me e taa wo Pétéru, ke e â benieng wo Korneï, ke e tidihii jilin, ke e miibule ne ko ni a Pétéru.

²⁶ †Kehe icehi ana e pwiieng da wo Pétéru, ke e pii ten pie: «Go cuwoda, be woéo, ke te pa apulie pwohewiiko!»

²⁷ E tee ko cihe ko taa huâ wo Pétéru. Ke e too ni apulie na hiwon jélé, na lé caa teko mu lang. ²⁸ Ke e pii telé pie: «Geé caa te tai temehi pie wo pa Juif, ke iitihi me pibéélu me pa coho. Ke e paciitihi kon mwo me e taa pelen. Kehe icehi ana wo Padué, ke e habwii tong pie, me é nemwo niimihi pie me ta pa apulie, ke me é nemwo pwo me muhi tong kon. ²⁹ Ke me geé todeéo bé, ke te tice aceli me mwo pitoole jo kon. Ke é tahimwokewé pie: De ace watihen me geé pwo me é âbé?»

³⁰ Ke e pii ten wo Korneï pie: «Caa cié ni tan jena, na é pwoiitihi ne éni, ke é ko cié inetéale ko alecehe a goahen. Ke e te piâbeetiéo kuti wo pa apulie na pwomelaa a epwénen †. ³¹ Ke e pii tong pie: “Korneï, e caa hegi a pwopwoiitihi tem wo Padué. Ke e caa alihi ati ni âpipati tem ne pele nina pwoééhelé, ke time e uce pineuko. ³² Wâé heme go ne nge Jopé ce apulie, beme lé â todebé Simon, pana te pii kon mwo pie Pétéru. E pimu pele Simon, pa apenem ko iiwota, na e mu pejié.” ³³ Ke anaa, na é pawie epin lé ni apulie, beme lé todeko, ke te junihe wâé kuti na go âbé. Be é jena, ke caa tai wogeme éni ati he pwahamii Padué, beme geme téne ati ce naado celi e caa ne tem wo Padaame beme go pii teme.»

E pacihe ni béén na time uce ni Juif

³⁴ ††E pii beetihi telé wo Pétéru pie: «É bwo teko temehi kuti pie, mepwo wo Padué, ke time e uce pipwoinen ne ko ni apulie. ³⁵ Be é ati he ni amu, ke wo pa apulie na e paciiti Padué, me e pwo nina wâé, me pipati, ke e piwâéeng wo Padué. ³⁶ E caa pawie a pwooti, me de a bele *Isaraéla: a Pwooti Wâé ko a péém, na e

‡ 10.26 Apostolo 14.13–15; Pii Beetihi 19.10 †† Pa apulie na pwomelaa a epwénen—A bwopiinen pie, pa céiu âcélo. Omehi Apostolo 1.10. †† 10.34 Deutéronome 10.17; Roma 2.11

pwaadeniin bé wo Iésu Kériso, Padaame he ati ni apulie.

³⁷ †«Geé caa te temehi ana e tuie ânebun ne Galilé, ke é mulang, die ati he ni piduaan ko a *Judé, ne alecehe a bwo patemehi na a pipuu apulip te Ioane.

³⁸ ††Geé caa temehi pie wo Padué, ke e neole a junuu † a Jenen Iitihine ko Iésu, pa apulie mu Nazaret. E engen ati he ni piduaan me e pwo nina wâé. Ke e pwo me wâé [nina cunu jélé me] ati ni béén na e kolé a junuu *Caatana, be e pelen wo Padué.

³⁹ «Wogeme kuti lépwo *apajuujuhi na ati nina e pwo, ne *Iérusaléma, die ha ati a amu te lépwo Juif. Lé cemeiteeng ne ko a *kuricé, ke e mele.

⁴⁰ «Kehe icehi ana wo Padué, ke e pwo me e mulie mwo, ha a béciéhe ni tan. Ke e pwo me e piâbeetikeme. ⁴¹ ††Wogeme ni béén na e caa pipégalikeme ânebun, beme geme bo lépwo apé na a juuju te Iésu. Wogeme ni béén na geme tai piwiinaado me ûdu me weeng, alecehe a bwo mulie cemwo ten koja ni amele. Time e uce pwo me e pihabwiieng de ati a bele. ⁴² ††Ke e caa pahedekeme, beme geme â patemehi te a bele a Pwooti Wâé, me pii beetihie pie caa te weeng kuti, pana e caa neeng wo Padué me pa atauti nina lé mulie, me nina lé mele.

⁴³ †††«Ke, ati ni péroféta, ke lé caa mi pii pie, paceli e céihi ne kon, ke o pineuhi ni ta pwo ten ne he niin.»

E ole huîlé a Jenen Iitihine

⁴⁴ †††É he e mwo ko cihe wo Pétéru, ke e ole a Jenen Iitihine ne huî ati nina lé tabemi a pwooti te Padué.

⁴⁵ Wo lépwo Juif na lé céihi, li lé âbé céi Pétéru [§], ke lé téele, he e homwo mwo a Jenen Iitihine ne huî ni béén na time uce ni Juif. ⁴⁶ ††Be lé ténéle he lé ko cihe he ni pwooti na te pi-ité, me pipaunu Padué. Ke e pii wo Pétéru pie: ⁴⁷ «Woté, o te jan me time nye uce puu lépwona lé caa hegi a Jenen Iitihine, pwohewiikenye?»

⁴⁸ †††Ke e ne a mwomwon wo Pétéru, beme puulé ne he nii Padaame Iésu.

Ke lé ileeng pie me e mwo pwo mwo lupwoce tan pelelé.

E uti te ni apostolo wo Pétéru

11 Lépwo *apostolo me lépwo acéihi na lé mu *Judé, ke lé téne pie lépwo béén na time uce lépwo *Juif, ke lé caa hegi a pwooti te Padué.

² Ke é he e taa *Iérusaléma wo Pétéru, ke wo lépwo acéihi juif ^{§†}, ke lé taapwii ten nina e pwo, ³ †††ke lé pii

† 10.37 Mataio 4.12–17 †† 10.38 Mataio 3.16; Luka 4.17–20
‡ Neole a junuu... Grek: Oint. Omehi note †† 10.41
Luka 24.42–43; Apostolo 1.8 †† 10.42 Apostolo 17.31; 1 Pétéru 4.5
††† 10.43 Ésaie 53.5–6; Jérémie 31.34 ††† 10.44 Apostolo 11.15,
15.8 § Wo lépwo...li lé âbé céi Pétéru—Omehi a niide a tii 23.
§† 10.46 Apostolo 2.4, 19.6 §†† 10.48 Apostolo 2.38 §† Lépwo
acéihi juif—Grek: Lépwona tegoop jélé. (Les croyants d'origine juive.)
§†† 11.3 Apostolo 10.28; Galat 2.12

ten pie: «É ko ade na go â taa pele lépwona mwo time uce *tegoop jélé, me geé piwiinaado ibu?»

E paciheéo wo Padué

⁴ Ke wo Pétéru ke e piuti telé ehi ni naado na e tuie ne kon, ha atabuihi ko a jepule naa. Ke e pii telé pie:

⁵ ††«É mu ha a pwomwo ubwo Jopé, ke é ha a benaamwon na é ko pwoitihine hen, ke é alihi a céiu naado na pwohewii a cehitaap na nihe ubwo na cie ni uhin na paa, he e ko opé mu he miiden die pelong. ⁶ Ke me é omehi a cehitaap naa, ke é alihi ne hen ni wota na pipaa ni alé, me ni wota apiaba, ke ni paile me ni âmutaa me ni bwien, me ni meni mwo. ⁷ Ke é téne a pwocihe na e pii tong pie: “Go cuwoda go Pétéru, ke go taunuhi, ke go wii.”

⁸ «Kehe é pii pie: “Ûhu, go Padaame, be time é mu uce wii ni naado na iitihine he ni patén.”

⁹ «Ke é téne mwo ali pwocihe mu he miiden, na e pii pie: “Go nemwo pii me ta nina e pii wo Padué pie te wâé.” ¹⁰ Ke ocié ko tuie ni naado naa, ke é alecehen, ke tai céilé daamwo he miiden.»

É âcélilé ne Césaré

¹¹ «Ke lé te pwome tehenebé wo lépwo apulie na cié jélé, na nelé bé céiiéo mu Césaré. Ke lé âbé cuwo he pomwa ko a mwa na é mu hen. ¹² Ke e pii tong a *Jenen Iitihine pie, me é nemwo pwo me piwâ jo me é âcélilé. Ke lé âbé céing lépwo acéihi na 6 jélé na élé éni ^{§†}, ke geme taa ha a mwa te Kornei.

¹³ «Ke e piuti teme wo Kornei a bwo alihi nen den ne ha a mwa ten, pa *âcélo na e âbeetieng, ke e pii pie: “Ne ngen lépwoce ne Jopé, beme lé pwo me e âbé wo Simon, pana lé pii mwo kon pie Pétéru. ¹⁴ †††Pana e bo pii tem ni pwooti te Padué, na e bo celuimiko, wogo, ke tai ati a pwomwoiu tem.”»

E ole kolé a Jenen Iitihine

¹⁵ †††«Ke me é tabuihi cihe te Kornei me lépwo béén, ke e ole kolé a Jenen Iitihine, pwohewii ne konye ha atabuihi kon. ¹⁶ †††Ke é niimihi ali pwooti te Padaame: “E *puu apulie ko a tabe wo Ioane, kehe bo puukewé ko a Jenen Iitihine.”

¹⁷ «Wo Padué, ke e ne telé a âpipati na pwohewii ana ne tenye, wogenye na nye caa céihi ne ko Padaame Iésu Kériso. Woéo ke he woo, me é cubwoni Padué?»

¹⁸ †††Alecehe a bwo téne na anaa, ke caa nebwen na lé okéé. Ke lé pipwoun de Padué, ke lé pii pie: «Wo Padué, ke e caa ne mwo a pininim ne pele lépwona time uce lépwo Juif, beme lé mulie.»

§† 11.5 Apostolo 10.9–48 §† Lépwo acéihi na 6 jélé na élé éni—Nina lé âbé céi Pétéru mu Jopé. Omehi Apostolo 10.23,45.
§†† 11.14 Apostolo 16.31 §†† 11.15 Apostolo 2.4 §†† 11.16 Apostolo 1.5 18 11.18 Apostolo 13.48, 14.27

Lépwo acéihi mu Antioche ne Siri

¹⁹ †Alecehe a bwo mele te Étienne, ke lé tabuhi pwo me lé mu he ni picani wo lépwo acéihi, ke lé pipiiden nge he ni amu, é Fénisi, ke é Antioche, ke é pwo a één Chipre. Ke lé te â cihe te lépwo Juif cehi, ko a Pwooti Wâé. ²⁰ Kehe icehi ana wo lépwo béén mu pelelé, lépwo apulie mu Chipre, ke é Cirène, ke lé âbé ne Antioche, ke lé cihe ko a Pwooti Wâé te Padaame Iésu te lépwona time uce lépwo Juif. ²¹ Ke e mu huílél a junuu Padué, ke hiwon mwo ni apulie na lé bitelé ne ko Padaame, ke lé céihi.

²² ††Ke lé téne anaa wo lépwo acéihi ne Iérusaléma. Ke lé ne Barnabas nge Antioche. ²³ Ke me e tehene ngen, ke e alihi a *adéihi te Padué ne huî a bele, ke e te junihe pipwodéén. Ke e pamwoiulé ati, beme lé cumang ati he ni pwonimelé, ne ko Padaame.

²⁴ Be wo Barnabas, ke pa apulie na te nihe wâé nang, ke tilieng na a Jenen Iitihhi, ke te nihe ubwo a céihi ten. Ke a hiwon ko apulie, ke lé céihi ne ko Padaame.

²⁵ *Ke é mulang, ke e â Tarse wo Barnabas, beme e â hane Saulo. ²⁶ Ke me e tooeng, ke e pééeng bé ne Antioche [ne Siri]. É he na céiu jo, ke lu mu he ni pitihhi ko pwoiitihhi, ke lu pacémunihi a hiwon ko apulie. Ke é mu Antioche he na lé tabuhi pii ko lépwo acéihi pie, lépwo *chrétien* [a bwopiinen pie 'llepwo acéihi ne ko Kériso].

Lé picani te lépwo acéihi ne Judé

²⁷ É ha a benaamwon naa, ke lé opé mu Iérusaléma ne Antioche wo lépwo péroféta. ²⁸ ††Pa céiu béélél, ke a niin pie Agabus. Ke e mu kon a junuu a Jenen Iitihhi. Ke e cuwoda, ke e pii telé pie: «O bo pwo ace menele celi nihe ubwo ati ne pwo a bwohemwo.» Ke o cuwo a bwopiinen naa, ha a benaamwon de Klaude, pa daame ubwo te lépwo Roma.

²⁹ Ke é ne ko lépwo acéihi, ke lé piténelé beme lé ne ngen ce bépicanhi te lépwo acéihi na lé mu Judé. Ke lé te muko ne, na te jan me lé ne [âcehi nina lé pé mu ko ni penem delé]. ³⁰ ††Ke lu pé ngen ni âpipati naa wo Barnabas me Saulo, nge céii lépwo apihuô te ni acéihi.

Lé taunu Cang ke imwi Pétéru

12 É ha a benaamwon naa, ke e pwotahi ne ko ni béé acéihi wo pa daame *Érode Agripa Ier. ² Ke e ne a mwomwon beme lé taunu Cang, pa âjiéne Ioane, ko teua. ³ Ke me e alihi pie wâé te lépwo Juif, ke e ne me imwi mwo Pétéru, ha a céiu tan ubwo telé, a tan ko pieni pwoloa na tice nyaa ten. ⁴ Ke e pwo me tahieng da he karépu, ke e ne me lé wéieng nina paa ni bele na pipaa ni coda ne hen. Be nimen me e tauti Pétéru ne he pwahamii ni apulie ati, alecehe a tan ub-

wo ko *Pacika. ⁵ Ke lé wéi Pétéru ne he karépu. Ke mepwwo ni acéihi, ke lé te mwoiu ko pwoiitihhi me den.

E pawie Pétéru wo pa âcélo

⁶ É ha a bwén ânebuhe a bwo tautieng, ke wo Pétéru, ke e pule ha awieme lupwo alo coda. Ke cieeng ko ni itihhe toki ne ko lupwoli coda. Ke pwo mwo ni coda na lé cuwo he pomwa ko a karépu, beme lé wéieng.

⁷ Kehe icehi ana e te tuie kuti wo pa céiu *âcélo te Padaame, ke te ju pwéélang kuti ha ali karépu. Ke wo pali âcélo, ke e ti ko a céiu duaa Pétéru, ke e paûmiéng. Ke e pii ten pie: «Go cuwoda epin!» Ke e te tupwo kuti mu ko lupwo i Pétéru li itihhe toki.

⁸ Ke e pii ten wo pali âcélo pie: «Go cieko ko a taihenam, ke go cuwohe lupwo dihibwaam.» Ke e te piténeeng wo Pétéru.

Ke e pii ten mwo wo pali âcélo pie: «Go cuwohe a palito tem, ke go âbé céieng.»

⁹ Ke e âcéin mu he karépu wo Pétéru. Kehe icehi ana time e uce temehi pie, nina e pwo ten wo pali âcélo, ke te ni juuju. Be e niimihi pie a niûn. ¹⁰ †††Lu wédeni ni coda na lé wéa ânebun, ke lu wédeni mwo nina lé cuwo lang. Ke lu tehene nge ko a pomwa toki: a babé ko a pwomwo ubwo. Ke e te pitehi cehi ne ânebuhele, ke lu wie, ke lu â ha a céiu pwaaden. É mulang, ke te tie kuti pali âcélo.

¹¹ Ke e bwo mwojuia mwo a pwonime Pétéru, ke e pii pie: «Te a juuju kuti! É jena na ni, ke é bwobe temehi pie, e pawiebé pa âcélo ten wo Padaame, beme e celuimieo mu ha a pihuô te Érode! Ke e celuimieo koja ni ta na lé pwo me lé pwo tong na a bele te lépwo *Juif [na lé pipwobwonikeme].»

E â pele ni béé acéihi béén

¹² É alecehe anaa, ke e â ha a pomwa te Maria, nyaa te Ioane na pii kon mwo pie Maréko. Lé teko mu lang a céiu a hiwon ko ni acéihi, be lé teko pwoiitihhi. ¹³ Ke e cii a pomwa wo Pétéru, ke e âbé wo Roda me e tehi. Wo êje, ke ê eabwé ha a pwomwo naa. ¹⁴ Ke e téne temehi a pati Pétéru, ke te junihe piwâénimen. Ke e téte ngen, ke e pii pie: «Éé, wo Pétéru na e âoté pwomwo!» Ke e pineuhi me e tehi ali pomwa!

¹⁵ Ke lé pii ten pie: «Go piolo, go êje!» Ke e hegi ne telé pie: «Uhuu! É te juuju.» Ke lé pii ten mwo pie: «Ûhu! Wieli a jenen ††.»

¹⁶ É he lé mwo ko picihhe, ke e tee mwoiu ko cii ali pomwa wo Pétéru! Ke me lé tehi ali pomwa, ke lé te junihe tétieng kuti.

¹⁷ Ke e pwo inenaado telé ko a in, pie me lé nemwo cihe. Ke e piuti telé a bwo pawieeng mu he karépu. Ke e pii telé mwo pie: «Wâé heme géé bo pii te Cang ⁵, me

† 11.19 Apostolo 8.1–4 †† 11.22 Apostolo 4.36 † 11.25 Apostolo 9.30 †† 11.28 Apostolo 21.10 †† 11.30 Apostolo 12.25

††† 12.10 Apostolo 5.19 ††† Jenen—ai Pa âcélo ten. Lé céihi wo lépwo Juif pie, lé wéikenye ne ni âcélo.

ni béé acéihi béénye.» Ke e wie kojálé, ke e â ha a céiu duaan.

¹⁸ †Ke me pwang daabé, ke lé âdé ke âbé wo lópwo coda. Ke lé te junihe gia, be time lé uce temehi he celi e lang wo Pétéru, ke te junihe mwotilé. ¹⁹ Ke e pwo me lé haneeng wo Érode, kehe icehi ana time lé uce too-eng. Ke e pwo me tahimwo lópwo awéa, ke e ne a mwomwon beme taunulé.

É alecehen, ke e ole wo Érode mu *Judé ne Césaré, beme e pimu lang.

E mele wo Érode Agripa Ier

²⁰ E te nihe okéé wo pa daame naa, wo Érode, ne ko lópwo apulie Tir me lópwo apulie Sidon. Ke lé piténelé wo lópwonaa, ke lé âbé alieng beme lé ilehi kojaeng a péém. Be lupwo amu naa, ke lé mulie mu ko a amu te Érode. Ke lé ne me pa pwaadeniilé wo Blaste, pa apenem de pa daame, ke pa caa te penem he mwodaame.

²¹ Ke é ha a tan na e caa pipégali wo Érode, ke e cuwohe ni epwénen he daame, ke e taa tebwo pwo atebwo he daame, ke e cihe te ni apulie naa.

²² Ke lé te nihe picedieng, ke lé pii pie: «ÉÉ! Time uce wo pa apulie na e cihe, kehe caa te wo padué!»

²³ ††Ke é ha a benaamwon naa, ke e ahi Érode wo pa âcélo te Padaame, be time uce nime Érode me e pipwoun de Padaame, kehe te nimen me e te pipwoun den. Ke lé wiieng ne ni béle, ke e mele.

²⁴ †Ke a pwooti te Padué, ke caa nihe piân. ²⁵ ††Wo Barnabas me Saulo, ke lu caa panebwénihi ni penem delu ne ko lópwo acéihi ne *Iéruusaléma. Ke lu engemwo, woélé me Ioane na pii kon mwo pie Maréko.

a bécéiuhe bwo engen de paulo

(Pwahamii tii: 13.1—14.28)

Lé pipégali Barnabas me Saulo

13 É ne pele ni acéihi ne Antioche ha a province Siri, ke caa pwo ni péroféta me ni béén na lé pacémuni ni acéihi: wo Barnabas, Siméon, pana lé pii kon pie 'pa Apulie Bwiile'; Lucius mu Cirène; Manaën, pana lé picilelu ibu me gupéno *Érode Antipas; ke wo Saulo.

² ††Ke pwo a benaamwon na lé patupwo wiinaado me ûdu, beme lé pwoitihi te Padaame. Ke e pii telé na a *Jenen Iitihii pie: «Geé pineité Barnabas me Saulo ne ko a penem na é todelu ne kon.»

³ ††É alecehe a bwo time wiinaado telé me pwoitihi telé, ke lé ne ni ilé ne huîlu [beme adéilu] ke lé nelu me lu engen.

§ Cang—Pa ciéé Iésu. Omehi note † 12.18 Apostolo 5.22—24 †† 12.23 Daniel 5.20 ‡ 12.24 Ésaie 55.11

Lu â pwo a één Chipre

⁴ E pahede Barnabas me Saulo na a Jenen Iitihii. Ke lu ole Sélusi, ke é mulang, ke lu engen pwo ong, nge pwo a één Chipre. ⁵ †††Ke me lu tehene nge Salamine, ke lu patemehi a pwooti te Padué ne he ni *mwotapitihii te lópwo *Juif. Ke e âcéilu wo Ioane-Maréko, beme e picani telu.

E cubwonilu wo Élimas

⁶ Ke me lu caa â engen pitihii a één, die ha a pwomwo ubwo Pafos, ke lu too pa céiu Juif na pii kon pie Bar-Ié-su. Wo pa apulie naa, ke pa apwotuté, ke e pii pie weeng, ke pa péroféta te Padué. ⁷ Wo panaa, ke pa béé Sergius Paulus, pa gupéno pwo a één naa, pa apulie na e pitemang. Ke e tode Barnabas me Saulo wo pa gupéno, be te junihe nimen me e téne a pwooti te Padué. ⁸ Kehe icehi ana wo pali apwotuté, na pii kon mwo he pwo *grek pie Élimas, ke e hane beme e bitehi a bwo temehi nen de gupéno, beme e nemwo céihi ne ko a pwooti.

⁹ Ke wo Saulo, pana lé mu pii kon mwo pie Paulo §, ke caa ju tilieng na a Jenen Iitihii, ke e te ju ome Élimas, ke e pii ten pie: ¹⁰ «Pa naî *Caatana! Wogo ke pa apipwobwonihi ne nina mwomwon! Te junihe ubwo kuti a pipwohuô ne kom! Woté? Mwo te time go uce nebwén kuti a bwo bitehi ne ni pwaadeni Padaame na mwomwon? ¹¹ ††Go téne: É jenea [ke a okéé te Padaame, ke e kom] ke o bwi go, ke o pwo a benaamwon na time go uce alikenye.»

Ke e te âbé kuti huîin a bwén, ke e pingaulieng hane ce apulie me lé pipééeng.

¹² Ke wo gupéno, ke e téetihii ana e ko tuie, me [a junuu] a pwooti te Padué. Ke e te céihi kuti.

Antioche ne Pisidi

¹³ ††É alecehen, ke wo Paulo me lópwo béén, ke lé taa pwo ong mu Pafos nge Perge ha a province Pamfili. Ke e engen kojalu mulang wo Ioane-Maréko, ke e mwojuia ngemwo *Iéruusaléma. ¹⁴ Ke é mu Perge, ke lu engen, ke lu uti a pwaaden nge Antioche, ha a céiu duaa Pisidi.

Ke me lu tehene ngelang, ke lu taa ha a mwotapitihii ha a *tan iitihii, ke lu tebwo. ¹⁵ Ke mepwo ni apulie na lé ko pwoitihi lang, ke lé ko pine a tii ko *patén de Moosé, me ni tii te lópwo péroféta. Ke é alecehen, ke lé pii telu wo lópwo apihuô ne ha a mwotapitihii pie: «Lupwo âjiéneme, mepie pwo ce pwooti teu me bépamwoiu a bele, ke geu cihe.»

†† 12.25 Apostolo 11.29—30, 15.37 ††† 13.2 Apostolo 9.15 †††† 13.3 Apostolo 6.6 †††† 13.5 Apostolo 12.12, 15.39 § Saulo, Paulo—A niin he pwo ébéru pie Saulo; a niin he pwo grek pie Paulo. ††† 13.11 Apostolo 9.8 †††† 13.13 Apostolo 15.38

E pacihe lépwo âjiénen wo Paulo

¹⁶ Ke e cuwoda wo Paulo, ke e pwo inenaado beme lé nemwo cihe, ke e pii pie: «Geé téne, ati wogewé lépwo *Isaraéla, me wogewé mwo na geé ko pipwoiitihi ibu. ¹⁷ †E pipégali lépwo caa tenye wo Padué he a bele Isaraéla. Ke e pwo me piubwo da a bele, ha a benaamwon na lé mwo apulie coho ne *Aigupito. Ke e pwo me lé wie ko a niihen me junuun. ¹⁸ ††Ke e wéilé ‡, he na e mwonuhi na 40 ni jo ne ha a melé.

¹⁹ ††«Ke me e pwo me lé mele ne ni 7 mwametau mu ha amu *Kanana, ke e patupwo ne telé amu beme lépwo ju eapwihin. ²⁰ ††A benaamwon naa, ke é mwonu na 450 ni jo. Ke [é alecehe a bwo pipégali ten ne Aigupito, ke] e ne ni apihuô te ni watihenye, die ha a benaamwon de péroféta Samuel.

²¹ ††«Ke mepwo ni watihenye, ke lé ilehi koja Padué pace daame helé. Ke e ne telé Saül, pa naî Kis mu ha a pwomwoiu te *Benjamin. Ke e daame helé he na 40 ni jo.»

Wo Iésu pa aceluimikenye

²² ††«É alecehen, ke e pé kojaeng a pihuô wo Padué, ke e ne te *Davita beme pa daame he lépwo caa tenye. E pii ne kon wo Padué pie: *É caa too Davita, pa naî Jessé, pa apulie na te junihe eânimung den, na e bo pacuwohi ati nina nimung kon.*

1 Samuel 13.14

²³ †«Ke é ne he ni pihuô te Padué, ke e bo wie mu ha a pwomwoiu te Davita wo Iésu, beme pa apiceluimi *Isaraéla.

²⁴ ††«Ânebuhe a bwo tuie te Iésu, ke e âbé wo *Ioane pa apipuu apulie, ke e pipatemehi ati te a bele Isaraéla. Ke e pii telé pie: “Geé pininim, ke geé bitekewé, ke me puukewé!” ²⁵ ††Ke me e panebwénihini ni penem den, ke e pii telé wo Ioane pie: “Kona geé ko niimihi pie, woéo ke woo? Be time uce woéo pa *Mesia. Be e bo âbé alecehung wo pana o te junihe time uce jan ne kong me é tuwo ni tai ko ni dihibwaan.”»

Time lé uce temehi Iésu

²⁶ [Ke e pii mwo wo Paulo pie]: «Geé tabemiéo, wogewé lépwo âjiénung, lépwo piebehi *Abérama, me wogewé mwo na geé paciiti Padué. E caa patupwobé céiikenye ati a pwooti ce, beme celuimikenye. ²⁷ Kehe icehi ana ni apulie Iérusaléma, me ni daame helé, ke time lé uce temehi Iésu, pana e âbé beme e celuimikenye. Time lé uce temehi a pwooti na lé mu

† 13.17 Exode 1.7, 6.6, 12.51 †† 13.18 Nombres 14.34; Deutéronome 1.31 ‡ E wéilé—ai E pwo me lé wiinaado—ai E picani ne kolé. †† 13.19 Deutéronome 7.1; Josué 14.1 †† 13.20 Juges 2.16; 1 Samuel 3.20 ††† 13.21 1 Samuel 8.5, 19, 10.20—24 ††† 13.22 1 Samuel 13.14, 16.12; Psaume 89.21 † 13.23 2 Samuel 7.12—16 †† 13.24 Mataio 3.1—2 ††† 13.25 Ioane 1.20, 27

caa pii ânebun wo lépwo péroféta, na lé mu pine ati he ni tan iitihi. Kehe icehi ana lé pacuwohi a pwooti naa, be lé pwo beme e mele wo Iésu.

²⁸ ††«Be lé te temehi pie, te tice aceli e pwo wo Iésu celi jan me taunueng kon, kehe icehi ana lé te ilehi koja *Pilate pie, wâé heme e mele [ne ko a *kuricé].

²⁹ †††Be lé pacuwohi ati ni naado na pii ne kon ne ni tii iitihi. Ke é alecehen, ke lé neeng ole mu ko a kuricé, ke lé neeng he iitihi.»

E pamulipieng mwo wo Padué

³⁰ «Kehe icehi ana wo Padué, ke e te pamulipieng mwo, mu ha awieme ni amele. ³¹ ††Ke é he ni tan na junihe hiwon, ke e pihabwiieng wo Iésu te ni apulie na lé tai taa me weeng mu Galilé, me lé taa Iérusaléma. Ke é jena na ni, ke caa lépwo apajujueng ne ha awieme a bele Isaraéla.

³² «Ke wogeme, ke geme pipatemehi tewé a Pwooti Wâé naa. Be e caa mi pii ânebun wo Padué te ni watihenye. ³³ ††Ke, é jena na ni, ke e pwo me denye ni naîlé [me ni béén mwo]. Be e pwo me e mulie cemwo wo Iésu.

«Be nye pine ne ha a béalohe *psaume* te Davita pie: *É jena na, ke é pii beetihi: Wogo pa naîng, ke woéo pa caa tem.Psaume 2.7*

³⁴ †††«Éa, wo Padué ke e pamulipieng mwo, mu ha amele, beme time e uce mwojuia mwo ne he iitihi, beme time uce nyaale pule nang. E caa mi pii wo Padué pie: *É bo ne tewé a *adéihi na é caa mi pii te Davita.*

Ésaie 55.3

³⁵ †††«Ke a juuju, be nye pine ne mwo ha a céiu dua tii te *Psaumes pie: *Ke time go uce neeng me nyaale pule pa apipenem iitihi tem na go caa pipégalieng.Psaume 16.10*

³⁶ «Ke e pipenem de Padué wo Davita, die ha a mele ten, beme e pacuwohi nina nime Padué kon. Ke me e mele, ke neduwoeng pwohewii lépwo caa ten, ke nyaale pule nang, ne he iitihi. ³⁷ Kehe icehi ana wo pana e caa pamulipieng wo Padué, ke time uce nyaale pule nang.»

E pineuhi ni ta pwo tenye

³⁸⁻³⁹ ††††«Wâé heme geé temehi ehi ni, wogewé lépwo âjiénung, pie é ko a nii Iésu, na geme patemehi tewé jena na, a bwo pineuhi na a ta. Be time uce jan ni patén de Moosé me pineuhi ni ta. Kehe icehi ana wo pana e céihi ne ko Iésu, ke caa mwomwon nang, be caa pitice-

‡ 13.28 Mataio 27.22—23 ††† 13.29 Mataio 27.59—60 †† 13.31 Apostolo 1.3, 8 †† 13.33 Psaume 2.7 ††† 13.34 Ésaie 55.3 ††† 13.35 Psaume 16.10 †††† 13.39 Roma 10.4

naado ne ko ni ta na e pwo. ⁴⁰ Ke geé pipwocile, be koli e bo tuie ne kowé ana lé caa pii wo lépwo péroféta:

⁴¹ †*Geé pipwocilekewé,
wogewé lépwo apipaunukewé!
Wâé heme geé téétihi,
ke me geé pipiiden!
Be é o caa pwo ne pelewé
ce naado celi junihe ubwo.
Ke mepie lé piuti tewé,
ke o time geé uce céihi ne kon.» Habakuk 1.5*

⁴²⁻⁴³ Ke é alecehe a pitihhi, ke lu pwo me lu wie mu ha a mwotapitihhi wo Paulo me Barnabas. Ke lé ilehi kojalu ne ni apulie pie me lu mwo ne ce behi ni pwooti telu, ha a tan iitihhi alecehen. Ke hiwon ni apulie na lé âcéi Paulo me Barnabas: wo lépwo Juif, me ni béén na lé céihi ne ko a pwoiitihhi te lépwo Juif. Ke lé pipwojepule ibu, ke lu pamwoiulé, beme lé imwi mangihhi ni *pipwoééhe tice ja kon de Padué.

Lu â céii nina time uce ni Juif

⁴⁴ É ha a tan iitihhi alecehen, ke lé pipitilé a hiwon ko ni apulie Antioche ne Pisidi, beme lé téne a pwooti te Padaame. ⁴⁵ Ke lé teko ali ni apulie naa wo [lépwo apihuô te] lépwo Juif, ke lé pipwokon ne ko Paulo, ke lé pigetieng, ke lé pipiitaeng. ⁴⁶ ††Kehe icehi ana lu pii mwoiuhhi telé wo Paulo me Barnabas pie: «Gemu mi âbé céiikewé, be wogewé ninaa, na me geé mi téne a pwooti te Padué. Kehe geé téétihi, ke é mulang, na gemu bitekemu nge céii nina time uce ni Juif. Be wieli time uce a dewé a *mulie dieli mwo ne pele Padué!

⁴⁷ ‡Be weengi ana e caa pii teme wo Padaame:

*É neko bé,
me go pwéélang de ni béé bele,
beme go pii te a bwohemwo ati
pie, e caa âbé celuimikewé
wo Padué!» Ésaïe 49.6*

Hiwon nina lé céihi

⁴⁸ Ke me lé téne anaa wo lépwona time uce lépwo Juif, ke lé te junihe pipwodéén. Ke lé pii pie: «Te junihe wâé kuti a pwooti te Padaame!» Ke lé céihi ne nina e caa pipégaliilé wo Padué, beme e mu kolé a mulie na tice pwonehin.

⁴⁹ Ke e â pitihhi a amu a pwooti te Padaame.

⁵⁰ Pwo ni toomwo na piubwo jélé ne ha amu naa, na wâé telé a pwoiitihhi te lépwo Juif. Ke wo lépwo Juif, ke lé pine ânepuni ni toomwo naa, me ni apihuô ha amu, beme lé pwotahi ne ko Paulo me Barnabas. Ke lé pawielu mu ha amu telé. ⁵¹ ‡†Ke lu tagiliihhi ni muu pule ko

alu ‡ [beme lu habwii pie time uce wâé ni huô telé] ke lu engen kojalé, ke lu â Ikone.

⁵² Ke ni acéihi na lé mu Antioche, ke caa ju tililé na a Jenen Iitihhi, ke lé te junihe pipwodéén.

Paulo me Barnabas ne Ikone

14 Piwie nina tuie ne Ikone me Antioche. Be lu taa wo Paulo me Barnabas ha a *mwotapitihhi te lépwo *Juif, ke lu patemehi a pwooti te Padué; ke hiwon ni apulie na lé céihi: wo lépwo Juif, me lépwona time uce lépwo Juif. ² Kehe icehi ana wo lépwo béé Juif, ke te muhi telé me lé céihi ne ko a pwooti na lu pipatemehi. Ke lé pine da puni lépwona time uce lépwo Juif na lé mu lang, beme lé okéé ne ko Paulo me Barnabas.

³ ‡†Kehe icehi ana time lu uce engen, ke lu mwo te mu lang. Ke time uce piabwobwo julu me lu pii mwoiuhhi a pwooti te Padaame, be lupwona lu céihi ne kon. Ke e *pajuujuhi ni pwooti na lu pii wo Padué, ke e ne me lu pwo ni *pipwojunuun me ni inenaado na piwéden. ⁴ Ke lé pipiiden wo lépwo apulie ha amu naa. Be a céiu duaan, ke lé mu ko [lépwo apihuô te] lépwo Juif; ke a céiu duaan, ke lé âcéi lépwo *apostolo.

⁵ ‡†Ke lé piténelé wo lépwo Juif me lépwona time uce lépwo Juif, me lépwo apihuô telé, beme lé pwotahinaado ne ko Paulo me Barnabas, ke me lé taunulu ko péi. ⁶ Kehe icehi ana me lu temehi anaa, ke lu cela nge he ni pwomwo ubwo Listre me Derbe ne Likaoni, me ni béé duaan ko jijen. ⁷ Ke lu patemehi nelang a Pwooti Wâé.

Ne Listre me Derbe

⁸ É ha a benaamwon naa, ke e mu ha a pwomwo ubwo Listre wo pa apulie na tebwomwa nang he mwo wahin nang. Ke time uce jan me e cuwoda me engen. ⁹ Ke é ha a céiu tan, ke e tabemi Paulo he e ko cihe ko a Pwooti Wâé. Ke e te ju omeeng wo Paulo, be e alihi pie e céihi wo paje beme wâé nang.

¹⁰ Ke e te nihe cihe da ko miiden wo Paulo, ke e pii ten pie: «Go caama, me go cuwo!»

Ke e te cuwoda kuti, ke e engen.

¹¹ ‡Ke hiwon ni apulie mu ha amu Likaoni na lé alihi ana e pwo wo Paulo. Ke lé cihe da ko miiden he patilé pie: «Éé! Ni duéé henye, ke lé caa pé ni éé apulie, ke lé opé céiikenye!»

¹² Ke lé ne telu ni nii ni duéé helé; lé pii ko Barnabas pie Zeus [a nii pa daame he ni duéé helé]; ke wo Paulo pie Ermès ‡†, be te weeng, pa apébé na a pwooti.

¹³ Ke pwo a *mwaiitihhi te Zeus, na e mu ha ata ne ha a pwomwo ubwo. Ke wo pa apwoâpwailo te Zeus, ke e pébé ni caa te paaci na pwo itihhe muun kolé, ke lé ne

† 13.41 Habakuk 1.5 †† 13.46 Apostolo 3.26, 18.6 ‡ 13.47 Ésaïe 49.6 ‡† 13.51 Mataio 10.14; Apostolo 18.6

‡† Tagiliihhi ni muu pule ko alu—A bwopiinen pie, o time uce pine ne kolu celi e o toolé. ‡†† 14.3 Maréko 16.20; Ébéru 2.4 ‡††† 14.5 Apostolo 14.19 ‡ 14.11 Apostolo 28.6 ‡† Zeus, Ermès—Ânebn, ke lépwo Grek, ke te junihe hiwon ni duéé helé.

he ni pomwa. Be nimen me woélé ati me a pubu apulie, ke me lé *pwoâpwailo te lupwo apostolo.

Te céiu pa ju Dué

¹⁴ Kehe icehi ana me lu téne anaa, ke te junihe time uce wâé telu, ke lu tie ni epwénelu †. Ke lu téte nge ha awieme ni apulie, ke lu toii da pie: ¹⁵ ††«Ôhu! Léowo béému, é mu ko ade na geé pwo anaa? Wogemu, ke te lupwo apulie pwohewiikewé! Ke gemu âbé patemehi tewé a Pwooti Wâé! Wâé heme geé necu ni duéé hewé, na piticenaado ne kolé! Ke geé bitekewé ne ko Padué na e mulip. Be weeng na e pwo a miiden me a bwohemwo me a jîé, me ati ni naado na e hen.

¹⁶ ††«Ke é he ni benaamwon na e caa âdé, ke e mwo te ne ni puapulie me lé mwo te pwo nina te wâé telé.

¹⁷ ††Kehe icehi ana e mu te habwii tenye a pipwoééhe ten, ke e pwo ni naado na wâé, me denye. Be e ne tenye a ute, bé mu he miiden, me ni benaamwon ko a pitii âdaanu. Ke weeng na e ne tenye ni wiinaado na nihe hiwon, ke e ne mwo me nye nihe pipwodéén.»

¹⁸ Ke lu caa te patemehi telé ni pwooti naa wo Paulo me Barnabas, kehe icehi ana lu mwo te pwobwonilé beme time lé uce pwoâpwailo telu.

Lé ahi Paulo ko péi

¹⁹ ††É ha a benaamwon naa, ke lé âbé mu Antioche ne Pisidi, ke é mu Ikone, wo léowo béé Juif. Ke lé taa pine puni léowo béé apulie, beme lé taunu Paulo. Ke lé te junihe ahieng ko péi, ke lé céieng wie koja a pwomwo ubwo, be lé piniimihi pie e caa mele. ²⁰ Kehe icehi ana me lé mu aujenieng wo léowo acéihi, ke e cuwoda, ke e taa ha a pwomwo ubwo.

Ke é ha a tan alecehen, ke lu â Derbe wo Paulo me Barnabas.

Lu mwojuia mwo ne Antioche ne Siri

²¹ É mulang, ke lu pipatemehi a Pwooti Wâé ne Derbe wo Paulo me Barnabas. Ke hiwon ni apulie na lé céihi. Ke lu mwojuia mwobé ne Listre, ne Ikone me Antioche ne Pisidi. ²² ††Lu pamwoiu léowo acéihi beme lé cumang ne he ni céihi telé ne ko Padaame. Ke lé pii telé pie: «Nye mulie ne he ni picani, me genye â ha a pwaaden nge ha a *Mwametau te Padué.»

²³ Ke lu pipégali léowo béé apulie, beme léowo apihuô te ni béé acéihi ne he ni béé duaan. Ke pwo a céiu benaamwon na lu pipatupwo wiinaado me ûdu, ke lu pwoiithi, beme lu nelé te Padaame na lé céihi ne kon. ²⁴ Ke nebwén, [ke lu pinelé] ke lu pitahagéi ole Pisidi, ke lu tuie nge ha a province Pamfili. ²⁵ Ke é nelang, ke

† Lu tie ni epwénelu—Beme habwii pie te junihe piemegéi nalu, be lé pwo aceli ta ne ko Padué wo léowo Likaoni. †† 14.15 Psaume 146.6; Apostolo 10.26 † 14.16 Apostolo 17.30 †† 14.17 Jérémie 5.24 †† 14.19 Apostolo 17.13; 2 Korénit 11.25 ††† 14.22 Apostolo 15.32; 1 Tésalonik 3.3

lu pipatemehi a Pwooti Wâé ne Perge. Ke é mulang, ke lu ole ne Atali.

²⁶ †††Ke lu taa pwo ong me lu mwojuia ngemwo Antioche ha a province Siri. Be wo léowo acéihi ne ha a duaan naa, ke li lé caa nebwén ko nelu te Padué ha a pipwoééhe, ne ko a penem na lu ko pwo.

²⁷ †Ke me lu tuie ngemwo lang, ke lu neibu léowo acéihi. Ke lu uti telé ati ni jéhinaado na e ne telu me lu pwo wo Padué. Ke lu uti mwo a bwo tehi na a pomwa ko a céihi te lépwo na time uce léowo Juif, me lé céihi.

²⁸ Ke lu mwo mu me bwolihi pelelé.

A picihe ko ni patén

15 ††Pwo ni béé apulie, na lé âbé mu *Judé me lé â Antioche. Ke lé mwo pacémuni ni acéihi, ke lé pii telé pie: «Mepie time uce pipwotegoop tewé, pwohewii ana pii ne he ni *patén de Moosé, ke o time uce celuimikewé.»

² ††Kehe icehi ana wo Paulo me Barnabas, ke te junihe time lé uce piténelé me woélé, ke lé te nihe picihe ko a bwo niimihinaado naa. Ke lé pihuô ibu pie wâé hemepie lé taa *Iérusaléma, woilu me ni béén mu kolé, beme lé o picihe wo léowo *apostolo, me léowo apihuô te ni acéihi, ke ace bwopiine a pwooti naa.

³ Ke é mu ko anaa, na lé pawielé ngen wo léowo acéihi Antioche. Ke lé engen wo léowoje, ke lé tahagéi Fénisi me *Samari. Ke lé piuti a bwo pininim de lépwo na time uce léowo *Juif. Ke lé te junihe pipwodéén kon wo léowo acéihi na lé mu lang.

A pitihhi ne Iérusaléma

⁴ ††Ke me lé tuie nge Iérusaléma, ke lé hegilé ati ne ni acéihi, me ni apostolo, me ni apihuô telé. Ke lé piuti telé ati ni naado na lé pwo me Padué.

⁵ Kehe icehi ana pwo ni béé *Farasaio na lé caa céihi ne ko Iésu, ke lé cuwoda, ke lé pii telé pie: «Wâé heme lé *pwotegoop te ni acéihi na time uce ni Juif, ke wâé heme lé âcehin ehi ni patén de Moosé.»

⁶ Lé pipitilé wo léowo apostolo me léowo apihuô, beme lé picihe ko a pwooti naa.

E pacihelé wo Pétéru

⁷ ††Lé te junihe picihe kon, ke é ha a céiu benaamwon, ke e cuwoda wo Pétéru, ke e pii telé pie: «Léowo acéihi bééng, geé temehi pie caa bwolihi na e pipégalié wo Padué mu ha awiemewé, beme é patemehi a pwooti te nina time uce ni Juif. Be nimen me lé téne a pwooti ko a mulip, ke me lé céihi ne kon. ⁸ ††Wo Padué, ke e te temehi ni pwonime ni apulie. Ke e ne telé mwo a *Jenen Iitihhi, pwohewii ne konye. E tee ko habwii

††† 14.26 Apostolo 13.1–2 § 14.27 Apostolo 15.4, 12 §† 15.1 Galat 5.2 §†† 15.2 Galat 2.1 §† 15.4 Apostolo 14.27 §†† 15.7 Apostolo 10.1–43 §† 15.8 Apostolo 10.44, 11.15

tenye pie, e te hegilé mwo. ⁹Time e uce pipwoinen ne konye me woélé. E pwo me wâe ni pwonimelé, be lé céihi.

¹⁰ †«Ke é jena ni, ke é mu ko ade na geé mwo teko tacebwéni Padué? É ko ade na geé ne huí ni acéihi a âneule, na time uce jan me lé canihi wo lépwo wati-henye, ke wogenye mwo? ¹¹ ††Genye céihi pie caa celuimikenye, ko a *pipwoóéhe tice ja kon te Padaame Iésu. Tai wogenye me woélé.»

¹² Ke te ju tice pwocihe ha ali tapitihí, ke lé tabemi Barnabas me Paulo. Ke lu piuti telé ni *pipwojunuun me ni inenaado na e ne me lu pwo wo Padué, ne ha awieme nina time uce ni Juif.

Ni âniimihinaado te Cang

¹³ *Ke me lu caa cihe ati, ke e uce cihe wo Cang ††, ke e pii pie: «Lépwo acéihi bééng, geé tabemiéo. ¹⁴ E piuti wo Simon [Pétéru] a bwo tabuhi pipégali nen de Padué ace bele ten, mu hadenii ni béén na time uce ni Juif, beme a bele ten. ¹⁵ Be caa pwohewii a bwopiinen de ni péroféta, na nye pine ne he ni tii iitihí pie:

¹⁶ ††E pii wo Padaame pie:

“É alecehe anaa,

ke é bo âmwobé,

ke é bo bahi mwo

*a mwa te *Davita na e caa tupwo.*

É bo pwo me e cuwo mwo,

¹⁷ *beme lé o bo haneéo*

ati ne ni apulie pwo bwohemwo.

Éa, beme lé o bo haneéo

ati ne ni bele na é todelé

beme lé bele tong.

¹⁸ *Woéo Padaame,*

na é pii ni pwooti naa.

É caa te mi pii beetihí ânebun.”» Amos 9.11–12

¹⁹ E pii mwo wo Cang pie: «É niimihí pie, me time uce ne mwo ace céiu âneule huí nina time uce ni Juif, na lé caa céihi ne ko Padué. ²⁰ †††Wâé heme nye pwotii nge céiilé, me nye pii telé pie: “Geé nemwo wii ni mewota na *pwoâpwailo kon ne te ni *dème duée. Geé nemwo pibune, ke geé nemwo pipule hauli. Geé nemwo wii ni mewota na mwo cewéle, me ni wota na ebunuhi [be time e uce wie a cewéhelé].” ²¹ Be tabuhi bwolihi, ke pwo ni apulie na lé patemehi ni patén de Moosé ne he ni pwomwo ubwo. Ke lé pine ni patén ne he ni *mwotapitihí, ati he ni *tan iitihí.»

† 15.10 Mataio 11.30; Galat 3.10 †† 15.11 Galat 2.16; Éfésu 2.5–8 † 15.13 Galat 2.9 †† Cang—Pa ciéé Iésu. Omehi Maréko 6.3. Time uce pace céiu béé lépwo 12 apostolo, kehe icehi ana e bo te apostolo ke bo pa apulie na piubwo nang ne pele lépwo acéihi ne Iérsaléma. Omehi a Galat 1.19; 2.9. †† 15.16–18 Amos 9.11–12 ††† 15.20 Exode 34.15–17; Lévitique 17.10–16

A tii nge céii ni acéihi Antioche

²² Ke wo lépwo apostolo, me lépwo apihuô, me ati ni acéihi, ke lé piténelé beme lé tii a tii nge céii ni acéihi ne Antioche. Ke lé pipégali Silas me Jude, na pii kon mwo pie Barsabas, lupwo apulie na lé céihi ne kolu, beme lu âcéi Paulo me Barnabas [beme lé pé ngen ali tii]. ²³ Ke lé ne telé ali tii na pii ne hen pie:

Bwocu tewé, wogewé ni acéihi ne Antioche, ke Siri, ke Silisi! Wogeme lépwo apostolo, me lépwo apihuô, na geme tii a tii ce. Time geé uce Juif, kehe icehi ana geé céihi ne ko Kériso, ke é mu ko anaa, na wogewé, ke caa lépwo âjiéneme ne he niin.

²⁴ Geme téne pie, pwo ce béén celi lé engen mu peleme, ke lé âdé pahaulikewé ko ni pwooti telé, ke lé pwo me penem ni pwonimewé. Kehe icehi ana time uce wogeme celi geme ne a mwomwon delé. ²⁵ Ke é mu ko anaa, na geme pitapitikeme, ke me niimihí pie wâé hemepie geme pipégali lupwoce apulie mu peleme, me geme nelu lé céiikewé, beme lu âdé céi lupwo acéihi bééme, lupwona te junihe eânimeme telu: wo Paulo me Barnabas, ²⁶ lupwo apulie na time uce piwâ julu me lu patupwo ni mulihelu ne he nii Padaame Iésu Kériso. ²⁷ Geme ne lé Jude me Silas, beme lu mwo ju pii pwaatihí tewé, nina tii ne ha a tii ce. ²⁸ †††Be geme piténekeme, wogeme me a Jenen Iitihí, pie time uce wâé heme geme ne mwo huíiwé ace âneule. Kehe icehi ana weengi a junaado:

²⁹ Geé nemwo wii ni mewota na pwoâpwailo kon ne te ni déme duée;

Geé nemwo wii ni mewota na mwo cewéle, me ni wota na ebunuhi [be time e uce wie a cewéhelé];

Geé nemwo pibune, ke geé nemwo pipule hauli.

Wâé heme geé nebwén koja ni naado naa.

Adéikewé!

Nihe pamwoiu lépwo acéihi

³⁰ Ke lé patupwo ngen Paulo, Barnabas, Jude me Silas. Ke lé â Antioche ne Siri, ke lé tapiti ati ni acéihi, beme lé ne telé ali tii. ³¹ Ke me lé pine ali tii wo lépwo acéihi, ke te junihe piwâénimelé kuti.

³² Mepwo é ne ko Jude me Silas, lupwo péroféta, ke lu mwo te junihe pacihelé ke pamwoiulé.

³³ Lu mwo mu lang ha a céiu benaamwon, ke lé pinelu wo lépwo acéihi mu Antioche, me lu mwojuia ngemwo pele lépwo na lé nelu bé. { ³⁴ Kehe icehi ana e niimihí wo Silas pie wâé hemepie e mwo mu. }

³⁵ Ke wo Paulo me Barnabas, ke lu tee mu Antioche. Ke lu pacémunihí me pii beetihí a pwooti te Padaame, woilu me ni apulie na hiwon jélé.

††† 15.28 Mataio 23.4

a béalohe bwo engen de paulo

(Pwahamii tii: 15.36—18.22)

Lu pipiiden wo Paulo me Barnabas

³⁶ É alecehe a céiu benaamwon, ke e pii wo Paulo te Barnabas pie: «Genyu mwojuia ngemwo, he li pwomwo ubwo li genyu patemehi nge hen a pwooti te Padaame. Wâé heme genyu caniê ni acéihi na ko élé hen, beme genyu alihi pie he ko woté jélé.»

³⁷ †Ke nime Barnabas me e pé mwo Ioane, na pii kon mwo pie Maréko. ³⁸ ††Kehe icehi ana muhi te Paulo, be e te pipwoité engen kojalu wo panaa. Be tabuhi mu ha a province Pamfili, ke time e uce picani telu, die ha anebwén ko ni penem delu. ³⁹ Lu te junihe picuhe, ke lu te junihe piokéé, dieli lu â pipiiden. Ke e pé Ioane-Maréko wo Barnabas, ke lu engen pwo ong nge Chipre.

⁴⁰ Ke e pé Silas wo Paulo, ke lé nelu wo lépwo acéihi, ne ha a pipwoééhe te Padaame. Ke lu engen. ⁴¹ Ke lu tahagéi lupwo province Siri me Silisi, ke lu pamwoiu ngen ni acéihi.

Wo Timoté ke e âcéi Paulo

16 †E engen wo Paulo mulang nge he ni pwomwo ubwo Derbe me Listre. E pimu Listre wo pa acéihi na pii kon pie Timoté, pa naî ê toomwo *Juif, na e caa céihi ne ko Iésu. Ke hemepwo pa caa ten, ke time uce pa Juif. ² ††Ke lé pii wo lépwo acéihi mu Listre ke é mu Ikone pie, te junihe pa apulie wâé wo Timoté.

³ Nime Paulo me e pééeng. Ke e *pwotegoop ten, mu ko lépwo Juif na lé mu ha a duaan naa. Be lé te temehi ati pie, wo caa ten, ke time uce pa Juif ††.

⁴ ††É he ni pwomwo ubwo na lé â hen, ke lu pii te ni acéihi wo Paulo me Silas pie, me lé ténédehi ni pihuô te lépwo apostolo me lépwo apihuô te ni acéihi ne *Iérusaléma.

⁵ Ni acéihi, ke piubwo jélé da ne ha a céihi, ke e pitaamwo a jéhilé téteda he ni tan.

Tode Paulo ne Macédoine

⁶ ††Ke e pwobwoni Paulo me Silas a *Jenen Iitihi, beme lu nemwo patemehi a pwooti te Padué ne ha a province Asia. Ke lé pitahagéi a Frigi, me a province Galat [me lépwo béélu]. ⁷ Ke me lé tehene nge

† 15.37 Apostolo 12.12,25 †† 15.38 Apostolo 13.13; Kolosé 4.10 † 16.1 Apostolo 14.6; 2 Timoté 1.5 †† 16.2 Filipi 2.19—22 †† Nime Paulo me pé ngen a Pwooti Wâé ne pele lépwo Juif. Kehe icehi ana time lé uce hegieng ehi mu ko Timoté, be time uce téele pwotegoop ten. Be wo caa te Timoté, ke time uce pa Juif. ††† 16.4 Apostolo 15.23—29 ††† 16.6 Apostolo 18.23

mwonuhi a duaan Misi, ke lé pwo me lé taa ha a province Bitini, kehe icehi ana time e uce tehi ne telé na a Jene Iésu. ⁸ Ke é mulang, ke lé uce tahagéi Misi, ke lé tuie ole Troas ha atii ne ong.

⁹ Ke é he bwén, ke wo Paulo, ke e alihi ne he niûn pa apulie mu ha a province Macédoine, na e ko cuwo, ke e wâgo kon ke e pii ten pie: «Go âbé ne Macédoine, me go picani teme!»

¹⁰ É ne alecehe ana e habwii ten, ke game [§] hane me game piepin nge Macédoine, be game caa temehi pie, wo Padaame na e todekeme, me game patemehi a Pwooti Wâé nelang.

Ne Filipi

¹¹ Game taa pwo ong ne Troas, ke game caa te â ko a één Samotrace. Ke é ha acaama hen, ke game tuie ne Néapolis. ¹² Ke é mulang, ke game â Filipi, a pwomwo ubwo ne ha a céiu duaan ^{§†} ko a province Macédoine. Filipi, ke a colonie te lépwo Roma ^{§††}. Mwo te pwo ni tan deme nelang.

E céihi wo Lidi

¹³ É ha a *tan iitihi, ke game wie koja a pwomwo ubwo, ke game âmwonuhi a éémwa, be game niimihi pie e lang ace duaan celi lé mu pwoiitihi ne hen wo lépwo Juif. Game tebwo, ke game cihe ne ko ni toomwo na lé ko pitapitilé nelang. ¹⁴ Wo é céiu, ke a niin pie Lidi, é apulie mu Tiatire, é a-icuhi mwaanu megele, na te junihe ubwo a cuhin. Time uce é Juif, kehe icehi ana e céihi ne ko a pwoiitihi te lépwo Juif. Ke e te ju tabemi ehi ni pwooti te Paulo. Ke e tehi a pwonimen wo Padaame beme e hegi a pwooti. ¹⁵ Ke puueng me ni apulie na lé mu ha a pomwa ten.

Ke é alecehen, ke e pii teme pie: «Mepie geé *pipaju-juhi pie, é céihi me mang ne ko Padaame, ke geé âbé céing ne ha a pomwa tong!» Ke e cuwokome beme game âcén.

E pawiehi a duéé mu ko é toomwo

¹⁶ É ha a céiu tan, he game â ha a duaan na lé mu pwoiitihi ne hen, ke e âbé benikeme é toomwo na pwo duéé kon. A duéé naa, ke e patemehi ten me e pii te ni apulie nina e bo tuie. Ke te junihe hiwon ni mwani na lé hegi mu ko nina e pii, wo lépwona e penem delé.

¹⁷ ††Ke e âbé céime, wogeme me Paulo, ke e toii pie: «Wo lépwo apulie ce, ke lépwo eabwé te Padué na ni-

§ Game—Wo Luka, pana e tii a tii ce, ke e tabuhi âcéi Paulo mu éni. †† A céiu duaan—ai A bécéiue duaan. Ke pwo ni duaan na paa mu ko a Macédoine, ke a Filipi, ke e ha a bécéiue duaan. ††† Colonie... A pwomwo ubwo na lé bahi wo lépwo Roma. Pwo mwomwon den me e pihuô. Time lé uce pwocuhi puni apulie. Nina lé mulang, ke te céiu a mwomwon delé me lépwona lé mu Itali. ††† 16.17 Maréko 1.24

he e daaité, ke lé patemehi tewé a pwaaden nge ha a mulip.»

¹⁸ E te wonaa ati he ni tan, ke e caa â okéé wo Paulo. Ke e te biteeng kuti, ke e pii te ali duéé pie: «Go wie mu ko ê toomwo naa, ne he nii Iésu Kériso!»

Ke e te wie kuti mu kon.

Imwi Paulo me Silas

¹⁹ Ke me lé alihi wo lépwo apihuô ten pie, caa tieden ali apé mwani telé, ke lé te imwi kuti Paulo me Silas, ke lé teuulu nge ha apimu ibu te ni apulie ne he pwa-hamii ni apihuô ha amu. ²⁰ †Lé habwiilu te lépwo atautinaado te lépwo Roma, ke lé pii telé pie: «Wo lupwo apulie ce, ke lu pahauli a pwomwo ubwo. Be lupwo Juif, ²¹ ke lu ko patemehi ni huô na mwo coho, na tice mwomwon denye me nye hegi, ke me genye mulie hen, wogenye lépwo Roma.»

²² ††Ke lé te okéé kuti ne kolu ne ni apulie. Ke wo lépwo atautinaado, ke lé céi tie ni epwénelu, ke lé pwo me ahilu ko beba-acuwo. ²³ Ke lé nihe ahilu, ke lé tahilu da he karépu, ke lé pii te pa awéa kolu pie me e wéa ehi kolu. ²⁴ É mulang, ke e nelu ha a bénebwéne nemwa ne ha a karépu wo pa awéa kolu, ke e cie mwo ni alu ne ko ni ba-acuwo.

Penem bwohemwo

²⁵ É ha awieme bwén, ke lu teko pwoiitihi, me pwonyebi, me pipaunu Padué wo Paulo me Silas. Ke lé teko tabemilu wo lépwo béélu ko pwokarépu. ²⁶ Ke e te tuie kuti a penem bwohemwo, na te junihe ubwo. Ke e papenemihi ni goomwa ko a karépu. Ke te tai tehi kuti ati ni pomwa, ke tupwo mwo ni itihe toki, na lé cie lépwo a-mu he karépu kon.

²⁷ †Ke me e ûmiê wo pali awéa, ke [te junihe emegéi nan kuti. Be] e alihi ni pomwa ubwo ko ali karépu he tehi, ke e te céi kuti a teua ten, beme e piwolieng hen †, be e niimihi pie lé caa cela wo lépwo a-mu he karépu.

²⁸ Kehe icehi ana e henieng wo Paulo, ke e pii ten pie: «Go nemwo pipwotako, be te tai wogeme éni ati!»

²⁹ Ke e te ilehi kuti ace miû wo pali awéa, ke e taa epin ha ali karépu, ke e tidihii jilin ko ni a Paulo me Silas, ke éjén nang ko a bwo mwotieng.

E céihi pa awéa

³⁰ ††Ke e pawielu, ke e pii telu pie: «Lupwo daame, ade aceli me é pwo, beme o celuimiéo?»

† 16.20 Maréko 13.9 †† 16.22 2 Korénit 11.25; 1 Tésalonik 2.2
‡ 16.27 Apostolo 12.18–19 †† Beme e piwolieng hen—Wo lépwo Roma, ke lé taunu pa awéihi karépu, heme e cela wo pace céiu apwokarépu. †† 16.30 Apostolo 2.37

³¹ Ke lu hegi ne ten pie: «Go céihi ne ko Padaame Iésu, ke o celuimiko, wogo me ni apulie na lé mu ha a pomwa tem.»

³²⁻³⁴ Ke e pé Paulo me Silas nge ha a pomwa ten, he mwo bwén, ke e puu ni ahinaado kolu, ke e pwo me lu wiinaado. Ke lu patemehi te paje me ni apulie na lé mu ha a pomwa ten, a pwooti te Padaame. Ke lé céihi ne kon, ke puulé. Ke lé nihe pipwodéén.

Lé patupwo Paulo me Silas

³⁵ É he pwang, ke lé pahede lépwo apipépwooti wo lépwo atautinaado te lépwo Roma, beme lé pii te pa awéa ko a karépu pie me e patupwolu.

³⁶ Ke e pii te Paulo wo pa awéa pie: «Lé piibé céiiéo a pwooti wo lépwo atautinaado, pie me é patupwokeu. Geu wie, ke geu engen ha a péém.»

³⁷ Ke e pii wo Paulo te lépwo apipépwooti pie: «Lépwoje, wogemu ke lupwo Roma ††, kehe icehi ana lé pi-jeta komu, ke lé ahikemu ne he pwhamii ni apulie ati, ke lé tahikemu ne he karépu! Ke é jenea ni, ke lé pwo me lé pipwoneduwohi a bwo pawiekemu? Úhu! Time uce wonaa! Wâé heme lé te âbé woélé, me lé pawiekemu.»

³⁸ Ke lé engen wo lépwo apipépwooti, ke lé pémwojuiéhi nge céii lépwo atautinaado te lépwo Roma a bwopiinen de Paulo. Ke te junihe mwoti lépwo atautinaado he lé téne pie lupwo Roma. ³⁹ Ke lé âbé pimi-ibule ne telu. Ke lé pawielu, ke lé cuwokolu pie me lu engen mu ha a pwomwo ubwo.

⁴⁰ Ke lu engen wo Paulo me Silas, ke lu taa too Lidi. É alecehe a bwo ali ni acéihi, ke lu pamwoiulé, ke lu engen.

Paulo me Silas ne Tésalonik

17 Lu â Amfipolis me Apoloni wo Paulo me Silas, ke lu tehene nge Tésalonik, he na e mu lang a céiu *mwotapitihii te lépwo *Juif. ² Ke e taa ha a mwotapitihii wo Paulo, pwohewii ana e mu te pwo. Ke é he na cié ni *tan iitihii, ke e pwopune ko a pwooti mu he ni tii iitihii. ³ E pii pwaatihii ke habwii telé pie, wo pa *Mesia, ke e o bo mu he ni picani ke e bo mele. Kehe icehi ana e o bo mulie cemwo. Ke e pii telé mwo wo Paulo pie: «Wo pa Iésu na é patemehieng dewé, ke weeng kuti pa Mesia.»

⁴ Wo lépwo béén mu kolé, ke e ti kolé ni pwooti naa, ke lé âcéi Paulo me Silas. Ke hiwon ni béén mu ko lépwo *Grek na lé âcéilu: nina wâé telé a pwoiitihi te lépwo Juif, wonaa mwo mu pele ni toomwo na piubwo jélé.

††† Lupwo Roma—Lupwo Roma wo Paulo me Silas, be lu âbé mu he ni amu na lé pé wo lépwo Roma. É ne ha a patén de lépwo Roma, ke iitihii me lé tati pace apulie celi e mu ha a tii telé.

⁵ Kehe icehi ana lé te junihe pipwokon wo lépwo Juif, ke lé tode ni apulie na te tice aceli wâé ne kolé, ke lé pine ânepuni ni apulie ha a pwomwo ubwo, beme lé okéé. Ke lé â hanelu ha a pomwa te pa apulie na pii kon pie Jason, beme lé péélu ole pwo pwaaden, ne he pwahamii ati ni apulie [beme tautilu].

⁶⁻⁷ †Kehe icehi ana time lé toolu, ke lé uce teuu ngen Jason me lépwo béé acéihi pele lépwo apihuô ne ha a pwomwo ubwo, ke lé toii pie: «Wo paje, ke e hegi lupwo apulie ta, wo Paulo me Silas, lupwoli lu pahaulihi a bwohemwo ati, ke é jena na ni, ke lu tuie ne éni! Wo lépwoje me lépwo béélé, ke lé cubwonihni ni patén de César, pa daame ubwo te lépwo Roma. Be lé pii pie, te céiu pa daame ubwo, ke wo panaa, ke wo Iésu.»

⁸ Ke me lé téne anaa ne ni apulie me lépwo apihuô, ke te junihe pahaulilé kuti. ⁹ Ke lé bwo pawie Jason me lépwo béén, na lé pwocuhi ni kuhinaado telé ††.

Ne Béré

¹⁰ É he babwén, ke wo lépwo acéihi, ke lé te pwome pwo me lu engen kuti [mu Tésalonik] wo Paulo me Silas, me lu â ha a pwomwo ubwo Béré.

Ke me lu tehene ngen, ke lu taa ha a mwotapitihni te lépwo Juif. ¹¹ Wo lépwo Juif na lé mu Béré, ke te junihe wâé jélé koja lépwo Juif na lé mu Tésalonik: Be lé hegi a pwooti ha a pipwodéén. Ke ati he ni tan, ke lé te omehi ehi ni tii iitihni, beme lé alihi pie, teko ni juuju kuti ni pwooti na e ko pii telé wo Paulo. ¹² Hiwon nina lé céihi mu kolé, ke é mu pele lépwo Grek, ke hiwon mwo ni toomwo na piubwo jélé, ke pwo mwo ni aiu.

¹³ Kehe icehi ana lé téne wo lépwo Juif mu Tésalonik pie wo Paulo, ke e ko patemehi a pwooti te Padué ne Béré. Ke lé âbé pine ânepuni ni apulie lang, ke lé pwo me lé okéé ne kolu. ¹⁴ Ke lé te pwome téele kuti wo lépwo acéihi, ke lé pé Paulo, ke lé pééeng nge ha atii ne ong. Ke mepwo wo Silas me Timoté, ke lu mwo tee mu Béré.

¹⁵ Lé pé Paulo die Atène wo lépwo acéihi. Ke e pahedelé mwo pie me lé mwojuia ngemwo Béré, me lé â pii te Silas me Timoté pie me lu piepin ko âbé toeng.

Paulo ne Atène

¹⁶ Wo Paulo, ke e mwo te ju pwome piucéi Silas me Timoté ne Atène. Ke e alihi pie, te junihe hiwon ni *dème duéé na lé mwo te pipaunuhi ne ni apulie ha a pwomwo ubwo naa. Ke te junihe téé kuti a pwonimen. ¹⁷ *Ke é ne ha a mwotapitihni, ke e pacihe ni Juif, me ni béén na wâé telé a pwoiitihni te lépwo Juif. Ke ati he ni tan, ke e pacihe mwo ni béén na e toolé ne ha apwojenep.

† 17.7 Luka 23.2; Ioane 19.12 †† Pwocuhi ni kuhinaado telé—Mwani na lé ne te lépwo apihuô. Ke hemepie lé okelo ko pwo a ta naa, ke time lé uce hegi mwo ni mwani telé. Une caution. ‡ 17.17 Apostolo 18.19

¹⁸ Ke lé picihni me mwo me weeng ni béé caa te lépwo *épicurien* me lépwo *stoïcien*††. Wo lépwo béén, ke lé pii pie: «He ade ana e teko cihe ko pii tenye wo pane?»

Ke wo lépwo béén mwo, ke lé pii pie: «Pwohewiin heme e pipatemehi ce duéé celi te pi-ité ‡‡.» Be lé téne Paulo he e ko pipatemehi Iésu me a mulie cemwo.

¹⁹ Ke lé pééeng céilé, ke lé pééeng nge ha a mwohuô ha a pwomwo ubwo na a niin pie *Aréopage*, ke lé pii te Paulo pie: «Nimeme me geme temehi ehi ni naado naa, na mwo coho, na go ko pii teme. ²⁰ Be go pwo me geme téne ni naado na te ité, ke nimeme me geme temehi ce bwopiinen.» ²¹ Be ati ni apulie éni Atène, me ni béén na ni aâbé na lé mulie ne éni, ke lé te uti ke tabemi ni jepule na mwo coho.

²² Ke e cuwoda wo Paulo, ke e pii pie: «Lépwo Atène, é alihi pie geé te junihe pwoiitihni te ni duéé.²³ Be me é ko engen ha a pwomwo ubwo tewé, ke é alihi ni démenaado na geé bahi me geé pipaunuhi, me pwoiitihni ne kon. Ke é te tooli mwo a *apwoâpwailo na tii ne kon pie: *A de Padué na time nye uce temehieng*.

«Geé téne, wo Pana geé pipaunueng na time geé uce temehieng, ke weeng kuti na é âbé pipatemehieng dewé. ²⁴ †††Wo Padué na e pwo a bwohemwo, me ati ni naado na e pwon, ke weeng Padaame he a miiden me a bwohemwo. Ke time e uce mu he ni *mwaiitihni na lé bahi wo lépwo apulie. ²⁵ †††Ke time uce jan me nye picani ten me e mulie, be tai pwo ne ten ati. Be weeng Pana e ne tenye a mulie, me a nenehenye, me ati ni naado. ²⁶ Ke e pwo me ni apulie ati, ke me lé wie mu ko pa apulie na te céiu nang, beme lé mulie pitihni a bwohemwo. Ke e caa nebwén ko ne telé ni picé ko a amu telé, ke e caa nebwén ko ne telé ni benaamwon ne ha a jo.

²⁷ ††E wonaa a bwo ne nen den wo Padué beme lé o haneeng ne ni apulie. Be time uce e ité kojakenye. Piwien hemepie binyi me lé haneeng wo lépwo apulie, kehe lé o te toeng. ²⁸ Be caa nebwén ko pii pie: “Nye mulie mu kon, nye piâdé ke âbé, ke genye apulie mu kon.” Pwohewiin ana lé pii mwo wo lépwo béé apwotii tewé pie: “Wogenye mwo ni naîn ††.”

²⁹ †††«É mu ko anaa, ke wogenye ni naîn, ke genye nemwo niimihni pie wo Padué, ke e pwohewiin ni duéé na pwo ko péi, ai nina pwo ko mwani megele, me

†† Lépwo *épicurien* me lépwo *stoïcien*—Wo lépwo na lé âcéi *Épicure* ai Zénon, lupwo *philosophe* te lépwo Grek ânebn. E pii wo *Épicure* pie, a naado na piwéden ne te ni apulie, ke a ‘wâé na ubwo’. E pii wo Zénon (pa caa te lépwo *stoïcien*) pie, nye mulie ha a wâé na ubwo heme time nye uce temehi a cunu, me a pipwodéén, ke heme caa céikenye koja ni apulie. ‡‡ Ce duéé celi te pi-ité—Hiwon ni duéé he lépwo Atène. Ke lé niimihni pie wo Paulo, ke e cihe ko lupwoce duéé celi mwo lupwo coho. Wo pa céiu, ke pa duéé aiu na a niin pie Iésu; ke é céiu, ke é duéé toomwo na a niin pie Mulie Cemwo. ††† 17.24–25 1 Rois 8.27; Apostolo 7.48 ††† 17.25 Psaume 50.12 † 17.27 Psaume 145.18; Jérémie 23.23 †† Wogenye mwo ni naîn—Wo Paulo, ke e pii a pwooti na lu tii wo lupwo poète grek. ††† 17.29 Ésaie 40.18–20, 44.10–17; Apostolo 19.26

mwani pwojo! Time e uce pwohewii ni naado na lé pwo wo lépwo apulie, pwohewii ni bwo niimihinaado telé, be time lé uce temehieng!³⁰ Ke wo Padué, ke caa time e uce ne me pwnaado ne ko ni benaamwon na time lé uce temehieng.

«Kehe icehi ana é jena ni, ke e cuwoko ati ni apulie pwo bwohemwo beme lé pininim, beme o taatéhi ni mulihelé.³¹ †Be e caa nebwén ko ne a Tan na e bo tauti ati ni apulie pwo bwohemwo ha a juuju. E bo pip-waadeniin bé wo pa apulie, na e caa nebwén ko pipégalieng ne ko a Tan naa. Ke e pamulipieng mwo mu ha amele, beme e habwii tenye ati pie, weengaa kuti, pa aututinaado na caa pipégalieng.»

E pineitélé na a pwooti

³² Me lé téneeng wo lépwo Grek he e ko cihe ko a mulie cemwo mu ha amele, ke [lé pipilé. Ke] lé pihoonieng wo lépwo béén, kehe lé pii ne ni béén pie: «Geme bo tabemiko mwo ko anaa ha ace céiu tan.»

³³ Ke e engen kojale wo Paulo.

³⁴ Kehe icehi ana ni béén na lé âcéi Paulo, ke caa ni acéihi. Wona ne ko Denys, pa céiu âne a mwouhê te lépwo Atène, me ê céiu toomwo na pii kon pie Damaris, me ni béé apulie mwo.

Ne Korénit

18 E engen wo Paulo mu Atène, ke e â Korénit.
² ††Ke e too pa céiu *Juif nelang na pii kon pie Akilas, pa apulie mu ha a province Pont, he lu mwo ko tehenebé mu Itali me Priscile, ê mwoden. Be lé piténédehi a âpihuô te Klaude, pa daame ubwo te lépwo Roma, be e caa te pii ati te lépwo Juif pie me lé wie mu *Rome.

Ke e â caniêlu wo Paulo.³ †Ke e â pimu pelelu beme lé pipenem ibu. Be piwie ni penem delé, be ni apwo mwa mwaanu ††. ⁴ Ke é he ni *tan iitihii, ke e patemehi a pwooti ne te lépwo Juif me lépwo *Grek wo Paulo ne ha a *mwotapitihii. Ke e hane me lé céihi ne ko ni pwooti na e pii.

E â céii nina time uce ni Juif

⁵ ††Me lu tehenebé mu ha a province Macédoine wo Silas me Timoté, ke é ati he ni tan, ke e tee pipatemehi a pwooti wo Paulo. Ke e pii te lépwo Juif pie: «Wo Iésu, ke te weeng kuti pa *Mesia.»

⁶ †††Kehe icehi ana lé piâdeeng, ke lé pipiitaeng. Ke e tagiliihi taabwon ni muu pule ††† ko ni epwéne wo Paulo, ke e pii telé pie: «Hemepie tiekewé koja a mulihe Padué, ke bo te é mu kowé, kehe time uce woéo pa

† 17.31 Psaume 96.13 †† 18.2 Roma 16.3 † 18.3 Apostolo 20.34 †† Ni apwo mwa mwaanu—ai Lépwo apenem ko iiwota. †† 18.5 Apostolo 17.14—15 ††† 18.6 Apostolo 13.46,51; Apostolo 20.26 ††† Tagiliihi taabwon ni muu pule—A bwopiinen pie, o time uce pine ne kon celi e o toolé.

watihen. É jena ni, ke é o â céii ni béén na time uce ni Juif.»

⁷ Ke e engen kojale, ke e â pele pa céiu na pii kon pie Titius Justus, pa apulie na e céihi ne ko a pwoitihii te lépwo Juif. A pomwa ten, ke e te ju mu mwonuhi a mwotapitihii. ⁸ Ke wo Krispus, pa daame he a mwotapitihii, ke e céihi ne ko Padaame, tai woélé ati me a pomwa ten. Ke hiwon ni Korénit na lé téne Paulo, ke lé céihi, ke puulé.

⁹ É ha a céiu bwén, ke e pihabwiieng ha a jenen wo Padaame ne te Paulo, ke e pii ten pie: «Go nemwo pwo me mwotiko, kehe go patemehi a pwooti, ke go nemwo pwo me tice patim! ¹⁰ †Be é teko mu pelem, ke o te tice pace céiu apulie celi e o imwiko, me e pwo tem celi ta, be hiwon ni apulie tong ne ha a pwomwo ubwo naa.»

¹¹ Ke e mu lang wo Paulo he na céiu jo, ke 6 ni wole. Ke e pacémuni ni Korénit ko a pwooti te Padué.

Teueng nge ânebuhe pa gupéno roma

¹² É ha a benaamwon na e gupéno ne ha a province Akai[†] wo Galion, ke lé tai piâde Paulo wo lépwo Juif, ke lé imwieng, ke lé pééeng nge he mwotautinaado [ânebuhe pa gupéno]. ¹³ Ke lé pii pie: «Wo pa apulie ce, ke e te cuwoko ni apulie beme lé pipaunu Padué, ne he ni bwopwonen na te ité koja ni patén de a pwoitihii teme.»

¹⁴ Ke é he e mwo ko pwo me e cihe wo Paulo, ke e pii wo Galion te lépwo Juif pie: «Lépwoje, hemepie [e taunuhi apulie wo paje, ai hemepie] e pwo aceli te junihe ta, ke é o te tabemikewé. ¹⁵ Kehe icehi ana wogewé, ke geé picihe ko ni pwooti, me ni nii apulie me ni patén dewé. Ke anaa, ke te piwogewé. Time uce nimung me pa apitauti ne ni naado naa.»

¹⁶ Ke e pamwojuiéle mu he mwotautinaado. ¹⁷ Ke tai woélé ati, ke lé uce imwi Sostène^{††}, pa daame he a mwotapitihii, ke lé piahieng ne he pwahamii a mwopitautinaado. Kehe icehi ana te tice aceli e alihi ne kon wo Galion.

A bwo mwojuia mwo nge Antioche

¹⁸ ††Mwo te neme bwolihi a bwo mu te Paulo ne Korénit. Ke é mulang, ke e pine ni acéihi. Ke e engen kojale ne Cenkré na e mwonu. É he e mu lang, ke e tali me tice apunin, pwohewii a patén de lépwo Juif, beme e habwii pie e caa panebwénihii a *piapwo li e pwo.

Nebwén, ke lé taa pwo ong nge ha a province Siri, woélé me Priscile me Akilas.

§ 18.10 Josué 1.9; Ésaie 41.10 † Akai—A céiu duaan mu ko a Grèce jena. †† Lépwo Juif, ke lé taatéé Krispus ke wo Sostène, me e daame he a mwotapitihii telé, be e â céihi ne ko Iésu wo Krispus (omehi a niide a tii 8). Kehe é alecehen, ke lé okéé ne ko Sostène, be time e uce piwéden koja Paulo ne he mwotautinaado. †† 18.18 Nombres 6.18; Apostolo 21.24

¹⁹ Ke me lé tehene nge Éféso, ke e engen kojalu wo Paulo, ke e taa ha a mwotapitihhi, ke lé picihhe me lépwo Juif. ²⁰ Ke lé ileeng pie me e mwo neme mu pelelé.

²¹ Kehe icehi ana e pii telé pie: «Hemepie mwo te nime Padué, ke é o bo mwojuia mwobé céiikewé †.»

Ke e engen kojale pwo ong mu Éféso.

²² Ke me e tehene nge Césaré, ke e taa [*Iérusaléma] wo Paulo, ke e pwobwocu te ni acéihhi. Ke nebwnén, ke e ole Antioche ha a province Siri [he li e tabuhi a bwo engen den mulang].

a béciéhe bwo engen de paulo

(Pwahamii tii: 18.23—21.16)

²³ Mwo te pwome bwolihi a bwo mu ten Antioche. Ke é alecehen, ke e engemwo. Ke e â pitahagéi Galat me Frigi, ke e pamwoiu ni acéihhi.

A penem de Apolos ne Éféso

²⁴ É ha a benaamwon naa, ke e âbé ne Éféso wo pa céiu Juif na pii kon pie Apolos, pa apulie Alexandri. Wo panaa, ke pa apulie na e cihe ehi, ke e temehi ehi ni tii iitihhi. ²⁵ Ke caa pacémunieng ne ko *a bwo âcéi Padaame. Ke e patemehi a Pwooti Wâé te Kériso ha a ju pwonimen, kehe icehi ana e te ju temehi cehi a *pipuu apulie te Ioane.

²⁶ Ke e te cihe ne ha a mwotapitihhi, ke te tice aceli mwotieng kon. Ke me lu téneeng wo Priscile me Aki-las, ke lu pééng nge pelélu, ke lu pacémunieng ko a pwaadeni Padué.

²⁷ Ke nime Apolos me e â Akai, ke lé pamwoiueng wo lépwo acéihhi, ke lé pwotii nge céii ni acéihhi na élé lang, beme lé hegieng ehi.

Ke me e tehene ngen, ke e caa picani ko ni huô na ubwo, me de nina lé caa céihhi, mu ko a pipwoéhe te Padué. ²⁸ ††Ke lé picihhe me lépwo Juif ne he pwahamii ni apulie ati. Ke te tice aceli me lé pwo ten, be e *paju-ujuhi ne telé ko ni tii iitihhi pie wo Iésu, ke te weeng kuti pa Mesia.

Paulo ne Éféso

19 †É ha a benaamwon na e mwo teko mu Korénit wo Apolos, ke wo Paulo, ke e pitahagéi ni piduaan ne pwo juwolé ††, ke e â ole Éféso.

Ke e too ni béé acéihhi lang, ke e tahimwolé pie:

² ††«Kona é he li géé céihhi, ke e te opé kowé a *Jenen Iitihhi?» Ke lé hegi ne ten pie: «Time geme uce temehi pie pwo ace Jenen Iitihhi!»

† Ni béé tii iitihhi he pwo grek, ke e hen ni pwooti ce: Be nimung me é mu ko a tan ubwo ne Iérusaléma. †† 18.28 Apostolo 9.22 † 19.1 1 Korénit 3.6 †† Ni piduaan ne pwo juwolé—É ne Frigi, ke é ha a province Asia. †† 19.2 Apostolo 8.16

³ Ke e pii telé pie: «He ace de *pipuu apulie celi puukewé kon?» Ke lé hegi ne ten pie: «Ko a pipuu apulie te Ioane.»

⁴ ††Ke e pii telé wo Paulo pie: «Wo Ioane, ke e puu ni-na lé pininim, ke lé bitelé ne ko Padué. Ke e pii te lépwo *Juif pie me lé céihhi ne ko pa apulie na e bo âbé céin: wo Iésu.»

Lé hegi a Jenen Iitihhi

⁵ Ke me lé téne anaa ne ni acéihhi, ke lé pwo me puulé ne he nii Padaame Iésu. ⁶ ††Ke me e ne lupwo in huîlé wo Paulo, ke e ole kolé a Jenen Iitihhi, ke lé cihe he ni pwooti na te pétaa ko pi-ité, ke lé pii beetihhi ni pwooti na e ne telé wo Padué. ⁷ Piâmwonuhi a 12 a jéhi lépwo apulie naa.

E patemehi a pwooti nelang

⁸ Ke é mulang, ke e taa ha a *mwotapitihhi wo Paulo he ni wole na cié. Ke time uce piwâ nang me e pate-mehi a pwooti nelang. Ke e patemehi, te ni béén na lé ko tabemieng, a *Mwametau te Padué, ke e hane me lé céihhi ne ko nina e pii telé.

⁹ Kehe icehi ana hiwon ni béén na lé pwo me mwoiu ni punilé, ke muhi telé me lé céihhi. Ke lé pihoonieng ko *a bwo âcéi Padaame, ne he pwahamii ati ni apulie. Ke e engen kojale wo Paulo, ke e pé ni acéihhi, ke e pacémunilé ati he ni tan, ne ha a céiu mwotapitihhi te Tiranus §. ¹⁰ E wonaa a bwo penem den wo Paulo he na alo ni jo. Ke ati nina lé mu ha a province Asia, ni Juif me nina time uce ni Juif, ke lé téne a pwooti te Padaame.

Lépwo naî Séva

¹¹ ††Ke wo Padué, ke e pwo me e pipwaadeniin bé wo Paulo ni *pipwojunuun na te junihe ité kuti. ¹² †††Ke lé pé ni epwén me ni memwaanu na e ti kon wo Paulo, ke lé pé nge céii ni cunu, ke caa te wâé jélé kuti! Ke ni duéé na lé mu ko ni béén, ke lé wie, ke lé engen.

¹³ Ke te pwo mwo a céiu duaa juif na lé te piengen he ni amu. Ke lé pihane me lé pawiehi ni duéé mu ko ni apulie, ne he nii Padaame Iésu. Ke lé pii telé pie: «É ne he nii Padaame Iésu na e pipatemehieng wo Paulo, ke géé wie!»

¹⁴ Lépwonaa, ke lépwo 7 naî Séva, pana e te pineeng me pa céiu caa te lépwo *apwoâpwailo.

††† 19.4 Mataia 3.11 ††† 19.6 Apostolo 8.17; Apostolo 10.44,46 § Mwootapitihhi te Tiranus—Wiel e mu pacémuni ni apulie nelang wo pana a niin pie Tiranus. †† 19.11 Apostolo 14.3 ††† 19.12 Apostolo 5.15

É te temehi Iésu. Wogewé ke woo?

¹⁵ Kehe icehi ana e hegi ne telé ali duéé pie: «É te temehi Iésu, ke é te temehi mwo Paulo. Ke kona wogewé, ke woo?»

¹⁶ Ke wo pa apulie na e mu kon ali duéé, ke e téele gaale, ke e imwilé †, ke e te junihe ahilé kuti. Ke lé cela imi ni ahinaado kolé mu ha a pomwa ten, he caa tice naamuulé!

¹⁷ ††Ke lé téne a jepule naa wo lépwo Éféso: wo lépwo Juif, me ni béén na time uce ni Juif mwo. Ke te junihe abwobwo jélé, ke lé tai paciiti Padaame Iésu. Ke lé pii pie: «Nihe ubwo a nii Padaame Iésu!» ¹⁸ Ke hiwon mu ko ni béén na lé caa céihi, na lé âbé pii beetihi ne he pwahamii ati ni apulie ni naado na lé pwo. ¹⁹ Ke a hiwon ko ni apulie na lé mu pacihe ni duéé, ke lé pébé ni tii telé, ke lé cini ne he pwahamii ni apulie. Ke te junihe ubwo a cuhi ati ni tii naa: E taa pwo 50 million‡. ²⁰ Ke é mu ko a niihe Padaame, ke a pwooti ten, ke e piân, ke pipamwoiulé ngen.

Lé pwobwoni Paulo wo lépwo Éféso

²¹ ††Ke é alecehe ni naado naa, ke e niimihi wo Paulo pie me e pitahagéi ngen lupwo province Macédoine me Akai, beme e â *Iérusaléma. Ke e pii mwo pie: «Hemepie é tehene ngen, ke wâé mwo hemepie é â *Rome.»

²² Ke e ne nge Macédoine lupwo alo apulie mu ko lépwo apicani ten, wo Timoté me Éraste. Ke weeng, ke e mwo tee mu ha a province Asia.

E pigeti Paulo wo Démétrius

²³ ††É ha a benaamwon naa, ke e penem a amu ko a bwo âcéi Padaame [na e pacémunihi wo Paulo]. ²⁴ Be pwo pa céiu apulie na pii kon pie Démétrius, pa apenem ko ni mwani pwojo. Ke e pwo ko mwani pwojo ni cuwo nahi *mwaiitihhi te Artémis ††, ê céiu duéé. É mu ko a penem naa, ke te junihe ubwo a mwani na lé hegi me lépwo béén.

²⁵ Ke e taineibu ni apenem den me ni béé apulie na piwie ni penem delé, ke e pii telé pie: «Lépwoli wé, geé temehi pie, ni wâé tenye, ke e âbé mu ko a penem denye ce. ²⁶ Kehe e pii wo Paulo pie, ni duéé na lé pwo ne ni apulie, ke time uce ni duéé. Ke caa hiwon ni apulie na lé mwomwohi ana e pii, éni pelenye, ke é ati ha a province Asia. Geé caa teko téne he e ko pii, ke geé alihi ninaa. ²⁷ Be koli o pwotahi ni penem denye. Ke o tieden a bwo pipaunuhi na a mwaiitihhi te é duéé

† Imwilé—Ni béé tii iitihhi he pwo latin Imwi lupwoceli alo mu kolé. †† 19.17 Apostolo 5.11 ‡ 50 million—Grek: 50000 mwani pwojo—Te junihe ubwo a cuhin. A cuhi pa apulie na céiu nang ne ha a mulihen. †† 19.21 Apostolo 23.11; Roma 1.13 †† 19.23 2 Korénit 1.8 ††† Artémis—É duéé he lépwo Grek. A niin he pwo latin Diana.

henye, Artémis! Ke o caa time nye uce pii pie wo Artémis, ke é duéé henye ubwo! Kehe lé pipaunueng ati ni apulie ne éni Asia, ke é pwo a bwohemwo ati.»

E pahauli ni apulie

²⁸ Ke me lé téne ni pwooti naa, ke lé te junihe okéé kuti, ke lé toii da pie: «Junihe ubwo Artémis tenye ni Éféso!»

²⁹ †††Ke me e téne anaa na a pwomwo ubwo, ke hauli jélé. Tai ati ni apulie, ke lé piepin nge ha a mwotapitihhi. Ke lé pé Gaius me Aristarke, lupwo apulie ha a province Macédoine, lupwo béé Paulo ko pipatemehi a pwooti. ³⁰ Ke nime Paulo me e â beni ni apulie, beme lé picuhe, kehe icehi ana lé pacuwoeng wo lépwo acéihi. ³¹ Ke te pwo lépwo béé Paulo, lépwo apulie na piubwo jélé bé mu Asia. Ke lé pahede pa apulie me e â pii ten pie: «Go nemwo pihabwiiko te ni apulie ne ha a mwotapitihhi!»

³² É ne ko ni apulie Éféso, ke caa time lé uce piténelé. Be lé pii ne ni béén pie woni, ke lé pii ne ni béén pie wonaa. Ke mepwo a ubwo kolé, ke time lé uce temehi pie, é mu ko ade na lé ko pipitilé.

³³ Ke mepwo ni béé Juif, ke lé pé pa céiu apulie na pii kon pie Alexandre, ke lé piuti ten a watihe a pitapitihhi te ni apulie naa. Ke lé cineeng beme pa apicuhe telé ne he pwahamii a bele. Ke e eti da a in wo Alexandre, beme e ilehi koja ni apulie pie me e cihe.

³⁴ Kehe icehi ana me lé temehi pie pa Juif, ke lé toii da he na alo inetéale pie: «Junihe ubwo Artémis tenye ni Éféso!»

E pacuwolé wo pa céiu apihuô

³⁵ Ke e bwo pacuwolé wo pa apwotii te a mwohuô ha a pwomwo ubwo, ke e pii telé pie: «Lépwoli mu Éféso, nye tai temehi ati pie a pwomwo ubwo ce, ke pa apiwéihhi mwaiitihhi te Artémis, me a démen na iitihhi na pwo ko péi, na e tupwo opé mu he miiden! ³⁶ Te tice pace céiu celi me e piwotétaa ko anaa. Wâé heme bwala gewé, kehe geé nemwo wele hauli. ³⁷ Be geé pébé éni ni apulie ce. Kehe icehi ana te tice aceli lé pwotahi ne ko a mwaiitihhi, ke te tice aceli ta celi lé pii ne ko Artémis, é duéé toomwo tenye.

³⁸ «Wo Démétrius me ni apenem den, ke wieli nimelé me lé hane a ta ne ko pace céiu. Wâé, kehe icehi ana te pwo ni atautinaado, ke te pwo mwo ni tan ko pitautinaado. Geé â ânebuhe lépwo atautinaado! ³⁹ Ke me mwo te pwo ce naado celi nimewé me geé tahimwohi, ke genye bo picuhe ibu, ko ace bwopwonen celi wâé, ha ace tan ko mwohuô. ⁴⁰ Be ni apihuô te ni Roma, ke wieli lé o tahimwokenye pie: “É ko ade na geé pitapitikewé?” Ke o tice aceli genye hegi ne telé kon.»

††† 19.29 Apostolo 20.4, 27.2; Kolosé 4.10; Filémon 1.24

⁴¹ Ke é alecehe a bwo cihe ten, ke e pii telé pie me lé pipiiden.

Paulo ne Macédoine ke é ne Grèce

20 Me caa nebwén nina e he pipuwohelé, ke e tapi-ti ni acéihi wo Paulo, ke e pamwoiulé.

É alecehen, ke e pinelé, ke e â ha a province Macédoine. ² Ke e pitahagéi a Macédoine, ke e te junihe pamwoiu ni acéihi na lé mu lang, ko ni pwooti na hiwon. Ke é mulang, ke e â Grèce. ³ Ke e mwo mu lang he na cié wole. Ke é ha a benaamwon na me e taa pwo ong nge ha a province Siri, ke e téne pie lé pwo me lé pipwohuô ten wo lépwo *Juif. Ke e niimihi pie me e mwojuia ngemwo Macédoine.

⁴ Hiwon ni apulie na lé âcén: wo Sopater mu Béré, pa naî Pirus, ke wo Aristarke me Sekond mu Tésalonik, ke wo Gaïus mu Derbe. Ke pwo Timoté; ke wo Tichike, me Trofime, mu ha a province Asia. ⁵ Ke lé piânebuheme †, ke lé bwo ucéikeme ne Troas.

⁶ Ke mepwo é ne kome, ke geme taa pwo ong mu Filipi, alecehe a tan ubwo te ni Juif, a *Pacika. Ke é alecehe ni tan na nim, ke geme bwo toolé ne Troas. Ke geme mwo mu lang he na céiu naadenitan.

Paulo ne Troas

⁷ É he capéto ko a babwén ††, ke geme pimu ibu me geme pé wiinaado, ke geme ebii a pwoloa ‡. Ke e pacihe ni acéihi wo Paulo, die ko awieme bwén, be e o caa engen ko acaama. ⁸ Geme tai mu ha a nemwa ko miiden. Ke te junihe hiwon ni miû lang na pwéelang.

E pwo me e mulie wo Eutike

⁹ Pwo pa ewa aiu, na pii kon pie Eutike, na e tebwo ha a pomwa-he-puwo ††. Ke e te pwo jame cihe wo Paulo, ke e pawie pule wo paje, ke e tupwo mu ha a bécíéhe ni nemwa da ko miiden. Ke me lé pwieng, ke he e caa mele.

¹⁰ Ke e ole wo Paulo, ke e cieng, ke e haaieng, ke e pii pie: «Geé nemwo pwo me mwotikewé, be e mwo teko mulie!»

¹¹ Ke me e taamwo wo Paulo, ke e ebii a pwoloa, ke lé eni. Ke e mwo te cihe die pwopwometan. Ke é alecehen, ke e engen kojálé. ¹² Ke wo lépwo acéihi, ke lé pipé ngemwo pali ewa aiu [nge pelen]. Ke te junihe wâé ne kolé.

† Lé piânebuheme—Wo Luka, pana e tii a tii ce, ke e mwo te mu pele Paulo. †† É he capéto ko a babwén—ai É he pwoiitihi. ‡ Ebii a pwoloa—Sainte-Cène, Eucharistie. Omehi note

†† Tebwo ha a pomwa-he-puwo—Time uce iitihi ne ha a bwomu telé.

E tabuhi mwo a bwo mwojuia

¹³ Geme ânebuhe Paulo pwo ong, be weeng ke ni-men me e engen pwo amu die Assos, ke geme bo pééeng mulang. ¹⁴ Ke me e âbé tookeme, ke e taabé céikeme ne pwo ong, ke geme â Mitilène. ¹⁵ É mulang, ke geme caa engen pwo ong, ke geme tuie nge Kio, ha acaama. É ha a tan alecehen, ke geme tuie nge Samos, ke é ha a tan alecehen mwo, ke é Milet. ¹⁶ Be e caa te pihuôhi wo Paulo pie time e o uce cuwo Éféso, be time uce nimen me e patieden tan ne Asia. Be e piwele, beme e tehene nge *Iérusaléma, hemepie te jan, ha a tan ko Pentekote.

E pine lépwo acéihi ne Éféso

¹⁷ †† Ke me geme tehene nge Milet, ke e patupwo pwooti wo Paulo nge céii ni apihuô te lépwo acéihi ne Éféso, beme lé âbé beniieng ne Milet.

¹⁸ ††† Ke me lé pimu ibu, ke e pii telé pie: «Geé caa te alihi a mulie na é mu hen ne ha awiemewé, tabuhi ha a tan na é tuiebé pelewé ne ha a province Asia. ¹⁹ Ke é penem de Padué, ke time é uce pipii dong. Ke é he ni béé tan, ke é mu é, be é te junihe picani ko ni huô na ta na lé pwo tong wo lépwo Juif. ²⁰ Geé caa temehi, be é caa te pii tewé ati nina wâé me dewé, ke te tice aceli é neduwohi kowé. Be é patemehi me pacémunikewé, ne ânebuhe ati ni apulie, ke é ne mwo he ni pomwa tewé. ²¹ É pii mwoiuhi te ni Juif, me nina time uce ni Juif mwo, pie me lé pininim, me bitelé ne ko Padué, ke me lé céihi ne ko Padaame henye, Iésu Kériso.»

O time nye bo uce pialikenye mwo

²² «Ke é jena, ke é o mwo â Iérusaléma, be e teko cuwokong a *Jenen Iitihi, kehe time é uce temehi aceli e o tuie ne kong. ²³ ††† Kehe icehi ana e mu te paténeéo ne he ni amu, na a Jenen Iitihi pie, a karépu me a picani, ke lu teko ucéié. ²⁴ † Kehe icehi ana te piticenaado ne kon, heme é mele, ai heme é mulie. Be weengi ana te junihe pwonaado ne kon: Me é panebwénihi †† a penem na e ne tong wo Padaame Iésu, pie me é pipatemehi a Pwooti Wâé, ko a pipwoééhe te Padué.

²⁵ «É patemehi nge pelewé a *Mwametau te Padué. Ke é jena ni, ke é temehi pie, o caa time nye bo uce pialikenye mwo. ²⁶ É mu ko anaa, na é pii mwoiuhi tewé jena ni pie, mepie pwo pace céiu pibééwé celi o tieeng pele Padué, ke time uce woéo pa watihen. ²⁷ Be é caa patemehi tewé, ati nina nime Padué me e pwo. Ke te tice celi é neduwohi kowé.»

†† 20.17 Apostolo 18.21 ††† 20.18 Apostolo 19.10 ††† 20.23 Apostolo 9.16, 21.11 § 20.24 Apostolo 21.13; 2 Timoté 4.7

††† Panebwénihi—Ni béé tii iitihi he pwo grek, ke e hen ni pwooti ce: Ha a pipwodéén.

Pwoiipihi ehi ni acéihi

28 †«Geé pipwocilekewé, ke geé pwoiipihi ehi mwo ni naî Padué, na e caa nebwen ko nelé tewé na a Jenen Iitihî. Ke geé wéi ni acéihi, woélé na e caa pwocuhilé wo Padué, ko a bwo mele te pa Naîñ ††. 29 †Be é te temehi pie, é alecehe a bwo engen dong, ke lé o tu- iebé ni apulie na ni agele. Ke lé o pwohewii ni wota apiwii, ke lé o papiidenihî a pubuwé. 30 Ke te é mu hadeniwé mwo, na lé o cuwoda nina lé pacémunihi a gele, beme lé teuu ni acéihi céilé.»

Geé pipwohewiiéo

31 ††«Geé te ûmiê, ke geé te niimihi pie, caa cié ni jo na é mu pelewé: Ke pwo ni béé benaamwon, na é mu â é, heme é mu pamwouiukewé, heme bwén ke pwang. 32 Ke é jena ni, ke é nekewé te Padué, me a pwooti he a pipwoééhe ten. Be weeng na eten a junuun me e pamwouiukewé, me ne tewé ni pipwowâe na e caa nebwen ko pipwopweehi me de ni apulie ten.

33 ††«É he é mwo ko mu pelewé, ke time uce nimung ko ce mwani pwojo, me ce mwani megele, me ce epwéne ce béé apulie. 34 †††Be geé caa te temehi pie, te lupwo naating ce na é penem kon, be me deme, me ni bééng. 35 Ke é caa habwii tewé ati a bwo penem, me nye picani te nina cunu jélé me nina tice delé. Ke genye penem niimihi ni pwooti te Padaame Iésu na e pii pie: “Te junihe ubwo a pipwodéén de pana e ne, ko- ja pana e hegi.”»

36 Ke é alecehe a bwo cihe ten naa, ke e tidihî jilin wo Paulo, ke lé tai pwoiitihî ibu. 37 Ke lé mwomwaaueing beme lé pineeng, ke lé te ju tai é ati. 38 Be te junihe pi- wahin ni pwonimelé ko ana e pii telé pie, o caa time lé bo uce pialilé mwo. Ke é mulang, ke lé pipééng ole die pwo ong.

E â Iéusaléma wo Paulo

21 Geme pinekeme me ni apihuô te ni acéihi ne Éféso, ke geme taa pwo ong, ke geme téte mwomwon nge Kos†. Ke é ha acaama, ke geme â taa Rode ††, ke é mulang, ke geme â Patara. 2 É nelang, ke geme tooli a ong nge Fénisi, ke geme taa pwon, ke geme engen.

3 Ke geme alihi a één Chipre, ke geme neeng pwo eaamu. Ke geme â ha a province Siri, ke geme ti ha a céiu pwomwo ubwo nelang, na pii kon pie Tir, é lang he na me eaatihî nelang ni âicu.

† 20.28 1 Timoté 4.16; 1 Pétéru 5.2–4 †† Ko a bwo mele te pa Naîñ—Grek: Ko a bwo téé na a cewéhen. † 20.29 Mataio 7.15; Ioane 10.12 †† 20.31 1 Tésalonik 2.11 †† 20.33–34 1 Korénit 9.11–12 ††† 20.34 Apostolo 18.3; 1 Tésalonik 2.9 ††† Kos; Rode—Alo lupwo één ne ha a jîé Méditérané ne ha a céiu duaa a amu Turki. (É Turki, ke a province Asia ha a benaamwon de Paulo.)

4 †Ke me geme too ni acéihi lang, ke geme mu pelelé he na céiu naadenitan. Ke e cinelé na a *Jenen Iitihî, pie me lé pii te Paulo pie me e nemwo taa *Iéusaléma ††. 5 Kehe icehi ana é alecehe a naadenitan na céiu, ke geme cuwo ha a pwobenele ko a engen deme. Ke lé pipéékeme ne ni a-mu lang, woélé me ni mwodelé, me ni naîlé. Lé pipéékeme die ticepwon. Ke me geme tehene ole, ke geme tidihî jilime, ke geme pwoiitihî. 6 Nebwen, ke geme taa pwo ong, ke lé mwojuia ngemwo pelelé.

Paténe Paulo pie o imwieng

7 Ke geme engen mu Tir, ke geme â Tolémaïs, atii ne ong. É mulang, ke geme â pwobwocu te ni acéihi, ke geme mwo te ju ne me mu pelelé he na céiu tan.

8 †††Geme â Césaré ha acaama. Ke me geme tehene ngelang, ke geme pimu pele Filip, pa apipatemehi na a Pwooti Wâé, pa céiu béé ni 7 dikone li pipégallé ne Iéusaléma ††. 9 Wo panaa, ke paa ni naîñ toomwo na ni péroféta, na lé pébé a pwooti mu pele Padué. 10 †††Ke caa junihe hiwon ni tan deme ha a duaan naa.

Ke, é ha a benaamwon naa, ke e tuie opé mu *Judé wo pa céiu péroféta, na pii kon pie Agabus. 11 ††Ke me e tookeme, ke e pé a taihena Paulo, ke e cie lupwo an ke lupwo in kon, ke e pii pie: «Weengi ana e pii na a Jenen Iitihî: “Wo pa apulie na den a taihena ce, ke lé o woni ko ace bwo cieeng wo lépwo *Juif ne Iéusaléma. Ke lé o bo neeng de nina time uce ni Juif ††.”»

12 Me geme téne anaa, wogeme me ni a-mu lang, ke geme cuwoko Paulo pie me e nemwo taa Iéusaléma.

13 †††Kehe icehi ana e hegi ne teme pie: «É ko ade na geé é, me pwo me piwahin a pwonimung? Hemepie cieéo me taunuéo ne ko a nii Iésu ne Iéusaléma, ke é caa te pipwopweeéo.»

14 Ke he time uce jan me geme taatééhî a bwo niimi- hinaado ten, ke geme nebwen a bwo cuwokon, ke geme pii pie: «Wâé hemepie e cuwo ana nime Padaame kon.»

15 É alecehe ni tan naa, ke geme pipwopweekeme, ke geme taa Iéusaléma. 16 Ke lé âbé céime ne ni béé acéihi mu Césaré, ke lé péékeme nge céii pa apulie na pii kon pie Mnason, beme geme pimu pelen. Wo panaa, ke pa apulie pwo a één Chipre, pana caa bwolieng ha a céihi.

§ 21.4 Apostolo 20.23 †† E pii na a Jenen Iitihî pie, o pwotahi ne ko Paulo, hemepie e â Iéusaléma. Wieli woélé lépwo apulie na lé pébé a pwooti naa, ke me lé niimihi pie, a bwopiinen pie me e nemwo â lang. ††† 21.8 Apostolo 6.5, 8.40 †† Omehi Apostolo 6.1–6. ††† 21.10 Apostolo 11.28 †† 21.11 Apostolo 20.23, 21.33 †† Nina time uce ni Juif—Wo lépwo coda roma na lé cemeite Iésu ne ko a kuricé. ††† 21.13 Apostolo 20.24

Lé pitapitilé wo Paulo @ me ni apihuô ne Iérusaléma

¹⁷ Ke me geme tehene nge Iérusaléma, ke lé hegikeme ha a pipwodéén ne ni acéihi. ¹⁸ A tan alecehen, ke e ole pele Cang † wo Paulo, ke geme ole cén. Ke lé tai pitapitilé nelang wo lépwo apihuô te ni acéihi. ¹⁹ †† Ke me e pwobwocu telé ati wo Paulo, ke e piuti telé ati ni naado na e pwo wo Padué, ne ha awieme ni béén na time uce ni Juif, ha a benaamwon na e pipate-mehi telé a pwooti. ²⁰ † Ke me lé téne anaa, ke lé te junihe pipaunu Padué.

Lépwo Juif na lé céihi

Ke é alecehen, ke lé pii te Paulo pie: «Go téne, go pa acéihi bééme, caa te junihe hiwon ni Juif na lé caa céihi [ne ko Iésu] na lé mwo teko âcehi ni *patén de Moosé. ²¹ Ke lé téne pie wogo na go picaa te ni Juif pie, he lé pimulie ibu me ni béé apulie, ke me lé bitelé koja ni patén de Moosé. Ke lé téne mwo pie, go pii pie, me lé nemwo *pwotegoop te ni nailé, ke me lé nemwo âcehi a bwomu te ni Juif. ²² Nye o bo pwo de? Be {lé o pitaineibulú ne ni apulie be} lé o caa temehi pie wogo éni.

²³ †† «É mu ko anaa, ke wâé heme go pwo ana geme pii tem: Be élé éni hadeniime lépwo apulie na paa jélé na lé pwo ni *piapwo te Padué. ²⁴ Wâé heme go péélé céim, beme geé pwo a pwoiitihî tenye † na e pwo me wâé genye ne pele Padué. Ke go pwocuhi nina tice telé ko a penem naa, beme lé o pwo me tice iwo ni punilé †. Ke lé o temehi ne ni apulie pie ana lé téne ne kom, ke a gele. Ke o te wogo mwo, ke go o habwii pie, pana go te pipwoiipiko mwo, ne ko ni patén.»

A tii nge céii nina time uce ni Juif

²⁵ †† «Ke mepwo é ne ko nina time uce ni Juif na lé caa céihi, ke geme caa pwotii nge céiilé. Ke geme pii telé a huô teme: “Geé nemwo wii ni mewota na *pwoâpwailo kon ne te ni *dème duéé. Geé nemwo wii ni mewota na mwo cewéle, me ni wota na ebunuhi, [be time e uce wie a cewéhelé]. Ke geé nemwo pibune, ke geé nemwo pipule hauli.”»

²⁶ †† Ke [e ko a bwo niimihinaado telé, ke] é ha a tan alecehen, ke e pé ni apulie na paa wo Paulo. Ke lé tabuhi me weeng a *pwoiitihî ko a bwo wâé genye ne pele Padué, pwohewii a patén de ni Juif. Ke é alecehen, ke e taa *huâ iitihî wo Paulo, ke e pii beetihî a tan na lé

† Cang—Omehi note †† 21.19 Apostolo 15.12 † 21.20 Apostolo 15.1,5 †† 21.23–24 Nombres 6.1–20; Apostolo 18.18 †† A pwoiitihî tenye...; Pwo me tice iwo ni punilé—Omehi mwo a Âpwailo ne ha a Niinaado (Vocabulaire) ha anebwén ko a tii. Wieli wo lépwoceli lé pwo a piapwo naa, ke lé pitalupe, kehe wâé heme lé pwo a pwoiitihî naa, beme wâé jélé mwo ne he pwahamii Padué. ††† 21.25 Apostolo 15.29 ††† 21.26 1 Korénit 9.20

o bo muko pétaapwo pwoâpwailo hen, beme lé habwii pie lé caa panebwénihi a piapwo telé.

Imwi Paulo ne huâ iitihî

²⁷ Ke é ha a bé7 he ni tan naa, he lé o caa panebwénihi a piapwo telé, ke ni Juif mu ha a province Asia, ke me lé ali Paulo ne ha a *mwaiitihî, ke lé pine ânepuni ni apulie beme lé imwieng. ²⁸ Ke lé pii pie: «Lépwo *Is-araéla, geé âbé picani teme! Weengi pa apulie na e piuti pitihî ati pie me pihoonihî a bele tenye, me ni patén de Moosé me a mwaiitihî ce! Ke é jenea, ke e caa pwo me tice junuu mwo a duaan ce iitihî, be e caa ne da lang nina time uce ni Juif!» ²⁹ † Lé pii anaa be lé alilu neibu me Trofime, pa apulie mu Éfeso, ne Iérusaléma, ke lé niimihî pie, e pééeng da huâ iitihî wo Paulo.

³⁰ Ke ati a pwomwo ubwo naa, ke iluuhî, ke lé téelebé ati ne ni apulie, ke lé imwi Paulo. Ke lé teuueng wie mu huâ iitihî, ke lé te pwome capuhi kuti ni pomwa †. ³¹ Ke lé caa pihane beme lé taunueng.

Lé pacuwolé wo lépwo coda roma

Kehe icehi ana e téne wo pa apihuô te ni coda roma pie, lé ko iluulé ati wo lépwo Iérusaléma. ³² Ke e te pwome pé kuti ni coda, me ni caa telé, ke lé téte nge céiilé. Ke me lé alilé ne ni apulie, ke lé te nebwén kuti na lé ahi Paulo.

³³ E te ân kuti wo pali apihuô te ni coda, ke e te imwi kuti Paulo, ke e cieeng ko lupwo itihî toki. Ke e tahimwo ni apulie pie: «He woo paje? Ke ade aceli e pwo?»

³⁴ Ke lé pii ne ni béén pie woni, ke lé pii ne ni béén pie wonaa. Ke time e uce temehi wo pali pie woo celi e juuju, be lé te junihe iluulé, ke e pii pie me pé Paulo da ha a mwocoda. ³⁵ Ke me lé tuie nge ko a aca, ke lé caa te ju pitemeeng, be lé te junihe okéé ne ni apulie, ke nimelé me lé ahieng. ³⁶ †† Be lé tai âcén ati, ke lé toii pie: «Neeng, beme geme taunueng!»

E pacihe ni Juif wo Paulo

³⁷ Ke é ha a benaamwon na ko ne da Paulo he mwocoda, ke e pii te pa apihuô te ni coda [he pwo *grek] pie: «He o te jan me é pii tem a céiu naado?»

Ke e hegi ne ten pie: «Kona go te temehi pwo grek? ³⁸ †† Kona time uce wogo pa *Aigupito ††, pali e pwo me e penem a amu? Pana e pé nge jengedé ha a melé li 4000 pwéréca?»

³⁹ Ke e pii ten wo Paulo pie: «[Ûhu!] Woéo ke pa Juif, pana é tuie ne Tarse, a pwomwo ubwo ko a province Silisi, a pwomwo na te junihe ubwo. Ke é ilehi kojako pie, he time uce jan me é pacihe ni apulie ce?»

‡ 21.29 Apostolo 20.4 † Lé teuueng wie mu huâ iitihî... Lé pwo anaa, be iitihî me nye pwo ana ta ne hen, ke time uce nimelé me wo Paulo, ke me e cela da lang. †† 21.36 Luka 23.18 †† 21.38 Apostolo 5.36–37 †† Pa Aigupito na pa Juif, na nimen me lé cibéé lépwo Roma mu ha amu Judé. Omehi a note

⁴⁰ Ke e pii wo paje pie: «Îgo!»

Ke e cuwo pwo ali aca wo Paulo, ke e pwo inenaado te ni apulie ko a in. Ke me te ju tice pwocihe kuti, ke e pacihelé wo Paulo, ha a pati ni Juif.

22 Ke e pii wo Paulo pie: «Lé pwo âjiénung me lé pwo caa, geé téne ana me é pii tewé ni, beme é pipwopaing.»

² Ke me lé téne he e pacihelé he pwo patilé, ke bwo te junihe tice patilé kuti.

Woéo ke pa ju Juif

Ke e pii wo Paulo pie: ³ †«Woéo ke pa *Juif. É pituie ne Tarse ha a province Silisi, kehe icehi ana picileó ne éni *Iérusaléma. Ke wo Gamaliel †† na e pacémuniéo. Ke e picaa tong ehi ni patén de ni watihenye. Pana é ûmiê me de Padué pwohewiikewé ati jena. ⁴ †É pwotahi, me pwo me taunu ni béén na lé âcéi Padaame Iésu. Ke é pwo me imwi ni aiu me ni toomwo mwo, ke é tahlil ne he karépu.

⁵ «Jan me lé pajuujuéo wo pa *daame he lé pwo apwoâpwailo me ni *mwohuô. Be é hegi kojale ni tii, beme é ne te ni âjiénenye, ni Juif na lé mu Damas. Ni tii naa, ke lé ne mwomwon dong, me é â lang, me é â imwi nina lé céihi ne ko Iésu, ke me é péélé bé ne Iérusaléma beme lé pwocuhinaado.»

E piuti a pwoto te Padaame

⁶ «Kehe icehi ana me é ko â he pwaaden, he teko ju goahen ehi, he é ko âmwonuhi Damas, ke e te âbé kuti mu jeda he miiden a pwéélang na te junihe ubwo, ke e pwoeihéo. ⁷ Ke é te tupwo kuti ne pwo bwohemwo. Ke é téne a pwocihe na e pii pie: “Saulo, Saulo, é ko ade na go pwotahi ne kong?”

⁸ «Ke é hegi ne ten pie: “Wogo, ke woo, go pa daame?”

«Ke e hegi ne tong pie: “Woéo Iésu mu Nazaret, pana go ko pwotahi ne kong.”

⁹ «Lé te alihi a pwéélang wo lé pwo na lé âcéing, kehe icehi ana time lé uce téne a pwocihe te pana e pacihéó.

¹⁰ «Ke é pii pie: “Padaame, ade aceli me é pwo?” Ke e hegi ne tong wo Padaame pie: “Go cuwoda, ke go â Damas, be o bo pii tem nelang aceli me go pwo.”

¹¹ «Ke me é niê, ke caa time é alikenye. Ke lé bwo te ju pétaa ko ing ne ni bééng, ke lé pééo nge Damas.

¹² «Ke pwo pa céiu apulie lang, na pii kon pie Ananias. Wo panaa, ke pa apulie na e te junihe pipwoiipieng me âcehi ni *patén de Moosé. Ke lé te junihe piwâéng ati ne ni Juif na lé mu Damas. ¹³ Ke e âbé

† 22.3 Apostolo 5.34 †† Gamaliel—Pa apulie na piubwo nang ne pele ni caa te cémun ko patén. Omehi Apostolo 5.34. ‡ 22.4 Apostolo 8.3

beniéó wo panaa, ke e pii tong pie: “Saulo, pa acéihi bééng, go niê mwo!”

«Ke é caa te ju niê ehi mwo, ke é alieng. ¹⁴ Ke e pii tong pie: “E caa pipégaliko wo Padué he ni watihenye, beme go temehi ana nimen kon, beme go ali Pana e mwomwon, wo Iésu, ke me go téne a patin heme e cihe tem. ¹⁵ Be go bo pa apé na a juuju ten, ne pele ni apulie ati, ko ni naado na go alihi me téne. ¹⁶ Ke é jena, ke he ade aceli go ucéihi? Go cuwoda me puuko. Ke go pwoitihiti te Padaame ††, beme e pineuhi ni ta pwo tem.”»

Â céii lé pwo na time uce lé pwo Juif

¹⁷ «Ke é alecehen, ke é caa mwojuia mwo ne Iérusaléma. Ke é ha a céiu tan, he é mwo ko pwoitihiti ne *huâ iitihiti, ke e pihabwieng dong ne ha a jenung wo Padaame, ke é alieng. ¹⁸ ††Ke e pii tong pie: “Go piepin, ke go wie epin mu Iérusaléma, be o time lé uce hegi a bwo pajuujuéo tem ne ni apulie éni.”

¹⁹ †††Ke é hegi ne ten pie: “Padaame, lé te temehi pie é â he ni *mwotapitihiti, ke é pwo me imwi nina lé céihi ne kom. Ke é pwo me ahilé, ke é nelé da he karépu.

²⁰ †††Ke é he taunu Étienne, pa eabwé tem, ke é te mu lang mwo. Be woéo pa céiu na é te picani telé ne ko a bwo niimihinaado telé, ke é wéihi mwo ni epwéne lé pwo na lé taunueng.”

²¹ ††Kehe icehi ana e pii tong wo Padaame pie: “Go wie [mu Iérusaléma] be é bo neko nge, he na e éité lang, pele nina time uce ni Juif.”»

Pwo me lé ahieng lé pwo coda

²² Lé tabemi Paulo die lang ne ni Juif, kehe icehi ana me e pii pie e â céii nina time uce ni Juif, [ke lé te okéé kuti] ke lé toii da pie: «Taunueng! Be time uce jan me e mulie!» ²³ Ke lé te wiikau kuti, ke lé céi taabwon ni epwénélé, ke lé pwo muu pule ††.

²⁴ Wo pa apihuô te ni coda roma, ke e pwo me lé pé da Paulo he mwocoda, beme tatieng ko bwaliwota †††, beme e pii telé ace watihen me lé uu [ke me lé okéé ne kon] ne ni Juif.

Woéo pa Roma

²⁵ ††Kehe icehi ana me lé cieeng beme lé tatieng, ke e pii wo Paulo te pa céiu caa te coda na e mu lang pie: «Kona te pwo mwomwon dewé me geé tati pana e mu ha a tii tewé, ni Roma, na mwo time uce tautieng?»

†† Go pwoitihiti te Padaame—Grek: Go pwoitihiti ne he niin.
 ††† 22.18 Apostolo 9.29–30 †††† 22.19 Apostolo 8.3, 26.9–11
 †††† 22.20 Apostolo 8.1 § 22.21 Apostolo 9.15 ††† Céli taabwon ni epwénélé... Lé wonaa heme lé okéé. Lé niimihiti pie, e pii wo Paulo pie: «E tahi taabwoni lé pwo Juif wo Padué, ke e pipégali ni béé bele.»
 †††† Bwaliwota—Te junihe ta, be pwo mehi ni duuwota, beme céi ni éé apulie (chair). ††† 22.25 Apostolo 16.37

²⁶ Ke [e téetih]i wo pali caa te coda he e téne anaa, ke e â paténe pa apihuô telé, pie: «Go pipwocile aceli me go pwo te pa apulie ce, be pa Roma!»

²⁷ Ke e âbê too Paulo wo pali apihuô, ke e tahimwoeng pie: «Go paje, te wogo kuti ha a tii tenye ni Roma?»

«Éa.»

²⁸ Ke e pii wo pali apihuô te ni coda pie: «Te junihe hiwon ni mwani na é ne beme é Roma!»

Ke e pii wo Paulo pie: «Woéo ke é he é pituie, ke é caa te Roma.»

²⁹ †Ke me e téne anaa, ke te junihe mwotieng kuti. [Be iitih]i me lé cie pana e ha a tii telé. Ke lé te neeng kuti ne ni coda na lé pwo me lé tatieng, ke lé engen.

Paulo ne ânebuhe a mwohuô

³⁰ Nime pa apihuô te ni coda me e temehi ace watihen me lé tééti Paulo ne ni Juif. Ke é ha acaama, ke e pihuôhi ne te ni *apwoâpwailo, me ati a mwohuô te ni Juif, pie me lé pipitilé. Ke me lé pipitilé, ke e te pwo me tuwo ni itihe toki ko Paulo, ke lé pééeng bé, ke lé neeng ha awiemelé.

23 Ke e te ju ome ni *mwohuô wo Paulo, ke e pii telé pie: «Lépwo âjiéning, time uce pipenem a pwonimung ne he pwahamii Padué, ko a mulihung dieli jenea.»

² †Ke me e téne anaa wo Ananias, pa *daame he lépwo apwoâpwailo, ke [e okéé. Ke] e pahede nina lé mu mwonu Paulo pie me lé ahi a pwon.

³ †Ke e pii ten wo Paulo pie: «E bo pwocuhin ne tem wo Padué! Be nimem me go tautié ko ni patén, kehe icehi ana go piâ ité koja ni patén, be go pwo me lé ahiéo! Wogo, ke te ju wâé a pwom, kehe icehi ana a pwonimem, ke te junihe melepiing hen!»

⁴ Ke ni béén na lé mu cebwo Paulo, ke lé pii ten pie: «Éé! Go ko pii me ta pa daame he lépwo apwoâpwailo te Padué!»

⁵ †Ke e hegi ne telé wo Paulo pie: «[Pineuéo] wogewé lépwo bééng, be time é uce temehi pie, weeng pa daame he lépwo apwoâpwailo! A juuju pie caa te tii ne he ni tii iitih pie: *Go nemwo cihe me ta ne ko pa apihuô te a bele tem.*»

Exode 22.27

Lé pipiiden wo lépwo apihuô

⁶ †E te temehi wo Paulo pie, nina lé mu ha a mwohuô, ke pwo ni *Farasaio, me ni *Saducéen. Ke e pii telé pie: «Lépwo âjiéning! Woéo ke pa Farasaio, ke wo caa tong ke pa Farasaio, ke é céih ne ko a bwo mulie cemwo te ni amele. Ke é ko anaa na lé tautié.»

⁷ Ke me e pii anaa, ke ni Farasaio me ni Saducéen, [ke lé te piokéé kuti] ke lé pipiiden. ⁸ ††Be lé pii ne ni Saducéen pie, te tice mulie cemwo te ni amele, te tice *âcélo, ke te tice duéé. Ke mepwo é ne ko ni Farasaio, ke lé céih ne ko ati ninaa.

⁹ Ke me lé caa ko junihe picih da, ke lé te cuwoda kuti ni béé *dotéén ko patén mu ha awieme ni Farasaio. Ke lé pii pie: «Te tice aceli geme alihi celi ta, celi e pwo wo pa apulie ce. Wieli e cihe ne kon na ace âcélo?»

¹⁰ Ke me caa â piubwo da ali bwo piokéé telé, ke e ni imih wo pa apihuô te ni coda pie, lé o pitanahi Paulo, ke e pii te ni coda ten pie me lé ole pééeng daamwo he mwocoda.

¹¹ ††É he bwén, ke e piâbeeti Paulo wo Padaame, ke e pii ten pie: «Go mwou! Be go caa pajujuéo ne *Iérusaléma, ke wâé mwo heme go pajujuéo ne *Rome.»

Lé pipwohuô beme lé taunueng

¹² É ha acaama hen, ke lé pine huô ne ni béé *Juif, ke lé *piapwo pie, o time lé uce wiinaado me ûdu ânebuhe ace bwo taunu Paulo. ¹³ Ni apulie naa, ke eda koja a 40 jélé.

¹⁴ Ke lé â too ni caa te ni apwoâpwailo me ni apihuô, ke lé pii telé pie: «Geme caa piapwo pie, time geme o uce wiinaado, dieli heme geme bo taunu Paulo. ¹⁵ †Ke anaa, wâé heme géé neme ilehi koja pa apihuô te ni coda pie, me e pébé céikewé Paulo, wogewé me ati ni mwohuô. Ke géé pii ten pie, nimewé me géé temehi ehi aceli e pwo. Ke wogeme, ke geme pipwop-weekeme, beme geme taunueng ânebuhe ace bwo tuiebé ten ne éni.»

E paténe Paulo wo pa acim kon

¹⁶ Kehe icehi ana wo pa acim ko Paulo, ke e téne pie lé pwo me lé pipwohuô te Paulo. Ke e taa paténeeng ne he mwocoda.

¹⁷ Ke me e téne a pwooti naa wo Paulo, ke e tode pa céiu caa te coda, ke e pii ten pie: «Go pé ngen pa ewa aiu ce pele pa apihuô tewé, be pwo a céiu naado na nimen me e pii ten.»

¹⁸ Ke e pé paje, ke e pééeng nge céii pa apihuô ten, ke e pii ten pie: «E todeéo wo Paulo, pa apwokarépu, ke e pahedeéo me é pébé céiiko pa ewa aiu ce, be pwo ace naado celi nimen me e pii tem.»

¹⁹ Ke e pétaa ko i pali nahi aiu wo pali apihuô, ke lu tabuhi gaaté cuwo, ke e tahimwoeng pie: «Ade aceli nimem me go pii tong?»

²⁰ Ke e hegi ne ten pie: «Lé mi piténelé wo lépwo Juif beme lé ilehi kojako pie, me go bo pwo me e âbê meé

† 22.29 Apostolo 16.38 †† 23.2 Ioane 18.22–23 † 23.3 Mataio 23.27 †† 23.5 Exode 22.27 †† 23.6 Apostolo 26.5

††† 23.8 Mataio 22.23 ††† 23.11 Apostolo 27.24, 28.16, 23 § 23.15 Apostolo 25.3

wo Paulo ne ânebuhe a mwohuô telé. Be wieli lé o pii tem pie, nimelé me lé temehi ehi aceli e pwo. ²¹ Kehe icehi ana go nemwo piténedelé! Be lé o pipwohuô ten. Be piwoélé da koja 40 lépwona lé caa piapwo pie, o time lé o uce wiinaado ke ûdu, die ko ace bwo taunueng. Ke é ha a benaamwon ce, ke lé caa nebwén ko pipwopweelé, ke lé ju ucéihi aceli me go pii.»

²² Ke e hegi ne ten wo pa apihuô pie: «Go nemwo uti a bwo picihe tenyu!» Ke e neeng me e engen.

Lé pé Paulo nge céii gupéno

²³ E tode lupwo caa te coda ten wo pa apihuô, ke e pii telu pie: «Geu pipwopweehi celi 200 coda celi lé pé teua, ke 70 coda celi lé tebwo pwo haricaan, ke 200 coda celi lé nuô da, beme lé â Césaré heme 9 inetéale ko a babwén. ²⁴ Geé pwopweehi mwo ce haricaan, beme lé pé Paulo nge pele pa gupéno Félix. Ke geé wéieng ehi, beme time uce tuie ne kon celi ta.»

²⁵ Ke nebwén, ke e tii a tii ce:

²⁶ Klaude Lisias ne te gupéno Félix, bwocu!

²⁷ †Pa apulie ce, na lé imwieng wo lépwo Juif beme lé o bo taunueng. Ke é âbé me ni coda, beme é pééeng koyalé, be é temehi pie pa Roma. ²⁸ ††Nimung me é temehi ace watihen celi lé imwieng kon, ke é pwo me e tautieng a mwohuô telé. ²⁹ Ke é alihi pie heme lé pipé ne kon, ke te é mu ko ni patén delé, kehe te tice aceli me pipé ne kon kon, celi jan me taunueng kon, ai me e pwokarépu kon.

³⁰ †É he patemehi tong ana me lé pwo ne ko pa apulie ce, ke é te pwome neeng lé céiiko, me lépwona lé pipé ne kon. Ke é pwo ko pii telé pie, me lé patemehi tem celi lé pipé ne kon kon.

³¹ É he bwén, ke wo lépwo coda, ke lé pwo ana e pii telé wo pa apihuô telé, ke lé pé Paulo nge ha a pwomwo ubwo Antipatris. ³² É ha acaama, ke lé mwojuia mwobé ne he mwocoda wo lépwo béé coda, ke lé te ne lépwo atebwo pwo haricaan me lé ân me weeng. ³³ É he lé tehene nge Césaré, ke lé ne te gupéno ali tii, ke lé ne Paulo ten.

³⁴ E pine a tii wo pali gupéno, ke e tahimwo Paulo pie: «He go âbé mu ha ace duaan celi woté?»

Ke e hegi ne ten wo Paulo pie: «É âbé mu Silisi.»

³⁵ Ke e pii pie: «É bo tautiko hemepie lé bo âbé pi-patemehilé wo lépwona lé pipé ne kom.» Ke e huôhi pie me lé ne Paulo ha a karépu ne ha a mwodaame na e pwo wo *Érode pa Bécéiuhén.

Paulo ne he pwahamii gupéno Félix

24 Ke nim ni tan alecehen, ke lé tuie ole Césaré wo Ananias, pa *daame he lépwo apwoâpwailo, me

† 23.27 Apostolo 21.30–33, 22.25–27 †† 23.28 Apostolo 22.30 ‡ 23.30 Apostolo 24.5–8

ni béé ukéiu te ni *Juif, me pa avoka †† na pii kon pie Tertule. Ke lé too gupéno Félix, ke lé pitéteiminaado ten ne ko Paulo. ² Ke e todebé Paulo wo pali gupéno [beme e cuwo ânebuhen].

E pipé ne ko Paulo wo Tertule

Ke e pipé ne ko Paulo wo Tertule [ne he pwahamii pali gupéno] ke e pii pie: «Gupéno Félix, é hemepie geme mulie ha a péém, ke wonaa mu kom, ke é mu ko ni bwo huô tem, me a bwo pé ehi nen dem a amu teme. ³ Geme pwo-olé tem, he ni ju pwonimeme, ko ni naado naa. ⁴ Time uce nimung me é pé kojako ce benaamwon celi bwali, é mu ko anaa, na é ileko pie go te ju picani, beme go tabemi ehi celi é o pii tem.

⁵ ††«Geme alihi pie wo pa apulie ce, ke te junihe pa apulie ta kuti, be e hane pwo-okéé ko lépwo Juif ati pwo a bwohemwo, be pa caa te a céiu pubu apulie *Nazaréen*. ⁶ †††Weeng mwo, ke e te hane me e pwo ni naado beme e habwii pie time e uce pipaunuhi a *mwaiitihi. Ke é mu ko anaa, na geme imwieng {be nimeme me geme tautieng âcehi ni patén deme.

⁷ «Kehe icehi ana wo pa apihuô te ni coda, Lisias, ke e âbé, ke e te pwome pééeng kojakeme. ⁸ Ke e pii te lépwona lé tauti Paulo pie me lé âbé céiiko, beme lé pii tem ni naado na ni watihe a bwo tautieng.} Tahimwo pa apulie ce, be go bo alihi pie ati nina geme pipé ne kon, ke te ni juuju.»

⁹ Lé piténelé wo lépwo Juif, ke lé pii pie ana e pii wo avoka Tertule, ke te a juuju.

E pipwopain wo Paulo

¹⁰ Wo gupéno, ke e pwo inenaado te Paulo pie me e cihe.

Ke e pii wo Paulo pie: «É te temehi pie, wogo pa apihuô, ke go tauti a amu teme lépwo Juif, he ni jo na hiwon. Ke time uce pinekepé ne tong me é pipwopaing ne he pwahamiim.

¹¹ «Go tahimwohi lé, be time uce téele wédenihi celi 12 ni tan na é tuiebé ne *Iérusaléma, me é pipaunu Padué. ¹² Ke time é uce pine puni ke cine ni apulie ne *huâ iitihi, ke é ne he ni *mwotapitihi, ke é ne ha a pwomwo ubwo Iérusaléma. Ke te tice apulie celi lé pii pie lé aliéio, he celi é ko pwo ninaa. ¹³ Ke é jenaa, ke ni apulie ce, ke time uce jan me lé *pajujuhi ne tem, ni na lé tautiéio kon.

¹⁴ «A juuju pie pana é âcéi Padaame nge ha a pwaaden [na mwo coho] he é pipwoeabwé te Padué he ni watihenye. Kehe é ne telé, ke a pwaaden naa, ke a gele. Kehe icehi ana woéo, ke é céihi ne ko ati ni *patén de Moosé, me ati ni tii te lépwo péroféta.

¹⁵ †††Be geme céihi, woéo me ni apulie ce, pie lé o bo

†† Pa avoka—Avocat. Pa apipwopainye ne he mwotautinaado. ††† 24.5 Apostolo 17.6 †††† 24.6 Apostolo 21.28–30

mulie mwo na ati nina lé mele ne ha a wâé me a ta.
¹⁶ Ke é mulang na é te pihane me te tice celi me e pipé ne kong a pwonimung, ne he pwahamii Padué me ni apulie.»

Te tice ta celi é pwo!

¹⁷ «É ne alecehe ni jo na hiwon na tieéo mu Iérusaléma, ke é mwojuia mwobé, beme é pébé ni mwani bépicanu te a bele tong, ke me é pwoâpwailo te Padué.
¹⁸ †Anaa kuti ana é mu ne kon, ne huâ iitihi, ke lé tooéo he é ko panebwénihi a *pwoiitihi ko a bwo wâé genye ne pele Padué. Te tice apulie bééng, ke time é uce cine ni apulie me lé pipwohau.

¹⁹ «Kehe icehi ana lé mu lang ne ni béé Juif mu ha a province Asia. Ke hemepie é pwo aceli ta ha a tan naa, ke é mu ko ade na time lé uce mu éni jena, beme lé pipé ne kong? ²⁰ Mwo te wo lépwo apulie ce mwo, na lé pééo nge ânebuhe a *mwohuô, he ade aceli ta celi lé te alihi ne kong? ²¹ †Ai he nimelé me lé tautié, ko ali pwooti li é pii ne ha awiemelé, pie: “É céihi pie, lé o mulie mwo ne ni amele?” Ke é mu ko anaa, na é ko mu éni jena ne ânebhewé.»

Pine ngemwo a bwo tauti Paulo

²² *Ke mepwo é ne ko gupéno Félix, ke e te junihe téne ni pwooti ko *a bwo âcéi Padaame. Ke e picéi ngemwo a bwo tauti Paulo. Ke e pii te lépwo Juif pie: «O bo tauti cawi Paulo, hemepie e tuiebé wo Lisias, pa apihuô te ni coda.»

²³ Ke e pii te pa céiu caa te coda pie me e wéi Paulo ne he karépu, ke me time e uce cieeng me pwohau ten, ke me e te patupwo ne te ni béén me lé âbé caniéng. [Ke e engen wo Félix.]

²⁴ Pwo ni tan he pwocehin, ke lu tuiebé wo Félix me Drusile ††, ê mwoden, ê toomwo Juif. Ke lu pwo me e âbé wo Paulo, ke lu tabemieng he e cihe ko a céihi ne ko Iésu Kériso.

²⁵ Kehe icehi ana me e cihe ko a mulie ha a *mwomwon ne he pwahamii Padaame, me a bwo pipwoi-ipikenye, me a tautinaado te Padué na e bo âbé, ke mwoti Félix, ke e pii te Paulo pie: «É jena ni, ke genye o mwo pacuwohi ali pitihi tenye. Ke wâé heme go mwo engen kojaéo, ke hemepie pwo ace benaamwon dong, ke é bo todeko mwo.» ²⁶ Be e te niimihi wo gupéno Félix pie, me e bo ne ten ce mwani wo Paulo. É mu ko anaa, na e pwo me lé te cuwo ko pébé céieng Paulo, beme lu picihe.

Paulo ne ânebuhe gupéno Festus

²⁷ Caa âdé na alo jo, ke e taatéé gupéno Félix wo Porcius Festus. Kehe icehi ana wo Félix, ke e te pwo me e te mu he karépu wo Paulo, beme lé te piwâéeng wo lépwo Juif.

25 E tuie ne ha a province *Judé wo gupéno Festus, ke cié ni tan alecehen, ke e taa mu Césaré ne *Iérusaléma.

Lé pipé mwo ne ko Paulo

² *Ke lé pitéiminaado ten ne ko Paulo wo lépwo caa te lépwo *apwoâpwailo, me ni apulie na piubwo jélé mu pele lépwo *Juif. ³ ††Lé cuwokon me ileeng pie me e pwo me e âbé ne Iérusaléma wo Paulo. Be wo lépwoje, ke lé te pwo a céiu huô, beme lé bo taunueng ne pwo pwaaden.

⁴ Ke e hegi ne telé wo Festus pie: «Ûhu, be lé wéieng ne Césaré, ke woéo, [ke time uce bwoliéo Iérusaléma] ke é o caa te engemwo. ⁵ Ke wâé heme lé opé céieng ne Césaré wo lépwo apihuô tewé. Ke mepie pwo ace naado celi ta celi e pwo wo pa apulie naa, ke lé bo pii nelang.»

Paulo ne he mwopitautinaado

⁶ E te ju mu pelelé he na 8 ai 10 ni tan wo Festus, ke e homwo Césaré. Ke é ha acaama hen, ke e taa he mwopitautinaado, ke e pihuôhi ne telé pie me lé pébé Paulo. ⁷ ††Ke me e tehenebé wo Paulo, ke lé aujenieng wo lépwo Juif na lé opé mu Iérusaléma. Ke hiwon ni naado na lé pipé ne kon kon na te nihe ta. Kehe icehi ana time uce jan me lé *pajuujuhi.

⁸ Ke e hegi wo Paulo me pipwopain, ke e pii pie: «Te tice aceli é pwotahi ne ko ni patén de lépwo Juif, ke é ne ko a *mwaiitihi, die ko pa daame ubwo César.»

⁹ Nime Festus me lé piwâéeng wo lépwo Juif, ke e hegi ne te Paulo pie: «Nimem me go taa Iérusaléma, beme é bo tautiko nelang?»

Nime Paulo me e tautieng wo César!

¹⁰ Ke e pii ten wo Paulo pie: «É cuwo ânebuhe a mwotautinaado te César, ke o bo te tautié nelang. Be go caa te temehi ehi pie, te tice aceli é pwo celi ta ne ko lépwo Juif. ¹¹ Ke mepie é pwo aceli time uce mwomwon, celi jan me taunuéo kon, ke time uce piwâ jo hemepie taunuéo. Ke mepie nina lé pii ne kong, ke me ni gele, ke te tice pace apulie celi pwo mwomwon den me e pééo nge céiilé. Ûhu! Nimung me e tautié wo César [§]!»

†† 24.15 Ioane 5.28–29 † 24.18 Apostolo 21.12–28 †† 24.21 Apostolo 23.6 † 24.22 Apostolo 23.26 †† Drusile—É pwaadeni pa daame Agripa II, ke é pwaadeni Bérénice. Omehi a Apostolo 25.13.

†† 25.2 Apostolo 24.1 ††† 25.3 Apostolo 23.15 ††† 25.7 Apostolo 24.5–6 § Nimung me e tautié wo César—Pana e mu ha a tii te lépwo Roma, ke jan me e ilehi me tautieng wo César, pa daame he lépwo Roma, pwohewii a Cour d'appel.

¹² Ke é ne alecehe a bwo picihe te Festus me lépwo apwopitihi, ke e pii te Paulo pie: «Mepie te nimem me e tautiko wo César, ke go bwo te ân!»

Piuti jepule ko Paulo te Agripa II

¹³ É he ni tan alecehen, ke lu tuie ne Césaré wo pa daame *Agripa † me Bérénice, ê toomwo pwaadeniin, me lu â pwobwocu te Festus.

¹⁴ †Mwo te hiwon ni tan na lé mwo te mu hen, ke e piuti te pa daame wo Festus nina lé pwo te Paulo, ke e pii ten pie: «Pwo pa apulie na e neeng he karépu wo Félix. ¹⁵ É he é mu Iérusaléma, ke lé pitéteiminaado wo lépwo caa te lépwo apwoâpwailo, me lépwo apihuô te lépwo Juif, me ilehi pie me e pwocuhinaado.

¹⁶ «Ke é hegi ne telé pie: “Wogeme lépwo Roma, ke time mu uce wonaa ni huô teme. Be time geme mu uce pwocuhinaado te pa apulie, ânebuhe a bwo tautieng. Be wâé heme e mwo te picihe me lépwona lé pipé ne kon, beme e te pii ce pwooti bépipwopain.” ¹⁷ Ke é mulang na lé tai tuiebé pelong. Time é mwo uce ucéhi, ke é ha acaama, ke é mu he mwotautinaado, ke é ilehi pie me pébé pa apulie naa.»

Pipééle ko a pwoitihi telé

¹⁸ «Lé tehenebé wo lépwo apipé ne kon. É ko niimihi pie, junihe ubwo a ta na e pwo. Kehe icehi ana lé pipé ne kon, ke te piticenaado ne kon. ¹⁹ Be lé te pipééle ko nina te é ha a pwoitihi telé, ne ko pace Iésu celi e mele, pana e pii wo Paulo pie e mulie cemwo.

²⁰ «Ke time é uce temehi aceli me é pwo, ne ha a bwo picihe telé. Ke é tahimwo Paulo pie, nimen me e â Iérusaléma, me bo tautieng nelang ko ni naado naa. ²¹ Kehe icehi ana e ilehi me e tautieng wo César. Ke é ne a mwomwon pie me wéieng dieli ha ace bwo pawieeng dong, nge céii César.»

²² Ke e pii wo *Agripa te Festus pie: «Woéo mwo, ke nimung me é téne pa apulie naa.»

Ke e hegi ne ten wo Festus pie: «Wâé, be é meé, ke go bo te téneeng.»

Lé taa he mwopitautinaado

²³ É ha acaama hen, ke lu tuie nge he mwopitautinaado wo Agripa me Bérénice, woélé me ni apihuô te ni coda me ni apulie na piubwo jélé ne ha a pwomwo ubwo. [Ke lé te junihe pipaunulu ne ni apulie, pwohewii a bwopwonen delé.] Ke e ne a mwomwon wo Festus pie me lé pébé Paulo.

²⁴ Ke e pii wo Festus pie: «Padaame Agripa me tai wogewé ati na wogewé éni peleme, geé ali pa apulie

† Agripa—Agripa II, pa naí pa daame Érode Agripa (omehi a pwahamii tii 12). Pa daame ne Chalcis ne Palestine, ke ni amu na élé cebwon. L'empereur roma, ke e ne ten a mwomwon me e pipégali pa daame he lépwo apwoâpwailo te lépwo Juif. †† 25.14 Apostolo 24.27

ce. Be pa watihe picihe te ati ni Juif, ne Iérusaléma, ke éni, ke lé caa âbé tooéo ne kon. Ke lé tai pii tong ati pie, wâé heme taunueng.

²⁵ «Ke hemepwo é ne kong, ke é tooli pie te tice aceli e pwo celi ta celi me jan me taunueng kon, kehe icehi ana te weeng mwo na e ilehi pie me e â too pa daame César. Ke é niimihi pie me é te patupwoeng ngen.

²⁶ «Kehe icehi ana time é uce temehi aceli me é tii nge céii pa daame César ne kon, ke anaa a watihen me é pwo me e cuwo ânebuhewé ati. Te wogo cehi, go pa daame Agripa, na é pine ne kom. Be mepie geé tahimwoeng ati, ke o bo jan me geé pii tong, aceli me é tii nge céii pa daame César. ²⁷ Be time uce mwomwon ne kong me é pawie nge céiieng pace apwocuhinaado, heme time uce ju pwéélang ehi ace watihen.»

E pipwopain wo Paulo ne he pwahamii Agripa

26 Ke e pii wo *Agripa te Paulo pie: «É pawie ne tem me go cihe, me go pipwopaim.»

Ke e eti da a in wo Paulo, ke e pii pie:

² «É te junihe pipwodéén, go pa daame Agripa, me é cihe ânebuhem jena, me é piwotétaa ko nina lé tautié kon wo lépwo *Juif. ³ Be go te ju temehi ehi a bwomu tenye ni Juif ‡, me ni naado na nye mu picihe kon, ke é ileko pie go te ju picani, ke go tabemiéo.»

Lé tai temehi a mulihung

⁴ «Ati ni Juif, ke lé te tai temehi a mulihung, ha atabuhi kon, he é mwo ewa aiu, ne ha awieme a bele tong [ne ha a province Silisi] die *Iérusaléma. ⁵ †Caa bwolihi a bwo temehi nen delé pie, pana é mulie ne pele lépwo *Farasaio, a céiu duaa pwoitihi na te junihe binyi, na geme mu hen. O te jan me lé *pajuujuhi, hemepie nimelé.

⁶ ††«Ke é jena ni, ke caa tautié, be é céhi pie, o cuwo a bwopiinen ânebun de Padué te ni caa teme. ⁷ Ke lé te céhi ne mwo ko a bwopiinen naa ne ni 12 pwomwoiu *Isaraéla, he lé penem de Padué, ne he ni ju pwonimelé, heme bwén ke pwang.

«Ke é mu ko anaa, na lé tautié, go pa daame Agripa, wo lépwo Juif naa. ⁸ Ke wogewé ni Juif jena ni, ke he time geé uce mwomwohi pie wo Padué, ke e pwo me lé mulie cemwo ne ni amele?»

Ânebun ke é pipwobwoni Iésu

⁹ †††«Ânebun, ke é niimihi pie a penem dong, ke me é pwopa me ubwo ne ko a nii Iésu mu Nazaret. ¹⁰ Ke é hegi mu ko ni caa te lépwo *apwoâpwailo a mwomwon, beme é ne he karépu lépwo apulie ten. Ke te nihe

‡ Bwomu tenye ni Juif—A pwomwoiu te lépwo Érode, ke time uce lépwo ju Juif. É bwolihi, ke lé bitelé ne ko a pwoitihi te lépwo Juif, kehe icehi ana time lé uce ju mu ko a bwo pwoitihi telé. †† 26.5 Filipi 3.5–6 †† 26.6–7 Apostolo 23.6, 28.20 ††† 26.9 Apostolo 8.3

hiwon lépwo béén na é pwo me nelé he karépu ne Iérusaléma. Ke woéo pa céiu mwo, na wâé ne kong a bwo taunui apulie. ¹¹ É te cuwo ko ahilé ne he ni *mwotapitihí, me cuwokolé me lé pii me ta a nii Iésu. Be te nihe pa a-okéé, ke é pwotahi ne kolé, die he ni pwomwo ubwo na e ité.»

E piuti mwo a bwo todeeng de Padaame

¹² «Ke weengaa kuti a watihen me é â Damas, imi a mwomwon na lé ne tong wo lépwo caa te ni apwoâp-wailo. ¹³ É he geme mwo ko â he pwaaden, go pa daame Agripa, he te ju goahen ehi, ke é alihi a pwéélang na e âbé mu he miiden ne kong me ni bééng, ne ha a pwaaden na geme uti. Ke te junihe pwéélang koja a téale. ¹⁴ Geme te ju tai tupwo ati ne pwo bwohemwo, ke é téne a pwocihe na e pii tong he pwo *ébéru pie: “Saulo, Saulo, é ko ade na go pwotahi ne kong? O te junihe binyi ne kom me go cuwode Padué †.”

¹⁵ «Ke é tahimwohi pie: “Wogo ke woo, go pa daame?”

«Ke e hegi ne tong pie: “Woéo Iésu, pana go ko pwotahinaado ne kong. ¹⁶ Go cuwoda, be é pihabwiié tem, ke é pipégaliko beme go pa bépenem dong. Ke bo wogo pa apajujuéo, ke go bo piuti ana go alihi jena, ke go bo piuti mwo nina é bo habwii tem. ¹⁷ É bo te wéiko mu ha awieme a bele tem, lépwo Juif, me ni béé bele mwo. Ke é neko nge céiilé. ¹⁸ †É pahedeko, beme go tehi ni naamiilé, beme lé o wie mu ha a melepiing, me lé â ha a pwéélang: mu ha a pihuô te *Caatana, nge pele Padué. Be mepie lé céihi ne kong, ke é o pineulé, ke lé o pimu ibu me nina lé céihi ne ko Padué.”»

E pii pwaati Iésu pithi

¹⁹ [E pii mwo wo Paulo pie]: «Wonaa go pa daame Agripa, te junihe pwocoon ne kong me time é ténédehi nina é alihi: ni naado na e âbé mu pele Padué. ²⁰ Ke é tabuhi pipatemehi a pwooti mu Damas, ke é Iérusaléma, me ati he ni amu te lépwo Juif, ke é ne mwo pele nina time uce ni Juif. Ke é pii telé ati pie: “Geé pininim, ke geé bitekewé ne ko Padué. Ke geé habwii ne he ni bwomu tewé pie, geé caa pininim.”

²¹ «Weengaa kuti a watihen me lé imwiéo ne *huâ iitihí wo lépwo Juif, ke lé pwo me lé taunuéo. ²² Kehe icehi ana e te wéié dieli ni wo Padué. Ke é ko ana na é teko pajuujuhi ne he pwahamii ni apulie na wahin ke ubwo jélé.

«Ke mepwo nina é pii, ke time uce pi-ité koja nina lé pii wo lépwo péroféta me *Moosé he ni bwopiinen

† Me go cuwode Padué—A ocine he pwo grek ne ko a haricaan na muhi ten me e piténede pana e tebwo huíin. †† 26.18 Ésaie 42.16; Éfésó 2.2; Kolosé 1.13

delé ânebun pie: ²³ †Wâé heme e picani wo pa *Mesia, ke me e mele, ke me pa bécéiuhén na e mulie cemwo mu ha awieme ni amele, beme e o patemehi a pwéélang te a bele juif me ni béé bele.»

Wâé heme go céihi, go pa daame!

²⁴ Me e wonaa a bwo pipwopain wo Paulo, ke e toii da wo Festus pie: «Pipenem a punim, go paje! Go te junihe cémun, ke go caa piolo ko a pitemang dem!»

²⁵ Ke e hegi ne ten wo Paulo, ke e pii ten pie: «Úhu! Time uce pipenem a puning, go gupéno, be te ana a pwooti na a juuju ke pitemang na é pii. ²⁶ E caa te temehi ni naado naa wo pa daame Agripa, be time uce ce naado celi pineduwohi, ke time uce piwâ jo me é pii ten.»

²⁷ [Ke e biteeng wo Paulo ne ko pa daame Agripa, ke e tahimwoeng pie]: «Ko go pa daame, go te céihi ne ko lépwo péroféta? É te temehi pie go te céihi ne kolé...»

²⁸ Ke e pii ten wo Agripa pie: «Go te niimihi kuti pie me é te pwome céihi ne ko Iésu ni?!»

²⁹ Ke e hegi ne ten wo Paulo pie: «Hemepie éni ai bo é, ke bo te wonaa, pwohewii ana nime Padué kon! Be nimung me geé pwohewiiéo, go pa daame Agripa, me wogewé ati na geé ko tabemiéo jena. Kehe icehi ana me time uce ciekewé ko itihe toki pwohewiiéo!»

Tice aceli e pwo celi ta wo Paulo

³⁰ Nebwén, ke lé tai cuwoda ati wo pa daame, ke wo gupéno, ke wo Bérénice me ati ni béén na lé mu lang. ³¹ Ke lé wie, ke lé pipii telé pie: «Wo pa apulie ce, ke te tice aceli e pwo celi ta, celi o jan me e pwokarépu kon, ke me taunueng.»

³² Ke e pii wo Agripa te Festus pie: «Éa kuti. Ke hemepie time e uce ilehi me tautieng ne pele pa daame ubwo, ke me o te jan me patupwoeng mwo.»

Ne Paulo nge Rome

27 É he caa pii pie, me geme â pwo ong nge Itali, ke lé ne Paulo me lépwo béé apwocuhinaado ne te pa caa te coda na pii kon pie Julius, pa béé ni coda na lé wéa ko pa daame ubwo telé. ² †Geme taa pwo ong mu Adramite na me e â he ni atii ne ong ne ha a province Asia. Geme tai engen me Aristarke, pa apulie Macédoine mu ha a pwomwo ubwo Tésalonik.

³ É ha a tan alecehen, ke geme tehene nge Sidon. Ke e pwopweehi ne ko Paulo wo Julius, ke e neeng me e â céii lépwo béén, ke me e hegi mu kolé a wâé.

⁴ Geme engen mulang, ke geme âmwonuhi a één Chipre, beme geme taduwo, be udan ne kome. ⁵ Alecehe a bwo hagéi na a jíé Silisi me Pamfili, ke geme tehene nge Mira ha a province Lisi. ⁶ Ke é lang, ke wo

‡ 26.23 Luka 24.44–47; 1 Korénit 15.20 †† 27.2 Apostolo 19.29

pa caa te coda, ke e tooli a ong mu Alexandri, na e â Itali, ke e pwo me geme taa pwon.

⁷ É he na hiwon ni tan, ke geme te ju piân âmimihi, be te nihe binyi. Ke geme tehene nge mwonuhi a pwomwo ubwo Cnide, ke pwocoon me geme teda lang, be ubwo a dan. Ke geme â he déme a één Krète, he bebenihe a miin Salmoné. ⁸ Ke te nihe binyi me geme wédenihi, ke geme tehene nge ha a duaan na pii kon pie *Bons Ports*, mwonuhi a pwomwo ubwo Lasé.

Caa a benaamwon ko ta-amu

⁹ Geme te nihe patieden ni benaamwon na hiwon, ke caa abwobwo me geme tee ân, be caa a benaamwon ko udan. Be e caa âdé a tan ko pipwodéén ko a *pipaciile †. É mu ko anaa, ke e pii te lépwo béén wo Paulo pie: ¹⁰ «É alihi pie a bwo engen denye, ke abwobwo. A ong ke ni ânen, ke o tanahi, ke wogenye, ke wieli genye o patieden ni mulihenye.»

¹¹ Kehe icehi ana wo pa caa te coda, ke e ténédehi ana lu pii ten wo pa apihuô pwo ong, me pa eapwihi ong koja nina e pii ten wo Paulo. ¹² A atii ne ong, ke time uce wâé ne ko ni ta-amu. Ke hiwon lépwona lé mu pwo ong, na nimelé me lé engen mulang, beme lé hane me lé teda Fénix, atii ne ong ne Krète, he na picidin lang ††, beme lé mu lang ha a benaamwon ko ta-amu. ¹³ Pwo a dan na e picuu âmimihi bé mu he *sud*, ke ni apulie ha ali ong, ke lé niimihi pie o caa wâé ne kolé. Lé céi a pehinyu, ke lé engen uti a één Krète.

A udan

¹⁴ Te ju é alecehen, ke e wiebé a dan mu pwo ali één, na te junihe pwo niihen. ¹⁵ Ke e cuutééhi ali ong, ke pwocoon me pwo ace bwopwonen, be te nihe ubwo a dan. Ke geme necu me cuutéékeme. ¹⁶ Geme â he déme a cuwo nahi één na pii kon pie Kauda. Ke binyi me geme ne da a nahi ong na geme teuu.

¹⁷ Alecehe a bwo céida pwo ong, ke lé cie ni piduaan ko ni tai wo lépwo apenem ne ko a pilehe ong, be abwobwo pie geme o teda pwo a bwowon Sirte [cebwo Libi]. Lé pawie a nyu me e pulaa nge he tabe ‡, ke lé ne a dan me cuutéékeme.

¹⁸ É ha acaama, ke caa junihe pwo niihe a udan, ke lé tahi ne pwo tabe ni âicu na mu ha ali ong wo lépwo apenem. ¹⁹ É ha acaama, ha a bécíéhe ni tan, ke lé tahi ne pwo tabe a ééniê me ni niê pwo ong.

²⁰ É he na hiwon ni tan, ke pwocoon me geme alihi a téale ai ni ceni ††. Ke mwo te nihe pwo niihe a udan, ke

† *Tan ko pipwodéén ko a pipaciile—Tan ubwo ko a wole septembre. Omehi mwo Tan ubwo ne ha a Niinaado (Vocabulaire) ha anebwén ko a tii.* †† *Picidin lang—Grek: Picidin lang, be e biteeng nge he sud-ouest ke a nord-ouest.* ‡ *Lé pawie a nyu me e pulaa nge he tabe—ai Lé neole a niê.* †† *Pwocoon me geme alihi a téale ai ni ceni—Te tice bwopwonen me lé pé ce ja telé ne ko ni ceni.*

caa time geme mwomwohi pie geme o mulie. ²¹ Caa bwolihi na time geme uce wiinaado.

E pamwoiu lépwo béén wo Paulo

Ke e cuwo ha awiemelé wo Paulo, ke e pii telé pie: «Lépwo bééng, é hemepie géé teko ténédehi ali é pii tewé pie, me time nye uce engen mu Krète, ke me time e o uce tuie ne konye aceli woni. ²² É pii tewé pie: Géé mwoiu! Be o te tice pace béénye celi e o mele, kehe o te icehi a ong na nye o patieden.

²³ «Woéo pa apulie te Padué, ke pa apenem den, ke é tibwén, ke e âbeetiéo wo pa *âcéló ten, ²⁴ ††ke e pii tong pie: “Go nemwo pwo me mwotiko, go Paulo, be o bo tautiko ne ânebuhe César, pa daame ubwo te lépwo Roma. Ke wonaa mu kom, ke wo Padué, ke e o pwo me lé mulie wo lépwona lé âcém.”

²⁵ «Lépwo bééng, géé mwoiu! Be é céihi ne ko Padué. Éa, e o te pwo ana e pii tong. ²⁶ †††Kehe genye o teda pwo ace één.»

Lé âmwonuhi amu

²⁷ Caa a bé14 he ni bwén, ke a udan, ke e teko cuutéékeme nge pwo a tabe Méditérané †††. Ke é ha awieme bwén, ke wo lépwo apenem pwo ong, ke lé piténe ne kolé pie, geme caa âmwonuhi a céiu amu.

²⁸ Lé tahi ne pwo tabe a béja na imwi ko tai, ke lé tooli pie *37 mètre* a bwo numwihi na a tabe. Ke lé piân, ke lé tahi mwo ali béja, ke lé tooli pie *28 mètre* a bwo numwihi na a tabe. ²⁹ Abwobwo jélé pie o tanahi a ong ne ko ni péi. Ke lé tahi ni nyu na paa alece, ke nimelé me e epin a pwopwang.

³⁰ Ke lé neole he tabe a nahi ong wo lépwo apenem pwo ong, ke lé pii pie: «Geme mwo â tahi ni nyu ânebuhe a ong ubwo tenye ati.» Kehe time uce a juuju, kehe lé pwo me lé cela mu ha ali ong.

³¹ Kehe e pii wo Paulo te ni coda me pa caa telé pie: «Mepie time lé uce mu pwo ong wo lépwo apulie ce, ke o pwocoon me géé mulie.»

³² Ke lé tahagéi ni tai ko ali nahi ong wo lépwo coda, ke lé pawie me e â pwo tabe.

E pamwoiulé mwo wo Paulo

³³ Ânebuhe a pwopwang, ke e pii telé wo Paulo pie: «Jenaa, ke caa a bé14 he ni tan na géé uca, ke géé mu, he time géé uce wiinaado. ³⁴ É pamwoiukewé me géé wiinaado, beme pwo niihewé, ke me te tice celi tookewé.»

³⁵ Alecehe a bwo cihe telé, ke e pé a pwoloa, ke e pipwo-olé te Padué ne ânebuhelé ati, ke e patihi a pwoloa, ke e wiinaado. ³⁶ Tai woélé ati, ke lé mwoiu, ke lé wiinaado mwo. ³⁷ Pwo 276 a jéhikeme ati ne ha ali

†† 27.24 Apostolo 23.11 ††† 27.26 Apostolo 28.1

††† Méditérané—Grek: Adriatiké.

ong. ³⁸ É he caa nebwén na lé wiinaado, ke lé tahi ne pwo tabe ni *blé* beme pwia a ong.

Lé teda pwo a bwowon

³⁹ É he pwang, ke wo lépwo apenem pwo ong, ke time lé uce temehi pie ade één, kehe lé alihi a ooluuu ke a nicepwon. Lé hane ace bwopwonen beme lé pé die lang a ong, hemepie jan. ⁴⁰ Lé tuwo ni nyu, ke lé pawie ne he tabe. Ke lé tuwo mwo ni tai ko a eaong. Ke lé ne a nié pwo ong ânebuhe a ong, beme e péékeme da ticepwon na a dan. ⁴¹ Kehe lé teda pwo a bwowon, ke caa pwocoon me e pipenem na a ong. A ânebuhen, ke e wie nge he ni won, ke pwocoon me e wie. Ke lé tabuluhene a alecehen ne ni jilé na pwo ni ihen.

Lé tai mulie

⁴² Nime lépwo coda me lé taunu lépwo apwocuhinaado, beme te tice paceli e cela heme lé ko éoom. ⁴³ Kehe e pacuwolé wo pa caa telé, be nimen me e celuimi Paulo. Ke e pii te lépwona lé temehi éoom pie, me woélé lépwo bécéiuhén na me lé téele ne pwo tabe beme lé taa huâiu. ⁴⁴ Ke wo lépwo béén, ke lé bwo âcéilé pwo ce meacuwo ai ce pihe a ong, ke wonaa a bwo â teda telé ati ha amu. Tai wogeme ati, ke game tai mulie.

Paulo ne pwo a één Malte

28 Alecehen, ke game temehi pie a één naa, ke a niin pie Malte. ² †Ke lé hegikeme wo lépwo apulie lang, ke lé te nihe picani teme ehi. Ke he te nihe ubwo a ute me a bwala, ke lé patéi a miû na nihe ubwo, ke lé ne me game pwocadéu. ³ Ke e pé ni uluhe acuwo wo Paulo beme e tahi da pwo miû, ke pwo pa bwien na e â wie mu hen ko a éle, ke e wii a i Paulo.

⁴ Ke é he lé alihi a bwien he e tetelu ko a in wo lépwo apulie ha amu naa, ke lé pipii telé pie: «Éé! Geé alihi, wo pa apulie ce, ke pa ataunuhi apulie, be caa celuimieng koja a jilé, kehe icehi ana e pwocuhinaado ten wo pa duéé henye, ke e pwo me e mele.»

⁵ †Kehe icehi ana e tagilihi a in wo Paulo, ke e tupwo ne pwo miû ali bwien, ke time uce picunu nang kon.

⁶ †Ke lé omeeng wo lépwoli apulie, be lé niimihi pie, o cibi nang, ai e o te ju pwome tupwo, ke me e mele. Ke caa ju bwolihi a bwo omeeng delé, ke he lé alihi pie time uce ko cunu nang, ke pitaatéhi ni bwo niimihi-naado telé, ke lé pii pie: «Ûhu! A duéé!»

E pwo me tieden ni cunu

⁷ É ha a duaan naa, ke pwo a duaan de Publius, pa apulie na nihe piubwo nang ne pwo a één naa. Wo pa-

† 28.2 Korénit 11.27 †† 28.5 Maréko 16.18 † 28.6 Apostolo 14.11

je, ke e te nihe hegikeme ehi. Ke game pimo pelen, he na cié ni tan. ⁸ Kehe te nihe cunu pa caa ten, be piéle nang, ke e pitebwohi cewéle, ke e tee pule. Ke e ân wo Paulo me e â alieng, ke e ne ni in huûin, ke e pwoiitih ten, ke caa tieden a cunu kon.

⁹ Ke é alecehen, ke lé âmwobé ati ni béé cunu mu ha a één naa, ke e pwo me tieden ni cunu kolé. ¹⁰ Ke lé te nihe pipaunukeme. Ke é he caa nebwén a bwo mu teme lang, ke lé ne teme nina nihe pwonaado ne kon ne ko a bwo engen deme.

E tuie nge Rome wo Paulo

¹¹ Caa ju cié wole ko a bwo mu teme [pwo a één Malte]. Ke nebwén, ke game taa pwo ong mu Alexandri, na a niin pie *Kastor me Polux*^{††}, a ong na e teko mu lang ha a benaamwon ko ta-amu. ¹² [Ke game engen] ke game tuie nge Sirakuse, ke game mu lang he na cié ni tan.

¹³ Ke é mulang, ke game tête uti a amu, ke game tuie nge Régio. Ke é ha acaama, ke e tahieng a dan na e âbé mu he *sud*. Ke alo ni tan deme, ke game bwo tuie nge Pouzole, atii ne ong. ¹⁴ Ke game tooli nelang lépwo acéihi, ke lé ilekeme me game mwo te ju pwome mu pelélé he celi céiu naadenitan. Ke game mwo ju pwome mu pelélé. Ke nebwén, ke game bwobe â *Rome.

¹⁵ Ke é he lé téne a jepule kome wo lépwo acéihi na lé mu Rome, ke lé âbé benikeme ne ha Api-icu te Apius, ke é ne he ni Mwowiinaado na Cié. Ke, me e alilé wo Paulo, ke te nihe piwâénimen, ke e pwo-olé te Padué.

E pacihe lépwo Juif ne Rome

¹⁶ É he game tehene nge Rome, ke lé ne te Paulo a mwomwon me e mu ha a céiu mwa, ke céiu pa coda na wéa kon.

¹⁷ Cié ni tan alecehen, ke e tode lépwo caa te lépwo *Juif ne Rome wo Paulo. Ke e pii telé pie: «Lépwo âjié-nung, te tice aceli é pwo ne ko a puapulie tenye ai a bwomu te ni caa tenye. Kehe icehi ana lé neéo he karépu ne *Iérusaléma, ke é mulang, ke lé neéo te lépwo Roma. ¹⁸ ††Ke lé tautiéwo wo lépwo Roma, ke nimelé me lé pawieéo, be te tice watihenaado celi lé tooli ne kong, beme lé taunuéo.

¹⁹ †††«Kehe icehi ana wo lépwo Juif, ke te muhi telé, ke é caa ju ilehi me é taa die pele César, pa daame ubwo. Kehe icehi ana time uce nimung me é pipé ne ko a puapulie tong. ²⁰ †††É mu ko anaa, na é ilehi me é alikewé, ke me é cihe tewé. Be wonaa mu ko pa

†† *Kastor me Polux*—Ni nii lupwo duéé he tabe lupwo péidu te lépwo Grek. A niilu mwo pie *Les Dioscures*. †† 28.18 Apostolo 26.31 ††† 28.19 Apostolo 25.11 ††† 28.20 Apostolo 26.6–7

*Mesia na genye ucéieng, ati wogenye a puapulie *Is-
araéla, na cieéo ko ni tai toki ce.»

²¹ Ke lé hegi ne ten pie: «Time geme uce hegi ace tii
kom mu *Judé. Te tice pace béénye celi e âbé pwo-
jepule teme kom, ai me e pii me ta ne kom. ²² †Kehe
icehi ana nimeme me go pii teme ehi a pwoitihhi naa,
be geme téne pie, nihe piikewé me ta pitihhi.»

E pipatemehi Iésu telé

²³ Ke lé picéi a tan. Ke hiwon nina lé âbé céiieng ne
ha a mwa na e mu hen wo Paulo. Ke tabuhi ko acaama
die ko a babwén, ke e cihe telé ko a *Mwametau te
Padué, ke e pwo me e habwii telé ni pwooti ko Iésu, ne
he ni *patén de Moosé, ke é ne he ni tii te lépwo
péroféta.

²⁴ Wo lépwo béén, ke lé céihhi ne kon, ke wo lépwo
béén, ke te muhi telé me lé céihhi. ²⁵ Ke é he time lé uce
piténelé hadeniilé, ke lé pwo me lé engen. Ke e pii telé
a bénebwéne pwooti wo Paulo pie: «E te ju cihe ehi na
a *Jenen Iitihhi te lépwo caa tenye, mu ko Isaia pa
péroféta, pie:

²⁶ *Go â pii te a puapulie naa pie:*

“Geé tee téne taaci,

kehe time geé uce temehi.

Geé tee omehi taaci,

kehe time geé uce alihi temehi.”

²⁷ *[É pii ne kolé:*

Mwoiu a puni a puapulie ce.]

† 28.22 Apostolo 24.14

Capuhi ni pwonimelé.

Bwéjé ni pwojéénelé.

Bwi ni naamiilé.

Be time uce nimelé

me lé alihi ko ni naamiilé,

ke me lé téne ko ni pwojéénelé,

ke me lé temehi ko ni pwonimelé.

Te muhi telé me lé bitelé bé céiiéo,

me lé taatéehi ni mulihelé,

ke me é o pwo me wâé jélé.» Ésaie 6.9–10

²⁸ E pii telé mwo wo Paulo pie: «Wâé heme geé temehi
ehi a céiu naado: E nebé a Pwooti Wâé wo Padué, me
de lépwona time uce lépwo Juif. Ke lé o téne.»

{ ²⁹ Ke nebwén, ke lé engen wo lépwo Juif, ke lé te ni-
he picihhe kon.}

E pacémuni nina lé âbé céiieng

³⁰ Mepwo é ne ko Paulo, ke e mwo tee mu ha a mwa
na e pwocuhin, he na alo ni jo ††. Ke e hegi ati nina lé
âbé omeeng. ³¹ Ke e cihe telé ko a Mwametau te
Padué, ke e pacémunilé ati ko Padaame Iésu Kériso.
Ke te tice celi me lé pacuwoeng ne ha a bwo cihe ten.

†† *Wieli lé pawie Paulo wo lépwo Roma, alecehe lupwo jo na alo.
Ke e bo pwo a béciéhe bwo engen den, na time uce piuti ne ha a Tii
Iitihhi. Wieli e â caniê lépwo acéihhi ne Akai (Grèce). Ke wieli e â die Es-
pagne mwo. Omehi a Roma 15.24 ke 28. E tii a bécéiuhhe tii ten ne te
Timoté, ke a tii te Tit ha a benaamwon naa. Ke é alecehen, ke wo
Néron, pa daame he lépwo Roma, ke e pwo me lé imwieng mwo. Ke
lé taunueng nge ha a jo 67 ne Rome.*

Roma

nge céii lépwo

Atabuhi ko a tii

Woo na e tii a tii ce?

Wo Paulo, pa apostolo. Hiwon ni acéihi na lé mu pelen, na lé ne ngen ni bwocu telé, te lépwo béélé ne Rome (pwahamii tii 16).

E tii éniile?

Ha a jo 57. E tii mu Korénit wo Paulo, ha a béciéhe ni bwo engen den, ânebuhe a bwo mwojuia ten mwo ne Iérusaléma. (Omehi a tii 15.25–31.)

E tii me dee?

Te lépwo apulie ha a pwomwo ubwo Rome, li lé téne a Pwooti Wâé, ke li lé céihi ne kon. (Time uce wo Paulo na e pipatemehi telé.) Hiwon mu kolé, nina time lé uce Juif. (Omehi 1.13; 11.13,30,31.) Kehe pwo lépwo béén mwo na te lépwo Juif. (Omehi 2.17; 7.1.) Lé pitapitilé wo lépwo acéihi ne he ni pwomwo. (Omehi a pwahamii tii 16.)

É ko ade na e tii?

Wo Paulo, ke e habwii tenye a bwomune a céihi tenye ne he Iésu Kériso. Ke e habwii tenye mwo a bwopwonen me e celuimikenye wo Padué, ke e ne tenye a mulie dieli mwo ne pelen.

Wieli pwo ace pipééle hadenii ni acéihi na lé Juif, me nina time lé uce Juif. E habwii wo Paulo pie, ete lépwo Juif a piapwo na iitihi mu ko Padué, kehe icehi ana é jena, ke e hegi ati ni apulie na lé âbé céiieng, kehe time e uce pipwoinen ne ko ni apulie.

E pwopune te lépwo acéihi wo Paulo, beme lé mulie ha a mulie na mwomwon ke juuju. A céiu mwo, ke e paténe lépwo acéihi ne Rome pie, e bo mu pelelé, hemepie e bo â Espagne (1.10–13; 15.22–28).

Ade ace âne a tii ce?

A tii ce, ke e habwii ehi a bwo celuimikenye te Padué: Ânebun, ke genye tai mu ha a ta, ke genye ucéihi a cuhinaado na te junihe ubwo, na e bo ne wo Padué (pwahamii tii 2–3). Kehe icehi ana te junihe ubwo a pipwoééhe tice ja kon den me denye, ke e celuimikenye koja ni ta pwo tenye, hemepie genye céihi ne kon. Weengaa a bwo niimihinaado ten ânebun, ke e pacuwohi jena. Ke e pwo me e pipwaadeniin bé wo Iésu Kériso, he e pineeng, beme e pwocuhi ni cuhinaado tenye, he e mele ne ko a kuricé (3.23). É mu ko anaa kuti, ke wo Padué, ke e pwo me wogenye ni apulie na nye mwomwon ne he pwahamiin, ke e pwo me pwohewiin heme time genye mu uce pwo celi ta. Wona cehi, mu ko ana e pwo wo Kériso, ke genye hegi heme genye céihi ne kon. Time uce é mu ko aceli wâé celi nye pwo, ai ace bwo piténedehi nen denye ace céiu patén.

E béhabwiinen tenye wo Abérama, pa apulie na piubwo nang ne pele lépwo Juif. A mulihen, ke e pajuujuhi ana e pii wo Paulo. Be e céihi ne ko Padué wo Abérama, ke wo Padué, ke e pwo me pa apulie na e mwomwon ne he pwahamiin (pwahamii tii 4).

É mu ko ana e pwo wo Kériso, ke e tahagéi a junuu a ta ne he ni mulihenye wo Padué, ke e caa tuwokenye, beme nye mulie ha a mulie na mwomwon. O time bo uce tautikenye mwo. Be e caa pii beetihi pie, wogenye, ke ni apulie ten na wâé genye ne he pwahamiin (8.1). Ke te tice naado celi jan me pineitéékenye koja a pipwoééhe ten (8.38).

É mu ko anaa kuti, ke wâé heme nye pipatupwokenye ati ne ten, beme nye pwohewii a âpwailo na mulip, na te junihe wâé ten. Be weengaa kuti a ju pwopwoiitihi, na jan me nye ne ten (12.1).

Nye mulie he ni mulie na pwoiipihi: Nye piténe nina e mu huîlé a pihuô ne he ni amu (13.1); nye nemwo tau-ti me pipii lépwo acéihi béénye (14.4). Nye picani ne ko ni béén na time uce téele mang ni céihi telé. Ke genye pwo celi wâé telé, ke genye picani telé, me pamwoiuihi ni céihi telé (15.1).

A bwomune a tii Roma

Pipwobwocu me a pwonime Paulo

Genye te tai pwo nina ta

Genye mwomwon mu ko a céihi tenye

A mulihenye na mwo coho

A bele Isaraéla me ni béé bele

A cémun ko a mulihenye

Bénebwéne pwooti me a pipwobwocu

Pipwobwocu

1 [†]Woéo Paulo, pa eabwé te *Kériso Iésu, ke é pwotii lé [céiikewé ni acéihi roma]. E todeéo wo Padué, beme é apostolo. Ke e pipégaliéo beme é pii beetihi a *Pwooti Wâé ten ^{2 ††}na e caa te mi pii beetihi ânebun, be e pwo me lé pipwaadeniin bé ne ni *péroféta ten, na lé tii ne he ni *tii iitihi: ^{3 a} Pwooti Wâé ko pa Naîn, wo Iésu Kériso, [Padaame henye]. Te pa apulie pwohewiikenye [‡], be pa piebehi pa daame *Davita. ⁴ Kehe e habwii wo Padué pie, wo pa Naîn, he e pwo me e mulie cemwo mu ha amele ko a junuu a *Jenen Iitihi ^{††}. ^{5 ††}E etiéo wo Padué, beme é ^{†††}apostolo te Kériso. Ke a penem dong, ke me é pii beetieng, ne te ati ni bele, beme lé céihi ne kon me piténe deeng.

^{6-7 †††}Wogewé mwo, lépwo Roma, ke geé béé lépwon-aa, be te junihe eânime Padué tewé, ke e caa todekewé wo Iésu Kériso beme geé mulie me den. Wâé heme e mu pelewé a *pipwoééhe tice ja kon me a péém, na e âbé mu ko Padué henye me Padaame Iésu Kériso. Adéikewé!

Nime Paulo me e caniélé

⁸ É tabuhi ko a pipwo-olé te Padué hung, mu kowé ati, ne he nii Iésu Kériso, be caa te ju jepule pitihii a bwohemwo a céihi tewé. ⁹ Ke e te temehi wo Padué pie, é tee niimikewé ne he ni pwopwoiitihi tong. Weeng pana é pipwoeabwé ten, ati ha a pwonimung, na é pipatemehi a Pwooti Wâé ko pa Naîn.

^{10 §}É te cuwo ko ileeng pie, me é cedikewé, hemepie te nimen. ¹¹ Be te junihe nimung me é alikewé, beme é ne tewé ni âpipati na e âbé mu ko a Jenen Iitihi, beme

pwo niikewé, ¹² ke me genye bo pipamwoiukenye ko ni céihi tenye [ne ko Kériso].

^{13 §†}Tuiebé jena, ke time uce jan me é âdé céiikewé. Kehe icehi ana wâé heme geé temehi, wogewé lépwo bééng ne he nii Kériso, pie, caa te junihe hiwon ni bwo niimihi nen dong pie, me é pwo. Be wâé tong me é alihi ce acehi ni penem dong ne pelewé, pwohewii a bwo alihi nen dong [ne pele lépwona time lé uce *Juif] ne he ni béé amu.

¹⁴ Be é te junihe niimi ati ni apulie: lépwona lé pwohewiikenye, me lépwo béén na te pi-ité ni bwomu tenye me woélé ^{§††}; ke ni apulie na lé cémun, me ni béén na mwo time lé uce cémun. ¹⁵ É mu ko anaa, na te junihe nimung me é cedikewé ne *Rome, beme é pipatemehi a Pwooti Wâé ne pelewé.

A âne a Pwooti Wâé

^{16 §†}Time uce tanim jo me é pipatemehi a Pwooti Wâé. Be a junuu Padué na me e *celuimi ati nina lé céihi: mi ni Juif ânebun, ke bo ni béén alece.

^{17 §††}Be e habwii tenye na a Pwooti Wâé pie, wo Padué, ke e pwo me lé mwomwon wo lépwona lé céihi ne kon. Ke a céihi telé naa, ke caa te jan. Be caa te tii ne he ni tii iitihi pie: *Wo pana e céihi ne ko Padué, ke mwomwon nang ne he pwahamiin, ke e kon a mulie*^{§†}.

Habakuk 2.4

genye te tai pwo nina ta

(Pwahamii tii: 1.18—3.20)

¹⁸ E habwii wo Padué, mu âda he *miiden, a pwo-okéé kon ne ko ni apulie, na ta jélé. Be é mu ko ni

† 1.1 Apostolo 9.15 †† 1.2 Roma 16.25—26 ‡ Te pa apulie pwohewiikenye—Grek: Ne ha a éé apulie. †† Ai, E habwii pie pa Naîn na te junihe pwojunuun... †† 1.5 Apostolo 26.16—18; Galat 2.7—9 ††† É—Grek: Geme. Omehi note ††† 1.7 Nombres 6.25—26 § 1.10 Apostolo 19.21; Roma 15.23

§† 1.13 Apostolo 19.21 §†† Lépwona lé pwohewiikenye, me lépwo béén... Grek: Lépwo Grek me lépwo Barbare. §‡ 1.16 Maréko 8.38; Apostolo 13.46; 1 Korénit 1.18—24 §†† 1.17 Habakuk 2.4; Roma 3.21—22 §† Wo pana e céihi...ke e kon a mulie—Grek: Wo pana e mwomwon mu ko a céihi, ke e o mulie.

bwomu telé na ta, ke lé pwobwonihi a juuju me e penem.

¹⁹ †Be caa te ju pwaale ne kolé aceli genye ko temehi mu ko Padué, be weeng na e caa patemehi telé. ²⁰ ††Be mepie time genye uce alieng ko lupwo naamiinye, kehe e pihabwiieng ehi ne he ni naado na e pwo mu ha atabuhi kon. Be e ne a miiden me a bwohemwo, me ati ni naado na e pwon. Ke jan me nye alihi pie, e te junihe piwéden, ke pwojunuun dieli mwo. ²¹ †[Ke caa te tice bwopwonen me lé pipwopailé] be lé caa te temehi Padué, kehe time lé uce pipaunueng, me pipwo-olé ten, kehe nina me nye pwo me den.

Be lé pipatieden ne ha a melepiing, ke piticenaado ne ko ni bwo niimihinaado telé. ²² ††Lé niimihi pie, lé pitemang, kehe icehi ana lé piolo. ²³ ††Be lé jéilé ne ko Padué, na e mu dieli mwo ne ha *a wâé ten, beme lé pipaunu ni *démenaado na o tieden: ni déme apulie, me ni meni me ni wota, me ni bwien.

E nelé wo Padué

²⁴ É mu ko anaa, na e nelé wo Padué, me lé te pwo ni huô na ta, na nimelé kon. Ke lé pwotahi ni éélé, ke lé pipatanimilé mwo. ²⁵ Ke lé ne Padué na e juuju, ke lé téte cehi ni duéé hauli ††. Ke lé pipaunuhi ni naado na e tabuhi. Kehe [wogenye, ke] wâé heme nye *adéi Padué dieli mwo! Amen!

²⁶ É mu ko anaa, na e te nelé wo Padué, beme lé te âcehi ni pwonimelé na tanim. Be ni toomwo, ke time lé uce pule me ni aiu, kehe lé te pule imi mwo ni toomwo, kehe time nye mu uce wonaa. ²⁷ †††Ke te piwien ne mwo ko ni aiu, be caa te time lé uce pule imi ni toomwo; be lé âcehi nina nimelé kon na mwiihi, ke lé te pule imi mwo ni aiu! É mu ko anaa, na lé te hegi mwo a kuhinaado telé ne he ni éélé, mu ko ni ta na lé pwo.

²⁸ É he time uce nimelé me lé temehi Padué, ke e te nelé me lé te âcehi ni pitemang delé na time uce mwomwon, be lé pwo nina me time nye uce pwo.

²⁹⁻³¹ Te ju oba jélé ati ko a ta:

Lé cibehede, ke lé pipii delé;
Ke nimelé ko ni de ni béén, ke lé pipwokon;
Ke lé pipwohuô te ni béén;
Ke lé pijeta kolé, ke lé pipééle;
Ke lé cihe me ta ne kolé;
Ke lé okéé die ko ana lé taunuhi apulie;
Ke time lé uce piténe ni nyaa me caa telé;
Ke time lé uce pajuujuhi ni *piapwo telé;
Ke time lé uce paciiti Padué, ke lé cubwonieng.
Ke te tice pwonimelé, ke te tice pipwoééhe kolé;

† 1.19 Apostolo 14.15–17, 17.24–28 †† 1.20 Job 12.7–9; Psaume 19.2 †† 1.21 Éfeso 4.17–18 ††† 1.22 Jérémie 10.14; 1 Korénit 1.20 †† 1.23 Deutéronome 4.15–19; Psaume 106.20 ††† Duéé hauli—Grek: Ana gele. †††† 1.27 Lévitique 18.22, 20.13; 1 Korénit 6.9

Ke lé tee cuwo ko tooli ati ni bwopwonen me lé pwo nina ta.

³² Ati lépwona lé wonaa, ke e pii wo Padué pie lé bo tai mele, be anaa a bwo tautinaado ten na mwomwon. Ke lé caa te temehi anaa, kehe icehi ana time lé uce pipéce ne kon. A céiu mwo, ke lé te pamwoiu mwo ni béén beme lé te pwohewiilé!

A tautinaado te Padué

² †Wogo na go tauti ni béén [na é mwo ko piilé] kehe go teko pipwohewiilé mwo! Me go tautilé, ke te wogo na go teko pitautiko mwo. ² Ke genye caa te ju temehi ehi pie, e mwomwon wo Padué, heme e tauti ni apulie na lé wonaa.

³ Ke wogo, pana go teko pwohewiilé, ke go teko tautilé. Ke woté? Go ko niimihi pie, go o te cela ko a tautinaado te Padué? ⁴ ††Kona time go uce ko alihi pie, e te junihe picani ne kom wo Padué, ke te junihe wâé nang ne kom? Go teko pé me piticenaado ne ko ninaa? E wonaa wo Padué, be nimen me go pitaatéhi a mulihem.

⁵ Kehe time uce nimem me go temehi, be te junihe mwoiu a punim! É mu ko anaa, ke go te ucéihi a kuhinaado tem. Be é ha a Tan [na e caa pipégali wo Padué] ke e o habwii a okéé ten ne kom, ke e o tauti ni apulie ha a juuju. ⁶ †††«Ke e bo te muko pétaapwo ne ce cemelé, ne he ni muko pétaapwo bwo penem delé.»

⁷ Mepwo é ne ko ni béén, ke lé hane me lé pwo celi wâé, beme e piwâélé wo Padué ††. Ke lé hane a *adéihi ten, me a mulie na tice anebwén kon ne pelen. Ke wo Padué, ke e bo pwo me lé mulie ne pelen dieli mwo.

⁸ †††Kehe ni béén, ke lé pwobwonieng, ke time lé uce piténe dehi a juuju, ke lé te cuwo ko pwo ni huô na ta. Ke wo Padué, ke e bo habwii a okéé kon na ubwo, ke e bo pwocuhinaado telé.

⁹ A apwohi me a mwoti, ke e bo tupwo ne ko ati nina lé pwo nina ta: ni *Juif ke ni béén mwo. ¹⁰ Kehe *a wâé, ke a adéihi, ke a péém, ke bo ni de ati ni apulie na lé pwo nina wâé: ni Juif ke ni béén mwo. ¹¹ Be wo Padué, ke time e uce pipwoinen ne ko ni apulie.

Piwien hemepie pwo patén, ai tice patén

¹² Wo lépwo Juif, ke etelé ni *patén de Moosé, ke hemepwo é ne ko ni béé apulie, ke te tice telé ni patén. Kehe te piwien ne kolé. Be heme lé pwo ana ta, ke e o tautilé wo Padué, ke e bo pwocuhinaado telé. Kehe a kuhinaado te lépwo Juif, ke o âcehi ni patén na etelé ††.

§ 2.1 Mataio 7.1–2; Ioane 8.7 †† 2.4 Éfeso 1.7; 2 Péteru 3.15 ††† 2.6 Psaume 62.13; Proverbes 24.12; Mataio 16.27; 2 Korénit 5.10 †† Beme e piwâélé wo Padué—Grek: Lé hane a wâé. †††† 2.8 2 Tésalonik 1.8 †† Grek: Ati nina lé pwo nina ta, heme time uce etelé

¹³ Be time uce nina lé tabemi ni patén, na lé *mwomwon ne he pwahamii Padué, kehe nina lé piténehehi.

¹⁴ †Nina time lé uce Juif, ke time lé uce temehi ni patén de Moosé. Kehe icehi ana heme lé mulie ne ha ana e pii ne ni patén, ke pwohewiin heme te woélé ni patén. ¹⁵ Ke lé teko habwii pie, teko e he pwonimelé ni patén. Ke e te *pajuujihi anaa na a *pwocihe na e âbé mu he ni pwonimelé. Be é he ni béé benaamwon, ke lé te pitautilé mwo, ke é he ni béé benaamwon, ke lé te pipwopailé mwo.

¹⁶ Genye bo alihi ehi, ha a Tan na e bo tauti ni apulie hen wo Padué. Be e ne me e tauti nina neduwohi ne he pwonime ati ni apulie wo Kériso Iésu. Ke weengaa a Pwooti Wâé na é pipatemehi.

A bele Isaraéla me ni patén

¹⁷ Wogo, pana go Juif, ke go mu pwo ni patén, ke go pipii dem ko Padué hem. ¹⁸ Ke go pii pie, go temehi ana nimen kon; ke lé picani tem ni patén me go pwo nina wâé, ke me go temehi ace bwo engen dem. ¹⁹ Ke go niimihi pie, wogo pa apipé ni bwi, ke go pwéélang de lépwona lé mu ha a melepiing. ²⁰⁻²¹ †† *Ke go picaa lépwona time lé uce temehi me lé pwo celi wâé. Ke go pacémuni lépwona mwo time uce pwo niihelé ††. Be go niimihi pie, etem ace bwo temehinaado, me a juuju, celi e âbé mu ko ni patén.

Aje! Kona time go te pipacémuniko kona woté? Ke go pii te ni béén pie, me lé nemwo bune, kehe wogo, ke go te bune! ²² Ke go paciitihi a bune toomwo, ke go te bune toomwo! Go téétihi ni duéé hauli, ke go bune nina e he ni *mwaiitihi telé ††. ²³ Go pipii dem be e mu kom ni patén, kehe icehi ana time go uce piténehehi! Ke go pwotahi ne ko Padué ko ni huô tem.

²⁴ †††Be caa te tii ne he ni tii iitihi pie: *Wonaa mu tewé, me lé pipii me ta a nii Padué ne nina time lé uce Juif.*

Ésaïe 52.5

A ju tegoop

²⁵ Heme go pwo ana e pii ne ni patén, ke junaado a *tegoop. Kehe icehi ana mepie time go uce piténehehi ni patén, ke o te piticenaado ne ko a tegoop.

²⁶ †††Wo lépwona [time uce lépwo Juif, ke] time uce tegoop jélé. Kehe icehi ana me lé te piténehehi ni patén de Padué, ke e te alilé wo Padué, me pwohewii nina tegoop jélé. ²⁷ O woélé na lé bo tautiko, wogo [pa Juif] na tegoop go. Ke go o hegi a kuhinaado [na te junihe ub-

ni patén, ke lé o mele heme time uce etelé ni patén. Ke ati nina lé pwo nina ta ne haahi ni patén, ke o tautilé âcehi ni patén. † 2.14 Apostolo 10.35 †† 2.20 2 Timoté 3.5 † 2.21 Mataio 23.3–4

†† Lépwona mwo time uce pwo niihelé—Grek: Lépwona cuwo nahi ewa. †† Go bune nina e he ni mwaiitihi telé—ai Time go uce éewo ko ni naamuunaado na iitihi. Wieli wo lépwo béé Juif, ke lé icuhi ni deme duéé na e âbé mu he ni béé mwaiitihi, te lépwona time lé uce céihi ne ko Padué. A naado na iitihi ne he ni patén. Omehi Deutéronome 7.25. ††† 2.24 Ésaïe 52.5 ††† 2.26 Galat 5.6

wo]. Be go te temehi ni patén, kehe icehi ana time uce nimem me go piténehehi.

²⁸ Time nye uce Juif wonaa mu ko nina nye alihi ko ni naamiinye. A ju tegoop, ke time uce ana genye alihi ne ko a éé apulie. ²⁹ †Kehe wo pa ju Juif, ke pana e Juif mu jengedé ne kon; ke a ju tegoop, ke a pwonimen. Ke e âbé mu ko a Jene Padué, kehe time uce é mu ko ni patén na tii. Pa ju Juif, ke time e uce hegi a pipwoun mu ko pa apulie, kehe é mu ko Padué.

Te junihe mwomwon ana e pwo wo Padué

3 Kona ade aceli piwéden ne ko pa *Juif koja ni béén? Kona te junihe pwonaado ne ko a *tegoop? ² Éa, te junihe wâé ne kon, ne he ni naado na hiwon. Be wo Padué, ke e mi ne te lépwo Juif a pwooti ten, beme lé wéihi.

³ Hemepie ce béé Juif, ke me time lé uce cile nina lé caa te mi pii ânebun, ke kona wo Padué, ke time e o uce cile nina e caa te mi pii ânebun? ⁴ ††Uhuu! Be mepie lé gele ne ni apulie, kehe e te mwomwon wo Padué, ke e te penem ha a juuju. Be caa te tii ne he ni tii iitihi pie:

Me go cihe, [go Padué]

ke go cihe ha a juuju.

Lé o tai temehi a pwooti tem.

Mepie lé tautiko, ke go te piwéden

koja nina lé tautiko. Psaume 51.6

⁵ Mepwo é ne ko ni huô tenye na ta, ke lé habwii pie, te tice ta ko Padué. Ke é mu ko anaa, ke lé pii ne ni béén ††† pie: «Time uce wâé, hemepie e pwocuhinaado tenye wo Padué, [be ni huô tenye na ta, ke e habwii a bwo wâé nang]!» ⁶ ††Uhu! Be hemepie time e uce mwomwon wo Padué, ke kona e o woté ko ace bwo tauti ni apulie pwo bwohemwo?

⁷ [Ke wieli go niimihi pie]: ‘É mu ko a gele tong, ke me e tuiebeele a juuju te Padué, ke me e habwii *a wâé ten, ke é ko ade na e mwo tee pwocuhinaado tong?’

⁸ [††Uhu. Go nemwo pii anaa. Be te pwohewiin] heme nye pii pie «Genye pwo ana ta, beme e wie a wâé.»

Kehe pwo ni béén na lé pipé ne kome pie, geme pii anaa. Ke lé te ju hane me lé pwocuhinaado.

Te tice pace céiu apulie celi e mwomwon

⁹ †††Genye o pii pie woté, ne ko wogeme lépwo Juif? Kona geme piwéden koja ni béén [ne he pwahamii Padué]? ††Uhu! É caa habwii tewé pie: wo lépwo Juif me lépwona time lé uce Juif, ke lé tai mu ha a pihuô te a ta. ¹⁰ †††Be caa te tii ne he ni tii iitihi pie:

*Te tice pace céiu apulie
celi e mwomwon*

§ 2.29 Deutéronome 30.6; Kolosé 2.11 §† 3.4 Psaume 51.6 §†† Lé pii ne ni béén—Grek: É cihe pwohewii ni apulie. §† 3.9 Roma 1.18—2.24, 3.23 §†† 3.10 Psaume 14.1–3, 53.2–4

ne he pwahamii Padué.
 Te tice paceli te ju céiu nang!
¹¹ Te tice pace céiu apulie
 celi e hane a juuju.
 Te tice paceli e hane Padué!
¹² Lé te tai jéilé ne ko Padué,
 be tai ni apulie na ta jéilé.
 Te tice paceli e pwo aceli wâé.
 Te tice paceli te ju céiu nang! Psaume 14.1–3
¹³ † Me lé cihe, ke te junihe ta;
 be piapwong ni upehelé.
 Ke lé pipwohuô te ni béén. Psaume 5.10
 Ni pwooti na lé pii,
 ke mucenihi ni apulie.
 Be e pwolé a tabepwo ni bwien. Psaume 140.4
¹⁴ †† Ubwo a apwohi ne pwolé,
 ke cunu genye ko ni bwo cihe telé. Psaume 10.7
¹⁵ † Lé te ju tété,
 me lé â taunuhi apulie.
¹⁶ É he na lé â lang,
 ke lé pwotahinaado.
¹⁷ Time lé uce temehi
 a pwaadeni a péém. Ésaïe 59.7–8
¹⁸ †† Be time lé uce paciiti Padué. Psaume 36.2

¹⁹ Mepwo é ne ko ni patén, me ni pwooti na e hen, ke e mi ti ko lépwona e ne me delé ni patén, [wo lépwo Juif]. E habwii ati ni huô te ni apulie, na time uce *mwomwon ne he pwahamii Padué, ke e bo tautilé kon. Ke o te tice pace céiu apulie pwo bwohemwo celi jan me e pipwopain. ²⁰ †† Be te tice pace céiu apulie celi me e pii pie, mwomwon nang ne he pwahamii Padué, ko ace bwo piténedehi nen den ni patén. Be a ju pen-em de ni patén, ke me lé temehi ne ni apulie pie, woélé ke ta jéilé.

genye mwomwon mu ko a céihi tenye

(Pwahamii tii: 3.21–5.21)

²¹ É jena ni, ke e caa habwii wo Padué a bwopwonen, me genye mwomwon ne he pwahamiin. É he e te pwo, ke te tice patén. Be ni *patén de Moosé, me ni pwooti te lépwo péroféta, ke lé te ju *pajuujuhi cehi nina e pwo wo Padué. ²² †† Be wo Padué, ke e pwo me lé mwomwon ne ni apulie mu ko a céihi telé ne ko Iésu Kériso. Ke e te pwo te ati ni apulie na lé céihi ne ko Kériso, be te tice pipwoinen hadeniilé.

²³ Be nye tai pwo nina ta, ke tai wogenye ité koja a wâé te Padué. ²⁴ ††† Ke wo Padué, ke é mu ko a *pipwoéhe tice ja kon den, ke e ne tenye a âpipati na

† 3.13 Psaume 5.10, 140.4 †† 3.14 Psaume 10.7 † 3.15 Ésaïe 59.7–8 †† 3.18 Psaume 36.2 †† 3.20 Psaume 143.2; Roma 7.7; Galat 2.16 ††† 3.22 Galat 2.16 ††† 3.24 Roma 5.1

wonaa: [a péém na e ne ha awiemenye me weeng [§]. Ke e ne me pwohewiin heme time nye mu uce pwo celi ta] beme wogenye ni apulie na nye mwomwon ne he pwahamiin. Anaa, ke a âpipati ten ne tenye, na e pwaadeniin bé wo Kériso Iésu, pana e tuwokenye koja nina ta.

²⁵⁻²⁶ Ke e ne Kériso, beme e *âpwailo me denye. É mu ko a cewéhe Kériso, ke e pineuhi ni ta pwo tenye, wogenye nina nye céihi ne kon. Ke weengaa a béhabwiinen pie, mwomwon nina e pwo wo Padué, ânebun ke é jena. Be é ânebun, ke e te picani ne konye, ke time e uce pwocuhinaado tenye ko ni ta pwo tenye. Ke é jena, ke e pwo me nye mwomwon ne he pwahamiin, wogenye nina genye céihi ne ko Kériso.

E pajuujuhi ni patén na a céihi tenye

²⁷ É mulang, ke o te tice watihen me nye pipii denye, ke o te piticenaado ne ko a bwo piténedehi ne ni patén. Be ana a junaado, ke a céihi ^{§†}. ²⁸ Be é pii tewé pie: Wo Padué, ke e pwo me nye mwomwon ne he pwahamiin, mu ko a céihi tenye. Kehe time uce é mu ko a bwo pacuwohi nen denye ni patén.

²⁹ §†† Woté, [go niimihi pie] wo Padué, ke te Padué he lépwo Juif cehi? Ke kona time uce Padué he ce béén mwo? Uhuu, be Padué he a bwohemwo ati ^{§††} ³⁰ §†† Be te céiu cehi Padué. Ke weeng pana e bo pwo me lé mwomwon ne he pwahamiin wo lépwo Juif, mu ko a céihi telé. Ke weeng mwo, na e bo pwo me lé mwomwon ni béé puapulie, mu ko a céihi telé mwo.

³¹ §† Kehe icehi ana nye nemwo niimihi pie, piticenaado ne ko ni patén, wonaa mu ko a céihi tenye. Uhu! Time uce wonaa! Be a céihi tenye, ke e *pajuujuhi ni patén.

Pa acéihi wo Abérama

4 Nye o pii pie woté ne ko *Abérama, pa watihenye ^{§†}? De ace cemen ko ni penem na e pwo? ² [Te tice.] Be time uce é mu ko nina e pwo, celi me caa pace apulie celi e *mwomwon ne he pwahamii Padué. Ke time uce jan me e pipii den. ³ §†† Be caa te tii ne he ni tii iitihi pie: *E céihi ne ko Padué wo Abérama, ke é mu ko a céihi ten, ke wo Padué, ke e pwo me pa apulie na e mwomwon ne he pwahamiin.*

Genèse 15.6

§ A péém na e ne ha awiemenye me weeng—La réconciliation. Ni pwooti naa, ke lé â ibu me ni pwooti ce: mwomwon ne he pwahamiin (justifié). É mu ko anaa, ke geme ne mwo hen, he ni béé duaan ne ha a tii ce. Omehi Mwomwon ne ha a Niinaado (Vocabulaire) ha anebwén ko a tii. §† Grek: Kona ade a watihe a bwo pipii denye? Te tice. É mu ko ade? Kona é mu ko ni penem? Uhu, te é mu ko a céihi. §†† 3.29 Roma 10.12 §† Bwohemwo ati—Grek: Ni béé puapulie (les paiens). §†† 3.30 Deutéronome 6.4; Galat 3.20 §† 3.31 Mataio 5.17 §† Abérama, pa watihenye—Grek: Abérama, pa watihenye ne ha a éé apulie. Wo Abérama, ke pa watihe lépwo Juif. Kehe icehi ana e te â mwo pa watihe ati lépwona lé céihi ne ko Padué. Omehi ni nide a tii 11 me 12. §§† 4.3 Genèse 15.6; Galat 3.6

⁴ Mepie e penem wo pace céiu apulie, ke a mwani na e hegi, ke time uce a âpipati, kehe te a cuhieng ne ha a penem den. ^{5,6} Kehe icehi ana time uce piwien ne ko pa apulie na nimen me wâé nang ne he pwahamii Padué, be te tice penem celi jan me e pwo. Kehe te ju a céihi ten cehi ne ko Padué. É mu ko a céihi ten, ke wo Padué, ke e pwo me e mwomwon ne he pwahamiin.

Wo pa daame *Davita, ke e pwonyebi ha a pipwodéén de ni apulie na lé wonaa, ke e pii pie:

^{7†} *Adéi ni apulie na e pétaabwon
ni ta pwo telé wo Padué,
ke e pineuhi ni huô telé na ta.

⁸ Adéi nina time e uce piniimihi
ni ta pwo telé wo Padaame. Psaume 32.1–2

Time uce a tegoop @ ana e pwo me wâé genye

⁹ A pipwodéén [na e pii wo Davita] ke he te a de ni *Juif cehi? Ûhu! Te a de ati ni bele. Be li e caa mi pii pie: *E céihi ne ko Padué wo Abérama, ke é mu ko a céihi ten, ke wo Padué, ke e pwo me pa apulie na e mwomwon ne he pwahamiin.*

Genèse 15.6

¹⁰ Kona he éniile celi wo Padué, ke e pwo me e mwomwon wo Abérama, ne he pwahamiin? Wieli é alecehe a *tegoop ten? Ûhu, time uce é alecehen, kehe te é ânebun. ^{11††} Be wo Padué, ke e te pwo me e mwomwon ne he pwahamiin, he mwo te time uce pwo a tegoop ten, mu ko a céihi ten. Ke é alecehen, ke e hegi a inen ko a tegoop ten.

Ke me wonaa, ke e â pa caa te ati nina lé céihi ne ko Padué, na time uce tegoop jélé. Ke wo lépwonaa ati, ke wo Padué, ke e caa pwo me ni apulie na lé mwomwon ne he pwahamiin. ¹² Ke te pa caa mwo te lépwona tegoop jélé [wo lépwo Juif] hemepie lé céihi pwohewieng. Be weeng, ke e céihi ne ko Padué, ânebuhe a tegoop ten.

A piapwo te Padué ne te ni acéihi

^{13†} E pii te Abérama me ni piebehieng wo Padué pie: «É bo ne tewé a bwohemwo ati.» Time uce é mu ko ana e piténedehi ni patén wo Abérama. Kehe e wonaa ten wo Padué, be e caa pwo me e mwomwon ko a céihi ten. ^{14††} Be hemepie a adéihi naa, ke me a de nina lé piténedehi ni *patén de Moosé, ke wieli o te piticenaado ne ko a céihi, me ali e pii wo Padué.

^{15††} Ûhu! Ni patén, ke e te ju pébé cehi a kuhinaado [te lépwona lé mulie ne he ni patén. Be pwocoon me lé âcehin ati]. Be hemepie te tice patén, ke wieli o te tice bwopwonen me nye caada ni patén.

^{16†††} A adéihi na e pii [wo Padué] ke e âbé mu ko a *pipwoééhe tice ja kon den, wonaa mu ko a céihi te

† 4.7–8 Psaume 32.1–2 †† 4.11 Genèse 17.10–11 † 4.13 Genèse 17.4–6, 22.17–18; Galat 3.29 †† 4.14 Galat 3.18 †† 4.15 Roma 3.20, 5.13 ††† 4.16 Galat 3.7

Abérama. Ke lé â mu hen ne ni piebehieng. Ke time uce a de lépwonaa cehi na lé âcehi ni patén; kehe te a de ati nina lé céihi ne ko Padué, pwohewii Abérama.

Ke e â caa tenye ati, ^{17†††} pwohewii ana e pii ten [wo Padué] ne he ni tii iitihi pie: *É pwo me wogo pa caa te ni bele na hiwon.*

Genèse 17.5

E caa tenye wo Abérama, be e céihi ne ko Padué. [Be e temehi pie, e bo pacuwohi a *piapwo ten ânebun.] Be weeng na e pamulipi mwo nina lé caa mele, ke weeng mwo, na e ne ana mwo coho na mwo time genye uce téele tooli ne éni pwo bwohemwo.

^{18§} Éa, e te mu ucéihi wo Abérama ali e pii ten wo Padué, ke e te uca. Be e te céihi ne ko Padué, he li e pii ten pie: *O te junihe hiwon ni piebehiko.*

Genèse 15.5

É mu ko anaa, na e â caa te ni bele na hiwon.

Genèse 17.5

¹⁹ Ke mang a céihi ten. Kehe icehi ana a naado na pwocoon, be e o caa pwo 100 ko ni jo hen, ke caa e mwonu me e mele. Ke wo Sara, é mwoden, ke caa time uce jan me pwo naîn. ²⁰ Kehe icehi ana time uce pinekepé ne ten ko a piapwo te Padué. Ke e te pipamwouieng ko a céihi ten, ke e te pipaunu Padué. ²¹ Be e te temehi pie, te junihe pwojunuu Padué, me e pacuwohi ali e caa mi pii ten. ^{22§†} Ke weengaa kuti, na wo Padué, ke e pwo me pa apulie na e mwomwon ne he pwahamiin.

Genèse 15.6

A pwooti me denye mwo

²³ Ni pwooti naa, ke time uce ni de Abérama cehi. ^{24-25§††} Kehe te ni pwooti me denye mwo. Be e te muko alihi ni céihi tenye wo Padué, ke e bo hegikenye. Weeng na e ne Iésu, Padaame henye, beme e mele ne ko ni ta pwo tenye. Ke e pwo me e mulie cemwo mu ha amele, beme e pwo me wogenye ni apulie na nye mwomwon ne he pwahamiin.

A péém ha awiemenye me Padué

5 Wo Padué, ke e pwo me wogenye ni apulie na mwomwon genye ko ni céihi tenye. Ke é jena, ke genye mu ha a péém me Padué, na e pwaadeniini bé wo Padaame henye, Iésu Kériso. ² É mu ko a céihi tenye ne kon, ke caa jan me nye too Padué, be e pwaadeniinye wo Iésu. Ke genye caa hegi a *pipwoééhe tice ja kon den, ke genye caa mulie hen jena. Ke genye caa pipwodéén, be genye caa *cumang ne ha a céihi tenye, pie, genye o hegi a cemenye: a bwo mu tenye pele Padué, ne ha a bwo ubwo na a wâé ten §†.

††† 4.17 Genèse 17.5 § 4.18–19 Genèse 15.5, 17.17 §† 4.22 Genèse 15.6 §†† 4.25 Ésaïe 53.4–5 §† Grek: Be é mu kon na tehi

³ †A céiu mwo, ke genye pipwodéén ne he ni picani tenye, be genye temehi pie, e pwo beme nye *ucéihi ne ha a céihi. ⁴ Ke heme nye wonaa a bwo ucéihi nen, ke genye cumang ne he ni tacebwén. Ke me genye cumang, ke o piubwo da a céihi tenye, heme genye ucéihi [a bwopiinen ânebun de Padué].

⁵ Ke mang a céihi tenye ne kon, be time e bo uce patupwokenye mwo wo Padué. Be caa tidi ni pwonimenye a pipwoééhe ten na te junihe ubwo, na e pipwaadeniin bé na a *Jenen Iitihi na e caa ne tenye.

E mele me denye he mwo ta genye

⁶ He mwo te tice niihenye, ke wo Kériso, ke e caa mele me denye, wogenye ni apulie na ta genye, ha a benaamwon na e caa te pacuwohi wo Padué.

⁷ Caa te junihe pwocoon me nye mele me de pa apulie na mwomwon a mulihen. Ke meniing pie, o pwo ace niihenye, me nye mele me de pace apulie celi te junihe wâé nang. ⁸ ††Kehe icehi ana e mele me denye wo Kériso, he mwo ni apulie na ta genye. É mu ko anaa, na wo Padué, ke e habwii a bwo eânimen denye.

⁹ †Ke é jenea ni, ke e caa pwo me nye *mwomwon ne he pwahamiin, ko a cewéhe Kériso. Ke me e pwo a naado na ubwo na wonaa, ke e bo celuimikenye koja a kuhinaado [ha a Tan na e bo tauti ni apulie hen wo Padué].

¹⁰ Be é he mwo pita genye me Padué, ke e ne a péém ne hadeniinye me weeng, ko a mele te pa Naîn. Ke me e wonaa tenye he mwo ta genye, ke é jenea ni, [he genye caa béén] ke [nye temehi pie] e bo te celuimikenye ko a bwo mulie cemwo te pa Naîn. ¹¹ Ke genye pipwodéén, me pipaunueng ko Padaame henye Iésu Kériso, na e caa ne a péém naa.

Adamu me Iésu Kériso

¹² ††[Weengi ana e tuie]: E caa tuie ne pwo bwohemwo a Ta †, watihen wo pa apulie na te céiu nang, na wo *Adamu. Ke a Ta, ke e pwo me nye mele, wogenye ati ni apulie. Be é mu kon na nye tai pwo nina ta, ke genye o tai mele.

¹³ †††Be caa e éni pwo bwohemwo a Ta, ânebuhe a bwo ne te *Moosé ni patén de Padué. Kehe icehi ana he mwo te tice patén, ke time genye uce pinenimenye ne ko ni ta na nye pwo. ¹⁴ Be wo Adamu, ke e pwo ana e paciitihini kon wo Padué. Ke tabuhi ha a benaamwon de Adamu, tehene nge ko Moosé, ke te junihe pwo ni-

ne tenye a pipwoééhe tice ja kon naa, na genye cumang ne hen. Ke genye pipwodéén ne ha a céihi ko a wâé te Padué. † 5.3 Cang 1.2–3; 1 Pétéru 1.5–7 †† 5.8 Ioane 3.16; 1 Ioane 4.10 † 5.9 Roma 1.18, 2.5 †† 5.12 Genèse 3.6; Roma 6.23 †† A Ta—Le péché, le mal. A ta na e mu he ni pwonime ati ni apulie, ke e cinelé me lé pwo nina ta. É ne he ni pwahamii tii 5–8, ke e cihe wo Paulo ko a Ta pwohewi-in hemepe pa apulie. ††† 5.13 Roma 4.15

ihe a mele ne ko ni apulie. Ke te piwien ne kolé, heme time lé uce pwo celi ta, pwohewii ana e pwo wo Adamu.

Ke wo Adamu, ke e déme pana e bo tuie, [wo Iésu Kériso]. ^{15–16} Kehe icehi ana time uce piwielu. Be a ta na e pwo wo Adamu ††, ke te junihe ité koja a âpipati na e ne wo Padué, na e pwaadeniin bé wo Iésu Kériso. Be é mu ko a ta pwo te Adamu, ke lé tai mele ati ne ni apulie. Kehe é mu ko ana e pwo wo Kériso, ke lé tai hegi a *adéihi na e ne wo Padué, ne ha a pipwoééhe tice ja kon den.

Be a ta na e pwo wo Adamu, ke e pébé a tautinaado, me a kuhinaado. Ke a âpipati na e ne wo Padué, ke e pébé a bwo tuwokenye mu ha a ta, wogenye ni apulie na hiwon genye. Te piwien, heme te junihe hiwon ni ta pwo tenye. Be te junihe pwojunuu ni pipwoééhe tice ja kon de Padué koja a ta na e pwo wo Adamu.

¹⁷ Be é mu ko a ta na e pwo wo pa apulie na te céiu nang, wo Adamu, ke e piwéden koja ati ni apulie na a mele. Kehe icehi ana wo Padué, ke e ne tenye a *adéihi ten, na e pwaadeniin bé wo pa apulie na te céiu nang, wo Iésu Kériso. Ke e pwo me [pwohewiin heme time nye mu uce téele pwo celi ta, beme] wogenye ni apulie, na nye mwomwon ne he pwahamiin. Ke e pwo me nye piwéden, ne ha *a ju mulip.

¹⁸ †[É pii mwo pie]: É mu ko a huô na ta na e pwo wo pa apulie na te céiu nang, ke tai tauti ati ni apulie, ke pwocuhinaado telé. Kehe é mu ko a huô na wâé na e pwo wo pa apulie na te céiu nang, ke wo Padué, ke e tuwo ati ni apulie mu ha a ta, beme lé mulie. Ke e pwo me ni apulie na lé mwomwon ne he pwahamiin.

¹⁹ ††Be wo pa apulie na te céiu nang, wo Adamu, ke time e uce piténede Padué. Ke é mu ko anaa kuti, ke lé caa pwo nina ta ati ne ni apulie. Kehe wo pa apulie na te céiu nang, wo Iésu Kériso, ke e te piténede Padué. Ke é mu ko anaa, na wo Padué, ke e pwo me ni apulie na lé mwomwon ne he pwahamiin.

Piwéden a pipwoééhe te Padué

²⁰ É he e tehenebé ni patén, ke piubwo da a Ta. Kehe icehi ana te junihe ubwo kaaole a adéihi te Padué.

²¹ ††É he ni benaamwon ânebun, ke e piwéden a Ta, ke e pébé a mele. Ke é jenea ni, ke e piwéden a pipwoééhe tice ja kon de Padué. Ke e pébé céiikenye a péém, me a mwomwon, na e pwaadeniin bé wo Iésu Kériso, Padaame henye. Ke etenye a *mulie dieli mwo ne pele Padué.

††† Wo Adamu—Grek: Wo pa apulie na te céiu nang. § 5.18 1 Korénit 15.22 †† 5.19 Ésaie 53.11 ††† 5.21 Roma 6.23

a mulihenye na mwo coho

(Pwahamii tii: 6—9)

Me puukenye, ke nye mulie cemwo me Kériso

6 Ade aceli genye o pii? Kona genye o mwo tee cuwo ko pwo nina ta, beme wo Padué, ke me e bo habwii tenye a *pipwoééhe tice ja kon den? ² Ûhu! Genye nemwo pwo nina wonaa! Be caa te tice junuu a Ta ne konye †. Ke é ko ade na nye mwo te cuwo ko pwo ana ta?

³⁴ †† Be géé caa te temehi ehi pie, é mu ko a bwo puukenye ko a tabe, ke caa céiu genye me Kériso Iésu. A bwopiinen pie, he li puukenye, ke pwohewiin heme nye mele, ke neduwokenye me weeng. Kehe icehi ana ubwo *a wâé te Padué Caa, me a junuun. Be e pamulipi Kériso mu ha amele, ke o wogenye mwo, ke nye o mulie ha a mulie na mwo coho.

A mulihenye me de Padué

⁵ Be caa céiu genye me weeng ko a bwo mele tenye. Ke o te céiu genye mwo me weeng ne ha a mulie cemwo tenye mu ha amele. ⁶ †† Wâé heme géé temehi ehi jena pie: A mulihenye ânebun, ke e caa mele ne ko a *kuricé me Kériso. Ke e caa pwo me tieden a junuu a Ta ††, na e mu he ni pwonimenye. Ke caa time genye uce ni *apenem tice ja kon de a Ta. ⁷ Be wo pana e mele, ke caa tuwoeng koja a junuu a Ta.

⁸ Heme nye mele me Kériso, ke genye céihi mwo pie, nye o mulie cemwo me weeng. ⁹ Be nye caa temehi pie, é he e mulie cemwo mu ha amele wo Kériso, ke time e bo uce mele mwo. Be a mele, ke caa tice niihen ne kon. ¹⁰ Be é he e mele wo Kériso, ke e caa pé a junuu a Ta †††, dieli mwo. Ke é jena, ke e mulie ha a mulihen me de Padué.

¹¹ ††† Ke wogewé mwo, ke wâé heme géé temehi pie, pwohewiin heme géé caa mele, ke caa tice junuu a mele ne kowé. Ke géé mulie me de Padué, be caa céiu gewé me Kériso Iésu.

¹² † Ke wâé heme géé mulie pwohewiin heme te tice junuu a Ta ne he ni ééwé na e bo mele ha ace céiu tan. Ke géé nemwo pitenedehi nina te nimewé kon na ta.

¹³ †† Geé nemwo ne ce béé duaan ne ko ni ééwé me bépwo na a Ta. Kehe géé pinekewé te Padué, beme géé pipwoeabwé ten, be wogewé ni apulie na géé caa mulie cemwo mu ha amele. ¹⁴ ††† Be caa time uce ni

† Caa te tice junuu a Ta ne konye—Grek: Genye mele ne ko a Ta.
†† 6.3 Galat 3.27† 6.4 Kolosé 2.12†† 6.6 Galat 5.24†† A Ta—Péché. Omehi note ††† E caa pé a junuu a Ta—Grek: E mele ne ko a Ta. ††† 6.11 2 Korénit 5.15; Galat 2.19 § 6.12 Genèse 4.7§† 6.13 Roma 12.1§†† 6.14 1 Ioane 3.6

patén nina lé pihuôkewé, kehe caa te a pipwoééhe tice ja kon de Padué. É mu ko anaa, ke géé nemwo pwo me e pihuôkewé na a Ta.

Wogenye ni eabwé te Padué

¹⁵ Genye nemwo pii pie: «Genye pwo ana ta, be e pi-huôkenye na a pipwoééhe tice ja kon de Padué, kehe caa time uce ni patén!» ¹⁶ †† Ûhu! Kona time géé uce temehi pie, hemepie géé pinekewé te pace céiu apulie, beme géé apenem tice ja kon den, ke te weeng na géé pitenedeeng. Hemepie géé pipwoeabwé te a Ta, ai hemepie géé pipwoeabwé te Padué. Mepie géé pitenedehi a Ta, ke géé o mele, ke me géé pitenede Padué, ke e o pwo me wogewé ni apulie na géé *mwomwon ne he pwahamiin.

¹⁷ Nye tai pipwo-olé te Padué henye. Be é ânebun, ke géé pipwoeabwé te a Ta. Ke é jena ni, ke géé caa pitenedehi ni pwooti na géé hegi he ni ju pwonimewé.

¹⁸ Ke é jena ni, ke caa tuwokewé koja a Ta. Ke géé caa pipwoeabwé te [Padué, beme géé pwo] ana mwomwon, ke wâé.

¹⁹ É te temehi pie, te junihe pwocoon ne kowé, me géé temehi ehi. A watihen me é pwo-ocine ko a mulihenye ati he ni tan ††. Ânebun, ke pwohewiin heme wogewé ni apenem tice ja kon de a Ta. Ke géé patupwo ati ni ééwé, beme géé mulie ha a mulie na ta, ke mwiihi. Ke é jena ni, ke géé caa penem [de Padué]. Ke wâé heme géé patupwo ati ni ééwé, beme géé pipwoeabwé ten, ke me géé pwo ana wâé. Ke géé pipwocilekewé, [beme wâé ten gewé].

²⁰ É he géé pipwoeabwé te a Ta, ke time géé uce picuwokowé me géé âcehi ni pihuô te Padué †. ²¹ He ade ace utehe a penem dewé? Tanim gewé heme géé niimihi jena ni! Be ni naado naa, ke e pébé a mele.

²² É jena ni, ke caa tuwokewé koja a Ta, ke géé caa â pipwoeabwé te Padué. Ke a utehe a penem dewé, ke me wâé te Padué a mulihewé. Ke é mu ko anaa, ke e mu kowé a *mulie dieli mwo, ne pele Padué. ²³ †† Be a cuhi a Ta, ke a mele. Kehe wo Padué, ke e te ju ne tenye me tice ja ko a mulie dieli mwo, na e pwaadeniin bé wo Kériso Iésu, Padaame henye.

Tuwokenye koja ni patén

7 Lépwo bééng ne he nii Kériso, é niimihi pie, me géé temehi a bwomune ni patén. Be e pi-huôkenye ne ni patén, heme nye mwo te mulie.

² Pwohewii ê toomwo na e caa piaten, be caa cieng ne ko pa aiu hen, heme e mwo te mulie wo panaa. Kehe mepie e caa mele, ke caa te jan me e piaten mwo

†† 6.16 Ioane 8.34; 2 Pétéru 2.19§†† 1re & 2e phrases—Grek: É cihe ha a bwomu tenye ni apulie, wonaa mu ko a bwo tice niihewé ne ha a éé apulie. † Ni pihuô te Padué—Grek: Nina mwomwon.

³ Ke hemepie e â mwode pace céiu aiu, heme e mwo teko mulie wo pa aiu hen, ke genye pii pie e bune aiu [be time e uce piténedehi ni patén]. Kehe icehi ana hemepie e mu pele pace céiu aiu, alecehe a bwo mele te pa aiu hen, ke caa time e uce bune aiu, ke caa time e uce caada ni patén.

⁴ †Ke wogewé mwo, wogewé ni acéihi bééng, ke te piwien ne mwo konye. Be caa time e uce ciekenye mwo ne ni patén ††. Be caa wogenye ni apulie te Kériso, pana e caa mele me denye ‡, ke e mulie cemwo mu ha amele. Ke é mu ko anaa, ke wâé heme a mulihenye, ke me e ne ce acehin celi wâé, me de Padué.

⁵ Be é ânebun, he genye mwo te mulie cehi nina nimenye kon na ta, ke ni patén, ke e pwo me piubwo da ni bwo niimihinaado na ta ne he ni éénye. Ke é mu ko anaa, na genye o mele. ⁶ ††Kehe icehi ana é jena, [ke wo Padué] ke e caa tuwokenye koja ni patén na e pwocuhinaado tenye ‡‡. Ke genye caa pipwoeabwé te Padué, ne ha a bwomunen na mwo coho. Be genye piténede a *Jenen Iitih, kehe time uce ni *patén de Moosé.

Nye âde a ta na e konye

⁷ ††Kona nye pii pie, ni patén, ke ta? Ûhu! Be te é mu ko ni patén, na é temehi ana ta. Be mepie tice patén ††, ke time uce jan me é temehi pie, ni bwo niimihinaado tong, ke ta. ⁸ [É o cihe ko a Ta, pwohewiin heme pace céiu apulie]: A Ta, ke e hane kong ace bwopwonen, ne ko ni patén, beme e pamulipihi ati ni muko pétaapwo naado na ta, na nimung kon. Ke e ne ha a pwonimung, ni bwo niimihinaado na ta. Be mepie tice patén, ke te tice junuu a Ta §.

⁹ É he mwo te tice patén, ke é te mulie. Kehe me e âbé ni patén, ke a Ta na e mulie kong, ¹⁰ ke e pébé a mele. [Geé alihi pie] e ne a patén den [wo Padué] beme é mulie kon, kehe icehi ana a patén naa, ke e pwo me é mele. ¹¹ ††Be a Ta, ke e pé a patén, beme e patiedenié, ke e pwo me é mele.

¹² ††Mepwo é ne ko ni patén, ke a naado na iitih, [be e âbé mu ko Padué]. Ke ni cuwo nahi huô, na e mu he ni patén, ke mwomwon, ke wâé me denye. ¹³ Kona a naado na wâé, ke e o pwo me é mele? Ûhu, time uce wonaa. Be e pé ana wâé na a Ta, beme e pwo me é mele. Ke, me e pwo anaa, ke e habwii pie, te junihe ta nang. [Mepwo é ne ko a huô, ke e paciitih konye, me

§† 6.23 Roma 5.12,15 §†† Caa te jan me e piate mwo—Grek: Caa tuwoeng koja a patén na e cieeng ne ko pa aiu hen. † 7.4 Roma 6.2,11 †† Be caa time e uce ciekenye mwo ne ni patén—Grek: Geé mele ne ko ni patén. ‡ Pana e caa mele me denye—ai Ke caa céiu genye ne ha a één, a puco te ni acéihi ati. †† 7.6 Roma 8.2, 6.4 †† Na e pwocuhinaado tenye—Grek: Be genye mele ne ko ni patén na e pwo me imwikenye. ††† 7.7 Exode 20.17; Deutéronome 5.21 ††† Be mepie tice patén—Grek: É hemepie te tice patén celi e pii pie: «Go nemwo pwo me gaale a pwonimem ko ace céiu naado.» § Te tice junuu a Ta—E caa mele a Ta. Omehi mwo note §† 7.11 Genèse 3.13 §†† 7.12 1 Timoté 1.8

nye nemwo pwo ana ta.] Ke a Ta, ke e pé a huô, beme nye junihe pwo ana ta, kojan ânebun §††

A pa na junihe pwo niihen

¹⁴ Genye caa te temehi ehi pie, e âbé mu ko Padué ne ni patén. Kehe icehi ana woéo, ke pa apulie na tice ni-ihung. Ke é caa â *apenem tice ja kon de a Ta. ¹⁵⁻¹⁶ §††Ke time é uce temehi ehi aceli é pwo. Be time é uce pwo ana nimung kon, kehe é pwo ana time uce nimung me é pwo. Ke é mulang, he na é bwo temehi pie, ni patén, ke a naado na wâé. ¹⁷ Be time uce woéo na é pwo anaa, kehe a Ta na e kong. ¹⁸ É te temehi pie, time e uce mu kong a wâé, mu ko ana woéo, ke pa apulie na tice nihung. Be é heme nimung me é pwo ana wâé, ke pwocoon.

¹⁹⁻²⁰ Éa, time é uce pwo ana wâé na nimung kon. Kehe é pwo ana ta, na time uce nimung kon. Ke me wonaa, ke [pwohewiin heme] time uce woéo na é pwo anaa, kehe a Ta na e kong.

Woo na e celumié?o

²¹ É te temehi pie, pwo a 'patén' [na e kong]. Weengi: Me nimung me é pwo ana wâé, ke time uce jan. Ke é te cuwo ko pwo ana ta. ²² Geé alihi pie, é ne ha a ju pwonimung, ke wâé tong a patén de Padué. ²³ ††Kehe icehi ana pwo a céiu 'patén' na e ha a ééng: a patén ko a Ta. Ke lu pipwopa me ana nimung kon. Ke a patén naa, ke pwohewiin heme e pééo, me e neéo he karépu. ²⁴ Au, mwolihi! O woo celi e o celumié o koja a pwonimung na ta §†, na e o pééo nge ha amele? ²⁵ ††Te icehi Padué na e pwaadeniin bé wo Padaame Iésu Kériso §††! Wâé heme nye picedieng!

[Weengi a bwopiine ana é pii]: Nimung me é piténedehi a patén de Padué, kehe icehi ana tice ni-ihung, ke é tee piténedehi a patén ko a Ta.

E tuwokenye koja a ta wo Padué

8 Nina lé mu ko Kériso Iésu, ke te tice tautinaado, ke kuhinaado telé §§§. ² Be, me woéo ko Kériso Iésu, ke e ne tong a mulip na a *Jenen Iitih. Ke e caa â patén dong na mwo coho, ke e tuwoéo koja a patén na e pééo nge ha a Ta ¹⁸, ke a mele ¹⁹.

³ Mepwo ni *patén de Moosé, ke pwocoon me e tuwokenye, be tice niihen [me e pitaatéhi ni pwonimene na ta]. Kehe icehi ana e caa tuwokenye wo

§† Dernière phrase—Grek: É mu ko a patén, ke e pihabwieng a Ta pie, caa te junihe ta wéden. §†† 7.15 Galat 5.17 §† 7.23 Galat 5.17; 1 Pétérú 2.11 §† Pwonimung na ta—Grek: Éé apulie. §†† 7.25 1 Korénit 15.57 §†† 1re, 2e phrase—Grek: Kehe icehi ana [genye] pipwo-olé te Padué ko Iésu Kériso, Padaame henye. §§§ Ni béé tii iitih he pwo grek, ke e hen ni pwooti ce: Be lé mulie cehi a Jenen Iitih, kehe time uce âcehi ana nimelé kon na ta. ¹⁸ A Ta—Omehi a note ¹⁹ (Niide a tii)—Grek: Be a patén de a Jenen [Iitih] ke a mulie na e ko Iésu Kériso, ke e caa tuwoéo koja a patén ko a ta, ke a mele.

Padué. Be e caa nebé pa Naîn beme pa apulie pwohewiikenye, wogenye nina ta genye, beme e tu- wokenye koja a Ta. Ke e caa pwo me tieden a Ta naa †, na e pihuôhi a éé apulie, ††beme nye mulie cehi a patén den na mwomwon. Be caa time nye uce mulie cehi nina nimenye kon na ta, kehe genye mulie ko a Jenen Iitihhi.

⁵⁶ Be wo lépwona lé âcehi nina nimelé kon na ta, ke lé te piténédehi ni naado naa. Ke lé â benihi a mele. Kehe wo lépwona lé âcehi a Jenen Iitihhi, ke lé te piténédeeng. Ke pwo ne telé *a ju mulip me a péém.

⁷⁸ Heme nye âcehi nina nimenye kon na ta, ke o te pwocoon me nye piténédehi ni patén de Padué, ke pwocoon me wâé genye ne he pwahamiin. Ke genye âdeeng, me lépwona lé téétieng.

Nye âcehi a Jenen Iitihhi

⁹ †Kehe icehi ana wogewé, ke caa time geé uce âcehi ni bwo niimihinaado tewé naa. Be geé caa piténédehi a Jenen Iitihhi te Padué, na caa e kowé. Wo pa apulie na time uce e kon a Jenen Iitihhi te Kériso, ke time uce pa apulie te Kériso.

¹⁰ ††Kehe icehi ana wogewé, ke e kowé wo Kériso. Ke me e bo mele a ééwé watihen a Ta, ke a juuju mwo pie, [wo Padué, ke e pwo me pwohewiin heme time geé mu uce pwo celi ta, beme] wogewé ni apulie na mwomwon gewé ne he pwahamiin. Ke e pwo me geé mulie na a Jenen Iitihhi ten ††. ¹¹ Éa, e bo mele a ééwé, kehe icehi ana heme e kowé a Jenen Iitihhi, ke e bo pamulipikewé wo Padué, pwohewii a bwo pamulipi Kériso Iésu mu ha ame.

E pwo me wogenye ni naî Padué

¹² É mu ko anaa, wogewé lépwo bééng ne he nii Kériso, be pwohewiin heme pwo kérédi tenye. Be [heme nye mulie ha a Jenen Iitihhi] ke time genye uce mulie cehi nina nimenye kon na ta. ¹³ †††Be, me geé mulie cehi ninaa, ke geé o mele [dieli mwo]. Kehe icehi ana hemepie geé pwo me e mele ni bwo niimihinaado naa, mu ko a Jenen Iitihhi, ke e o mu kowé a ju mulip. ¹⁴ Be wo lépwona lé mulie cehi a Jenen Iitihhi te Padué, ke lépwo naî Padué.

¹⁵ †††Ke, me nye hegi a Jenen Iitihhi, ke time e uce ciekenye me e pwo me mwotikenye. Kehe e pwo me wogenye ni naî Padué. Ke e picani tenye me nye toii da cíii Padué, me pii ten pie: «Pa Caa tong!»

† E caa pwo me tieden a Ta naa—Grek: E tauti a Ta naa, ke e pwocuhinaado ten. (Condamner). †† 8.4 Galat 5.16,25† 8.9 1 Korénit 3.16, 12.3†† 8.10 Galat 2.20†† Grek: Ke hemepie e mu kowé wo Kériso, ke a juuju pie, e o mele a éé apulie koja a Ta, kehe icehi ana a Jenen Iitihhi, ke [e ne] a mulie, mu ko a bwo mwomwon [Padué]. ††† 8.13 Galat 6.8; Kolosé 3.5††† 8.15 Maréko 14.36; 2 Timoté 1.7§ 8.15–17 Galat 4.5–7; Pii Beetihhi 21.7

¹⁶ ††Ke e *pajuujuhi ne te a jenenye na a Jenen Iitihhi pie, wogenye ni naî Padué †††. ¹⁷ Ke me genye naî Padué, ke genye o hegi a *adéihhi na e caa pii ânebun pie, e bo ne te a bele ten. Ke genye bo tai hegi me Kériso. Be, me nye mu he ni picani pwohewieng, ke genye hegi mwo *a wâé pwohewieng.

A adéihhi tenye na mwo e lang

¹⁸ É niimihhi pie, ni picani tenye jena, ke te junihe wahin koja a wâé na ubwo na e bo ne tenye wo Padué. ¹⁹ Be ati ni naado na e caa tabuhi † [wo Padué] ke lé ucéihhi ha a picani ace benaamwon celi e bo habwii a bwo ubwo na a wâé te ni naî wo Padué.

²⁰⁻²¹ †††Be ati nina e tabuhi wo Padué, ke pwocoon me lé pwo me junihe wâé, be élé ha apwohi ††. Kehe lé ucéihhi a tan na e bo tai tuwolé hen, mu he ni penem tice ja kon, na e pwo me nyaale ke tépu jélé. Ke lé bo tai mu ha a wâé †† te Padué me ni naî.

²² Ke genye tai temehi pie, ati ni naado, ke lé cewé ko ni bwo picani telé, pwohewii ê toomwo na e piâbeele ewa. ²³ †††Ke wogenye mwo, ni naî Padué, ke genye ko cewé he ni pwonimenye, ucéihhi a benaamwon na e bobo tuwokenye wo Padué. Ke genye bo pimu ibu me weeng, dieli mwo †††. Kehe é jena, ke e caa ne tenye a Jenen Iitihhi, na a bécéiuhe âpipati na e caa pii ânebun wo Padué pie, me e bo ne tenye.

²⁴ Be e caa celuimikenye, beme nye o hegi ati ni adéihhi naa, na nye mwo ko ucéihhi †††. Ke é heme nye caa alihi ana genye mwomwohi, ke a céihhi tenye, ke time uce a ju céihhi. Be time genye uce *ucéihhi ne ha a céihhi ana caa etenye. ²⁵ Kehe me genye céihhi ne ko ana time genye uce alihi, ke genye cumang ne ha a bwo piuca tenye.

E picani tenye a Jenen Iitihhi

²⁶ A céiu mwo, ke e âbé picani tenye na a Jenen Iitihhi, wogenye nina pitice niihenye [ke wahin ni céihhi tenye]. Be time genye uce temehi ehi ace bwo pwoiitihhi. Kehe e cewé ko pwoiitihhi me denye na a Jenen Iitihhi. Ke a pwopwoiitihhi ten, ke piwéden ati koja ni pwooti tenye. ²⁷ ¹⁸Be wo Padué, ke e te alihi ana e he pwonime pa apulie, ke e te temehi ana nime a Jenen Iitihhi me e ilehi. Be a Jenen Iitihhi, ke e pwoiitihhi cehi ana te nime Padué kon, me de ni apulie ten.

† 8.16 2 Korénit 1.22 ††† Ai, A Jenen Iitihhi, ke lu pajuujuhi me a jenenye pie genye caa naî Padué. †† Ati ni naado na e caa tabuhi—A bwohemwo me ati ni naado na e pwon, me ati a miiden me ni ceni. La création. ††† 8.20 Genèse 3.17–19 †† 1re phrase—Grek: Be ana e ne [pwo a bwohemwo wo Padué] ke e mu haahi ni pihuô te ni béé naado na piticenaado ne kon. †† Ke lé bo tai mu ha a wâé... ai O pwo ace ceme: a bwo mu telé ne ha a bwo ubwo na a wâé ten. ††† 8.23 2 Korénit 5.2–4 ††† Genye bo pimu ibu me weeng, dieli mwo—Grek: Genye o lépwo naî. (L'adoption). ††† 1re phrase—ai Be e caa celuimikenye, mu ko a céihhi tenye ne kon. 18 8.27 Psaume 139.1

²⁸ †Be genye temehi mwo pie: Ati ni naado ke lé tuie, beme béwâé genye, wogenye nina eânimenye te Padué, wogenye na e todekenye âcehi *a bwo niimihi-naado ten. ²⁹ ††Be e caa mi pipégalikenyé ânebun. Ke e caa mi pihuôhi ânebun pie, me genye pwohewii pa Naîn, pa cuwo lépwo âjjiénen na hiwon jélé.

³⁰ Be woélé na e te mi pipégaliilé ânebun wo Padué, ke e caa te todelé mwo. Ke woélé na e caa todelé, ke e pwo me lé *mwomwon ne he pwahamiin. Ke e bo pwo me lé mu pelen, ne ha a bwo ubwo na a wâé ten.

Te tice aceli e pipapiidenikenye koja a pipwoééhe te Padué

³¹ †He ade aceli genye o pii celi piwéden? Heme caa wogenye ibu me Padué, ke woo celi e o pwob-wonikenye [me piwéden kojakenye]? Te tice! ³² Be e caa te pawie pa ju Naîn [me e *âpwailo] me denye ati, ke time e uce celuimieng koja ni picani. Ke heme wonaa, ke kona woilu me pa Naîn, ke time lu uce ne tenye me piticenaado ne kon ati ni naado? Uhuu!

³³ ††Ke kona o woo celi e o pipé ne ko nina e caa pipégaliilé wo Padué? Te tice! Be te wo Padué, na e pwo me lé mwomwon ne he pwahamiin. ³⁴ Ke o woo celi e o tautilé me pwocuhinaado telé? Te tice! Be e caa mele me delé wo Kériso Iésu.

Ke a céiu mwo: Ke e caa mulie cemwo mu ha amele, ke caa e *pwo a jui Padué, [beme e pihuôhi ati ni naado] ke e pwoitihi me denye.

³⁵ Ke o ade mwo celi e o papiidenikenye koja a pipwoééhe te Kériso? Te tice! Time uce ni picani me téé, me ni bwo pinekepé tenye, me ni bwo pwotahinaado ne konye, me a menele, me ni bwo tice naamuunye, [me ni cunu] me ati nina abwobwo. Ke time uce a mele † mwo, celi o jan me e pineitéékenye koja a pipwoééhe te Kériso. ³⁶ ††Be caa te tii ne he ni tii iitihi pie:

*Wonaa mu kom,
me lé pwohuu teme,
ke lé taunukeme ati he ni tan.
Lé pwo me piticenaado ne kome,
pwohewii ni muto na lé péélé
nge ha a mwotaunuhi wota. Psaume 44.23*

³⁷ Kehe icehi ana é ati ne he nina e tuie ne kome, ke geme te junihe piwéden, watihen wo pana e caa pipwoééheme. ³⁸⁻³⁹ Be é te céihi pie, te tice aceli jan me e pineitéékenye koja a pipwoééhe na e habwii tenye wo Padué, ne ko Kériso Iésu, Padaame henye:

Time uce a mele,
time uce a mulip,
time uce ni *âcélo,
time uce ni duéé,

† 8.28 Éfeso 1.11 †† 8.29 Kolosé 1.18; Ébéru 1.6 † 8.31 Psaume 118.6 †† 8.33 Ésaie 50.8–9 †† A mele—Grek: A teua. ††† 8.36 Psaume 44.23

heme é jena, heme é meé,
heme ni pipwojunuun,
heme é jeda, heme é jeoté,
heme ati ni naado na e tabuhi,
ke te tice aceli jan
me e pineitéékenye
koja a pipwoééhe te Padué!

a bele isaraéla me ni béé bele

(Pwahamii tii: 9—12)

E é niimi ni béén wo Paulo

⁹ É pacihekewé jena, ha a ju pwonimung, ke a juu-ju ana é pii, kehe time é uce gele. Be te céiu gemu me Kériso, ke e pihuôhi a *pwonimung na a *Jenen Iitihi. Ke weeng na e *pajuujuhi nina é pii tewé: ² É jena, ke te junihe piwahin jo, ke téé a pwonimung ³ ††ko ni âjjiéning juif, a bele *Isaraéla. Be hemepie jan me é picani telé [me celuimilé] ke wieli me e o piapwoéo wo Padué, ke me e neitééo koja Kériso.

⁴ †Be e te pipégaliilé wo Padué, beme a bele ten, ke me lé naîn. Ke e caa te habwii telé a bwo ubwo na a wâé ten. Ke e *piapwo ne telé, ke e ne telé ni patén. Ke e ne telé mwo a pihuô, beme lé pwoitihi ten [ha a juu-ju]. Ke e ne telé a *adéihi na e caa te mi pii telé ânebun.

⁵ Be ni watihelé, ke ni apulie na pwonaado ne kolé ne he pwahamiin. Ke e wie mu kolé wo Kériso, beme pa apulie pwohewiikenye †. Wâé heme nye tai pipaunu Padué dieli mwo, na e daaité koja ati ni naado ††!

Lépwo ju naî Padué

⁶ Heme wonaa, ke kona genye o niimihi pie, time e o uce pacuwahi nina e pii ânebun wo Padué? Uhuu! E caa te pacuwahi, be a ju bele te Padué, ke te junihe ubwo koja a bele Isaraéla †.

⁷ ††A céiu mwo, ke time uce wo lépwona lé tai wie mu ko *Abérama, na tai lépwo ju naîn. Be e pii te Abérama pie: *Wo lépwo piebehiko, li é piilé, ke lé o bo pituie mu ko pa naîm Isaaka.*

Genèse 21.12

⁸ ††[Kehe te pwo mwo ni béé naî Abérama.] A bwopiinen pie, ni ju naî Padué, ke time uce nina lé tuie mu ko aceli nime pa apulie kon †, kehe wo lépwona lé tuie mu ko a bwopiinen ânebun de Padué. ⁹ †††Ke weengi ana e pii wo Padué, te Abérama [he li e piapwo ne

††† 9.3 Exode 32.32 † 9.4 Exode 9.4 †† Beme pa apulie pwohewiikenye—Grek: Ha a éé apulie. ††† Dernière phrase—ai [Wo Kériso] ke e nihe wéden koja ati ni naado, be weeng Padué, na pipaunueng dieli mwo. †† Grek: Kehe icehi ana a pwooti te Padué, ke time uce pitalupe. Be a bele Isaraéla, ke time uce ati lépwona lé piâbee mu ko Isaraéla. ††† 9.7 Genèse 21.12 †† 9.8 Galat 4.23

ten]: *É heme é bo âmwobé he na céiu jo, ha a benaam-won ce, ke wo Sara, ê mwodem, ke e bo picile pa cuwo nahi aiu.*

Genèse 18.10

¹⁰ [Ke e te cuwo, pwohewii a bwopiinen den. Ke mepwo é ne ko pa ewa aiu naa] ke wo Isaaka, pa watihe lépwo *Juif. Ke é alecehen, ke lu piaten me Rébéka, ke e picile lupwo naïn wo Rébéka †.

¹¹⁻¹³ †† *Ke e pii ten wo Padué pie, wo pa cuwon Ésaü, ke e bo pipwoeabwé te pa ciéen, Iakobo. Be caa te tii ne he ni tii iitihii pie: *É piwâé Iakobo koja Ésaü.*

Malachie 1.2–3

E te mi pii anaa, he mwo te time lu uce tuie wo lupwo péidu. Ke mwo te tice ta me wâé celi lu pwo. Ke e wonaa ko a bwo pipégali nen den wo Padué, beme e pacuwohi a bwo niimihi nen den. Be e te pipégali ni apulie, kehe time uce é mu ko ce penem delé.

Te wo Padué cehi na e pipégali

¹⁴ Kona genye pii pie, time e uce mwomwon wo Padué? Úhu! ¹⁵ ††Be e caa pii te *Moosé pie: *É o pipwoééhe paceli te nimung me é pipwoééhen, ke é o piwâé paceli te nimung me é piwâéeng.*

Exode 33.19

¹⁶ ††Be te wo Padué na e niimihi pie me e pwo ana wâé me denye. Kehe time uce é mu ko aceli te nimenye kon, me ce penem denye. ¹⁷ †††Caa te tii ne he ni tii iitihii pie, e pii wo Padué te Faraô, pa daame ne *Aigupito, pie: *Woéo pana é pwo me go daame, beme é habwii a junuung ne kom, ke me lé o temehi a niing, ati pwo a bwohemwo.*

Exode 9.16

¹⁸ Be hemepie nime Padué, ke e o pipwoééhe ni béén, ai e o pwo me mwoiu ni puni ni béén.

E pwo ana nimen kon

¹⁹ Wieli go o pii tong pie: “Hemepie wo Padué na e ne tenye me nye pwo ati ni huô tenye, ke kona é ko ade na e mwo cihe tenye mwo? Be time uce jan ne konye me genye pwo me mwoiu ni puninye ne kon!”

[Ke é hegi ne tem pie]: “Kona wogo ke woo, me go pwobwonieng?” ²⁰ †††Ke kona a naado na pwo, ke he e te pii te pana e pwo, pie: “É ko ade na go pwo me woni jo?”

Úhu! ²¹ †Be wo pa apwo ila pule, ke e o te pwo aceli te nimen kon ko a pule ten. Ke mepie te nimen, ke e o te pwo ko a pule naa, ace tam celi junihe wâé, me ace tam celi penem kon ati he ni tan.

‡ Mu ko aceli nime pa apulie kon—Grek: Mu ko a éé apulie.
 ††† 9.9 Genèse 18.14† Grek: Ke a céiu mwo, ke wo Rébéka, ke e picile [lupwo] naï Isaraéla, mu ko Isaaka, pa caa tenye. †† 9.12 Genèse 25.23 ‡ 9.13 Malachie 1.2–3 †† 9.15 Exode 33.19 †† 9.16 Éféso 2.8 ††† 9.17 Exode 9.16 ††† 9.20 Ésaie 29.16, 45.9 ‡ 9.21 Jérémie 18.6

²² Wonaa ne mwo ko Padué. Be mepie nimen, ke te jan me e habwii a okéé ten, me a junuun, me e tanahi ni apulie na ta jélé †. Kehe icehi ana e te junihe picani ne kolé. ²³ Ke nimen mwo me e pipwoééhe ni béén, beme e patemehi telé a bwo ubwo na a wâé ten. Be e caa mi pipégalié, beme lé hegi a wâé ten naa.

Time e uce tode lépwo Juif cehi

²⁴ Wogenye lépwo apulie naa! Time e uce todekenye cehi mu ha awieme lépwo Juif, be te é mu mwo ha awieme nina time uce ni Juif. ²⁵ †††Be e pii ne kolé, ne ha a tii te péroféta Osé, pie: *A bele na time uce a bele tong, ke é o caa pii kolé jena na ni, pie “a bele tong”. Ke a bele na time é uce pipwoééhen, ke é o caa pipwoééhen.*

Osé 2.25

²⁶ †††*Ânebun, ke é pii telé pie: “Time geé uce bele tong.” Ke é pii kolé jena na ni pie: “Wogewé ni naï Padué na e mulip.”*

Osé 2.1

²⁷ †††Mepwo é ne ko lépwo Juif, ke e toii da wo péroféta Isaia, pie: *Wo lépwo Isaraéla, ke o bo hiwon jélé, pwohewii ni won jeoté ticepwon. Kehe icehi ana o te ju a céiu duaan mu kolé na o *celuimi.*²⁸ Be wo Padaame, ke e epin ko a bwo tauti na a bwohemwo ati.

Ésaie 10.22–23

²⁹ †††Ke e te mi pii ânebun mwo wo Isaia, pie: *Wo Padué na te junihe pwojunuun ne ko ati ni naado, ke e te necu ni béé piebehikenyé, beme lé mulie. Be mepie time uce wonaa, ke o tai tiekenye, pwohewii lupwo pwomwo ubwo *Sodome me Gomore.*

Ésaie 1.9

Time lé uce céihi wo lépwo Juif

³⁰ He ade ace bwopiine ati ninaa? Be genye alihi pie, wo lépwona time uce lépwo Juif, ke time lé uce hane Padué. Kehe icehi ana me lé caa â céihi ne kon, ke e pwo me lé *mwomwon ne he pwahamiin.

³¹ Mepwo é ne ko lépwo apulie he a bele Isaraéla, ke lé hane ni patén, beme e pwo me lé mwomwon ne he pwahamii Padué. Kehe icehi ana time lé uce tooli.

³² †††Ke he é ko ade? Be lé hane me lé mwomwon, mu ko ni âpenem delé, kehe time uce é mu ko ace céihi telé [ne ko Padué]. Ke tacida mwodalé ne ko a péi na e pwo me nye tupwo. ³³ †††Be caa te tii ne he ni tii iitihii a pwooti te Padué, ce:

Go téne ani, go pa puapulie!

*É ne ha amu *Sion a péi*

na e pwo me lé tupwo ne ni apulie.

Kehe wo pana e céihi ne kon

ke time e o uce tupwo†††. *Ésaie 8.14; 28.16*

† Ni apulie na ta jélé—Grek: Ni apulie na wâé heme titéélé.
 ††† 9.25 Osé 2.25 ‡ 9.26 Osé 2.1 ††† 9.27 Ésaie 10.22–23 † 9.29 Ésaie 1.9 ‡ 9.32 Ésaie 8.14 ††† 9.33 Ésaie 28.16; 1 Pétéru 2.6 ††† Time e o uce tupwo—Grek: O time uce tanim nang.

10 Ni bééng acéihi, te junihe nimung me *celuimi lépwo *Juif, a bele tong. Weengaa a pwoopwoiiti-hi tong ne te Padué. ²⁻³ Be é temehi ehi pie, nimelé me lé âcéi Padué. Kehe icehi ana time lé uce temehi a pwaadeni Padué, beme lé *mwomwon ne he pwa-hamiin. Ke lé te â he ni pwaadeniilé, be lé piwâgo [beme lé piténehehi ni *patén de Moosé].

⁴ Kehe icehi ana é jena ni, ke caa piticenaado ne ko ni patén, wonaa mu ko Kériso †. Be wo lépwona lé céihi ne kon, ke wo Padué, ke e tai pwo me lé mwomwon ne he pwahamiin.

E celuimi ati lépwona lé todeeng

⁵ ††Ânebun, ke a pwaaden me nye mwomwon ne he pwahamii Padué, ke me genye âcehi ni patén. Ke e pii ko ni patén wo Moosé, pie: *E ne a mulie te pana e piténehehi ati ni pihuô na e hen.*

Lévitique 18.5

⁶ †Kehe icehi ana é jena ni, ke genye mwomwon ne he pwahamii Padué, mu ko a céihi tenye [ne ko Kériso]. Ke time genye o uce pitahimwokenye pie: "Woo celi e o taa he miiden?" beme e neopé céiikenye [paceli me e celuimikenye. Be e caa te opé] wo Kériso. ⁷ Ke time genye o uce pitahimwokenye mwo pie. "O woo celi e o ole ha amele †?" beme pamulipi mwo Kériso. Be e caa taamwo mu ha awieme ni amele. ⁸ [Ke e pébé céiikenye a bwo celuimikenye.] Kehe wâé cehi heme nye céihi ne kon.

Weengaa a pwooti na geme pipatemehi. Be e caa te pii mwo wo Moosé ne he ni tii iitih pie: *E mu mwonuko a pwooti. Be e mu pwom, ke e ha a pwon-imem.*

Deutéronome 30.14

⁹ Be, heme go pii beetihi ko a pwom pie, wo Iésu Kériso, ke Padaame, ke heme go céihi ha a ju pwon-imem pie, e pamulipieng mwo wo Padué mu ha amele, ke o celuimiko. ¹⁰ Be hemepie go te junihe céihi ne kon, me pii beetieng, ke e o celuimiko wo Padué, ke e o pwo me go mwomwon ne he pwahamiin †.

¹¹ ††Be caa te tii ne he ni tii iitih pie: *Wo pana e céihi ne kon, ke time e o uce tupwo††.*

Ésaie 28.16

¹² †Ke [é ne ha a pwooti naa, ke] te tice pipuwohe lépwo Juif, me ni béén na time lé uce Juif. Be te céiu Padaame helé ati, na e ne a wâé ten, me de nina lé todeeng. ¹³ ††Be pwohewii ana caa tii mwo ne he ni tii iitih pie: *O celuimi nina lé tode Padaame.*

Joël 3.5

† 1re phrase—Grek: *E pacuwohi ni patén wo Kériso.* †† 10.5 *Lévitique 18.5* † 10.6–9 *Deutéronome 30.12–14* †† Amele—Grek: *Pwon na tice anebwén kon, Oolaa (‘Abîme’).* Omehi Pii Beetihi 9. †† Grek: *E o mwomwon wo pana e céihi ne ha a pwonimen; ke o celuimi wo pana e pii beetihi ko a pwon.* ††† 10.11 *Ésaie 28.16* ††† Time e o uce tupwo—Grek: *O time uce tanim nang.* § 10.12 *Apostolo 15.9* †† 10.13 *Joël 3.5*

Pipatemehi a Pwooti Wâé

¹⁴ O woté ko ace bwo tode Padaame, hemepie time genye uce céihi ne kon? Ke o woté ko ace bwo céihi ne kon, hemepie time genye uce téne ce pwooti kon? Ke o woté ko ace bwo temehieng, hemepie te tice celi lé pipatemehieng? ¹⁵ ††Ke o woté ace bwo pipatemehieng, hemepie te tice paceli pahedeeng me e pii? Be caa te tii ne he ni tii iitih pie: **Adéihi a bwo tuie te lépwona lé patemehi a péém, ke nina lé pipatemehi a Pwooti Wâé.*

Ésaie 52.7

¹⁶ ††Ke time uce woélé ati [lépwo Juif] na lé piténehehi a Pwooti Wâé. Be e pii wo péroféta Isaia, pie: *Padaame, he woo paceli e céihi ne ko ni pwooti teme?*

Ésaie 53.1

¹⁷ A céihi, ke e âbé mu ko ana genye téne; ke ana genye téne, ke e âbé mu ko a pwooti ko Kériso heme lé pipatemehi.

¹⁸ ††Ke mepwo é ne mwo ko lépwo Juif, ke kona time lé uce téne a pwooti naa? Uhuu. Be caa te tii ne he ni tii iitih pie:

Caa te pipatemehi ne pwo a bwohemwo ati. E â die ha a pwonehi a bwohemwo ne ni pwooti ten. Psaume 19.5

¹⁹ ††Ai, kona time lé uce temehi a pwooti? Uhuu! Be e caa te mi pii ânebun wo Padué, na e pwaadeniin bé wo Moosé, pie:

É o pwo me geé pitaaba ne ko ana time uce a ju bele. É bo pwo me geé okéé ne ko a bele

na time uce pitemang. Deutéronome 32.21

²⁰ ††Ke time uce piwâ Isaia me e pii a pwooti ce, na e âbé mu pele Padué, pie:

Nina time lé uce haneéo, ke lé caa tooéo. Ke nina time lé uce todeéo, ke é caa pihabwiiéo telé. Ésaie 65.1

²¹ †††Ke e pii mwo ne ko lépwo *Isaraéla wo Padué pie:

É cine ngen ni ing céii a bele naa, he ni tan ati.

[Kehe time lé uce âbé céiiéo.]

Be te junihe mwoiu ni punilé. Ke time lé uce piténehehi. Ésaie 65.2

††† 10.15 *Ésaie 52.7* †† 10.16 *Ésaie 53.1* ††† 10.18 *Psaume 19.5* †† 10.19 *Deutéronome 32.21* †† 10.20 *Ésaie 65.1* ††† 10.21 *Ésaie 65.2*

Time e uce jéin ne ko lépwo Juif

11 †Me nye pii pie woté? Kona e te jéin wo Padué ne ko a bele ten, [wo lépwo *Juif]? Ûhu! Be woéo ke pa Juif ††, pa piebehi *Abérama, mu ha a pwomwoiu te *Benjamin. 2 Ûhu, time e uce jéin ne ko a bele ten wo Padué, be e caa te mi pipégaliilé ânebun.

Be géé caa te temehi ehi, ana e pii wo péroféta *Élia ne ko panaa. Be genye caa pine ne he ni tii iitihí pie, e pitéteiminaado te Padué wo Élia, ne ko a bele *Isaraéla. 3 †Ke e pii pie: *Au, Padaame! Lé caa taunu lépwo péroféta tem. Ke lé tanahi ni *apwoâpwailo tem. Ke te woéo cehi na é mu. Ke nimelé mwo, me lé taunuéo.*

4 ††Ke ade aceli e hegi ne ten kon wo Padué? E pii ten pie: *Uhu, lé mwo te mu nina 7000 apulie tong, na time lé uce tidihí jililé he pwahamii pa duée, Baa††.*

5 Ke te piwien jena. Be te pwo a nehi a bele Isaraéla na e pipégalieng wo Padué, beme e den, ha a *pipwoééhe tice ja kon den. 6 ††Ke time e uce pipégaliilé mu ko ace huô telé. Be mepie wonaa, ke wieli a pipwoééhe ten, ke time uce a pipwoééhe na e ne me piti-cenaado ne kon ††.

7 A bwopiinen pie woté anaa? Wo lépwo Juif, ke lé hane [a péém delé me Padué] kehe icehi ana time lé uce tooeng na a ubwo kolé, be mwou ni punilé; kehe te icehi nina e pipégaliilé wo Padué. 8 †Be caa te tii ne he ni tii iitihí pie:

*E pwo me lé pule wo Padué,
beme tice celi lé temehi.
Ke e pwo me lé bwi
ke me bwéjé jélé dieli jena. Deutéronome 29.3; Ésaïe 29.10*

9 ††E pii mwo wo pa daame *Davita [te Padué] pie:

*Go ne kuhinaado te nina ta jélé.
Lé piwiinaado me ûdu.
Ke o wâé heme bitehi ati nina,
beme o a pwojé ne ha a pwaaden,
beme lé tupwo ne hen.*

10 *Go pwo me bwi jélé,
beme tice celi lé alihi!
[Go ne telé ni picani me ni téej]
celi me time o uce pé kojalé.*

Ke me cii ni jélilé! Psaume 69.23–24

† 11.1 1 Samuel 12.22; Psaume 94.14; Filipi 3.5 †† Pa Juif—Grek: Pa Isaraéla. † 11.3 2 Rois 19.10, 14 †† 11.4 1 Rois 19.18 †† Baal—Pa céiu duée he lépwo apulie ha amu Kanana, a amu na lé pé wo lépwo Isaraéla. Ke wo lépwo béé Isaraéla, ke lé jélilé ne ko Padué, ke lé pwoiitihí me de Baal. ††† 11.6 Galat 3.18 ††† Ni béé tii iitihí he pwo grek, ke e hen ni pwooti ce: Be lupwo naado na time uce piwien. § 11.8 Deutéronome 29.3; Ésaïe 29.10 †† 11.9–10 Psaume 69.23–24

Tehi ne te ni béé bele

11 ††É tahimwohi pie: He lé tupwo dieli mwo wo lépwo Juif? Ûhu. [Mwo te ju wonaa ha a cuwo céiu be-naamwon]. Ke é mu ko anaa, na *celuimi ni béé bele, ke e â pitaaba a bele Isaraéla. 12 Be, me time lé piténeede Padué wo lépwo Juif, ke [time lé uce hegi ati ni adéihí ten. Ke] é mu ko anaa, ke e te junihe *adéi ni na time uce ni Juif éni pwo bwohemwo. Kehe icehi ana lé bo te tai cuwoda mwo wo lépwo Juif. Ke é ha a tan naa, ke o te junihe ubwo a adéihí [me denye ati].

13 Mepwo é ne kowé, wogewé na time géé uce Juif, ke [e pahedeéo ngen wo Padué, beme] é *apostolo tewé. Ke a penem naa, ke te junihe wâé tong. 14 Ke me é ko wonaa, ke lé o pitaaba wo lépwo âjiéning, lépwo Juif, beme o celuimi ce béén mu kolé. 15 É he e jéin ne kolé wo Padué, ke e ne a péém ne ha awieme ni béé bele, éni pwo bwohemwo, me weeng. Kehe e bo te hegi mwo lépwo Juif, ke é ha a tan naa, ke lé o pwohewii ni amele na lé mulie cemwo!

Neko gaale ko a bele ten

16 [Hemepie lé apulie te Padué wo lépwo watihe lépwo Juif, ke te piwien ne mwo ko ni piebehilé.] Be mepie a bécéiuhé mepwoloa, ke me a de Padué, ke a pwoloa ati, ke te a de Padué. Ke te pwohewii mwo a acuwo. Be mepie ni waan, ke ni de Padué, ke ni dihen, ke te ni den mwo.

17 ††Be a bele Isaraéla, ke pwohewii a céiu acuwo, na pwopweehi kon, ne ha apwoamu te Padué. Ke e caa tahagéi ni béé dihen. Ke wogo, pana time uce pa Juif, ke go pwohewii a dihe acuwo na te ité. Ke e paatiko ne ko a acuwo na pwopweehi kon. Ke me wonaa, ke wogo mwo, ke go ûdu a duhi a acuwo naa. Ke pwo a cemem, mu ha adéihí te Padué, na e pii ânebun, he li e *piapwo ne te Abérama ††.

18 Ke go nemwo pipii dem! Go nemwo niimihi pie, wâé go koja a dihe acuwo na tahagéi. Be time uce wogo na go pé ni waan, kehe ni waan na lé pééko!

19-21 A juuju pie, e tahagéi ni béén, be time lé uce céihí. Ke wogo, ke e paatiko ne ko ali acuwo, mu ko ana go céihí. Ke wieli go bo pii pie: “E caa tahagéi ali dihen, beme woéo, ke me paatiéo ne ko ali acuwo.” Kehe icehi ana go pipwocile! Be mepie e tahagéi a ju dihen, ke wieli e o pipwohewiin ne mwo kom. É mu ko anaa, na é pii pie, go nemwo pipii dem!

22 ††Go alihi: Wo Padué ke te wâé nang ne konye. Kehe icehi ana e tauti mwouhi nina time lé piténeedeeng ††. Ke wâé nang ne kom, heme go te cuwo ko pwo ana

††† 11.11 Apostolo 13.46 †† 11.17 Éféso 2.11–19 ††† Dernière phrase—Grek: Pwo dem mu ko a waan. †† 11.22 Ioane 15.2,4 †† Nina time lé piténeedeeng—Grek: Nina lé tupwo.

nimen kon. Ke mepie time uce wonaa, ke e o tahagéiko mu ko ali acuwo.

²³ Wieli lé o bo mwojuia mwo wo lépwo Juif, me lé céihi ne ko Padué. Ke mepie wonaa, ke pwo a junuun me e paatilé mwo ne ko a acuwo. ²⁴ Be he li e paatiko, wogo pa dihe a acuwo na te ité go, ne ko a acuwo na pwopweehi kon, ke time uce a naado na me pwo. Ke mepwo é ne ko lépwo Juif, ke te lépwo ju dihe a acuwo. Ke te ju ticecoon ne ko Padué, me e paatilé mwo ne ko a acuwo.

E bo celuimi a bele Isaraéla

²⁵ Éa, lépwo bééng ne he nii Kériso, geé nemwo pipii dewé! Be te junihe hiwon ni naado na time geé uce temehi. Ke nimung me geé temehi nina e bo tuie ne ko lépwo Juif, ni naado na e ha aduwo ânebun.

Weengi: Hemepie muhi te ce béén me lé céihi, kehe icehi ana o time lé uce cuwo ko wonaa. Be âcehi *a bwo niimihinaado te Padué, ke lé o âbé céiieng ni béén na time lé uce Juif. Ke me lé tai âmwobé céii Padué, ke lé o tabuhi céihi mwo wo lépwo ju Juif †.

²⁶ ††Ke, é ha a benaamwon naa, ke o celuimi a bele Isaraéla. Be caa te tii ne he ni tii iitihii [a pwooti te Padué ce] pie:

*E bo âbé mu *Sion
wo pana e bo celuimikenye,
beme e tuwo ni piebehi Iakobo‡.*

²⁷ ††Be é piapwo ne telé pie,
é bo pétaabwon ni ta pwo telé.Ésaïe 59.20; 27.9

²⁸ A juuju pie, hiwon lépwo Juif na muhi telé ko a Pwooti Wâé. Ke é mu ko anaa, ke lé pwobwoni Padué. Ke anaa, ke o wâé me dewé, wogewé na time geé uce Juif. Kehe icehi ana e caa pipégali lépwo Juif wo Padué, beme a bele ten, ke e *piapwo ne te ni watihelé, be te junihe eânimen delé. ²⁹ Ke time e o uce pé mwo ana e caa ne. Ke time e o uce jéin ne ko lépwona e caa todelé.

³⁰⁻³¹ Ânebun, ke wogewé [na time geé uce Juif] ke time uce nimewé ko Padué. He muhi te lépwo Juif me lé hegi ni adéihi ten, ke e uce ne tewé ††. Kehe icehi ana [é ha ace céiu tan] ke e bo te ne telé mwo ni adéihi ten. ³² Ke e caa te pwo me wonaa †††, beme e habwii tenye ati a pipwoééhe ten.

† *Grek: Time uce nimung me geé niimihii pie lépwo atemehinaado. Wâé heme geé temehi a bwo niimihinaado na binyi ce: Lé bo pwo mwoiu pun a hiwon ko lépwo Isaraéla, die ko aceli lé bo taabé ati wo lépwona time uce lépwo Juif. †† 11.26 Ésaïe 59.20–21*

‡ *Iakobo—Pa watihe ati lépwo Juif. Omehi mwo Abérama me Isaka me Iakobo ne ha a Niinaado (Vocabulaire) ha anebwén ko a tii.*

†† *11.27 Jérémie 31.33–34 †† 2e phrase—Grek: Time lé uce piténdeeng, ke geé hegi a pipwoééhe. ††† E caa te pwo me wonaa—Grek: Wo Padué, ke e ne lépwo apulie me time lé uce piténdeeng.*

Junihe ubwo a pipwoééhe te Padué

³³ †††Te junihe ubwo Padué! Ke te junihe ubwo a pipwoééhe ten, me ni naado na wâé na e pwo! Te junihe e daaité kojakenye, ke e bwolu ni bwo temehinaado, me ni bwo niimihinaado ten! Woo celi e temehi ni pihuô ten? Ke woo celi e temehi ce bwo penem den †? ³⁴ ††Be caa te tii ne he ni tii iitihii pie:

*Woo celi e temehi
a bwo niimihinaado te Padaame?
Woo paceli me e pacémunieng? Ésaïe 40.13*

³⁵ †††Woo celi e ne ten ce naado,
beme e ujen ne ten wo Padué?Job 41.3

³⁶ ††Be ati ni naado, ke e te tai âbé mu kon. Be te weeng na e pwo ati ni naado, me den. E pelen *a wâé dieli mwo. Amen!

a cémun ko a mulihenye

(Pwahamii tii: 12.1—15.13)

A âpwailo na mulip

¹² ††Ni bééng ne he nii Kériso, e te junihe pipwoééhenye wo Padué, ke e pwo nina wâé me denye. É mu ko anaa, ke é ilekewé, ha a ju pwonimung pie, geé pinekewé ati ne ten, beme geé pwohewii a *âpwailo na mulip na te junihe wâé ten. Ke weengaa kuti a ju pwopwoiitihii, na wâé me geé ne ten.

² Geé nemwo pipwohewii ni apulie pwo bwohemwo. Kehe geé pinekewé te Padué, beme e taatéehi ni pwonimewé [me ni bwo niimihinaado tewé, me ni bwomu tewé]. Be me wonaa, ke geé o temehi, ke geé o pwo ana te nimen kon, na juuju, ke wâé, ke hején.

Pétaapwo ne tenye ni pétaapwo âpipati

³ ††Mepwo é ne kong, ke e te ju ne tong, me tice cuhi, ni wâé ten wo Padué [he e pipégaliéo me é *apostolo ten. É mu ko anaa, na o jan me] é pii pie: Go nemwo niimihii pie, pipwonaado ne kom. Ôhu, go pwo me piwahin go, ke go pininim ehi. Ke go piomeko ehi, ne ha a céihi na e ne tem wo Padué.

⁴ ††Be, hiwon ni piduaan ne ha a éénye. Ke te muko pétaapwo pi-ité ni penem delé. ⁵ Ke wonaa ne konye, wogenye na hiwon genye. Be céiu a éénye, ke céiu genye me Kériso, ke te muko pétaanye [ni penem

††† *11.33 Ésaïe 55.8–9 § Grek: E bwolu ni wâé me ni bwo temehinaado me ni bwo niimihinaado te Padué. Pwocoon me nye temehi ni pihuô ten, ke pwocoon me nye tooli ni pwaadeniin. † 11.34 Ésaïe 40.13; 1 Korénit 2.16 ††† 11.35 Job 41.3 †† 11.36 1 Korénit 8.6 ††† 12.1 Roma 6.11,13; 1 Péteru 2.5 †† 12.3 1 Korénit 12.11; Éféso 4.7 †† 12.4–5 1 Korénit 12.12,27*

denye]. ⁶ †Be e te muko ne tenye ni muko pétaapwo âpipati wo Padué [beme nye pipwoeabwé ten].

Ke wonaa, he e ne tem a penem ko péroféta, ke wâé heme wogo pa apipéwooti ten, âcehi a ja ko a céihi tem. ⁷ Ke me e ne tem me go picani te ni béén ††, ke wâé heme go picani telé. Ke me e ne tem me go pwocémun, ke go pwocémun.

⁸ Ke me wogo pa apamwoiu ne ni béén, ke go pamwoiulé. Ke me wogo pa âpipati, ke go ne, ke go nemwo pine jahi. Ke me wogo pa apipé bele, ke go pwo ha a ju pwonimem. Ke me wogo pa apwo na wâé me de ni béén, ke me go picani telé, ke go pwo ha a pipwodéén.

A cémun ko a mulihe pa acéihi

⁹ Mepwo é ne ko a pipwoééhe tewé, ke wâé heme a ju pipwoééhe. [Geé nemwo gahe pwo.] Kehe wâé heme geé téétihi me mwiihi ati nina ta, ke geé mu ko ana wâé. ¹⁰ †Ke geé pipwoééhewé he ni ju pwonimewé, be wogewé lépwo âjién ne he nii Kériso. Ke geé nihe pipaciitikewé. ¹¹ Geé pipwoeabwé te Padaame, ke geé nemwo pwoemaan. Kehe geé te ûmiê, ke geé penem me den, ati he ni niihewé me ni pwonimewé.

¹² ††Geé pipwodéén he ni céihi tewé [ne ko ni *adéihi na e bo ne tewé wo Padué]. Ke mepie e tookewé ni picani, ke geé te cumang ne ha a piuca, ke geé te cuwo ko pwoiitihi. ¹³ ††Ke mepie ni acéihi bééwé, ke me tice telé ce béé naado, ke geé ne telé. Ke geé hegi ehi nina lé âbé céiikewé.

¹⁴ †††Mepwo é ne ko nina lé pwotahi ne kowé, ke geé ile Padué pie, me e adéilé. Éa, geé ilehi a adéihi ten, ke geé nemwo piapwolé.

¹⁵ Geé pipwodéén me nina lé pipwodéén, ke geé é me nina lé é. ¹⁶ †††Wâé heme céiu gewé. Geé pwo me piwahin gewé, ke geé pwo ni penem na time uce nime lépwo béén me lé pwo. Geé nemwo pwo me piubwo gewé, ke geé nemwo niimihi pie geé nihe temehinaado [§].

A huô tenye ne pele ni apulie ati

¹⁷⁻¹⁹ †††Hemepie jan, ke geé hane me geé mulie ha a péém, me woélé ati. Ke geé hane me geé pwo ana wâé, ne he pwahamii ni apulie ati. Lépwo ju bééng, heme lé pwo tewé celi ta, ke geé nemwo pamwojuiéhi ne telé mwo. Kehe geé ne te Padué ninaa, be weeng,

na e bo tauti, me pwocuhinaado telé ne ha a okéé ten. Be e pii wo Padaame, ne he ni tii iitihi pie:

*Te woéo cehi, na é bo uje
[ne te nina lé pwo nina ta].
Ke te woéo cehi,
na é bo te muko ne telé
ce cemelé ko ni huô telé. Deutéronome 32.35*

²⁰ ††Ke caa te tii mwo, ne he ni tii iitihi pie:

*Hemepie mene paceli pita geu,
ke go ne celi e wii.
Ke mepie nimen me e ûdu,
ke go ne ace ûden!
Ke a tanim kon ke o pwohewii
ace daapi celi éle ne pwo punin. Proverbs 25.21–22*

²¹ Ke geé nemwo pwo me piwéden a ta. Kehe wâé hemepie geé pwo me e piwéden koja a ta, ana wâé.

Piténade lépwo apihuô ha amu

13 †††Geé piténede lépwo apihuô ha amu. Be mepie lé pihuô, kehe te wo Padué na e nelé. Be te tice apihuô, hemepie time e uce ne ace mwomwon den wo Padué. ² Wo pana muhi ten me e piténede ni apihuô, ke e pwobwonihana e pwo wo Padué, ke e bo hegi a cuhinaado ten.

³ ††Me nye pwo ana wâé, ke time o uce mwotikenye ko lépwona lé pihuô tenye. Kehe o mwotikenye kolé heme nye pwo ana ta. Anaa kuti na me go pwo ana wâé, beme wâé telé go.

⁴ Be wo lépwo apihuô, ke te pwohewii lépwo eabwé te Padué na me lé picani tem beme go pwo ana wâé. Kehe me go pwo ana ta, ke wâé heme mwotiko, be pwo a mwomwon delé me lé pwocuhinaado tem. Be weengaa mwo a penem na e ne telé wo Padué, beme e habwii a okéé ten ne ko lépwona lé pwo nina ta. ⁵ Ke é mu ko anaa, na wâé heme go piténede ni, beme time e o uce okéé ne kom wo Padué, ke me go piténede ni mwo a *pwocihe na e âbé mu ha a pwonimem.

⁶ ††Wâé mwo, heme go ne a mwani *cuihuni apulie. Be wo lépwona lé tai mwani, ke wo Padué na e ne telé a penem naa. ⁷ Ke go ne te ni béén ana me go te uje ne telé. Hemepie a cuihuni apulie, ke go pwocuhin. Ke mepie a piténede ni, ke go piténede ni. Ke mepie a pipwoiipihi, ke go pwoiipihi.

A pipwoééhe ke a patén denye

⁸ †††Hemepie pwo ce kérédi tem, ke wâé heme go piepin ko pwocuhin. Kehe icehi ana te pwo a céiu naado, na time uce jan me go pwocuhin ati, ke a pipwoééhe! Be wâé heme go te cuwo ko pipwoééhe ni

† 12.6–8 1 Korénit 12.4–11; 1 Pétéru 4.10–11 †† Go picani te ni béén—Weengaa a bwopiine a dikone. ‡ 12.10 1 Pétéru 1.22 †† 12.12 1 Tésalonik 5.16–18 †† 12.13 Ébéru 13.2 ††† 12.14 Mataio 5.44; 1 Korénit 4.12 ††† 12.16 Proverbs 3.7 § Ai, Geé nemwo pipwoinen ne ko ni apulie. Kehe geé pwo me céiu a bwo pipwoééhelé tewé, pwohewiin heme tai pwo naado ne ko ati ni apulie. Ke geé nemwo pipaunukewé. Ke geé nemwo niimihi pie, geé te junihe temehinaado. † 12.17 1 Tésalonik 5.15 †† 12.19 Deutéronome 32.35; Mataio 5.39

§ 12.20 Proverbs 25.21–22; Mataio 5.44 ††† 13.1 Proverbs 8.15; Tit 3.1 † 13.3 1 Pétéru 2.13–14 † 13.6–7 Mataio 22.21 †† 13.8 Mataio 22.39–40; Cang 2.8

béén. Ke me go wonaa, ke go te piténehehi ehi ni patén. ⁹ †Hiwon ni pihuô ne he ni patén. [Woélé ni béén]:

Go nemwo pibune;
Go nemwo taunuhi apulie;
Go nemwo bune††;
Go nemwo pwo me ânenimem ko ni naamuu ni béén.

Exode 20.13–17

Ke ni âne ati ni huô ce, ne pehi ni béén, ke caa e ibu ne ha a pwooti ce, pie:

Go pwo me eânimem de ni béén‡, pwohewii a bwo pieânimem dem.

Lévitique 19.18

¹⁰ ††Be mepie genye pipwoééhe pace céiu, ke caa te ju-nihe pwocoon me nye pwo ten aceli ta! Be, me nye pipwoééhen, ke genye piténehehi ati ni patén.

Mulie ne ha a pwéélang

¹¹ ††Geé ûmiê [ke geé mulie ha ana é ko pii tewé]. Geé temehi ehi a benaamwon na genye ko mulie hen. Be caa e mwonukenye a tan na e bwobe celuimikenye hen wo Padué.

Ânebun, he genye mi céihi ne ko Kériso, ke mwo te e ité a tan naa. Kehe é jena ni, ke e teko piâbé mwonukenye. ¹² ††Be e caa âdé a bwén, ke e o caa taawie a téale.

Ke me wonaa, ke wâé heme nye pétaabwon ni huô na ta, na nye pwo heme bwén. Ke genye pé ni naamuu pa, me nye pwopa ha a pwéélang. ¹³ ††Wâé heme geé mulie ha a mulie na mwomwon, ke wâé, ne ha a pwéélang. Geé nemwo junihe ûdu me wiinaado; ke geé nemwo pipule hauli me ni béén; ke geé nemwo pipwokon me piokéé.

¹⁴ †Kehe wâé heme céiu gewé me Padaame Iésu Kériso, me pwohewii a epwén toki na e kowé. Ke geé nemwo âcehi nina nimewé kon na ta.

Nye pipwoééhe @ nina mwo wahin ni céihi telé

Nemwo tautilé

14 [†]Go hegi ati nina mwo time uce mang ehi ni céihi telé, ke go nemwo tautilé me pipiilé. ² ††Be wogo, ke wieli te wâé tem ati ni wiinaado. Kehe icehi ana wo pana mwo time uce mang a céihi ten, ke wieli time e uce wii mewota [‡]. ³ ††Ke go nemwo pipiitaeng.

† 13.9 Exode 20.13–15,17; Deutéronome 5.17–19,21 †† Go nemwo bune—Ni béé tii iitih he pwo grek, ke lé tii ni pwooti ce: Go nemwo pii ce béé pwooti me go geti ce béé apulie. ‡ Ni béén—Grek: Pana e mu mwonuko, ai Pa ju béém. †† 13.10 1 Korénit 13.4–7 †† 13.11 Éféso 5.14; 1 Tésalonik 5.6–7 ††† 13.12 1 Joane 2.8 ††† 13.13 Luka 21.34; Éféso 5.18 § 13.14 Éféso 5.11 §† 14.1 Roma 15.7 §†† 14.2 Genèse 9.3–4 §† Time e uce wii

Ke wo panaa mwo, ke e nemwo tautiko mwo. Be e te tai hegikeu wo Padué. ⁴ ††He wogo ke woo, me go tauti pa eabwé te pa céiu? Be te icehi pa daame hen, na e bo te tautieng, hemepie wâé nang, ai hemepie ta nang [‡]. Ke e bo te picani ten, [beme e pwo ana wâé].

⁵ ††Wonaa ne mwo ko lépwona lé niimihi pie, te pwo a tan na iitih [‡]. Ke ni béén mwo, na lé niimihi pie, te piwien ati ni tan. Ke wâé heme lé te muko cile ehi ni bwo niimihi nen delé; ke me lé te muko cumang ne kon.

⁶ Wo lépwona lé pwo me time uce piwie ni tan, ke lé pwo beme lé paciiti Padaame Padué. Ke wo lépwona lé wii ati ni wiinaado, ke lé te wonaa mwo, beme lé paciitieng. Ke lé pipwo-olé ten ati kon. Ke wo lépwona time lé uce wii ati ni wiinaado, ke lé te pwo mwo anaa, beme lé paciiti Padué. Ke woélé mwo, ke lé pwo-olé ten.

Nye mulie me de Padué

⁷ Time nye uce mulie me denye cehi, ke time genye uce mele me denye cehi. ⁸ ††Be, heme nye mulie, ke wâé heme nye mulie me de Padaame. Ke me genye mele, ke genye mele me den. Be é ne ha a mulie, ke é ne ha a mele, ke wogenye, ke ni eabwé te Padaame.

⁹ Be e mele wo Kériso, ke e mulie cemwo mu ha amele, beme Padaame he ni amele, me nina lé mulie.

¹⁰ ††É mu ko ade, na wo lépwo béén mu kowé, ke lé tauti ni acéihi béélé? Ke ni béén [na lé niimihi pie mang a céihi telé] ke me lé nemwo tééti ni béén. Be genye bo te tai cuwo, ânebuhe Padué ne ha atautinaado ten ¹⁹. ¹¹ ††Be caa te tii ne he ni tii iitih pie:

Weengi a pwooti tong,
woéo Padaame na é ne a mulie.
É pii mwouhi pie:
Lé o tai âbé tidihi jililé ânebung,
me pipaunui a niing,
woéo Padué.Ésaie 45.23

¹² Be [o bo pwo a tan, na] e bo todekenye wo Padué, beme nye muko pii ten ni huô tenye.

Nemwo pwo me lé pwo nina ta

¹³ Genye nemwo tee cuwo ko pitauti me pipii ni béén. Wâé heme te tice ace céiu naado celi go pwo, celi me e tanahi a céihi te pa béém, ke me e pwo ana ta.

mewota—Grek: E te ju ânye madinaado cehi. Omehi a niide a tii 21. Hiwon ni patén de ni Juif ne ko ni wiinaado. Kehe icehi ana e caa tuwokenye koja ninaa wo Kériso. §†† 14.3 Kolosé 2.16 §† 14.4 Mataia 7.1; Cang 4.11–12 §† Hemepie wâé nang, ai hemepie ta nang—Grek: Hemepie e cuwo, ai Hemepie e tupwo. §†† 14.5 Galat 4.10–11 §†† Iitih—Grek: Nihe pwonaado ne kon koja ni béé tan. §§§ 14.8 Galat 2.20 18 14.10 2 Korénit 5.10 19 Grek: Ke wogo, ke é mu ko ade na go tauti lépwo béém? Ai, Wogo, ke é mu ko ade na go pwohauhi ne ko lépwo béém? Be genye bo tai cuwo ha a tautinaado te Padué. 20 14.11 Ésaie 45.23; Filipi 2.10–11

¹⁴ †Mepwo é ne kong, ke e caa te patemehi tong wo Padaame Iésu, pie, te tice [wiinaado] celi e paciitih konye. Kehe icehi ana wo pace céiu celi e niimihi pie, iitih ace céiu wiinaado, ke te iitih me den. ¹⁵ ††Ke go nemwo pwo me a wiinaado tem, ke me pwotahinaado ne ko pa céiu acéih béém. Be, me go wonaa, ke caa time go uce mulie ha a pipwoééhe. Be wo Kériso, ke e te mele me den mwo. ¹⁶ Wieli go bo temehi pie ana go pwo, ke a naado na time uce iitih. Kehe icehi ana time uce wâé heme pii me ta [a nii Kériso] † mu ko ni huô tem.

¹⁷ A wiinaado me ûdu, ke time uce a junaado [me denye ni eabwé] ne ha a *Mwametau te Padué. Ana a junaado, ke a mulie na mwomwon [ne he pwahamii Padué] ke a péém, me a pipwodéén, na e ne tenye na a *Jenen Iitih. ¹⁸ Ke me go wonaa a bwo pipwoeabwé tem me de Kériso, ke o wâé te Padué go. Ke o wâé mwo te ni apulie go.

E pébé a péém

¹⁹ ††Go pwo ni naado na me e pébé a péém, ke me e pamwoiuh ni céih te ni béém. ²⁰ ††Ke go nemwo pwotahi ni penem de Padué ko ni wiinaado tem! A juu-ju be é teko pii pie, te wâé ne konye ati ni wiinaado. Kehe icehi ana time uce wâé heme go tanahi ni céih te ni béén ko ni wiinaado na go wii, ai me go pwo me lé pwo nina ta ††.

²¹ Ana wâé, ke me go wiinaado, me ûdu jahi. Go nemwo tanahi a céih te pa béém, ko celi go wii me ûdu, hemepie ce mewota, ai ace tabe megele. ²² Ke [go nemwo pii hauli ni bwo niimihinaado tem ne ko anaa.] Go te cile anaa, beme o te wo Padué cehi na e temehi.

Mepwo wogo, ke o adéiko, heme time e uce cieko †† ne he ni huô tem, me ni bwo niimihinaado tem. ²³ Kehe icehi ana me piwâ go me go wii ace céiu naado, ke [wâé heme go nemwo wii. Be] mepie go wii, ke go caa wie koja a céih tem. Ke nina time e uce âbé mu ko a céih, ke ta.

Genye pipwohewii Kériso

15 Genye nemwo mulie me denye cehi. Wogenye nina mang ni céih tenye, kehe wâé heme genye picani ne ko ni béén na time uce téele mang ni céih telé. ² †Ke genye piwâgo me nye pwo ce naado celi wâé telé, ke me genye pamwoiulé ne he ni céih telé. ³ ††Be [genye âcéi] Kériso, pana time e uce mulie me den ce-

hi. Be caa te tii ne he ni tii iitih pie: *Me lé pipii me ta go, ke woéo pana lé pipii me ta jo.*

Psaume 69.10

⁴ ††Ati ni pwooti he ni tii iitih, ke caa te mi tii, beme pacémunikenye. Be lé pamwoiukenye, beme ubwo ni céih tenye, he genye mwo ucéih ha a piuca [ni *adéih na e caa te mi pii ânebun wo Padué]. ⁵ Be a piuca me a pipamwoiuh, ke e te âbé mu ko Padué. Ke weeng mwo na e ne a niihenye beme nye cumang. Ke wâé heme e pwo me céiu gewé, ke me geé piténedekewé, pwohewii a huô te Kériso Iésu. ⁶ Ke é mu ko anaa, ke geé o tai pipaunu Padué, pa Caa te Padaame henye Iésu Kériso.

⁷ ††Geé pihegikewé ehi, pwohewii a bwo hegikewé te Kériso. Ke me wonaa, ke lé o pipaunu Padué [ne ni apulie].

E âbé wo Kériso me de ati ni bele

⁸ ††É pii tewé pie: E âbé [ne éni pwo bwohemwo] wo Kériso, beme e eabwé te lépwo *Juif, ke me e habwii pie wo Padué, ke e caa pacuwohi nina e caa pii ânebun te ni watihenye. ⁹ ††Ke lé o te pipaunu mwo Padué ne ni béén na time lé uce Juif, ko a bwo wâé nang ne kolé. Be caa te tii ne he ni tii iitih pie:

É o pwonyebi da;

me é pipaunuhi a niim

ne ha awieme ni bele. Psaume 18.50

¹⁰ ††Ke caa tii ne mwo ha a céiu duaan pie:

Geé tai pipwodéén,

wogewé ni bele.

Geé tai pwonyebi

me a bele te Padué. Deutéronome 32.43

¹¹ ††Ke a céiu mwo, ke:

Me lé pipaunu Padaame

ne ni apulie ati.

Geé pwonyebi da a wâé ten,

wogewé ni bele! Psaume 117.1

¹² ††Ke e pii mwo wo péroféta Isaia, pie:

E bo cuwoda pa piebehi Jessé^{SSS}

ke e bo pihuôhi ati ni bele.

[Te é mu kon, ni pipwowâé,

na e âbé mu ko Padaame.]

Te é mu ko weeng,

me lé céih ne kon. Ésaie 11.10

¹³ Be wo Padué na e ne tenye a céih, me nye mwo ucéih [ati ni wâé na e bo ne tenye]. Wâé heme e pwo me hején ne kowé a péém me a pipwodéén. Be me

† 14.14 Apostolo 10.15; Tit 1.15 †† 14.15 1 Korénit 8.11–13
‡ Pii me ta a nii Kériso—ai Pii me ta go. †† 14.19 Roma 12.18, 15.2
‡† 14.20 1 Korénit 8.13 ‡†† Tanahi ni céih...ai...pwo me lé pwo ni-
na ta—Grek: Pwo me [lé] tupwo. ‡†† Time e uce cieko—ai Te tice
celi me e tautiko kon na a pwocihe na e âbé mu he pwonime. Grek:
Time e uce pitautieng mwo. § 15.2 1 Korénit 10.24,33 †† 15.3
Psaume 69.10

†† 15.4 2 Timoté 3.16 §† 15.7 Roma 14.1 §†† 15.8 Mataio
15.24 †† 15.9 Psaume 18.50; Apostolo 3.25 §† 15.10 Deutéronome
32.43 ††† 15.11 Psaume 117.1 ††† 15.12 Ésaie 11.10; Pii Beetih
5.5 ††† Jessé—Pa caa te pa daame Davita, pa piebehi Iésu Kériso.
Omehi Mataio 1.1–6, Apostolo 13.22.

wonaa, ke o ubwo da a céihi tewé, mu ko a junuu a *Jenen Iitih, ne ha a bwo ucéihi nen dewé.

E pipwoeabwé te Kériso wo Paulo

¹⁴ Lépwò bééng ne ko Kériso, é temehi pie, wogewé, ke ni apulie na wâé gewé. Ke geé temehi ehi [a bwo mulie ha a mulie na mwomwon]. Ke jan ne kowé me geé pipacémunikewé. ¹⁵ Kehe icehi ana time uce piwâ jo, me é paniimihi tewé ne ha a tii ce, nina geé caa pi-caa. Be wo Padué, mu ko a *pipwoééhe tice ja kon den, ¹⁶ †ke e pwo me é pieabwé te Kériso Iésu me dewé, wogewé na time geé uce Juif. Ke é caa pé lé céi-ikewé a Pwooti Wâé ten, beme geé utepanu te Padué, na wâé me den. Be e pipégalikewé, beme geé apulie ten, ko a Jenen Iitih ††.

¹⁷⁻¹⁸ Ke é te junihe pipwodéén kuti ko a penem dong me de Padué. Time é uce pipii dong ko ce béé naado, kehe é te pii cehi ana e ne me é pwo wo Kériso, be céiu gemu me weeng. Ke e ne me lé piténede Padué wo lépwona time uce lépwò Juif, mu ko a pwocihe me a huô tong. ¹⁹ [E pwo me tuie mu kong] ni inenaado ne ha a junuu a Jenen Iitih; ni naado na lé téetih ne ni apulie. Tabuhi mu *Iéusaléma, die ha a duaan Iliri, ke é caa pipatemehi pitih a Pwooti Wâé ko Kériso.

²⁰ †Weengaa a penem dong na te junihe wâé tong; a bwo pipatemehi nen dong a Pwooti Wâé, ne he ni pid-uaa amu na time lé mu uce téne a pwooti ko Kériso. Be time é uce bahi ne mwo pwo a paan na e caa ne wo pace céiu ††. ²¹ ††Be é âcehi ana tii ne he ni tii iitih pie:

*Time lé uce téne ce pwooti kon;
Te tice apulie celi pipatemehi telé
[a Pwooti Wâé].
Kehe lé bo tai alieng,
me temehi [Padaame]. Ésaie 52.15*

A bwo engen de Paulo

²²⁻²³ †††Hiwon ni benaamwon na nimung me é âdé caniékewé, kehe icehi ana te cuwo ko pipééo na a pen-em naa. Ke é jenea ni, ke é caa panebwénihi a penem dong ne ha amu ce. ²⁴ Ke é piniimihi pie, hemepie é o caa â Espagne, ke é o mwo âdé cuwo pelewé [ne *Rome]. Be o wâé ne kong, heme wonaa. Ke é alecehen, ke geé bo picani tong, ne ha a bwo engen dong.

²⁵⁻²⁶ †††É jenea ni, ke é â Iéusaléma, be é pé ngen a âpipati na lé ne wo lépwò acéihi na élé Macédoine me Akai [na time lé uce Juif]. Be lé ileéo pie, me é pé lé a âpipati telé, ne te lépwò [Juif] na lé céihi ne ko Iésu, na élé Iéusaléma. Be é pele lépwonaa, ke mwo te hiwon

† 15.16 Roma 1.5, 11.13 †† Dernière phrase—Grek: A Jenen Iitih, ke e pwo me iitih ke wâé te Padué a âpwailo. † 15.20 2 Korénit 10.15–16 †† 2e phrase—Be time uce nime Paulo me e pé me den a penem de pace céiu. †† 15.21 Ésaie 52.15 ††† 15.22 Roma 1.13 ††† 15.25–26 Apostolo 24.17; 1 Korénit 16.1–4; 2 Korénit 8.1, 9.2,12

nina tice delé. ²⁷ †Lé te junihe pipwodéén kuti wo lépwò Macédoine me Akai, na lé picani telé ko ni delé. Be lé caa te junihe hegi mu kolé ni adéihi ne he ni pwon-imelé.

²⁸ Mepie é ne telé ati [ni mwani] ke é bo âdé pelewé, hemepie é â Espagne. ²⁹ ††Ke é caa temehi pie, é o pé lé céiikewé a adéihi na hején, mu ko Kériso.

Geé pwoitih me dong

³⁰ ††Lépwò bééng mu ko Kériso, é ilekewé pie, me geé te mwouu ko pwoitih te Padué me dong. Be nye caa pimu ibu ne ha a céihi ne ko Padaame Iésu Kériso, ne ha a pipwoééhe na e ne tenye na a Jenen Iitih.

³¹ Geé pwoitih, beme time lé uce pwotahi ne kong wo lépwò *Judé na muhi telé me lé céihi ne ko Kériso. Ke geé pwoitih mwo me de lépwò acéihi mu Iéusaléma, beme lé o hegi ehi a bépican na é pé nge céiilé.

³² Ke é alecehen, ke mepie nime Padué, ke é o âdé céi-ikewé ha a pipwodéén. Ke wieli o jan me é mwo mwaale pelewé.

³³ Wâé heme e mu pelewé ati wo Padué, pana e ne a péém! Amen!

Adéikewé

16 [Geé hegi ehi] Fébé ††, é béénye ne he nii Kériso. É toomwo dikone ne Cenkré †††, ke é toomwo na wâé nang. ² Geé hegieng ehi ne he nii Padaame, pwohewii a bwopwonen denye, wogenye ni acéihi. Ke geé picani ten ne he ni naado ati, be weeng, ke te junihe hiwon lépwona e picani telé, die kong mwo.

³ †††[Hiwon ni béén ne pelewé, na nimung me] geé pii telé mwo a bwocu tong:

Ne te [lu aadomwin] Priscile me Akilas, na geme pipenem ibu me woilu me de Kériso Iésu. ⁴ Time uce piwâ julú me lu ne ati, die ko a bwo patupwo ne ni mulihelu, me lu picani tong. Ke te junihe eanimung delu. Ke lé te temehilu mwo ati ne ni *puco te ni acéihi na time lé uce *Juif;

⁵ Me de ati ni acéihi na lé pitapitilé ne ha a pomwa telu.

Me de pa bééng, Épénète, pana e mi céihi ne ko Kériso, ne ha a province Asia;

⁶ Me de Maria, éna e te junihe penem me ubwo me dewé;

⁷ Me de Andronikus me Junias, lupwo âjiénung juif, na geme mu ibu he karépu. Lupwo *apostolo na te junihe pwonaado ne kolu ††, na lu te mi céihi kojaéo;

⁸ Me de Ampliatu, pa ju bééng ne he nii Padaame;

§ 15.27 1 Korénit 9.11 §† 15.29 Roma 1.11 §†† 15.30 2 Korénit 1.11; Kolosé 4.3; 2 Tésalonik 3.1 §† Fébé—Wieli wo weeng na e pé ngen a tii te Paulo nge céii lépwò acéihi ne Rome. §†† Cenkré—A pwomwo ubwo na a atii ne ong ne Korénit. §† 16.3 Apostolo 18.2 §† Lupwo apostolo na te junihe pwonaado ne kolu—ai Lé pii me wâé julú wo lépwò apostolo.

⁹ Me de Urbain, na gemu pipenem ibu me de Kériso; Me de pa ju bééng Stakis;

¹⁰ Me de Apelès, na e habwii ehi pie, pa apulie na e mwomwon ne ko Kériso;

Me de ni béén na élé ha a pomwa te Aristobule;

¹¹ Me de pa âjiénung, wo Érodion;

Me nina élé ha a pomwa te Narcisse, na lé céihi ne ko Padaame;

¹² Me de lu toomwo, wo Trifène me Trifose, na lu te junihe penem me ubwo me de Padaame;

Me ê ju bééng Perside, be wo ênaa mwo, ke e te junihe penem me ubwo me de Padaame;

¹³ †Me de Rufus, pa eabwé te Padué na pwonaado ne kon, ke me de nyaa ten, na é te pééng mwo me ê nyaa tong;

¹⁴ Me de Asinkrite, me Flégon, me Ermès, me Patrobas, me Ermas, me ni béé béénye ne ko Kériso na élé pelelé;

¹⁵ Me de Filolog me Juli;

Me de Néré, me ê pwaadeniin, Olimpa, me ati ni acéihi na élé pelelu.

¹⁶ ††Wogewé ati, ke wâé heme geé pipwobwocu tewé, pwohewii a bwopwonen de ni acéihi ne ko Kériso. Ke lé ne mwo lé ni bwocu tewé, ati ni puco te ni acéihi ne ko Kériso.

Bénebwéne pwooti

¹⁷ †Lépwo bééng ne he nii Kériso, [pwo a céiu naado na nimung me é pii tewé]: Geé pipwocile lépwona lé papiidenihi a puco tewé, ke lé pwobwonihni ni pwooti na geé caa hegi, ke lé tanahi ni céihi te ni béén. Geé nemwo pimu ibu me woélé. ¹⁸ ††Be time lé uce pieabwé te Kériso Padaame henye. Be lé te âcehi nina nimelé kon na ta † [me ni patén delé]. Ke lé te ju penem de pa apulie ne ko ni nalé, ke lé pihaami ni béén na mwo wahin ni céihi telé, ke mwo time jan me lé temehi ehi a bwomune a ta ††.

† 16.13 Maréko 15.21 †† 16.16 1 Korénit 16.20; 1 Pétéru 5.14

‡ 16.17 Mataio 7.15; Tit 3.10 †† 16.18 Filipi 3.19; 2 Pétéru 2.3

‡‡ Nina nimelé kon na ta—Grek: Ni nalé. ††† Ni béén na mwo wahin...a bwomune a ta—Grek: Gens simples.

¹⁹ ††Mepwo é ne kowé, ke é pipwodéén, be lé alihi ati ne ni apulie, pie geé piténeade Padaame. Ke wâé heme geé ali ehi, beme geé pwo ana wâé, ke me geé cela ko a ta. ²⁰ †Ke wo Padué, pana e ne a péém, ke e pwo me geé caaite *Caatana.

Wâé heme e adéikewé wo Padaame Iésu Kériso, ha a *pipwoééhe tice ja kon den. Adéikewé!

Pwobwocu te ni béén

²¹ †Lé pwobwocu tewé mwo wo Timoté, pa bééng ko penem, woélé me lépwo âjiénung juif, wo Lucius me Jason me Sosipater.

²² Ke woéo mwo, wo Tertius, na é tii a tii ce, ne he nii Paulo, ke é pwobwocu tewé, ne he nii Padaame na e neibukenye.

²³ ††Ke e pwobwocu tewé mwo wo Gaius, na é pimu pelen. Be lé pitapitilé nelang ati ni acéihi. Woilu mwo, ke lu pwobwocu tewé wo Éraste, pa awéihi mwani te a pwomwo ubwo, me Kartus, pa béénye ne he nii Kériso. { ²⁴ Wâé heme e adéikewé ati wo Padaame Iésu Kériso, ko a pipwoééhe tice ja kon den. Amen. }

Pipaunu Padué

²⁵⁻²⁶ ††Genye pipaunu Padué na e haabwén, ke é jena, ke é dieli mwo. Weeng na e bo pwo me mang a céihi tewé, ne ko a Pwooti Wâé ne ko Iésu Kériso na é patemehi. Be anaa kuti *a bwo niimihinaado ten na e ha aduwo mu ha atabuhi kon. Ke é jena ni, ke e pi-huôhi wo Padué pie, me pii beetihi a pwooti naa te ati ni bele na time lé uce Juif, ne he ni tii te lépwo pérofé-ta. Ke é ko anaa, na lé o bo céihi ne kon, me piténeadeeng.

²⁷ Nye pipaunu Padué na te céiu nang, weeng na e temehi ati ni naado. Ke a den *a wâé mu ko Iésu Kériso dieli mwo.

Amen!

‡‡‡ 16.19 Roma 1.8; 1 Korénit 14.20 § 16.20 Genèse 3.15

§† 16.21 Apostolo 16.1–2, 19.22, 20.4 §†† 16.23 Apostolo 19.9; 1

Korénit 1.14 §‡ 16.25 Roma 1.5; Éféso 1.9, 3.5,9; Kolosé 1.26

1 Korénit

nge céii lépwo

Atabuhi ko a tii

Woo na e tii a tii ce?

Wo Paulo, pa apostolo. Ke e mu pelen wo Sostène.

E tii éniile?

Ha awieme a jo 53 me 55, ha a benaamwon na e mu Éféso wo Paulo. (Omehi a 19.8–10.)

E tii me dee?

Te ni acéihi ne Korénit, a pwomwo ubwo ha amu Grèce. Ke e tabuhi a puco te ni acéihi nelang wo Paulo, he li e pipatemehi telé a Pwooti Wâé ko Iésu, ha a jo 51 ai 52. (Omehi a 1.1–18.) E tii ni tii na paa te lépwo Korénit wo Paulo, kehe icehi ana te ju alo cehi, na e ha a Tii Iitih. A tii ce, , ke a béalohe tii ten ne telé. (Omehi 5.9.)

É ko ade na e tii?

Korénit, ke a pwomwo ubwo na e mu mwonuhi a bajié, ke hiwon ni apulie na lé mu tuie nelang, na lé âbé mu he ni amu na e ité. Ke lé pébé ni bwomu telé, ne he ni pwoitih telé ânebun, na te ité koja a ju céihi ne ko Iésu Kériso. Be lé pii ne ni béén pie, te icehi a jenenye na junaado, kehe time uce a éénye; é ko anaa na wâé heme nye mulie hauli ko a éénye.

Hiwon ni acéihi na lé mu âcehi ni bwomu naa. Be lé niimihi pie, e o mu kolé ace bwo temehinaado celi e bwolu koja ni béén, ke lé pipaunulé kon. Ke time lé uce piténelé, ke lé pipiiden. Ke e tii wo Paulo, beme e pii telé pie, me lé nemwo wonaa ko a bwopwonen delé. E tii mwo, beme e pii telé ni naado na lé tahimwoeng kon (7.1,25; 8.1; 12.1; 16.1,12).

Ade ace âne a tii ce?

E pii wo Paulo pie, wâé heme céiu a pwonime lépwo acéihi (1.10–17). Time uce wâé heme nye piokéé, ke pé ni acéihi béénye nge ha a mwotautinaado (pwahamii tii 6). Nye nemwo pipule hauli, ke mulie ha a mulie hauli (pwahamii tii 5).

Nye nemwo pwo me piubwo genye ko ni bwo temehinaado tenye. Be a ju bwo temehinaado, ke e âbé mu ko Padué, ke time lé uce alihi temehi wo lépwo apulie pwo bwohemwo. A bwo mele te Iésu, me a bwo mulie cemwo ten mu ha amele, ke a naado na te junihe pwonaado ne kon, ne ha a céihi tenye (1.18–2.14; me pwahamii tii 5).

E pacémunikenye wo Paulo, ko a bwo mulie na iitih te pa ju acéihi ne ko Iésu, ne ha awieme ni apulie, na te ité a pwoitih me a bwomu telé. E caa tuwokenye wo Kériso, ke te tice celi e paciitih. Kehe icehi ana nye pipwocile, be time uce ati ni naado celi wâé me denye, ke e cuwokonye wo Paulo, beme time nye uce pwo ace naado celi me e tanahi a céihi te pace céiu béénye (pwahamii tii 8–10).

E pii a bwopwonen me nye pimu ibu. E patemehi ni âpipati, na e ne tenye wo Padué beme nye pipamwoiukenyé, ni acéihi. Nye nemwo pipwohauhi ko ni âpipati. Wâé heme nye pipwoiipih ni bwomu tenye heme nye pwoitih (pwahamii tii 11–12).

Ana junaado koja ati ni béé naado, ke a pipwoééhe. Wâé heme ati nina nye pwo, ke me e âbé mu ko a pipwoééhe (pwahamii tii 13).

E pii wo Paulo a bwomune a bwo mulie cemwo tenye, mu ha amele (pwahamii tii 15). A bwo mulie cemwo te Ié-su, ke pwohewii a atabuhi ko pitii âdaanu. Ke e bo tai pamulipikenye wo Padué.

A bwomune a tii 1 Korénit
 Pipwobwocu me pipwo-olé
 Time lé uce piténelé ni acéihi
 A bwo temehinaado te Padué
 Genye âcéi Kériso cehi
 Ni apostolo ke ni eabwé te Kériso
 Ni huô na ta hadenii ni acéihi
 E hegi wo Paulo ne te ni Korénit
 A pwooti ko piaten
 Nina time lé uce piaten
 Âpwailo me de ni déme duéé
 A huô tenye heme nye pwoiitihi ibu
 A bwo tawii puninye
 A wiinaado te Padaame
 Ni âpipati te a Jenen Iitihi me a pipwoééhe
 A bwo mulie cemwo mu ha amele
 Ni béé pihuô te Paulo ke bépinelé

Pipwobwocu

1 Woéo Paulo, na todeéo mu ko ana nime Padué me é *apostolo te *Kériso Ié-su, he wogemu me Sostène pa béénye. ² É pwotii lé céiikewé, ni acéihi ne ko Padué ne ha a pwomwo ubwo Korénit. Wogewé lépwona caa pipégalikewé, beme geé mulie me de Kériso Ié-su. Wogewé ke lépwo eabwé mu ko a pwoto te Padué; a puapulie na e pipégalikewé wo Padué. Be e wonaa te lépwona élé ati he ni piduaan na lé pwoiitihi ne he nii Padaame Ié-su Kériso, Padaame henye.

³ Ke me a *pipwoééhe tice ja kon, ke a péém, ke me e mu pelewé, mu ko Padué Caa tenye, ke wo Padaame Ié-su Kériso.

E adéikenye wo Padué @ na e pwaadeniin bé wo Kériso

⁴ É tee pipwo-olé te Padué ne kowé, mu ko ni âpipati te Padué, na e ne tewé ne he Kériso Ié-su. ⁵ É ne he Ié-su, ke geé tai hegi ni âpipati ten, ke ati a pwooti, ke a bwo temehi Padué. ⁶ Be a bwo patemehi Kériso, ke e mu mang pelewé.

⁷ Ke wonaa, te tice celi tieden pelewé mu ko ni âpipati na e ne, wogewé lépwona geé ucéihi a benaam-won na wo Padaame henye, Ié-su Kériso, ke e o tuie.

⁸ *Weeng na e bo pwo me geé cumang die ha a pwonehin. Ke o te tice celi lé o tautikewé kon, ha a tan na e bo âmwobé wo Padaame henye, Ié-su Kériso.

⁹ †Be e te pacuwohi nina e pii wo Padué, weeng na e todekewé, me geé pimulie ibu me pa Naîn, Ié-su Kériso, Padaame henye.

time lé uce piténelé ni acéihi

(Pwahamii tii: 1—4)

¹⁰ †É ilekewé ni bééng, ne he nii Padaame henye Ié-su Kériso, me geé piténekewé, beme te tice celi piehadeniiwé, ke me céiu ace pwonimewé, ke ace bwo niimihinaado tewé.

¹¹ Be é téne he lé cihe kowé wo lépwo apulie mu pele Kloé pie, pwo celi piehadeniiwé, wogewé ni bééng.

¹² †É pwo me é pii ngelang pie, muko pétaapwo wogewé, ke geé pii pie: «Woéo, ke pa béé Paulo», ke «Woéo, ke pa béé Apolos», ai «Woéo, ke pa béé Pétéru», ai «Woéo, ke pa béé Kériso.»

¹³ Wo Kériso, ke he e pipii mu kon? Ai wo Paulo paceli cemeiteeng ne ko a *kuricé me dewé? Ai, puukewé ne he nii Paulo?

¹⁴ †É pipwo-olé te Padué, be time é uce puu pace céiu mu hadeniiwé; te icehi Krispus, ke wo Gaius. ¹⁵ É mu ko anaa, ke time uce jan me lé pii pie, puulé ne he niing. ¹⁶ ††É puu mwo a pwomwoiu te Stéfanas, ke ni nehin. Ke time é uce temehi pie é puu lépwoce béén.

¹⁷ Be time e uce neéo bé wo Kériso beme é *puu apulie, kehe me é patemehi a *Pwooti Wâé; time uce é

† 1.8 1 Tésalonik 3.13, 5.23

†† 1.9 1 Tésalonik 5.24; 1 Ioane 1.3 ‡ 1.10 Filipi 2.2 †† 1.12 Apostolo 18.24–28; 1 Korénit 3.4 †† 1.14 Apostolo 18.8; Roma 16.23 ††† 1.16 1 Korénit 16.15

mu ko a bwo temehinaado te pa apulie. Beme a kuricé te Kériso, ke me time uce piticenaado ne kon.

A bwo temehinaado te Padué

¹⁸ †Be a pwooti ko a kuricé, ke a olo ne te lépwona élé ité koja Padué na lé patieden ni mulihelé. Kehe é ne tenye nina caa celuimikenye, ke a junuu Padué. ¹⁹ ††Be caa te tii ne he ni *tii iitihí pie: É bo pwo me tieden a *pitelang de lépwo apitelang, ke a bwo temehinaado te lépwona lé temehinaado.*

Ésaie 29.14

²⁰ †E wé wo pa apitelang me pa apwocémun me pana e cihe ehi? Wo Padué, ke e pwo me a bwo temehinaado te a bwohemwo ce, ke a pihauli.

Kériso, ke a bwo temehinaado ten

²¹ ††Be time uce jan me e temehi Padué na a bwohemwo, ko a bwo temehinaado ten naa. Ke wâé te Padué me e *celuimi lépwo acéihí mu ko a pune na pihauli ne te ni apulie na time lé uce céihí.

²² Be wo lépwo *Juif, ke lé ilehi ce *pipwojunuun, ke wo lépwona time uce lépwo Juif, ke lé hane a bwo temehinaado.

²³ ††Kehe wogeme, ke geme patemehi Kériso, pana cemeiteeng ne ko a kuricé. É ne te lépwo Juif, ke te junihe time uce wâé ne kolé anaa; ke lépwona time uce lépwo Juif, ke a pihauli ne telé.

²⁴ †††Kehe é ne pele lépwona e todelé, heme lépwo Juif, ai lépwona time uce lépwo Juif, wo Kériso, ke pa junuu Padué, ke a bwo temehinaado te Padué.

²⁵ †††Be a piolo te Padué, ke te junihe pitelang koja a pitelang de ni apulie. Ke a bwo tice niihe Padué, ke te junihe pwo niihen koja a niihe ni apulie.

E pipégali pana tice niihen

²⁶ †Geé omehi hadeniiwé, lépwo bééme, wogewé na e todekewé wo Padué. Be time uce hiwon ne pelewé, lépwoceli lé nihe temehinaado ne he ni bwo alihi nen de ni apulie, ai lépwoceli nihe pwonaado ne kolé, ai lépwoceli nihe pwo delé.

²⁷ Kehe e pipégali ni naado na piticenaado ne kon wo Padué, beme e patanimi lépwona lé temehinaado. Ke e pipégali ni naado na tice niihen ne pwo a bwohemwo, beme e patanimi nina pwo niihelé. ²⁸ Ke e pipégali nina wahin, beme pétaabwon ni naado na nihe ubwo. Ke e pipégali nina téétihí ne pwo bwohemwo, nina nihe piticenaado ne kon. ²⁹ ††Be me wonaa, ke me te tice celi lé pipaunulé ne he pwahamii Padué.

† 1.18 Roma 1.16 †† 1.19 Ésaie 29.14 † 1.20 Job 12.17; Ésaie 19.12, 33.18, 44.25 †† 1.21 Mataio 11.25 †† 1.23 Roma 9.32; 1 Korénit 2.14 ††† 1.24 Kolosé 2.3 ††† 1.25 2 Korénit 13.4 † 1.26 Mataio 11.25; Cang 2.5 †† 1.29 Éfeso 2.9

³⁰ †††Weeng na e pwo me céiu gewé me Kériso Iésu, ke wo Kériso pa bwo temehinaado tenye na e âbé mu ko Padué. É mu kon na e pwo me mwomwon genye wo Padué, ke e pipégalikenye me nye den, ke e tuwok-enye mu ha a ta.

³¹ ††Pwohewii ana tii pie: *Wo pana nimen me e pipii den, ke wâé heme e pipii den ne he Padaame.*

Jérémie 9.23

É patemehi a bwo mele te Iésu

2 Lépwo bééng, é âdé pelewé, beme é patemehi tewé a bwo niimihinaado te Padué na neduwohi ha atabuihi kon ††. Ke time é uce âdé patemehi tewé ni naado na e pele Padué ko ce pwooti celi binyi, ai ha ace bwo temehinaado celi piwéden. ² Te tice aceli nimung me é temehi ne pelewé, kehe te icehi Iésu Kériso, wo Iésu Kériso, pana cemeiteeng ne ko a *kuricé.

³ ††Ke é ne ânebuhewé, ke te junihe piwahin jo, ke abwobwo jo, ke cenim jo. ⁴ ††A pwooti tong, ke a bwo pacémunihi tong a Pwooti Wâé, ke time uce piwien me a bwo cihe ha a bwo temehinaado te pa apulie. Kehe a junuu a *Jenen Iitihí na e pwo me pwaale ko nina é pii. ⁵ Beme a céihí tewé, ke me time e uce âbé mu ko a bwo temehinaado te lépwo apulie, kehe é mu ko a junuu Padué.

Time lé uce temehi ne ni apulie

⁶ Geme ko cihe ko a bwo temehinaado na geme caa patemehi ne te lépwona caa ubwo jélé ne ha a céihí. Ke time uce a bwo temehinaado pwo a bwohemwo, ke time uce a bwo temehinaado te lépwo apihuôhi na a ta ††† ne pwo a bwohemwo, na bo ciitililé taabwon. ⁷ Geme cihe ko a bwo temehinaado te Padué: a bwo temehinaado na neduwohi, na e piwâam kon ânebuhe atabuihi ko a bwohemwo, beme e ne tenye a bwo ubwo na a wâé ten.

⁸ Mwo te tice lépwoceli lé pihuôhi a ta ne éni pwo bwohemwo celi lé temehi anaa. Be hemepie aceli lé te temehi, ke me o time lé uce cemeite Padaame he *a wâé.

⁹ †††Kehe, pwohewii ana tii pie:

Time e uce alihi nina wonaa na a naamii pa apulie.

Time e uce téne na a pwojéenen.

Time e uce temehi na a pwonimen.

E pipwopweehi ninaa wo Padué, me de nina nihe eânimelé ten.Ésaie 64.3

††† 1.30 Jérémie 23.5–6 †† 1.31 Jérémie 9.23 ††† A bwo niimihinaado te Padué na neduwohi ha atabuihi kon—ai A pwooti ko Padué. †† 2.3 Apostolo 18.9; 2 Korénit 10.1 †† 2.4 1 Tésalonik 1.5 ††† Lépwo apihuôhi na a ta—Lépwo apihuô, ai ni duéé na lé péélé. ††† 2.9 Ésaie 64.3

Etenye a bwo niimihinaado te Kériso

¹⁰ Kehe e habwii tenye anaa wo Padué, ko a Jenen Iitihí. Be e temehi ati ni naado na a Jenen Iitihí, die ko ni naado na e bwolu ne he pwonime Padué.

¹¹ Be he woo, mu ko ni apulie, celi e temehi ni bwo niimihinaado na e ha aduwo ne te pa apulie? Te icehi a jene pa apulie na e kon. Ke wonaa mwo ne ko Padué: Te tice paceli e temehi ni bwo niimihinaado te Padué, hemepie time uce a Jene Padué.

¹² Kehe wogenye, ke time genye uce hegi a jene a bwohemwo, kehe a Jenen na e âbé mu ko Padué, be me genye temehi ni âpipati na e te ju ne tenye wo Padué.

¹³ Ke geme cihe ko ni âpipati tice ja kon naa, time uce é ko ni pwooti na pacémunihi na a bwo temehinaado te pa apulie, kehe é ko ana e pacémunihi na a Jenen Iitihí. Ke geme wonaa a bwo cihe ko a Jene Padué, be me geme pii nina e te âbé mu ko Jenen naa †.

¹⁴ Wo paceli e te ju niimihi cehi ne ha a bwo niimihi-naado te pa apulie, ke time e uce hegi nina e âbé mu ko Padué, be a olo ne ten. Ke pwocoon me e temehi ninaa, be te a Jenen Iitihí na e tauti ninaa. ¹⁵ Pana eten a Jenen Iitihí, ke jan me e tauti ati, kehe weeng, ke o te tice paceli e o tautieng. ¹⁶ ††Be caa te tii ne he ni tii iitihí pie:

Woo celi e temehi

a bwo niimihinaado te Padaame?

Woo paceli me e pacémunieng?Ésaie 40.13

Kehe wogenye, ke etenye a bwo niimihinaado te Kériso.

Genye âcési Kériso cehi

3 Lépwó bééng, é he é cihe tewé, ke time é uce cihe tewé pwohewii ne ko lépwona lé cési, kehe pwohewii ne ko lépwona time uce e kolé a *Jenen Iitihí, pwohewii ne ko ni cuwo ewa ne he Kériso.

² †[É he li é pacémunikewé] ke é ne tewé a *lait*, beme geé údu, kehe time uce a mewota, be mwo te time uce jan me geé wii. Ke é jenaa mwo, be mwo teko piwien.

³ ††Be geé mwo te pitaaba, ke mwo te pwo ni naado na e he pipwohewé. Ke anaa, ke geé pipwohewii ni apulie pwo bwohemwo [na time lé temehi Kériso].

⁴ ††Be heme e pii wo pace céiu pie: «Woéo, ke é âcési Paulo», ke wo pa céiu, ke e pii pie: «Woéo, ke é âcési Apolos», ni bwo cihe tewé, ke pwohewiin heme time geé uce temehi Padué.

† Beme geme pii... ai Beme geme pii te nina e kolé a Jenen naa.
†† 2.16 Ésaie 40.13 † 3.2 Ébéru 5.12–13; 1 Pétéru 2.2 †† 3.3 1 Korénit 1.10–11 †† 3.4 1 Korénit 1.12

Wogemu lupwo eabwé

⁵ ††He wooélé wo Apolos, ke he woo wo Paulo? Wogemu, ke te ju lupwo eabwé, na é mu komu, na geé cési. Ke gemu penem ne he ni bwomunen na e muko pétaapwo ne temu wo Padaame. ⁶ É cemi, ke e puu wo Apolos, kehe te wo Padué na e pwo me cim.

⁷ Ke me wonaa, ke time uce wo paceli e cemi, ai pana e puu, celi pipwonaado ne kon, kehe wo Padué na e pwo me cim. ⁸ ††Pana e cemi, ke wo pana e puu, ke te piwielu, kehe lu bo muko pétaapwo hegi ni cemelu, ne he ni bwomune ni penem delu. ⁹ Be geme penem me Padué †.

Wogewé a mwa te Padué

Ke wogewé a ninaado te Padué, ke a mwa te Padué. ¹⁰ É ne a paan pwohewii a bwo temehinaado te pa apwo mwa, te âcehi ni âpipati †† te Padué na e ne tong. Ke e penem pwon wo pa céiu. Ke wâé heme geé muko pétaapwo pipwocile a bwo bahi ne pwon. ¹¹ †††Be te tice paceli me e ne ace céiu paan koja a paan na caa ne, na wo Iésu Kériso.

¹² Hemepie pwo paceli e bahi ne pwo a paan, ke jan me e bahi ko ni mwani megele, ni mwani pwojo, ni péi na junihe pwoonaado ne kon ††, ni ba-acuwo, ai ni bwolihe meté, ai ni meté †††.

¹³ ††O habwii muko ni pétaapwo penem, ke bo ptemehi ha a tan na e bo tauti ni apulie hen wo Padué. Be o habwii ne ha a miû, ke é ne ha a miû, ke o habwii a bwomune ni pétaapwo penem. ¹⁴ Mepie wo pace céiu, ke me e bahi ne pwo a paan, ke me e cumang ne ko a miû a penem den, ke e o hegi ace cemen. ¹⁵ Hemepie a penem den, ke mepie éle, ke e o patieden a cemen ††. Kehe weeng, ke o celuimieng, kehe o pwohewiin heme e hagéi ace miû beme e cela.

E mu kowé a Jene Padué

¹⁶ †††He time geé uce temehi pie wogewé, ke a *mwaiitihí te Padué, ke a Jene Padué, ke e mu kowé?

¹⁷ Hemepie pwo paceli e tanahi taabwon a mwaiitihí te Padué, ke e bo tanahieng taabwon wo Padué. Be iitihí a mwaiitihí ten, ke wogewé a mwaiitihí naa.

††† 3.5–6 Apostolo 18.4,11 ††† 3.8–9 Mataio 13.3–9; Éféso 2.20–22 † Me Padué—ai Me de Padué. †† †pipati—A niihen me a bwo temehinaado ne ko ni penem de Padué. Omehi note
††† 3.11 Ésaie 28.16; 1 Pétéru 2.4–6 †† Mwani megele...pwonaado ne kon—Ocine ko ni naado na habwii ne ko ni penem de Padué, be ni naado na mu dieli mwo. ††† Ni ba-acuwo...ni meté—Ocine ko ni naado na time uce jan, be o éle ne ha a miû. †† 3.13 1 Korénit 4.5 †† Patieden a cemen—ai Patieden ati a ceme ni penem den. ††† 3.16 1 Korénit 6.19; 2 Korénit 6.16

Geé mu ko Kériso

18 Ke me te tice paceli e te pipwohuô ten mwo: Hemepie pwo pace mu hadeniwé, ke me e piniimihi pie e temehinaado ne ha a bwomu he benaamwon ce, ke me e olo beme e bo temehinaado. 19 †Be a bwo temehinaado ne pwo a bwohemwo, ke a olo ne pele Padué. Be tii pie: *E imwi lépwo atemehinaado he ni pipwohuô kolé.*

Job 5.13

20 ††Ke caa tii mwo pie: *Wo Padaame, ke e te temehi ni bwo niimihinaado te lépwo apitemang, na te ju tice-naado ne kon.*

Psaume 94.11

21 É mu ko anaa, ke wâé heme te tice paceli me e pi-paunueng mu ko pace céiu apulie, be tai ni naado, ke tai ni dewé: 22 hemepie wo Paulo, hemepie wo Apolos, hemepie wo Pétéru; a bwohemwo, a mulie, a mele, a benaamwon ce, ai ana e bo âbé. Ati, ke tai ni dewé. 23 Ke wogewé he Iésu Kériso, ke wo Kériso, ke e he Padué.

Ni apostolo ke ni eabwé te Kériso

4 Wogewé ati, ke wâé heme geé temehi pie wogemu [me Apolos] † ke gemu lupwo eabwé te Kériso, ke lupwo apihuô na e ne temu me gemu patemehi nina e ha aduwo na e pele Padué. 2 ††Ana e ilehi koja lép-wona e ne telé a pihuô, ke me lé penem ehi me den, ke me lé cumang.

3 Te jan me geé tautié, ai a mwotautinaado te pa apulie. Kehe woéo, ke time é uce pipéce ne ko anaa. Be woéo, ke time é uce pitautié. 4 É piniimihi pie te tice aceli me é pipé ne kong kon, kehe anaa, ke time uce a bwopiinen pie wâé jo. Be wo Padaame na e tautié.

5 †Geé nemwo tauti ânebuhe a benaamwon na e o âbé wo Padaame. Weeng pana e bo pwo me pwéélang ko nina neduwohi ha a melepiing. E bo habwii ni bwo niimihinaado na lé neduwohi ne ni apulie, ne he ni pwonimelé. Ke muko pétaapwo ni apulie, ke lé o hegi mu ko Padué, ni pwooti beme cemelé ko nina lé pwo.

É ko ade na geé pipii dewé?

6 ††Lépwo bééng, é ne ko ana é pii, ke é péékemu me Apolos beme lupwo béhabwiinen dewé. Nimung me é picaa tewé a bwopiine a pwooti ce: «Te tice celi piwéden da koja ana tii.» Beme o te tice paceli e o pipii den, heme e pipégali pace céiu apihuô, koja pace céiu apihuô.

† 3.19 Job 5.13 †† 3.20 Psaume 94.11 † Wogemu me Apolos—ai Wogeme. Wiel e niimihi wo Apolos me Pétéru me lépwo béén. Omehi 1 Korénit 3.22. †† 4.2 Luka 12.42 †† 4.5 1 Korénit 3.8 ††† 4.6 Roma 12.3

7 ††Be he ade aceli e pwo me go piewa koja lépwo béén? Tai nina etem, ke nina e ne tem wo Padué. Ke é hemepie go hegi, ke é mu ko ade na go pipii dem pwohewiin heme time go uce hegi?

8 Kona geé niimihi pie caa pwo ne tewé ati nina nimewé kon? Caa pwo dewé? Caa wogewé lépwo daame, kehe time uce wogeme? Hemepie geé caa te daame, ke nimeme me genye tai daame!

9 Kehe é ne tong, ke wo Padué, ke pwohewiin heme e nekeme wogeme lépwo *apostolo, ha a bénebwéne atebwo, pwohewii lépwo apwocuhinaado ko a mele. Éa, lé alo kome ati ne pwo bwohemwo, ne ni *âcélo ke ni apulie, ne he ni picani teme na ubwo.

10 Geme olo wonaa mu ko Kériso, kehe wogewé, ke lépwo acéihi na geé temehinaado. Tice niiheme, kehe wogewé, ke pwo niihewé. Lé te nihe éewo kowé, kehe wogeme, ke lé téétikeme.

11 †Dieli jena na ni, ke meneme, nimeme me game údu, ta ni epwéneme. Lé pwotahinaado ne kome, ke pwocoon me game mu he celi céiu lang. 12 ††Mwaale game me game penem ko ni ime. Lé cihe me ta ne kome, ke game te adéilé. Lé pwo me game mu he ni picani, kehe game te pé ne kome.

13 Lé pii nina ta ne kome, kehe game pamwoiu ni béén. Dieli jena, ke é ne te ni apulie, ke pwohewiin heme wogeme ni cabin de a bwohemwo, pwohewii ni naado na alili, na lé tahi taabwon.

Ni naîng ne ha a céihi

14 Time é uce tii ninaa beme tanim gewé, kehe é patemehi tewé, wogewé ni naîng ne ha a céihi, na eân-imumung dewé. 15 ††Be hemepie 10000 lépwoceli lé pacémunikewé me geé âcéi Iésu Kériso, kehe te céiu jo pa caa tewé. Be woéo, pana é ne tewé a mulie te Iésu Kériso, he é patemehi tewé a Pwooti Wâé. 16 ††Ke é ile, ke wâgo kowé, me geé pwohewiié.

17 ††É mu ko anaa, na é ne lé Timoté, pa naîng ne ha a céihi, na nihe eânimumung den, pana e cumang ne he Padaame. E bo paniimihi tewé ni pwaadeniing he é âcéi Iésu Kériso, na é pacémunihi ati ne he ni *puco te ni acéihi.

Pipwocile!

18 Ke lé pipii delé wo lépwo béén, be lé niimihi pie, time é bo uce âmwo lé ne pelewé. 19 Kehe time uce bwolihi, ke é o âdé pelewé, hemepie te nime Padaame. Ke é bo temehi a junuu aceli jan me lé pwo wo lépwo apipii delé. 20 ††Be a *Mwametau te Padué, ke time uce a pwooti cehi, kehe é ne ha a junuu Padué. 21 Ade aceli nimewé kon? Me é âdé céiikewé imi a bwaliwota, ai a

††† 4.7 Roma 12.6 § 4.11 2 Korénit 11.23–27 †† 4.12 Mataio 5.44; Apostolo 18.3; 2 Tésalonik 3.8 ††† 4.15 Galat 4.19 †† 4.16 Filipi 3.17 ††† 4.17 Apostolo 19.22 †† 4.20 1 Korénit 2.4

pwonime na oba ko a pipwoééhe, ke a jenen na bwala?

ni huô na ta hadenii ni acéihi

(Pwahamii tii: 5—6)

Lé pipule hauli ni béé acéihi

5 †Geme téne he lé ko pipii ngen pie, pwo ni béén mu pelewé na lé mulie ne ha a ta. Be e pé ê mwode pa caa ten wo pace mu hadeniiwé! Kehe time genye uce téele tooli ace naado celi wonaa pele lépwona time lé uce temehi Padué, be te junihe ta!

² Ke geé te junihe pipii dewé! Kehe, me geé ko mu ha a piwahin! Ke me geé o neeng ité mu hadeniiwé.

³ †Be é ne tong, ke tieéo pelewé, kehe woéo pelewé ha a jenung, ke é caa tauti pa apulie na e pwo anaa, pwohewiin heme teko woéo pelewé. ⁴ Geé pimu ibu ne he nii Padaame Iésu, ke é bo mu pelewé ha a jenung ke a junuu Padaame henye, Iésu. ⁵ †Ke geé ne pa apulie naa te *Caatana †! Beme ana nimen kon na ta, ke o pétaabwon, ke hemepwo a jenen, ke bo *celuimi ha a tan na e bo âbé hen wo Padaame Iésu.

⁶ †Time uce wâé a bwo pipii dewé! He time geé uce temehi pie a cuwo nahi nyaa te pwoloa, ke e pwo me cibú ati a pwoloa?

⁷ ††Geé pétaabwon a ta na pwohewii a ukéiu nyaa te pwoloa, beme wogewé a pwoloa na mwo coho, na te tice nyaa ten, ana geé caa ko mu hen. Be wo Iésu, ke caa neeng me pa *âpwailo, pwohewiin heme pa muto ko *Pacika †† tenye.

⁸ †É mu ko anaa, ke genye pituume ha a Pacika ko a pwoloa na tice nyaa ten, ne ha a pwonime na céiu, ke juuju. Genye nemwo eni a pwoloa na pwo ko a ukéiu nyaa te pwoloa, a nyaa te pwoloa ko a bwomu tenye na ta.

Nemwo pabéélé!

⁹ Ha a céiu tii, ke é pwotii lé céiikewé pie: Geé nemwo piténekwé me nina lé pipule hauli me ni béén. ¹⁰ Time uce nimung me é cihe ati ko lépwona élé pwo bwohemwo na ta ni mulihelé, ai lépwo abune, lépwo atapi, ai lépwona lé pipaunuhi ni *dème duéé helé. Be hemepie wonaa, ke wâé heme geé wie mu ha a mulie na e mu pwo bwohemwo! ¹¹ ††Ùhu! Ke é tii pie:

† 5.1 Lévitique 18.7–8; Deutéronome 23.1 †† 5.3 Kolosé 2.5 ‡ 5.5 1 Timoté 1.20 †† Geé ne pa apulie naa te Caatana—Wielé lé o pawieeng mu ha a puco te ni acéihi, ucéihi a benaamwon na e bo pitaatééhi a mulihen. Omehi 1 Timoté 1.20. †† 5.6 Galat 5.9 ††† 5.7 Ésaie 53.7; 1 Pétéru 1.19 ††† Ni Juif, ke lé tahi taabwon a ukéiu nyaa te pwoloa, ânebuhe a Pacika. A nyaa te pwoloa, ke a ocine ko ni ta na neduwohi ne konye. Omehi Luka 12.1. § 5.8 Deutéronome 16.3 †† 5.11 2 Tésalonik 3.6; Tit 3.10

Hemepie pwo paceli pii kon pie pa acéihi béénye, ke me e mulie ne ha a ta, ai pa atapi, ai e pipwoun de ni déme duéé, ai e piciheta, ai e tee ûdu, ai eânimen ko a mwani, ke geé nemwo piwiinaado me pa apulie naa!

¹²⁻¹³ ††Be he a penem dong me é tauti lépwona time uce lépwo acéihi? Te wo Padué na e bo te tautilé!

Wogewé, ke wâé heme geé tauti ni bééwé ko a céihi. Be caa te tii ne he ni tii iitihii pie: *Geé pawie pana ta ni huô ten mu hadeniiwé.*

Deutéronome 17.7

Lé pipééle ni béé acéihi

6 Hemepie pwo pace pibééwé celi pwo aceli piehadeniilu me pace céiu, ke e o te pé nge ha a mwotautinaado te lépwona time lé uce céihi, koja lépwo acéihi. Woté? ² ††He time geé uce temehi pie lépwo acéihi, ke lé bo tauti a bwohemwo? Ke hemepie geé tauti a bwohemwo, ke kona time uce jan ne kowé me geé tauti ni cuwo nahi naado?

³ He time geé uce temehi pie genye bo tauti mwo lépwo *âcélo ††? Ke hemepie wonaa, ke jan me genye tauti ni naado ha a mulie ce!

⁴ Hemepie pwo celi me tauti ne ha a bwomune a mulie ce, ke geé pé me lépwo atautinaado tewé lépwona tice penem delé mu hadenii ni acéihi! ⁵ É cihe beme tanim gewé. Woté? He te tice paceli e temehinaado hadeniiwé? He te tice paceli te ju céiu nang celi jan me e tauti ne hadeniiwé lépwo béén? ⁶ Kehe geé â he mwotautinaado, é ne ânebuhe lépwona time uce lépwo acéihi!

Geé nemwo wonaa!

⁷ Ke anaa, ke geé caa pipweéo, be time uce wâé ne pelewé, me geé piâ he mwotautinaado. É mu ko ade na time geé uce mu he ni picani ne ko lépwona lé pwo ana ta? É mu ko ade na time geé uce necu me lé bunekewé? ⁸ Ke wogewé na geé pwo nina time uce wâé, ke geé bune lépwo bééwé. ⁹ ††Ke geé pipwocile! He time geé uce temehi pie wo lépwona ta jélé, ke time lé o uce taa ha a *Mwametau te Padué?

Lépwona lé pwotahinaado ne ko ni éélé me lépwo béén;

Lépwona lé paunuhi ni *dème duéé;

Lépwo apibune;

Lépwo aiu na lé te pipule mwo me ni aiu;

¹⁰ Lépwo abune;

Lépwo atapi;

Lépwona lé tee ûdu;

Lépwona lé pii me ta lépwo béén;

††† 5.13 Deutéronome 13.6, 17.7 †† 6.2 Pii Beetihii 3.21 ††† Genye bo tauti mwo lépwo âcélo—ai Genye bo pihuô ne ko ni âcélo, ai Genye bo pihuô ne ko ni duéé me nye tautilé. A pwooti âcélo he pwo grek, ke wieli ni âcélo te Padué, ai ni duéé. †† 6.9–10 Galat 5.19–21; Éféso 5.5; Pii Beetihii 22.15

Lépwona lé pwotahi ne ko lépwo béén.

¹¹ †Ke lé âbé mulang wo lépwo béén mu hadeniwé. Ke e puukewé mu he ni ta pwo tewé wo Padué. Ke e pipégalikewé, ke e pwo me mwomwon gewé ne he nii Padaame Iésu Kériso, ke é ko a Jene Padué.

Genye pipwoiipihi ni éénye

¹² ††Geé pii pie: «Tai ni naado, ke te tice aceli paciitihhi.» Kehe time lé uce pamwoiu ni béénye. Tai ni naado, ke tice aceli paciitihhi, ke te jan ne kong me é pwo, kehe te muhi tong me é *apenem tice ja kon ne ko ace céiu naado. ¹³ †Geé pii mwo pie: «A wiinaado, ke a bépwo-nen ne ko a nanye, ke a nanye, ke a bépwo-nen ne ko a wiinaado ††.» Kehe wo Padué, ke e o tai tanahi taab-won a nanye, ke a wiinaado. A éénye, ke time uce a bépwo-nen ne ko a ta, kehe a bépwo-nen ne ko Padaame, ke wo Padaame, ke é ne ko a éénye. ¹⁴ ††Wo Padué, ke e pwo me e mwojuia mu ha amele wo Padaame Iésu, ke e bo pwo me nye bo mwojuia mu ha amele, mu ko a junuun.

¹⁵ †††He time geé uce temehi pie ni ééwé, ke ni de Iésu? É bo pé ace céiu duaa a éé Kériso, beme é pwo ace céiu duaa éé ê toomwo pwo-pwaaden? Ôhu! Te junihe pwocoon me wonaa! ¹⁶ †††He time geé uce temehi pie pana lu pipule me ê toomwo pwo-pwaaden, ke céiu a éélu? Be caa pii pie: *Ke caa céiu julu.*

Genèse 2.24

¹⁷ †Kehe wo pana céiu julu me Padaame, ke céiu a jenelu.

¹⁸ Geé cela ko ni ta na e pwo me mwiihi a éénye. Ni béé ta, ke te e ité koja a éénye. Kehe pana e pwo a ta na e pwo me mwiihi a één, ke e te pipwotahi ne ko a één. ¹⁹ He time geé uce temehi pie a ééwé, ke a mwa te a *Jenen Iitihhi na e kowé, na e ne wo Padué? Caa time geé uce pihuôhi a ééwé, ²⁰ ††be ubwo a cuhi a bwo péékewé. Geé ne te Padué *a wâé ten, ne he ni ééwé!

e hegi wo paulo ne te ni korénit

(Pwahamii tii: 7—14)

A pwooti ko piaten

7 Mepwo é ne ko ni naado na geé pwotii bé céiié ne kon, ke wâé ne ko pa aiu heme time e uce piaten ^{††}. ² Ke me e pile a pibune, ke wo lépwo aiu, ke wâé

† 6.11 Tit 3.3—7†† 6.12 1 Korénit 10.23 † 6.13 1 Tésalonik 4.3—5 †† A wiinaado, ke a bépwo-nen ne ko a nanye... A bwopiinen pie, lé niimihi pie ticenaado ne ko nina lé pwo ne ko ni ééle. †† 6.14 Roma 8.11; 1 Korénit 15.20; 2 Korénit 4.14 ††† 6.15 Éféso 5.30 ††† 6.16 Mataio 19.5 § 6.17 Ioane 17.21—23; Roma 8.9—11 §† 6.20 1 Korénit 7.23; 1 Pétéru 1.18—19 §†† Time e uce piaten—ai Time lu uce pipule me êce céiu toomwo.

heme muko pwo ce mwodelé, ke ni toomwo, ke wâé heme muko pwo ce aiu helé.

³ Ke pa aiu, ke me e pwo a penem den ne ko ê mwoden, ke wonaa ne ko ê toomwo ne ko pa aiu hen. ⁴ Ê toomwo, ke pwocoon me e pwo aceli nimen kon ne ko a één, be a één, ke a de pa aiu hen. Ke wonaa ne ko pa aiu; ke pwocoon me e pwo aceli nimen kon ne ko a één, be a één, ke a de ê mwoden.

⁵ Geu nemwo pitapikeu kou beme céiu geu, lu aadomwin. Kehe te ju icehi, heme geu pwoiitihhi, ha ace céiu benaamwon. Ke é alecehen, ke geu mwojuia, be koli time geu uce cile ehi a ééu, ke koli e bo taceb-wénikeu wo *Caatana. ⁶ Ana é ko pii, ke time uce ace huô, kehe ana jan me é ne tewé.

⁷ Nimung me geé tai pwohewiiéu [na te tice mwodong]. Kehe genye te muko hegi mu ko Padué, nina e ne: Pa céiu, ke e hegi ace céiu bwomunen, ke wo pa céiu, ke uce ace céiu bwomunen.

Muko pihuô te ni muko apulie

⁸ Kehe é pii te nina time lé uce piaten, ke ni depwele ^{††} pie, wâé ne kolé heme lé mu pwohewiiéu. ⁹ †††Ke hemepie time uce jan me geé cile a ééwé, ke geé piaten! Wâé heme geé piaten, kojan heme tee âbé ne he pwonimewé a pibune.

¹⁰ ††É ne pele lépwona lé caa piaten, ke woni ana é pii; time uce woéu, kehe wo Padaame: Pa apiaten, ke me time e uce cibéé ê mwoden; ke ê toomwo, ke me time e uce engen koja pa aiu hen. ¹¹ Hemepie lu pimú ité me pa aiu hen, ke e mu heme time e uce piaten, ai lu pipwopweehi me pa aiu hen. Ke pa aiu, ke me time e uce ne ê mwoden.

¹² Kehe é ne ko ni béén, ke é pii woéu, kehe time uce wo Padaame: Hemepie pa acéihhi, ke mepie pwo êce mwoden celi time uce ê acéihhi, ke me nime ê mwoden me e mu pelen, ke me time e uce ne ê mwoden. ¹³ Ke é hemepie pwo êce toomwo celi pa aiu hen, ke time uce pa acéihhi, ke me nime pa aiu hen me e mu pelen, ke me time e uce ne pa aiu hen.

¹⁴ Be pa aiu na time e uce céihhi, ke e mwonu Padué, wonaa mu ko ê mwoden. Ke mepwo ê toomwo na time e uce céihhi, ke e mwonu Padué, wonaa mu ko pa aiu hen na e céihhi. Hemepie time uce wonaa, ke ni naîwé, ke o pwohewii nina élé ité koja Padué ^{††}. Kehe a ju bwomunen, ke te élé mwonu Padué.

¹⁵ †††Ke hemepie pwo paceli time e uce céihhi, ke mepie nimen me e engen, ke te jan me e pwo. Kehe é ne ha a bwomunen naa, ke pa acéihhi, pa aiu, ai ê toomwo, ke caa time o uce céiu julu, be e todekewé wo Padué me geé mulie ne ha a péém ^{†††}. ¹⁶ ††††Wogo ê acéihhi, ke é ne ha a muliheu, ke o te jan me go *celui-

§† Depwele—Veuve. §†† 7.9 1 Timoté 5.14 §† 7.10 Mataio 5.32, 19.9 §† Nina élé ité koja Padué—Grek: Ana nye mwiihi ke ana time uce wâé te Padué. §†† 7.15 Roma 14.19 §†† Caa time o uce céiu...

mi pa aiu hem? Ke wogo pa acéihi, ke é ne ha a muli-heu, ke o te jan me go celuimi ê mwodem ?

Geé mulie ne ha a bwomunen @ na e ne tewé

¹⁷ Wâé heme geé mulie ne ha a bwomunen na e ne tewé wo Padué, ânebuhe a bwo todekewé. Ke wonaa ana é pii ati te ni acéihi. ¹⁸ É he e todeko wo Padué, ke he te *tegoop go? Go te mu ha a bwomunen naa. Time uce tegoop go? Go nemwo uce pwo me pwote-goop tem!

¹⁹ ††Be te ju piticenaado ne ko a tegoop, ai me time uce tegoop. Ana pwonaado ne kon, ke me pwo ana nime Padué kon. ²⁰ Nye te pétaapwo mu he ni bwomu tenye, he e todekenye wo Padué.

²¹ É he e todeko wo Padué, ke he go mwo te mulie ha a penem tice ja kon? Go nemwo uce pihanenaado ne ko a bwomunen naa! Ke hemepie jan me go mulie hemepie te tice celi e imwiko, ke go âcehin, be wâé.

²² *Be pa *apenem tice ja kon na e todeeng wo Padaame, ke e caa te ju pimu ngen, caa pa apulie te Padaame.

Ke pa apulie na caa ju pimu ngen na e caa todeeng wo Padaame, ke caa pa apenem tice ja kon de Kériso.

²³ Ke e pwocuhikewé wo Padué ko a cuhin na junihe ubwo, beme e pawiekewé mu he na geé mu lang. Geé nemwo â penem tice ja kon ne pele lépwo apulie.

²⁴ Lépwô bééng, genye te pétaapwo mu he bebenihe Padué, ne ha a bwomunen na nye te mu hen he e todekenye.

Nina time lé uce piaten

²⁵ Mepwo é ne ko nina time lé uce piaten, ke te tice aceli é hegi mu ko Padué. Ke é ne ha a bwo niimihi-naado tong: a bwo niimihinaado na jan me mwom-wohi. Be wo Padaame, ke wâé nang ne kong.

²⁶ É piniimihi pie wâé ani, wonaa mu ko ni picani na genye mu hen jena: Wâé ne konye, heme nye te mu he ni pétaapwo bwomu tenye. ²⁷ Hemepie go piaten me êce toomwo, ke go nemwo uce hane me go neeng. Mepie time go uce piaten me êce toomwo, ke go nemwo uce hane êce toomwo. ²⁸ Ke hemepie go piaten, ke time go uce pwo aceli ta. Ke mepie e piaten êce ewa toomwo, ke te tice ta celi e pwo. Ke hemepie lé piaten, ke lé bo mu he ni picani ne he ni mulihelé téteda he ni tan †. Kehe woéo, ke time uce nimung me wonaa.

²⁹ Ke é pii ani, wogewé lépwô bééng: Caa cuwo a be-naamwon ne ko ni nehi tan, ke wo lépwona pwo ni

ai Be wâé te Padué heme lu piténelu, ai Kehe me jan ne kou, ke geu pimu ibu. Be wo Padué, ke e todekeu, beme geu piténekeu. §§§ 7.16 1 Pétéru 3.1 † Wieli a bwopiinen pie, wâé heme geu pimu ibu, beme e bo hegi a mulip wo pa béém, ai wieli wâé heme geu pimu ité, be o time uce celuimieng, hemepie geu tee piokéé.

†† 7.19 Roma 2.25; Galat 5.6, 6.15 † 7.22 Filémon 1.16; 1 Pétéru 2.16 †† Ni mulihelé téteda he ni tan—ai Ne he ni cunu na e tuie.

mwodelé, ke me lé mulie [me de Padaame] pwohewiin heme te tice mwodelé.

³⁰ Ke nina lé é, ke me lé mulie pwohewiin heme time lé uce é. Ke nina élé ha a pipwodéén, ke me lé mulie pwohewiin heme time lé uce pipwodéén. Ke nina lé pwocuhi ni naado, ke me lé mulie pwohewiin heme time uce ni delé ni naado na lé pwocuhin. ³¹ ††Lépwona lé ko âcehi ni naado pwo a bwohemwo, ke me lé mulie pwohewiin heme time lé uce âcehin, be time e uce mu a bwomune a bwohemwo ce jena, kehe e o âdé.

Hane me e wâékewé wo Padaame

³² Kehe nimung me geé nemwo gia. Wo pana time e uce piaten, ke e pwo ni naado me de Padaame, ke e hane me e piwâéeng wo Padaame. ³³ Kehe wo pana e piaten, ke a pwonimen, ke e te mu ko ni naado pwo bwohemwo, ke e hane beme wâé ne ko ê mwoden.

³⁴ Pihiwon ni bwo niimihinaado ten.

É toomwo na time e uce piaten, ai ê nahi toomwo ††, ke lu pwo ni naado me de Padaame. Lu hane beme lu eabwé te Padaame, ke lu pinelu ati ten. Kehe é toomwo apiaten, ke e te mu ko ni naado pwo bwohemwo, ke e hane beme wâé ne ko pa aiu hen.

³⁵ Ke é pii anaa beme é picani tewé, kehe time uce a bwopwonen me a âneule tewé. Kehe nimung me geé pipégali ana wâé beme céiu gewé me Padaame.

Nina lé ucéihi me lé piaten

³⁶ Ke mepie pwo paceli te junihe nimen ko êceli lu picihe, ke me e piniimihi pie time uce jan me e cile ehi a één ††, ke o wâé heme lu piaten §. Time e uce pwo aceli ta heme lu piaten. ³⁷ Kehe wo paceli e niimihi ne he pwonimen pie, me time e uce piaten, ke me time lu uce pipule me êna lu picihe. Mepie wonaa ace bwo niimihinaado ne ha a pwonimen, ke me e te pihuô ne ko nina nimen kon, ke wâé hemepie time e uce piaten.

³⁸ Ke wonaa, wo pana e piaten me êna lu picihe, ke wâé, kehe wo pana time e uce piaten, ke te nihe wâé.

Ni depwele

³⁹ ††É toomwo, ke te céiu julu me pa aiu hen, ha a be-naamwon na e mwo teko mulie hen wo pa aiu hen. Ke hemepie e mele wo pa aiu hen, ke caa te wâé ne kon

†† 7.31 1 Ioane 2.17 ††† É toomwo na time e uce piaten, ai é nahi toomwo—Grek: É ewa toomwo, ai É ukéiu toomwo, ai É depwele. ††† Time uce jan me e cile ehi a één—Ni béé tii iitihî he pwo grek, ke e hen ni pwooti ce: Ke o tanim êje. § 1re phrase—ai A céiu, ke é ne ko pa caa te é ewa toomwo na caa piukéiu nang. Ke é hemepie wonaa, ke o woni a niide a tii 36—38: ³⁶ Hemepie e niimihi pie, time uce wâé heme mwo tee cileeng ne ha a pomwa ten, ke wâé heme e neeng me e piaten, ke time uce a naado na ta. ³⁷ Kehe icehi ana me e niimihi me ubwo ne he pwonimen pie, time e o uce pwo me e piaten wo êje, ke te wâé, heme te tice ace bépatootihî nen. ³⁸ Anaa kuti, é hemepie e ne é naîn beme e piaten, ke te wâé, ke mepie time e uce ne é naîn me e piaten, ke te junihe wâé kuti. †† 7.39 Roma 7.2—3

me e piaten mwo me paceli nimen kon. Kehe te icehi ne he Padaame. ⁴⁰ Ke é ne tong, ke o te junihe wâé ne kon heme e te ju mu wonaa. Ke é pii pie, woéo mwo, ke etong a Jene Padué.

Âpwaito me de ni déme duéé

8 [†]Mepwo é ne ko ni mewota na *pipwoâpwaito kon ne te ni déme duéé ^{††}, ke genye tai temehi, be «tai etenye a bwo temehinaado [‡]». Kehe [geé pipwocilekewé. Be] e pipii den a bwo temehinaado, kehe é ne ko a pipwoééhe, ke e pamwoiu ni béénye.

^{2 ††}Hemepie pwo paceli e niimihi pie e temehi ati ce naado, ke time e uce téele temehi mwo pie he me e woté ace bwo temehi nen. ³ Ke mepie pwo paceli eâni men de Padué, ke wo Padué, ke e te temehieng.

^{4 ††}Mepwo é ne ko a bwo wii ne nina pwoâpwaito kon, ne te ni déme duéé, ke genye temehi pie a duéé na pi paunuhi ne pwo bwohemwo, ke te ju piticenaado ne kon. Be te tice pace céiu duéé, kehe te céiu cehi Padué. ⁵ Pwo ni béén na lé pii pie, pwo ce duéé, ke pwo ce daame he miiden, ke é pwo bwohemwo. Ke te a juuju, be é ne telé, ke hiwon ni 'duéé', ke hiwon ni 'daame'.

^{6 †††}Kehe é ne tenye, ke te céiu cehi Padué Caa, na é mu kon, ke tai pwo ni naado, ke genye mulie me den. Ke te céiu cehi Padaame Iésu Kériso, na é mu kon, ke tai pwo ati ni naado, ke é mu kon na genye mulie.

Niimi nina wahin ni céihi telé

⁷ Kehe a bwo temehinaado, ke time uce tai etenye. Ânebun, ke mwo te pwo ni béén na lé mwo teko pwoi itihi te ni déme duéé. Ke é jena mwo, ke hemepie lé wii ni mewota na lé pipwoâpwaito kon ne ni béén, ke pwohewiin heme te ne te ni déme duéé. Be time e uce mu mang a *pwocihe na e âbé mu he ni pwonimelé. Ke lé téne ne kolé pie ta jélé ko a wiinaado naa.

⁸ Kehe time uce a wiinaado ana e pwo beme nye piâmwonu Padué. Hemepie time nye uce wii ace céiu wiinaado, ke te piticenaado ne kon, ke é hemepie nye wii ace céiu wiinaado, ke te piticenaado ne kon mwo.

^{9 ††}Te jan me geé pwo celi nimewé kon, kehe geé pipwocile ni bwopemikewé, beme time geé uce patupwo ne ha a ta pana tice niihen ne ha a céihi ten. ¹⁰ Be wogo pana go temehi a juuju, ke mepie lé aliko hemepie go ko wiinaado ne pwo taap ha ace *mwaiitihi te ni duéé hauli, ke o woté ace bwomunen? Go o

† 8.1 Apostolo 15.29 †† Déme duéé—Idole. Omehi mwo Déme-naado ne ha a Niinaado (Vocabulaire) ha anebwén ko a tii. Lé icuhi a mewota wo lépwo apulie ne ha apwojenep. Ke time lé uce patihi a mewota na pwoâpwaito kon. Pwocoon me e temehi wo pa apulie na e pwocuhin. ‡ Tai etenye a bwo temehinaado—Lé pipii delé wo lépwo Korénit pie, lé tai temehi. Ke lé niimihi pie, mang a céihi telé. †† 8.2 Galat 6.3 †† 8.4 Deutéronome 4.39, 6.4; Galat 4.8 ††† 8.6 Éféso 4.5,6 ††† 8.9 Roma 14.13–15; Galat 5.13

patupwo pana tice niihen ne ha a céihi ten [§], me e te wii mwo ni wiinaado na lé ne me de ni déme duéé.

^{11 ††}Ke wonaa, mu ko a bwo 'temehinaado' tem, ke e o tupwo wo pa acéihi na mwo wahin nang ne ha a céihi, weeng pana e caa mele me den wo Kériso! ¹² Me geé pwo ana ta na wonaa ne ko lépwo bééwé, ke me geé pwotahi ne ko a céihi telé na te ju wahin, ke geé pwo ana ta ne ko Kériso. ^{13 †††}É mu ko anaa, ke hemepie a mewota, ke mepie e pwo me e tupwo wo pa bééng ko a céihi, ke time é bo uce wii mwo ace mewota, beme time é uce pwotahi ne ko pa bééng.

E pwopain wo Paulo

9 ^{§†}Time uce jan me é pwo aceli nimung kon? He time uce woéo pa apostolo? Time é uce ali Iésu Padaame henye? Time uce wogewé ni acehi a penem dong ne he Padaame? ^{2 †††}Hemepie time é uce *apostolo ne te ni béén, kehe é apostolo ne tewé. Be wogewé ni bépajuujuhi na a penem dong ne he Padaame.

Pwo mwomwon dong be pa apenem

³ É hegi ne te lépwona lé pipé ne kong pie: ^{4 ††}He te tice mwomwon demu, me gemu ^{§†} wiinaado, ke ûdu? ⁵ He te tice mwomwon demu, beme gemu pé lu mwodemu acéihi, pwohewii ana lé pwo wo lépwo béé apostolo, ke wo lépwo ciéé Padaame, ke wo Pétéru ^{§††}? ⁶ Kona te wogemu cehi me Barnabas, na me gemu penem ne ko mwani, beme gemu mulie?

⁷ É heme e â he coda wo pace céiu, ke time e uce pwocuhin me e pwocoda. Ke wo paceli e cemi ace éé tabe megele, ke kona time e uce wii ni acehin? Ai wo paceli e cile ace bwehi wota, ke kona time e uce ûdu *lait* mu ko a bwehi wota?

⁸ He é pii ni naado naa, ne ha a bwomunen ne ko pa apulie? Ai ni patén mwo, ke he time e uce pii ni naado naa? ^{9 †††}Be caa te tii ne he ni *patén de Moosé pie: *Go nemwo pacuwohi a paaci me e wii ni ace blé heme e ko penem me dem*^{§§§}.

Deutéronome 25.4

He e te ju omehi cehi ni paaci wo Padué? ^{10 18A} e cihe beme denye? Be tii ani be me denye pie, me e penem wo pana e penem he pule, heme e céihi pie e o tii celi e cemi. Ke wo pana e tati *blé*, ke e céihi pie o pwo ace den mu kon.

^{11 19}Gemu ²⁰ cemi he ni pwonimewé ni wâé te a *Jenen Iitih ²¹. Kona o te junihe ubwo hemepie gemu hegi aceli jan ne he ni mulihemu mu ko ni dewé ne éni

§ Go o patupwo pana tice niihen—Be hemepie e wii, ke time e uce piténedehi a pwocihe na e âbé mu he pwonimen. † 8.11 Roma 14.15,20 †† 8.13 Roma 14.21 †‡ 9.1 Apostolo 22.17–18, 26.16; 1 Korénit 15.8–9 ††† 9.2 2 Korénit 3.2–3 † 9.4 Luka 10.8 †‡ Gemu—Paulo me Barnabas. Omehi a niide a tii 6. ††† Pétéru—Grek: Céfas. †‡† 9.9 Deutéronome 25.4; 1 Timoté 5.18 ††† Penem me dem—Grek: Caaite ni pidenaado. 18 9.10 2

pwo bwohemwo? ¹² †Hemepie lé hegi wo lépwoce béén ne he ni bwomunen naa ne pelewé, kona he time uce wogemu na me gemu o hegi?

Gemu caa cuwokowé

Kehe time gemu uce hane, kehe gemu tai pé ne komu, beme time uce cubwoni a Pwooti Wâé te Kériso.

¹³ ††Geé temehi ehi pie lépwona lé penem ha a *mwaiitihi, ke lé wii nina e âbé mu ha a mwaiitihi. Ke wo lépwo *apwoâpwailo, ke te pwo ni delé mu ko a bwo pwoâpwailo. ¹⁴ †Te piwien mwo, be wo Padaame, ke e pii pie me lé mulie mu ko a Pwooti Wâé wo lépwona lé patemehi a Pwooti Wâé.

¹⁵ Kehe woéo, ke time é uce hane ni bwomunen naa, ke time é uce tii ani, beme é hane ce dong. Be me o wâé ne kong heme é mele, kojan heme é patieden a watihe a pipwodéén dong ††. ¹⁶ ††Be é hemepie é patemehi a Pwooti Wâé, ke te tice aceli me é pipii dong ne hen, be te tice ace céiu bwopwonen, be ana ne tong. O te junihe ta ne kong hemepie time é uce patemehi a Pwooti Wâé.

¹⁷ Be hemepie woéo pana é pipégali a penem naa, éa, ke me o pwo ace cuhin. Kehe te tice ace céiu bwopwonen celi me é pwo, ke é te ju pwo ana me é te pwo. ¹⁸ He ace cuhiéo, ke he ade? É he é patemehi a Pwooti Wâé he te tice cuhin, é patemehi a Pwooti Wâé, kehe time é uce pé mu kon ana jan me é pé.

É pipwoeabwé te ni apulie ati

¹⁹ Te tice pace pibééwé celi jan me e cuwokong me é pwo ace céiu naado. Kehe nimung me é tai pipwoeabwé tewé, beme é pébé ce apulie celi hiwon. ²⁰ †††Ke é ne pele lépwo Juif, ke é mulie pwohewii pa Juif, beme é pébé lépwo Juif. É ne ko lépwona lé mu he ni patén de Moosé, ke é ténedehi ni patén, beme é pébé lépwona lé mu he ni patén. Kehe time uce pwonaado ne kon me é ténedehi ni patén.

²¹ Ke é ne ko lépwona time lé uce temehi ni patén, ke é mulie pwohewiin heme te tice patén, beme é pébé lépwona time lé uce temehi ni patén. Kehe te etong a patén de Padué, be é ténedehi a patén de Kériso.

²² †††Ke é ne ko lépwona mwo wahin jélé ne ha a céihi, ke é mulie pwohewiin heme mwo wahin jo, ne ha a céihi. É pineéo ati telé, beme é pébé [§] lépwoce béén. ²³ Ke é tai pwo ati ni naado naa, wonaa mu ko a Pwooti Wâé, beme é mu he ni wâé ten.

Timoté 2.6 19 9.11 Roma 15.27 20 Gemu—ai Geme. 21 Te a Jenen Iitihi—Spirituel. † 9.12 Apostolo 20.34; 2 Korénit 11.9 †† 9.13 Deutéronome 18.1–3 † 9.14 Mataio 10.10; Luka 10.7; Galat 6.6 †† Dernière phrase—Grek: O te tice pace apulie celi e pétaabwon kojaéo a pipwodéén dong naa. †† 9.16 Jérémie 20.9 ††† 9.20 Apostolo 21.20–26 ††† 9.22 2 Korénit 11.29 § Pébé—Grek: Celui-mi.

É te téte beme é piwéden

²⁴ He time geé uce temehi pie wo lépwo apitéte ha a pitai, ke lé te tai téte, kehe te wo pa bécéiuhén pana e pé a cuhin? Geé téte, ne ha a bwomunen na me geé pé ace cuhin. ²⁵ ††Tai lépwo ajele, ke lé picaa, ke lé pwo he necu ni béé naado. Woélé, ke lé pwo beme lé pé a cuhin na o tieden.

Kehe wogenye, ke genye pwo beme nye pé a cuhin na e o tee mu. ²⁶ É mu ko anaa, na é téte, kehe time é uce pitéte hauli. É pwohewii pa atahi mwoi, kehe time é uce tahi nge ha a puwo. ²⁷ †††É tacebwénihi a ééng, ke é â pihuô ne kon. Be mepie time uce wonaa, ke woéo pana é patemehi a Pwooti Wâé ne te lépwo béén, ke o jan me tieéo ††.

Nemwo pipaunuhi ni déme duéé

10 †††Wogewé lépwo bééng, geé caa temehi nina e tuie ne ko lépwo watihenye †† [ne ha a da] be e ne ânebuhelé a nii [wo Padué] beme e wéilé, ke lé tai hagéi a jilé Megele. ² Ke tai woélé, ke tai puulé he céiu jélé me *Moosé, ne ha a nii, ke é ne ha a jilé.

³ ††Ke lé tai wii a wiinaado na céiu na e âbé mu he miiden †††. ⁴ †††Ke lé tai ûdu mu ko a tabe na céiu na e âbé mu he miiden, ana e âcéilé, be lé ûdu mu ko a péi. Be a péi, ke wo Kériso.

⁵ †††Kehe time uce wâé te Padué a ubwo kolé, ke é mu ko anaa, na e pwo me lé mele ne ha a melé ¹⁸.

Nemwo pipwohewii a bele Isaraéla ânebun

⁶ ¹⁹Ke ni naado naa, ke e tehenebé, beme e habwii a bwomu tenye, beme time uce wâé tenye ni naado na ta, pwohewii ne ko lépwo ukéiu tenye:

⁷ ²⁰Genye nemwo pipaunuhi ni *déme duéé, pwohewii ne ko ana lé pwo ne ni béén mu kolé, be caa te tii ne he ni tii iitihi pie: *E tebwo a pubu apulie beme e pwowiinaado, ke e ûdu. Ke e cuwoda ke e pwolu hauli. [Ke e pipaunu a déme duéé.]*

Exode 32.6

⁸ ²¹Genye nemwo pipule hauli me ni béén, pwohewii ana lé pwo ne ni béén mu kolé, be lé mele ha a tan na céiu nina 23000 jélé.

† 9.25 Filipi 3.14; 2 Timoté 2.4–5, 4.7–8 †† 9.27 Roma 8.13, 13.14 †† Tieéo—Grek: Neéo ko jijen (disqualifié). Pacitihi kon me e nemwo téte ha a pitéte. ††† 10.1 Exode 13.21–22, 14.22–29 †† Lépwo watihenye—Hiwon lépwo acéihi ne Korénit na time lé uce Juif (lépwo Isaraéla). Kehe icehi ana e pii wo Paulo pie, wati-henye, be wogenye ati, lépwo acéihi ne ko Kériso, ke genye pwohewii lépwo piebehi Abérama, pa watihe lépwo Isaraéla. Omehi Galat 3.29. †† 10.3 Exode 16.35 †† Na e âbé mu he miiden—Grek: Spirituel. ††† 10.4 Exode 17.6; Nombres 20.11 ††† 10.5 Nombres 14.29–30 18 Melé—Da (désert). A duaan na ticie hen. 19 10.6 Nombres 11.4,34; 1 Korénit 10.11 20 10.7 Exode 32.6 21 10.8 Nombres 25.1–9

⁹ †Genye nemwo tacebwéni Padaame ††, pwohewii ana lé pwo wo lépwo béélé, na lé wiilé ne ni bwien, ke lé mele.

¹⁰ †Genye nemwo pihuu, pwohewii ana lé pwo wo lépwo béélé, ke li e taunulé wo pali *âcélo ko a mele.

¹¹ Tai ni naado naa, ke e tehenebé ne kolé, beme habwii tenye, ke tii beme mi pii tenye, wogenye na caa ju acunaa me nye tehene nge ha anebwén kon. ¹² É mu ko anaa, ke wo pace apulie celi e mwomwohi pie e cumang, ke e pipwocile beme e nemwo tupwo.

¹³ Tai ni tacebwén na e tookenye, ke te wonaa a bwomunen, be wo Padué, ke nina e pii, ke e te pwo. Ke time e o bo uce pwo me tacebwénikenye, koja ana jan me genye pé ne konye. Kehe e mu konye beme genye cumang, ke me genye â wie mu he ni tacebwén.

¹⁴ É mu ko anaa, wogewé lépwo ju bééng, ke geé nemwo â pipaunuhi ni duéé hauli!

Céiu genye me Kériso

¹⁵ É cihe pwohewii ne ko ni apulie na lé temehinaado. Geé pitauti ana é ko pii. ¹⁶ ††Genye olééhi ne te Padué a mwoûdu ko a *adéhi. É heme nye ûdu, ke he time uce a bwo céiu genye ne ko a cewéhe Kériso? Heme nye eni a pwoloa na nye pipatihi, ke he time uce a bwo céiu genye me a éé Kériso? ¹⁷ ††Be wogenye na hiwon genye, ke te céiu a pwoloa tenye, ke te céiu a éénye, be genye tai eni a pwoloa na céiu.

Nemwo pimwô me ni duéé!

¹⁸ †††Geé ali a bwomu te lépwo *Isaraéla: Lépwona lé wii nina *pwoâpwayilo kon ne te Padué, ke â céiu jélé me Padué. [Be a apwoâpwayilo, ke a de Padué.]

¹⁹ †††Ade aceli nimung me é pii? Aceli pipwoâpwayilo kon, ne te a déme duéé, ke he te pwonaado ne kon? Ai ni déme duéé, ke he te pwonaado ne kolé? ²⁰ ††Ûhu! Kehe ni naado na lé pipwoâpwayilo kon, ke lé pipwoâpwayilo kon ne te ni duéé me ni iténaado, kehe time uce é ne te Padué. Kehe te muhi tong me céiu gewé me ni duéé me ni iténaado ††. ²¹ †††Pwocoon me geé ûdu ha a mwoûdu te Padaame, ke me geé ûdu ha a mwoûdu te ni iténaado. Pwocoon me geé wiinaado pwo a taap te Padaame, ke é pwo a taap te ni iténaado. ²² ††Ai ni menye me e pitaaba wo Padaame? Nihe pwo niihenye kojaeng?

Geé tai pwo ne ha a wâé te Padué

²³ †††Geé pii pie: «Tai ni naado, ke te tice aceli paciitihii.» Kehe time uce tai wâé. «Tai ni naado ke tai wâé», kehe time lé uce pamwoiu ni béénye. ²⁴ ††Ke me te tice paceli e pihane den, kehe me hane me de pa béén.

²⁵ Wâé heme geé wii, ne ha a *pwonime na wâé, ati nina icuhi ne he jenep, kehe me time geé uce pihane-naado ne kon. ²⁶ ††Be a bwohemwo, ke a de Padaame, ke tai nina e pwon.

Psaume 24.1

²⁷ Ke hemepie e todekewé wo paceli time uce pa acéhi, ke mepie geé âcéin, ke geé wii a wiinaado na e ne tewé, ne ha a pwonime na wâé. ²⁸ †††Ke hemepie e pii tewé wo pace céiu pie ani: «Ke a wiinaado na pwoâpwayilo kon ne te ni duéé hauli», ke geé nemwo wii, wonaa mu ko pana e pii tewé, beme te wâé a pwonimen. ²⁹ É cihe ko a pwonime weeng, kehe time uce wogewé.

Kona he a pwonime pace céiu, ke e o te tauti ana é pwo na wâé? É mu ko ade? ³⁰ †††Hemepie woéó, ke é pipwo-olé te Padué ne ko a wiinaado heme é pwowinaado, ke é mu ko ade na lé pipiéo ko a wiinaado na é wii, he é pwo-olé te Padué ne kon?

³¹ †††Hemepie geé wiinaado, ai é heme geé ûdu, ai é heme geé pwo ace céiu naado, ke geé tai pwo beme lé o pipaunu Padué ne ni apulie. ³² ††Geé nemwo hane ace watihen me lé tupwo wo lépwo *Juif, me lépwna time uce lépwo Juif, ai ni apulie te Padué.

³³ †††Geé pwohewiiéo ²⁰: É hane me wâé ne kolé ati ne he ni naado. Time é uce pihane dong, kehe é hane me wâé ati ne kolé, beme celuililé.

11 ²¹ Geé pipwohewiiéo, pwohewiin he é pipwohewii Kériso.

a huô tenye heme nye pwoitihii ibu

(Pwahamii tii: 11—14)

A bwo tawii puninye

² É pipii dewé, be geé mwo teko piniimiéo ati ne he ni naado, ke é ko a bwo âcehi ne ni cémun na é ne tewé ²². ³ ²³Kehe nimung me geé temehi pie, pa apihuô ²⁴ te ati ni apulie, ke wo Kériso; ke pa apihuô te é

††† 10.23 1 Korénit 6.12 †† 10.24 Roma 15.1—2 †† 10.26 Psaume 24.1 ††† 10.28 1 Korénit 8.7 ††† 10.30 1 Timoté 4.4 ††† 10.31 Kolosé 3.17 18 10.32 Roma 14.13 19 10.33 1 Korénit 9.20—22 20 Geé pwohewiiéo—ai É wonaa. 21 11.1 1 Korénit 4.16 22 Te pétaapwo pi-ité ni bwomu, he ni amu he ni pétaapwo benaamwon. É ha a benaamwon de Paulo, ke time uce wâé, heme bwali ni apuni pa aiu, ke time uce wâé me tali me tice iwo a puni é toomwo. Be wâé heme pwoiipihii a bwomu tenye, âcehi ni bwomu telé me denye, ke me time uce tanahi lépwo béénye. 23 11.3 Genèse 3.16; Éfésó 5.23 24 Pa apihuô; A pihuô—Grek: A punin. A

† 10.9 Nombres 21.5—6 †† Padaame—Ni béé tii iitihii he pwo grek, ke lé pii pie: Wo Kériso. † 10.10 Nombres 14.26—38 †† 10.16 Mataio 26.26—28 †† 10.17 Roma 12.5 ††† 10.18 Lévitique 7.6 ††† 10.19 1 Korénit 8.4 † 10.20 Deutéronome 32.17; Pii Beetihii 9.20 †† Pwo mwomwon denye me nye wii a mewota na pwoâpwayilo kon, kehe icehi ana nye pipwocile, me nye nemwo pwoitihii te ni duéé. ††† 10.21 2 Korénit 6.15—16 †† 10.22 Deutéronome 32.21

toomwo, ke wo pa aiu hen; ke pa apihuô te Kériso, ke wo Padué.

⁴ É heme geé pwotapitihî, ke wo pana e pwoiitihî, me pana e cihe ne he nii Padué heme pwo a boon, ke time e uce pipaunu Kériso, pa apihuô ten.

⁵ Ke tai ni toomwo na lé pwoiitihî heme geé pwotapitihî, ai nina lé cihe ne he nii Padué, heme tice boolé, ke time lé uce pipaunu pa apihuô telé; ke piwien ne ko ê toomwo na e tali me tice iwo a punin. ⁶ É hemepie ê toomwo, ke me te tice boon, ke me e tali me tice iwo a punin! Ke mepie tanim † ne ko ê toomwo, me e tali me tice iwo a punin, ke wâé heme e ne ace bétawii na a punin.

⁷ †† Be pa aiu, ke me time e uce tawii a punin ‡. Be weeng, ke a déme *a wâé te Padué ††; kehe ê toomwo, ke ê wâé te pa aiu. ⁸ †† Be time e uce tabuhi pa aiu wo Padué mu ko a éé ê toomwo, kehe e tabuhi ê toomwo mu ko a éé pa aiu. ⁹ Ke time e uce tabuhi pa aiu me de ê toomwo, kehe e tabuhi ê toomwo me de pa aiu.

¹⁰ É mu ko anaa, na ê toomwo, ke me tawii a punin: a ine a pihuô † na e mu haahin, mu ko ni *âcélo ††.

¹¹ Kehe é ne he Padaame, ke te tie ê toomwo heme te tie pa aiu; ke te tie pa aiu heme te tie ê toomwo.

¹² Be pwohewii ne ko ê toomwo, e tabuhieng mu ko pa aiu, ke wonaa ne ko pa aiu, e âbeele ne pwo bwohemwo mu ko ê toomwo. Ke tai ni naado, ke tai âbé mu ko Padué.

¹³ Geé pitauti pie, he te wâé me ê toomwo, ke me e pwoiitihî te Padué heme time e uce tawii a punin. ¹⁴ He time e uce picaa na a bwomu ††† pie, tanim heme pa aiu, ke e pwo me bwali ni apunin? ¹⁵ Ke hemepie ê toomwo, ke me bwali ni apunin, ke a pipwowâé, be ni apun, ke e ne beme a bétawii na a punin. ¹⁶ Ke hemepie pwo paceli muhi ten ko a bwomunen naa, kehe wogeme, ke te cemang ne kome §, me ni acéihî ne ko Padué.

bwopiine mwo a pihuô, pwohewiin heme a puninye, ke pa apihuô te a éé apulie. † Mepie tanim ne ko ê toomwo—Wo lépwo juif ânebun, ke lé tali a puni ê toomwo, heme e pwo ni huô na ta. Tali mwo ni apuni ni toomwo pwopwaaden. †† 11.7 Genèse 1.26–27 ‡ Me time uce tawii a punin—ai Time uce cuwokon me e tawii a punin. †† A déme a wâé te Padué—E caa ne pa apulie wo Padué, beme e pwohewiieng, weeng Padué. †† 11.8–9 Genèse 2.18–23 ††† A ine a pihuô na e mu haahin mu ko ni âcélo—Time uce pwéélang ko a bwopiinen. Weengi ni béé bwo niimihi nen de lépwo béé dotéén ko a Tii Iitihî: • É toomwo, ke e habwii te ni âcélo pie, pwo mwomwon den, beme e pwoiitihî me pipéwooti ne he nii Padué. Ke a mwomwon naa, ke e âbé mu ko Padué. Ai, • E habwii te ni âcélo pie, e paciiti pa aiu hen. Ai, • E pipwopain koja lépwo âcélo te Caatana (ni duéé), he e mwo ko pwoiitihî. Ai, • O pwojunuun koja ni duéé, beme e pivédén kojale. ††† Bwomu—Grek: La nature. Wieli a bwopiine ani pie a bwomu te ni apulie. § Cemang ne kome—ai Cemang ne kong.

A wiinaado te Padaame

¹⁷ Hemepie é ko cihe tewé jenea, ke time é uce piwâékewé. Be ni pitihî tewé, na me wâé ne kowé, ke geé pipwotahi ne kowé.

¹⁸ †† Be a bécéiuhên, ke é téne pie, é heme geé pwotapitihî, ke pwo celi piehadeniwé, ke é mwomwohi pie a juuju. ¹⁹ Be wâé mwo hemepie pwo celi piehadeniwé, be me wonaa, ke me nye alihi mu hadeniwé, lépwona lé te pieabwé te Padué.

²⁰ É heme geé pwotapitihî, ke time uce a wiinaado te Padaame ††† ana geé pé. ²¹ Be é heme geé pwowiinaado, ke geé wele, ke wo pa céiu, ke menen, ke wo pa céiu, ke e te junihe ûdu. ²² Te tice pomwa tewé me geé pwowiinaado me ûdu? Ai geé tééti a puapulie te Padué, ke geé pwo me tanim lépwona te tice delé? He me é pii tewé pie woté? Me é piwâékewé? Ûhu! É ne ha a bwomunen naa, ke time é uce piwâékewé.

Âne a wiinaado te Padaame

²³ Be woéo, ke é hegi mu ko Padaame, ke é pacémunikewé kon pie: É ha a bwén na icueng hen, ke e pé a pwoloa wo Padaame Iésu.

²⁴ †† Ke e pipwo-olé te Padué, ke e ebii, ke e pii pie: «Ani, ke a ééng na me a dewé. Geé pwo ani beme geé pipaniimiéo.»

²⁵ ††† Ke é alecehe a wiinaado, ke e pé a mwoûdu ko tabe megele, ke e pii pie: «A mwoûdu ce, ke a inenaado ko a *piapwo na mwo coho, na e pwo wo Padué, ko a cewéhung. [Be o wonaa a bwo ne na a péém ne ha awiemewé me weeng.] É téteda heme geé ûdu, ke geé pwo beme geé pipaniimiéo.»

²⁶ Be é téteda heme geé eni a pwoloa ce, ke me geé ûdu ha a mwoûdu, ke geé patemehi a bwo mele te Padaame die ko a bwo mwojuia ten.

Pininim

²⁷ †† É mu ko anaa, ke wo pana e eni a pwoloa te Padaame, ai e ûdu ha a mwoûdu ten, heme time e uce pipwoiipieng, ke e pwotahi ne ko a éé Padaame ke a cewéhen. ²⁸ Geé muko pétaapwo pininim ânebuhe a bwo wiinaado me ûdu. ²⁹ Be wo pana e eni a pwoloa ke e ûdu ha a mwoûdu, heme time e uce temehi a éé Padaame ††, ke wo panaa, ke e te pébé a tautinaado ne kon.

†† 11.18 1 Korénit 1.10–12 ††† Wiinaado te Padaame—Ne pele ni bécéiuhé acéihî ne ko Iésu, ke te tice Caanilo (Sainte-Cène, Eucharistie) pwohewiikenye. Lé te wiinaado pwohewii a bwo wiinaado tenye ati he ni tan. †† 11.24–25 Mataio 26.26–28; Maréko 14.22–24; Luka 22.19–20 ††† 11.25 Exode 24.6–8; Ébéru 8.8–13 †† 11.27 Ébéru 10.29 †† Time e uce temehi a éé Padaame—Alo ni bwopiinen: Ai, Time e uce temehi pie, céiu jélé me ni acéihî béén na lé wiinaado me ûdu, be céiu a éé apulie, a éé Kériso. Ai wieli, Time e uce temehi pie ana e ûdu me wii, ke {a ine} a éé Kériso me a cewéhen, he e mele me denyé; ke a naado na te junihe iitihî.

³⁰ É mu ko anaa, ke hiwon nina tice niihelé, ke cunu jélé mu hadeniwé, ke hiwon nina lé mele. ³¹ Ke mepie genye te pitauti ni bwomu tenye, ke time e o uce tautikenye wo Padué. ³² †Ke heme e tautikenye ke e pwo me genye mwomwon wo Padaame, beme time nye uce pwocuhinaado me ni apulie pwo a bwohemwo.

³³ Ke anaa, wogewé lépwo bééng, é heme geé pitapitikewé beme geé pwowiinaado, ke geé piucéikewé.

³⁴ Ke mepie mene pace céiu, ke e pwowiinaado ne pelen, be heme geé pitapitikewé, ke me time e uce tautikewé wo Padué.

É ne ko ni béé naado, ke é bo pii hemepie é âdé pelewé.

Ni âpipati te a Jenen Iitih

12 É ne ko ni âpipati †† te a *Jenen Iitih, wogewé lépwo bééng, ke nimung me geé temehi ni naado naa.

² †É bwolihi, ke mwo te time geé uce téele temehi Padué. Be lé pwo me geé piâ ité ne ni apulie, ke geé tee âcehi ni *déme duéé na tice mulie kolé ††. Ke pwocoon dewé me geé nelé.

³ †É mu ko anaa, na nimung me é patemehi tewé a naado na céiu: Hemepie pwo paceli e cihe mu ko a Jene Padué, pwocoon me *piapwo Iésu. Ke te tice paceli jan me e pii pie: «Wo Iésu, ke Padaame!», heme time uce é mu ko a Jenen Iitih.

Te céiu a Jenen Iitih na e ne

⁴ ††Muko pétaapwo pwo ni âpipati na ne, kehe te céiu a Jenen Iitih na e ne. ⁵ Muko pétaapwo pwo ni bwo pipwoeabwé ko ni penem, kehe te céiu Padaame na nye penem den. ⁶ Muko pétaapwo pwo ni penem, kehe te céiu Padué na e pwo ni penem ne konye ati. ⁷ Ke e muko pétaapwo ne ni âpipati a Jenen Iitih beme wâé ne konye ati:

⁸ Ke wo pa céiu, ke e hegi mu ko a Jenen Iitih a bwo temehinaado;

Ke wo pa céiu, ke e hegi mwo, te é mu mwo ko a Jenen Iitih, a pwooti ko ana e habwii ten ne ha a jenen.

⁹ Ke wo pa céiu, ke e hegi a céihi, ke te é mu mwo ko a Jenen Iitih.

Ke wo pa céiu, ke e hegi, ke te é mu ko a Jenen Iitih beme e pwo me tieden ni cunu.

¹⁰ Ke wo pa céiu, ke e pwo ni *pipwojunuun.

Ke wo pa céiu, ke e cihe ne he nii Padué.

Ke wo pa céiu, ke e temehi me e pineitééhi nina e âbé mu ko a Jenen Iitih, ke nina time uce âbé mu kon.

Ke wo pa céiu, ke e temehi cihe he ni pwooti na te pi-ité †††.

Ke wo pa céiu, ke a bwo piocihe ne ni pwooti naa.

¹¹ †Kehe te a Jenen Iitih na e tai pwo ninaa. Ke e muko pétaapwo patih pwohewii ana te nimen kon.

Céiu genye me Kériso

¹² ††Be piwien ne ko a éé apulie, be te céiu, kehe hiwon ni béé duaan mu kon, beme lé pwo ace éé apulie. Hemepie junihe hiwon jélé, kehe icehi ana lé tai mu ha a éé apulie na te céiu. Ke te piwien mwo ne mwo ko Kériso. ¹³ †††Be wogenye mwo, ke tai puukenye ko a Jenen Iitih, beme céiu genye ne ha a één, heme ni *Juif ai nina time uce ni Juif, ai ni *apenem tice ja kon, ai heme ni apulie na time uce ni apenem tice ja kon; kehe genye tai ûdu mu ko a tabe na céiu na a Jenen Iitih, beme céiu genye me weeng.

¹⁴ Be a éé apulie, ke time uce ace céiu duaan mu kon, kehe hiwon ni piduaan. ¹⁵ Hemepie pa a apulie, ke me e pii pie: «Woéo, ke time uce pa i apulie, ke é mu ko anaa, ke pwohewiin heme time é uce mu ha a éé apulie», kehe e teko mu ha a éé apulie. ¹⁶ Hemepie e pii na a pwojééne pie: «Woéo, ke time uce pa naamii apulie, ke é mu ko anaa, ke pwohewiin heme time é uce mu ha a éé apulie», kehe e teko mu ha a éé apulie! ¹⁷ Hemepie ati a éé apulie, ke me tai a naamii apulie, ke genye o woté ace bwo téne nen? Hemepie ati a éé apulie, ke me tai a pwojééne, ke genye o woté ace bwo téne ne ni ûdenaado?

Te céiu a één

¹⁸ Kehe e te muko ne ni piduaan ne ha a éé apulie wo Padué, ke te é ne ha ana te nimen kon. ¹⁹ Hemepie te ju a céiu duaan mu ko a één, ke time uce a éé apulie na hején.

²⁰ Be hiwon ni piduaan, ke te céiu a één. ²¹ A naamii, ke pwocoon me e pii te a i apulie pie: «Time uce pwonaado ne kom!» Ai a puni pa apulie, ke pwocoon me e pii te ni a apulie pie: «Time uce pwonaado ne kowé!»

²² Kehe icehi ana nihe pwonaado ne ko ni piduaan ne ha a éé apulie na nye niimihi pie tice niihelé. ²³ Ke genye te nihe pipwocile ni duaan na nye niimihi pie time uce ju pwonaado ne kon. Ke genye te junihe pipwopweehi ne ko nina time genye uce alihi. ²⁴ Ke time genye uce wonaa ko a bwo pipwopweehi ne ko ni duaan ne ha a éénye na jan me nye alihi. Kehe e te pwo a

† 11.32 Ébéru 12.5–6 †† Âpipati—A bwopiine ani pie, a niihenye me a bwo temehinaado na e ne tenye, beme nye penem me Padué, me pamwoiu ni acéihi (talent, aptitude, capacité). ‡ 12.2 Habakuk 2.18–19 †† Tice mulie kolé—Grek: Huhu jélé. †† 12.3 1 Ioane 4.2–3 ††† 12.4 Roma 12.6

††† Ni pwooti na te pi-ité—Ni pwocihe na time nye uce cémun ne kon, na nye pipaunu Padué kon. Wieli a ju pati apulie, wieli a pati ni âcélo (omehi 1 Korénit 13.1), wieli time uce a ju patinye. § 12.11 1 Korénit 7.7 † 12.12 1 Korénit 10.17 †† 12.13 Galat 3.28

ée apulie wo Padué me wonaa, ²⁵ beme te tice aceli pineitééhi ne ha a ée apulie. Tai ni piduaan ne ha a ée apulie, ke lé muko pétaapwo picilelé. ²⁶ Hemepie cunu ace céiu duaan mu ko a ée apulie, ke tai ati ni duaan ne ko a ée apulie, ke lé tai mu he ni picani me weeng. Hemepie ace céiu duaa apulie, ke me piwâéeng, ke tai ni piduaan, ke lé tai pipwodéén me weeng.

Ni béé penem na e ne wo Padué

²⁷ †Wogewé, ke a ée Kériso, ke muko pétaapwo wogewé, ke ni piduaan ne ha a één. ²⁸ ††Ke wo Padué, ke e ne, pele ni acéihi me:

Lépwō bécéiuhēn, ke wo lépwō *apostolo;
Lépwō béalohen, ke wo lépwō *péroféta [na lé pébé a pwooti mu pele Padué];

Lépwō bécíéhēn, ke wo lépwō apwocémun.
Ke é nelang, ke pwo:

Lépwōna lé pwo ni naado na pwojunuun;
Lépwōna lé pwo me wâé ni cunu;
Lépwōna lé picani te ni béén;
Lépwōna lé pipé ni béén;
Lépwōna lé cihe he ni pwooti na te pi-ité.

²⁹ Lé te tai pwo apostolo? Lé te tai pwo péroféta? Lé te tai pwo cémun? Lé te tai pwo ce pipwojunuun? ³⁰ Te tai ne telé me lé pwo me wâé ni cunu? Lé te tai cihe he ni pwooti na te pi-ité? Lé te tai piocihe? Úhu! ³¹ †Geé hane me etewé ni âpipati na ubwo.

Ke é bo habwii tewé mwo a pwaaden na junihe wâé.

A pipwoééhe

13 Hemepie é cihe
he ni pwooti te ni apulie
ke ni *âcélo,
ke me tieden dong a pipwoééhe,
ke é te ju pwohewii
a kiloon na taii,
ai a mekapwa na tanahi †.

² ††Hemepie etong
me é cihe ne he nii Padué,

ke me é temehi
nina e ha aduwo,
ke me etong
ati a bwo temehinaado,

ke me etong ati a céihi,
beme é pitaatééhi
ni amu ne ni juwole,

ke hemepie time uce
eânimung de ni béén,
ke te ju piticenaado ne kong.

³ Hemepie é patihi ni dong

† 12.27 Roma 12.5 †† 12.28 Éfeso 4.11–12 ‡ 12.31 1 Korénit 14.1 †† Mekapwa na tanahi—Grek: Cymbale na pwo tihin. †† 13.2 Mataio 17.20

ne te nina menelé,
ke me é ne a ééng
beme cini ††,
ke hemepie time uce
eânimung de ni béén,
ke te ju piticenaado ne kong.

He ade a pipwoééhe?

⁴ A pipwoééhe,
ke e ucéihi,
ke e picani te ni béén,
ke time e uce pitaaba,
ke time e uce pipii den,
ke time uce upwonimen.

⁵ A pipwoééhe,
ke time e uce pwo celi tanim,
ke time e uce pihane den,
ke time e uce okéé,
ke time e uce cile ni ta
na lé pwo ne kon ne ni béén.

⁶ ††Time e uce pituume ko a ta,
kehe e pituume ko a juuju.

⁷ †A pipwoééhe,
ke e pineuhi ati,
ke e cile a céihi
na ati he ni bwomunen,
ke e mu ucéihi ati,
ke e pé ne kon ati.

E te mu dieli mwo

⁸ Ke time e uce mele
a pipwoééhe.
Ke o tieden ni pwooti
na pii ne he nii Padué.
Ke o tieden ni pwooti
na te pi-ité.

Ke o tieden
a bwo temehinaado.

⁹ Ke genye te ju temehi
a céiu duaan.

Ke genye te ju pii
a céiu duaan
ne he nii Padué.

¹⁰ Ke hemepie e bo âbé
ana ju wâé,
ke bo tieden
ana time uce hején.

¹¹ He mwo woéo
pa cuwo nahi ewa,
ke é cihe pwohewii

††† Beme cini—ai Beme é pipii dong. Time uce pwéélang he pwo grek. ††† 13.6 Roma 12.9 § 13.7 1 Pétéru 4.8

pa cuwo nahi ewa,
ke é niimihi pwohewii
pa cuwo nahi ewa,
ke é pitautinaado pwohewii
pa cuwo nahi ewa.
Ke he é caa apulie,
ke caa nebwén na é pwohewii
ni bwomu te pa cuwo nahi ewa.

¹² Be é jena,
ke time genye uce alihi ehi,
ke nye alihi pwohewiin
ne ha apiocile na caa au.
Kehe é alecehen,
ke genye bo ju alihi gaale.
Ke é jena,
ke é te ju temehi a céiu duaan.
Kehe é alecehen,
ke é bobé temehi † pwohewiin
he e temehié wo Padué.

¹³ †† Lé mu lépwo naado ce cié:
a céihi,
a piuca,
ke a pipwoééhe.
Kehe ana junihe piubwo
hadenii ninaa,
ke a pipwoééhe.

A bwopwone lupwo alo âpati

14 †Geé hane ânebun a pipwoééhe ne ha ati ni naado na géé pwo.
Wâé mwo heme te junihe nimewé ko ni âpati na e ne na a *Jenen Iitihî, ke e mu hadenii ninaa, ke a âpati ko a cihe ne he nii Padué. ² Be, me go cihe he ni pwooti na te pi-ité, ke time go uce cihe te ni apulie, kehe go cihe te Padué. Be te tice paceli e temehi nina go pii, be é mu ko a Jenen Iitihî na go pii nina e ha aduwo.
³ Heme go cihe ne he nii Padué, ke go cihe te ni apulie: Go pamwoiulé, ke go paûmiêlé, ke go pwopweehi ne kolé. ⁴ Heme go cihe ha a pwooti na te pi-ité, ke go te pipamwoiuko. Kehe me go cihe ne he nii Padué, ke go pamwoiu ni acéihi.
⁵ Nimung me géé tai cihe ha a pwooti na te pi-ité, kehe te junihe nimung me géé tai cihe ne he nii Padué. He go cihe ne he nii Padué, ke wâé mwo kojan heme go cihe ha a pwooti na te pi-ité, ju icehi hemepie e piocihen, beme e pamwoiu ni acéihi.

Pamwoiu ni acéihi

⁶ Hemepie é tuie lé pelewé, wogewé lépwo acéihi bééng, ke me é te ju pacihekewé cehi ha a pwooti na

† É bobé temehi—Grek: Nye bo alieng gaale ne ha a ju bwo weeng. †† 13.13 1 Tésalonik 1.3 †† 14.1 1 Korénit 12.31, 14.39

te pi-ité, ke é bo woté ko ace bwopwonen me é pamwoiukewé? Ûhu, wâé heme é pébé a pwooti na géé temehi, ne ha a bwo pwopune tong, ai é ne ha a pwooti ko a bwo temehinaado, ai é ne ha a pwooti na é pébé céiikewé ne he nii Padué, ai é ne ha a pwooti ko ana e habwii tong wo Padué ne ha a jenen. Be ati ninaa, ke ni bwopwonen me picani tewé.

⁷ Hemepie ni pihenyebi, ke me pwo a patin, pwohewii ne ko a oopwé ai a gitar, hemepie time uce téne ehi ni patin celi pi-ité, ke genye o woté ko ace bwo temehi na ace maa nyebi †† celi e ko pwo? ⁸ Ke mepie a tutu, ke me e pwo ace patin celi time uce wâé, woo na e bo pipwopweeng me e â ko pa? ⁹ Te piwien ne mwo kowé, hemepie é mu ko a patiwé, ke me time géé uce ne ace pwooti celi me temehi ehi, ke genye bo woté ace bwo temehi na aceli géé ko pii? Be géé teko ju cihe nge ha a puwo.

¹⁰ Te junihe hiwon ni pwooti pwo a bwohemwo, kehe te tice aceli piticenaado ne kon. ¹¹ Hemepie time é uce temehi ace pwooti, ke é o coho ne pele paceli e ko cihe, ke weeng, ke pa coho ne tong. ¹² Wogewé mwo, be te junihe nimewé ko ni âpati na e ne na a Jenen Iitihî, géé hane me hiwon ne tewé ninaa beme pamwoiu ni acéihi heme géé pimu ibu.

Piocihe beme lé temehi

¹³ É mu ko anaa, ke wo pana e cihe ha a pwooti na te pi-ité, ke me e pwoiitihî beme ne ten me e piocihe.
¹⁴ Be é hemepie é pwoiitihî ha a pwooti na te pi-ité, ke a jenung †† ke e pwoiitihî, kehe a bwo temehinaado tong, ke te tieden. ¹⁵ Ade aceli me é pwo? É bo pwoiitihî ko a jenung, kehe é o pwoiitihî mwo ne ha a bwo temehinaado tong. É bo pwonyebi ha a jenung, kehe é o bo pwonyebi mwo ko a bwo temehinaado tong.
¹⁶ Be é hemepie go pipwo-olé te Padué ne ha a jenem, ke e o woté a bwo hegi nen pie «Amen †††» wo pana e mu pelem ne ha a pwopwoiitihî tem? Be time e uce temehi celi go ko pii. ¹⁷ Go pwo ni pwopwoiitihî na junihe wâé, kehe time o uce pamwoiung ne ha a céihi ten.
¹⁸ É pipwo-olé te Padué mu ko ana é cihe ha a pwooti na te pi-ité koja wogewé ati. ¹⁹ Kehe me nye pwotapitihî, ke nimung me é pii celi nim ce pwooti mu ko a bwo temehinaado tong, beme é pacémunihî mwo ni béén, kojan hemepie 10000 ce pwooti ha a pwooti na te pi-ité.

Ni pwooti na ité ke a inenaado

²⁰ ††† Lé pwo bééng, géé nemwo alihi pwohewii ne ko ni nahi ewa ne ha a bwo tautinaado. Kehe é ne ko a ta,

†† Ace bwo temehi na ace maa nyebi—ai Ace bwo pineitééhi nen. ††† Jenung—ai Jenen Iitihî. †††† Amen—Wâé heme wonaa! †††† 14.20 Éféso 4.14

ke me wogewé ni cuwo nahi ewa, kehe é ne ko a bwo tautinaado, ke me wogewé lépwo apulie. ²¹ †Caa te tii ne he ni tii iitihí pie, e pii wo Padaame pie:

*É bo cihe te a puapulie ce
ha a céiu pwooti na te pi-ité,
me ha a pati ace céiu puapulie.
Kehe o te piwien
be time lé o uce tabemiéo.Ésaie 28.11–12*

²² Kehe é ne ko ni pwooti na te pi-ité, ke a inenaado, time uce é ne ko lépwo acéihí, kehe é ne ko lépwona time lé uce céihí.

A bwo cihe ne he nii Padué, ke a inenaado, time uce é ne ko lépwona time lé céihí, kehe é ne ko lépwo acéihí.

²³ ††Hemepie lé taineibulé wo lépwo acéihí, ke mepie lé tai cihe ha a pwooti na te pi-ité, ke me lé tehenebé wo lépwoce apulie celi te tice aceli lé temehi, ai lépwoceli time uce lépwo acéihí, ke lé o pii pie wogewé lépwo apiolo!

²⁴ †Ke hemepie lé tai cihe ne he nii Padué, ke mepie pwo paceli time uce pa acéihí ai paceli te tice celi e temehi, ke me e tehenebé, ke e téne ne kon ni pwooti telé ati, ke e temehi ni ta pwo ten. ²⁵ Nina e ha aduwo ne he pwonimen, ke te ju tai mu ha a pwaale, ke e bo tidihí jilin beme e pipaunu Padué, ke e pii pie: «A juuju pie wo Padué, ke e pelewé!»

Bwomu tenye heme nye pipitikenye

²⁶ ††He ade aceli me pwo, wogewé lépwo bééng, heme géé pitaineibukewé?

E pébé ace nyebi wo pace céiu;
Ke e pacémunihi †† wo pace céiu;
Ke wo pace céiu, ke e pii ana e habwii ten wo Padué;
Ke e cihe ha a pwooti na te pi-ité wo pace céiu;
Ke e piocihen wo pace céiu.

Kehe tai ninaa, ke a bwopwonen beme pamwoiu ni acéihí. ²⁷ Hemepie pwo celi lé cihe ha a pwooti na te pi-ité, alo ai cié, kehe lé muko pétaapwo cihe, ke me pwo paceli e piocihen. ²⁸ Ke hemepie te tice celi lé piocihen, ke genye nemwo cihe. Kehe me nye te picihé tenye, ke genye cihe te Padué.

²⁹ †††É ne ko lépwo péroféta, ke alo ai cié lépwoceli lé cihe. Ke me lé tauti ††† wo lépwo béén. ³⁰ Ke hemepie e hegi ace pwooti mu ko Padué wo pace céiu, ke e nemwo cihe wo pa bécéiuhen.

³¹ Te jan me géé tai cihe ne he nii Padué, muko pé-taapwo wogewé, beme tai pacémunihi, ke pamwoiuhi. ³² A jene pa péroféta, ke e te ténede pa péroféta. ³³ Be

† 14.21 Ésaie 28.11–12 †† 14.23 Apostolo 2.13 † 14.24 Ioane 16.8 †† 14.26 1 Korénit 12.8–10 †† Pacémunihi—A bwopiinen pie, pipépwooti ne he nii Padué ko a junuu a Jenen Iitihí (prophétiser). Be nye wonaa heme nye pipune, heme e péékenye na a Jenen Iitihí. ††† 14.29 1 Tésalonik 5.21 ††† Lé tauti—A bwopiinen pie, picihé ko ace bwo mulie hen. Ai, Pitautieng.

wo Padué, ke time uce pihauli nang, kehe e ne a au ke belece.

Bwomu te ni toomwo

³⁴ §Ke ni toomwo, ke me lé nemwo cihe ne he ni *mwotapitihí, pwohewii ati ne pele ni acéihí, be time uce ne telé me lé cihe. Kehe me lé ténedehe, pwohewii ana e pii mwo ne ni *patén de Moosé. ³⁵ Hemepie nimelé me lé temehi ace céiu naado, ke wâé heme lé tahimwo ni aiu helé ne he ni pomwa telé. Be é ne ko ê toomwo, ke time uce wâé heme e cihe ne he ni pitihí te ni acéihí §†.

³⁶ He é mu pelewé he na e wie mulang a pwooti te Padué? Ai te é ne tewé celi e âbé beme dewé?

³⁷ †††Hemepie pwo paceli e mwomwohi pie pa péroféta, ai me e neeng bé na a Jenen Iitihí, ke me e temehi pie ana é ko tii me dewé, ke a pihuô te Padaame. ³⁸ Ke é hemepie pwo paceli time e uce temehi ninaa, ke wonaa be time e uce temehieng wo Padué §†.

³⁹ Wonaa, wogewé lépwo bééng, ke géé hane me géé cihe ne he nii Padué, ke géé nemwo pacuwohi a cihe ha a pwooti na te pi-ité. ⁴⁰ Kehe me tai pwo ne ha au, ke é ne ha a bwomunen na me wâé.

a bwo mulie cemwo mu ha amele

(Pwahamii tii: 15)

E caa mulie cemwo wo Kériso

15 É paniimihí tewé, wogewé lépwo bééng, a Pwooti Wâé na é caa patemehi tewé. Ke géé caa hegi, ke géé ko mulie ne hen. ² Ke é mu ko a Pwooti Wâé naa, ke e bo celuimikewé, hemepie géé temehi ne he ni bwomunen na é patemehi tewé. Ke hemepie time uce wonaa, ke o te ju piticenaado ne ko a céihí tewé.

³ †††É caa ne tewé a pune na é caa hegi. Weengi ana junihe pwonaado ne kon:

E mele wo Iésu Kériso
ne ko ni ta pwo tenye,
pwohewii ana tii
ne he ni tii iitihí.

⁴ §†Ke neduwoeng.

§ 14.34 1 Korénit 11.3; 1 Timoté 2.12 §† Ne ha a niide a tii 11.5, ke e pii wo Paulo pie, pwo mwomwon de ni toomwo me lé pipépwooti ne he nii Padué. Time uce wâé te Paulo me lé pacuwohi a pwoiitihí, ke me lé tahimwohi a bwo pwopune, ai heme lé pwojepule. É ha a benaamwon de Paulo, ke ni toomwo juif, ke time lé uce picaa me lé pine ni patén de Moosé, pwohewii ana lé pwo ne ni aiu. Omehi mwo note §†† 14.37 1 Ioane 4.6 §† Time e uce temehieng wo Padué—ai Time géé uce pipéce ne kon. §†† 15.3 Ésaie 53.5–12 §† 15.4 Mataio 12.40; Apostolo 2.24–32

Ke e mulie cemwo
ha a béciéhe ni tan,
pwohewii ana tii
ne he ni tii iitihii.
5 †Ke e âbeeti Pétéru ††,
ke wo lépwo 12 *apostolo.

6 Ke é alecehe anaa,
ke e âbeeti lépwona
wédenihi nina 500 acéihii.

A ubwo kolé, ke lé mwo teko mulie, kehe wo lépwo
béén, ke lé caa mele.

7 †É alecehen, ke e âbeeti Cang,
ke tai lépwo apostolo.

E âbeeti Paulo

8 ††Ke é alecehelé ati, ke e âbeetié pwohewii pa
bénebwéne ewa ††. 9 †††Be woéo pana junihe wahin jo
koja lépwo apostolo. Ke time uce jan me toii kong pie
pa apostolo, be é pwotahinaado ne ko ni acéihii ne ko
Padué. 10 †††Kehe é mu ko a *pipwoééhe tice ja kon de
Padué, ke é mu ha a bwomunen naa. Ke a pipwoééhe
tice ja kon den ne kong, ke time uce piticenaado ne
kon, be é te junihe penem wéden kojaté ati. Time uce
woéo, kehe a pipwoééhe tice ja kon de Padué na e
kong.

11 Ke wonaa hemepie woéo ai woélé, ke weengaa ku-
ti a Pwooti Wâé li game pipatemehi tewé, ke li geé céi-
hi ne kon.

E bo pwo me nye mulie cemwo

12 Ke hemepie game patemehi pie e mulie cemwo
mu hadenii nina lé mele wo Kériso, ke woté? Be lé pii
wo lépwo béén mu kowé pie, te tice mulie cemwo te
nina lé caa mele. 13 Hemepie te tice mulie cemwo te ni-
na lé mele, ke wieli time e uce mulie cemwo mwo wo
Iésu Kériso! 14 Ke mepie time e uce mulie cemwo wo
Iésu Kériso mu hadenii ni amele, ke ana game cihe
kon, ke o te ju piticenaado ne kon, ke a céihii tewé
mwo, ke o te ju piticenaado ne kon. 15 Hemepie ni
amele, ke time lé uce mulie cemwo, ke anaa, ke a
bwopiinen pie wo Padué, ke time e uce pwo me e
mulie cemwo mu ha amele wo Kériso. Ke é ha a
bwomunen naa, ke wogeme lépwo agele, he game pii
pie wo Padué, ke e pwo me e mulie cemwo mu ha
amele wo Kériso.

16 Be mepie time lé uce mulie cemwo nina lé mele, ke
time e o uce mulie cemwo wo Kériso. 17 Ke mepie time

† 15.5 Mataio 28.16–17; Luka 24.34 †† Pétéru—Grek: Céfás. (Ke a céiu nii Pétéru.) Omehi a Ioane 1.42. † 15.7 Luka 24.50 †† 15.8 Apostolo 9.3–6 †† Pwohewii pa bénebwéne ewa—Grek: Pwohewii he piciléó ânebuhe a bwo tuie tong. Wieli lé pitoii nii Paulo, mu ko a bwo pwotahinaado ten ne ko lépwo acéihii, ânebuhe a bwo céihii ten ne ko Kériso. ††† 15.9 Éfésó 3.8; 1 Timoté 1.15 ††† 15.10 2 Korénit 11.23

e uce mulie mu ha amele wo Kériso, ke o te ju pitice-
naado ne ko a céihii tewé. Ke mwo te wogewé he ni ta
pwo tewé. 18 Ke élé ité koja Padué ni acéihii ne ko
Kériso na lé caa mele. 19 Hemepie te ju a mulie ce cehi,
na genye céihii ne ko Kériso, ke wogenye ni apulie na
te junihe ta ne konye.

Pa bécéiuhen na e mulie cemwo

20 Ke weengi ana a juuju: E caa mulie cemwo mu
hadenii nina lé mele wo Kériso, pa atabuhii ko a tii
âdaanu: inen pie o hiwon nina lé o mulie cemwo. 21 †Be
a mele, ke e âbé mu ko pa apulie na te céiu nang, wo
*Adamu. Ke te é mu mwo ko pa apulie na te céiu
nang, wo Kériso, na e âbé a mulie cemwo te ni amele.
22 Pwohewii he lé tai mele be céiu jélé me Adamu, ke
te piwien mwo ne he Kériso, be lé bo tai mulie be céiu
jélé me weeng.

23 ††Ke e caa mi pamulipi Kériso mu ha amele wo
Padué, be pa bécéiuhen. Ke e bo tai pamulipikenye
mwo, ni apulie te Kériso, heme e mwojuia cemwo ne
mwo éni pwo bwohemwo wo Kériso †††. 24 Ke é ha
anebwén kon, ke e bo tanahi taabwon ati ni pihuô na
ta na e konye wo Kériso. Ke e bo ne a pihuô he daame
te Padué Caa.

25 ††Be wâé heme e pihuô dieli hemepie wo Padué, ke
e ne ati lépwona lé pwotahi ne kon, haahi ni an. 26 †††A
bénebwénen na e bo tanahi taabwon, ke a mele.

27 ††Be wo Padué, ke e *tai ne haahi ni an.*

Psaume 8.7

Kehe ati ninaa, ke te wo Padué na e ne te Kériso a pi-
huô ne ko ati ni naado. 28 Hemepie lé tai mu haahi ni
pihuô ten, ke wo pa Naîn, ke e bo mu haahi ni pihuô ne
pana e ne ten a pihuô. Be me wonaa, ke bo wo Padué
na e pihuôhi ati ni naado.

Geé ûmiè!

29 Hemepie te pwo ace céiu bwomunen, ke lé o pwo
de wo lépwona puulé me de nina lé mele? Hemepie
time lé uce mulie cemwo nina lé mele, ke é mu ko ade
na lé pwo me puulé me delé ††?

30 †††Ke wogeme, ke é mu ko ade na game teko mu
he ni naado na abwobwo tétéda he ni benaamwon?

31 É tétéda he ni tan, ke é tee âmwonuhi a mele. A ju-
uju pie é te junihe pipwodéén kowé, wogewé ni bééng,
ne he Kériso Iésu, Padaame henye. 32 †††Hemepie te ju
icehi me de a mulie pwo a bwohemwo, na é pwopa ne
ko ni 'wota apiaba' ne Éfésó, ke ade aceli é o pé mu
kon? Hemepie nina lé mele, ke me time lé uce mulie

§ 15.21 Roma 5.12 †† 15.23 1 Tésalonik 4.16; Pii Beetihii 20.5 ††† A bwopiinen he pwo grek pie: O bo tai pwo te ati ni apulie, ne ha ati ni pétaapwo amu telé. †† 15.25 Mataio 22.44 ††† 15.26 Pii Beetihii 20.14 †† 15.27 Psaume 8.7 †† Puulé me de nina lé mele—Wieli lé wonaa wo lépwo béén, ha a benaamwon de Paulo. Kehe icehi ana te tice pwooti ko a bwomunen naa, ne ha a céiu du-
aan ko a Tii Iitihii. ††† 15.30 Roma 8.36 ††† 15.32 Ésaie 22.13

cemwo, ke genye pwowiinaado, ke genye ûdu, be é meé, ke genye o mele.

³³ Geé pipwocile! Be: «Lépwo béénye na ta jélé, ke lé pwotahi ne ko ni bwomu tenye na wâé.» ³⁴ Geé mwojuia mwo ne he ni bwomu tewé na wâé, ke geé nemwo pwo nina ta. Be time lé uce temehi Padué wo lépwo béén mu kowé. É pii anaa beme tanim gewé.

Éé apulie na mwo coho

³⁵ Ke wieli go o pii tong pie: «Lé woté ace bwo mulie cemwo telé, ne nina lé caa mele? Ke é he ace de éé apulie celi lé mwojuia cemwo ne hen?» ³⁶ †Wogo pa apulie na te tice celi go temehi! Be a pidenaado na go cemi, ke e o mi mele ânebuhe ace bwo cim nen. ³⁷ Ke ana go cemi, ke time uce a acuwo, kehe te ju a pide-naado, a pide blé ai ace céiu pidenaado. ³⁸ Ke wo Padué, ke e ne te a pidenaado naa ace één celi te nimen kon, ke muko pétaapwo ni pidenaado, ke e ne ni één na time uce piwien.

³⁹ Ke time uce piwie ni éé nina lé mulie, be ni apulie ni béén, ke ni wota ni béén, ke ni meni ni béén, ke ni ikua ni béén.

⁴⁰ Pwo nina élé he miiden, ke te pwo mwo nina élé pwo bwohemwo. Ke time uce piwie a bwo wâé ne nina élé he miiden, me nina élé pwo bwohemwo. ⁴¹ A céiu, ke a pwéélang ko a téale, ke a céiu, ke a pwéélang ko a wole, ke ni béén, ke ni pwéélang ko ni ceni. Ke ni ceni, ke time uce piwie ni pwéélang hen.

Ana e mulie cemwo

⁴² Ke o te piwien mwo ne ko a mulie cemwo te nina lé mele. Nina neduwahi he pule, ke lé mele. Ke nina mulie cemwo, ke time lé o bo uce mele mwo.

⁴³ ††Ana neduwahi, ke caa piticenaado ne kon, kehe ana e mulie cemwo, ke te junihe wâé. Ana neduwahi, he te ju tice niihen, ke e mulie cemwo he pwo niihen.

⁴⁴ Ana neduwahi, ke a éé apulie, ke é alecehen, ke o a éé apulie na mwo coho. Be te pwo a éé apulie, ke te pwo mwo a jenen.

Adamu me Kériso

⁴⁵ †Be caa te tii ne he ni tii iitihie pie: *Pa bécéiuhé apulie, wo Adamu, ke e hegi a mulie.*

Genèse 2.7

Pa bénebwéne Adamu, wo Kériso, ke a Jenen na e ne a mulip. ⁴⁶ Kehe a éé apulie na mwo coho, ke time uce a bécéiuhé, kehe a éé apulie. Ke e bo âbé alecehen a éé apulie na mwo coho.

⁴⁷ Wo Adamu, pa bécéiuhé apulie na tabuhieng mu ko a pule, ke e mu pwo bwohemwo. Kehe e âbé mu he *miiden wo Kériso, 'pa béalohe apulie'.

† 15.36 Ioane 12.24 †† 15.43 Filipi 3.20–21 ‡ 15.45 Genèse 2.7

⁴⁸ Be wo Adamu, ke tabuhieng mu ko a pule, ke lé pwohewiieng ni apulie, na lé mu pwo bwohemwo. Kehe wo Kériso, ke e âbé mu he miiden, ke lé pwohewiieng ni apulie na lé mu he miiden. ⁴⁹ Genye pwohewii pa apulie na tabuhieng ko a pule. Alecehen, ke genye bo te pwohewii mwo pa apulie na e âbé mu he miiden.

Nye piedad dieli mwo

⁵⁰ Weengi ana é pii tewé, wogewé ni bééng: Time lu o uce taa ha a *Mwametau te Padué a éé apulie, ke a cewéle. Be nina nyaale tieden, ke te tice delé ha a *mulie dieli mwo.

⁵¹ ††Geé téne ehi, be é patemehi tewé ana te junihe pwojunuun na e ha *aduwo: Time genye o uce tai mele ††, kehe o tai taatéékenye ⁵² ju a benaamwon, na piipwong ni naamiim, ha a bénebwéne pati a tutu. Be o cuu a tutu, ke nina lé mele, ke lé o mulie cemwo, ne ha a mulie na tice anebwén kon. Ke wogenye, ke o taatéékenye. ⁵³ †††Be wâé heme e mele a éé apulie, ke me taatééhi, ke me e mulie §. ⁵⁴ ††Ke mepie taatééhi a éé apulie, ke me e mulie †††. Ke é nelang he na o bo pacuwahi a pwooti na tii pie:

E piwéden koja a mele

a mulie cemwo.Ésaïe 25.8

⁵⁵ ††Wogo a mele, ke e wé a niihem?

Wogo a amele,

ke bo woté ko ace bwo pwotahi

ne kome mwo†††?Osé 13.14

⁵⁶ ††A ju junuu a mele ne konye, ke ana e âbé mu ko ni ta na genye pwo. A junuu a ta, ke e âbé mu ko [ana time nye uce mulie ehi ne he] ni *patén de Moosé.

⁵⁷ Genye pipwo-olé te Padué, na e ne tenye me nye piwéden dieli mwo, mu ko Padaame henye, Iésu Kériso!

⁵⁸ Ni ju bééng, geé cumang me te tice celi e patupwokewé. Geé penem beme wâé ngen ana nime Padué kon, heme geé ko temehi pie a penem dewé, ke time uce piticenaado ne kon ne he Padaame.

Ni béé pihuô te Paulo

Âpati me de lépwo Iérusaléma

16 ††É ne ko a mwani na taineibuhi me de ni acéihi ne *Iérusaléma, pwohewii ana é pii te ni acéihi ne Galat, ke geé pwo mwo. ² Tai é he ni bécéiuhé tan ne ha a naadenitan, ke muko pétaapwo wogewé, ke

†† 15.51 1 Tésalonik 4.15–17 ††† 15.51–52 Mataio 24.31 †††† Wieli e niimihi wo Paulo pie, e o epin ko mwojuia mwobé wo Kériso, heme lé mwo te mulie wo lépwo béén acéihi. Omehi 1 Tésalonik 4.15–17. †††† 15.53 2 Korénit 5.4 § Grek: Wâé heme ana nyaale, ke e cuwohe ana time uce nyaale. †† 15.54 Ésaïe 25.8 ††† Grek: Wâé heme ana e mele, ke me cuwohe ana time e uce mele. †† 15.55 Osé 13.14 ††† Ke bo woté ko ace bwo pwotahi ne kome mwo?Grek: a Oû est ton aiguillon? †† 15.56 Roma 7.13 †† 16.1 Roma 15.25–26; 2 Korénit 8.1–9

geé neité ce mwani celi geé caa ko piwâam kon ne pelewé, beme time geé uce ucéihi ace bwo tehene lé tong, ke me geé bo taineibuhi ce mwani.³ Wâé heme geé pipégali ni apulie, beme lé pé ngen ce âpati tewé ne Iérusaléma. Ke é hemepie caa woéo lang, ke é † bo nelé ngen ne pehi ce tii, beme *pajuujihi pie wogenye na genye pahedelé.⁴ É hemepie wâé me é ân, ke geme bo tai miengen.

É pipwopweeéo beme é engen

⁵ †É bo âdé pelewé, alecehe a bwo pitahagéi na a province Macédoine tong. ⁶ *Wieli é o mwo mu pelewé ha ace céiu benaamwon, wieli ati a benaamwon ko taamu. Ke geé bo ne tong ce bépwnon ne he celi me é â lang. ⁷ Be time uce nimung me é ju alikewé heme é âdé, kehe é piniimihi pie me mwo pwo ace benaamwon celi me é mwo mu pelewé, hemepie te nime Padaame.

⁸ Kehe é o te mu Éfeso die ha a tan ko Pentekote †, ⁹ ††be pwo a pomwa na ubwo na tehi ne ko a penem na wâé, kehe hiwon lépwona lé cubwoniéo.

¹⁰ ††Hemepie e tuie lé wo Timoté, ke geé hegieng ehi, beme wâé ne kon, be e penem me de Padaame pwohewiiéo. ¹¹ †††Ke me te tice paceli e téétieng, kehe geé ne ten ce bépwnon beme e mwojuia mwobé die pelong heme wâé a pwnimen. É o ucéieng me lépwocé béénye celi lé o âbé.

¹² †É ne ko pa béénye Apolos, ke é te cuwo ko pii ten pie me e âdé pelewé me lépwocé béénye, kehe time uce nimen me e âdé ni ††. Kehe e bo âdé, hemepie e bo tooli ace bwo âdé ten.

† É—ai Geé. †† 16.5 Apostolo 19.21 † 16.6 Roma 15.24 †† Tan ko Pentekote—A pipwodéén ko pitii âdaanu. Omehi mwo a Tan ubwo ne ha a Niinaado (Vocabulaire) ha anebwén ko a tii. †† 16.9 Apostolo 19.8–10; 2 Korénit 2.12 ††† 16.10 1 Korénit 4.17 ††† 16.11 1 Timoté 4.12 § 16.12 1 Korénit 3.6 †† Time uce nimen me e âdé ni—Wieli time uce ana nime Padué kon me e pwome engen.

Bénebwéne pwooti

¹³ Geé ûmiê! Ke geé *cumang ne ha a céihi, ke geé mwoiu! ¹⁴ Ke me tai ni naado ne pelewé, ke me tai pwo ne ha a pipwoééhe.

¹⁵ ††Nimung me é pii tewé a céiu naado: Geé te temehi pie wo Stéfanos, ke ni apulie mu ha a pwomwoiu ten, ke ni bécéiuhen na lé céihi ne Akaï, ke lé penem me de ni acéihi. ¹⁶ Ke wogewé mwo, ke geé ténedé ni apulie na pwohewiielé, ke ni apulie na lé te ju-nihe penem me woélé.

¹⁷ É pituume ko a bwo âbé te Stéfanos, ke wo Fortunatus me Akaïkus, be lé wodehikewé ne pelong, ke lé pamwoiuéo. ¹⁸ Be lé paûmiêhi a jenung, ke a jenewé. Geé pwo me wâé tewé ni apulie na wonaa jélé!

Bépinelé

¹⁹ ††Ni acéihi ne province Asia, ke lé pwobwocu tewé. Akilas me Priscile, me nina lé taineibulé ne pelelu, ke lé pwobwocu tewé ne he Padaame. ²⁰ Tai lépwocé acéihi na élé éni, ke lé pwobwocu tewé.

Geé pimwomwaaukewé heme geé pipwobwocu tewé, pwohewii nina pibéélé.

²¹ Woéo Paulo pana é tii ko a ing a bwocu ce.

²² ††Mepie pwo paceli time uce eânimen de Padaame Iésu Kériso, ke me e mu ha apwohi ††!

Maranata: Âbé go Padaame!

²³ Ke me a pipwowâé te Padaame Iésu, ke me tai mu pelewé ati!

²⁴ Ke tai e pelewé ati a pipwoééhe tong, ne he Kériso Iésu.

Adéikewé!

††† 16.15 1 Korénit 1.16 §† 16.19 Apostolo 18.2,18,26 §†† 16.22 Galat 1.8–9 †† E mu ha apwohi—Ke a bwopiinen pie Geé neeng ité koja a pimu ibu tewé.

2 Korénit

nge céii lépwo

Atabuhi ko a tii

Woo na e tii a tii ce?

Wo Paulo, pa apostolo. Ke e mu pelen wo Timoté.

E tii éniile?

Ha awieme a jo 55 me 57, he e mu Macédoine wo Paulo. (Omehi 16.6—17.15.) E tii a tii ce ha a jo na céiu alecehe a bwo tii nen den a .

E tii me dee?

Te a puco te ni acéihi ne Korénit. Omehi Atabuhi ko a tii . E tii ni tii na paa te lépwo Korénit wo Paulo, kehe icehi ana te alo cehi na e mu ha a Tii Iitihi. A tii ce, , ke a bépahe ni tii ten delé.

É ko ade na e tii?

É ne ha a céiu tii na e tii ne telé ânebun (na pipatieden), ke e pééle lépwo Korénit wo Paulo. E cihe telé ko nina lé pwo na ta (2.3). Hiwon ni béén mu kolé na lé pininim (7.8—13). Kehe icehi ana pwo ni béé upwonimelé na lé pii pie, te tice mwomwon den me e pacihelé. Be lé hegi ni béé apipune agele na lé pii pie, te woélé cehi lépwo ju apostolo, ke lé pii me ta Paulo (pwahamii tii 10—11). E tii a tii ce wo Paulo, beme e pipwopain, ke me e habwii a pipwoééhe ten ne te lépwo acéihi ne Korénit (2.4; 6.11), me a pipwoééhe te Padué me delé (5.14—15). Nimen me e ne telé ace céiu benaamwon beme lé pininim, ânebuhe a bwo mwojuia ten mwo (13.10).

E tii mwo, beme e pwopune telé, beme lé pajuujihi nina lé pii ânebun pie, me lé tai mwani me de lépwo acéihi ne Iérusaléma, be pwo a menele nelang (pwahamii tii 8).

Ade ace âne a tii ce?

Lé pii wo lépwona lé tauti Paulo pie, time uce pa ju apostolo, ke time uce e kon a Jenen Iitihi, mu ko ana pa apulie na e mu he ni picani, ke tice niihen. Kehe icehi ana e habwii wo Paulo pie, heme nye ju eabwé te Kériso, ke genye o bo mu he ni picani me ni téé pwohewii Kériso. Ke wâé heme nye hegi anaa, ke me genye cumang ne ha a piuca. Heme nye mu he ni picani jenaa, ke a bwopwonen me nye pipwopweekenye, beme e mu konye a wâé na te junihe ubwo wéden dieli mwo (4.17).

Heme tice niihenye, ke jan ne ko a junuu Padué me e penem konye, ke me e taatéékenye, beme nye pwohewii Iésu. Ke genye o habwii ne konye te ni apulie pwo bwohemwo a junuu Padué me a bwo ubwo na a wâé ten. E habwii wo Paulo pie, wo lépwona lé tautieng, ke time uce lépwo ju eabwé te Kériso, be lépwo upwonimelé, ke muhi telé me lé picani me den.

E pii mwo pie, heme nye pwo ana ta, ke wâé heme nye pininim ke bitekenye, beme nye pitaatééhi nina nye pwo na time uce wâé. Heme wonaa, ke genye o bo piténe Padué, ke genye bo pipwoééhe ni apulie, ke o iitihi ke mwomwon ni mulihenye. Kehe icehi ana time uce wonaa a mulihe lépwona lé tauti Paulo.

É ne ha a tii ce, ke wo Paulo, ke e te junihe habwii a pwonimen ko lépwo Korénit. E te junihe pipwoééhelé, ke e te okéé ne kolé mwo ko ni ta na lé pii ne kon. Ke e te junihe okéé ne ko ni apulie na lé pwo me lé pitalupe.

A bwomune a tii 2 Korénit

Pipwobwocu me atabuhi ko a tii

A bwo mu te Paulo me lépwo Korénit

Mwomwon ni huô ten ne telé
 E pipatemehi a piapwo ko a mulip
 E pamwoiung na a Pwooti Wâé, he e mu he ni picani mu ko Kériso
 A pihuô ten ne kolé
 A bépicanî te lépwo acéihi ne Iérusaléma
 E pipwopain wo Paulo ne ko lépwona lé tautieng
 Paulo me lépwo apostolo agele
 E mu he ni picani mu ko Kériso
 Ana habwii te Paulo
 Gia Paulo ne ko lépwo Korénit
 Bénebwéne pwooti
 Bépinelé

Pipwobwocu

1 Woéo † Paulo, na é pwtotii, woéo pa apostolo te Iésu *Kériso, âcehi ni pihuô te Padué. [Be e pahedeéo ngen, beme é patemehi a pwooti ten.] É pwtotii lé céiikewé, wogewé a puapulie ten, na géé mu ha a pwomwo ubwo Korénit, ke me de mwo ni apulie ten ne ha a province Akai. Wogemu me Timoté, pa céiu acéihi béénye. [Ke e pwobwocu tewé mwo.]

² Wâé heme e mu kowé a *pipwoééhe tice ja kon, me a péém na e âbé mu pele Padué henye, me Padaame Iésu Kériso. Adéikewé!

E pamwoiukenyé ne he ni picani

³ †Nye pipaunu Padué, Caa te Padaame henye Iésu Kériso. Be pa Caa tenye mwo na nihe eânimen denye, ke e te cuwo ko pwo nina wâé ne konye. Ke weeng Padué, na e mu te cuwo ko pwopweehi ni pwonimenye, ke e pamwoiukenyé.

⁴⁵ †Be e wonaa tenye heme nye mu he ni picani mu ko Kériso. Ke hemepie te junihe ubwo ni picani tenye, ke o te junihe ubwo wéden a bwo pwopweehi ne ni pwonimenye ten ne ko Kériso. Ke wogenye mwo, ke o jan ne konye me nye uce pwopweehi ni pwonime ni béén na lé mu he ni picani.

⁶ É mu ko anaa, na hemepie é † mu he ni picani woéo, ke a bwopwonen me é pwopweehi ni pwonimewé, beme celuimikewé. Be e pamwoiuéo [wo Padué] beme é pamwoiukewé, heme géé mu he ni picani pwohewiiéo. ⁷ Ke é temehi pie, géé cumang [ne he ni céihi tewé]. Be é he géé mu he ni picani

† Woéo—Grek: Wogemu. Wo Paulo na e pwo a tii, kehe icehi ana e habwii pie te céiu pwonimelu me Timoté na e mu pelen. †† 1.3 Roma 15.5 † 1.5 Psaume 34.20 †† É—Grek: Nous. Ati ha a tii ce, ke e pii wo Paulo pie, Geme (nous), beme e te cihe kon mwo. He pwo cemuhi, ke genye tii pie, Woéobeme junihe pwéélang. (E ne he ni note Woéo...). He ni béé duaan, ke wieli e cihe kolé me lépwoce béén.

pwohewiiéo, ke e pwopweehi ni pwonimewé wo Padué pwohewiiéo.

Lé pwotahinaado ne ko Paulo ne Asia

⁸ †Wâé heme géé temehi, wogewé lépwo bééng, pie lé te nihe pwotahinaado ne kong ne ha a province Asia. Ke caa pwocoon ne kong me é picani ne ko ninaa, ke é caa pwo me é mele.

⁹ Pwohewiin heme tautié, ke pwocuhinaado tong die ha a mele. Ke heme wonaa, ke a bwopwonen, beme é nemwo picéihi ne kong, ke me é pipatupwoéo te Padué, na e pwo me lé mulie cemwo lépwo amele.

¹⁰ ††E caa te celuimiéo koja a mele, ke e o mwo te celuimiéo mwo he ni benaamwon ce. Ke é céihi me ubwo pie, e o mwo te celuimiéo mwo he ce tan celi mwo e he pwaaden. ¹¹ Ke wogewé, ke géé picani tong, ne he ni pwopwoiitihî tewé, wogewé me lépwona hiwon jélé. Ke e téne wo Padué, [ke e celuimiéo] ke e adéié. Ke hiwon ni apulie na lé pwo-olé ten ko ninaa.

a bwo mu ten me lépwo korénit

(Pwahamii tii: 1—7)

Mwomwon ni huô tong ne tewé

¹² [Wâé heme géé temehi pie] ati ni naado na é pwo ne éni pwo bwohemwo, ke é pwo ne ha a juuju, ke é mu ha a ju pwonimung ††. Ke te piwien mwo ne ko ni penem dong ne kowé [be te tice ta hen]. Ke e pajuujuéo na a *pwocihe na e âbé mu ha a pwonimung, me é pii ninaa. Be é âcehi a pipwoééhe tice ja kon de Padué, kehe time uce é ne ha a bwo temehinaado te lépwo apulie.

†† 1.8 Apostolo 19.23; 1 Korénit 15.32 ††† 1.10 2 Timoté 4.18 ††† Wieli lé tauti Paulo wo lépwo béén ne Korénit pie, time uce a juuju ali e pii pie, me e bo okelo ko â caniêlé. Ke e tii beme e pipwopain.

¹³⁻¹⁴ †Be, me é mu pwotii lé céiikewé [ke te tice celi é pineduwohi kowé]. Be nina geé pine, ke te ni juuju. É mu ko anaa, [na o time uce tanim gewé kong] ha ace tan celi e o bo mwojuia mwo hen wo Padaame henye Iésu. Ke geé o pipwodéén kong, pwohewii a pipwodéén dong kowé. Geé caa te temehi anaa, kehe nimung me geé temehi ehi.

Junihe nimung me é â caniêkewé

¹⁵ Ânebun, ke é niimihi pie, geé te temehi ehi [a pwonimung]. Ke anaa kuti ali é niimihi ânebun pie me é [okelo ko] âdé caniêkewé, beme e okelo ko adéikewé wo Padué mu kong. ¹⁶ ††Be a céiu, ke a bwo engen dong nge ha a province Macédoine. Ke a céiu mwo, ke a bwo mwojuia tong mwo ne *Judé. Ke é niimihi pie, wieli geé bo picani tong ko a bwo mwojuia tong ne mwo lang.

¹⁷ Weengaa a bwo niimihinaado tong ânebun. [He é mu ko ade na time é uce mwojuia ne mwo pelewé?] Wieli geé ko niimihi pie, time é uce piniimihi ehi? Wieli é pwohewii lépwona lé pii pie «éa» heme ko «ûhu»? ¹⁸ Ūhu! Time é uce wonaa, be e te pajuujuéwo wo Padué. Be hemepie e te cumang, ke woéo mwo, ke é o te cumang. Ke é hemepie é pii tewé pie «éa», ke te «éa» †!

¹⁹ ††Geé téne: Wo Kériso Iésu na geme patemehiang dewé, wogeme me Silas me Timoté, ke te weeng kuti pa *Naî Padué [na e juuju. Be weeng, ke pa pwooti mu pele Padué] na e pii tenye pie: «Éa!» Kehe time uce «Mening...» ††. ²⁰ †††Be e pii pie «éa», beme nye hegi ati ni *adéihi te Padué li e caa mi pii. Ke te é mu ko Kériso na nye tai pwoun de Padué, ke genye tai pii ati pie: «Éa! Amen!»

²¹ Ke te wo Padué na e pwo me nye cumang ne he Kériso. Be weeng na e pipégalikenyé ††† [me nye apulie ten]. ²² †Ke e caa ne tenye a *Jenen Iitihî he ni pwonimenye, beme a inen [pie wogenye, ke ni apulie ten]. Weengaa a bécéiuhe adéihi na e ne tenye.

A watihen na time é uce âdé

²³ É te juuju ††, ke e pajuujuéwo mwo wo Padué, heme é pii tewé pie: Weengi a watihen na time é uce mwojuia ne mwo pelewé ne Korénit. Be é hemepie é âdé, ke wieli [é o pii ce pwooti celi nihe] téé ne kowé. Kehe time uce nimung me é wonaa. ²⁴ †††Be time uce nimung me é pihuô wédenikewé. Be geé caa te

† 1.14 2 Korénit 5.12; Filipi 2.16 †† 1.16 1 Korénit 16.5–6 † Grek: Wo Padué, ke e te mu ha a bwo mu ten, beme a pwooti +tong ne tewé ke me time uce «éa» me «ûhu». †† 1.19 Apostolo 18.5 ††† Mening... Grek: «Éa» me «ûhu». ††† 1.20 Pii Beetihî 3.14 ††† Pipégalikenyé—Grek: Oint. Omehi note § 1.22 2 Korénit 5.5; Éféso 1.13–14 †† É te juuju—Grek: [É piapwo] ne ko a mulihung. ††† 1.24 1 Pétéru 5.3

cumang ne he ni céihi tewé, ke nimung me nye pipenem ibu, beme nye tai pipwodéén.

² ¹⁻³ †††Hemepie é pipwodéén, ke wogewé mwo, ke geé pipwodéén. Be te wogewé kuti na geé mu tee cuwo ko pamwouiéwo, ke wâé heme wonaa †††. Kehe icehi ana heme téé gewé, ke bo woólé celi lé bo pwo me é pipwodéén? É mu ko anaa, na caa time uce nimung me é cihe me ubwo ne kowé mwo, ko aceli é tooli ne pelewé ††. Weengaa kuti a watihen na é pitaatéihi a bwo niimihinaado tong. ⁴ ††Ke é caa pwotii lé céiikewé †††. Kehe icehi ana te junihe piwahin a pwonimung, ke é te nihe é, be é temehi pie, o te nihe téé gewé ko nina é pii †††. Be ana te ju wâé tong cehi, ke me é habwii tewé pie, nihe ubwo a pwonimung kowé.

Geé pineu pa apulie @ na e pwotahinaado ne kowé

⁵ Wo pa apulie na e pelewé, pali e pwotahinaado ne kong †††, ke te nihe ubwo a ta na e pwo tewé kojaéo. Weengaa a watihen me tai téé genye. Kehe icehi ana time é uce pé me ubwo [a ta na e pwo tenye]. ⁶ Be geé caa te tautieng ¹⁸, [ke geé caa te habwii ten a ta na e pwo]. Ke caa te jan.

⁷ Ke é jenaar, ke wâé heme geé pineueng, ke me geé pipamwouieng mwo. Be koli e bo patupwo [a céihi ten] be te nihe ubwo a bwo téé nang. ⁸ Ke é cuwokowé [beme geé pwo me céiu a pwonimewé] beme geé habwii ten mwo a pipwoééhe tewé ¹⁹.

⁹ Ke é he li é pwo ali tii, ke a bwopwonen me é alihi [ni pwonimewé] pie, geé te piténedéwo, na ati he ni naado. ¹⁰ Ke é hemepie geé pineu pa apulie naa, ke woéo mwo, ke é o te pineueng mwo. Ke te a juuju pie, é caa pineueng, me dewé, ne he nii Kériso. Ke é niimihi pie, a ta na e pwo tong, ke time uce nihe ubwo ²⁰. ¹¹ ††Be hemepie nye wonaa, ke o caa te tice pwaadeni *Caatana me e pihaamikenye. Be nye caa temehi ehi ni bwomu ten.

Nye piwéden mu ko Iésu Kériso

¹² ††É â Troas, beme é pii beetihî a *Pwooti Wâé te Kériso. Ke me é tehene ngen, ke é tooli pie, e caa te pwopweehi a pwaadeniing wo Padué. ¹³ ††Kehe icehi

‡ 2.1 1 Korénit 4.21 ††† 2e phrase—Grek: [Wogewé] na me geé pwo me é pipwodéén. †† 4e phrase—Grek: Anaa kuti na é niimihi pie, o time é uce mwojuia ngemwo pelewé, me é pwo me piwahin gewé. †† 2.4 Apostolo 20.31 ††† É caa pwotii lé céiikewé—Tieden a tii naa, kehe time e uce pii a bécéiuhe tii te lépwwo Korénit, na e mu ha a Tii Iitihî. ††† Be é temehi pie, o nihe téé gewé ko nina é pii—Grek: Time uce a bwopwonen me piwahin gewé. ††† Wo pa apulie na e pelewé, ke pali e pwotahinaado ne kong—Grek: Hemepie e pwo me piwahin genye wo pace céiu apulie. ¹⁸ Geé caa te tautieng—Grek: Lé caa te tautieng na a hiwon kowé. Wieli a bwo tautieng de ni acéihi na lé pimu ibu. ¹⁹ Habwii ten mwo a pipwoééhe tewé—Wieli a bwopiinen pie, lé hegieng mwo ne ha a pimu ibu telé. ²⁰ Dernière phrase—Grek: Hemepie é pineueng ko ace

ana te nihe pinekepé ne tong ko pa bééng Tit. Be é ucéieng, ke time e uce tuiebé. Ke é caa pine lépwo a-mu Troas, ke é mwojuia mwobé ne éni Macédoine [beme é haneeng].

¹⁴ Kehe icehi ana nye pipwo-olé te Padué, be e caa piwéden wo Kériso. Ke e péékenye † ne he pwahamii ni apulie ati, pwohewii a mwocoda ten na e piwéden. Ke nye habwiieng ati ne he ni piduaan, ke e pwo me nye patemehieng, pwohewii a ûdenaado na wâé.

¹⁵⁻¹⁶ ††Éa, nye pwohewii a tabe ûde, a âpipati na e ne te Padué wo Kériso. Ke wo lépwo béén, na e mwo ko celuimilé mwo, ke lé téne a ûden na wâé, ke e pébé céiilé *a ju mulip [dieli mwo ne pelen]. Kehe é ne ko lépwo béén na lé ko pipatieden ni mulihelé ité ko-jaeng, ke lé te ju téne cehi a ûdenaado na ta, na e pébé céiilé a mele.

Ke he woo celi jan me e pwo a penem naa, [a penem de lépwo *apostolo? O te tice, kehe te icehi pa apulie na e picani ten wo Padué]. ¹⁷ Junihe hiwon lépwona lé pé a pwooti te Padué, beme lé hane mwani kon, kehe time é uce pwohewiilé. Be woéo, ke pa apenem de Kériso, ke é pii a juuju ne he pwahamii Padué. Be weeng na e pahedeéo.

É pipatemehi a piapwo ko a mulip

3 *Kona [geé niimihi pie] é pipii dong mwo? Ôhu! Kona wâé heme é habwii tewé ni tii na lé cihe kong me wâé? Ai me é pwo me geé tii ni pwooti ne kong, beme é habwii te ni béé acéihi, pwohewii ana lé pwo ne ni béé apipune? Ôhu! Time é uce wonaa, [be geé te temehié ehi]! ² ††Be a tii tong, ke ana wogewé na caa te tii ne ha a pwonimung. Ke jan me lé pine ati ne ni apulie [na lé alihi ni penem dong ne pelewé].

³ ††Be wo Kériso, ke weeng na e caa tii a tii naa, ke woéo, ke te ju pa apitéteimipwooti. Ke a pwooti ha a tii na time uce tii ko bépwootii, kehe ana tii ko a *Jenen Iitihii te Padué, na e mulip ††. A tii na time uce tii ne pwo ace péi ††, kehe e tii ne he ni pwonime apulie. ⁴ É cumang [he é pii anaa] é mu ko ana é céihi me ubwo ne ko Padué, be é mu he Kériso. ⁵ Ke time é uce niimihi pie, é pipwo cehi a penem na e ne tong. Be te wo Padué na e pwo me jan ne kong me é pwo. ⁶ ††Ke weeng na e pwo me é pébé a *piapwo ten na mwo coho [na e pwo me denye, wogenye a puapulie ten].

céiu naado. 21 2.11 Luka 22.31 22 2.12 Apostolo 14.27; 1 Korénit 16.9 23 2.13 Apostolo 20.1 † Péékenye—ai Péékeme. Wieli e te picihe kon me lépwo béé apostolo. †† 2.16 Luka 2.34; 2 Korénit 3.5—6 † 3.1 Apostolo 18.27; 2 Korénit 5.12 †† 3.2 1 Korénit 9.2 †† 3.3 Exode 24.12; Jérémie 31.33; Ézékiel 36.26—27 ††† Padué, na e mulip—ai Padué na e ne a mulip. ††† Tii ne pwo ace péi—Ni patén de Moosé. Omehi Exode 24.12. E caa te mi patemehi ânebun wo péroféta Jérémia pie, wo Padué ke e o pii a patén na mwo coho ne he ni pwonime ni apulie. Omehi Jérémie 31.33; Ézékiel 11.19; 36.26—27. § 3.6 Jérémie 31.31; Ioane 6.63; 1 Korénit 11.25

A piapwo naa, ke time e uce âbé mu ko ni patén na tii, kehe ana e âbé mu ko a Jenen Iitihii. Be ni patén na tii, ke e pwo me nye mele. Kehe icehi ana a Jenen Iitihii, ke e pwo me nye mulie.

Junihe ubwo a wâé te Padué

⁷ ††He li e pébé li patén wo *Moosé li tii ne pwo li péi, ke lé tuiebé ne ha *a wâé te Padué. Be te junihe pwomelaa a pwahamii Moosé, ke time uce jan me lé omeeng wo lépwo *Isaraéla. Kehe icehi ana time uce bwolihi a pwéelang naa, ke ni patén, ke e pébé a mele.

⁸ Ke hemepwo é ne ko ali piapwo ††† li e pébé na a Jenen Iitihii, [ke e pwo me nye mulie] ke te junihe ubwo wéden a wâé naa. ⁹ ††Be mepie pwo a wâé na ubwo te ni patén na lé ne kuhinaado tenye, kehe o bo junihe ubwo wéden a wâé te a piapwo na e pwo me mwomwon genye [ne he pwahamii Padué]. ¹⁰ Éa, a wâé [ko ni patén] ke a naado na te junihe wahin ne ko jije a wâé [ko a piapwo na mwo coho]. ¹¹ Be mepie caa pwo a wâé ko ana time uce bwolihi, ke o bo woté ace bwo ubwo na a wâé ko ana e mu dieli mwo?

Nye alihi a wâé te Padué

¹² E pamwoiukenyé a piapwo naa, na e pwo me denye wo Padué †††, beme time uce piwâ genye [me nye pipwoeabwé ten]. ¹³ ††Ke time nye uce pwohewii Moosé, li e talui a pwahamiin, he li e cuwo ânebuhe [a puapulie ten] lépwo Isaraéla. Be o time uce wâé heme lé alihi a wâé na pwomelaan na e mu kon. Be a wâé naa, ke caa ko pitieden kojan ânebun.

¹⁴ Ke é ne ko lépwo Isaraéla, ke te junihe capuhi ni pwonimelé, dieli jena. Be heme lé pine, ai me lé téne ni tii ko patén ††, tii ko a piapwo ânebun, ke [time lé uce alihi temehi ni juuju na e mu hen. Be pwohewiin heme] talui ni pwahamiilé ko ace mwaanu. Ke time uce [jan me lé pwii] a mwaanu naa, kehe te icehi, hemepie lé mu ko Iésu.

¹⁵ Éa, a juuju pie, é dieli jena ni, heme lé mu pine ni tii te Moosé wo lépwo Isaraéla, ke pwohewiin heme neduwohi kolé ni bwopiinen. ¹⁶ †††Kehe icehi ana hemepie e biteeng nge céii Padaame wo pace céiu apulie, ke o tupwo a bétalui na a pwahamiin. ¹⁷ †††Be wo Padaame, ke weeng a Jenen. Ke me e konye a Jene Padaame, ke e tuwokenye koja ni naado na lé ciekenye, ke caa te tice celi e imwikenye. ¹⁸ Ke caa tai pwii mu he pwahamiinye a bétalui nen, beme nye pwohewii a apiocile na pwomelaan ko a wâé te Padué.

†† 3.7 Exode 34.29 ††† Piapwo—Grek: A penem (ministère, service). Te piwien ne he ni niide a tii 9 me 10. †† 3.9 Deutéronome 27.26; Roma 1.17 ††† A piapwo naa, na e pwo me denye wo Padué—Grek: Espérance. †† 3.13 Exode 34.33 †† Ni tii ko patén—Élele Iitihii Ânebun (l'Ancien Testament). ††† 3.16 Exode 34.34 ††† 3.17 Ioane 8.36; Roma 8.2

Be e pitaatéekenye na a Jene Padaame, beme nye pwohewii, ke me nye mu ha a wâé na piubwo da.

A Pwooti Wâé ke a pwéélang @ ne ha a melepiing

4 E ne tong a penem naa wo Padué, ne ha a bwo wâé nang. Weengaa a watihen na time uce pitupwo jo [heme é mu he ni picani].

² Ke é caa mi piniimihi pie [hemepie é patemehi te ni apulie] ke time é o uce pii ace pwooti celi gele, ke time é uce neduwohi ace céiu naado. Úhu! Time uce wâé tong ni bwomu te ni apulie na lé wonaa, be lé pwo me tanim genye. Be é penem ha a juuju. Ke time é uce pibitehi ni pwooti te Padué; kehe é habwii ehi a juuju, ne he pwahamii Padué. Ke wo lépwo apulie, ke lé o temehi ne he ni *pwonimelé [pie time é uce pi-haamilé]. ³ Be a Pwooti Wâé na é ko patemehi, ke pwéélang, ke jan me lé temehi ati ne ni apulie, kehe te time uce wo lépwona élé ité koja Padué na lé patieden ni mulihelé ††. ⁴ Be e pwo me bwi jélé [wo *Caatana] pa caa te a bwohemwo ce, beme time lé uce alihi a pwéélang ko a Pwooti Wâé, ke me time lé uce céihi ne kon. A pwéélang naa, ke *a wâé te Kériso, na a déme Padué.

⁵ Be, me é pipune, ke time é uce pipii dong ne tewé, kehe é patemehi Kériso Iésu, Padaame. Ke é mu kon, na woéo, ke é penem dewé.

⁶ E pii wo Padué ânebun pie: *Wâé heme e tuie a pwéélang ne ha awieme a melepiing.*

Genèse 1.3

Ke wo Padué naa, ke weeng kuti, na e pwo me e tuie a pwéélang den ne he ni pwonimenye, beme nye temehi pie, a wâé ten, ke e he Iésu Kériso ††.

Mang a céihi tong ne he ni picani

⁷ ††[A pwéélang na e konye, ke e pwohewii] a naado na nihe ubwo a cuhin. Kehe icehi ana nye pwohewii ni mwotabe pule [na time uce mwou]. Ke anaa, ana me lé temehi ne ni apulie, pie time e uce âbé mu konye a junuun ce, na junihe ubwo wéden. Kehe e te âbé mu ko Padué.

⁸ ††É † te junihe mu he ni pétaapwo picani me ni téé, kehe icehi ana time lé uce caaiteéo. Ke hiwon ni naado na ta na e mu tuie ne kong, kehe icehi ana é te cumang. ⁹ Lé te cuwo ko pwo tong nina time uce wâé, kehe icehi ana time e uce patupwoéo wo Padué. Ke lé pabetiiéo ne he pule, kehe icehi ana é te cuwoda mwo.

¹⁰⁻¹¹ †† Ati he ni tan, ke é te pipwopweeéo ne ko a mele me de Iésu. Be é teko pé ne ha a ééng a bwo

† 4.2 2 Korénit 2.17; 1 Tésalonik 2.5 †† Grek: Caa neduwohi a Pwooti Wâé tong ne ko lépwona lé mele. † 4.4 Éféso 2.2; Kolosé 1.15; Ébéru 1.3 †† 4.6 Genèse 1.3; Ésaie 9.1; 2 Korénit 3.18 †† A wâé ten, ke e he Iésu Kériso—Grek: A wâé te Padué ne he pwahamii Kériso. ††† 4.7 2 Korénit 5.1 ††† 4.8 2 Korénit 1.8, 7.5 † É—Grek: Nous (pwohewii gemu, geme, ai genye he pwo cemuhi). Kehe icehi ana wo Paulo, ke e pii ni naado na e tuie ne kon. Piwien he ni niide a

mele ten: a ééng na e bo mele. Kehe icehi ana é te pé ne kong mwo a bwo mulie cemwo ten. Ke lé o alihi anaa ne ni apulie ††.

¹² Ke hemepie é pipwopweeéo ne ko a mele, ke a bwopwonen beme e mu kowé *a ju mulip †††. ¹³ †† Be caa te tii ne he ni *tii iitihii pie: *É céihi ne ko Padué, ke é mu ko anaa, na é cihe.*

Psaume 116.10

Ke woéo mwo, ke é céihi, ke é mu ko anaa, na é pii beetihii a Pwooti Wâé ten.

E pwo me é mulie cemwo

¹⁴ †† Be é temehi pie, wo Padué, ke e pwo me e mulie cemwo wo Padaame Iésu mu ha amele. Ke e bo pwo me é mulie mwo, be é mu ko Iésu. Ke e bo tai péékenye ibu me wogewé, me nye cuwo he pwahamii in. ¹⁵ É ko anaa, na e adéikewé mu ko ni picani na é mu hen. Ke me wonaa, ke o hiwon ce apulie celi lé o temehi ni *adéihi ten na e âbé mu ko a *pipwoééhe tice ja kon den. Ke lé pwo-olé ten, me pipwoun den, ke lé o pipatemehi ngen a wâé ten, me a bwo ubwo nang †††.

Time uce bwali ni picani tenye jena

¹⁶ ††É mu ko ati [ni adéihi naa] ke o time uce pitupwo genye. Be mepie e ko mwaale ni éénye [ke me e â benihi a mele]; ke é ne ko a ju mulip na e konye, ke e o piubwo nang da. ¹⁷ ††† Ke mepie nye mu he ni picani he ni tan ce, ke time uce ubwo, ke time uce bwali. Be ni bwopwonen me pipwopweekenye, beme e mu konye a wâé te Padué. Ke a wâé naa, ke o junihe ubwo wéden koja ni picani jena. Ke e o te mu pelenye dieli mwo.

¹⁸ ††É mu ko anaa, na nye nemwo pé me junaado ni na nye alihi ko ni naamiinye. Be time lé uce tee mu me bwolihi. Kehe nye hane ni naado na time nye uce alihi: ni naado na lé o mu dieli mwo.

A éé apulie na mwo coho

5 ¹⁹ He nye mwo ko mulie éni pwo bwohemwo, ke a éénye, ke pwohewii a mwa mwaanu na o bo tanahi taabwon ha ace céiu tan. Kehe icehi ana nye temehi pie, pwo a mwa tenye na e jeda he *miiden. A mwa naa, ke e te mu dieli mwo, be a mwa na e bahi wo Padué, kehe time uce aceli e bahi wo pace apulie. [A mwa naa, ke a éénye na mwo coho.] ² ²⁰ É jena, ke nye cewé, be te junihe binyi ne tenye me nye tee ucéi-

tii 8–15. Omehi mwo note †† 4.10 1 Korénit 15.31 ††† 4.11 Roma 8.36 †† Ke lé o alihi anaa ne ni apulie—Grek: Beme o habwii a [mulie] naa. ††† Grek: Anaa kuti na e penem +kong a mele; ke a mulie, ke e [mu] kowé. †† 4.13 Psaume 116.10 †† 4.14 1 Korénit 6.14 ††† Grek: Be ati ninaa, ke e tuie be me dewé, beme e piân a pipwoééhe tice ja kon. Ke o hiwon nina lé o pipwoun de Padué, ne ha a wâé ten. ††† 4.16 Éféso 3.16 ††† 4.17 Roma 8.17–18 18 4.18 Kolosé 1.16 19 5.1 2 Korénit 4.7 20 5.2 Roma 8.23

hi a éénye † na o bo ne tenye ne jeda he miiden. ³ [A éé apulie naa, ke e o pwohewii a epwén] na mepie genye cuwohen, ke o te junihe wâé ne he pwahamii Padué ††. [Be e o ne te a jenenye a één na mwo coho.]

⁴ Kehe é he genye mwo ko mulie éni pwo bwohemwo, ke genye te junihe cewé kuti ko a bwo cunu genye. Be mepie time uce nimenye me nye necu a éénye, kehe icehi ana o nihe wâé tenye me nye taatééhi, beme a éénye na mwo coho ne he miiden, ke me e taatééhi ni naado na caa mele na a mulip.

⁵ Ke te wo Padué na e caa pipwopweekenye ne ko a mulie naa. Ke e ne tenye a *Jenen Iitihi, beme pa ânebuhe ni *adéihi na e ne, ke me e *pajuujuhi mwo pie, genye bo tai hegi mwo ce béén †. ⁶ †† Ke wâé heme genye te pwo me piwâénimenye!

Nye mulie ha a céihi

Te a juuju pie, he genye mwo tee ko mulie ha a éénye ne éni pwo bwohemwo, ke mwo time genye uce téele pimbu me Padaame [ne he miiden]. ⁷ Kehe icehi ana genye mulie ne ha a céihi, kehe time genye uce âcehi nina genye alihi. ⁸ †† Be anaa kuti a watihen me genye te pwo me piwâénimenye. Be wâé tenye heme genye engen mu ha a éé apulie ce, beme genye pimbu me Padaame.

⁹ †† Ke ana junaado ne tenye, ke me genye hane me wâé te Padué genye, he genye mwo ko mulie éni [pwo bwohemwo] ne ha a éé apulie ce, ai hemepie nye caa engen mu hen. ¹⁰ ††† Be genye o tai cuwo he pwahamii Iésu Kériso, beme e tautikenye. Ke e bo patihi ne konye ni pétaapwo cuhi ni penem denye na wâé, ai ni na ta, he nye mwo mulie pwo bwohemwo.

É pébé a pwooti ko a péém

¹¹ Nye pipwocilekenye ne ânebuhe Padué, ke genye nihe paciitieng. Ke é ne kong §, ke é mu te niimihi anaa. Ke anaa kuti na é mu te pacihe ni apulie, me lé bitelé ne kon. Be e te temehi a pwonimung wo Padué. Ke é niimihi pie wogewé, ke geé te temehiéo mwo.

¹² Geé nemwo niimihi pie é te cuwo ko pipii dong. Ju nimung cehi pie me geé pwo me piwâénimewé kong. Ke é ne tewé a béhegi nen de lépwona lé mu pipii delé ne ko ni naado na nye alihi ko ni naamiinye, kehe time uce é ko nina e he ni pwonimenye.

¹³ Wieli [lé o pii pie] pipenem a puning, heme é ko pii ninaa. Ke hemepie é wonaa, be é penem me de

† Nye tee ucéihi a éénye—Grek: Nimenye me nye cuwohe a mwa naa. Ne he ni niide a tii 2–5, ke e neibuhi lupwo ocine ko a éénye wo Paulo: a mwa mwaanu, me a epwénenye. †† Ke o te junihe wâé ne he pwahamii Padué—Grek O time uce tice mwaanu konye. † 2e phrase—A bwopiine ni pwooti grek pie, prémices ke garantie. †† 5.6 Ébéru 11.13–16 †† 5.8 Filipi 1.23 ††† 5.9 Kolosé 1.10; 1 Tésalonik 4.1 ††† 5.10 Ecclésiaste 12.14 § Kong—Grek: Kome. Kehe icehi ana wieli e te piche kon mwo wo Paulo ne he ni niide a tii 10 die ha a 15. Omehi mwo note

Padué. Ke mepie é penem ha a pitemang, [me a bwo temehinaado ten] ke é wonaa beme geé hegi a pwooti ten ††!

¹⁴ [Ke é ne ko ati ni naado na é pwo] ke é te piténédehi a pipwoééhe te Kériso. Be é temehi pie, te céiu pa apulie, wo Kériso, na e mele me denye ati. É mu ko anaa, na wogenye, ke genye caa mele [mu ha a mulihenye ânebun]. ¹⁵ ††† Ke genye nemwo tee mulie me denye cehi. Be hemepie e mele wo Kériso, ke e mulie cemwo, ke me e pwo me genye mulie mwo, ke wâé heme nye mulie me den.

A péém na e pwaadeniin bé wo Kériso

¹⁶ É mu ko anaa, na caa time é uce ali ni apulie pwohewii a bwo alilé †† te lépwona time lé uce temehi Padué. Ânebun, ke é ††† mu wonaa a bwo ali Kériso, kehe icehi ana é jena na ni, ke caa time é uce wonaa. ¹⁷ †† Be mepie e mu ko Kériso wo pace céiu apulie, ke [wo Padué, ke e] ne kon a mulip na mwo coho. Ke caa tieden ni naado ânebun. Ke mwo coho ati ni naado.

¹⁸⁻¹⁹ †† Be wo Padué, ke e caa ne a péém ne ha awiemenye me weeng, na e pwaadeniin bé wo Kériso. Ke e pineuhi ni ta pwo tenye. Be te *a bwo niimihinaado ten, he e nebé Kériso ne pelenye lépwo apulie †††. Ke weengaa kuti a penem dong, beme é pébé céii ni apulie a pwooti ko a péém naa ²⁰ ne he nii Kériso. Ke wogewé, ke e todekewé wo Padué, beme e mu kowé a péém naa, ne ha awiemewé me weeng.

Ke é wâgo kowé, ne he nii Kériso, beme geé ténédehi a pwooti naa †††. ²¹ ††† Be wâé te Padué heme mwomwon genye ne he pwahamiin, mu ko Kériso. Pana te tice ta pwo ten, kehe icehi ana e ne huîin ati ni ta pwo tenye wo Padué, beme e ne konye ati a mwomwon me a wâé te Kériso!

Hegi a pipwoééhe ten jena!

6 Woéo, ke gemu penem ibu me Padué ¹⁸. Ke é ko anaa, na é wâgo kowé pie, me geé nemwo pwohauhi ko ni âpipati na e ne tewé wo Padué ne ha a *pipwoééhe tice ja kon den. ² ¹⁹ Be e caa te pii pie:

*Ha a benaamwon na é o pipégali,
ke é o ténéko.*

Ke é o picani tem

ha a tan na é pacuwohi.

‡† Beme geé hegi a pwooti ten—Grek: Me dewé. ††† 5.15 Roma 14.7–8 ‡† Pwohewii a bwo alilé... Grek: Ha a éé apulie. ††† É—ai Genye, ai Geme. Omehi note †† 5.17 Roma 8.1; Galat 6.15 ‡† 5.18–19 Roma 5.10, 3.23–25 ††† 3e phrase—Grek: Ati ninaa, ke e âbé mu ko Padué...ke e mu ko Kériso, beme e wonaa te ni apulie. ††† Grek: +Woéo pa apipéppwooti ne he nii Kériso, be e paténekwé kong wo Padué. É mu ko anaa kuti, na é tee cuwokowé ne he nii Kériso pie, me geé pwo a péém me Padué. ††† 5.21 Ébéru 4.15 ¹⁸ 1re phrase—Grek: Wogeme, ke game penem ibu me Padué. Wieli me e te piche mwo kon wo Paulo. Kehe icehi ana mening pie e cihé kolé me lépwo apostolo béén. Ke piwien mwo he ni niide a tii 1–13. Omehi a note ¹⁹ 6.2 Ésaie 49.8

*Ke é o celuimiko
ha a tan na bo wâé tong. Ésaie 49.8*

Ke geé téne, be e caa tuie a tan naa! Be caa é jena, na e celuimikenye wo Padué!

Ni picani te Paulo mu ko Kériso

³ Time uce nimung me é pwotahinaado ne ko ni apulie ko ni bwomu tong, be me wonaa, ke me time lé uce pii me ta a penem dong.

⁴⁵ †Uhu! É te habwii ati ne he ni naado pie woéo pa ju eabwé te Padué. Ke é mu ko anaa, na é te cumang me é te pé me dong ni naado na ta na hiwon na e tooéo: ni picani, ni mwaale, ni menele, me ni bwo mwotiéo. Be lé ahiéo, ke lé tahiéo ne he karépu. Ke é mu cela mu ha awieme ni apulie na lé okéé ne kong. Kehe é te mwoiu ko penem, dieli â tice niihung.

É picani ke é te penem

⁶⁷ ††Ke é ati ne he ninaa, ke é te cuwo ko habwii pie woéo pa ju eabwé te Padué, ko a bwo pipwoiipi, ko a bwo temehinaado tong, ke a bwo cumang ne he ni picani tong. Ke é te cuwo ko picani te ni apulie, ke é pipwoéhelé mu ha a ju pwonimung. Ke é te cuwo ko penem ko a junuu a *Jenen Iitihi te Padué. Be é te cuwo ko patemehi ngen a pwooti ten, a pwooti na juuju. Ke ni bwomu tong naa na mwomwon, ke pwohewii ni pihe pa me bépipwopaing, ke me é pwo me e piân a Pwooti Wâé.

⁸ [He é penem me de Padaame, ke time é uce pipéce ne ko nina lé niimihi wo lépwo apulie.] Be lé pii nina wâé ne kong wo lépwo béén; ke lé pii nina ta ne kong wo lépwo béén mwo. Ke lé picediéo wo lépwo béén; ke lé pihooniéo wo lépwo béén. Ke lé pii pie, woéo ke pa agele wo lépwo béén; kehe icehi ana é pii a juuju.

⁹ *Ke lé pii wo lépwo béén pie, time lé uce temehié. Kehe icehi ana [nihe hiwon nina lé] temehié ehi ††. Ke junihe ubwo ni kuhinaado tong, ke é caa pwo me é mele ††. Kehe icehi ana é mwo teko mulie.

¹⁰ Éa, é te nihe mu he ni picani, kehe icehi ana é te pipwodéén. Be mepie tice wâé tong ne éni pwo bwohemwo, kehe hiwon ni wâé na é ne he ni pwonime ni apulie. Ke mepie te tice dong, kehe a juuju pie, ni naado ati, ke ni dong.

¹¹ Wogewé lépwo bééng Korénit, é tehi ne tewé jena a pwonimung. Ke te tice celi é neduwohi kowé mu ha ati nina é pii tewé. ¹² Be junihe ubwo a pwonimung kowé. Ke [mepie pwo aceli piehadeniinye, ke wieli] time geé uce piwâééo mu he ni ju pwonimewé. ¹³ ††É pacihekewé jena, pwohewiin heme te lépwo ju naîng.

† 6.5 2 Korénit 11.23–27 †† 6.6 1 Timoté 4.12 † 6.9 2 Korénit 4.10 †† 2e phrase—ai Wo Padué ke e te temehié ehi. †† 3e phrase—Grek: [Lé niimihi pie é] caa mele. ††† 6.13 1 Korénit 4.14

Ke wogewé, ke wâé heme geé pipwohewiiéo, ke me geé hegiéo ehi ne he ni ju pwonimewé!

Geé engen koja lépwona lé pwo nina ta

¹⁴ ††Geé nemwo junihe pipabéé [§] lépwona time lé uce céihi ne ko Padué [ke lé tee pwo nina ta]. Be time uce jan me geé mulie ha a mulihelé. Be woté? Te jan me lu pimu ibu a wâé me a ta? Te jan me lu pimu ibu a pwéélang me a melepiing? ¹⁵ Te jan me lu pimu ibu wo Kériso me *Caatana ^{§†}? Te jan me te céiu ace bwo alihi nen de paceli e céihi ne ko Padué, me paceli time e uce céihi? ¹⁶ †††Ade aceli piwien ne ko ni déme duéé ^{§†}, me a *mwaiitihi te Padué? Uhu! Be wogenye, ke nye mwaiitihi te Padué, na e mulie. Be e caa te pii pie:

É mu pele a puapulie ce,

ke gemu piengen ibu.

É bo Dué hen.

Ke bo pa puapulie tong. Lévitique 26.12; Ézékiel 37.27

¹⁷ †††Ke e pii mwo wo Padaame Padué pie:

Geé engen kojale.

Geé nemwo mu pelelé.

Geé necu ni bwomu telé na ta.

Ke é o bo hegikewé. Ésaie 52.11

¹⁸ ††É bo Caa tewé,

ke geé bo naîng^{§†}, aiu me toomwo.

Woéo Padué na pwojunuung

ne ko ati ni naado. 2 Samuel 7.14

7 [Wo Padué, ke e] pii ni naado naa, wogewé lépwo ju bééng, be me denye [wogenye ni naîng]. É mu ko anaa, na wâé heme nye pimu ité koja ni naado na e pwo me ta a éénye me a pwonimenye. Wâé heme nye pétaabwon a ta mu he ni mulihenye, ke me nye paciitieng.

Piwâénimung kowé lépwo Korénit

² Geé ne ace ahiéo ne he ni pwonimewé. Be time é uce téele pipwohuô te pace céiu bééwé. Ke time é uce téele pwo me e biteeng wo pace céiu mu ha a céihi ten. Ke time é mu uce getikewé, beme é bo pé ace céiu naado kojakewé.

³ Hemepie é pii anaa, ke time uce a bwopwonon me é tautikewé. Be a juuju ana é caa pii pie, geé mu ha a pwonimung. Ke o te wonaa, hemepie nye mwo teko

††† 6.14 Éfeso 5.11 § *Geé nemwo junihe pipabéé—A bwopiinen pie, me nye nemwo pamwoiulé me piengen ibu ne he ni bwomu telé na time uce wâé. §† Caatana—Grek: Béliat, a céiu nii Caatana.*

§†† 6.16 Lévitique 26.12; 1 Korénit 3.16 §†† *Déme duéé—Idole. Omehi Démenaado ne ha a Niinaado (Vocabulaire) ha anebwén ko a tii. §†† 6.17 Ésaie 52.11; Pii Beetihi 18.4 §† 6.18 2 Samuel 7.14; Jérémie 31.9 §†† *Geé bo naîng—A pwooti li e mi pii wo Padué ne ko pa Mesia. Omehi 2 Samuel 7.14 ke Ébéru 1.5. Kehe icehi ana wo Paulo, ke e pineibuhi a pwooti naa me a pwooti na e pé mu ha a Ésaie 43.6—7 lépwo naîng aiu me toomwo, beme e habwii pie wogenye ati na genye céihi ne ko Iésu pa Mesia, ke genye caa tai ni naî Padué, ke etenye ati ni adéhi te ni ju naîng.**

mulie, ai hemepie nye caa mele. ⁴É céihi ne kowé, be te junihe wâé tong a mulihewé, ke é te junihe pipii dewé [ko a céihi tewé]. Be geé te junihe pamwoiuéo ne ha ati ni picani na é mu hen. É mu ko anaa, na é te junihe pipwodéén.

⁵†[É mwojuia ne mwo ko ali é pii.] He li é tuie ne ha a province Macédoine, ke time é uce mwaale. Be hiwon ni jjié me ni dan ânebhung ††. Be é pwomwo, ke é too lépwona lé cubwoniéo. Ke é ne ha a pwonimung, ke te junihe mwotió.

⁶Kehe icehi ana wo Padué, ke e te junihe pamwoiu pa apulie na tice niihen. Ke e te pamwoiuéo, be e nebé céiiéo Tit. ⁷Ke é te junihe pipwodéén he e tehenebé pelong, ke é he é téne pie geé te junihe pamwoiueng. Ke e pii mwo pie, te junihe nimewé me geé aliéo, [ke geé teko ucíéio]. Ke te junihe piwahin gewé [ko ni naado na lé pii ne kong ne pelewé] ‡. Ke e pwojepule tong ko ni pwonimewé kong, be te junihe nimewé me geé pwopaing. Anaa kuti a pipwodéén dong.

É pipwodéén be geé bitekewé

⁸†Lépwó bééng, é temehi pie piwahin gewé ko ali céiu tii tong †† ha a cuwo benaamwon. Ke woéo mwo, ke piwahin jo, kehe icehi ana é jena, ke time é bo uce niimihi mwo. ⁹Kehe é pipwodéén; ke time uce é mu ko a bwo piwahin gewé, kehe é mu ko ana geé caa pininim, ke geé bitekewé mwo. Be a naado na te junihe wâé te Padué. Ke é alihi pie, time uce pwotahinaado ne kowé [ali é tii].

¹⁰††Be time nye bo uce tee niimihi mwo a piwahin na e ne tenye wo Padué. Be e ne, beme nye pininim, ke me nye taatéhi ni mulihenye. Ke a piwahin naa, ke e pébé a bwo celuimikenye. Kehe icehi ana hemepie piwahin genye, ke me time nye uce bitekenye, ke a naado na ta ††. Be hemepie wonaa, ke nye â benihi a mele dieli mwo na e éité koja Padué.

¹¹Lépwó bééng, geé cuwoteeke alihi ana e pwo wo Padué me dewé ko a bwo piwahin gewé. Weengi: Geé habwii pie, geé cuwo ité koja pana e pii me ta jo †! A céiu: Ke geé okéé ne kon! A céiu: Ke nimewé me geé pwocuhinaado ten! A céiu: Ke mwotikewé [be koli geé bo pwo ace naado celi time uce wâé]! A céiu: Ke junihe nimewé me geé aliéo [beme geé pwopweehi a pwonimung]. A céiu: Ke geé habwii pie time uce wogewé na geé pwo nina ta ha a benaamwon naa.

† 7.5 2 Korénit 2.13 †† 3e phrase—Grek: +É mu he ni picani ati ne he ni bwomunen. ‡ Ni naado na lé pii ne kong ne pelewé—E te junihe pipii Paulo wo pa céiu béé lépwó Korénit. Omehi 2 Korénit 10.7. †† 7.8 2 Korénit 2.4 †† Ali céiu tii tong—A tii li e pwo, beme e cihe me mwoiu ne kolé. Time e uce pii a bécéiuhe tii te lépwó Korénit na e mu ha a Tii Iitihi. Omehi mwo 2 Korénit 2.1–3. ††† 7.10 Mataio 27.3–5; Ébéru 12.16–17 ††† 4e phrase—Grek: A piwahin na e âbé mu ko a bwohemwo. † 2e phrase—Grek: Geé pipwopaiwé.

¹²He li é tii a tii naa, ke time uce a bwopwonen me é tauti paceli e pwo celi ta, ai me é pwopai pace céiu apulie ††. Kehe nimung me e bo habwii tewé wo Padué pie, é teko mu he ni pwonimewé. Be geé pipwopaing. ¹³Be anaa kuti ana e pamwoiuéo.

É pipwodéén ko Tit

A céiu mwo, wogewé lépwó bééng: É te junihe pipwodéén, be geé pwo me e pipwodéén wo Tit. Be geé [tai hegieng ehi] ke geé pwopweehi ne kon, me wâé a pwonimen. ¹⁴Be é cihe ten ehi kowé. Ke time geé uce pwo me é pitaatéhi ni bwo niimihinaado tong ne kowé ††. Be ana é pii ten, ke a pwooti na juuju, pwohewii ali é mu te cuwo ko pii tewé.

¹⁵É ne ko Tit, ke te junihe eânimen dewé. Be e pii pie, geé hegieng ne ha a pipwoun, ke geé te nihe piténeeng. Weengaa a watihen me piubwo a pipwoéhe ten me dewé. ¹⁶É te junihe pipwodéén, be é céihi ne kowé ne he ni naado ati.

a bépicanu te lépwó acéihi @ ne iéruusaléma

(Pwahamii tii: 8–9)

Lé nihe ne mwani wo lépwó Macédoine

8 ††Lépwó bééng ne he Kériso, wâé heme geé temehi a penem na e pwo wo Padué mu ko a *pipwoéhe tice ja kon den, ne hadenii ni acéihi ne ha a province Macédoine ††. ²Be lé te junihe mu he ni picani, be te tice delé, kehe icehi ana lé te mu ha a pipwodéén. Ke lé ne ni delé me ju piticenaado ne kon. ³Ke é *pajuujuhi pie, lé te ne nina e teko mu peelé. Ke lé te ne mwo nina piwéden, kehe te tice apulie celi lé cuwokolé me lé ne.

⁴Be te woélé na lé cuwokong, beme lé ne ce bépicanu me de lépwó acéihi ne *Iéruusaléma. ⁵Ke nina lé ne, ke te junihe wéden koja nina é ucéihi mu kolé. Be lé te pinelé ati te Padaame, ke é alecehen, ke lé pinelé tong, beme lé piténehehi ana nime Padué kon.

⁶[É ne ko li bépicanu] ke te wo Tit na e tabuhi a penem naa. Ke weeng na e pamwoiukewé mwo, me geé pé ce âneule tewé kon. É mu ko anaa, na é pii ten pie, wâé heme e pamwoiukewé mwo, beme geé panebwenihi ni âniimihinaado tewé. ⁷†Be [wo Padué, ke e] caa te ne tewé ni muko wâé na hiwon: a céihi, ke a bwo cihe, me a bwo temehi nen, me a nihwé, me a pipwoéhe. Ke geé te ûmiê; ke te junihe ubwo a pip-

†† Pace céiu apulie—A bwopiinen pie weeng, Paulo. ††† 2e phrase—Grek: Ke time uce tanim go. †† 8.1 Roma 15.26; 2 Korénit 9.1–2 ††† Ni acéihi ne...Macédoine—Ni puco te ni acéihi na e tabuhi wo Paulo ne he lupwo pwomwo ubwo Filipi me Tésalonik, wieli é ne mwo Béré. Omehi Apostolo pwahamii tii 16–17. †† 8.7 1 Korénit 16.1–2

woééhe tewé ne kong †. Ke wâé mwo heme geé te pati mwo lépwo béén, ke me geé ne me piticenaado ne kon.

⁸ Hemepie é pii anaa, ke time é uce cuwokowé. Kehe é te ju pii tewé pie: Ni béé *puco te ni acéihi, ke te pepule jélé, me lé pipati ha a pipwodéén. Ke é ne tewé a bwomunen naa, beme habwii pie a pipwoééhe tewé, ke te a juuju. ⁹ ††Be geé te temehi pie, e te neeng ati tewé wo Padaame henye Iésu Kériso mu ko a pipwoééhe tice ja kon. Be te junihe hiwon ni wâé ten [ne jeda he miiden]. Ke e ne ati, beme dewé ni wâé na hiwon [ne pele Padué].

Geé ne âcehi nina e mu pelewé

¹⁰⁻¹¹ É ha ali jo li, ke te wogewé li geé mi piniimihi pie me geé picani [te lépwo Iérusaléma]. Be wonaa a bwo niimihinaado tewé ne kon, ke geé téetihhi, ke geé pwo. Ke weengi a bwo niimihinaado tong: Wâé heme geé epin ko panebwénihi ana geé caa tabuhi, âcehi nina e pelewé. ¹² †Be hemepie nye ne mu he ni ju pwonimenye, ke o wâé te Padué nina nye ne. [Te piwien, hemepie ubwo, ai wahin.] Be time e uce ilehi kojakenye aceli teko tieden pelenye.

¹³ Time é uce pii pie, me geé pwo me téé ni mulihewé, beme pwia ni mulihe lépwo béén! Wâé heme pwo ce dewé, ke me pwo mwo ce delé. ¹⁴ Be é jena, ke te nihe hiwon ni dewé, kehe woélé, ke te tice delé. Ke wâé heme geé picani telé, be mepie o bo tice dewé ha ace céiu tan, ke o bo woélé na lé bo picani tewé. Ke é ha a tan naa, ke o bo tai pwo dewé. ¹⁵ ††Be caa te tii ne he ni tii iitihhi pie: *Wo pana nihe pitii âdaanu, ke o te tice celi piwéden. Ke wo pana te ju mehni ni âdaanu ten, ke o time uce menen.*

Exode 16.18

E cile ni âpipati wo Tit

¹⁶ É pwo-olé te Padué, be e ne he pwonime Tit a pipwoééhe me dewé, pwohewii a pipwoééhe tong me dewé. Be te junihe nimen me e picani tewé. ¹⁷ É he é pii ten pie me e âdé caniêkewé, ke e hegi ne ha a pipwodéén, be te junihe wâé ten.

¹⁸ Ke é o caa neeng lé, me pa céiu acéihi béén. Wo panaa, ke pa apulie na lé te nihe picedieng ati ne ni puco te ni acéihi mu ko a penem den ko a bwo pii beetihhi a Pwooti Wâé. ¹⁹ Ke lé caa pipégalieng, beme e bo âcéing [ne Iérusaléma] hemepie é pé ngen li âpati. Ke weengaa a bwo pipwoeabwé tong me de Padaame beme é pipwoun den. Ke weengaa mwo a bwo habwii na a ju pwonimung.

† Junihe ubwo a pipwoééhe tewé ne kong—Ni béé tii iitihhi he pwo grek, ke lé pii pie: Junihe ubwo a pipwoééhe tong me dewé.

†† 8.9 Mataio 8.20; Filipi 2.6–7 † 8.12 Maréko 12.43–44 †† 8.15 Exode 16.18

²⁰ Nihe ubwo a mwani naa [be lé ne me tice ja kon]. Ke é te pipwocile, be koli lé bo pipé ne kong wo lépwo béén, hemepie é picile tahi. ²¹ Be é hane ana wâé te Padué, ke ni apulie mwo.

²² Mepwo é ne ko pa céiu bééng na é neeng lé me lupwoje, ke te junihe pa apicani tenye [ke pa apiténedehi]. Ke é te nihe céihi ne kon. Ke weeng, ke e te junihe céihi ne kowé, ke te nihe wâé ten, me e picani tenye ati. ²³ Ke é ne ko Tit, ke pa bééng ko penem me dewé. Ke wo lupwo alo, ke ni puco te ni acéihi na lé nelu lé, ke lé tai penem me lé pipaunu Kériso.

²⁴ ††Ke [geé hegilé ehi, ke] geé habwii telé a pipwoééhe tewé, be é caa cihe me wâé ne kowé te ni acéihi. Ke wâé heme lé alihi ace a juuju kon.

É te nihe pii me wâé gewé

⁹ ††É te ju pwotii lé céiikewé ko ni âpipati me de lépwo acéihi ne *Iérusaléma, ² be é te temehi ni pwonimewé, ke é caa pipatemehi a bwo wâé gewé ne te lépwo Macédoine. Be é pii telé pie, wogewé, lépwo acéihi mu ha a province Akai, ke geé caa mi pipwopweekewé, ke geé caa tabuhi ne ni bépicani tewé ha ali jo li. Ke hiwon mu kolé na te nihe pipamwoiulé, beme lé pipwohewiikewé.

³ Kehe icehi ana é ne lé céiikewé lépwo bééng na cié jélé naa, [beme lé picani tewé, beme geé tai ati ni âpati tewé ânebuhe a bwo âdé tong pelewé]. Be é caa pii te lépwo béén pie, geé caa pipwopweekewé. Ke time uce wâé heme piticenaado ne ko a bwo piikewé tong me wâé. ⁴ Be é bo âdé ne pelewé me lépwo béé Macédoine. Ke mepie lé alihi pie time geé uce téele pipwopweekewé, ke o tanim jo, ke o te junihe tanim gewé mwo.

⁵ Weengaa kuti, ana é mi ne lé lépwo bééng ko penem, [li cié jélé] beme lé mi alihi li âpipati tewé, li geé caa mi pipwopweehi. [Ke mepie game âdé me lépwo béé Macédoine] ke lé o alihi pie, ni âpipati tewé, ke te âbé mu he ni ju pwonimewé, kehe time uce é mu kong.

Ne, ne ha a pipwodéén

⁶ ††Weengaa ana é ko pwo beme é pii tewé: Pana te ju wahin ni apwoamu ten, ke o time uce hiwon ni âdaanu ten. Ke wo pana nihe ubwo ni apwoamu ten, ke o nihe hiwon ni âdaanu ten.

⁷ Wâé heme nye ne, mu he ni ju pwonimenye, be time nye uce piwâgo konye. Be wâé te Padué pana e ne, ne ha a pipwodéén. ⁸ Ke e bo ne tewé ni pétaapwo wâé ten, ke e ne me pitice ja kon. Ke e o te pwo ne tewé mwo ati ni naado na o te jan ne ko a mulihewé, ke e o ne tewé me piwéden, beme ni âpipati tewé me

†† 8.24 2 Korénit 7.13–14 ††† 9.1 2 Korénit 8.1–7 ††† 9.6 Proverbes 11.24–25

de ni béén †. 9 ††Be caa te tii ne he ni tii iitihi a pwooti ce [ko pa apulie, na e paciiti Padué]:

*E ne me tice ja kon,
te lépwona tice delé.
Junihe ubwo ni âpipati ten,
pwohewii ni âdaanu na hiwon.
A bwo wâé nang, ke é dieli mwo. Psaume 112.9*

O bo adéikewé

10 †Wo Padué na e ne ni wiinaado †† tenye. Be e ne ni âdaanu na nye cemi, ke e pwo me cim. Ke, me nye ne, ke e bo pwo me hiwon ni acehi ni penem denye na wâé.

11 ††Éa, e bo ne tewé, me piticenaado ne kon, ni pé-taapwo naado na wâé. Ke geé bo ne ce de lépwo béén. Ke o hiwon ce acéihi [mu Iérusaléma] celi lé bo pwo-olé te Padué mu ko ni âpipati tewé, na geme bo pé nge céiilé. 12 Weengaa kuti a bwopwonen me geé pipenem delé. Be geé ne telé ana tieden kojálé.

Ke geé pamwoiulé, beme lé nihe pwo-olé te Padué. 13 Ke geé habwii a bwo piténehehi nen dewé a Pwooti Wâé te Kériso. Be geé patihi nina pwo ne tewé te lépwo acéihi ne Iérusaléma, me ati lépwo béén mwo.

Éa, lé o alihi mwo pie, nihe pwonaado ne ko a bwo penem dewé me delé. Ke lé o pipwoun de Padué kon, ke lé o pwo-olé ten 14 ko a wâé ten na nihe ubwo, na e caa ne tewé me tice ja kon. Ke lé o te nihe pwoitihi ten me dewé, be junihe eânimelé tewé.

15 Wâé heme nye pwoun de Padué ko pa âpipati ten †† na pida, ke e piwéden, na pwocoon me nye pii!

e pipwopain wo paulo

(Pwahamii tii: 10—12)

10 ††Pwo lépwo béén [mu kowé] na lé pii pie: «Wo Paulo, ke te junihe pwo niihen ne he ni tii ten †, kehe te ju tice niihen, me e mu pelenye!» Kehe é jena, ke woéo Paulo, ke é pwo me piwahin jo, ko a piwahin me a bwo bwala Kériso, beme é mwo ilekewé [pie me geé mwo te ju pwo me tabemiéo].

2 ††Lépwoli! Geé téne, be koli é bo uce cihe me téé, hemepie é tuie lé pelewé! Be lé niimihi pie a mulihung, ke time uce pi-ité koja lépwo apulie na time lé uce temehi Padué ††. [Lé pipwocile, be lé bo temehi ehi

† Beme ni âpipati tewé me de ni béén—Grek: Ne ko ni penem na wâé. †† 9.9 Psaume 112.9 † 9.10 Ésaie 55.10 †† Wiinaado—Grek: Pwoola. †† 9.11 2 Korénit 1.11, 4.15 ††† Pa âpipati ten—Wo Iésu Kériso, ai a bwo pine ibu lépwo Juif me lépwona time uce lépwo Juif. Weengi a ânen: Wo Padué, ke e pineeng me pa âpati, ke é heme lé ne ni âpati telé me piticenaado ne kon wo lépwo apulie, ke lé wonaa mu ko Padué. ††† 10.1 1 Korénit 2.3 † Ne he ni tii ten—Grek: He mwo woéo ité. †† 10.2 1 Korénit 4.21 ††† A mulihung, ke time uce pi-ité... Grek: É âcehi a éé apulie.

pie] woéo, ke pa apulie ten, ke pwo a junuun ne kong.

3-4 ††Hemepie woéo ††, ke te pa apulie pwo bwohemwo, kehe icehi ana time é uce pwohewii lépwo béén. [Be é penem me de Padué.] Ke ni pihe pa na etong, ke time uce ni pihe pa te ni apulie. Be a niihelé, ke e âbé mu ko Padué, beme e tanahi a mwogu [te *Caatana] ke ni âniimihinaado na gele 5 te lépwo acibehede, ni âniimihinaado na capuhi bwonilé, beme lé nemwo temehi Padué. Ke é pwopa, hane me taatéhi ni pwo-ime apulie, beme lé piténehe Kériso.

6 Hiwon lépwona lé mu pelewé na lé caa piténehe Kériso. Kehe icehi ana te hiwon mwo lépwona te muhi telé me lé piténeheeng. Ke wo lépwonaa, ke é o caa tabuhi pwocuhinaado telé ††.

Caa ne tong a pihuô ne kowé

7 Wâé heme geé alihi ehi ni naado! Pwo pa céiu apulie †† pelewé, na e [pipiiéo, ke e te nihe pipii den. E] pii pie, pa apulie te Kériso, [ke caa te wâé] kehe icehi ana wâé heme e niimihi pie, woéo mwo, ke te pa céiu apulie te Kériso! 8 †††Ke woéo, ke e pelong a pihuô ne kowé, na e âbé mu ko Padaame.

Woté? Wieli [geé ko niimihi pie] é te junihe pipii dong ko anaa? Kehe icehi ana time uce tanim jo ko a pihuô naa, be a bwopwonen, me é picani tewé, ke me é pamwoiukewé. Kehe time uce a bwopwonen me é pwo me ta ne kowé. 9 Ke geé nemwo niimihi pie é hane me é pwo me mwotikewé ko ni tii tong.

10 Ke é ne ko pa apulie naa, ke e pii pie: «Te junihe mwoiu ni tii te Paulo, kehe icehi ana me e mu hadeni-inye, ke pwohewii ni pioti, be time e uce temehi pii ni pwooti.» 11 Wo paceli e wonaa a bwo cihe ten, ke wâé heme e temehi ehi pie: Te tice aceli é tii ne he ni tii tong celi time é uce pii tewé gaale!

É te ju pii cehi ni penem de Padué

12 Lé niimihi wo lépwo apulie na wonaa jélé pie, te nihe pwonaado ne kolé. Kona lé niimihi pie piticenaado ne kong ††? Te tice celi lé temehi, be lé te pipii jahi ne kolé mwo, [ke time lé uce omehi a mulihe lépwona pwonaado ne kolé]. 13 †††Ke lé pipii delé 18 nge he ni naado na hiwon, he na te tice pihuô telé nelang.

Kehe woéo, ke o time é uce wonaa, be é te ju pipii dong cehi ko a penem na e ne tong wo Padué 19. Ke e caa nekewé tong, beme é penem ha awiemewé. 14 Ke

†† 10.4 Éfeso 6.13–17 ††† Woéo—ai Wogenye. Omehi mwo note †† Grek: +É pipwopweéo beme é pwocuhinaado te ati nina time lé uce piténehehi, me hején a bwo piténehehi nen dewé. †† Pwo pace céiu apulie—ai Pwo lépwo apulie. Wieli e cihe wo Paulo ne he ni niide a tii 7–11 ko pa apulie na te céiu nang na e pacémunihi a gele. Grek: Hemepie pwo pace céiu apulie... ††† 10.8 2 Korénit 13.10 ††† 2e phrase—Grek: +Time é uce pwo me piwiekeme me woélé. ††† 10.13 Roma 12.3 18 Lé pipii delé—Grek: +Time é uce pipii dong. 19 2e phrase—Grek: +É pé me a béja tong a picé na e ne wo Padué [ne ko a penem dong].

te pwo a pihuô tong me é pii anaa †. Be woéo, ke pali é mi pé lé céiikewé a Pwooti Wâé te Kériso. ¹⁵ Ke wogewé, ke ni apwoamu tong, ke time é uce pipii dong ko ace apwoamu celi e te penem hen wo pace céiu. Ke é niimihi pie, geé o picediéo ††, hemepie piubwo da a céihi tewé. ¹⁶ Ke é mulang, ke é bo â patemehi a Pwooti Wâé ne he ni duaan na e éité kojakewé. Ke o te tice ace bwopwonen, me lé pipé ne kong pie, é te ju penem cehi he ni apwoamu te pace céiu.

¹⁷ †Wo pana nimen me e pipii den, ke wâé heme e pipii den ne he Padaame.

Jérémie 9.23

¹⁸ ††Woolé paceli pwonaado ne kon? Time uce paceli e ju pipii den cehi! Kehe te wo pana e pii wo Padaame pie, pwonaado ne kon.

Paulo me lépwo apostolo agele

11 Wieli geé ko niimihi pie é ko pipii dong ††? [Time é uce wonaa, kehe] geé te picani ne kong [heme é pipwopaing].

² ††Wieli [geé niimihi pie] é ko pitaaba [ne ko lépwoce béé apwocémun? Ke me é te pacémunikewé cehi?] Ke me wonaa, ke é pwohewii Padué. Be geé pwohewii é ewa toomwo, na te junihe wâé nang. Ke é caa mi pii te Kériso pie, é bo nekewé ten, beme geé bo piaten me weeng, ke me time geé uce apulie te pace céiu.

³ ††[Dieli jena, ke mwomwon, ke juuju a bwo engen dewé céi Kériso.] Kehe, geé pipwocilekewé, be koli geé bo pipatieden ni pwonimewé koja Kériso. Be wo *Caatana, ali bwien ânebun, ke e geti Éva †, ke e pwo me e pipatieden.

⁴ †É ânebun, ke é patemehi tewé Iésu [Kériso, ke geé hegi a pwooti tong]. Kehe icehi ana é jena ni, ke geé te nihe wele ko hegi pa céiu 'Iésu' na lé patemehiang wo lépwo béén. Ke geé tété, beme geé hegi ace céiu 'jenen' na pi-ité koja a *Jenen Iitihi, ali geé caa mi hegi kojaéo. Ke pwohewii a bwo hegi nen dewé a céiu 'pwooti wâé', na time uce a ju Pwooti Wâé.

⁵ ††[Wo lépwona lé pii beetihi ninaa, ke lé pii pie] woélé lépwo '*apostolo ubwo'. Kona woéo, ke woo ††?

⁶ ††Wieli a juuju pie, time é uce temehi cihe. Kehe icehi ana é te nihe temehi Padué [me ni wâé ten]. Ke ati nina é pwo, ke é te habwii ne ha a pwéélang.

Time é uce iluukewé

⁷⁻⁸ ††É he é patemehi tewé a Pwooti Wâé na e âbé mu pele Padué, ke time é uce ilehi kojakewé pie, me geé picani tong ko mwani. Be te ni béé acéihi na lé ne ni mwani tong. Ke é heme é penem pelewé, ke pwohewiin heme é pé kojalé, beme é ne tewé. É wonaa beme é pwo me piwahin jo ne he pwahamiiwé, beme o pinekewé da. Ke woté? Kona [geé ko niimihi pie] ta nina é pwo tewé?

⁹ Te pwo ni benaamwon na tice mwani tong hen, ke time é mu uce pii tewé. Kehe te wo lépwo acéihi béénye mu Macédoine, na lé mu pébé ni bépicanitong. Éa, time é mu uce ilehi ce naado kojakewé, ke time é bo uce ilehi mwo. ¹⁰ Ke time uce piwâ jo me é pii anaa, nge ati he ni piduaan ko a amu Akāi. É he é ko pii anaa, ke e pajuujuéo wo Kériso. ¹¹ Kona [geé niimihi pie] time é uce pipwoééhewé [ko ana time é uce ilehi ace céiu naado kojakewé]? Geé nemwo niimihi pie wonaa, be e te temehi wo Padué pie é te junihe pipwoééhewé!

Lépwo eabwé te Caatana

¹² Weengaa a watihen me time é o uce hegi ace céiu naado kojakewé ††. Be time é uce patupwo ne te lépwo agele ace bwopwonen beme lé pii pie é pipwohewiilé. ¹³ Be wo lépwonaa, ke lé pii pie, wo Kériso, ke e nelé ngen beme lépwo apostolo ten, ke me lé eabwé ten. Kehe icehi ana lépwo apihaamikenye, ke lépwo agele.

¹⁴ Geé nemwo téetihii anaa! Be wo Caatana, pali agele, ke e te gahe pwo me pa *âcélo na e pwéélang.

¹⁵ Ke lé te gahe pwo mwo ni eabwé ten, me woélé ni eabwé te Padué na lé pwo nina wâé. Kehe icehi ana [é ha ace céiu tan] ke lé bo hegi ace kuhinaado telé, âcehi ni penem delé [na ta].

É mu he ni picani mu ko Kériso

¹⁶⁻¹⁸ Wo [lépwo 'apostolo ubwo' naa] ke lé te junihe pipii delé. Kehe é niimihi pie, te junihe hiwon ni watihen me é pipii dong kojalé. É he é pii anaa, ke é cihe pwohewiilé, kehe time uce wo Padaame. Kehe geé nemwo niimihi pie é pipii dong heme é pipwopaing. Kehe mepie ko wonaa ce bwo niimihinaado tewé, ke wâé heme geé picani ne kong, ke me geé hegi ana é pii ††. ¹⁹ [Be geé niimihi pie] wogewé lépwo atemehi-

† 1re phrase—Grek: Ke time é uce piâ ité koja a picé, pwohewii ana time é uce tuie lé pelewé. †† Geé o picediéo—ai O piubwo da a penem dong ne pelewé. † 10.17 1 Korénit 1.31 †† 10.18 1 Korénit 4.4 †† É ko pipii dong—Grek: Pihauli jo. ††† 11.2 Éféso 5.26–27 ††† 11.3 Genèse 3.4,13 † Éva—É mwode Adamu, pa bécéiuhe apulie pwo bwohemwo. Omehi 1 Timoté 2.13–15. †† 11.4 Galat 1.8–9 ††† 11.5 1 Korénit 15.10; 2 Korénit 12.11 †† Kona woéo, ke woo?—Grek: Ke é niimihi pie time uce wahin jo kojalé. ††† 11.6 1 Korénit 2.1,13

†† 11.7 1 Korénit 9.18 †† 11.8–9 2 Korénit 12.13; Filipi 4.15–16 ††† 1re phrase—Grek: Ana é pwo, ke é o tee cuwo ko pwo.

††† Grek: ¹⁶ É pii mwo pie: Me te tice apulie celi me e niimihi pie, pipenem a puning. Kehe me wonaa, ke geé hegiéo pwohewii pana pipenem a punin, beme jan me é pipii dong. ¹⁷ Me é pii anaa, ke time é uce pii ha a pihuô te Padaame, kehe be [pwohewiin heme] pipenem a puning. ¹⁸ Junihe hiwon nina lé pipii delé âcehi a éé apulie. É mu ko anaa, na é o pipii dong mwo.

naado, he geé te junihe epin ko hegi [a pwooti te] lépwo apulie naa, na lé pipii delé hauli †!

²⁰ [Be wo pa céiu béélé, ke e pihaamikewé, ko ni pwooti na e pé lé céiikewé.] Ke geé neeng me e pi-huôkewé, ke me ni *apenem tice ja kon den. Ke e pé ni mwani tewé, ke e wii ni acehi ni penem dewé. Ke [me e wonaa tewé, ke] e teko pihoonikewé, be pa upwoni-men. [Pwohewiin heme] e ahi ni pwahamiiwé. Kehe icehi ana geé te pipwodéén ko anaa!

²¹ ††Kehe woéo, ke time é uce wonaa. Wieli wâé heme tanim jo kon? Be [geé pii kong pie] tice niihung. Ke te wâé, kehe geé niimihi ehi!

Wo panaa me lépwo béén, ke lé te nihe mwoiu ko pipii delé. Ke me wonaa, ke wâé heme é mwoiu, me é pipwopaing. [Kehe mepie é pwo anaa, ke wieli geé niimihi pie é] pipii dong pwohewiilé ‡.

É te nihe pipwoeabwé ten kojálé

²² Kona [lé pipii delé pie] lépwo apulie mu ko a bele te lépwo *Ébéru? Woéo mwo. Ke [lé pii pie etelé a pwoiitihite] lépwo *Isaraéla? Woéo mwo. Lépwo piebehi *Abérama? Woéo mwo. ²³ ††Lé [pii pie woélé] ke lépwo eabwé te Kériso? Woéo mwo, be te junihe ubwo a bwo pipwoeabwé tong kojálé. É he é pii anaa, ke é cihe pwohewiilé, be lé pipii delé hauli. Éa, é caa te junihe penem kojálé, me de Kériso. Caa te cuwo ko neéo he karépu. Caa te cuwo ko tatiéo kojálé. Hiwon mwo ni benaamwon na é caa pwo me é mele hen [ko a bwo pipwoeabwé tong me de Kériso.]

²⁴ ††[Mepwo é ne ko a ju bele tong] wo lépwo *Juif, ke lé ne tong [ni kuhinaado na nim na te junihe ubwo kuti]: 39 a jéhi ni bwo ahiéo ko a bwaliwota ††, ne ha a bwo pwocuhinaado na céiu. ²⁵ †††Ke mepwo é ne ko lépwo Roma, ke ocié ko tatiéo ko ba-acuwo. Ke é ha a céiu, ke lé ahiéo ko péi, beme lé taunuéo. Ke é ha a céiu mwo, ke ocié jo ko tebwo he ni ong na lé mwiiê. Ke, é ha a céiu benaamwon, ke céiu a tan ke céiu a bwén na é mu he jié.

²⁶ ††Hiwon ni a-engen dong nge he ni amu, ke é tooli nina abwobwo me ni tacebwén. Be é tooli ni jaa, ke ni abune, ke [lépwona lé cubwoniéo]: ni béén mu ko lépwo âjiénung, lépwo Juif, ke ni béén mu ko ni béé bele, die mwo ko lépwona lé pii pie lépwo acéihi ne ko Iésu! Ke é te junihe mu he ni picani ne he ni pwomwo ubwo, ke é he ni melé ††, ke é ne he jié: [ne ha ati ni piduaan].

† Na lé pipii delé hauli—Grek: Na pipenem punilé. Piwien ne he ni niide a tii 20–23. †† 11.21–22 Filipi 3.5 † Grek: Tanim jo heme é cihe, be te tice +niihung. Kehe mepie time e uce piwâ [me e pipii den] wo pace apulie, ke woéo mwo, ke é wonaa. Kehe é cihe pwohewii pana pipenem a punin...? †† 11.23 Apostolo 16.23 †† 11.24 Deutéronome 25.3 ††† 39 a jéhi ni bwo ahiéo ko a bwaliwota—A kuhinaado na ubwo, be iitihite ne ha a patén delé me lé wédenihite a 40 bo tati apulie. Omehi Deutéronome 25.3. ††† 11.25 Apostolo 16.22, 14.19 † 11.26 Apostolo 9.23, 14.5 †† Melé—Da (désert). A duaan na ticie hen.

²⁷ Ke é te junihe mwoiu ko a bwo penem dong. Ke, é he ni béén, ke te tice mwaale tong, ke te junihe emaan jo. Ke é he ni béén, ke te tice wiinaado me ûdu, ke menung. Ke, é he ni béén, ke te tice palito me pwotuun dong, ke te junihe im jo.

²⁸ Ke a céiu mwo: Ke mu pinekepé a pwonimung ne ko ati ni acéihi, be é te niimilé taaci. Ke caa a âneule na te junihe téé ne tong. ²⁹ Be heme tice niihe pace céiu acéihi bééng, ke woéo mwo, ke é te téne mwo. Ke mepie pihaami pace céiu, beme e pwo ace céiu naado celi ta ††, ke téé jo kon [ke é okéé ne ko pana e pihaamieng].

É pipii dong ko a bwo tice niihung

³⁰ É heme é pipii dong, ke é te pipii dong cehi ko a bwo tice niihung. ³¹ Ke time é uce gele, he é pii anaa. Be e pajuujuéo wo Padué, pa Caa te Padaame Iésu, ke pana nye pipaunueng dieli mwo.

³² ††He li é mu ha a pwomwo ubwo Damas, ke lé hane me lé imwiéo. Be wo pa gupéno lang, ke pa apenem de pa daame Aréta, ke e pwo me lé wéihi ni pomwa ko a pwomwo ubwo wo lépwo coda ten. ³³ Kehe [wo lépwo bééng ko penem, ke] lé neéo ha a élele tai, ke lé neéo ole ha a pomwa-he-puwo, uti a goomwa babé ko a amu. Ke weengaa a bwo celuimiéo.

Ana habwii te Paulo

12 A juuju pie, te junihe piticenaado ne kon, heme é tee pipii dong. Kehe icehi ana é o te pii tewé nina e habwii tong wo Padaame. ² [Geé mwo tabemi a jepule tong]: Pwo pa céiu apulie, pa acéihi ne ko Kériso. Ke é ha a céiu tan, caa 14 ni jo jena, ke e céieng da wo Padué ne ha a duaan na junihe e daaité ne he miiden. Meniing pie he e necu a één, ai e teko mu hen: Time é uce temehi, te wo Padué cehi na e temehi.

³ Ke e pééng da wo Padué, ne ha a duaan na junihe wâé. É ne ha amu naa, ke lé te mwaale ha a péém ††† beé Padué. Meniing pie e te necu a één wo pa apulie naa, ai e teko mu hen: Time é uce temehi, kehe te wo Padué cehi na e temehi. ⁴ Ke é ne ha a duaan naa, ke e téne ni pwooti na junihe wâé, nina pwocoon me nye pii ne he ni pati apulie ††.

⁵⁻⁶ Weengaa a jepule na juuju, kehe time é o uce pipii dong kon ††. Kehe é te ju pii cehi pie woéo, ke pa apulie na tice niihung, ke é te ju pipaunu cehi [Padué]. Be time uce wâé heme geé niimihi pie, pwonaado ne

††† Beme e pwo ace céiu naado celi ta—ai Beme e patupwo a céihi ten. †† 11.32–33 Apostolo 9.23–25 ††† É ne ha amu naa, ke lé te mwaale ha a péém...Paradis. †† Nina pwocoon me nye pii ne he ni pati apulie—ai Nina iitihite me e pii wo pace céiu apulie. †† Time é o uce pipii dong kon—Be wo Paulo pa apulie naa. Omehi a niide a tii 7.

kong mu ko anaa. Kehe wâé heme geé tautiéo cehi ko nina geé alihi ne kong, ai celi geé téne mu kong †.

A 'danaado' ne ha a ééng

⁷ †Te junihe wâé ana é alihi ha a tan naa. Kehe icehi ana é alecehen, ke e ne tong ni picani na te nihe muhi tong kon ‡, beme é nemwo pipaunuéo, ke me é nemwo pipii dong ko nina é alihi. A picani naa, ke pwohewii a danaado ne ha a ééng, ke pwohewii mwo, pace céiu apitéimipwooti celi e âbé mu pele *Caatana, beme e tatiéo. ⁸ Oci jo ko pwoiitihi te Padué, beme e pé kajaéo. ⁹ †Kehe icehi ana e pii tong pie: «Caa te jan ne kom a *pipwoééhe tice ja kon dong, be mepie pitice niihem, ke o oba go ko a junuung.»

É mu ko anaa, ke é te ju pipii dong cehi ko a bwo tice niihung, beme e mu kong a junuu Kériso. ¹⁰ É mu ko anaa kuti, na wâé heme tice niihung, ke me é mu he ni picani me ni téé, be caa woéo he Kériso. Ke wâé mwo heme lé pii me ta jo wo lépwo béén, ke me lé pwotahi ne kong. Ke é te tai hegi ninaa ne ha a pipwodéén. Be é he ni benaamwon na tice niihung hen, ke weengaa kuti a benaamwon na nihe pwo niihung hen [ne he Kériso].

Gia Paulo ne ko lépwo Korénit

¹¹ †† tee ko pipii dong ††, be wogewé ke time geé uce pii me wâé jo! Ke mepie [geé niimihi pie] te piticenaado ne kong, ke te piticenaado mwo ne ko lépwo lé pii pie lépwoce *apostolo ubwo'.

¹² ††He li é mu pelewé, ke geé te alihi a bwo cumang dong ne ha a tacebwén. Ke geé téetihi ni inenaado na é pwo ko a junuu Padué. A inen pie woéo, ke pa ju apostolo [na e pahedeéo wo Padué].

¹³ †Ke geé hegi ati nina é ne te ni béé acéihi. Ke te céiu cehi ana, time é uce téele ilehi kojakewé pie, me geé ne ce bépicanu tong. Be kona woté? Geé niimihi pie ta nina é pwo, ke me é pimiibule ne tewé?

Te tice aceli é ilehi kojakewé

¹⁴ [Geé téne, wogewé lépwo bééng, be] é o te ju pwome âdé céiikewé a béociéhen. Ke o te tice celi é ilehi kojakewé. Be time uce ni mwani [ai ce béé naado] celi nimung kon ne pelewé, kehe te icehi ni pwonimewé! Be [geé pwohewii ni ju nañg. Ke] time uce ni

† (Niide a tii)—Grek: ⁵ Me é o pipii dong ne ko pa apulie naa. Ke hemepwo é ne kong, ke time é o uce pipii dong, kehe é o pipii dong mu ko a bwo tice niihung. ⁶ Hemepie nimung me é pipii dong, ke time o uce pipenem a puning. Kehe é o pii a juuju; kehe time é o uce pwo, be me wonaa, ke me te tice paceli e pwo ce bwo niimihinaado ne kong celi pveda. [Ke wâé heme lé tautiéo] cehi ko nina lé alihi ne kong ai celi lé téne mu kong. †† 12.7 Job 2.6 ‡ Ni picani na te nihe muhi tong kon—Wieli a cunu ne ha a één. Wieli a bwo pwotahi ne kon de lépwona lé cubwonieng. †† 12.9 Filipi 4.11–13 †† 12.11 2 Korénit 11.5 ††† É tee ko pipii dong—Grek: Pipenem a puning mu kowé. ††† 12.12 Roma 15.19 § 12.13 2 Korénit 11.9

nahi ewa na lé penem, beme lé pamwoiu ni nyaa me caa telé. Kehe te ni nyaa me caa te ewa, na lé pamwoiu ni nañlé. ¹⁵ É mu ko anaa, na é pipwodéén, he é ne tewé ana e mu kong: ati ni naamuung, me ati a pwonimung. Kona e o piwahin a pipwoééhe tewé me dong, heme piubwo ngen a pipwoééhe tong me dewé?

¹⁶ [É niimihi pie, é caa habwii tewé ehi pie] time é mu uce ne huñiwé ce âneule. Kehe icehi ana lé pipiiéo wo lépwo béén pie, pa apipwohuô. Be lé pii pie: «Hemepie time e uce ilehi ace céiu naado he e mu pelenye, ke e te gahe pwo, be e caa te tooli a céiu bwopwonen celi me e bo pwo tenye ††.»

¹⁷ Kehe icehi ana geé cuwoteeke niimi lépwona é nelé lé céiikewé. Ke kona é pahede paceli céiu nang mu kolé, beme é pé kojakewé ace céiu naado? Úhu! ¹⁸ ††É he li é pahede Tit lé céiikewé me pa céiu bééng, ke kona e pipwohuô tewé wo Tit? Úhu, be wogemu, ke céiu pwonimemu, ke céiu bwo engen demu.

É pacihekewé beme é pamwoiukewé

¹⁹ Kona geé niimihi [wogewé lépwo ju bééng] pie é teko pipwopaing cehi, heme é ko pii ninaa? Úhu! É ko pacihekewé ne he pwahamii Padué, é mu ko ana nye tai mu ko Kériso. Ke ati nina é pii tewé, ke nina é pwo tewé, ke ni bwopwonen me é pamwoiukewé.

²⁰ Be mwotiéo hemepie é tehene lé pelewé, ke koli é tooli ace naado celi time uce wâé tong. Ke wieli time uce wâé tewé ace bwo hegi nen dong ne tewé. Be wieli é tooli ne pelewé ce pitaacunaado, me ce pipwokon, me ce piokéé, ke ce pihota, me ce pipii apulie, me ce picibehede. Ke wieli é o tooli ce béé huô celi ta ne ha a pubuuwé.

²¹ †Be [he li é mu pelewé] ânebun, ke hiwon mu kowé, na lé pipule hauli me lépwo béén, ke lé pwo ni huô na mwiihi.

Ke mwotiéo pie, é o tehene lé, hemepie time geé uce téele bitekewé. Ke koli e bo pwo me tanim jo kowé wo Padué, ke wieli é bo é wonaa mu kowé.

Bénebwéne pwooti

¹³ ¹⁻² ††Ha ali béokelohe bwo caniêkewé tong, ke li é caa pii tewé pie, pwo lépwo bééwé na lé pwo nina time uce wâé. Ke é jena ni, he mwo woéo ité kojakewé, ke é pii tewé mwo pie: Geé pipwocile, be é o caa âdé a béociéhen ne pelewé. Ke caa te tii ne he ni tii iitihi pie: *Hemepie nye pipé ne ko pace céiu ko aceli ta, ke time uce jan me céiu pace *apajujuhi nen. Kehe wâé heme alo ai cié jélé.*

Deutéronome 19.15

† Dernière phrase—Grek: Ke é imwikewé. †† 12.18 2 Korénit 8.6, 16–18 †† 12.21 2 Korénit 13.2 ††† 13.1 Mataia 18.16; 1 Timoté 5.19

Ke geé pipwocilekewé, be mepie é tehene lé pelewé, ke koli é o cihe me mwoiu ne kowé.

³ Kona geé hane me é habwii tewé pie é cihe ne he nii Kériso? [É bo habwii tewé ehi pie] pana te junihe pwo niihen, ke te junihe pwojunuun, beme e penem kong ne pelewé. ⁴ †He li e mele ne ko a *kuricé, ke tice niihen. Kehe icehi ana e mulie cemwo mu ha amele ko a junuu Padué.

Ke woéo mwo, ke tice niihung, kehe icehi ana é mu ko Kériso, ke gemu pimulie ibu. Ke e mu kong a junuu Padué, é mu kon. Ke geé o bo alihi anaa.

⁵ ††Geé cuwoteeke omehi ni mulihewé, pie te a ju mulihe lépwona lé céihi ne ko Kériso. Ke mepie geé tooli pie, time e uce mu pelewé wo Kériso, ke geé caa te pitalupe. ⁶ Ke é niimihi pie, geé temehi pie, woéo, ke [e caa tautiéwo wo Padué, ke e tooli pie] time é uce pitalupe!

⁷ Ke é pwoiitihi te Padué me dewé, beme geé neb-wén na geé pwo nina ta. Kehe time uce a bwopwonen me é habwii pie, time é uce pitalupe [ko ni penem dong ne pelewé]. Be te wâé tong cehi heme geé pwo nina wâé.

Ke te piticenaado ne kon, hemepie lé tauti [wo lépwo béén] pie ta ni penem dong. ⁸ Be woéo, ke pa eabwé ko a [pwooti na] juuju. Ke é te ju penem cehi beme pi-ubwo ngen a penem naa. Ke te tice apulie celi jan me

† 13.4 Filipi 2.7–8 †† 13.5 1 Korénit 11.28

e pacuwohi ‡. ⁹ Ke é pipwodéén ko a bwo tice niihung ke me pwo niihewé. Ke é pwoiitihi, beme wâé mwo ni pwonimewé [ne he pwahamii Padué].

¹⁰ ††Weengaa a watihen me é tii a tii ce, he mwo woéo ité. Be time uce nimung me é cihe me téé hemepie é mu pelewé. Be e caa ne tong a pihuô wo Padaame, beme é pamwoiukewé, kehe time uce a bwopwonen me é pwotahinaado ne kowé.

Bépinelé

¹¹ É caa punuu ne éni, wogewé lépwo bééng acéihi, ke é pii tewé pie: Geé pwo me piwâénimewé ††! Ke geé mwojuia mu he ni ta pwo tewé! Ke geé pipamwoiukewé, ke wâé heme céiu pwonimewé. Ke me geé mulie ha a péém, ke e bo mu pelewé wo Padué na e pipwoééhenye, ke e ne tenye a péém.

¹² Geé pipwobwocu, pwohewii a bwomu te lépwo ju acéihi béénye.

Lé tai ne bwocu tewé ati wo lépwo acéihi na élé éni.

¹³ Ke me e adéikewé wo Padaame Iésu Kériso ko a *pipwoééhe tice ja kon den. Ke me e mu pelewé ati a pipwoééhe te Padué, me a *Jenen Iitihi na e pineibukenye!

Adéikewé!

‡ Te tice apulie celi jan me e pacuwohi—Grek: Time uce jan ne +kong me é pacuwoeng. †† 13.10 2 Korénit 10.8 †† Geé pwo me piwâénimewé...ke geé pipamwoiukewé—ai É pinekewé...ke geé piténedéé.

Galat

nge céii lépwo

Atabuhi ko a tii

Woo na e tii a tii ce?

Wo Paulo, pa apostolo.

E tii éniile?

Wieli é ha awieme a jo 48 me 49, he e mu Antioche wo Paulo, ânebuhe a pitapitihî ubwo te lépwo apihuô te ni acéihî ne ko Kérîso ne Iérusaléma ha a jo 50. (Omehi pwahamii tii 15.) Wieli a bécéiuhe tii na e tii wo Paulo.

E tii me dee?

Me de ni acéihî ha a duaan Galat, ha amu Turki jenea. Wieli a province Galat, he na e lang ni pwomwo ubwo Ikone me Listre me Derbe. Ke wo Paulo me Barnabas, ke lu pipatemehi a Pwooti Wâé nelang ha a jo 46–47 (omehi a pwahamii tii 14), te ju alo jo ânebuhe a bwo tii na a tii telé.

É ko ade na e tii?

Hiwon lépwo Galat na time uce lépwo Juif. Ke é alecehe a bwo céihî telé ne ko Iésu, ke lé âbé wo lépwo béé apwocémun, ke lé cuwokolé me lé âcehi ati ni patén ko a pwoitihî te lépwo Juif, pwohewii a bwo pwotegoop, me paciitihî ni béé tan. E te junihe okéé wo Paulo ne ko lépwona lé pii anaa. Ke e okéé ne ko lépwo Galat mwo, be lé pwo me lé piâ ité koja a ju céihî (1.6–9; 3.1–3). E te junihe pipwoééhelé, be lé pwohewii lépwo ju naîn, ne he nii Iésu Kérîso (4.19).

Ade ace âne a tii ce?

Wo Kérîso, ke e caa tuwokenye, beme tice celi me e ciekenye (5.1). Piticenaado ne ko ati ni patén ko pwoitihî ânebun. Be pwocoon me nye mwomwon ne he pwahamii Padué mu ko a bwo piténédehi nen denye ni patén. Kehe te icehi mu ko a céihî tenye ne ko Kérîso (2.16). Ke wo Padué, ke e pwo me wogenye ni apulie na mwo co-ho (6.15). Ke time bo uce wogenye celi nye mulie ha a mulihenye, kehe te wo Kérîso na e mulie konye (2.20).

A bwomune a tii Galat

Pipwobwocu

Te céiu cehi a ju Pwooti Wâé

Tode Paulo beme e pipatemehi

Lé hegieng wo lépwo béé apostolo

A âne a Pwooti Wâé

Tuwokenye koja ni patén

Time uce jan ni patén

Ni naî Padué mu ko a céihî

Nemwo pwo me ciekewé mwo!

Lupwo piapwo na alo

E caa tuwokenye wo Kérîso

Piténade a Jenen Iitihî

Bénebwéne pwooti ke bépînelé

Pipwobwocu

1 Woéo † Paulo na é pwotii. Woéo pa *apostolo, be lu pipégaliéo wo Iésu *Kériso me Padué Caa, pana e pamulipi Iésu mu ha amele. [Ke lu pahedeéo ngen, me é pipatemehi a pwooti telu.] Time é uce wonaa mu ko aceli lé pii ne ni apulie, be time uce ni apulie na lé pwo me woéo pa apostolo!

2 É pwotii lé céiikewé, wogewé ati ni *puco te ni acéi-hi ha a province Galat. Ke lé ne bwocu tewé mwo ati lépwo acéihi ne ko Iésu Kériso na élé éni.

3 Wâé heme e mu kowé a *pipwoééhe tice ja kon me a péém, na e âbé mu ko Padué Caa tenye me Padaame Iésu Kériso. Adéikewé! 4 ††Wo Padaame Iésu, ke e pineeng me e mele, beme e tuwokenye koja ni ta pwo tenye, ke e celuimikenye koja a mulie na ta ne pwo a bwohemwo ce. Be weengaa ana nime Padué Caa tenye kon. 5 *A wâé, ke te a de Padué cehi, dieli mwo! Wâé heme wonaa! Amen!

te céiu cehi a ju pwooti wâé

(Pwahamii tii: 1—2)

6 Wo Padué, ke e caa todekenye, ko a pipwoééhe tice ja kon den {na e pwaadeniin bé wo Iésu Kériso}. Ke é téele kowé, he geé epin ko piâ ité koja pana e todekewé, me geé â téne a céiu pwooti [na lé pébé céi-ikewé ne ni béén]. 7 *Kehe icehi ana te céiu a *Pwooti Wâé te Kériso. Ke wo lépwo [agele] na lé pipatemehi a céiu pwooti, ke lé pibitehi a ju Pwooti Wâé. Ke lé pahaulihi ni pwonimewé.

8 ††Wâé heme *piapwo pa apulie na e pipatemehi ce béé pwooti celi pi-ité koja a ju pwooti, li geme † caa mi pipatemehi tewé! Ke te piwien mwo hemepie wogeme, ai é hemepie wo pace céiu *âcélo bé mu he miiden!

9 Geme caa pii tewé kuti, ke é pii mwo ni, pie, wo lép-wona lé pipatemehi a pwooti na pi-ité koja a Pwooti Wâé li geé caa hegi, ke wâé heme e piapwolé wo Padué!

10 †††[Lé pii wo lép-wonaa pie] geme hane me lé pi-wâékeme ne ni apulie. Uhu! É te pipwoeabwé te Kériso cehi. Time é mu uce hane me lé wâééo ne ni apulie; kehe é te hane cehi me e te piwâééo wo Padué!

Tode Paulo beme e pipatemehi

11 †††Lépwo acéihi bééng, wâé heme geé temehi pie, a Pwooti Wâé na é ko pipatemehi, ke time e uce âbé mu

† Woéo—Grek: Wogeme. Wo Paulo na e pwotii, kehe icehi ana e habwii pie, te céiu a pwonimelé me lépwo acéihi béén na lé mu pelen. †† 1.4 Galat 2.20 † 1.7 Apostolo 15.1,24 †† 1.8 1 Korénit 16.22 †† Geme—ai Woéo. Wieli e pieng mwo wo Paulo. ††† 1.10 1 Tésalonik 2.4 ††† 1.11 Mataio 16.17

ko ni apulie. 12 Be time uce aceli é hegi mu ko pace céiu apulie, ke te tice pace apulie celi e pacémuniéo kon. Be te ana e te habwii tong [wo Padué] mu ko Kériso †.

13 ††Be geé te temehi ehi ni bwopemiéo ânebun, he li é mwo te mu ha a pwoiitih te lépwo [âjiénung] juif. Be é te junihe okéé ne ko nina lé céihi ne ko Iésu. Ke nimung me é tanahi a céihi telé. Ke é pwo me lé picani, ke é te junihe pwotahi ne kolé. 14 ††É ha a benaamwon naa, ke é te junihe pitaa kojálé, ne ha a pwoiitih te lépwo *Juif, koja lépwo âjiénung na pijéhi jo heme me woélé. Ke é wédenilé, be é te junihe âcehi ehi ati ni huô me a bwomu te lépwo watiheme.

É ali pa Naî Padué

15 ††Kehe icehi ana wo Padué, ke li e caa mi pipégaliéo, he mwo te woéo tina nyaa tong, ke e todeéo ha a pipwoééhe tice ja kon den. 16 Ke e niimihi pie me e habwii tong pa Naî, beme é pipatemehieng de lép-wona time uce lépwo Juif. Ke me wonaa, ke time é uce ilehi ace bwo temehinaado koja pace céiu. 17 Be time é uce taa *Iéusaléma, me geme pitookeme me lépwo apostolo ânebuhung. Be é â epin nge ha a duaan Arabi. Ke é mulang, ke é mwojuia mwobé ne ha a pwomwo ubwo Damas.

18 ††É alecehe ni jo na cié, ke é taa Iéusaléma, beme gemu pitemehikemu me Pétéru ††. Kehe icehi ana gemu te ju mu lang he na alo naadenitan cehi. 19 Ke time é uce ali lépwo béé apostolo, te icehi Cang, pa âjiéne Padaame.

20 Ana é pii tewé ni, ke é pipatemehi tewé, ne he pwhamii Padué, ke time é uce getikewé.

21 ††É mulang [ke time é uce mu ha amu *Judé] kehe é â he lupwo piduaan ne Siri me Silisi. 22 Ke ati ha a benaamwon naa, ke time lé uce temehié wo lépwo acéihi mu Judé, be time lé mu uce aliéo. 23 Kehe lé te ju piténe jepule kong. Be lé pii wo lépwo béén pie: «Wo pa apulie naa, ke weeng kuti pali e te junihe pwotahi ne kome ânebun. [Ke e pacuwo ni apulie, beme lé nemwo céihi ne ko Iésu.] Kehe é jena na ni, ke e caa pipatemehi ali céihi li e mu tanahi ânebun!»

24 Ke é mu kong, ke lé tai pipaunu Padué.

Lé hegiéo wo lépwo béé apostolo

2 †††Caa 14 ni jo alecehen, ke é mwojuia ngemwo *Iéusaléma imi Barnabas, ke é pé mwo Tit. 2 Be wo Padué, ke e pii tong pie, me é mwojuia ne mwo lang. Ke geme pipwotapitih me lépwo apihuô te ni acéihi, ke é pipatemehi telé a Pwooti Wâé, na é ko pi-

§ Be te ana e te habwii tong...mu ko Kériso—ai Wo Iésu Kériso na e pwo me é temehi, ai Wo Iésu Kériso he li e pihabwieng dong. †† 1.13 Apostolo 8.3 ††† 1.14 Apostolo 22.3 †† 1.15 Ésaie 49.1; Galat 2.7 ††† 1.18 Apostolo 9.26 †† Pétéru—Grek: Céfás. Omehi Ioane 1.42 me a note †† 1.21 Apostolo 9.30 ††† 2.1 Apostolo 15.2

patemehi te lépwona time uce lépwo *Juif. Be o wâé ne kong, hemepie céiu jélé ko ana é pwo. Be mepie time uce wonaa, ke wieli o te piticenaado ne ko ati ni penem dong †.

³ [Kehe icehi ana te wâé telé. Ke wâé telé mwo a bwo penem ibu temu me] Tit, pa apulie na time uce pa Juif. Ke time lé uce wâgo kon pie, me *pwotegoop ten [pwohewii a bwomu te lépwo Juif]. ⁴ †† Be wo Kériso Ié-su, ke e caa tuwokenye, beme o te tice aceli me e bo uce ciekenye mwo ‡.

Kehe icehi ana pwo ni béé apulie, na lé te ju êjele bé hadenii ni acéihi. Ke lé pii pie lépwo acéihi béénnye, kehe icehi ana lépwo apipwohuô. Be lé pwohewii ni coda, na lé mi êjetihii a amu, beme lé alihi ehi ni mulihe ni apulie hen †. [Ke te junihe *mwiihi telé] a mwomwon na e ne tenye wo Ié-su. Be nimelé me lé pwo me nye *apenem tice ja kon [ne ko ni patén]. ⁵ Kehe icehi ana time geme mu uce pipéce ne kolé, ke time geme mu uce piténédelé, ne he ni cuwo nahi naado. Ke geme cile a juuju ko a Pwooti Wâé me dewé ††.

Lé alihi pie wo Padué na e pahedeéo

⁶ Mepwo é ne ko lépwo apihuô, lépwo apulie na pi-ubwo jélé ne ha a céihi, ke te tice aceli lé pwo me pitaatééhi ne he ni pwooti na é mu pipatemehi. Kehe icehi ana time uce junaado ne tong, hemepie lépwo apulie ubwo, ne he ni bwo alihi nen de ni apulie. Be wo Padué, ke time e uce pipwoinen ne ko ni apulie.

⁷ †† Kehe icehi ana lé temehi pie, piwiekemu me Pétéru ††. Be wo Padué, ke e pahedeeng ngen, beme e â pipatemehi a Pwooti Wâé te lépwo Juif. Ke woéo, ke e pahedeéo ngen beme é â pipatemehi a Pwooti Wâé te nina time uce lépwo Juif. ⁸ A bwopiinen pie, e penem ko Pétéru wo Padué, beme e *apostolo ten ne pele lépwo Juif; ke e penem kong, beme é apostolo ten, ne pele ni béén.

⁹ Ke mepwo é ne ko lépwo apihuô ubwo na cié jélé: wo Cang, me Pétéru, me Ioane, ke lé hegikemu me Barnabas. Ke lé patemehi pie lépwona pibééme [ne he ni penem de Padué] ke me wogemu, ke me gemu â pele lépwona time uce lépwo Juif, ke woélé, ke me lé â pele ni Juif.

¹⁰ † Ke lé te ju ilekemu cehi pie, me gemu niimi lépwo acéihi na pitice naamuulé [ne Iérusaléma]. Ke é te pwo ati kuti ha a ju pwonimung.

É pacihe Pétéru

¹¹⁻¹² †† É alecehen, ke wo Pétéru, ke e âbé caniékeme ne Antioche ne Siri. É he e mwo ko mu peleme, ke lé mu piwiinaado ibu me lépwo acéihi na time uce lépwo Juif. Kehe icehi ana wo Cang, ke e pahede céiikeme [mu Iérusaléma] lépwo béén [na lé te junihe pwohewii a ju bwomu te lépwo Juif]. Ke mwoti Pétéru [ko ana lé pii ne kon] ke e tabuhi picepewie lépwona time uce lépwo Juif.

Ke me wonaa, ke time uce piwâ jo me é paciheeng, ne he pwahamii ati ni acéihi, beme é habwii ten pie, time uce wâé a huô ten naa.

¹³ Ke time uce weeng cehi, be ati ni acéihi na lé Juif, ke lé te tai pwohewiieng, die ko Barnabas mwo! Be pi-wâ jélé me lé habwii nina lé niimihi. Kehe icehi ana lé te temehi pie, ana lé pwo, ke time uce wâé.

¹⁴ Ke me é alihi pie, time uce mwomwon ni bwo engen delé, ne ha a Pwooti Wâé, ke é pii te Pétéru, ne he pwahamii ati ni acéihi pie: «Wogo pa Juif, kehe icehi ana go tabuhi necu a bwo engen denye, ne he ni patén de lépwo Juif, beme geé pimulie ibu me lépwona time uce lépwo Juif. Ke é ko ade na go cuwoko ni béén na time uce lépwo Juif me lé pipwohewii lépwo Juif?»

A âne a Pwooti Wâé

¹⁵ Mepwo é ne kome ††, ke geme te Juif mu ha a bwo piâbeele teme. Ke é ânebun, ke geme mu pii ko lépwona time uce lépwo Juif pie, 'lépwo apwo na ta', be time lé uce âcehi ni *patén de Moosé ††.

¹⁶ †† Kehe icehi ana é jena na ni, ke geme caa temehi pie, time e uce *mwomwon ne he pwahamii Padué wo pace céiu apulie mu ko ace bwo piténédehi nen den ni patén de Moosé, kehe te icehi mu ko a céihi ten ne ko Kériso Ié-su. Ke wogeme, ke geme te céihi ne kon [beme e mu ha awiememe me Padué a péém] ke me wogeme ni apulie na me mwomwon ne he pwahamiin †. A péém me a mwomwon naa, ke e âbé mu ko a céihi teme ne ko Kériso, time uce é mu ko ace bwo piténédehi nen deme ni patén. Éa, [é pii mwo pie]: Te tice pace apulie celi e bo mwomwon ne he pwahamii Padué, mu ko ace bwo piténédehi nen den ni patén!

¹⁷ É mu ko anaa, na wogeme lépwo Juif, he li geme hane ace bwopwonen beme geme bo mwomwon ne he pwahamii Padué. Ke geme tooli he Ié-su. Ke ni béén, ke lé pipé ne kome pie, wogeme 'lépwo apwo na ta', be

† Dernière phrase—Grek: Wieli piticenaado ne ko a bwo pitéte tong ânebun ke é jena na ni. †† 2.4 Galat 1.7, 5.1, 13 † 1re phrase—Grek: Etenye a liberté ne ko (Kériso Ié-su). †† 4e phrase—Geme patemehi ne éni a bwopiine a pwooti espions. †† Beme o time uce pitaatééhi ace cuwo nahi naado mu ko a Pwooti Wâé, me genye tai hegi ati ni adéihi ten. ††† 2.7 Apostolo 22.21 ††† Pétéru—Grek: Céfas. Omehi Ioane 1.42 me a note § 2.10 Apostolo 11.29–30

§† 2.12 Apostolo 11.3 §†† Mepwo é ne kome—ai Mepwo é ne konyu. Wieli ni pwooti ne he ni niide a tii 15 me 16 (wieli é die ha a niide a tii 21), ke ni behi ni pwooti te Paulo ne te Pétéru. §† (Niide a tii)—Grek: Wogeme, ke lépwo Juif ne ha a bwo piciekeme, kehe time uce lépwo apwo na ta, mu he ni béé bele. §†† 2.16 Apostolo 15.10–11; Roma 3.20–28; Galat 3.11 §† E mu...mwomwon ne he pwahamiin—Grek: Justifiés. Omehi Mwomwon ne ha a Niinaado (Vocabulaire) ha anebwén ko a tii.

time geme uce pitenedehi ati ni patén. Éa, lé pii pie, wo Kériso, ke e péékeme, beme lépwo apwo na ta! Ûhu! Time uce a juuju † 18 Weengi ana ta: é hemepie é mwojuia cemwo ne mwo ko li patén li é caa tahi taabwon †† 19 Me é mulie he ni patén, ke o te junihe pwocoon de Padué me e piwâééo. Kehe icehi ana te é mu ko ni patén kuti, na é temehi ninaa! Ke é jenea, ke é caa necu ni patén, beme é mulie me de Padué. Ke time e bo uce cieéo mwo, be caa pwohewiin heme é mele ne ko ni patén.

Be é he e mele ne ko a *kuricé wo Iésu, ke wogemu me weeng ‡. 20 ††Heme é mulie, ke time uce woéo, kehe wo Kériso na e mulie kong. Ke a mulihung jenea ni, ne ha a éé apulip, ke é mulie hen ha a céihi ne ko pa *Naî Padué na e pipwoééhung, ke e mele me dong.

21 Weengaa a âpipati na e ne tenye wo Padué, é mu ko a *pipwoééhe tice ja kon den, beme nye mwomwon ne he pwahamiin. Ke woté? Kona é bo tahi taabwon anaa, beme é mu ko ni patén? Ûhu! Be mepie jan me pwo a péém ne ha awiemenye me Padué, me wogenye ni apulie na nye mwomwon ne he pwahamiin, mu ko a bwo pitenedehi nen denye ni patén, ke wieli me te piticenaado ne ko a bwo mele te Kériso ††

tuwokenye koja ni patén

(Pwahamii tii: 3—4)

3 [É téetikewé] wogewé lépwo Galat, be pwohewiin heme pipenem ni puniwé! Ade aceli e pa-haulikewé [me géé padep koja a juuju]? Oniile jo ko pii tewé pie, wo Kériso, ke e caa mele ne ko a *kuricé [beme wâé te Padué gewé]?

2 Weengi cehi ana nimung me é temehi kojakewé: Kona géé niimihi pie, géé caa hegi a *Jenen Iitih, mu ko a bwo mulie tewé he ni patén? Ûhu! Te é mu ko a céihi tewé, ne ko a Pwooti Wâé ko Kériso! [Ke géé temehi ehi anaa!] 3 É ko ade na géé pwo me pihauli gewé kojan?

Te a Jenen Iitih na e tabuhi a penem ne kowé. Ke kona géé niimihi pie, géé bo panebwénihi ha a éé apulip? Wogewé, ke pipatieden ni puniwé! 4 Kona géé o te pwo me piticenaado ne ko ati nina e tuie ne kowé dieli jenea? Géé tahi taabwon ati ninaa?

5 Wo Padué, ke e caa ne a Jenen Iitih, ke e pwo me géé pwo ni *pipwojunuun, na lé téetih ne ni apulie. Ke

† Grek: É hemepie geme alihi temehi pie wogeme lépwo apwo na ta, é mu ko a bwo alihi temehi nen deme a mwomwon mu ko Kériso, ke kona wo Kériso, ke pa apenem de a ta? Ûhu! Time uce wonaa! †† Grek: Be hemepie é bahi mwo ali é caa patieden, ke é habwii pie é pwo ana ta. ‡ Grek: Be te é mu ko a patén na é mele ne ko a patén, beme é mulie me de Padué. Cemeitekemu ne ko a kuricé me Kériso. †† 2.20 Galat 1.4 †† Grek: Time é uce tahi taabwon a pipwoééhe tice ja kon de Padué, be é hemepie nye mwomwon mu ko a patén, ke te ju piticenaado ne ko a bwo mele te Kériso.

kona géé niimihi pie, te é mu ko a bwo pitenedehi nen dewé ni patén? Ûhu! [É pii mwo pie]: Te é mu ko a céihi tewé cehi, ne ko a Pwooti Wâé [ko Kériso]!

Wo Abérama ke pa béhabwiinen

6 ††[Nye pine ne he ni *tii iitih pie]: E céihi ne ko Padué wo *Abérama, ke é mu ko a céihi ten, ke wo Padué, ke e pwo me pa apulie na e *mwomwon ne he pwahamiin.

Genèse 15.6

7 É mu ko anaa, na wâé heme géé temehi pie, ati nina lé céihi [ne ko Padué] ke te woélé kuti naa, lépwo piebehi Abérama. 8 Be genye pine ne mwo he ni tii iitih pie, wo Padué, ke e mi pii ten a pwooti wâé ce, pie: É bo *adéi ati ni bele pwo bwohemwo mu kom!

Genèse 12.3

Weengaa ana e mi pii beetih pie, e bo hegi ni béén na time lé *Juif, ke e bo pwo me lé mwomwon ne he pwahamiin. Ke te é mu ko a céihi telé, na e wonaa.

9 Wonaa ne mwo ko ati nina lé céihi [ne ko Padué] be lé o hegi mu kon ali adéih li e caa ne te Abérama, mu ko a céihi ten.

Time uce jan ni patén

10 ††Kehe icehi ana lé apwohi wo lépwo na lé niimihi pie, o wâé te Padué jélé mu ko a bwo pitenedehi ne ni patén delé. Be caa tii ne mwo he ni tii iitih pie: Apwohi pana time e uce pitenedehi taaci ni patén na tii ne ha a tii ko patén!

Deutéronome 27.26

[Ke te junihe pwocoon kuti me nye pitenedehi ati!]

11 †Nye alihi pie, o te tice apulie celi lé mwomwon ne he pwahamii Padué ko ace bwo pitenedehi ne ni patén. Ûhu! [Be caa te tii ne he ni tii iitih pie]: Wo pana e mwomwon mu ko a céihi, ke e o mulie.

Habakuk 2.4

12 Genye alihi pie, ni patén, ke time e uce engen ne ko a céihi [kehe te é mu ko ni penem denye]. Be weengi ana caa tii ne he ni patén: E ne a mulie te pana e pitenedehi ni pihuô na e hen.

Lévitique 18.5

[Kehe me wonaa, ke genye tai apwohi, be time uce jan!]

13 ††Kehe icehi ana wo Kériso, [ke e pipatupwoeng] ke e caa tuwokenye koja a apwohi ko ni patén, be e pé ne huîn a apwohi tenye [ke cemeiteeng ne ko a kuricé]. Be caa te tii ne he ni tii iitih pie: Apwohi pana pawiieng ne ko a ba-acuwo.

Deutéronome 21.23

14 E wonaa wo Kériso, beme e o mu konye, nina nye céihi ne kon, a adéih li e ne te Abérama wo Padué. Ke a juuju mwo, ne ko lépwo na time uce lépwo Juif. Ke é

††† 3.6 Genèse 12.3; Roma 4.3,16 ††† 3.10 Deutéronome 27.26 † 3.11 Galat 2.16 †† 3.13 Deutéronome 21.23; Roma 8.3

mu ko a céihi tenye ne kon, ke genye hegi a Jenen Iitihi, na e caa mi pii ânebun wo Padué pie, me e bo ne tenye.

Ni patén ke e âbé alecehe Abérama

¹⁵⁻¹⁶ †Ânebun, ke e pii te Abérama wo Padué pie, me e bo adéieng. Me nye alihi ehi a pwooti te Padué ne he ni tii iitihi, ke genye pine pie e pii pie, me e bo adéi Abérama *me pa piebehieng*.

Genèse 12.7

A bwopiinen pie *pana e bo âbeele mu kon*. Time e uce tii pie *lépwo piebehieng*, kehe e tii pie, *papiebehieng*. Wo pa apulie naa, ke wo Kériso ††.

Wo Padué, ke e *piapwo ne te Abérama, beme e *pajuujuhi a bwopiinen den naa. Ke geé alihi, wogewé ni bééng, pie, mepwo é ne konye ni apulie, ke me nye piapwo ne ko ace céiu naado celi nye pii, ke time uce jan me nye pitaatéhi ai patieden ni pwooti na nye caa pii. [Ke me wonaa ne pelenye ni apulie] ¹⁷ †ke genye temehi pie, wo Padué, ke time e bo uce pitaatéhi mwo nina e pii, li e caa piapwo ne kon.

Weengi ana nimung me é pii: Mepwo é ne ko ni patén, ke a naado na e ne wo Padué, mwo te ju 430 ni jo alecehe a bwopiinen den te Abérama. Ke ni patén, ke time uce jan me e pitaatéhi a cuwo nahi atii, ne he ni bwopiinen den ânebun.

¹⁸ ††Ke hemepie a adéihi, ke me e ne tenye, mu ko [a bwo piténédehi nen denye] ni patén, ke wieli time e uce âbé mu ko a bwopiinen ânebun de Padué. Kehe icehi ana time uce wonaa, be wo Padué, he li e ne te Abérama a adéihi ten, mu ko a bwopiinen den ânebun. Ke e ne ten me piticenaado ne kon.

¹⁹ ††Ke heme wonaa, ke ni patén ke he me ni de? Te a naado li e ne tenye wo Padué alecehen, beme e habwii tenye ni ta na nye pwo. Ke e cuwo die ko a bwo tuie te pa piebehi Abérama na te céiu nang: pana e bo pipwaadeni ati ni adéihi ††.

[A céiu mwo, ke time uce piwie ni patén me a piapwo, be nye pii pie, wo Padué, ke e ne] ni patén [me de a bele] na lé pipwaadeniin bé ne ni *âcélo. Ke [wo *Moosé ke] pa apipépwooti ten. ²⁰ Kehe icehi ana he li e piapwo wo Padué ne te Abérama, ke te tice apipépwooti hadeniilu. Be a naado na e te pipwo mu kon wo Padué [ke te tice pwooti te Abérama hen].

† 3.16 Genèse 12.7, 13.15 †† Wo Kériso, ke te weeng cehi na e pwaadeni ati ni adéihi me denye. Ke e pii konye pie nye piebehi Abérama, mu ko a céihi tenye ne ko Kériso. Grek: ¹⁵ É cihé ko a bwomu te lépwo apulie: É hemepie e piapwo wo pa apulie, ke e pajuujueng...ke o te tice apulie celi jan me e pwo me tieden, ai ne ace behin. ¹⁶ É ne ko nina caa mi pii ânebun, ke ni naado na pii te Abérama, me ni piebehieng, ke time uce ni piebehieng na hiwon. Te céiu cehi pa piebehieng, ke wo Kériso. † 3.17 Exode 12.40 †† 3.18 Roma 4.14 †† 3.19 Apostolo 7.38; Roma 5.20 ††† Pana... Grek: Pana pwo a bwopiinen ânebun me den.

E mi habwii tenye Kériso

²¹ †††Kehe wonaa, ke kona ni patén, ke e cubwonihi a piapwo te Padué? Ūhu! Be te icehi a piapwo na e pébé céiikenye *a ju mulip. Ke e pwo me wogenye ni apulie na nye mwomwon ne he pwahamiin. Ke te tice ace céiu patén celi jan me e wonaa. ²² Kehe icehi ana ni tii iitihi, ke e pii beetihi pie, é ati he ni naado, me ati ni apulie, ke lé tai mu haahi a junuu a ta. Ke [te tice ace bwopwonen, me] nye hegi a adéihi ko a piapwo, [kehe te icehi] mu ko a céihi tenye ne ko Iésu Kériso.

²³ †Ânebun, ke pwohewiin heme nye pwokarépu. Ke ni patén, ke e wéikenye ati he ni tan, ucéihi a benaamwon na o habwii tenye a pwaaden mu ko a bwo céihi ne ko Kériso. ²⁴⁻²⁵ ††[Weengi a ocine ko ni patén]: Ânebun, ke pwohewiin heme pace caa te cémun denye celi e pacémunikenye, ke me e mi habwii tenye Kériso, ucéihi ace bwo tuie ten. Ke é jena ni, ke e caa te tuiebé kuti wo Kériso, ke genye caa céihi ne kon. Ke e caa pwo me nye mwomwon ne he pwahamii Padué. Ke time uce junaado me e mwo pacémunikenye mwo ne ni patén.

Ni naî Padué mu ko a céihi

²⁶ †††Heme nye †† céihi ne ko Kériso Iésu, ke genye caa tai naî Padué. ²⁷ †††He li puukenye ne he nii Kériso, ke genye caa cuwohe ni epwén na mwo coho, beme nye pwohewiieng ††.

²⁸ ††[Me nye caa mu ko Kériso] ke caa te tice aceli pité ne ha awieme lépwo Juif me lépwona time uce lépwo Juif; ke é ne ha awieme lépwo *apenem tice ja kon, me lépwona time lé uce apenem tice ja kon; ke é ne ha awieme lépwo aiu me ni toomwo. Be caa céiu genye, mu ko ana caa céiu genye me Kériso Iésu.

²⁹ †††Ke me genye caa mu ko Kériso, ke genye caa piebehi Abérama. Ke caa e konye a adéihi, li e caa mi pii te Abérama wo Padué.

Wogenye ke ni ju naî Padué

4 Geé cuwoteeke niimihi ani, pie: Wo pa apulie, ke e bo hegi ati ni naamuu pa caa ten [heme bo caa ubwo nang]. Kehe icehi ana heme mwo pa cuwo ewa, ke time e uce piwéden koja lépwo *apenem tice ja kon de caa ten. ² Ke e te cuwo ko piténéde lépwona lé wéieng, die ha a tan na e caa jahi wo caa ten.

³ †††Piwien ne konye. Be é ânebun, ke genye pwohewii ni cuwo ewa, be genye apenem tice ja kon

††† 3.21 Roma 8.2–4 § 3.23 Galat 4.3 †† 3.24 Roma 10.4 ††† 3.26 Ioane 1.12 †† Nye—Grek: Geé. Piwien ne he ni niide a tii 26–29. ††† 3.27 Roma 6.3 †† Grek: Ati lépwona puulé ne he Kériso, ke a epwénéle, ke wo Kériso. A ocine ko a bwo necu ne ni huô tenye na ta, beme nye mulie ha a mulie na mwo coho, me Kériso. †† 3.28 Roma 10.12 ††† 3.29 Roma 4.13 ††† 4.3 Kolosé 2.20

de ni patén me ni duée hauli †. 4 ††Kehe icehi ana é ha a benaamwon na e caa te mi pii jahi wo Padué, ke e nebé céiikenye pa Naîn. E âbeele mu ko ê toomwo, ke e [mulie ha a éé apulie ne pele lépwona lé] mu he ni *patén de Moosé. 5 Wo Padué, ke e nebé pa Naîn, beme e tuwokenye koja ni patén na e ciekenye, ke e pwo me wogenye ni ju naîn.

6 †A bwopwonen me nye temehi pie, wogenye ni naîn, ke wo Padué, ke e ne, he ni pwonimenye, a *Jenen Iitihite pa Naîn. Ke a Jenen Iitihite, ke e ne me nye pii te Padué [ha a pipwodéén] pie: «Caa tong!» 7 Ke é mu ko anaa, ke caa tice aceli e ciekenye †, be genye caa naî Padué. Ke e bo ne tenye ati ni *adéihi te ni naîn, na e caa te mi pii ânebun.

Nemwo pwo me ciekewé mwo!

8 Ânebun, ke time geé uce temehi Padué, ke wogewé ni apenem tice ja kon de ni nahi duée, koja Padué na te céiu nang. 9 Kehe icehi ana é jena na, ke geé caa temehieng. Ke te a juuju pie, te wo Padué kuti na e temehikewé. Ke é ne he pwahamiin, ke te tice niihe ni duée hauli, me ni patén; ke te piticenaado ne kon.

Woté? É mu ko ade na geé bitekewé mwojuia, me geé pitenedehi mwo ni naado naa? Kona nimewé me geé tai ni apenem tice ja kon delé mwo? 10 ††É mu ko ade na geé paciitihite ni béé tan, me ni béé wole, me ni béé benaamwon, me ni béé jo? 11 Pwohewiin heme te piticenaado ne ko ati ni penem dong ne pelewé!

12 É te cuwokowé, wogewé ni bééng, ne he nii Kériso, pie, me geé pipwohewiio [ke me geé pwo me tuwokewé koja ati ninaa]! Be woéo [pa *Juif, ke caa tuwoéo koja ni patén, beme] é pwohewiikewé [nina time geé uce Juif].

Ânebun, ke te junihe wâé ni bwomu tewé ne kong, ke wâé heme geé te cuwo ko wonaa ††. 13 Geé temehi pie, he li é mi pipatemehi tewé a Pwooti Wâé, ke é mu ko a cunu kong, na é tuie lé pelewé. 14 Ke geé gia ko anaa, kehe icehi ana time geé uce pihoonié, me téétié. Úhu, geé te hegié, pwohewiin heme woéo pa *âcélo te Padué, ke pwohewiin heme woéo, ke wo Kériso Iésu. 15 Ke geé te junihe pipwodéén kuti, ke pepule gewé me geé picani tong. Ke geé pipatupwokewé ati ne pehi ni wâé tewé me dong †††

Ke é jena, ke e wé a pipwoééhe me a pipwodéén dewé naa? 16 Kona geé niimihi pie, woéo pa acubwonikewé, mu ko ana é pii tewé a juuju?!

Nemwo tabemi lépwo apahaulikewé

17 [É temehi pie, wo lépwo apwocémun na lé tuie ne pelewé] §, ke lé hane me wâé tewé jélé. Kehe icehi ana time lé uce wonaa mu he ni ju pwonimelé. Be nimelé me lé pineitéékewé kojaéo, beme geé âcéilé.

18 É he li é mu pelewé, ke geé mwouiu me geé pwo ni na wâé. Ke wâé heme geé te wonaa, heme te tieéo pelewé †.

19 Au, [te junihe eânimung dewé] wogewé lépwo ju bééng! Ke é te junihe picani, heme é niimikewé, pwohewii ni cunu ko ni toomwo heme lé piâbeele ewa. Ke time o uce tuwoéo koja anaa, heme time uce téele hején a mulihe Iésu ne kowé. 20 Kehe icehi ana caa time é uce temehi aceli me é pwo [beme é picani] tewé. Ke te junihe nimung me é mu pelewé, beme é cihe me bwala ne kowé.

Lupwo piapwo na alo

21 Kona pwo ce béén mu kowé celi nimelé me lé pitenedehi ni patén de Moosé? Ke wâé, kehe icehi ana wâé heme lé téne ehi ana e pii ne ni patén. 22-23 †† ††Be caa te tii ne he ni tii iitihite pie, wo *Abérama, ke alo lupwo naîn. Wo pa céiu, ke pa naî é apenem tice ja kon den; ke wo pa céiu, ke pa naî é ju mwoden.

Wo pa naî [Agar] é apenem tice ja kon den, ke e âbeele mu ko ana te nime pa apulie kon. Kehe icehi ana wo [Isaaka] pa naî [Sara, é mwode Abérama], éna time uce é apenem tice ja kon, ke e pituie be te wo Padué kuti, na e pacuwohi a bwopiinen ânebun.

24-25 Wo lu toomwo naa, ke lu ocine me denye, ne ko lupwo *piapwo [na e pwo wo Padué me de a bele ten]. Wo Agar, é apenem tice ja kon de Abérama, ke é ocine [ko ni patén, li e ne wo Padué me de a bele ten, wo lépwo Juif]. Be lé caa â apenem tice ja kon [de ni patén] pwohewii Agar me ni piebehieng. Ke a pwomwo ubwo [te lépwo Juif] é *Iérusaléma, ke e pwohewii a juwole Sinaî ha amu Arabi, [he li lé mi hegi nelang li patén]. Be lupwo piduaan naa, ke a ine a bwo cie ni apulie.

26-28 †† †† ††Mepwo é ne ko Sara, ke é ocine ko a bwopiinen ânebun de Padué, na e tuwo lépwo apulie koja ana ciélé kon. Ke pwo a céiu Iérusaléma na e jeda he *miiden, ke a amu te ati lépwona tuwolé †††. Ke te junihe hiwon jélé. Be caa te tii ne he ni tii iitihite pie:

*Go pipwodéén wogo,
Iérusaléma na tice naîm!*

† Ni patén me ni duée hauli—ai Ni paa a bwohemwo. †† 4.4–5 Ioane 1.14; Roma 1.3 † 4.6–7 Roma 8.15–17 †† Caa tice aceli e ciekenye—Grek: Caa time uce wogewé ni apenem tice ja kon. †† 4.10 Roma 14.5; Kolosé 2.16 ††† Dernière phrase—Grek: Caa time geé uce pwo tong celi ta. ††† 2e phrase—Grek: E wé a pipwodéén dewé? É pii tewé pie, ânebun, ke wieli geé tuu ni ânenaamiiwé beme geé ne tong, heme pie jan.

§ Lépwo apwocémun na lé tuie ne pelewé—Omehi Galat 1.7. †† Ai, Wâé heme lé hane me lé pwo nina wâé, he ni benaamwon na tieéo, pwohewii a benaamwon na é mu pelewé. Wieli a pwooti ko nina lé tuie ne pele ni Galat, ai a pwooti ko ni Galat. ††† 4.22 Genèse 16.15, 21.2 § 4.23 Roma 9.7–9 §†† 4.26 Ébéru 12.22; Pii Beetihite 21.2, 10 §† 4.27 Ésaie 54.1 §† 4.28 Roma 9.7 §†† Grek: 26 Kehe icehi ana é Iérusaléma na e jeda, na é nyaa tenye, ke pwo mwomwon den.

*Pwonyebi me pipwodéén,
wogo na time go uce piâbeele ewa!
Lé caa tahi taabwoniko,
kehe icehi ana go bo te piwéden!
O te junihe hiwon ce naîm
koja êna pwo aiu hen!Ésaïe 54.1*

Geé téne, wogewé ni bééng ne he Kériso, wo lépwo naîm, ke te wogenye kuti! Éa, wogenye ke ni ju naîm, kehe time genye uce ni apenem tice ja kon de pace céiu. Be genye pwohewii Isaaka, be genye piâbeele mu ko a bwopiinen ânebun.

²⁹†Ânebun, ke [wo Ismaël, pa naî ê apenem tice ja kon, ke e pwotahi ne ko Isaaka]. Geé alihi, wo pa naîm na e âbeele mu ko ana nime pa apulie kon, ke e pwotahi ne ko pa naîm na e piâbeele mu ko a bwopiinen ânebun de Padué. Ke é jena ni, ke teko piwien ne konye, nina nye piâbeele mu ko a Jenen Iitihi.

³⁰E pii pie woté ne ni tii iitihi ne ko anaa? Weengi: *Geé cibéé ê apenem tice ja kon, me pa naîm. Be wo panaa, ke time e o uce hegi ni wâé te caa ten. Te icehi pa naî ê toomwo na time uce ê apenem tice ja kon, na e bo hegi ati.*

Genèse 21.10

³¹Geé alihi, wogewé lépwo bééng ne he Kériso, time genye uce ni apenem tice ja kon de ni patén. Wogenye ni ju naî Padué na e caa tuwokenye ††!

E caa tuwokenye wo Kériso

5 E tuwokenye wo Kériso, beme te tice celi e ciekonye mwo. Ke wâé heme geé imwi me mang a bwo tuwokewé. Ke geé nemwo ne me wogewé lépwo *apenem tice ja kon mwo [ne ko ace céiu patén].

²³Geé téne wogewé! Be woéo, Paulo [pa *apostolo] ke é pii mwouhi tewé pie: Hemepie geé [hane a péém me Padué ko a bwo] *pwotegoop âcehi ni patén, ke wâé heme geé piténehehi ati ni patén. Ke hemepie wonaa, ke te piticenaado ne ko ana e pwo wo Kériso me denyé!

⁴Wo lépwo béén mu kowé, ke lé hane me lé *mwomwon ne he pwahamii Padué mu ko a bwo piténehehi nen delé ni patén. [Lé pipwocile!] Be wieli o pineitéélé koja Kériso me a *pipwoééhe tice ja kon de Padué.

⁵Kehe icehi ana wogenye, ke genye te ju céihi cehi, ke genye ucéihi ne ha a pipwodéén a tan na e bo hegikonye wo Padué ne pelen, ke o wâé ten genye. Ke e picani tenye na a *Jenen Iitihi, ha a benaamwon na nye mwo ucéihi a tan naa ‡.

† 4.29–30 *Genèse 21.9–10; Ioane 8.35* †† *Grek: ...Time nye uce naî ê apenem tice ja kon de pace céiu, kehe nye naî ê toomwo na pwo mwomwon den.* ‡ *Grek: Wogenye, ke genye ucéihi mu ko a céihi, a bwo mwomwon genye ko a Jenen.*

⁶††Hemepie tegoop genye, ai mepie time uce tegoop genye, ke te piticenaado ne kon, be nye mu he Kériso Iésu. Ke ana a junaado, ke te icehi a céihi tenye [ne kon]. Ke a céihi tenye, ke o habwii, heme nye pipwoééhe [lépwo béén].

Woo celi e ne me geé padep?

⁷Wogewé lépwo bééng, geé caa te engen ehi [ne ko Kériso]. Ke woo celi e ne me geé padep koja a pwaaden naa, beme time geé uce âcehi a juuju? ⁸Time uce wo Padué, be te weeng na e todekewé! ⁹††[Geé pipwocile, be wo pa apulie na e gele, ke jan me e ne me geé tai pilééng.] Pwohewii ana nye mu pii pie: «A cuwo nahi nyaa te pwoloa, ke e pwo me cibi a pwoloa.» ¹⁰†††Kehe icehi ana é céihi me mang pie, me céiu a bwo niimihinaado tenye, mu ko a bwo céiu genye ne ko Padaame.

Mepwo é ne ko pa apulie na e pwo me pipenem ni pwonimewé, ke wo Padué, ke e bo tautieng ke pwocuhinaado ten. Te piwien hemepie wo panaa, ke pa apulie na ubwo nang ne pelewé.

¹¹Wogewé lépwo bééng ne he nii Kériso, time é mu uce patemehi tewé a bwo pwotegoop, âcehi a bwomu te lépwo *Juif. Be mepie é wonaa, ke wieli time lé uce pipiéo me ta. Úhu! Weengi ana é patemehi: [E celuimikonye wo pa *Mesia, he e mele ne ko] a *kuricé. Ke weengaa a piolo ne te lépwo Juif.

¹²Mepwo é ne ko lépwona lé iluukewé, ke [caa emaan jo kolé]. Hemepie nimelé me lé pwotegoop tewé, ke wâé heme lé tahagéi taabwon a aiu telé!

Piténehe a Jenen Iitihi

¹³†††Caa te todekewé, wogewé lépwo bééng ne he Kériso, beme tuwokewé ati koja ni naado na ciekewé. Kehe icehi ana geé nemwo pé hauli a bwo tuwokewé naa, beme geé mulie mwo ha a ta. Geé pipenem dewé ne ha a pipwoééhe. ¹⁴§Ati ni âne ni *patén de Moosé, ke e mu ha a âpihuô na te céiu. Weengi: *Go pwo me eânimem de ni béén*††, *pwohewii a bwo pieânimem dem.*

Lévitique 19.18

¹⁵É hemepie geé te cuwo ko pipwotahinaado ne kowé, pwohewii ni wota apiaba, ke geé pipwocile, be wieli geé bo pitaunukewé. ¹⁶Weengaa ana é pii tewé: Geé piténehehi a Jenen Iitihi. Be mepie wonaa, ke time geé o uce âcehi nina te nimewé kon na ta. ¹⁷†††Be nina te nimenye kon na ta, ke lé pwobwonihii a Jenen Iitihi; ke a Jenen Iitihi, ke e pwobwonihii nina nimenye kon na ta. Ke lu pipwopa ne konye. Ke lu pineitééhi ni pwonimenye. ¹⁸Ke hemepie e pihuôkewé na a Jenen

†† 5.6 1 *Korénit 7.19; Galat 6.15* ††† 5.9 1 *Korénit 5.6* ††† 5.10 2 *Korénit 11.15; Galat 1.7* †††† 5.13 1 *Pétérú 2.16* § 5.14 *Roma 13.9* †† Ni béén—*Grek: Pana e mu mwonuko, ai Pa ju béém.* ††† 5.17 *Roma 7.15–23*

Iitihî, ke caa time geé uce mu haahi ni patén. [Ke weengaa ali é pii tewé.]

Utehe nina nimenye kon na ta

¹⁹ †Genye omehi ehi ni huô te lépwona lé te âcehi nina nimelé kon na ta:

Lé nemimelé ne ko ni naado na tanim genye kon;
Lé pipule hauli me ni béén;
Lé pwo ni huô na mwiihi ne ko ni éélé;
²⁰ Lé pipwoun de ni *dème duéé, ke lé pwo eti ta, ke lé piténede ni duéé;
Lé pitaaba;
Lé pitéétilé, ke lé piokéé;
Lé pipwoun delé mwo, ke lé caa â huî lépwo béén;
Lé pineitéélé, ke lé niimihi pie, te ni juuju cehi nina lé pii ne he ni muko puco telé;
²¹ Lé nemimelé ne ko ni de lépwo béén;
Lé piolo, ke lé piwiinaado me ûdu pwohewii ni puwokwo.

Ke hiwon mwo ni naado na lé pwo na ta. Ke é pii tewé mwo ana é caa pii, pie: Wo lépwona lé pwo ni naado naa, ke time lé o uce hegi ni *adéihi te a *Mwametau te Padué.

Ni acehi a Jenen Iitihî

²² Kehe icehi ana weengi ni acehi a Jenen Iitihî, na e ne he ni mulihenye:

A pipwoééhe;
A pipwodéén;
A péém;
A piuca;
A pipwowâé;
A pipwoeabwé;
A piténedehi ha a céihi;
²³ A pwonime na bwala;
A pipwoiipihi.

Ke ni patén, ke te ju tice aceli e pii ne ko ninaa.

²⁴ ††Wogenye na lépwo apulie te Kériso Iésu, ke genye caa cemeite ne ko a kuricé nina te nimenye kon na ta.

²⁵ Kehe mepie e pamulipikenye na a Jenen Iitihî, ke wâé heme nye ne me e pihuôkenye. ²⁶ †Genye nemwo pwo me piubwo genye, ke pihabwiikenye! Genye nemwo pwo me pita ni béénye! Ke genye nemwo pitaaba!

Bénebwéne pwooti

6 ††Lépwo ju bééng ne he Kériso, hemepie geé temehi pie, pa céiu bééwé, ke e ko pwo nina ta, ke wâé heme geé pééng mwobé ha a pwaaden na wâé. Ke weengaa a penem dewé hemepie geé cumang †† ne

† 5.19 1 Korénit 6.9–10 †† 5.24 Roma 6.6; Kolosé 3.5 † 5.26 Filipi 2.3 †† 6.1 Mataio 18.15 †† Hemepie geé cumang—Grek: Wo lép-

ha a bwo mulie tewé âcehi a *Jenen Iitihî. Ke geé cihe me bwala ne kon. Ke geé pipwocile, wogewé ati, be koli lé bo céikewé mwobé, me geé pwo nina ta. ² ††Geé picani tewé ko pé ni âneule tewé. Be me wonaa, ke geé piténedehi a pihuô te Kériso [pie, me genye pipwoééhenye, be weengaa a ju patén me denye].

³ Mepie e niimihi wo pace céiu pie pwonaado ne kon, ke wo panaa, ke e pipweéo, be te piticenaado ne kon!

⁴ Ke go nemwo tee ome pace céiu, beme go pwo me piubwo go kojaeng. Go te pitauti mwo ni huô tem. Ke mepie wâé, ke go pipwodéén kon. ⁵ ††Be wâé heme nye te muko pétaapwo alihi ni penem denye.

⁶ †A céiu mwo: Ke wâé heme geé pipatihî ni wâé tewé me pana e pacémunikewé ko a pwooti.

Nye tii nina nye cemi

⁷ ††Go pipwocileko ne ko ni bwopemiko! Go nemwo niimihi pie go taduwo ne he pwahamii Padué ††† Be go o te tii nina go te cemi. ⁸ Be hemepie nye cemi, âcehi nina te nimenye kon na ta, ke nye bo tii mwo ne ha a mele, me a bwo tiekenye. Kehe icehi ana mepie nye cemi, âcehi ana nime a Jenen Iitihî kon, ke genye bo tii a *mulie dieli mwo ne pele Padué. ⁹ Ke anaa, na me time nye uce pwo me emaan genye, me nye pwo ana wâé! Ke genye nemwo pipwotupwo! Be o bo tuie a tan na nye bo hegi [a *adéihi]. ¹⁰ É mu ko ati ninaa, ke genye pé a benaamwon na mwo mu ne tenye, me nye mi pwo nina wâé te ni acéihi béénye, ke genye wonaa mwo te ati ni apulie!

Pinekenye

¹¹ Woéo Paulo, na é imwi a bépwortii †† beme é panebwénihî ali tii. Geé alihi ni atii na ubwo na é pwo!

¹² [Weengi ana é pii tewé]: Geé pipwocilekewé ne ko lépwona nimelé me lé *pwotegoop tewé!

Lé wonaa beme lé piwâélé wo lépwo apulie. Be mwotilé ko lépwo *Juif. Be hemepie lé pipatemehi a pwooti ko a bwo mele te Kériso ne ko a *kuricé, ke wieli o pwotahinaado ne kolé. ¹³ Wieli lépwona tegoop jélé, ke time uce nimelé me lé âcehi ni *patén de Moosé. Ke te nimelé cehi me lé pipii delé ne he pwaahamii lépwo Juif. Ke wâé telé heme lé pii pie, te woélé cehi, na lé ne me geé hegi a bwomu te lépwo Juif †††.

¹⁴ Woéo, ke time é uce pipii dong ko ni naado na wonaa. É patemehi cehi a bwo mele te Padaame henye, Iésu Kériso, ne ko a kuricé. Ke é mu ko anaa

woce mu kowé celi lé cumang. E pii anaa wo Paulo, beme tanahilé, be lé pipii delé. ††† 6.2 Roma 15.1 ††† 6.5 Roma 14.12 † 6.6 1 Korénit 9.11, 14 †† 6.7–8 Roma 8.13 ††† 2e phrase—Ai, Time uce jan me nye pihooni Padué, ai Time uce jan me nye pipwohuô te Padué. †† Woéo Paulo, na é imwi a bépwortii—He lí e pwotii, ke e cihe, ke pa céiu apulie (secrétaire), ke e tii ana e pii. Kehe icehi ana e pé a bépwortii wo Paulo, beme e pwobwocu telé. ††† Grek: Be wo lépwona pwotegoop telé, ke time lé uce âcehi ni patén. Kehe icehi ana wâé telé heme pwotegoop tewé, beme lé pipii delé ko ni ééwé.

kuti, ke time uce junaado ne tong, ati ni huô na nihe pwoñaado ne kon, ne pwo a bwohemwo ce †. Pwohewiin heme lé caa mele ati ninaa, ne kong. Ke woéo, ke pwohewiin heme é caa mele koja ni bwomu te a bwohemwo.

¹⁵ ††Hemepie tegoop genye, ai mepie time uce tegoop genye, ke te piticenaado ne kon. Ana pwoñaado ne kon, ke ana me taatééhi a bwo mulie tenye. Be wo Padué, ke e pwo me wogenye ni apulie na mwo coho.

¹⁶ Wogewé na geé mulie cehi a âpihuô tong naa, ke te wogewé kuti a ju puapulie te Padué ‡: a puapulie

† *Grek: Kehe icehi ana woéo, ke time é uce pipii dong, kehe é pipii dong cehi ko a kuricé te Padaame henye Iésu Kériso. É mu kon, ke caa cemeite ne ko a kuricé a bwohemwo me dong, ke woéo mwo me de a bwohemwo. †† 6.15 Galat 5.6; 2 Korénit 5.17 ‡ ...Te wogewé kuti a ju puapulie te Padué—ai ...É ne pehi a ju puapulie te Padué.*

*Isaraéla na mwo coho! Wâé heme e mu kowé ati a pipwoééhe me a péém de Padué!

¹⁷ ††[É panebwénihi ne ha a bwopiinen pie]: Wo lép-wona lé cubwoniéo ‡, ke wâé heme lé cuwo! [Be te wo Iésu kuti na e ne a mwomwon dong.] Be é caa junihe mu he ni picani, he é penem me den. Ke ni ahinaado na e ha a ééng, ke ni inen.

¹⁸ Lépwó acéihi bééng, wâé heme e adéikewé wo Padaame henye Iésu Kériso, mu ko a *pipwoééhe tice ja kon den!

Adéikewé! Amen!

†† 6.17 2 Korénit 4.10 ‡‡ *Cubwoniéo—Wieli ni pwooti ko lépwo apwopune na lépwo agele, na lé pii pie, time uce pa ju apostolo wo Paulo, ai wieli emaan Paulo ko lépwo Galat, heme lé te cuwo ko ilu-ueng ko a bwo nimelé me lé ácehi ni patén de Moosé.*

Éféso

nge céii lépwo

Atabuhi ko a tii

Woo na e tii a tii ce?

Wo Paulo, pa apostolo.

E tii éniile?

Ha awieme a jo 60 me 62, ha a bécéiuhe bwo mu he karépu te Paulo ne Rome . Ha a benaamwon naa, ke e tii ni tii na paa: a tii ce, nge céii lépwo Éféso; ke a tii nge céii Filémon; ke ni béé tii mwo nge céii lépwo Filipi; me lépwo Kolosé.

E tii me dee?

Te lépwo acéihi na time lé uce Juif, ha a province Asia (Turki jenea). Lé mu ha a pwomwo ubwo Éféso me ni béé duaan na e mwonuhi lang. Wieli e tii, beme pine nge he ni pétaapwo puco te ni acéihi. Time e uce temehi ati lépwo apulie na e pwotii nge céiilé (omehi 1.15; 3.2), be e tii he na paa ai nim ni jo alecehe a bwo mu ten Éféso , ke caa piân a Pwooti Wâé.

É ko ade na e tii?

E tii, beme e habwii tenye lépwo acéihi pie, te junihe ubwo wéden ni adéihi na e pipwaadeniin bé wo Iésu Kériso. Ke e pwopune tenye me nye mulie ha a mulie na wâé te Padué.

Ade ace âne a tii ce?

Te junihe wâé Padué, be e niimihi ha atabuhi kon pie, me e bo ne tenye ati ni wâé ten. Mu ko a pipwoééhe tice ja kon den, ke e celuimikenye koja ni ta pwo tenye, ke e ne tenye a ju mulip ne pelen. Ke e ne tenye mwo atebwo ne he miiden me Kériso, me ati a adéihi ten: a adéihi jenea, me a adéihi na e bo âbé. E wonaa, be caa wogenye he Kériso (2.6).

É mu ko anaa kuti, na e neibukenye, ati lépwo acéihi ne ko Kériso, me a bele na céiu. Hiwon ni ocine ko a pua-pulie te Kériso, a Mwaiitih ten, na e pii wo Paulo. Be nye pwohewii a één (1.22–23); ke nye pwohewii a mwa te Padué (2.19–22); ke genye pwohewii ê mwode Kériso (5.23–32).

Ke me wonaa, ke wâé heme nye mulie ha a mulie na wâé te Padué:

- Nye penem ko a âpipati na e ne tenye na a Jenen Iitih, beme nye pamwoiu ni acéihi béénye (4.1–16);
- Nye tahi taabwon ati ni huô me ni bwomu na mwiihi, ke genye mulie ha a pwéélang (4.17–5.20);
- Nye mulie ha a pipwoééhe me pwo me piwahin genye, ne he ni pwomwoiu tenye (5.21–6.9).

E paniimihi tenye wo Paulo pie, wogenye, ke ni coda te Kériso na nye pwopa ne ko Caatana me a junuu a ta. É mu ko anaa, na wâé heme nye pé ati ni naamuu pa na e ne tenye wo Padué (6.10–20).

Hiwon ni pwooti na junihe wâé na e ha a tii ce, ko nini:

A pipwoééhe te Padué (1.5, 2.4 me ni béé niide a tii)

A Jenen Iitih te Padué (1.13–14 me ni béé niide a tii)

A Pwooti te Padué (1.13; 5.26; 6.17)

A bwomune a tii Éféso

Pipwobwocu
 A adéihi na e pébé wo Iésu Kériso
 E pwoitihi me de lépwo acéihi wo Paulo
 Ânebun, ke genye mele; ke é jena, ke genye mulie
 Céiu genye ne he Kériso
 Ana e niimihi wo Padué bwolihi
 Te junihe ubwo a pipwoééhe te Kériso me denye
 A mulihenye ne ha a pimu ibu tenye
 A mulihenye na mwo coho
 Mulie pwohewii ni ju naî Padué
 Ni pwomwo na lé céihi
 Ni naamuu pa tenye
 Bépinelé

Pipwobwocu

¹ †Woéo, Paulo, na é pwotii lé céiikewé, woéo pa apostolo te *Kériso Iésu, âcehi a bwo niimihinaado te Padué. [Be e pahedeéo ngen, me é pipatemehi a pwooti ten.] É pwotii lé céiikewé, wogewé ni apulie iitihi ten ne Éféso ††, [ke é ne mwo he ni béé duaan mwo] wogewé na géé *cumang ne ha a céihi ne ko Kériso Iésu, ke céiu gewé me weeng.

² Wâé heme e mu kowé a *pipwoééhe tice ja kon me a péém na e âbé mu pele Padué Caa tenye, me Padaame Iésu Kériso. Adéikewé!

a adéihi na e pébé wo iésu kériiso

(Pwahamii tii: 1—3)

³ Wâé heme nye pipaunu Padué! Weeng Padué na e Caa te Padaame henye Iésu Kériso. Be e ne tenye mu he miiden ati ni *adéihi ten, mu ko ana céiu genye me Kériso.

⁴ ††Ânebuhe a bwo tabuhi na a bwohemwo, ke e caa te mi pipégalikenyé wo Padué, beme nye apulie ten, na e pwaadeniin bé wo Kériso. Ke nimen me wâé genye, ke me tice ta konye ne he pwahamiin. Be te junihe eânimen denye. ⁵ ††Ke é mu ko a pipwoééhe ten, ke a âniimihinaado ten ânebun pie, me e bo pwo me wogenye ni naîn, mu ko Iésu Kériso. Weengaa a bwo niimihinaado ten, ke e te pacuwohi.

⁶ Wâé heme nye pipaunueng, me picedieng. Be te junihe ubwo *a wâé ten, me a pipwoééhe tice ja kon den me denye! Be e ne, me piticenaado ne kon, ne tenye ni adéihi ten, na e pwaadeniin bé wo pa Naîn na te junihe eânimen den. ⁷ ††Ke caa céiu genye me weeng. Ke e

caa tuwokenye [wo Padué] ke e caa pineuhi ni ta pwo tenye, mu ko a cewéhe Kériso [na téé he li e mele me denye]. Be te junihe ubwo a pipwoééhe tice ja kon den ⁸ na e ne tenye me tice ja kon. Ke e ne tenye ati a pitemang me a bwo temehinaado ††.

⁹ †E habwii tenye *a bwo niimihinaado ten li e ha aduwo ânebun. Ke e pacuwohi ne tenye, mu ko Kériso, ¹⁰ ††ha a benaamwon na e caa te mi pacuwohi ânebun. Ke e bo neibuhi ati nina [e tabuhi] ne jeda he miiden, ke e jeoté pwo bwohemwo. Ke e bo tai nelé ati haahi a pihuô te Kériso.

E pipégalikenyé bwolihi wo Padué

¹¹⁻¹² ††E pipégalikeme wo Padué, wogeme na geme mi céihi ne ko Kériso, me ucéieng. Ke e niimihi ânebun me e pwo me wogeme ni apulie ten, mu ko ana céiu geme me Kériso. Be ati ni naado na nimen kon, ke e te pacuwohi. E pwo me wonaa, beme geme habwii *a wâé ten na junihe ubwo.

¹³ Wogewé mwo, ke géé téne a pwooti na a juuju. Ke a pwooti ce, ke a *Pwooti Wâé, na e celuimikewé kon. Be géé caa téneeng, ke géé caa céihi ne ko Iésu Kériso. Ke e [habwii wo Padué, pie, géé caa apulie ten. Be e] caa ne kowé a inen, a *Jenen Iitihi, pwohewii a bwo *piapwo ten ânebun.

¹⁴ ††Ke a Jenen Iitihi naa, ke e ânebuhe ni wâé ten, na e ne tenye, ni apulie ten. Ke é mu ko anaa, ke genye temehi pie, genye o bo hegi ati ni wâé ten. Ke bobé tuwokenye ati koja a ta. Wâé heme nye pipii de Padué na ubwo nang ne ha a wâé ten!

É pwoitihi me dewé ni acéihi

¹⁵⁻¹⁶ É mu ko ati ninaa, ke é te cuwo ko niimikewé ne he ni pwopwoitihi tong. Ke é te cuwo ko pwo-olé ten kowé. Be é téne jepule kowé pie, géé te junihe céihi ne

† 1.1 Apostolo 18.19–21, 19.1 †† Ne Éféso—Ni pwooti naa, ke te tieden he ni béé tii iitihi he pwo grek. ‡ 1.3 Éféso 2.6 †† 1.4 Ioane 15.16 †† 1.5 Ioane 1.12 ††† 1.7 Éféso 2.7; Kolosé 1.14

††† Ai, E pwo ninaa mu ha a pitemang me a bwo temehinaado ten. § 1.9 Roma 16.25 † 1.10 Kolosé 1.16,20 ††† 1.11 Roma 8.28–29 †† 1.14 2 Korénit 1.22

ko Padaame Iésu, ke geé pipwoééhe ati ni apulie ten.
¹⁷ †[Heme é pwoiitihi me dewé] ke é ilehi koja Padué pie, me e picani tewé, me geé temehiang ehi ko a Jenen Iitihi ten. Be a Jenen Iitihi, ke e bo habwii tewé a ju bwomu te Padué †: wo Padué te Padaame henye Iésu Kériso, me pa Caa na oba nang ko a wâé. ¹⁸ Ke é ilehi kojaeng pie, me pwéélang ehi ne he ni pwonimewé ko ati ni wâé ten na e ne tewé. Be junihe ubwo nina e bo ne te ati ni apulie ten. Be wonaa a cemewé na geé *ucéihi ne ha a céihi, alecehe a bwo todekewé ten. ¹⁹ *Ke [é pwoiitihi mwo pie] me geé temehi a junuu Padué na te junihe ubwo me denye, wogenye nina genye céihi ne kon.

Ne te Kériso me e pihuôhi ati

E habwii a niihen me a junuun naa wo Padué, ²⁰ ††he e pamulipi Kériso mu ha amele, ke e pwo me e tebwo *pwo a juin ne he miiden. ²¹ ††Ke e pwo me e pihuôhi ati ni apihuô ke ni pwojunuun [ne jeda he miiden, ke éni pwo bwohemwo]; he ni benaamwo amu ce, ke ni benaamwo amu na e bo âbé. ²² ††Éa, e tai ne ati wo Padué haahi ni pihuô te Kériso.

Ke e pwo me pa daame he a puapulie ten, a Mwaiitihi, ²³ ††na a één, ke [wo Kériso, ke e punin; ke] céiu ju-lu. Ke ati ni naado na e ne wo Padué, ke te tai oba ko Kériso ⁵.

Ânebun ke genye mele

2 stÂnebun, ke wogewé ni apulie mele, [be time e uce mu kowé *a ju mulip] mu ko ni huô tewé na ta, me a bwo time uce piténede Padué. ² ††Be li geé mulie pwohewii ni apulie pwo bwohemwo na lé pwo nina ta. Ke geé piténede [*Caatana] pa caa te ni duéé na lé pihuô ne he pipuwohe a miiden me a bwohemwo. Weeng na e pihuô te ati nina muhi telé me lé piténede Padué. ³ ††Ke é ânebun, ke wogenye, ke genye tai pwohewiilé. Be genye âcehi ni bwo niimihi-naado tenye na ta. Ke genye pwo ati nina nimenye me nye pwo ko ni éénye. Ke genye ucéihi ni kuhinaado mu pele Padué, be e okéé ne ko ati ni apulie pwo bwohemwo na lé pwo nina ta ^{st†}.

Nye mulie mu ko a pipwoééhe ten

⁴⁵ ††Ânebun ke wogenye ni apulie mele [ne he pwa-hamii Padué] ko ni ta pwo tenye. Kehe icehi ana te junihe eânimen denye, be te junihe ubwo a pipwoééhe ten. Ke e pwo me nye pimulie ibu me Kériso. Éa, celuimikewé mu ko a *pipwoééhe tice ja kon de Padué. ⁶ ††E céikenye mu ha amele me Kériso Iésu, ke e ne tenye ni atebwo he *miiden me Kériso. E wonaa, be caa wogenye he Kériso. ⁷ Be nime Padué me e habwii dieli mwo pie, te junihe ubwo a pipwoééhe tice ja kon den, ke te junihe hiwon mwo ni adéihi me ni wâé ten na e ne tenye, me piticenaado ne kon, na e pwaadeni-in bé wo Kériso Iésu.

⁸ Be e caa celuimikewé mu ko a pipwoééhe tice ja kon den wo Padué, na e pwaadeni-in bé na a céihi tewé. A bwo celuimikewé, ke time uce é mu kowé. Be a âpipati, na e ne tenye [me piticenaado ne kon] wo Padué. ⁹ ††Ke time uce wonaa mu ko ce penem dewé, ke me geé pipii dewé! ¹⁰ ††Be wogenye ni acehi ni penem de Padué, he li e pwo me mwo coho ni mulihenye. E pwo me wonaa, beme nye te cuwo ko pwo ni penem na wâé na e caa te mi piwâam kon ânebun, beme nye bo pwo.

Céiu genye ne he Kériso

¹¹ Wo lépwo *Juif, ke lé pii kolé pie, 'lépwna *tegoop jélé'. Ke lé pipii delé kon ^{ss}. Kehe wogewé na time geé uce Juif, ke lé pii kowé pie, 'lépwna time uce tegoop jélé'.

Mepwo é ne ko a tegoop, ke ana te ju pwo ne ko a éé apulip cehi. Kehe icehi ana wâé heme geé niimihi pie, é ânebun, ke time geé uce apulie ha a bele te Padué ¹⁸. ¹² ¹⁹Ha a benaamwon naa, ke time geé uce temehi pie, woo wo Kériso ²⁰, pa *Mesia [na e *celuimi a bele te Padué]. Be time geé uce apulie ha a bele *Isaraéla na e pipégali wo Padué. Ke tice dewé mu ko ni piapwo te Padué. Ke geé mulie pwo a bwohemwo ce, kehe o te tice *adéihi celi geé ucéihi mu ko Padué. Be time geé uce temehiang, ¹³ ²¹ke geé mu ité kojaeng.

Kehe icehi ana é jena ni, ke geé caa âbé céieng mu ko a cewéhe Kériso Iésu [na téé he li e mele me dewé].

¹⁴ ²²Wo Kériso, ke caa weeng pa péém denye. Ke e neibukenye, beme wogenye a bele na céiu, wogeme lépwo Juif me wogewé ²³, nina time geé uce Juif. Be é

† 1.17 Kolosé 1.9 †† A ju bwomu te Padué—ai ...ko ni naado. Révélation. E habwii tenye a Jenen Iitihi ne ha a jenen ni naado na time genye uce temehi ha a bwo temehinaado te pa apulie. † 1.19 Kolosé 1.11 †† 1.20 Psaume 110.1; 2 Korénit 13.4; Kolosé 2.12 †† 1.21 Kolosé 1.16, 2.10 ††† 1.22 Psaume 8.7 ††† 1.23 Roma 12.5; Éfeso 4.10,15; Kolosé 1.18 † Tai oba ko Kériso—Ati ni naado na e tabuhi wo Padué, ke ni de Kériso. Ke e mu kolé wo Kériso, ke e ne telé a mulie. Ai, Wo Kériso, ke hején nang ko ati ni naado na e tabuhi wo Padué. †† 2.1—5 Kolosé 1.21, 2.13 ††† 2.2 Kolosé 3.7; Tit 3.3 †† 2.3 Kolosé 3.6 ††† Ati ni apulie...na lé pwo nina ta—Grek: Ni béén.

†† 2.4—5 Roma 6.13 †† 2.6 Kolosé 2.12 ††† 2.9 1 Korénit 1.29—31; 2 Timoté 1.9 ††† 2.10 Tit 2.14 ††† Lé pipii delé kon—Be a tegoop, ke a ine a bwo pipégallé te Padué beme lé bele ten. ¹⁸ (Niide a tii)—Grek: He geé teko pipaniimihi pie, é ânebun, ke wogewé nina time geé uce Juif ha a éé apulie. Ke wo lépwna te-goop jélé, ke lé pii kowé pie 'lépwna time uce tegoop gewé'. [A te-goop, ke te a céiu naado] na pwo ne ko a éé apulie ko ni i apulie. ¹⁹ 2.12 Roma 9.4; Kolosé 1.21 ²⁰ Time geé uce temehi pie, woo wo Kériso—Grek: Te tie Kériso kowé. ²¹ 2.13 Kolosé 1.20 ²² 2.14 ¹

he e mele ne ko a *kurićé, ke e tanahi a aba ha awiemenye na bahi ko a bwo pitéétikenye.

¹⁵ †[Wogeme lépwo Juif, ke geme âcehi] ni *patén de Moosé; ke [te hiwon] ni pihuô, me ni cuwo nahi patén kon. [Kehe icehi ana é jenea ni] ke piticenaado ne ko ninaa ko ana e pwo wo Kériso. Be e ne a péém hadeni inye me wogewé na time geé uce Juif. Ke e neibukenye, beme wogenye a bele na céiu, na nye mu kon.

¹⁶ ††A céiu mwo: Ke e ne mwo a péém ha awiemenye ati me Padué ko a bwo mele ten ne ko a kurićé. Ke e pwo me tieden a bwo pitéétikenye.

¹⁷ †Éa, e tuie wo Kériso, beme e pipatemehi a Pwooti Wâé na e pébé a péém. Ke e pipatemehi tewé [wogewé nina time geé uce Juif] na geé mu ité koja Padué. Ke e pipatemehi teme [wogeme lépwo Juif] na geme pimu mwonu Padué.

¹⁸ É mu ko ana e pwo wo Kériso, ke wogenye ati, wogeme ni Juif me wogewé lépwona time geé uce Juif, ke caa jan me nye âmwonu Padué Caa tenye. Ke genye tai â pelen, ko a *Jenen Iitihî ten na te céiu nang.

Wogenye ni apulie ha a pomwa ten

¹⁹ †É mulang na wogewé lépwona time geé uce Juif, ke time geé uce coho, ke time geé uce a bele ité. Be geé caa apulie te Padué, ke geé taa ha a pwomwoiu ten, pwohewii ati ni béé apulie te Padué.

²⁰ †[Nye pwohewii] a mwa na bahi ne pwo a paan [na mang]. Be a paamwa, ke wo lépwo *apostolo, me lépwo *péroféta ††, ke a péi paamwa na a junaado, ke wo Kériso. ²¹ †††Ke weeng na e pwo me mang, me piubwo da a mwa, [wogenye na nye céihi ne kon] me â a Mwaitihî te Padué.

²² †Wogewé [na time geé uce Juif] ke geé te péi mwo ne ko a mwa naa, be caa wogewé he Kériso. Ke piwien mwo ne kome [lépwo Juif]. Ke e mulie ha a mwa naa a Jenen Iitihî te Padué ††.

Ana e niimihi wo Padué bwolihi

3 ¹⁻² ††† [Wo Padué, ke e pwo me céiu genye: wogeme lépwo *Juif, me wogewé na time geé uce Juif.] Ke é mu ko anaa kuti, na woéo, Paulo, ke é pipwoeabwé te Kériso Iésu, he é penem me dewé. Ke é jenea ni, ke é mu he karépu mu ko a penem naa. Kona time geé uce temehi anaa? Be e ne tong a penem naa

wo Padué ne ha a wâé ten, beme e pacuwohi ana e niimihi.

³ ††Time e uce pii beetihî *a bwo niimihinaado ten naa, na e ha aduwo [mu ha atabuhî kon]. Kehe icehi ana é jenea ni, ke e habwii tong, ke é bwo ko tabuhî pii tewé ne ha a tii ce. ⁴ Ke, me geé pine, ke geé o temehi ana é temehi, woéo, ne ko a bwo niimihinaado ten naa, na e pacuwohi ne ko Kériso.

⁵ †Ánebun, ke te tice apulie celi lé temehi ehi anaa. Kehe icehi ana wo Padué, ke e caa pwo me lé temehi ne ni *apostolo me ni péroféta ko a *Jenen Iitihî ten. Be woélé ni apulie ten na e caa pipégaliilé ††.

⁶ ††Weengi a bwo niimihi nen den: Heme lé mu ko Kériso Iésu wo lépwona time uce lépwo Juif, ke lé caa te â pwohewii lépwo Juif, be caa â céiu a bele ††. Ke lé tai hegi ni wâé me a *adéihî te Padué. Ke a piapwo te Padué, ke te a delé ati. Weengaa kuti a Pwooti Wâé! †††

Pahede Paulo beme e pipatemehi

⁷⁻⁸ ††† ¹⁸Woéo, ke te piticenaado ne kong koja ati ni apulie te Padué. Kehe icehi ana e te junihe pwohewii ne kong ha a *pipwoééhe tice ja kon den, ke e pipégaliéio beme é eabwé ten. Ke e penem kong ko a junuun, beme é pipatemehi a Pwooti Wâé ten ne te lépwona time uce lépwo Juif. Ke é pii telé ati ni adéihî ten na e daaité, ke piwéden, na e [ne tenye, na nye] mu he Kériso.

⁹ E pahedeéo ngen, beme é habwii te ati ni apulie ni bwopwonen den, me e pacuwohi a bwo niimihinaado ten na e ha aduwo mu ha atabuhî kon, he li e tabuhî ati ni naado. ¹⁰ Ke [habwii mwo] te ati ni pihuô, me ni pwojunuun he miiden [me a bwohemwo] pie, te junihe ubwo a bwo temehinaado ten, weeng Padué, na ati he ni naado. Be lé o alihî [a bwo céiu lépwo Juif me ni béén, ne ha a puapulie ten], a Mwaitihî ¹⁹.

¹¹ Ati ninaa, ke e caa te niimihi ha atabuhî kon pie me e bo pwo. Ke e caa pacuwohi ne ko Kériso Iésu Padaame henye.

¹² ††Wogenye, ke genye mu ko Kériso, ke genye céihî ne kon. Ke é mu ko anaa, na pwo mwomwon denye, me nye âbé céii Padué, me nye mu pelen. Ke time uce piwâ genye [ke time uce mwotikenye].

¹³ Ke wonaa, ana é pii tewé pie, me geé nemwo pwo me pinekepé tewé ko a bwo mu he ni picani tong me dewé. Be é mu ko anaa [ke piubwo da a céihî tewé]. Ke o ne tewé me geé mu pele Padué, ne ha a bwo ubwo na a wâé ten ²¹!

Korénit 12.13 23 Wogeme...wogewé—Pa Juif wo Paulo, kehe time uce lépwo Juif wo lépwo Éfésó. † 2.15 Kolosé 2.14 †† 2.16 Zakari 9.10; Kolosé 1.20,22 † 2.17 Ésaie 57.19 †† 2.19 Éfésó 3.6 †† 2.20 1 Korénit 3.11 ††† Apostolo...péroféta—Omehi Éfésó 4.11. ††† 2.21 1 Korénit 3.16 † 2.22 1 Pétéru 2.5 †† Dernière phrase—ai E mulie ne ha a mwa naa wo Padué, ko a Jenen Iitihî. ††† 3.1 Filipi 1.7,13 †† 3.2 Kolosé 1.25

††† 3.3 Éfésó 1.9–10; Kolosé 1.26 †† Ni apulie ten na e caa pipégaliilé—Grek: Na lé iitihî. †† 3.6 Éfésó 2.13,16–19 ††† Céiu a bele—Grek: Céiu a éé apulie. ††† Weengaa kuti a Pwooti Wâé—ai Ko a Pwooti Wâé. ††† 3.7 Kolosé 1.25 18 3.8 1 Korénit 15.9–10 19 Be lé o alihî...a Mwaitihî—ai Lé o bo temehi anaa, é mu ko a bwo patemehi na a Pwooti Wâé te a Mwaitihî. Grek: ...É mu ko a Mwaitihî. 20 3.12 Ioane 14.6; Roma 5.2 21 Dernière phrase—Grek: Be wonaa a bwo ubwo na a wâé tewé.

Te junihe ubwo a pipwoééhe te Kériso me denye

¹⁴ É tidihi jiling he pwahamii Padué Caa [ke é pi-paunueng] ko anaa. ¹⁵ Be weeng pa Caa te ati lépwona élé jeda he miiden, ke éni pwo bwohemwo. Ke e pwo me nye tai apulie ha a bele na céiu †. ¹⁶ Te junihe ubwo a wâé ten, ke te junihe hiwon ni adéihi ten. Ke é ilehi kojaeng pie, me e bo pamwoiukewé ko a Jenen Iitihi ten, beme mang ni pwonimewé.

¹⁷ ††Wâé heme e mu he pwonimewé wo Kériso mu ko a céihi tewé! Wâé heme [geé pwohewii ni acuwo na mwoiu] ni waan, ke e bwolu ne ha a pipwoééhe ten.

¹⁸ Ke me wonaa, ke wogewé me ati ni béé apulie te Padué, ke geé temehi ehi pie, te junihe ubwo wéden a pipwoééhe te Kériso, na ati he ni bwomunen ‡. ¹⁹ Be e piwéden koja ni bwo temehinaado tenye lépwo apulie. Ke wâé heme oba gewé ko a mulihe Padué, ke me e mu kowé ati.

²⁰ E penem konye wo Padué ko a junuun na junihe ubwo. Ke jan me e pwo ce naado celi junihe ubwo ne konye koja nina nye niimihi pie me nye ilehi kojaeng.

²¹ Wogenye a Mwaiitihi ten na nye mu ko Kériso Iésu, ke wâé heme nye pipaunueng taaci dieli mwo! Amen! Wâé heme wonaa!

a mulihenye ne ha a pimu ibu tenye

(Pwahamii tii: 4—6)

4 †É mu he karépu, be é pipwoeabwé te Padaame. Ke é wâgo kowé, me [geé niimihi ati nina e pwo me dewé wo Padué, ke] me geé mulie ha a mulie na wâé ten. Be e todekewé beme geé apulie ten. ² ††Wâé heme geé te cuwo ko pwo me piwahin gewé, me bwala gewé, ke me geé uca. Wâé heme geé te cuwo ko pipwoééhewé, ke me geé picani ne kowé. ³ †††Be e neibukewé na a Jenen Iitihi. Ke wâé heme geé te cuwo ko mulie ha a péém, beme te céiu gewé.

Céiu a éénye me Kériso

⁴ Te céiu cehi a éé apulie, ke te céiu a Jenen Iitihi. Ke te céiu a cemenye na nye ucéihi, alecehe a bwo todekenye. ⁵ Te céiu cehi Padaame henye, ke te céiu cehi a céihi, ke te céiu cehi a pipuu apulip †††. ⁶ †Te céiu cehi Padué, pa Caa tenye ati ††. Weeng pana e pihuôhi

† Ke e pwo me nye tai apulie ha a bele na céiu—Grek: E ne ni ni ni pétaapwo pwomwoiu. †† 3.17 Ioane 14.23; Kolosé 1.23, 2.7

‡ Junihe ubwo wéden... Grek: Ubwo, bwali, eda ke numwihii (large, long, haut et profond.) †† 4.1 Kolosé 1.10 †† 4.2 Kolosé 3.12–13 ††† 4.3 Kolosé 3.14–15 ††† Te céiu cehi a pipuu apulip—Hemepie hiwon ni bwopwone a pipuu apulip, kehe te céiu cehi a bwopiinen, be a inenaado beme nye pii beetihi pie, wogenye lépwo apulie te Kériso. § 4.6 1 Korénit 12.6 †† Caa tenye ati—ai Caa te ati ni naado.

ati, weeng pana e pwo ati, ke e mu ati he ni naado.

⁷ ††A juuju pie wo Kériso, ke e muko ne tenye me piti-cenaado ne kon ni muko pétaapwo âpati. ⁸ ††Be caa te tii ne he ni *tii iitihi pie:

E taa ha a duaan na e daaité.

Ke e pé da céin nina lé téétieng,

na e piwéden kojale.

Ke e ne te ni apulie ten ni âpati. Psaume 68.19

⁹ ††A bwopiinen pie woté ana e pii pie: *E taa ha a duaan na e daaité? A bwopiinen pie, ânebuhe a bwo taa ten, ke e mi ole ha a duaan na te junihe ole bwolu ne ha a pule †† wo Kériso.* ¹⁰ Wo pana e ole, ke weeng kuti pana e taa ha a duaan na e daaité ne he miiden, beme Padaame he ati ni naado na e tabuhi wo Padué, ke me e tidilé ati †† [beme hején jélé].

¹¹ †††[A bwopiinen pie woté ana e pii pie: *E ne te ni apulie ten ni âpati?*] Wo Kériso, ke e muko pétaapwo pipatihi ne ko ni apulie ten ni penem na me lé pwo †††. [Weengi ni béén]:

Lépwo *apostolo (lépwona lé caa alieng, ke lé pipatemehi a pwooti ten);

Lépwo péroféta (lépwona lé hegi ha a jenen ni pwooti te Padué, ke lé bwo pébé céiikenye);

Lépwo *évangéliste* (lépwona lé pipatemehi ngen a Pwooti Wâé);

Lépwona lé pwoiipihi me pacémuni ni acéihi.

¹² E ne telé ni âpati naa, beme lé o bo uce pamwoiu ati ni apulie te Padué, ke me lé pipwoeabwé telé mwo. Ke me wonaa, ke o piubwo da a puapulie ten, a éé Kériso.

¹³ †††Ke o wogenye ibu, ke o céiu ace céihi tenye ne ko pa *Naî Padué, ke ace bwo temehieng denye. Ke genye o tai cumang, pwohewii Kériso, ke o tai piwiekenye me weeng ¹⁸.

Wâé heme nye cumang ne ko Kériso

¹⁴ Me wonaa, ke o caa time genye uce pwohewii ni cuwo nahi ewa [ne ha a céihi. Be time lé uce ju téele cumang ne ni béén mu konye. Lé] pwohewii a ong na tice eaong kon, na e te ju titééhi pwo ni jié na a dan. Be lé te junihe tabemi ni pwooti te ni apulie na lé gele, na lé âbé picéidekenye, beme lé pipatiedenikenye.

¹⁵ ¹⁹ ††Uhu, genye nemwo wonaa. Wâé heme nye te mulie ha a juuju me a pipwoééhe ²⁰. Ke genye o â pwohewii Kériso, ati ne he nina nye pwo. Weeng

††† 4.7 Roma 12.3,6 †† 4.8 Psaume 68.19 ††† 4.9 Ioane 3.13 †† E mi ole... ai E ole jeoté pwo bwohemwo. Lé niimihi wo lépwo juif pie, wo lépwo amele, ke lé mu ha a pwon na tice anebwén kon, na a niin pie Oolaa. Omehi Pii Beetihi 9. †† Ke me e tidilé ati... ai Ke me piubwo ngen ni pihuô ten ne kolé ati. ††† 4.11 1 Korénit 12.28 ††† Ni penem na me lé pwo—ai Ni âpipati. ††† 4.13 Kolosé 1.28 18 Dernière phrase—Grek: Beme genye â ni apulie na ubwo genye, ko a gwomaa Kériso na hején. 19 4.15–16 Kolosé 1.18, 2.19 20 Mulie ha a juuju me a pipwoééhe—ai Pii ana juuju, ne ha a pipwoééhe.

Padaame [he a Mwaiitihi ten, na a éé apulie] ke weeng pa punin. ¹⁶ Weeng na e pihuô, me piwéihi † ati ni piduaan ne ko a één, beme céiu jélé ko ni acipetééhi kon. E pwo me lé wiinaado, ke e pamwoiulé, beme pieân-imelé telé, ke me lé muko pétaapwo penem ehi. É ko anaa na piubwo da a één, ke e cumang ne ha a pipwoééhe.

A mulihenye na mwo coho

¹⁷ ††É cuwokowé ne he nii Padaame pie, me geé nemwo mulie pwohewii lépwona time lé uce temehi Padué, lépwona tice pwonimelé. ¹⁸ Melepiing he ni bwo temehinaado telé, be mwouiu ni punilé [ke time uce nimelé me lé piténede Padué]. Ke é nelang he na tieden koyalé *a ju mulip na e ne wo Padué. ¹⁹ Time lé uce temehi pineitééhi aceli wâé me aceli ta. Ke lé pinelé te a mulie hauli, ke me lé pwo ni muko huô na mwiihi na time uce tanim jélé kon.

²⁰ Time uce wonaa a mulihenye céi Kériso na geé caa picaa. ²¹ Be geé caa téne ali pwooti ko Kériso li pacemunihi tewé, ke geé temehi pie e kon a juuju. Be wogewé ni apulie ten.

²² †É mu ko anaa, na geé nemwo mulie ha a mulie na ta, li geé mulie hen ânebun. Geé necu ati ni huô me ni bwopemikewé na mwiihi.

Be é ânebun, ke geé âcehi nina nimewé kon na lé pwo me geé mele. ²³ ††Geé taatééhi ni pwonimewé, me ni bwo niimihinaado tewé, me ni bwopemikewé, ²⁴ †††beme wogewé ni apulie na mwo coho ni mulihewé. Ke geé o pwohewii nina lé céi ni epwénéle na tooli, ke lé cuwohe ni epwén na mwo wâé.

Be é he e nekewé wo Padué, ke nimen me geé pwohewiieng, beme geé mulie ha a juuju. Ke wâé heme ni huô tewé, ke me mwomwon ke pipaunui ††.

Nye taatééhi ni bwopemikenyé na ta

²⁵ †††Geé nemwo gele, kehe geé pii a juuju te lépwo bééwé acéihi. Be wogenye ati, ke céiu genye pwohewii ni piduaan mu ko a éé apulie na céiu.

²⁶ †Mepie geé piokéé me pace céiu, ke geé nemwo pwo celi ta.

Psaume 4.5

Kehe geé pwome necu a okéé tewé ânebuhe a bwo nuule na a téale. ²⁷ Ke geé nemwo ne te *Caatana [me e tacebwénikewé, me geé pwo nina ta].

²⁸ Hemepie wogewé lépwo abune, ke wâé heme geé cuwo! Kehe geé mwouiu me geé penem ††, [beme pwo

† Weeng na e pihuô, me piwéihi...E pwo me lé wiinaado—Grek: É mu kon (par lui)... †† 4.17 Roma 1.21; 1 Pétéru 1.14 † 4.22 Roma 8.13; Kolosé 3.9 †† 4.23 Roma 12.2 †† 4.24 Genèse 1.26; Kolosé 3.10 ††† Grek: Geé cuwohe a apulie na mwo coho na tabuhi mu ko Padué [beme geé] mwomwon ke iitihi ne ha a juuju. ††† 4.25 Zakari 8.16; Kolosé 3.8–9 † 4.26 Psaume 4.4; Cang 1.19–20 †† Geé mwouiu me geé penem—Grek: Geé penem ko ni iwé ha a juuju.

ce mwani tewé] beme geé pwocuhi celi tice tewé, ke me geé o ne te lépwona tice telé.

²⁹ †††Geé nemwo pii ni pwooti na mwiihi [ke geé nemwo pwo nina ta ne ko lépwo béén]. Kehe geé pii ni pwooti na wâé, beme bépicanu telé me pamwoiulé.

³⁰ †††Geé nemwo pwo me piwahin a Jenen Iitihi [ko nina geé pwo]. Be e caa neeng kowé wo Padué, beme [e habwii pie, wogewé, ke ni apulie ten. Ke] a béhabwii-inen pie, e bo tuwokewé ati mu he ni ta pwo tewé, ha a Tan den.

³¹ †††Geé nemwo pwotahinaado ne ko ni béén, me pipii me ta jélé. Geé nemwo cile ne he ni pwonimewé nina ta na lé pwo tewé. Geé nemwo pipééle, me piokéé. Ke geé nemwo pijeta kowé.

³² ††Wâé heme geé pwopweehi ne ko ni béén. Ke geé habwii telé a pipwoééhe na e he ni pwonimewé. Ke geé pineukewé, pwohewii ana e caa pineukewé wo Padué mu ko Kériso.

Mulie pwohewii ni ju naî Padué

5 †††Wogewé ni naî Padué, na te junihe eânimen dewé. Ke wâé heme geé pwohewiieng, ² †††ke wâé heme geé pipwoééhe ni béén. Be e pipwoééhenye wo Kériso, ke e patupwo a mulihen, ke e mele beme e *âpwalko me denye na te junihe wâé te Padué ††.

³ Geé nemwo pipule hauli, ke geé nemwo pwo ni naado na mwiihi ne ko ni ééwé. Geé nemwo hane me hiwon dewé ni naado ne éni pwo bwohemwo. Be wogewé, ke ni apulie te Padué. Ke time uce nimung me [é téne pie] lé pii ne ni apulie pie geé wonaa.

⁴ Geé nemwo pii ni pwooti na ta, ke mwiihi, na time uce wâé me geé pii. [Geé nemwo pii hauli ni naado na nye paciitihi.] Ke geé nemwo piauhi ni jepule na ta, [pwohewii lépwona tice pwonimelé]. Kehe wâé heme nina geé pii, ke me geé pipwo-olé te Padué kon.

⁵ †††Wâé heme geé temehi pie: O te tice atebwo ha a *Mwametau te Padué me Kériso te lépwona lé pipule hauli, me lépwona lé pwo ni naado na mwiihi ne ko ni éélé. Te piwien ne ko lépwona lé te cuwo ko hane ni naado ne éni pwo bwohemwo. Be, me nye wonaa, ke pwohewiin heme nye pipaunu ni *déme duéé.

Nye mulie ha a pwéélang

⁶ ¹⁸ Lé pii wo lépwo béén pie, te tice ta ko ni huô naa. Kehe icehi ana lé gele, ke geé nemwo nelé me lé pwo me geé pipatieden. Be e okéé wo Padué ne ko lépwona time lé uce piténedeeng, ke e bo tautilé me

††† 4.29 Kolosé 4.6 †† 4.30 Ésaie 63.10; Éfésó 1.13–14; 1 Tésalonik 5.19 ††† 4.31 Kolosé 3.8 †† 4.32 Mataio 6.14, 18.22–35; Kolosé 3.12–13 †† 5.1 Mataio 5.48 ††† 5.2 Exode 29.18; Ébéru 10.10 ††† Na te junihe wâé te Padué—Grek: Ke pwohewii a tabe ûde na nihe wâé. ††† 5.5 1 Korénit 6.9–10; Kolosé 3.5 ¹⁸ 5.6 Roma 1.18; Kolosé 2.4,8

pwocuhinaado telé †. ⁷ Ke geé nemwo pipwohewii †† lépwona apulie na lé wonaa!

⁸⁻⁹ ††Anebur, ke wogewé, ke geé mu ha a melepiing. Kehe é jenaar, ke geé caa mu ha a pwéélang, be geé caa mu ko Padaame. Ke wâé heme ni bwopemikewé, ke me ni bwopemi lépwona lé mu ha a pwéélang, ha a mulie na wâé, ke mwomwon, ke juuju. ¹⁰ Wâé heme geé tee hane nina wâé te Padaame.

¹¹⁻¹² Geé nemwo pipwohewii lépwona lé penem ha a melepiing, be te tice acehi ni penem delé celi wâé. Me nye te ju niimihi †† cehi ni bwopemilé, ke nye caa te mwiihilé. Geé téétihi ati ninaa, ke geé pé nge ha a pwéélang ati nina ta. ¹³⁻¹⁴ †††Be a pwéélang, ke e habwii a ju bwopwone ati ni naado, heme wâé, ai heme ta ††. Ke é mu ko anaa, na nye pii pie:

«Go ûmiê wogo pana go ko pule!
Go cuwoda mu ha awieme
ni amele!
Be e bo pwo me pwéélang kom
wo Kériso!»

Nye penem ehi he ni benaamwon na ne tenye

¹⁵ †Geé pipwocile a mulihewé. Geé pipwohewii lépwona lé pwoiipihi ni bwomu telé, kehe time uce wo lépwona tice pwonimelé. ¹⁶ Ke geé penem ehi he ni benaamwon na e mwo ko ne tewé wo Padué [beme geé pwo ana wâé]. Be piubwo ngen a ta ha a benaamwon jenaar. ¹⁷ Ke é mu ko anaa, na geé nemwo mulie hauli ††, kehe geé hane ana wâé te Padaame.

Nye mulie ha a Jenen Iitihi

¹⁸ †††Geé nemwo piolo ko a tabe megele, be koli e bo pwotahi ne kowé ††. Kehe wâé heme e te tidikewé taaci na a *Jenen Iitihi. ¹⁹ †††Ke geé pipamwoiukewé ko ni nyebi: ni *psaume*, me ni *cantique*, me ni béé nyebi na e ne tewé na a Jenen Iitihi. Ke é heme geé pwonyebi, ke geé pipaunu Padaame he ni ju pwonimewé. ²⁰ ††Wâé heme geé te cuwo ko pipwo-olé te Padué Caa ne ko ati ni naado, ne he nii Iésu Kériso, Padaame henye.

Ni pwomwo na lé céihi

²¹ ††Geé paciiti Kériso, ke geé pwo me piwahin gewé ne ko lépwo acéihi bééwé.

† Grek: Geé nemwo pwo me e pipaupaakewé wo pace céiu apulie ko ni pwooti na te tice ânen. Be te é muko ninaa kuti na a okéé te Padué, ke é mu ko lépwona lé cubwonieng. †† Pipwohewii—ai Piengen ibu. † 5.8 Ioane 12.36; Éféso 2.13; Kolosé 1.13; 1 Pétéru 2.9 †† Niimihi—Grek: Pii. †† 5.13 Ioane 3.20—21 ††† 5.14 Ésaie 26.19, 60.1; Roma 13.11 ††† Heme wâé, ai heme ta—Grek: Be, ana nye alihi ne ha a pwéélang, ke o â pwéélang. § 5.15—16 Kolosé 4.5 †† Geé nemwo mulie hauli—ai Geé nemwo pwo me tice pwonimewé. ††† 5.18 Luka 21.34 †† E bo pwotahi ne kowé—Grek: [E bo pwo me] geé mulie hauli. ††† 5.19 Kolosé 3.16 †† 5.20 Kolosé 3.17 †† 5.21 1 Pétéru 5.5

Lu aadomwin @ —Ê toomwo

²² †††Wo é toomwo, ke wâé heme e pwo me piwahin nang ne ko pa aiu hen, pwohewii a bwo pwo me piwahin nang ne ko Padaame. ²³ †††Be e pihuô é mwoden wo pa aiu, pwohewii ana wo Kériso, ke e pihuôhi a puapulie ten, a Mwaiitihi, na [e pwohewii] a één. Ke weeng pana e celuimieng.

²⁴ A Mwaiitihi ten, ke e pwo me piwahin nang ne ko Kériso, é mu ko anaa, na wâé heme é toomwo, ke me e pwo me piwahin nang ne ko pa aiu hen, na ati he ni naado.

Lu aadomwin @ —Pa aiu

²⁵ †††Mepwo é ne ko pa aiu, ke wâé heme eânimen de é mwoden, pwohewii ana eânime Kériso te a Mwaiitihi ten. Ke e pawie a mulihen [ke e mele] me den. ²⁶ †††Ke e pineeng me de Padué. Ke e puueng ko tabe, me a pwooti ¹⁹, beme paciitieng, ²⁷ †††ke me e cuwo he pwa-hamiin, ke me oba nang ko *a wâé, ke te tice nyeluhén ke tice ta kon [pwohewii é ewa toomwo na me lu piaten me weeng].

²⁸ Piwien ne ko pa aiu. Be wâé heme eânimen de é mwoden pwohewii a bwo eânimen de a één. Be wo pana eânimen de mwoden, ke te pieânimen den mwo. ²⁹ Be te tice pace apulie celi e pitéétihi mwo a één. Be e pawinaadonieng, ke e wéieng ehi, pwohewii ana e pwo wo Kériso te a Mwaiitihi ten.

³⁰ [Genye temehi anaa] be wogenye, ke genye één. ³¹ †††Caa te tii ne he ni tii iitihi pie: *E patupwo lu nyaa me caa ten wo pa aiu, beme lu pimú me é mwoden. Ke me wonaa, ke caa céiu julú.*

Genèse 2.24

³² †††A pwooti naa, ke e bwolu, be é niimihi pie, a ocine ko a bwo [pimu ibu te] Kériso me a Mwaiitihi ten.

³³ A bépanebwénihi nen, [ke é pii mwo pie]: Wo pa aiu, ke wâé heme eânimen de é mwoden, pwohewii a bwo pieânimen den. Ke wo é toomwo, ke wâé heme e paciiti pa aiu hen.

Ni ewa me lu nyaa me caa telé

6 ²³ Wogewé ni ewa, ke wâé heme geé piténéde lu nyaa me caa tewé. Weengaa ana me geé pwo, {be wogewé ni apulie te Padaame}. ² †††Be [caa te tii ne he ni tii iitihi pie]: *Go paciiti lu nyaa me caa tem.*

Exode 20.12

Anaa, ke a bécéiuhé patén de Padué na pwo *adéihi hen. Be e pii pie, e bo ne [te lépwona lé piténédehi a

††† 5.22 Kolosé 3.18; 1 Pétéru 3.1 ††† 5.23 1 Korénit 11.3; Éféso 1.22 ††† 5.25 Kolosé 3.19; 1 Pétéru 3.7 18 5.26 Tit 3.5 19 Ke e puueng ko tabe, me a pwooti—Pipuu apulip. A pwooti naa, ke wieli a Pwooti Wâé, ai ni pwooti na pii heme lé puu apulip wo lépwo acéihi, ai ni pwooti te pa apiaten ne te é mwoden. 20 5.27 2 Korénit 11.2; Kolosé 1.22 21 5.31 Mataio 19.5 22 5.32 Pii Beetihi 19.7 23 6.1 Kolosé 3.20 24 6.2—3 Exode 20.12

patén naa]: ³ *Ke o bwali, ke wâé a mulihem ne éni pwo bwohemwo.*

Exode 20.12

⁴ †Wogewé lépwo caa te ewa ††, ke geé nemwo pwo me lé okéé ne ni naîwé. Kehe wâé heme geé cilelé ehi, ke geé cihe ne kolé, ke pacémunilé. [Be weengaa ana me e pwo wo pa acéihi] ne ko Padué.

Lépwo eabwé me lépwo apihuô telé

⁵ †Wogewé lépwona geé penem tice ja kon, ke wâé heme geé piténede lépwo apihuô tewé ne éni pwo bwohemwo. Ke geé paciitilé, ke geé pipwoeabwé telé ehi he ni ju pwonimewé, pwohewii a bwo pipwoeabwé tewé te Kériso.

⁶⁻⁷ Geé penem ehi, beme lé pipwodéén kowé [ati ne he ni naado]. Ke time uce é ne he ni benaamwon cehi, na lé alikewé hen. Kehe geé niimihi pie, geé penem me de Padaame, kehe time uce ni apulie. Be wogewé, ke ni eabwé te Kériso, kehe wâé me geé pwo ana nime Padué kon, na ati he ni pwonimewé.

⁸ †Be wâé heme geé temehi pie, e bo muko pétaapwo ne ni cemenye wo Padaame, ko nina wâé na nye pwo. Piwien ne ko lépwo *apenem tice ja kon, ke é ati ne ko lépwo béén mwo †.

⁹ ††Pwohewii ne mwo kowé, wogewé lépwo apihuô. Be wâé heme geé paciiti ni apenem dewé [ke me geé pwopeehi ne kolé]. Ke geé nemwo pwohuu telé. Be céiu pa apihuô tewé ati ne he miiden, na time uce pipwoinen ne ko ni apulie.

Naamuu pa tenye

¹⁰ É panebwénihi ne ko a bwopiinen pie: Wâé heme geé mwoiu ne he a junuu Padaame na junihe ubwo. ¹¹ †††Geé pé ati ni naamuu pa na e ne tewé wo Padué, beme o jan me geé cubwonihi ni huô te *Caatana na ta.

¹² †Be time nye uce pwopa ne ko ni apulie. Kehe genye pipwopa me lépwo apihuô te ni duéé me ni iténaado [na time nye uce alilé ko ni naamiinye]. Nye pipwopa ne ko lépwo daame na pwojunuulé ha a melepiing he pipwohe a miiden me a bwohemwo, na lé pihuô ne ko a bwohemwo ce.

¹³⁻¹⁴ ††Ke é mu ko anaa [na é pii tewé pie]: Geé pé ati ni naamuu pa na e ne tewé wo Padué, beme o jan me

† 6.4 Psaume 78.4; Proverbes 22.6; Kolosé 3.21 †† Lépwo caa te ewa—ai Ni nyaa me caa te ewa. † 6.5 Kolosé 3.22–23; Tit 2.9–10; 1 Pétéru 2.18 †† 6.8 2 Korénit 5.10; Kolosé 3.24–25 †† 2e phrase—Esclave ou libre. ††† 6.9 Roma 2.11; Kolosé 4.1 ††† 6.11 Roma 13.12; 2 Korénit 10.4 § 6.12 1 Pétéru 5.8–9 †† 6.14 Ésaie 11.5, 59.17; 1 Tésalonik 5.8

geé cumang, he ni benaamwon na e tuie ne kowé a ta. Be, me nebwen a pa, ke geé o piwéden. Weengi ††† ni naamuu pa tenye:

Ni taihenanye: a juuju te Padué;

Ni epwén toki me bépwobwonihni ni bwaangenyne: a mulie na *mwomwon ne he pwahamiin;

¹⁵ ††Ni dihibwaanye: a bwo cuwo ko pipatemehi nen denye a Pwooti Wâé na e pébé a péém;

¹⁶ Ni bépedinaado^{††}: a céihi tenye ne ko Padué, na ati he ni naado. Ke nye pé téteda beme nye taunuhi ni duwele miû ko ni da na e nuô wo Caatana, pana ta nang.

¹⁷ ††Ni béwéihi ne ni puninye: a mulip na e ne tenye wo Padué, he e celuimikenye ††;

Ni teua tenye na e ne tenye na a *Jenen Iitihi: a pwooti te Padué.

¹⁸ †††Geé tee ko pwoiitihi na [ati he ni piduaan me] ati he ni benaamwon, âcehi ni pihuô na e ne tewé na a Jenen Iitihi. Ke geé tee ûmiê, ke geé te cuwo ko pwoiitihi me de ati ni apulie te Padué.

¹⁹⁻²⁰ ††††Geé pwoiitihi me dong, beme e ne tong a pwooti ten wo Padué. Be e pahedeéo, beme é pipatemehi te ati ni apulie a Pwooti Wâé na time lé uce temehi ânebun, be te e ha *aduwu. Ke weengaa a watihen na cieéo ko itihe toki ne éni he karépu. Ke anaa, na me geé pwoiitihi, beme time o uce piwâ jo me é tee cuwo ko pacihe ni apulie [ko Kériso].

Bépinelé

²¹⁻²² ¹⁸É pahede Tichike lé céikewé, beme e piuti tewé a jepule kong, ke me e pamwoiukewé. Wo panaa, ke pa ju béénye, ke pa eabwé na e te junihe piténede Padaame, he gemu pipenem ibu me weeng.

²³ Wâé heme wo Padué Caa tenye, me Padaame Iésu Kériso, ke me lu ne tewé, ati ni acéihi béému, a péém me a pipwoééhe. Ke me lu picani tewé, me geé *cumang ne ha a céihi ne kolu ¹⁹. ²⁴ É ile Padué pie, me e adéihi, ko a *pipwoééhe tice ja kon den, ati lépwona lé cumang ne ha a bwo eânimelé te Padaame Iésu Kériso.

††† Weengi... Grek: Geé pé... Piwien ne ko ati ni pétaapwo naamuu pa, ha a niide a tii 13–17. §† 6.15 Roma 10.15 §†† Bépedinaado—Bouclier. †† 6.17 Ébéru 4.12 §† A mulip na e ne tenye wo Padué, he e celuimikenye—Grek: A bwo celuimikenye. ††† 6.18 Luka 18.1; Kolosé 4.2; 1 Tésalonik 5.17 †††† 6.19 Kolosé 4.3–4; 2 Tésalonik 3.1 ††§ 6.20 2 Korénit 5.20; Filémon 1.9 18 6.21 Apostolo 20.4; Kolosé 4.7–8; 2 Timoté 4.12 19 Dernière phrase—Grek: Me a céihi.

Filipi

nge céii lépwo

Atabuhi ko a tii

Woo na e tii a tii ce?

Wo Paulo, pa apostolo. Ke e mu pelen wo Timoté.

E tii éniile?

Ha awieme a jo 60 me 62, ha a bécéiuhe bwo mu he karépu te Paulo ne Rome . Ha a benaamwon naa, ke e tii ni tii na paa: a tii ce, nge céii lépwo Filipi; ke a tii nge céii Filémon; ke ni béé tii mwo nge céii lépwo Éféso; me lépwo Kolosé.

E tii me dee?

Te lépwo acéihi ha a pwomwo ubwo Filipi me lépwo apihuô telé. E pwotii nge céiilé wo Paulo he na 12 ni jo alecehe a bwo mi pipatemehi telé a Pwooti Wâé.

É ko ade na e tii?

Te junihe eânime Paulo te lépwo Filipi (1.8), ke e tii, beme e pii a pipwoééhe ten ne kolé, ke me e ne telé a jepule kon. E pipwo-olé telé ko ni âpipati na lé ne ten (4.10–15). E pamwoiulé beme lé cumang ne he ni céihi telé, ke me lé pipenem ibu ha a pwonime na céiu (1.27). Ke e pii telé pie, me lé tee pipwodéén taaci heme lé mu ko Padaame (4.4).

Ade ace âne a tii ce?

A tii ce, ke pii kon pie, 'Tii ko pipwodéén', be e piohiwon ko tii a ne hen wo Paulo. A ju pipwodéén, ke time e uce âbé mu ko ni naado na élé pwomwo kojakenye. Kehe e âbé mu ko a péém de Padué na e mu he ni pwoni-menye, mu ko a bwo wogenye he Kériso.

Be nye alihi ne ha a mulihe Paulo pie, pana e te junihe mu he ni picani me ni téé ko Kériso. E tii mu he karépu ne Rome, kehe mwo time e uce ju temehi ce huô kon, be wieli e o mele (1.7; 2.17,23). Ke hiwon lépwona lé téé-tieng, ke cubwonieng (3.2), kehe te ju mehin ni acéihi na lé picani ten (2.20,21).

Kehe icehi ana e te pipwodéén taaci wo Paulo, ke e hegi nina e tooeng na ati he ni piduaan, ke é ati he ni benaamwon. E pii pie «Tai jan ne kong ati ninaa, é mu ko Kériso na e pamwoiuéo» (4.13).

E tii mwo pie, ana a junaado, ke a bwo temehi Iésu Kériso, Padaame henye. Ke te piticenaado ne ko ati ni béé naado koja anaa (3.8).

Wâé heme nye pipwohewii Iésu ne ha ati ni naado. E pwo me piwahin nang, ke e pineeng me e mele me denye ne ko a kuricé. Ke wâé heme nye pinekenye, ke genye muko pipwoeabwé tenye, ne ha a piwahin pwohewiieng.

A bwomune a tii Filipi

Pipwobwocu ke pipwo-olé

E piân a Pwooti Wâé

A mulihe Paulo me de Kériso

Ni pihuô te Paulo ne te lépwo Filipi

E pahede Timoté me Épafrodite

A junaado ke me nye temehi Kériso

Ni béé pihuô te Paulo ke bépinelé

Pipwobwocu

1 †Woéo †† Paulo na é pwotii, he wogemu me Timoté, be lupwo apenem de *Kériso Iésu. É pwotii lé céiikewé, wogewé lépwo apulie te Padué na geé mu Filipi, me lépwo apihuô me lépwo dikone. Wogewé lépwo apulie te Padué, be geé mu he Kériso Iésu.

2 Wâé heme e mu pelewé a *pipwoééhe tice ja kon me a péem na e âbé mu ko Padué Caa tenye, me Iésu Kériso, Padaame henye. Adéikewé!

E pwo-olé te Padué wo Paulo

3 É ati he ni benaamwon na é niimikewé hen, ke é pwo-olé te Padué kowé. 4 Be é te pipwodéén taaci, ne he ni pwopwoiitihi tong me dewé. 5 Be geé picani tong ko a bwo patemehi na a *Pwooti Wâé, tabuhi he geé mi céihi, dieli jenea.

6 †Wo Padué, ke e tabuhi a penem na te nihe wâé ne he ni pwonimewé. Ke é céihi me mwoiu pie, e bo nihe penem kowé, ke e bo panebwénihi ha ace tan celi e bo mwojuia mwobé hen wo Kériso Iésu.

7 Nihe eânimung dewé! Ke wonaa a pwonimung kowé ati, be geé te nihe picani tong ne he ni penem na e ne tong wo Padué. [Ke genye tai hegi neibuhi a *adéihi ten] jenea, he é mu he karépu; pwohewiin ânebun [he mwo time uce téele cieéo].

É ha a benaamwon naa, ke é pwopahi a Pwooti Wâé, ke é patemehi te ni apulie beme lé céihi ne kon. 8 Éa, e te temehi wo Padué pie, é pii a juuju. Be é nihe tai pipwoééhewé pwohewii a bwo pipwoééhewé te Kériso Iésu.

9 Wonaa a pwopwoiitihi tong, beme o piubwo da a pipwoééhe tewé. Wâé heme geé temehi ehi [a céihi na e mu konye]. Ke wâé heme geé temehi pineitééhi aceli wâé me aceli ta. 10 ††Ke me wonaa, ke geé o alihi temehi ana wâé me ana juuju, [beme geé mulie hen]. Ke é ha a tan na e bo mwojuia mwo hen wo Kériso, ke o te tice ta kowé celi me tautikewé kon. 11 Ke e o te nihe wâé ke hején ni acehi ni penem dewé, é mu ko ana e mulie kowé wo Iésu Kériso. Ke [wo lépwo apulie, ke lé] bo alihi *a wâé te Padué, ke lé bo pipaunueng.

E piân a Pwooti Wâé

12 Lépwo bééng acéihi, nimung me geé temehi pie, a bwo mu he karépu tong, ke [pwo a naado na wâé hen. Be] é mu ko anaa, ke e te nihe piân a Pwooti Wâé.

13-14 ††Be wo lépwo coda na lé mu ha a pomwa te pa gupéno, ke ati ni apulie éni, ke lé caa temehi pie, é mu he karépu ko a bwo penem dong ne ko Kériso. Ke hi-

† 1.1 Apostolo 16.12–40 †† Woéo—Grek: Wogemu. Wo Paulo na e pwotii, kehe icehi ana e habwii pie, céiu pwonimelu me Timoté he e mu pelen. † 1.6 1 Korénit 1.8 †† 1.10 1 Tésalonik 5.23 †† 1.13 Apostolo 28.30

won ni acéihi na e nihe pamwoiulé wo Padaame, beme time uce abwobwo jélé me lé patemehi a pwooti ten.

15-17 Be hiwon nina lé pwojepule ko Kériso mu he ni pwonimelé na wâé. Be lé temehi pie, é mu he karépu mu ko a bwo *pajuujuhi na a Pwooti Wâé. Ke lé temehi pie, [wo Padué na e] ne tong a penem ce.

Kehe pwo lépwo bééng na lé patemehi a pwooti é mu ko a pipwokon delé. Be nimelé me lé wédeniéio. Ke lé pwo me é mu he ni picani, he é mu éni.

18 É hemepie lé pwo ni penem de Kériso mu he ni ju pwonimelé, ai é heme lé te piniimilé cehi, ke te ju piti-cenaado ne kon. Be patemehi a nii Kériso mu ko nina lé pwo. Ke é pipwodéén jenea ko nina. Éa, é te cuwo ko pipwodéén.

A mulihe Paulo me de Kériso

19 ††É pipwodéén, be é temehi pie, geé pwoiitihi me dong, ke e nihe picani tong a *Jenen Iitihi te Kériso [ke e wéihi a jenung]. É mu ko anaa, na é céihi pie, o bo tuwoéo [mu he karépu].

20 Nihe nimung me [woéo pa apenem ehi te Kériso. Ke] me o time uce tanim jo [ko ni penem dong] ke me time uce piwâ jo me é habwii pie, te nihe ubwo Kériso ††, é hemepie é mulie, ai é hemepie é mele. 21 †Be é hemepie é mulie, ke é mulie me de Kériso. Ke é hemepie é mele [me de Kériso] ke nihe wâé mwo. 22-23 ††Be caa nihe nimung me é mu pele Kériso dieli mwo, be a naado na te junihe wâé wéden.

Kehe icehi ana te nihe hiwon ni bwo niimihinaado tong ††. Be é hemepie é tee mulie éni pwo bwohemwo ††, ke é o tee pwo ni penem na wâé me den. 24-25 Ke o wâé me dewé, heme é mu éni pwo bwohemwo, beme é picani tewé, beme o piubwo ngen a céihi me a pipwodéén dewé. Ke é mu ko anaa, na é céihi pie e o mwo te ne tong wo Padué, me é mwo te mu éni.

26 Wonaa, hemepie é âdé céiikewé, ke geé o pipwodéén me pipaunu Kériso Iésu, é mu ko nina e pwo me dong.

Ni pihuô te Paulo ne te ni Filipi

Geé tee cumang

27 ††Ana wâé me dewé, ke me geé mulie cehi a Pwooti Wâé te Kériso. Ke é hemepie é âdé caniêkewé, ai é hemepie time é uce âdé, ke é o bo téne pie, geé cumang ne he ni céihi tewé, ke me geé pipnem ibu ne ha a pwonime na céiu. Be geé [pwohewii lépwona

†† 1.19 2 Korénit 1.11 ††† Me é habwii pie, te nihe ubwo Kériso—Grek: Me pipaunu Kériso ne ha a ééng. § 1.21 Galat 2.20 §† 1.23 2 Korénit 5.8 §†† 1re phrase—Grek: Time é uce temehi ana é pipégali. Be piteéo ne ko lupwo piduaan. §† Éni pwo bwohemwo—Grek: Ha a éé apulie. §†† 1.27 Éfésó 4.1; 1 Tésalonik 2.12

lé] pwopa, ke wâé heme geé penem me mwoiu, beme ubwo a céihi tenye na e âbé mu ko a Pwooti Wâé †.

²⁸ Geé nemwo pwo me mwotikewé ko lépwona lé cuwodekewé. Be [é hemepie geé mwoiu] ke lé o alihi pie lé o patieden ati dieli mwo. Ke geé o temehi pie [geé piwéden, ke] e o bo celuimikewé wo Padué.

²⁹ ††Be weeng, ke e ne tewé a céihi ne ko Kériso, ke weeng mwo, ke e ne me geé mu he ni picani be wogewé lépwo apulie ten.

³⁰ Be woéo mwo, ke é te nihe mu he ni picani me den, jena na, pwohewiin ânebun, [he é mwo mu pelewé]. Be geé caa alihi a bwo pwopahi nen dong [a Pwooti Wâé]. Ke a penem naa, ke tai ni penem denye ati ‡.

Geé piténedekewé

2 E pamwoiukewé na a mulihewé ne he Kériso, ke e pwopweehi ni pwonimewé na a pipwoééhe ten. Ke a *Jenen Iitihi, ke e pinebukewé me weeng. Ke geé pipwoééhewé mu he ni ju pwonimewé. ² É mu ko anaa, ke [é cuwokowé pie] me geé piténekewé. Wâé heme céiu a pipwoééhe tewé, ke me céiu a pwonimewé, ke me céiu a bwo niimihinaado tewé. Be, me geé wonaa, ke nihe ubwo a pipwodéén dong.

³ ††Ke geé nemwo niimihi pie, te nihe pwonaado ne kowé, ke geé nemwo penem beme geé pihabwiikewé. Kehe geé pwo me piwahin gewé, ke geé pipaunu lépwo béén. ⁴ ††Geé nemwo piniimikewé cehi, kehe geé hane aceli wâé me de lépwo béén.

Geé pwohewii Iésu

⁵ Wâé heme geé pipwohewii Kériso Iésu ne he ni bwo niimihinaado tewé, me ni bwomu tewé.

⁶ ††Be te céiu julu me Padué ne ha ati ni naado. Kehe time e uce cile [a bwo ubwo nang].

⁷ ††E patupwo atebwo ten.

E patupwo ati.

Ke e pé a éé apulie, ke e penem tice ja kon.

⁸ †E pwo me piwahin nang.

E piténe de Padué die ko a bwo mele ten, a bwo mele ne ko a *kuricé [pwohewii ne ko ni cabin de ni apulie ati].

⁹ ††Kehe e pineeng da wo Padué.

Ke e ne ten a nii apulie

† Dernière phrase—Grek: Geé pwopa...me de a céihi [tenye] ne ko a Pwooti Wâé. †† 1.29 Apostolo 16.19–40 ‡ Grek: Be genye pwo a pa na céiu. Be li geé alihi pie [é pwo a pa naa]. Ke é jena na, ke geé téne mwo pie é mwo teko pwo. †† 2.3 Galat 5.26 †† 2.4 1 Korénit 10.24 †† 2.6 Ioane 1.1–2, 17.5 ††† 2.7 Ioane 1.14; 2 Ko-

na te nihe ubwo wéden.

¹⁰ †††Beme é ne he nii Iésu, ke lé tidihijililé ne he pwahamiin ati ni naado jeda he *miiden, ke éni pwo bwohemwo, die ha amu te ni amele ††.

¹¹ †††Ke ati ni pwocihe

ke lé toii da pie:

Wo Iésu Kériso, ke Padaame!

Beme a bwo pipaunu Padué Caa.

Geé ceni ha a melepiing

¹² É he é mwo mu pelewé, wogewé lépwo ju bééng, ke geé piténe de. Ke wâé heme geé te cuwo ko piténe de jena na, heme tieéo pelewé. Geé nihe paciiti Padué ††. Ke geé penem den ati ne he ni naado, ke geé pipnem ibu, beme te wâé a mulihewé †† ne kon. ¹³ Be e ko penem kowé wo Padué, ke e bo pwo me wâé tewé ana nimen kon. Ke e bo ne ce nihihéwé, me geé piténe deeng.

¹⁴ [É ne he ni mulihewé me ni penem dewé] ke geé nemwo pipééle me pihuu ne kowé, ¹⁵ †††beme o te tice celi ta pelewé, ke me o te tice celi o tautikewé kon. Ke me wogewé ni naî Padué na wâé gewé, ne ha awieme ni apulie pwo bwohemwo, na ni agele, me ni apulie na ta jélé. Be me wonaa, ke geé o pwohewii ni ceni na lé niê heme bwén, ¹⁶ he geé pé nge céiilé a pwooti ko a mulip †††.

Heme geé wonaa, ke é o nihe pipwodéén kowé ha a tan na e bo mwojuia hen wo Kériso. Be é caa te junihe pineéo me dewé, pwohewii pa atéte ne ha a pitéte. Ke é o nihe pipwodéén, heme pwo acehi ni penem dong me dewé †††. ¹⁷ Ke wieli [é o mele me dewé, ke] é o patupwo a mulihung pwohewii a *âpwailo ne te Padué. Ke genye o bo ne, pehi a âpwailo na geé ne ten mu ko ni céihi tewé ne kon. Ke hemepie wonaa, ke é bo te nihe pipwodéén ko anaa. ¹⁸ ††Éa, wâé heme genye pipwodéén ibu.

É pahede Timoté me Épafrodite

¹⁹ É niimihi pie, é hemepie wâé te Padaame Iésu, ke é pahede Timoté lé céiikewé, beme é téne ce jepule kowé, beme pamwoiuéo. ²⁰ Te icehi Timoté, na piwie

rénit 8.9 § 2.8 Ébéru 5.8, 12.2 †† 2.9 Apostolo 2.33; Ésaie 45.23; Éféso 1.20–21; Ébéru 1.3–4 ††† 2.10 Roma 14.11 †† Amu te ni amele—Grek: Haahi a bwohemwo. Be lé niimihi wo lépwo Juif pie, pwo a amu te lépwo amele ne haahi a bwohemwo. ††† 2.11 Roma 10.9 †† Geé nihe paciiti Padué—Grek: Geé pwo me mwotikewé ke éjén gewé. †† Mulihewé—Grek: A bwo celuimikewé. A bwopiinen pie, a mulihe ni acéihi na lé pimu ibu. ††† 2.15–16 Daniel 12.3; Filipi 1.10; 1 Tésalonik 2.19 ††† 1re phrase—ai Geé cumang ne he ni pwooti ko a mulip. ††† 3e & 4e phrase—Grek: Beme pipii dong ha a Tan de Kériso pie, time uce piticenaado ne ko a pitéte tong ke a penem dong. 18 2.18 Filipi 3.1, 4.4

nina e mu he ni pwonimemu. Ke te tice pace céiu celi e niimikewé, kehe te weeng cehi.

²¹ †Be wo lépwo béén, ke lé te muko hane ce wâé telé, kehe time lé uce hane ce penem celi wâé te Kériso Iésu.

²² Kehe icehi ana geé temehi pie, e nihe picani tong wo Timoté. Be gemu pwohewii lupwo âmehi, na gemu pipenem ibu ko a bwo patemehi na a Pwooti Wâé.

²³ Ke anaa kuti ana é niimihi pie, me é bo neeng lé céi-ikewé, hemepie é temehi ce huô kong ne éni. ²⁴ Ke é ne kong, ke é temehi pie, é o âdé céiikewé. Be é te nihe céihi ne ko Padaame.

Geé hegi ehi Épafrodite

²⁵ †É jena ni, ke é niimihi pie, me é ne lé mwo céi-ikewé pa céiu acéihi béénnye: wo Épafrodite, pali geé neeng bé céiié, beme e picani tong. Be gemu te nihe pipenem ibu pwohewii lupwo apwopa [he gemu pii beetihi a Pwooti Wâé]. ²⁶ Nihe nimen me e alikewé ati. Be te nihe téé a pwonimen, he [e téne pie] geé téne a bwo cunu nang.

²⁷ Te a juuju pie, nihe cunu nang ânebun, be e caa pwo me e mele. Kehe e pipwoééhen wo Padué, ke caa te wâé nang mwo. Ke heme wonaa, ke woéo mwo, be e caa celuimié koja a téé na nihe ubwo.

²⁸ Nimung me é neeng lé céiikewé, beme geé o pipwodéén, ke me caa time é o uce gia kowé.

²⁹ Geé hegieng ehi ha a pipwodéén, pwohewii a bwo hegi nen denye pa acéihi béénnye ne he nii Kériso. Be wâé heme geé paciiti ni apulie na lé pwohewiieng.

³⁰ Be e pwo me e mele, he e penem me de Kériso. Ke e wonaa, beme e picani tong, ha a benaamwon na time uce jan ne kowé me geé picani tong, wonaa mu ko a bwo pimu ité tewé.

A junaado ke me nye temehi Kériso

3 ¹⁻² É panebwénihi a bwo niimihinaado tong ce ne tewé, lépwo acéihi bééng: Wâé heme geé pipwodéén ko a bwo mu tewé me Padaame.

Pipwocile nina ta ni penem delé

Time uce piwâ jo me é pii mwo pie: Geé pipwocile lépwo na ta ni penem delé. [Geé te ûmiê ke pipwop-weekewé.] Be lé pii pie, wâé heme *pwotegoop tenye ati [wogenye na nye céihi ne ko Iésu]. Woélé lépwo wotaahen! Nimelé me tahagéi a céiu duaan mu ko a éénye. Kehe icehi ana te piticenaado ne kon.

³ †Be a ju tegoop, ke [e he ni pwonimenye. Ke] wogenye, [ke a ju bele te Padué]. Be nye penem me den ko a *Jenen Iitihi. Ke time nye uce pipii denye ko nina nye pwo ne he ni éénye, kehe genye te ju pii cehi ana e pwo wo Kériso Iésu me denye.

† 2.21 2 Timoté 4.10 †† 2.25 Filipi 4.18 † 3.3 Roma 2.29

⁴ †É hemepie pwo pace céiu celi jan me e pipii den, ke o woéo. Ke é hemepie lé niimi ne ce béén pie, nihe pwonaado ne ko ni penem delé, ke woéo ke é wédenilé. ⁵ †Be woéo, ke pa ju *Juif, pa *Isaraéla, mu ha a pwomwoiu te *Benjamin ††. Ke pwotegoop tong ne he na 8 ni tan alecehe a bwo picileéo [âcehi a bwomu teme lépwo Juif]. Ke woéo pa céiu béé lépwo *Farasaio [a céiu dihe pwoitihi teme] na geme nihe mu ko ni *patén de Moosé. Ke woéo, ke pana é te junihe pitenedehi ni patén, ⁶ ††die ko ni cuwo nahi patén †.

Ke é nihe pineéo [me de a pwoitihi tong] die ko ana é pwotahi ne ko ni acéihi ne ko Iésu. [Be é te niimihi pie, é pwo aceli nime Padué kon.]

Ticenaado ne ko ni penem dong

⁷ ††[É ha a benaamwon naa] ke te junihe junaado ne tong ninaa. Kehe é jena ni, ke é caa temehi pie, te ju piticenaado ne kon, watihen [ana e pwo] wo Kériso.

⁸⁻⁹ †††Ana junihe pwonaado ne kon, ke ana é temehi Kériso Iésu, Padaame hung. Ati ni naado, ke te piticenaado ne kon koja anaa. Ke ati ninaa, ke pwohewiin heme te ju ni cabin, ke é tai necu ati. Be é mulie ko Kériso, ke wo Padué, ke e pwo me mwomwon jo ne he pwahamiin, watihen a céihi tong ne ko Kériso. Kehe time uce é mu ko ace bwo pitenedehi nen dong ni patén.

¹⁰ ††Nimung me é te nihe temehi Kériso me a junuu [Padué] na e ne me e mulie cemwo mu ha amele. Ke é pé ce panung ko a bwo mu he ni téé me picani, ke a bwo mele ten, beme é pwohewiieng. ¹¹ Be é hemepie wonaa, ke é céihi pie [wo Padué, ke] e bo pamulipiéo mu ha amele, pwohewii Kériso.

Pitéte beme geé nihe âdé

¹²⁻¹³ †††E caa celuimié wo Kériso Iésu, beme woéo pa apulie na é hején ke wâé te Padué jo, beme mang a céihi tong. Kehe time é uce pii tewé, wogewé lépwo acéihi bééng, pie caa wâé jo, ai é caa tehene nge ko a tai ko pitéte. [Be mwo te nihe bwali a pwaaden.] Ke é te omehi cehi a pwaaden na e ânebhung, kehe time é uce niê nge alece ††. Ke é te junihe pineéo me de a naado na céiu: ¹⁴ ††É téte ati ko a nihung, beme é hegi a cemung na e todeéo ne kon ††† wo Padué, é mu ko ana e pwo wo Kériso Iésu me denye †††.

†† 3.4 2 Korénit 11.18 †† 3.5 Luka 1.59; Apostolo 23.6; 2 Korénit 11.22 ††† He pwo grek, ke e hen ni pwooti ce: Pa Ébéru na é piâbeele mu ko ni Ébéru. ††† 3.6 Apostolo 8.3 † Die ko ni cuwo nahi patén—Grek: Ke caa te tice ace céiu naado celi me pipé ne kong (irréprochable). † 3.7 Mataio 13.44,46 ††† 3.9 Roma 3.21—22 †† 3.10 Roma 6.3—5, 8.17 ††† 3.12 1 Timoté 6.12,19 †† Grek: ¹² Time uce téele wâé jo. Ke é pihane, beme é pé ace cemung, be woéo, ke e pééo wo Kériso. ¹³ Time é uce niimihi, wogewé lépwo âjiéning, pie caa mu ne tong anaa. Ke é necu ni naado na e céing, ke é téte benihi ana e ânebhung. †† 3.14 1 Korénit 9.24 ††† A cemung na e todeéo ne kon—ai A mulip na mwo coho na e

¹⁵ †Wogenye ati na genye cumang ne he ni céihi tenye, ke wâé heme wonaa ace bwo niimihinaado tenye. Ke mepie pi-ité ce bwo niimihinaado te lépwoce béén ne ko ace céiu naado, ke e bo habwii telé wo Padué a juuju ko ninaa. ¹⁶ Ke wâé heme nye piengen ibu, âcehi ni pihuô na genye caa âcehin dieli jena na ni.

Geé pipwohewiiéo

¹⁷ ††Wogewé, lépwo acéihi bééng, ke wâé heme geé pipwohewiiéo. Ke geé pipwohewii mwo lépwo na lé pipwohewiikeme.

¹⁸ [Geé pipwocile ni huô tewé.] Be é caa pii tewé ânebun pie, te nihe hiwon ni acéihi na lé â cubwonihii a *kuricé te Kériso, mu ko ni huô telé. Ke [nihe piwahin jo ko ninaa, ke] é é.

¹⁹ †Woélé, ke lé te ju pinenimelé cehi ne ko ni naado pwo bwohemwo. Ke lé pinelé ati ne ko nina nimelé kon na ta ††, ke lé pipii delé ne ko nina me tanim jélé kon. Tai ninaa, ke e o péélé nge ha a mele [ité koja Padué dieli mwo].

²⁰ ††Ke hemepwo é ne konye, ke wogenye ni apulie he miiden, é he na e tebwo lang wo Padaame Iésu Kériso. Ke genye mwo te ucéihi a bwo mwojuia cemwo ten, beme e bobé celuimikenye. ²¹ †††Ke e bo taatéhi a éénye na tice niihen, ko a junuun, beme pwohewii a één na te junihe wâé wéden. Ke é ko a junuun naa, ke e bo piwéden ati koja ni naado, ke e bo pihuô telé.

Ni béé pihuô te Paulo

4 †††Lépwo ju bééng, nihe nimung me é alikewé mwo. Be é te nihe pipwodéén kowé, be wogewé lépwo acehi ni penem dong [§]. Kehe é ilehi kojakewé pie, geé te cumang ne ko Padué.

² Wogeu, [lu ewa toomwo] wo Évodi me Sintike, é ilehi kojakeu me mwoiu pie, geu piténekeu me céiu geu ne ko Padaame.

³ ††Ke é ileko, go pa ju bééng ko penem ^{§††} pie, go picani telu. Be te junihe binyi a bwo penem deme me woilu, me piân a Pwooti Wâé; a penem na game pwo, me Klément, me lépwo béén. Ke wo Padué, ke e caa tii ni niilé, ne ha a tii ko ni apulie na lé bo hegi kojaeng *a ju mulip dieli mwo ^{§†}.

jeda. ^{§§†} É mu ko ana e pwo wo Kériso... ai He e todekenye, na e pwaadeniin bé wo Kériso Iésu. † 3.15 1 Korénit 2.6 †† 3.17 1 Korénit 4.16 † 3.19 Roma 16.18 †† Ke lé pinelé ati ne ko nina nimelé kon na ta—Grek: Ni nalé ke ni duéé helé. †† 3.20 Éfeso 2.6, 19 ††† 3.21 1 Korénit 15.28, 43–53 ††† 4.1 1 Tésalonik 2.19–20 § Wogewé lépwo acehi ni penem dong—Grek: Wogewé a kuron dong. §† 4.3 Luka 10.20 §†† Pa ju bééng ko penem—Wo Paulo, ke e pacihe pa céiu béén ko penem, kehe time e uce pii a niin. §† Tii ko ni apulie na lé bo hegi...a ju mulip dieli mwo—Grek: Tii ko a mulip. Omehi mwo Pii Beetihii 3.5.

Geé tee pipwodéén taaci

⁴ Geé te cuwo ko pipwodéén, he geé te mu ko Padaame. Éa, é te pii mwo pie, wâé heme geé tee pipwodéén!

⁵ ††Ke wâé heme bwala gewé ne ko ati ni apulie. Be e o caa mwojuia cemwo wo Padaame. ⁶ ††Geé nemwo gia ko ni naado, kehe geé pwoitihii da céii Padué, me geé ilehi kojaeng ce naado celi tieden kojakewé. Ke geé cuwo ko pwo-olé ten. ⁷ ††Ke a péém na e âbé mu ko Padué, ke e bo wéihii ni pwonimewé me ni bwo niimihinaado tewé, na e he Kériso Iésu. Ke a péém naa, ke te junihe wédenihii a bwo niimihinaado tenye, [lépwo apulie].

Geé tee mu ko ana wâé

⁸ É panebwénihii a bwo niimihinaado tong ne éni, wogewé lépwo acéihi bééng: Wâé heme geé nenimewé ne ko nini:

Nina wâé;
Nina juuju;
Nina *adéihii;
Nina hején;
Nina nye pipaciitihii;
Nina nye picedihii;
Nina e ha a pwéélang;
Nina *mwomwon ne he pwahamii Padué.

⁹ †††Ke geé pipwohewiiéo, ne ha ati nina geé picaa mu kong, ke nina geé hegi mu kong, ke nina geé téne heme é pii, ke nina geé alihi heme é pwo. Ke e bo mu pelewé wo Padué, pana e ne a péém.

E picani tenye wo Kériso

¹⁰ [É te temehi pie] te junihe ubwo a pwonimewé kong. Kehe icehi ana é dieli jena, ke time uce hiwon ni benaamwon na jan ne kowé me geé habwii a pipwoééhe tewé me dong. Ke é jena ni, ke é nihe pipwodéén ko Padaame, be e caa ne tewé a bwopwonon, beme geé picani tong [ko ni âpipati tewé].

¹¹ Time é uce pii tewé pie, tieden kojaéo ace céiu naado. Be é caa te temehi me é mulie ko nina pwo ne tong. ¹² Be é te hegi nina e te tuie ne kong, ne ha ati ni piduaan me ati he ni benaamwon. Ke é te temehi mulie, é hemepie hiwon dong, ai é hemepie te tice tong; ai é heme pwoluu jo, ai é heme menung. ¹³ †††Be tai jan ne kong ati ninaa, é mu ko Kériso na e pamwouiéo.

††† 4.5 Ébéru 10.25; Cang 5.8–9 §† 4.6 Mataio 6.25–34; Kolosé 4.2 §† 4.7 Ésaie 26.3; Ioane 14.27; Kolosé 3.15 §§† 4.9 Roma 16.20 §§† 4.13 2 Korénit 12.10

Olé tewé ko ni âpipati

¹⁴ Kehe icehi ana te nihe wâé [tong, nina geé pwo, mu he ni pipwoééhe tewé] wogewé lépwo ju bééng, lépwo Filipi. Be geé caa picani tong, he é mu he ni picani.

¹⁵ †Geé niimihi [a bwo mulie tong] he li é engen mu ha a province Macédoine, beme é pii beetihi a Pwooti Wâé [ne pelewé]. É ha a benaamwon naa, ke te tice mwo ce béé acéihi celi lé niimihi pie, me lé picani tong ko mwani: te wogewé cehi. ¹⁶ Ke é he li [é engen kojakewé, ke] é mu ha a pwomwo ubwo Tésalonik, ke geé piohiwon ko patiéo.

¹⁷ É hemepie é pii tewé ati ninaa, ke time é uce hane mwo a pipwoééhe tewé! Kehe icehi ana é te temehi pie, é hemepie geé ne, ke geé o te hegi ace cemewé ††. ¹⁸ Be ni âpipati tewé ne tong, ke pwohewii a *âpwailo te Padué na te junihe wâé.

É ne ko nina geé ne tong na e pwaadeniin bé wo Épafrodite, ke é te hegi ne ha a pipwodéén. Be tai pwo

† 4.15 2 Korénit 11.9 †† Grek: Time é uce hane ce âpipati, kehe é hane ce acehin celi ubwo me dewé.

ne tong nina nimung kon. Be caa nihe hiwon, ke caa nihe wéden.

E bo ne tewé nina tieden

¹⁹ [E bo adéikewé] wo Padué hung ko ni wâé ten na nihe hiwon. Ke e bo ne tewé ati celi tieden kojakewé, na e pwaadeniin bé wo Kériso Iésu. ²⁰ Wâé heme nye pipaunu Padué Caa, dieli mwo. Amen! Wâé heme won-aa!

Bépinelé

²¹ Geé tai pwobwocu ati te [lépwo acéihi na lé mu pelewé: wo] lépwo apulie te Padué, mu ko Kériso Iésu. Ke lé pwobwocu tewé mwo wo lépwo acéihi béénye na élé éni. ²² Ke lé pii mwo pie bwocu tewé wo lépwo acéihi na lé penem ha a pomwa te pa daame he lépwo Roma, me ati lépwo béé acéihi mwo.

²³ Wâé heme e mu kowé ati a *pipwoééhe tice ja kon de Padaame Iésu Kériso.

Adéikewé!

Kolosé

nge céii lépwo

Atabuhi ko a tii

Woo na e tii a tii ce?

Wo Paulo, pa apostolo. Ke e mu pelen wo Timoté.

E tii éniile?

Ha awieme a jo 60 me 62, ha a bécéiuhe bwo mu he karépu te Paulo ne Rome . Ha a benaamwon naa, ke e tii ni tii na paa: a tii ce, nge céii lépwo Kolosé; ke a tii nge céii Filémon; ke ni bée tii mwo nge céii lépwo Filipi; me lépwo Éféso. Hiwon ni pwooti ne ha a , na piwien me ni pwooti na e ha a .

E tii me dee?

Me de ni acéihi ne Kolosé, a pwomwo ubwo ha a province Asia (a amu Turki jenea), ha a benaamwon na lé pihuô nelang wo lépwo Roma. Wo pa céiu apulie na a niin pie Épafras, ke e pipatemehi telé a Pwooti Wâé ko Iésu he ni jo 52–55, ânebuhe a bwo mu telu ibu he karépu me Paulo.

É ko ade na e tii?

Hiwon mu ko lépwo acéihi mu Kolosé na time lé uce Juif. Ke time lé uce temehi ni patén de Padué. Pwo ni bée apulie na lé pipwohuô telé ko ni pune na gele. Be lé pii telé pie, a éénye, ke a naado na ta, kehe wâé heme nye âcehi ni patén na binyi, beme nye te junihe pipwoiipikenye. Ke lé pii mwo pie, wâé heme nye pipaunu ni âcélo. Ati ninaa, ke ni naado na gele, be ni naado na piâ ité koja a ju Pwooti Wâé ko Iésu.

Ade ace âne a tii ce?

E pipwodéén wo Paulo, be te mang a céihi te lépwo Kolosé. Ke e pamwoiulé, beme lé te mu ha a ju pune ko Kériso, kehe me time lé uce piâ ité kojan. Wâé heme nye pipaunu cehi Padué me Kériso, be woilu na lu pihuô ne ko ati ni naado ne pwo bwohemwo, ke é he miiden. Ke e pii mwo wo Paulo pie, te a céihi tenye ne ko Kériso na e o pwo me wâé te Padué genye, kehe time uce ni patén de ni apulie. A ju patén denye, ke e mu he ni pwon-imenye, ke te tice aceli me e ciekenye mwo, wogenye na nye mu he Kériso, be pwohewiin heme nye caa mele, ke mulie cemwo me weeng.

A bwomune a tii Kolosé

Pipwobwocu me ni pwopwoiitihi

Wo Kériso ke pa junaado koja ati ni naado

A penem de Paulo me de ni acéihi

Geé mu mang ko Kériso

Ni patén na gele: Nemwo pipéce ne kolé

Genye mulie ha a mulie he Kériso

Ni pwomwo na lé céihi

Bénebwéne pwooti me a bépinelé

Pipwobwocu

1¹⁻² Woéo Paulo na é pwotii lé céiikewé, wogewé lépwo apulie te Padué, ne ha a pwomwo ubwo ne Kolosé. He wogemu me Timoté, pa acéihi béénye. [Ke e pwobwocu tewé mwo.] Woéo pa *apostolo te *Kériso Iésu, âcehi ana nime Padué kon. [Be e pa-hedeéo ngen, me é pii beetihi a pwooti ten.] Ke wogewé, ke e pipégalikewé, beme ni apulie ten, me geé piténeeng, be céiu gewé me Kériso. Wâé heme e mu pelewé a *pipwoééhe tice ja kon me a péém na e âbé mu pele Padué henye. Adéikewé!

A pwopwoiitihhi te Paulo

3[†] Geme te cuwo ko pwoiitihhi me dewé, ke geme te cuwo ko pwo-olé te Padué, pa Caa te Padaame Iésu Kériso. 4 Be geme téne a jepule ko a céihi tewé ne ko Kériso Iésu, me a pwonimewé ko ati ni apulie te Padué. 5^{††} Ke geé wonaa, be geé ucéihi ne he ni céihi tewé ni *adéihi na e pipwopweehi me dewé ne he *miiden wo Padué. Ke geé caa temehi anaa, he li geé caa mi téne a *Pwooti Wâé, a pwooti na e juuju, 6 ke e ko piubwo ngen ati pwo a bwohemwo, ke e ko taatéehi a mulihe ni apulie, na ati he ni piduaan. Ke e pébé ni adéihi ne huíilé ‡. Ke e caa te wonaa ne pelewé, tabuhi ha a benaamwon na geé tabuhi téne hen, ke geé caa te mi temehi a juuju ko a pipwoééhe tice ja kon de Padué, [me denye lépwo apulie].

7^{††} Be e pé lé céiikewé a pwooti naa wo Épafras, pa bééme ko penem. Pa apipenem na e piténe Kériso, ke e penem me dewé ‡. 8 Ke e piuti teme mwo a pipwoééhe na e ne kowé na a *Jenen Iitihhi.

Geme pwoiitihhi me dewé

9^{†††} Tabuhi ha a tan na geme téne a jepule kowé, ke time uce mwaale geme ko a bwo pwoiitihhi me dewé. Ke geme ilehi koja Padué pie, me e ne tewé a bwo temehinaado na e pwaadeniin bé na a Jenen Iitihhi ten, beme geé temehi ehi ana nimen kon. 10-11^{†††} Ke me wonaa, ke geé o bo mulie pwohewii ana nime Padaame kon, ke geé bo pwo ati ce pétaapwo bwomunen celi wâé ten. Ke o bo junihe ubwo ace bwo temehi Padué tewé na te nihe ubwo nang ne ha a wâé ten. Ke e bo ne ace niihewé ko a junuun na te nihe ubwo, beme geé cumang, ke me geé te picani, ke me te pi-wâénimewé ne ha ati ni naado na e o tuie ne kowé.

12[§] Ke geé bo pwo-olé te Caa. Be e ne tewé a mwomwon beme geé hegi mu ko ni adéihi ten na e pipwop-

weehi, beme ni de lépwo apulie ten, na lé mulie ha a pwéélang.

13^{§†} Be e celuimikenye mu ha a pihuô he a mwametau te a melepiing. Ke e péékenye nge ha a Mwametau te pa Naîn, na te nihe eânimen den. 14^{§††} É mu ko pa Naîn, ke e caa tuwokenye, ke e caa pineuhi ni ta pwo tenye.

Wo Kériso ke pa junaado koja ati ni naado

15^{§†} Time uce jan me nye ali Padué.

Kehe icehi ana wo Kériso, ke pa déme Padué na nye alieng.

[Be e pwohewii Padué, na ati he ni bwomunen.]

Pa Naîn, na e ânebuhe

ati ni naado.

Ke e piwéden koja ati ni naado

na e tabuhi wo Padué^{§††}.

16[†] Ati ni naado,

ke tai tabuhi mu kon:

ati ni naado jeda he miiden,

ke éni pwo bwohemwo;

ati ni naado na nye alihi

me nina time nye uce alihi;

ati ni jenenaado me ni junuun;

ati ni apihuô, me ni daame,

ati ni mwametau

me ni mwodaame.

Weeng na e tabuhi

ati ni naado me den.

Be ana nime Padué kon,

ke wo Kériso na e pacuwohi^{§†}.

17^{§†} Caa te e lang ânebuhe ati.

Ke ati ni naado, ke âbé mu kon,

ke e te cilelé ehi.

18^{§§†} Weeng ke pa Puni a één,

[Padaame he] a Mwaiitihhi,

a puapulie ten.

Weeng na e ne a mulip^{§§†}.

Weeng pa apulie na e mi

mulie cemwo mu ha amele.

Weeng pa bécéiuhén kojálé ati.

19^{§§§} Ke wâé te Padué

me e paai pa Naîn,

ati ne he ni bwomunen.

20¹⁸ É mu ko pa Naîn,

na e ne a péém wo Padué,

ne ha awieme weeng

me ati ni apulie,

† 1.3–4 Éféso 1.15, 16 †† 1.5–6 Éféso 1.13; 1 Pétéru 1.4 ‡ 2e & 3e phrases—Grek: E ne ni acehin. †† 1.7–8 Kolosé 4.12; Filémon 1.23 †† Me dewé—ai Me dong ne pelewé. ††† 1.9 Éféso 1.16, 17 ††† 1.11 Éféso 1.19, 3.16 § 1.12 Éféso 1.11, 18

§† 1.13 Luka 22.53; Éféso 2.2 §†† 1.14 Éféso 1.7 §† 1.15 Ioane 1.18; 2 Korénit 4.4 §†† Dernière phrase—Grek: Pa cuwo ati ni naado na e tabuhi. §† Weeng na e tabuhi ati ni naado...wo Kériso na e pacuwohi—Grek: Ne ati mu kon me den. §† 1.17 Ioane 1.1, 8.58 §§† 1.18 Apostolo 26.23; Éféso 1.22–23; Pii Beetihhi 1.5 §§§ Weeng na e ne a mulip—Grek: Weeng, ke pa atabuhi kon. §§§ 1.19 Kolosé 2.9 18 1.20 Éféso 1.10, 2.16

ke ni naado ati
na élé éni pwo bwohemwo,
ke é jeda he miiden.
Wonaa mu ko a cewéhe Kériso
[he li e mele ne ko a *kuricé].

E caa ne a péém me wogewé

²¹ †[Ni pwooti naa, ke e cihe me dewé mwo.] Be é ânebun, ke geé te pimu ité koja Padué, ke li geé téé-tieng, ke geé cubwonieng ko ni bwo niimihinaado tewé, me ni huô tewé na ta. ²² ††Ke é jena, ke wo Padué, ke e caa ne a péém ne ha awiemewé me weeng. Be e â pa apulie wo pa Naîn, ke e mele [ne ko a kuricé] beme e péékewé nge he pwahamii Padué, beme geé iitihî. Ke me te tice ta kowé celi me e bo tau-tikewé kon.

²³ Wâé heme geé cumang ne he ni céihî tewé. Geé nemwo piâ ité koja a Pwooti Wâé na geé caa hegi, be weengaa a watihe a céihî tewé. É mu ko anaa, na geé ucéihî ne he ni céihî tewé ati ni adéihî te Padué ‡. A Pwooti Wâé naa, ke caa pii beetihî pitihî a bwohemwo. Ke woéo Paulo, ke pa apipenem den.

A penem de Paulo me de ni acéihî

²⁴ É ne ko woéo, ke é pipwodéén ne he ni picani me dewé. Be é ko pé a âneule mu ko ni picani te Kériso me de a één, na a Mwaiitihî ten. ²⁵ ††Be e pahedeéo wo Padué, beme pa apipenem de ati nina lé céihî ne kon, beme é pii beetihî tewé ati ni Pwooti Wâé ten: ²⁶ ††ni pwooti ko ni bwo niimihinaado ten na e caa pacuwohi beme denye. Ânebun, ke mwo te e ha *aduwo, ke mwo te tice apulie celi lé temehi. Kehe é jena ni, ke e caa patemehi tenye, wogenye a puapulie ten.

²⁷ Be nimen me nye temehi pie, te junihe ubwo ke te junihe wâé a adéihî na e pwo me denye. A naado na nihe ubwo me de ati ni puapulie, kehe time uce a de cehi lépwo *Juif. Ke weengi a ânen: E mulie konye wo Kériso! Ke é mu ko anaa, ke nye temehi pie, genye bo mu ha a bwo ubwo na a wâé ten ††.

²⁸ Ke weengaa kuti a watihen me geme patemehi Kériso te ati ni apulie. Ke geme pacihelé me pacémunilé ko ati ni bwo temehinaado na e kome. Geme wonaa, [beme geme péélé nge pele Padué] ke me lé cumang, ke me oba jélé [ko ni céihî telé] ne ko Kériso. ²⁹ †††Weengaa kuti, na é ko mwoiu ko penem ko a junuu Kériso na nihe ubwo, na e ko penem kong.

† 1.21 Roma 5.10; Éféso 2.12 †† 1.22 Éféso 2.14–16, 5.27 ‡ 3e phrase—Espérance. †† 1.25 Éféso 3.2,7–8 †† 1.26 Roma 16.25–26; Éféso 3.5,9 ††† Grek: Nimen me lé temehi a adéihî ne ko ana neduwohi, me de ni bele. Weengi: Wo Kériso, ke e mu kowé, ke weengaa a watihen me geé ucéihî a wâé ten. ††† 1.29 Éféso 3.7,20; Filipi 4.13

² Nimung me geé temehi pie, é mwoiu ko penem me dewé me lépwo acéihî na élé Laodicé, me lépwo béén mwo na time uce téele pitapitikeme. ² Be nimung me é pamwouiukewé ati, beme céiu gewé ne ha a pipwoééhe, ke me geé mwoiu ne he ni céihî tewé [ne ko nina e pwo wo Padué]. É mu ko anaa, na geé temehi ehi *a bwo niimihinaado ten me denye, ana e ha aduwo ânebun. Ke a bwo niimihinaado naa, ke wo Kériso.

³ †Ke weeng na e mu kon ati ni wâé ne ha a bwo temehinaado, me ni pitemang de Padué na te neduwohi [ke te weeng cehi na e habwii tenye].

⁴ †É ko pii tewé ninaa, beme o te tice apulie celi me lé o âdé pihaamikewé ko ce bwo cihe telé celi ju wâé heme geé téne. ⁵ ††Be é hemepie caa woéo ité kojakewé, kehe é te niimikewé †. Ke é te junihe pipwodéén he é téne pie, te ju wâé ni mulihewé, ke geé pipwoiipikewé, ke geé cumang ne he ni céihî tewé ne ko Kériso.

Geé mu mang ko Kériso

⁶ Geé caa hegi Kériso Iésu, beme Padaame hewé. Ke wâé heme geé mu mang kon, ⁷ ††[pwohewii ni acuwo] na pwo waan [ne ha a pule na wâé]. Ke me geé mu mang ne ha a céihî li geme caa pacémunikewé kon [pwohewii a mwa na bahi] ne pwo a paan na mwoiu. Ke me geé tee pwo-olé te Padué mu he ni ju pwonimewé.

⁸ Geé nemwo pwo me lé pihaamikewé wo lépwoce béén ko ce âpicaanaado celi gele. A pwooti telé [ke nihe wâé heme nye téne] kehe icehi ana te junihe pitice-naado ne kon. Be te ni bwo niimihinaado me ni bwomu te pa apulie, na e âbé mu ko ni duéé †, kehe time uce ace pwooti celi e âbé mu ko Kériso.

⁹ ††Ke é hemepie pa apulie pwohewiikenye wo Kériso, kehe icehi ana te piwielu me Padué Caa ††, na ati he ni béé bwomunen. ¹⁰ †††Ke me oba gewé ko a mulip na geé caa hegi, é mu ko anaa, na geé te mu ko Kériso. Weeng na eten ati a mwomwon, ke pwojunuun ne ko ati ni pihuô me ni duéé.

E caa ne tewé a ju mulip

¹¹ ††††Me geé âbé céii Kériso, ke pwohewiin heme *pwotegoop tewé. Kehe a tegoop naa, ke time uce pwo ne ha a éé apulie, [kehe ana e pwo ne he ni pwonimewé]. Be wo Kériso, ke e pétaabwon nina e teko pwo me nye âcehi nina ta.

§ 2.3 1 Korénit 1.24,30 † 2.4 Roma 16.18 †† 2.5 1 Korénit 5.3 † † É te niimikewé—Grek: É mu pelewé ha a jenen. †† 2.7 Éféso 3.17 † Na e âbé mu ko ni duéé... ai A bwo niimihî nen, ne ko a bwo pwo na a bwohemwo me a miiden. † 2.9 Ioane 1.14,16 †† Piwielu me Padué Caa... Grek: Wo Padué, ke e mu ati ko Kériso. †† 2.10 Éféso 1.21–22 †† 2.11 Roma 2.29

¹² †Be li caa puukewé, ke [pwohewiin heme] caa neduwokewé ibu me Kériso. Ke geé caa ûmiê mu ha amele me weeng. Be geé caa céhi ne ko a junuu Padué na e pwo me e mulie cemwo. ¹³ ††Be é ânebun, ke wogewé ni apulie mele [be time e uce mu kowé *a ju mulip] é mu ko ni ta pwo tewé. Ke é ha a benaamwon naa, ke time uce téele tahagéi taabwon nina e teko pwo me geé âcehi nina ta ‡.

Ke é jena, ke wo Padué, ke e pwo me nye pimulie ibu me Kériso. Ke e caa pineuhi ati ni ta pwo tenye. ¹⁴ ††Ke e caa ciitili ni 'kérédi' tenye [a bwopiinen pie ati ni naado na nye pwo na ta] na o bo tautikenye kon âcehi ni patén. Ke e pwo me tieden ni niihe ni naado naa, be e caa cemeite ne ko a *kuricé [he li e mele wo Kériso. ¹⁵ Be é mu ko a kuricé] ke e piwéden koja ni jenaado me lépwo daame [he a melepiing na lé cubwonieng]. Ke e cielé, ke e pwo me tice niihelé, ke e teulé ngen [ne he ni bwo tanim jélé] ne ânebuhe ni apulie ati ††.

Ni patén na ni gele

¹⁶ †††[Geé nemwo pwo me lé ne ce patén dewé ne ce apulie.] Ke geé nemwo pwo me lé tautikewé mu ko celi geé wii, ai celi geé ûdu, ai ni béé tan [na lé niimihi pie iitih] heme tebwo a wole, ai a céiu tan ne ha naadenitan. ¹⁷ †††[Lé âcehi ninaa ânebun ne ni apulie] kehe te ju ni déme nina me e bo âbé. Ke caa pacuwohi ati ninaa jena ne ko Kériso †.

¹⁸ Geé nemwo pwo me lé pacuwokewé koja a pipwodéén dewé. Be nime ni béén me nye pipaunu ni *âcélo, ke lé te nihe âcehi ni niûlé. Te junihe pwo ni bwo temehinaado telé [na lé pii pie e âbé mu ko Padué] ke lé te nihe pipii delé ne kon. Kehe icehi ana te ju ni bwo niimihinaado te pa apulie!

¹⁹ ††Ke muhi telé me lé mu ko Kériso, pa punin. Be é mu ko a punin na e pwo pweehi ati ni piduaan ne ko a één, beme céiu jélé ko ni acipetééhi kon me ni mehieng. Ke e pwo me ubwo jélé wo Padué.

E tuwokewé koja ni huô na ta

²⁰ †††Wogewé, ke geé caa mele me Kériso, ke e caa tuwokewé koja a junuu a pihuô pwo bwohemwo ††. Ke é mu ko ade na geé mwo teko mulie he ni pihuô naa? Be geé mwo teko piténe dehi ni patén [ko a pwoiitih].

† 2.12 Roma 6.4 †† 2.13 Éféso 2.1,4–5 † 2e phrase—Grek: Ke é mu ko ana, na time uce pwotegoop tewé. †† 2.14 Éféso 2.14–16; 1 Pétéru 2.24 †† Ni Roma, nina lé pihuôhi a bwohemwo ha a benaamwon naa, ke lé mu pé ati lépwo coda na lé piwéden kojale ne ko pa, ke lé habwiilé ne he pwahamii ni apulie ati ne he a bwo pitanim jélé. Weengaa a ocine ko Kériso na e piwéden ati koja ni duéé me ni pihuô na lé cubwonieng. ††† 2.16 Roma 14.1–12 ††† 2.17 Ébéru 8.5 † Dernière phrase—Grek: Ana junaado, ke wo Kériso. †† 2.19 Éféso 2.21, 4.16 ††† 2.20–21 Galat 4.3,9; 1 Timoté 4.3 †† A pihuô pwo bwohemwo—ai Ni duéé.

²¹ Be lé pii pie: «Geé nemwo pé ani, ke geé nemwo wii ani, ke geé nemwo ti ko nini!»

²²⁻²³ †††Ke ni patén naa, ke ni bépwonen ne ko ni naado na o bo tieden hemepie nye penem kon. Lé niimihi ne ni béé apulie pie, ni bwopwonen me nye mulie ne ha a mulip na wâé te Padué. Be lé pii pie, te wâé heme nye te nihe pwo me piwahin genye, ke me nye pwo me e mu he ni picani na a éénye. Ôhu! Te ju piticenaado ne kon! Be te ju ni patén na e âbé mu ko pa apulie. Kehe te tice niihelé me lé pacuwohi nina nimenye kon na lé pwo me nye pwo nina ta.

Genye mulie ha a mulie he Kériso

³ ††[Wo Padué, ke e] pwo me geé mulie cemwo mu ha amele me Iésu Kériso. Ke e mu he miiden wo Kériso *pwo a jui Padué [beme e pihuôhi ati ni naado]. É nelang, ke wâé heme geé hane ni naado na e he miiden. ² ††Ke geé ne ni pwonimewé ne ko ninaa, kehe time uce ni naado éni pwo bwohemwo.

³ Be geé caa mele ††† pwohewii Kériso. Ke a ju mulihewé, ke neduwohi ibu me Kériso ne he Padué. ⁴ Kehe me e bo pihabwiieng, ke geé bo pimu ibu me weeng †††, he geé bo mu ha a bwo ubwo nang me *a wâé ten.

Geé necu ni bwomu tewé na ta

⁵ †††Weengaa kuti a watihen me geé necu nina ta na nimewé kon, na e mwo teko mu kowé ¹⁸. Geé nemwo niimihi pie me geé pipule hauli me ce béén, ke geé nemwo pwo ni naado na ta ne ko ni ééwé. Ke geé necu ni bwo niimihinaado na tanim genye kon. Ke geé nemwo hane me pihiwon dewé ni naado ne éni pwo bwohemwo, be, me geé ne ni pwonimewé ko ni naado naa, ke pwohewiin heme geé pipaunu ni duéé hauli.

⁶ Ke wo Padué, ke e okéé ne ko lépwona lé wonaa ni bwomu telé ¹⁹ [ke e bo tautilé, ke e bo ne telé a cuhinaado ko ninaa].

⁷ Ânebun, ke geé wonaa, he geé mwo mulie he ni bwomunen na ta. ⁸ ²⁰Kehe é jena, ke [é pii tewé pie] geé necu ninaa! Geé necu mwo a okéé, ke ni piéi. Geé nemwo pwotahinaado ne ko lépwo béén, ke geé nemwo piciheta ne kolé. Geé nemwo pii ni pwooti na ta, na time uce wâé me genye pii. ⁹ ²¹Ke geé nemwo geti ni acéhi bééwé.

††† 2.22 Mataio 15.9 †† 3.1 Maréko 12.36, 16.19; Éféso 1.20 †† 3.2 Mataio 6.33 ††† Geé caa mele—A bwopiinen pie: Caa nebwen ni mulihewé ânebun, na e âcehi nina te nimewé kon na ta. ††† Geé bo pimu ibu me weeng—Grek: Geé bo pihabwiikewé. ††† 3.5–6 Roma 6.6,11; Éféso 4.19, 5.3–6 18 Nina ta na nimewé kon... Grek: Ni naado mu ko a bwohemwo. 19 Lépwona lé wonaa... Ni béé tii iitih he pwo grek, ke lé pii pie Lépwona lé cubwonieng. 20 3.8 Éféso 4.25–29, 5.4 21 3.9 Éféso 4.22,25

Geé caa céi a epwén na alili

[Ati ninaa, ke pwohewii a epwén na alili, na] geé caa céi. [Be geé caa necu] a bwo mulie tewé ânebun, me ni bwomu tewé na ta. ¹⁰ †Ke geé caa cuwohe [a céiu epwén] na mwo wâé.

Ke e tee penem kowé wo Padué, pana e nekewé, beme geé te pipwohewiieng, ke me geé temehieng ehi. ¹¹ ††[Ke a mulie na mwo coho na e ne tewé] ke caa te tice celi pi-ité koja lépwo Juif, me lépwona time uce lépwo Juif: lépwona *tegoop jélé, me lépwona time uce tegoop jélé. Ke caa te tice penebé ‡, me ce kepune. Ke caa te tice lépwona lé 'pitemang', me lépwo 'apulie bwolihí' ††. Ke caa te tice celi pi-ité koja lépwo *apenem tice ja kon, me ati lépwo béén. Kehe ana junaado, ke wo Kériso, ke te weeng cehi. Ke tai e konye ati.

¹² ††E pipwoééhewé wo Padué, ke e pipégalikewé beme wogewé a puapulie ten na iitihi. Ke wâé heme geé pipwoééhe, ke me geé te cuwo ko pwo nina wâé ne ko ni apulie. Ke wâé heme bwala gewé, ke me geé pwo me piwahin gewé, ke me geé cumang ne ha a piuca. ¹³ †††[Geé mu ehi me lépwo acéihi bééwé, ke] geé picani ne kolé. Ke geé pineulé heme lé pwo ce naado celi time uce wâé tewé. Be e caa pineukewé wo Padaame!

¹⁴ †††Ana junaado, ke a pipwoééhe. Be anaa kuti a tai na e pineibukenye, ke e ciekenye, beme te céiu genye na ati he ni naado.

¹⁵ †E todekewé wo Padué, beme geé pwohewii a éé apulie na te céiu, ke me e mu kowé a péém na e âbé mu pele Kériso. Ke wâé heme a péém naa, ke me e pé ati ni pwonimewé [me ni bwo niimihinaado tewé]. Ke me geé tee pwo-olé ten. ¹⁶ ††Wâé heme e mulie ne kowé ni pwooti te Kériso me ati ni *adéihi na e pébé céiikewé.

Geé pipacémunikewé, ke geé pipamwoiukewé ko ni bwo temehinaado [na e ne tewé]. Ke geé pwo-olé te Padué mu he ni ju pwonimewé. Ke geé pwoonyebi ko ni *psaume*, me ni *cantique*, me ni nyebi na e ne tewé na a *Jenen Iitihi.

¹⁷ †††Ati nina geé pwo, me nina geé pii, ke me geé pwo ne he nii Padaame Iésu Kériso. Ke [ati ne he ni naado] ke geé pwo-olé te Padué Caa, mu ko nina e pwo wo Kériso me dewé ††.

Ni pwomwo na lé céihi

¹⁸ †††Wogewé ni toomwo, geé pwo me piwahin gewé ne ko ni aiu hewé. Be te wonaa [ne ko êna e céihi] ne ko Padaame.

† 3.10 Éfésó 4.24 †† 3.11 Galat 3.28 ‡ Penebé—Lépwo coho. †† Lépwona 'apulie bwolihí'—ai Lépwona te tice pitemang delé: primifts. †† 3.12 1 Pétéru 2.9 ††† 3.13 Éfésó 4.2,32 ††† 3.14 Roma 13.8—10 § 3.15 1 Korénit 12.27; Éfésó 4.4; Filipi 4.7 † 3.16 Éfésó 5.19 ††† 3.17 1 Korénit 10.31; Éfésó 5.20 †† Mu ko nina e pwo wo Kériso... ai É ne he nii Kériso. ††† 3.18 Éfésó 5.22

¹⁹ ††Wogewé lépwo aiu, ke geé pipwoééhe ni pétaapwo mwodewé [ne ha a péém] ke geé nemwo pwohuu telé.

²⁰ ††Wogewé ni ewa, ke geé piténede ni nyaa me caa tewé ne ko ati ni naado. Be wâé te Padaame ni bwomunen na wonaa.

²¹ †††Wogewé lépwo caa te ewa, geé nemwo tee pwohuu te ni naîwé. Be koli geé bo pipatupwolé.

Lépwo apenem me ni caa telé

²²⁻²³ †††Wogewé lépwo apenem tice ja kon, ke geé piténede ni caa tewé na ati he ni naado ne éni pwo bwohemwo, mu he ni ju pwonimewé. Ke geé penem ehi he ni benaamwon na lé wéa kowé hen, ai heme tielé pelewé. Be time geé uce penem beme e piwâékewé wo pace céiu apulie, be geé penem me de Padaame. Be weeng ke pa apihuô tewé na me geé paciitieng, ²⁴ ke te weeng na me geé penem den. Be geé temehi pie, e bo ne tewé a cemewé ko ni penem dewé, na e pwopweehi me de a puapulie ten.

²⁵ †††Kehe wo pana e pwo ana ta, ke e bo hegi a cuhinaado ten. Be wo Padué, ke time e uce pipwoinen ne ko ni apulie.

4 ¹⁸Wogewé lépwo caa te lépwo *apenem tice ja kon, ke wâé heme geé pwopweehi ne kolé. Ke geé nemwo pineuhi pie, wogewé mwo, ke te pwo pa apihuô tewé na e jeda he miiden.

Bénebwéne pwooti

² ¹⁹Geé te cuwo ko pwoiitihi. Ke geé ûmiê ne ko ni pwopwoiitihi tewé, ke geé te cuwo ko pwo-olé te Padué. ³ ²⁰Ke geé pwoiitihi mwo me deme, beme e bo ne teme ace bwopwonen me game pii beetihi a pwooti ten. A pwooti ko *a bwo niimihinaado ten na e ha aduwo, [ke caa pacuwohi jena ne] ko Kériso. [Geé pwoiitihi me dong mwo] be é ko mu éni he karépu, mu ko a bwo patemehi nen dong a pwooti naa. ⁴ Ke geé pwoiitihi, beme o pwaale ne telé ni pwooti na é pii. Be weengaa a penem na e ne tong.

⁵ ²¹Ke geé engen ha a pitemang ne pele lépwona time uce lépwo acéihi, ke geé penem ehi he ni benaamwon na e mwo ko ne tewé wo Padué. ⁶ ²²Geé pacihelé ehi, beme o nimelé me lé te tabemikewé ²³. Ke wâé heme geé temehi me geé hegi ehi ne te ni apulie ni naado na lé tahimwokewé kon.

§† 3.19 Éfésó 5.25 †† 3.20 Éfésó 6.1 ††† 3.21 Éfésó 6.4 ††† 3.22 Éfésó 6.5–8 ††† 3.25 Roma 2.11 18 4.1 Éfésó 6.9 19 4.2 Éfésó 6.18; Filipi 4.6 20 4.3 Roma 15.30; Éfésó 6.19 21 4.5 Éfésó 5.15–16 22 4.6 Éfésó 4.29; 1 Pétéru 3.15 23 1re phrase—Wo Paulo, ke e pwo-ocine he pwo grek, be e pii pie, a bwo cihe tenye na wâé, ke pwohewii a wiinaado na pwo jíé ne hen, ke wâé a nemen.

Adéikewé

⁷⁻⁹ † † † É pahede Tichike, pa bééng ko penem, me e âdé céiikewé, woilu me Onésime, pana e âbé mu pelewé. Lupwo ju béénye, ke lupwo eabwé na lu te junihe piténede Padaame. É pahedelu lé céiikewé, beme lu piuti tewé a jepule kong, ke me lu pamwouiukewé.

¹⁰⁻¹¹ † † Lé ne lé a bwocu tewé mwo wo Maréko † †, pa béé Barnabas; me Iésu † † na pii kon pie Justus, me Aris-tarke, na gemu tai mu he karépu.

Hiwon ni Juif na lé caa céihi ne ko Kériso, kehe te icehi lépwonaa mu kolé na lé picani tong. Ke lé pamwouiúo ne he ni penem ko a *Mwametau te Padué.

Mepwo é ne ko Maréko, ke wieli e bo âdé céiikewé. Ke hemepie wonaa, ke wâé heme geé hegieng ehi, pwohewii ana geme pii tewé ânebun.

¹² † † † Ke e ne mwo a bwocu tewé wo Épafras, pana e âbé mu pelewé, pa eabwé te Kériso Iésu. Be e te pwopa me dewé ne he ni pwopwoiitihi. Ke e te cuwo ko ilehi koja Padué pie, me geé cumang ne he ni céihi

† 4.7–8 Éféso 6.21–22 † † 4.9 Filémon 1.10–12 † 4.10 Apostolo 12.12, 13.13, 15.37–39 † † Maréko—A céiu niin mwo, ke Ioane, ai Ioane-Maréko. Omehi Apostolo 12.12. Wo panaa, ke weeng pa apwo Tii te Maréko. Omehi mwo 2 Timoté 4.11; Filémon 1.24; 1 Pétéru 5.13. † † Iésu—Time uce wo Padaame Iésu Kériso. Hiwon lépwu apulie na niilé pie Iésu ne pele lépwu Juif, pwohewii lupwo nii apulie na Bwaé me Hié ne pelenye. † † † 4.12–14 Kolosé 1.7; 2 Timoté 4.10–11; Filémon 1.23–24

tewé, ke me geé temehi ni naado na nime Padué kon, ke me geé piténedeeng. ¹³ É *pajuujihi pie, e te junihe mwoiu ko penem me dewé, ke é ne mwo ko ni acéihi na lé mu he lupwo pwomwo ubwo Laodicé, ke é Iérapolis.

¹⁴ Ke lu ne a bwocu tewé mwo wo Luka, pa dotéén na te junihe eânimung den, me Démas.

¹⁵ Geé pii te ati ni acéihi béénye ne ha a pwomwo ubwo Laodicé pie geme pwobwocu telé. Ke me bwocu mwo te Nimfa, me ni acéihi na lé mu pitapitilé ne pelen.

¹⁶ Ke mepie geé caa pine ati a tii ce ne pelewé, ke geé ne te ni acéihi ne Laodicé, beme lé pine mwo. Ke geé pine mwo a tii tong na lé bo ne lé céiikewé.

¹⁷ † † † Ke geé paniimihi te Arkipe pie, wâé heme e panebwénihi ehi a penem na e ne ten wo Padaame.

Bépinelé

¹⁸ § Woéo Paulo, ke é pé a bépwortii beme é panebwénihi a tii ce. Ke geé nemwo pineuhi pie, mwo teko woéo éni he karépu.

Ke me e mu kowé a *pipwoééhe tice ja kon de Padué!

Adéikewé!

† † † 4.17 Filémon 1.2 § 4.18 1 Korénit 16.21

1 Tésalonik

nge céii lépwo

Atabuhi ko a tii

Woo na e tii a tii ce?

Wo Paulo, pa apostolo. Lu mu pelen wo Timoté me Silas.

E tii éniile?

Ha awieme a jo 49 me 52, ha a béalohe bwo engen de Paulo, he lé mu ha a pwomwo ubwo Korénit me Timoté me Silas. (Omehi 18.1 me 18.5.)

E tii me dee?

Me de ni acéihi ne Tésalonik, a pwomwo ubwo ha amu Grèce, a céiu duaan ko a province Macédoine, ha a be-naamwon na lé pihuô nelang wo lépwo Roma. E pipatemehi nelang a Pwooti Wâé wo Paulo he na cié ni naadenitan, ânebuhe a bwo cela ten ko lépwona lé cubwonieng . Kehe icehi ana hiwon lépwona lé céihi mu ko a pwooti ten, ke e tii a tii ce, wieli céiu jo alecehen, beme e pamwoiuihi ni céihi telé na mwo coho.

É ko ade na e tii?

É he e tabuhi a puco te ni acéihi ne Tésalonik wo Paulo, ke time uce wâé te ni béé Juif a pwooti na e pipatemehi, ke lé pawieeng mu ha a pwomwo ubwo. (Omehi 17.1–9.) E tii me de lépwo acéihi na élé lang, beme e pamwoiulé ke pacémunilé.

Ade ace âne a tii ce?

E pipwodéén wo Paulo ko ati ni naado na wâé, ne ha a mulihe ni acéihi. Ke e pamwoiulé, beme lé piwéden koja ni gia me tacebwén. Ke e pacémunilé ko a bwo mulie telé, me lé ucéihi a bwo mwojuia mwobé te Padaame Iésu. Be wo lépwo béén mu kolé, ke caa tabuhi pinekepé ne telé ko aceli e o tuie ne ko lépwo acéihi na lé mele ânebuhe a bwo mwojuia mwobé te Iésu. Ke é mu ko ana lé céihi pie caa e mwonu a bwo mwojuia mwobé te Padaame, ke wo lépwo béén mwo, ke lé niimihi pie, wâé heme lé mulie hauli, ke me lé pwoemaan.

A bwomune a tii 1 Tésalonik

Pipwobwocu

A mulie na wâé ne pele lépwo Tésalonik

A penem de Paulo ne Tésalonik

A mulie na wâé te Padué

A bwo mwojuia cemwo te Padaame

Bénebwéne pwooti ke a bépinelé

Pipwobwocu

1 †Woéo †† Paulo na é pwotii, he wogeme me Silas ‡ me Timoté.É pwotii lé céiikewé, ni acéihi ne ha a

pwomwo ubwo Tésalonik, na geé mu ko Padué Caa tenye, me Padaame Iésu *Kériso.

Wâé heme e mu kowé a *pipwoééhe tice ja kon, me a péém. Adéikewé!

† 1.1 Apostolo 17.1–9 †† Woéo—Grek: Wogeme. Wo Paulo na e pwotii, kehe icehi ana e habwii pie céiu pwonimelé me Timoté me

Silas he lu mu pelen. ‡ Silas—A niin, ke Silvain he pwo latin Silas he pwo grek. Omehi Apostolo 17.1.

A mulie na wâé @ ne pele lópwo Tésalonik

²³†Geme te cuwo ko pipwo-olé te Padué Caa, heme geme pwoiitihi me dewé. Geme pipwo-olé ten ko ati ni penem na geé pwo, ne ha a céihi me a pipwoééhe tewé. Ke geme pipwo-olé ten mwo ko a bwo cumang dewé, be geé ucéihi ne he ni céihi tewé [a bwo mwoujuia mwobé te] Padaame Iésu Kériso. ⁴ Lópwo bééme ne ko Kériso, geme te temehi pie, e pipwoééhewé wo Padué, ke e pipégalikewé, beme geé apulie ten.

Geé pipwohewiikeme

⁵†He li geme pii beetihi tewé a *Pwooti Wâé te Iésu, ke time geme uce ju pii tewé ko pwocihe cehi; kehe geme pipatemehi tewé ko a junuu a *Jenen Iitihi. Geme céihi pie, a pwooti teme, ke a juuju. Ke geé temehi ehi a muliheme ne pelewé, me a bwo picani teme tewé. ⁶‡Ke wogewé, ke geé âcehi a bwo mulie teme me a bwo mulie te Padaame. Be geé caa hegi a pwooti, ne he ni tacebwén na ubwo. Kehe icehi ana a Jenen Iitihi, ke e ne tewé a pipwodéén na te junihe ubwo. ⁷ Ke geé caa béhabwiinen de ni acéihi, ati ne he lupwo province Macédoine, me Akai †.

⁸ Be a pwooti te Padaame, na e engen mu pelewé, ke genye téne a één pitihia Macédoine, me a Akai [pwohewii a tikekele]. Ke ati ni apulie lang, ke lé temehi pie, geé céihi ne ko Padué.

Te tice pwooti celi jan me geme pii. ⁹ Be, me lé pwojepule kome, ke lé te piuti mwo a bwo hegakeme tewé, ne pelewé. Ke lé pii pie, geé caa bitekewé nge céii Padué. Ke geé necu ni *dème duéé, beme geé pipaunu, me piténede Padué na e mulip, ke juuju.

¹⁰ Ke lé piuti ngen pie, geé *ucéihi ne ha a céihi, pa Naïn Iésu Kériso, na e bo mwoujuia mwobé, mu he *miiden. Be e caa mulie cemwo mu ha amele, ke e celuimikenye mu ha a kuhinaado ko ni ta: a kuhinaado na e bo ne te ni apulie wo Padué, ne ha a okéé ten.

A penem de Paulo ne Tésalonik

2 Geé te temehi, wogewé mwo ni bééme acéihi, pie a bwo mu teme pelewé, ke time uce piticenaado ne kon. ² †† He li geme mu Filipi, ke geme mu he ni picani, ke lé téétikeme, ke lé pijeta kome, me pwohewii ana geé temehi. Kehe icehi ana wo Padué, ke e pamwoiukeme, beme geme patemehi tewé a Pwooti Wâé ten, ne ha awieme ni tacebwén.

³ Be ana geme cihe kon, ke time e uce cuwo pwo a gele, ai é ne pwo ni naado na time uce wâé, ai é ne ha a pipwohuô. ⁴ ††† Kehe wo Padué, ke e niimihi pie wâé heme e ne teme a Pwooti Wâé, me geme cihe, time

† 1.3 1 Korénit 13.13; Kolosé 1.4–6 †† 1.5 1 Korénit 2.4–5 † 1.6 Apostolo 17.5–9 †† Akai—Ha amu Grèce jenea. †† 2.2 Apostolo 16.19–24, 17.1–9 ††† 2.4 Galat 1.10

uce a bwopwonen beme lé piwâékeme wo lópwo apulie, kehe me de Padué na e alihi bwoluhii ni pwonimeme.

⁵ Geé te temehi pie, time geme mu uce téele cihe me geme pihaami ni apulie. Ana nimeme kon, ke time uce aceli me geme pé ce mwani kon. Wo Padué, ke e te alihi ni pwonimeme. ⁶ Ke time geme uce hane *a wâé na e âbé mu ko ni apulie, ai é mu kowé, ai é mu ko ce béén.

⁷ Kehe wogeme lópwo *apostolo te Kériso, hemepie nimeme, ke geme o huôhi ne huiiwé. Kehe é he li geme mu pelewé, ke te ju bwala geme, pwohewii é nyaa te ewa na e cile ehi ni naïn. ⁸ É mu ko a bwo wâé geme ne kowé, geme caa piwâam beme geme ne tewé, time uce a Pwooti Wâé cehi te Padué, kehe ni muliheme mwo. Be te junihe ubwo a pwonimeme kowé. ⁹ ††† Wogewé ni bééme, geé teko piniimihi ni bwo penem deme, ke ni bwo mwaale geme. Geme penem bwén ke pwang, beme te tice celi gia gewé kon. Ke wonaa a bwo patemehi nen dewé a Pwooti Wâé te Padué.

A bwopemikeme ne pelewé ke wâé

¹⁰ Wogewé lópwo *apajuujihi nen, ke wo Padué mwo, pie a bwopemikeme ne pelewé, wogewé lópwo acéihi, ke mwomwon, ke juuju, ke te tice celi me tau-tikeme kon. ¹¹ †† Geé te temehi mwo pie, muko pétaapwo wogewé, ke geme pwohewii pa caa te ewa ne ko ni naïn me dewé. ¹² Geme ne tewé ni pune, beme be pamwoiukewé. Geme wâgo kowé me geé mulie pwohewii ana nime Padué kon, weeng Pana e todekewé me geé taa ha a Mwametau ten, beme geé mu pelen ne ha a bwo ubwo na a wâé ten.

Geé caa hegi ehi a pwooti te Padué

¹³ ††† Geme te pipwo-olé te Padué, be li geé hegi a pwooti ten he li geme patemehi, time uce pwohewii a pwooti te ni apulie, kehe a pwooti te Padué na e penem kowé, wogewé na geé céihi.

¹⁴ ††† Be wogewé ni bééme, geé pipwohewii ni acéihi †† ne ko Padué ne *Judé, na élé he Kériso Iésu. Be wogewé mwo, ke geé mu he ni picani mu ko lópwo bééwé mu ha amu tewé, pwohewii ni acéihi na lé mu he ni picani mu ko lópwo âjiénelé juif, ¹⁵ ††† na lé pwo me e mele wo Padaame Iésu, me lópwo *péroféta. Ke lé pwotahinaado ne kome, ke lé tééti ni apulie!

Ke wo Padué, ke muhi ten kolé. ¹⁶ Nimelé me lé pwo me time geme cihe te lópwona time uce lópwo *Juif ko a pwooti na me e celuimilé. Ke lé bwo nihe pwo kuti ni-

††† 2.9 Apostolo 20.34 § 2.11–12 Apostolo 20.31 †† 2.13 2 Tésalonik 2.13 ††† 2.14 Apostolo 17.5 †† Ni acéihi—Grek: Églises. ††† 2.15 Apostolo 9.23,29, 13.45,50, 14.2,5,19

na ta. É mu ko anaa, ke wo Padué, ke e bo tautilé, ke e bo pwocuhinaado telé †.

Nimung me é alikewé mwo

¹⁷ Mepwo é ne kome, wogewé lépwo bééme, alecehe a bwo pipiiden denye lépwo apulie ha a céiu benaam-won ††, ke time nye uce pialikenye, kehe te wogewé he ni pwonimeme! Ke game hane me game alikewé mwo, be game te junihe niimikewé. ¹⁸ Ke nimeme mwo me game âdé die pelewé, te woéo Paulo, pa bécéiuhen; kehe wo *Caatana, ke e pwo me time game uce âdé. ¹⁹⁻²⁰ †Nihe wâé teme gewé, ke game pipwodéén kowé. Ke é mu kowé na game ucéihi a tan na e bo mwojuia mwobé wo Padaame henye Iésu Kériso. Be, é ha a tan naa, ke o wogewé na géé o cememe, pwohewii ana ne te lépwona lé piwéden.

Geme pahede Timoté lé céiikewé

³ †Caa time game uce ucéihi, game niimihi pie wâé heme gemu te pimu cehi éni Atène, ² ††ke gemu ††† ne lé pa béému Timoté, pa eabwé te Padué, ke pa béému ko penem, ko a bwo patemehi na a Pwooti Wâé te Iésu Kériso, beme e paûmiêhi, ke pamwoiukewé ne he ni céihi tewé, ³ †††beme te tice paceli me pihauli nang ne he ni tacebwén jenaar.

Be géé te temehi pie é lang he na nime Padué me nye â die lang. ⁴ É he game mwo mu pelewé, ke game pii tewé ânebun pie, genye bo mu he ce picani celi ubwo; ke anaa, ke e caa tehenebé, géé teko temehi.

E pii me wâé gewé

⁵ É mu ko anaa, ke é caa ne lé Timoté, be time uce nimung me é tee uca, kehe nimung me é alihi ace bwo engen dewé ne ha a céihi. Be mwotiéo pie pa atacebwénikenye, ke e caa tacebwénikewé, ke wieli game penem me te ju piticenaado ne kon.

⁶ †Kehe wo Timoté, ke e mwo ju tehenebé mu pelewé, ke e ne teme ni jepule wâé mu ko a céihi tewé, ke a pwonimewé ne ko Padué. E pii teme pie, géé teko pipaniimikeme, ke nimewé me géé alikeme mwo, pwohewii ne kome mwo. ⁷⁻⁸ ††É mu ko anaa, ke wogewé ni bééme, é ne ha awieme ni tacebwén, me ni picani, ke te junihe pamwoiukeme a céihi tewé, be géé teko cumang ne he Padaame. ⁹ Ade ace bépipwo-olé celi me game ne te Padué, é ne kowé, mu ko a bwo piwâénimeme kowé ne ânebuhe Padué? ¹⁰ Bwén ke pwang, game ileeng ne he ni ju pwonimeme, beme e

† Dernière phrase—Grek: Kehe icehi ana o caa mu kolé a pwo-okéé. †† Lu engen mu Tésalonik wo Paulo me Silas, beme lu cela ko lépwona lé cubwonilu. Omehi Apostolo 17.10. † 2.19 Filipi 2.15–16, 4.1; 2 Tésalonik 1.4 †† 3.1 Apostolo 17.15 †† 3.2 Apostolo 16.1–3 ††† Gemu—Paulo me Silas. ††† 3.3 2 Timoté 3.12 § 3.6 Apostolo 18.5 §† 3.7 2 Tésalonik 1.4

ne teme beme game alikewé mwo, ke me game ne behi nina tieden he ni céihi tewé, beme jéhin.

É pwoitihi me dewé

¹¹ †††Ke me weeng Padué Caa tenye, ke Padaame henye Iésu Kériso, ke me lu tehi ace pwaaden die pelewé! ¹² Ke wo Padaame, ke me e pwo me ubwo a bwo eânimen dewé me de ni bééwé, ke me de mwo ati ni apulie, pwohewii a bwo eânimeme tewé. ¹³ Ke me e pwo me mang ni pwonimewé, ke me te tice celi me pipé ne kon, é ne ha a bwo pipaciitikewé, ne ânebuhe Padué Caa tenye, heme e bo âbé wo Padaame henye Iésu me ati ni apulie iitihi ten.

A mulie na wâé te Padué

⁴ Lépwo bééng ne he Kériso, game panebwénihi [ne ha a bwo niimihi nen ce]: Game caa pacémunikewé ko a mulie na wâé te Padué, ke géé caa mulie hen. Ke é jenaar ni, ke game cuwokowé, ne he nii Padaame Iésu, pie, me géé pwo celi piwéden. ² Be géé caa te temehi li pihuô li game caa ne tewé, ne he niin. ³ ††Wo Padué, ke nimen me géé mulie ne ha a mulie na wâé ten, ha ati ni bwomunen.

Ke géé nemwo pule imi ni apulie hauli.

⁴ ††Go wéihi ehi a éém ††, beme go iitihi, ke me wâé go, ne he pwahamii Padué.

⁵ Go nemwo pwo me céiko nina te nimem kon na ta, pwohewii lépwona time lé uce temehi Padué.

⁶ Go nemwo pipwohuô te pa acéihi béém, ke me go pule imi é mwoden ††.

Wo Padué, ke e pwocuhinaado te lépwona lé wonaa, pwohewii a bwopiinen na game caa mi pii tewé. ⁷ †††Be time e uce todekenye, beme nye mulie hauli. Kehe e todekenye beme nye mulie me den. ⁸ †††Ke wo pana e tahi taabwon a pwooti naa, ke time e uce tahi taabwon ni pihuô te ni apulie, kehe e tahi taabwoni Padué, Pana e ne tewé a *Jenen Iitihi ten.

Pwo me piubwo da a bwo pieânimewé tewé

⁹ †††Mepwo é ne ko a bwo pieânimewé tewé, ke te tice aceli me é pii tewé ne kon. Be géé caa te temehi, mu ko Padué, a bwo eânime ni bééwé ne ko Kériso. ¹⁰ Ke [game temehi pie] te junihe ubwo a bwo eânimewé te lépwo acéihi na ati ha a Macédoine. Ke game pii tewé pie, wâé heme géé junihe pwo celi piwéden.

¹¹ ¹⁸Geé hane me géé mulie ha a péém me ni béén. Ke géé nemwo pwo me ânenimewé ko ce bwomu te pace céiu. Kehe géé penem ehi, pwohewii a bwo ilehi

††† 3.11 2 Tésalonik 2.16 §† 4.3 1 Tésalonik 5.23; 1 Pétéru 1.16 §†† 4.4–5 1 Korénit 6.13 §† Go wéihi ehi a éém—ai Go wéi me paciiti é mwodem. §† Pipwohuô...me go pule imi é mwoden—ai Pipwohuô ne he ni âicu tem. §†† 4.7 1 Pétéru 1.15–16 §§† 4.8 Lu-ka 10.16; 2 Korénit 1.22 §§§ 4.9 Ioane 13.34 18 4.11 Éfésó 4.28

nen deme kojakewé.¹² Ke me wonaa, ke wo lépwona time uce lépwo acéihi, ke lé paunuhi a bwo mulie tewé. Be o time geé uce wiinaado téte nge he ni pwomwo †.

A bwo mwojuia cemwo te Padaame

Lé o bo mulie mwo ne ni amele

¹³ Lépwo bééng ne he Kériso, nimeme me geé teme-hi ana e o tuie ne ko lépwo a[céihi na lé caa] mele. Be me o time uce piwahin gewé, pwohewii lépwona time uce lépwo acéihi. ¹⁴ ††Be genye céihi pie, e mele wo Ié-su, ke e mulie cemwo mu ha amele. Ke é nelang he na geme temehi pie, é heme e mele wo pa acéihi ne kon, ke wo Padué, ke e pwo me e mulie cemwo ‡, mu ko Ié-su.

¹⁵ ††Éa, weengi a pwooti te Padaame na geme pii tewé: É ha a tan na e bo mwojuia mwobé wo Padaame, ke ni apulie ten na lé caa mele, ke [lé o bo mulie cemwo mu ha amele, ke lé o tooeng. Ke] o time lé o uce ucéikenye lépwona nye mwo mulie. ¹⁶ É ha a tan naa, ke genye bo téne ce pwowiikau celi ubwo: a pati pa daame he ni *âcélo, me a éé a tutu te Padué. Ke wo Padaame, ke e bo opé, mu he miiden. Ke wo lépwona lé céihi ne kon na lé caa mele, ke lé mi cuwo-da mu ha amele.

¹⁷ Ke é alecehen, ke wogenye lépwona nye mwo mulie, ke o tai céikenye da ibu me woélé, da he ni nii, da céii Padaame, ke o pitapitikenye me weeng. Ke genye o bo pimu ibu me Padaame dieli mwo. ¹⁸ Geé pi-pamwoiukewé ko a pwooti naa!

Patéeti lépwo apulie

5 Time geme uce tii ace benaamwon, ke ace tan celi e bo tuie hen wo Padaame. ² ††Be geé caa te temehi ehi pie, e mwojuia mwobé, pwohewii pa abune heme e âbé he bwén. [Be time lé o uce ucéieng wo lépwo apulie.] ³ †††Be lé o niimihi pie, lé caa mulie ha a péém, ke o wâé ne kolé ati. Kehe icehi ana o patéetilé a tan naa, pwohewii a bwo cunu ê toomwo na e piâbeele ewa. Ke o time uce jan me lé cela.

⁴ Ke mepwo é ne kowé, ni acéihi bééng ne ko Kériso, ke time geé uce mulie ne ha a melepiing. Ke time geé o uce téetihii a tan naa, na e tuie pwohewii pa abune. ⁵ †††Be wogewé ni apulie ha a pwéélang, be wogewé ni apenem heme pwang. Kehe time genye uce mu ha a melepiing.

Genye tee ûmiê

⁶ Genye nemwo pule pwohewii lépwo béén, kehe genye tee ûmiê, ke nye wéa, ke pipwocilekenye. ⁷ Be a bwén, ke a de lépwona lé pule, me lépwona lé piolo. ⁸ †[É pii mwo pie]: Wogenye, ke lépwo apulie ha a pwéélang. Ke genye wéa, ke pipwocilekenye. Genye pé a céihi, me a bwo pieânime beme epwén ko pa. Genye pé me boonye a bwo mwomwohi nen pie caa celuimikenye.

⁹ Wo Padué, ke time e uce todekenye me e pwocuhinaado tenye, kehe me e celuimikenye, na e pwaadeni-in bé wo Padaame henye, Iésu Kériso. ¹⁰ ††Be wo Iésu, ke e caa mele me denye, beme genye o pimulie ibu me weeng, [hemepie genye caa mele, ai hemepie nye mwo te mulie; ke] mepie genye teko pule, ai é hemepie nye teko ûmiê; ha ace tan celi e o bo mwojuia mwobé hen. ¹¹ É mulang, he na wâé heme geé te cuwo ko picani tewé, me pipamwoiukewé, pwohewii ana geé caa teko pwo.

Bénebwéne pwooti

¹² Lépwo bééme ne he Kériso, geme ilekewé pie, me geé pipaunu lépwo apihuô tewé ne ha a céihi na e nelé wo Padaame me lé pwopune tewé, ke pacému-nikewé. ¹³ Geé paciitilé, ke geé pipwoééhelé ne ko nina lé pwo ati ne kowé. Ke geé mulie ha a péém me lépwo bééwé.

¹⁴ †††Geé cihe me mwoiu ne ko ni apwoemaan ††, ke geé pamwoiu nina piwâ jélé [me lé penem de Padué] ke geé picani te nina tice niihelé, ke geé picani ne kolé ati.

¹⁵ †††Geé pipwocile, geé nemwo pwotacu ko a ta, ko ana ta. Kehe geé hane me geé te cuwo ko pipwo tewé nina wâé. Ke geé wonaa mwo te ati ni apulie.

¹⁶ ††Geé te cuwo ko pipwodéén, ¹⁷ geé te cuwo ko pwoiitihii, ¹⁸ †††ke geé te cuwo ko pipwo-olé te Padué, heme wâé ai, é heme ta ne kowé. Be weengaa kuti, ana nimen me geé pwo, wogewé nina caa céiu gewé me Kériso Iésu.

¹⁹ †††Geé nemwo pacuwohi a *Jenen Iitihii heme e penem. ²⁰ Ke geé nemwo pwo me piticenaado ne ko ni pwooti na lé pébé wo lépwo péroféta ne he nii Padué. ²¹ †††Geé omehi ati me pineitééhi nina wâé koja nina ta. Ke geé cile cehi nina wâé, ²² ke geé â ité koja nina ta.

Bépinelé

²³ ††††Geme ilehi koja Padué, Pana e ne a péém, pie, me e pwo me geé iitihii, ke me geé mulie me den cehi.

† 2e phrase—ai Beme te tice ace céiu naado celi tieden kojakewé. †† 4.14 Roma 14.9; 1 Korénit 15.3–4,12 ‡ E pwo me e mulie cemwo—Grek: E pééeng bé. †† 4.15–16 1 Korénit 15.51–52 †† 5.2 Mataio 24.42–43; 2 Pétéru 3.10; Pii Beetihii 3.3 ††† 5.3 Mataio 24.39; Luka 21.34–35 ††† 5.5 Roma 13.12

§ 5.8 Ésaie 59.17; Éféso 6.14,17 †† 5.10 Roma 14.8–9; 1 Tésalonik 4.14 ††† 5.14 2 Tésalonik 3.6,11 †† Lépwo apwoemaan—ai Lépwona time lé uce pipwoiipilé. ††† 5.15 Roma 12.17; 1 Pétéru 3.9 †† 5.16 Filipi 4.4 †† 5.18 Éféso 5.20 ††† 5.19 Éféso 4.30 ††† 5.21–22 1 Ioane 4.1 ††† 5.23 2 Tésalonik 3.3

Ke me e wéihi dieli mwo ati ni mulihewé: ni jenewé, me ni pwonimewé, me ni bwo niimihinaado tewé, me ni ééwé. Ke, é ha ace tan celi e o mwojuia mwobé hen wo Padaame henye Iésu Kériso, ke o te tice ta kowé celi me tautikewé kon. ²⁴ Be wo Padué na e caa todekewé, ke e caa te cuwo pwo ana e pii, ke e bo te tai pacuwohi ati ninaa.

²⁵ †Ke géé pwoiitihí me deme mwo, wogewé lépwo bééme ne he Kériso.

²⁶ Geé pipwobwocu mu he ni ju pwonimewé te ati ni béénye acéihí ne ko Kériso.

²⁷ Ke é ilehi kojakewé, ne he nii Padaame pie, me géé bo pine a tii ce, te ati ni acéihí.

²⁸ Wâé heme e mu pelewé a *pipwoééhe tice ja kon de Padaame henye Iésu Kériso!

Adéikewé!

† 5.25 Kolosé 4.3; 2 Tésalonik 3.1

2 Tésalonik

nge céii lépwo

Atabuhi ko a tii

Woo na e tii a tii ce?

Wo Paulo, pa apostolo, he lé mu ha a pwomwo ubwo Korénit me Timoté me Silas.

E tii éniile?

Ha awieme a jo 49 me 52, ni béé wole alecehe a bécéiuhe tii ten ne te lépwo Tésalonik.

E tii me dee?

Te ni acéihi ne Tésalonik. Omehi Atabuhi ko a tii .

É ko ade na e tii?

É alecehe a bwo tii na a bécéiuhe tii nge céii lépwo Tésalonik, ke e téne wo Paulo pie, teko piubwo ngen a céihi me a pipwoééhe telé (1.3). Ke e pipwodéén, ke e tii beme e pamwoiulé.

Ke e tii mwo, beme e pacémunilé mwo ko a bwo mwojuia cemwo te Padaame Iésu, ke a mulie na wâé ha a be-naamwon na nye ucéieng. Be hiwon lépwona mu kolé, na time lé uce temehi ehi ni pune na e ha a bécéiuhe tii ten, ke lé niimihi pie, caa tuie ni bénebwéne tan, mu ko ana piubwo ngen a bwo pwotahinaado telé. Be wo lépwo béén, ke lé pii pie, wieli e caa mwojuia cemwo wo Iésu (2.1–2). Ke wo lépwo béén, ke lé necu ni penem (3.6–13). Ke e te pwome tii a tii ce wo Paulo, beme e paténelé ke pacuwolé.

Ade ace âne a tii ce?

E pii ehi wo Paulo ana e o tuie ânebuhe a bwo mwojuia cemwo te Padaame, be mwo time e uce téele tuie. Hiwon ni apulie na lé o cubwoni Padué. Ke e bo pihabwieng wo pa apulie na te junihe ta nang, na pii kon pie pa (2.3). E bo â tebwo ha a mwaiitih te Padué, me pipatemehi pie, weeng Padué (2.4). Ke e bo pwo ni inenaado na pwojunuun, na lé téetih ne ni apulie. Ke o hiwon lépwona e o pahaulilé (2.9–10). Ke e bo pwotahi ne ko ni apulie te Padué.

Kehe icehi ana e pamwoiukenyé wo Paulo, beme nye cumang ne he ni céihi tenye. Genye nemwo pwome céihi ne ko lépwona lé pébé ni jepule na ité ko a bwo mwojuia cemwo te Padaame (2.1–3). Wâé heme nye mu ko a pwooti te Padué na nye hegi (2.15). Genye nemwo pwoemaan. Wâé heme nye mulie ha a mulie na pwoiipih ke wâé te Padué, die ha a pwonehin (1.12).

A bwomune a tii 2 Tésalonik

Pipwobwocu me pwopwoiitih

Ânebuhe a bwo mwojuia mwobé te Padaame

Bénebwéne pwooti ke bépinelé

Pipwobwocu

1 Woéo † Paulo na é pwotii, he wogeme me Silas me Timoté. É pwotii lé céiikewé, ni acéihi ne Tésa-

† Woéo—Grek: Wogeme. Wo Paulo na e pwotii, kehe icehi ana e habwii pie te céiu pwonimelé me Timoté me Silas he lu mu pelen.

lonik; na wogewé ko Padué Caa tenye, ke wo Padaame Iésu *Kériso.

² ††Ke me lu ne tewé a *pipwoééhe tice ja kon, ke a péém wo Padué Caa, ke wo Padaame Iésu Kériso.

†† 1.2 Roma 1.7

Pamwoiuihi ne he ni tacebwén

³ Lépwó bééme, geme te pipwo-olé te Padué é mu kowé, be a céihi tewé, ke piubwo ngen, ke a pwonimewé ko ni béén, ke e teko piubwo ngen. ⁴ †Ke anaa, na geme pipii dewé te ni béé acéihi ne ko Padué, wonaa mu ko a bwo cumang dewé, ke a céihi tewé, é ne ha ati ni tacebwén ke ni picani na géé mu hen.

E bo tauti ni apulie wo Padué

⁵ Ni téé me ni picani, ke e habwii pie wo Padué, ke e tauti ne ha a mwomwon, be me wonaa, ke me jan ne kowé me géé taa ha a *Mwametau te Padué. Ke é mu kon, na géé ko mu he ni picani. ⁶ ††Wo Padué, ke e bo pwo nina mwomwon, beme e ne a picani ne te lépwona lé pwo me géé mu he ni picani. ⁷ †Ke me e ne tewé, wogewé na géé mu he ni picani, a mwaale me wogeme, hemepie Padaame Iésu, ke me e pihabwieng ne jeda he *miiden me ni *ácélo na pwojunuulé, ⁸ †ne ha awieme a duwele miû, beme e pwocuhinaado te nina muhi telé ko Padué; ke nina time lé uce ténedehi a pwooti te Padaame Iésu. ⁹ ††A cuhinaado telé, ke o te ju patiedenilé, ke lé o mu ité koja a junuu *a wâé te Padué dieli mwo.

¹⁰ ††É hemepie e bo âbé a tan na e âbé hen wo Iésu, ke ni apulie ten, ke lé bo pipaunueng, ke lé o bo picedieng nina lé céihi. Géé bo mu pelelé, be géé céihi ne ko nina geme pii tewé.

E pwoiitihî me delé wo Paulo

¹¹ ††É mu ko anaa, na geme tee pwoiitihî me dewé, beme e picani tewé, beme géé mulie ne ha a mulip na wâé ten. Be e todekewé [me géé mulie me den cehi]. Ke geme ileeng me e picani tewé ko a junuun, beme géé panebwénihi ati nina wâé na nimewé me géé pwo, mu ko a céihi tewé. ¹² Ke me wonaa, ke o paunuhi a nii Iésu, Padaame henye, mu kowé. Ke wogewé mwo, ke o pipaunukewé me weeng, mu ko a pipwoééhe tice ja kon de Padué henye, me Padaame henye Iésu Kérîso.

Ânebuhe a bwo mwojuia mwobé te Padaame

2 Lépwó acéihi bééme, [nimeme me geme pacémunikewé] ko a bwo mwojuia mwobé te Padaame henye Iésu Kérîso, me a bwo pineibukenye ten, beme nye mu me weeng. ² Géé nemwo pwo me hauli ni pwonimewé, ke mwotikewé, heme lé pii ne ni béén pie, e caa mwojuia mwo [§], be a jepule gele. Ke wieli lé o pii pie, te a *Jenen Iitihî na e te habwii telé anaa ^{§†}, ai lé o pii pie, wogeme na geme pii, ke tii ne

† 1.4.2 Korénit 7.4; 1 Tésalonik 2.19†† 1.6 Roma 12.19‡ 1.7 1 Tésalonik 3.13†† 1.8 Ésaie 66.15‡‡ 1.9 Ésaie 2.10††† 1.10 Kolosé 3.4††† 1.11 Kolosé 1.9; 1 Tésalonik 1.2–3§ E caa mwojuia mwo—Grek: Caa tuie ali tan de Padaame. §† Te a Jenen Iitihî, na e

telé anaa. ³ ††Ûhu! Géé nemwo pwo me lé pipwohuô tewé!

E bo tehenebé wo pa Acubwoni Padué

Time e o uce ju téele tuie a tan naa, ânebuhe a bwo tuie ne [ni béé naado. Be e o mwo mi cuwo] a be-naamwon, na lé o pwobwoni Padué ne ni apulie na te junihe hiwon jélé. Ke e bo te â tuiebeele wo pana pii kon pie pa Acubwoni Padué ^{§†}. Ke wo panaa, ke wo Padué, ke e bo pwo me e patieden.

⁴ ††E bo pihoonihi ati ni naado na iitihî, me ati nina lé pipaunuhi me paciitihî ne ni apulie. Ke e bo pipaunueng mwo, me pii mwo pie, e eda koja ati ni naado. E bo â taa tebwo ha a *mwaiitihî te Padué, me pipate-mehi pie weeng Padué! ⁵ É caa pii tewé ati ninaa, ha ali benaamwon li é mwo mu pelewé. Ai, kona géé caa pineuhi anaa?

⁶ Wo pa Acubwoni Padué, ke time o uce jan me pihabwieng, ânebuhe a tan den. Be pwo ana e pacuwoeng dieli ha a tan naa. Ke géé caa te temehi ehi anaa. ⁷ A juuju pie, e caa teko penem éni pwo bwohemwo, a *pipwojunuun na e pwobwoni Padué. Kehe icehi ana é dieli jena, ke te wogenye cehi ni naî Padué na nye ali temehieng. Kehe me e céieng mwo wo pana e pacuwoeng, ⁸ †ke wo pa Acubwoni Padué, ke e bo te â tuiebeele. [Weengi ana e o tuie ne kon ha anebwén kon]:

E bo tuie wo Padaame Iésu,
ha *a wâé ten.

Ke e bo pwo me e mele

[wo pana e cubwonieng]

heme e cuueng ko a pwon.

Ke e bo pwo me tieeng dieli mwo

ko a bwo tuiebé na a wâé ten!

⁹ ††[Kehe icehi ana é ânebuhe anaa, ke] wo pa Acubwoni Padué, ke e bo pwo ni inenaado na hiwon ko a junuu *Caatana: ni naado na lé o téetihî ne ni apulie, ke e o pipwohuô telé kon. ¹⁰ Ke o hiwon mwo ni naado na ta na e bo pwo, beme e pigeti ni apulie. Wo lépwonaa, ke o tielé dieli mwo, be muhi telé ko a juuju na me e celuililé.

¹¹ Te wo Padué na [e ne me wonaa, ke] e ne a pipwojunuun na ta, me e pipwohuô telé. Ke lé o céihi ne ko a gele. ¹² Ke e bo tautilé, ke e bo pwocuhinaado telé, ko ana tee nimelé me lé pwo ana ta, kojan me lé céihi ne ko a juuju.

te habwii telé anaa—Grek: É mu ko a Jenen. A bwopiinen pie, ana e alihi (vision), ai Ni pwooti ne he nii Padué (prophétie). §†† 2.3 1 Timoté 4.1; 1 Ioane 2.18, 4.3 §† Pa Acubwoni Padué—Pa daame he lépwona lé cubwoni Padué, ke â pwo ni patén den. §†† 2.4 Ézékiel 28.2; Daniel 11.36 §† 2.8 Ésaie 11.4; Pii Beetihî 19.15 §† 2.9 Pii Beetihî 13.11–13

Bénebwéne pwooti

¹³ †Lépwo acéihi bééme, te junihe eânime Padaame tewé, ke wâé heme geme te cuwo ko pwo-olé ten kowé! Be e caa te mi pipégalikewé ha atabuhi kon ††, beme e celuimikewé. Ke e wonaa ko a Jenen Iitihi ten, ke e pwo me wogewé ni apulie iitihi te Padué, ke é mu ko a bwo céihi tewé ne ko a juuju. ¹⁴ Ke e todekewé, he li geme pipatemehi tewé a *Pwooti Wâé, beme geé mu ha a bwo ubwo na a wâé te Padaame henye, Iésu Kériso. ¹⁵ Ke wonaa, wogewé ni bééme, wâé heme geé te cumang [ne he ni céihi tewé]. Ke geé cumang ne ko ni pwooti na geme ne tewé ko patime, ai nina geme tii me dewé.

¹⁶ Wo Padué Caa tenye, ke te junihe eânimen denye. Ke é mu ko a *pipwoééhe tice ja kon den, ke e o te cuwo ko pamwoiukenyé dieli mwo. Ke e caa ne tenye a céihi na ubwo, ha a benaamwon na nye mwo ucéihi ati ni wâé, na me e bo ne tenye. Ke geme ilelu me Padaame Iésu Kériso, ¹⁷ me lu pamwoiukewé, beme time o uce piwâ gewé, me geé te cuwo ko pwo ke pii nina wâé!

Geé pwoitihi me deme

3 Ke wogewé ni bééme, ke geé pwoitihi me deme, geé ilehi pie me a pwooti te Padaame, ke me epin ko ân, ke me lé pipaunuhi pwohewii ne pelewé. ² Geé pwoitihi mwo, beme e wéikeme koja lépwona ta ni pwonimelé. Be hiwon nina time lé uce céihi ne ko Padué.

³ Kehe wo Padaame, ke e te mu ha a bwo mu ten, ke e bo pwo me pwo niihewé, ke e bo wéikewé ne ko *Caatana, pana ta nang. ⁴ †Geme céihi ne ko Padué ne ha a bwomu tewé, be geé pwo nina geme pii tewé, ke geé bo tee pwo mwo ce béén.

⁵ Ke me wo Padaame, ke me e pwo me ni pwonimewé, ke me eânimewé te Padué, ke geé bo *ucéihi ne ha a céihi na e âbé mu Kériso.

Geé penem pwohewiikeme!

⁶ †Geme ilekewé, ni bééme, ne he nii Padaame Iésu Kériso pie, me geé mu ité koja lépwo acéihi béénye na

† 2.13 Éfeso 1.4; 2 Tésalonik 1.3 †† Ai, Ha atabuhi kon—ai Ni bécéiuhén. † 3.4 2 Korénit 7.16; Galat 5.10 †† 3.6 Roma 16.17

lé pwoemaan, ke time lé uce âcehi ni cémun na lé hegi mu kome. ⁷ ††Wogewé, ke geé te temehi a bwopwonen me geé pipwohewiikeme, be time geme uce pipwohauhi ne pelewé. ⁸ ††Ke time geme uce ju wiinaado heme tice cuhin pele pace céiu apulie; kehe geme penem, ke binyi ke mwaale geme, bwén ke pwang, beme time geme uce ne mwo huîiwé ace âneule.

⁹ ††Time uce a bwopiinen pie tice mwomwon deme, kehe nimeme me geme habwii tewé a bwomunen na me geé pipwohewiin. ¹⁰ É he geme mwo mu pelewé, ke geme pii tewé pie: Hemepie wo pace céiu, ke me te muhi ten me e penem, ke wâé heme time e uce wiinaado!

¹¹ †Geme téne pie pwo lépwoce béén mu hadeniwé celi lé mulie ne ha a pihauhi: Time lé uce penem, kehe lé gaale he nina e piehadenii ni béén. ¹² ††Ke ni apulie naa, ke geme pihuôlé, ke geme pamwoiulé ko Padaame Iésu Kériso, pie me lé penem ehi, beme lé wiinaado.

Geé tee pwo ana wâé

¹³ ††Kehe é ne ko wogewé lépwo bééme ne he Iésu, geé nemwo pwo me emaan gewé, me geé pwo ana wâé. ¹⁴ Hemepie pwo paceli time e uce piténedehi ana geme pii ne ha a tii ce, ke geé nemwo âcén ne he nina e pwo ††, beme tanim nang. ¹⁵ ††Geé nemwo pééeng me pwohewii paceli e téétikenye, kehe geé paciheeng pwohewii pa acéihi.

Bépinelé

¹⁶ Ke me wo Padaame he a péém, ke me e ne tewé a péém ati he ni benaamwon! Ke wo Padaame, ke me e mu pelewé ati!

¹⁷ Woéo Paulo, na é pé ali bépwtii, beme é panebwénihii ali tii. Be é te wonaa, ko ati ni tii tong, beme é habwii pie te woéo na é tii.

¹⁸ Ke me e mu pelewé ati a *pipwoééhe tice ja kon de Padaame Iésu Kériso.

Adéikewé!

†† 3.7 Filipi 3.17 ††† 3.8 1 Tésalonik 2.9 ††† 3.9 1 Korénit 9.4; 1 Tésalonik 1.6 § 3.11 1 Timoté 5.13 §† 3.12 1 Tésalonik 4.11 §†† 3.13 Galat 6.9 §† Geé nemwo âcén... Grek: Geé nemwo pabéélé. §†† 3.15 1 Tésalonik 5.14

1 Timoté

nge céii

Atabuhi ko a tii

Woo na e tii a tii ce?

Wo Paulo, pa apostolo.

E tii éniile?

Ha awieme a jo 62 me 66, alecehe a bwo tabuhi mu he karépu te Paulo ne Rome, ana tii ne ha a pwahamii tii 28. Wieli bwo é alecehen na e bo engen pitihi ni béé amu (wieli é die ha amu Espagne) beme e pipatemehi mwo a Pwooti Wâé. Wieli e tii mu Macédoine a tii ce. Ke é alecehen, ke lé imwieng mwo wo lépwo Roma, ke lé taunueng.

E tii me dee?

Te Timoté. Wo pa caa ten, ke pa Grek; ke wo nyaa ten, ke ê toomwo Juif, êna e céihi ne ko Iésu Kériso. E too Timoté wo Paulo ha a béalohe bwo engen den, he e mu Listre, ha a jo 49. Ke wo Timoté, ke e caa â acémun den . É alecehen, ke wo Paulo, ke e pahedeeng nge Tésalonik, ke é Korénit , ke é nge Éféso, beme e pwoiipi ni acéihi lang .

É ko ade na e tii?

E téne wo Paulo pie, wo lépwo béén, ke lé ko pacémuni ni acéihi ne Éféso ko ni naado na gele. Ke e tii nge céii Timoté, beme e bo pwopune te lépwo acéihi me lépwo apihuô telé.

Ade ace âne a tii ce?

Weengi ni béé pune na e ne te Timoté wo Paulo, ne ha a tii ce:

- Go cumang ne ha a bwo engen dem, âcehi a Tii Iitihi.
- Go mwoiu ne ha a penem dem ko a Pwooti Wâé.
- Go pii te lépwo acéihi pie, wâé heme lé te cuwo ko pwoiitihi ibu.
- Go pwoiipi ni acéihi.
- Go pipégali lépwoce awéihi nen.

A bwomune a tii 1 Timoté

Pipwobwocu

Pipwocile ni apwopune na lé gele

A pwooti ko a bwo pwoiitihi

Ni bwomu tenye heme nye pwoiitihi ibu

Lépwo apihuô me lépwo dikone

A pihuô te Paulo ne te Timoté

Lé bo piâ ité wo lépwo béén

Wo pana e penem ehi me de Kériso

Go pipwocile a bwo mulie tem

A bwo pacémuni ni pétaapwo acéihi

Bénebwéne pwooti ke bépinelé

Pipwobwocu

1 ¹⁻² †Woéo Paulo na é pwtii lé céiiko, go Timoté. Woéo pa apostolo te *Kériso Iésu, pa watihe a céi-hi tenye. Be lu pahedeéo ngen, woilu me Padué, pa *acelumikenyé [beme é patemehi a pwooti te Kériso]. Wogo pa ju naîng ne ha a céihi ne ko Kériso. Wâé heme e mu kom a *pipwoééhe tice ja kon, me a péém na e âbé mu ko Padué henye me Padaame Kériso Iésu. [Ke wâé heme go temehi] a bwo wâé julú ne kom.

Pipwocile ni apwopune na lé gele

3 Pa bééng, é te ju paniimihi tem ali é pii he li é engen kojako me é â ha a province Macédoine. Be é pii tem pie, wâé heme go tee mu ha a pwomwo ubwo Éféso, beme go pacuwo lépwo apwopune na lé gele. ⁴ ††Lé te cuwo ko cihe ko ni jema na gele, ke ni jame jepule ko ni nii lépwo watihenye. Ke go pii telé pie me lé necu ninaa. Be ninaa kuti na bo taapwii ni pitaacunaado ‡, ke time lé uce picani ko ni penem de Padué, a penem na nye pwo ne ha a céihi ††.

⁵ É pii tem pie, me go pwo anaa, [go Timoté, ke me go pacémuni ni acéihi] beme lé pipwoééhelé mu he ni ju pwonimelé. A pipwoééhe, ke e âbé mu ko a bwo piténédehi nen denye a *pwocihe na e âbé mu he ni pwonimenye. Ke e âbé mwo mu ko a bwo céihi nen denye na juuju.

⁶ Kehe icehi ana wo lépwo apwopune na lé gele ††, ke lé piâ ité koja a pwaaden na wâé. Ke lé pipatieden ne he ni jepule telé na te ju piticenaado ne kon. ⁷ Be nimelé me lé pacémuni ni apulie ko ni *patén de Moosé. Kehe icehi ana time lé uce temehi nina lé tee ko mwoiu ko pacémunihi!

Ni patén ke wâé, heme nye mulie hen

⁸ ††Genye te temehi pie te wâé ni patén, heme nye mulie ehi hen. ⁹ Be time e uce ne ni patén [wo Padué] me de lépwona wâé ni mulihelé. Kehe e ne, beme de lépwona lé te cuwo ko pwo nina ta. Be muhi telé me lé piténédehi, ke lé caada ni pihuô ten:

Lé bitelé koja Padué, ke muhi telé me lé pipaunueng;

Lé pihoonihi ni naado na iitih;

Lé taunhi apulie die ko ni nyaa me caa telé;

¹⁰ Lé cibe mwa;

Lé pipule hauli me ni béén, die ko ana wo lépwo aiu, ke lé te pipule mwo me ni aiu;

Lé pwo âicu ko ni apulie ††;

Lé gele;

† 1.2 Apostolo 16.1–3; Tit 1.4 †† 1.4 1 Timoté 4.7; Tit 1.14 † Ni pitaacunaado—ai Ni bwo picihe na piticenaado ne kon. †† Penem na nye pwo ne ha a céihi—ai A penem den, ke a bwo celuimi lépwo apulie. Ke genye temehieng cehi ko a céihi. †† Lé pwo apwopune na lé gele—Grek: Wo lépwo béén. ††† 1.8 Roma 7.12,16 ††† Lé

Lé pipé ne ko ni béén ne he ni mwopitautinaado.

Be [e ne ni patén wo Padué me de lépwona wonaa jélé] me ati lépwona lé pwo ni béé huô na ta. Be time lé uce piténédehi ni pune na mwomwon na genye hegi, ¹¹ ke e âbé mu ko a *Pwooti Wâé, na e ne tong wo Padué [beme é wéihi, ke me é patemehi]. Ke wâé heme nye pipaunueng §, be te junihe wâé nang.

Pwo-olé te Kériso na e celumikenyé

¹² †É pwo-olé te Padaame henye Kériso Iésu. Be e niimihi pie jan ne kong me é pwo a penem na e ne tong, ke e ne tong mwo a niihen beme é pwo. ¹³ ††Kehe é ânebun, ke é mu cihe me ta ne kon. Ke é mu pwtahinaado [ne ko ni apulie ten]. Kehe icehi ana e pipwoééhung, [ke time e uce pwocuhinaado tong. Be e alihie pie] é wonaa be time é uce temehi, be time é uce téele céihi ne kon.

¹⁴ Nihe ubwo a pipwoééhe tice ja kon de Padaame Padué ne konye; a pipwoééhe na e pida me dong. Ke e pwo me é céihi ne ko Kériso Iésu, ke e pwo me é pipwoééhe ni apulie ko a pipwoééhe na e âbé mu kon. ¹⁵ ††Be [nye mu pii pie]: «E âbé ne pwo a bwohemwo wo Kériso Iésu, me e celuimi nina ta jélé.» Ke weengaa a pwooti na juuju, ke nina wâé heme genye céihi ne kon.

Ke te woéo kuti pana é te nihe pwo nina ta! ¹⁶ Kehe icehi ana e pipwoééhung wo Padué, beme e habwii pie e picani ne kong wo Iésu Kériso. Be, heme e wonaa tong, woéo pa apulie na junihe ta jo, ke o bo a cémun de ni béé apulie. Ke lé bo céihi ne kon, ke lé o bo hegi mu pelen a *mulie dieli mwo.

¹⁷ Me genye pipaunu Padué me pipii den!

Be weeng Padaame ne ha a wâé ten;

Pana te tice anebwén kon;

Pana te mulie dieli mwo;

Pana time nye uce alieng;

Pana te céiu nang!

Me genye pipwoun den dieli mwo!

Wâé heme wonaa! Amen!

Go cumang ne ha a céihi

¹⁸ Ana é pii tem, go Timoté pa naîng, ke te ju piwien me ali lé pii wo lépwo péroféta [he li lé pébé a pwooti te Padué] ne kom. Ni pwooti naa, ke e bo ne ace ni-ihem, beme go pwopahi [a Pwooti Wâé]. ¹⁹ Wâé heme go *cumang ne ha a céihi tem [ne ko Kériso]. Ke go

pwo âicu ko ni apulie—Trafiquants d'esclaves. Lé imwi ni apulie, ke lé iculé beme lépwo apenem tice ja kon de lépwo béén. § Wâé heme nye pipaunueng—ai E ne tenye a péém me a pipwodéén. †† 1.12 Apostolo 9.15; 1 Korénit 15.9–10; Galat 1.15–16 ††† 1.13 Apostolo 8.3, 9.1–5 †† 1.15 Luka 19.10

pipwocile, beme go mulie ehi âcehi ni pwooti na e âbé mu ha a pwonimem.

Be wo lépwo béén, ke muhi telé me lé piténehehi a pwocihe na e âbé mu he ni pwonimelé. Ke lé caa patieden a céihi telé. ²⁰ †Woilu pelelé wo Iméné me Alexandre. Ke é caa nelu te *Caatana ††, be me wonaa, ke me lu temehi pie, lu nemwo pii pie lu cihe ne he nii Padué ††

A pwooti ko a bwo pwoiitih

2 É mu ko ati ninaa, ke é pamwoiukewé [go Timoté, me ati ni acéihi] pie me geé pwoiitih te Padué me de [lépwo acéihi bééwé me ati] ni apulie [mu he ni ju pwonimewé]. Geé ilehi kojaeng pie, me e pwo ce naado celi wâé me delé; ke geé pwo-olé ten ko ninaa. Weengaa kuti a junaado.

² Geé pwoiitih me de lépwo daame, [me lépwo apihuô, me lépwona piubwo jélé] me ati lépwona lé pipwahamiinye [ne he ni amu tenye]. Be me wonaa, ke genye mulie ha a péém. Ke genye o bo paciiti Padué, ke genye o engen ehi ati he ni bwomunen. ³ Weengaa kuti [a bwo pwoiitih] na wâé heme genye pwo, be ana piwâénime Padué kon, pana e celuimikenye. ⁴ Be nimen me e *celuimi ni apulie ati, ke me [lé hegi ke] temehi a juuju [ko Iésu].

⁵ Be te céiu cehi Padué [he ati ni apulie].

Ke te céiu cehi pa apipépwooti hadeniinye me Padué: ke wo Kériso Iésu.

Be e â pa apulie pwohewiikenye, ⁶ ††ke e patupwo a mulihen, beme e tuwo ati ni apulie [koja a ta me a mele].

Weengaa ali e caa habwii wo Padué

ha a tan na e caa te mi ne, pie nimen me celuimi ni apulie ati.

⁷ ††Ke é mu ko anaa kuti, na e pahedeéo, beme pa apostolo ten me de lépwona time uce lépwo *Juif. Be e pahedeéo ngen, me é â pwopune telé, ke me é pacémunilé ko a pwooti na juuju [ko Iésu] na nye ko céihi ne kon. Ke heme é ko pii anaa, ke é te juuju, kehe time é uce gele!

Ni bwomu tenye heme nye pwoiitih ibu

⁸ Weengi ana é huôhi: Ati he ni benaamwon, [heme geé pipitikewé ne he nii Padaame] ke wâé heme geé pwoiitih ten. Ke geé necu a pipééle me a pitaacunaado. Ke me geé eti ni iwé da céii Padué, ke wâé heme geé pwo, mu he ni ju pwonimewé na wâé.

⁹ ††Ke é huôhi ne te ni toomwo pie: [Heme geé pipitikewé ne he nii Padaame] ke wâé heme geé pipwocile a bwo cuwohe ni epwénewé, ke a bwo tuti ne ni puniwé, beme geé nemwo pihabwiikewé. Ke geé nemwo cuwohe ni epwén na junihe ubwo ni cuhin. Ke geé nemwo ne ni mwani megele, me ni *perle*. ¹⁰ ††Be a ju wâé te é acéihi, ke e habwii ko ni penem den na wâé.

¹¹⁻¹² ††Wâé heme ni toomwo, ke me lé pwo me piwahin jélé, ke me lé te ju mu me lé tabemi a pune ††. Be time é uce ne telé a mwomwon me lé pacémuni lépwo aiu, ai me lé pwohuu telé ne he nina lé pwo †††. ¹³ ††Be wo Padué, ke e mi tabuhi [pa aiu, wo] *Adamu; ke é alecehen, ke e bwo ne [é toomwo na wo] Éva. ¹⁴ †††Ke time uce wo Adamu li e pihaamieng [na ali bwien, wo *Caatana]. Kehe wo égi toomwo li e pihaamieng, ke time e uce ténédehi ni patén de Padué. ¹⁵ Kehe icehi ana o celuimi ni toomwo ne ha a bwo picile ewa telé ††, hemepie lé tee mulie ha a mulie na wâé te Padué, ne ha a céihi, me a pipwoééhe, ke me lé pwo me piwahin jélé.

A pwooti te ni apihuô te ni céihi

3 ††Weengi a céiu pwocihe [na nye mu pii pie]: «Hemepie nime pace céiu apulie me pa caa te lépwo apihuô te ni acéihi, ke a penem na wâé.» Ke a pwooti na juuju. ²⁻³ †††Ke wo pa apulie naa, ke wâé heme e pipwoiipih a mulihen [ne he pwahamii ni apulie ati]. Ke wâé heme te tice celi me pipé ne kon:

Me e ju mu ehi ko é mwoden †††;

Me time e uce nihe wiinaado, me ûdu;

Me time uce pa apipééle, ke pitaacunaado;

Me time e uce pwo me wâé ten a mwani.

Me e éewo ko ni apulie;

Me e cihe me bwala;

Me e hegi ehi ni apulie na lé âbé tuie ne pelen;

Me e temehi pacémuni ni acéihi;

† 1.20 1 Korénit 5.5; 2 Timoté 4.14–15 †† É caa nelu te Caatana—Wieli a bwopiinen pie, e pawielu wo Paulo mu ha a puco te ni acéihi, ucéihi a benaamwon na lé taatééhi ni mulihelé. † Pii pie lu cihe ne he nii Padué—ai Pii me ta a nii Padué (blasphémer). †† 2.6 Roma 3.29–30; Galat 1.4 †† 2.7 Apostolo 9.15; Galat 2.7–8; 2 Timoté 1.11

††† 2.9 1 Pétéru 3.3–5 ††† 2.10 1 Timoté 5.10 § 2.12 1 Korénit 14.34 †† Tabemi a pune—Wieli é ha a benaamwon de Paulo, ke hiwon ni toomwo na lé niimihi pie, pwo mwomwon delé me lé picihe hauli heme lé pitapitilé wo lépwo acéihi. Ke nimen me e pacuwohi a bwopwonen naa wo Paulo. É mu ko anaa, na e paciitih kolé me lé cihe ne he ni puco te ni acéihi na e pihuô ne hen. ††† Me lé pwohuu telé ne he nina lé pwo—ai Ke lé nemwo tahagéi a pwooti heme e cihe wo pa aiu. §† 2.13 Genèse 2.7,21–22; 1 Korénit 11.8–9 §†† 2.14 2 Korénit 11.3; Galat 3.1–6 §† Ne ha a bwo picile ewa telé—ai Heme lé hegi ehi ni penem delé, he lé cile ehi ni nailé, ai É mu ko a bwo pituie te pali Cuwo ewa [Iésu]. §† 3.1 Apostolo 20.28 §†† 3.2 Tit 1.6–9 §†† E ju mu ehi ko é mwoden—Grek: Te céiu cehi é mwoden.

⁴ Me e temehi pihuôhi a pomwa ten, beme lé piténeeng ne ni naîn ne ha a bwo pwo me pi-wahin jélé.

⁵ Be mepie time e uce temehi me e wéihi ehi a pomwa ten, ke kona e bo woté ko ace bwo pé na a puapulie te Padué, a Mwaitihi ten? ⁶ Wo pace apihuô, ke time uce wâé hemepie paceli e mwo ju tabuhi céihi. Be koli e bo cibehede, ke koli e bo paupaaeng wo *Caatana †. ⁷ †† Ke a céiu mwo: Ke wâé heme a mulihen, ke me wâé te lépwona time uce lépwo acéihi, beme te tice apulie celi me lé pii celi ta ne kon. Ke me time e uce tupwo ne ha a pwojé na e pipwopweehi me den wo Caatana.

Lépwo dikone

⁸ Te piwien ne ko lépwo dikone ‡, be wâé heme lépwo apulie na lé woni:

Me lé pipaciitilé;

Me mwomwon jélé, ke me lé nemwo te pitaatéhi pwocihe;

Me time lé uce nihe ûdu tabe megele;

Me time uce lépwo ahane mwani.

⁹ Ke wâé heme lé âcehi †† a céihi [na caa pacémunilé kon]. Be a juuju li e ha *aduwo ânebun, ke e caa habwii tenye wo Padué ††. Ke wâé heme lé tabemi ehi a *pwocihe na e âbé mu he ni pwonimelé. ¹⁰ Ânebuhe ace bwo pipégali pace apulie beme pa dikone, ke wâé heme nye mwo mi alihî ni penem den, beme te tice naado celi me o bo pipé ne kon.

¹¹ ††† Ke é ne ko ni dikone toomwo †††, ke wâé heme lé woni:

Me lé pipaciitilé;

Me time lé uce pipii apulie;

Me time lé uce wiinaado me ûdu hauli;

Me lé juuju ne he nina lé pwo.

¹² Wo lépwo dikone, ke wâé heme lé paciiti ni mwodelé §. Ke wâé heme lé pacihe ehi ni naîlé, me ni pwomwoiu telé. ¹³ Be mepie lé pwopweehi ni penem delé, ke nye o tai paciitilé. Ke o te mu mang ni céihi telé §† ne ko Kériso Iésu.

A pihuô te Paulo ne te Timoté

¹⁴ Nimung me é mwo âdé die pelem, kehe icehi ana é mi pwo a tii ce lé céiiko, ¹⁵ be wieli o bwolié. [Be wâé tong] me go temehi ce bwomu tenye celi wâé ne ha a

† Koli e bo paupaaeng wo Caatana... ai Koli e bo â hegi a kuhinaado ten, pwohewii Caatana, pana ta nang. †† 3.7 2 Korénit 8.21

‡ Dikone—A bwopiine a pwooti ce, he pwo grek, pie: Pa eabwé. Ne he ni bécéiuhé puco te ni acéihi, ke wo lépwo dikone, ke lépwo bépicani te lépwo apihuô. Omehi Apostolo 6.1–6. †† Âcehi—ai Wéihi.

†† Ze phrase—Wona a bwopiine a pwooti mystère. ††† 3.11 Tit 2.3 ††† Ni dikone toomwo—ai Ni mwode dikone. § Lé paciiti ni mwodelé—Grek: Te océiu ko piaten. §† Ke o te mu mang ni céihi telé—ai Me lé pipatemehi a céihi telé.

pwomwoiu te Padué. A pwomwoiu naa, ke a Mwaitihi te Padué na e mulip, a puapulie ten. Ke a Mwaitihi, ke e imwi me pwopahi a ju pipwopune [ko Kériso]. Be e pwohewii pa acuimi na a mwa §††.

Nihe ubwo a wâé te Kériso

¹⁶ §† Go alihî, a juuju na e habwii tenye wo Padué §††, ke a naado na te nihe ubwo wéden. Ke genye nihe céihi ne kon! Be:

E pé a éé apulie wo Iésu Kériso.

Ke e pajuujueng a *Jenen Iitihî.

Ke lé alieng ne ni *âcélo.

Genye patemehieng te ni bele.

Ke lé céihi ne kon

pitihî a bwohemwo.

Ke céieng da he *miiden

ne ha a wâé te Padué Caa.

Lé bo piâ ité wo lépwo béén

⁴ E patemehi na a *Jenen Iitihî pie, lé o bo patieden ni céihi telé wo lépwo béén he *ni bénebwéne tan. Be lé o âcehi ni bwo temehinaado na gele na e âbé mu ko ni duéé. ² Wo lépwo apulie naa, ke ni agele na lé pipwohuô tenye, be lé caa patieden a *pwocihe na e âbé mu he ni pwonimelé, ko a bwo time lé uce tabemieng §†. ³ §† Lé huôhi [te lépwo acéihi] pie me lé nemwo piaten, ke lé paciitihî kolé ni béé wiinaado. Kehe icehi ana ni wiinaado naa, ke nina e ne wo Padué beme nye wii.

Kehe wogenye ni acéihi, ke genye caa temehi a juuju, ke te wâé heme genye wiinaado, ke me nye pwo-olé te Padué kon. ⁴ Éa! Te tai wâé ati ni naado na e pwo wo Padué! Ke te tice celi me genye paciitihî! Kehe genye te tai hegi ati [ne ha a pipwodéén] ke genye pwo-olé te Padué. ⁵ Be ni naado naa, ke nina wâé te Padué mu ko a pwooti ten, ke ni pwopipwo-olé ten.

Wo pana e penem ehi me de Kériso

⁶ Wâé heme go te picaa ni naado naa te lépwo acéihi béém. Be me wonaa, ke bo wogo pa ju eabwé te Kériso Iésu. Ke go te hegi [ne ha a pwonimem] ni pune na juuju ko a céihi tenye [ne ko Kériso]. Be go caa te âcehin, ke wâé mwo heme pwohewii ni wiinaado tem ati he ni tan.

§†† Pa acuimi na a mwa—Pa amwo ha awieme mwa ne pelenye ne Kalédoni. A pwooti ni ko a puco te ni acéihi, kehe icehi ana é ne he ni béé tii, ke a pwooti mwo ko Kériso. Omehi 1 Korénit 3.11; 1 Pétéru 2.4–8. §† 3.16 Ioane 1.14; 2 Pétéru 3.3; 1 Ioane 2.18 §†† A juuju na e habwii tenye wo Padué—Grek: Mystère. §† Grek: A pwocihe na e âbé mu he ni pwonimelé, ke caa cini ko toki megele (marqués au fer rouge dans leur conscience). É ha a benaamwon de Paulo, ke hemepie lé cela wo lépwo apwokarépu, ke wo lépwo coda, ke lé te junihe tanahî pwotahî ni béé duaan ko ni éélé ko toki megele, beme a ine ni ta pwo telé. §† 4.3 Genèse 9.3; Roma 14.6; 1 Korénit 10.30–31

⁷†Go nemwo pipéce ne ko ni jemaa na gele, be te ju piticenaado ne kon ne te pa apulie na e paciiti Padué. Wâé heme go tee mwoiu ko penem, beme wogo pa apipwoiipi, ke me go paciiti Padué. ⁸Be [nye mu pii pie]: «Ni jele, ke ni penem na lé pwopweehi a éénye, ke ni naado na wâé. Kehe icehi ana a naado na nihe wâé, ke a penem ko a mulihenye, beme wâé te Padué. Be é mu ko anaa, na nye hegi *a ju mulip tabuhi jena, ke é dieli mwo.»

⁹A pwooti naa, ke a juuju, ke wâé heme lé hegi ati ne ni apulie. ¹⁰†É mu ko anaa kuti, na me genye mwoiu ko penem, be genye caa céihi ne ko Padué, na e mulie [ke e ne a mulip]. Be weeng li e *celuimi ati ni apulie; ke anaa, ke a juuju te lépwona lé céihi ne kon. ¹¹Ke weengaa kuti ana me go te cuwo ko pacémunilé kon.

Go pipwocile a bwo mulie tem

¹²‡Wâé heme go habwii ce bwomu tem celi wâé te ni acéihi ne he ni bwo cihe tem me ni penem dem, me a pipwoééhe tem, ke a céihi tem, me a bwo pipaciitiko. Ke me wonaa, ke o te tice bwopwonen me e pihooniko wo pace céiu apulie, mu ko ana wogo, ke mwo pa ewa aiu.

¹³Heme go ucéihi a bwo tuie tong, ke wâé heme go te cuwo ko pine ni *tii iitihite ni apwoiitihite. Ke go tee pamwoiulé, ke go tee pacémunilé. ¹⁴‡Go nemwo neuhi ali âpipati li e ne tem na a Jenen Iitihite, he li lé ne li ilé huïim ‡‡ wo lépwo apihuô te ni acéihi, ke li lé pii li pwooti ne huïim [ne he nii Padué]. ¹⁵Ke wâé heme go ju mu cehi ko li penem [li é caa pii tem]. Ke go penem ehi, beme lé alihi ne ni apulie pie, caa piubwo da a utehe a penem dem. ¹⁶Go pipwocile a bwo mulie tem me a bwo pwocémun dem. Ke go te ju mu kon cehi. Ke e o bo celuimikewé [wo Padué]: wogo me lépwona lé hegi ni pwooti tem.

A bwo pacémuni ni pétaapwo acéihi

5 Go nemwo cihe me mwoiu te pace ukéiu. Hemepie go pwopune ten, kehe go paciitieng, pwohewiin heme pa caa tem. Ke go pwopune te ni ewa pwohewiin heme ni ciéém; ²ke ni ukéiu toomwo, pwohewiin heme ce nyaa tem; ke ni ewa toomwo pwohewiin heme ce toomwo pwaadeniim.

Ni depwele

³Geé pwopweehi ne ko ni depwele ‡‡ na te tice apulie celi me lé picani telé. ⁴Ke mepie te pwo ce naîlé, me ce pabulé, ke wâé heme lé mi pwopweehi te ni pwomwoiu telé. Be weengaa kuti a ju penem de pa

† 4.7 1 Timoté 1.4 †† 4.10 1 Timoté 2.3–4 ‡ 4.12 Tit 2.15 ‡† Pine...te ni apwoiitihite—É ha a benaamwon de Paulo, ke time uce hiwon nina lé temehi pine tii. ‡‡ 4.14 2 Timoté 1.6 ‡‡† Lé ne li ilé huïim—Lé wonaa alecehe a bwo pipégali Timoté, beme lé adéieng, ke pamwoiueng ne ko ni penem. ‡‡‡ Depwele—Veuve.

acéihi. Be ni taacu me mwojuia ko ni naado na lé hegi mu ko ni caa me nyaa telé, me ni ao me gee telé. Ke o te junihe wâé te Padué.

⁵Ke mepwo é ne ko ni depwele na te tice apulie celi me lé picani telé, ke woélé kuti ni toomwo na lé céihi ehi ne ko Padué. Be lé te pwoiitihite ten heme bwén ke pwang. Ke lé te cuwo ko ilehi kojaeng me e picani telé. ⁶Ke mepwo é ne ko ni depwele na lé te ju hane cehi ni pipwodéén delé, ke pwohewiin heme lé caa mele, te piwien heme lé mwo teko mulie.

⁷Weengaa kuti a huô na me go pii te ni depwele, [me ni pwomwoiu telé] [§], beme o te tice naado celi me nye o bo pipé ne kolé kon. ⁸Be [te a penem denyé] me nye pwopweehi ne ko a pwomwoiu tenye, tabuhi mu ha a pomwa tenye. Ke wo pana time e uce wonaa, ke e â ité koja a céihi ten, ke caa junihe ta nang koja pana time uce pace acéihi.

Ni depwele na nye ne mwani telé

⁹É ne ko ni depwele na nye ne mwani telé ne ha a Mwaiitihite ^{§†}, ke wâé heme lé caa wédenihite a 60 ni jo helé. Ke nina lé te mu ehi ko ni aiu helé ânebuhe a bwo mele telé ^{§††}. ¹⁰Ke wâé mwo hemepie ni toomwo na nye temehilé mu ko ni naado na wâé na lé mu pwo:

Me lé te ju cile ehi ni naîlé;

Me lé te hegi ehi ni apulie;

Me lé pipenem ehi te ni acéihi ^{§‡};

Me lé picani te lépwona lé mu he ni picani me ni téé;

Me lé pwo ati ni pétaapwo naado na wâé.

¹¹Geé nemwo ne ce bépicanite ni depwele na mwo ni ewa. Be koli lé bo âcehi ana te nimelé kon, beme lé piaten mwo. Ke koli lé bo piâ ité koja [ni penem na lé mi pii pie me lé pwo me de] Kériso. ¹²Ke é he ko wonaa, ke time lé uce pacuwohi a *piapwo telé me den, ¹³§††ke koli lé bo uce pwoemaan. Ke a naado na nihe ta koja anaa, ke koli lé bo te â he ni pwomwo, ke lé pipii apulie, ke lé gaale he ni naado na te tice panelé ne kon, ke lé tee pwome pii ni naado.

¹⁴§†Ke é mu ko anaa kuti, na é pii te ni toomwo depwele na mwo ni ewa pie, wâé heme lé piaten mwo. Ke wâé heme lé cile ehi ni naîlé, ke me lé pwoiipihite ehi ni pomwa telé. Ke me wonaa, ke time lé o uce ne pwaadeni lépwona muhi telé konye ^{§‡}, me lé pipii me ta genye. ¹⁵Be é ne ko ni béé depwele, ke lé caa te piâ ité, be lé âcéi *Caatana, ke lé caa pipatieden.

§ Go pii te ni depwele, [me ni pwomwoiu telé]—Grek: Go pii telé. Wieli ni depwele, ai wieli ati ni acéihi. §† Ni depwele...a Mwaiitihite—Grek: Ni depwele na tii ni niilé ne ha a tii. Piwien ne ha a niide a tii 11. Ni depwele naa, ke lé pinelé, beme lé penem de Padué, ke lé hegi ni mwani bépicanite koja a puco te ni acéihi. §†† Lé te mu ehi ko ni aiu helé... Grek: Te picéiu ni aiu helé. §‡ Pipenem ehi—Grek: Puu ni a lépwo apwoiitihite. (A bwo pihegi apulie te lépwo Juif me lépwo atabuhite céihi ne ko Iésu, ha a benaamwon de Paulo.) §†† 5.13 2 Tésalonik 3.11 §† 5.14 1 Korénit 7.9 §‡ Lépwona muhi telé konye—ai Wo Caatana, pana muhi ten konye.

¹⁶ [Go pii te] ni toomwo na lé céihi pie, mepie pwo ce depwele he ni pwomwoiu telé, ke wâé heme lé picani telé. Be me wonaa, ke me time uce a âneule te a *pu-co te ni acéihi, beme e bo te ju picani cehi te ni depwele na tice apulie celi me lé picani telé.

Lépwo apihuô te ni acéihi

¹⁷ Wâé heme nye paciitihi, ke me nye pwocuhi lépwo apihuô na lé pé a puapulie te Padué †. Ke me nye pwocuhilé ehi, hemepie lé te mwoiu ko pwopune me patemehi a Pwooti Wâé. ¹⁸ †† Be caa te tii ne he ni tii iitihi pie: *Go nemwo pacuwohi a paaci me e wii ni ace blé, heme e ko penem me dem*‡.

Deutéronome 25.4

Ke caa tii mwo pie: «Wo pa apenem, ke wâé heme e hegi a cuhieng ††.»

¹⁹ †† Hé hemepie pwo pace céiu apulie celi e pipé ne ko pace céiu apihuô, ke go nemwo uce pipéce ne kon, hemepie te weeng cehi. Be wâé heme alo ai cié lép-woceli lé *pajujuhi.

²⁰ †† Wo lépwna lé te cuwo ko pwo nina ta, ke go pacihelé ne he pwahamii ni apulie ati. Be me wonaa, ke me mwoti lépwo béén me lé pwo nina ta.

²¹ Weengaa nina é huôhi ne tem ne he pwahamii Padué, me Kériso Iésu, me ni *âcélo na lé pipenem delu ††. Ke go piténédelé ehi, ke go nemwo pipwoinen ne ko ni apulie.

²² Wâé heme go omehi a mulihe pa apulie ânebuhe a bwo pipégalieng beme pa apihuô te ni acéihi. Be koli go bo habwii pie, te wâé tem ni ta na e pwo. Go pipwocile, ke go pipwoiipiko ati ne he ni bwomunen †.

²³ Ke é ne ko wogo, go Timoté, ke wo pana mu te cuwo ko cunu go, kehe é pii tem pie: Go nemwo ju ûdu ju tabe cehi; kehe go neibuhi me ace tabe megele, beme wâé a nam.

²⁴ É ne ko lépwna lé cuwo ko pwo nina ta, ke genye te mi alihi ni ta pwo telé ânebuhe a tan ko tautinaado ††. Ke é ne pele lépwo béén, ke genye bo tee alihi mwo alecehen. ²⁵ Pwohewii ni penem na wâé. Be pwo ni béé penem na te ju epin ko alihi. Ke ni béén, ke nye bo tee alihi alecehen ††.

† 1re phrase—Grek: Wâé heme okelo ko pipaunu lépwo ukéiu na lé pihuô ehi. †† 5.18 Mataio 10.10; 1 Korénit 9.9 † Penem me dem—Grek: Caaite ni pidenaado. †† ...Wâé heme e hegi a cuhieng—A pwooti te Iésu ne ha a tii te Luka (Luka 10.7). Habwii tenye pie, e niimihi wo Paulo pie, te piwie ana tii ne ha a Élele Iitihi na mwo Coho (le Nouveau Testament), me nina e ha a Élele Iitihi Ânebun (l'Ancien Testament), be tai a pwooti te Padué. †† 5.19 2 Korénit 13.1 ††† 5.20 Éfeso 5.11 ††† Ni âcélo na lé pipenem delu—Grek: Ni âcélo na pipégalié. Wieli lépwo âcélo na lé pipwoeabwé te Padué, ne ânebuhe a atebwo ten ne he miiden. Omehi Pii Beetihi 5.11. † Grek: Go nemwo piepin me go ne ni im ne ko pace céiu apulie. Go nemwo pipabéé me pipwohewii pana e pwo nina ta. Kehe go pipaicitiko. †† Tan ko tautinaado—Heme a tautinaado te Padué, ai a tautinaado te Timoté me ni béé acéihi. ††† Nye bo te alihi alecehen—Grek: Time uce jan me neduwolé.

Lépwo apenem tice ja kon

6 †† Weengi a pwooti me de lépwo acéihi na lépwo *apenem tice ja kon: Geé paciiti lépwo caa tewé me piténédelé ehi. Be me wonaa, ke wo lépwo apulie, ke me o time lé uce pihooni Padué, ke é ne ko ni cémun denye. ² ††† Hemepie pa caa tem ke pa acéihi béém, ke time uce a bwopiinen pie, me go nemwo paciitieng na ati he ni bwomunen. Wâé heme go te penem ehi me den, beme go picani te pa acéihi béém, na te wâé mwo te Padué nang.

Bénebwéne pwooti

Wâé heme go pacémuni lépwo acéihi ati ko ninaa, go Timoté. Ke go wâgo kolé me lé piténédehi.

Lépwo agele

³ †† Pwo ni béé apulie na lé pacémuni ni acéihi ko ni naado na te ité koja [nina é pii tem]. Ke time lé uce âcehi a pwooti te Padaame henye, wo Iésu Kériso. A pwooti naa, ke juuju, ke wâé, ke e pacémunikenye ko a mulip na wâé te Padué †† me nye mulie hen. ⁴ Wo lépwo apulie naa, ke te nihe lépwo acibehede, kehe te tice celi lé temehi. Caa te a cunu kolé anaa: Wâé telé heme lé tee pitaacunaado. Kehe ati ni pwooti telé naa, ke e taapwii a pitaaba, me a pineité, me ni piciheta, me ni bwo niimihi naado na ta. ⁵ ††† [Te nihe wâé telé] ni picihe na tice anebwén kon, be lé âcehi ni bwo niimihi naado telé na time uce mwomwon. Be time lé uce alihi a juuju. Ke lé niimihi pie, a céihi ne ko Padué, ke a pwaaden beme o pwo ce delé.

A ju wâé tenye

⁶ ††† Te a juuju pie, a céihi tenye ne ko Padué, ke caa te a wâé tenye na nihe ubwo! Ke wâé heme nye pipwodéén ko nina caa e pelenye. ⁷ †††† Be te tice celi nye pébé ne éni pwo bwohemwo, ke e te tice mwo celi nye o mwojuia imi. ⁸ Ke hemepie pwo ce wiinaado, me ce epwénenye, ke caa te jan ne konye ninaa.

⁹ Ke é ne ko lépwna lé tee ko hane ce naamuulé, ke lé ne [te *Caatana a watihen] me e pipaupaalé, ke lé o bo â pwo ni naado na ta. Be time lé uce ko alihi pie, lé teko pipwotahinaado ne kolé mwo, be lé teko âcehi nina te nimelé kon, na te ju piticenaado ne kon. Pwohewiin heme ko cielé ko itihe toki, ke me tahlilé ne he jilé beme lé mwiié, ke me tielé dieli mwo ¹⁸.

¹⁰ ¹⁹ Be a watihe ni pétaapwo naado na ta, ke a bwo wâé tenye a mwani. Hiwon nina lé nihe hane a mwani,

†† 6.1 Éfeso 6.5 ††† 6.2 Filémon 1.16 †† 6.3 Galat 1.6–9 †† E pacémunikenye ko a mulip na wâé te Padué—ai E engen ne ko a céihi tenye. ††† 6.5 2 Timoté 3.8, 4.4; Tit 1.14 ††† 6.6 Filipi 4.11–12; 1 Timoté 4.8; Ébéru 13.5 ††† 6.7 Job 1.21 18 Dernière phrase—Grek: Tahlilé [ne ha a jilé]. Geme ne mwo ni béé pwooti, beme patemehi a ocine he pwo grek. ¹⁹ 6.10 Éfeso 5.5

ke lé pineuhi a céihi. Ke lé te nihe mu he ni picani kon.

Ni béé huô te Timoté

¹¹ †Go cela ko ni naado na ta, go Timoté, be wogo ke pa apulie te Padué. Go pipwoiipiko, beme wâé te Padué go. Go mulie ne ha a céihi, me a pipwoééhe, me a piuca. Ke me bwala a pwonimem. ¹² ††Go cumang ne ha a pa na wâé, âcehi a céihi tenye ‡. Ke go imwi mangihi a mulip ne pele Padué dieli mwo [ke go mulie ehi hen jena]. Be e caa todeko ne ha a mulie naa, ha a tan na go patemehi a céihi tem ne ânebuhe ni apulie na hiwon.

¹³⁻¹⁴ ††É huôhi ne tem pie, me go pitenedehi ni patén na go caa hegi. Ke é pii tem anaa ne he pwahamii Padué, na e ne a mulihe ati ni naado. Ke é pii mwo ne he pwahamii Kériso Iésu, pana e te pii cehi a juuju he li e cuwo he pwahamii gupéno Ponce *Pilate. Go ténédehi ni patén naa, beme o te tice alili kom; ke me o te tice celi me o tautiko kon, die ha a tan na e bo mwojuia mwobé hen wo Padaame henye Iésu Kériso.

¹⁵ ††Be:

E pihuôhi ati wo Padué henye,
na wâé heme nye pipaunueng ††.
Padaame he ni daame,
ke pa Apihuô te ni apihuô.
E caa pacuwahi a tan
na e bo habwii Kériso
[he e bo mwojuia mwobé.]
¹⁶ Te weeng cehi kuti
na e *mulie dieli mwo.

† 6.11 2 Timoté 2.22 †† 6.12 1 Korénit 9.25–26; 2 Timoté 4.7
‡ Âcehi a céihi tenye—ai Beme go pwopahi a céihi tenye. †† 6.13
Ioane 18.36–37 †† 6.15 Pii Beetihi 17.14 ††† Wâé heme nye pi-
paunueng—ai E ne tenye a péém me a pipwodéén.

Pwomelaa a pwéélang den ††;
pwocoon me nye omeeng;
time uce jan me nye alieng.
O bo pipaunueng he ni tan ati.
Mu kon a pwojunuun dieli mwo.
Wâé heme wonaa! Amen!

Lépwona acéihi na pwo ni wâé telé

¹⁷ §Go pii ehi te lépwona pwo ni wâé telé ne éni pwo bwohemwo pie, me lé nemwo pipaunulé. Ke me lé nemwo céihi ne ko ni wâé telé, be time o uce mu dieli mwo. Ôhu! Wâé heme lé céihi ne ko Padué, pana e ne tenye me piticenaado ne kon ati ni naado beme nye pipwodéén kon. ¹⁸ Go pii telé pie me lé pwo ce naado celi hiwon celi wâé. Ke me lé pati ni béén, ke me lé ne, me piticenaado ne kon. ¹⁹ §†Ke me wonaa, ke lé ne a wéa ko a céiu benaamwon, he na e lang a wâé na juni-he wéden, na o time uce nyaale: ke *a ju mulip.

Bépinelé

²⁰ Go cile ehi, go Timoté, ana e ne tem wo Padué. Go nemwo tabemi ni pwocihe na tice ânen na lé nekenye ité koja a céihi. Be wo lépwona lé taacunaado ko ni naado naa, ke lé pii pie e pelelé ni bwo temehinaado [na e bwolu] kehe icehi ana lé gele. ²¹ §††Ke hiwon lépwona lé piâ ité koja a ju céihi, be lé âcehi ni âniimihinaado naa.

Wâé heme e mu pelewé ati a *pipwoééhe tice ja kon de Padué.

Adéikewé!

††† Pwomelaa a pwéélang den—Grek: E mu ha a pwéélang na
time uce jan ne konye me nye âmwonuhi. § 6.17 Luka 12.20
§† 6.19 Mataio 6.20 §†† 6.21 1 Timoté 1.6; 2 Timoté 2.18

2 Timoté

nge céii

Atabuhi ko a tii

Woo na e tii a tii ce?

Wo Paulo, pa apostolo.

E tii éniile?

Ha awieme a jo 66 me 67, ha a béalohe bwo mu he karépu te Paulo ne Rome. Omehi Atabuhi ko a tii . A béneb-wéne tii na e tii, be time uce bwolihi, ke te ju é alecehen, ke e pwo me taunueng wo Néron, pa daame he lépwo Roma. Be pana e tééti lépwona lé céihi ne ko Iésu.

E tii me dee?

Te Timoté. Omehi Atabuhi ko a tii .

É ko ade na e tii?

E temehi wo Paulo pie, o caa time uce bwali a mulihen, ke e pwotii nge céii Timoté, be te junihe eânimen den, pwohewiin hemepie te pace ju naîn (1.3). E tii beme e habwii a bwo pipwoééhen den, ke me e pamwoiueng ne ha a céihi ten. Ke e pii ten ni bwomunen ne ko lépwo apipune na lépwo agele.

Ade ace âne a tii ce?

Wo Paulo, ke pa apulie na te junihe ubwo nang ne ha a céihi. É ne ha a tii ce, ke e tii ni bénebwéne bwo niimihi-naado ten, ke genye alihi a pwonimen, ke ana a junaado ne ten. Weengi a pune na e ne te Timoté ne ha a tii ce:

- Go te ome Iésu, ke go te âcén taaci, dieli ha a pwonehin, pwohewiiéo (2.8–13; 4.6–8).
- Go paciitihii a mulihem (2.21–22).
- Go nemwo pwo me piwâ go heme go pwo ni penem na e ne tem wo Padaame, be e ne tem a junuun (1.6–8).
- Go tee cumang ne he ni picani me ni téé na e tuie ne kom, mu ko ana wogo, ke pa apulie te Iésu (2.3–7; 4.5).
- Go te cuwo ko piténedehi ni pwooti na juuju, na e mu ha a Tii Iitihii (1.13; 4.14–17), ke go te cuwo ko pipate-mehi ke pacémuni ni apulie kon (2.15; 4.5).
- Go tahi taabwon ni cémun na gele (2.21), ke go pipwocile lépwona lé âbé pipwohuô te ni apulie te Padué (3.1–9).
- Go pipégali ni apulie na jan me lé pacémuni ni béén (2.1–2).

A bwomune a tii 2 Timoté

Pipwobwocu

Nye te cumang ne he ni céihi tenye

E pamwoiu Timoté wo Paulo

Pa coda na e piténe de Padaame

Wo Iésu Kériso ke pa béhabwiinen denye

Pipwocile nina lé piâ ité koja a juuju

Ni cémun ne te Timoté

Bénebwéne pwooti ke bépinelé

Pipwobwocu

1 Woéo Paulo [na é pwotii lé céiiko go Timoté] woéo pa *apostolo te *Kériso Iésu, âchehi ana nime Padué kon. Be e pahedeéo ngen me é pii beetihi a pwooti ko a mulip. Be e caa pii ânebun pie, e bo ne tenye a mulip naa, na e pwaadeniin bé wo Kériso Iésu.

2 †Wogo pa ju naîng ne ha a céihi, go Timoté, na te junihe eânimung dem. Wâé heme e mu kom a *pipwoééhe tice ja kon me a péém na e âbé mu ko Padué henye me Padaame Kériso Iésu. Ke [wâé heme go temehi] a bwo bwala julu ne kom. Adéiko!

E pamwoiu Timoté wo Paulo

3 †É heme bwén ke pwang, heme é pwoiitihi, ke é mu tee cuwo ko pii a niim. Ke é pwo-olé te Padué, pali lé pipwoeabwé ten wo lépwoli ukéiu tenye. Ke é ko pipwoeabwé ten mwo, mu ha a ju *pwonimung na time uce pipé ne kong. 4 É niimihi ali bwo é tem [he li é engen kojako]. Ke junihe nimung me é aliko mwo, ke é o te junihe pipwodéén hemepie genyu bo pitookenyu mwo.

Pwo mwo me éle a miû na e kom

5 †É temehi pie wogo, ke go céihi ne ko Padaame mu ha a ju pwonimem. Be go pwohewii gee tem Loïs, êgi te mi é acéihi kojako, ke wo Eunice êgi nyaa tem. 6 †É mu ko anaa kuti, na é pamwoiuko, beme go wéihi ehi a âpipati te Padué na e kom, li go hegi he li é ne lupwo ing huîm. Be caa pwohewii a miû na e caa pwo me e mele. Ke wâé heme go pwo me éle mwo †.

7 ††Be a *Jenen Iitihi, na e ne tenye wo Padué, ke time e uce ne me piwâ genye, ai me mwotikenye. Be e pébé céiikenye a junuun, me a pipwoééhe, me a bwo pipwoiipikenye! 8 É mu ko anaa, na go nemwo pwo me piwâ go me go patemehi Padaame henye. Ke go nemwo pwo me mwotiko †† ko a bwo mu tong éni he karépu me den! Kehe wâé heme nyu pimu ibu he ni picani, mu ko [a bwo patemehi na] a *Pwooti Wâé. [Ke go cumang ne ko Padué] be e ne tem a junuun [li é caa pii tem].

A nyebi da céii Padué na e celuimikenye

9 †E caa *celuimikenye [wo Padué].

Ke e todekenye ati,

beme wogenye ni apulie ten.

Time uce wogenye

na nye pwo anaa;

Kehe te a bwo niimihinaado ten, na e caa te mi *pajuujuhi, he mwo te tieden a bwohemwo.

E habwii tenye a pipwoééhe ten na e pwaadeniin bé wo Kériso.

10 †E tuiebé wo Kériso,

pa aceluimikenye;

e pwo me tieden a niihe a mele.

Ke e ne tenye a *mulie dieli mwo.

Weengaa a Pwooti Wâé ten ††!

Time uce piwâ jo me é patemehiang

11 ††Wo Padué, ke e pwo me woéo pa céiu apostolo ten, beme é patemehi a Pwooti Wâé ten naa, ke me é pacémuni ni apulie kon. 12 Weengaa kuti nina é ko mu he ni picani kon jena. Kehe icehi ana time uce mwotiéo kon. Be é te temehi Pana é céihi ne kon. Ke é te céihi me ubwo pie, e bo te wéihi ali e ne tong ††, dieli ha a *Tan Alece.

13 Go âchehi ni pwooti na juuju, na go caa hegi kojaéo, ke go mulie hen, ne ha a céihi me a pipwoééhe na e ne tenye wo Kériso Iésu. 14 ††Ke go cile ehi a [Pwooti Wâé] na ne tem. Be e bo picani tem a Jenen Iitihi na e mulie konye.

Pa béenye Onésifor

15 É ne ko lépwo acéihi mu ha a province Asia, ke go teko temehi pie, lé bitelé kojaéo; wonaa mwo ne ko lupwo bééng, wo Figèle me Ermogène. 16 Te icehi Onésifor. Ke wâé hemepie wo Padaame, ke me e ne a pipwoééhe ten me de a pwomwoiu ten. Be e tee cuwo ko picani tong, ke time uce mwotieng me e pwokarépu pwohewiiéo †. 17 Be é he e tuiebé ha a pwomwo ubwo *Rome, ke time uce mwaale nang ko haneéo ati he ni piduaan, ke e te tooéo.

18 Ke go teko temehi ehi ati ni penem na wâé na e pwo me dong ne ha amu ten é Éféso. Ke é ile Padaame me e habwii ten a pipwoééhe ten ††, ha ace Tan celi e bo tauti a bwohemwo wo Padué.

Pa coda na e piténede Padaame

2 É mu ko ati [ni naado naa] go pa naîng, ke wâé heme go cumang ne ko a *pipwoééhe tice ja kon de Kériso Iésu. 2 A pwooti na go caa téne heme é pii ne ânebuhe ni apulie na hiwon jélé, ke wâé heme go ne te ni apulie na mwomwon jélé, lépwona jan ne kolé me lé pacémuni ni béé apulie.

† 1.2 Apostolo 16.11; 1 Timoté 1.2 †† 1.3 Apostolo 23.1 † 1.5 Apostolo 16.1 †† 1.6 1 Timoté 4.14 †† Miû na e caa pwo me e mele...éle mwo—ai A miû, na wâé heme go pwo me junihe tole. ††† 1.7 Roma 8.15 ††† Go nemwo pwo me mwotiko—A pwooti tanim he pwo grek, ke a bwopiinen pie Mwotikenye ne éni, ke é ne ha a niide a tii 12 ke 16. § 1.9 Éféso 2.8–9; Tit 3.5

† 1.10 Ébéru 2.14 ††† Weengaa a Pwooti Wâé ten—ai É mu ko a Pwooti Wâé. §† 1.11 1 Timoté 2.7 ††† Ali e ne tong—Wieli a mulihe Paulo, ai wieli a Pwooti Wâé. †† 1.14 1 Timoté 6.20 †† Time uce mwotieng me e pwokarépu pwohewiiéo—Grek: Time uce tanim nang ko ni itihe toki kong. ††† A pipwoééhe ten—ai A pipwoééhe te Padué.

³ †Go pé ce dem mu ko ni picani na genye mu hen, pwohewii pa coda te Kériso Iésu. ⁴ Be pa coda na nimen me e piwâeng wo pa caa ten, ke time e uce neni-men ne ko ni penem na e pwomwo koja a mwocoda. ⁵ ††Ke wo pace ajele, ke te tice cemen hemepie time e uce âcehi ni patén ko a jele.

⁶ †[Pwohewii ali nye mu pii pie]: Wo pana e te nihe penem he ni apwoamu, ke e o te mi pé ni acehi ni penem den. ⁷ Go pitautinaado ehi ne ko nina é ko pii tem, be e o bo pwo me go temehi ati wo Padué.

Wo Iésu ke pa béhabwiinen denyé

⁸ †Wâé heme go piniimihi pie, e caa mulie cemwo mu ha amele wo Iésu Kériso, pa piebehi pa daame *Davita. Weengaa kuti a Pwooti Wâé na é ko pateme-hi.

⁹ †Ke é ko mu he ni picani mu ko a Pwooti Wâé naa, ke lé taa kong ni itihe toki pwohewii pace ataunuhi apulie. Kehe pwocoon me lé taa a pwooti te Padué! ¹⁰ Ke é te pé ne huíng ati ninaa, be me de nina e pipé-galilé wo Padué. Ke me woélé mwo, ke me celuimilé mu ko Kériso Iésu, ke me lé mulie ha *a wâé na ubwo [te Padué] dieli mwo. ¹¹ ††Be a juuju a pwooti [na nye mu pii pie]:

Hemepie genye mele me Iésu,
ke genye o te mulie mwo
me weeng.

¹² ††Ke é hemepie genye cumang,
ke genye o pihuô me weeng.
Kehe mepie muhi tenye kon,
ke weeng mwo,
ke o te muhi ten konye.

¹³ †Kehe mepie time nye uce cumang,
kehe icehi ana weeng,
ke e te cumang.
Be weeng ke e te mu
ha a bwo mu ten.

Pipwocile nina lé â ité koja a juuju

¹⁴ ††Go paniimihi ni pwooti naa te ati [lépwo acéihi]. Ke go pii me mwoiu telé ne he pwahamii Padué pie, me lé nemwo pitaacunaado. Be te ju piticenaado ne ko ni pwocihe naa, be e pwotahi ne ko lépwona lé ko tabemi.

¹⁵ ††Wogo, ke go mwoiu ne he ni penem dem, ke go pii ehi a pwooti na juuju, beme e o pipwodéén wo Padué ko a penem dem, ke me time o uce tanim go kon.

¹⁶⁻¹⁷ †††Go nemwo mu pele lépwo apulie na lé uti ni jepule na te ju piticenaado ne kon, pwohewii Iméné

† 2.3 2 Timoté 1.8 †† 2.5 2 Timoté 4.8 † 2.6 1 Korénit 9.7
†† 2.8 Roma 1.3; 1 Korénit 15.4 †† 2.9 Éféso 3.1,13; Filipi 1.12–14
††† 2.11 2 Korénit 4.11 ††† 2.12 Mataio 10.33 † 2.13 Roma 3.3–4;

me Filète. Be ni pwooti naa, ke pwohewii ni ahinaado ne he ni ééwé na tee piubwo ngen. Ke e pébé ni huô na time e uce paciiti Padué.

¹⁸ Kehe é ne ko lupwona, ke lu caa piâ ité koja a juuju, be lu pii pie, lé caa mulie cemwo wo lépwo amele, [ke o caa te tice mulie cemwo celi me nye ucéihi]. Ke me lu wonaa, ke lu pwotahi ni céihi te ni béé apulie.

¹⁹ ††Kehe e te mu mang a paan na e ne wo Padué. Weengi ni pwooti na pii ne kon: *Wo Padaame, ke e te temehi nina te ni apulie ten [ke e te alihi ni penem delé me den].*

Nahoum 1.7

Ke a céiu mwo: «Ke wo pana e pii pie, pa apulie te Padué, ke wâé heme e piâ ité koja a ta.»

²⁰ Ha a mwa te paceli te junihe pipwonaado ne kon ††, ke time e o uce mu hen cehi ce tam celi ubwo a cuhin †††. Kehe o te pwo mwo ce tam pule, be te ni pihe ati ni tan. Ke ni tam na junihe wâé, ke ni pihe ni tan na genye pwo ni piwiinaado hen na ubwo. ²¹ Ke hemepie go pétaabwon ni ta pwo tem mu ha a pwonimem, ke ni cémun na gele, ke go o pwohewii a tam na wâé me de Padué. Ke e bo pééko me pa bépenem den. Ke o bo hiwon ce pétaapwo penem celi wâé celi e bo pwo ne kom.

Go cela ko a ta me a gele

²² †††Go cela ko ni bwo niimihinaado na ta te ni ewa, go Timoté. Ke go hane me go mulie ha a mulie na mwomwon ne ha a céihi, me a pipwoééhe, me a péém. Be weengaa a bwomu te lépwona lé paciiti ††† Padaame, mu he ni ju pwonimelé na wâé ne he pwhamiin.

²³ ††Go nemwo pipéce ne ko ni piche na tice ânen, ke piticenaado ne kon, be e âbé mu ko ninaa ni pitaacunaado. ²⁴ Kehe wo pana e pipwoeabwé te Padaame, ke wâé heme time uce pa ataacunaado. Ke wâé heme bwala nang, ke me e pé ne kon ni naado na lé pii ne kon. Ke me e temehi pacémunilé ehi.

²⁵ Be wâé heme e temehi cihe me bwala ne ko lépwona lé cubwonieng. Ke é mulang, ke e bo picani telé wo Padué me lé pininim, ke me lé temehi a juuju. ²⁶ Ke lé o bo wie mu he ni pwojé te *Caatana na e teko imwilé. Ke o caa time lé uce pwo nina nimen kon, be caa wâé ni bwo niimihinaado telé.

Tit 1.2 †† 2.14 1 Timoté 6.4; Tit 3.9 ††† 2.15 1 Timoté 4.6 †† 2.16 1 Timoté 4.7 ††† 2.17 1 Timoté 1.20 †† 2.19 Ésaie 52.11; Ioane 10.14; 1 Korénit 8.3 †† A mwa te paceli te junihe pipwonaado ne kon—Grek: A mwa na ubwo. ††† Ce tam celi ubwo a cuhin—Grek: Ce tam na pwo ko mwani megele me mwani pwojo. ††† 2.22 1 Timoté 6.11 †††† Paciiti—Grek: Tode. 18 2.23 1 Timoté 4.7

O hiwon nina lé pipwohuô

3 [†]Wâé heme go temehi pie, he *ni bénebwéne tan, ke o caa tuiebé ni benaamwon na binyi. ² Be ni apulie ke [o te junihe ta jélé]:

Lé o te piniimilé cehi;
Ke o wâé telé a mwani;
Ke ubwo ni pwonimelé, ke lé o pipii delé;
Ke lé o pii me ta Padué;
Ke o time lé uce piténéde lu nyaa me caa telé;
Ke o caa time lé uce pwo-olé.
Ke o time lé uce paciitihini ni naado na iitihini;
³ Ke mwoiu ni pwonimelé, ke te tice pipwoééhe kolé;
Ke lé pii me ta lépwo béén;
Ke lé mulie hauli;
Ke lépwo a-okéé;
Ke lé cubwonihi ni naado na wâé;
⁴ Ke lé icu lépwo béélé;
Ke lé o pwohewii lépwona pipenem ni punilé ^{††};
Ke lé pipwohauili;
Ke wâé telé a pipwodéén ité koja Padué.

⁵ [†]Ke lé o gahe pwo me lépwo apulie te Padué, ke lé âcehi ni bwomu te ni acéhi, kehe icehi ana o te tice ni ihe ni céhi telé [ne he ni mulihelé]. Ke go cela ko ni apulie na lé wonaa!

⁶ [Ke mwo teko wonaa jena] be lé mwo te picedi pwomwo wo lépwo béén mu kolé, ke lé pihaami ni toomwo na time uce mang ehi ni céhi telé. Be ni toomwo naa, ke lé te niimihi pie nihe ubwo ni ta pwo telé ^{††}, be te nihe gaale ni pwonimelé ne ko ni pétaapwo naado. ⁷ Ke lé tee cuwo ko picaa ni naado, kehe pwocoon me lé temehi a juuju.

⁸ ^{††}Lépwwo apipune agele naa, ke lé pwohewii Janès me Jambrès ^{†††}, na lu cuwode *Moosé bwolihi. Be ni apulie na lé mu cubwonihi a juuju. Ke time uce wâé ni bwo niimihi naado telé, be te tice paa a céhi telé. ⁹ Kehe icehi ana time lé o uce â ité. Be ni apulie ke lé o bobé alihi a bwo pipwohauili telé, pwohewii ali lé alihi ne ko Janès me Jambrès.

Ni cémun ne te Timoté

¹⁰ Kehe icehi ana wogo go Timoté, ke go caa te nihe temehié, ke [wâé heme] go âcéing na ati he ni naado: ni cémun dong, ke ni bwomu tong, me ni bwo niimihi naado tong; ke a céhi tong ne ha a bwo uca tong; me a pipwoééhe tong, me a bwo cumang dong. ¹¹ ^{†††}Go te temehi mwo a bwo pwotahinaado ne kong, ke ni pi-

[†] 3.1.1 Timoté 4.1 ^{††} Lé o pwohewii lépwona pipenem ni punilé—ai Lépwwo a-okéé. [‡] 3.5 Mataio 7.15,21; Tit 1.16 ^{††} Lé tee niimihi pie nihe ubwo ni ta pwo telé—ai Hiwon ni ta pwo telé. ^{††} 3.8 Exode 7.11 ^{†††} Janès me Jambrès—Wielu lupwo apulie mu ko lépwwo apwotuté te pa daame Faraô na lé pwobwoni Moosé ne Aigupito. Omehi Exode 7.11,22. ^{†††} 3.11 Apostolo 13.14–52, 14.5,8–20

cani na é mu hen, ne Antioche ne Pisidi, ne Ikone, ke é ne Listre. Kehe icehi ana e te celuimié mu he ni naado naa wo Padaame. ¹² [§]Ke te wâé, be heme nimenye me nye âcéi Kériso Iésu, ke me nye mulie ha a mulie na wâé te Padué, ke lé o te pwotahinaado ne konye.

¹³ Kehe é ne ko lépwona ta jélé me lépwwo apipwohuô, ke lé bobé te junihe pwo kuti nina ta. Ke lé bo pipwohuô te ni béén, kehe icehi ana o bo uce te pipwohuô telé mwo.

¹⁴ Kehe wogo, ke wâé heme go âcehi a juuju na go caa picaa, ke nina go caa céhi ne kon. Be go te temehi lépwona lé pacémuniko. ¹⁵ Be go temehi ni *tii iitihini mu ha a bwo ewa go. Ke e ne tem a bwo temehinaado ko a bwo celuimikenye mu ko a céhi tenye ne ko Kériso Iésu.

¹⁶ ^{§†}Be lé tai âbé mu pele Padué ati ni pwooti ne he ni tii iitihini, beme picaa tenye ana juuju, ke me patemehi tenye ko ni cémun na gele, ke me pamwomwonikenye, ke me e pacémunikenye ko a bwo mulie ha a mulie na wâé ke mwomwon ^{§††}. ¹⁷ Te é mu ko ni tii iitihini na [e penem konye wo Padué, beme] wogenye lépwwo apenem den ^{§†}. Ke e pipwopweekenye beme nye pwo ati ni naado na wâé.

Go patemehi a pwooti te Padué

⁴ E bo âbé pihuô te ni apulie ati wo Kériso Iésu, ke e bo tautilé: nina lé mwo mulie me lépwona lé caa mele. É mu ko anaa, na é huôhi ne tem ne he pwhamiin, ke é ne he pwhamii Padué pie: ² Go te cuwo ko patemehi a pwooti te Padué, ati he ni benaamwon, hemepie wâé, ai hemepie ta. Ke go pacihe lépwona lé pwo nina ta. Ke go picani ne kolé, ke go ne ni pune te ni apulie, ke go pacémunilé ehi, ke go pamwoiulé, ke go pwo ati ninaa ne ha a piuca.

³ ^{§††}Be e o caa tuiebé a benaamwon na o caa muhi te ni apulie me lé téne a [pwooti te Padué na] a juuju. Kehe lé o te âcehi nina nimelé kon na ta. Ke lé o tee hane lépwwo caa te cémun celi hiwon jélé, celi lé ju pii cehi nina wâé telé me lé téne. ⁴ Be bwéjé jélé ne ko a juuju, ke lé bwo te tabemi ni jepule na gele.

⁵ Kehe wogo, ke wâé heme go pipwoiipiko ne ha ati ni naado. Ke go pé ne huïm ni picani, ke go cumang. Ke go patemehi a Pwooti Wâé, ke go panebwénihi ati ni penem na e ne tem wo Padué, be wogo ke pa apenem den.

É caa pwo a pa na wâé

⁶ ^{§†}É ne ko woé, ke é o caa patupwo a mulihung beme é *pwoâpwailo kon te Padué. Be e o caa tuie a be-

[§] 3.12 Mataio 16.24; Ioane 15.20; Apostolo 14.22 ^{§†} 3.16 Roma 15.4 ^{§††} Pacémunikenye ko a bwo mulie ha a mulie na wâé ke mwomwon—ai Patemehi tenye ni naado na wâé, ke ni naado na ta. ^{§†} 1re phrase—Grek: Beme o hején pa apulie te Padué. ^{§††} 4.3.1 Timoté 4.1 ^{§†} 4.6 Filipi 2.17

naamwon na é o caa mele hen. ⁷ †É caa pwo a pa na wâé, ke é caa panebwénihi a pitéte tong, kehe é te imwi mangihi a céihi tong ††. ⁸ †Ke é ha a benaamwon ce, ke e ko ucéié na a cemung: a kuron na e bo ne tong wo pa atautinaado na mwomwon nang, ha a Tan na e bo tauti ni apulie hen. Be e bo ne te ati lépwona eânimelé ten, ke lé ucéihi a tan na e bo âmwobé hen.

Bénebwéne pwooti

⁹ Wâé heme go epin bé céiié. ¹⁰ ††Be e caa engen kójaé wo Démas, be te junihe wâé ten ni naamu a bwohemwo ce, ke e â Tésalonik. Kehe wo Kresen, ke e â Galat; ke wo Tit, ke e â Dalmati. ¹¹ Ke te icehi Luka na ko e éni pelong. Kehe go hane Maréko, ke go todeeng me e âbé céim. Be pana e te nihe picani tong ne he ni penem na e ne tong wo Padué. ¹² É ne ko Tichike, ke é neeng nge Éféso.

¹³ ††Hemepie go bo âbé, ke go bwo pébé a palito li é ne pele Karpus ha a pwomwo ubwo Troas. Ke go bo pé mwobé ni tii tong; ke go nemwo neuhi ni tii li tii ne pwo li imuto ††.

¹⁴ †††E te nihe pwo tong ni naado na ta wo Alexandre, pa acii toki. Kehe icehi ana wo Padaame, ke e bo te ne ten ce cuhi ni penem den [na ta]. ¹⁵ Ke go pipwocileeng, be e te junihe cubwonihni ni pwooti teme.

† 4.7 1 Timoté 6.12 †† É te imwi mangihi a céihi tong—ai Ke é caa piténedehi, dieli ha anebwén kon. † 4.8 1 Korénit 9.24–25 †† 4.10–11 Apostolo 15.37–39; 2 Korénit 8.23; Kolosé 4.14 †† 4.13 Apostolo 20.6 ††† Tii li tii ne pwo ni imuto—Parchemins. Ubwo a cuhin koja ni pwopie (papyrus), be nihe mwoiu. ††† 4.14 Psaume 62.13; Roma 2.6; 1 Timoté 1.20

Lé tai patupwoéo

¹⁶ É ha a tan na tabuhi tautié hen ne he mwopitautinaado, ke te tice celi lé picani tong, be lé te tai patupwoéo. Kehe wâé heme e pineulé wo Padué. ¹⁷ Kehe icehi ana e te picani tong wo Padaame, ke e te pamwouié. Ke e ne tong a niihen beme é patemehi ati a pwooti ten ne te lépwona time uce lépwo *Juif na lé mu éni. Ke e celuimié mu ha a pwo liô [§] [a bwopiinen pie ha a mele]. ¹⁸ [Ke é te temehi pie] e o bo te celuimié koja ati ni béé naado na ta, ke e bo pééo da ha a Mwametau ten he *miiden. Me paunueng ke adéieng dieli mwo! Wâé heme wonaa! Amen!

Bépinelé

¹⁹ ††Bwocu te Priscile me Akilas me a pwomwoiu te Onésifor. ²⁰ †††E te mu Korénit wo Éraste. É ne ko Trofime, ke é âbé kojaeng ne Milet, be cunu nang.

²¹ Timoté, go piepin bé, ânebuhe a benaamwon na ubwo a bwala hen.

Lé pii pie me bwocu tem wo Eubule, ke Pudens ke Lin, me Klaudia, ke ati ni béénye na lé céihi ne ko Kériso na élé éni.

²² Wâé heme e pelem wo Padaame [go Timoté]. Ke me e mu pelewé ati a *pipwoééhe tice ja kon den.

Adéikewé!

§ Liô—Lion. †† 4.19 Apostolo 18.2; 2 Timoté 1.16–17 ††† 4.20 Apostolo 19.22, 20.4; Roma 16.23

Tit

nge céii

Atabuhi ko a tii

Woo na e tii a tii ce?

Wo Paulo, pa apostolo.

E tii éniile?

Ha awieme a jo 62 me 66, ânebuhe a bénebwéne bwo mu te Paulo he karépu ne Rome, me a bwo mele ten nelang. Wieli e mu Macédoine wo Paulo. Omehi Atabuhi ko a tii . E tii ha a benaamwon na e tii a bécéiue tii ten ne te Timoté.

E tii me dee?

Te Tit, pa naî pa céiu Grek, na e mu pwo a één Krète. E céihi ne ko Iésu mu ko Paulo (1.4). É ha a jo 46, ke e âcén nge Iérusaléma (omehi pwahamii tii 2). Ke 10 ni jo alecehen, ke e âcéri Paulo ha a bécéiue bwo engen den, ke lu pipenem ibu, beme lu pipatemehi a Pwooti Wâé (omehi pwahamii tii 2, 7, 8, me 12). É alecehen, ke wo Paulo, ke e neeng nge Krète, beme e pihuô te ni acéihi (1.3).

É ko ade na e tii?

Nime Paulo me e ne ce cémun de Tit, beme e pwoiipihii a bwo pimu ibu te lépwo acéihi ne Krète.

Ade ace âne a tii ce?

Wo Paulo, ke e paniimihi te Tit, ke e pii ten a bwo mulie te pana nimen me e pihuôhi ni acéihi. Ke e ne mwo ni pune te lépwo acéihi: te lépwo ukéiu, te ni ewa toomwo, te ni ewa aiu, me lépwo acéihi na lépwo apenem tice ja kon te lépwo apulie na pwo naamuulé. Ke e patemehi telé a mulie na wâé te Padué.

A bwomune a tii te Tit

Pipwobwocu

Pé ehi ni acéihi @ ke cubwoni lépwo apwopune na lépwo agele

A bwo mulie ha a mulie na wâé

A bwo pacémuni ni acéihi

A mulie na mwo coho

Bénebwéne pwooti ke bépinelé

Pipwobwocu

1 Woéo Paulo [na é pwotii lé céiiko, go Tit]. Woéo pa eabwé te Padué, ke é *apostolo te Iésu *Kériso.

[E pahedeéo wo Padué] beme é ne me piubwo da a céihi te lépwona e caa pipégaliilé. Ke e pahedeéo, beme é patemehi a juuju ko Iésu, beme lé mulie, ke me lé mu mang ko Padué. ²†Ke me wonaa, ke lé o céihi

† 1.2 Kolosé 1.27

me ubwo pie, e o mu kolé a *mulie dieli mwo ne pele Padué. Be ânebuhe [a bwo ne na a bwohemwo] ke e caa mi pii pie, e bo ne tenye a mulie naa, ke time e uce gele.

³ Ke é ha a benaamwon na e caa te mi pacuwohi wo Padué, pa *aceluiimikenye, ke e caa patemehi a pwooti ten naa, ke e pahedeéo beme é pipatemehi.

⁴††Wogo Tit, ke go pwohewiin heme te pa ju naîng, mu ko a céihi na e pineibukenyu. Wâé heme e mu kom

†† 1.4 Roma 1.7; 2 Korénit 8.23; Galat 2.3; 2 Timoté 4.10

a pipwoééhe me a péém na e âbé mu ko Padué henye me Kériso Iésu, pa aceluimikenye.

Go pé ehi ni acéihi

⁵ É he li é pineko ne pwo a één Krète, ke é pii tem pie, me go bo tee panebwénihi ni penem denyu nelang. Be wâé heme go ne ce apihuô te ni acéihi, ne he ni béé mwopopwaalé.

Pipégali ehi ni apihuô

⁶⁻⁷ †Mepwo é ne ko pa apihuô te ni acéihi, ke wâé heme a mulihen, ke me pipwoiipihhi, ne ânebuhe ni apulie ati, beme te tice celi me tautieng kon:

Me e te mu ehi ko ê mwoden ††;
 Me time e uce pipaunueng;
 Me time uce pa aûdu;
 Me time uce pa a-okéé, me pa apipiéi;
 Me time e uce pipwohuô beme hane mwani;
 Ke wo lépwo naïn, ke me lépwo acéihi ne ko Iésu, ke me lé piténéelé, ke me time lé uce mulie hauli.

⁸ Wâé heme:

E hegi ehi ni apulie na lé tuie ne pelen;
 Ke me eânimen ko ni naado na wâé;
 Ke me e pininim ehi;
 Ke me e mwomwon ke e pipwoiipieng.

⁹ Ke wâé heme e âcehi a pwooti na juuju, na patemehi [te ni acéihi]. Ke me wonaa, ke o juuju a pune, na e ne te ni apulie, ke e pamwoiulé kon. Ke o jan me e pate-mehi te lépwona lé pwobwonihhi a pwooti.

Go capuhi ni pwo ni agele!

¹⁰ †Te nihe hiwon ni apulie na time lé uce piténédehi, ke lé pigeti ni apulie ko ni pwooti telé, na piticenaado ne kon. Lé te nihe mu pele ni Juif na lé caa céihi [ke lé wâgo ko ni béén pie, me *pwotegoop telé]. ¹¹ ††Wâé heme go capuhi ni pwolé. Be lé pacémuni ni apulie ko ni naado na time uce ni juuju, ke lé pwo me pipenem a céihi te ni pwomwoiu. Ke a céiu mwo, ke lé hane mwani ko ni gele na lé pii.

¹² Be te pa céiu apulie pitemang mu pele lépwo apulie Krète, na e pii ko ni béén ne ha a puapulie ten pie:

«Pa apulie mu Krète,
 pa agele, me pa apwoemaan.
 Te nihe pa awiinaado.
 Time e uce piténédekenye;
 pa wota apiwii!»

† 1.6 1 Timoté 3.2–7; 2 Timoté 2.24–26 †† E te mu ehi ko ê mwoden—Grek: Te céiu ê mwoden. ‡ 1.10 1 Timoté 4.7 †† 1.11 2 Timoté 3.5–6; 1 Pétéru 5.2

¹³ ††A pwooti naa, ke te a juuju. É mu ko anaa kuti, ke wâé heme go pacuwolé me péélelé, beme mwomwon a céihi telé. ¹⁴ †††Ke go pii telé pie, me lé nebwén na lé tee tabemi ni jemaa ke ni huô na gele te ni béé *Juif. Be lé jéilé ne ko a juuju. ¹⁵ [Lé paciitihhi me nye nemwo wii ni béé wiinaado. Kehe icehi ana nye temehi pie]:

Ati ni naado, ke wâé
 ne te nina wâé ni pwonimelé.
 Te tice celi wâé
 ne te nina ta ni pwonimelé,
 me nina muhi telé me lé céihi.

Wonaa, be ta ni bwo temehinaado telé, me a *pwocihe na e âbé mu he ni pwonimelé. [Be time lé mu uce téele pineitééhi nina wâé me nina ta.] ¹⁶ †††Lé pii pie lé temehi Padué, kehe icehi ana é ne he ni bwomu telé, ke lé piâ ité kojaeng. Time lé uce piténédeeng, ke muhi ten ko nina lé pwo. Piticenaado ne ko ati ni penem delé, ke caa te junihe pwocoon me lé pwo ace céiu naado celi wâé.

A bwo pacémuni ni acéihi

Ni ukéiu

² Wogo, go Tit, wâé heme go pacémuni lépwo apulie ko ni cémun na mwomwon. ² Go pacémuni ni ukéiu aiu, beme lé pipwoiipilé, me pipwocilelé. Ke wâé heme lé mulie ne ha a céihi, me a pipwoééhe, me a piuca. ³ †Ke go pii te ni ukéiu toomwo pie, wâé heme lé cile ehi a mulie na wâé ne ale Padué. Ke lé nemwo pipii apulie, ke lé nemwo nihe ûdu tabe megele. Wâé heme lé habwii ne he ni bwomu telé, ni naado na wâé me nye pwo. ⁴ Ke wâé heme lé pacémuni ni toomwo na pwo ni aiu helé, beme:

Lé pipwoééhe ni aiu helé, me ni naïlé;
⁵ ††Lé pipwoiipilé;
 Lé penem ehi ne he ni pomwa telé;
 Lé pwo me piwahin jélé ne ko ni aiu helé.

Ke me wonaa, ke ni apulie, ke me time lé o uce pii me ta a pwooti te Padué.

Ni ewa

⁶ Go pamwoiu ni ewa, beme lé pipwoiipilé. ⁷ †††Ke wogo mwo, na ati he ni bwomu tem, ke wâé heme go habwii telé ni ju bwomu tenye. Ke go pacémunilé, ha a ju pwonimem.

⁸ ††Wâé heme ni pwocihe tem, ke me juuju, ke wâé, beme time lé o uce pipiiko. Ke wo lépwo apwotahinaado ne konye, ke me o tanim jélé, be o te tice celi lé tooli me lé pipii me ta genye kon.

†† 1.13 2 Timoté 4.2 ††† 1.14 1 Timoté 4.7 ††† 1.16 1 Ioane 1.6, 2.4 § 2.3 1 Timoté 3.11 §† 2.5 Éfésó 5.22 §†† 2.7 1 Timoté 4.12 §† 2.8 1 Pétéru 2.15

Ni apenem tice ja kon

⁹ †Wo [lépwo acéihi na] lépwo *apenem tice ja kon de ni apulie, ke wâé heme lé pwo me piwahin jélé ne ko ni caa telé, na ati he ni naado. Wâé heme lé hane ace bwopwonen me piwâé jélé me ni caa telé. Ke me time lé uce hegi ne telé ko a okéé. ¹⁰ Ke me lé nemwo bunelé. Wâé heme lé habwii telé pie lé juuju, ke lé mwomwon ne ha ati ni naado na lé pwo. Ke me wonaa, ke lé o alihi wo lépwo apulie pie a pwooti te Padué, pa *aceluimikenye, ke a naado na nihe wâé, ke *adéihi.

A mulie na mwo coho

¹¹ Wo Padué, ke e caa habwii a *pipwoééhe tice ja kon den, beme e celuimi ati ni apulie. ¹² ††Ke e pacémunikenye ko a pipwoééhe ten naa, beme nye necu ati ni huô na time nye uce paciiti Padué kon, me nina te nimenye kon na ta. Ke me wonaa, ke nye mulie ha a benaamwon ce, ha a mulie na pipwoiipihi, ke mwomwon, ke nye paciiti Padué.

¹³ Genye *ucéihi ne ha a céihi a tan na te nihe wâé. É ha a tan naa, ke e bo mwojuia mwo wo Iésu Kériso ne ha a bwo ubwo na a wâé ten. Be weeng Padué henye, ke pa aceluimikenye. ¹⁴ †E caa patupwo a mulihen, beme e tuwokenye koja ati ni bwomu tenye na ta. Ke e pwo me wogenye a puapulie ten, na caa tice ta kon, ke te cuwo ko nimen me e pwo ana wâé.

¹⁵ †Weengaa ana wâé heme go pacémuni ati ni apulie kon, ke go pamwoiulé, ke go pacihelé. Be etem a mwomwon me go wonaa. Ke go nemwo uce pwo me e téétiko wo pace céiu apulie.

Geé hane me geé pwo ana wâé

3 ††Go paniimihi [te ni acéihi na élé pelem ne Krète] pie, me lé pwo me piwahin jélé ne ko ni daame, me ni apihuô, me ni gupéno, ke me lé piténédelé. Ke wâé heme lé te cuwo ko hane me lé pwo ni penem na wâé. ² Lé nemwo pii me ta ce béé apulie. Ke lé nemwo pitaacunaado. Wâé heme lé pipwoiipilé, me bwala jélé, ke me lé pwo me piwahin jélé, ne ânebuhe ati ni apulie.

³ ††A juuju pie, é ha a benaamwon na mwo time celuimikenye, ke mwo te tice aceli nye temehi [ne ko Padué]. Ke muhi tenye me nye piténeeng. Ke nye pipatupwokenye, beme nye piâ ité kojaeng. Ke wogenye ni *apenem tice ja kon ne ko nina te nimenye kon na ta, me ni pipwodéén hauli. Nye mulie ha a mulie na ta. Nye pitaaba. Ke pimuhi tenye konye. ⁴ Kehe icehi ana:

E habwii a bwo wâé nang wo Padué pa *aceluimikenye, be e pipwoééhenye.

⁵ ††E te celuimikenye cehi ko a *pipwoééhe tice ja kon den, kehe time uce wogenye, na genye piceluimikenye ko ni penem denye.

E ne me puukenye ko a *Jenen Iitih.

[E puu ni ta pwo tenye mu he ni pwonimenye.]

E ne me nye âbeele cemwo, ke e ne tenye a mulie na mwo coho.

⁶ †E ne konye a Jenen Iitih mu ko Iésu Kériso, pa aceluimikenye.

⁷ E ne me nye mwomwon ne ânebuhen, mu ko a pipwoééhe ten.

O mu konye a *mulie dieli mwo, be e caa mi pii, ke genye te céihi ne kon.

⁸ Weengaa a pwocihe na a juuju.

Necu ni picihe ko a pwoiitih

Nimung go Tit me go mwoiu ko pii ninaa, te ati lépwo acéihi ne ko Padué. Be me wonaa, ke me lé te cuwo ko pwo ni penem na wâé. Ke me nina lé pwo, ke o wâé heme junaado ne te ni apulie ati. ⁹ ††Go pile ni jepule hauli ne ko ni nii ni watihenye: [ni bwo pipii delé ne ko a pwoiitih]. Go cela ko ni pitaacunaado ko ni *patén de Moosé. Be ati ninaa, ke piticenaado ne kon, ke time uce ni naado na e picani tenye.

¹⁰ ††Hemepie pwo pace apulie celi e pwo me time lé uce piténéle ne ni acéihi, ke go cihe ten a bécéiuhén, ke a béalohen. [Ke mepie time e uce piténédeko] ke go neeng ité koja ni acéihi. ¹¹ Be pa apulie na e wonaa, ke e caa padep koja a juuju. Ke e pwo ana ta, ke e te picieeng mwo.

Bénebwéne pwooti

¹² †É bo ne lé céiiko Artémas, ai wo Tichike. Ke mepie e tuié lé, ke go piepin ko âbé tooéo ne ha a pwomwo ubwo Nikopolis. Be nimung me é mu lang, ha a benaamwon ko ta-amu. ¹³ ††Ke go picani te Zénas pa avoka †, me Apolos, ke geé piwâam ko a bwo engen delu kojakewé, beme o te tice celi tice telu. ¹⁴ ††Be me wonaa, ke ni acéihi béénye [ne Krète] ke me lé picaa a bwo

† 2.9 1 Timoté 6.1 †† 2.12 1 Ioane 2.16 † 2.14 Exode 19.5; Deutéronome 4.20, 7.6; Ézékiel 37.23; Galat 1.4; 1 Pétéru 2.9 †† 2.15 1 Timoté 4.12 †† 3.1 Roma 13.1–7; 1 Pétéru 2.13–14 ††† 3.3 1 Korénit 6.11; Éféso 2.2, 5.8

††† 3.5 Éféso 5.26; 2 Timoté 1.9 § 3.6 Apostolo 2.17–18 †† 3.9 2 Timoté 2.14, 16 ††† 3.10 Mataio 18.15–17 †† 3.12 Éféso 6.21–22; Kolosé 4.7–8 ††† 3.13 Apostolo 18.24; 1 Korénit 3.5–6, 16.12

pwo ne nina wâé, beme lé picani te nina tice telé. Be wâé heme pwo ce acehi ni penem delé.

Bépinelé

¹⁵ Ati ni acéihi na élé pelong, ke lé adéiko. Ke go pwobwocu te ni ju béénye ne ha a céihi, na élé lang.

§† *Pa avoka—Avocat. Pa apipwopainye ne he mwotautinaado.*

§‡ 3.14 *Éfeso 4.28*

Ke me e mu pelewé ati a pipwoééhe tice ja kon de Padué.

Adéikewé!

Filémon

nge céii

Atabuhi ko a tii

Woo na e tii a tii ce?

Wo Paulo, pa apostolo. Ke e mu pelen wo Timoté.

E tii éniile?

Ha awieme a jo 60 me 62, ha a bécéiue bwo mu he karépu te Paulo ne Rome . Ha a benaamwon naa, ke e tii ni tii na paa: a tii ce, nge céii Filémon; ke ni béé tii mwo nge céii lópwo Éféso, ke lópwo Filipi me lópwo Kolosé.

E tii me dee?

Te pa céiu acéihi na a niin pie Filémon ne ha a pwomwo ubwo Kolosé. Pa béé Paulo ko penem (1.1), ke pa apulie na pwo naamuun, be pwo ni apenem tice ja kon den.

É ko ade na e tii?

Wo Onésime, pa apenem tice ja kon de Filémon, ke e bune ni mwani ten, ke e cela. Ke e tehene nge ha a pwomwo ubwo Rome, ke pitapitilu me Paulo nelang. Ke é mu ko a pwooti te Paulo, ke e céihi ne ko Iésu wo Onésime. Ke wo Paulo, ke e neeng ngemwo pele Filémon. Ke e pwotii nge céiieng, beme e hegi mwo Onésime, pwohewii pa acéihi béén ne ko Iésu.

Ade ace âne a tii ce?

Ha a benaamwon na lé pihuô hen wo lópwo Roma, ke hiwon ni apulie na pwo ni apenem tice ja kon delé. É ne he ni bwo niimihi nen de ni apulie na hiwon jélé, ke piticenaado ne ko ni apenem tice ja kon delé. Kehe icehi ana e habwii wo Paulo pie, genye nemwo niimihi anaa, wogenye lópwo acéihi ne ko Iésu. Be e pii te Filémon pie, wo Onésime, ke caa time uce pa apenem tice ja kon den cehi. Kehe caa pa acéihi béén ne ko Padaame. Ke wâé heme e hegieng wo Filémon, ha a pipwoééhe (1.16), ke me e pineuhi ni ta na e pwo.

E temehi wo Paulo pie, e okéé wo Filémon, ko a ta na e pwo ten wo Onésime, ke é nelang he na genye alihi pie, e paciheeng me bwala, ne ha a pipwoééhe.

É ne ha a tii ce, ke genye alihi mwo a ocine ne ko a bwopwonen de Kériso tenye ni apulie na nye pwo nina ta. Be e pineukenye, ke e hegikenye. Ke e pii pie, wogenye lópwo béén. Ke pwohewii ana e pwo me de Onésime wo Paulo (1.18–19), ke e pwocuhi ati ni kérédi tenye wo Kériso, ko a bwo mele ten me denye.

A bwomune a tii te Filémon

Pipwobwocu

A pipwoééhe me a céihi te Filémon

Go hegi mwo Onésime

Bépinelé

Pipwobwocu

1 Woéo † Paulo na é pwotii lé céiiko, go Filémon, pa bééng ko a penem, na te nihe eânimung dem. É ko mu he karépu, mu ko ni penem dong me de

*Kériso Iésu. Ke [e ne bwocu tem mwo] wo Timoté, pa céiu acéihi béényu. ² ††Ke [go ne a bwocu temu] te

† Woéo—Grek: *Wogemu*. Wo Paulo na e pwotii, kehe icehi ana e habwii pie, céiu pwonimelu me Timoté na e mu pelen. †† 1.2 Kolosé 4.17; 2 Timoté 2.3

Apia, ê céiu béényu, ke wo Arkipe, pa béényu ko pwopa [me de Padaame henye Iésu Kériso]. Ke [go pwobwocu mwo] te ni béé acéihi, na lé pineibulê ne he pomwa tem. ³ Wâé heme etewé a *pipwoééhe tice ja kon me a péém na e âbé mu ko Padué Caa tenye me Padaame henye Iésu Kériso. Adéiko!

A pipwoééhe me a céihi te Filémon

⁴ Tee ati he ni benaamwon na é mu pwoiitihi hen, ke é pwo-olé te Padué kom. ⁵ Be é téne ni jepule ko a céihi tem ne ko Padaame Iésu, me a bwo pipwoééhe tem ne ko ati ni acéihi. ⁶ É ilehi koja Padué pie, wâé heme te nihe ubwo da a pipwoééhe tem ne ko lépwo béém acéihi †. Ke ni apulie ††, ke lé o alihi ehi ati ni pétaapwo naado na wâé, na e konye, mu ko Kériso. ⁷ *Te nihe pipwodéén a pwonimung, go pa ju bééng, ko a pipwoééhe tem. Be go pwopweehi ni pwonime ni apulie te Padué, ke anaa kuti ana e pamwouiéu.

Go hegi mwo Onésime

⁸ [É mu ko a pipwoééhe tem] ke time é uce pi-imwiéu, me é ilehi kojako [pie, me go hegi ehi pa ju bééng †]. Te jan ne kong me é pihuôhi ne tem anaa, ne he nii Kériso. ⁹ Kehe icehi ana é te ju ilehi kojako, be te nihe eânimung dem, woéo Paulo, na caa pa apulie pwonimung †, ke é ko mu he karépu, [mu ko ni penem dong] me de Kériso Iésu.

¹⁰ †† Weengi ana é ilehi kojako: Me go hegi mwo pa *apenem tice ja kon dem [li e cela kom]: wo Onésime. Be [caa pa acéihi] he é mu éni he karépu. Ke caa pa naîng ne ha a céihi.

¹¹ [A nii Onésime, ke a bwopiinen pie 'pa apicani tenye'.] Ke é hemepie time e uce picani tem ânebun, kehe é jena ni, ke e te nihe picani tenye.

É neeng mwo lé céiiko

¹²⁻¹³ Be pana te junihe e ha a pwonimung. Ke te nihe nimung me é te imwieng ne éni pelong, ha a benaamwon ce, beme e mwo picani tong, he mwo ko tieko. Be é mwo mu he karépu mu ko [a bwo patemehi nen

† A pipwoééhe tem ne ko lépwo béém acéihi—Grek: A pimu ibu ne ha a céihi, ai A bwo pipatemehi na a céihi. †† Ni apulie—ai Go. † 1.7 2 Korénit 7.4 †† Me go hegi ehi pa ju bééng—Ni pwooti na e mu ha a niide a tii 17. †† Woéo...na caa pa apulie pwonimung—ai Woéo pa apulie na e pahedeéu ngen wo Kériso. ††† 1.10 1 Korénit 4.15; Kolosé 4.9

dong] a *Pwooti Wâé te Iésu Kériso. Kehe icehi ana é o neeng mwo lé céiiko, ¹⁴ hemepie nimem. Kehe time é o uce wonaa hemepie te muhi tem. Be wâé heme go hegieng †† ha a ju pwonimem, kehe me time uce é mu ko a bwo huôhi ne tem dong.

¹⁵ A juuju pie, pwo a céiu benaamwon na time geu uce pimu ibu hen. Wieli me wonaa, beme geu bo pimu ibu mwo dieli mwo. ¹⁶ † Be é jena ni, ke caa time uce pa apenem dem cehi, kehe caa pa âjiényu mwo ne he nii Kériso. Caa pa ju bééng, ke wogo, ke wâé heme go te nihe piwâéeng. Be pa apenem dem, ke a céiu mwo, ke caa pa acéihi béém ne ko Padaame.

Go hegieng pwohewii ne kong

¹⁷ Hemepie junaado ne tem pie wogenyu lupwo béén [ne he nii Kériso] ke go hegieng mwo, pwohewiin heme woéo. ¹⁸ Ke mepie e bune ace céiu naado kojako ††, ke mepie e pwo ace naado celi time uce wâé, ke go ne he niing ati. ¹⁹ Woéo na é tii ni atii ce, ko a ing: *Woéo Paulo, na é bo pwocuhin ne tem.* Kehe icehi ana wogo mwo, go pa bééng, ke wâé heme go niimihi ††† pie, é mu kong li go hegi *a ju mulip. ²⁰ É mu ko anaa, ke é ilehi kojako go Filémon pie, go pwo ana é pii, ne he nii Padaame, beme o wâé a pwonimung, be wogenyu lupwo acéihi ne ko Kériso ††.

²¹ É caa céihi ne ko a bwo piténehehi tem. Ke anaa é pwotii lé, be é temehi pie, go o bo pwo celi nihe piubwo koja nina é ko pii lé.

Bépinelé

²² ††† Niimihi pie [wo Padué, ke e] o caa ne me é âdé caniêkewé ati, wonaa mu ko ni pwopwoiitihi tewé. Ke go pwopweehi ace nemwa celi me é mu hen. ²³ †† E pwobwocu tem wo Épafras, pa bééng ko a mu éni he karépu, mu ko [a bwo patemehi nen den] Kériso Iésu. ²⁴ †† Ke lé pwobwocu tem mwo wo Maréko, me Aris-tarke, me Démas, me Luka, lépwo bééng ko a penem.

²⁵ Wâé heme tai e pelewé ati, a pipwoééhe tice ja kon de Padaame henye Iésu Kériso!

Adéikewé!

††† Go hegieng—Grek: A naado na wâé na go pwo. † 1.16 1 Timoté 6.2 †† Mepie e bune ace céiu naado kojako—Grek: Mepie pwo kérédi ten ne pelem. ††† Wâé heme go niimihi—Grek: Time é o uce pii tem. †† Be wogenyu lupwo acéihi ne ko Kériso—ai Ne he nii Kériso. ††† 1.22 Filipi 1.25, 2.24 †† 1.23 Kolosé 1.7 †† 1.24 Kolosé 4.10–12, 14; 1 Timoté 4.10–11

Ébéru

Atabui ko a tii

Woo na e tii a tii ce?

Time nye uce temehi ace nii paceli e tii a tii ce. Kehe icehi ana nye temehi pie, te pa céiu Juif, na e céihi ne ko Ié-su. Pana e temehi ehi a pwoitihi te lépwo Juif, me a Élele Iitihî Ânebun. Ke pa apulie na e temehi ehi a bwo pwotii he pwo grek, be a bwo pwotii ten, ke te junihe wâé.

E tii éniile?

Ânebuhe a jo 70. Be é ha a jo 70, ke wo lépwo coda roma, ke lé tanahi a mwaiitihî te lépwo Juif ne Iéruusaléma, ke lé pacuwohi ati ni âpwailo te lépwo Juif, na e pii wo pana e tii a tii ce. (Omehi ni pwahamii tii 9 me 10.)

E tii me dee?

Te lépwo Juif, lépwo Ébéru, na lé caa céihi ne ko Ié-su. Wieli lé neibuhi ni pwooti ten na hiwon, ne ha a tii na céiu, beme lé ne te ace céiu puco te ni acéihi.

É ko ade na e tii?

E tii beme lé temehi ehi a penem na e pwo wo Ié-su me delé. Ke e pamwoiulé, beme lé cumang, ke me lé picani ne kolé, be lé ko mulie ha a benaamwon na lé pipwotahi ne kolé.

Ade ace âne a tii ce?

Ati ni patén me ni âpwailo te lépwo Juif ne ha a Élele Iitihî Ânebun, ke te a déme cehi a âpwailo na e pwo wo Ié-su Kériso he e mele me denye. Be a âpwailo ten, ke e taatéehi ati ni âpwailo ânebun. Be, é ne he Kériso, ke wo Padué, ke e pwo ne te ni apulie a piapwo na mwo coho. Wo Ié-su pana e pébé ni adéihi ko ni piapwo, ke weeng pa apipépwotii, ha awiemenye ni apulie me Padué. Be te pa apulie, ke te pa ju naî Padué, na te céiu nang. Be e mu pele Padué Caa, ânebun, ke é dieli mwo. Kehe icehi ana e opé ne éni pwo bwohemwo, ke e pé a éé apulie. Ke e pwo a âpwailo na hején, he e pineeng me e mele. Ke téé a cewéhen he e mele ne ko a kuricé, beme pineuhi ati ni ta pwo tenye. Ke é mu ko Kériso, ke jan me nye â pele Padué ha a pipwodéén. Ke caa time nye uce hane mwo me nye pwo mwo ace céiu âpwailo.

A bwomune a tii Ébéru

Wo Ié-su Kériso, ke e piwéden

E piwéden koja ni âcélo

E pébé a pwaaden na te nihe pwonaado ne kon

E piwéden koja Moosé wo Ié-su

Hegi a ju péém na e pébé wo Ié-su

Wo Ié-su ke pa apipépwotii hadeniinye me Padué

E pé a éé apulie, ke e piténede Padué

A bwo paténe lépwo acéihi

E pacuwohi nina e caa mi pii wo Padué

Wo Melkisédek ke e déme Kériso

Pa apwoâpwailo ubwo tenye wo Ié-su Kériso

Time uce jan ni âpwailo ânebun me pineuhi ni ta

Hején a âpwailo te Kériso

E te océiu ko pwoâpwailo wo Kériso

Ni béhabwiinen de lépwo acéihi
A céihi te ni Isaraéla ânebun
Genye tai cumang pwohewii Iésu
Bénebwéne pwooti

wo iésu kériso ke e piwéden

(Pwahamii tii: 1.1—4.13)

1 É ânebun, ke e pacihe lépwo watihenye † wo Padué, na lé pwaadeniin bé ne ni *péroféta ten, ne he ni bwopwonen na hiwon. ² ††Ke, é ha a benaam-won ce, na caa *ni bénebwéne tan, ke e pacihekenye ko pa Naîn. Be é mu kon, ke wo Padué, ke e tabuhi a miiden me a bwohemwo me ati ni naado na lé mu hen. Ke te weeng kuti, na e pipégalieng wo Padué, beme e bo ne ten ati ni naado naa. ³ †Me genye ali pa Naîn, ke genye alihi *a wâé me a bwo ubwo Padué Caa. Be te piwielu ne ha ati ni bwopwonen. Ati ni naado na lé tuie, ke lé te tai mulie mu ko ni pwooti ten, na nihe pwojunuun.

Te weeng kuti pa Naîn, li e puu taabwon ni ta pwo tenye. Ke é alecehen, ke e mwojuia daamwo he *miiden, pele Padué. Ke wo Padué, pana te nihe pwojunuun, ke e pwo me e tebwo *pwo a juin [beme e pi-huôhi ati ni naado].

E piwéden koja ni âcélo

⁴ ††Wo Padué, ke e ne me e piwéden †† koja ati ni *âcélo wo pa Naîn. Ke e ne ten a nii apulie, na te nihe pwoonaado ne kon, koja ati ni nii apulie. ⁵ †††Be time e mu uce pii te pace céiu âcélo wo Padué pie:

É jena, ke é pii beetihi:

Wogo pa naîng,

ke woéo pa caa tem.Psaume 2.7

Ke a céiu mwo:

O woéo pa caa ten,

ke bo pa naîng.2 Samuel 7.14

⁶ †††Kehe me e habwii pa Naîn †, ne pele lépwo na lé mu pelen, ke e ne ten a mwomwon de pa bécéiuhe ewa. Ke e huôhi pie:

† Watihenye—Wo pana e tii a tii ce, ke pa céiu Juif, ke e tii ne te lépwo béén na te lépwo Juif mwo. Ke lé caa tai céihi ne ko Kériso.
†† 1.2 Ioane 1.3 † 1.3 Apostolo 2.33—34; Kolosé 1.20; Ébéru 8.1 †† 1.4 Filipi 2.9 †† E piwéden—ai E caa piwéden, ai E bo â piwéden. ††† 1.5 2 Samuel 7.14; 1 Chroniques 17.13; Apostolo 13.33 ††† 1.6 Roma 8.29 † Me e habwii pa Naîn... Grek: Me e pé pa cuwo ni ewa ne pwo bwohemwo [monde]. Wieli a bwo pituie te Kériso, ai a bwo mwojuia cemwo ten ha ace céiu tan. A pwooti grek ce, ke a bwopiinen pie: A atebwo, ai a amu, ai a mwametau. Wieli é ne éni pwo bwohemwo, ai hemepie é jeda he miiden.

*Wâé heme ati ni âcélo tong,
ke me lé tai pipaunueng.Psaume 97.7*

⁷ ††Ke mepwo é ne ko ni âcélo, [ni apipenem den] ke e pii wo Padué pie:

É ne me lé pwohewii a dan^{††},

ke me lé pwohewii ni duwele miû.Psaume 104.4

Pwooti ko pa Naîn

⁸ ††Kehe icehi ana weengi ana e pii ne ko pa Naîn:

Te wogo [pa Naîng]

ke wogo Padué^{†††}!

O te tice pwonehi a Mwametau tem.

Go bo Daame dieli mwo.

O mwomwon a bwo pihuô tem.

⁹ *Wâé tem a mwomwon,*

ke muhi tem ko a ta.

Ke woéo Padué Caa tem,

ke é caa pipégaliko[†]koja ni béém.

É céihi a tabe ûde ne pwo punim.

É ne tem a pipwodéén

na te nihe ubwo wéden.Psaume 45.7—8

¹⁰ ††E pii mwo wo Padué ne ko pa Naîn pie:

É ha atabuhi kon,

ke te wogo Padaame^{††},

na go tabuhi a bwohemwo.

Go pwo ko ni im a miiden.

¹¹⁻¹² *O bo tieden a bwohemwo ati,*

me a miiden [me ati nina e mu hen].

Kehe icehi ana te wogo cehi

na go o bo mu dieli mwo.

Go o tapipidulé pwohewii a epwén.

Go o capipilé

pwohewii a ukéiu talihi.

Te wogo cehi na go te mu cawi;

*go te *mulie dieli mwo.Psaume 102.26—28*

† 1.7 Psaume 104.4 †† A dan—He pati ni Ébéru, ke a bwopiine a dan, ke te a jenen mwo. †† 1.8 Psaume 45.7—8 ††† Wogo Padué—Ni pwooti naa na e ha a Psaume 45, ke a pwooti te pa céiu apwonyebi, ko a bwo piaten de pa céiu daame. É ne éni, ke e pii wo pana e tii a tii te lépwo Ébéru, pie, wo Padué Caa, ke e pii anaa te Iésu Kériso, pa Naîn. E wonaa wo Padué beme e habwii te ni apulie pie, wo Iésu, ke pa daame he a bwohemwo ati. † Pipégaliko—Grek: Oint. Omehi note †† 1.10—12 Psaume 102.26—28 ††† Te wogo, Padaame—Ni pwooti naa na e mu ha a Psaume 102, ke ni pwooti te pa céiu apulie te Padué. É ne éni, ke e pii wo pana e tii a tii te lépwo Ébéru pie, wo Padué Caa, ke e pii anaa te pa Naîn, Iésu Kériso.

¹³ †Ke weengi a céiu naado li e pii wo Padué:
Go âbé tebwo éni pwo a juing.
[É ne tem a pihuô.
Ke o pipaunuko dieli mwo.]
É pwo me go caaite
nina lé pipwopa ne kom.Psaume 110.1

Kona géé niimihi pie, e pii anaa te pace céiu âcélo ten?
 [Ôhu! E pii anaa te pa Naîn!]

¹⁴ ††Be mepwo é ne ko lépwo âcélo, ke te ju ni apipen-
 em cehi. Be e pahedelé wo Padué, beme ni apicani
 tenye, wogenye na e bo celuimikenye.

E pébé a pwaaden @ na te nihe pwnaado ne kon

Nemwo pwo me piticenaado ne kon

2 É mu ko anaa †, ke wâé heme genye engen ehi,
 cehi ni pwooti na genye téne. Be koli genye bo piâ
 ité kojan. ² ††Be é ne ko ni *patén de Moosé †, ke e
 habwii pie a juuju, ke e pwo me lé pwocuhinaado ati
 wo lépwona time lé uce ju âcehin.

³ ††Kehe icehi ana [wo Padué, ke] e caa ne tenye a
 pwaaden na te nihe pwnaado ne kon! Ke genye o
 woté ko ace bwo cela tenye ko a cuhinaado, hemepie
 time genye uce âcehi a pwaaden naa?! Be te wo
 Padaame Iésu li e mi patemehi a pwaaden. Ke wo lép-
 wona lé téneeng, ke lé *pajuujuhi ne tenye.

⁴ ††Ke wo Padué mwo, ke e pipajuujueng ne ko ni
 *inenaado na pwojunuun: ni naado na lé o téetihi ne
 ni apulie. Ke e muko ne ni âpipati, na e pwaadeniin bé
 na a *Jenen Iitihi, âcehi ana nimen kon.

E pwo me piwahin nang me denye

⁵ É ko pacihekewé ko a Mwametau ⁵ na e o bo tuie.
 Ke o time uce ni âcélo na e bo nelé me lé pihuô nelang
 wo Padué. ⁶ ††Be e pii ten wo pa céiu apulie, ne ha a
 céiu duaan ne he ni *tii iitihi pie:

Woo pa apulie,
beme go o niimieng, [go Padué]?
Ke é mu ko ade na eânimem
de pa nahi apulie^{††}?

⁷ *Go pineeng ole koja lépwo âcélo*
ha a cuwo benaamwon.
Go ne ten a kuron he daame.
Go pwo me pipaunueng.

† 1.13 Psaume 110.1 †† 1.14 Psaume 34.8, 91.11 † Anaa—A bwo
 ubwo na a wâé te pa Naî Padué, na e pii ehi ne ha a pwahamii tii 1.
 †† 2.2 Galat 3.19 †† Patén de Moosé—Grek: A pwooti na lé pébé
 wo lépwo âcélo, ke e cuwo. Lé pii wo lépwo Juif pie, lé hegi ni patén
 de Moosé na lé pwaadeniin bé wo lépwo âcélo. Omehi Apostolo
 7.53. ††† 2.3 Ébéru 10.29, 12.25 ††† 2.4 Maréko 16.20; 1 Korénit
 12.4, 11 § Mwametau—Grek: Monde. †† 2.6 Psaume 8.5–7
 ††† Pa nahi apulie—A pwooti mu ha a Psaume 8.5–7, na a pwooti
 konye ni apulie. Kehe icehi ana wo pana e tii a tii te lépwo Ébéru, ke
 e pii pie wo Iésu, na pii kon pie, pa Nahi Apulie.

⁸ *Go tai ne haahi ni an*
[me e pihuô ne ko ati ni naado].Psaume 8.5–7

Be te tice ace céiu naado celi e o mu ité koja ni pihuô
 ten ⁸†. Kehe icehi ana é jena, ke genye te ju alihi ehi,
 pie mwo time uce cuwo ati ni pwooti naa. ⁹ †††Ke genye
 alihi mwo pie, e caa neole Iésu haahi ni âcélo, ha a cu-
 wo benaamwon. Be e mu he ni picani, ke e mele me
 denye, ati ni apulie, é mu ko a *pipwoééhe tice ja kon
 de Padué. Ke é mu ko ana e pwo wo Iésu, ke caa ne
 ten a kuron: a bo lépwo daame. Ke genye alihi pie pi-
 paunueng [pwohewii a pwooti naa, ne he ni tii iitihi].

Pa cuwo ati ni naî Padué

¹⁰ Wo Padué, ke e ne ati ni naado me den, ke e tee ko
 wéa kolé. Pwo ni béé naî Padué mwo, na te nihe hiwon
 jélé [wogenye kuti ¹⁰†]. Ke wâé ten, me genye tai mu ha
 a bwo ubwo na a wâé ten, na e pipwaadeniin bé a bwo
 mu he ni picani te Iésu me a bwo mele ten. Ke é mu ko
 anaa kuti, ke wo Padué, ke e ne te Iésu a atebwo na
 hején, ke jan ne kon. Be wo Iésu, ke Padaame na e
 *celuimi ati ni naî Padué, ke e pipéélé nge [ha *a ju
 mulip ¹⁰†].

¹¹ †††Te wo Iésu kuti, na e pwo me pwéelang ni pwoni-
 menye, ke e péékenye, wogenye ni apulie ten, nge céii
 Padué ¹¹†† [pa caa ten] beme céiu pa caa tenye ati me
 weeng. É mu ko anaa kuti, na time uce tanim nang me
 e pii konye pie ni âjiéne. ¹² †††Be weeng na e pii te
 Padué pie:

É bo pipatemehi a niim
te lépwo âjiéning.
É bo pwonyebi ko ni nyebi tem,
heme lé pitapitilé¹⁸.Psaume 22.23

¹³ ¹⁹Ke e pii mwo pie: *Woéo mwo, ke é bo céihi ne ko*
Padué.

Ésaie 8.17

Ke a céiu mwo:
Woéo-ni, me ni béén
na e nelé tong wo Padué,
beme ni naîng.Ésaie 8.18

§† Pihuô ten—ai Pihuô tenye. Wieli e piikenye ni apulie, ai wieli wo
 Iésu Kériso, pa Nahi Apulie. ††† 2.9 Filipi 2.8–9 †† Wogenye ku-
 ti—Geme caa tii pie **wogenyeni** naîn ne he ni niide a tii 10–18, be
 wogenye ni naî Padué, wogenye na nye céihi ne ko Iésu. Omehi
 Ébéru 3.6. †† (Niide a tii)—ai Ati ni naado, ke ni den [de Padué] ke
 lé âbé mu kon, ke lé mu kon. Ke e pé ni naîn na hiwon jélé ne ha a
 bwo ubwo na a wâé ten. Ke wâé ten me e pwo me hején [Iésu] na e
 pwaadeniin bé a bwo mele ten, weeng [Iésu] pana e tabuhi a bwo
 celuimilé. Ni pwooti, ke lé pwo me hején [Iésu] ke wieli a bwo hegi
 nen den a atebwo ten ne he miiden, ai wieli a bwopiinen pie, o hején
 a bwo celuimikenye ten. ††† 2.11 Mataio 25.40 ††† E
 péékenye...nge céii Padué—ai E tuwo ni apulie koja ni ta pwo telé.
 Grek: E pwo me lé iitihi. ††† 2.12 Psaume 22.23 18 Ni pwooti mu
 ha a Psaume 22.23, ana e tii wo pa daame Davita. Wo pana e tii a tii
 ce te lépwo Ébéru, ke e pii pie, te wo Iésu na e mi pii ni pwooti naa
 te Padué, he li lu mu he miiden, ânebuhe a bwo tabuhi na a
 bwohemwo. 19 2.13 Ésaie 8.17, 18

E pé a éé apulie pwohewiikenye

¹⁴ †Wogenye ni naí Padué, ke tai etenye ati, a éé apulie na e bo mele. Ke e pé a éé apulie wo Iésu, beme e pwohewiikenye. Ke e caa mele me denye, beme e pétaabwon a junuu *Caatana, pana e pwo me genye mele. ¹⁵ Ke me wonaa, ke e tuwokenye koja a bwo mwotikenye ko a mele, na genye teko mu hen ânebutun, ati he ni tan.

¹⁶ Genye temehi ehi pie, time e uce âbé wo Iésu beme e picani te ni âcélo. Kehe e âbé picani te ni piebehi *Abérama. ¹⁷ Ke e pipwohewiikenye, ne ha ati ni bwomunen. Be [mepie time uce wonaa, ke wieli o time uce jan me] pa apipépwooti †† ha awiemenye me Padué. Ke e caa *apwoâpwailo ubwo tenye, na e piténede Padué, ne ha a bwo penem den. Ke e pipwoééhenye [wogenye na tice niihenye]. Ke e pwo a âpwailo, beme pineuhi ni ta pwo tenye. ¹⁸ Ke te jan me e picani tenye, hemepie e tuiebé ne konye ni tacebwén. Be e temehi ni tacebwén, me ni picani mwo.

E piwéden koja Moosé wo Iésu

3 †Ni acéihi bééng, wo Padué, ke e caa todekewé, beme geé apulie ten. Ke wâé heme geé nenimewé ne ko Iésu, be pa watihe a céihi tenye. Be e neeng bé céiikenye wo Padué, beme pa *apwoâpwailo ubwo tenye. ² Ke e piténede Padué na e pipégalieng, ke e penem den ehi pwohewii *Moosé, he li e penem me de ati a puapulie te Padué, a mwa ten.

³ Kehe icehi ana te nihe pwonaado ne ko Iésu, ke wâé heme te nihe pipaunueng koja Moosé. Be pa abahi mwa, ke e te nihe piwéden koja a mwa. ⁴ Be muko pétaapwo ni mwa, ke te pwo ni abahi mwa, ke te wo Padué, na e pwo ati ni naado.

⁵ †Mepwo é ne ko Moosé, ke te nihe pa apenem ehi, ne ha ati a mwa te Padué, ke e te nihe piténedeeng. Kehe icehi ana te ju pa apenem cehi. Be te ju pa déme †† ati nina e bo patemehi wo Padué, alecehen. ⁶ Ke wo *Kériso, ke pa *Naí Padué ne ha a mwa te Padué, ke ne ten a pihuô. Ke a mwa naa, ke wogenye, hemepie genye te *ucéihi ne ha a céihi, ke genye imwi mangihi a céihi tenye.

Hegi a ju péém na e pébé wo Iésu

Nemwo pwohewii ni Isaraéla

⁷ ††É mu ko ninaa, ke [wâé heme nye piténede] ni na e pii na a *Jenen Iitihii pie:

Me geé téne a pwoto te Padué

† 2.14 1 Ioane 3.8; Pii Beetihii 12.10 †† Pa apipépwooti... e caa apwoâpwailo. Omehi a note † 3.1–2 Nombres 12.7; Ébéru 4.14, 7.26 †† 3.5 Nombres 12.7 †† Pa déme—Grek: Pa apajuujihi nen. ††† 3.7 Psaume 95.7–11

ha a tan jenea,

⁸ †††ke geé piténede!††

Geé nemwo bitekewé kojan

*pwohewii [ni *Isaraéla] ne ha a melést.*

Be muhi telé ko Padué helé,

ke lé ne jéilé ne kon.

Lé tee pipwopwocihe

ko ni bwomu telé. Psaume 95.7–8

⁹ [Ke te piwien mwo me ana e pii ne kolé wo Padué, pie]:

Lé tacebwéniéno ne ha a melé

wo lépwo caa tewé,

ke lé alih^{st††}ana é pwo

¹⁰ *ne he na 40 ni jo.*

É okéé ne kolé, ke é patemehi pie:

“Lé ne jéilé ne kong,

ke time lé mu uce piténedeé^{st†}!

¹¹ †††O time lé bo uce tuie

nge ha amwaale tong,

[a péém] na é caa pipwopweehi!” Psaume 95.9–11

Nye nemwo pwo me mwoiu ni puninye

¹² Geé pipwocile, wogewé ni bééng! Be mepie geé cile ni âniimihinaado na ta, ke mepie muhi tewé me geé céihi, ke wieli geé bo piâ ité koja Padué na e mulip. ¹³ Be a ta na genye pwo, ke e pahaulikenye, ke e pwo me mwoiu ni puninye [ke e pwo me genye bitekenye koja Padué]. Ke anaa, na me geé te pipamwouiukewé ibu, beme time e uce tuiebé kowé ninaa! Ke geé wonaa ati he ni tan. Be a tan naa, [na caa te tii ne he ni tii iitihii] ke caa te é jenea [kehe time bo uce é meé]!

¹⁴ Genye caa béé Kériso, wogenye na nye céihi ne kon. Ke wâé heme genye imwi mangihi a céihi naa, pwohewiin he li genye céihi, die ha a pwonehin [beme o pwo ce denye mu ko nina eten].

¹⁵ ††Ke [genye nemwo pineuhi ana genye] pine ne he ni tii iitihii pie:

Me geé téne a pwoto te Padué

ha a tan jenea,

ke geé piténede!

Geé nemwo bitekewé kojan

pwohewii [ni Isaraéla] ne ha a melé. Psaume 95.7–8

Time lé uce tuie nge ha amwaale

¹⁶ ††Woolé lépwona lé téne a pwoto te Padué, ke li lé bitelé ne kon? Te wo lépwo watihenye kuti, li e péélé

††† 3.8 Exode 17.7; Nombres 20.2–5 † Ke geé piténede... Grek: Geé nemwo pwo me mwoiu ni pwonimewé, pwohewiin ânebutun, he muhi tewé kon. †† Melé—Da (désert). A duaan na ticie hen. ††† Ke lé alih—Ai, É mu ko anaa, ke lé alih—ai Kehe icehi ana lé caa alih. †† Dernière phrase—Grek: E pahaulilé taaci ni pwonimelé. Time lé uce temehi ni pwaadeniing. ††† 3.11 Nombres 14.21–23 †† 3.15 Ébéru 3.7–8 †† 3.16 Nombres 14.1–35

wie wo Moosé mu ha amu *Aigupito, ¹⁷ †ke li e ne a pwo-okéé kon wo Padué, ne he na 40 ni jo. Te woélé, li lé pwo ana ta ne ha a melé, ke li lé tai mele nelang. ¹⁸ Ke te woélé, li e apwolé wo Padué pie, o time lé uce tuie nge ha amu li e caa pipwopweehi me delé. ¹⁹ Ke caa time lé uce tuie nge ha amwaale [me a péém] te Padué mu ko ana muhi telé me lé céihi ne kon.

4 Wo Padué, ke e caa mi pii [te ni watihenye] pie: «É bo péékewé nge ha amwaale [me a péém] na é caa pipwopweehi me dewé.» Ke ana e caa mi pii, ke e caa cuwo me denye jena. Ke anaa, me genye pipwocile, be koli e bo tauti ce béén mu konye wo Padué, be e bo pii pie, time lé bo uce tuie ^{††} nge ha amwaale ten.

² Be caa te patemehi tenye a pwooti na wâé [ko a amwaale naa] pwohewilé. Kehe icehi ana woélé, ke te tice ceme a pwooti na lé téné, mu ko ana time lé uce hegi ko a céihi †. ³ ††[Weengaa a watihen me] e pii wo Padué pie:

*É okéé ne kolé, ke é patemehi pie:
O time lé bo uce tuie
nge ha amwaale tong,
[a péém] na é caa pwopweehi! Psaume 95.11*

Tehi ne tenye a amwaale naa

Kehe icehi ana wogenye na nye céihi, ke genye o hegi a ju mwaale †† me a péém de Padué [na e caa neb-wén ko pwopweehi wo Padué ha atabuhi kon]. Be ati ni âniimihinaado ten ne ko ni penem na e bo pacu-wohi, ke caa hején, ânebuhe a bwo tabuhi na a bwohemwo.

⁴ ††Genye te pine mwo ne ha a céiu duaan ne he ni tii iitihii [li e pwo wo Padué, ha atabuhi kon]. Be caa tii pie: *E mwaale wo Padué ha a bé7 he ni tan, alecehe ni penem na e pwo.*

Genèse 2.2

[Weengaa a bé7 he ni tan ha a naadenitan.]

⁵ ††Genye mwojuia ne mwo ko a niide a tii, li e pii pie:
*O time lé bo uce tuie
nge ha amwaale tong,
[a péém] na é caa pwopweehi! Psaume 95.11*

⁶ [Me genye pine anaa, ke genye te temehi pie] te pwo amwaale [me a péém] na e caa pwopweehi wo Padué. Ke genye caa alihi pie, ni béén na lé caa mi hegi a pwooti na wâé [ko a amwaale naa] ke time lé uce taa hen, be time lé uce piténeeng. ⁷ †Ke anaa kuti, na e ne a céiu tan wo Padué [beme lé o hegi a ju péém] ††

† 3.17 1 Korénit 10.10 †† Be koli...pii pie, time lé bo uce tuie—ai Be koli lé niimihii ne ce béén mu konye pie, caa pibwolilé. † Time lé uce hegi ko a céihi—ai Time e uce mu kolé a céihi te nina lé piténeeng. Be te wo Kaléba me Iosua cehi na lu céihi ne ko Padué. Omehi Nombres pwahamii tii 13 me 14. †† 4.3 Psaume 95.11; Ébéru 3.11 †† Genye o hegi a ju mwaale... Grek: Genye o te taa ha a ju mwaale. Genye hegi a ju péém naa heme nye mu ko Iésu

den wo lépwo béé apulie]. Ke a tan naa, ke “é jena!” Ke ali e pii, ne ha ali niide a tii, ne he ni tii iitihii pie:
*Me géé téné a pwoto te Padué
ha a tan jena,
ke géé piténeeng! Psaume 95.7–8*

Ke a pwooti naa, ke caa junihe bwolihi, ke wo pa daame *Davita na e pwaadeniin mwobé [ne ko a bwo engen de ni ukéiu tenye ne ha a melé].

⁸ ††Anaa genye alihi pie, a amwaale [me a péém] ke time uce a amu li e péélé nge hen wo Iosua ††. Be mepie wonaa, ke wieli time e bo uce cihe mwo ko ace céiu tan wo Padué. ⁹⁻¹⁰ ††É mu ko anaa, ke pwo amwaale [me a péém] tenye, ni apulie te Padué. Ke genye o taa hen, ke genye o bobé mwaale koja a penem denye. Ke genye o pwohewii Padué, li e mwaale ha a bé7 he ni tan [alecehe a bwo pwo nen den a bwohemwo].

¹¹ Mepie wonaa, ke wâé heme genye hane ne he ni ju pwonimenye me genye hegi a ju péém de Padué. Ke genye nemwo pioi ko ni watihenye [lépwo *Isaraéla] be li lé cibe. Be wo pana time e uce piténeeng Padué, ke e piâ ité ††.

A pwooti te Padué ke a teua

¹² ††A pwooti te Padué, ke te nihe pwojunuun, beme e penem konye. Be e pwohewii a teua, na te nihe ânye-e lupwo piduaan, be e tahagéi die ko ni acipetééhi konye, ke é die ko ni béle he duunye. Be e gaale die ko ana nimenye kon, me a âniimihinaado na e ha aduwo, ne he ni pwonimenye. Ke e [pwo me pwéélang kolé, me] tautilé.

¹³ Be te tice ace céiu naado, me pace apulie celi e ha aduwo ne ko Padué. Be weeng na e nelé ati, ke e te temehi a bwopwonen ne kolé ††. Ke te weeng kuti, na genye bo cuwo he pwahamiin, me habwii ten ati ni penem na genye pwo.

Kériso. ††† 4.4 Genèse 2.2 ††† 4.5 Psaume 95.11 † 4.7 Psaume 95.7–8 †† Hégi a ju péém—Omehi note ††† Ke géé piténeeng—Grek: Nemwo pwo me mwoiu ni pwonimewé! †† 4.8 Deutéronome 31.7; Josué 22.4 ††† 1re phrase—Grek: Be heme e ne telé a amwaale wo Iosua...; Iosua—Omehi Apostolo 7.45. †† 4.10 Ébéru 4.4 †† Dernière phrase—Grek: Beme time e o uce tupwo wo pace céiu. ††† 4.12 Éféso 6.17; Pii Beetihii 1.16, 19.13–15 ††† E te temehi a ju bwopwonen ne kolé—Grek: Ke lé te tai tuebeele ne hamiin.

wo iésu ke pa apipéwooti hadeniinye me padué

(Pwahamii tii: 4.14—10.18)

E te temehi a bwo tice niihenye

¹⁴ †[É ko pii tewé pie] wo Iésu, pa *Naí Padué, ke pa *apwoâpwailo ubwo tenye, na e caa taa he miiden [beme pa apipéwooti hadeniinye me Padué]. É mu ko anaa, na wâé heme genye imwi mangihi a céihi tenye ne kon.

¹⁵ Time uce pa apwoâpwailo na e ité kojakenye, be e te temehi ehi a bwo tice niihenye, be te tacebwénieng, ne ko ati nina tacebwénikenye kon. Kehe icehi ana time e uce tupwo ne hen, ke time e uce pwo celi ta.

¹⁶ †É mu ko anaa kuti, na me time uce piwâ genye, me genye âbé ne he pwahamii Padué ‡, Padaame [na e pwaadeniin bé wo Iésu]. Be genye o bo hegi a *pipwoééhe tice ja kon den. Ke e bo picani tenye [wogenye na tice niihenye] ke e bo te nihe pwo celi wâé ne konye, ha a benaamwon den.

Wo Padué na e ne ten a penem den

5 Pa *apwoâpwailo ubwo, ke pa apulie na pipégalieng, beme pa apipéwooti hadenii ni apulie me Padué. Be e ne te Padué ni âpipati me ni âpwailo, beme pineuhi ni ta pwo te ni apulie. ² Ke [te pa apulie] pwohewiilé, ke e temehi a bwo tice niihe ni apulie. Ke bwala nang ne kolé, ke e pipwoééhelé, heme lé piâ ité, mu ko a bwo time uce temehi nen delé. ³ †Ke, é ha a benaamwon na e pwo a âpwailo me pineuhi ni ta pwo te a puapulie, ke e pwo a âpwailo me den mwo, mu ko ana te pa apulie mwo na tice niihen, pwohewiilé.

⁴ †Be te tice pace apulie celi me e te picaamada mu kon, beme pa apwoâpwailo. Be a penem na te nihe pwnaado ne kon. Kehe te icehi Padué na jan ne kon me e pipégali pace apulie, pwohewii a bwopwonen den ne ko *Aarona.

⁵ Piwien ne ko Kériso. Be time e uce pipaunueng mwo. Ke te wo Padué na e neeng me pa apwoâpwailo ubwo. Be e pii ten pie:

É jena, ke é pii beetihi:

Wogo pa Naîng,

ke woéo pa caa tem. Psaume 2.7

† 4.14 Ébéru 3.1, 10.23 †† 4.16 Ébéru 10.19 ‡ Ne he pwahamii Padué, Padaame—Grek: Ne ko a atebwo he daame (trône). †† 5.3 Lévitique 9.7, 16.6 †† 5.4 Exode 28.1

⁶ ††Ke genye pine [ne ha a céiu niide a tii ne he ni tii iitih] ana e pii wo Padué pie: *Wogo pa apwoâpwailo dieli mwo, âcehi a bwopwonen de Melkisédék*††.

Psaume 110.4

E piténehehi wo Kériso he ni picani

⁷ †É he e mwo mulie ne éni pwo bwohemwo wo Iésu, ke pwo a benaamwon na e é me toii da céii Padué pie, me e celuimieng [koja a bwo mele ten] ††. Ke e téne a pwopwoiitih ten wo Padué. Be wo Iésu, ke e te nihe paciitieng ke e piténeheeng.

⁸ Ke te pa *Naí Padué, kehe icehi ana jan me e picaa a bwo piténehehi, ko a bwo mu he ni picani ten. ⁹ Ke [e piténehehi die ha anebwén kon, ke] e caa panebwénihi ati ††† ni penem den. Ke é mu ko anaa kuti, na o caa pa acelumi ati lépwona lé piténeheeng. Ke e ne telé *a ju mulip ne pelen. ¹⁰ Ke e etieng wo Padué, me pa apwoâpwailo ubwo pwohewii Melkisédék.

A bwo paténe lépwo acéihi

¹¹ Hiwon ni naado na nimung me é †† pii tewé ne ko [a bwo piwie Iésu me Melkisédék]. Kehe icehi ana time geé uce temehi, be wogewé lépwo apwoemaan, ke time geé uce pininim ehi ††† [ne ko ni céihi tewé].

¹² ††Caa bwolihi [na geé céihi, kehe icehi ana mwo te junihe wahin ni bwo temehinaado tewé, ne ko a pwooti te Padué. Ke mepie geé te cumang] ke me geé caa ko pacémuni lépwo béén. Kehe wogewé, ke mwo te lépwo acémun, ke mwo time geé uce nihe ân.

Geé pwohewii ni cuwo nahi ewa na lé mwo dile. Be mwo time lé uce wii ce wiinaado celi mwoiu. ¹³⁻¹⁴ Ke wo pa [acéihi] na e wonaa, ke mwo time uce jan me e pineitééhi ana juuju me ana ta ††. Kehe wo pana e cumang [ne ha a céihi] ke e temehi, be e caa mulie hen, ke e picaa. Ke jan me e wii a wiinaado na mwoiu.

Genye pitaa koja ni cémun ânebun

6 ¹² Wâé heme wogenye ni apulie, na genye cumang ne he ni céihi tenye ne ko Kériso. Genye

††† 5.6 Psaume 110.4; Ébéru 6.20, 7.1 ††† Melkisédék—Wo pa daame, me pa céiu apwoâpwailo te a céiu bele, ha a benaamwon de Abérama, pa caa te a bele Isaraéla. Omehi pwahamii tii 7, me Genèse 14.17–24. § 5.7 Mataio 26.36–46; Filipi 2.6–8 †† 1re phrase—ai Pwo a benaamwon na e é, ke to da céii Padué, beme e celuimieng. Be pwojunuu Padué na e celuimikenye koja a mele. Wo pana e tii a tii ce, ke e niimihi a pwopwoiitih te Iésu ne Getsémané. Omehi Mataio 26.36–46. Wieli e niimihi mwo ni béé benaamwon na e é hen wo Iésu, pwohewiin alecehe a bwo mele te Lazare. Omehi Ioane 11.35. ††† Ke...e caa panebwénihi ati ni penem den—ai E neeng wo Padué, beme pa apwoâpwailo ubwo ten. Grek: Ke me e caa pwo me e hején. †† É—Grek: Geme. A bwopwonen de ni apulie ânebun, na lé tii pie: Wogeme; ke a bwopiinen pie: Woéo. Omehi note ††† Wogewé lépwo apwoemaan, ke time geé uce pininim ehi—Grek: Caa bwéjé gewé. †† 5.12 1 Korénit 3.1–3

†† Pineitééhi ana juuju me ana ta—ai Temehi a pwooti na juuju.

pitaa koja ni cémun ânebun, li genye caa hegi, ke li genye caa céihi ne kon:

A bwo pininim me a bwo bitekenye koja ni bwomu tenye na ta, na lé péékenye nge ha amele;
A bwo céihi ne ko Padué;
A bwo *pipuu apulie;
A bwo ne inye [ne ko pana e mwo ju pineeng];
A bwo mulie cemwo mu ha amele, te ati ni apulie;
A pitautinaado te Padué [beme e ne telé ni cemelé ko ni penem delé]. Ke mepwo é ne ko a tautinaado ten, ke o te cuwo dieli mwo.

Be ati ni naado naa, ke genye caa mi picaa ânebun. Ke time o uce jan me genye mwo picaa mwo. ³ Be wâé heme genye pitaa, âcehi ana nime Padué kon †.

⁴ Ade aceli genye pii ne ko lépwona lé caa tupwo mwo ne ha a mulie na ta ††? [O caa pwocoon me lé bitelé mwo.] Be li e caa pwo me pwaale ne telé [a juuju ten]. Ke lé caa hegi ni *adéihi ten, na e âbé mu he miiden. Ke e caa te e kolé a *Jenen Iitihi. ⁵ Ke lé caa te nemi mu ko a bwo wâé na a pwooti te Padué. Ke lé caa te alihi mwo, a junuu a *Mwametau te Padué ‡, na e o bo tuie.

⁶ ††Ke mepie lé necu ati ninaa, ke lé o te nihe pipwotahinaado ne kolé mwo ††. Ke o te nihe pwocoon me nimelé me lé pininim, ke me lé mwojuia mwo. Be pwohewiin heme lé cemeite mwo pa *Naí Padué ne ko a *kuricé, ke lé pwo me tanim nang, ne ânebuhe ni apulie.

⁷ [Wo lépwona lé wonaa, ke lé pwohewii a pule na ta.] Mepwo é ne ko a pule na wâé, ke e hegi ehi a ute, ke e pwo me cim ni âdaanu beme a wiinaado te ni apenem hen. Ke e adéihi a pule naa wo Padué. ⁸ †††Ke a pule na e ne me cim ni acuwo pwo dan me ni meté na ta, ke te ju piticenaado ne kon. Ke wieli e o apwohi a pule naa wo Padué, me cini taabwon.

Geé cumang die ha a pwonehin

⁹ Mepwo wogewé, lépwo ju bééng, ke é te nihe céihi ne kowé. Be é niimihi pie, geé teko mu ha a ju pwaaden ††† na wâé, na e péékewé nge ha a bwo

† A bwopiinen pie, wâé heme nye pininim ne ko ni naado na e bwolu ko ni céihi tenye: ni naado na e mu ha a Tii Iitihi na time nye uce ju téele temehi. Ke e habwii ni béé naado naa, ne ha a tii ce. Be hiwon ni ocine ko Iésu Kériso, na lé mu ha a Élele Iitihi Ánebun.
†† Lépwona lé caa tupwo mwo ne ha a mulie na ta—Niide a tii 4–8, ke wieli a pwooti ko lépwona lé céihi ânebun, kehe icehi ana lé necu ni céihi telé. Ai wieli a pwooti ko lépwona lé mu pele lépwo acéihi, ke lé temehi a juuju, ke lé alihi ni naado na wâé na e pwo wo Padué, kehe icehi ana lé tahi taabwon. ‡ A junuu a Mwametau te Padué...
Grek: A junuu a benaamwon na e bo âbé. †† 6.6 Mataio 12.31; Ébéru 10.26–27; 1 Ioane 5.16 †† Lé o te nihe pipwotahinaado ne kolé mwo—Grek: Telé mwo. Ni pwooti naa, ke ni behi ni pwooti na e pii pie, lé cemeite pa Naí Padué, ke wieli a bwopiinen pie: Ko lupwo ilé. ††† 6.8 Genèse 3.17–18 ††† Geé teko mu ha a ju pwaaden... ai Etewé ni naado na te junihe wâé [koja anaa] na lé o pébé a bwo celuimikewé.

celuimikewé. ¹⁰ §Be wo Padué, ke e mwomwon, ke time e uce pineuhi a pipwoééhe tewé ne kon, me ni apulie ten. Be geé te nihe picani telé, ke geé teko cumang hen jena.

¹¹ Ke te nihe wâé tong, heme geé teko mwoiu ko penem [ne he ni pipwoééhe tewé naa] die ha anebwén kon. Geé o bo hegi ni cemewé na wâé, na geé ucéihi.

¹² Ke geé nemwo pwoemaan! Wâé heme geé pipwohewii lépwona lé cumang ne he ni céihi telé. Be lé *ucéihi ne ha a céihi, die ko ana e bo ne telé ce cemelé ne ko ni penem delé wo Padué, li e caa mi pii telé.

E pacuwohi nina e caa mi pii

¹³⁻¹⁴ ††É ânebun, ke e pwo a *piapwo wo Padué ne he niin, be te tice pace apulie celi nihe pwonaado ne kon kojaeng. Ke e pii te *Abérama [pa watihenye] pie: *É o te nihe adéiko. Ke é bo pwo me te nihe hiwon ni piebehiko.*

Genèse 22.17

¹⁵ Ke wo Abérama, ke e ucéihi ne ha a céihi ana e caa mi pii wo Padué. Ke é mu ko anaa, na e te hegi.

¹⁶ Ne pelenye ni apulie, ke me nimenye me genye habwii te ni béén pie, genye pii a juuju, ke genye pwo ace piapwo ne he nii pa apulie na te nihe pwonaado ne kon kojakenye. Be me wonaa, ke e pacuwohi ni picihedeniilé, ke genye capuhi ni pwolé.

¹⁷ Te piwien mwo ne ko Padué. Be he e pii pie, e bo adéi ni apulie, ke e te pwo a piapwo ne kon, beme e *pajuujuhi ne telé nina e pii. É mu ko anaa, na lé temehi pie, lé o te hegi ana e caa mi pii, ke time e o uce pitaatéihi ana e caa pii ânebun.

¹⁸ †††[Be genye temehi pie, hemepie e pii pie, e bo pwo ace céiu naado] wo Padué, ke time e uce gele. [Ke mepie e piapwo ne kon, ke e te pacuwohi.] Weengaa lupwo alo naado na me nye céihi mu kon, ke weengaa a bépamwoiukenyé, wogenye na genye cela nge pelen. Ke pwo niihenye me genye imwi mangihi ana e caa mi pii ânebun me denye, na nye ucéihi ne ha a céihi.

¹⁹⁻²⁰ ††A piuca tenye naa, ke e pwohewii a pehinu na binyi na taa me mang he ni pwonimenye. Ke e ceta ehi ne ha a duaan na junihe iitihi ne he miiden. Be wo Iésu, ke e caa tehi a mwaanu ubwo na e capuhi a duaan naa †††, ke e mi engen kojakenye, beme e taa lang, [beme pa apipépwoti ha awiemenye me Padué]. Be te weeng kuti na e caa *apwoâpwailo ubwo tenye, na e pwohewii pa daame Melkisédék ânebun ††. Ke e bo wonaa wo Iésu dieli mwo.

§ 6.10 Ébéru 10.32–34 †† 6.14 Genèse 22.16–17 ††† 6.18 Nombres 23.19 †† 6.19–20 Lévitique 16.2–3 ††† Mwaanu ubwo... Omehi Mataio 27.51. †† 3e phrase—Ke me e wonaa wo Iésu, ke e pipwohewii pa apwoâpwailo ubwo ha a mwaiitihi te lépwo Juif, na e ne lang ni âpwailo bépineuhi ni ta pwo te a bele.

Wo Melkisédék ke e déme Kériso

Wooélé Melkisédék?

7 [†]Wo Melkisédék, ke pa daame ne ha a pwomwo ubwo Salem, ha a céiu benaamwo amu. Pa ^{*}apwoâpwailo te Padué henye na nihe e daaité. Ke wo Melkisédék, ke pitapitilu me ^{*}Abérama [pa watihenye] he e mwojuia mwobé mu he pa. Be e piwéden koja ni daame. Kehe me pitapitilu, ke e adéieng wo Melkisédék. ² Ke wo Abérama, ke e ne ten a céiu duaan mu ko ni duaan na 10 mu ko nina e hegi ne ha a bwo pwopa ten.

A nii Melkisédék, ke a bwopiinen pie 'pa daame na e mwomwon'. Ke Salem, ke a bwopiinen pie a 'péém'. Ke é mu ko anaa, na e daame he a péém mwo. ³ [Time uce hiwon ni pwooti kon ne he ni tii iitih. Be]:

Time uce pii tenye
luce nyaa me caa ten,
me ce watihen.
Ke time uce patemehi
ace bwo âbeelee ten,
me ace bwo mele ten.
Pa ocine ko pa ^{*}Naî Padué,
pa apwoâpwailo dieli mwo.

⁴ Geé te alihi pie wo Melkisédék, ke te nihe pwonaado ne kon. Ke wo Abérama, pa ukéiu tenye, ke te pwonaado ne kon mwo. Kehe icehi ana e ne, ne ânebuhe Melkisédék, ni âpipati ten: a céiu duaan mu ko ni duaan na 10 mu ko nina e hegi mu ha a bwo pwopa ten. ⁵ ^{††}Ke weengaa a jéhi nina e pihuôhi wo ^{*}Moosé ne he ni patén den, beme o bo ni mwoto te lépwo apwoâpwailo. Ke ni patén naa, ke ni denye, wogenye ni piebehi Abérama. Ke nina genye ne, ke genye ne te ni béénye mwo, wo lépwo apwoâpwailo tenye, mu ha a pwomwoiu te Lévi [‡].

⁶⁻⁷ Ke wo Melkisédék, ke time uce pa apulie mu ha a pwomwoiu te Lévi. Kehe icehi ana e te hegi koja Abérama a céiu duaan mu ko ni duaan na 10 mu ko nina e pé.

A céiu mwo: Ke wo Abérama, ke [pa apulie na ubwo nang, be] li e pwo a ^{*}piapwo ne ten wo Padué [‡]. Ke genye temehi mwo pie, pa apulie na ubwo nang, ke e ^{*}adéi pa apulie na wahin nang. Kehe icehi ana [genye pine pie] wo Melkisédék, li e adéi Abérama.

⁸⁻⁹ Ke ni apwoâpwailo, wo lépwo piebehi Lévi, ke lé hegi ni âpipati na wonaa. Kehe icehi ana ni apulie naa,

† 7.1 Genèse 14.17–20 †† 7.5 Nombres 18.21 ‡ A pwooti te lépwo acéihi na te lépwo Juif mwo. Grek: Âcehi a patén, ke pwo mwomwon de lépwo naî Lévi, me lépwo apwoâpwailo mwo, me lé hegi a céiu duaan mu ko a 10, mu ko nina ete ni apulie te a bele Isaraéla. A bwopiinen pie, lépwo âjiénelé. Kehe icehi ana woélé mwo, ke lépwo piebehi Abérama. †† Be li e pwo a piapwo ne ten wo Padué—Grek: He li e hegi a piapwo (promesse) te Padué.

ke lé o te tai mele pwohewiikenye. Ke mepwo é ne ko Melkisédék, ke pii kon pie, pa apulie na e ^{*}mulie dieli mwo.

Ke heme e ne te Melkisédék ali âpipati ten wo Abérama, ke pwohewiin heme lé tai wonaa ten ati ni piebehi Lévi [‡]. [Be wo Abérama, ke pa ukéiu telé ati.] ¹⁰ Be mepie wo Lévi [pa caa telé] ke he mwo time e uce âbeelee, kehe e caa te mu ha a éé pa watihen, Abérama, pali e ne ali âpipati ten ne te Melkisédék.

Taatééhi a bwo pwoâpwailo ânebut

¹¹ Genye tabuhi alihi a bwo pwoâpwailo, ha a benaamwon ko ni patén de Moosé. Be te wo ^{*}Aarona me lépwo apulie ha a pwomwoiu te Lévi, na lépwo apwoâpwailo tenye. Kehe icehi ana genye alihi pie, a bwo pwoâpwailo naa, ke time e uce pacuwohi ana nime Padué kon ^{‡†}. Be mepie [wo Padué, ke] wieli time e o uce neopé céiikenye pace céiu apwoâpwailo ubwo, celi ité nang kojálé, na pwohewii Melkisédék. ¹² Ke mepie e tuie wo pa apwoâpwailo ubwo, ke me e pwo a âpwailo na mwo ju coho, ke wâé mwo heme taatééhi ni patén.

¹³⁻¹⁴ ^{‡‡}Geé téne ehi pie, é ko cihe tewé [ko Melkisédék] ke é pwo-ocine ko Padaame henye, Iésu Kériso, na e wie mu ha a pwomwoiu te ^{*}Juda, kehe time uce é mu ha a pwomwoiu te Lévi. Ke te tice pace apulie mu ha a pwomwoiu ten celi e mu pwoâpwailo. Be te tice mwomwon delé me lé pwo a penem naa, ne he ni ^{*}patén de Moosé.

E piwéden wo Iésu Kériso

¹⁵ Geé caa alihi pie, wo pa apwoâpwailo tenye [wo Iésu Kériso] ke te ité nang [koja ni apwoâpwailo âcehi ni patén de Moosé]. Ke geé bwobe temehi, hemepie genye pii pie, e pwohewii Melkisédék. ¹⁶ Be time uce etieng mu ko ace bwo wie ten [§] mu ha ace céiu pwomwoiu. Kehe te icehi mu ko a junuu a mulihen na e dieli mwo. ¹⁷ Be genye caa alihi pie, caa te tii ne he ni tii iitih pie: *Wogo pa apwoâpwailo dieli mwo, âcehi a bwopwonen de Melkisédék.*

Psaume 110.4

¹⁸ Weengaa ana e ne me tieden ni patén de Moosé [ne konye]. Be te tice niihen me e pacuwohi [ana nime Padué kon]. ¹⁹ ^{§†}Be time uce jan me e ne me hején genye [me mwomwon ne ale Padué]. Ke é jena, ke e

‡‡ Pwohewiin heme lé tai wonaa ten ati ni piebehi Lévi—Grek: Pwohewiin heme e wonaa ten wo Lévi. (A bwopiinen ne éni pie lépwo piebehi Lévi. É ne ha a Tii Iitih, ke ni piebehilé, ke lé te cuwo ko toii kon a nii pace watihelé. «Isaraéla», ke a nii pana te céiu nang, kehe te a nii mwo a bele na lé wie mu kon.) ††† Time e uce pacuwohi ana nime Padué kon—Grek: Time e uce pébé a bwo hején [genye]. ††† 7.14 Ésaie 11.1; Mataio 2.6; Pii Beetih 5.5 § Mu ko ace bwo wie ten... Grek: Watihen ace céiu patén celi e âbé mu ko a éé apulie. Wieli a bwopiinen pie, é mu ko ni patén de ni apulie, ai é mu ko nina genye alihi ko ni naamiinye. §† 7.19 Ébéru 9.9

ne tenye a pwaaden nge pelen, na te nihe wâé koja ni patén [mu ko a piapwo ten ne tenye, na mwo coho] †. Ke genye *ucéihi ne ha a céihi [ace bwo pacuwohi nen].

E te mu dieli mwo

²⁰⁻²¹ ††A céiu mwo: É he e pipégali Kériso wo Padué, ke e pwo a piapwo pie, bo pa apwoâpwailo ten dieli mwo. Kehe time e mu uce pii pie wonaa te lépwo béé apwoâpwailo. Be weengi ana e pii:

E caa pwo a piapwo wo Padaame.

E caa pii tem pie:

'Wogo pa apwoâpwailo dieli mwo.'

O time e bo uce pitaatééhi mwo ana e caa ne.Psaume 110.4

²² †É mu ko anaa kuti, na wo Iésu, ke caa pa inenaado †† ko a piapwo na e pwo tenye wo Padué, na te nihe wâé koja ni patén.

²³ A céiu mwo, ke wo [Iésu, ke e piwéden koja] lépwo apwoâpwailo ânebun. [Be weeng, ke te céiu nang, ke woélé] ke te nihe hiwon jélé. Be mepie e mele wo pace céiu, ke e o taatééeng wo pana e âbé cén. ²⁴ Ke o te tice apulie celi me lé taatéé Iésu, be e te mu dieli mwo. ²⁵ ††Ke me wonaa, ke jan me e *celuimi lépwona lé âbé céii Padué ne he niin. Be e mulie dieli mwo, ke e te pwoiitihi me delé.

E iitihi ke hején nang

²⁶ Te tice pace apulie celi jan me pa apwoâpwailo tenye, [ke me pa apipépwooti tenye ne ânebuhe Padué] kehe te wo Iésu cehi. Be e iitihi, ke te tice ta kon. Ke wâé te Padué nang. Ke wo Padué, ke e caa pwo me e mu daaité koja lépwona lé pwo nina ta. Be e céieng da, ne ha a duaan na e daaité ne he miiden [be-me o te nihe pipaunueng].

²⁷ †††Wo Iésu, ke time e uce pwohewii lépwo béé apwoâpwailo, na lé pwoâpwailo ati he ni tan, me de ni ta pwo télé mwo, ke me de ni ta pwo te a puapulie. Be e te océiu ko pwoâpwailo dieli mwo, he li e pineeng me e mele [ne ko a *kuricé].

²⁸ Wo lépwo *daame he lépwo apwoâpwailo na e nelé ne ni patén de Moosé, ke wo lépwo apulie na tice niihelé [pwohewiikenye]. Ke wo Padué, ke [e taatééhi ni patén] ko a piapwo ten. Ke e eti pa Naîn, na e hején dieli mwo.

Pa apwoâpwailo ubwo tenye @ wo Iésu Kériso

8 Weengi a âne ana é pii: Pwo pa *apwoâpwailo ubwo tenye, na e he miiden, [ke pa apipépwooti tenye] ne ânebuhe Padué. Wo Padué na te nihe pwojunuun, ke e neeng me e tebwo pwo juin [beme e pi-huôhi ati ni naado]. ² Ke e pwo a penem den, ne ha a duaan na junihe iitihi ne ha a ju mwa ko pwoiitihi. Be a naado na e pacuwohi wo Padué, kehe time uce ana e pwo wo pa apulie.

³⁻⁴ Pwo a âpipati na e ne, ke weengaa a penem de lépwo apwoâpwailo ne éni pwo bwohemwo. Be mepie e mwo teko mu éni pwo bwohemwo wo Kériso, ke wieli time o uce jan me pa apwoâpwailo. Be wo lépwo béén, ne éni pwo bwohemwo, ke ni apwoâpwailo âcehi ni *patén de Moosé. Ke a penem delé, ke me lé pwoâpwailo, ke me lé ne ni âpipati. ⁵ †††Kehe icehi ana ati ninaa, ke te ju a déme a ju *mwaitiitihi na e jeda he miiden. Be wo Moosé li e pacuuli a mwaitiitihi pwo ko mwaanu, ke e huôhi ne ten wo Padué pie: *Go pwo ati ni naado âcehi ana é caa habwii tem ne pwo ali juwole.*

Exode 25.40

⁶ ††Be a penem na e ne te Kériso wo Padué, ke te nihe pwonaado ne kon [koja a bwo pwoâpwailo âcehi ni patén de Moosé]. Be wo Iésu, ke pali e pébé céiikenye ali *piapwo [li mwo ju wâé, na e pwo tenye wo Padué]. Ke a piapwo naa, ke te junihe pwojunuun koja ni patén, ke e pébé céiikenye ni *adéihi na te nihe wâé.

A piapwo na mwo coho

⁷ [Ânebun, ke wo Padué, ke e pwo a piapwo ne te a bele ten, *Isaraéla, ko ni patén de Moosé.] Ke mepie a bécéiuhe piapwo ânebun naa, ke mepie e caa te *pajuujihi a bwo niimihinaado te Padué st, ke wieli time e bo uce pwo mwo ace béalohen. ⁸ †††[Kehe icehi ana a piapwo ânebun, ke time uce hején be] e cihe okéé ne ko a bele ten wo Padué, ke e pii pie:

O tuie a benaamwon

na geme bo piténekeme

*me lupwo bele Isaraéla me *Juda.*

Ke geme bo pwo mwo

ace piapwo celi mwo coho.

⁹ *Li geme pwo ali piapwo*

me ni caa télé,

*li é pawielé mu ha amu *Aigupito.*

[É péélé wie beme é celuimilé.]

Ke geme pwo a piapwo.

Kehe time lé uce piténedehi,

ke lé pineuhi ni pwooti.

Ke é ne a jéing ne kolé.

Kehe time o uce piwien

† Mu ko a piapwo ten ne tenye... Ke ni pwooti naa, ke lé âbé mu ha a niide a tii 22. †† 7.21 Ébéru 5.6 † 7.22 Ébéru 8.6, 12.24 †† Wo Iésu, ke caa pa inenaado—Be é mu kon, ke genye temehi pie wo Padué, ke e bo pacuwohi a piapwo ten. †† 7.25 Roma 8.34 ††† 7.27 Ébéru 5.3

††† 8.5 Exode 25.40; Kolosé 2.17; Ébéru 9.23 § 8.6 Ébéru 7.22 §† Mepie e caa te pajuujihi a bwo niimihinaado te Padué—Grek: Mepie hején. §†† 8.8–12 Jérémie 31.31–34

¹⁰ *me a piapwo na mwo coho
na me gemu bo pwo,
wogemu me Isaraéla,
lépwo apulie tong.
É bo ne ni patén dong
ne he ni pwonimelé.
É bo tii a pwooti tong
ne he ni bwo temehinaado telé.
Ke é bo Dué helé,
ke bo woélé a bele tong.*

¹¹ *O time lé uce tahimwo ni béélé
beme lé temehiéo.*

*Be lé tai temehiéo ati,
lépwona pwonaado ne kolé
ke nina piticenaado ne kolé.*

¹² *É bo pineulé ko ni ta pwo telé.*

*Ke o time é bo uce niimihi
ni bwomu telé na ta. Jérémie 31.31–34*

¹³ Ke me e pii kon pie, a piapwo na mwo coho, ke a bwopiinen pie, caa ukéiu a piapwo ânebun. Be a naado na caa ukéiu, ke o caa tieden.

Time uce jan ni âpwailo ânebun

A bwomune lupwo duaan na iitihî

⁹ †A *piapwo ânebun [ke tii ne he ni *patén de Moosé]. Ke, he ni patén ânebun, ke e pihuôhi ne te lépwo apulie a bwo pwoiitihî telé, ne he ni duaan na iitihî ne kolé, ne éni pwo bwohemwo.

²³ ††Ke lé pacuuli a mwa mwaanu beme a *mwaiitihî, ke alo lupwo nemwa hen. Pwo ‘a nen na iitihî’, ke a céiu nen, ke ‘a nen na junihe iitihî’. Ke a nen naa, ke capuhi bwonihi ko a mwaanu. Ke a nen na iitihî, ke e hen a taap, me a mwomiû, me ni pwoloa na ne te Padué.⁴ †Ke a nen na junihe iitihî, ke e hen a *apwoâpwailo †† na timi ko mwani megele, na lé mu cini *encens* [ni dep na ûde wâé] nelang. Ke e lang mwo a piélele mwopiapwo na timi ati ko mwani megele. Ke é ha a mwopiapwo naa, ke pwo ni naado [na cié, na te junihe iitihî] na élé hen:

A piélele na mwani megele na oba ko ni nehi pwoloa *manne* †† opé mu he miiden;
Ali bwaja *Aarona ††† li e muu;

† 9.1–2 Exode 25.23–40, 26.1–30 †† 9.3 Exode 26.31–33 † 9.4 Exode 16.33, 25.10–16, 30.1–6; Nombres 17.23–26; Deutéronome 10.3–5 †† Apwoâpwailo—A duaan na cini encens

†† Manne—Wo Padué, ke e pwo me lé wiinaado ne ni Isaraéla ne ha a melé ko a manne

††† Bwaja Aarona—Wo Padué, ke e pwo me e pé a bwajaan wo Aarona, beme

Lupwoli péi na tii ne pwon li 10 patén ko a piapwo ânebun.

⁵ ††É ne pwo a capuhe ali piélele mwopiapwo, ke pwo lupwo déme âcélo † na mwani megele. Be lu habwii a bwo mu te Padué me *a wâé ten. Ke ni puuilu, ke talui ali capuhe piélele, é nelang he na lé mu pétaabwon ni ta pwo te a bele, ko ni cewéhe ni wota.

Kehe mwo time uce téele a benaamwon me genye nihe cihe ko ni bwomunen naa.

Penem de ni apwoâpwailo

⁶ ††A mwa mwaanu, ke alo ni nemwa hen.

Ke lépwo apwoâpwailo, ke lé mu taa ha a duaan na iitihî, ati he ni tan, beme lé pwo ni penem delé. ⁷ †††Kehe te icehi pa apwoâpwailo ubwo, na pwo mwomwon den me e taa ha a béalohe nemwa [ha a duaan na junihe iitihî]. Ke te océiu nang ko taa lang ha a jo. Ke e pé da a cewéhe ni wota, na e ne beme âpipati te Padué. Ke a cewéle naa, ke a âpwailo bépineuhi ni ta: ni ta pwo ten me ni ta pwo te a puapulie, na lé pwo he time lé uce temehi.

⁸ Ati ninaa, ke weengi ana nime a *Jenen Iitihî me e habwii tenye: Be time uce jan ne konye me nye taa ha a duaan na junihe iitihî [jeda he miiden] mu ko a bwo pwoâpwailo ne ha a mwa mwaanu †† [ânebun ne éni pwo bwohemwo].

⁹ †††Be genye alihi pie é ha a benaamwon ce, ke hiwon ni utepanu me ni âpwailo na lé ne te Padué ne ni apulie. Kehe icehi ana time uce jan me e pwo me mwomwon ni pwonimelé ne ânebuhen ††. ¹⁰ Be a pwoiitihî naa, me ati ni patén den, ne ko ni wiinaado me ûdu, me ni bwo pipuulé, ke te ju ni naado ha a éé apulie, ke e te ju engen cehi die ko a ju bwopwonen de Padué.

Hején a âpwailo te Kériso

¹¹ Mepwo é ne ko Kériso, ke caa apwoâpwailo ubwo tenye, na e pébé céiikenye ati ni *adéihi na genye ko mulie hen ††. E caa taa ha a mwaiitihî na e jeda he miiden †††, na e piwéden ke hején. Be time uce pwo ko ni i apulie, ke time uce a naado pwo a bwohemwo ce. ¹² Ke wo Kériso, ke e te taa me océiu ne ha a duaan na junihe iitihî. Ke e pé da lang a cewéle [beme âpwailo bépineuhi ni ta]. Time uce a cewéhe nani me paaci, ke-

e pwo ni penem ko ni pipwojunuun de Padué. Omehi Exode pwhamii tii 30. ††† 9.5 Exode 25.18–22; Ézékiel 10.12–15 § Âcélo—Grek: Chérubin. Omehi Exode pwhamii tii 25, me Ézékiel pwhamii tii 10. †† 9.6 Nombres 18.2–6 ††† 9.7 Lévitique 16.2–34 †† Mu ko a bwo pwoâpwailo ne ha a mwa mwaanu... Grek: Ke me e mwo ko mu a mwa mwaanu. A ocine ko a bwo pwoiitihî te lépwo Juif. ††† 9.9 Ébéru 10.1–2 †† Mwomwon ni pwonimelé ne ânebuhen—Grek: Hején a pwocihe na e âbê mu he pwonime (conscience). †† Na genye ko mulie hen—ai Na genye bo mulie hen. ††† Na e jeda he miiden—Grek: Na pwo ko mwaanu.

he te a cewéhen [na e téé, he li e pineeng beme e âpwailo]. Ke me wonaa, ke e tuwo ni apulie mu ko ni ta pwo telé dieli mwo.

¹³ †Ācehi ni patén ko a bwo pwoiitihi ânebun [ke hiwon ni naado na *mwiihi te ni apulie kon]. Ke hiwon ni âpwailo me ni pwoiitihi telé, beme puu taabwon ni ta pwo telé. Ke lé mu pitaipuulé ko a cewéhe nani, me a cewéhe paaci, me ni dep ko a nahi paaci na cini, ne ko nina lé pwo na ta. Ke é alecehe a bwo puu taabwon na a ta mu ko ni éélé, ke jan me lé bo pwoiitihi mwo ††.

¹⁴ †Te icehi a cewéhe Kériso na te nihe pwojunuun koja ninaa! Be e puu taabwon ni ta mu he ni pwonimenye dieli mwo. Ke e tuwokenye mu he ni huô me ni ta, na lé péékenye nge ha a mele. Be é mu ko a Jenen Iitihi, ke e pineeng wo Kériso ne te Padué, beme pa âpwailo na hején, na tice tooli me ta kon. Ke é mu ko anaa kuti, na o time e uce pipé ne konye ni *pwonimenye. Ke jan me genye cuwo ânebuhe Padué na e *mulie dieli mwo, beme genye pipaunueng, ke me genye penem den.

¹⁵ Ke a bwo mele te Kériso, ke e tuwokenye koja ni ta na genye pwo, na genye mulie hen haahi a piapwo ânebun. Ke e ne a piapwo na mwo coho. Ke ati lép-wona e caa todelé wo Padué, ke lé bo tai hegi ati ni adéihi naa, dieli mwo.

A piapwo ko a cewéle

¹⁶⁻¹⁷ Mepwo é ne ko [a piapwo, ke pwohewii] a tii na e tii wo pa apulie, ânebuhe a bwo mele ten. Be e tii ni nii ati ni apulie na lé o hegi ni wâé ten ††. Kehe icehi ana mwo time uce cuwo a tii naa, be mwo time e uce mele wo pa atii nen. [Ke o mwo te tice apulie celi me e hegi ce den mu ko ni wâé ten.] ¹⁸ Ke piwien ne mwo ko a piapwo ânebun. Be e te *pajuujihi cehi ne ko a bwo téte na a cewéhe [a wota na taunuhi].

¹⁹ ††Be, me e pipatemehi ati ni patén te a puapulie wo Moosé, ke e pé a cewéhe ni nahi paaci me ni nani, na e bitehi neibuhi me a tabe. Ke e neole hen a dihe acuwo *hysope* na cie ko a pumajoo ††† megele. Ke e taipuu a tii ko patén. Ke e wonaa mwo ne ko ni apulie ati. ²⁰ Ke e patemehi telé pie: *Weengi a cewéle bépajuujihi na a piapwo na e pwo wo Padué me dewé, ke wâé heme geé âcehin.*

Exode 24.8

²¹ †††Ke e taipuu ko a cewéle a *mwaiitihi na pwo ko mwaanu, me ati ni naado na iitihi na lé mu hen.

²² †Ācehi ni patén, ke te icehi a cewéle na jan me e ne me wâé †† ni naado ne ânebuhe Padué. Ke te tice ace

† 9.13 Lévitique 16.15–16; Nombres 19.9,17–19; Ébéru 10.4
†† Grek: ...[Lé pé] a cewéhe ni nani me paaci, ne pehi a dep ko nahi paaci toomwo, beme lé puu lép-wona mwiihi jélé, beme lé pétaabwon ni ta ko ni éé apulie. † 9.14 1 Pétéru 1.18–19 †† Tii na e tii...na lé o hegi ni wâé ten—Testament. †† 9.19–20 Exode 24.6–8 ††† Pumajoo—La laine. ††† 9.21 Lévitique 8.15,19 † 9.22 Lévitique 17.11 †† Ne me wâé—Grek: Pétaabwon ni ta (purifier).

bwo pineuhi ne ni ta, hemepie time uce téte a cewéle.

E habwiikenye te Padué

²³ ††Genye caa alihi pie, a mwaiitihi pwo ko mwaanu, me ni naado na lé mu hen, ke wâé ne ânebuhe Padué. Be wâé ko a cewéhe ni wota. Kehe icehi ana ni naado naa, ke te ju a déme ni naado na piwéden, na e jeda he miiden. Ke é mu ko ninaa, ke o wâé mwo ni âpwailo na nihe piwéden. [Be time uce jan a cewéhe ni wota, me e ciitili ni ta.]

²⁴ Wo Kériso, ke e taa ha a mwaiitihi na e jeda he miiden, beme e habwiikenye te Padué. Kehe time e uce wonaa ne ha a mwaiitihi ne éni pwo bwohemwo, na pwo ko ni i apulie. Be a mwaiitihi naa, ke te ju a déme a junaado [na e jeda he miiden].

²⁵ [Ke a céiu mwo, ke] a âpwailo na e pébé wo Kériso, ke te a cewéhen [kehe time uce a cewéhe ni wota].

Ke time e uce pwo me piohiwon ko pwoâpwailo, pwohewii pa apwoâpwailo ubwo juif ne éni pwo bwohemwo, na e te pwo téteda ati he ni jo. ²⁶ ††Be mepie wonaa, ke me e o pwo me piohiwon ko mu he ni téé [me mele] tabuhi mu ha atabuhi ko a bwohemwo. Time uce wonaa! E caa te océiu ko tuie, ha a céiu benaamwon, ânebuhe a anebwén ko a bwohemwo. Ke e pineeng beme pa âpwailo. Ke e caa pwo me tieden a ta, ko a bwo mele ten.

²⁷ Mepwo é ne ko ni apulie, ke lé te océiu ko mele. Ke é alecehen, ke e bo tautilé wo Padué. ²⁸ Ke wo Kériso mwo, ke e te océiu ko mele, beme pineuhi ni ta pwo te ni apulie na hiwon jélé. Ke mepie e bo âmwobé, ke caa time uce a bwopwonen me e mwo tuwokenye mwo mu ha a ta. Kehe e o âmwobé beme e celuimikenye, wogenye na genye ucéieng. [Ke *a ju mulip na e ne tenye, ke o é dieli mwo.]

E te océiu ko pwoâpwailo wo Kériso

10 [É caa habwii tewé pie]: Ni *patén de Moosé, ke te ju a déme cehi, ni *adéihi na e bo âbé alece ††. Ke time uce a ju déme ninaa. Be ni patén, ke e wâgo ko pa *apwoâpwailo ubwo pie, me e pwo me océiu ko pwoâpwailo ne ha a jo. Ke te piwien ati he ni jo.

Kehe icehi ana ati ni âpwailo naa, na te junihe hiwon, ke time uce jan me lé ne me mwomwon ke hején ni apulie na lé âbé mwonu Padué, ² ke me puu taabwon ni ta pwo telé. Be mepie jan, ke wieli caa time e o uce pipé ne kolé a pwonimelé, ke caa time lé bo uce pwoâpwailo mwo. ³ Ni âpwailo na lé ne, ati he ni jo, ke lé paniimihi telé mwo ni ta pwo telé [na e teko mu kolé]. ⁴ ††Be te nihe pwocoon me pétaabwon ni ta pwo te ni apulie, ko a cewéhe paaci me ni nani aiu.

††† 9.23 Ébéru 8.5, 10.1 †† 9.26 Ébéru 10.10 ††† Na e bo âbé alece—Wo Kériso, ke e caa te pébé ni adéihi naa, alecehe a benaamwon ko ni patén de Moosé. †† 10.4 Ébéru 9.13

⁵⁻⁶ †Weengaa a watihe ni pwooti ce, li e pii te Padué wo Kériso, he li e tuiebé ne éni pwo bwohemwo:

Time uce nimem

ko ni âpwaito bépineuhi ne ni ta.

Time go uce hegi ni paaci na cini.

Time uce wâé tem ni âpipati.

Kehe go ne tong cehi

a éé apulie bépenem dem.

⁷ Ke é pii tem pie:

“Woéo-ni ânebuheh.

É bo pacuwohi ana nimem kon.

Be wonaa apii kong ne he li tii tem.”Psaume 40.7–9

E ne a piapwo na mwo coho

⁸ Go alihi, e pii wo Kériso pie, time uce wâé te Padué ni âpwaito me ni âpipati, me ni paaci na cini! Kehe icehi ana te ni patén, na e te wâgo konye, beme genye ne ati ninaa!

⁹ Ke e pii mwo te Padué wo Iésu Kériso pie: *Woéo-ni ânebuheh. É bo pacuwohi ana nimem kon.* [Ke go alihi, ni pwooti naa, ke lé habwii tenye pie] e †† pwo me tieden a *piapwo ânebun, beme e ne a piapwo na mwo coho. ¹⁰ †Ke wo Kériso, ke e caa te pwo ana nime Padué kon, ke e ne a één, beme âpwaito na te océiu ko pwo. Ke e caa tuwokenye mu he ni ta pwo tenye, ke e pwo me wogenye ni apulie te Padué ††.

¹¹ ††[Ne ha a piapwo ânebun, ke] lé cuwo pwo apwoâpwaito wo lépwo apwoâpwaito ati he ni tan †††. Ke lé piohiwon ko pwo a âpwaito na te piwien. Kehe icehi ana te tice aceli te ju céiu mu ko ni âpwaito na lé pwo, celi jan me tuwokenye mu he ni ta pwo tenye.

¹² Ke mepwo é ne ko a âpwaito te Kériso †††, ke e te océiu ko pwo. Ke te nihe pwojunuun me pineuhi ni ta pwo tenye dieli mwo [§]. Ke é alecehen, ke wo Padué, ke e pwo me e tebwwo pwo juin [beme e pihuôhi ati ni naado] dieli mwo. ¹³ ††Ke e te mu lang, die ha ace bwo caaite lépwona lé pwopa ne kon.

¹⁴ Te é mu ko a âpwaito ten na te céiu, na e pwo me lé mwomwon ke hején dieli mwo ne ânebuhe Padué, ati ni apulie na e caa tuwolé koja ni ta pwo telé †††.

† 10.5 Psaume 40.7–9 †† E—Kériso, ai Padué Caa. † 10.10 Ébéru 9.12 †† 2e phrase—Grek: Sanctifiés. Pineité. A bwopiinen mwo pie, jan me nye alihi a pwahamiin, me pipaunueng me pipwoe-abwé ten. †† 10.11 Exode 29.38 ††† Ati he ni tan—Ni âpwaito na lé pwo, ke te ité koja ni âpwaito na piwéden, na te pwo cehi ha a tan na céiu ha a jo. Omehi a niide a tii 1. Kehe icehi ana te tice mu kolé celi pwojunuun me e tuwo ni ta pwo tenye. ††† A âpwaito te Kériso—A pipwoâpwaito ten naa, ke te weeng mwo, be e pineeng me e mele. Omehi Ébéru 9.28. § Dieli mwo—Ni pwooti naa, ke wieli ni behi ni pwooti bépineuhi ne ni ta pwo tenye, ai wieli ni behi ni pwooti beme e tebwwo pwo a juin. †† 10.13 Psaume 110.1 ††† Na e caa tuwolé koja ni ta pwo telé—ai Ana e caa pwo me woélé ni apulie te Padué. Grek: Na caa paciitilé.

Ni patén na e ne he ni pwonimenye

¹⁵ E te *pajuujuhi anaa tenye na a *Jenen Iitihi, ko a pwooti ce [na e pii wo Padué pie]:

¹⁶ ††Weengi kuti a piapwo

na geme o bo pwo

[me ni apulie tong]

ha a tan na é caa pacuwohi.

É bo ne ni patén dong

ne he ni pwonimelé.

É bo tii a pwooti tong

*ne he ni bwo temehinaado telé.*Jérémie 31.33

¹⁷ ††Ke e pii mwo pie:

É pineulé ko ni ta pwo telé,

ke o time é bo uce niimihi mwo

*ni bwomu telé na ta.*Jérémie 31.34

¹⁸ Ke mepie e caa pineuhi ni ta pwo tenye, ke o caa time uce jan me genye mwo pwo mwo ace âpwaito.

ni béhabwiinen de lépwo acéihi

(Pwahamii tii: 10.19—13.25)

Nye imwi mangihi ni céihi tenye

¹⁹⁻²⁰ †† ††Lépwo bééng, caa tehi ne tenye ali duaan li junihe iitihi [ne jeda he miiden] mu ko a bwo téé na a cewéhe Iésu. Be li e ne a één [beme e âpwaito] ke e tie ali mwaanu [bécapuhi bwonihni na ali duaan li junihe iitihi]. Ke o caa time uce piwâ genye me genye taa lang! Be anaa kuti a pwaaden ^{§§†} na mwo coho, ne ko a mulie [dieli mwo ne pele Padué].

²¹ Ke caa pwo pa apwoâpwaito ubwo tenye, na e pihuô ne ha a mwa te Padué. ²² †††Ke e caa puu taabwon ni ta pwo tenye, beme pwaale konye, pwohewiin heme e puukenye ko a tabe na te ju bwakenu ^{§§§}. Ke o caa te tice ace céiu naado celi me e o pipé ne konye kon. Ke bwobe jan me genye taa pele Padué, ne ha a pwonime na juuju, me a céihi na mang.

²³ Ke wâé heme genye imwi mangihi a céihi tenye ne ko ni adéihi na genye ucéihi [na e âbé mu pele Padué]. Be e o te pacuwohi nina e caa mi pii ânebun. ²⁴ Ke wâé heme genye picani tenye, me pipamwoiukenyé ibu, beme piubwo da a pipwoééhe tenye me ni penem denye na wâé. ²⁵ ††Ke genye nemwo cuwo koja ni pitihi

§† 10.16 Jérémie 31.33; Ébéru 8.10 §†† 10.17 Jérémie 31.34

§† 10.19 Ébéru 4.16 §† 10.20 Mataio 27.51 §§† E tie ali

mwaanu...pwaaden—Grek: E tehi a pwaaden na mwo coho na e pitadiihi a mwaanu. Omehi Mataio 27.51. §§† 10.22 Lévitique 8.30; Ézékiel 36.25; Éfeso 5.26 §§§ 1re phrase—Grek: Caa pétaabwon ni tooli he ni pwonimenye, ke caa puu ni éénye ko a tabe na bwakenu.

18 10.25 Ébéru 3.13

tenye, pwohewii ni béén, ke wâé heme genye te pi-pamwoiukenyé. Ke genye te cumang ne kon, be genye caa temehi pie, o caa tuie a Tan [na e bo mwojuia mwobé hen wo Padaame].

Genye pipwocile!

²⁶ †[Genye pipwocilekenye!] Be mepie genye te pwo me ubwo ni puninye, me genye pwo nina ta, wogenye nina genye caa temehi a juuju, ke o te tice ace âpwailo celi o jan me bépwonon me pineuhi ni ta pwo tenye naa! ²⁷ ††Ke te tice aceli genye hegi koja Padué, kehe te icehi a bwo tautikenye ten, me a bwo pwocuhinaado tenye ten! Ke anaa, na genye ucéihi ne ha a bwo mwotikenye, me éjén genye. Be ati lépwona lé pwobwoni Padué, ke e pwo me éle jélé ne ha a miû na junihe ubwo!

²⁸ ††Ke é ne ko pa apulie na time e uce piténédehi ni patén de Moosé, ke tautieng me taunueng, hemepie alo ai cié celi lé pipé ne kon. Ke time uce piwâ lépwo béén me lé taunueng.

²⁹ ††Ke o ade ace cuhinaado te lépwona lé tééti pa *Naî Padué ko ni bwomu telé? Be li e caa pwo me lépwo apulie ten ††, é mu ko a cewéhen: a cewéle li e pacuwohi a piapwo te Padué. Ke mepie lé ne me piti-cenaado ne kon, ke o ade ace cuhinaado telé? Ke mepie lé piciheta ne ko a Jenen Iitihi, pa apébé na a *pipwoééhe tice ja kon de Padué, ke o ade ace cuhinaado telé? [É pii tewé pie]: O te nihe ubwo dieli mwo! ³⁰ †††Be genye caa temehi pie, e caa pii [wo Padué] pie:

*Te woéo cehi na é bo uje
[ne te nina lé pwo nina ta].*

*Te woéo cehi
na é o te muko ne telé*

ce cemelé ko ni huô telé. Deutéronome 32.35

Ke a céiu mwo:

*Ke e bo te tauti a bele ten
wo Padaame. Deutéronome 32.36*

³¹ Ke o te junihe pwoééhenye, hemepie wo Padué, na e *mulie dieli mwo, ke me e imwikenye beme e pwocuhinaado tenye!

Cumang ne ha a céihi die ha a pwonehin

³² Wâé heme geé pipaniimihi ni tan ânebun, he geé hegi a pwéélang de Padué. Be é alecehe a bwo temehi nen dewé Kériso †††, ke geé tooli ni tacebwén, me ni picani, me ni téé na te nihe binyi. Kehe icehi ana geé te cumang. ³³ Be lé pwotahinaado ne kowé, me

† 10.26 Ébéru 6.4–8 †† 10.27 Ésaie 26.11 † 10.28 Deutéronome 17.6, 19.15 †† 10.29 Exode 24.8 †† E caa pwo me lépwo apulie ten—Grek: *Il les a sanctifiés. Ke e caa pinelé ité.* ††† 10.30 Deutéronome 32.25–36 ††† A bwo temehi nen dewé Kériso—Grek: *A bwo pwo me pwéélang kowé.*

pitaahikewé, ne ânebuhe ni apulie. Ke é he ni béé be-naamwon §, ke geé picani te nina lé pwotahinaado ne kolé, pwohewiin ne kowé.

³⁴ ††Be li geé mu he ni picani me ni téé ne ko ni [acéihi bééwé] na lé mu he karépu. Ke geé mu ha a pipwodéén, he li lé pé kojakewé ni dewé. Be geé temehi pie, caa etewé a adéihi [na e ne wo Padué] na piwéden, ke e mu dieli mwo.

³⁵ Ke é jena ni, ke geé mwoiu, ke geé nemwo pwo me emaan gewé. Be [mepie geé te cumang] ne he ni céihi tewé [ne ko Padué] ke o ubwo ace cemewé! ³⁶ Ke geé te cumang, beme geé pwo ana nime Padué kon. Ke geé o hegi ni adéihi, na e caa mi pii. ³⁷ †††Be caa time uce bwolihi [ke e o tuiebé wo Padaame] pwohewii ana caa te tii ne he ni tii iitihi pie:

*E o te ju pwome tuiebé
wo pana me e âbé.*

O time uce bwolihi,

ke e o pihabwiieng. Habakuk 2.3

³⁸ [Ke e pii mwo wo Padué pie]: *Wo pana e te céihi ne kong, ke mwomwon nang ne he pwahamiing. Ke e kon a mulie*††.

Habakuk 2.4

Kehe wo pana e mwojuia mwo, ke muhi te Padué kon.

³⁹ Ke wo lépwona lé mwojuia mwo koja Padué, ke o tielé dieli mwo.

Kehe wogenye na genye céihi ne ko Padué, ke e celuimikenye.

A céihi te ni Isaraéla ânebun

11 †††A céihi, ke a bwopiine ade? Me genye céihi, ke genye temehi me ubwo ne he ni pwonimenye, pie e o tuie ana wâé na genye ucéihi. Be a céihi, ke o *pajuujuhi ne he ni pwonimenye pie, e te cuwo, nina mwo time genye uce alihi ko ni naamiinye. ²⁻³ †††Te é mu ko a céihi, na genye temehi pie, wo Padué, ke e ne ati ni naado ko a pwooti ten. Be e ne a bwohemwo me a miiden ††, me ati nina lé mu hen. Ati ni naado na genye alihi, ke lé tai âbé mu ko nina time genye uce alihi.

É bwolihi, ke lé céihi ne ko Padué wo lépwo ukéiu tenye. Ke te é mu ko anaa, na wâé ten jélé.

Abel

⁴ †††Wo Abel †, ke e céihi ne ko Padué. Ke te é mu ko a céihi ten, na e pwo a *âpwailo na wâé te Padué. Be piwéden koja ali e pwo wo pa cuwon, Kaina †††. Ke e

§ *É he ni béé benaamwon—ai Ce pibééwé. Wieli ce béén mu kolé, ke pwotahi ne kolé, ke ce béén, ke lé picani telé.* † 10.34 Mataio 6.20, 19.29 †† 10.37–38 Habakuk 2.3–4 †† Grek: *Wo pa apulie tong na mwomwon nang, ke e o mulie mu ko a céihi.* ††† 11.1 2 Korénit 5.7 † 11.3 Genèse 1.1; Psaume 33.6; Ioane 1.3 †† A bwohemwo me a miiden... A pwooti grek éni, ke a bwopiinen pie, âge, monde, univers. ††† 11.4 Genèse 4.3–10 ††† Abel;

hegieng wo Padué, ke e pwo me mwomwon Abel ne he pwahamiin, mu ko a céihi ten. Ke hemepie caa bwolihi a bwo mele te Abel, kehe ninnaa, ke lé mwo teko pacihekenye.

Énoka

⁵ †Wo Énoka, ke e céihi ne ko Padué. Ke caa te tii ne he ni tii iitihii †† pie, pa apulie na wâe te Padué nang. Ke te é mu ko a céihi ten, na wo Padué, ke e pééeng da he miiden, he e mwo teko mulie, be time e uce mele. Ke caa time lé bo uce alieng mwo ne éni pwo bwohemwo.

⁶ Genye alihi pie, mepie tice céihi tenye, ke o pwocoon me ni apulie na wâe te Padué genye. Ke mepie [nimenye me] genye taa pelen, ke wâe heme genye céihi pie, te pwo Padué! Ke a céiu, ke wâe heme genye céihi pie, *adéi lépwona lé âbé céiieng mu he ni ju pwonimelé.

Noé

⁷ †Ke wo Noé, ke e céihi ne ko Padué. Ke te é mu ko a céihi ten, na e mi paciheeng wo Padué [ko a ujaa na nihe ubwo na e bo tuie]. Mwo time e uce alihi a ujaa wo Noé, kehe icehi ana e te paciiti Padué, ke e te piténeeng. Ke e jili ali ong, ke tai celuimilé ati, me a pwomwoiu ten. Ke a céihi ten, ke e habwii tenye [a bwo time uce céihi te] lépwo béé apulie pwo bwohemwo, na caa tautilé me pwocuhinaado telé. Ke wo Padué, ke e ne me mwomwon Noé ne he pwahamiin, beme e ne ten ni adéihi ten. Tai cuwo ati ninnaa mu ko a céihi te Noé.

Abérama

⁸ ††Wo *Abérama, ke e te céihi ne ko Padué. Ke te é mu ko a céihi ten, na e pitabemi Padué, he li e todeeng. Ke e engen koja a amu ten, nge ha amu na me e bo habwii ten wo Padué. Be mwo time e uce ju temehi, he na me e â lang. ⁹ ††Ke me e tuie nge ha ali amu li e ne ten wo Padué, ke e te mu lang ko a céihi ten, he ni mwa mwaanu, be e pwohewii pa coho.

Ke lu te wonaa mwo wo Isaaka, pa naîn, me Iakobo, pa pabun. Be ali *piapwo li e pwo te Abérama wo Padué, ke te a de mwo ni piebehieng ††. ¹⁰ Be a ju amu na e ucéihi wo Abérama, ke a amu na e bahi wo Padué, âcehi ana te nimen kon; amu na e te mu dieli mwo.

¹¹ †††Wo Abérama, me Sara, ke caa lu ukéiu aiu me ukéiu toomwo. Wo Sara, ke ê toomwo na te tice naîn,

Kaina—Lupwo naî Adamu, pa bécéiue apulie ne pwo bwohemwo. † 11.5 Genèse 5.21–24 †† Caa te tii ne he ni tii iitihii—ai Wo Padué, ke e caa pipajuujuhi ne kon. † 11.7 Genèse 6.13–22, 7.1 †† 11.8 Genèse 12.1–5 †† 11.9 Genèse 35.12 ††† Dernière phrase—Grek: Be lé hegi me weeng a piapwo. ††† 11.11 Genèse 18.11–14, 21.2; Roma 4.19

be time uce jan me pwo naîn. Kehe icehi ana lu céihi ne ko Padué. Ke te é mu ko a céihi telu, na pwoapulie ko Sara §. ¹² ††Ke caa nihe hiwon ni niide apulie na lé tuie mu kon. Ke caa nihe hiwon jélé pwohewii ni ceni jeda he miiden, ke ni won jeoté ticepwon, na time uce jan me genye pine. [Be caa te cuwo, pwohewii ana e caa mi pii wo Padué.] Ke lé tai âbé ati mu ko pa apulie na te céiu nang, na caa te nihe pa ukéiu!

¹³ †††Wo Abérama, me Isaaka, me Iakobo ††, ke time lé uce alihi ati [ni adéihi na e âbé mu ko] ana e caa mi pii wo Padué, he lé mwo mulie. Kehe icehi ana lé te céihi taaci [pie o te cuwo ha ace céiu tan]. Ke lé pipwodéén, be pwohewiin heme lé alihi mu ité a bwo pacuwohi nen. Be lé patemehi ati pie, woélé lépwo coho ne pwo a bwohemwo ce.

¹⁴ Ke wo lépwona lé wonaa ko ni bwo cihe telé, ke lépwo apulie na lé ko hane ace céiu amu, na me bo te a ju amu telé. ¹⁵ Be hemepie nimelé, ke jan me lé mwojuia mwo, kehe time lé uce niimihi ali amu li lé âbé mu hen.

¹⁶ Be lé niimihi a amu na te junihe wâe koja ace céiu amu éni pwo bwohemwo. Be amu na e jeda he miiden, na e pwopweehi me delé wo Padué. Ke weengaa a watihen me genye alihi pie, wo Padué, ke time uce tanim nang, heme lé toii kon pie Padué helé.

¹⁷⁻¹⁸ †††Wo Abérama, ke e nihe céihi ne ko Padué. Ke e pii ten wo Padué pie, o bo te junihe hiwon ce piebehieng, celi lé *o bo pituie mu ko pa naîm Isaaka.*

Genèse 21.12

Kehe icehi ana é alecehen, ke e tacebwéni a céihi ten wo Padué. Be e pii ten pie, me e *pwoâpwailo ten ko Isaaka. Ke wo Abérama, ke e te pipwopweeng ne kon beme e pwo. ¹⁹ ††Be e céihi pie, te jan ne ko Padué, me e pwo me lé mulie mwo wo lépwo amele. [Kehe icehi ana e pacuwong wo Padué] ke e ne Isaaka mwo te Abérama. Ke pwohewiin heme e caa mulie cemwo wo Isaaka ††.

Isaaka

²⁰ †††Wo Isaaka mwo, ke e te céihi ne ko Padué. Ke te é mu ko a céihi ten na e adéi [lupwo naîn]: wo Iakobo me pa cuwon Ésaü. Ke e ne telu ni adéihi, na o bo cuwo he ni tan na mwo e he pwaaden.

§ Ni béé tii iitihii he pwo grek, ke lé pii a céihi te Sara, ne ha a niide a tii ce. Kehe icehi ana ni béén, ke lé pii Abérama. Ke ni béén mwo, ke lé tai piilu. † 11.12 Genèse 15.5, 22.17 †† 11.13 Genèse 23.4; 1 Chroniques 29.15; Psaume 39.13; 1 Pétéru 2.11 †† Abérama, me Isaaka, me Iakobo—Grek: Ati lépwo apulie naa. Kehe icehi ana time uce pii ati lépwo piebehi Abérama na te junihe hiwon jélé, na piilé ne ha a niide a tii 12. ††† 11.17–18 Genèse 21.12, 22.1–14 †† 11.19 Roma 4.17 †† Ke pwohewiin heme e caa mulie cemwo... ai Weengaa a céiu ocine [me denyé]. ††† 11.20 Genèse 27.27–29, 39–40

Iakobo

²¹ †Wonaa mwo ne ko Iakobo. Be e te céihi ne ko Padué. Be é ânebuhe a bwo mele ten, ke e caamada ko a bwajaan, ke e paunu Padué. Ke e adéi lupwoli naî Josef. Ke te é mu ko a céihi ten na e wonaa.

Josef

²² ††Wo Josef, ke e céihi pie, alecehe a bwo mele ten, ke wo Padué, ke e bo pé a puapulie ten *Isaraéla mu ha amu *Aigupito. Ke é mu ko a céihi ten, na e mi pii te lépwo béén pie, mepie te cuwo a tan naa, ke me lé bo te pé mwo céilé ni duun mu ha amu Aigupito ‡.

Lu nyaa me caa te Moosé

²³⁻²⁴ ††Wo lu nyaa me caa te *Moosé, ke lu céihi ne ko Padué. Ke te é mu ko ni céihi telu, na time lu uce piténédehi a patén de Faraô, pa daame he lépwo Aigupito. [Be e huôhi pie, me lé taunu ati ni nahi ewa aiu na lé âbeehe ne pele ni Isaraéla.] Lu neduwo Moosé he na cié wole. Be lu alihi pie te nihe wâé a bwo alieng ‡. [Ke e toeng ê naî pa daame Faraô, ke e pééeng beme pa naî.] Ke ubwo Moosé ne ha a pomwa te pa daame Faraô.

Moosé

Wo Moosé, ke e céihi ne ko Padué. Ke é mu ko anaa, na muhi ten me lé pii kon pie, pa naî égi naî pa daame he lépwo Aigupito. ²⁵ Ke e mu pele [ni ju béén, wo lépwo Isaraéla], a puapulie te Padué, ha a benaamwon na ta ne kolé hen. Be nimen me e mu he ni picani na lé mu hen, koja a pipwodéén [ne pele Faraô] ne ha a mulie na muhi te Padué kon. Be time uce bwali a pipwodéén naa.

²⁶ Ke pihoonieng, pwohewii a bwo pihooni Kériso: pa *Mesia [li e neeng bé wo Padué, hiwon ni jo alecehen]. Wâé te Moosé anaa, koja ace bwo hegi ati ne ni wâé ne ha amu Aigupito. E wonaa, be e niimihi ni cemen na e bo ne ten wo Padué.

²⁷ Ke te é mu ko a céihi ten, na e [pé a bele ten, beme lé] wie mu Aigupito. Time uce mwotieng ko ace bwo okéé te pa daame Faraô. Ke e te cumang, be e te alihi, ko a céihi, pana time genye uce alieng ko ni naami-inye. ²⁸ ††Ke te é mu ko a céihi ten, na e [huôhi ne te a bele ten pie, me lé] pwo a pipwodéén ko a *Pacika. Be nimen me lé niimihi he li lé timi ni jije pomwa telé, ko a cewéhe a nahi muto, beme time e uce taunulé wo pali

† 11.21 Genèse 47.31—48.20 †† 11.22 Genèse 50.24—25; Exode 13.19 ‡ Dernière phrase—Grek: Ke e ne a pihuô ten, ne ko ni duun. †† 11.23 Exode 1.22, 2.2 †† Lu alihi pie te nihe wâé a bwo alieng—Wo lépwo Isaraéla ânebun, ke lé céihi pie, a bwo wâé na a pwahamii pa apulie, ke a inenaado pie, wâé te Padué nang. Omehi 1 Samuel 9.2; Apostolo 7.20. ††† 11.28 Exode 12.21—30

*âcélo li e taunu ni bécéiuhe ewa aiu [ha amu Aigupito].

Lépwo Isaraéla

²⁹ †††Wo lépwo watihenye, wo lépwo Isaraéla, ke lé céihi ne ko Padué [ke lé âcéi Moosé mu ha amu Aigupito]. Ke te é mu ko a céihi telé, na meiu a pwaadeniilé nge ha a jié Megele. Ke lé gaale ko a céiu goon [ke celuimilé]. Ke me lé tailé wo [lépwo coda te] lépwo Aigupito, ke e âbé huîlé ali tabe, ke lé tai mele.

³⁰ †Ke wo lépwo Isaraéla, ke lé te céihi mwo ne ko Padué. Ke te é mu ko a céihi telé mwo, na lé engen au-jenihi a goomwa babé bwonihni Iériko he na 7 ni tan. Ke e te tupwo kuti ali goomwa.

Rahab

³¹ ††Rahab, ê toomwo pwoywaaden [ne Iériko] ke e céihi ne ko Padué. Ke te é mu ko a céihi ten, na e hegi lupwo coda Isaraéla, li mi nelu ngen beme lu â alihi a pwomwo ubwo. Ke anaa, na e *celuimi [a pwomwoiu ten]. Kehe icehi ana lé tai mele ati ni apulie ha a pwomwo ubwo, mu ko ana time lé uce piténéde Padué.

Hiwon mwo ni béén

³² †††O ade aceli me é mwo pii mwo? Time uce jan ni benaamwon me é uti ati [nina lé pwo mu ko ni céihi telé, pwohewii] Gédéon, Barak, me Samasona, me Jéfté, me *Davita, me Samuel, me ati lépwo péroféta mwo:

³³ ††Lé piwéden koja ni mwametau wo lépwo béén; Lé pé a pihuô ko a juuju wo lépwo béén; Lé [pwo nina wâé, ke lé] hegi a adéihi te Padué wo lépwo béén;

Lé capuhi a pwo ni liô beme lé nemwo wiilé;

³⁴ ††Lé taunuhi ni miû na ubwo wo lépwo béén;

Lé cela ko lépwona nimelé me lé taunulé;

Lé hegi ni niihelé na ubwo wo lépwo béén na tice ni-ihelé, beme lé piwéden ne ko a pa, ke me lé pacelahi ni mwocoda na nihe ubwo.

³⁵ ††Ke pwo ni béé toomwo, ke [te é mu ko ni céihi telé, na] lé hegi mwo ni aiu helé, me ni béélé ††, me ni naîlé li lé caa mele, be lé caa mulie cemwo.

Ke pwo ni béé apulie, na [te é mu ko ni céihi telé] na lé mu he ni picani, be lé pwotahi ni éélé [wo lépwona muhi telé ko Padué] die ko a bwo pwo me lé mele. Ke time lé uce [pawie ni céihi telé, beme o] tuwolé. Be lé

††† 11.29 Exode 14.21—31 § 11.30 Josué 6.12—21 †† 11.31 Josué 2.1—21, 6.21—25; Cang 2.25 ††† 11.32 Juges 6.11—8.32, 4.6—5.31, 11.1—12.7, 13.2—16.31; 1 Samuel 16.1—1 Rois 2.11; 1 Samuel 1.1—25.1 †† 11.33 Daniel 6.2—28 ††† 11.34 Daniel 3.23—27 †† 11.35 1 Rois 17.17—24; 2 Rois 4.25—37 †† Ni aiu helé, me ni béélé, me ni naîlé—ai Lépwo âjiénélé. Grek: Lépwo amele telé.

caa mi niimihi a mulie na e alecehe a mele, na lé bo hegi; a mulie na te nihe piwéden [koja a mulie ce, ne éni pwo bwohemwo].

³⁶ †Wo lépwo béén, ke pihoonilé, me ahilé ko bwali-wota. Ke wo lépwo béén, ke nelé he karépu, ke cielé ko itihe toki. ³⁷⁻³⁸ ††Ke taunu ni béén ko péi. Ke woli ni béén ko teua. Ke ei me alo mu ko ni béén ko gili.

Ke pwo ni béén na pwotahinaado ne kolé, me cibéélé mu he ni béé duaan nge he ni béé duaan. Ke lé cela nge ha a melé, ke é nge pwo ni juwole, ke te tice mwaale telé. Ke tice naamuulé, ke lé cuwohe ni imuto, me nani. Ke lé taduwo nge he ni mwa péi, me ni pwon na ini ne he pule. Ke te nihe pwoééhelé, be lé te junihe mu he ni picani mwo. [Au, pwoééhelé!] Be te nihe wâé jélé koja a bwohemwo ce.

Lé tai ucéihi ana genye hegi

³⁹ Ati ni apulie naa, ke lé tai céihi ne ko Padué. Ke te é mu ko ni céihi telé, na e pii me wâé jélé. Kehe icehi ana te tice paceli e ne me e hegi, ha a benaamwon naa, ati [a adéihi] li e caa mi pii wo Padué [pie me e bo ne te a bele ten. ⁴⁰ Ke he é mu ko ade?] Be lé ko ucéikenye [wogenye na genye mwo ko mulie jena]. Be wo Padué, ke e caa mi pwopweehi ânebun pie, me e bo pwo me tai mwomwon genye, me hején genye ne ânebuhen, wogenye me woélé. Ke a naado na te nihe wâé ne konye jena †.

Genye tai cumang pwohewii Iésu

12 †Caa pajuujihi ne tenye ni céihi te lépwona lé ânebuhenye, lépwona te junihe hiwon jélé. A mulihelé, ke a béhabwiinen denyé †. Ke mepie wonaa, wogewé lépwo bééng, ke wâé heme genye pétaabwon ati ni âneule na lé pacuwohi ni bwo téte tenye. Genye necu ni ta na e imwikenye! Ke genye cumang, beme genye te téte die ha anebwén kon.

² Genye ome Iésu cehi, be weeng na e céihi tenye, mu ha atabuhi kon, ke weeng na e wéihi, beme o hején die ha a pwonehin. Ke e hegi a penem den, ne ha a bwo uca ten. Ke e te nihe mu he ni picani, ke e mele ne ko a *kuricé: a bwo mele na pwo me tanim. Kehe icehi ana e pwo me piticenaado ne ko a tanim naa, be e niimihi a bwo pipwodéén den, ne ha anebwén kon. Ke wo Padué, ke e caa neeng me e tebwo pwo juin [beme e pihuôhi ati ni naado].

† 11.36 1 Rois 22.26–27; 2 Chroniques 18.25–26; Jérémie 20.2, 37.15, 38.6 †† 11.37 2 Chroniques 24.21 ‡ Grek: Wo Padué, ke e caa mi alihi ana te junihe wâé me denyé koja anaa, be time o uce wâé me e pwo me hején jélé kojakenye. Weengi a naado na te junihe wâé me denyé: Be nye alihi a adéihi te Padué he nye mwo mulie éni pwo bwohemwo, mu ko a bwo mu ibu tenye me Kériso. †† 12.1 1 Korénit 9.24–25 †† 1re & 2e phrases—Grek: Lé aujenikenye wo lépwo apipajuujihi na lé pwohewii a nii na ubwo. Ocine ko a jéhilé, be te junihe hiwon jélé.

³ Wâé heme genye niimihi a bwo picani ten ne ko ni apulie ta na lé te nihe pwotahinaado ne kon. Be mepie wonaa, ke o time genye uce pwoemaan, ke me nye patupwo [ni céihi tenye].

E punekenye be eânimen denyé

⁴ [É temehi pie, lé pwopa ne kowé wo lépwo apulie ta, pwohewii ali lé pwo te Kériso, ke geé te junihe mu he ni picani kon.] Kehe icehi ana mwo time geé uce téele [pwohewii Kériso] die ko ace bwo mele tewé ††¹ ⁵ ††Ke a céiu mwo, kona geé caa pineuhi pie, e pii kowé pie, wogewé ni naîn, ke e punekewé [ko a bwo mu tewé he ni téé me ni picani]? Be e pii pie:

Pa ju naîng wé,

go tabemi Padaame na e punekewé.

Go nemwo pwo me pita tem.

⁶ *E pune ati ni ju naîn.*

E pune ati lépwona

eânimen delé. Proverbs 3.11–12

⁷⁻⁸ †É mu ko anaa, na geé hegi ehi ni pune te Padué, he e huôhi ne tewé ni naado. Be e wonaa te ati ni naîn. Be he wo pace ewa celi time e uce ne pune ten wo pace caa ten? Ke mepie time e uce wonaa tewé wo Padué, ke a bwopiinen pie wogewé, ke time uce ni ju naîn.

⁹ Ke mepie genye paciiti ni caa tenye ne éni pwo bwohemwo, nina lé punekenye me pwopweehi ne konye, ke o te nihe wâé mwo heme genye hegi, beme e pwopweehi ne konye wo Padué Caa tenye, na e jeda he miiden. Ke e o mu konye *a ju mulip ††.

¹⁰ Be wo lépwo caa tenye, ke lé te punekenye me ée-wo konye ha a cuwo benaamwon na te ju bahin, âcehi nina nimelé kon, me ni âniimihinaado telé. Kehe icehi ana wo Padué, ke e huôhi ne tenye ke e punekenye, beme e picani tenye [dieli mwo]. Be wâé ten heme genye â ni apulie ten na wâé genye, ke iitih, ke hején pwohewiieng.

¹¹ ††A juuju pie, time uce wâé tenye a cuwo benaamwon na genye mu he ni pihuô me ni pune tenye. Kehe icehi ana mepie genye hegi ehi, me picani ne kon, ke é alecehen, ke e o bo pwo ce cemenye celi o nihe wâé. Be genye o bo ni apulie ko a péém: nina lé te pwo nina wâé, ke mwomwon.

Go cuwoda!

¹² ††Anaa na [é muko pii tewé pie]:

[Go cuwoda!]

Go pamwoiuihi lupwo im!

††† Grek: Mwo te time geé uce ju téele pwobwonihii a ta die ko a bwo téé na a cewéhe[wé]. ††† 12.5–6 Job 5.17; Proverbs 3.11–12; Pii Beetihii 3.19 § 12.7 Deutéronome 8.5 †† Ke e o mu konye a ju mulip—ai Ke genye bo picaa a bwo mulie ha a mulie na wâé ten. Grek: Ke genye bo mulie. ††† 12.11 Cang 3.17–18 †† 12.12 Ésaie 35.3

ten, ²⁹ †be wo Padué henye, ke e pwohewii a miû na e pwo me éle tieden ati ni naado!

Bénebwéne pwooti

13 Wâé heme geé te pipwoééhewé, pwohewii ni acéihi ne ko Kériso. ² ††Ke geé hegi ni apulie na lé âbé pelewé. Be wo lépwo béén, ke time lé uce temehi pie, lé hegi ni *âcélo te Padué. ³ Ke geé niimi mwo lépwo [acéihi bééwé] na élé he karépu, ke geé mu he ni picani me woélé, pwohewiin heme wogewé na ciekewé mwo. Ke te piwien mwo ne ko nina ahilé me pwo ahinaado ne ko ni éélé. Wâé heme geé pwo me cunu gewé me woélé, pwohewiin heme ni ééwé na lé pwotahi ne kolé †.

⁴ ††Ke geé paciitihhi a piaten. Ke geé nemwo pibune: Nemwo êjele koja ni mwodewé, ai ni aiu hewé. Be wo Padué, ke e bo ne kuhinaado te lépwona lé wonaa, me ati lépwona lé pipule hauli me ni béén.

E picani tenye wo Padaame

⁵ †Geé nemwo pwo me ânenimewé ne ko a mwani! Geé pipwodéén ko ni naado na e pelewé. Be e caa te pii wo Padué pie: *Time é o uce engen kojako, ke é bo te pwopeehi ne kom.*

Deutéronome 31.6

⁶ ††Ke anaa kuti, na me time uce pinekepé tenye. Be: *E te *celuimié wo Padaame hung. O time uce mwotié ko ni apulie. Te tice aceli jan me lé pwo tong. Psaume 118.6*

Weengaa a pwooti na me genye pipatemehi, ne ha a pipwodéén!

⁷ ††Geé niimi lépwo apihuô tewé ne ha a céihi, li lé pébé céiikewé a pwooti te Padué. Ke geé nenimewé ne ko ni bwo mulie telé, me ni *adéihi na e âbé mu kolé †. Ke wâé heme geé pipwohewiilé.

Âcéi Iésu

⁸ Wo Iésu, ke te céiu a bwo mu ten, ânebun, é jenaar, ke é dieli mwo! ⁹ ††Geé nemwo hegi haulihi ni muko pé-taapwo pune na ité. Be koli lé bo pipatiedenikewé. Be te icehi a *pipwoééhe tice ja kon de Padué, na e temehi me e pamwouihi ni pwonimenye, kehe time uce a bwo piténehehi nen denye ni patén ko ni wiinaado. Be te junihe piticenaado ne ko ninaa.

¹⁰ Pwo a *apwoâpwailo tenye [na piwéden]. Ke wo lépwo apwoâpwailo éni pwo bwohemwo, ke te tice

† 12.29 Deutéronome 4.24, 9.3 †† 13.2 Genèse 18.1–8, 19.1–3; Roma 12.13 † Pwohewiin heme ni ééwé na lé pwotahi ne kolé—ai Be wogewé mwo, ke pwo ni ééwé, ai Be geé mwo mulie ne éni pwo bwohemwo me woélé, ai Be wieli o pwotahi ne kowé ha ace céiu tan celi mwo e he pwaaden. Grek: Be te wogewé ha a éé apulie. †† 13.4 Éféso 5.5 †† 13.5 Deutéronome 31.6,8; Josué 1.5 ††† 13.6 Psaume 118.6 ††† 13.7 1 Korénit 4.16 † Adéihi na e âbé mu kolé—ai A bwo mele telé. †† 13.9 Roma 14.17

mwohemwo delé ne kon. ¹¹ †††Wo pa apwoâpwailo ubwo, ke e mu pébé a cewéhe ni wota na taunuhi, ne ha a duaan na junihe iitihhi, beme a âpwailo bépineuhi ni ta. Ke ni éé ni wota naa, ke cini ne âoté pwomwo †† [ne ha a céiu duaan na e ité koja a pimú te ni apulie].

¹² †††Wo Iésu, ke [weeng pa âpwailo tenye. Ke lé téé-tieng, ke] e mu he ni picani, ke e mele ne pwomwo koja a pwomwo ubwo. Ke téé a cewéhen, beme puu taabwon ni ta pwo tenye, ke me pwéelang [ni pwonimenye ne ânebuhe Padué].

¹³ ††Wâé heme genye âcéi Iésu, ke me genye te mu he ni téé me ni tanim kon ††. Ke genye wie me weeng koja ni bwo mulie te ni apulie [na ta jélé] †††. ¹⁴ †††Be a ju amu tenye, ke time uce e pwo a bwohemwo ce, be o tieden. Kehe genye omehi cehi a amu na e jeda he mi-iden, he na genye o â lang †††.

¹⁵ ††Weengi ni âpwailo na wâé te Padué, na me genye ne ânebuhen: Me genye pipaunuhi a niin, me pipatemehi pie, Padaame henye. ¹⁶ ††Ke a céiu: Ke me genye pwo ana wâé, ke me genye pipwoééhe nina tice delé. Anaa kuti a âpwailo na wâé ten.

Pwo me piwahin gewé ke geé pwoiitihhi

¹⁷ ††Wâé heme geé pwo me piwahin gewé, ke me geé piténehe ni apihuô tewé [ne ha a céihi]. Be e bo tautilé wo Padué mu kowé. Ke geé pwo me lé pipwodéén ko ni bwomu tewé, ke geé nemwo pwo me téé ni pwonimelé. Be mepie piwahin jélé mu kowé, ke o te ta ne mwo kowé.

¹⁸ ††[Dieli jenaar ni, ke] time e uce pipé ne kome ni pwonimeme. Ke wâé heme geé te pwoiitihhi me deme ²², beme te wâé ni bwomu teme, ne ha ati ni bwomunen. ¹⁹ Ke a céiu mwo, ke é te ju ilekewé me ubwo pie, me geé pwoiitihhi beme é epin ko mwojuia ne mwo pelewé.

Adéihi

²⁰⁻²¹ ††É ile Padué, pana e ne tenye a péém, pie, me e ne tewé ati celi tice tewé, beme geé pwo ana nimen kon. É ilehi kojaeng pie, me e penem kowé, na e pwaadeniin bé wo Padaame henye, Iésu Kériso, beme

††† 13.11 Lévitique 16.27 †† Cini ne âoté pwomwo... A inenaado ko a bwo tahi taabwon ne ni ta pwo te a bele. ††† 13.12 Ioane 19.17 †† 13.13 Ébéru 12.2 †† Tanim kon—A bwo mele ten ne ko a kuricé. Omehi Ébéru 12.2. ††† Koja ni bwo mulie te ni apulie na ta jélé—Grek: Koja a duaan na lé mu hen ne ni apulie (hors du camp). Time uce a bwopiinen pie, genye mulie ité koja ni béé apulie; wâé heme nye mulie ha a mulie iitihhi, ke ité koja a mulihelé na ta, be a ju amu tenye, ke time uce e éni pwo bwohemwo. Wâé heme nye picani, heme lé tahi taabwonikenye, me pwotahi ne konye, me pihoonikenye, be ni naado na lé te pwo te Iésu. ††† 13.14 Ébéru 11.10,16, 12.22 ††† 2e phrase—Grek: Ke genye hane a amu na e bo tuiebé. 18 13.15 Psaume 50.14,23 19 13.16 Filipi 4.18 20 13.17 1 Tésalonik 5.12 21 13.18 Apostolo 24.16; 2 Korénit 1.12 22 Me deme. Wieli e te pipiieng mwo wo pa atii na a tii ce. 23 13.20 Jérémie 32.40; Ézékiel 37.26; 1 Péturu 2.25

o pwo ce acehin ne kowé celi te junihe wâé ten. [Ke é pwoun de] Iésu Kériso, pa awéikenye, wogenye na genye pwohewii a pubu muto ten. [Be e pineeng me denye die ko a bwo mele ten.] Ke a cewéhen li e téé, ke anaa kuti ali âpwailo li e pacuwohi a *piapwo [te Padué] ne tenye, na o tee mu dieli mwo. Ke wo Padué, ke e pamulipieng mwo mu ha amele. Wâé heme te ete Kériso a bwo ubwo na a wâé dieli mwo! Amen!

Pinelé

²² Wogewé lépwo bééng acéihi, é ilehi kojakewé pie, me geé hegi ehi ni âpihuô tong ne ha a tii ce. Be time

uce bwolihi nina é tii, beme é pamwoiukewé, me patemehi tewé.

²³ A jepule wâé ko pa béénye Timoté: Be e caa wie mu he karépu! Ke mepie e epin ko tuiebé ne éni, ke e bo âbé céing hemepie é bo âdé caniêkewé.

²⁴ Geé ne a bwocu tong te lépwo apihuô tewé ne ha a céihi, me ati ni acéihi. Ke lé pwobwocu tewé mwo, ati ni acéihi éni ha amu Itali.

²⁵ Wâé heme e mu pelewé a pipwoééhe tice ja kon de Padué!

Adéikewé!

Cang

Atabuhi ko a tii

Woo na e tii a tii ce?

Wo Cang, pa ciéé Iésu. Time uce pa béé lépwo 12 acémun he e mwo mulie wo Iésu, kehe icehi ana é alecehen, ke caa pa apostolo, ke pa apulie na piubwo nang ne pele lépwo acéihi ne Iérusaléma. (Omehi a pwahamii tii 15 me 1.19; 2.9.)

E tii éniile?

Ha awieme a jo 43 me 48, ânebuhe a pitapitih ubwo te lépwo apihuô te ni acéihi ne Iérusaléma ha a jo 50. (Omehi a pwahamii tii 15.) Wieli a bécéiuhe tii na tii ne ha a Élele Iitih na mwo Coho .

E tii me dee?

Te lépwo Juif na lé céihi ne ko Iésu, na lé mulie ité koja a amu Judé. (Omehi a 2.9–11; 8.1–4.)

É ko ade na e tii?

Pinekepé te lépwo béé acéihi, be lé mu he ni picani (1.2,12; 5.11,13). Wieli é mu ko ana lé pwotahi ne kolé wo lépwona time lé uce céihi. Ke e tii wo Cang, beme e pamwoiulé, ke me pwia ni pwonimelé. A céiu mwo, ke pwo ni pitaacunaado hadenii ni acéihi, ke e tii beme lé nebwén (4.1). A céiu mwo, ke e pipwocile lépwo acéihi na te junihe pwo naamuulé, be time uce wâé ni huô telé ne ko lépwona pitice naamuulé (5.1–6).

Ade ace âne a tii ce?

Weengi ni béé pihuô te Cang ne ha a tii ce:

- Wâé heme nye cumang ne he ni céihi tenye, heme nye mu he ni picani;
- Wâé heme nye pwoitih he ni céihi tenye;
- Nye ilehi koja Padué a bwo temehinaado, beme e ne ce acehin ne he ni mulihenye: a pimiibule, ke a péém, ke a tebwo ehi;
- Wâé heme nye mulie ha a mulie na iitih ke wâé te Padué;
- Nye pipwocile a upehenye, be a naado na te junihe pwo niihen, heme nye cihe me wâé, ai me ta.
- Heme nye pii pie wogenye ni acéihi, ke wâé heme nye habwii pie te a juuju a céihi tenye, ne he ni bwomu tenye na wâé, me a pipwoééhe tenye, ke time uce é ko a pwooti cehi.

Pwo ni béén na lé niimihi pie, e cubwonihi a pwooti te Paulo ne ni bénebwéne pwooti naa. Be e pii wo Paulo pie, celuimikenye, ke etenye a ju mulip, te é mu ko a céihi cehi, kehe time uce é mu ko aceli nye pwo. (Omehi a 4.1–3.) Weengi a juuju mu ko lupwo bwo niimihi nen naa: A juuju ana e pii wo Paulo, be te junihe pwocoon me wâé te Padué genye ko ni penem denye. Kehe icehi ana te a juuju mwo ana e pii wo Cang. Be hemepie e juuju a céihi tenye, ke o pwo ace béhabwiinen: ni penem na wâé na nye pwo.

A bwomune a tii te Cang

Pipwobwocu

Me nye cumang ne he ni tacebwén

Go téne, ke go pwo!

Nemwo pipwoinen ne ko ni apulie

Ni bwomu tenye ke e pajujuhi ni céihi tenye

Ni piokéé heme geé pimu ibu

Paténe lépwona pwo delé
Bénebwéne pwooti

Pipwobwocu

1 †Woéo Cang, pa eabwé te Padué me Padaame Ié-su *Kériso, na é pwotii lé céikewé ati, wogewé a puapulie te Padué ††, na papiidenikewé ne pwo a bwohemwo ati.

Me nye cumang ne he ni tacebwén

2 †Lépwó bééng, geé pipwodéén heme e tuie ne kowé ni pétaapwo tacebwén. 3 ††Be geé temehi pie, a tacebwén, ke e ne me nye cumang ne ha a piuca [ke e habwii a bwomune a céihi]. 4 Kehe a piuca, ke wâé heme e pwo a penem den. Be me wonaa, ke me wâé ne kowé, ke me hején gewé, ke heme te tice aceli me tieden mu kowé.

Genye ile Padué ne ha a céihi

5 ††Hemepie pwo pace mu hadeniwé celi time e uce temehinaado, ke wâé heme e ile Padué, be weeng pana e ne me piticenaado ne kon, ke e bo ne ten. 6 Ke wâé heme e ilehi ne ha a céihi, ke me time uce pinekepé ne ten. Kehe wo pana pinekepé ne ten, ke e pwohewii a jié na me e cuu na a dan, ke e â he ni piduaan. 7-8 Wo pa apulie na e wonaa, ke e nemwo niimihi pie, e bo hegi ace céiu naado mu ko Padaame. Be time e uce mu mang ne he ni bwopemieng.

Piticenaado ne ko ni naamuunye

9 Ke mepwo wo pa acéihi na te tice den, ke me e pwo me piwâénimen, be e bo pineeng da wo Padué.

10 †††Ke mepwo wo pana pwo den †††, ke me e pwo me piwâénimen ko a bwo neeng ole. Be bo tieeng pwohewii ne ko a muu meté. 11 Be heme e taawie a téale, ke te nihe pwo niihen, ke e pwo me meiu a meté, ke e tupwo a muun, ke tieden a bwo wâé nen. Ke e wonaa wo pana pwo den, be e o mele ke o tieden ni penem den §.

Me go pwo ana ta ke te wogo

12 Piwâénime pa apulie na e cumang ne he ni tacebwén, be é alecehen, ke e bo hegi a kuron ko a mulie §† na e caa mi pii wo Padaame pie e bo ne te lépwona

† 1.1 Mataio 13.55; Apostolo 15.23; Galat 1.19; 1 Pétéru 1.1 †† A puapulie te Padué—Grek: Ni 12 pwomwoiu. Ni 12 pwomwoiu, ke a bele Isaraéla (lépwó juif), li papiidenilé ne he ni muko piduaan. E tij wo Cang ne te lépwó acéihi ne ko Iésu, be a bele te Padué na mwo coho. † 1.2 Roma 5.3–5 †† 1.3 1 Pétéru 1.7 †† 1.5 Proverbes 2.3–6 ††† 1.10 Ésaie 40.6–7 ††† Pana pwo den—Wielí ni acéihi na te junihe pwo delé, ai wielí ni béén na time lé uce céihi. § Ke o

eânimelé ten. 13 Ke me te tice paceli e pii, heme tacebwénieng, pie: «Wo Padué na e tacebwéniéo.» Be wo Padué, ke pwocoon me e tacebwénieng na a ta, ke pwocoon mwo me e uce tacebwéni pace. 14 Kehe muko pétaapwo ni apulie na tacebwénielé, heme lé âcehi nina te nimelé kon. 15 Ke ana nimem kon, ke me go te âcehin, ke e pééko nge ha a ta. Ke a ta, ke me go tee pwo §††, ke e pééko nge ha a mele.

16 Geé nemwo pipweéo, wogewé ni ju bééng:

17 Ati ni âpipati na junihe wâé, ke ni *adéihi na nye hegi, ke tai opé mu jeda, pele Caa na e ne ni pwéélang. Te tice celi taatééhi ne pelen, te tice celi mu ha a melepíng.

18 §†Te é mu ko ana nimen kon, ke e ne tenye *a ju mulip, mu ko a pwooti na juuju, beme junihe pwonaado ne konye §†† mu ko ati nina e tabuhi.

Go téne ke go pwo!

19 Geé téne ehi, wogewé ni bééng na eânimung dewé:

Geé muko pétaapwo tabemi ehi. Ke me bwolihi me cihe. Ke me bwolihi me okéé.

20 §†Be a okéé te pa apulie, ke time e uce pwo ana nime Padué kon. 21 §†É mu ko anaa, ke geé necu nina ta, ke ni naado na mwiihi. Ke geé pwo me piwahin gewé, ke geé hegi a pwooti na e caa cemi he ni pwonimewé wo Padué, ke anaa, ke jan me e celuimikewé.

Me geé ténedehi a pwooti

22-23 §††Geé tabemi a pwooti ke geé ténedehi! Be hemepie geé te ju tabemi cehi, ke geé pipweéo, pwohewii pa apulie na e omehi a démen ne ha apiocile, 24 kehe é alecehen, ke e engen, ke e te ju pwome neuhi ace bwo alieng! 25 §††Kehe adéi pana e te nihe cémun ko ni patén [de Padué] hemepie e tee penem, ke me time e uce neuhi nina e téne. Ke e bo pituume ne ha ana e pwo. Be hején a pwooti naa, ke e tuwokenye mu he nina e imwikenye.

tieden ni penem den—ai He e mwo ko pwo ni penem den. §† Kuron ko a mulie—Omehi Zenote §†† Me go tee pwo—Grek: Me caa piubwo da [a ta]. §† 1.18 Ioane 1.13 §†† Junihe pwonaado ne konye—Grek: Lépwó atabuhi na a pitii ádaanu. §† 1.20 Ecclésiaste 7.9 §† 1.21 Kolosé 3.8; 1 Pétéru 2.1 §†† 1.22 Mataio 7.26; Roma 2.13 §†† 1.25 Roma 8.2; Cang 2.12

²⁶ †Hemepie pwo pace apulie celi e pipii den pie pa apwoiitihi, ke hemepie time e uce pipwocile a bwo cihe ten ††, ke e te pigeti a pwonimen, ke te ju piticenaado ne ko a pwoipwoiitihi ten. ²⁷ Weengi a pwoipwoiitihi na te tice ta hen ne ânebuhe Padué, pa Caa tenye:

Me nye cile ni ewa na te tice nyaa me caa telé;
Me nye picani te ni depwele ‡ ne he ni picani me téé na lé mu hen;
Me time genye uce pwo me e âbé konye a ta pwo a bwohemwo.

Nemwo pipwoinen ne ko ni apulie

2 ††Wogewé ni bééng, heme geé céihi ne ko Padaame Iésu Kériso, na te junihe ubwo *a wâé ten, ke me time geé uce piwâé pace céiu koja pace céiu. ²⁻³ Geé cuwoteeke niimihi ani, pie: Lu â taabé ha ace *mwotapitihii wo lupwoce apulie: Wo pa céiu, ke pwo ce mwani megele kon, ke te junihe wâé ni naamuun. Ke wieli geé pipéce ne kon, ke geé pii ten pie: «Aje, go âbé tebwo éni ânebun!»

Ke wo pa céiu, ke tice den, ke time uce wâé ni epwé-nen. Ke wieli [geé pwohuu ten ke] geé pii ten pie: «Aje! Go tebwo ole pwo bwohemwo ko ni ang!» ⁴ Kona é ne tewé, ke time geé uce pipwoinen ne ko ni apulie? Ke time uce wogewé lépwo atautinaado, na ta ni bwo ni-imihinaado tewé?

⁵ ††Geé tabemi, wogewé ni bééng na eânimung dewé! Wo Padué, ke e pipégali lépwona tice delé ne ha a bwo alihi nen de ni apulie, beme o pwo delé ne ha a céihi. Ke e ne telé a Mwametau na e caa mi pii te lépwona eânimen delé. Ai, kona time geé uce temehi anaa?

⁶ Kehe wogewé, ke geé tééti lépwona tice delé! Kona time uce wo lépwona pwo delé, na lé pwohuu tewé, ke lé péékewé nge he ni mwotautinaado? ⁷ Kona time uce woélé, lépwona lé pii me ta a nii [Iésu] ne kowé, na ju wâé?

Geé pipwoééhe ni béén

⁸ ††A naado na wâé, ke me geé ténédehi a patén ne he ni *tii iitihii pie: *Go pwo me eânimem de ni béén*††, *pwohewii a bwo pieânimem dem.*

Lévitique 19.18

Ke wâé anaa heme geé pwo, be a patén [na junihe pipwonaado ne kon] ne ha a *Mwametau te Padué. ⁹ †Kehe mepie geé piwâé pace céiu koja pace céiu, ke geé pwo ana ta. Ke geé caada a patén, ke o tautikewé kon.

¹⁰ ††Be wo paceli e piténédehi ati ni patén, ke hemepie e caada ace patén celi te ju céiu, ke e pwo

† 1.26 Psaume 141.3 †† A bwo cihe ten—Grek: A upehen. ‡ Depwele—Veuve. †† 2.1 Apostolo 10.34; Cang 2.9 †† 2.5 1 Korénit 1.26–28 †† 2.8 Mataio 19.19; Galat 5.14 ††† Ni béén—Grek: Pana e mu mwonuko, ai Pa ju béém. § 2.9 Deutéronome 1.17 †† 2.10 Mataio 5.19

ana ta ati ne ko ni patén. ¹¹ ††Be e pii wo Padué pie: *Go nemwo pibune.*

Exode 20.14

Ke e te pii mwo pie: *Go nemwo taunuhi apulie.*

Exode 20.13

Ke hemepie time go uce bune toomwo, ke mepie go taunuhi apulie, ke go caada ni patén.

¹² ††Wâé heme geé cihe ke geé penem pwohewii ni apulie na [lé temehi pie] o tautilé ko a patén [na piwéden koja ni *patén de Moosé]. Be a patén naa, ke tu-wokenye mu he nina e ciekenye ††.

¹³ ††Be é ha a tautinaado, ke o te tice pipwoééhe ne ko nina te tice pipwoééhe telé ko ni béélé. Kehe mepie geé pipwoééhe ni bééwé, ke time e o uce tautikewé wo Padué, kehe e o pipwoééhewé ††.

Ni bwomu tenye @ ke e pajujuhi ni céihi tenye

¹⁴ Ni bééng, kona te pwonaado ne ko a bwopiinen de pace céiu pie eten a céihi, hemepie time e uce habwii ko ce penem? Kona te jan me e celuimieng na a céihi naa? ¹⁵ †††Geé cuwoteeke niimihi ani: Pwo pace ai wo êce béénye, hemepie te tice mwaanu kolu, ke me tice wiinaado telu. ¹⁶ Ke mepie geé pii telu pie: «Geu âdé ne ha a péém, ke geu picuwohe epwén, ke geu pwoiinaado ehi», ke te ju piticenaado ne ko ni pwooti naa, hemepie time geé uce ne celi me lu mulie kon! ¹⁷ Ke wonaa a bwomune a céihi, be hemepie time e uce penem, ke e te mele ne kon.

Habwii a céihi tenye ne he ni huô

¹⁸ †††Wieli go bo pii tong pie: «Wogo, ke etem ni penem; ke woéo, ke etong a céihi †††.» Ke é hegi ne tem pie: «Go habwii tong a céihi tem, heme te tice celi go pwo! Ûhu! Woéo, ke é bo habwii tem a céihi tong ne he ni penem dong!» ¹⁹ É he go céihi pie te pwo Padué na te céiu nang, ke te wâé a bwomunen naa? Lé te céihi mwo lépwo iténaado, ke éjén jélé ko a bwo mwotilé! ²⁰ Wogo pa apulie na te tice bwo temehinaado tem! Kona time go uce temehi pie, te ju piticenaado ne ko a céihi, heme te tice béhabwiinen?

A céihi te Abérama me Rahab

²¹ ††Wo *Abérama, pa watihenye, ke he time uce mwomwon nang mu ko ni penem, he e ne pa naîn Isaaka pwo apwoâpwailo? Uhuu! ²² ††Go te alihi pie a céihi, ke lu piengen ibu me ni penem, ke é mu ko ni penem, ke e pwo me wâé a céihi. ²³ ††Ke wonaa a bwo

††† 2.11 Exode 20.13–14; Roma 13.9 ††† 2.12 Galat 6.2; Cang 1.25; 1 Pétérus 2.16 ††† Dernière phrase—Grek: ...la loi de liberté. ††† 2.13 Mataio 5.7, 18.32–35 ††† Dernière phrase—Grek: A pipwoééhe, ke piwéden koja a tautinaado. ††† 2.15 1 Ioane 3.17 ††† 2.18 Galat 5.6 †††† Wogo, ke etem ni penem; ke woéo, ke etong a céihi—Grek: Wogo, ke etem a céihi, ke woéo, ke etong ni penem. 18 2.21 Genèse 22.9–12 19 2.22 Ébéru 11.17–18 20 2.23 Genèse 15.6; 2 Chroniques 20.7; Ésaie 41.8

*pajuuji na ana tii ne he ni tii iitihi: *E céihi ne ko Padué wo Abérama, ke é mu ko a céihi ten, ke wo Padué, ke e pwo me pa apulie na e *mwomwon ne he pwhamiin.*

Genèse 15.6

Ke wo Padué, ke e pii kon pie pa béén.

²⁴ Geé te alihi pie, mwomwon pa apulie mu ko ni penem, kehe time uce a céihi cehi.

²⁵ †Wo Rahab, ê toomwo pwopwaaden, ke he time e uce pwo mwo me mwomwon nang mu ko ni penem? Uhuu! Be e hegi lupwo coda *Isaraéla [li lu â cedi bune amu ten Iérikó] ke e pwo me lu cela nge ha a céiu pwaaden.

²⁶ Pwohewii ne ko a éé apulie, be e mele heme te tieden a jenen; ke piwien ne mwo ko a céihi, heme te tieden ni penem.

Ni piokéé heme geé pimu ibu

3 Me time uce hiwon mu hadeniwé celi nimelé me lé pacémunihi, be geé te temehi pie, wo Padué, [ke e ucéihi ni naado na ubwo ne kome ni apwocémun] ke e bo te junihe tautikeme koja ni béén.

Nye pipwocile ni upehenye

² Genye muko pétaapwo pwo nina ta, kehe mepie pwo paceli e pipwocileeng ne he ni bwo cihe ten, ke jan ne kon me e pipwocileeng ati ne he ni naado. ³ Be hemepie genye ne a taikopwo pa haricaan, beme e piténédekenye, ke genye o pééeng ati nge he na nimenye me nye â lang †. ⁴ Pwohewii ne mwo ko a ong na te junihe ubwo na e paengenihi na a dan. Be e biteeng ko a cuwo nahi eaong wo pa apé nen. ⁵ Ke te piwien ne mwo ko a upehenye, be te ju a cuwo nahin, kehe e pipii den ne he ni naado na junihe ubwo.

A upehenye ke a miû

Geé alihi a cuwo nahi miû, be te jan me e cini ace wii celi junihe ubwo. ⁶ †A upehenye mwo, ke pwohewii a miû na jan me e pwo me éle ati a éénye jame a mulihenye. Be e pébé a ta na tidi a mulihenye. Be a miû na patéi mu ha a miû na ubwo te *Caatana!

⁷ Te jan ne konye ni apulie me nye pé ni muko pétaapwo wota, ke me nye pwo me lé piténédehi. Te piwien ne mwo ko ni meni, me nina lé éewo, ke nina lé mu he tabe. ⁸ ††Kehe te tice pace apulie celi jan me e pipwocile a upehen heme e cihe! Be pwocoon me genye pacuwohi, be oba ko a tabe na ta na genye mele kon.

⁹ É mu kon, ke genye *adéi Padaame, pa Caa tenye, ke é mu kon, ke genye apwohi ni apulie na e pwo mu

† 2.25 Josué 2.1–21; Ébéru 11.31 †† Pééeng ati nge he na nimenye me nye â lang—Grek: Pé a één ati. ‡ 3.6 Mataio 12.36–37, 15.11, 18–19 †† 3.8 Roma 3.13

ko a démen! ¹⁰ É mu ko a pwo pa apulie na te céiu nang, ke e wie a adéihi, ke a apwohi.

Time uce wâé, wogewé lépwo bééng, heme wonaa. ¹¹ A acaamatabe, ke he e te pwo me e taawie a ju tabe, me a tabe na male? ¹² A majing, wogewé ni bééng, ke he te jan me e ne ce *olive*, ai ace éé tabe megele, me e ne ce ace majing? A tabe he jié, ke pwocoon me e pwo ace ju tabe.

Bwopemikenye

¹³ Woo, mu hadeniwé, paceli e temehinaado? Be, me e habwii ko ace bwopemieng celi wâé ne ha a bwo pipwoiipieng.

¹⁴ Kehe mepie e he pwonimewé a pitaaba ke a pipwokon, ke geé nemwo pipii dewé, ke geé nemwo gele.

¹⁵ A bwo temehinaado naa, ke time e uce âbé mu jeda he *miiden, kehe é mu pwo bwohemwo, mu ko nina te nimewé kon na ta. Ke âbé mwo mu ko Caatana.

¹⁶ Be é he na e lang a pitaaba ke a pipwokon, ke e lang a pihauli, ke tai ni bwopwone ni naado na ta.

Bwomu mu ko a ju bwo temehinaado

¹⁷ Te tice celi ta ko pa apulie na oba nang ko a bwo temehinaado mu jeda. Weengi ni huô ten:

Pa apulie na e paciitihii a mulihen;

Pana e pwo ati mu ha a ju pwonimen;

Pana e pipwopai ati lépwo apulie, be time e uce pipwoinen ne kolé;

Pana e téne ehi lépwo béén ne ha a bwo pipwoiipieng;

Pana bwala nang ne ha a bwo hegi nen den ne telé;

Pana e pipwoééhe lépwona lé mu he ni gia;

Pa apulie na junihe hiwon ni ace acuwo na wâé ne ha a mulihen.

¹⁸ ††Wo lépwona lé wonaa, ke lé cemi ha a péém, ke nye tai pitii âdaanu: a bwo pipwoiipihii ke a péém ne pelenye.

Bwopemikewé na ta

4 ††E âbé mu wé ni piokéé, ke nina piehadeniwé? Kona time uce é mu ko nina nimewé kon, na lé ko pipwopa ne he ni pwonimewé? ² Be te junihe nimewé kon, kehe time uce etewé, ke geé pitaaba. Ke geé pitaacunaado ke pipwopa die ko ana geé pwo me geé pitaunukewé.

Time uce etewé, be time geé uce ile Padué. ³ É heme geé ilehi, ke time geé uce hegi, be geé pi-ilehi tahi. Be geé hane ni naado âcehi nina nimewé kon na ta.

⁴ †††Wogewé lépwo apibune, be geé engen koja Padué! Kona time geé uce temehi pie, hemepie eân-

†† 3.18 Mataio 5.9; Ébéru 12.11 ††† 4.1 Roma 7.23 ††† 4.4 Roma 8.7; 1 Ioane 2.15

imewé ko ni naado na ta pwo a bwohemwo, ke a bwopiinen pie, geé tééti Padué? Be wo pana nimen me e pipwoeabwé te a bwohemwo, ke e pwo ana ta ne ko Padué. ⁵ Be caa te tii ne he ni tii iitihí † pie, [ana nime Padué kon, ke a ju pwonimenye] be e ne konye a *Jenen Iitihí ten, na te junihe eänimen den ††. Ai, kona geé te niimihi pie te piticenaado ne ko a pwooti naa?

Geé piämwonu Padué

⁶ †Te junihe ubwo a âpipati na e ne wo Padué. É mu ko anaa, na tii ne mwo he ni tii iitihí pie:

Wo Padué, ke e cuwode

lépwona lé pipaunulé.

Ke wâé nang

ne ko lépwona lé pipwoiipilé. Proverbes 3.34

⁷ ††Geé piténe de Padué, ke geé cuwode *Caatana, ke e bo cela nge ité kowé. ⁸ ††Geé piämwonu Padué, be e bo piâbé mwonukewé. Geé puu ni iwé, wogewé na ta ni huô tewé. Geé pwo me wâé ni pwonimewé, be lépwo apulie na time geé uce cumang [ne ko a bwo piténe deeng dewé].

⁹ Geé pininim [ke bitekewé nge céii Padué!] Ke me a bwo piap tewé, me a bwo pituume tewé, ke me taatéhi ko a piwahin, ke ni pwoé. ¹⁰ †††Geé pipwoi-pikewé ne ânebuhe Padaame, ke e bo nekewé da.

Go nemwo tauti pa béém

¹¹ Go nemwo cihe me ta ne ko ni béém, ke go nemwo tautilé! Be wo pana e wonaa, ke e cihe me ta ne ko ni patén, ke e tauti ni patén. Kehe time uce wogo na me go tauti ni patén, kehe me go ténédehi ††† ¹² †Te céiu pana e ne ni patén ke pa atauti nen, ke wo Padué. Ke te weeng cehi pana jan ne kon me e *celuimi ni apulie, ke me e pwo me lé patieden. Kehe wogo, ke woo, me go tauti pa béém?

Paténe lépwona pwo delé

Geé pwo me piwahin gewé ne ko Padué

¹³ ††Geé téne, wogewé lépwona geé pii pie: «É jenea ai é meé, ke genye bo â ha a pwomwo ubwo, ke genye o mulie lang he celi céiu jo. Ke genye o pwo ce bwopwonen, beme pwo ce mwani tenye.» ¹⁴ †††Kehe time geé uce temehi aceli e bo tuie meé! Be he ade a muli-

† Caa te tii ne he ni tii iitihí—Wielí e niimihi Exode 20.5; 34.14; Deutéronome 4.24; Zakari 8.2. †† E ne konye a Jenen Iitihí ten, na te junihe eänimen den—ai A Jenen Iitihí, ke e pwobwonihí a tapi me a pitaaba tenye, ai Te junihe nime Padué ko ni pwonimenye na e ne konye, ai A pwonimenye...ke e te cuwo ko nimen ko ni naado, ke e te cuwo ko pitaaba. † 4.6 Proverbes 3.34; 1 Pétéru 5.5 †† 4.7 Éféso 6.12 †† 4.8 Ésaie 1.16; Zakari 1.3; Malachie 3.7 ††† 4.10 Job 5.11; 1 Pétéru 5.6 ††† Dernière phrase—Grek: Hemepie go tauti ni patén, ke time uce wogo na go piténe dehi, kehe wogo pa atautinaado. § 4.12 Roma 2.1, 14.4 † 4.13 Luka 12.18–20 ††† 4.14 Psaume 39.6,12; Proverbes 27.1

hewé? Geé pwohewii a caamele na e tuie ju é ha a céiu benaamwon, ke caa te tieden mwo. ¹⁵ Ke me geé o pii pie: «Hemepie te nime Padué, ke genye o mulie, ke genye bo pwo ani, ai ani.» ¹⁶ Ke wogewé, ke geé pipii dewé ne he ni picibehede tewé. Kehe a naado na time uce wâé [te Padué]. ¹⁷ ††Be wo pana e temehi ana wâé ke e pwo, ke me time e uce pwo, ke e pwo ana ta.

Geé bo mu he ni picani!

⁵ Wogewé lépwona pwo dewé, wâé heme geé te nihe é me ubwo, wonaa mu ko ni picani na e o bo tuie ne kowé! ² ††Be o muti ni dewé, ke lé o wii ni epwénewé ne ni ma. ³ Ke o paale ni mwani tewé, ke lé bo cihe da me pipé ne kowé. Ke bo wii a ééwé, pwohewii ne ko a miû. Be geé caa taineibuhi ni mwani bépwo na a bwohemwo ce na o bo tieden ††† ⁴ ††Ke time geé uce pwocuhi lépwo apenem dewé, ke lé tee ilehi kojakewé a cuhilé. Ke e téne wo Padaame, pana te junihe pwo-junuun ne ko ati ni naado.

⁵ †††Geé mulie ne pwo a bwohemwo ha a tuume tewé ne ko ni naamuuwé. Geé te pwo nina te nimewé kon. Geé te junihe wiinaado ehi, heme ko pwo ni apulie na lé metihí menele †††. ⁶ Ke geé caa ne a cuhinaado te pana mwomwon nang †††, die ko a bwo taunueng, ke time e uce pipwopain.

Bénebwéne pwooti

Geé cumang ne he ni picani

⁷ ¹⁸ Ni bééng, geé cumang heme geé ucéihi a bwo mwojuia mwobé te Padaame. Be wo pa apenem ko âdaanu, ke e ucéihi a benaamwon ko tii âdaanu, ke e ucéihi die ha a bwo tuie te ni bécéiuhé ute, ke ni bénebwéne ute. ¹⁹. ⁸ ²⁰ Ke wogewé mwo, me mu mang ni pwonimewé heme geé ucéihi, be o caa e mwonu a bwo âbé te Padaame.

⁹ Geé nemwo pipii lépwo béén, beme time e uce tautikewé wo Padué: Be neko pa atautinaado he e caa ko cuwo he pomwa! ¹⁰ Ni bééng, geé pipwohewii lépwo *péroféta na lé cihe ne he nii Padaame. Be lé te cumang ne he ni picani.

¹¹ ²¹ Genye pii pie, lé pituume ne nina lé mu he ni picani. Be geé caa te temehi a jepule ko a bwo uca te Job, ke geé caa te temehi ni *adéihi na e ne ten alece-

§† 4.17 Luka 12.47 §†† 5.2 Mataio 6.19 †† Dernière phrase—ai Geé tai ne ko a bénebwéne Tan [na e bo tauti ni apulie hen wo Padué]. §† 5.4 Deutéronome 24.14–15 §†† 5.5 Luka 16.25 §†† Dernière phrase—ai Geé pwohewii ni wota na cile me géréén ânebuhe a bwo taunuhi nen me wii. §§§ Pana mwomwon nang—Ocine ko ati nina pwoééhelé, na pwocoon me lé pipwopailé. 18 5.7 Deutéronome 11.14; Jérémie 5.24 19 Ni bécéiuhé ute, ke ni bénebwéne ute—Pwo lupwo benaamwon ha a jo na céiu ko a ute ne Isaraéla. 20 5.8 Roma 13.11–12; 1 Pétéru 4.7 21 5.11 Exode 34.6; Job 1.21–22, 2.10; Psaume 103.8

hen wo Padaame. Be wo Padaame, ke te junihe wâé nang, ke e pipwoééhenye.

¹² †Ni bééng, geé nemwo *piapwo da he a miiden, ai a bwohemwo, ai é ne ko ace céiu piapwo. Kehe me geé pii pie «éa», ke te éa, ke me geé pii pie «ûhu», ke te ûhu, beme time e uce tautikewé wo Padué.

A pwopwoiitihî te pa acéihî

¹³ Kona e mu he ni picani wo pace pibééwé? Wâé heme e pwoiitihî. Pwo paceli e pituume? Wâé heme e pwonyebi, beme e pipaunu Padaame. ¹⁴ ††Pwo pace mu hadeniîwé celi cunu nang? Ke wâé heme e tode lépwo apihuô te ni acéihî, beme lé pwoiitihî ne kon, heme lé ko ne huîin a *huile*‡ ne he nii Padaame.

¹⁵ ††Be a pwoiitihî ne ha a céihî, ke o bo celuimi pana cunu nang, ke e bo pwo me wâé nang †† wo Padaame. Ke é hemepie e pwo celi ta, ke e bo pineueng wo Padué.

† 5.12 *Mataio 5.34–37* †† 5.14 *Maréko 6.13* ‡ Lé ko ne huîin a *huile*—Wo lépwo *Juif*, ke lé puu lépwona cunu jélé ko duhi olive heme lé pwoiitihî telé. †† 5.15 *Maréko 16.18* †† Me wâé nang—Grek: Me e cuwoda mwo.

¹⁶ Geé pipii tewé nina geé pwo na ta, ke geé pipwoiitihî ne kowé, beme wâé gewé mu he ni cunu kowé. Be a pwoiitihî te pana mwomwon nang, ke te junihe pwo a junuun.

¹⁷ ††Wo *Élia [pa péroféta ânebun] ke pa apulie pwohewiikenye. Ke e te junihe pwoiitihî beme time e uce ute, ke time uce ute ne pwo a bwohemwo, he na 3 ni jo ke 6 ni wole. ¹⁸ ††Ke é alecehen, ke e pwoiitihî mwo, ke te ute kuti, ke [te wâé mwo] a bwohemwo, ke pwo mwo ni âdaanu.

Pé mwobé lépwo bééwé

¹⁹ §Ni bééng, hemepie pwo pace mu hadeniîwé celi e caa junihe â ité koja a juuju, ke me e pééeng mwobé wo pace céiu. ²⁰ §†Ke me geé temehi pie: Pana e bo pé mwobé pana e pipatieden, ke e bo celuimi a mulihen mu ha amele, ke wo Padué, ke e bo pétaabwon ati ni ta pwo ten §†.

††† 5.17 1 *Rois 17.1, 18.1* ††† 5.18 1 *Rois 18.42–45* § 5.19 *Galat 6.1* §† 5.20 *Proverbes 10.12; 1 Pétéru 4.8* §†† Ati ni ta pwo ten—Grek: Hiwon ni ta pwo.

1 Pétéru

te

Atabuhi ko a tii

Woo na e tii a tii ce?

Wo Simon Pétéru, pa apostolo, ke pa apulie na piubwo nang ne hadenii ni acéihi. E picani ten wo Silas (omehi 5.12), be wieli e temehi pwotii he pwo grek.

E tii éniile?

Ha awieme a jo 62 me 64, ha a benaamwon na wo pa daame he lépwo Roma wo Néron, ke e pwotahi ne ko lépwo acéihi ne ko Iésu. Wieli e tii mu Rome wo Pétéru (he na pii kon lang pie 'Babulona' ne ha a niide a tii 5.13).

E tii me dee?

Te lépwo acéihi ne ko Iésu Kériso na time uce lépwo Juif, na lé mulie ha a province Asia te lépwo Roma, ha a duaan na pii kon pie Turki jenea. Ke e pwotii nge céii mwo ati lépwo acéihi na pwotahi ne kolé.

É ko ade na e tii?

Wo lépwo acéihi, ke lé mu ha a péém he ni jo na hiwon. Kehe icehi ana pwo ni apulie na lé tabuhi cubwonilé, ke lé pwotahi ne kolé. Ke lé cine pa daame he lépwo Roma, wo Néron, beme e pwotahi ne kolé mwo. E tii wo Pétéru, beme e pamwoiu lépwo acéihi ne he ni picani na lé mu hen.

Ade ace âne a tii ce?

Wogenye na genye céihi ne ko Iésu, ke genye caa apulie ne ha a bele te Padué, mu ko a bwo pwoâpwailo ko Iésu Kériso. Caa puukenye ne he nii Kériso, ke wâé heme nye mulie ha a mulie na iitihi ati he ni tan. Hemepie pwotahi ne konye, ke wâé heme nye niimihi pie junihe pwotahi ne ko Iésu, ke wâé heme nye picani ha a pipwodéén pwohewieng. Be me wonaa, ke e o mu konye ni adéihi mu jeda he miiden na e o tee mu dieli mwo (1.3–4, 5.12).

A bwomune a tii 1 Pétéru

Pipwobwocu

E celuimikenye wo Padué, ke e adéikenye

Mulie ha a mulie na iitihi

A mulihenye ne pele nina time lé uce temehieng

A pwooti ne te lu aadomwin

Nye adéilé heme lé pwotahi ne konye

A pwooti ne te lépwo apihuô

Bénebwéne pwooti ke bépinelé

Pipwobwocu

1 Woéo Pétéru, na é pwotii, woéo pa *apostolo te Iésu *Kériso. [Be e neéo ngen beme é patemehi a pwooti ten.] É pwotii lé céiikewé lépwo apulie te Padué, na géé mu he ni pétaapwo province: Pont†,

Galat, Kapados, Asia ke Bitini †. ² ††Wo Padué Caa, ke e caa pipégalikewé, be weengaa a âniimihinaado ten na caa te bwolihi. Ke a *Jenen Iitihi ten, ke e ne me wogewé a puapulie ten, na iitihi. Ke wo [pa Naîñ] Iésu

† Pont...Bitini—Ati ni province naa, ke lé mu ha amu Turki jenea.
†† 1.2 Roma 8.29; 2 Tésalonik 2.13

Kériso, ke e caa pétaabwon ni ta pwo tewé, ko a bwo téé na a cewéhen †. Ke caa wogewé lépwo apulie na geé piténedehi.

Wâé heme etewé a pipwoééhe me a péém na piwéden!

E celuimikenye wo Padué

³ Pipaunu Padué, pa Caa te Padaame henye, Iésu Kériso! Be te nihe ubwo wéden a pipwoééhe ten me denye. Ke e ne tenye a mulie na mwo coho mu ko a bwo mulie cemwo mu ha amelete te Iésu Kériso. Ke é mu ko anaa, ke etenye a céihi na mang, ⁴ †† ne ko ati ni *adéihi na nye ucéihi. Ke weengi: Ke o tai ni de ni naî Padué a mulie na e jeda he miiden ‡, é he na time uce ta ni naado nelang, ke time uce alili, ke time uce tieden, be e mu dieli mwo!

⁵ ††Be e celuimikenye wo Padué mu ko a céihi tenye [ne ko Iésu Kériso]. Ke e wéikenye ko a niihen ke a junuun, beme nye bo hegi ati ni adéihi ten ††, na e bo habwii tenye ha a *Tan Alece ††.

⁶ ††É mu ko ati ninaa, ke wâé heme geé pipwodéén, heme geé muko pétaapwo mu he ni picani na téé. Be wâé heme wonaa ha a benaamwon ce te ju bahin, ⁷ ††beme e tacebwénihi a céihi tewé. Be pwohewii a mwani megele na cini ne pwo miû, beme pétaabwon ana alili mu kon ††. Ke a céihi, ke te nihe a junaado koja a mwani megele, be o tieden ha ace céiu tan. Ke mepie te mang a céihi tewé, ke [é alecehe ni tacebwén] ke geé bo hegi a pipwowâé na nihe ubwo ke piwéden, ha a tan na e bo pihabwiieng de ati ni apulie wo Iésu Kériso.

⁸⁻⁹ †††Time geé mu uce ali Iésu, kehe icehi ana o eân-imewé ten. Ke time geé uce téele alieng, kehe icehi ana geé tee ko céihi ne kon. Ke é mu ko anaa, ke e celuimikewé wo Padué, ke o te junihe ubwo wéden a pipwodéén dewé, na pwocoon me nye pii.

Patemehi ânebun a bwo celuimikenye

¹⁰⁻¹¹ †††Lé mi pébé a pwooti te Padué wo lépwo *péroféta bwolihi, ke lé cihe ko a âpipati na genye bo hegi: a bwo celuimikenye. Be e mu kolé, ke a Jenen Iiti-

† 3e phrase—Grek: A bwo puukewé ko a cewéhe Iésu Kériso. Wo lépwo Juif, ke lé taunuhi a paaci, ke lé puu ni apulie ko a cewéhen, beme lé pétaabwon ni ta pwo telé. Jenaa ni, ke a bwo mele te Kériso, ke e âpwoilo beme pétaabwon ni ta pwo tenye. A ocine mwo ko a piapwo tenye me Padué. Omehi Exode 24.5–6, me Ébéru 9.18–21.

†† 1.4 Kolosé 1.12 † A mulie na e jeda he miiden—Grek: A tau, héritage, a bwopiinen pie: Adéihi na e ne wo Padué dieli mwo.
†† 1.5 Ioane 10.28, 17.11 †† Ati ni adéihi ten—Grek: A bwo celuimikenye. ††† Tan Alece—A tan na e bo mwojuia mwo wo Iésu Kériso, beme e pihuô ne ko ati ni naado ne éni pwo bwohemwo, ke é jeda he miiden. Ke wo Padué, ke e bo pwo me mwo coho ati ni naado. ††† 1.6 Cang 1.2; 1 Pétéru 5.10 † 1.7 Proverbes 17.3; Zakari 13.9; Malachie 3.3; Cang 1.3 †† Pwohewii mwo a bwo tole na a miida ne pwo miû. ††† 1.8 Ioane 20.29; 2 Korénit 5.7 †† 1.10 Mataio 13.16–17 ††† 1.11 Psaume 22; Ésaie 53; Luka 24.26–27

hi te Kériso, ke e ne me lé pii pwaatihi a bwo picani ke a bwo mele te Kériso, me a bwo ubwo na a wâé ten alecehen. [Kehe icehi ana time lé uce temehi a pwooti na lé pébé] ke lé te nihe hane me lé temehi pie o [wooélé, ke] éniile, ke o woté.

¹² Be e pii telé wo Padué pie, ati ni naado na lé pii pwaatihi ne he niin, ke e bo pacuwohi alecehelé, me denye jenaa. Ke [weengaa ana e tuiebé. Be] li apulie [li e pahedelé ngen wo Padué] ke lé caa patemehi tewé a *Pwooti Wâé, ne ha a junuu a Jenen Iitihi na e âbé mu he miiden. Ke a Pwooti Wâé naa, ke te nihe nime lépwo *âcélo me lé temehi [ke me lé alihi aceli e o bo âbé alecehen].

Mulie ha a mulie na iitihi

¹³ É mu ko anaa, ke geé pipwoiipikewé, ke geé tee ûmiê, ke geé tee niimihi ni adéihi na e bo ne tewé ha a tan na e bo pihabwiieng hen wo Kériso. ¹⁴ ††Geé piténedehi, be wogewé ni naîn, ke geé nemwo âcehi nina te nimewé kon na ta ânebun, he time geé uce téele temehi Kériso. ¹⁵ Geé pipaciitikewé ne he ni huô tewé, be wo Padué na e todekewé, ke Padué na e iitihi. ¹⁶ ††Be caa te tii ne he ni *tii iitihi pie: Geé pipaciitikewé, be é iitihi.

Lévitique 19.2

Paciiti Padué

¹⁷ †††Geé pwoiitihi te Padué, ke geé pii kon pie Caa. Ke [wâé heme geé tee niimihi pie] te weeng na e bo muko tautikenye ko nina nye pwo, ke time e uce pipwoinen ne ko ni apulie. Ke é ko anaa na me geé paciitieng he geé mwo ko mulie éni pwo bwohemwo.

¹⁸ Be geé te temehi ehi pie [wogewé ni apulie ten jena. Be] e pwocuhikewé ko a cuhin na te junihe ubwo. E celuimikewé mu ha a mulihewé ânebun na geé pé koja lépwo watihewé; a mulie na time uce jan me e ne tewé a ju adéihi ††.

Time e uce pwocuhikewé ko mwani megele ai mwani pwojo, ai ko ce béé naado celi nyaale, ke muti. ¹⁹ †††Ôhu! E celuimikewé ko a cewéhe Kériso [na e téé he li e mele me dewé]: a cewéle na nihe ubwo wéden a cuhin. Wo Kériso, ke te tice ta kon, pwohewii a nahi muto na *pwoâpwoilo kon, na te tice alili me cunu kon.

²⁰ ††Be e caa mi pipégalieng wo Padué, ânebuhe a bwo tabuhi na a bwohemwo [beme e bo mele, ke me e tuwokenye mu he ni ta pwo tenye]. Ke e habwiieng tewé wo Padué he ni benaamwon ce, be caa *ni bénebwéne tan. ²¹ ††É mu ko Kériso na geé céihi ne ko

† 1.14 Roma 12.2; Éféso 2.3, 4.17–18 †† 1.16 Lévitique 11.44–45; Mataio 5.48 ††† 1.17 Roma 2.11; Pii Beetihi 2.23 ††† Na time uce jan me e ne tewé a ju adéihi—Grek: Na ticensaado ne kon. ††† 1.19 Apostolo 20.28; Ébéru 9.12–14 18 1.20 Éféso 1.4 19 1.21 Ioane 14.6; Roma 5.1–2

Padué na e caa pwo me e mulie cemwo mu ha amele, ke e ne ten a bwo ubwo na a wâé. Weengaa ana me geé temehi pie, wo Padué, ke e bo ne tewé ana e caa te pii. Ke geé *ucéhi ne ha a céhi †.

Geé pipwoééhewé

²² ††Geé caa hegi a [pwooti na] juuju: [a Pwooti Wâé ko Iésu Kériso] ke geé piténe dehi, ke caa ciitili taabwon ni ta pwo tewé mu he ni pwonimewé. Ke é mu ko anaa, ke caa jan me geé pipwoééhe lépwo acéhi bééwé mu he ni ju pwonimewé. Ke te nihe wâé heme geé te cuwo ko wonaa. ²³ Be geé caa âbeele cemwo, ke a mulie na geé caa hegi, ke te nihe piwéden koja ana geé hegi koja lu nyaa me caa tewé! Be anaa, ke o nyaale ke tépu ‡. Kehe te icehi a mulie na mwo coho na é pii, ke e o mu dieli mwo, be e âbé mu ko a pwooti te Padué, a pwooti na e *mulie dieli mwo.

²⁴ ††Ati ni apulie,
ke lé pwohewii ni muu meté.
O meiu jélé ati.

O tieden a bwo wâé jélé,
pwohewii a muu buké
na caa meiu, ke e tupwo.

²⁵ É ne ko a pwooti te Padaame,
ke e o te mu die ha a pwonehin!

Ke e o tee cumang dieli mwo.Ésaie 40.6–8

A pwooti naa, ke a Pwooti Wâé na caa patemehi tewé!

2 ††É hemepie wonaa, ke tahi taabwon ni huô na ta, pwohewii a pipwohuô, a gele, a pipwokonaado, me a pipii apulie. ² Wâé heme geé pwohewii a cuwo nahi ewa na mwo ju picileeng, be te céiu cehi a naado na wâé ten, ke a dile ten. Ke wâé heme geé wonaa ko a pwooti te Padué. Geé nenimewé ne kon, ke geé te nihe ilehi, be weengaa a wiinaado [ne ko a pwonimewé] na time e uce pimu ibu me ace céiu naado. Ke e ne tewé, beme ubwo gewé da ne ha a mulie na mwo coho na e kowé ††. ³ †††Be geé caa nemi mu ko a bwo wâé Padaame.

Wo Iésu ke pa ju péi paamwa

⁴ Geé âbé céii Padaame Iésu. Be weeng pa péi na e mulie, [ke pa paa a mulihenye]. Lé téétieng wo lépwo apulie [na ta jélé] kehe icehi ana e pipégalieng wo Padué, be te junihe pwonaado ne kon. ⁵ †Ke wogewé mwo, ke geé pwohewii ni péi na lé mulie. Wâé heme geé pinekewé [te Padué] beme e nekewé ha a Mwaiiti-

† Dernières phrases—Espérance en Dieu. †† 1.22 Ioane 13.34; Roma 12.10 ‡ 1re & 2e phrases—Grek: A bwo piâbeele tewé mwo, ke time uce é mu ko a âdaanu na o muti; kehe te é mu ko a âdaanu na e mu dieli mwo. †† 1.24 Ésaie 40.6–8 †† 2.1 Éféso 4.22; Cang 1.21 ††† Ne ha a mulie na mwo coho na e kowé—Grek: Ne ha a bwo celuimikewé. ††† 2.3 Psaume 34.9 § 2.5 Éféso 2.21–22; Pii Beethi 1.6

hi ten na e ko bahi. A céiu mwo, ke geé pwohewii ni *apwoâpwailo [âpipégali te Padué]. Ke a penem dewé, ke me geé ne ten ni âpwailo, mu ko a *Jenen Iitihi na e kowé. Ke e bo hegi wo Padué mu ko ana e pwo wo Ié-su Kériso. ⁶ ††Be caa te tii ne he ni tii iitihi [ko Iésu] pie:

Go téne ani, go a puapulie!

É ne ha amu *Sion a péi
na te junihe pwonaado ne kon,
beme a péi paan.

Ke wo pana e céhi ne kon,
ke time e o uce tupwo^{††}.Ésaie 28.16

⁷ ††Te junihe a junaado ne tenye a péi naa, [wo Iésu Kériso] be genye caa céhi ne kon. Kehe icehi ana [weengi a pwooti ko] lépwona muhi telé me lé céhi ne kon:

Ali péi li lé tahi taabwon
wo lépwo abahi mwa,

ke te anaa kuti a ju paamwa.Psaume 118.22

⁸ ††Ke a céiu mwo:

Ke a péi na lé ténéda kon;

Ke a péi na e pwo me lé tupwo.Ésaie 8.14

Be te muhi telé me lé mwomwohi a pwooti te Padué. Ke wonaa ana me e tuie ne kolé.

Wogewé a puapulie te Padué

⁹ ††Kehe wogewé, ke a puapulie na e pipégali, beme e pipwoâpwailo te Padaame: a amu na iitihi, a bele ten. E todekewé mu ha a melepiing nge ha a pwéélang den na junihe wâé, beme geé pii ni wâé ten.

¹⁰ ††Wogewé ânebun lépwona time geé uce puapulie ten, kehe é jena, ke wogewé a puapulie te Padué. É ânebun, ke time geé uce hegi a pipwoééhe te Padué, kehe é jena, ke geé caa hegi.

A mulihenye ne pele @ nina time lé uce temehieng

¹¹ †††Wogewé ni ju bééng, wogewé ni apulie na geé âbé ke geé o te engemwo mu pwo a bwohemwo ce. É mu ko anaa, na é ilekewé pie, geé nemwo âcehi nina te nimewé kon na ta, na lé pwopa ne ko a mulihewé.

¹² ††Geé pwo me wâé ace bwopemikewé ne ha awieme nina time lé uce temehi Padué. Be mepie lé pipé ne kowé pie geé pwo aceli ta, ke lé bo alihi nina geé pwo na wâé. Ke me wonaa, ke lé bo pipaunu Padué ha a tan na e bo âbé hen^{§§§}.

§† 2.6 Ésaie 28.16; Éféso 2.20 §†† Time e o uce tupwo—Grek: O time uce tanim nang. §† 2.7 Psaume 118.22 §†† 2.8 Ésaie 8.14–15 §† 2.9 Exode 19.6 §† 2.10 Osé 2.25 §†† 2.11 Galat 5.17,24 §†† 2.12 Mataio 5.16 §§§ Ha a tan na e bo âbé hen—Wieli a tan celi e bo tauti a bwohemwo hen wo Padué, ai wieli ace tan celi e céhi ne kon wo pace céiu apulie, ke e hegi a ju mulip. Ai wieli é ha ace tan celi e mu he ni picani hen wo pace céiu apulie.

Geé piténede lépwo apihuô ha amu

¹³ †Geé piténede lépwo apihuô, wonaa mu ko Padaame: wo pa daame he amu, ¹⁴ ke wo lépwo gupéno mwo. Be nelé ngen beme lé pwocuhinaado te lépwona lé pwo ana ta, ke me lé piwâé lépwona lé pwo ana wâé. ¹⁵ ††Be nime Padué ko ani: É mu ko ni bwopemikewé na wâé, ke me geé capuhi ni pwo nina time lé uce temehinaado, be te ju piticenaado ne ko nina lé pii †.

¹⁶ Geé engen ehi ne he ni bwomu tewé, be caa tuwokewé mu he na geé mu lang. Ke ni bwomu tewé naa, ke me time e uce neduwahi ni penem dewé na ta. Geé engen ehi pwohewii lépwo eabwé te Padué.

¹⁷ ††Geé éewo ko ni apulie ati. Ke geé pwo me eânimewé te ni bééwé, ke geé pipaunu Padué, ke geé éewo ko pa daame he amu.

Nye pwo me piwahin genye @ pwohewii Kériso

¹⁸ ††Wogewé ni *apenem tice ja kon, ke geé ténede lépwo caa tewé ko penem: time uce é ne ko lépwona wâé jélé cehi, ke wâé telé gewé, kehe é ne mwo ko lépwona lé pwo a okéé. ¹⁹ Geé mu he ni picani, na me time geé uce mu hen. Ke heme wonaa be nimewé me geé ténede Padué, ke anaa a naado na junihe wâé ††. ²⁰ †††Be é hemepie geé pwo ana ta, ke ade aceli wâé heme geé mu he ni picani kon?

Ke hemepie geé cumang ne he ni picani hemepie geé pwo ana wâé, ke a naado na te junihe wâé ne he pwahamii Padué. ²¹ †Be é mu ko anaa, na e todekewé wo Padué. Ke wo Kériso, ke e te mu mwo he ni picani me dewé. Ke e habwii a pwaaden beme geé uti ni apuwon. ²² ††Weeng panaa:

Time e uce pwo aceli ta.

Mwo te time e uce téele

pipwohuô te pace céiu.Ésaïe 53.9

²³ ††Lé pii nina ta ne kon,

ke time e uce hegi ko a ta.

É he e mu he ni picani,

ke time e uce heni pace céiu.

E ne a céihi ten ne ko Padué,

na e tauti ne ha a mwomwon.

²⁴ ††E pé ne ha a één ni ta pwo tenye

ne ko a *kuricé.

É mu ko anaa, ke nye nebwen

me genye mulie ha a ta,

ke jan me genye mulie

† 2.13 Tit 3.1 †† 2.15 1 Pétéru 3.16 † Time lé uce temehinaado...nina lé pii—Grek: Na tice pwonimelé. †† 2.17 Roma 12.10 †† 2.18 Éfésó 6.5 ††† Anaa a naado na junihe wâé—ai E bo adéikewé wo Padué. ††† 2.20 1 Pétéru 3.14,17 § 2.21 Mataio 16.24; Ioane 13.15 §† 2.22 Ésaïe 53.9 §†† 2.23 Ésaïe 53.7; 1 Pétéru 3.9 §† 2.24 Ésaïe 53.5—6; Roma 6.11

ne ha a mulie na wâé te Padué.

É mu ko ni ahinaado kon

na e pwo me wâé gewé.

²⁵ †††Anebun, geé pwohewii

lépwo muto na lé pipatieden,

kehe é jena,

ke geé caa mwojuia mwobé

céii pa awéihi muto

na e wéihi ni mulihewé.

A pwooti ne te lu aadomwin

Ni toomwo

3 ††Wogewé mwo ni toomwo, geé piténede ni pétaapwo aiu hewé. Te piwien hemepie pa aiu hem, ke me time e uce céihi ne ko a pwooti te Padué. Be e bo âbé ha a céihi mu ko ace bwomu tem, ke heme te tice pwooti tem ne ten. ² Be e o alihi ni huô tem pie go éewo kon. ³ ††A bwo wâé gewé, ke me time uce ju é pwomwo cehi, pwohewii ni apun na péi, ke ne mwani megele, ke cuwohe ni epwén na nihe wâé.

⁴ A ju bwo wâé gewé, ke me e te mu tinawé: a péém me a pwonime na bwala. Weengaa a bwo wâé gewé na te junihe pwonaado ne kon ne te Padué, ke time o uce tieden. ⁵ Be, wonaa a bwo wâé ni toomwo na lé céihi ne ko Padué he ni benaamwon na caa âdé, be lé piténede lépwo aiu helé. ⁶ ††Pwohewii ne ko Sara, be e piténede *Abérama, ke e toii kon pie: 'pa daame hung'. É jena, ke caa wogewé ni naîn toomwo, hemepie geé pwo ana wâé, ke me time geé uce pwo me mwotikewé.

Ni aiu

⁷ †††Te piwien mwo ne ko wogewé lépwo aiu helé. Geé cilelé ehi ne ha a bwo pimu ibu tewé, be te junihe pwo ni hewé kojale. Ke geé éewo kolé, be lé bo hegi *a ju mulip pwohewiikewé. Hemepie geé pwo anaa, ke o te tice aceli e o pacuwokewé ne he ni pwoopwoiithi tewé.

Nye adéilé heme lé pwotahi ne konye

⁸ Me tai céiu gewé ne he ni bwo niimihinaado, ke geé pwo me pieânimewé tewé pwohewii lépwo pwé-naâjién, me ni ténaâjién. Geé pwo nina wâé, ke geé pwo me piwahin gewé ne pele ni béén. ⁹ Geé nemwo taacu a naado na ta ko a naado na ta, ke geé nemwo taacu a piciheta ko a piciheta. Kehe geé hegi pie: «Me e adéiko wo Padué!» Be e todekewé wo Padué beme geé wonaa, ke a bwopwonen me e ne tewé a *adéihi.

¹⁰ †††Be caa te tii ne he ni tii iithi pie:

He nimem me go mulie

††† 2.25 Ézékiel 34.5—6; Mataio 9.36; Ioane 10.14; Ébéru 13.20—21 §† 3.1 Éfésó 5.22 §† 3.3 1 Timoté 2.9 §†† 3.6 Genèse 18.12 §†† 3.7 Éfésó 5.25 §†† 3.10 Psaume 34.13—17

ha ace mulie celi wâé?
He nimem me go mu ha a péém?
Go nemwo pii me ta lépwo béén.
Ke go nemwo gele.

¹¹ Cela ko a ta, ke go pwo ana wâé.
Hane a péém, ke âcehin.

¹² Be e wéi lépwona lé piténeeng
wo Padaame,
ke e téne ni pwoipwoiitihi telé.
E cuwode lépwona lé pwo nina ta. Psaume 34.13–17

Adéikenye he nye mu he ni picani

¹³ Hemepie geé hane me geé pwo ana wâé mu he ni ju pwonimewé, ke time o uce hiwon celi lé pwotahi ne kowé. ¹⁴ †Kehe mepie geé mu he ni picani be geé pwo ana wâé, ke geé pwo me piwâénimewé!

Geé nemwo pwo me mwotikewé
ko ni apulie!
Nemwo pwo me pinekepé ne tewé! Ésaie 8.12

¹⁵ Ke wâé heme geé paciiti Kériso he ni ju pwonimewé. Geé tee pipwopweekewé me geé hegi ne te ni apulie, mepie lé tahimwokewé pie, é mu ko ade na geé céihi. ¹⁶ ††Ke geé hegi ne telé he ni pwonimewé na bwala. Geé pipwocile ni bwomu tewé beme time e uce pipé ne kowé na a *pwonimewé. Ke hemepie lé pii me ta gewé ne ni apulie mu ko a mulihewé, be geé âcéi Kériso, ke bo tanim jélé. ¹⁷ Éa, wâé heme geé mu he ni picani é mu ko a wâé na geé pwo âcehi a pihuô te Padué. Kehe time uce wâé heme geé mu he ni picani é mu ko a ta na geé pwo!

E mu he ni picani wo Kériso ke e piwéden

¹⁸ Te océiu Kériso ko mele
ne ko ni ta pwo te ati ni apulie.
Te tice aceli e pwo celi ta,
kehe e mele me de nina ta jélé,
beme e péélé nge céii Padué.
Taanueng ne ha a één.
Ke a *Jenen Iitihi
ke e ne ten mwo a mulie ‡.

¹⁹ Ke e â patemehi a Pwooti Wâé ne te nina lé mele, na élé he karépu †. ²⁰ ††Ni amele naa, ke nina time lé uce piténeeng Padué bwolihi, he e mwo ko jili a ongen wo Noé. Ke e te junihe picani ne kolé wo Padué, ke e te ju-

† 3.14 Ésaie 8.12–13; Mataio 5.10; 1 Pétéru 2.20, 4.14 †† 3.16 1 Pétéru 2.12 ‡ Dernières lignes—Grek: Pamulipieng mwo ne ha a jenen. †† Nina lé mele, na élé he karépu—Wieli ni apulie ta he ni benaamwon ânebun he lé mele, kehe wo Kériso, ke e caa te pii beetihi a Pwooti Wâé telé. Ai wieli ni duéé: li âcélo li lé cubwoni Padué. Omehi Genèse 6.1–4. Ke wo Kériso, ke e â tautilé, beme pwocuhinaado telé dieli mwo. †† 3.20 Genèse 6—7

nihe ucéilé. Kehe te ju mehin ni apulie, 8 jélé neibuhi, na lé taa ha a ong, ke celuimilé mu ha a tabe.

²¹ Ati ninaa, ke a déme a *pipuu apulie na e celuimikewé jena, wogewé mwo. Be a bwopiine a pipuu apulie, ke time uce ana me pétaabwon a alili mu ko a éé apulie! Kehe a ine a bwo hegi a pwoto te Padué, ke ni ta pwo tenye, ke caa pineuhi ††. E celuimikewé a pipuu apulie, be e mwojuia cemwo mu ha amele wo Iésu Kériso. ²² Ke e caa taa he *miiden, ke e pwo jui Padué. Ke ati ni *âcélo, ke ni jenenaado, ke ati nina pwojunuun, ke lé mu haahi ni pihuô ten.

Mulie ne ha a mulie na wâé te Padué

4 ††Wo Kériso, ke e mu he ni picani ne ha a één. Ke wogewé mwo, ke wâé heme geé mwomwohi pie: «Wo pa acéihi na e mu he ni picani, ke weeng kuti pana e caa necu a ta †.» Ke é ne tewé a bwo niimihi-naado naa, beme a pihe pa tewé.

² É ha a benaamwon na e mwo ko ne tewé beme geé mulie ne pwo bwohemwo, ke geé nemwo âcehi nina te nimewé kon na ta, ke me geé piténeeng Padué. ³ †Éa, é ha a céiu benaamwon, ke geé pwohewii lépwona time lé uce temehi Padué, ke geé te mulie hauli. Be geé te nihe wiinaado ke nihe ûdu tabe megele. Ke geé pitaaba. Ke geé pipaunu ni duéé hauli: Ke a naado na te junihe ta. ⁴ É jena, ke lé téetihi wo lépwo bééwé ânebun, be caa time geé uce âcéilé ne he ni naado na lé pwo na tanim, ke lé pii nina ta ne kowé. ⁵ ††Kehe lé bo pwocuhin nina lé pwo ne te Padué, be e caa pipwopweeng beme e tauti lépwona lé mulie, me lépwona lé caa mele.

⁶ É mu ko anaa, na a Pwooti Wâé, ke patemehi die pele lépwona lé caa mele †. Be woélé, ke tautilé ne he ni muko bwomu telé, pwohewii ni apulie ati. Kehe é jena, ke jan me lé mulie ne ha a bwomunen naa ne ko Padué, wonaa mu ko a *Jenen Iitihi.

Geé pipwoiipikewé

⁷ ††E o caa piâbé a pwonehi ati ni naado. Ke geé mu ehi, ke geé te ûmiê, beme geé pwoiitihi. ⁸ †Weengaa kuti a junaado: Geé pwo me pieânimewé tewé he ni ju pwonimewé, be «a eânime, ke e pétaabwon ni ta na hiwon».

⁹ †Ke geé pihegikewé ne he ni pomwa tewé heme time geé uce pihuu. ¹⁰ ††Geé papenemihi ne ko ni

†† Ni ta pwo tenye, ke caa pineuhi—Grek: Avec une conscience pure. ††† 4.1 Roma 6.2,7 § Wo pa acéihi na e mu he ni picani... Wieli a bwopiinen pie: Wo pa acéihi na e tupuu, beme e habwii pie e bo necu a ta. † 4.3 Éféso 2.2–3 ††† 4.5 Apostolo 10.42 †† Lépwona lé caa mele—Wieli ni apulie na lé mele ânebuhe a bwo tuie te Iésu Kériso. Kehe wo Iésu, ke e pipatemehi telé ni tan na cié na e pwo tina a pule. Omehi lupwo niide a tii 19 me 20. Kehe icehi ana hiwon mwo ni bwo niimihi nen ne ko ni bwopiine ni pwooti naa. ††† 4.7 Roma 13.11–12 † 4.8 1 Pétéru 1.22; Proverbes 10.12 † 4.9 Ébéru 13.2 ††† 4.10–11 Roma 12.6–8

bééwé nina geé muko pétaapwo hegi. Wâé heme geé pwohewii lépwo apenem na wâé jélé na lé cile ehi nina pidodoni na e ne telé wo Padué.

¹¹ Wo pana e cihe, ke wâé heme pa apipépwooti te Padué. Wo pana e pipati, ke me e patihi ha a niihen na e ne ten wo Padué.

É nelang, ke ati ni apulie ke lé pipaunu Padué ati ne he ni naado, mu ko Iésu Kériso. Eten *a wâé ke a junuun dieli mwo! Amen!

Ni picani mu ko a bwo âcéi Kériso

¹² Wogewé ni ju bééng, geé nemwo téetihi hemepie geé bo mu he ni picani na pwohewii a miû na ubwo.

¹³ †Hemepie geé mu he ni picani te Kériso, ke geé pwo me piwâénimewé, be geé temehi pie, bo junihe ubwo wéden a pipwodéén dewé, hemepie geé bo alihi a wâé ten. ¹⁴ ††Hemepie lé piciheta ne kowé, be geé eabwé te Kériso, ke a naado na wâé ne kowé! Be caa e kowé a jene Padué, ke a jenen na junihe wâé wéden!

¹⁵ Kehe icehi ana hemepie e mu he ni picani wo pace céiu, ke wâé heme time e uce âbé mu ko a taunuhi apulie, ai a bune, ai e pwo ana ta, ai e gaale he ni picihete te lépwo béén!

¹⁶ Ke hemepie e mu he ni picani be pa acéihi, ke me time e uce pwo me pitanim nang. Ke wâé heme e pipwo-olé te Padué ko a bwo pé na a nii Kériso.

¹⁷ Weengaa atabuhi ko a tautinaado, ke e tabuhi mu ha a pwomwoiu te Padué. Ke hemepie e tabuhi mu konye, ke ade aceli e o tuie ne ko lépwona te muhi telé me lé mwomwohi a Pwooti Wâé te Padué? ¹⁸ †Be caa te tii ne he ni tii iitih pie:

*Lépwona lé pwo ana wâé,
ke caa binyi me celuimilé.*

Ke lé bo pwo de

wo lépwo apulie na ta jélé,

na lé jéilé ne ko Padué? Proverbes 11.31

¹⁹ Ke wonaa, nina lé mu he ni picani heme lé pwo ana nime Padué kon, ke me lé ne ni mulihelé ne te pana e tabuhi ati ni naado. Ke me lé tee pwo ana wâé.

A pwooti ne te lépwo apihuô

5 É pamwoiukewé lépwo apihuô te ni acéihi, be woéo, ke pa apihuô pwohewiikewé. Ke é caa alihi ni picani na e mu hen wo Kériso, ke é o mu ha *a wâé ten heme e bo habwiieng [wo Padué]. Ke é ilekewé ha a ju pwonimung pie: ² ††Geé cile ehi a pubu apulie na e ne tewé wo Padué. Geé nemwo pwo pie ana me geé pwo, kehe geé pwo mu he ni ju pwonime, pwohewii ana nime Padué kon. Ke geé nemwo pwo beme geé pé mwani kon. ³ ††[Geé daame helé] kehe geé nemwo

† 4.13 Apostolo 5.41; Cang 1.2; 1 Pétéru 1.6–7 †† 4.14 1 Pétéru 2.20 † 4.18 Proverbes 11.31 †† 5.2 Ioane 21.15–17; Apostolo 20.28 †† 5.3 2 Korénit 1.24; Filipi 3.17; Tit 2.7

huôhi me binyi ne ko a pubu apulie na e ne tewé wo Padué. Kehe wâé heme wogewé lépwona me lé alikewé, ke me lé pwohewiikewé. ⁴ Ke mepie e âbé wo pa Caa te lépwo awéihi na a pubu apulie, ke geé bo hegi a cemewé †† na junihe wâé na e mu dieli mwo.

Bénebwéne pwooti

⁵ ††Wogewé ni ewa, ke geé piténede lépwo ukéiu! Ke tai wogewé, ke geé pipwoiipikewé ne he pwahamii ni béén. Be caa te tii ne he ni tii iitih pie:

Wo Padué, ke e cuwode

lépwona lé pipaunulé.

Kehe wâé nang ne ko

lépwona lé pipwoiipilé. Proverbes 3.34

⁶ †Geé pipwoiipikewé ne haahi a junuu a i Padué, ke e bo nekewé da, heme e bo âbé a benaamwon na e caa pipégali. ⁷ ††Geé tai ne ten ni gia kowé, be weeng pana e cilekewé.

⁸ ††Geé tee ûmiê, be pana e pwopa ne kowé, ke wo *Caatana, be e pwohewii pa liô na e okéé ††, ke e biteeng aujenikewé, be e hane paceli me e wiieng.

⁹ ††Geé cuwodeeng ne ha a céihi na mang, heme geé ko temehi pie, te piwie ni picani na pwo ne ko lépwo bééwé na élé pwo a bwohemwo ati.

¹⁰ Ni picani tewé, ke mwo te ju é ha a cuwo benaamwon, kehe e todekewé wo Padué na junihe eânimen denye, beme geé mu ha a wâé ten na tice anebwén kon, ibu me Kériso. Ke e bo pwo me wâé gewé, ke bo pwo me geé cumang, ke pwo nihiwé, ke o pwocoon me lé pwo me geé tupwo.

¹¹ Eten a junuun dieli mwo! Amen!

Bépinelé

¹² ††É pwotii lé céiikewé beme é pamwoiukewé, ke me é pii tewé pie: A *pipwoééhe tice ja kon de Padué, ke ana geé caa ko mu hen. Ke geé tee cumang hen. É ne te Silas a tii ce ††, pa âjién na e piténedehi [beme e pé lé céiikewé].

¹³ ††Ni acéihi na élé éni *‘Babulona’ †††, ke lé pwobwocu tewé. Be wo Padué, ke e pipégaliilé pwohewii ne kowé.

Ke e pwobwocu tewé mwo wo Maréko, pa nañg ne ha a céihi.

††† Cemewé—Grek: Kuron (couronne). ††† 5.5 Éféso 5.21; Cang 4.6 † 5.6 Mataio 23.12; Luka 14.11; Cang 4.10 †† 5.7 Mataio 6.25–30 ††† 5.8 1 Tésalonik 5.6 †† Liô na e okéé—Grek: Liô na e huu. ††† 5.9 Éféso 6.11–13; Cang 4.7 †† 5.12 Apostolo 12.2,25, 13.13, 15.22,37–40 †† É ne te Silas a tii ce—ai E tii ne he niing wo Silas. ††† 5.13 2 Timoté 4.11 ††† ‘Babulona’—A bwopiinen pie a pwomwo ubwo Rome. Nime Pétéru me e neduwohi a niin ko ni béén na lé tééti ni acéihi. Babulona, ke a ocine ko lépwona lé pwopa ne ko a bele te Padué. Omehi tii Pii Beetih 14.8 me 18.10,21.

¹⁴ Geé pipwobwocu tewé mu he ni ju pwonimewé. Ke me e mu pelewé ati na a péém, wogewé na céiu gewé me Kériso!

Adéikewé!

2 Pétéru

te

Atabuhi ko a tii

Woo na e tii a tii ce?

Wo Simon Pétéru, pa céiu acémun de Iésu Kériso. Pa apulie na piubwo nang ne hadenii ni acéihi.

E tii éniile?

Ha awieme a jo 65 me 67. E tii wo Pétéru mu Rome, ânebuhe a bwo mele ten ne ko a kuricé, pwohewii Iésu.

E tii me dee?

Te ati ni acéihi ne ko Iésu Kériso.

É ko ade na e tii?

Ha a benaamwon na e tii, ke hiwon lépwo apipune na lépwo agele, na lé pwo me lé piâ ité wo lépwo acéihi koja a pwooti ko Iésu na juuju. Ke e tii wo Pétéru, beme e paténe lépwo acéihi, beme time lé uce âcéilé. Ke e tii mwo beme e pinelé, be e temehi pie, e o te ju téele mele.

Ade ace âne a tii ce?

E pamwoiukenyé wo Pétéru, beme nye te cuwo ko âcéi Iésu, beme o te cuwo ko piubwo ngen ace bwo temehieng denye, me a pipwoééhe tice ja kon ne konye. E o caa mwojuia mwo wo Padaame Iésu Kériso, ke genye nemwo pipéce ne ko lépwona lé pii pie, time o uce wonaa. O ubwo a kuhinaado te lépwo apwopune na lépwo agele. Hiwon ni pwooti na piwien me ni pwooti na e ha a .

A bwomune a tii 2 Pétéru

Pipwobwocu

Mulie ha a mulie na wâé te Padué

Lépwo apwopune na lépwo agele

E o bo tuie mwo wo Padaame

Bénebwéne pwooti ke bépinelé

Pipwobwocu

1 Woéo Simon Pétéru [na é pwtii]. Woéo pa eabwé te Iésu *Kériso, ke é apostolo ten [be e pahedeéo ngen, beme é â pipatemehi a pwooti ten]. É pwtii lé céiikewé, wogewé nina céiu a céihi tenye. A céihi tenye naa, ke a naado na te junihe wâé, be genye caa hegi mu ko Iésu Kériso, Padué henye, na weeng wo Padué ke pa *aceluimikenye. Junihe mwomwon ati ni bwopwonen den, be time e uce pipwoinen ne konye, be e tai ne tenye a céihi na piwien [†].

[†] Dernière phrase—*ai Weeng na e pwo me nye mwomwon ne he pwahamii Padué. Grek: Ko a bwo mwomwon nang.*

² Wâé heme lu adéikewé wo Padué henye ke wo Padaame henye Iésu Kériso. Wâé heme te piubwo ngen a bwo temehinaado tewé ne kolu, beme piubwo ngen ne kowé a *pipwoééhe tice ja kon me a péém delu!

Mulie ha a mulie na wâé te Padué

³ E todekenye wo Padaame ^{††}, beme nye mu ha *a wâé ten na te junihe ubwo! Ke é mu ko a bwo temehieng denye, ke jan me nye mulie ha a mulie na iitih ke wâé ten. Ke e ne tenye, ko a junuun, ati ni junaado, be me wonaa a bwo mulie tenye. ⁴ É mu ko ati ninaa,

^{††} Padaame—*Wiel wo Iésu, ai wiel wo Padué Caa.*

ke e ne tenye ali e caa mi pii ânebun: ati ni *adéihi na te junihe wâé, ke te junihe ubwo wéden! [Geé imwi ehi ninaa] beme o tuwokewé koja nina nimewé kon na ta, na e pwotahi ne ko ni apulie pwo bwohemwo! Ke o céiu a pwonimewé me Padué, ke geé o pwohewieng.

⁵ Ke geé te nihe hane beme e ne kowé ni acehin ce, na a céihi tewé †:

Geé mulie ha a mulie na mwomwon;

Geé temehi Padué, ke o piubwo da a bwo teme-hieng dewé;

⁶ ††Geé pipwoiipikewé;

Geé cumang ne he ni picani;

Geé paciiti Padué me piténeeng;

⁷ Geé pwo me eânimewé te ni acéihi bééwé;

Geé pipwoééhe ati ni apulie.

Pwo me piubwo da ana wâé

⁸ Weengaa ni wâé na me e mu kowé. Ke mepie ubwo ne kowé, ke o pepule gewé, beme geé pwo celi wâé, ke o jan ne kowé me geé temehi ehi † Padaame henye, Iésu Kériso. ⁹ Heme pie pwo pace apulie celi tieden ne ten ni wâé naa, ke e pwohewii pana bwi nang. Be e neuhi pie, caa puueng mu he ni ta na e pwo bwolihi.

¹⁰ E caa pipégalikewé wo Padué, wogewé lépwo bééng, ke e todekewé beme lépwo apulie ten. Ke wâé heme geé te junihe mwoiu, me geé habwii anaa ne he ni bwomu tewé ††. Be me wonaa, ke time o uce tacida mwodawé, ke o time geé uce tupwo. ¹¹ Ke e bobé hegikewé ha a pipwodéén ††, ne ha a Mwametau te [pa Naîn] Iésu Kériso, Padaame henye, ke pa aceluimikenye; ne ha a Mwametau na tice pwonehin.

Time o uce bwolihi ke é o mele

¹² Geé caa te temehi ati ni naado naa, na é ko pii ni, ke geé caa te cumang, ne ha [a bwo mulie tewé âcehi] a juuju. Kehe icehi ana [time uce piwâ jo me] é te pani-mihi tewé mwo. ¹³ Ke é niimihi pie, o wâé heme é te cuwo ko wonaa, he é mwo teko mu éni pwo bwohemwo. ¹⁴ †††Be e caa habwii tong wo Padaame Iésu Kériso pie, time o uce bwolihi, ke é o caa engen mu éni pwo a bwohemwo ce †††. ¹⁵ Ke wâé heme é te nihe penem ni, beme é alecehen, ke me geé bo tee niimihi nina é patemehi tewé.

† Beme e ne kowé ni acehin ce, na a céihi tewé—Grek: Geé ne mwo te a céihi tewé a mwomwon. Ke geé ne mwo pwo a mwomwon... É ha a Tii Iitih he pwo grek, ke piokelo ko pii ati ni naado ne he ni niide a tii 5–7. †† 1.6 Galat 5.22–23 † O jan ne kowé me geé temehi ehi—ai O piubwo da a bwo temehi nen dewé. †† Habwii anaa ne he ni bwomu tewé—Grek: Pajujuhi. †† Ha a pipwodéén—Grek: Me ubwo. ††† 1.14 Ioane 21.18–19; 2 Korénit 5.1 ††† É o caa engen mu éni pwo a bwohemwo ce—Grek: É o caa necu a mwa mwaanu ce.

Geme piuti tewé nina geme alihi

¹⁶ §[Wogeme me lépwo *apostolo bééng, ke] geme caa pipatemehi tewé a junuu Padaame Iésu Kériso, me a bwo mwojuia cemwo ten ††. Time uce ace céiu jemaa te lépwo apulie, ke time uce ace jepule celi e âbé mu ko ace pitemang deme †††. Be geme te ju piuti tewé cehi nina geme alihi ko ni naamiime.

Be geme alihi a bwo ubwo na a wâé te Padaame Iésu na pwomelaan, ¹⁷⁻¹⁸ §†he li geme mu pwo ali juwole iitih. Ke geme téne a pwocihe te Padué Caa mu he mi-iden, Padaame henye na te junihe ubwo a wâé ten ke a junuun. Be e te junihe pipaunu me pipwoun de Iésu [ânebuheme] he e pii beetih pie: «Wo paje, ke pa Naîn [na te céiu nang] na te junihe eânimung den. Weeng na é caa te pipégalieng ha a pipwodéén dong.»

A Tii Iitih ke a pwooti te Padué

¹⁹ É mu ko anaa kuti †††, ke jan me nye céihi ne ko ati ni pwooti te lépwo *péroféta, ke me nye nenimenye ne kon. Be lé pwohewii a mwomiû na e pwéélang ha a melepiing, ucéihi a bwo taa te a ceni pwo pwometan, ânebuhe a téale. [Be é jena, ke wo Kériso] ke e caa tuie ne he ni pwonimenye!

²⁰ Go nemwo niimihi pie, jan me go te pitemehi cehi ce bwopiine ni pwooti he ni *tii iitih, na lé pwaadeniin bé wo lépwo péroféta ††. ²¹ †††Be time uce aceli e âbé mu kolé lépwo apulie. Kehe te a *Jenen Iitih na e penem kolé, beme lé pébé a pwooti na e âbé mu ko Padué.

Lépwo apipune na lépwo agele

2 †††Ânebun, ke lé tuie ne ko a bele *Isaraéla ne ni péroféta agele. Ke o te piwien mwo jena ni. Be lé o êjele bé céiikewé ni apipune na lépwo agele. [Ke lé o pii pie, lépwo apulie te Padaame henye.] Kehe icehi ana muhi telé kon, weeng pali [e pineeng beme] e celuimilé †††. Ke lé o pwo me lé bitelé ne ni apulie mu he ni céihi telé †††. [Kehe icehi ana o te woélé mwo, na] o te junihe epin me ta ace bwo tanahilé taabwon!

² O hiwon ce béén celi lé o âcehi ni cémun delé, me ni huô telé na mwiihi ko ni éélé. Ke é mu ko anaa, ke o pii me ta a ju céihi [ne ko Kériso]. ³ Ke wo lépwo apipune naa, na lépwo agele, ke lépwo atapi. Ke lé o

§ 1.16 Mataio 17.1–5 †† A bwo mwojuia cemwo ten—ai A bwo tehenebé ten. ††† 2e phrase—Grek: Time geme uce âcehi ni jepule na [geme] pwo ko a bwo temehinaado [teme]. §† 1.17 Mataio 17.5 ††† É mu ko anaa kuti—A bwopiinen pie, é mu ko ana caa te pacu-wohi li pwooti li lé caa mi pébé wo lépwo péroféta ânebun: pwooti ko a bwo ubwo na a wâé te Kériso. †† 2e phrase—A bwopiinen pie: Temehi a bwopiine a pwooti te Padué, ke a penem de ati ni acéihi. Ai, Wâé heme geé temehi pie, te tice pwooti he ni tii iitih celi e te ju âbé cehi mu ko ce bwo niimihi nen de lépwo péroféta. §† 1.21 2 Timoté 3.16; 1 Pétéru 1.11–12 ††† 2.1 Mataio 24.11; Jude 1.4 ††† Celuimilé—Grek: Pwocuhilé. ††† 6e phrase—Grek: Lé pébé ni pwooti na e pwo me tieden (doctrines de perdition).

pipwohuô tewé, beme lé pé ni mwani tewé. Kehe icehi ana time o uce bwolihi ace bwo pwo me tielé. Be e caa te niimihi [wo Padué] ânebun pie, me e bo ne cuhinaado telé.

Lé o pwocuhinaado

⁴ †Be e epin wo Padué me e ne cuhinaado te lépwoli *âcélo li lé cubwonieng. Be e cielé ko ni itihe toki, ke e nelé ha a melepiing, ucéihi a Tan na e bo tauti ni apulie hen.

⁵ ††A céiu mwo, ke é bwolihi, ke e pwocuhinaado te ni apulie ne pwo bwohemwo na time lé uce paciitieng. Be li e pwopune telé wo Noé, me lé mulie ha a mulie na mwomwon [ne he pwahamii Padué. Kehe icehi ana time lé uce piténeeng. Ke lé tai mele] ne ha a jaa na te junihe ubwo wéden, na e tilihii a bwohemwo ati. Ke te 8 cehi nina celuimilé: wo Noé me [a pwomwoiu ten].

⁶ †A céiu mwo, ke wo Padué, ke e pwo me tieden lupwo pwomwo ubwo *Sodome me Gomore. Ke te tice aceli e cuwo, te icehi ni dehe miû. E wonaa beme a béhabwiinen ne ko ati ni apulie na time lé uce paciitieng, he ni tan na mwo e he pwaaden ††. ⁷⁻⁸ ††Kehe icehi ana pwo pa apulie na te céiu nang, mu kolé, na mwomwon ni huô ten ne he pwahamii Padué: wo Lota ††. É ati he ni tan, he e ko mulie ha awiemelé, ke e te alihii ke téne ni naado na mwiihi na lé pwo. Ke te junihe téé a pwonimen kon. Ke te weeng cehi na e celuimieng wo Padué [koja a miû].

⁹ Be wo Padaame, ke te jan me e *celuimi lépwona lé paciitieng koja ni picani telé. Ke mepwo é ne ko lépwo apulie na ta jélé, ke pwojunuun me e nelé he karépu, ucéihi a Tan na e bobé tauti a bwohemwo ati hen.

¹⁰ †††Ke o te junihe ubwo a cuhinaado na e bo ne te lépwona lé mulie he nina nimelé kon na ta, ke lé pwo ni huô na mwiihi ne ko ni éélé. Ke piwien ne mwo ko ni béén na lé pwo me piticenaado ne ko ni pihuô ten.

Lépwonimelé

Lé wonaa wo lépwo apipune na lépwo agele. Be lé pwo upwonimelé, ke time uce piwâ jélé me lé pwo ati nina ta, ke me lé pii me ta ni âcélo na junihe ubwo *a wâé telé ⁵. ¹¹ ††Kehe ni âcélo, nina te junihe pwo nihelé kojale, ke time lé uce niimihi pie, me lé pii me ta lépwonaa †††, ne he pwahamii Padué! ¹² ††Kehe icehi ana wo lépwo apwocémun naa, ke [time uce mwotilé, me]

† 2.4 Jude 1.6 †† 2.5 Genèse 6—8; 2 Pétéru 3.6 † 2.6 Genèse 19.24; Jude 1.7 †† He ni tan na mwo e he pwaaden—ai (A béhabwiinen) ne ko nina e bo tuie ne kolé. †† 2.7 Genèse 19.1—16

††† Lota—Pa acim ko Abérâma. Omehi note ††† 2.10 Jude 1.7—8, 16 † Ni âcélo na junihe ubwo a wâé telé—Grek: Lépwona caa telé a wâé (êtres glorieux). Wieli lépwo âcélo, ai lépwo eabwé te ni âcélo, ai ni duéé, ai lépwo apulie na lé pihuô ne éni pwo bwohemwo. †† 2.11 Jude 1.9 ††† Kojalé; Lépwonaa—Wieli lépwo apipune na lépwo agele, ai wieli nina caa etelé a wâé na piilé ne ha a niide a tii 10. †† 2.12 Jude 1.10

lé pihoonihii ni naado [na te junihe piwéden kojale] na te tice aceli lé temehi ne kon.

Mepwo é ne ko a mulihelé, ke pwohewii ni wota apiaba na te tice pwonimelé, na lé mu éni [pwo bwohemwo] beme o tailé, me taunulé. Ke mepwo ni huô telé na mwiihi, ke e o péélé nge ha a cuhinaado dieli mwo ††. ¹³ Ke o pwotahi ne kolé, pwohewii a bwo pwotahi ne ko lépwo béén.

Wo lépwo apulie naa, ke te nihe piwâénimelé heme lé getikewé, wogewé [lépwo ju acéihii]. Be lé temehi neduwohi ni ta pwo telé, heme lé mu he ni piwiinaado tewé, ke lé pwo me time wâé a pimu ibu tewé, ke lé pwo me tanim gewé. Be:

Lé pwo ni naado na mwiihi ne ha a pwaale ††;

¹⁴ Lé te cuwo ko ome ni toomwo, ke ta ni pwonimelé ne kolé;

Lé te pwo taaci ni bwo niimihinaado na ta;

Lé te hane taaci ni naado na ânenimelé kon;

Lé picéide lépwona time uce mang ni céihii telé, beme lé pwo nina ta.

É mu ko ati ninaa, ke e caa piapwolé wo Padué, [ke e bo ne telé a cuhinaado na junihe ubwo]. ¹⁵⁻¹⁶ ††Be lé caa piâ ité koja a pwaaden na mwomwon. Ke lé pipwohewii Balaam, pa naî Béor †††. Be weeng, [ke pa péroféta agele ânebun] ke te junihe wâé ten a bwo hegi mwani, beme e pwo nina ta. Kehe icehi ana [wo Padué] ke e pééleeng ko ni huô ten na ta. Ke e pacuwoeng koja nina e niimihi me e bo pwo ha a bwo tice pwonimen. Ke e pwo me e paciheeng na a buriko ten, ha a pati apulie!

Lépwonimelé

¹⁷ †††Wo lépwo apipune na lépwo agele, ke [te tice naado celi lé pébé celi wâé]. Lé pwohewii ni pwomiidu na tice tabe hen, me ni nii na pé na a dan: [Te junihe bwiile, kehe te tice ute hen.] Ke e caa imwi ni atebwo telé wo Padué ne ha a melepiing iitihii.

¹⁸ Ubwo ni pwolé, ke lé tee pipii delé ko ni jame pwocihe na te tice ânen. Ke lé cine lépwona lé caa âbé koja a mulie na ta, beme lé pwo mwo ati ni bwopemilé na mwiihi. [Be lé pii telé pie, wâé heme nye] âcehi ati nina nimenye kon na ta.

¹⁹ Lé pii tewé pie, lé tuwokewé koja nina lé ciekewé [beme time geé uce pipwoeabwé ko ce patén]. Kehe icehi ana woélé, ke cielé ko ni bwomu telé na mwiihi, na péélé nge ha a mele †††. Be wo pa céiu apulie, ke pa eabwé ko ana e pé pihuô ne kon.

††† Dernière phrase—Grek: Lé o mele pwohewii ni wota. †† 2e, 3e & 4e phrases—Grek: Be wâé telé me lé âcehi nina nimelé kon na ta, heme pwang. Pwo alili me ni huô telé na ta. Wâé telé me lé pipwohuô [tewé] me geé piwiinaado ibu. †† 2.15—16 Nombres 22—24; Jude 1.11; Pii Beetihii 2.14 ††† Béor—ai Bosor. ††† 2.17 Jude 1.12—13 ††† Péélé nge ha a mele—Grek: Pwotahinaado ne kolé, ai Péélé nge ha a bwo pwo me tielé.

²⁰ †Ānebun, ke lé te temehi Iésu Kériso, Padaame henye, ke pa *aceluimikenyé. Be e caa tuwolé koja ni huô na mwiihi te lépwo apulie pwo bwohemwo. Kehe icehi ana lé te mwojuia mwo, beme lé te pipwoeabwé te mwo a ta. [Te junihe pwoééhelé!] Be caa te junihe ta jélé koján ânebun!

²¹ ††Ānebun, ke lé hegi ni pihuô na iitihhi [koja Padaame] ke lé temehi a pwaaden na mwomwon. Kehe icehi ana [lé tahi taabwon ati, beme] lé mwojuia cemwo. Ke mwo te wâé ne kolé, heme mwo time lé uce temehi a juuju! ²² *Genye alihi ne kolé pie, te a juuju [lupwo alo] apii kon ce: *E pieni mwo ni unyehen wo pa wotaahen.*

Proverbs 26.11

Ke «Nye puu a puwokwó, kehe e mwojuia ne mwo ha a hepule.»

E o bo tuie mwo wo Padaame

3 Lé pwo ju bééng wé, weengi a béalohe tii na é tii, beme é paniimihi tewé ati ni naado naa, ke me é pamwoiukewé, beme o mwomwon ke iitihhi ni âniimihi-naado tewé. ² ††Wâé heme geé pipaniimihi ni pwooti na lé caa mi pii ânebun wo lé pwo péroféta iitihhi [te Padué]. Ke geé cile ehi ni pihuô te Padaame, pana e caa celuimikenyé, li lé caa pipatemehi tewé wo lé pwo *apostolo tewé.

³ ††Weengi a pwooti na a junaado, na wâé heme geé temehi ehi: [Be caa mi pii tewé pie] lé o bo tuie ne kowé he *ni bénebwéne tan wo lé pwo apulie na lé te ju engen cehi ne he nina nimelé kon na ta.

Ke lé o pihonikewé ⁴ †††me pii tewé pie: «Kona e wé naa wo pali Iésu tewé li e pii pie e bo mwojuia cemwo? [O caa time e uce âbé!] Lé caa mele wo lé pwo lé lé mi céihi ne kon ††† [ke time lé uce alieng!] Be te tice ace céiu naado ne éni pwo bwohemwo celi me pitaatééhi mu ha atabuhhi kon!»

⁵ ††Wo lé pwo apihota na lé pii anaa, ke time uce nimelé me lé temehi pie, e ne a bwohemwo me a miiden wo Padué ko a pwooti ten. Be e taawie a bwohemwo mu ha a tabe, beme e mu aujenihhi a bwohemwo na a tabe. ⁶ ††Ke é alecehen, ke e pwo me tieden a bwohemwo ko a tabe. Be e patupwo ngen a jaa na junihe ubwo.

⁷ [Weengaa ana é pii]: Ke me lu mu a miiden me a bwohemwo jenaa ni, ke te é mu ko a pwooti te Padué. Ke e cile ati ni naado ko a pwooti ten, ucéihi a Tan na e bo tai tautilé hen. Ke é ha a Tan naa, ke e bo cini a miiden me a bwohemwo, me ati ni apulie na time lé uce paciitieng.

E uca be e te junihe pipwoééhenye

⁸ †††Kehe icehi ana wogewé lé pwo bééng, ke geé nemwo pineuhi pie: «A tan na céiu, ke pwohewii ni jo na 1000 ne ha a bwo alihi nen de Padaame. Ke nina 1000 ni jo, ke pwohewii a tan na te céiu.»

⁹ ††Ke [weengaa ana geé alihi pie] time uce a juuju a bwopiinen de ni béén pie, te bwoli Padaame me e pacuwohi ana e pii! Ôhu! E tai ucéikenye, [be te junihe bwala nang] ke e picani ne konye ni apulie. Be time o uce wâé ten hemepie e mele ace apulie celi te ju céiu nang. [Ke e ne te ni apulie ati a benaamwon] beme lé bitelé ne mwo kon koja ni ta pwo telé [ke me tai celuimilé].

¹⁰ †††Kehe icehi ana e bo te mwojuia mwobé wo Padaame ††, [ke e bo patéeti ni apulie] pwohewii pa abune. [Lé o bo téné] a tihinaado na te junihe ubwo, ke o te ju pwo é tieden a miiden. Ke o éle tieden ni ceni ne ha a miû na junihe ubwo. Ke o tieden †† a bwohemwo me ati ni naado na e pwon!

Mulie ha a mulie na iitihhi

¹¹ Hemepie o tieden ati, ke o ade aceli me geé pwo? Weengi: Geé mulie ha a mulie na iitihhi na wâé te Padué, ke geé te pipwoeabwé ten cehi. ¹² Geé wonaa a bwo ucéihi nen, be ††† e o bo tuiebé epin a Tan naa, [na e bo tauti ati ni naado wo Padué]; a tan na o éle ati a miiden me a bwohemwo ne ha a miû na ubwo. ¹³ ††††Be e caa mi pii ânebun pie, me e bo ne a miiden me a bwohemwo na mwo coho. Ke ati ni naado na lé bo mu pwon, ke lé o mulie cehi ni bwo niimihinaado te Padué ††††. Ke weengaa a bwohemwo na nye ucéihi [ha a pipwodéén!]

Bénebwéne pwooti

¹⁴ É mu ko anaa kuti, ke wogewé lé pwo ju bééng, ke geé hane me geé mulie ha a mulie na iitihhi, ucéihi a Tan naa. Be mepie geé wonaa, ke o tice ta kowé celi me e bo tautikewé kon wo Padué. Ke o pwo a péém ha awiemewé me weeng.

¹⁵⁻¹⁶ 18[É ko ade na bwoli Padaame me e mwojuia mwobé?] Te ju é ko [a bwo bwala nang, me] a bwo picani ten ne konye! Ke geé nemwo pineuhi pie, wogewé, ke e caa celuimikewé [koja a kuhinaado]. Ke weengaa ana e mu tii me dewé wo Paulo, pa ju béénye na te junihe eânimenye ten. Be e pipatemehi ninnaa, ne he ni tii ten ati, ko a bwo temehi nen na e ne ten wo Padué.

† 2.20 Mataio 12.45 †† 2.21 Luka 12.47–48 † 2.22 Proverbs 26.11 †† 3.2 Jude 1.17 ††† 3.3 1 Timoté 4.1; Jude 1.18 †††† 3.4 Mataio 24.48 †††† Lé pwo lé lé mi céihi ne kon—Grek: Wo lé pwo caa tenye. † 3.5 Genèse 1.6–9 †† 3.6 Genèse 7.11; 2 Pétéru 2.5

††† 3.8 Psaume 90.4 †† 3.9 Habakuk 2.3; 1 Timoté 2.4 †††† 3.10 Mataio 24.29,35; Luka 12.39; 1 Tésalonik 5.2 †† E bo te mwojuia mwobé wo Padaame—Grek: Ha a tan de Padaame. †† Tieden—ai Tauti. †††† Be—ai Beme. †††† 3.13 Ésaie 65.17, 66.22; Pii Beetihhi 21.1,27 †††† 2e phrase—Grek: E bo mu lang a mwomwon. 18 3.15 Roma 2.4

A juuju pie, te pibinyi a bwo temehi ne ni béé pwooti ten. Ke pwo ni apulie na lé pibitehi nina e pii. Wo lép-wonaa, ke time uce pwo waalé ne ha a juuju, ke time uce lépwo ju acémun [ko ni tii iitih] †. Be lé wonaa ne mwo he ni béé pwooti ne he ni tii iitih. Ke é mu ko anaa kuti, ke lé â benihi a mele dieli mwo na e éité koja Padué ††.

Bépinelé

¹⁷ †[É tii a tii ce, beme] é mi paténekwé, wogewé lépwo bééng, ko lépwo [apipune agele] na time lé uce

† *8e phrase (Wo lépwonaa...)*—Grek: *Te tice aceli lé temehi [ko ni tii iitih] ke time lé uce cumang [hen].* †† *A mele dieli mwo na e éité koja Padué*—Grek: *A bwo tanahilé.* ‡ 3.17 Maréko 13.33; 1 Korénit 10.12

paciitih ana juuju! É ko anaa na geé tee ûmiê! Ke geé pipwocile, be koli lé pihaamikewé, ke koli geé bo tupwo mu he na geé cumang lang.

¹⁸ Wâé heme piubwo ngen ne kowé a *pipwoééhe tice ja kon de Iésu Kériso, Padaame henye, ke pa *aceluimikenye. Wâé heme piubwo ngen ace bwo temehieng dewé! Pipaunueng ne ha a bwo ubwo na a wâé ten jenea, ke é dieli mwo!

Wâé heme wonaa! Amen!

1 Ioane

te

Atabuhi ko a tii

Woo na e tii a tii ce?

Wo Ioane, pa apostolo, he li mwo pa ewa aiu ha a benaamwon de Iésu.

E tii éniile?

Ha awieme a jo 85 me 100, he caa ukéiu nang, ke e pihuô te ni acéihi ne Éféso, ha a province Asia (ha amu Turki jena). Ha a benaamwon naa, na e tii ati ni tii ten na nim na e mu ha a Tii Iitihi: a Pwooti Wâé ; , me a tii .

E tii me dee?

Te ni puco te lépwo acéihi ne ko Iésu na lé mu ha a province Asia.

É ko ade na e tii?

E pacémuni lépwo acéihi ne Asia ko a juuju. Be wo lépwo béén mu kolé, ke lé pacémunilé ko ni pwooti na gele. Be lé pii pie, wo Iésu, ke time uce pa ju apulie pwohewiikenye, ke time e uce temehi ni tacebwén me ni picani te lépwo ju apulip. Ke lé pii mwo pie, piticenaado ne ko a éénye me ati ni naado na nye alihi. É mulang, na piticenaado ne ko a bwo mulie ha a mulihenye, heme wâé ai heme ta, be te piwien. Ke lé caa pwo me lé piâ ité ne ni béén ko a pwooti naa.

Ade ace âne a tii ce?

E paniimihi tenye wo Ioane pie, te a juuju pie, te pa ju apulie pwohewiikenye wo Iésu. Kehe icehi ana te pa Naî Padué mwo. Mepwo wo Padué, ke e pwéélang, ke ubwo a pwonimen konye. Ke genye temehi anaa mu ko Iésu na e caa pineuhi ni ta pwo tenye. Ke genye temehi mwo mu ko a Jenen Iitihi na e caa ne tenye wo Iésu. Mepwo é ne ko pa ju acéihi ne ko Iésu, ke wâé heme e te cuwo ko mu ko a céihi na caa picaa ten ha atabuhi kon. Ke wâé mwo, heme e ne a mulihen me de ni béén, pwohewii Iésu.

Me wonaa, ke e habwii pie eânimen de Padué, ke e temehieng.

A bwomune a tii 1 Ioane

A pwooti te Padué na e ne a mulip

Nye mulie ha a pwéélang

Lépwo acubwoni Kériso

Genye naî Padué

Lépwo péroféta agele

A pwonime Padué ke a pwonimenye

Céihi ne ko pa Naî Padué

E tii wo Ioane, beme mang a céihi tenye

A pwooti te Padué na e ne a mulip

1 †A Pwooti na e ne a mulip ††, ke e mu ha atabuhi ko a bwohemwo. Ke game patemehieng tewé je-

† 1.1 Ioane 1.1

naa ni, be game caa ju téneeng; ke game caa ju alieng; ke game caa ju ti kon; ke game caa ju pinenimeme ne kon ‡. 2 ††Be e tuie ‡, ke game alieng, ke game pajuu-

†† A Pwooti na e ne a mulip—A bwopiinen pie, Iésu Kériso. Ome-hi Ioane 1.1.

jueng. Ke geme patemehi tewé pie, e mu kon a mulie na tice anebwén kon. Be e mu pele Caa, na e caa habwiieng deme. ³ Nina geme alihi ke nina geme téne, ke geme patemehi tewé mwo, beme tai piwogenye ibu ne pele Caa me pa Naîn Iésu *Kériso. [Be lu te pimu ibu.] ⁴ Ke geme ^{††} tii lé céiikewé a tii ce, beme hején a pipwodéén denye.

Nye mulie ha a pwéélang

⁵ [‡]Weengi a pwooti na geme téne mu ko Iésu Kériso, ke geme patemehi tewé: «Wo Padué, ke pa pwéélang, ke te tice meleepiing kon.» ⁶ [‡]Hemepie genye pii pie genye mu ko Padué, ke mepie genye mwo te engen ha a meleepiing, ke genye gele; ke time uce e konye a *JUJU. ⁷ Be e mu ha a pwéélang wo Padué, ke mepie genye engen ha a pwéélang, ke céiu genye. Ke a cewéhe Iésu Kériso, pa Naîn, ke e pétaabwon ni ta pwo tenye.

⁸ [‡]Hemepie genye pii pie te tice ta pwo tenye, ke genye te pigetikenye, ke time uce e konye a JUJU. ⁹ Kehe mepie genye pii te Padué ni ta pwo tenye, ke e mwomwon ke e juuju me e pétaabwon ni ta pwo tenye. ¹⁰ Hemepie genye pii pie te tice ta pwo tenye, ke genye pé Padaame me pa agele, ke time uce e konye a pwooti ten.

A bwo mulie tenye ni naî Padué

E picani tenye wo Iésu Kériso

² ^{‡‡}Ni naîng ne ha a céihi, é tii ne tewé ni naado naa, beme time geé uce pwo nina ta. Kehe mepie pwo paceli e pwo aceli ta, ke pwo pana e pipwopainye ne pele Caa: wo Iésu Kériso, na e mwomwon.

² ^{‡‡}Weeng na e mele beme pineuhi ni ta pwo tenye; time uce é ne konye cehi, kehe é ne mwo ko ni apulie pwo a bwohemwo ati.

Genye mulie pwohewii a bwo mulie ten

³ Hemepie genye ténédehi ni patén de Padué, ke genye temehi nelang pie nye te temehieng. ⁴ Wo paceli e pii pie e temehi Padué, ke me time e uce ténédehi ni patén den, ke pa agele, ke time uce e kon a *JUJU. ⁵ [§]Kehe wo pana e ténédehi a pwooti te Padué, ke tidi ati a pwonimen ko a pipwoééhe ten ^{§†}. É

‡ Geme caa ju pinenimeme ne kon—Grek: Geme caa ju omeeng. †† 1.2 Ioane 1.14 ‡‡ E tuie—Grek: Caa habwii a mulie naa. † 1.4 Ioane 16.24 †† Geme—Wo Ioane, ke e tii ha a bwo niimihini nen delé me lépwo apostolo béén. ‡ 1.5 1 Timoté 6.16; Cang 1.17 †† 1.6 1 Ioane 2.4 ‡‡ 1.8–9 Psaume 32.5; Proverbs 28.13 ‡‡‡ 2.1 Ébéru 9.24 ‡‡‡ 2.2 Ioane 1.29; Kolosé 1.20; 1 Ioane 4.10 § 2.5–6 Ioane 14.21,23 §† Tidi ati a pwonimen ko a pipwoééhe ten—Grek: Hején ne kon a pipwoééhe te Padué. É ha a tii ce, ke geme pé lupwo bwopiinen na alo, beme pioche a amour pwonime, ai eanime, ke pipwoééhe, ácehi ni niide a tii, ke é he ni béén, ke geme tai ne lupwona alo.

mu ko anaa, ke genye temehi pie wogenye kon. ⁶ Be wo pana e pii pie e mu kon, ke wâé heme e mulie pwohewii a bwo mulie te Iésu.

Eânimem de pa béém acéihi

⁷ ^{§††}Ni bééng acéihi, time uce a patén na mwo coho na é tii me dewé, kehe ana geé caa te mi temehi ^{§†}. Be weengaa kuti a pwooti na geé caa te téne. ⁸ ^{§††}A céiu mwo, ke a patén na te junihe wâé ^{§†} na é tii me dewé. Ke e te *pajuujuhi [ne ha a mulihen] wo Kériso, ke é ne he ni mulihewé mwo. Be caa ko pitieden ngen a meleepiing, be e caa tuie a ju pwéélang.

⁹ ^{§†}Wo paceli e pii pie e mu ha a pwéélang, kehe mepie e tééti pa béén acéihi, ke e mwo te mu ha a meleepiing. ¹⁰ ^{§§†}Kehe wo paceli eânimem de pa béén, ke e mu ha a pwéélang. Ke time e uce tupwo ne ha a ta. ¹¹ ^{§§†}Kehe pana e tééti pa béén, ke e mu ha a meleepiing, be time e uce temehi he na e â lang, be e pwo me bwi nang na a meleepiing.

Nemwo pwo me eânimewé ko ni huô na ta

¹²⁻¹⁴ É pwotii lé céiikewé, ni naî Padué. Be caa pineuhi ni ta pwo tewé, mu ko a nii Kériso. Ke geé caa temehi Caa.

É pwotii lé céiikewé, wogewé ni 'caa' [wogewé na mang a céihi tewé] be geé temehi [Kériso] pana e mu ha atabuhi kon. Éa, e mu ânebun ne ko ati ni naado!

É pwotii lé céiikewé, wogewé ni ewa, be geé mwoiu, ke e kowé a pwooti te Padué. Ke geé caa piwéden koja *Caatana, pana ta nang. Éa, geé caa piwéden kojaeng ^{§§§†}.

¹⁵ ¹⁸ Geé nemwo pwo me eânimewé ko a bwohemwo ¹⁹, ke nina élé pwo a bwohemwo. Hemepie pwo paceli eânimem ko a bwohemwo, ke time uce e kon a pipwoééhe na e âbé mu ko Caa ²⁰. ¹⁶ ²¹ Weengi nina e âbé mu ko [a mulihe pa apulie] pwo a bwohemwo ce:

Tee nimenye me nye pwo nina ta, ne he ni bwo engen denye;

Tee nimenye ko nina nye alihi ko ni naamiinye;

Tee eânimenye ko ni denye, ke genye pipaunukenye mu kon.

§†† 2.7 Ioane 13.34; 2 Ioane 5–6 §† Geé caa te mi temehi—ai Mu ha atabuhi ko a bwohemwo, ai Ha a benaamwon li pipatemehi a Pwooti Wâé, ai He geé tabuhi céihi. Piwien ne ha a 2.24 me 3.11. §†† 2.8 Ioane 1.9; Roma 13.12 §† Junihe wâé—ai coho, be alo lupwo bwopiine a pwooti grek ne éni. §† 2.9 1 Ioane 4.20 §§† 2.10 Roma 14.13 §§† 2.11 Ioane 12.35 §§§ Geme caa neibuhi he pwo cemuhi ni pwooti na e piokelo ko pii wo Ioane he pwo grek. 18 2.15 Roma 8.7 19 A bwohemwo—E pihiwon ko tii pie a bwohemwo wo Ioane ne he ni tii ten, beme a bwopiinen pie, ni apulie na lé tééti Padué, ke ati nina ta pwo bwohemwo na nime ni apulie kon. 20 Time uce e kon a pipwoééhe na e âbé mu ko Caa—ai Time uce eânimem de Caa. 21 2.16 Roma 13.14

Ati ninaa, ke time e uce âbé mu ko Padué Caa! ¹⁷ †O tieden a bwohemwo, ke ati ni naado na nye alihi na eânimenye kon, kehe e o mu dieli mwo wo paceli e pwo nina e pii wo Padué.

Lépwo acubwoni Kériso

¹⁸ ††Ni naîng, caa *ni bénebwéne tan ‡, ke geé caa temehi pie, e o tuie wo pa Acubwoni Kériso. Ke caa élé éni. Hiwon nina lé cubwoni Kériso, é mu ko anaa, na genye temehi pie caa ni bénebwéne tan. ¹⁹ ††Lé wie mu hadeniinye, be time uce ni béénye. Be hemepie te ni béénye, ke lé o te mu konye. Kehe lé engen, beme lé habwii tenye pie time uce ni béénye.

²⁰ ††Kehe wogewé, ke geé caa hegi a *Jenen Iitih. Be e pipégalikewé ††† wo Kériso, pana e iitih, ke e ne tewé. É mu ko anaa, ke geé caa temehi a JUJU. ²¹ Hemepie é pwotii lé céiikewé, ke time uce a bwopiinen pie, time geé uce temehi a JUJU, kehe geé te temehi, ke te tice ace gele celi e âbé mu ko a JUJU.

²² ††He woo pa agele? Wo pana e pii pie wo Iésu, ke time uce wo Kériso [pana e neeng bé wo Padué]. Ke pa Acubwoni Kériso, ke pana e piwotétaa ko Caa me pa Naîni Iésu. ²³ †Be nina lé piwotétaa ko pa Naîni, ke te tie Caa kolé. Kehe wo pana e hegi †† pa Naîni, ke e hegi mwo Caa.

Geé mu ko Kériso

²⁴ Wâé heme e mu mang kowé ni pwooti na geé téne mu ha atabui kon. Hemepie e mu kowé ni pwooti naa, ke geé bo mu he pa Naîni, ke é he Caa. ²⁵ Anaa, ke ali e caa mi pii tenye wo Iésu: a mulie na tice anebwén kon.

²⁶ É tii ninaa lé céiikewé, wonaa mu ko nina lé pip-wohuô tewé. ²⁷ †††Kehe wogewé na geé caa hegi a Jenen Iitih †† mu ko Kériso, ke geé nemwo hane lépwoce apwocémun [celi lé wonaa] be caa e kowé a Jenen Iitih, ke e bo pacémunikewé ko ati ni naado. Ke nina e pi-caa tewé, ke a juuju, kehe time uce a gele. É mu ko anaa, ke geé mu ko Iésu pwohewii ana e patemehi tewé na a Jenen Iitih.

²⁸ É jena, wogewé ni bééng, ke wâé heme geé mu ko Kériso, beme time uce tanim gewé †††, ke me geé † cela kon heme e mwojuia mwo. ²⁹ ††Geé temehi pie e mwomwon wo Kériso, ke wâé mwo heme geé temehi

† 2.17 Mataio 7.21 †† 2.18 Mataio 24.5,24; 2 Ioane 7 † Ni bénebwéne tan—Grek: Ni bénebwéne inetéale. †† 2.19 Apostolo 20.30 †† 2.20 1 Korénit 2.15 ††† E pipégalikewé... Grek: Ke wogewé, ke e mu kowé a adéihi (onction) mu ko ana iitih. A onction

note

††† 2.22 1 Ioane 4.3; 2 Ioane 7 § 2.23 Ioane 5.23; 1 Ioane 4.15, 5.1 †† Hégi—ai Temehi. ††† 2.27 Ioane 16.13 †† A Jenen Iitih—Grek: Onction, pwohewiin ne ha a niide a tii 20. Wieli a Jenen Iitih, ai wieli a pwooti te Padué. ††† Gewé; Geé—Grek: Genye. †† 2.29 1 Ioane 3.10

pie, ati nina lé penem ha a mwomwon, ke lé âbeele mu kon.

Genye naî Padué

³ ††Geé alihi a bwo ubwo na a pwonime Padué Caa ne konye, be e toii konye pie ni naîni. Time e uce temehikenyé na a bwohemwo, be time lé uce temehi Padué.

² ††Ni ju bééng, é jena, ke genye caa naî Padué. Kehe mwo time uce téele habwii ana genye bo mu hen ha ace céiu tan. Kehe genye te temehi pie, hemepie e tuie wo Kériso, ke genye o pwohewiieng, be genye bobé alieng ne ha a bwo weeng. ³ Ke nina lé ucéihi a tan naa, ke lé pipaciitilé, pwohewii a bwo pipaciitieng den.

Paceli e âbeele mu ko Padué

⁴ Tai ni apulie na lé mulie ne he ni ta pwo telé, ke lé caada ni patén de Padué. Be a ta, ke e cubwonihi ni patén den. ⁵ †††Kehe geé te temehi pie e tuie wo Iésu Kériso, beme e pétaabwon ni ta pwo tenye †††. Weeng, ke te tice ta kon, ⁶ ke nina lé mu kon, ke time lé uce tee pwo nina ta. Ke nina lé tee pwo nina ta, ke time lé uce alieng, ke time lé uce temehieng.

⁷ Ni ju bééng, me te tice paceli e péékewé koja a pwaaden: Be wo paceli e tee pwo ana mwomwon, ke mwomwon nang, be wo Kériso, ke mwomwon nang. ⁸ ††Kehe wo pana e tee pwotahinaado, ke e âbé mu ko *Caatana. Be wo Caatana, ke e pwotahinaado mu ha atabui kon. Ke e tuie wo pa *Naî Padué beme e pé-taabwon ni penem de Caatana.

⁹ ††Wo paceli e âbeele mu ko Padué, ke time e uce mulie ha a ta, be e kon wo Padué ²⁰, ke pwocoon me e tee pwo aceli ta, be e âbeele mu ko Padué. ¹⁰ É mu ko anaa, na genye te pitemehi ni naî Padué, ke ni naî Caatana. Be wo paceli time e uce pwo ana mwomwon, ke time uce pa ju naî Padué. Ke te piwien ne mwo ko pana e téeti pa acéihi béén.

Wâé heme pieânimenye tenye

¹¹ ††Weengaa a pwooti na [caa ne tewé, ke] geé caa te téne mu ha atabui kon pie: Wâé heme pieânimenye tenye.

¹² ††Genye nemwo pwohewii Kaina, be pa apulie te Caatana, pana ta nang, ke e taunu pa ciéen. É ko ade na e taunueng? Wonaa mu ko ni bwomu ten na ta, ko-ja pa ciéen na e pwo ana mwomwon. ¹³ ††Geé nemwo

‡ 3.1 Ioane 1.12–13, 16.3 ††† 3.2 2 Korénit 3.18 ††† 3.5 Ioane 1.29; 1 Pétéru 2.22–24; 1 Ioane 2.2 ††† Beme e pétaabwon ni ta pwo tenye... ai Beme e picani te ni apulie, beme o time lé uce pwo celi ta. 18 3.8 Ioane 8.44 19 3.9 1 Ioane 5.18 20 Wo Padué—ai A ju mulip, na e âbé mu ko Padué, ai A junuu Padué, ai A Jenen Iitih te Padué, ai A pwooti te Padué. Grek: Ni âdaanu te Padué. 21 3.11 Ioane 13.34 22 3.12 Genèse 4.8 23 3.13 Ioane 5.18–19

téele, wogewé ni bééng acéihi, hemepie lé téétikewé [ni apulie na ta jélé pwo] a bwohemwo.

¹⁴ †Ke mepwo wogenye, ke genye temehi pie, genye caa wie mu ha amele, me nye â ha *a ju mulip. Be eân-imenye te ni acéihi béénye. Kehe wo paceli e tééti pa béén ††, ke e mwo te mu ha a mele. ¹⁵ †Wo paceli e tééti pa béén, ke pa ataunuhi apulie. Ke geé te temehi pie pa ataunuhi apulie, ke time uce e kon a mulie na tice anebwén kon.

¹⁶ ††Weengi a pwonime Padué: E mele wo Kériso me denye. Ke wâé hemepie nye ne mwo ni mulihenye ne te ni béénye.

¹⁷ ††Hemepie paceli pwo den ne pwo a bwohemwo, ke me e ali pa acéihi béén na tice den, ke me e capuhi a pwonimen ne kon, ke o woté a pwonime Padué ne kon? ¹⁸ ††Ni ju bééng, geé nemwo pwo me ju pieân-imewé tewé cehi ne ha a pwooti, kehe geé habwii ne he ni bwomu tewé.

Wâé ni pwonimenye ne he pwahamiin

¹⁹ É mu ko anaa, ke genye bo temehi pie wogenye ha a *JUJU, ke bo wâé ni pwonimenye ne he pwahamii Padué. ²⁰ Kehe mepie nye niimihi ne he ni pwonimenye pie ta genye, ke wo Padué, ke e daaité koja ni pwonimenye, ke e temehi ati ni naado. ²¹ ††Ni ju bééng, hemepie time uce pipé ne konye ni pwonimenye, ke o time uce mwotikenye ne he pwahamii Padué.

²² Ke e o bo ne tenye ati nina genye ilehi kojaeng, be genye ténédehi ni patén den, ke genye pwo nina wâé ne he pwahamiin. ²³ †Weengi a patén den: Me genye céihi ne he nii pa Naîn, Iésu Kériso, ke me pieânimenye tenye, pwohewii a pihuô ten ne tenye.

²⁴ ††Wo paceli e ténédehi ni patén den, ke e ko Padué. Ke e kon wo Padué. Ke genye temehi pie e konye, mu ko a *Jenen Iitih na e ne tenye.

Lépwo péroféta agele

⁴ ††Ni ju bééng, geé nemwo céihi ne ko ati ni pwooti na geé téné ††, kehe geé tabemi ehi, beme geé temehi celi e âbé mu ko Padué. Be hiwon nina lé pii pie, woélé ni *péroféta na lé â ati pwo a bwohemwo, kehe time uce tai ni ju péroféta. ² ††Woni a bwo temehi na a *Jenen Iitih te Padué: Tai nina lé pii pie wo Iésu, ke pa *Mesia na e âbé ha a éé apulie, ke e kolé a Jenen Iitih te Padué.

† 3.14 Ioane 5.24 †† Wo paceli e tééti pa béén—Grek: Wo paceli tice pipwoééhe kon. † 3.15 Pii Beetih 21.8 †† 3.16 Ioane 13.1; Galat 1.4 †† 3.17 Deutéronome 15.7 ††† 3.18 Cang 2.15–16 ††† 3.21 Ébéru 4.16 § 3.23 Ioane 6.29, 13.34 §† 3.24 1 Ioane 4.13 §†† 4.1 Mataio 7.15; 1 Tésalonik 5.21; 1 Ioane 2.18; 2 Ioane 7 §† Ati ni pwooti na geé téné—ai Ati nina lé pii pie e kolé a Jenen Iitih. Grek: Ati ni jenenaado. §†† 4.2 1 Korénit 12.3

³ ††Kehe mepie time e uce pii wo pa apulie †† pie wo Iésu, ke pa Mesia na e âbé ha a éé apulie, ke e kon a jene pa Acubwoni Kériso, be time e uce âbé mu ko Padué. Ke geé caa te temehi a bwo âbé ten, be é jena ni, ke caa e pwo a bwohemwo.

⁴ ††Wogewé ni acéihi na geé âbé mu ko Padué, ke geé caa piwéden koja ni péroféta agele †††, be pana e kowé, ke te nihe ubwo nang koja [Caatana †††] pana e pwo a bwohemwo. ⁵ ††Woélé, ke lé âbé mu pwo a bwohemwo. É mu ko anaa, ke lé cihe pwohewii ni apulie [na ta jélé] ne pwo a bwohemwo, ke e piténédelé na a bwohemwo.

⁶ Kehe wogenye ¹⁹, ke genye âbé mu ko Padué. Ke wo paceli e temehi Padué, ke e o tabemikenye. Wo paceli time e uce âbé mu ko Padué, ke time e uce tabemikenye. Wonaa a bwo téné temehi na a Jene Padué na *JUJU, ke a jene pa agele.

A pwonime Padué ke a pwonimenye

⁷ Ni ju bééng, genye pwo me pieânimenye tenye, be a bwo pieânime, ke e âbé mu ko Padué. Ke ni apulie na pieânimelé telé, ke lé âbé mu ko Padué, ke lé temehi Padué. ⁸ Kehe wo pana time uce eânimen de pace céiu, ke time e uce temehi Padué, be wo Padué, ke a pipwoééhe [ke ubwo a pwonimen]. ⁹ ††Weengi a bwo eânime Padué tenye: E nebé pa Naîn na te céiu nang, ne pwo a bwohemwo, beme nye mulie mu kon. ¹⁰ ††A pwonime naa, ke time e uce âbé mu ko a bwo eânimenye ko Padué, kehe e âbé mu ko a bwo eânime Padué konye, ke e nebé pa Naîn me e *âpwailo beme pétaabwon ni ta pwo tenye.

¹¹ Ni ju bééng, hemepie wonaa a bwo eânime Padué konye, ke wâé hemepie pieânimenye konye. ¹² ††Te tice paceli e ali Padué, kehe mepie pieânimenye konye, ke e konye wo Padué, ke tidikenye ati a pwonimen ke a pipwoééhe ten ²³.

Genye mu ko Padué ke e mu konye

¹³ ††Genye temehi pie genye mu ko Padué, ke e mu konye, be e ne tenye a Jenen Iitih ten. ¹⁴ Ke genye caa alihi ²⁵, ke *pajuujuhi pie e caa nebé pa Naîn wo Caa, beme e *celuimi a bwohemwo ati.

¹⁵ Wo paceli e pii beetih pie, wo Iésu ke pa *Naî Padué, ke e ko Padué, ke wo Padué ke e kon. ¹⁶ Ke

§† 4.3 1 Ioane 2.18 §† Pa apulie—ai Pa jenenaado. §†† 4.4 Mataio 12.29; 1 Ioane 5.4–5 §†† Ni péroféta agele—ai Ni jenenaado naa—ai Lépwo agele naa. §†† Caatana—ai Pa Acubwoni Kériso. Grek: Pana e mu pwo a bwohemwo. 18 4.5–6 Ioane 8.47, 15.19 19 Wogenye—ai Wogeme (wo Ioane me ati ni apostolo na lé pacémuni ni apulie ko a juuju 20 4.9 Ioane 3.16 21 4.10 Roma 5.8–10; 1 Ioane 2.22 4.12 Ioane 1.18 23 Tidikenye ati a pwonimen ke a pipwoééhe ten—Grek: Hején ne konye a pipwoééhe ten. Piwien ne he ni niide a tii 17 ke 18. 24 4.13 2 Korénit 1.22; 1 Ioane 3.24 25 Genye caa alihi—ai Geme caa alieng (wo Ioane me lépwo apostolo na lé ali Iésu he e mulie ne pwo bwohemwo).

genye te temehi a pwonime Padué ne konye, ke genye céihi ne kon.

Be wo Padué, ke a pipwoééhe [ke ubwo a pwonimen]. Ke wo paceli e mulie ha a pipwoééhe, ke e ko Padué; ke wo Padué, ke e kon. ¹⁷ Ke me genye mu ko Padué, ke tidikenye ati a pwonimen ke a pipwoééhe ten, ke o time uce mwotikenye ha a Tan na e bo tauti ni apulie hen. Be a bwo mulie tenye pwo a bwohemwo ce, ke pwohewii a bwo mulie te Iésu. ¹⁸ Te tice mwoti ne ha a pipwoééhe, kehe e pwo me tieden a mwoti na a ju pipwoééhe. Hemepie mwotikenye, ke wonaa be genye ucéihi ace kuhinaado tenye †. Ke wo paceli mwotieng, ke te time e uce tidieng ati a pipwoééhe [te Padué].

Geé mulie ne ha a pipwoééhe

¹⁹ Ke wogenye, ke eânimenye te Padué, be weeng pana mi eânimen denye. ²⁰ Hemepie e pii wo pace céiu pie, eânimen de Padué, ke me e tééti pa acéihi béén, ke wo panaa, ke pa agele. Be hemepie time uce eânimen de pa béén na e alieng, ke e bo woté ko ace bwopwonon me eânimen de Padué, na time e uce alieng? ²¹ ††Kehe weengi a patén na e ne tenye: *Wo paceli eânimen de Padué, ke wâé heme eânimen mwo te pa béén.*

Céihi ne ko pa Naî Padué

5 ¹Wo lépwona lé céihi pie wo Iésu ke pa *Mesia, ke lépwona naî Padué. Ke wo paceli eânimen de Padué Caa, ke o eânimen de ati ni naî Padué. ² Genye temehi pie eânimenye te ni naî Padué, heme eânimenye te Padué, ke me genye ténédehi ni patén den. ³ ††Be a pwonimenye ne ko Padué, ke me nye ténédehi ni patén den. Ke time uce téé ne konye ni patén den. ⁴ Be tai ni naî Padué, ke lé piwéden koja a bwohemwo, mu ko a céihi telé [ne ko Iésu Kériso]. ⁵ He woo paceli e piwéden koja a bwohemwo? Wo pana e céihi pie wo Iésu, ke pa *Naî Padué.

Cié jélé na lé pajuuju pa Naî Padué

⁶ ††Te wo Iésu Kériso kuti na e âbé imi a tabe ke a cewéle ††. Time uce a tabe cehi, kehe a tabe me a cewéle. Ke e pajuujueng na a *Jenen Iitih, be a Jenen Iitih, ke a *JUJU. ⁷ É mu ko anaa, na cié jélé na lé paju-

ujueng ††: ⁸ ^{5A} Jenen Iitih, ke a tabe ke a cewéle ††. Cié jélé, ke lé te piténéle.

⁹ ††E patemehi a juuju ko pa Naî wo Padué, ke mepie genye hegi ana lé pii ne ni apulie, ke wâé heme genye hegi ana e pii wo Padué, be piwéden. ¹⁰ ††Be, me genye céihi ne ko pa Naî Padué, ke genye temehi ne ha a pwonimenye pie, a juuju ana e pii wo Padué ne kon ††.

Kehe wo paceli time e uce céihi ne ko Padué, ke e pii pie pa agele wo Padué, be time e uce céihi ne ko ana e pii wo Padué ne ko pa Naî.

¹¹ Be weengi a *JUJU. E ne tenye wo Padué a mulie na tice anebwén kon. Ke a mulie naa, ke e he pa Naî. ¹² ††Ke wo pana e kon wo pa Naî, ke eten a mulie. Kehe pana time uce e kon wo pa Naî, ke time uce eten a mulie.

É tii beme mang a céihi tewé

¹³ ††É tii ninaa lé céiikewé, wogewé na geé céihi ne he nii pa Naî Padué, beme geé temehi pie etewé a mulie na tice anebwén kon. ¹⁴ ††E pelenye a céihi na nihe ubwo: Be hemepie genye ileeng ko ace céiu naado âcehi ana nimen kon, ke e o te ténékenye. ¹⁵ Ke hemepie genye temehi pie e te ténékenye, ke ce naado celi genye ilehi, ke genye temehi pie e caa ne tenye.

Time nye uce tee pwo nina ta

¹⁶ ††Hemepie geé ali pa acéihi bééwé heme e pwo aceli ta, celi time e uce pééeng nge ha a mele [dieli mwo] ke wâé heme geé pwoiitih me den. Ke e o ne ten *a ju mulip wo Padué. Kehe pwo a ta na e péékenye nge ha a mele [dieli mwo] ††. Ke time é uce pii pie, me geé pwoiitih ne ko [pana e tee cuwo ko pwo] anaa. ¹⁷ Tai ni naado na time uce mwomwon, ke ni ta pwo tenye. Kehe time uce tai ni ta pwo tenye na lé péékenye nge ha a mele [dieli mwo].

¹⁸ ¹⁸Genye te temehi pie wo paceli e âbeele mu ko Padué, ke time e uce tee pwo ana ta. Ke time uce jan me e ti kon wo *Caatana, pana ta nang, be e te cileeng wo pa Naî Padué.

††† Ni béé tii iitih he pwo grek, ke lé pii pie: ⁷ Be cié lépwona lé pipajuujuhi ne he miiden: wo Caa, ke a Pwooti, ke a Jenen Iitih. Ke lépwona apulie na te céiu: ⁸ Ke cié lépwona lé pipajuujuhi ne pwo bwohemwo: a Jenen Iitih, ke a tabe, me a cewéle. Ke lé piténéle wo lépwona cié jélé naa. § 5.8 Ioane 15.26 †† A tabe ke a cewéle—A ocine mwo ko a bwo pipuukenyé, me a tabe megele na nye ūdu ha a Caanilo, beme paniimih a bwo mele ten. ††† 5.9 Ioane 5.32–37 †† 5.10 Galat 4.6 ††† Genye temehi ne ha a pwonimenye pie, a juuju...ne kon—Grek: Ke e mu konye a pajuujuhi kon. †† 5.12 Ioane 3.36 †† 5.13 Ioane 20.31 ††† 5.14 Ioane 14.13; 1 Ioane 3.21–22 ††† 5.16 Mataio 12.31 ††† A ta na e péékenye nge ha a mele [dieli mwo]—Wieli me a bwo cuwo ko ne jéinye ne ko Kériso (omehi a niide a tii 12), me a bwo cuwo ko muhi tenye me nye pipwoééhe ni béénye (omehi 1 Ioane 3.14). A mele naa, ke wieli a mele dieli mwo, ai wieli a bwo pwotahi na a bwo mu tenye me Padué, ai wieli a mele ha a éé apulie. 18 5.18 1 Ioane 3.9

† 2e phrase—ai A bwo mwotikenye, ke pwohewiin heme nye pwocuhinaado. †† 4.21 Maréko 12.29–31 † 5.1 1 Ioane 4.15 †† 5.3 Ioane 14.15,23–24 †† 5.6 Ioane 1.29–34 ††† Tabe ke a cewéle—Tabe: Ocine ko a bwo âbeele te Iésu, ai a bwo puueng. Cewéle: Ocine ko a bwo mele ten.

¹⁹ Genye te temehi pie wogenye, ke ni naî Padué, ke-he a bwohemwo ati, ke e mu haahi a junuu Caatana.

Genye temehi Padué

²⁰ Genye te temehi mwo pie, e âbé wo pa Naî Padué, beme e ne tenye a bwo temehinaado, beme genye temehi Padué na [te céiu nang ke] *JUUJU*. Ke genye tai mu kon, be genye mu ko pa Naîn, Iésu Kériso. Be

weeng Padué na e *JUUJU*, ke [e ne tenye] a mulip na tice anebwén kon.

²¹ Ni ju bééng, wâé heme geé pipwocilekewé ne ko ni déme duée: [ati ni naado na lé pé atebwo te Kériso ne he ni pwonimewé] †!

† *Wieli a bwopiinen mwo pie, Geé tahi taabwon a ta na e he ni pwonimewé, ai Geé tahi taabwon ni cémun na time e uce paciiti Kériso. Omehi mwo a Déménaado (idole) ne ha a Niinaado (Vocabulaire) ha anebwén ko a tii.*

2 Ioane

te

Atabuhi ko a tii

Woo na e tii a tii ce?

Wo Ioane. Omehi Atabuhi ko a tii .

E tii éniile?

Ha awieme a jo 85 me 100.

E tii me dee?

Te ê céiu toomwo na pii kon pie , a ocine ko lépwo acéihi ha a céiu duaan. Wieli lépwo acéihi na lé mu pitapitilé ne pele Gaius. (Omehi Atabuhi ko a tii .) Be é ha a benaamwon naa, ke hiwon ni apulie na lé pwotahi ne ko ni acéihi ne ko Kériso. É mu ko anaa, na time uce nimen me e pipatemehi ni ju niilé ne ha a tii.

É ko ade na e tii?

E tii a bécéiuhe tii ten, , he e paténe lépwo acéihi ko lépwona lé pacémunilé ko ni pwooti na gele. Ke e tii mwo, be wo lépwonaa, ke lé ko piengen mu ha a céiu duaan, nge ha a céiu duaan, beme lé pipwohuô te lépwo acéihi (1.10–11).

Ade ace âne a tii ce?

Lupwo pwooti na junaado ne ha a tii ce (me ati ni tii te Ioane), ke a , me a . A , ke e âbé mu ko Kériso me a pwooti kon (1.1–4). Omehi mwo a ne ha a Niinaado ha anebwén ko a tii. Heme nye mulie ne ha a , ke o habwii ne ha a pipwoééhe tenye (1.5), ke genye o temehi lépwo apwocémun na lé pipwohuô, ke time genye o uce picani telé ne he ni penem delé (1.10–11).

A bwomune a tii 2 Ioane

Pipwobwocu

Mulie ha a me a pipwoééhe

Lépwo apipune agele

Bépinelé

Pipwobwocu

¹ Tii te [Ioane] pa ukéiu ne ha a céihi, ne te ê toomwo na e pipégalieng wo Padué, me ni naïn †. Te nihe êanimung dewé, ke time uce woéo cehi, kehe tai ni na lé temehi a *JUJU. ² Êanimeme tewé, wonaa mu ko a JUJU na e konye, na e o te mu konye dieli mwo.

³ Me e mu pelenye a *pipwoééhe tice ja kon, ke a péém, ke a *adéihi, mu pele Padué Caa, me Iésu *Kériso pa Naïn, ne ha a JUJU ke a pipwoééhe!

† É toomwo...me ni naïn—A puco te ni acéihi ha a céiu duaan. Omehi Atabuhi ko a tii.

Mulie ha a JUJU me a pipwoééhe

⁴ ††Te nihe ubwo a pipwodéén dong he é too ni bée naïm, na lé engen ha a JUJU, âcehi a patén na e ne tenye wo Caa. ⁵ †É jena, go êje, ke weengi ana é ilehi: Me pieânimenye tenye! Time uce a patén na mwo coho na é tii me dem, be ana genye caa te hegi ha atabuhi kon ††. ⁶ Be a pipwoééhe, ke me genye âcehi ni

†† 1.4 3 Ioane 3‡ 1.5 1 Ioane 2.7 †† Ha atabuhi kon—Wieli a bwopiinen pie He géé tabuhi céihi, ai Ha atabuhi ko a bwohemwo, ai Tabuhi ha a benaamwon na pipatemehi a Pwooti Wâé.

patén de Padué. Wonaa a patén na caa picaa tewé ha atabuhi kon: *Geé pwo me pieânimewé tewé†!*

Lépwo apipune agele

⁷ †Hiwon ni apulie na lé pipwohuô, na lé âbé ne pwo a bwohemwo, ke muhi telé me lé mwomwohi pie wo Iésu Kériso [ke pa *Mesia na] e âbé ha a éé apulie. Woélé ni apipwohuô ke ni acubwoni Kériso.

⁸ Geé pipwocilekewé, beme time geé uce patieden ni acehi ni penem dewé ‡, kehe me geé hegi a cuhin na hején.⁹ Wo paceli e piâ ité koja a pwaaden, ke me time e uce mu ko ni cémun de Kériso, ke te time uce e kon wo Padué. Kehe wo paceli e mu ko ni cémun de Kériso, ke e kon wo Caa me pa Naîn.

† *Geé pwo me pieânimewé tewé—Grek: Mulie ha a pipwoééhe.*
 †† 1.7 1 Ioane 4.1–3 ‡ *Penem dewé—ai Penem deme, ai Penem denye, ne he ni béé tii iitih he pwo grek ânebun.*

¹⁰ Mepie pwo paceli e âbé ne pelewé, ke me te tieden kon a cémun de Kériso, ke geé nemwo hegieng ne pelewé, ke geé nemwo pwobwocu ten †. ¹¹ Be wo pana e hegieng, ke e hegi mwo ni naado na ta na e pwo.

Bépinelé

¹² Hiwon ni naado na me é pii tewé, kehe time uce nimung me é tii ne he tii. Be é niimihi pie é bo âdé ne pelewé, ke me genye picuhe ibu, ne ha a pipwodéén na hején.

¹³ Lé niimiko ni naî ê béém ‡ na e pipégalieng wo Padué, ke lé pwobwocu tem.

†† *Geé nemwo pwobwocu ten—Ai, Geé nemwo pamwoiueng ne ha a penem den.* ‡† *Ni naî ê béém—A puco te ni acéihi ne ha a du-aan na e mu hen wo Ioane. Omehi note*

3 Ioane

te

Atabuhi ko a tii

Woo na e tii a tii ce?

Wo Ioane. (Omehi Atabuhi ko a tii .)

E tii éniile?

Ha awieme a jo 85 me 100.

E tii me dee?

Te pa céiu apihuô te ni acéihi, na pii kon pie Gaïus. Wieli pace béé lépwo apulie na cié jélé na cihe kolé ne ha a Tii Iitihi. Ai, wieli pace apulie celi e pihuô te ni acéihi ne Pergame.

É ko ade na e tii?

Pwo pa céiu apulie na pii kon pie Diotrêfe na te junihe ta nina e pwo ne hadenii ni acéihi. Muhi ten me e piténédehi ni pihuô te Ioane, be pa upwonimen. Ke e pawie lépwo béé apipune mu hadenii ni acéihi (1.9). Kehe icehi ana time uce wonaa ni bwopwonen de Gaïus, be pa apulie na wâé nang. Ke e pwotii nge céiieng wo Ioane, beme e pamwoiung, beme e te cuwo ko pwo ana wâé. Ke e paténeeng ko Diotrêfe.

Lé niimihi wo lépwo béé dotéén ko Tii Iitihi pie, wo Ioane, ke e tii ni tii ten na cié ha a benaamwon na céiu, ke e ne te Démétrius (1.12), beme e ne te Gaïus me ni acéihi béén:

- 1 Ioane—a pune te ati ni acéihi ha a province Asia (ha amu Turki jena).
- 2 Ioane—a tii te Gaïus me ni acéihi na lé mu pitapitilé ne pelen (ke time e uce pii ni niilé, be koli e bo pwotahi ne kolé).
- 3 Ioane—a tii te Gaïus cehi, beme e habwii ten Démétrius, pa apé tii, ke me e paténeeng mwo ko Diotrêfe.

Ade ace âne a tii ce?

Cié ni apulie hen, na me nye pé ce denye mu kolé:

Gaïus, be a mulihen, ke wâé ke mwomwon, ke e hegi ehi ati ni apulie te Padué, na lé tuie ne ha amu ten (1.3,5)

Démétrius, be pa apulie na e engen ha a juuju (1.12)

Diotrêfe (omehi ni niide a tii ânebun), be e pwo nina ta, ke genye nemwo pipwohewiieng!

Wo Ioane, ke e pii me wâé lépwo ju eabwé te Padué na lé engen mu ha a céiu duaan, ke me lé â ha a céiu duaan, beme lé â pipatemehi a Pwooti Wâé, ke me lé pamwoiu lépwo acéihi lang. A penem denye, wogenye ni naî Padué, me nye hegilé ehi me picani telé (1.6–8).

Wo lépwonaa, ke time uce lépwo apwocémun na e pii me ta jélé ne ha a 1.7. Nye pineité lupwo pubu apulie naa, âcehi a pwooti na e ha a 1.8. Be lé mu ko ni pipune te Kériso ne ni béén; kehe ni béén, ke lé piâ ité kojan.

A bwomune a tii 3 Ioane

Pipwobwocu

Genye hegi ehi ni béénye coho

E pii me ta Ioane wo Diotrêfe

Bépinelé

Pipwobwocu

1 †Woéo [Ioane] pa ukéiu [ne ha a céihi] ke é pwotii lé céiiko, go Gaius, be te nihe eânimung dem ††.
 2 Pa ju bééng, é cihe beme wâé ne kom ati ne he ni pwaadeniim, ke me pepule go ne ha a éém, ke é ne ha a jenem. 3 †Te junihe piwâénimung, he lé tehenebé ni béénye acéihi, ke lé uti a mulihem na mwomwon, âcehi a *JUJU. 4 Be te tice aceli é pipwodéén kon, celi ubwo kojan heme é téne pie lé engen ha a JUJU ni naîng ne ha a céihi ††.

Genye hegi ehi ni béénye coho

5 Pa ju bééng, [é te temehi pie] go penem ha a JUJU, be go pipwopweehi ne ko ati ni acéihi béénye † ne pelem, ke é ne mwo ko ni béénye coho [na lé tuie ne ha amu tem]. 6 ††Ni apulie naa, ke lé uti te lépwo acéihi a pwonimem kolé.

Wâé heme go bo picani telé ne he ni pwaadeniilé, beme lé panebwénihi ni penem †† delé. Be wâé te Padué heme nye wonaa a bwo picani tenye. 7 §Be lé engen ne he nii Iésu *Kériso, be te tice celi lé pé mu ko nina tice céihi telé. 8 É mu ko anaa, ke wâé heme genye hegi ehi ni apulie naa, beme genye tai penem ibu ne ko a bwo patemehi na a JUJU.

† 1.1 Apostolo 19.29; Roma 16.23 †† Nihe eânimung dem—ai Te junihe eânimung dem mu ko a JUJU † 1.3 2 Ioane 4 †† Ni naîng ne ha a céihi—Grek: Ni naîng. (Be wo Ioane na e pwo me lé céihi ne ko Iésu). †† Ni acéihi béénye—A bwopiinen ni pie, lépwona lé âbé beme lé pacémuni ni acéihi. ††† 1.6 Tit 3.13 ††† Penem—ai Engen. § 1.7 1 Korénit 9.12

E pii me ta Ioane wo Diotrèfe

9 Ânebun, ke é pwotii † nge céii lépwo acéihi, kehe time e uce hegiéo wo Diotrèfe. Be pana nimen me piubwo nang mu hadeniwé. 10 É mu ko anaa, na mepie é tehene lé pelewé, ke é o pii beetihi tewé ni penem na e pwo na time uce wâé: Be e te nihe pipiikeme, ke time e uce hegi mwo ni apulie te Padué na lé tehene lé pelewé. Ke nina nimelé me lé hegi ni béénye naa, ke e cubwonilé, ke e pawielé mu ha a *puco te ni acéihi!

11 ††Pa ju bééng, go nemwo âcéi [nina lé pwo] nina ta, kehe go âcehi nina wâé. Be wo pana e pwo ni penem na ta, ke time e uce temehi Padué. Ke wo pana e pwo ni penem na wâé, ke e âbé mu ko Padué.

12 Ke heme pwo é ne ko Démétrius, ke lé tai piieng me wâé ne ni apulie ati, be e pajuujueng ni penem den †. Ke wogeme mwo. Ke go te temehi mwo pie nina game uti, ke ni juuju.

Bépinelé

13 ††Hiwon ni naado na me é pii tem, kehe time uce nimung me é tii ne he tii. 14 Be é céihi pie, time uce bwolihi, ke genyu o caa pitookenyu mwo, beme genyu picihe ibu.

15 Me e mu kom a péém! Lé pwobwocu tem ni béém [na élé éni]. Ke go bo muko pétaapwo pwobwocu te ati ni béénye na élé pelem.

§† Ânebun, ke é pwotii—A céiu tii te Ioane, na time e uce mu ha a Tii Iitih. ††† 1.11 1 Ioane 3.6–10 §† Ni penem den—Grek: A juuju. ††† 1.13 2 Ioane 12

Jude

Atabuhi ko a tii

Woo na e tii a tii ce?

Wo Jude, pa ciée Iésu me Cang. (Omehi a 13.55.) Time uce wo Jude, pa céiu apostolo (omehi 1.17–18).

E tii éniile?

Ha awieme a jo 64 me 67, ânebuhe a bwo tanahi na a pwomwo ubwo Iérusaléma.

E tii me dee?

Wieli é ne te lépwo acéihi ne ko Iésu, na te lépwo Juif mwo. Be hiwon ni pwooti na e tii na e âbé mu ha a Élele Iitihî Ânebun .

É ko ade na e tii?

Ha a benaamwon na e tii, ke hiwon lépwo apwopune na lépwo agele, na lé pwo me lé piâ ité wo lépwo acéihi koja a pwooti na juuju ko Iésu. Be lé pii pie, wo Iésu, ke time uce Padaame, ke lé pacémuni ni apulie ko a bwo mulie na mwiihi. Ke e tii wo Jude, beme e paténe lépwo acéihi, beme time lé uce âchehi ni cémun naa.

Ade ace âne a tii ce?

A céihi tenye, ke time e uce ne tenye a mwomwon beme nye mulie hauli. Be wo Padué, ke e ne a kuhinaado na te junihe ubwo te lépwona lé wonaa. Genye nemwo âcéi ni apulie na lé pii pie, me nye wonaa. Wâé heme nye mulie ne ha a céihi tenye, na bahi ne pwo a paan na mang. Ke genye pébé ni béénnye, heme lé piâ ité koja anaa. Hiwon ni pwooti ne ha a na piwien me ni pwooti na e ha a .

A bwomune a tii te Jude

Pipwobwocu

Lépwo apwopune na lépwo agele

Ni cémun me kuhinaado telé

Lé pwotahi a puco tewé

E mi pii a kuhinaado telé wo Énoka

Bénebwéne pwooti

Pipwobwocu

¹ Woéo Jude, pa eabwé te Iésu *Kériso, ke pa âjiéne Cang, ke é pwotii lé céikewé, wogewé ni apulie na e todekewé wo Padué. Ke e pipwoééhewé, ke wo Iésu Kériso ke e cilekewé. ² Wâé heme te ubwo ngen ne pelewé ati a pipwoééhe ke a péém de Padué.

Lépwo apwopune na lépwo agele

³ Ni ju bééng, ânebun ke nimung me é pwotii lé céikewé, ko *a ju mulip na tai e konye ati. Ke [heme é

† 1.1 Mataio 13.55

téne a jepule ko ni naado na e tuie ne pelewé] ke é te pwome tii, beme é pamwoiukewé, me geé te nihe pwopa beme geé pwopahi a ju céihi tenye. Be a céihi na te océiu Padué ko ne tenye, wogenye ni apulie ten.

⁴ ††Be [é téne pie] lé êjele bé céikewé ni apulie na time lé uce paciiti Padué. Ke lé bitehi me ta a pwooti ko a *pipwoééhe tice ja kon den, beme lé pwo ni huô na mwiihi ko ni éélé. Ke muhi telé ko Iésu Kériso, Padaame henye, ke pa apihuô tenye, na te ju céiu nang. Kehe caa bwolihi na tii ne he ni *tii iitihî [pie o te junihe ubwo] a kuhinaado te ati lépwona lé wonaa!

†† 1.4 Galat 2.4; 2 Pétéru 2.1

⁵ †Geé temehi ehi ana é bo pii tewé, kehe nimung me é paniimihi tewé pie:

Wo Padaame ††, ke e caa *celuimi a bele ten, *Is-araéla, mu *Aigupito. Kehe icehi ana ni béén mu kolé, ke muhi telé me lé piténdeeng, ke e pwo me lé mele.

⁶ †Ke a céiu mwo, li e ne te ni *âcélo a pihuô [na te junihe ubwo wo Padué]. Kehe icehi ana [lé niimihi] ne ni béén mu kolé [pie te time uce jan] ke lé engen mu-lang. Ke é alecehen, ke e cielé wo Padué, ke e nelé ha a duaan na te nihe melepiing hen, beme lé pwokarépu, ucéihi a Tan na e bo tauti a bwohemwo hen.

⁷ †Ke a céiu mwo, ke ni apulie mu *Sodome me Gomore, me ni amu aujenilu, ke lé pwo ni huô na mwiihi ko ni éélé. Ke [wo Padué, ke e pwo me] cinilé ha a miû na tice anebwén kon, beme a ine a kuhinaado [te lépwona time lé uce piténdeeng].

Lé pwotahi a puco tewé

⁸ Ke lé wonaa wo lépwo apipune naa, he lé tuiebé pelewé. Be mwiihi ni huô telé. Ke lé âcehi ni niûlé, ke muhi telé me lé téne ni pihuô te Padaame ††, ke lé piciheta ne ko ni âcélo na te junihe ubwo *a wâé telé †††.

⁹ †††Mepwo é ne ko Michel, pa daame he ni âcélo, ke time e uce niimihi pie e pii me ta *Caatana, he lu pipééle pahi a déhi *Moosé. Be e te ju pii ten cehi pie: «Me e pwocuhinaado tem wo Padaame ††»

¹⁰ ††Kehe icehi ana ni apulie ce, ke time uce piwâ jélé, me lé pii me ta ni naado [na iitih] na time lé uce temehi. Be lé pwohewii ni wota apiaba na te tice pwonimelé, ke lé âcehi nina te nimelé kon na e pébé a kuhinaado telé.

¹¹ †††O ubwo ace kuhinaado telé!

Be lé âcehi a pwaadeni Kaina,
ke lé hane mwani
pwohewii Balaam.
Lé pwopa [ne ko Padué]
pwohewii Koré,
ke lé o mele ati!

† 1.5 Exode 12.51; Nombres 14.29–30 †† Wo Padaame—Wo Iésu, ai Wo Iosua ne he ni béé tii iitih he pwo grek ânebun. † 1.6 2 Pétéru 2.4 †† 1.7 Genèse 19.1–25; 2 Pétéru 2.6,10 †† Pihuô te Padaame—ai A pihuô te ni apulie, ai A pihuô te ni âcélo. ††† Ni âcélo na junihe ubwo a wâé telé—Omehi a note ††† 1.9 Daniel 10.13,21, 12.1; Zakari 3.2; 2 Pétéru 2.11; Pii Beetih 12.7 † É ne ha a jepule te lépwo Juif, ke wo Padué, ke e nebé Michel, pa daame he lépwo âcélo, beme e neduwo Moosé, he li e mele. Kehe wo Caatana, ke e pii ten pie, te tice mwomwon den me e pwo, be li e taunu pa céiu apulie wo Moosé (Exode 2.12), ke e pii wo Caatana pie den a éé Moosé. Kehe time e uce pihooni Caatana wo Michel he lu ko picihé. †† 1.10 2 Pétéru 2.12 ††† 1.11 Genèse 4.7–8; Nombres 16.1–35; 2 Pétéru 2.15; 1 Ioane 3.12

¹² ††Lé pwotahi a puco tewé heme geé pwo a wiinaado te Padaame. Be lé te junihe wiinaado me ûdu, ke lé te piniimilé cehi, ke time uce tanim jélé kon.

Woélé, ni nii
na cuutéélé na a dan,
kehe te tice ute hen.

Woélé, ni acuwo na tice acehin,
be mele ni miin
ke mele ni waan
ke tawii taabwon.

¹³ Woélé, ni pihijé
na lé te ju ne cehi a buloop;
ke ûde ta he nen †††.

Woélé, ni ceni na lé tête hauli,
na o tahlilé ne ha a melepiing
na tice anebwén kon.

E mi pii a kuhinaado telé wo Énoka

¹⁴ ††Te é mu kolé mwo, na e mi pii ânebun wo Énoka, pa bé7 he niide apulie tabuhi mu ko *Adamu, pie:

«E o caa tuie wo Padaame
me ni âcélo iitih ten
na te junihe hiwon jélé.

¹⁵ E âbé tauti ati ni apulie.
E bo pwocuhinaado
te nina lé téétieng,
mu ko ati ni pwooti na ta
na lé pii ne kon ††.»

¹⁶ Wonaa ni apulie na time uce piwâénimelé, ke lé tee cuwo ko pwohuu [te Padué]. Lé âcehi nina nimelé kon na ta. Ubwo ni pwolé, ke lé tee pipii delé, beme lé pipwoun delé. Ke lé pipaunu ni apulie beme lé pwo nina nimelé kon.

Bénebwéne pwooti

¹⁷ Kehe wogewé ni ju bééng, ke geé pipaniimihi ni pwooti na lé caa mi paténekenye kon ne ni *apostolo te Padaame Iésu Kériso. ¹⁸ ††Be lé pii pie: «Lé o bo tuie ne kowé he *ni bénebwéne tan wo lépwo apulie na time lé uce paciiti Padué. Ke lépwo apihota, ke lé te ju engen cehi ne ko nina nimelé kon na ta.»

¹⁹ Woélé na lé pwo me [nye pipééle, ke] me nye pipiden. Be lé te ju âcehi ni bwo niimihinaado te pa apulie, be time uce e kolé a *Jenen Iitih.

²⁰ †††Kehe wogewé ni ju bééng, ke geé pipamwouiukewé, beme ubwo gewé da ne ha a ju céihi ††† [ne ko Padué] ke geé tee pwoiitih âcehi a pihuô na e ne tewé na a Jenen Iitih. ²¹ Geé tee mulie ha a pipwoééhe

†† 1.12 2 Pétéru 2.13,17 ††† Úde ta he nen—Grek: Mwiihi ni bwomu telé. †† 1.14 Genèse 5.18,21–24 †† Dernière phrase—Geme caa neibuhi he pwo cemuhi ni pwooti na e piokelo ko pii he pwo grek. ††† 1.18 2 Pétéru 3.3 ††† 1.20 Kolosé 2.7 ††† A ju céihi—Grek: A céihi na te junihe iitih.

te Padué, he geé mwo ko ucéihi a tan na e bo ne tewé hen a mulie na tice anebwén kon wo Padaame Iésu Kériso, pana e pipwoééhenye.

Geé pipwoééhe nina wahin a céihi telé

²² Geé pipwoééhe ni apulie na wahin ni céihi telé.
²³ †[Ke mepwo nina lé â ité koja a pwaaden] ke geé céilé bé koja a miû. Ke geé pipwoééhe nina lé pwo nina ta, kehe geé pipwocilekewé, be koli geé pwo me alili gewé mu ko ni bwomu telé na mwiihi ††.

† 1.23 Zakari 3.2; Pii Beetihi 3.4 †† Dernière phrase—Grek: Ke geé pipwoééhe ni béén, kehe geé pwo me mwotikewé mwo, he geé mwiihi ni epwén na tooli ko [ni bwomu ha] a éé apulie.

Nye pipwoun de Padué!

²⁴ Te jan ne ko Padué me e cilekewé, beme time geé uce tupwo ne ha a ta. Ke e pwo me te tice ta pwo tewé, beme geé cuwo he pwahamiin, ne ha a wâé ten na junihe ubwo, ke é ne ha a pipwodéén. ²⁵ ‡Be pa *aceluimikenye na te céiu nang. Wâé heme nye pipwoun den ne he nii Iésu Kériso, Padaame henye ††! Be e mu pelen a wâé, ke a bwo ubwo nang, ke a junuun, ke a pihuô, mu ha atabuhi kon, é jenea, ke é dieli mwo!

Wâé heme wonaa! Amen!

‡ 1.25 Roma 16.27; 2 Pétéru 3.18 †† 1re & 2e phrases—ai Be weeng Padué na te céiu nang, na e pamulipikenye, ke e pipwaadeni in bé wo Padaame henye, Iésu Kériso. Ke wâé heme nye pipaunung!

Pii Beetihi

Ni naado na habwii te Ioane

Atabuhi ko a tii

Woo na e tii a tii ce?

Wieli wo Ioane, pa apostolo. (Omehi Atabuhi ko a tii .) Wo lépwo Roma, ke lé neeng he karépu ne pwo a één Patmos (na e mwonuhi a amu Turki jena). Ke e paciheeng nelang wo pa céiu âcélo te Padué, ke e habwii ten ni naado na o bo tuie.

E tii éniile?

Ha awieme a jo 95 me 96 alecehe Iésu Kériso. É ha a benaamwon naa, ke e daame he lépwo Roma wo Domitian. Ke e te junihe pwotahi ne ko ni acéihi ne ko Iésu.

E tii me dee?

Te ni acéihi ne ha a province Asia (ha amu Turki jena). Hiwon mu kolé na pinekepé ne telé ko a bwo pwotahi ne kolé. Kehe time e uce téele mwojuia cemwo wo Iésu ne ha a bwo piwéden den, pwohewii ana e caa mi pii telé.

É ko ade na e tii?

E pamwoiu lépwo acéihi na te junihe pwotahi ne kolé pie, wo Iésu, ke e o te piwéden koja ati lépwona lé cubwonieng, woélé me Caatana, pa caa telé. Ke e o tee mu dieli mwo a Mwametau tenye me Kériso.

Ade ace âne a tii ce?

Wo Ioane, ke e tii a pwooti te Iésu te ni 7 puco te ni acéihi ne Asia, beme e paténelé me pamwoiulé (pwahamii tii 2—3).

É alecehen, ke e tii ni naado na hiwon, na o bo tuie, na e habwii ten wo pali âcélo. Be e alihi a pa na ubwo te Caatana me ni apulie ten na lé pwopa ne ko Iésu me ni apulie ten.

- Ke o piubwo ngen a ta, ke o te junihe hiwon lépwoceli lé o ne jéilé ne ko Padué. A pwomwo ubwo Babulona na pii kon pie 'É toomwo pwopwaaden' (pwahamii tii 17—18), ke a ocine ko a pwomwo ubwo Rome, ke a ocine mwo ko ati ni apulie pwo bwohemwo na upwonimelé, ke lé cubwoni Padué me pwotahi ne ko ni apulie ten.
- Wo Caatana, ke a ocine kon, ke a dragon, ke e bo junihe pwotahi ne ko ni apulie te Kériso. (A ocine kolé, ke é toomwo ha a pwahamii tii 12.) E pwotahi ne kolé dieli e â taunu ni béén. Kehe icehi ana wo Padué, ke e bo wéihi ni jenelé.
- Lu bo cuwoda wo lupwo alo apulie na te junihe ta julu, lupwo eabwé te Caatana na pii kolu pie 'pa iténaado', ke 'pa péroféta agele' (pwahamii tii 13), ke o patupwo ne telu me lu pwo ni naado na ta ne éni pwo bwohemwo ha ace céiu benaamwon.
- O bo tuie ni inenaado na ité, ke o tieden a céiu duaa miiden me a bwohemwo, ke o hiwon ni picani me ni téé na e o bo tuie ne ko ni apulie (pwahamii tii 6—10; 15—16).
- Kehe icehi ana é alecehen, ke e bo mwojuia mwo wo Padaame Iésu, ke e bo piwéden koja Caatana me ni apulie ten. E bo tanahi 'Babulona', ke e bo imwi Caatana, ke e bo tahieng ne ha a miû dieli mwo (pwahamii tii 19—20).

• O tieden a bwohemwo me a miiden ânebun, ke e o tuie a bwohemwo me a miiden na mwo coho, na e o mu dieli mwo. Lé o mulie nelang dieli mwo, ne ha a tebwo ehi me a pipwodéén, ati ni apulie te Padué (pwahamii tii 21—22).

Hiwon ni bwo niimihinaado ne ko nina tii ne he ni pwahamii tii 4—19 ne pele lépwo dotéén ko a Tii Iitihi. Be pii pie:

- Ni naado na tai cuwo ha a benaamwon de Ioane;
- Ni naado na e ko cuwo, dieli ha a tan den, ke é jenea, ke é alecehen;
- Ni naado na mwo time uce téele tuie.

Wieli te tai ni juuju ni bwo niimihi nen naa, be nina e mi pii ânebun wo Padué ne he ni tii iitihi, ke hiwon ni bwo pacuwohi nen: pacuwohi ha a benaamwon na tii, ke pacuwohi mwo alecehen, ke bo pacuwohi ati, ha a pwonehi a bwohemwo.

Hiwon ni ocine na ité, na élé ha a tii ce: ni ocine na lé temehi ehi ni bwopiinen ne ni acéihi, he ni benaamwon ânebun. Kehe icehi ana time genye uce ju temehi ehi jenea. Kehe icehi ana te junihe pwéélang ni âne a tii: E te piwéden koja a ta wo Iésu, tabuhi jenea dieli ha a pwonehi a bwohemwo, ke wâé heme nye mu kon, wogenye ni apulie ten.

Numéro 7 ne ha a tii Pii Beetihi

E pé a numéro 7 wo Ioane me inenaado ko nina iitihi ke hején, beme e habwii pie, wo Iésu, ke Padaame na hején nang. (Omehi mwo a Atabuhi ko a tii.) Weengi ni 7 x 7 naado ne ha a tii ce:

<α> Ni muko tii te ni 7 puco te ni acéihi (2.1—3.22)

<β> 7 apinyihi ko tii (5.1—6.17; 8.1—5)

<γ> 7 âcélo ke 7 tutu (8.6—11.18)

<δ> 7 ni inenaado (11.19—15.4)

<ε> 7 mwotabe ko a apwohi (15.5—16.21)

<ζ> 7 pwooti ko Babulona (18.1—24)

<η> 7 naado na o cuwo ha a pwonehi a bwohemwo (19.11—21.8)

A bwomune a tii Pii Beetihi

A bécéiuhe pwooti te Ioane

Ni naado na o mu jenea

E wéi ni apulie ten wo Kériso @ —Ni muko tii te ni 7 puco

Ni naado na e bo tuie

Tehi a miiden

Ni picani me ni téé

Patieden a céiu duaan mu ko a bwohemwo me a miiden

Lé pwopa ne ko Kériso wo Caatana me ni apenem den

Ni apwohi

Patieden ê toomwo pwopwaaden Babulona

Pwonehi a bwohemwo. E piwéden wo Kériso

A miiden me a bwohemwo na mwo coho

Bénebwéne pwooti

A bécéiuhe pwooti te Ioane

1 †Weengi ana e habwii wo Iésu *Kériso, ne ko ni naado na o te ju téele tuiebé. Be e hegi mu ko Padué Caa, ke e bwo pahede pa céiu *âcélo ten, beme e pébé céiié a pwooti, woéo Ioane, pa eabwé ten, ke e huôhi ne tong pie, me é pii beetihi te ni apulie te Padué. 2 É *pajuujihi ne tewé ni, pie, ati nina é alihi, ke

† 1.1 Pii Beetihi 22.6

ni pwooti na e pii tong wo Padué, ne ko Iésu Kériso ††. 3 **Adéi pa apulie na e pine [te ni apulie] a pwooti ce, na e âbé mu pele Padué. Ke adéi mwo lépwona lé téne, ke lé âcehin! Be caa e mwonu a tan na e bo pacuwohi ati ninaa [wo Padué].

†† Ne ko Iésu Kériso—ai A pwooti te Iésu Kériso. ‡ 1.3 Pii Beetihi 22.7,10

Pipwobwocu

⁴†É pwtii nge he ni 7 *puco te ni acéihi, ha a province Asia ††: Wâé heme e mu pelewé a adéihi, me a *pipwoééhe tice ja kon, me a péém:

A adéihi na e âbé mu pele Padué na e ânebun, ke é jena, ke e te mu dieli mwo!

A adéihi na e âbé mu ko a *Jenen Iitih, na e mu ânebuhe a atebwo te Padaame. [A Jenen Iitih, ke pwohewii ni 7 jenen † ne ha a bwo hején nang!]

⁵††A adéihi na e âbé mu ko Iésu Kériso! Weeng pana e pipatemehi Padué ko a juuju. Ke weeng pa apulie na e mi mulie cemwo mu ha amele. Ke weeng kuti Padaame he ati ni daame éni pwo bwohemwo!

Ke weeng na te junihe eânimen denye, ke e tuwok-enye koja ni ta pwo tenye, ko a cewéhen [na téé he li mele me denye]. ⁶††Ke e pwo me genye nahi a Mwametau ten, ke me genye cuwo he pwahamii Padué ††, Caa ten, beme genye pipwoeabwé ten. Wâé heme e mu pelen a bwo ubwo na a wâé, me a junuun, dieli mwo! Amen!

⁷††Geé alih! Be e o te ju tééle âbé, he ni nii. Ke lé o tai alieng, ati ne ni apulie, me ni béén mwo li lé tidih kon ali da. Ke lé o bo é me pihemun, ati ni bele éni pwo bwohemwo. Amen!

⁸§E pii wo Padaame Padué pie: «Woéo, ke é Alfa^{††}, ke é Oméga †, pa atabuh kon, ke pa anebwén kon. Woéo ânebun, ke é jena, ke é te mu dieli mwo. Woéo pana junihe pwojunuung, ne ko ati ni naado.»

E ali Iésu Kériso ne ha a wâé ten

⁹Woéo Ioane, pa acéihi bééwé, na nye tai picani, be wonaa mu ko *a bwo âcéi Iésu tenye. Kehe icehi ana nye te cumang ne he ni bwo picani tenye, me nye tai ucéihi a Mwametau ten.

[É ha a benaamwon na e paciheéo wo Padaame] ke he li é mu [he karépu] ne pwo a één Patmos, mu ko a bwo pipatemehi nen dong a pwooti te Padué, me a bwo pajuju Iésu tong. ¹⁰Ke é ha a céiu tan ko pwoiitih, a tan de Padaame ††, [he é mwo ko pwoiitih] ke e pééo na a Jenen Iitih. Ke é téne ne céing a pwocihe na te junihe ubwo, pwohewii ni pwocuu tutu.

† 1.4 Exode 3.14–15; Pii Beetih 3.1, 4.5 †† Asia—Ha amu Turki jena. A pwomwo na junihe ubwo ne Asia, ke é Éféso. † Jenen Iitih, ke pwohewii ni 7 jenen... Grek: Ni 7 jenen. Numéro 7, ke a ocine ko a bwo hején Padué, ácehi a bwo niimih nen de lépwo Juif. †† 1.5 Psaume 89.28; Kolosé 1.18 †† 1.6 1 Pétérú 2.9; Pii Beetih 5.10, 20.6 ††† Genye cuwo he pwahamii Padué—Grek: Wogenye ni apwoâp-wailo. ††† 1.7 Daniel 7.13; Zakari 12.10; Mataio 24.30; Ioane 19.34–37; 1 Tésalonik 4.17 § 1.8 Pii Beetih 21.6, 22.13 †† Alfa—A bécéiue atii ha a alphabet he pwo grek; Oméga—Bénebwénen. ††† Tan de Padaame—Ni bécéiue acéihi ne ko Iésu, ke lé pii pie, 'a tan de Padaame', ke a bwo cihe ko a tan ko pwoiitih. A bwopiinen naa pie 'dimanche', ke âbé mu he latin 'dies dominicus', 'a tan de Padaame'.

¹¹Ke e pii tong pie: «Go tii ne ha a tii ni naado na go alihi. Ke go pawie nge he ni 7 puco te ni acéihi he ni pwomwo ubwo ce: é Éféso, ke Smirne, ke Pergame, ke Tiatire, ke Sarde, ke Filadelfi, ke Laodicé.»

¹²Ke é biteéo, beme é alihi pie, woo celi e paciheéo, ke é alihi ni 7 mwomiû na mwani megele. ¹³††Ke é ha awiemelé, ke e cuwo lang wo pa *Nahi Apulie ††. Ke e cuwohe a epwén na bwali. Ke mwani megele a taihenan †. ¹⁴††Ke pwojo ni apunin, pwohewii ni nii na te junihe pwojo ††. Ke lupwo naamiin, ke pwohewii a duwele miû. ¹⁵Ke lupwo an, ke pwohewii ni toki megele, na éle ko miû, ke te junihe pwomelaan. Ke te junihe ubwo a patin, pwohewii a éé tabe pwob-waatéep na te junihe ubwo ††. ¹⁶§§Ke e pé ne ha a in pwo jui ni ceni na 7. Ke e wie mu pwon a teua na pipwon waalihi. Ke a pwahamiin, ke pwomelaan, pwohewii a téale, heme te ju goahen ehi.

¹⁷††Ke é tupwo ne ko watihe an, pwohewiin heme é caa mele.

Kehe icehi ana e ne a in pwo jui huíng, ke e pii tong pie: «Go nemwo pwo me mwotiko! Be woéo pa atabuh kon, ke pa pwonehin. ¹⁸Ke woéo Pana é mulip ¹⁹, li é caa mele, kehe icehi ana é caa *mulie dieli mwo, be pwojunuung ne ko a mele. Be é te pé a kilé ko a amu te ni amele. ¹⁹Ke go tii ne ha a tii nina go alihi: ni naado jena, me ni naado na lé bo tee tuie.

²⁰«Weengi a bwopiinen na e ha aduwo, ne ko ni 7 mwomiû mwani megele, me li 7 ceni, li go alihi ne ha a ing ne pwo jui: Be ili 7 mwomiû, ke 7 puco te ni acéihi, ke ili 7 ceni, ke ni âcélo telé ²⁰.»

tii te ni 7 puco te ni acéihi <α>

(Pwahamii tii: 2—3)

1 <α> Te ni acéihi ne Éféso

2 ²¹[E pii tong ²² wo pa *Nahi Apulie pie]: «Go tii nge céii pa âcélo ²³ te ni acéihi ne Éféso pie: «Weengi a pwooti tong, woéo pana é imwi ne ha a naatiing pwo jui ni 7 ceni; ke é engen ha awieme ni 7 mwomiû mwani megele. ²†É caa temehi ni mulihewé

§† 1.13 Daniel 7.13, 10.5 ††† Pa Nahi Apulie—ai Pana e pwohewii ni apulie. †† Taihenan—A taihena na cie ni bwaangenye, ne ko pa. §† 1.14 Ézékiel 43.2; Daniel 7.9, 10.6; Pii Beetih 2.18, 14.2, 19.12 ††† Te junihe pwojo—Pii ehi he pwo grek pie: Pwohewii ni pumii muto na pwojo, ke pwohewii mwo a neige. ††† Pwohewii a éé tabe pwob-waatéep na te junihe ubwo—ai Pwohewii ni jii na te junihe ubwo. ††† 1.16 Ébéru 4.12; Pii Beetih 2.12, 19.15 18 1.17—18 Ésaie 44.6, 48.12; Pii Beetih 2.8, 22.13 19 Pana é mulip—ai Pana é ne a mulip. 20 Ni âcélo telé—Wieli lépwo âcélo, ai wieli lépwo apulie. Ácélo he pwo grek, ke a bwopiinen pie: Pana e pébé a pwooti. 21 2.1 Pii Beetih 1.16 22 Tong—Wo Ioane na e tii a tii. 23 Pa âcélo—ai Pa apihuô. Piwiin ne ha a niide a tii 8,12,18. Omehi note 24 2.2 1 Ioane 4.1

†, me ni penem dewé me ni bwo picani tewé, be geé te cumang. Ke é caa temehi pie, geé cubwoni ni béén na nimelé me lé pwo nina ta. Be geé caa temehi lépwo agele, na lé pii pie lépwo *apostolo [na é pahedelé ngen]. ³ Ke geé cumang ne he ni picani, be wonaa mu kong. Kehe icehi ana time geé uce patupwo a céihi tewé ne kong ††.

⁴ «Kehe te ju céiu cehi ana geé pwo na ta, ke é cihe me mwoiu ne kowé. Be geé caa patieden ni pwonimewé kong † na e mu kowé ânebun. ⁵ ††Wâé heme geé niimihi, he celi geé tupwo nelang. Ke geé pininim ke geé bitekewé, me geé mulie mwo he ni bwomu tewé bwolihi [na wâé te Padué]! Be koli é bo âbé mwonukewé, ke é pé kojakewé ni mwomiû tewé.

⁶ «Kehe icehi ana weengi ni bwomu tewé na wâé. Be geé téétihi, pwohewiiéo, ni penem de lépwo *Nicolaïte*††.

⁷ ††«Wo paceli pwo ce pwojéénen, ke wâé heme e téne ana e pii na a *Jenen Iitihî te ni acéihi!

«Ke wo lépwona lé piwéden [koja a ta] ke é bo ne telé a mwomwon, me lé wii a acehi a acuwo ko a mulip, na e ha apwoamu te Padué na e he *miiden.»

2 <α> Te ni acéihi ne Smirne

⁸ [Ke e pii tong mwo wo pa Nahi Apulie pie]: «Go tii nge céii pa âcélo te ni acéihi ne Smirne pie:

«Weengi a pwooti tong, woéo na é atabuihi kon, ke é anebwén kon, li é caa mele, ke é caa mulie cemwo. Ke é pii tewé pie:

⁹ ††«É caa temehi a bwo mu he ni picani tewé, me a bwo tice dewé. Ke te junihe hiwon ni *adéihi te Padué ne kowé! Ke é caa temehi ni pihota te lépwona lé pii pie lépwo *Juif, kehe time uce lépwo Juif. Be lépwo apulie te *Caatana.

¹⁰ †«Ke é pii tewé pie: O bo pwo ace cuwo benaamwon †† celi geé o mu he ni picani, me téé hen. Be wo Caatana, ke e o te ju pwome ne ce béén mu kowé he karépu, beme a bwo tacebwénikewé ati he na 10 ni tan. Kehe icehi ana geé nemwo pwo me mwotikewé. Kehe geé cumang ne he ni céihi tewé, piwien heme e â

taunukewé. Be é bo pwo ce ceme ni penem dewé ††: a *mulie dieli mwo.

¹¹ ††«Wo paceli pwo ce pwojéénen, ke wâé heme e téne ana e pii na a Jenen Iitihî te ni acéihi!»

«Wo lépwona lé piwéden [koja a ta] ke time uce tatéélé a béalohe mele. [Be lé bo mulie pele Padué dieli mwo]!»

3 <α> Te ni acéihi ne Pergame

¹² [Ke e pii tong mwo wo pa Nahi Apulie pie]: «Go tii nge céii pa âcélo te ni acéihi ne Pergame pie:

«Weengi a pwooti tong, woéo pana pwo a teua tong, na pipwon waalihi, ke é pii tewé pie:

¹³ «É temehi pie, é he na geé mu lang, ke e pihuô nelang wo Caatana. Kehe icehi ana geé te cumang ne kong. Ke é caa temehi pie, lé pé kojakewé Antipas, pana mwomwon nang, ke e pajuujuéo. Ke lé taunung, ne ha a pwomwo ubwo tewé, he na e mu lang wo Caatana. Kehe icehi ana time geé uce tahi taabwon a céihi tewé ne kong.

¹⁴ ††«Kehe te ju céiu cehi ana pwo a bwopemiko na ta, ke é cihe me mwoiu ne kowé. Be élé pelewé wo lépwo apulie na lé pipwohewii Balaam. Be [pa *péroféta agele ânebun, he li] e picani te pa daame Balak, beme e pipatiedeni a bele *Isaraéla. Be e pwo me lé wii ni *âpwalko na ne te ni *dème duéé. Ke e pwo me lé jéilé ne ko Padué ne ni béén.

¹⁵ «Ke wonaa ne pelewé jena, be pwo ce bééwé celi lé âcehi ni cémun de lépwo *Nicolaïte*. ¹⁶ ††Ke é pii tewé pie, geé pininim, ke geé bitekewé! Be koli é tuie ne kowé. Ke é pwopa ne kolé, ko a teua na e wie mu pwong ††.

¹⁷ ††«Wo paceli pwo ce pwojéénen, ke wâé heme e téne ana e pii na a Jenen Iitihî te ni acéihi!

«Wo lépwona lé piwéden [koja a ta] ke é bo ne telé a wiinaado mu he miiden: a *manne* na neduwohi ††. Ke é bo ne telé a péi na pwojo, na tii ne kon a nii na mwo coho. Ke time e uce temehi a nii naa wo pace céiu apulie, kehe te icehi pa apulie na e hegi!»

4 <α> Te ni acéihi ne Tiatire

¹⁸ ††[Ke e pii tong mwo wo pa Nahi Apulie pie]: «Go tii nge céii pa âcélo te ni acéihi ne Tiatire pie:

††† É bo pwo ce ceme ni penem dewé: a mulie dieli mwo—ai É bo ne tewé a ju mulip, ai É bo ne tewé ce cemewé me geé mulie ha a mulie. Grek: A kuron ko a mulie. †† 2.11 Pii Beetihî 20.14, 21.8 ††† 2.14 Nombres 22—24, 25.1—2, 31.16; 2 Pétéru 2.15 †† 2.16 Pii Beetihî 3.11 †† A teua na e wie mu pwong—A ocine ko a pwooti te Padaame na juuju. Wo Iésu, ke e bo pé a pwooti ten, beme e tauti lépwo agele na lé pibitehi ni pwooti ten. ††† 2.17 Exode 16.4, 14—15, 33—34; Ésaie 62.2; Ioane 6.48—50 ††† Manne na neduwohi—Wo Padué, ke e pwo me lé wiinaado ne ni Isaraéla na lé mu ha a da, ko a manne 2enote

††† 2.18 Pii

† *Mulihewé*—Grek: A mulihem. A tii, ke e tii ne te pa apiwéihi puco te ni acéihi, be me de ati ni acéihi na e wéihi. †† 2e phrase—Grek: Time uce emaan gewé. † Pwonimewé kong—ai Ni pwonimewé ko lépwo acéihi bééwé. †† 2.5 Pii Beetihî 3.3 †† Lépwona Nicolaïte—Lépwona apwopune na lépwo agele na lé pacémuni lépwona acéihi ne ko Kériso ko ni pwooti na gele. Wieli lé pii pie, e kolé a bwo temehinaado na neduwohi, ke lé niimihi pie a jenyene cehi na a junaado, kehe time uce a éénye, é mulang kuti na wâé heme nye mulie hauli ko a éénye. Wieli lé âcéi pa apulie na a niin pie Nicolaüs. ††† 2.7 Genèse 2.9; Pii Beetihî 22.2, 19 ††† 2.9 2 Korénit 11.14—15; Pii Beetihî 3.9 † 2.10 2 Timoté 4.8; Cang 1.12 †† Ace cuwo benaamwon—Grek: 10 ni tan, a ine a cuwo benaamwon.

Beetihî 1.14—15

«Weengi a pwooti tong, woéo pa *Naî Padué, woéo na lupwo naamiing, ke pwohewii a duwele miû. Ke lupwo ang, ke pwohewii ni toki megele, na éle ko miû, ke te junihe pwomelaan. Ke é pii tewé pie:

¹⁹ «É caa temehi ni mulihewé, me ni penem dewé. Be geé céihi ne kong, ke eanimewé te ni apulie, ke geé picani telé. Ke geé picani ne kowé, ke geé te cumang. Ke é temehi pie, geé te junihe pwo ni penem na hiwon koján ânebun.

²⁰ †«Kehe te ju céiu cehi ana pwo a bwopemiko na ta, ke é cihe me mwoiu ne kowé. Be [te junihe muhi tong he] time geé uce pacuwo Jézabel ††. Wo ênaa, ke e pii pie, ê péroféta celi e pébé a pwooti tong. Kehe icehi ana e gele, ke e bite ni apulie tong, me lé pwo nina ta. Be e pwo me lé wii ni âpwailo na ne te ni déme duéé. Ke e pwo me lé jéilé ne ko Padué ne ni béén.

²¹ «E pwohewii ni toomwo pwopwaaden ‡. Ke é te junihe ne ten ni benaamwon me e pininim me biteeng. Kehe icehi ana time uce nimen me e pitaatéhi a mulihen, be nimen me e te pwo toomwo pwopwaaden.

²² «Ke me wonaa, ke é o tahieng ne pwo apule ko picani, me lépwona piwie ni huô telé na ta, hemepie time lé uce pininim me lé pibitelé koja ni huô naa.

²³ ††«Éa, é bo pwo me lé mele ati, wo lépwona lé âcén ††. Ke ati ni acéihi, ke lé bo tai temehi pie, woéo pana é temehi ati ni bwo niimihinaado me nina nime ni apulie kon. [Geé pipwocile!] Be é bo muko pétaapwo ne tewé, âcehi ni muko pétaapwo penem dewé.

²⁴ «Mepwo é ne ko lépwona lé âcni Jézabel, ke lé pii pie, lé hane ce cémun celi eda. Kehe lé te ju gele, be lé hane Caatana †††. Kehe icehi ana time lé uce wonaa wo lépwo béén mu kowé mulang Tiatire. Kehe [a pwooti tong me dewé, ke] time uce ace âneule celi junihe téé.

²⁵ †††Kehe geé imwi mangihi nina etewé §, die ha ace bwo mwojuia mwo tong.

²⁶⁻²⁷ †††«Wo lépwona lé piwéden, wo lépwona lé piténédeé dieli ha a pwonehin, ke é bo ne telé a mwomwon na e ne tong wo Caa tong. Ke lé bo pihuôhi ati ni bele pwo bwohemwo. Ke lé bo tailé ko a betoki, pwohewii a bwo taii ne ni tam pule. ²⁸ †††Ke é o ne telé mwo a ceni pwopwometan, na e pé da a téale [beme a inenaado ko a bwo piwéden delé].

²⁹ «Wo paceli pwo ce pwojéénen, ke wâé heme e téne ana e pii na a Jenen Iitihite ni acéihi!»

† 2.20 1 Rois 16.31; 2 Rois 9.22 †† Jézabel—Wieli a ocine ko Jézabel, ne ha a Élele Iitihite Ânebun, he li e pébé a pwoiitihite Baal. Omehi 1 Rois 16.31–33. ‡ E pwohewii ni toomwo pwopwaaden—A ocine ko a mulie na time e uce paciiti Padué. †† 2.23 Psaume 7.10; Jérémie 17.10; Pii Beetihi 20.12–13 †† Lépwona lé âcén—Grek: Ni naîn. ††† 1re & 2e phrases—Grek: Lé pii pie, lé temehi nina pida ne pele Caatana. ††† 2.25 Pii Beetihi 3.11 § Nina etewé, ke geé imwi mangihi—Ni céihi telé, me ni naado na wâé na lé pwo. †† 2.26–27 Psaume 2.8–9 ††† 2.28 Pii Beetihi 22.16

5 <α> Te ni acéihi ne Sarde

³ ††[Ke e pii tong mwo wo pa *Nahi Apulie pie]: «Go tii nge céii pa âcélo ††† te ni acéihi ne Sarde, pie:

«Weengi a pwooti tong, woéo na e tidiéo [na a junuu a *Jenen Iitihite, na e pwohewii] ni 7 jenen [ne ha a bwo hején nang]; ke dong mwo ni 7 ceni. Ke é pii tewé pie:

«É caa temehi ni mulihewé, me ni penem dewé. É téne a pwooti kowé, pie geé teko ûmiê, kehe icehi ana geé caa mele. ² Ke é alihi pie, ni huô tewé, ke time uce wâé te Padué Caa tong. É mu ko anaa, na é pii tewé pie: Geé cuwoda! Ke geé pamwoiuhi a cuwo nehinaado na wâé na mwo te e pelewé. Be koli geé bwobe ju mele.

³ †††«Geé pininim, ke geé bitekewé! Ke geé niimihi ni pwooti, na geé caa téne ke hegi. Ke geé piténédehi! Be koli é âbé pwohewii pa abune. Be time geé o uce temehi ace benaamwon celi é o tookewé hen.

⁴ †††«Kehe céiu cehi ana pwo ni béén mu kowé, mu Sarde, na time lé uce pwo me tooli ni epwénélé; na wâé tong ni mulihelé. Ke é bo ne telé ni epwén pwojo na mwo wâé. Ke geme bo piengen ibu.

⁵ †††«Be lépwona lé piwéden [koja a ta] ke lé o cuwohe ce epwén pwojo celi wonaa, ke time é o uce ciitili ni niilé, mu ha a tii ko ni apulie na lé bo hegi *a ju mulip dieli mwo †††. Ke é bo pipatemehi, ne he pwa-hamii Caa tong me ni *âcélo ten, pie, ni apulie tong.

⁶ «Wo paceli pwo ce pwojéénen, ke wâé heme e téne ana e pii na a Jenen Iitihite ni acéihi!»

6 <α> Te ni acéihi ne Filadelfi

⁷ ††††[Ke e pii tong mwo wo pa Nahi Apulie pie]: «Go tii nge céii pa âcélo te ni acéihi ne Filadelfi pie:

«Weengi a pwooti tong, woéo pana é iitihite, ke é juuju. Woéo pana é pé a kilé ko a pwodaame te *Davita ¹⁸. Woéo pana é tehi ¹⁹, ke o te tice paceli jan ne kon me e capuhi; ke me é capuhi, ke o te tice paceli jan ne kon me e tehi. Ke é pii tewé pie:

⁸ ²⁰«É caa temehi ni mulihewé, me ni penem dewé. Te junihe tice niihewé, me junuuwé, kehe icehi ana geé te piténédehi ni pwooti tong. Ke time geé uce téétihi a ning. Geé téne, be é caa ne he pwahamiiwé a pwaaden, ke te tice paceli me e capuhi.

†† 3.1 Pii Beetihi 1.4, 16 ††† Pa âcélo—ai Pa apihuô. Piwien ne ha a niide a tii 7 me 14. Omehi note †† 3.3 Mataio 24.43–44; 1 Tésalonik 5.2; Pii Beetihi 2.5, 16.15 †† 3.4 Jude 1.23 ††† 3.5 Exode 32.32–33; Mataio 10.32; Luka 10.2, 12.8 ††† Tii ko ni apulie na lé bo hegi a ju mulip dieli mwo—Grek: Tii ko a mulip. Omehi Filipi 4.3. ††† 3.7 Ésaie 22.22 ¹⁸ Pana é pé a kilé ko a pwodaame te Davita—A bwopiinen pie, pana pwo mwomwon den me e pihuôhi a pwomwo he daame ne he nii pa daame. Omehi Ésaie 22.22. A pwodaame te Davita, ke a pwodaame te pa Mesia. ¹⁹ Woéo pana é tehi... A bwopiinen pie, e pihuô ne ko ati ni naado wo Kériso, ke e te pacuwohi ana nimen kon. Te tice aceli jan me e cubwonieng. ²⁰ 3.8 1 Korénit 16.9

⁹ †«Pwo ni béén mu pelewé, na lé pii pie, lépwo *Juif. Kehe icehi ana time uce lépwo Juif, be lépwo apulie te *Caatana. Ke é bo pwo me lé tidihi jililé he pwahamiiwé. Ke lé o te temehi pie te junihe eânimung dewé.

¹⁰ ††«Be geé te pitenedehi ni pwooti tong, beme geé cumang! Ke é mu ko anaa, ke é bo wéikewé, he ni tan ko téé me picani. He ni tan naa, ke o tacebwéni ati ni apulie pwo bwohemwo.

¹¹ †«Kehe icehi ana geé te ûmiê! [Be koli é bo patéetikewé.] Kehe geé imwi mangihi ni wâé [na e he ni pwonimewé]. Be koli bo pé kojakewé ni cemewé.

¹² †«Wo lépwona lé piwéden [koja a ta] ke é bo pwo me lé amwo ha a *mwaiitihi te Padué Caa tong. Ke lé o te mu lang dieli mwo. Ke é bo tii ne kolé a nii Padué Caa tong, ke a nii a pwomwo ubwo te Padué Caa tong: a *Iérusaléma na mwo coho, na e opé mu he miiden, pele Padué. Ke é bo tii mwo, ne kolé, a niing na mwo coho.

¹³ †«Wo paceli pwo ce pwojéénen, ke wâé heme e téne ana e pii na a Jenen Iitihi te ni acéihi!»

7 <α> Te ni acéihi ne Laodicé

¹⁴ [Ke e pii tong mwo wo pa Nahi Apulie pie]: «Go tii nge céii pa âcélo te ni acéihi ne Laodicé pie:

«Weengi a pwooti tong, woéo pana pii kong pie 'Amen, ke Wâé heme wonaa'. Woéo kuti na é pii beeti Padué ha a juuju. Ke woéo pa atabuhi ko ati ni naado na e pwo wo Padué. Ke é pii tewé pie:

¹⁵⁻¹⁶ ††«É caa temehi ni mulihewé, me ni penem dewé. [Time geé uce pipwoeabwé tong, ati he ni pwonimewé.] Kehe te ju cuniê gewé. Ke geé pipwocile, be koli é bo unyehikewé!

¹⁷ ††«Geé pipii dewé pie, te junihe hiwon ni naamuuwé me ni mwani tewé, ke te tice ace céiu naado celi tieden kojakewé.

«Kehe icehi ana tice tewé, be time geé uce alihi temehi pie, te junihe pwoééhewé! Be te ju tice ace cuwo naamuuwé, ke bwi gewé, ke tice mwaanu kowé!

¹⁸ †††«Ke é pii tewé pie: Wâé heme geé pwocuhin, kojaéo, ni mwani megele na cini ne pwo miû, na te junihe pwomelaan, ke te tice alili hen, ke ubwo a cuhin. Ke o pwo naamuuwé, ne he pwahamii Padué. Ke geé pwocuhi ce epwén celi te junihe pwojo, me geé cuwohen. Be me wonaa, ke o time bo uce tanim gewé ko a bwo tice mwaanu kowé. Ke geé pwocuhin kojaéo, ce etihe naamiwé, beme geé o niê ehi.

¹⁹ †††«É ne pune ke é pwocuhinaado te lépwo apulie na te junihe eânimung delé. Ke é mu ko anaa, ke geé ûmiê, ke geé pinim, ke geé bitekewé. Ke geé taatéihi ni mulihewé!

† 3.9 Ésaïe 45.14, 49.23, 60.14; Pii Beetihi 2.9 †† 3.10 Luka 21.19; 2 Timoté 2.12 † 3.12 Ésaïe 62.2, 65.15; Pii Beetihi 14.1, 21.2 †† 3.15 Roma 12.11 †† 3.17 Luka 12.21; 1 Korénit 4.8 ††† 3.18 Ésaïe 55.1; Pii Beetihi 4.4 ††† 3.19 1 Korénit 11.32; Ébéru 12.6; Pii Beetihi 2.5

²⁰ †«Be é cuwo he pomwa, ke é cii. Ke mepie e téne a pating wo pace céiu apulie, ke me e tehi ne tong, ke é o taa céieng, me gemu piwiinaado ibu!

²¹ †«Wo lépwona lé piwéden [koja a ta] ke é bo pwo me lé tebwo pwohewiié, ne pwo a atebwo tong. Be é caa piwéden, ke gemu caa tebwo pwo a atebwo he daame me Caa tong. ²² Wo paceli pwo ce pwojéénen, ke wâé heme e téne ana e pii na a Jenen Iitihi te ni acéihi.»

Lé pipaunu Padué ne he miiden

⁴ †É ne alecehe ni naado naa, ke é alihi mwo a céiu naado. É alihi ne jeda he miiden a pomwa na tehi. Ke é téne mwo ali pwocihe, li pwohewii a pati tutu. Ke e pii tong pie: «Go taabé éni, beme é habwii tem ni naado na o te ju téele tuie.»

² ††Ke e ole kong a *Jenen Iitihi, ke é alihi a atebwo jeda he miiden, ke é ali Padaame he e ko tebwo pwon. ³ ††Ke te junihe wâé nang, ne ha a wâé ten, be pwodaadiin, pwohewii ni péi na pun bupwi ke megele, na te junihe ubwo a cuhin ††. Ke e aujenihi a atebwo na a aduwoho, na pwomelaan pwohewii a péi émer-aude.

Lépwo 24 ukéiu

⁴ †Aujenihi a atebwo he daame, ke é alihi ni béé atebwo na 24; na lé ko tebwo pwon wo lépwo ukéiu na 24 jélé, na lé cuwohe ni epwén na pwojo, ke lé pwobo he ni kuron na mwani megele. ⁵ ††Ni ilehi, ke a huu he a tikekele, ke lé wie mu ko ali atebwo. Ke é ânebuhe a atebwo naa, ke 7 ni mwomiû na tole. Ke weengaa [ni inenaado ko] a Jenen Iitihi te Padué. ⁶ †††Ke é alihi ne mwo lang, a jié, na te junihe bwakenu.

Lépwo âcélo na paa jélé

É ha awiemen, ke é aujenihi a atebwo he daame, ke lé cuwo lang wo lépwo âcélo na paa jélé †††, na lé pwohewii ni wota, na hiwon ni naamiilé ânebun ke é alecehelé. ⁷ Pa bécéiuhén, ke pwohewii ni liô †; pa béalohen, ke pwohewii ni nahi paaci; pa bécíehen, ke pé ana pwohewii ni pwahamii apulie; pa bépaahén, ke pwohewii a bwaaoléé ††† heme e téé. ⁸ ††Muko pétaapwo pi 6 telé ni puuilé. Ke pwo ni naamiilé ati, pwo ni puuilé, ke é haahi ni puuilé. Ke bwén, ke pwang, ke lé tee pwonyebi, ke lé pii pie:

«E iitihi! E iitihi!

§ 3.20 Ioane 14.23 † 4.1 Pii Beetihi 1.1, 10 †† 4.2 Ésaïe 6.1 †† 4.3 Ézékiel 1.28 ††† Péi na pun bupwi ke megele—Péi 'jaspe' me 'sardoine'. † 4.4 Pii Beetihi 3.18 †† 4.5 Ézékiel 1.13; Zakari 4.2; Pii Beetihi 1.4, 8.5, 11.19, 16.18 ††† 4.6 Ézékiel 1.5—10, 22, 10.14 ††† Lépwo âcélo na paa jélé—Grek: Êtres vivants. Pwocoon me nye pii pie, pwohewii ace de. Wieli te pipwohewii ni wota, ai ni apulie, ai ni âcélo, ai ni jenen. ††† Liô—Lion; Bwaaoléé—Aigle. 18 4.8 Ésaïe 6.2, 3; Ézékiel 1.18, 10.12

E iitihî wo Padaame,
be weeng Padué.
Te junihe pwo niihen
ne ko ati ni naado.
Be weeng jena,
ke weeng ânebun,
ke e te mu dieli mwo!»

⁹ Lé pwonyebi beme lé pipwoun, me pipwo-olé te pana e ko tebwo pwo a atebwo he daame, pana e *mulie dieli mwo. ¹⁰ †Ke ati he ni benaamwon na lé pipwoun den hen, ke lé tidihi jililé he pwahamiin wo lépwoli 24 ukéiu. Ke lé pipaunu pana e mulie dieli mwo. Ke lé tahi ni kuron delé ne he pwahamiin, ke lé pii ten pie:

¹¹ «Wogo Padaame, Padué heme,
ke wogo pana jan me pipaunuko
ne ha *a wâé tem,
me a junuum.

Wogo pana go tabuhi
ati ni naado.

Wogo na go pacuwohi
ana te nimem kon!»

7 apinyihi ko tii <β>

(Pwahamii tii: Pii Beetihi 5—7; Pii Beetihi 8.1—5)

E tehi a tii wo pa Nahi Muto

⁵ ††É alihi a tii na capuhi, na e pé ne ha a in ne pwo juin wo pana e ko tebwo pwo a atebwo he daame. Pwo a atii he ni piduaa a tii naa. Ke pwo ni apinyihi kon na 7 ‡. ² Ke é ali pa céiu *âcélo na te junihe pwojunuun, ke e toii da pie: «Woo celi jan ne kon me e tuwo ni apinyihi, ke me e pale a tii ce?»

³ Kehe icehi ana te tice pace apulie celi jan ne kon me e tuwo, ke me e pale ali tii, me e alihi. Te tice jeda he miiden, ke éni pwo bwohemwo, ke é haahi a bwohemwo. ⁴ Ke é te junihe é kuti, ko ana te tice pace céiu apulie celi jan ne kon me e tuwo.

⁵ †Ke e pii tong wo pa céiu béé lépwoli ukéiu pie: «Go nemwo é! Be te pwo pa céiu apulie na jan ne kon me e tuwo ni apinyihi na 7 naa, ke me e pale a tii. Be wo [pana lé pii kon pie] pa Liô mu ha a pwomwoiu *Juda, pa apulie mu ha a pwomwoiu te pa daame *Davita, ke e caa piwéden, ke e bo tuwo ni 7 apinyihi naa, me e tehi a tii.»

Jan ne ko pa Nahi Muto

⁶ ††Ke nebwén, ke é ali pa *Nahi Muto, na e ko cuwo ânebuhe a atebwo te Padaame, ha awieme ni âcélo na paa jélé, na lé pwohewii ni wota, me lépwoli ukéiu. Ke pwohewiin heme taunueng me *pwoâpwailo kon. Ke 7 ni gi ten, ke 7 ni naamiin. Ni naamiin, ke a *Jenen Iitihî †† [na pwohewii ni 7 jenen ne ha a bwo hején nang] na e neeng opé wo Padué ne pwo a bwohemwo ati.

⁷ Ke e âbé wo pali Nahi Muto, ke e pé ali tii mu ha a in ne pwo jui pali e tebwo pwo ali atebwo he daame.

⁸ ††Ke lé tai miibule, ke tidihi jililé he pwahamiin wo lépwoli âcélo li paa jélé, me lépwoli 24 ukéiu, ke lé pipaunueng. Ke te pipétaa lépwoli 24 ukéiu ni gitar [§] telé, me ni mwotabe mwani megele, na oba ko tabe ûde. Be anaa, ke ni pwopwoiitihî te ni apulie te Padué. ⁹ ††Ke lé pwo a céiu nyebi na mwo coho, ke lé pii pie:

«Wogo na jan ne kom
me go pé a tii,
me go tuwo ni apinyihi kon.
Be caa wogo pa âpwailo,
ke lé taunuko.

Tée a cewéhem me de ni apulie:

ati he ni pwomwoiu,
me ati he ni pati apulie
mu he ni amu ati,
me ati ni bele.

Ke go pwo me lé bele te Padué.

¹⁰ †††Ke go pwo me lé nahi
a Mwametau ten,
ke me lé pipwoeabwé ten.
Lé bo pihuôhi ni apulie
pwo bwohemwo!»

¹¹ ††Ke é alecehen, ke é alihi, ke é téne ni âcélo, na te junihe hiwon jélé, na pwocoon me nye pinelé, na lé tai cuwo aujenihî a atebwo he daame: Lé cuwo ânebun ne ni âcélo na paa jélé, ke lé cuwo lang wo lépwoli ukéiu, ke lé panebwénihi ne ni âcélo naa. ¹² Ke lé te junihe toii da wo lépwo âcélo, na lé pwonyebi pie:

«Pipaunu pa Nahi Muto,
pali lé taunueng!
Be eten ni pipwojunuun,
me ni wâé ten,
me a temehinaado ten.
Pwo niihen ko a wâé ten.
Jan me pietiang da!»

¹³ Ke é téne ni pwocihe te ati ni naado na e pwo wo Padué ne jeda he miiden, ke éni pwo bwohemwo, ke é

† 4.10 Pii Beetihi 7.10,15, 19.4 †† 5.1 Ésaie 29.11; Ézékiel 2.9—10 ‡ Ni apinyihi kon na 7—Pwomangihî ehi ko duhi bougie (cire de bougie). Ke wo pa apwotii, ke e pwo ni inen ko a bougie. †† 5.5 Genèse 49.9; Ésaie 11.1,10; Pii Beetihi 22.16

‡‡ 5.6 Zakari 4.10; Ioane 1.36; Pii Beetihi 13.8 ††† Jenen Iitihî—Grek: 7 jenen. Omehi Zenote ††† 5.8 Psaume 141.2; Pii Beetihi 8.3—4 § Gitar—Grek: Cithare, Lyre, Harpe. † 5.9 Psaume 33.3, 40.4, 96.1, 98.1 †† 5.10 Exode 19.6; Ésaie 61.6; Pii Beetihi 1.6, 20.6 †† 5.11 Daniel 7.10; Ébéru 12.22

he jíé, ke é haahi a bwohemwo. Ke lé tai pwonyebi, me pii pie:

«Me nye pipaunu
pana e tebwo pwo a atebwo,
me pa Nahi Muto!
Nye pipwoun delu dieli mwo!
Pwo *a wâé telu,
me a niihelu dieli mwo!»

¹⁴ Ke lé pii wo lépwoli âcêlo li paa jélé pie: «Amen! Wâé heme wonaa!» Ke lé tai miibule ke tidihi jililé wo lépwoli 24 ukéiu, ke lé pipaunulu.

Tuwo li 7 apinyihi ko tii

1 <β> Pa atebwo pwo a haricaan pwojo

6 [†]É alecehen, ke é ali pali *Nahi Muto, he e tabuhi tuwo a bécéiuhe apinyihi ko ali tii. Ke é téne pa céiu béé lépwoli âcêlo li paa jélé, li lé pwohewii ni wota, he e cihe ha a patin na te junihe pwo niihen, ke e pii pie: «Go âbé!» ^{2 ††}Ke e tehenebé wo pana e tebwo pwo a haricaan pwojo [‡], na e pé a mwonyigé. E hegi a cemen, be e caa piwéden, ke e engemwo beme e piwéden mwo.

2 <β> A pa

³ Ke e tuwo mwo ali béalohe apinyihi ko tii wo pali Nahi Muto. Ke é ha a benaamwon naa, ke é téne pa béalohe âcêlo, he e toii pie: «Go âbé!» ⁴ Ke e tehenebé wo pa haricaan na megele nang [‡] pwohewii a duwele miû. Ke wo pana e tebwo pwon, ke ne ten a teua na te junihe ubwo. Ke pwo mwomwon den me e pétaabwon a péém, mu éni pwo bwohemwo, beme lé pitaunulé wo lépwo apulie.

3 <β> A menele

⁵ É alecehen, ke e tuwo a bécíéhe apinyihi ko tii wo pali Nahi Muto. Ke é ha a benaamwon naa, ke é téne pa bécíéhe âcêlo, he e toii pie: «Go âbé!» Ke e tuiebé pa haricaan na bwiile nang [‡]. Ke e pé a béja ^{‡‡} wo pana e tebwo pwon. ⁶ Ke é téne a céiu pwocihe mu ha awieme lépwoli âcêlo li paa jélé. Ke e pii pie: «Céiu a béja ko *blé* ha a tan ko penem, ke cié ni béja ko *orge* ha a tan ko penem. Kehe go nemwo pwotahi a géréén, me a tabe megele ^{‡‡‡}»

† 6.1 Pii Beetihî 4.6, 5.1 †† 6.2–5 Zakari 1.8, 6.1–6 ‡ Haricaan pwojo—A inenaado ko a bwo piwéden. †† Haricaan na megele nang—A inenaado ko a pa me a bwo taunu ni apulie. ‡‡ Haricaan na bwiile nang—A inenaado ko a menele me a mele na e pébé. ‡‡‡ Béja—Balance pour mesurer le poids. ‡‡‡ Go nemwo pwotahi a géréén, me a tabe megele—ai Go nemwo pwotahi ni acuwu olivier me ni ni tabe megele.

4 <β> Mele

⁷ Ke e tuwo a bépaahe apinyihi ko ali tii wo pali Nahi Muto. Ke é ha a benaamwon naa, ke é téne pa bépaahe li âcêlo, he e toii pie: «Go âbé!» ^{8 §}Ke é alihi a haricaan na pwiu. Ke wo pana e tebwo pwon, ke a niin pie 'Mele'. Ke pwo pa céiu na e âcêin, na a niin pie 'Amu te lépwo Amele'. Ke ne telu a mwomwon, me lu pihuô ne ha a céiu duaan, mu ko ni duaan na paa, mu ko ni apulie pwo bwohemwo. Ke lu ne a pa me a menele, me ni wota apiaba pwo bwohemwo, me ati nina e pébé a mele.

5 <β> Lépwona taunulé

⁹ Ke é alecehen, ke e tuwo a bénim he ni apinyihi wo pali Nahi Muto. Ke é ha a benaamwon naa, ke é alihi, ne haahi *apwoâpwailo ^{§†}, ni jene ni apulie na taunulé watihen a pwooti te Padué, ke woélé mwo lépwo apa-juujueng.

¹⁰ Ke lé toii da pie: «Padaame wé! Wogo na te junihe pwojunuum ke go iitihî ke go juuju, ke go bo tauti ni apulie pwo bwohemwo, ke go bo pwocuhinaado telé, be lé taunukeme. Ke kona go o mwo te jame uca?»

¹¹ ^{§††}Ke muko pétaapwo ne telé ni epwén pwojo. Ke e pii telé pie: «Geé mwo te ju pwome mwaale, ucéihî ace bwo âbé te ati ni bééwé: [ni eabwé te Iésu] na o taunulé pwohewiikewé. Be mwo time lé uce tuie ati.»

6 <β> Penem ati ni naado

¹² ^{§†}Ke é ali mwo pali Nahi Muto, he e tuwo a bé6 he apinyihi ko ali tii. Ke é ha a benaamwon naa, ke e te tuie kuti a penem bwohemwo na te junihe ubwo. Ke a téale, ke bwiile pwohewii a epwén he doole mele. Ke a wole, ke megele pwohewii a cewéle. ¹³ ^{§††}Ke lé tai tupwo ne pwo bwohemwo ne ni ceni, pwohewii ni ace majing wamin heme patupwohi na a udan. ¹⁴ ^{§†}Ke te pieadi ngen a miiden, pwohewii a talihi ^{§†} heme nye capipihî. Ke ati ni juwole me ni één, ke péélé mu he ni amu telé.

¹⁵ ^{§§†}Ke lé tai cela wo lépwo daame pwo bwohemwo, me lépwo apulie na piubwo jélé, me lépwo caa te coda, me lépwo apulie na pwo naamuulé, me lépwo apulie na pwo niihelé, me ati lépwo *apenem tice ja kon me ati lépwo béén mwo. Ke lé â taduwo he ni péi, ke é he ni mwa péi ne pwo juwole.

§ 6.8 Jérémie 15.1–3; Ézékiel 5.12,17, 14.21 §† Apwoâpwailo—Autel. Omehi mwo Âpwailo ne ha a Niinaado (Vocabulaire) ha anebwén ko a tii. Wielî a inenaado ko a âpipati na lé ne te Padué ne ni apulie ten, na lé patupwo ne ten ni mulihelé. Omehi Filipi 2.17; 2 Timoté 4.6. §†† 6.11 Pii Beetihî 7.9,13, 19.14 §‡ 6.12 Mataio 24.29; Apostolo 2.20; Pii Beetihî 8.12, 11.13, 16.18 §†† 6.13 Ésaie 34.4 §† 6.14 Pii Beetihî 16.20 §† Talihi—Grek: Livre, Rouleau. §§† 6.15 Ésaie 2.10,19,21

¹⁶ †Ke lé pii te ni juwole, me ni péi pie: «Geé tupwo ne huîime! Geé neduwokeme ité koja pana e ko tebwo pwo a atebwo he daame! Geé neduwokeme ité koja a okéé te pa Nahi Muto!

¹⁷ ††«Be e tuie a tan na ubwo ko a okéé telu. Ke woo paceli e o mwo mulie?»

A bele te Padué

7 †Ke é alecehen, ke é ali ni béé âcélo na paa jélé, na lé ko cuwo he ni uhin ko a bwohemwo, ke lé imwi ni dan na paa na te junihe ubwo ne pwo a bwohemwo. Ke wonaa, beme te tice dan celi me e cuu a bwohemwo, ke a jilé, me ni acuwo.

² É ali mwo pa céiu âcélo he e ko taa ha a duaan na e taa tuie hen a téale, he e ko pé ana me e ne me a ine † Padué na e mulip ††.

Ke e toii da me ubwo te lépwo béé âcélo na paa jélé, na ne telé ni pipwojunuun, me lé pwotahi a bwohemwo me a jilé. Ke e pii telé pie: ³ ††«Geé mwo neme cuwo! Geé nemwo téele pwotahi a bwohemwo, me a jilé, me ni acuwo! Be geme o mwo mi ne ânebun a inen ne pwo bwaade lépwo eabwé te Padué henye.»

⁴ †††Ke é téne a jéhi lépwona lé hegi a ine Padué. Be lépwo 144000 ††† ni apulie, mu ha ati ni pwomwoiu te a bele *Isaraéla:

- ⁵ 12000 mu ha a pwomwoiu te *Juda,
- 12000 mu ha a pwomwoiu te Ruben,
- 12000 mu ha a pwomwoiu te Gad,
- ⁶ 12000 mu ha a pwomwoiu te Asser,
- 12000 mu ha a pwomwoiu te Neftali,
- 12000 mu ha a pwomwoiu te Manassé,
- ⁷ 12000 mu ha a pwomwoiu te Siméon,
- 12000 mu ha a pwomwoiu te Lévi,
- 12000 mu ha a pwomwoiu te Issakar,
- ⁸ 12000 mu ha a pwomwoiu te Zabulon,
- 12000 mu ha a pwomwoiu te Josef,
- 12000 mu ha a pwomwoiu te *Benjamin.

Tai woélé, ke lé tai hegi a ine Padué.

Lé pipaunu Padué ne ni apulie na te junihe hiwon jélé

⁹ É alecehe ninaa, ke é omehi mwo, ke é ali ni apulie na te junihe hiwon jélé, na time uce jan me nye pinelé. Be lé âbé mu ati he ni bele, me ni pwomwoiu, me ni amu, me ni pati apulie pwo bwohemwo. Ke lé tai cuwo ânebuhe a atebwo te Padaame, me pali *Nahi Muto. Ke lé tai cuwohe ni epwén pwojo, ke lé tai pé ne he ilé, ni madi alica.

† 6.16 Luka 23.30; Osé 10.8†† 6.17 Joël 2.11; Malachie 3.2 † 7.1 Jérémie 49.36; Daniel 7.2 †† Ine—Sceau; Padué na e mulip—A bwopiinen mwo pie: Padué na e ne a mulip. †† 7.3 Ézékiel 9.4,6; Pii Beetihî 9.4 ††† 7.4 Pii Beetihî 14.1,3 ††† 144000—A inenaado ko a bwo hején jélé ati ni apulie te Padué (12 x 12 x 1000). Omehi note

¹⁰ †Ke lé tai toii da pie: «Geu caa celuimikeme, wogo Padaame Padué heme, na go tebwo pwo a atebwo tem, ke wogo pa Nahi Muto!»

¹¹ Ke lé tai cuwo aujehi a atebwo naa: Ke é aujeni lépwo ukéiu, ke wo lépwoli âcélo li paa jélé, li lé pwohewii ni wota. Ke lé tai miibule, me tidihî jililé ânebuhe a atebwo he daame, ke lé pipwoun de Padué.

¹² ††Ke lé pii pie:

«Amen! Wâé heme wonaa!
Pipaunu Padué henye!
Olé me ubwo ten!
Be eten ni pipwojunuun,
ke a bwo temehi nen den,
ke a niihen, me a wâé ten!
Jan me pietiang da!
Wâé heme wonaa! Amen!»

Lé âbé mu he ni picani me ni téé

¹³ Nebwén, ke e [biteeng ne kong] wo pa céiu ukéiu, ke e tahimwoéo pie: «He woélé ni apulie na lé ko cuwohe ni epwén pwojo, ke lé âbé mu wé?»

¹⁴ †††Ke é hegi ne ten pie: «Pa daame, te wogo pana go temehi.»

Ke e pii tong pie: «Woélé, ke lépwona lé âbé mu he ni picani me ni téé na junihe ubwo. Lé caa puu ni epwénéle ne ha a cewéhe pa Nahi Muto ††, ke ni epwénéle, ke caa pwojo.

¹⁵ «Lé cuwo he pwahamii Padué, na e tebwo pwo a atebwo ten.

Ke lé pipwoeabwé
heme bwén ke pwang,
ne ha a *mwaiitihî ten.

Ke e bo wéilé wo pana e tebwo
pwo a atebwo he daame.

¹⁶ †††Ke o caa time uce menelé,
ke o caa time uce nimelé
me lé ûdu;

ke o caa time uce éle jélé
ko a téale, me a éle.

¹⁷ ††Éa, be bo pa awéihî muto telé
wo pa Nahi Muto na e mwonuhî
a atebwo he daame.

E bo péélé nge ha acaamatabe,
a tabe na e ne a mulip.

Ke wo Padué, ke e bo tahi
ati ni tabehaamiilé.»

§ 7.10 Pii Beetihî 4.10 † 7.12 Pii Beetihî 5.12 †† 7.14 Daniel 12.1; Mataio 24.21 †† Lé caa puu ni epwénéle ne ha a cewéhe pa Nahi Muto—A ocine ko Iésu Kériso, he e pwo me wâé ni pwonimelé ne he pwahamii Padué, he e mele me delé ne ko a kuricé. ††† 7.16 Ésaie 49.10 † 7.17 Psaume 23.2; Ésaie 25.8; Pii Beetihî 21.4

Tuwo a bénebwéne apinyihi ko ali tii

7 <β> Pwopweehi ni tutu

8 E tuwo ali bé⁷ he apinyihi ko ali tii wo pali *Nahi Muto. Ke é ha a benaamwon naa, ke te ju tice pwocihe jeda he miiden he na céiu bebehi inetéale. ² Ke é ali ni *âcélo na 7 jélé na lé ko cuwo he pwahamii Padué. Ke muko pétaapwo ne telé ni tutu.

³ †Ke e âbé cuwo mwonuhi a *apwoâpwailo wo pa céiu âcélo, ke e pé a mwocini tabe ûde na mwani megele, ke e hegi ni tabe ûde na te junihe hiwon. Ke e patih ni pehi ni pwopwoiitih te ati ni apulie te Padué, ne pwo a apwoâpwailo mwani megele na e ânebuhe a atebwo he daame. ⁴ É mu ha a naatii pali âcélo, ke e taa he pwahamii Padué a muu tabe ûde ne pehi ni pwopwoiitih te ati ni apulie ten.

⁵ ††Ke e pé ali mwocini tabe ûde wo pali âcélo, ke e paobaahi ko a miû ko ali apwoâpwailo, ke e tahi ole pwo bwohemwo. Ke pwo ni pwocihe ‡, ke te ilehi kuti, ke e huu wo tikekele, ke penem a bwohemwo.

7 âcélo ke 7 tutu <γ>

(Pwahamii tii: 8.6—11.18)

⁶ Lé pipwopweelé wo lépwoli 7 âcélo, beme lé cuu li tutu telé.

1 <γ> Cini a céiu duaa bwohemwo

⁷ †E cuu a tutu ten wo pa bécéiuhen, ke lé te tupwo kuti, ne pwo bwohemwo, ni aceute na te junihe ubwo ke te junihe bwala ††, ke a miû na pwo cewéle hen. Ke e cini taabwon a céiu duaan ††† mu ko a bwohemwo, ke a céiu duaan mu ko ni acuwu, me ni meté na e mu pwon.

2 <γ> Megele a céiu duaa jíé

⁸ E cuu a tutu ten wo pa béalohe âcélo, ke e te tupwo kuti ne he jíé a miû, na pwohewii a juwole na te junihe ubwo. Ke cewéle a céiu duaan mu ko a jíé. ⁹ Ke lé mele a céiu duaan mu ko nina lé mulie ne he jíé, ke tanahi a céiu duaan mu ko ni ong.

3 <γ> Maga a céiu duaa éémwa

¹⁰ E cuu a tutu ten wo pa bécíéhe âcélo. Ke e te tupwo kuti a ceni na te junihe ubwo, ke e pwéélang ngen pwohewii ni ei, ke e tupwo ne pwo a céiu duaan mu ko

† 8.3 Exode 30.1—3; Pii Beetih 5.8 †† 8.5 Exode 19.16—19; Lévitique 16.12; Pii Beetih 11.19, 16.18 ‡ Pwocihe—Ai, Tihinaado.

†† 8.7 Exode 9.23—26; Ézékiel 38.22; Joél 3.3 †† Ni aceute na te junihe ubwo ke te junihe bwala—Grêe. ††† A céiu duaan—Grek: A céiu duaan mu ko ni duaan na cié. Piwien ne he ni niide a tii 8—12.

ni éémwa, me ni acaamatabe. ¹¹ †††A nii a ceni naa pie 'Muceni'. Ke a céiu duaan mu ko a tabe, ke mucenihi. Ke te junihe hiwon ni apulie na lé mele kon.

4 <γ> Bwiile a céiu duaa téale me a wole

¹² †E cuu a tutu ten wo pa bépahe âcélo. Ke tanahi a céiu duaan mu ko a téale, ke a wole, ke ni ceni. Ke bwiile ni duaan na tanahi: Ke patieden a céiu duaan mu ko a pwéélang he a tan, ke a bwén mwo.

¹³ ††Ke é niê daamwo, ke é alihi a bwaolée na e ko téé ko miiden, ke é téneeng he ko toii da pie: «Pwoééhe! Pwoééhe! Pwoééhe ni apulie pwo bwohemwo, heme lé bo cuu ni tutu telé wo lépwo béé âcélo na cié jélé!»

A bénim he ni tutu

5 <γ> Kolée na pwo dan

9 ††E cuu a tutu ten wo pa bénim he ni *âcélo. Ke é alihi a ceni na e caa tupwo ne pwo bwohemwo mu he miiden. Ke e hegi a kilé, ko a pwon na te tice anebwén kon ††, é lang he na lé pwocuhinaado nelang ne ni iténaado. ² ††E tehi ali pwon na tice anebwén kon na ali ceni, ke e taawie a muun, na pwohewii ni muu miû na te junihe ubwo. Ke piing a téale, me a amu, wonaa mu ko a muu ali pwon.

³ Ke lé wie mu ha ali muu miû ne ni kolée, ke lé talui a bwohemwo. Lé hegi ni pipwojunuun, na piwien me ni *scorpion* pwo bwohemwo, heme lé wolikenye. ⁴ ††Ke he icehi ana paciitih kolé me lé nemwo pwotahi ni meté, ke ni naado na cemi, me ni acuwu. Kehe te ju pwo mwomwon delé cehi me lé pwotahi ne ko ni apulie na tice ine Padué pwo bwaadelé. ⁵ Te tice mwomwon delé me lé taunulé, kehe me lé te junihe pwo me lé picani he na nim ni wole, pwohewii a bwo cunu ne ni awoli he ni *scorpion*.

⁶ †É ha a benaamwon naa, ke ni apulie, ke lé o hane a mele, kehe icehi ana time lé o bo uce tooli mwo. Ke o nimelé me lé mele, kehe a mele, ke e caa ecelé.

Ni duée na lé wie mu ha ali pwon

⁷ ††Ni kolée, ke lé pwohewii ni haricaan na lé piwâmihi ne ko pa. Ke pwo ni boolé, na pwohewii ni kuron na mwani megele. Ke ni pwahamii, ke pwohewii ni pwahamii apulie. ⁸ †††Ke ni apunilé, ke bwali pwohewii ni apuni ni toomwo. Ke ni pecuwolé, ke pwohewii ni pecuwo liô. ⁹ ††††Pwohewiin heme lé cu-

††† 8.11 Jérémie 9.14 § 8.12 Ézékiel 32.7; Pii Beetih 6.12—13 §† 8.13 Pii Beetih 9.12, 11.14 §†† 9.1 Pii Beetih 20.1 §† Pwon na te tice anebwén kon—Karépu te ni duée me ni jenen na ta, âcehi a bwo niimihi nen de lépwo Juif (omehi Luka 8.1); ai a amu te lépwo améle (omehi Roma 10.7 me a note §†† 9.2—3 Genése 19.28; Exode 10.12—15; Joél 2.2, 10 §† 9.4 Pii Beetih 7.3 §† 9.6 Job 3.21; Jérémie 8.3 §†† 9.7 Joél 2.4 §†† 9.8 Joél 1.6 §†† 9.9 Joél 2.5

wohe ce epwén toki. Ke a tihi ni puuilé, ke pwohewii a tihi ni otuun na lé céi ne ni haricaan na hiwon jélé, na lé tête ne ko pa. ¹⁰ Ke pwo ni tubwolé, na pwohewii ni tubwo *scorpion*, ke don ni utehen. É ko ni tubwolé, ke jan me lé pwotahi ne ko ni apulie he na nim ni wole.

¹¹ Pa daame he ni koléé, ke pa âcélo he ali pwon li tice anebwén kon. É he pwo *ébéru, ke a niin pie Abadon †, ke é he pwo *grek, ke a niin pie Apolion, a bwopiinen pie ‘pa ataunuhi apulie’.

¹² E caa âdé a bécéiue apwohi ††. Ke é alecehe anaa, ke o alo lupwo apwohi na lu o mwo âmwobé.

A bé6 he tutu

6 <y> A pa na te junihe ubwo

¹³ E cuu a tutu ten pa bé6 he âcélo. Ke é téne a pwocihe na e âbé mu he ni uhi a *apwoâpwailo mwani megele na e mu he pwahamii Padué. ¹⁴ A pwocihe, ke e pii te pa bé6 he âcélo, na e cuwo imi a tutu pie: «Go pawie lépwo âcélo na paa jélé ‡, na cielé ne mwonuhi a éémwa ubwo Eufrate.»

¹⁵ ††Ke e pawie lépwoli âcélo li paa jélé, li lé caa pi-wâamilé ne ko a inetéale, ke a tan, ke a wole, ke a jo na me lé taunuhi a céiu duaan ‡† mu ko ni apulie pwo bwohemwo.

¹⁶ Lé pii tong a jéhi ni coda na lé tebwo pwo haricaan pie, *200 million*. ¹⁷ Te wonaa mwo a bwo alilé tong: Pwo ni epwén toki pwo bwaangelé, na hiwon ni apunen, ke megele pwohewii ni miû, ke pun bwiile pwohewii ni péi na pwomelaan, ke nyen pwohewii a dep na éle ‡†. Ke ni puni ni haricaan, ke pwohewii ni puni ni liô. Ke lé puutih ni miû, ke ni muu miû, ke ni dep na éle.

¹⁸ A miû, ke a muu miû, ke a dep na éle, na lé wie mu pwo ni haricaan, ke ni cié apwohi na ubwo. Ke lé taunuhi a céiu duaan mu ko ni apulie pwo bwohemwo. ¹⁹ Be a junuu ni haricaan, ke e mu pwolé, ke é ko ni tubwolé. Ni tubwolé, ke pwohewii ni bwien; pwo ni punilé beme lé pwotahi ne ko ni apulie.

Time lé uce bitelé ne ni apulie

²⁰ ‡†Te junihe ubwo ni apwohi naa, kehe time lé uce taatéhi ni mulihelé ne ni apulie na lé mu. Be lé mwo te cuwo ko pwoeabwé te ni duéé me ni démenaado § na time lé uce niê, ke time lé uce téne, ke time lé uce engen. Be nina lé te pwo, woélé, ko ni mwani megele,

† Abadon—A bwopiinen mwo pie: a Amu te lépwo Amele. Omehi Job 26.6; 28.22; Psaume 88.11b; Proverbes 15.11. †† Apwohi—Malheur, plaie, fléau. ‡ Lépwo âcélo na paa jélé—Wielé lépwoce âcélo celi ta jélé. Time uce lépwo âcélo na paa jélé ne ha a niide a tii 7.1. Ke time uce lépwo âcélo na paa jélé na lé pwohewii ni wota. ‡† 9.15 Pii Beetihi 8.7–12 ‡† A céiu duaan—Grek: A céiu duaan mu ko ni duaan na cié. ‡†† Dep na éle—Soufre. ‡†† 9.20 Psaume 115.4–7, 135.15–17; Daniel 5.23; Pii Beetihi 16.9,11 § Démenaado—Idole.

me ni mwani pwojo, ke ni toki na te junihe mwou, ke ni péi, me ni ba-acuwo. ²¹ Ke lé mwo te cuwo ko pitaunulé, ke lé pwodooki, ke lé pipule hauli, ke lé bune.

Pa âcélo me a cuwo nahi tii

¹⁰ É ali pa céiu *âcélo na pwojunuun, na e opé mu he miiden. Ke pwo a nii na e tawiieng, beme a epwéne. Ke e mu pwo punin aduwoho, beme a boon. Ke a pwahamiin, ke pwomelaan pwohewii a téale. Ke te junihe pwo niihe lupwo an, ke pwohewii ni duwele miû. ² Ke e pé ne he in a cuwo nahi tii na tehi. Ke e ca pwo jié ko a an ne pwo juin, ke e ca ha a meiuhi ko a an ne pwo eaamun.

³ Ke e cihe da me ubwo pwohewii a liô [heme e okéé]. Ke me e cihe, ke ni tikekele na 7 jélé, ke lé hegi ko ni pwohuu telé.

⁴ ††É alecehe ni 7 pwohuu te tikekele naa, ke nimung me é tii nina lé pii ne li 7 pwohuu te tikekele. Ke é ha a benaamwon naa, ke é téne a pwocihe mu he miiden na e pii tong pie: «Go nemwo tii nina lé pii ne ni 7 pwohuu te tikekele. Kehe go neduwohi!»

⁵ ††Ke wo pali âcélo li é alieng, he e ko cuwo pwo jié, ke é ha a meiuhi, ke e eti da he miiden a in ne pwo juin, ⁶ beme e *piapwo ne he nii Padué na e *mulie dieli mwo, ke e pwo a miiden, me a bwohemwo, me a jié, ke ati ni naado na e hen.

Ke e pii wo pali âcélo pie: «O caa time uce bwolihi [ace bwo ucéihi nen dewé]! ⁷ ††É ha a benaamwon na e bo tabuhi cuu a tutu wo pali bé7 he ni âcélo, ke e o bo caa pacuwohi *a bwo niimihinaado ten wo Padué, na e ha aduwo. E caa pipatemehi anaa te ni eabwé ten, ni péroféta.»

Go wii ke go pii beetihi

⁸ Ke e cihe tong mwo a pwocihe mu he miiden na é caa mi téne, ke e pii pie: «Go â pé a [cuwo nahi] tii na tehi, mu ha a i pa âcélo na e ko cuwo pwo a jié, ke é ha a meiuhi.»

⁹ ††Ke é piâ céii pali âcélo, ke é ileeng me e ne tong ali cuwo nahi tii. Ke e pii tong pie: «Go pé ke go wii. O maga ne tinam, kehe é ne pwom, ke o te junihe neje pwohewii ni duhimepu.»

¹⁰ ††É pé ali cuwo nahi tii mu ha a i pali âcélo, ke é wii. Ke te junihe neje ne pwong pwohewii ni duhimepu. Kehe me é nemihi, ke te junihe maga ne tinang.

¹¹ Ke e pii tong mwo pie: «Go pii beetihi mwo a pwooti te Padué, ne ko ni bele na hiwon, ke ni amu, ke ni pati apulip, ke é ne mwo ko ni daame na hiwon jélé.»

§† 10.4 Daniel 12.4,9 §†† 10.5 Deutéronome 32.40; Daniel 12.7 §† 10.7 Amos 3.7 §†† 10.9 Ézékiel 2.8, 3.1–3 §† 10.10 Ézékiel 3.3

Lépwō apajuuju Padué

11 †Pwo pa céiu na e ne tong a bewomeéle na pwohewii a ba-acuwo, beme a béja. Ke e pii tong pie: «Go â jahi a *mwaiitihi te Padué, ke a *apwoâp-wailo. Ke go pine mwo nina lé pwoiitihi ne ha a mwaiitihi. 2 ††Ke go nemwo jahi a napwomwo ko a mwaiitihi. Go nemwo jahi, be genye necu ne ko nina time lé uce temehi Padué. Lé o pé pihuô ati ha a pwomwo ubwo iitihi † he na 42 ni wole.

3 «Ke é bo ne a pihuô te lupwo apajuujué na lu cuwohe ni epwén he doole mele. Ke lu bo cihe ko a nii Padué he na 1260 ni tan.» 4 ††Lupwōnaa, ke lupwo *olivier*, ke lupwo mwomiû na lu cuwo he pwahamii Padaame he a bwohemwo ati.

5 ††Mepie nime pace céiu apulie me e pwotahi ne kolu, ke e o wie mu pwo lu a miû, ke o éle nang. Éa, wo pace apulie celi nimen me e pwotahi ne kolu, ke o wonaa ace bwo mele ten. 6 †††Ke pwojunuulu me lu pacuwohi a ute me ole ha a benaamwon na lu ko cihe ko a nii Padué. Pwojunuulu me lu taatéhi a tabe me a cewéle. Jan me lu tanahi a bwohemwo ko ni toto bwomunen ko ni apwohi na ubwo, piohiwon juluheme nimelu.

Ana e o tuie ne kolu

7 †††Ke me lu caa panebwnihi a bwo *pajuujuhi nen delu, ke pa iténaado † na e taa mu ha ali pwon li tice anebwén kon, ke e o pwopa ne kolu, ke e o piwéden kojalu, ke e o taunulu.

8 ††Ni éélu, ke e o te mu ha apimu ibu ne ha a pwomwo ubwo †††, é lang he na lé cemeite Padaame helu ne ko a *kuricé. A nii a pwomwo ubwo naa pie 'Sodome' ai 'Aigupito' ††. 9 Ke ni apulie mu ati he ni bele, ke é mu he ni pwomwoiu, ke é mu ati he ni pati apulie, ke é mu ati he ni amu, ke lé bo âbé alihi ni éélu he na cié ni tan, ke pwo a behin. Ke time lé o uce pwo me lé neduwolu.

10 Ke ni apulie pwo bwohemwo, ke lé o te nihe pipwodéén ko a bwo mele te lupwo péroféta naa. Lé o te junihe pituume, ke lé o muko pine telé ni âpati, be lupwo apulie naa, ke lu te junihe pwo me lé picani.

11 †††Kehe é alecehe ni tan na cié, ke pwo a behin, ke e te pamulipilu mwo wo Padué. Ke lu te cuwoda kuti. Ke te junihe mwoti nina lé alilu.

12 ††Ke lu téne a pwocihe na e âbé mu he miiden wo lupwoli péroféta, na e pii telu pie: «Geu taabé éni!»

† 11.1 Ézékiel 40.3; Zakari 2.5–6 †† 11.2 Luka 21.24; Pii Beetihi 13.5 † A pwomwo ubwo iitihi—Iérusaléma. †† 11.4 Zakari 4.3, 11–14 †† 11.5 2 Samuel 22.9; Psaume 97.3 ††† 11.6 Exode 7.17–20; 1 Samuel 4.8; 1 Rois 17.1 ††† 11.7 Daniel 7.21; Pii Beetihi 12.17, 13.7, 17.8 † Iténaado—Grek: A wota apiaba [na e mu kon a junuu Caatana]. †† 11.8 Luka 13.34 ††† Pwomwo ubwo—Wiel Iérusaléma, ai wieli a ocine ko a bwo pimui ibu te ati ni apulie na time lé uce paciiti Padué. †† Sodome ai Aigupito—A ocine ko lépwō

Ke lu taa he miiden, ne he ni nii, ne he pwahamii nina lé téétilu.

13 ††Ke é ha a benaamwon naa, ke te pwo kuti a penem bwohemwo na te junihe pwo niihen. Ke niihi a céiu duaan mu ko ni duaan na 10 mu ko a pwomwo ubwo, ke 7000 ni apulie na lé mele. Ke te junihe mwoti nina lé mwo te mulie, ke lé pipaunu Padué na e he miiden.

14 †††E caa âdé a béalohe apwohi. Kehe a béciéhen, ke e o te ju téele tuie.

A bénebwéne tutu

7 <y> Mwametau te Padué

15 †††E cuu a tutu ten wo pa bé7 he ni *âcélo. Ke geme téne ni pwocihe na te junihe pwo niihen ne he miiden, na lé pii pie:

«A mwametau pwo bwohemwo, ke caa ne mwo te Padué Padaame henye me pa *Mesia ten. Ke e o Daame dieli mwo.»

16 Ke lé tai miibule, me tidihijililé wo lépwoli 24 ukéiu, li lé tebwo pwo li atebwo telé ne he pwahamii Padué.

Ke lé pipaunueng, 17 ke lé pii pie: «Padaame Padué na pwojunuum ne ko ati ni naado, wogo ânebun, ke wogo jena. Geme pipwo-olé tem.

Go pihuô ha a junuum na ubwo, ke é jena, ke go daame.

18 †††Lé okéé ne ni bele.

Kehe caa a benaamwon na go habwii a okéé tem beme go tauti ni amele.

Caa a benaamwon na go pwoceme ni eabwé tem, ni péroféta, me ni apulie tem, nina lé paciitiko, nina piticenaado ne kolé, me nina pwonaado ne kolé.

Caa a benaamwon na go tanahi nina lé pwotahi a bwohemwo.»

apulie na time lé uce paciiti Padué. ††† 11.11 Ézékiel 37.5, 10 †† 11.12 2 Rois 2.11 †† 11.13 Pii Beetihi 6.12, 16, 18 ††† 11.14 Pii Beetihi 9.12 ††† 11.15 Exode 15.18; Psaume 10.16; Daniel 2.44, 7.14 ††† 11.18 Psaume 110.5, 115.13; Roma 2.5; Pii Beetihi 20.11–13

7 ni inenaado <δ>

(Pwahamii tii: 11.19—15.4)

¹⁹†Ke tehi a mwaiitihi te Padué he miiden, ke é alihi a mwopiapwo †† ne ha a mwaiitihi ten. Ke pwo ni ilehi, ke a tihinaado na ubwo ‡, ke e huu na a tikekele, ke penem a bwohemwo, ke e ole a ute na te junihe ubwo, ke te junihe bwala ††.

1 <δ> Ê toomwo me a dragon

12 Pwo a inenaado na te nihe ubwo, na e tuie ne he miiden: ê toomwo na tawiieng ko a téale ††. Ke a wole, ke e haahi ni an. Ke e pwobo ha a kuron na pwo ko ni ceni na 12. ²††E o te ju téele piâbeele ewa, ke e é ko ni picani ko piâbeele ewa. ³††Pwo a céiu inenaado na e tuie ne mwo he miiden: a dragon § na te junihe ubwo nang, ke megele nang pwohewii a miû. Ke 7 ni punin, ke 10 ni gi ten, ke é pwo ni pétaapwo punin, ke e mu pwon ni kuron. ⁴††Ke é ko a tubwon, ke e baléhi a céiu duaa ††† ceni mu he miiden, ke e tahi ole pwo bwohemwo. Ke e cuwo âneb- uhe ê toomwo na me e piâbeele ewa, beme e wii a naîn, hemepie e âbeele. ⁵††Ke e picile pa cuwo nahi aiu wo êgi toomwo. Ke e bo pihuôhi ati ni bele wo panaa, ko a bwaja toki ten. Ke me e pituie, ke te celuimieng kuti koja ali dragon, ne pele Padué, ne pwo a atebwo he daame ten. ⁶ Ke e cela nge ha a melé ††† wo êgi toomwo. É lang he na e piwâamihi a amu ten nelang wo Padué, beme cileeng nelang, he na 1260 ni tan.

E pwopa ne kon wo Michel

⁷††Ke é mulang, ke pwo a pa ne he miiden. Wo Michel me ni *âcélo ten, ke lé pwopa ne ko ali dragon me ni duéé ten ††. ⁸ Ke time uce pwo niihe ali dragon, be te tice mwomwon delé me lé mu he miiden. ⁹†††Ke ali dragon ubwo, ke tahieng ole pwomwo. Be pali

† 11.19 Ébéru 9.4; Pii Beetihi 8.5, 15.5, 16.21 †† Mwopiapwo—Lé mu lang ni 10 patén de Padué. Omehi Deutéronome 10.1—5 me Ébéru 9.4. A ocine ko a bwo pimu ibu te Padué me a bele ten. ‡ Tihinaado na ubwo—ai Pwocihe na ubwo. †† Ute na te junihe ubwo, ke te junihe bwala—Grêlé. ††† Toomwo na tawiieng ko a téale—A ocine ko a bele te Padué, he na e wie mulang wo pa Mesia, pa Naî Padué. A bele te Padué, ke wo lépwo Isaraéla, ke é jena, ke caa ati nina lé âcéi Iésu. ††† 12.2 Miché 4.10 ††† 12.3 Daniel 7.7 § Dragon—Ne ha a cihedéé te lépwo Juif, ke a paille na te junihe ubwo nang, na e mu ha anumwihi. A niin mwo pie Léviatan (Psaume 74.14). É ne éni, ke a dragon, ke a céiu niin pie Caatana. Omehi a nide a tii 9. †† 12.4 Daniel 8.10 ††† A céiu duaa—Grek: A céiu duaa mu ko ni duaa na cié. †† 12.5 Psaume 2.9; Ésaie 7.14, 66.7; Pii Beetihi 19.15 ††† Melé—Da (désert). A duaan na ticie hen. †† 12.7 Jude 1.9 †† Ni duéé ten—Grek: Ni âcélo ten. Éni, ke a bwopiinen pie ni âcélo na ta jélé, na nye pii kolé pie, ni duéé. ††† 12.9 Genèse 3.1,14; Luka 10.18, 22.31; Pii Beetihi 20.2

bwien he li bécéiuhe tan, a niin pie 'pa apipé ne konye', ai wo *Caatana, 'pa acubwonikenye'. Ke e pipwohuô te a bwohemwo ati. Ke tahieng ole pwo bwohemwo, woélé me ni âcélo ten.

¹⁰†††Ke é téne a pwocihe na ubwo na e âbé mu he miiden, na e pii pie:

«É jena, ke a benaamwon na e *celuimi wo Padué.

É jena, ke e daame ko a junuun.

E habwii a mwomwon den wo pa *Mesia.

Be e caa tahi ole Caatana, pana e pipé ne ko ni béénye, he ni tan ke ni bwén.

¹¹ Kehe lé piwéden kojaeng, ko a cewéhe pa *Nahi Muto; ko a pwooti na lé *pajuujuhi.

Be time uce piwâ jélé, me lé patupwo ni mulihelé, ke me lé mele me den.

¹² †††Geé pipwodéén, wogewé a miiden, ke wogewé na geé mu hen! Apwohi a bwohemwo me a jilé! Be e oté céiikewé wo Caatana.

Kehe e te junihe okéé, be e caa te temehi pie, caa tice benaamwon den.»

E tai êgi toomwo na ali dragon

¹³ Ke me e alihi na ali dragon pie, caa tahieng ole pwo bwohemwo, ke e tai êgi toomwo ¹⁸ li e picile pali cuwo nahi aiu. ¹⁴ ¹⁹Ke wo êgi toomwo, ke e hegi lupwo puui a bwaaoléé na te junihe ubwo nang. Ke e téé kojaeng nge ha a melé, ha a duaan na caa piwâamihi me den, ne ité koja a bwien. Ke e bo hegi ni wiinaado nelang he na cié ni jo, ke pwo a behin ²⁰.

¹⁵ Ke wo pali bwien, ke e puutihi a tabe na pwohewii a tabe he éémwa céi êgi toomwo, beme cetieng. ¹⁶ Kehe icehi ana e picani te êgi toomwo na a pule, ke e tehi a pwon, ke e nemihali tabe. ¹⁷ ²¹Ke e te junihe okéé kuti na ali dragon, ne ko êgi toomwo, ke e â pwopa ne ko ni nehi naîn. Ninaa, ke nina lé piténedehi ni pihuô te Padué, ke lé pajuuju Iésu ²².

¹⁸ Ke e te cuwo ticepwon ali dragon.

††† 12.10 Job 1.11; Zakari 3.1 ††† 12.12 Ésaie 44.23, 49.13 18 E tai êgi toomwo—Hiwon ni naado jena, na pwohewii a bwo celuimi lépwo Isaraéla koja pa daame Faraô mu Aigupito. Omehi Exode 1.22; 14.8; 19.4; Nombres 16.31—33. 19 12.14 Daniel 7.25, 12.7 20 Cié ni jo, ke pwo a behin—A bwopiinen pie: 42 ni wole: 1260 ni tan. Omehi Pii Beetihi 11.2—3. Grek: Ha a benaamwon na céiu, me ni benaamwon, me a céiu bebeh benaamwon. 21 12.17 Pii Beetihi 11.7 22 Lé pajuuju Iésu—ai Lé te cumang ne ko a juuju na e habwii wo Iésu.

2 <δ> Pa iténaado mu he jíé

13 †Ke é ali pa iténaado na e taawie mu he jíé. Ke a wota na 10 ni gi ten, ke 7 ni punin. É pwo ni pé-taapwo gi ten, ke e mu pwon ni kuron. Ke é pwo ni pé-taapwo punin, ke e mu pwon a nii na e pihooni Padué.

2 ††A één, ke pwohewii a *léopard†*. Ni an, ke pwohewii ni a *ours*, ke a pwon, ke pwohewii a pwo liô †. Ke e ne ten a niihen na ali dragon, ke a atebwo he daame ten, ke a pihuô ten na junihe ubwo. 3 ††Ke pwo ahinaado ko a céiu puni pali iténaado, ke te junihe ubwo, ke pwohewiin heme e caa mele. Kehe icehi ana caa te mali mwo, ke caa wâé.

Ke lé picedieng ati ne ni apulie pwo bwohemwo, ke lé âcén. 4 Ke lé pipaunueng, ke lé pii pie: «Woo celi pwo niihen pwohewii pa iténaado? Woo celi jan me e pwobwonieng? Te tice!»

Ke lé pipaunu mwo ali dragon, be weeng na e ne ten a junuun.

E pii me ta Padué

5 ††E caa te hegi wo pa iténaado, me e pii ni pwooti na ta ne ko Padué, ke ne ten a pihuô he na 42 ni wole.

6 Ke e te junihe pii me ta Padué me a niin, me a atebwo ten ne he miiden, me ati nina lé mu lang.

7 ††Ke e caa te hegi a junuun me e pwopa, ke me e piwéden koja ni apulie te Padué. Ke e caa te hegi mwo ni pihuô, ne ko ati ni apulie pwo bwohemwo: ati ni pwomwoiu, me ni pati apulie, me ni amu, me ni bele.

8 ††Ke lé tai pipwoun den ati ne ni apulie pwo bwohemwo na time uce tii ni niillé ne ha a Tii te pa *Nahi Muto, ha atabui ko a bwohemwo. Wo pa Nahi Muto, ke weeng kuti pana e caa mele, beme e *âpwailo.

9 [Woéo Ioane na é tii a tii ce, ke é pii pie]: Wo paceli pwo ce pwojéenen me e téne, ke wâé heme e téne!

10 §[Be o pwotahi ne ko ni apulie te Padué.] Lé o pwokarépu ne ce béén, ke o taunu ce béén. Kehe wâé heme lé imwi mangihi a céihi telé, ke me lé cumang [ne he celi e o tuie ne kolé].

3 <δ> Pa iténaado mu he pule

11 É alecehen, ke é ali pa céiu iténaado, na e taa tuie mu he pule. Ke a wota na alo ni gi ten, pwohewii ni gi te ni nahi muto, kehe icehi ana a patin he e cihe, ke pwohewii a dragon. [Ke a niin mwo pie pa péroféta agele †.] 12 Ke e penem me de pa iténaado: ali wota

ânebun, li caa mali mwo ali ahinaado kon. Be e hegi koja pali iténaado ati a pihuô ten, me a junuun.

Ke e cuwoko ati ni apulie pwo bwohemwo, beme lé pimiibule, ke pipwoun de pali iténaado li caa mali mwo ali ahinaado kon. 13-14 ††Ke e pwo ni inenaado na te junihe ubwo, ko ni pipwojunuun, ne he pwahamii pali iténaado. Be e neole a miû mu he miiden, ke lé tai tététihi ne ni apulie pwo bwohemwo. Ke ne ten me e pahaulilé, ke e huôhi ne telé me lé pwo ace déme pali iténaado li caa mali mwo ali ahinaado kon †.

E pamulipihi a déme iténaado

15 Wo pa béalohe wota naa, ke wo pali péroféta agele, ke e hegi a pihuô me e pamulipihi ali déme iténaado. Ke e ne te ali démen me e cihe, ke me e taunu ati ni apulie na time lé uce pipaunueng. 16 ††Ke e cuwoko ni apulie ati, me lé hegi a inen ne ko ni ilé ne pwo jui, ai é ne mwo pwo ni bwaadelé. E wonaa te ati ni apulie na piubwo jélé me nina piwahin jélé, ke ni béén na pwo naamuulé, ke nina tice delé, ke ni *apenem tice ja kon, ke ni apulie na time uce ni apenem tice ja kon †. 17 Ke te tice apulie celi jan me e pi-icu heme te tice inen. A inen naa, ke a nii pali iténaado, me a *numéro* na a ocine ko a niin †.

18 [Woéo Ioane na é tii a tii ce, ke é pii tewé pie]: Wo pace apulie celi e pitemang, ke wâé heme e temehi ehi a *numéro* te pali iténaado. Be a *numéro* ten, ke a nii pa céiu apulie: Ke 666 ††.

4 <δ> Pipaunu pa Nahi Muto

14 [É alecehen, ke é alihi mwo ni béé naado na o bo tuie]: É ali pali *Nahi Muto, he e ko cuwo pwo a juwole *Sion. Ke lé ko mu pelen ne ni apulie na 144000 jélé ††. Woélé ati, ke caa tai tii ne pwo bwaadelé a niin, ke a nii Caa ten.

2 ††Ke é téne a pwocihe, na e âbé mu he miiden, na pwohewii ni tih gitar celi te junihe hiwon. Te junihe ubwo a tihin, pwohewii a éé tabe pwobwaatéép 18 na te junihe ubwo, ke a huu he a tikekele. 3 19 Ni apulie naa, ke lé pwonyebi ânebuhe a atebwo iitih, ke é he pwahamii ni âcélo na paa jélé, na pwohewii ni wota, me ni ukéiu na 24 jélé. Ke mwo coho a nyebi telé, ke te tice pace céiu apulie celi e temehi, kehe te icehi ni 144000 na caa celuimilé mu pwo bwohemwo.

†† 13.13–14 1 Rois 18.24–39; Mataio 24.24; Pii Beetihi 19.20
 † Li caa mali mwo ali ahinaado kon—ai Li e caa mulie mwo.
 †† 13.16–17 Pii Beetihi 14.9–11, 16.2, 20.4 † Ni apenem tice ja kon, ke ni apulie na time uce ni apenem tice ja kon—Esclaves et personnes libres. † He pwo ébéru, ke grek, ke ni béé pwocihe, ke ni pétaapwo atii, ke te pwo a jéhin na e te â ko ni muko atii.
 †† 666—Âcehi a bwo niimihi nen de lépwo Juif, ke 6, ke a numéro te ni apulie. 666, ke a numéro te pana nimen me e tebwwo pwo a atebwo te Padué. †† 144000 jélé—Omehi note
 †† 14.2 Pii Beetihi 1.15, 19.6 18 Pwohewii a éé tabe pwobwaatéép... ai Pwohewii ni jíé na nihe ubwo. 19 14.3 Ésaie 42.10; Pii Beetihi 5.9, 7.4

† 13.1 Pii Beetihi 12.3, 17.3,7–12 †† 13.2 Daniel 7.4–6
 † Léopard, be e te junihe tété; Ours, be te junihe bwali ni piimwodéin; Liô, be te junihe bwali ke ânyee ni pecuwon. †† 13.3 Pii Beetihi 17.8 †† 13.5 Daniel 7.8,25, 11.36; Pii Beetihi 11.2 ††† 13.7 Daniel 7.21; Pii Beetihi 11.7 ††† 13.8 Psaume 69.29; Pii Beetihi 17.8, 20.12,15, 21.27 § 13.10 Jérémie 15.2, 43.11; Pii Beetihi 14.12 †† Pa péroféta agele—Omehi Pii Beetihi 16.13 me a note

⁴Woélé, ke ni apulie na time lé uce pwo me alili ni mulihelé, ne ko ni toomwo pwoywaaden †. Lé te pipaciitilé, ke lé âcéi pa Nahi Muto ati ne he na e â lang. Be e caa pwocuhilé †† mu hadenii ni apulie, beme lé bécéiue âpipati ne te Padué, me pa Nahi Muto.

⁵Time lé mu uce gele. Ke te tice ta pwo telé.

5 <δ> A pwooti te ni âcélo

⁶Ke é ali mwo pa céiu *âcélo na e ko téé ko miiden, beme e â pipatemehi te ni apulie pwo bwohemwo a *Pwooti Wâé na e dieli mwo, ne ha ati ni amu, ke ati ni pwomwoiu, me ati ni pati apulie, me ati ni bele.

⁷Ke e toii da pie: «Geé paciiti Padué, me pipaunueng ne ha *a wâé ten! Be e caa tuie a benaamwon, na me e tauti ni apulie pwo bwohemwo hen. Pipwoun de pana e tabuhi a miiden me a bwohemwo, me a jîé, me ni acaamatabe!»

⁸†Ke e âbé alecehen wo pa béalohe âcélo, ke e toii da me ubwo pie:

«E caa tupwo, e caa tupwo
ali pilehe Babulona ††
E pwo me lé ûdu
a tabe megele ten
ne ni amu ati.
Ke lé pipule hauli
pwohewiieng.»

⁹††Ke e âbé alecehen wo pa bécíéhe âcélo, ke e pii ha a patin na ubwo pie: «Mepie pwo pace apulie celi e pipaunu pa iténaado me a démen, ke me e hegi a inen ne pwo bwaaden, ai é ne pwo a in, ¹⁰††ke e o te ûdu mwo weeng, a tabe megele ko a okéé te Padué, na time uce tahagéi, na céihi ne ha a béûdu ko a okéé ten. Ni apulie naa, ke lé o te junihe picani ne ha a miû, me a dep na éle, ne he pwahamii ni âcélo iitihi, me pa Nahi Muto.

¹¹†††«Tee taa dieli mwo a muu a miû na e pwo me lé te nihe picani. Nina lé pipaunu pali iténaado me a démen, ke lé hegi a ine a niin, ke time lé uce mwaale, heme pwang ke bwén.»

¹²§Nina élé ko Padué, ke me lé ténédehi ni patén den, ke me lé cumang ne he ni céihi telé ne ko Iésu [he ni picani].

¹³Ke é téne a pwocihe na e âbé mu he miiden, na e pii pie: «Go tii pie: “*Adéi nina lé mele, tabuhi jena, mu ko a bwo céihi telé ne ko Padaame!”»

† 1re phrase—A ocine ko a mulie na wâé ne he pwahamii Padué, be te tice ta hen. †† Pwocuhilé—A ocine ko a bwo pipatupwo na a mulihe Kériso. † 14.8 Ésaie 21.9; Jérémie 51.7,8; Pii Beetihi 17.2, 18.2,3 †† Babulona—Omehi mwo Babulona ne ha a Niinaado (Vocabulaire) ha anebwén ko a tii. Ocine ko ati lépwona lé cubwoni Padué, ke pwotahi ne ko ni apulie ten. †† 14.9 Pii Beetihi 13.12–17 ††† 14.10 Genèse 19.24; Psaume 75.9; Ésaie 51.17,22; Jérémie 25.15–16; Ézékiel 38.22; Pii Beetihi 16.19, 20.10, 21.8 ††† 14.11 Ésaie 34.10 § 14.12 Pii Beetihi 13.10

E pii na a *Jenen Iitihi pie: «Éa, be lé o mwaale koja ni téé me ni picani telé. Ke lé o hegi ni cemelé mu ko ni penem delé ††.»

6 <δ> Pitii âdaanu

¹⁴††É niê ngemwo, ke é ali pa *Nahi Apulie ††, he e ko tebwo ha a nii na pwojo. Ke e pwobo ha a kuron na mwani megele, ke e pé a bépwoopi na te junihe ânyee.

¹⁵Ke é ali mwo pa céiu âcélo na e wie mu ha a *mwaitiitihi ††† [jeda he miiden]. Ke e toii da céii pali e tebwo ha ali nii pie: «Go penem ko a bépwoopi tem! Be caa tuie a benaamwon ko pitii âdaanu ††, be caa pun ni âdaanu!»

¹⁶Ke e tahi ole pwo bwohemwo ali bépwoopi ten wo pali e tebwo ha ali nii, ke e pitii âdaanu ati pwo a bwohemwo.

¹⁷Ke é alecehen, ke e wie mu ha a mwaitiitihi he miiden wo pa céiu âcélo. Weeng mwo, ke e te pé mwo a bépwoopi na te junihe ânyee.

¹⁸††Ke pwo pa céiu âcélo na e âbé mu ko *apwoâp-wailo, na jan ne kon me e pihuôhi a miû. Ke e toii da céii pali e pé ali bépwoopi li te junihe ânyee pie: «Go penem ko a bépwoopi tem, na te junihe ânyee, ke go tahagéi ni jele ace tabe megele pwo bwohemwo! Be caa megele.»

¹⁹Ke e tahi ole pwo bwohemwo ali bépwoopi ten wo pali âcélo. Ke e tahagéi li jele ace tabe megele pwo bwohemwo. Ke e tahi nge ha a mwopwoti tabe megele ko a okéé te Padué. ²⁰†††Ke lé hegeti li ace tabe megele, ne ha a mwopwoti nen ne pwomwo koja a pwomwo ubwo. Ke e téé a cewéle, ke e pwice nge he na 300 kilomètre, ke e taa die ko a paapwo haricaan.

7 <δ> Pwopweehi ni 7 apwohi

15 É alihi ne he miiden a céiu inenaado na te junihe ubwo, ke é téetihi: 7 ni *âcélo na lé pé ni 7 apwohi. Weengaa kuti ni bénebwéne picani, be a okéé te Padué, ke e o caa cuwo ne kolé.

²Ke é alihi a céiu jîé na pwohewii ni kéle, na pwo miû hen. Ke é alihi nina lé piwéden koja pali iténaado me a démen, ke a *numéro* na e habwii mwo a niin, he lé ko cuwo pwo a jîé na piniêdiihi, ke lé pé ni gitar te Padué.

³†††Lé pwo a nyebi te *Moosé, pa eabwé te Padué, ke a nyebi te pa *Nahi Muto:

«Te junihe ubwo ni penem dem,

†† Dernière phrase—ai Ni penem delé, ke pajuujuulé. Grek: Ni penem delé, ke te piâcéilé. ††† 14.14 Daniel 7.13 †† Pa Nahi Apulie—ai Pa apulie na pwohewii pa Nahi Apulie (Iésu Kériso). ††† Mwaitiitihi—A ocine cehi, be te tice ju mwaitiitihi celi e jeda he miiden. Omehi Pii Beetihi 21.22. †† Pitii âdaanu—Récolter. Wieli a ocine ko ni apulie ati, na o todelé ne ha a tautinaado te Padué (Osé 6.11), ai te ni apulie te Padué cehi, na lé bo taa ha a Mwametau ten (Maréko 4.29). †† 14.18 Joël 4.13 ††† 14.20 Ésaie 63.3; Pii Beetihi 19.15 ††† 15.3 Exode 15.1; Psaume 139.14, 145.17

ke ubwo a wâé tem, go Padué!
 Te junihe pwo niihem
 ne ko ati ni naado.
 A pwodaame tem
 ati ne ko ni bele!
 Mwomwon ni pwaadeniim!
 4 †Te wogo cehi na go iitihi.
 Te wogo cehi Padué.
 Woo pace apulie
 celi time uce mwotieng kom?
 Woo pace apulie
 celi time e o uce pipaunuko?
 O te tice paceli te ju céiu nang!
 Lé o tai âbé ne ni bele,
 ke lé o pimiibule
 ne he pwahamiim.
 Be lé caa tai alihi
 ni penem dem na wâé!»

7 mwotabe ko a apwohi <ε>

(Pwahamii tii: 15.5—16.21)

5 †É alecehen, ke é omehi, ke é alihi a *mwaiitihi na pwo ko mwaanu, he tehi ne he miiden. 6 Ke lé wie ne ni âcélo na 7 jélé, na lé pé ni 7 apwohi ‡ na te junihe ubwo. Ke lé cuwohe ni epwén na pwojo pwomelaan. Ke lé cie ni bwaangelé ko ni taihena na mwani megele. 7 Ke pwo pa céiu béé lépwo âcélo na paa jélé na lé pwohewii ni wota, na e muko ne te lépwo 7 âcélo naa, ni mwotabe mwani megele, na oba ko a okéé te Padué, pana e *mulie dieli mwo. 8 ‡Ke te oba kuti ali mwaiitihi ko muu miû, mu ko a bwo ubwo na a wâé te Padué, me a junuun. Ke te tice pace céiu apulie celi jan ne kon me e taa ha ali mwaiitihi, heme mwo time uce pacuwohi ni apwohi na 7 te ni 7 âcélo.

16 É alecehen, ke é téne a pwocihe na ubwo, na e âbé mu ha ali *mwaiitihi, na e pii te lépwo 7 *âcélo pie: «Geé â céihi ole pwo bwohemwo ni 7 mwotabe ko a okéé te Padué.»

1 <ε> Ni tongo

2 ‡E ân wo pa bécéiuhe âcélo, ke e céihi ole pwo bwohemwo a mwotabe ten. Ke e te tuie kuti ni tongo na te junihe ta ke mwiihi, ne ko nina e kolé a ine pa iténaado, me pipaunuhi a démen.

2 <ε> A jîé na megele

3 ‡Ke e âbé wo pa béalohe âcélo, ke e céihi a mwotabe ten ne he jîé. Ke te bitehi kuti a jîé, ke megele tooli, pwohewii a cewéhe pa apulie na e caa mele. Ke lé te tai mele ati ni naado na lé mu he jîé.

3 <ε> A éémwa na megele

4 Ke e âbé wo pa bécíéhe âcélo, ke e céihi a mwotabe ten, ne he ni éémwa, me ni acaamatabe; ke te cewéle kuti. 5 Ke é téne pa céiu âcélo, na e pihuôhi ati ni tabe, he e pii te Padué pie:

«Te wogo cehi
 pana go mwomwon!
 Be wogo jena,
 ke wogo ânebun!
 Wogo pana go iitihi.
 Mwomwon ke juuju
 a bwo tautilé tem.
 6 [Be lé pwo ana ta]:
 Lé pwo me téé
 a cewéhe a bele tem
 me ni péroféta tem.
 Ke go te paûdulé mwo
 ko a cewéle,
 beme a kuhinaado telé!»

7 ‡Ke é téne mwo a pwocihe na e âbé mu pwo ali *apwoâpwailo, na e pii pie:

«Éa, go Padaame,
 Padué na pwojunuun
 ne ko ati ni naado:
 Be juuju, ke mwomwon
 ati ni tautinaado tem!»

4 <ε> A éle

8 Ke e âbé wo pa bépaahé âcélo, ke e céihi a mwotabe ten ne pwo a téale. A téale, ke e hegi a junuun me e éle ni apulie ko a miû kon. 9 ‡Ke te junihe éle kuti ni apulie ko a éle na te junihe pwo niihen. Ke lé pii me ta a nii Padué na pwojunuun, na e ne ni apwohi naa. Kehe time lé uce pitaatéhi ni mulihelé, ke time uce nimelé me lé temehi a bwo ubwo Padué.

5 <ε> A bwén

10 ‡Ke e âbé wo pa bénim he ni âcélo, ke e céihi a mwotabe ten, ne pwo a atebwo te pa iténaado. Ke a bwén, ke e tawii a mwametau te pali iténaado. Ke lé piwii ni upehelé ne ni apulie, ko ni bwo picani telé. 11 Ke lé pii me ta Padué he miiden, watihen ni bwo picani

† 15.4 Psaume 86.9; Jérémie 10.6—7 †† 15.5 Exode 38.21 ‡ Apwohi—Malheur, plaie, fléau. †† 15.8 1 Rois 8.10—11; 2 Chroniques 5.13—14; Ésaïe 6.4 ‡‡ 16.2 Exode 9.10; Pii Beetihî 13.12—17

‡‡† 16.3—4 Exode 7.17—21 ‡‡‡ 16.7 Psaume 19.10; Pii Beetihî 15.3 § 16.9 Pii Beetihî 9.20—21 §† 16.10 Exode 10.22; Ésaïe 8.21—22

telé, me ni ahinaado kolé, kehe time lé uce pininim me lé cuwo koja ni ta pwo telé.

6 <ε> Meiu a éémwa Eufrate

¹² †Ke e âbé wo pa bé6 he ni âcélo, ke e céihi a mwotabe ten ne ha a éémwa ubwo Eufrate, ke te ju meu kuti ali éémwa. Beme o bo a pwaadeni lépwo daame na lé bo âbé mu ha a duaan na e taa tuie hen a téale.

¹³ Ke é alecehen, ke é alihi ni duéé na cié jélé, pwohewii ni gérénuen ††. Ke lé wie mu pwo a dragon, ke é mu pwo pa iténaado, ke é mu pwo pa péroféta agele ‡.

¹⁴ ††Be e nelé bé wo *Caatana, beme lé pwo ni *in-enaado na pwojunuun. Lé â too ni daame ati pwo bwohemwo, be nimelé me lé neibulé, ne ko a pa he a tan ubwo te Padué na te junihe pwojunuun.

¹⁵ ††E pii wo Padaame pie: «É bo mwojuia mwobé †† [ke é o patéetikewé] pwohewii pa abune [he bwén]. Ke *adéi pana time e uce pule, ke e te cile ni epwénen ne cebwon, beme time e o uce engen heme te tice naamuun, ke me time o uce tanim nang, heme lé alieng ne ni apulie.»

¹⁶ †††Wo lépwoli duéé, ke lé taineibu ni daame pwo bwohemwo, ne ha a duaan na pii kon he pwo *ébéru pie Armaguédon.

7 <ε> Penem a bwohemwo

¹⁷ Ke e âbé wo pa bé7 he ni âcélo, ke e céihi a mwotabe ten nge ko miiden. Ke é téne a pwocihe na ubwo na e âbé mu pwo a atebwo te Padué, ne ha a mwaitihî, na e toii da pie: «Caa tai cuwo ati!»

¹⁸ †Ke ilehi, ke pwo ni pwocihe, ke e huu wo tikekele, ke pwo a penem bwohemwo, na te junihe pwo niihen. Tabuhi he pwo ni apulie pwo bwohemwo, ke time genye uce téele alihi ace penem bwohemwo celi wonaa. ¹⁹ ††Ke tanahi ni pwomwo ubwo ne pwo bwohemwo. Ke pipii me cié mu ko a pwomwo na junihe ubwo †††. Ke time e uce neuhi *Babulona wo Padué, ke e pwo me e ûdu ha a mwotabe na oba ko tabe megele ko a okéé ten na ubwo.

²⁰ ††Ke tieden ati ni één, ke caa time nye uce alihi ni juwole. ²¹ †††Ke lé te tupwo kuti mu he miiden ni aceute na pwo 40 kilo, na bwala. Ke lé tanahi ni apulie. Ke lé

pii me ta Padué, watihen a apwohi na ubwo ko a ute na bwala. Be te junihe ubwo a apwohi naa.

Ê toomwo pwopwaaden Babulona

¹⁷ ††É alecehen, ke e âbé céiié wo pa céiu béé lépwoli 7 *âcélo, li lé céihi li 7 mwotabe. Ke e pii tong pie: «Go âbé, me é habwii tem a kuhinaado [na e bo ne wo Padué] te ali pwomwo ubwo li e mu ko jije ni tabe na hiwon ††, na pii kon pie 'Ê toomwo pwopwaaden, na te junihe ta nang'. ² †††[Be te junihe mwiihi ni penem den.] Be lé pipule ††† me ati ni daame pwo bwohemwo. Ni huô ten, ke pwohewii a tabe megele, na e ne te ni apulie pwo bwohemwo, beme lé tai piolo, ke me lé pipule hauli me weeng.»

³ †††Ke e âbé kong a *Jenen Itihî, ke e pééo nge ha a melé wo pali âcélo. Ke é ali ê toomwo na e tebwo pwo a wota na megele, [pali iténaado ¹⁸]. Ke 7 ni puni a wota naa, ke 10 ni gi ten, ke tawiieng he ni niinaado na pii me ta Padué kon.

⁴ ¹⁹Wo êgi toomwo, ke e cuwohe a epwén na pun ke megele [pwohewii ni epwéne lépwo daame, me ni apulie na piubwo jélé]. Ke te ju oba nang ko mwani megele, ke *perle*, ke ni péi na ubwo ni cuhin, na pwomelaan. Ke e pé a mwotabe mwani megele, na oba ko ni naado na mwiihi. Be ni naado na ta ko ni bwomu ten na te junihe ta. ⁵ Ke tii ne pwo bwaaden a nii na neduwohi, na pii pie:

*BABULONA NA TE JUNIHE UBWO:
NYAA TE NI TOOMWO PWOPWAADEN,
ME ATI NI HUÔ NA MWIIHI
NE PWO BWOHEMWO.*

⁶ ²⁰Ke é alihi pie e piolo, be e caa junihe ûdu a cewéhe ni apulie te Padué na taunulé mu ko a céihi telé ne ko Iésu.

Pii te Ioane a bwopiinen

É omeeng, be é te junihe téetieng. ⁷ ²¹Ke e pii tong wo pali âcélo pie: «É ko ade na go téetieng? É bo pii tem a bwopiinen na neduwohi ne ko ê toomwo naa, me a wota na e ko pééeng: [pali iténaado] li 7 li punin, ke 10 ni gi ten.

⁸ ²²«A wota na go alihi, ke e mwo te mulie bwolihi, kehe é jena, ke caa tieeng. Ke e bo taamwobé, mu ha a pwon na te tice anebwén kon ²³, beme e â pipatiede-

† 16.12 Ésaie 11.15 †† Gérénuen—Wieli a ocine ko a pwooti te lépwo duéé na mwiihi. ‡ Pa péroféta agele—Tabuhi mu ko a niide a tii ce, ke a béalohe wota, na e taa tuie mu he pule (13.11–15), ke a niin pie, pa péroféta agele (omehi 19.20; 20.10). †† 16.14 Pii Beetihî 19.19 †† 16.15 Mataio 24.43–44; Pii Beetihî 3.3 ††† É bo mwojuia mwobé—A bénebvéne bwo tuiebé te Iésu. ††† 16.16 Zakari 12.11 † 16.18 Pii Beetihî 4.5, 8.5 †† 16.19 Pii Beetihî 14.10 ††† Pwomwo... Wieli Babulona (ocine ko Rome. Omehi a note

‡ 16.20 Pii Beetihî 6.14 ††† 16.21 Exode 9.23–24; Pii Beetihî 11.19

†† 17.1 Jérémie 51.12–13 †† Pwomwo ubwo... Babulona ânebun, ke a ocine ko Rome, na junihe ubwo ha a benaamwon de Ioane. Ke a ocine ko ati ni pubu apulie na time lé uce paciiti Padué.

††† 17.2 Ésaie 23.17; Jérémie 51.7; Pii Beetihî 14.8 ††† Lé pipule—A mulie pwopwaaden (prostitution), ke a ocine ko a bwo pi-paunuhi ne ni duéé hauli. Ke a ocine mwo ko a bwo time uce paciiti Padué. ††† 17.3 Pii Beetihî 13.1 18 Pali iténaado—Omehi Pii Beetihî 13.1. 19 17.4 Jérémie 51.7; Pii Beetihî 18.16 20 17.6 Pii Beetihî 18.24, 19.2 21 17.7 Pii Beetihî 13.1 22 17.8 Daniel 12.1; Pii Beetihî 11.7, 13.7 23 Pwon na te tice anebwén kon—Omehi note

nieng. Ke lé o téetieng ne ni apulie pwo bwohemwo: nina time uce tii ni niilé ne ha a tii ko a mulip, ânebuhe a bwo tabuhi na a bwohemwo.

⁹ «Wo pana e tauti ehi ni naado, ke wâé heme e temehi ni, pie: Ni 7 punin naa, ke ni cuwo nahi juwole na 7 †, na e mu pwon ê toomwo naa. Ke te ni daame na 7 jélé. ¹⁰ Be lé caa tupwo ne nina nim mu kolé, ke e mwo te mu wo pa céiu. Ke mwo te tie pa céiu. Ke hemepie e bo tuie, ke time o uce bwolihi ace bwo mu ten. [Be e caa te pacuwohi anaa wo Padué.]

¹¹ «Wo pali iténaado li e mulie ânebun, ke caa tieeng, ke weeng kuti pa bé8 he ni daame. Be te pa céiu béé lépwoli 7 daame ânebun. Ke e bo mwojuia mwo, beme e bé8 mwo he ni daame, ânebuhe a bwo pipatiede-nieng.

¹² ††«Mepwo ni gi ten, na go alihi, ke ni 10 daame, na mwo te tice mwametau telé. Ke o te ju ne telé cehi a cuwo benaamwon na time uce bwali ‡, me lé pihuô hen, me pa iténaado.

¹³ «Te céiu a bwo niimihinaado telé, me lé ne te pali iténaado ni junuulé, me a mwomwon me lé pihuô. ¹⁴ Be lé bo pwopa ne ko pa *Nahi Muto. Kehe icehi ana e o te piwéden kojale. Be te weeng kuti pa Apihuô te ni apihuô, ke e Daame he ni daame. Ke lé o tai piwéden me weeng †† ne nina e todelé wo Padué, ke pipégalié, na lé cumang ne he ni céihi telé.»

Lé tééti êgi toomwo wo lépwo daame

¹⁵ E pii tong mwo wo pali âcélo pie: «Go alihi ni tabe na hiwon, he na e mu lang wo êgi toomwo pwop-waaden, ke ni puapulie, me ni pati apulie, me ni amu, me ni bele.

¹⁶ ††«Ni 10 gi ten na go alihi, ke pa iténaado, ke lé bo tééti êgi toomwo pwopwaaden. Lé bo pé kojaeng ati nina eten, ke lé bo pwo me tice naamuun. Lé bo wii a één, ke lé bo tahi da pwo miû ni nehin.

¹⁷ «Lé wonaa, beme lé pacuwohi a bwo niimihinaado te Padué. Be weeng kuti na e ne a bwo niimihi nen naa, he ni pwonimelé, beme lé tai piténéle, me lé ne te pa iténaado ni pwodaame telé. Ke o wonaa dieli ha ace bwo pacuwohi ati na ali e caa mi pii wo Padué.

¹⁸ «Mepwo é ne ko ê toomwo naa, na go alieng, ke a pwomwo na junihe ubwo na e pihuôhi ati ni daame pwo bwohemwo.»

† Ni cuwo nahi juwole na 7—A ocine ko a pwomwo ubwo Rome, na bahi ne pwo ni nahi juwole na 7. Lépwoli 7 daame, ke wieli ce béé daame (empereur) nelang. †† 17.12 Daniel 7.7,24 ‡ Cuwo benaamwon na time uce bwali—Grek: A inetéale na te ju céiu. †† Lé o tai piwéden me weeng—ai Lé o mu me weeng. †† 17.16 Pii Beetihi 18.8

7 pwooti ko babulona <ζ>

(Pwahamii tii: 18)

18 É alecehe ninaa, ke é ali mwo pa céiu *âcélo na e opé mu he miiden, ke ne ten a junuun na ubwo. Ke pwéélang pitihhi a bwohemwo *a wâé ten.

E tautieng wo Padué

1 <ζ> O tupwo Babulona

² ††Ke e toii da pie ††:

«E caa tupwo, e caa tupwo ali pilehe *Babulona.

É jena, ke lé caa mu lang ne ni iténaado.

Caa a ataduwo te ni jenen na ta, ke ni toto meni na *mwiihi.

³ Be e pwo me lé ûdu

a tabe megele ten

na ati ni bele

ke ni daame pwo bwohemwo.

Ke lé pipule hauli me weeng.

Ke pwo naamuu

ni a-icu pwo bwohemwo

mu ko ni huô ten na ta.»

2 <ζ> Te junihe ubwo a kuhinaado ten

⁴ †Ke é téné a céiu pwocihe bé mu he miiden, na e pii pie:

«Go wie koja Babulona,

wogo a bele tong,

beme time go bo uce mu

he ni huô ten na ta,

ke me time go uce picani

ne he ni apwohi na ubwo

na é bo ne ten.

⁵ †Éa, ni ta pwo ten,

ke pitahipwon die he miiden.

Ke wo Padué,

ke time e uce pineuhi

ni ta pwo ten.

⁶ ††Wâé heme pwocuhinaado ten

âcehi ati nina e pwo.

Ne ten aceli junihe ubwo

koja ana e pwo.

Paobaanihi a mwoûdu ten.

††† 18.2–3 Ésaie 13.21, 21.9, 34.11–14; Jérémie 50.39; Pii Beetihi 14.8 ††† Wieli a bécéiuhé pwooti ko Babulona, ke e mu ha a pwahamii tii 17. § 18.4 Ésaie 48.20; Jérémie 50.8, 51.6,45; 2 Korénit 6.17 †† 18.5 Genèse 18.20–21; Jérémie 51.9 ††† 18.6 Psaume 137.8; Jérémie 50.15,29; 2 Tésalonik 1.6

Be e ne a tabe megele ten
 [beme e pwotahi ne ko ni bele].
 Paobaanihi beme e te ûdu mwo
 [ke me te nihe cunu nang kon].
 7 †Te nihe eânimen ko a wâé ten,
 me ni naamuunaado.
 Ne mwo ten ni picani,
 me ni doole tahagéi.
 Be e pipii den pie:
 “É tebwó pwo a atebwó
 he toomwó daame,
 ke time é o uce depwele,
 ke time o uce piwahin jo.”
 8 ††É mu ko anaa,
 ke weengi ni apwohi me den:
 O tupwó ne huîin a mele,
 ke a piwahin, ke a menele,
 ha a tan na te céiu,
 ke o éle nang ko a miû.
 Éa, pwojunuu Padaame Padué
 na e tautieng.»

Lé é niimieng ne ni apulie

3 <Ç> Lépwó daame

9 †Lépwó daame pwo bwóhemwó, na lé pipule hauli
 me weeng, ke lé téele ne kon, mu ko ni naamuun na te
 junihe ubwó. Ke heme lé bo alihi a muu a miû na éle
 nang kon, ke lé bo é, ke pihemun ne ko a pwomwó ub-
 wo naa. 10 Ke lé bo cuwo ité kojaeng, be bwó mwotilé
 ko ni picani na e mu hen. Ke lé bo pii pie:
 «Mwoli Babulona!
 Mwolihi a pwomwó ubwó!
 Tanahí me tieeng ††,
 ha a inetéale na te ju céiu!»

4 <Ç> Lépwó api-icu

11 ††Lé é niimieng, me pihemun wo lépwó api-icu éni
 pwo bwóhemwó, be caa tice apulie celi me lé pwocuhi
 ni âicu telé. 12 †††[Be weeng na e mu pwocuhi ati ni naa-
 do] na te junihe ubwó ni cuhin, na lé mu icuhi:
 Ni mwani megele, me ni mwani pwojo;
 Ni péi na te junihe ubwó ni cuhin;
 Ni toto mwaanu na te junihe wâé;
 Ni ba-acuwo na ûde wâé;
 Ni naado na pwo ko ni béokéé te ni éléphant†††;
 Ni naado na pwo ko ba-acuwo;
 Ni toki na mwoiu;
 Ni péi na pwojo na te junihe wâé †;

† 18.7 Ésaie 47.7–9†† 18.8 Pii Beetihi 17.16‡ 18.9–10 Ézékiel
 26.17, 27.30–35†† Tanahí me tieeng—Grek: Tautiko. †† 18.11
 Ézékiel 27.36 ††† 18.12 Ézékiel 27.12,13,22 ††† Béokéé te ni
 éléphant—Défenses d'éléphant, Ivoire. † Péi na pwojo na te junihe
 wâé—Marbre.

13 Ni toto tabe ûde, me ni eti na ûde wâé;
 Ni wie acuwo na ûde wâé heme nye cini;
 Ni tabe megele, me géréén, me *farine*, me *blé*;
 Ni paaci, me muto, me haricaan, me otuun;
 Ni *apenem tice ja kon.

5 <Ç> Lépwó pwo mwani telé

14 Lé pii te a pwomwó ubwó wo lépwó a-icu pie:
 «Ati ni âicu na nimem kon,
 ke caa tieden mu pelem.
 Ati ni naamuunaado na wâé,
 ke caa tice dem kon.
 Ati ninaa,
 ke time go bo uce tooli mwo!»

15 ††Lépwó a-icu na pwo delé, ko a bwó icu ha a pwom-
 wo ubwó naa, ke lé o cuwo ité kojaeng, ko ni bwó
 mwotilé ko ce picani celi e o mu hen, ke lé bo é me pi-
 hemun. 16 †††Ke lé bo pii pie:
 «Mwoli Babulona!
 Weeng na e cuwohe
 ali mwaanu megele pun,
 ke te junihe wâé,
 ke ubwó a cuhin.
 Ke oba nang ko mwani megele,
 ke ni péi na pwomelaan.
 17 ††É he na te ju céiu inetéale,
 ke te jan me tai tanahí
 ati ni naamuunaado naa!»

6 <Ç> Lépwó a-engen pwo ong

Ati ni apihuô pwo ong, ke nina lé engen pwo ong, ke
 ni apenem, me lépwó awoli ikua, ke lé caa mu ité ko-
 jaeng.

18 ††É he lé alihi a muu a miû na éle nang kon, ke lé
 toii da pie: «Mwo te tice ace pwomwó ubwó celi
 pwohewii a pwomwó ubwó ce!»

19 ††Ke lé o é me pihemun, ke lé tahi muu pule ne he
 ni punilé [ko ni bwó téé jélé]. Ke lé o wiikau ko pii pie:
 «Mwoli Babulona!
 Mwolihi a pwomwó ubwó naa,
 be te junihe pwo naamuu
 ati nina pwo ni ongelé he jíé.
 Ke é he na te ju céiu inetéale,
 ke tanahí ati ninaa!»

20 ††Miiden, go pipwodéén!
 Caa tanahí a pwomwó ubwó!
 Geé pipwodéén mwo,
 wogewé ni apulie te Padué,
 ni *apostolo, ke ni péroféta!

†† 18.15 Ézékiel 27.31,36 ††† 18.16 Pii Beetihi 17.4 †† 18.17 Ésaie
 23.14; Ézékiel 27.27–29 ††† 18.18 Ézékiel 27.32 †† 18.19 Ézékiel
 27.30–31 †† 18.20 Deutéronome 32.43; Ésaie 44.23; Jérémie 51.48

Éa, be e caa tautieng wo Padué
ko ni ta na e pwo tewé.

Bénebwéne pwooti kon

7 <Ç> O time bo uce alieng mwo

²¹ †Ke é ali pa âcélo na te junihe pwojunuun, na e pé a péi na te junihe ubwo ††, ke e tahi ne he jíé, ke e pii pie: «O wonaa ace bwo pabetii Babulona, a pwomwo na te junihe ubwo, ke o tahi taabwonieng. Ke time genye bo uce alieng mwo. ²² †Ke time genye bo uce téne mwo, ce pati gitar, me ce pwocuu oopwé, me ce pwocuu tutu. O te tice pace apenem ko ba-acuwo me toki celi te ju céiu nang. Ke time genye bo uce téne mwo ce tihi bécemeii blé. ²³ ††Ke o caa time bo uce pwéélang mwo ce miû lang. Ke o caa time genye uce téne mwo ce pwocihe te pa apiaten me ê mwoden.

«[O pé kojako, go Babulona, ati ninaa, watihen ni huô tem na ta.] Be go pwohewii ni toomwo apwodooki ††. Be lé pwo me lé pipatieden ati ni bele wo lépwo a-icu tem, na caa junihe piubwo jélé ne pwo a bwohemwo ati.

²⁴ †††«A céiu mwo, ke tée ne pelem a cewéhe ni péroféta, ke a cewéhe mwo ni apulie te Padué, ke ati nina taunulé ne pwo bwohemwo †††.»

Nyebi ko piwéden ne he miiden

19 É alecehe ni naado naa, ke é téne a éénaado na pwohewii ni pwocihe te nina te junihe hiwon jélé, ne jeda he miiden. Lé toii da pie:

«Pwonyebi pipaunu Padaame!
Be e caa celuimikenyel
A den a wâé me a pipwojunuun!
² †Juuju ke mwomwon
ni tautinaado ten.

E pwocuhinaado
te ê toomwo pwopwaaden
na e pwo me alili a bwohemwo,
ko ni huô ten na ta.
Ke e pwocuhinaado ten wo Padué,
be e taunu ni eabwé ten!»

³ Ke lé toii daamwo ne nina te junihe hiwon jélé pie:

«Pwonyebi pipaunu Padué!
Be tee taa dieli mwo a muu a miû
na e cini a pwomwo ubwo!»

† 18.21 Jérémie 51.63–64; Ézékiel 26.21 †† A péi na te junihe ubwo—A bwopiinen he pwo grek pie: Pwohewii ace paaete celi ubwo. Omehi a déme mwohaii olive ha awieme tii. † 18.22 Ésaie 24.8; Ézékiel 26.13 †† 18.23 Jérémie 7.34, 16.9, 25.10 †† Go pwohewii ni toomwo apwodooki—Wieli a ocine ko a bwo ubwo ne ni pwonime ni apulie, ke ni bwo ne jéilé ne ko Padué. ††† 18.24 Jérémie 51.49; Pii Beetihi 17.6 ††† Wieli a pwooti te Ioane, pana e tii a tii ce, ai wieli a behi pwooti te pa âcélo. § 19.2 Deutéronome 32.43; Pii Beetihi 6.10

⁴ Ke wo lépwo 24 ukéiu, me ni âcélo na paa jélé na lé pwohewii ni wota, ke lé miibule, ke tidihi jililé he pwohamii Padué ne pwo a atebwo he daame ten, ke lé toii da pie: «Amen! Pwonyebi pipaunu Padaame!» ⁵ Pwo a pwocihe, na e âbé mu pwo a atebwo he daame, na e pii pie:

«Pwonyebi pipaunu Padué,
wogewé ati ni eabwé ten,
na geé pipaciitieng,
me céihi ne kon,
na ubwo gewé ke wahin gewé!»

E piaten wo pa Nahi Muto

⁶ ††Ke é téne a éénaado na pwohewii ni pwocihe te ce apulie celi te junihe hiwon jélé. Te junihe ubwo a tihin, pwohewii a éé a tabe pwobwaatéép †††, me a pwohuu te a tikekele heme e huu me ubwo, he lé ko pii pie:

«Aléluia! Aléluia!
E pihuô wo Padué,
Padaame henye!
Te junihe pwo niihen
ne ko ati ni naado!
⁷ ††Genye tai pipwodéén
me pituume,
ke genye pipaunueng!
Be, é jenea, ke e piaten
wo pa *Nahi Muto.
Ke e pipwopweeng
ê toomwo na e pipégalieng
me ê mwoden.

⁸ Caa ne ten a epwénen,
na a mwaanu elélowo
na pwomelaan,
na tice alili hen.»

A mwaanu elélowo, ke ni penem na wâé, na lé muko pwo ne ni apulie te Padué.

⁹ †††Ke e pii tong wo pali *âcélo pie: «Go tii pie: “*Adéi nina todelé ne ko a piwiinaado ko piaten de pa Nahi Muto.”»

Ke e pii mwo pie: «Juuju ni pwooti naa, be ni pwooti te Padué.»

¹⁰ ††Ke é tidihi jiling he pwahamii pali âcélo beme é pipauueng. Ke e pii tong pie: «Ûhu! Go nemwo wonaa, be wogenyu, ke tai lupwo eabwé te Padué, pwohewii ni béénye na lé *pajuujuhi pie, woélé ni apulie te Iésu ††. Te wo Padué cehi na me go pipaunueng. Éa, ati lépwona lé pajuuju Iésu, ke e mu kolé a *Jenen Iitih na e

§† 19.6 Pii Beetihi 14.2 §†† Pwohewii a éé a tabe pwobwaatéép—ai Pwohewii ni jíé na junihe ubwo. §† 19.7–8 Ésaie 61.10; Pii Beetihi 21.2 §†† 19.9 Mataio 22.2–3 §† 19.10 Apostolo 10.25,26; Pii Beetihi 22.8–9 §† Na lé pajuujuhi... ai Nina lé te cumang ha a juuju, na e habwii wo Iésu.

mu ko lépwo péroféta, ke e ne me lé patemehi a pwooti te Padué †.»

pwonehi a bwohemwo: @ 7 naado na e alihi wo Ioane <η>

(Pwahamii tii: 19.11—21.8)

1 <η> Pa atebwo pwo a haricaan pwojo

¹¹ ††É alecehen, ke é alihi a miiden he tehi, ke é alihi a haricaan na pwojo. Ke pwo pa apulie na e tebwo pwon, na pii kon pie ‘Mwomwon ke Juuju’. Be mwomwon ke juuju a bwo tauti ne ni apulie ten. Ke e tauti ke e pwopa ko a mwomwon. ¹² †Ni naamiin, ke pwohewii ni duwele miû, ke hiwon ni kuron pwo punin. Pwo a nii apulie na tii ne kon, na te tice pace apulie celi e temehi. Te weeng cehi na e te temehi. ¹³ ††Ke e cuwohe a epwén na timi ko cewéle. Ke a niin pie: ‘Pwooti te Padué’.

¹⁴ Lé âcén ne ni mwocoda he miiden, pwo ni haricaan na pwojo. Ke te ju elélowo ni epwénéle, ke te ju pwojo ehi.

¹⁵ ††E wie pwon a teua na te junihe ânyee, beme pwocuhinaado te ni bele. Ke e bo pihuô me mwoiu ko a bwaja toki. Ke e bo caagetilé pwohewii a bwo caageti ne ni ace tabe megele. Weengaa a pwo-okéé ko Padué, na te junihe pwojunuun. ¹⁶ ††Ke é pwo a epwénen, ke é pwo a pan †††, ke tii ne pwon pie:

Pa Apihuô te ni apihuô,
ke e Daame he ni daame.

2 <η> A meni bwaaoléé me a pa

¹⁷ †Ke é ali pa âcélo, na e cuwo ha a téale. Ke e ko toii da céii ni meni bwaaoléé, na lé ko téé ko miiden pie: «Geé âbé ne ko a piwiinaado ubwo na e piwâamihi wo Padué me dewé. ¹⁸ Geé âbé, beme geé wii a mehi ni daame, ke a mehi ni caa te coda, ke a mehi nina pwo niihelé, ke a mehi ni haricaan, me nina lé tebwo pwon. Geé wii a mehi ni apulie ati: ni *apenem tice ja kon me nina time uce ni apenem tice ja kon; ni apulie na piubwo jélé me nina piwahin jélé.»

3 <η> Imwi pa iténaado me pa péroféta agele

¹⁹ Ke é ali pa iténaado me ni daame pwo bwohemwo, he lé ko pitapitihii ni mwocoda telé, beme lé pipwopa

ne ko pali e tebwo pwo ali haricaan pwojo, me a mwocoda ten.

²⁰ ††Ke imwi pali iténaado me pali péroféta agele. Weeng kuti pali e pwo li *pipwojunuun me de pali iténaado, beme e pipwohuô te li apulie, li lé hegi a ine pali iténaado, ke lé pipaunuhi a démen.

Ke lé tahilu ne ha a jié miû, he lu mwo teko mulie, beme e cinilu na a dep na éle. ²¹ Ke tai taunu ati lépwoli apwopa telu, ko ali teua li e wie mu pwo pali e tebwo pwo ali haricaan pwojo. Ke ni bwaaoléé, ke lé tai wii, ke pwoluu jélé ko ni mehi li apulie.

4 <η> Cie Caatana he na 1000 ni jo

²⁰ ††É alecehen, ke é ali pa *âcélo na e opé mu he miiden. Ke e pé ne he in a kilé ko a pwon na te tice anebwén kon, me a itihe toki na te junihe ubwo. ² ††Ke e imwi ali dragon. A dragon naa, ke pa bwien he ni bécéiuhe tan, a niin pie ‘pa apipé ne kon’, ai wo *Caatana, ‘pa acubwonikenye’. Ke e cieng wo pali âcélo he na 1000 ni jo. ³ Ke e tahieng ole ha ali pwon li te tice anebwén kon †††, ke e kiléhi bwonieng ne ha ali pwon, beme time e bo uce pipwohuô mwo te ni bele, ânebuhe a anebwén ko ni jo na 1000. Ke é alecehe anaa, ke bo tuwoeng mwo, ha a cuwo benaamwon.

⁴ ††Ke é alihi ni atebwo he daame. Nina lé tebwo pwon, ke lé hegi a mwomwon me lépwo atautinaado. Ke é ali mwo lépwona taunulé. Weengi a watihen me taunulé: Be woélé lépwo apajuuju Iésu, ke lé pipate-mehi a pwooti te Padué. Time lé uce pipaunuhi pa iténaado me a démen. Ke time lé uce hegi a inen ne pwo bwaadelé, ai é ne ko ni ilé. Be e caa pamulipilé mwo wo Padué mu ha amele, ke lé caa daame me Kériso he na 1000 ni jo.

⁵ Be woélé lépwo bécéiuhen na e pwiilé wo Padué mu ha awieme ni amele. Ni béé amele, ke time lé o uce mulie cemwo mu ha amele ânebuhe a anebwén ko ni jo na 1000. ⁶ ††Lé te junihe pipwodéén ne ni bécéiuhe amele, be e caa pwiilé mwo wo Padué, be eâni-men delé. Ke a béalohe mele †††, ke te tice mwomwon den ne kolé. Ke lé o pipwoeabwé te Padué me Kériso. Ke lé o daame me Kériso he na 1000 ni jo.

5 <η> Tahi Caatana ne ha a miû

⁷ Hemepie bo caa nebwén ni 1000 jo, ke wo Caatana, ke bo pawieeng mwo mu he karépu. ⁸ †††Ke e o engen pitihii a bwohemwo, beme e â pipwohuô te ati ni bele pwo bwohemwo, a bwopiinen pie Gog me Magog †††.

† Dernière phrase—ai A juuju na e habwii wo Iésu, ke a juuju na e pamwoiu lépwo péroféta, beme lé pipatemehieng. †† 19.11 Psaume 96.13; Ésaïe 11.4; Pii Beetihii 1.5, 6.2 † 19.12 Daniel 10.6; Pii Beetihii 1.14, 2.17 †† 19.13 Ésaïe 63.1—3; Ioane 1.1, 14 †† 19.15 Psaume 2.9; Pii Beetihii 1.16, 14.20 ††† 19.16 Pii Beetihii 17.14 ††† É pwo a epwénen, ke é pwo a pan (cuisse)—Wielé é pwo a epwén na tawii lupwo pan. † 19.17 Ezékiel 39.17—20

†† 19.20 Pii Beetihii 13.12—17, 20.10 ††† 20.1 Pii Beetihii 9.1 †† 20.2 Genèse 3.1; Pii Beetihii 12.9 ††† Pwon li te tice anebwén kon—Omehi note †† 20.4 Daniel 7.9, 22, 27; 1 Kórénit 6.2; Pii Beetihii 13.17 †† 20.6 Pii Beetihii 1.6 ††† A béalohe mele—Omehi a niide a tii 14. ††† 20.8 Ezékiel 38.2, 9, 15—16 ††† Gog me Magog—A inenaado ko lépwona lé cubwoni Padué. Omehi Ezékiel pwahamii tii 38 me 39.

Ke e neibulé, beme lé pipwopa [ne ko Padué, me ni apulie ten]. Ke te junihe hiwon jélé koja ni won jeoté ti-cepwon [ke pwocoon me nye pinelé].

⁹ †Ke lé â ati pwo a bwohemwo, ke lé mu aujehi a apimu ibu te ni naî Padué: a pwomwo ubwo na te junihe eânime Padué kon. Ke e opé mu he miiden a miû te Padué, ke e te cini ati kuti a bele na e neibuhi wo Caatana.

¹⁰ ††Ke mepwo é ne ko Caatana, pali e pipwohuô telé, ke tahieng ne ha a jié miû me a dep na éle, pele pali iténaado me pali péroféta agele. Ke lé o te junihe picani bwén ke pwang, dieli mwo.

6 <η> A bénebwéne tautinaado

¹¹ É alecehen, ke é alihi a atebwo ubwo he daame na te ju pwojo ati. Ke pwo pa apulie na e tebwo pwon. Ke tieden a miiden me a bwohemwo ne he pwahamiin, ke caa time genye bo uce alilu mwo. ¹² †Ke é ali ni apulie na lé caa mele, nina pwonaado ne kolé ke nina pitice-naado ne kolé, he lé ko cuwo ânebuhe ali atebwo he daame.

Ke tehi a tii ko [ni apulie na lé bo hegi] *a ju mulip dieli mwo. Ke pwo ni béé tii na tehi mwo, na tii ne hen ati ni bwomu te ni apulie. Ke tauti ni amele, âcehi ana tii ne he ni tii naa. ¹³ ††A jié, ke e ne mwo nina lé mele ne he jié. A mele, ke a amu te ni amele, ke lé ne mwo ni amele na lé wélilé. Ke tai woélé, ke tai tautilé, ne he nina lé mu ko pwo. ¹⁴ Ke a mele, ke a amu te ni amele, ke tai tahlilé ne ha a jié miû. A jié miû, ke a béalohe mele. ¹⁵ ††Ke mepie pwo ace apulie celi time uce tii a niin ne ha a tii ko a mulip, ke o tahieng ne ha a jié miû.

7 <η> A miiden me a bwohemwo @ na mwo coho

21 ††É alecehen, ke é alihi a miiden me a bwohemwo na mwo coho. Be caa tieden a bécéiue miiden me a bécéiue bwohemwo, ke caa tieden mwo a jié. ² ††Ke é alihi a pwomwo ubwo iitihî, a *Iéruusaléma na mwo coho, he e neopé mu he miiden wo Padué. E te junihe pipwopweeng, pwohewii êce toomwo celi e pipwopweeng ne ko pa aiu hen, beme lu piaten. ³ †Ke é téne a pwocihe na ubwo na e âbé mu pwo a atebwo he daame, na e pii pie:

«É jena, ke wo Padué,
ke e ha awieme ni apulie.

Ke lé o caa bele ten.
Ke e o caa mu pelelé,
ke o caa Padué helé.

⁴ ††Ke e bo tahi ati ni tabehaamiilé.

Ke caa tieden a mele,

ke caa tice téé me picani.
Be caa tieden ni naado bwolihi.»

⁵ ††Ke e pii wo pana e ko tebwo pwo ali atebwo he daame pie: «Geé alihi! Be é pemihî ati ni naado me tai coho.»

Ke e pii mwo pie: «Go tii, be juuju ke mwomwon ni pwooti tong.»

⁶ ††Ke e pii tong mwo pie: «Caa tai cuwo ati! Be woéo, ke é *Alfa*, ke é *Oméga*; woéo, na é atabuhî kon, ke é anebwén kon. Wo paceli nimen me e ûdu, ke é bo ne ten me e ûdu a tabe na te tice cuhin: a tabe he a acaamatabe ko a mulip. ⁷ ††Ke é bo ne te lépwona lé piwéden ati ni *adéihî naa. Ke é bo Dué helé, ke lé bo naîng.

⁸ ††«Ke mepwo é ne ko ni béén [ke é bo pwocuhinaado telé] ††:

Nina mwotilé me lé pwo celi wâé;

Nina muhi telé me lé céihî;

Nina lé gele;

Nina mwiihî ni bwomu telé;

Nina lé pipule hauli;

Nina lé pitaunulé;

Nina lé pwodooki;

Nina lé pipaunuhî ni *déme duéé.

«Ati ni apulie naa, ke o tahlilé ne ha a jié miû, me a dep na éle. Be weengaa a béalohe mele te ni apulie naa.»

A Iéruusaléma na mwo coho

⁹ É alecehen, ke e âbé beniéo wo pa céiu béé lépwoli 7 *âcélo, li lé pé li mwotabe li oba ko li 7 bénebwéne apwohi li ubwo. Ke e pii tong pie: «Go âbé, me é habwii tem ê ewa toomwo na e caa pipégalieng wo pa *Nahi Muto me e mwoden.»

¹⁰ ††Ke e âbé kong a *Jenen Iitihî, ke e pééo da pwo a juwole na te junihe ubwo, ke te junihe bwali. Ke e habwii tong a pwomwo ubwo iitihî Iéruusaléma na e neopé wo Padué mu he miiden. ¹¹ ††Ke pwéélang kon *a wâé te Padué. Ke pwomelaan pwohewii a péi na te junihe ubwo a cuhin, pwohewii a péi na pun bupwi, na te junihe piniêdiihî pwohewii a kéle. ¹² ††Ni goomwa babé, ke te junihe bwali, ke tabo. Ke 12 ni pomwa kon, ke 12 ni âcélo na lé wéihî. Ke tii, ne ko ni pomwa, ni nii ni 12 pwomwoiu te a bele *Isaraéla. ¹³ Cié ni pomwa he ni piduaan: cié he na e taa tuie lang a téale, ke cié he na e nuule lang na a téale, ke cié ne he pwon, ke cié ne

§ 21.3 Lévitique 26.11,12; Ézékiel 37.27; Zakari 2.14; 2 Korénit 6.16

† 21.4 Ésaie 25.8, 35.10, 65.19; Pii Beetihî 7.17 †† 21.5 2 Korénit

5.17 †† 21.6 Ésaie 55.1; Jérémie 2.13; Ioane 7.37; Pii Beetihî 1.8,17,

22.17 ††† 21.7 2 Samuel 7.14; Psaume 89.27–28 †† 21.8 Mataio

25.41; Ébéru 10.38–39; Pii Beetihî 20.15, 22.15 †† Time uce a

pwooti te lépwona nimelé me lé piténede Padué kehe icehi ana lé

tupwo, ke pwo nina ta he ni béé benaamwon. A pwooti te lépwona

lé jéilé ne ko Padué die ha a pwonehin. ††† 21.10 Ézékiel 40.2

††† 21.11 Ésaie 60.1–2,19 ††† 21.12–13 Ézékiel 48.30–35

† 20.9 2 Rois 1.10 †† 20.10 Psaume 11.6; Pii Beetihî 19.20, 21.8
‡ 20.12 Daniel 7.9–10; Mataio 25.31–46; Apostolo 17.31; 2 Korénit
5.10; Pii Beetihî 13.8 †† 20.13 Roma 2.6; 1 Pétéru 1.17; Pii Beetihî
2.23, 22.12 ††† 20.15 Psaume 69.30 ††† 21.1 Ésaie 65.17; 2 Pétéru
3.13 ††† 21.2 Ésaie 52.1, 61.10; Ébéru 11.16, 12.22; Pii Beetihî 3.12

cehimwa. ¹⁴ Ni goomwa babé, ke ne a paan pwo ni péi na 12. Ke ni péi na 12 naa, ke e pwon ni nii ni 12 *apostolo te pa Nahi Muto.

A ja ko a pwomwo ubwo

¹⁵ †Ke e pé a béja a womeéle na mwani megele wo pa âcélo na gemu picuhe, beme e jahi a pwomwo ubwo, ni pomwa kon, ke a babé kon. ¹⁶ Ke te ju piwie jame ni goomwa he ni piduaan na paa. Ke e jahi ko ali béja womeéle, ke te tai 12000 ni jame ni piduaan nge hemwo, ke é da ko miiden ††. ¹⁷ Ke e jahi li goomwa babé, ke e pwo 144 béja ‡. Be e te jahi ko a béja te ni apulie wo pali âcélo.

¹⁸ ††Ni goomwa babé, ke pwo ko ni péi na te junihe ubwo a cuhin, na pun bupwi. A pwomwo ubwo, ke mwani megele, na te junihe piniêdiihi pwohewii a kéle. ¹⁹ Ni péi paa a babé kon, ke lé pwonaamuun ko ni péi na te junihe ubwo a cuhin, ne he ni muko pétaapwo bwomunen:

- A bécéiuhe péi paan, ke pun bupwi;
- A béalohen, ke pun;
- A béciéhen, ke pihiwon ni apunen;
- A bépaahen, ke pun bupwi ke pun miiden;
- ²⁰ A bénim hen, ke megele pwohewii a cewéle;
- A bé6 hen, ke megele bwiile;
- A bé7 hen, ke pun bupwi pwojo;
- A bé8 hen, ke muuéi pwojo;
- A bé9 hen, ke nyen;
- A bé10 hen, ke nyen pun bupwi;
- A bé11 hen, ke megele nyen;
- A bé12 hen, ke muuéi.

²¹ Ni 12 pomwa, ke ni *perle* na 12. Ke ni muko pétaapwo pomwa, ke te pwo ko a *perle* na te céiu. Ke te ju mwani megele a apimu ibu te ni apulie, ke pwéélang pwomelaan.

Pwéélang a pwéélang de Padué

²² Kehe time é uce alihi ace *mwaiitihi, be a mwaiitihi ten, ke wo Padaame Padué na pwojunuun ne ko ati ni naado, me pa Nahi Muto. ²³ ††Ke a pwomwo ubwo, ke caa time e uce hane a pwéélang ko a téale, me a wole. Be a wâé te Padué, ke caa te pwéélang kon. Ke wo pa Nahi Muto, ke a pwéélang den. ²⁴ †††Ke lé bo mulie ha a pwéélang ko a pwéélang den na ati ni bele. Ke ni daame pwo bwohemwo, ke lé bo pé ngen ati ni wâé telé. ²⁵ †††Ke o caa time uce capuhi ni pomwa ten, be o

† 21.15 Ézékiel 40.3; Pii Beetihi 11.1 †† 12000—A ocine ko a bwo pimu ibu te Padué me ni apulie ten. 12000 = 3 x 4 x 1000. 3 = numéro te Padué (Caa, me pa Naïn, me a Jenen Iitihii); 4 = ni 4 piduaan nord, sud, est, ouest

‡ Béja—Coudée: demi-mètre. (A jame a i pa apulie, mu ko ni mwodéin, die ko ni juluuin.) †† 21.18–21 Ésaie 54.11–12

caa time uce bwén hen. ²⁶ Ke ni bele pwo bwohemwo, ke lé bo pé ngelang, ati ni naamuulé me ni wâé telé.

²⁷ †Te tice ace céiu naado celi mwiihi, celi e o taa ha a pwomwo ubwo naa. Ke time lé o uce taa lang ne ni apulie na mwiihi ni huô telé, ke lépwo agele. Kehe te icehi nina caa tii ni niilé ne ha a tii ko a mulip te pa Nahi Muto.

A éémwa na e ne a mulip

22 ^{††}É alecehen, ke wo pali *âcélo, ke e habwii tong a éémwa na e ne a mulip. Te ju bwakenu, na e tété mu ko a atebwo te Padué, me pa *Nahi Muto, ² ††† ha awieme a apimu te ni apulie ati ne ha a pwomwo ubwo. Ke é ko lupwo jije éémwa, ke e cuwo lang a acuwo ko a mulip. Ke e ne ni acehin, he na 12 ni wole ha a jo. Ke ni madihin, ke lé pwo me etihelé na a bele. ³ Ke o caa te tice apwohi.

Ke o caa e ha a pwomwo ubwo a atebwo te Padué me pa Nahi Muto. Ke lé bo pipaunu Padué wo lépwo eabwé ten. ⁴ ††Ke lé bo alihi a pwahamiin. Ke a niin, ke o bo tii ne pwo ni bwaadelé. ⁵ †††Ke o caa te tice bwén, ke o caa te tice apulie celi lé hane me pwéélang kolé, ce mwomiû, ai a pwéélang ko a téale. Be wo Padué, ke e bo pwo me pwéélang ko ni eabwé ten a pwéélang den, ke lé bo daame dieli mwo.

Bénebwéne pwooti

⁶ ††É alecehen, ke e pii tong wo pali âcélo pie: «Ni pwooti ce, ke mwomwon, ke juuju. Ke e ne a *Jenen Iitihii te ni péroféta wo Padaame Padué. Ke e pahede pa âcélo ten, me e â habwii te ni eabwé ten, nina e o caa tuie.»

E mwojuia cemwo wo Iésu

⁷ ††E pii wo Iésu pie: «Geé téne, é o caa âbé!»

*Adéi pa apulie na e piténedehi ni pwooti te Padué na e ha a tii ce!

⁸ †††Woéo Ioane na é alihi ke é téne ni naado naa. Ke me é caa nebwen ko téne ke alihi ni naado naa, ke é tidihii jiling ko ni a pali âcélo na e habwii tong ni naado naa, beme é pipaunueng.

⁹ Kehe e pii tong wo pali âcélo pie: «Ûhu! Go nemwo wonaa, be woéo, ke te pa eabwé pwohewiiko, pwohewii ni béé péroféta, ke pwohewii mwo nina lé ténedehi ni pwooti na e ha a tii ce. Te wo Padué cehi na me go pipaunueng.»

¹⁰ Ke e pii tong mwo pie: «Go nemwo cile me dem ce-hi, ni pwooti te Padué na élé ha a tii ce. Be caa e

†† 21.23 Ésaie 60.19–20; Pii Beetihi 22.5 ††† 21.24 Ésaie 60.3,5 ††† 21.25 Ésaie 60.11 § 21.27 Ésaie 52.1; Ézékiel 44.9; 1 Korénit 6.9–10 §† 22.1 Ézékiel 47.1 §†† 22.2 Genèse 2.9; Ézékiel 47.12; Joël 4.18; Zakari 14.8 §† 22.4 Mataio 5.8; Pii Beetihi 3.12 §†† 22.5 Daniel 7.18,27; Pii Beetihi 5.10, 20.6, 21.23,25 §† 22.6 Pii Beetihi 1.1 §† 22.7 Pii Beetihi 1.3 §†† 22.8 Pii Beetihi 19.10

mwonu a tan, na e o caa pacuwahi ati ninaa wo Padué.

¹¹ †«Wo pana ta nang, ke wâé heme e te cuwo ko pwo ana ta! Ke wo pana wâé ten me e te cuwo ko pwo ana mwiihi, ke wâé heme e te cuwo ko pwo ana mwiihi! Ke wo pana wâé nang, ke wâé heme e te cuwo ko pwo ana wâé! Ke wo pana e mulie me de Padué, ke wâé heme e te cuwo ko mulie me de Padué!»

Woéo na é atabuihi kon ke é anebwén kon

¹² †E pii wo Iésu pie: «Go téne, be é o te ju téele âbé! Ke é bo pébé ni cemung. Ke é bo muko ne telé, ne he ni muko bwo penem delé. ¹³ †Woéo, ke é *Alfa*, ke é *Oméga*, pa bécéiuhen, ke pa bénebwénen, pa atabuihi kon, ke pa anebwén kon.»

¹⁴ †«Adéi nina lé puu ni epwénélé. Be o pwo mwomwon delé me lé wii a acehi a acuwo ko a mulip. Ke o pwo mwomwon delé me lé taa he ni pomwa ko a pwomwo ubwo. ¹⁵ Ke lé mu pwomwo ne nina lé mulie hauli, ke ni apwodooki, ke ni apipule hauli, ke ni ataunuhi apulie, ke nina lé pipaunuhi ni *dème duée, ke ni agele!

¹⁶ †«Woéo Iésu, ke é pahede pa âcélo tong, beme e â patemehi ninaa, me de ni acéihi. Ati ninaa, ke juuju. Be

† 22.11 *Daniel* 12.10 †† 22.12 *Ésaie* 40.10; *Jérémie* 17.10; *Pii Beetihi* 2.23 † 22.13 *Ésaie* 44.6; *Pii Beetihi* 1.8,17, 21.6 †† 22.14 *Genèse* 2.9, 3.22 †† 22.16 *Nombres* 24.17; *Ésaie* 11.1,10; *Roma* 1.3; *Pii Beetihi* 2.28, 5.5

woéo, ke pa piebehi a pwomwoiu te pa daame *Davita; woéo pa ceni pwopwometan, na é pé da a téale.»

¹⁷ ††A Jenen Iitih me ê Apiaten, ke lu pii pie: «Âbé!» Ke wo paceli e téne anaa, ke me e pii pie: «Âbé!» Ke me e âbé wo paceli nimen me e ûdu. Wo paceli nimen kon, ke e o hegi me tice cuhi a tabe na e ne a mulip.

Nemwo taatéhi ni âne a pwooti ce

¹⁸ ††Woéo Ioane, na é patemehi te ati ni apulie na lé téne ni pwooti na e ha a tii ce, pie: Mepie pwo pace apulie, celi e pibitehi ni pwooti na e ha a tii ce, ke wo Padué, ke e o pinebehi ni apwohi na ubwo na tii ne ha a tii ce. ¹⁹ Ke mepie e pétaabwon ace céiu naado mu he ni pwooti na e ha a tii ce wo pace céiu apulie, ke wo Padué, ke e o pétaabwon kojaeng a den mu ko a acehi a acuwo ko a mulip, ke a den mu ko a pwomwo ubwo iitih na tii ne ha a tii ce.

²⁰ †Wo [Iésu] pana e *pajuujuhi ni naado naa, ke e pii pie: «Éa, é o te ju téele âbé!»

Amen! Âbé, go Padaame Iésu!

²¹ Ke a wâé te Padaame Iésu, ke e bo mu pelewé ati!

Adéikewé!

††† 22.17 *Ésaie* 55.1; *Pii Beetihi* 21.6 ††† 22.18–19 *Deutéronome* 4.2, 13.1 § 22.20 *Pii Beetihi* 2.16